


Onorúgame nila  
ra'íchali



New Testament in Tarahumara, Western (MX:tac:Tarahumara,  
Western)

**Onorúgame nila ra'ichali**  
**New Testament in Tarahumara, Western (MX:tac:Tarahumara, Western)**

copyright © 2008 Wycliffe Bible Translators, Inc.

Language: Tarahumara, Western

Translation by: Wycliffe Bible Translators, Inc.

Tarahumara Baja [tac], Mexico

### **Copyright Information**

©Wycliffe Bible Translators, Inc. 2008

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Tarahumara, Western

©Wycliffe Bible Translators, Inc. 2008

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022  
5abd0d10-18f8-5f78-aab1-438647421555

## Contents

SAN MATEO . . . . .	1
SAN MARCOS . . . . .	49
SAN LUCAS . . . . .	79
SAN JUAN . . . . .	130
HECHOS . . . . .	168
ROMANOS . . . . .	225
1 CORINTIOS . . . . .	246
2 CORINTIOS . . . . .	265
GÁLATAS . . . . .	280
EFESIOS . . . . .	289
FILIPENSES . . . . .	296
COLOSENSES . . . . .	301
1 TESALONICENSES . . . . .	306
2 TESALONICENSES . . . . .	311
1 TIMOTEO . . . . .	314
2 TIMOTEO . . . . .	320
TITO . . . . .	325
FILEMÓN . . . . .	328
HEBREOS . . . . .	329
SANTIAGO . . . . .	346
1 PEDRO . . . . .	352
2 PEDRO . . . . .	358
1 JUAN . . . . .	361
2 JUAN . . . . .	367
3 JUAN . . . . .	368
JUDAS . . . . .	369
APOCALIPSIS . . . . .	372

## Regá Anime Osale Mateo Ruigá Chu'síligo Esukristo Jena Wijchimoba Asagá

*Jena ruwimela chieri níligo alué Esukristo rijimála 'we 'ya mochígame ta'chó ochérachi Esukristo*

<sup>1</sup> Jena apélichí uchú suwábaga ralámuli rewalá, alué napu Esukristo rijimála\* nílige, alué napu 'ya mochígame nílige Esukristo ta'chó ochérachi. Alué Rabí 'lige Abraámi abiena rijimála nile alué Esukristo, alué ralámulika 'we 'ya ejperégame nilechigó ta'chó ochérachi Esukristo.

<sup>2</sup> Alué Abraámika Isaki o'nola nile. 'Lige Isákika Akobo o'nola nile. 'Lige Akóboka Jurá o'nola nile 'lige alué Jurá chega rijimála o'nola nile. <sup>3</sup> 'Lige Juraka Páresi o'nola nile, 'lige abiena Sárachigó. Alué Páresi 'lige Sara eyélaka Tamari anilime nile. 'Lige Páresika Esromi o'nola nile. 'Lige Esrómika Arami o'nola nile. <sup>4</sup> 'Lige Arámika Amí-narabi o'nola nile. 'Lige Amí-narábika Naasoni o'nola nile. 'Lige Naasónika Salmoni o'nola nile. <sup>5</sup> 'Lige Salmónika Bosi o'nola nile. 'Lige Bosi eyélaka Rajabi anilime nile. 'Lige Bósika Oberi o'nola nile. 'Lige Oberi eyélaka Ruti anilime nile. 'Lige Obérika Isai o'nola nile. <sup>6</sup> 'Lige Isaika alué wa'lula Rabí o'nola nile. 'Lige Rabika Salomoni o'nola nile. 'Lige Salomoni eyélaka Uriasi anilime rió 'yula nile.

<sup>7</sup> 'Lige Salomónika Roboami o'nola nile. 'Lige Roboámika Abíasi o'nola nile. 'Lige Abíasika Asa o'nola nile. <sup>8</sup> 'Lige Ásaka Josapati o'nola nile. 'Lige Josapátika Joramí o'nola nile. 'Lige Jorámika Usíasi o'nola nile. <sup>9</sup> 'Lige Usíasika Jotami o'nola nile. 'Lige Jotámika Akasio o'nola nile. 'Lige Akásioka Esekíasi o'nola nile. <sup>10</sup> 'Lige Esekíasika Manasesi o'nola nile. 'Lige Manasésika Amoni o'nola nile. 'Lige Amónika Josíasi o'nola nile. <sup>11</sup> 'Lige Josíasika Jekoníasi o'nola nile 'lige alué chega rijimálichigó. 'Alige bamí o'tole alué sontalo Babilono mochígame alué ralámuli israelita, preso o'tole.

<sup>12</sup> 'Akinana napu 'lige ku sebasa alué ralámuli ku alé Israelí anilichí, Jekoníasika Salatiéli o'nola nile. 'Lige Salatiélika Sorobabeli o'nola nile. <sup>13</sup> 'Lige Sorobabélika Abiuri o'nola nile. 'Lige Abiúrika Eliakimi o'nola nile. 'Lige Eliakímika Asori o'nola nile. <sup>14</sup> 'Lige Asórika Saroki o'nola nile. 'Lige Sarókika Akimi o'nola nile. 'Lige Akímika Eliuri o'nola nile. <sup>15</sup> 'Lige Eliúrika Eleasari

o'nola nile. 'Lige Eleasárika Matani o'nola nile. 'Lige Matánika Akobo o'nola nile. <sup>16</sup> Akóboka José o'nola nile alué napu María 'yula nílige. 'Lige alué Mariáka Esusi eyela nile, alué napu Kristo anilime ju. (Kristoka aníame ju Onorúgame julárigame. Jípeko Esukristo anilime júkuru.)

<sup>17</sup> Makué naómana chojkégame nile alué Abraámi rijimála Rabí ta'chó ochérachi, 'lige Rabí ochérale. 'Lige alué Rabí rijimála abechigó makué naómana chojkégame nile. 'Liko alué ralámuli israelita 'ma o'tóleru alé Babilonia anilichí. 'Lige a'kinana alué simírasa uchéchigo makué naómana chojkégame o'chérale. 'Liko bijí ta'chó ochérale alué Kristo, alué napu Onorúgame júrale.

*Jena ruwimela churigá ochérligo Esukristo*

<sup>18</sup> Jipe 'la ruimé ne churigá ochérligo Esukristo: 'Mariaka tárigame nilekuru José 'yuga newímili nile, 'lige tabilé 'cho 'yuga gojchichí José alué María 'yuga, alué María 'ma wa'lú rojparale u'tátiri ajchágame nile rojparáchi, Onorúgame Alawala 'sile napurigá rojparámala alué María. <sup>19</sup> 'Lige José tabilé che ikísá nilele chu'símia. Alué Joseka uché bilé rió 'yuga gojchíligo mayele alué María. Tabiléchigo che aníleko, 'we a'lá ralámuli nile alué José, alué Joseka tabilé chojkila neraga che wánilile alué María. Alué Joseka tabilé najkile napurigá chijunámala alué María uché jaré ralámuli 'yuga. Alekeri tabilé che anínáilile, 'lige tabilé newima olale alué mukí 'yuga. <sup>20</sup> 'Lige 'we 'nátale alarigá 'simia, 'lige bilé rukó remule bilé santo ánjeli. 'Lige alué santo ánjeli anele alué José:

—Mué José, mueka Rabí rijimála júkuru, alué 'we 'ya bejtégame. Tase majawa newia alué María 'yuga. Alué napu ranélimili ju María, alueka pecha bilé rió ranala nímálagó, pe Onorúgame Alawala 'sile napurigá ochéramala alué u'tátiri. <sup>21</sup> Alué Mariaka bilé u'tátiri ranélimili júkuru, 'lige mueka Esusi anilime rewá ujchéмили júkuru. Esusi aníáká alueka aníame júkuru «alué napu ralámuli buinámili ju alé resítirichi.» Asiriga 'la alarigá nímala.

<sup>22</sup> Suwábaga alarigá ikile napurigá anílige Onorúgame. Alué rió napu ruyame nile napu Onorúgame anelé† regá anile:

<sup>23</sup> Bilé mukí tabilé 'wesi rió 'yuga asigá pe bi'neli asigá

rojparámala u'tátiri ajchágame nímala.

'Lige ochéramala alué u'tátiri,

'lige Emanueli anilime nímala.

Emanuélika pe aníame ju «Onorúgame 'la ramué 'yuga ajtí.»‡

<sup>24</sup> Napu 'lige José bujsasa, alarigá 'sile napurigá nulélige alué santo ánjeli alué napu

\* 1:1 E'nesi glosario «ancestor». † 1:22 E'nesi glosario «profeta». ‡ 1:23 E'nesi Isaías 7:14.

Onorúgame júlafe. 'Liko alué José 'ma o'tole María bo'né bejtélachi napurigá bo'né 'yula neraga. <sup>25</sup> Tabiléchigo 'yuga gojchile ko ta'chó ochérachi alué u'tátiri, 'lige 'ma ochérasa alué u'tátiri, Joseka Esusi anilime rewá ajchele alué u'tátiri.

## 2

*Jena ruwimela jaré rió 'we machime 'siligo alué u'tá Esusi e'nemia*

<sup>1</sup> Esúsika Beleni anilíchi ochérale, alé ejiro Jurea anilíchi. Esúsika ochérale napu'lige Erere wa'lula nulame kachi alé alué we'é bo'ígichi. 'Lige alé we'ká riógichi Rusaleni anilíchi sébale jaré rió so'pilí 'we machime. «Mago» anilime nile alué rió yolí ra'ichaga. 'Lige 'nákatu napu rayénali ma'chínime ju alé Rusaleni asiruga, aleka neraga jsile alué rió. <sup>2</sup> 'Lige alué ralámuli «mago» alé we'ká riógichi Rusaleni sébaga rukele alué wa'lula Erere:

—¿Koche ajtí alué wa'lula ralámuli jurío nuleme alué napu kulí ochérale? Alé 'nákatu napu rayénali ma'chínime ju jena Rusaleni asiruga aleka enágame etératuru bilé so'pilí, 'lige alué so'pilika pe ruyame ju 'ma ochériligo alué napu Wa'lula nímili ju. Alekeri jsirúpá ramué 'we a'lá nirániliga.

<sup>3</sup> 'Lige alué wa'lula Erere akisá alué ra'ichali, asíruga we'ká nátafe. 'Lige aminá uché jaré ralámulitiri alé Rusaleni mochígame asíruga we'ká 'nátalechigó alué ra'ichali akisá. <sup>4</sup> 'Lige alué wa'lula Erere suwábaga balé e'wélala bayele, 'lige aminami alué e'wélala Moisesi nila nulalí benírame abiena bayéleru. 'Lige rukele koche ochérimili nílga alué Kristo, alué napu Onorúgame julámili nílge. <sup>5</sup> 'Lige anile alué ralámuli:

—Alé Beleni anilíchi ochéramili ke, alé napu Jurea anilime ejiro ju. Alarigá osale alué napu ruyame nílge napu Onorúgame anélige, napu 'ya bejtégame nile. 'Lige regá anime osale:

<sup>6</sup> Alé we'ká riógichi Beleni anilíchi napu ju Jurea anilíchi ejiro, pe u'kabi riógame ju alé Beleni, 'wéchigo najtékame kéréko me'tagá suwábaga we'ká riógachi,

aléchigo ochérimili kame Wa'lula, alué napu ne'chí oyérame ralámuli israelita anilime

repúmili ju abé i'libeko.\*

<sup>7</sup> 'Liko alué wa'lula Erere alué ralámuli «mago» bayele. Alué Eróreka tabilé najkile napurigá uché jaré ralámuli machimela alué rió 'yuga ra'ichálíchi. 'Liko rukele chiéniko kachi ma'chíniliga alué so'pilí. <sup>8</sup> 'Liko alé we'ká riógichi Beleni júlafe, 'lige anele:

—'Mi alé Belénichi simáwagó alué u'tátiri e'nemia pala ajtigá. 'Lige 'la rewisúká alué u'tátiri, 'liko yati juláwaká bilé rió ne'chí ruyéniliga, néchigó simémpá alemi e'nemia, 'lige 'we a'lá niramia aminami. (Eróreka pe me'linálga anile alué u'tátiri.)

<sup>9</sup> 'Lige gepusa alué ra'ichali napurigá anílge alué wa'lula Erere, 'liko yati simíbale alué «mago». 'Lige uchéchigo siné etele so'pilí. 'Lige alué so'pilí re'pami rewigáchimi neraga enale, bajchabemi enale napu e'yénale alué ralámuli «mago», 'mi alemi enale napu asale alué u'tátiri. 'Lige asíbale alué so'pilí alé amóbami neraga napu asale alué u'tátiri. <sup>10</sup> Alué bakiá rió etesa alué so'pilí, asíruga ra'sálale. <sup>11</sup> 'Lige galírale sébaga etele alué u'tátiri a'bé bo'igó eyela ajtígichi María anilime. 'Liko chojkóbisiga jábale 'we a'lá nirame kórigá alué u'tátiri. 'Lige gajoni i'pule, alué gajónika pe e'karúgame mochígame nile kónilime asíruga najtefe. 'Oro kógile, 'lige aminami o'kuitiri, 'lige aminami bilé tábiri 'we a'lá suwé júkame «mira» anilime. <sup>12</sup> 'Lige okoka bi'tigá alué «mago», Onorúgame remule, 'lige remugichi anele tabilé simánilile ku napu asálige alué Erere. Alekeri ku ejperélachi simíbale, se'wí boichí simárale.

*Jena ruwimela José Ejipto o'tólgo Esusi júmisiga simíbaga*

<sup>13</sup> A'kinana napu'lige alué ralámuli «mago» ku ejperélachi simasa, José bilé santo ánjeli etele remuka. 'Lige alué ánjeli anele alué José:

—'Ma asísawa, yati simigá 'ma mutuka alué u'tátiri 'lige 'ma 'yúriwa mué upila, wamí Ejipto anilime we'é bo'ígichi simawa. Alé mochiwa napu'lige ne aní a'lige si. Eróreka alué u'tátiri 'yaga einámala me'linálga. Alekeri júmasawa jena mochiga.

<sup>14</sup> 'Lige José 'ma asísale 'lige u'tátiri mutule 'lige simile eyélatiri 'yuga, 'lige rukó júmasale, Ejipto simiba. <sup>15</sup> Wamí 'mi alé Ejipto mochile napusí Erere mukusá. Onorúgame 'ya anile alarigá ikimeo. Alekeri lakile napurigá osale bilé rió napu ruyame nile napu anélige Onorúgame. Regá anile: «Neka bayékuru ne inolá alé Ejipto ajtígachi.»

*Jena ruwimela Erere nulálgo me'liniliga suwábaga u'kuchítiri*

<sup>16</sup> Napu'lige alué Erere machisá alué ralámuli «mago» ku simíbalego tabilé ruigá, asíruga ayoga rejpile. 'Liko nulale me'liniliga suwábaga u'kuchítiri oká bamígame go'nágana, alé we'ká riógichi Beleni o'chérigame, 'lige aminami alé a'bemi we'ká riógichi o'chérigimetiri. Alué ralámuli «mago» bajchá etéligame so'pilí anilá 'ma oká bamí nilekuru, alekeri me'linálile u'kuchítiri alué Erere oká bamígame 'lige

\* 2:6 E'nesi Miqueas 5:2.

ta'chó oká bamime. <sup>17</sup> 'Lige alarigá sébali ikile napurigá osale alué rió napu ruyame nile napu Onorúgame anélige napu Jeremíasi anilime nile, regá anime osilí:

<sup>18</sup> Suwábaga alué ralámuli alé we'ká riógichi Ramá mochígame

asíriga akéturu 'we sewékame nalachi bilé mukí

alué mukí Rakeli† anilime asíriga nalá ajtigéturu

'kúchila na'temaka.

'Lige alué Rakeli tabilé najkíturu napurigá gu'íriwa,

alué u'kuchítiri 'máchigo suwílígime.‡

<sup>19</sup> Napu'lige Erote mukusá a'kinana, José etele remuka bilé santo ánjeli. Onorúgame nuleme nile alué santo ánjeli. 'Lige alué José Ejipto asale. 'Lige anele alué santo ánjeli alué José:

<sup>20</sup> —'Ma asísawa, 'ma ku 'yúriwa ye u'tátiri 'lige eyélatiri, 'ma ku 'mi simawa Israeli anilichi. 'Máchigo suwílígime alué napu ye u'tátiri me'linálime nílige. Alekeri jípeko 'la júkuru ku 'mi alé simalia.

<sup>21</sup> 'Lige asísale alué José 'lige u'tátiri o'tole 'lige eyélatiri ku 'mi alé Israeli anilichi.

<sup>22</sup> 'Lige napu'lige José machísá alué Erote inolá Arkelao anilime wa'lula karao alé Jurea anilichi ejiro, asíriga majale alué José, tabilé siminálile 'mi alé. 'Lige José remule Onorúgame. 'Lige Onorúgame 'we a'lá anele alué José napurigá Galilea anilichi ejiro 'lina simela, alekeri simile alué José alé Galilea anilichi ejiro. <sup>23</sup> 'Lige alé sebasa Nasareta anilichi we'ká riógichi simíbale ejperélimia. Alué 'ya mochígame ralámuli napu ruyame nílige, napu anele Onorúgame anile alé Nasarétihi bejtélimio alué Esusi. Anile «nasareno»§ anélime nímará Esusi.

### 3

*Jena ruwimela Juani, alué napu ralámuli rewaramé nílige, rejcholi ruwílígó bilena napu tabilé 'wesi galí jágame nile*

<sup>1</sup> A'kinana we'ká bamí alué Juani napu ralámuli rewaramé nílige, nawale alé Jurea anilime ejírochi napu ta'wesi galí jágichi nílige. 'Lige alé pee u'kume nile, 'lige ba'wí ename nile alé. 'Lige rejcholi ruwile alé sebasa. <sup>2</sup> Anilé:

—'Ma a'rewa alué chátiri 'nátili. 'Ma ku 'la na'tawa, 'máchigo pe 'we nawámili kame Onorúgame suwábaga ralámuli nulemia.

<sup>3</sup> Alué rió napu ruyame nílige napu anélige Onorúgame, 'we 'ya bejtégame nílige, alué napu Isafási anilime nile, alué 'sile osá alarigá nochamio alué Juani. Regá anime osale:

Bilé ne'ome akerúguru alé napu pee u'kume nile.

Regá e'wele ra'icháchane:

«Newiwa bilé bowé Wa'lula Onorúgame.

Newiwa bilé bowé 'la wajchígame.»\*

<sup>4</sup> 'Lige alué Juani o'páchalaka kameyo anilime ajágame gupala newárigime nile.

'Lige wi'chí wasíbaligame nile. 'Lige ojchí go'yame nile alué Juani, 'lige aminami ijampre ba'wila melalo go'yame nile, alué

napu jami nerúgame 'ínili. <sup>5</sup> 'Lige wami 'naka we'ká riógachika Rusaleni anilichika

jsile ralámuli alué rejcholi akimea, 'lige we'kaná riógichika jsile alé Jurea anilichi

ejiro mochígame. 'Lige abiena jsile uché bilena we'kaná riógame na'lebo 'nálige wa'lú

bakó bo'ígichi ejperégame, Jorani anilime bakó. <sup>6</sup> Napu'lige ralámuli ruisá 'we resí

nokigá járome koriá, najkigá nokale napurigá Onorúgame 'la e'kámala, 'liko Juani

rewarale alué ralámuli alé Jorani anilichi bakochi.

<sup>7</sup> 'Lige jaré rió jurío sébale okaná chojkégame. Ye okaná chojkégame bariseo nile

jaré, 'lige saruseo nile jaré. 'We benírame nile napurigá 'we a'lá gawea bilé nóchali,

a'boi 'lina tabiléchigo sébali olame nílekó. Alueka pe jsile najkigá napurigá rewarawa

ba'wichí bokobuga Juánite. 'Lige Juani anele e'wele ra'ichaga:

—i'Émika pe napurigá sinowí 'kúchila alarigá júkuru, asíriga 'yégame júkuru 'emi!

¿Chieri aníbeché júmasiwa napurigá tabilé gastigáriwa? <sup>8</sup> 'Ma a'réwaguru alué tabilé 'la

nóchali nocha napurigá suwábaga ralámuli 'la etémala 'emi 'ma ku 'we a'lá 'nátili 'nátame

ko. <sup>9</sup> 'Émika Abraámi rijimala korime júkuru, alué 'we 'ya ajtégame, alekeri mayé

'emi Onorúgame 'la e'kamio. Tase alarigá na'tawa, tabilé chéré rekó rijimala nírigé

Abraámi. Onorúgameka pe napuyépiri ralámuli e'kame ju, pe 'la Onorúgame 'yuga

'nátame nísaká alué ralámuli. Onorúgame alarigá na'tásaká rejtétiri 'ma Abraámi

rijimala gainámaleké. <sup>10</sup> Rejpilaka 'ma listo bo'í napurigá rojá me'tépu. Suwábaga rojá

napu ekí tabilé rakeme ju 'ma me'tékime júkuru 'lige e'kósilime ju.† <sup>11</sup> Neka pe iligá

ba'wite rewaráguru, napurigá ralámuli etémala 'emi 'ma a'rélígo alué chátiri

'nátili. Abé i'libeko uché bilé sebámala abéchigo najtégame me'tígá ne'chí. Alueka

Onorúgame Alawala 'yámala ralámuli. Neka tabilé ikiáre napurigá ne alué rió akalá

o'toa napurigá pioní neraga. <sup>12</sup> Alueka 'ma wejpmoa chujkúuru ri'ligó sonolá

e'kósimia. 'Lige rakálaka 'ma gatémala bilena

† 2:18 Rakélíka Abraámi upila nile. Alueka mukule 'we 'ya alé a'bé Beleni anilichi. Alarigá aniáká nalálígo Rakeli, alueka aniname ju alué we'ká u'kuchítiri eyela alé Beleni mochígame nalálígo. ‡ 2:18 E'nesi Jeremías 31:15. § 2:23 E'nesi

glosario «nasareno». \* 3:3 E'nesi Isafás 40:3. † 3:10 Yeka pe ruyame ju, 'emi tabilé 'la nochásaká Onorúgameka 'ma lékana injiénochi 'lumio.

rekóachi, 'lige sonolaka 'ma e'kósamala na'ite. 'Lige tajsiné cho'mela alué na'í. Yeka pe tétali ju.

*Jena ruwimela 'ma rewarádirigo Esusi*

<sup>13</sup> 'Lige sébale Esusi alé bakochi Jorani anilichí, alé Galilea anilíchika simile alué Esusi. 'Lige alé ilile Juani, 'lige Esusi najkile napurigá rewarawa alué Juánite. <sup>14</sup> Napu'lige sebasa alué Esusi, 'lige Juánika tabilé rewaránilile alué Esusi, 'lige anele Juani alué Esusi:

—Ne 'nalina rewarárigame nímili júkuru muete. ¿Chonigá najki mué napurigá ne mué rewarámala?

<sup>15</sup> 'Lige Esusi anile:

—Abiena 'la julke mué ne'chí rewará. Onorúgameka larigá najkiame, 'la 'we a'la sébali oliame júkuru napurigá najki Onorúgame.

'Liko Juani rewarale alué Esusi. <sup>16</sup> Napu'lige Esusi rewarásiga ba'ichí bokobuga 'lige ku ma'chínasa aminá suwemi, 'pa rewagachi 'ma i'púriga ilíbale 'lige Esusi etele Onorúgame Alawala 'pákana enágichi napuyeri bilé baloma neraga. <sup>17</sup> 'Lige bilé ra'íchame anile 'pa rewigáchika. Regá anile:

—Ye júkuru ne Inolá napu 'we galé ne. Asíruga 'la ganúliga ajtí ne alué 'yuga.

## 4

*Jena ruwimela alué Satanasi 'we najkligo napurigá Esusi e'wímala alué Satanasi*

<sup>1</sup> 'Liko Onorúgame Alawálate o'tóleru Esusi 'mi bilena tabilé riógachi. Remónisika 'we 'yégalí olánilile Esusi napurigá Esusi tabilé 'la nochámalá.

<sup>2</sup> Esúsika oká liá rawé 'lige rukomi tabilé go'ale. A'kinana kulí e'luúle. <sup>3</sup> 'Lige Remónisika a'bé nawile 'yéginiliga Esusi, 'lige anele Remónisi alué Esusi:

—'La bijchiá Onorúgame Inolá níriká, baní gaináriwagó alué we'ká rejte.

<sup>4</sup> 'Lige Esusi nejele:

—Onorúgame nila ra'íchali aní: «Tase pe go'ámecho go'gá ejperélamala ralámuli, abiena semátiri ra'íchali Onorúgame nila rejcholi 'nátaga ejperélamala ralámuli.»\*

<sup>5</sup> 'Liko alué Remónisi Rusaleni o'tole Esusi 'lige asíruga re'pá iligame wa'lú re'obachi amoba 'mórale, <sup>6</sup> 'lige anele:

—'La bijchiá Onorúgame Inolá níriká 'légana o'pachípuagó jena iligá. Regá aní Onorúgame nila ra'íchali:

We'ká santo ánjeli julámala ne napurigá mué repúmala.

Alué santo ánjeli nokimela mué cha'piá sekate

napurigá ta iwégame chibámala mué 'légana wijchí.†

<sup>7</sup> 'Lige Esusi anile:

—Abiena regá aní Onorúgame nila ra'íchali: «Tabilé o'pochípua napurigá Onorúgame mué gu'írimala, mueka pe tonto neraga re'eme kame.»‡ Onorúgameka tabilé najki napurigá bilé tonto neraga o'pachípua.

<sup>8</sup> 'Lige alué Remónisi uchéchigo siné o'tole Esusi bilena rabó re'pá iligame, <sup>9</sup> 'lige anele alé o'tosá:

—'Nee, aka e'nébá bochígimi gawichí napu ma'chí 'lige suwábaga ralámuli etéru'e napu ekí mochí jena wijchimoba, aka e'nébá asíruga 'la suwétiri kámpá. 'Lige suwábaga ye 'yámala ne mué 'la chojkóbisiga iligá nirásaká mué ne'chí.

<sup>10</sup> 'Lige Esúsika anele:

—'Mi simigá mué Satanasi, cha 'yégame ke. Regá aní Onorúgame ra'íchálima: «Pe alué Wa'lula Onorúgamecho 'la niraga etewa, pe alekecho 'la e'wiwa.»§

<sup>11</sup> 'Liko alué Remónisi 'ma waná simile alé Esusi ajtígichi. 'Liko yati neraga jsile santo ánjeli go'ame 'yamia Esusi, 'lige aminami gu'írimia.

*Jena ruwimela Esusi pe kulí siné o'winaligo nocha alé Galilea anilime ejírochi*

<sup>12</sup> Esusi akele Juani galírale bajcháriga ajtigó. 'Lige simile Esusi uchéchigo ku Nasareta anilichi Galilea ejírochi.

<sup>13</sup> Tabiléchigo bejterálekó alé Nasareta anilichi, pe chebilena we'ká riógichi simile bejteramia Kapernaumi anilichi. Alé a'bé nile wa'lú ba'wí ilígichi. 'Yako alé sébale alué ralámuli israelita napu Sabuloni chojkégame nile, 'lige napu Neptalí chojkégame nile napu'lige bajchá sébalige alué ralámuli israelita alé Kanani. Makué oká chojkégame nile alué ralámuli israelita. <sup>14</sup> Alueka alé simílekuru, alarigáchigo osáligime 'ya bejtégame rió Isaíasi anilime, napu ruyame nílige napu Onorúgame anélige alarigá ikimeo. Regá anime osale:

<sup>15</sup> Alué we'é Sabuloni anilime 'lige Neptalí anilime,

napu wa'lú ba'wí ilí,

alé simírame bowé bo'í,

alé ju, alé napu Jorani anilime bakó bo'í,

alemi napu bokuíme ju rayénali Jorani anilichí asiruga,

napu jipe ju ejiro Galilea anilime,

napu ejperégame nile ralámuli tabilé jurío.

<sup>16</sup> Alué ralámulika tabilé machime ju Onorúgame.

Jípeko 'máchigo sébako Onorúgame Inolá napurigá bilé ra'ósali neraga.

\* 4:4 E'nesi Deuteronomio 8:3. † 4:6 E'nesi Salmos 91:11-12. ‡ 4:7 E'nesi Deuteronomio 6:16. § 4:10 E'nesi Deuteronomio 6:13.

'Lige alué ralámuli asíriga resítiri nóchali nocha mochile.

Jípeko 'ma sébaguru 'we a'lá semátiri ra'ósali.

Jípeko 'ma námamaleké alué ralámuli.\*

<sup>17</sup> 'Lige alé sebasa Esusi, a'lige kulí o'wínale rejcholi beniria. Regá anile:

—'Ma a'rewa alué resítiri nóchali. 'Ma amulí seba raweli napurigá Onorúgame suwábaga ralámuli nulémala. Alekeri 'ma ku 'la 'nátame gainawa.

*Jena ruwimela Esusi bayéligo naó rió ro'chi i'mume*

<sup>18</sup> Esusi enale suweke wa'lú ba'wí ilígichi Galilea anilichi. 'Lige alué Esusi oká rió etele bi'lepi o'nógame. Bilé Simoni anilime nile. Oká rewégame nile alué Simoni, Pegro anilime nilechigó. 'Lige uché bileka Antresi anilime nile. 'Lige alué rió ba'íchikana pa uchule alué morali ro'chí cha'pináliga alué morálite. <sup>19</sup> 'Lige anele Esusi alué oká rió:

—Jeka simasi ne'chí 'yuga. Jípeko 'emi nokimela ralámuli gu'iria buyana chátiri bowechi e'yéname.†

<sup>20</sup> 'Lige alué oká rió a'rele alué morali 'lige simíbale alué Esusi 'yuga.

<sup>21</sup> 'Lige abé a'mibemi e'yéniga Esusi uchéhigo jaré rió etele. Santiago anilime nile bilé, 'lige uché bilé Juani anilime nile. Seberéo 'kúchila nile alué oká rió. Bilé bárkochi mochile alué oká rió o'nola 'yuga morali napisua. 'Lige Esúsika bayele alué rió. <sup>22</sup> 'Lige 'ma a'rele alué barko o'nola 'yúriga, 'lige simíbale Esusi 'yuga.

*Jena ruwimela Esusi we'ká ralámuli beníraligo*

<sup>23</sup> Esusi bochígimi eyénale alé Galilea anilichi ejiro. Napu ekiná we'ká riógichi Esusi ruwile Onorúgame ra'íchálila ra'íchali 'lige napu ekiná u'kuchí jurío re'obálachi alé «sinagoga» anilichi. 'We a'lá semáriga ruwile alué ra'íchali churigá nulamio Onorúgame. 'Lige suwábaga ralámuli sa'wale napu ekí nayúkame nile. <sup>24</sup> 'Liko suwábaga ralámuli napu íchúrimi epperégame nílige Siria anilichi 'ma akéle alarigá nocha ajtigó Esusi. 'Lige a'pale suwábaga ralámuli napu ekí nayúkame nílige, jaré asíriga a'wágame o'kome, 'lige jaré u'kuchípala remónisi mochígame, 'lige jaré rekúpame, 'lige jaré sujírige. 'Lige Esúsika 'ma suwábaga sa'wale. <sup>25</sup> 'Lige asíriga we'ká ralámuli najátale alué Esusi. Alé Galilea anilime ejiro mochígame, 'lige ejiro Rekápolisi mochígame ralámuli abiena najátale Esusi, 'lige Rusaleni mochígame ralámuli abiena najátale Esusi. 'Lige Jurea ejiro mochígame ralámuli abiena najátale Esusi. 'Lige alé bakochi Jorani na'lebo 'nálige 'omi niraga

napu ma'chínami ju rayénali we'ká riógachi mochígame ralámuli abiena najátale Esusi.

## 5

*Jena ruwimela Esusi rejcholi beníraligo bilena rabomi asigá*

<sup>1</sup> Napu'lige Esusi suwábaga ralámuli etesa, bilena rabomi simile 'lige asíbale alé rabomi. 'Lige alué oyérame ralámulika a'bé mochíbale. <sup>2</sup> 'Lige Esusi o'wínale ra'icha ralámuli beniria.

<sup>3</sup> Regá anile Esusi:

—Onorúgameka 'we ganíliga eteme ju (yolí ra'íchagaká «dichoso» anime chujkú) alué ralámuli 'la machime rokárikó Onorúgame a'walila. Onorúgame 'we a'lá nulémala alué ralámuli.

<sup>4</sup> › Onorúgame 'we ganíliga eteme ju alué ralámuli napu jípe 'we seweka mochí, alué ralámuli 'we a'lá semati raweli 'yawa Onorúgamete.

<sup>5</sup> › Onorúgame 'we ganíliga eteme ju alué ralámuli napu tabilé riólame ju. Alué ralámulika 'la narémala alué napu Onorúgame nejímili ju.

<sup>6</sup> › Onorúgame 'we ganíliga eteme ju alué ralámuli napu 'we a'lá bijchiá e'wánilime ju napu Onorúgame nulame ju. Onorúgameka 'we a'lá nabí gu'írimala alué ralámuli napurigá 'la bi'lepi na'támala senibí Onorúgame 'yuga.

<sup>7</sup> › Onorúgame 'we ganíliga eteme ju alué ralámuli napu 'we na'temame ju uché jaré ralámuli. Onorúgamechigó a'chigóriga na'temámala alué ralámuli napu na'temame ju alué uché jaré ralámuli.

<sup>8</sup> › Onorúgame 'we ganíliga eteme ju alué ralámuli napu Onorúgame 'yuga 'nátame ju. Bilé rawé etémala Onorúgame alué ralámuli.

<sup>9</sup> › Onorúgame 'we ganíliga eteme ju alué ralámuli napu gu'írime ju uché jaré ralámuli, napurigá alué uché jaré ralámuli 'la bi'lepi 'nátame nímala. Alué ralámulika regá anéwali Onorúgamete: «'Émika ne 'kúchila ju.»

<sup>10</sup> › Onorúgame 'we ganíliga eteme ju alué ralámuli napu 'we resí oliame ju ralámulite napu 'la sébali olame ju napurigá najkí Onorúgame. Onorúgameka asíriga 'la semáriga nulémala alué ralámuli.

<sup>11</sup> › Onorúgame 'we ganíliga eteme ju 'emi napu'lige resí anilíe ralámulite ne'chí oyérame kóriká, 'lige aminami 'we 'yégiga ra'íchasa alué ralámuli 'emi 'yuga napurigá sairúgame neraga. <sup>12</sup> 'We ra'sáligá mochíwaká napu'lige alarigá nokachí ralámuli, 'émika 'wéchigo 'la semátiri raweli narémili kame 'pa rewagachi. Alué chátiri ralámuli abiena cha olale alué 'ya

\* 4:16 E'nesi Isaías 9:1-2. † 4:19 Esusi anile: Ralámuli i'mume nímala 'emi.



ejperégame ralámuli napu ruyame nílige napu anele Onorúgame.

*Jena ruwimela Esusi ruwílige bilé tétali oná lige ra'ósali*

13 › Jénaka bilé tétali ruyame ju. 'Émika pe napurigá oná ju. Napurigá 'we a'lá ajkágame newame ju go'ame, 'lige aminami napurigá tabilé bikamela sa'pá oná ajchésiga, 'émika gu'irame ju ralámuli napurigá tabilé aminabi resí nokísimala. Oná 'ma najsawísaká tabilé ra'ígame gainasa pecha sirbe nímálawé. Pecha uchéchigo ku 'la gainámálagó. 'Liko pe pálime nímala alué oná, 'lige ralámulika amoba e'yénamala re'keka. 'We a'lá na'tawa choniamé ka ye tétali.

14 › Jena uchéchigo bilé tétali ruwime ju. 'Émika napurigá ra'ósali ju jena wijchimoba. Bilena we'ká riógachi wa'lú gawichí amoba, pecha gainámili júkó napurigá chíbamala, abirigá ma'chí iliméleke senibí. 15 Abiena tabilé rajeme ju ralámuli lámpara, 'lige pachárale elamia napu bo'í bilé gajoni, iligá uché bilena elame ju napu abé 'la ma'chígime rajisáré, napurigá suwábaga ralámuli galírale mochígame 'la ma'chígichi mochímala. 16 Ye tétalika aniamé ju 'we a'lá sébali olawa napu nulá Onorúgame, 'lige napu'lige etea ralámuli, 'we a'lá níraga etémala O'nó Onorúgame 'pa rewagachi ajtígame.

*Jena ruwimela Esusi benírligo Moisesi nulalila*

17 › 'Émika bijchigi ne alué Moisesi nulalila suwábimiamawigó, 'lige abiena bijchigi 'emi ne nawigó suwábimiam alué 'ya nerúgame rejcholi, napu ruyame nile alué ralámuli napu Onorúgame anélige. Neka pecha se'wí pamia nawako alué nulalí nibilé alué ra'íchali rejcholi. Neka nawákuru ralámuli gu'irimia napurigá 'la námamala ralámuli alué nulalí. 18 Neka 'la bijchiá aníguru, biji 'la bo'ígichi ye gawí 'lige rewagátiri, tabilé 'wesí osilí bujéwili ju alué ra'íchali Onorúgame nila, napusi 'ma sébili ikí napu sébili ikimeli ju jena wijchimoba. 19 Alekeri napu'lige bilé rió tabilé e'wasa napurigá aní alué nulalí, 'lige uché jaré ralámuli sulisa napurigá alué ralámuli tabilé e'wámala alué nulalí, 'liko alué rió ta'mé najtékkame nímala napu'lige Onorúgame nulechi alué ralámuli. Bilé rió 'we a'lá e'wame nísaká napurigá aní alué nulalí, 'lige benírame nisa uché jaré ralámuli napurigá a'chigóriga nochámala, 'liko alué rió asiriga najtékkame nímala napu'lige Onorúgame nulechi alué ralámuli. 20 Neka anéguru 'emi: Alué bariseo 'lige alué Moisesi nila nulalila benírame, 'we ra'íchame ju Onorúgame nulalila tabiléchigo sébali olame júkó rekó lanime ke. 'Emi tabilé e'wásaká napu nulá Onorúgame me'tagá

alué bariseo 'lige alué Moisesi nila nulalí benírame, Onorúgame tabilé nulémala 'emi.

*Jena ruwimela Esusi benírligo napurigá tabilé ayome niwa*

21 › 'Emi 'we a'lá machí regá anélirigo alué 'ya mochígame: «Tase me'ligá ilírowa ralámuli. Apiépiri rió uché bilé rió me'lisá, alueka wa'lú gastigo rewimeli ju.» 22 Neka regáchigo anígó: Apiépiri rió napu ayóniga eté uché jaré ralámuli, abiena wa'lú gastigo 'yáwili ju Onorúgamete rekó ta me'ae. 'Lige bilé ralámuli tabilé 'la ra'íchasa uché jaré ralámuli olagá, alueka gastigáriwili ju alué e'wéalate napu nuleme ju ralámuli jurío. 'Lige bilé rió anesa chebilé rió: «Mueka pecha najtékkame júkó, mueka pe tonto ju», alué alanimeká gastigáriwili ju Onorúgamete na'ichí e'kósiga lékana injiérnochi.

23 › Alekeri, go'ame o'ká simisá mué alé mésachi napu Onorúgame go'ame ilíme ju, 'lige alé sebasa nelasa mué, mué bo'né se'winá oláligo uché bilé rió, 24 'liko abalé a'rélime júkuru alué go'ame 'na o'weka neraga napu ilí alué mesa. 'Lige alé a'resa, ku 'mi simibóká gatewa alué rió 'yuga. Napu'lige 'ma 'la sébali gatesa, a'lige kuka simibóká, a'lige kulí jawáwaká alué go'ame alé mésachi.

25 › Mué se'winá 'sisa bilé rió 'yuga, 'lige alué rió wa'lúlachi nejímala mué, 'liko ta'chó seba 'we a'lá gatélime júkuru. Alué riote nejísiga mué alé wa'lúlachi, 'liko galírale bajcháwili ju mué. 26 Ne 'la aní mué tabilé ma'chínimio. Napu'lige 'ma suwábaga najtétasa mué napu ekí goblara alué wa'lula, a'lige kulí ma'chínamala mué.

*Jena ruwimela Esusi benírligo napurigá tabilé e'newa bilé muki 'yuga gojchináliga*

27 › 'Émika 'we a'lá machí regá anélirigo alué 'ya mochígame: «Tase 'yuga gochiboa uché jaré umugi alué napu tabilé 'emi 'yula ju.» 28 Neka regáchigo anígó: Bilé rió rekó tabilé gochié uché bilé muki 'yuga, 'lige pe 'we 'yuga gochináliga etesa 'liko alué rioka 'ma resítiri alawégame nímili júkuru rekó ta 'yuga gochié.

29 › Chátiri na'tasa mué alieti etega, 'liko ma'chí pápua alué busí 'lige pápuaká. Abé 'la nímala pe busílacho we'kawa mué, tabilé 'la ju suwábaga mué sa'pala lékana injiérnochi pasía. 30 'Lige alué mué sekala wajtoná ilígame 'sísaká napurigá nochawa alué resítiri nóchali, 'ma rejpúniga pápua. Abé 'la kéréko seká we'kawa mué, tabilé 'la ju suwábaga mué sa'pala lékana injiérnochi pasía.

*Jena ruwimela Esusi ruwílige tabilé 'la ko bo'né 'yula muki a'rilila*

31 › Abiena anime nile 'ya mochígame: «Bilé rió muki a'resa bo'né 'yula, 'liko bilé

apeli i'lime júkuru anigá 'ma a'réguru mué mukí.»<sup>32</sup> Neka uché bilé rejcholi ruwimela. Bilé rió bo'né upila a'resa, 'lige alué mukí wa'lú resítiri alawégame nímala. Alué bajchá ajtígame rió chojkila nímala chonigá a'reme ju mukí. Alué nujubá ajtígame rioka abiena tabilé 'la nóchame kárélamala. Alué mukí tabilé alué rió nila ju. 'Lige alué mukí se'nú rió 'yuga gochime nisa ta'chó a'relia alué bajchabé riote, 'liko alué rioka tabilé resítiri alawégame gainámala rekó alué mukí a'rigé.

*Jena ruwimela Esusi ruwíligo alué nulali*

<sup>33</sup> › Abiena 'we a'lá machí 'emi regá anélirigo alué 'ya mochíggame: «Onorúgame e'negá ajtí 'la sébali olamio ne, alekeri 'la sébali olámala ne.»<sup>34</sup> Tase aniboa: «Onorúgame 'la e'negá ajtí alekeri 'la sébali olámala ne.» Pe 'la sébali olawa. 'Lige tase aniboa: «'La sébali olámala ne, 'la e'negá ajtíggame rewagá.» Tase regá aniboa: «Alé rewagachi nulá ajtíggame Onorúgame.»<sup>35</sup> Tase aniboa: «Gawí 'la machí 'la sébali olamio ne.» Tase aniboa alieti, gawika kame napu teka ajtí Onorúgame. 'Lige tase alarigá aniboa: «Rusalénika 'we a'lá machí 'la sébali olámala ne.» Tase alarigá aniboa alué Rusalénika Onorúgame nila kame.<sup>36</sup> Tase aniboa: «Ne bo'né mo'ola 'la machiame 'we a'lá sébali olamio ne.» Tase alarigá aniboa mueka pecha gainámalagó newá rosákame o chókame mué bo'né gupala, nibilé bi'lepi gupá.<sup>37</sup> Napu'lige 'la sébali olámorisá mué, 'la sébali olawa. Tabilé gainásaká sébali olá, pe aniboa: «Tabilé ikíromala ne.» Tabilé siné 'yéngili rupoa. 'Yéngiliká pe Remónisi ra'ichálila ju.

*Jena ruwimela Esusi ruwíligo tabilé cha nokíame ko alué ralámuli 'yuga rekó alué ralámuli 'we cha nokachí 'emi 'yuga*

<sup>38</sup> › Abiena 'we a'lá machí 'emi regá aníligo alué 'ya mochíggame: «Bilé ralámuli busila ma'chí pasa uché bilé rió, 'liko a'chigóriga oliame júkuru alué ralámuli. Bilé ralámuli ramé o'linasa uché bilé rió, 'liko a'chigóriga o'linálime júkuru alué rió ramalá.»<sup>39</sup> Neka regá aní: «Tase ayóniwa bilé rió 'we nejkome. Bilé rió nejchósaká bilena banichí, uchéchigo bilena gu'liwaká napurigá uché bilena banachí o'chómala.<sup>40</sup> Bilé rió bujénasaká mué o'páchala, yati 'yáwaká, 'lige abiena 'yáwachigó alué we'lí o'pacha\* o'páchiga inálime.<sup>41</sup> Sontalo rejósaká napurigá o'toboa bilé tábiri bilé mili metro mejká, mueka abéchigo noli oká mili metro o'tobóká.<sup>42</sup> Apiépiri ralámuli táachi tábiri, yati 'yáwaká. Bilé ralámuli tanega tásaká bilé tábiri, yati tanéwaká.»

*Jena ruwimela Esusi ruwíligo napurigá 'la galegá etewa saírúgame*

<sup>43</sup> › Abiena 'we a'lá machí 'emi regá anélirigo alué 'ya mochíggame: «'La galewa mué amígola, 'lige tase galewa mué saíla.»<sup>44</sup> Neka regá aní: 'La 'we a'lá galewa mué saíla. 'La 'we a'lá gu'iriwa alué ralámuli, alué napu tabilé ganílime ju 'emi 'yuga. 'La tániwa Onorúgame napurigá Onorúgame 'la gu'irimala alué chátiri ra'ichame ralámuli, abiena alué napu cha nokame ralámuli ju 'emi 'yuga.<sup>45</sup> Alarigá nokiáká 'emi, 'la alué O'nó Onorúgame kúchila nímala 'emi, alué Onorúgame napu 'pa rewagachi ajtí, alué nuleme ju rayénali napurigá 'we a'lá ma'chígime rainámala alué chátiri ralámuli mochígichi, 'lige 'we a'lá ralámuli mochígichi. Nuleme ju u'kí napurigá u'kumela alé napu mochí ralámuli napu 'la e'wime ju Onorúgame, 'lige abiena alé napu mochí ralámuli napu tabilé e'wime ju Onorúgame.<sup>46</sup> Mué pe alué 'we a'lá nirame ralámuli 'we a'lá nírásaká, 'liko mueka tabilé 'la narémala Onorúgame nila tábiri alarigá 'síkariká. Alué napu goblólome ju enomí alarigá nokame júchigó.<sup>47</sup> 'Emi pe a'boi amígola 'la repórisa, tachiri najtékame nímawé. Alué ralámuli tabilé Onorúgame oyérame, alueka abiena alarigá nokame ju. 'Émika 'we a'lá semáriga nokimeli júkuru, tase napurigá alué ralámuli.<sup>48</sup> 'We a'lá sébali 'nátame ralámuli niwa napurigá O'nó Onorúgame 'pa rewagachi ajtíggame.

**6**

*Jena ruwimela Esusi bentíaligo churigá gu'irílime ko uché jaré*

<sup>1</sup> › Tase che nokigá nokiboa napurigá ralámuli etémala 'emi napu'lige Onorúgame nulá. Tase anigá e'yénawa: «'Ramueka 'we a'lá Onorúgame oyérame niru.» Pe alieti 'nátaga nokisáká 'emi, 'liko 'emi O'nola 'pa rewagachi ajtíggame tabilé 'yámala 'emi semati raweli.<sup>2</sup> Napu'lige gu'irílima alué tabilé nígame ralámuli 'we resíriká eperéggame, tase we'ká ralámuli etériga gu'iriwa. Alarigá nokame ju ralámuli 'we riólame napu'lige bilé tábiri 'ya alué ralámuli tabilé nígame alé u'kuchí re'obachí «sinagoga» anílime mochígichi. Alué alarigá nokame ralámulika pe najkigá nokame ju napurigá 'we a'lá nerawa ralámulite. Peka 'la sébali olame ke a'bopi.<sup>3</sup> Napu'lige ralámuli tabilé nígame gu'iria mué, napu'lige tabilé 'wesi riógachi a'lige gu'iriwaká. 'Lige aminami tabilé 'wesi ruyéwaká, nibilé mué amígola rekó 'we a'lá amigo ke. (Ralámuli israelita regá anime nile: «Tase a'rewa napurigá mué sekala o'iná ilíggame etémala napu 'siá 'smi mué sekala wajtoná ilíggame.»)<sup>4</sup> 'Liko mué asíriga

\* 5:40 Alué we'lí o'pacha nile napurigá chaketa.

'la narémala O'nó Onorúgame nila semati raweli, alueka suwábaga eteme kame napu ekí tábiri nóchachi ramué.

*Jena ruwimela Esusi benírilingo churigá ra'ichálime ko Onorúgame 'yuga*

<sup>5</sup> › Napu'lige Onorúgame 'yuga ra'icha 'emi, tase o'weti jaga tániwa iwérali Onorúgame alé pachá u'kuchí re'obachi «sinagoga» anilime pe napurigá etewa suwábaga ralámulite. Alarigá nokame ju riólame ralámuli, peka 'la sébali olame ke a'bopi. Lige aminami alé bilena napu we'ká ralámuli mochí, alemi jaga tánime ju iwérali Onorúgame, pe napurigá etewa suwábaga ralámulite. 'We ganilime ju alieti nóchaga, pe u'kabi rawé 'we ganliga mochímala, Onorúgameka tabilé 'yámili ju semati raweli alué ralámuli. <sup>6</sup> Napu'lige mué Onorúgame 'yuga ra'ichánalasa, bi'neli simibóká pachami galírale 'lige 'yérawaká yochi, 'lige kulí ra'icháwaka mué O'nola Onorúgame 'yuga. Pecha etérame júkó Onorúgame kaka, alueka abienachigo 'la etiágó iwérali tánachi mué, 'liko Onorúgameka asíruga 'la semati raweli nejímala.

<sup>7</sup> › Napu'lige iwérali tania 'emi Onorúgame, tabilé we'sá simérawa bilé ra'ichali, 'lige aminami tabilé ra'ichawa alué tabilé námatame ra'ichali. Ralámuli tabilé machime Onorúgame pe alarigá nokame ju. Alueka abé 'la we'ká ra'ichálika 'we alá gepumia mayeme ju Onorúgame. <sup>8</sup> Tase alarigá nokiboa napurigá nokame ju alué ralámuli. Alué 'emi O'nola Onorúgameka 'la machí alekí bajchá ta'chó táachi 'emi. <sup>9</sup> Alekeri napu'lige ra'ichalia Onorúgame 'yuga, regá anewa: Mué O'nó 'pa rewagachi ajtígame, ramueka najkiáke'é

napurigá nerawa mué ralámulite, <sup>10</sup> najkiáke'é napurigá sebámala raweli napurigá suwábaga ralámuli nulémala mué. Abiena najkiáke'é napurigá nulámala mué jena wijchimoba napurigá nulame ju mué 'pa rewagachi. 'Lige abiena najkiáke'é napurigá 'la sébali ikimela napu mué najkí.

<sup>11</sup> Pe rekó 'yáwagó ramué go'ame napu senibí rawé nejime ju mué.

<sup>12</sup> Ramueka 'ma e'karu ralámuli alué napu cha nokálige ramué 'yuga, alekeri ramueka tánili e'kali mué cha nokogá nokigáriká.

<sup>13</sup> Pe rekó anáchaga 'yáwagó a'walí ramué napurigá 'la umérowa Remónisi

napu'lige alué Remónisi se'wí 'lúnilichi ramué.

Tase a'rewa ramué napurigá na'tawa alué chátiri 'nátili.\*

'Lige Esusi anile:

<sup>14</sup> —'Emi 'la e'kásaká uché jaré ralámuli napu'lige alué ralámuli e'káali tasa cha nokisá 'emi 'yuga, 'liko 'emi O'nola Onorúgame napu rewagachi ajtí 'la e'kámalachigó 'emi. <sup>15</sup> 'Emi tabilé e'kásaká 'lige tabilé niraga etesa alué cha nokame ralámuli, 'liko 'emi O'nola Onorúgame tabilé e'kámala napu'lige 'emi cha nokisá.

*Jena ruwimela Esusi benírilingo churigá ayundálime ko*

<sup>16</sup> › Napu'lige ayunalia 'emi, tabilé sewékame neraga e'yénewa. Alué 'we riólame ralámuli alarigá nokame ju peka 'la sébali olame ke, pecha sewékame kéréko, pe najkime ju napurigá niraga etewa ralámulite. Pe tabilé 'nátame ju Onorúgame 'yuga. Tabilé narémili ju napu Onorúgame nejímili ju. <sup>17</sup> Napu'lige ayunalia 'emi bajchá bisigówaguru 'lige 'we alá techípuaka, <sup>18</sup> napurigá tabilé machimela ralámuli mué ayúnachi, pe mué O'nola Onorúgame 'la machimela, 'liko 'la 'we 'la semati raweli nejímala Onorúgame.

*Jena ruwimela Esusi ruwilingo tase we'ká e'karúgame tábiri niga mochiwa*

<sup>19</sup> › Tase niga mochiwa e'karúgame tábiri 'we najteme jena wijchimoba mochiga, jena wijchimóbaka 'we o'chéráme ju nowí 'lige 'ma pe i'nime ju suwábaga tábiri gatériga mochígame. Suwábaga suwime ju. 'Lige chigórigame abiena mo'ime ju chigomia alué gatériga mochígame. <sup>20</sup> Tase we'ká na'tawa ye tábiri, iligá abé alá ju Onorúgame 'yuga na'talia. Alarigáká 'we alá semáriga narémala 'emi semati raweli napu'lige seba 'pa rewagachi. Tase nerume ju 'pa rewagachi nowí, 'lige tabilé i'nime ju tábiri gatérigime, 'lige tabilé e'yéname ju chigórigame. <sup>21</sup> Bilé rió we'ká tábiri nígame nisa 'we najteme, 'lige pe alekecho na'tasa, tabilé na'támala Onorúgame 'yuga.

<sup>22</sup> › Mué 'la gu'írisaká uché jaré ralámuli napu 'yáliru mué Onorúgamete 'yale mué, 'la Onorúgame 'yuga 'nátaga gu'írisaká mué uché jaré, 'liko 'we alá 'nátame ju mué, 'liko 'we alá bi'wígame alawégame nímala mué. <sup>23</sup> Mué tabilé gu'írisaká ralámuli napu 'yáliru mué Onorúgame 'yale mué, tabilé 'la bi'wígame alawégame nímala mué. Chókame nímala mué alawala.†

\* **6:13** Jaré osilí abiena regá aní: Mué kame napu nulame ju, mueka wa'lú a'walí nígame kame, 'lige nabí 'la sébali olame kame mué. † **6:23** Yolí ra'ichaga aní (22-23): «Los ojos son como una lámpara para el cuerpo, así que, si tus ojos son buenos todo su cuerpo tendrá luz. Pero si tus ojos son malos todo su cuerpo estará en la oscuridad y si la luz que hay en ti resulta ser oscuridad, ¡que negra será la misma oscuridad!» «Mué busila 'la a'ká nísaká» pe anieme kéré «mué 'we alá gu'írisaká uché jaré ralámuli.»

24, Oká e'wélala 'yuga nóchame nísaká alué pioni, pe tabilé ganiliga eteme ju bilé alué wa'lula, 'lige uché bilé wa'lúlaka 'la ganiliga eteme ju. 'Lige alué pioni bilé wa'lula 'la niraga etémala, 'lige bilé tabilé niraga etémala. Yeka anime ju: Bilé rió tabilé gainámala Onorúgame 'yuga 'nata, pe we'ká enomí mékame na'tásaká. 'Lige alarigáká tabilé gainámala Onorúgame oyeria.

25 › Neka alekeri aníguru: Tase regá na'tawa: «jipe rawé ¿tachiri go'póaché?, 'lige ¿tachiri bajíwaché?, peka i'tékuru ba'wí. 'Lige ¿tachiri o'pachátuwaché? Peka i'tékuru napurigá raliboa nuebo o'pacha.» ¿Tacha abé najteme júkó alawá me'tigá go'ame? 'Lige ¿tacha abé najteme júkó mué alawala me'tigá alué o'pacha? 26 Onorúgameka abiena 'la nejmíli júkuru go'ame 'lige o'pachatiri. 'We a'lá na'táwabala aka alué chulugí i'niga oyame: tabilé echame ke, tajsiné 'wime ka'e, 'lige tajsiné gateme ke go'ame rekóachi. Onorúgameka alué napu 'pa rewagachi ajtígame ju 'la 'yame ká'é go'ame. ¿Tacha abé najtékame ju 'emi me'tigá alué chulugí? 27 ¿Chieri 'la ochéramalawé uché pe'tá o'wétiri rekó 'we ochérinilie?† Rekó uché rajpé ochérinilie 'emi, tase uché rajpé abé re'pá jágame gainámala 'emi. Onorúgame 'sime ju newá re'pá jágame 'lige re'lé jágame.

28 › ¿Tachiri sirbe nímálawé pe o'páchacho na'talia? 'We a'lá na'táwabala churigá o'chéráme ka sewá jami nerúgame. Aka alué sewaka peka nóchame júkuru, nibilé o'páchati newame júkuru. 29 Neka aníguru abéchigo 'la semátiri ko me'tigá alué wa'lula 'ya bejtégame. Alué napu 'we nígame nílige, alué suwábaga me'tigá 'we nígame ka Salomoni anilime nile. Asíriga we'ká e'karúgame nígame nile napurigá chiní 'lige o'pachatiri asíriga jino, abirigáchigo ta'mé semati nílekó abé tase napurigá alué sewá jami nerúgame. 30 Onorúgameka nabí asíriga 'la semátiri sewame gajsalá echame ju jami, 'lige pe 'ma wakime ju alué gajsalá 'lige ralámulika 'ma e'kósime júkuru. 'Émika abé rajpé najtékame júkuru me'tigá alué gajsalá. 'Émika tabilé bijchigi Onorúgame nejkúrimio o'pacha nejja. 31 Liko tabilé we'ká 'nata mochiwa: «¿Tachiri go'póbeché jipe? ¿Tachiri bajíwaché jipe? ¿Tachiri o'pachátuwaché jipe?» 32 Alarigá nokame ju ralámuli tabilé bijchigime Onorúgame nila ra'íchali. Alué ralámuli asíriga 'nátame ju ye tábiri. Alué 'emi O'nola Onorúgame alué 'pa rewagachi bejtégame, asíriga 'la machí tachiri tábiri resilá 'emi. 33 Iligá bajchá Onorúgame 'yuga na'tálime júkuru najkigá napurigá Onorúgame nulámala. 'La newalime júkuru

napu Onorúgame najkí. Alarigá olásaká 'emi Onorúgame 'la nejmíala nejkúrali napurigá niga mochímala go'ame 'lige o'pachatiri. 34 Alekeri tabilé na'támili ju: «Chukimeli ju ne be'lí.» Iligá napu 'nata ajtí mué jipe alué 'lina na'táwaguru. Asíriga we'ká nerúkuru napurigá gatewa jipe yati. Be'líka uché bilé rawé ju.

## 7

*Jena ruwimela Esusi ruwiligo tabilé chojkila neraga che'wálime ko uché jaré ralámuli*

1 › Tase chojkila che'wawa uché jaré ralámuli. Mué chojkila neraga che'wásaká, 'liko Onorúgame chojkila neraga che'wámala mué. 2 Onorúgameka a'chigoriga animela 'emi olagá napurigá aneme ju 'emi uché jaré ralámuli. 'Emi tabilé niraga etésaká, 'liko Onorúgamechigó tabilé niraga etémala 'emi. 'We a'lá tétaga nejsáká 'emi, 'la bochí ajchigá, 'liko 'we a'lá sébali tétaga narémala 'émichigó, 'la bochí ajchigá. 3 'Lige ta machisá mué bo'né wa'lú wejkolí ajchágame ko mué bo'né busilachi, 'liko ¿choniga regá aneme ju mué uché jaré ralámuli: «Muérido, aka ne ma'chí pátirigo alué u'tá wejkolí mué busilachi ajtígame.» 'La ma'chí pápua mué bo'né bajchá alué wa'lú wejkolí mué busilachi ajtígame, a'liko 'la ma'chí pápua mué alué u'tá wejkolí alué rió busilachi ajtígame. (Yeka aníame ju 'emi chojkila neraga che'wásaká uché jaré pe u'tá tábiriti kachi, tabilé 'nátage mué bo'né abéchigo chojkila ke, tabilé 'la ju.) 4 Mué 'we resítiri nocha asisá, ¿chonémala mué bilé amigo? ¿Regá anémala mué?: «Ne 'la nejkúrimala ma'chí paa alué resítiri napu mué nocha ajtí.» 5 Iligá bajchá a'rewaguru alué chátiri 'nátili napu mué 'nata ajtí, 'liko 'la sébali 'nátame nímala mué Onorúgame 'yuga napurigá gu'írimala mué amígola. Mueka pecha gainámili júkó pe u'tá wejkolí ma'chí paa uché bilé ralámuli busilachi chujkúgame, mué bilé gutumoli elágame nísaká bo'né busilachi.

6 › Tase 'yáwaká go'ame o'kochí alué go'ame Onorúgame kógirime nísaká. 'Lige aminami tase 'lúpuaká alemi napu uchú gowí alué 'we najteme rejté. Mué alarigá olásaká, 'liko gowika pe re'keka e'yénamala, 'lige siné kachi ku gu'líga 'emi i'kímala alué gowí. (Ye tétagi júkuru aníame: 'We a'lá na'táwará napu'lige Onorúgame nila ra'íchali ruyá alué tabilé Onorúgame oyérame ralámuli 'yuga. Jaré ralámuli tabilé galeme ju alué ra'íchali.)

7 › Abichilubi tániwa Onorúgame, 'liko Onorúgame nejmíala 'nátili. Abichilubi 'yáawa 'emi 'lige 'la rewimela 'emi. Bayéwaká

† 6:27 E'nesi San Lucas 12:25.

\* 7:7 Yolí ra'íchaga aní Matéoka: «Llame a la puerta y se le abrirá.»

Onorúgame 'lige Onorúgame e'wame júkuru.\* <sup>8</sup> Apiépiri ralámuli 'la támeká 'la i'lime júkuru. 'Lige alué 'la 'yáameká 'la rewame júkuru. Alué bayémeka 'la nejélime júkuru.

<sup>9</sup> 'Emi 'kúchila baní tasa, 'émika tabilé rejté 'yámili júkuru. <sup>10</sup> 'Lige ro'chí tasa 'emi 'kúchila, tabilé sinowí 'yámili júkuru 'emi alué u'kuchítiri. <sup>11</sup> 'Emi napu chátiri 'nátame ke abiénachigo 'la jebénigame júkó 'emi 'we a'lá go'ame kógiga 'emi a'boi 'kúchila. 'Liko abéchigo 'la a'ká nejímala mué O'nola Onorúgame 'pa rewagachi ajtíggame alué napu tánime ju.

<sup>12</sup> 'Emi najkisáká napurigá 'we a'lá nekúrimala apiépiri ralámuli, 'liko 'emi bajchá 'we a'lá niraga gu'írimali júkuru apiépiri ralámuli. Alarigá ju napurigá nulame ju alué ra'íchali nulalí napu Moisesi osale 'we 'ya 'lige napu osale alué ralámuli napu ruyame nilige napu Onorúgame anélige.

*Jena ruwimela Esusi ruwíligo u'kabi ralámuli sebámili ko 'pa rewagachi*

<sup>13</sup> 'We e'wérali olawa napurigá mo'íboa alé u'tá yóggame galíchi. Wa'lú yóggame ju alé napu simárame ju ralámuli injiérnochi simamia 'lige we'lé bo'ígime ju bowé napu sébame alé injiérnochi, 'lige we'ká ralámuli alué bowé simíbame ju, cháchigo 'la we'lé bo'ígime kame alué bowé. <sup>14</sup> 'Lige pe u'kabi ralámuli simíbame ju alé bowechi tabilé we'lé bo'ígime mo'imea alé u'tá yochi alé ejperélimia senibí Onorúgame 'yuga.

<sup>15</sup> 'We majawa alué 'yéggame ralámuli napu ruwime korí napu ané Onorúgame napu 'we a'lá Onorúgame oyérame korime ju, peka Onorúgame oyérame ke. 'We a'lá a'ká ralámuli kárigá jsime ju, asíriga chátiri 'nátame kéréko sulachika. <sup>16</sup> 'We a'lá nérékuru 'we a'lá 'nátame ko 'we a'lá nóchali nochasa. Tabilé 'la ralámuli nísaká, 'liko tabilé 'la nóchali newámala. Tabilé rakémala i'wíli ('uba) alé golalachi, 'lige aminami tabilé rakémala alué chuná alé bilena bitáyachi. <sup>17</sup> Abiena alué 'we a'lá rojaka 'we a'ká rakeme ju, 'lige alué ta'mé 'la rojaka ta'mé 'la rakeme ju. <sup>18</sup> 'Lacha chátiri rakémalawé alué 'la a'ká rojá tabilé nayume, 'lige 'lacha a'ká rakémalawé bilé rojá nayume. <sup>19</sup> Suwábaga rojá tabilé 'la a'ká rakémeka 'ma pe me'teka 'lúpili ju alé na'ichí napurigá 'ma rajimela. <sup>20</sup> 'Liko 'we a'lá machimela 'emi alué ralámuli pala 'la bijchiá 'la bijchígili rejcholi nejime ka. Pe e'néniga napu nokame ju 'la machiboa.

<sup>21</sup> Tabilé suwábaga ralámuli moínámala 'pa rewagachi napu Onorúgame nulame ju rekó Wa'lula aneme ke ne'chí. Pe alué ralámuli napu ekí 'la sébali olame

ju napurigá najkí ne O'nola Onorúgame 'pa rewagachi ajtíggame, pe alueka 'la sebámala. <sup>22</sup> Napu'lige seba raweli napu Onorúgame gustisia olámala (napu Onorúgame animela chieri 'la sébali oláligo 'lige chieri tabile 'la sébali oláligo), we'ká ralámuli anémala ne'chí: «Mué Wa'lula nulame, mué a'walila gite ramueka 'we a'lá rejcholi 'yaruturu ralámuli, 'lige abiena buináruturu u'kuchípala remónisi napu ralámuli mochiga mochílige, 'lige abiena sa'wáruturu nayúkame.» <sup>23</sup> Alarigá animela. 'Lige neka 'we a'lá ma'chígime ruyémala regá: «Neka pecha siné machime kétego'emi.

'Émika tabilé a'lá nóchali nóchame júkuru. 'Mi simíbaga.» <sup>24</sup> 'Lige a'pílipi rió neraga 'la gepúsaká ye ra'íchali, 'lige 'la e'wasa ye ra'íchali, 'liko alué rió napurigá 'we machime rió neraga nímala, napurigá alué rió galí newággame 'we re'lé joka elale galí. <sup>25</sup> 'Lige wa'lú u'kusá 'lige 'ma bochile alé gomichi 'lige galírale sébale, 'lige aminami asíriga ekale, 'lige tabilé na'mínale alué galí, cha 'la newárigime niligame alué galí 'we re'lé joka. <sup>26</sup> 'A'píli ralámuli neraga 'we a'lá gepúsaká ye ra'íchali ne ra'íchálila, 'lige tabilé e'wasa alué ra'íchali, 'liko pe napurigá bilé rió tabilé 'nátame, pe alarigá nímala, pe napurigá bilé galí satebó galírárigime pe alarigá nímala. <sup>27</sup> 'Lige wa'lú u'kusá 'lige aminami asíriga ekesá, 'lige 'ma bochile ba'wí alé gomichi, 'lige 'ma omarúgame na'mínale alué galí.

<sup>28</sup> Napu'lige Esusi 'ma suwénasa ye ra'íchali beniria, ralámulika 'we ra'sásáale napurigá benírale <sup>29</sup> napugiti Esúsika 'we a'lá benigá benírale, bo'né 'we a'lá sébali machime nile, tabilé benile uché jaré benírame 'yuga, tase napurigá alué Moisesi nila nulalí benírame.

## 8

*Jena ruwimela Esusi nayúkame 'yóligo*

<sup>1</sup> 'Liko napu'lige Esusi 'pa rabókana re'kínasa asíriga we'ká ralámuli najátale.

<sup>2</sup> 'Liko bilé rió nayume sa'pachí amoba\* chojkóbisiga ilíbalé 'na o'weka neraga napu enale alué Esusi. 'Lige anile:

—Muériga Wa'lula, mué 'la 'yónalisiká ne'chí, ne'chí 'yówaká napurigá ne 'la lisen-sia nígame nímala napurigá bajkimela ne alé re'obachi pachá.

<sup>3</sup> 'Lige Esusi nochale bo'né sekálate alué rió, 'lige anile:

—'La nímala, 'ma 'la sa'wíggame nímala mué. 'Lige yati neraga sa'wile alué rió. <sup>4</sup> 'Lige anele Esusi alué rió:

—Tabilé 'wesi ruyéwaká ne mué sa'wáligo. Iligá simibóká balé ajtígichi napurigá

\* 8:2 E'nesi glosario «lepra».

† 8:4 Kulí siné rawé oká baloma kógime nile 'lige bilé tarali kachi kógime nile oká bo'á ranala.

etémala mué 'ma sa'wígame ko. 'Lige go'ame kógiwaká Onorúgame napurigá nulálige Moisesi.† 'La suwábaga alarigá olásaká mué, 'liko uchéchigo siné 'we a'lá sébali niraga etewa mué ralámulite.

*Jena ruwimela Esusi 'yólígo bilé sontalo piónila*

<sup>5</sup> Napu'lige Esusi Kapernaumi anilichi sébachi, bilé gapitani sontalo romano sébale Esusi ilígichi bilé nejkúrali tánimiliga. 'Lige anile alué sontalo gapitani Esusi olagá:

<sup>6</sup>—Mué Wa'lula, ne piónila sujirigame ju, tabilé gayena noká 'lige 'we resí nilia ajti.

<sup>7</sup>'Liko anele Esusi alué gapitani:

—Simé ne 'yomia.

<sup>8</sup>'Lige anile alué gapitani:

—Neka tabilé najtékame rió ju napurigá mué bajkimela ne bejtélachi, neka pe apiépiri rió ju. Pe iligá aníboa: «Sa'wisá 'la nímala alué pioni», 'lige alué piónika 'ma sa'wimela, mueka cha wa'lú nígame kame a'walí napurigá alarigá nulámala. <sup>9</sup> Neka 'la machí alarigá nulálime ko wa'lula níriga. Alué uché jaré wa'lula ne'chí nuleme ju, 'lige neka u'kuchípala sontalo nuleme ju. «Simawa», aneme ju ne jaré alué sontalo, 'lige yati simíbame ju. 'Lige «jeka simí», aneme ju ne bilé, 'lige yati jeka simime ju. 'Lige bilé tábiri newánilime ju ne piónila, 'lige alué piónika yati e'wame ju.

<sup>10</sup> 'Lige napu'lige Esusi akisá, pe i'kilí ilívale e'negá. 'Lige Esusi anele alué ralámuli Esusi najátame:

—'La bijchiá ye rioka 'la sébali bijchígame ju 'we a'lá sa'wame ko ne Onorúgame Alawala gite. Jena napu epperé ralámuli israelita pecha 'wesí ralámuli i'tékó uché abé bijchígame napurigá ye rió. <sup>11</sup> Neka aníguru napu'lige Onorúgame piesta newachi 'pa rewagachi Abraámi 'yuga 'lige Isaki 'yuga 'lige Akobo 'yuga, asírige we'ká ralámuli napuímio bochígimi gawichí mochígame. <sup>12</sup> We'ká ralámuli israelita tabilé sebámala alé piéstachi rekó Onorúgameka 'we gu'írilige alué ralámuli, jaré pecha Onorúgame 'yuga 'nátame níligo tase napurigá ye rió. Alué ralámulika pe ma'chige mochímala tabilé mochímala alé pachá piesta nerúgichi. Pe ma'chige 'lúpili ju asírige chonárale. 'Lige nalá mochímala alué ralámuli aminami chí'ná mochímala ramelá.

<sup>13</sup> 'Lige Esusi anele alué sontalo gapitani:

—Ku simigá galírale. A'chigóriga íkimela napurigá mué bijchígale.

'Liko pe aba'lige yati sa'wile alué pioni.

*Jena ruwimela Esusi 'yólígo Pegro wasila*

<sup>14</sup> Napu'lige Esusi sebasá Pegro galíachi, Esusi etele alué Pegro wasila 'we nayua bo'ígó. Asírige iná bo'ile alué Pegro wasila.

<sup>15</sup> 'Lige Esusi nochale Pegro wasila sekala, 'lige yati ajchábale inuí alué Pegro wasila. 'Liko asísale alué Pegro wasila, 'lige yati go'ame newale napurigá Esusi go'mela 'lige uché jaré ralámuli.

*Jena ruwimela Esusi we'ká nayúkame 'yólígo*

<sup>16</sup> Napu'lige rayénali bokuísa, a'páliku we'ká ralámuli u'kuchípala remónisi mochígame pachágana. 'Lige Esusi 'ma buyánale alué u'kuchípala remónisi pe nulíga. Abiena Esusi 'yole uché jaré nayúkame ralámuli. <sup>17</sup> Alarigá 'sile napurigá 'la sébali íkimela napurigá anilige 'ya bejtégame rió Isaías anilime napu ruyma nílige napu Onorúgame anele. Regá anile: «Alué bo'né o'tole nawilí napu ramué nayume nírige.»†

*Jena ruwimela jaré ralámuli Esusi oyériligo*

<sup>18</sup> 'Lige uché bilé rawé asírige we'ká ralámuli napuile. Napu'lige Esusi etesa, nulale napurigá listo u'chagá mochímala bilé barko simea na'lebo 'nálige. <sup>19</sup> Ta'chó simíbachi, bilé alué Moisesi nila nulalí benírame a'bé nawile Esusi, 'lige anile:

—Neka mué 'yuga inánili panápurí simichi mué.

<sup>20</sup> 'Liko Esusi anile:

—Geyóchika 'la nígame júkuru resó, 'lige chulugika 'la ra'sógame júkuru. Ne napu nawá 'pa rewagáchika napurigá rió neraga, neka tabilé asé galégame ju napurigá go'jchimela.

<sup>21</sup> 'Liko uchéchigo bilé rió alué Esusi oyérame, anele:

—Mué Wa'lula, neka mué si simela, pe iligá elíwagó ne napurigá ne o'nola tómala, a'lige simé ne mué 'yuga.

<sup>22</sup> 'Liko Esusi anile:

—Alué ralámuli tabilé Onorúgame oyérame, alué nokimela alué mukúgame toa. Mueka ne'chí 'yuga simíboa.

*Jena ruwimela Esusi eká geléchaligo 'lige ba'wí*

<sup>23</sup> 'Liko Esusi bárkochi 'mole alué makué oká oyérame 'yuga. <sup>24</sup> Napu'lige 'ma bárkochi e'yénigichi, asírige a'wágame ekénale, 'lige ba'wí asírige re'pá ilírale 'lige bárkochi bajkile ba'wí. 'Lige Esúsika gojchígá bo'ile. <sup>25</sup> 'Liko alué ralámuli Esusi oyérame 'ma ajchale Esusi gojchígá bo'ígichi. 'Lige anele ajchígá:

—iMuérigo Wa'lula, asá nejkúri, 'ma bokuíchi ye barko!

<sup>26</sup> 'Lige Esúsika anile:

—¿Chonigá aliena majálché 'emi? 'Émika tabilé bijchígilia Onorúgame 'la nejkúrimio napurigá 'la tabilé bokuímala ye barko.

† 8:17 E'nesi Isaiás 53:4.

'Lige asísale Esusi, 'lige ená anele Esusi alué eká 'lige ba'wítiri. 'Lige 'ma gelale alué eká 'lige ba'wítiri. <sup>27</sup> 'Lige alué oyérameka pe i'kilí jábele Esusi e'negá. 'Lige regá anile:

—¿Tachiri a'walí nígame júpeché alué rió 'siá? 'La e'wenti júkuru eká 'lige ba'wí.

*Jena ruwimela Esusi oká rió sa'wáligo u'kuchípala remónisi mochígame*

<sup>28</sup> Napu'lige Esusi na'lebo 'nálige Garara anilichi sebasa, oká rió buyale gaposántichika. 'Lige a'bé nawíleru Esusi alué oká riote. 'Lige alué okáraga rió u'kuchípala remónisi mochígame nile, 'lige alué rió asíriga jobátigame nile, tabilé a'reme nile napurigá ralámuli simáramala alemi. <sup>29</sup> 'Lige e'wele ra'íchale:

—Mué Onorúgame Inolá, ¿chonigá nawá mué jeka ramué mochígichi? ¿Ramué gastigárimia nawá mué? Ta'chó sébachi raweli gastigo narékime.

<sup>30</sup> 'Lige pe abé mejkabé we'ká gowí e'yénale go'gá. <sup>31</sup> 'Lige alué u'kuchípala remónisi 'we tánele Esusi, regá anile:

—Mué buinásaká ramué jena ye riochi mochígichi, 'liko 'mi we'ká gowichi juláwagó ramué.

<sup>32</sup> 'Liko Esúsika anele:

—¡Yati simásigó!

'Lige buyásiga yati simíbale, 'liko pachágana gowichi mo'ile, 'liko suwábaga gowí iwégame juma mo'íbele légana rejchíkana. 'Ma rujsule wa'lú ba'wí ilígichi, alésíko 'ma suwile.

<sup>33</sup> 'Liko alué gowí neseme, 'ma júmasale majaga, asíriga iwégame júmasaga sébale we'ká riógichi. 'Lige ruwile alakíligo alué rió u'kuchípala remónisi mochígame. <sup>34</sup> 'Liko suwábaga ralámuli napu ekí eperégame nílige alé we'ká riógichi simíbale Esusi e'nemia. Napu'lige etesa, asíriga iwégame anele napurigá simela.

## 9

*Jena ruwimela Esusi bilé rió 'yóligo sujirigame*

<sup>1</sup> 'Lige Esusi bárkochi 'mole, 'lige na'lebo 'nálige simile. 'Lige bo'né bejtélachi sébale Kapernaumi anilichi we'ká riógichi. <sup>2</sup> 'Lige alé sebasa, bilé rió o'tóleru sujirigame tabilé gayéname eyena. Pe tabachi rekagá o'tóleru. Napu'lige Esusi etesa alué ralámuli 'la bi-jchígio Esusi 'la umabamio alué sujirigame sa'wá, 'liko Esusi anele alué nayume:

—'We iwera towí, alué chátiri mué na'tálica 'lige napu 'sile mué 'ma e'kárigime ju.

<sup>3</sup> 'Liko jaré alué Moisesi nila nulalí benírame ralámuli mochile alé, 'lige akele alanichi Esusi, 'lige anile a'bopi 'nátaga: «Pe

Onorúgamecho ju napu e'kame ju chátiri 'nátili. Ye rioka bo'nepi mayé Onorúgame ko. 'La enárigarigá julke 'liko.» <sup>4</sup> 'Lige Esusi 'we a'lá machile alieri 'nata mochigo alué benírame. 'Lige anele Esusi:

—¿Chonigá aliena chátiri 'nátili 'nata mochípeché 'emi? <sup>5</sup> ¿Churigá anilía 'nalina abé a'lá nítéko? ¿Pa'lá regá anilía: «Mué rió 'ma bujé ne mué alué chátiri 'nátili napurigá 'la moínámala mué rewagachi», regáchala anía: «O'weti ilísiga yati einawa»? <sup>6</sup> Jipe ne napu 'pa rewagáchika nawágame ju napurigá rió neraga, <sup>7</sup> 'la machírimala ne 'emi ralámuli wa'lú a'walí nígame ko ne Onorúgame nila napurigá bujémala ne chátiri 'nátili jena wijchímoba nerúgame.

'Lige Esusi anele alué rió sujirigame:

—Yati ilísiwa. 'Lige yati ku galírale simi-boa, 'ma pabega gemá.

<sup>7</sup> 'Lige 'ma sa'wígame ilísale alué rió, 'lige 'ma ku galírale simile. <sup>8</sup> 'Lige ralámuli napu ekí alé mochíligo e'negá asíriga ra'sálale. 'Lige anile alué ralámuli:

—Asíriga 'la ju Onorúgame, 'yale a'walí ye rió napurigá ralámuli sa'wámala.

*Jena ruwimela Esusi owíligo Mateo*

<sup>9</sup> 'Lige Esusi 'we enale chebilénami simiá, 'lige alué Esusi bilé rió etele i'kilí ajtíggame bilena u'tá galichi enomí goblalia, gobierno 'yuga nóchame. Mateo anilime nile alué rió enomí goblálome. 'Liko Esusi anele alué rió:

—Nabá ne 'yuga.

'Lige alué rioka o'weti ilísiga yati simile Esusi 'yuga.

<sup>10</sup> 'Lige abé alí, Esusi 'lige alué oyérame ralámuli 'yuga i'kilí mochile bilena galírale go'ame go'yá. 'Lige we'ká mochile alé Esusi si napuíka go'ame go'yá alué enomí goblálome 'lige uché jaré ralámuli napu tabilé oyérame nílige alué Moisesi nulalíla. <sup>11</sup> 'Lige alé sébale jaré bariseo, 'lige anele alué Esusi oyérame olagá:

—Alué 'emi benírame enomí goblálome 'yuga ajtikuru go'yá, 'lige uché jaré cha nokame ralámultiri 'yuga. ¿Chonigá alué 'yuga go'áché?

<sup>12</sup> Napu'lige Esusi akisá alué ra'íchali, bilé tétali ruwile:

—Ralámuli 'we a'lá a'ká tabilé nayume, pecha najkime júkó bilé 'yome. Alué 'we nayume ralámulika, 'la najkime ju bilé 'yome.

'Lige uché rajpé ruwile:

<sup>13</sup> —Yati simawa beniboa alué napu ne ruimeli ju: «Neka najkí napurigá ralámuli na'temaka járomala a'bopi. Yeka abéchgila najtégame júkó me'tigá go'ame kógilia Onorúgame.»† Neka nawákuru ralámuli bayemia napu 'la machime ju cha nokame

\* 9:6 E'nesi glosario «Hijo del Hombre». † 9:13 E'nesi Oseas 6:6.

ko. Neka tabilé nawá ralámuli bayemia napu tabilé bijchígame ju cha nokame ko.

<sup>14</sup> 'Lige pe'tá i'libékorikáchi sébale Juani oyérame ralámuli, alué Juani napu ralámuli rewaramé nílige. 'Lige anile alué ralámuli Esusi olagá:

—Ramué 'lige bariseo 'we ayúname niru. Aka mué oyérameka, ¿chonigá tabilé ayúnabeché?

'Lige Esúsika regá anele:

<sup>15</sup> —Napu'lige bilé rió newímichi, alué gompaniérola napu nejkúrimili ju napu'lige newichi, asíruga ra'sálígá mochímala. Alekeri tabilé ayunámala. 'Lige bilé rawé sebámala napu'lige alué newímili rió o'toboa. A'lige kulí ayunámala alué rió newímili gompaniérola, cháchigo seweka mochímime kame. (Yeka ruwime ju bilé rawé smeo jaré rió Esusi o'tomea. A'lige kulí 'we seweka mochímio Esusi oyérame.)

<sup>16</sup> 'Lige aminami anele:

—Uché bilé téta! ruyémala ne 'emi. Napu'lige o'páchala 'la nisa kárélasa napurigá pachókawa, tase nuebo chinite pachókawa, pe abéchigo we'lé chi'wámala'é ichósiga cho'yoga. <sup>17</sup> 'Lige aminami tabilé ro'áwak ajkágame i'wilí ba'wila<sup>†</sup> o'chérame chiliwilachi wi'chite newárigime. Napu'lige alué i'wilí ba'wila ronasá 'ma chi'wámala alué chiliwila. 'Lige 'ma go'límala alué i'wilí ba'wila. 'Lige aminami 'ma tabilé sirbe nímala alué chiliwila. Bijí pe kulí 'la ronoa ilígichi alué i'wilí ba'wila se'wí ro'ilime júkuru abé nuebo chiliwilachi, 'liko alarigá 'la tabilé 'wesi najsawámala. Yeka ruwime ju napurigá tabilé na'lowawa Esusi nila rejcholi 'lige uché bilé rejcholi 'yúriga.

<sup>18</sup> Napu'lige Esusi biji ra'icha ilígichi, bilé rió sébale alemi u'tá re'obachi nulame «sin-agoga» anilime, 'lige chojkóbisiga ilibale alé a'bé napu ilile alué Esusi, 'lige alué rió anele alué Esusi:

—Ne malala pe i'pebi mukú, pe rekó anáchaga, simibóaká sekate nochamia napurigá ku ajánamala.

<sup>19</sup> 'Liko Esusi simile alué rió 'yuga, 'lige alué Esusi oyérame abiena simíbale. <sup>20</sup> 'Ma boichimi 'yénigichi, bilé mukí a'bé nawiga chévale Esusi o'páchala. Alué mukí nayume nile asíruga we'lisi, rojpachí nayume nile, tabilé siné ajchábame nile elenia, 'ma makué oká bamí nile alué mukí nayua. <sup>21</sup> 'Lige alué mukí 'nátale: «Pe chébamala ne alué Esusi o'páchala napurigá 'la sa'wimela ne.» <sup>22</sup> 'Lige Esusi gu'liga e'nénale alué mukí, 'lige anele:

—'We iwera mué mukí. Mueka 'la bi-jchígalekurú ne 'la umabamio mué sa'wá, alekeri 'la sa'wíkurú mué jipe.

Pe yati neraga sa'wile alué mukí.

<sup>23</sup> 'Lige napu'lige Esusi bajkisá alué wa'lula galílachi, «sinagoga» anilichi nulame, etele «flauta» bujchigá rabisime jágichi, 'lige aminami asíruga we'ká ralámuli e'wele nalame. <sup>24</sup> 'Lige anele Esusi alué ralámuli:

—Buyásiga 'emi. Ye iweka pecha mukigá bo'iko, pe gojchigá bo'íkurú.

'Liko alué ralámuli achile alué Esusi lanichi, pe tabilé bijchígale, 'máchigo mukugá bo'íligame. <sup>25</sup> Napu'lige ralámuli ma'chige buyasa Esusi pachá galírale bajkile napu bo'ile alué iwé mukúgame. 'Lige sekachí cha'pile Esusi alué iwé, 'lige yati asísale alué iwé. <sup>26</sup> 'Liko suwábaga ralámuli ra'íchiga e'yénale alué alieti bochígimi riógachi napu echulú nílige alé ejiro.

*Jena ruwimela Esusi sa'wáligo oká siego 'lige bilé rió tabilé gayéname ra'icha*

<sup>27</sup> Napu'lige Esusi 'ma boichimi enágichi, oká rió tabilé ma'chílime guwánaka e'yénale e'wele ra'ichasia Esusi olagá:

—¡'La na'temápua ramué, mué Rabí riji-mala!

<sup>28</sup> Napu'lige Esusi bilena galírale pachami bajkisá, alué oká rió abiena alé sébale. 'Lige rukele Esusi alué oká rió:

—¿'Emika 'la bijchígilia ne 'la umabamio 'emi sa'wá?

—Ramueka 'we alá bijchígilia —anile alué oká rió.

<sup>29</sup> 'Liko alué Esusi nochale alé alué oká rió busílachi. 'Lige anele nochagá:

—'Emi 'la bijchígasaká ne 'la umabamio 'yoya, 'liko ku 'la gainámala e'nena 'emi.

<sup>30</sup> 'Liko yati ku 'la ma'chílale. 'Lige Esusi 'we anele alué oká rió:

—Tabilé 'wesi ralámuli ruyéwaká ye alieti.

<sup>31</sup> 'Lige alué oká rioka arigáchigo 'we ruwile a'kinana, asíruga we'ká ralámuli ruyele alé ichúrimi riógichi.

<sup>32</sup> Napu'lige pe kulí simíbachi alué oká napu tabilé ma'chílime nílige, jaré rió bilé rió a'pale tabilé gayéname ra'icha, pe u'kuchípala remónisi mochígame nile.

<sup>33</sup> Napu'lige Esusi 'ma buinasa alué u'kuchípala remónisi, 'liko 'ma gayénale ra'icha alué rió. 'Lige suwábaga ralámuli pe i'kilí jale e'negá, 'we ra'sálame kéréle rekó pe i'kilí jage, 'lige anile:

—Tajsiné alarigá 'ínilituru jena Israeli.

<sup>34</sup> 'Lige alué bariseo tabilé ganíliga mochile alarigá ikísá. 'Lige anile alué bariseo:

—Pe alué wa'lula remónisi napu Satanasi anilime ju 'smi a'walí 'yaa napurigá ye rió 'la buinámala u'kuchípala remónisi.

*Jena ruwimela Esusi 'we na'temaka etéligo ralámuli*

<sup>35</sup> 'Liko Esusi bochígimi we'ká riógachi simírale benírísia, 'lige u'kuchí re'obachi

<sup>†</sup> 9:17 E'nesi glosario «vino».



alé «sinagoga» anilime simírale benírísia Onorúgame nila ra'ichali napurigá Onorúgame 'ma 'la semáriga nulámio suwábaga ralámuli alawálachi, 'lige abiena we'ká e'karúgame nawalí sa'wasia.<sup>36</sup> Napu'lige we'ká ralámuli sebasá Esusi e'nemia, alué Esusi asíriga na'temaka etele alué ralámuli, tabilé a'walí nígame níraga etele alué ralámuli, pe napurigá bo'á tabilé bo'élime, alarigá etele.<sup>37</sup> 'Lige Esusi anele alué bo'né gompaniérola:

—Asíriga we'lé ju ri'ligó echerúgime, 'lige alué 'wímeka asíriga u'kabi ju.<sup>38</sup> Alekeri Onorúgame tániwaguru napurigá uché rapjé julámala 'wime napurigá gu'írimala alué uché jaré 'wime.<sup>5</sup>

## 10

*Jena ruwimela Esusi nóchali 'yáligo alué makué oká rió bo'né 'yuga járome*

<sup>1</sup> 'Lige Esusi bayele alué makué oká rió bo'né 'yuga járome\* napurigá a'bé jámala alé Esusi ilígichi. 'Lige a'walí 'yale Esusi alué makué oká rió napurigá u'kuchípala remónisi buinámala, 'lige aminami napurigá we'ká e'karúgame nawalí sa'wámala.

<sup>2</sup> Jena uchú alué makué oká rió rewalá Esusi 'yuga járome: alué Simoni napu oká rewégame nílige, Pegro anilime níligechigó alué Simoni, 'lige bilé Antresi anilime nílige napu Simoni bonila nílige, 'lige bilé Santiago anilime nílige alué napu Sebereo inolá nílige, 'lige bilé Juani anilime nílige napu Santiago bonila nílige, <sup>3</sup> 'lige Belipe, 'lige Bartolomé, 'lige Romasi, 'lige Mateo alué napu enomí goblálome nílige, 'lige Santiago anilime nile bilé, alué napu Alipeo inolá nílige, 'lige Tareo anilime rewégame nile uché bilé, <sup>4</sup> 'lige Simoni, alué napu geriyero nílige, 'lige Jurasi Iskariote† napu Esusi saíla gu'írile Esusi cha'piachi.

<sup>5</sup> Ye makué oká rió nulele Esusi regá anigá:

—Tase simáwaká alé tabilé jurío ralámuli epperélachi. Aminami tabilé simawa alé we'ká riógichi Samaritano ralámuli epperélachi. <sup>6</sup> Iligá si'né simáwaká alué ralámuli israelita epperélachi. Alué ralámulika napurigá bo'á e'wegágame, alarigá e'yéname ju. <sup>7</sup> Napu'lige simalia, rejcholi nejíwaká alué napu regá anime ju: «Amulí seba raweli napurigá Onorúgame nulámala ralámuli alawálachi.» <sup>8</sup> 'Lige asíriga 'yoowaká nayúkame ralámuli, 'lige aminami ku ajánawa alué ralámuli suwígame napurigá ku ajagá mochímala. 'Lige abiena sa'wawa alué nayume amoba sa'pachí

napurigá 'la lisensia nígame níkala re'obachi simiba. 'Lige ralámuli u'kuchípala remónisi mochígame 'ma buináwaká alué u'kuchípala remónisi. Tabilé najtegachí narele 'emi alué a'walí napurigá ralámuli 'yómala, tase goblálowa 'emi alué ralámuli.

<sup>9</sup> › Tabilé o'ká simawa enomí napu ju alué 'oro, plata, 'lige kobre. <sup>10</sup> Nibilé morali napurigá tábiriti ajchawa, nibilé rasígame o'páchiga simawa. Aminami nibilé rasígame akega simawa, nibilé bilé resola o'ká e'nawa, napugiti nóchaga e'yéname ka, ralámulika 'la gu'írimala 'lige kógimala go'ame.

<sup>11</sup> › Panápuri we'ká riógichi sebasíga, bilé rió galila 'yáwaká 'we a'lá rió bejtélachi 'lige alé che'lebáwaká napusi simalia uchéchigo bilénami. <sup>12</sup> Bilena galírale sebasíga, 'la repóriwa ralámuli. <sup>13</sup> Alué ralámuli alé galírale mochígame 'we a'lá nísaká, 'liko Onorúgame 'we a'lá gu'írimala alué ralámuli. <sup>14</sup> 'Emi tabilé lisensia 'yásiga napurigá alé che'lebámala, 'lige tabilé akinálisa 'emi ra'ichálila, 'liko 'ma yati simáwaká alé galírale mochíga. 'Lige alé we'ká riógichi 'ma simawa. 'Ma sawéwaká we'é bemolila ronochí chujkúgame. (Alueka pe ruyame neraga níkala ye alué ralámuli alé we'ká riógichi mochígame gastigo naremio.) <sup>15</sup> Neka 'la bijchiá aníguru, napu'lige seba raweli napurigá Onorúgame gustisia olámala ralámuli 'yuga, alué gastigóká napu narémala alué we'ká riógichi mochígame, abéchigo enátiri níkala alué gastigo napu narémili ju alué cha nokame ralámuli napu Soroma epperégame nile 'lige Gomora epperégame.

*Jena ruwimela jaré ralámuli tabilé galéligo Esusi*

<sup>16</sup> › ¡Neka cha nokame ralámuli epperélachi jula 'emi, alué ralámuli napurigá olí bo'á go'nálime! 'We a'lá 'nátiga mochiwa napu'lige alué ralámuli 'yuga mochíriga napurigá tabilé che ikiboa. <sup>17</sup> 'We a'lá 'nátiga mochiwa, alué cha nokame ralámuli o'tomela 'emi alé we'ká riógichi napu e'wélala mochí. 'Lige wejpisómala gujsite alé u'kuchí re'obachi jáwoga «sinagoga» anilime. <sup>18</sup> 'Lige aminami o'toboli ju 'emi alé napu mochí alué e'wélala selígame nulame, 'lige napu ajtí alué wa'lula rey napurigá alué nokimela gustisia olá 'emi 'yuga, 'la ne'chí oyérame kóriká, alekeri lolámala. 'Lige alarigá 'la ra'ichámala 'emi ne nila ra'ichali alué ralámuli e'wélala napu tabilé jurío ju. <sup>19</sup> Napu'lige 'emi alé napu mochí e'wélala o'tosuga, tase we'ká na'táwaká: «¿Tachiri chonimé ne?

§ 9:38 Esúsika pe anime kéréle we'ká ralámuli 'ma listo mochigo napurigá gu'írwa, iligá pe u'kabi ralámuli e'yena Onorúgame nila ra'ichali benírige. \* 10:1 E'nesi glosario «apóstol». † 10:4 Iskariote aniaká pe Kiriote bejtégame anime ju.

¿Churigá ruyémala ne?» Napu'lige seba, Onorúgame 'we nejkúrimala napurigá 'la semáriga ra'íchawa, <sup>20</sup> napugiti tabilé 'emi nímala napu na'támala alué ra'íchali napu ra'íchame ju 'emi, O'nó Onorúgame Alawala 'símala ne'já alué 'nátili.

<sup>21</sup> › Jaré pe rijimala ke ba'chila o bonila saíla gainámala. 'Lige alé e'wélala mochígichi ne'jímala napurigá alué e'wélala nokimela me'á. 'Lige bilé o'nó abiena 'ma ne'jímala bo'né inolá. Tabilé na'temámala rekó bo'né inolá kachi. 'Lige inolaka 'ma alué bo'né o'nola 'lige eyélatiri saíla gainámala, 'lige ne'jímala alé e'wélala mochígichi napurigá alué e'wélala nokimela me'á. <sup>22</sup> Ne'chí oyérame kóriká, suwábaga ralámulite cha anewa 'emi. 'Emi tabilé guwana rujsúsaká, abirigá jasa napusi suwi ne'chí oyérama, 'liko 'pa rewagachi o'tomé ne 'emi. <sup>23</sup> Napu'lige cha nokisá bilena we'ká riógichi mochígama ralámuli, najátaga e'yénasa 'emi me'linálaga 'liko yati chebilena júmasawaguru. Neka 'la bijchiá aníguru, bajchabé nawamio alué napu nawale 'pa rewagáchika napurigá rió neraga 'emi ta'chó suwábichi ne nila ra'íchali beniria bochígimi we'ká riógachi jena Israeli anilichi.

<sup>24-25</sup> › Tase majawa napu'lige cha anichi ralámuli. Ne abienachigó cha anilime júchigó, 'lige ne'chí alarigá anésiga, alué ralámuli abiena cha animela 'emi olagá. Alarigá ju bilé benime 'yuga, napurigá alué benírame. Bilé nóchame ju napurigá wa'lula. 'Lige Belsebú anésiga ne'chí, napu aníame ju Wa'lula Suwábaga 'Yégili, alué ralámuli abiena alarigá anémala 'emi olagá.

*Jena ruwimela Esusi ruwíligo chieri 'nalina majátéko*

<sup>26</sup> › Tase majawa alué ralámuli. Rekó cha nokachi rukó tabilé ma'chígichi, Onorúgameka abiena 'la etea ajtí suwábaga 'lige abé a'kinana 'ma machiboli ju suwábaga napu alué ralámuli nokogá e'yena. <sup>27</sup> 'Liko tase majawaguru. Napu'lige ne ruwichi bilé ra'íchali rukó, 'émika rawé ruipóguru. Ne ruisáká i'kilí ra'íchaga 'emi najkálichi a'bé chujká napurigá tabilé akémala uché jaré, tase majawaguru e'wele ra'íchaga ruigá rawé galimopa jaga napurigá we'ká ralámuli akimela. <sup>28</sup> Tase majawa alué ralámuli napu uché jaré ralámuli me'agá e'yéname ju, alué ralámulika rekó me'ame ke pecha umubámalagó 'emi alawala me'á. Majawaguru Onorúgame 'nalina napu 'la alawala 'nalina me'ame ju napu 'ma 'légana injiémochi pame ju 'ma me'lisá.

<sup>29</sup> › ¿'Émika ralineme ju alué oká chulugí pe bilé pésochi? Tabilé 'me najteme ju alué chulugí, O'nó Onorúgame 'we a'lá machime

ju napu'lige suwichi alué chulugí. 'Lige alué chulugí suwime ju napu lisensia 'yame ju Onorúgame. <sup>30</sup> Onorúgame asiriga 'la tétiga ajtí a'pílipi gujpá 'emi mo'ólachi jágama, 'lige asiriga repume ju aminami. <sup>31</sup> 'Lige alarigá tabilé majawa, Onorúgameka asiriga 'la repúmili júkuru 'emi me'tigá alué chulugí, 'émika abéchigo 'la najtékame kame me'tigá alué we'ká chulugí.

<sup>32</sup> › Alué rió tase chijúnaga ruisá alué uché jaré ralámuli ne'chí oyérame ko, 'lige néchigó abiena 'we a'lá ruyémala Onorúgame 'pa rewagachi ajtígama alué rió ne'chí oyérame ko. <sup>33</sup> Jaré 'emi tabilé ne'chí oyérame korigá ruyésaká uché jaré ralámuli, 'liko neka tabilé machime korimela 'emi O'nó Onorúgame 'pa rewagachi ajtígama ruyea.

*Jena ruwimela Esusi ruwíligo ralámuli nakomio*

<sup>34</sup> › ¿'Lacha mayé 'emi ralámuli ne nawáligo ra'mamia 'emi ralámuli jena wijchimoba nakoga ejperégame? Neka ruwí tase ra'mamia nawagó. Neka iligá nawákuru sairárimia. <sup>35</sup> 'Lige bilé ralámuli bo'né o'nola sairámala. 'Lige bilé mukí bo'né eyela sairámala. 'Lige mo'lila bo'né wasila sairámala. <sup>36</sup> Alué napu bi'lénapi galírale ejperégame ju a'bópika sairámala.† Alarigá ikimela napu'lige ralámuli o'wina ne'chí oyeria.

<sup>37</sup> › Bilé ralámuli 'we galeme nisa bo'né o'nola 'lige bo'né eyela me'tigá ne'chí, 'liko alué ralámulika tabilé ne'chí oyérame nímala. Bilé ralámuli 'we galeme nisa bo'né inolá 'lige bo'né malala me'tigá ne'chí, 'liko alué ralámuli tabilé ne'chí oyérame nímala. <sup>38</sup> Bilé ralámuli tabilé e'wame napu nulá Onorúgame 'lige tabilé resí ikinálime, alueka tabilé ne'chí oyérame nímala rekó ne'chí 'yuga eyéname ke. <sup>39</sup> Alué ralámuli majame ka ne'chí oyérama, alueka tase rewimela semati raweli. Bilé ralámuli tabilé majame ka mukigá ne'chí oyérama, alueka 'we semáriga na'támala Onorúgame 'yuga. Tabilé chéré rekó mukugé, alué ralámuli abiena 'la Onorúgame 'yuga asimela.

<sup>40</sup> › Jaré ralámuli 'la nirásaká 'emi, pe a'chigóriga ju napurigá ne'chí niralia. Jaré ralámuli 'la nirásaká ne'chí, pe a'chigóriga ju napurigá Onorúgame niralia, alué napu 'sile ne'chí jula. <sup>41</sup> Bilé rió 'la niraasa apiépiri alué napu ruyame ju napu Onorúgame anele, 'liko alué rió asiriga 'la semati raweli narémala, a'chigóriga napurigá nareme ju alué rió napu ruyame ju napu Onorúgame anele. Bilé rió 'la nirásaká uché bilé 'we a'lá rió napu 'we a'lá sébali olame ju napu Onorúgame najkí, 'liko alué rió asiriga 'la semati raweli narémala napurigá nareme ju alué rió napu 'we a'lá sébali olame ju

† 10:36 E'nesi Miqueas 7:6.

napu najki Onorúgame. <sup>42</sup> Apiépiri ralámuli 'la 'yásaká pe bilé baso ba'wi ne 'yuga járome napurigá bajímala, 'we a'lá semati raweli narémala. Alueka 'we a'lá bijchiá ju.

## 11

*Jena ruwimela Juani júlaligo jaré rió Esusi rukéniliga*

<sup>1</sup> Napu'lige alué Esusi 'we a'lá ruyesa alué makué oká rió Esusi 'yuga járome, alésiko alué Esusi 'ma simile we'kanami pueblo ralámuli benírasi rejcholi Onorúgame nila.

<sup>2</sup> 'Lige Juani galírale bajcháriga asigá akele Esusi 'we a'lá benirio ralámuli Onorúgame ra'ichálila 'lige 'we a'lá sa'wao nayúkame, alué Juani regá 'nátele: «Pe ye Esusi kéréko Onorúgamete julárigame napurigá gu'irimala ramué, siné kachi pe alué kéréko Kristo anilime.» Alarigá 'nátele alué Juani. 'Liko júlale jaré rió alué Juani napu aba alué Juani gompaniérola nile <sup>3</sup>napurigá regá rukémala:

—¿Mué ju napu nawámili nilige ramué gu'irimia, o chebiléchala ju?

<sup>4</sup> 'Lige Esusi nejele:

—Simasi Juani ruyewa churigá ka ra'ichali napu 'emi akele jena jipe, 'lige abiena ruyéwaká napu 'emi etewá jipe. <sup>5</sup> Ruyéwaká alué tabilé ma'chilime 'ma ku ma'chilio, 'lige sujirigame ralámuli 'ma ku 'la gayenio e'yenia, 'lige alué ralámuli amoba sa'pachi nayume 'ma ku sa'wiligo 'lige 'ma lisensia nígame ko napurigá simámala re'obachi, 'lige alué najkacholo ralámuli 'ma ku akeo, 'lige suwígame 'ma ku ajanio, 'lige tabilé nígame 'ma akea mochigo alué 'we a'lala ra'ichali Onorúgame nila ra'ichali. <sup>6</sup> 'We ganílga eté Onorúgame alué ralámuli napu tabilé guwana rujsi.

<sup>7</sup> Napu'lige alué rió Juani gompaniérola simasa, Esusi chojkile ruyea ralámuli alarigáriga níligo Juani. Regá anile:

—Napu'lige 'emi 'mi alé simibalige alé napu tabilé 'me u'kume ju, alé napu Juani asálige nawésali ruyea ralámuli 'yuga, ¿tachiri e'nemia simárupeché? ¿Pe bilé rió napuyépiri rejcholi oyérame? <sup>8</sup> ¿Tachiri e'nemia simárukó 'liko? ¿Simáruchalá e'nemia bilé rió 'we a'lá semátiri o'páchigime? 'Emi 'la machilke alué 'we a'lá a'ká o'páchigime ralámulika alué e'wélala galíachi mochime ko. <sup>9</sup> ¿Liko tachiri e'nemia simárupeché? ¿Bilé rió napu ruyame ju napu anele Onorúgame, alué e'nemia simaru? Ju, alué e'nemia simábale 'emi. Aminami alueka 'we najtékame nóchali nígame júpá, me'tigá alué uché jaré ralámuli napu ruyame níligo napu anéligo Onorúgame. <sup>10</sup> Pe alué Juani

olagá aní alué osilí 'we 'ya nerúgame napu regá aní:

Neka julámala bilé rió napurigá ralámuli ruyémala mué sebámili ko jena wijchimoba.

'Lige alué 'símala gatea bowé napurigá mué sebámala alé.†

Alué Onorúgamete julárigame ka pe Juani ju. <sup>11</sup> Neka 'la bijchiá aníguru: Alué Juani napu ralámuli rewaramé níligo, alué ju suwábaga ralámuli me'tigá najtékame napu ekí mochí jena wijchimoba. Neka abiena ruwí bilé rió tase najtékame ko, napu'lige a'resa napurigá Onorúgame nulémala, 'liko 'we a'lá najtékame nimio Onorúgame níriga me'tigá Juani nochálila.

<sup>12</sup> › Napusí Juani we'ká ralámuli benírasi, we'ká ralámuli cha nokame sairuga mochí napu nulá Onorúgame. 'Lige 'ma na'minánili alué nulalí† (Alué ralámuli ju napurigá bo'á go'lechi uchúkame. Napu'lige nawame ju bo'elo i'pumia, júmaka buyame ju.)

<sup>13</sup> Suwábaga ralámuli 'we 'ya mochígame napu ruyame nile napu anile Onorúgame, 'lige abiena alué Moisesi nila ra'ichali, ruwile churigá níligo níligo alué Juani ralámuli rewaramé ba'wichí jáwaga. <sup>14</sup> Alué ralámuli anime ke uché bilé napurigá Elíasi§ nawamio. Neka aníguru alué Juani ko alué Elíasi ju napu nawámili níligo. <sup>15</sup> 'La najkégame nírika napurigá akiboa, asíruga 'la gepúlime júkuru.

<sup>16</sup> › ¿'La chieti alué ralámuli jipe mochígame? Pe alué okaná chojkégame kuchí 'kuchi kárékuru napu mochime ju alé we'ká riógachi nasípami re'ea, napu re'énilime ju uché jaré 'yuga, napu regá aneme ju alué uché bilena chojkégame kuchítiri napu re'eme ju: <sup>17</sup> «Bucheru alué baká napurigá 'emi yawimela, tabiléchigo yawíko 'emi. 'Lige 'we sewékame wíká wíkaráruturu, 'lige 'emi tabilé nalákuru.»

<sup>18</sup> 'Lige nawákuru Juani alué napu tabilé we'ká tábiri go'yame níligo, tase napurigá uché jaré ralámuli, 'lige aminami tabilé bajime níligo alué i'wilí ba'wila rekútame 'lige regá aneme júkuru alué ralámuli jipe mochígame: «Alueka pe u'kuchípala remónisi ajchágame ju.» <sup>19</sup> 'Lige nawákuru alué Onorúgamete julárigame 'pa rewagáchika, 'lige suwábaga go'ame go'yame júkuru napu ekí go'yame ju ralámuli jena wijchimoba mochígame, 'lige abiena bajime júkuru alué i'wilí ba'wila rekútame. 'Lige regá anéguru ralámuli: «Alueka 'ma rasíruga go'yame júkuru, 'lige aminami asíruga bajime júkuru, 'lige aminami 'we a'lá

\* **11:7** Matéoka aní: ¿Pe napurigá bilé gajsalá ko pe ekate noká iligame? † **11:10** E'nesi San Lucas 1:76. ‡ **11:12** Siné kachi ye bersikulo regá anime kéré: Napusí Juani we'ká ralámuli benírasi, we'ká ralámuli 'we najki napurigá Onorúgamete nulewa. § **11:14** Alué Elíasika napu 'we 'ya bejtégame nile ruyame nile napu anele Onorúgame ta'chó ochérachi Juani.

amigo ju rálámuli 'yuga enomí goblálome 'lige chejaré rálámulitiri alué 'we resítiri sulégame.» 'Wéchigo 'la ma'chígime néréko 'we a'lá benégame ko Onorúgame, 'we a'lá ma'chígime nérékuru 'ma 'la we'ká rálámuli sa'wáligo. Suwábaga a'lá sébali olame nile.

*Jena ruwimela Esusi ená anéligo alué chátiri rálámuli*

<sup>20</sup> 'Liko Esusi chojkile ená anea alué cha nokame rálámuli alé we'ká riógachi alé napu 'yóligo we'ká nayúkame alué Esusi. Ená anele pecha a'rélígame alué chátiri nóchali. Regá anele:

<sup>21</sup> —¡Resía 'emi rálámuli Korasini anilichi epperégame! ¡Resía 'emi rálámuli Betsáira anilichi epperégame! Neka 'we a'lá sa'wigéturu alé epperégame rálámuli Onorúgame a'walílate napu tabilé 'wesi rálámuli gayéname ju alarigá sa'wá, 'lige 'emi abirigá tabilé a'réturu alué resítiri nóchali. Rálámuli 'ya epperégame alé Tiro anilichi epperégame 'lige Sironi anilichi epperégame abiena asiriga 'we cha nokame rálámuli kéturu. Ne 'we a'lá sa'wasa alué rálámuli alé, 'lige o'pachátimituru alué o'pacha 'we chajótígame, 'lige mochíbimituru bilena najpisochi napurigá machimela rálámuli 'ma a'rélígame alué chátiri 'nátili. <sup>22</sup> Napu'lige seba raweli gastigo narémichi 'emi rálámuli Korasini epperégame 'lige Betsáira epperégame, a'lige rawé 'emi rálámuli uché rajpé a'wágame gastigo narémala me'tigá alué rálámuli cha nokame alé Tiro epperégame 'lige Sironi epperégame. <sup>23</sup> 'Emi rálámuli Kapernaumi anilichi we'ká riógichi epperégame, ¿'émika 'la bijchiá bijchigi 'pa rewagachi moinamio 'emi? Onorúgameka tabilé alarigá 'nata. 'Émika wamí 'légana injiérnochi simámili júkuru. Neka alé we'ká riógichi 'emi epperélachi asiriga 'la sa'wigéturu ne nayúkame, 'émika tabiléchigo a'réléko alué chátiri 'nátili. Alué chátiri rálámuli 'ya epperégame Soroma anilichi we'ká riógichi, etésaká aliena 'la umébiga ne sa'wá rálámuli, 'ma a'rémítibá alué chátiri 'nátili, 'lige bijí 'la we'ká riólimiturubá alé we'ká riógichi Soroma anilichi. <sup>24</sup> Neka anéguru 'emi rálámuli Kapernaumi anilichi we'ká riógichi epperégame, napu'lige raweli sebase napurigá Onorúgame wanápamia chátiri 'nátame rálámuli (gustisia olámala), uché rajpé a'wágame gastigo narémala me'tigá alué rálámuli napu Soroma anilichi epperégame nílige.

*Jena ruwimela Esusi aníligo nejkúrimio napurigá 'la resibamala rálámuli*

<sup>25</sup> 'Liko regá anile Esusi:

—Mué O'nó Onorúgame, mueka asiriga wa'lú júkuru 'lige mueka rewagachi nulame júkuru, 'lige aminami jena wijchimo. Neka 'we a'lá ra'íchame ju mué olagá,

mueka tabilé lisensia 'yale alué rálámuli riólame napurigá námamala alarigá ko mué, alué rálámuli napu 'nátame ju a'bopi 'we a'lá eppénigime ko. Mueka 'wéchigo a'lá gu'irame júko alué rálámuli tabilé riólame napurigá námamala churigá ko mué. Rálámuli alué tabilé riólame ka, alueka 'we listo ju, alueka 'la 'we a'lá námaka akeme ju. <sup>26</sup> Mué O'nó Onorúgame, alarigá ju. Alarigá newigá ganílame ju mué.

<sup>27</sup> 'Lige Esusi anile:

—Ne O'nola suwábaga 'yáturu ne'chí nóchali, 'nátili 'lige a'wali. Tase 'wesi machí churigá ko Onorúgame Inolá, pe O'nó Onorúgame 'la machí. 'Lige tabilé 'wesi machí churigá ko Onorúgame, pe alué Onorúgame Inolá 'la machime ju churigá ko O'nó Onorúgame. Ne, Onorúgame Inolá, 'we gu'irame ju ne uché jaré rálámuli napu ne najkí napurigá alué uché jaré rálámuli 'la námamala churigá ko Onorúgame. <sup>28</sup> Suwábaga 'emi napu ekí 'we resibaka mochí we'ká 'nátaga, jeka simasi, ne 'la nejkúramala napurigá 'emi 'la resibamala. <sup>29</sup> 'La eliwa ne napurigá ne 'símala benira, 'liko napurigá oká oisí bulurúgame nímalá ramué araro banasuka e'yénigime, siné kachi 'la benimela nóchali ne benírichi. Neka 'we i'kilí ju. 'Lige aminami tabilé riólame ju ne. Ne'chí 'yuga beniaká 'la tabilé we'ká 'nátame niwa, neka alé asimémpá 'emi gu'iria. 'Lige aminami asiriga 'la resibapua. <sup>30</sup> Rálámuli ne'chí 'yuga nóchameka asiriga 'la ganílaga mochímala. Tabilé bejtégame ju ne'chí 'yuga nochalia.

## 12

*Jena ruwimela Esusi 'yuga járome ri'púníligo ri'ligó bilé rawé resibulichi*

<sup>1</sup> A'kina bilé rawé resibalichi ri'ligó echégachimi eyénale Esusi alué bo'né 'yuga járome 'yuga. 'Lige alué bo'né 'yuga járome e'luíle 'lige rejpúnele ri'ligó mulalá 'lige go'ale rakala mojsika. <sup>2</sup> Napu'lige bariseo etesa alietí, anele Esusi:

—'We a'lá e'né alué mué 'yuga járome. Jipe rawé resibulichi júkuru tabilé nochálíchi ju, pecha ri'púnálime júko ri'ligó.

<sup>3</sup> 'Lige Esusi anele alué bariseo:

—¿Tacha leérame ju 'emi osilíchi napu ruyame ju churigá 'siligo alué 'ya bejtégame rió Rabí anilime napu'lige Rabí e'luísa 'lige aminami alué rálámuli Rabí 'yuga e'yéname nílige? <sup>4</sup> Alueka alé Onorúgame galílachi bajkile 'lige baní o'tole Onorúgame kógilime alé pachá Onorúgame galílachi mochígame. Alué Rabika 'lige alué rálámuli Rabí 'yuga e'yéname go'ale alué baní, tabilé lisensia nígame nile napurigá go'mela alué baní, pe baleka 'la lisensia nígame nile. <sup>5</sup> ¿Tabilé siné leérame ju 'emi alué apeli

napu chujkú Moisesi osilila, balé tabilé resíbame ko bilé rawé resíbilichi? Abirigá pecha resítiri júkó rekó alué balé noche bilé rawé resíbilichi. <sup>6</sup> Neka aníguru, napu ne nulá abé najtékame ju me'tigá alué Moisesi nila nulalí. <sup>7</sup> 'Émika pecha 'la námaka leérame júkó alué Onorúgame nila ra'íchali. Regá aní Onorúgame nila ra'íchali: «Neka najki napurigá 'emi 'we na'temaka etémala uché jaré ralámuli, tase pe ajágame me'liame najki ne ne'chí kógilime.» 'Emi 'we a'lá námasaká 'liko pecha chojkila neraga che'wámiko alué ralámuli tabilé resí nokágame, <sup>8</sup> napugiti ne kame Onorúgamete julárigame 'pa rewagáchika napurigá rió neraga wa'lula kame ne resíbalichi rawé.

*Jena ruwimela Esusi sa'wáligo bilé rió gajpólígame sekégame resíbulichi rawé*

<sup>9</sup> 'Lige Esusi uchéchigo bilena simile, simile bilé u'tá re'obá ilígichi «sinagoga» anilime. <sup>10</sup> 'Lige alé asale bilé rió bilena sekala sujirigame sekégame, 'lige alemi jale jaré bariseo 'lige rukele pe machinálíga choniá anirá alué Esusi, nejiwa olale se'wináriga anisáká. Regá rukele:

—¿'La ju napurigá bilé rawé resíbilichi 'yowa nayúkame?

<sup>11</sup> 'Lige Esúsika nejele:

—Bilé rawé bilé bo'á wijchisá 'emi bujkula bilena rejkolíchimi bilé rawé resíbilichi, ¿'Lacha ta ma'chí pámalá 'we 'emi na'temaka? <sup>12</sup> ¿Tacha abé najtékame júkó bilé ralámuli me'tigá bilé bo'á? Bilé ralámulika uché rajpé najtékame júkuru me'tigá bilé bo'á. 'Liko abiena 'la ikíaréleke napurigá 'yowa ralámuli nayume bilé rawé resíbilichi.

<sup>13</sup> 'Liko Esusi anele alué nayume:

—'Ma ku wajchinábá seká.

Napu'lige wajchinasa 'ma ku sa'wile. <sup>14</sup> 'Liko bariseo ma'chige simíbale 'lige chojkile ra'icha a'boi churigá 'la nítiká me'liá Esusi.

*Jena ruwimela Onorúgame ra'íchálila 'we a'lá ruwílígo 'ya churigá 'simio Esusi*

<sup>15</sup> Napu'lige Esusi machisá me'libólikó bariséote, 'liko Esusi yati simile. 'Lige simisá asíríga we'ká ralámuli najátele guwana. 'Lige Esusi 'we 'yole ralámuli nayume napu alemi e'yénale alemi guwánami, <sup>16</sup> 'lige 'we anile ralámuli napurigá ralámuli tabilé ruwimela chieri ko bo'né, <sup>17</sup> napurigá 'la sébali ikímela napurigá ruyélege Onorúgame alué abé 'ya bejtégame rió Isaiási anilime napu ruhame nile napu Onorúgame anélige ta'chó ochérachi Esusi. Anile:

<sup>18</sup> 'We a'lá e'nésibá.

Ye júkuru ne 'yuga nóchame.

Yeka ne cha'píturu ne bo'né.

Neka 'we galé ye rió,

asíríga ganúlíga ajtí ne ye rió 'yuga.

Neka ne alawala 'yama oláguru.

'Lige alué 'símala suwábaga chojkégame ralámuli ruyea

alué napu ne najkí.

<sup>19</sup> Alueka tabilé resí animela,

nibilé e'wele ra'íchámala,

nibilé sínámala

alemi napu we'ká riógachi ju.

<sup>20</sup> Alueka 'we a'lá niraga etémala

alué ralámuli tabilé nígame

napu tabilé gayéname ju bo'nepi nemía.

Alueka abisibi 'we nulámala

napusi 'ma a'lá sébali olá ralámuli napu nulá Onorúgame.

<sup>21</sup> Suwábaga chojkégame ralámuli jena wijchimoba mochígame

'we a'lá bijchígimala 'we a'lá gu'irimia alué.\*

*Jena ruwimela bariseo ruwílígo Esusi Remónisi a'walíla nígame ko*

<sup>22</sup> 'Liko Esusi bilé rió tabilé machílíme o'tóleru, 'lige aminami tabilé gayéname nile alué rió ra'icha, u'kuchípala remónisi ajchágame rió nile. 'Lige Esusi 'ma 'yóole, 'liko 'ma ma'chílíle, 'lige aminami 'ma gayénale ra'icha. <sup>23</sup> 'Lige alué ralámuli napu najátale Esusi rukele a'bopi napurigá majáganti neraga:

—¿Ye jule Esusi Rabí rijimela, alué napu ramué gu'irimili ju? Tabilé machirúbá.

<sup>24</sup> 'Lige alué bariseo akisá alanichi alué ralámuli, 'lige anile:

—Napu'lige buyana u'kuchípala remónisi ye rió, pe alué u'kuchípala remónisi o'nola nejlála a'walite buyáname ju, alué u'kuchípala remónisi o'nola napu Belsebú anilime ju 'lige aminami Satanasi anilime ju.

<sup>25</sup> Esusi 'we a'lá machile alieti 'nata mochigo alué bariseo, alekeri anele:

—Bilena ejiro pe a'bopi na'áwasa ralámuli, 'liko tabilé sirbe nímala alué ejiro. Abiena a'chigóríga ju ralámuli we'ká riógachi mochígame, abiena alarigá 'ínili ralámuli bilena galírale rijimá we'kaka napuika riógame nisa 'lige pe na'áwame nisa a'boi, tabilé gayéname ju bilé tábiri nóchali newá.

<sup>26</sup> 'Lige alué Satanasi ma'chí pasa alué u'tabela remónisi, ¿'lacha a'wálimalawé alué Satanasi alarigá 'sísaká? Tabilé gainámala bo'né nila nóchali newá. <sup>27</sup> 'Lige ne ma'chí pame nísaká alué u'kuchípala remónisi

Belsebú a'walílate, ¿chieri 'yame júkó a'walí alué 'emi gompaniérola napu'lige buyáname ju alué u'kuchípala remónisi? Remónisi nejime júlé. 'Émika tabilé remónisi 'sime kóríguru. 'Liko tabilé machígá aní 'emi ne'chí chojkila neraga che'wáa. <sup>28</sup> Neka Onorúgame Alawala a'walílate buyáname

\* 12:21 E'nesi Isaiás 42:1-4.

júkuru u'kuchípala remónisi. Yeka pe aniname ju Onorúgame 'ma nulá ajtigó jena.

<sup>29</sup> › Bilé rió tabilé gainámala chigoa bilé rió a'wágame galílachi, alué rió a'wágame tabilé buluruga asisáká. Napu'lige alué rió buluruga ajtígichi, a'liko 'la gainámala tábiri chigoa.†

<sup>30</sup> › Tabilé ne'chí oyérame ka pe ne saíla ju. Tabilé nejkura mochime ka alué oyérame ralámuli bailíchi, alueka mejká jula mochime ju alé napu ne ajtí, napurigá olí bo'á majárame ju. Alarigá ju alué ralámuli.

<sup>31</sup> › Abiena ruimé ne bilé ra'íchali: Onorúgameka 'la e'kame júkuru suwábaga alué chátiri ra'íchali napu ra'íchame ju ralámuli, nobi tabiléchigo e'kame júko alué ralámuli napu 'we resí anegá ra'íchame ju Onorúgame Alawala olagá. <sup>32</sup> Jaré ralámuli 'we gawéliga ra'ichasa Onorúgamete julárigame 'pa rewagáchika olagá, Onorúgameka abiena 'la e'kámala alué ralámuli. Onorúgame Alawala gawéliga ra'ichásaká, 'liko Onorúgameka tabilé siné e'kámala. Tabilé siné e'kámala jipe jena wijchimoba nibilé abé i'libeko napu'lige mukusuga.‡

*Jena ruwimela Esusi ruwligo bilé rojá 'we a'lálaká a'ká rakeme ko*

<sup>33</sup> › 'We a'lá repúpua bilé rojá 'liko 'la a'ká rakémala. Bilé rojá tabilé a'lá repútigame, alueka tabilé a'ká rakémala. Rakala e'néniga machiame júturu pala 'la ka alué rojá o tabilé 'la ko ma. <sup>34</sup> ¡'Émika pe napurigá sinowí 'kúchila júkuru! 'Émika asíriga cha nokame ralámuli júkuru, 'lige ¿'lacha a'ká ra'íchali ra'ichámiliwé 'emi, pe cha nokame ralámuli ke? <sup>35</sup> Bilé rió 'we a'lá 'nátame ka 'we a'lá ra'íchame júkuru, alué rioka 'wéchigo a'lá 'nátame nímime. Bilé rió tabilé a'lá 'nátame ka, alué rioka tabilé a'lá tábiri ra'íchame júkuru, alueka pecha a'lá 'nátali 'nátame nímime. <sup>36</sup> Neka aníguru, napu'lige raweli sébasa napurigá Onorúgame gustisia olámala, a'pilipi rió neraga ruimeli ju cha anigá eyéniligó. <sup>37</sup> Mué ra'ichálila 'we a'lá nejkúrisa napurigá tabilé narémala gastigo 'we a'lá a'ká nísaká alué ra'íchali. Tabilé a'ká nísaká alué ra'íchali, 'liko mué walú gastigo narémala.

*Jena ruwimela alué cha nokame ralámuli Esusi owligo napurigá Esusi 'we a'lá semátiri tábiri newámala*

<sup>38</sup> 'Liko jaré bariseo 'lige jaré Moisesi nila nulalí benírame anele Esusi:

—Mué rió Onorúgame nila ra'íchali benírame, ramueka 'we eténili alué 'we

semátiri tábiri newachi mué,<sup>§</sup> alué napu ta'wesi rió gayéname ju newá.

<sup>39</sup> 'Lige Esúsika anele:

—Ye 'we i'nílime ralámuli, tabilé sébali olame napu najkí Onorúgame 'la sébali olámirisá, rejoa aníguru napurigá ne newámala 'we semátiri tábiri napu tabilé gayéname ju ralámuli. Neka tabiléchigo newámalagó napurigá 'emi 'la machimela. Pe bi'lepi tábiri newámala ne abé i'libeko, pe alué napu ne newámili ju pe aba alieri nímala napu ikílige alué 'ya bejtégame rió napu ruyame nile napu Onorúgame anele, Jonasi anilime. <sup>40</sup> Alueka ro'chí rojpálíchi asálekurú bakia rawé 'lige bakia rukó, alué walú ro'chí napu walú ba'wichí oyame ju. Alarigá ikimela alué Onorúgamete julárigame 'pa rewagáchika, pachá jena gawíchi bo'imela bakia rawé 'lige bakia rukó. <sup>41</sup> Alé we'ká riógichi napu Jonasi rejcholi nejile, aleka Nínibe anilíchi nile. Napu'lige alué ralámuli akisá alé alué rejcholi, 'la a'rélekuru alué chátiri 'nátali 'nata. Napu'lige 'emi ruyechi ne ye rejcholi, 'émika tabilé a'reme júkuru alué chátiri 'nátali 'nata. Neka abéchigo walú najtékame júkuru me'tigá alué Jonasi. Napu'lige seba raweli napu Onorúgame gustisia olámala alué ralámuli chátiri 'nátame, 'liko alué ralámuli Nínibe mochígame chojkila neraga che'wámala 'emi tabilé ku guwana 'nátame koriká. <sup>42</sup> Napu'lige sebase raweli gastigo (juicio) narémichi ralámuli jipe epperégame, alué walúla mukí napu nulame nile alé Saba anilíchi napu 'we 'ya bejtégame nile ku ajánamala a'lige rawé, 'lige ra'ichámala sairúgame neraga alué ralámuli jipe epperégame olagá. Alué mukíka napu'lige biji ajagá asigá 'we mejkaka nawálekuru gepumia alué Salomoni nila rejcholi 'we benegá ra'íchame, 'lige jipe jena ajtíkuru ne napu abé benegá ra'íchame ju me'tigá alué Salomoni, 'lige 'émika tabilé gepúnili ne nila rejcholi.

*Jena ruwimela Esusi ruwligo tabilé 'la ko alué chátiri nóchali a'rílla tabilé Onorúgame 'yuga 'nátame níríká*

<sup>43</sup> › Napu'lige alué u'tabela remónisi ma'chínasa bilé ralámulíchi jami wakígichimi simime júkuru 'yásiga bilena 'we a'lá suéríkáchi resibamia, nobi tabiléchigo rewame júko. <sup>44</sup> 'Liko regá anime ju: «Ku simé ne napu ajtí alué rió napu ne galila nílige, 'lige ku pachágana bajkimé ne, alé pacháganaka ne galílachi kame.» 'Lige ku alé sébaga 'we a'lá bi'wigá iligame eteme ju abé 'la gatérigame pechítigame, (pe tabilé che'sime neraga etéwili ju alué

† 12:29 Onorúgame Alawala 'ma bulugá ajchale Remónisi, alekeri 'la gayena ne u'kuchípala remónisi Duyana. ‡ 12:32 Esúsika ne'ocha alué ralámuli anilígame Remónisi alawala ajchágame ko alué. § 12:38 E'nesi 16:1.

rió. Abirigáchigo tabilé ajchágame kéréko Onorúgame Alawala pachágana sulachí.)  
 45 'Liko alu'é u'tabela remónisi chéchigo gichao u'kuchípala remónisi, abéchigo enátiri napabume ju, 'lige suwábaga alu'é laki remónisi alé pachágana alu'é riochi mo'ime ju. 'Lige alu'é rioka abéchigo cha nokame nimala me'tigá bajchabé rawé. Alarigá ikimela ye ralámuli tabilé a'ká. Pe i'sínimi a'reme júkuru 'emi alu'é chátiri nóchali, 'lige 'emi tabilé ajchágame nísaká Onorúgame Alawala a'kinana rawé, abéchigo cha nokame gainámala 'emi.

*Jena ruwimela Esusi ruwíligo chieri ko eyela 'lige bonila 'lige waíla*

46 Napu'lige Esusi bijí ra'ícha ilígichi ralámuli 'yuga, sébale Esusi eyela 'lige suwábaga alu'é nasípasi bonila 'lige nasípasi waíla alé ma'chige. 'Lige ma'chige jale Esusi 'yuga ra'íchánilia. 47 'Lige bilé rió anele Esusi:

—Mué eyela 'lige mué bonila 'lige mué waíla ma'chige jawí, mué si ra'íchánilirí.

48 'Lige Esusi anele alu'é napu simile ruimea:

—¿Chieri júkó ne eyela, chieri júkó ne bonila 'lige ne waíla?

49 'Liko e'nénele alu'é oyérame, 'lige majoga regá anile:

—Ye ne 'yuga járome ralámuli júkuru ne eyélaka 'lige ne bonila 'lige ne waíla.

50 Apiépiri napu ekí 'la e'wame ju napurigá nulá ne O'nola Onorúgame, alu'é napu 'pa rewagachi ajtí, suwábaga alu'é júkuru ne bonila 'lige ne waíla 'lige ne eyela.

## 13

*Jena ruwimela Esusi ruwíligo bilé tétali rejcholi bilé rió rí'ligó weroka echame*

1 'Alige rawé Esusi 'ma simile alé galírale asigá 'lige 'mi wa'lú ba'í ilígichi suwékimi asíbale. 2 'Lige asíriga we'ká ralámuli napuile alé napu asale Esusi. 'Lige alekeri alé bárkochi 'mole Esusi, 'lige suwábaga ralámuli alé ba'wichí suweke jale. 3 'Liko Esusi chojkile ralámuli beniria we'ká tétali rejcholi. Regá anele:

—Bilé rió rí'ligó echimea simile weroka.

4 Jaré pe u'kabi talí boichimi rujsule. 'Lige chulugí jsile, 'lige 'ma go'ale alu'é rí'ligó.

5 'Lige jaré talí pe 'we rejtérale rujsule, tabilé 'me wa'lú ajtígichi we'é, 'lige yati ya'wile. 6 'Lige rayénilite 'ma wakíbale alu'é rí'ligó ya'wisá, pecha re'lé nawégame níligame. 7 'Lige jaré asíriga ro'rúgachi rujsule wejchá jágichi. 'Lige 'ma 'yale alu'é wejchá sawala, 'liko tabilé gayénale alu'é rí'ligó e'wele o'chera. 8 'Lige jaré talí 'we a'lá we'égachi rujsule, 'lige alueka 'we a'lá ya'wile 'lige asíriga 'la 'wíliru. Jaré rí'ligó

mulalá bilé sientó rí'ligó rakele. 'Lige jaré usánisa makué rakele. 'Lige jaré baisá makué rakele. 9 'Emi 'la najkégame níriká napurigá akiboa, asíriga 'la gepúlime júkuru ye ra'íchali.

*Jena ruwimela Esusi ruwíligo chonigá tételite benírame ko ralámuli*

10 'Liko alu'é Esusi 'yuga járome a'bé mochúbale napu asale alu'é Esusi, 'lige regá anele alu'é Esusi:

—¿Chonigá alarigá anéché mué alu'é ralámuli alu'é tételite peka 'la námame kachi alarigá ra'íchachi mué?

11 'Lige Esúsika anele:

—Émika 'we a'lá ma'chígime ruyémala ne napu tabilé námale 'emi. 'Lige uché jaré ralámulika tabilé 'la ma'chígime ruyémala ne, napurigá alu'é ralámuli tabilé pe'tá námaka ejtebímala rekó 'we a'lá akee 'lige rekó 'we a'lá etee. 12 Alu'é napu 'la námame ju bilé ra'íchali rejcholi ruilía churigá nulame ko Onorúgame, Onorúgameka uché rajpé 'yámili ju 'nátili. Alu'é napu tabilé námame ju 'lige tabilé beninálime ju Onorúgame tabilé lisenisia 'yámala napurigá benimela, 'liko alu'é u'kabi napu námame ju 'ma we'kuámala. 13 Alekeri alarigá ra'ícha ne, napugiti alueka rekó 'la etee, tabilé eteme kame, 'lige aminami rekó 'la akeme ke, tabilé akeme kame, 'lige aminami tabilé námame rekó 'la akeme ke. 14 Alarigá ikíbá napurigá sébali ikimela napu anele Onorúgame 'ya alu'é rió Isaiási anile. Regá anele:

Rekó akeme ke Onorúgame nila ra'íchali,

tabiléchigo námame júkó.

Rekó 'we a'lá eteme ke, tabiléchigo námame júkó.

15 Jipe eperégame ralámulika tabilé a'lá 'nátame ju,

'ma na'ole najkala

'lige 'ma busílatiri 'ma na'ole

napurigá tabilé etémala

'lige napurigá tabilé akimela,

'lige napurigá tabilé 'la námamala alu'é,

napurigá tabilé ku smela,

'lige napurigá 'yómala ne.\*

16 Onorúgame 'we ganíliga ajtí napugiti 'emi 'we a'lá ma'chílime buségame kame,

'lige aminami 'we a'lá akeme najkégame kame 'emi. 17 Neka 'la bijchiá aníguru.

Asíriga we'ká mochile 'we 'ya alu'é napu ruyame nile napu Onorúgame anele, 'lige aminami asíriga we'ká ralámuli 'we a'lá,

'lige asíriga eténile ye tábiri napu 'emi etiá jipe, tabiléchigo etéliko 'lige aminami asíriga gepúnilituru alu'é ye ra'íchali napu

'emi gepua mochí jipe, pecha it'éligime ye ra'íchali.

\* 13:15 E'nesi Isaiás 6:9-10.

*Jena ruwimela Esusi ruwĩligo alué tétali alué rió r'ligó echágame*

<sup>18</sup> › 'We a'lá gepuwa chonigá anime ko alué tétali bilé rió echame r'ligó. <sup>19</sup> Ralámuli alué ra'íchali gepume, alué napu ruyame ju alarigá nulame ko Onorúgame ralámuli alawálachi, 'lige pe tabilé námame ju, pe napurigá alué talí napu boichimi rujsule alarigá ju 'emi. Nawame ju Remónisi 'lige 'ma bujeme ju pe'kabi ra'íchali napu 'la námale. <sup>20</sup> Alué talí napu rejtérale rujsule, alueka pe napurigá ralámuli ra'íchali gepume 'we semáriga, pe alarigá ju, <sup>21</sup> nobi tabiléchigo 'la re'lesi nawégame júkó, tabilé 'we 'lisi oyérame ju Onorúgame. Napu'lige ralámuli cha anisá alué ralámuli olagá, 'we gawélesa Onorúgame oyérame kóriká, 'liko alué ralámulika 'ma a'reme ju alué 'we a'lá ra'íchali oyeria. <sup>22</sup> Alué talí wejchégichi rujsúkame ka, alueka pe napurigá ralámuli pe tábiricho 'we korume pe alarigá ju, alué ralámuli napu 'we korume ju o'pacha, go'ame 'lige aminami enomí. 'Liko 'ma a'reme ju Onorúgame ra'íchálila oyeria. <sup>23</sup> Alué talí 'we a'lá we'echi echerúgime ka, alueka ju napurigá ralámuli Onorúgame ra'íchálila gepume, pe alarigá ju. 'Lige 'we a'lá námame ju alué ralámuli, 'lige asíriga 'la e'wame ju napurigá aní Onorúgame nila ra'íchali. Jaré alué ralámuli napurigá r'ligó mulalá, alué napu bilé sientó rakégame ju, pe alarigá ju. 'Lige jaré napurigá usánisa makué rakégame, pe alarigá ju. 'Lige jaré napurigá baisá makué rakégame, pe alarigá ju.

*Jena ruwimela Esusi ruwĩligo Remónisi bo'né gompaniérola mo'áligo alé Onorúgame oyérame ralámulichi*

<sup>24</sup> Esusi uché bilé tétali ruwile, regá anile: —Napu'lige ralámuli 'la oyérasa napurigá nulá Onorúgame, pe napurigá bilé rió r'ligó echágame 'we a'lá we'é bo'ígichi, pe alarigá ju. <sup>25</sup> Napu'lige gojchigá bi'tígichi, sairúgame bajkile alemi echerúgichi 'lige alé echale alué chátiri gajsalá rakala. 'Lige napieri r'ligó alieri ya'wime nile alué gajsalá. 'Lige 'ma simile alué sairúgame alué gajsalá rakala echisá. <sup>26</sup> Napu'lige r'ligó o'chérasa, 'ma mulele alué r'ligó, a'lige kulí ma'chí neréle alué chátiri gajsalá nerugo alé r'ligó echégichi. <sup>27</sup> 'Liko nóchame alé r'ligó echégichi, simbale ruyemia alué r'ligó echágame. Regá anile: «Mué, ¿'la a'ká ke alué talí napu mué echálige? ¿Kócheke ma'chínalepeché alué chátiri gajsalá?» <sup>28</sup> 'Lige anile r'ligó echágame: «Bilé sairúgame nokálegeréko alieti echá.» 'Lige alué nóchame rukele alué r'ligó echágame rió: «¿Pala simawa alué chátiri gajsalá bo'naboa?» <sup>29</sup> 'Lige anile alué rió

r'ligó echame: «Tase, pecha 'la nímawé, pe r'ligó 'yúriga bo'nuímaleké. <sup>30</sup> Pe a'réwagó napurigá r'ligó 'yuga o'chéramala. Napu'lige 'wilichi ne bo'né nulémala ralámuli nóchame napurigá rojániga napabúmala alué chátiri gajsalá, 'lige bulugá ro'igá e'kósamala. 'Lige r'ligoka abé nujubá gatewa rekóachi.» (Alué chátiri gajsalaka pe napurigá Remónisi gompaniérola ju.)

*Jena ruwimela Esusi ruwĩligo chukime ka ralámuli napu'lige o'wina oyeria*

<sup>31</sup> Esusi abiena ruwile uché bilé tétali. Anile:

—Napu'lige Onorúgame chojkichi nulá ralámuli alawálachi, pe napurigá gilibá a'lásini echerúgime 'we a'lá we'echi, pe alarigá ju. <sup>32</sup> Asíriga u'kíchi ju alué talí a'lásini rakala, 'lige asíriga e'wele ochérame ju alué gilibá ya'wisá, me'tigá alué r'ligó. 'Lige chulugi jsime ju 'lige alé kábame ju.†

<sup>33</sup> 'Lige uchéchigo bilé tétali ruwile Esusi ralámuli beniria. Regá anile:

—Napu'lige Onorúgame chojkichi nulá ralámuli alawálachi a'chigóriga ju napurigá bilé mukí napu 'wile pe'tá kawali, napu ba'raga ro'ele alé arinachi 'lige alué kawali ba'rárigame bochígimi nabale alué arinachi.

<sup>34</sup> Esusi pe tétalicho ra'íchale ralámuli 'yuga, pe alarigacho ruyele. <sup>35</sup> Alarigá ra'íchale Esusi napurigá 'la alarigá ikimela napurigá anile alué 'ya ajtígame rió napu ruyame nile napu Onorúgame anele. Regá anile alué rió: Pe tétalicho ruyema ne ralámuli.

Regá ruyema ne ralámuli alué ra'íchali napu 'we nóchali kame ju námalia.

Napusí Onorúgame newálige ye gawí, ralámulika tabilé námale ye tétali.

*Jena ruwimela Esusi ruwĩligo choniamé ka alué r'ligó tétali 'lige alué gajsalátiri*

<sup>36</sup> 'Lige Esusi 'ma ku júlale suwábaga ralámuli napu mochile alemi, 'lige bajkile alé pachá galírale 'lige alué 'yuga járome anele alué Esusi:

—Mué Wa'lala, ruyérigó ramué choniamé ju alué gajsalá r'ligochi jágame.

<sup>37</sup> 'Lige anile Esusi:

—Alué napu 'we a'lá talí echame ka, alueka pe Onorúgamete julárigame ju 'pa rewagáchika. <sup>38</sup> Alé we'échika napu echale alué talí echame, aleka pe napurigá wijchimoba ju. Alué 'we a'lá talí aniáká, alueka pe ralámuli 'we a'ká ralámuli aniamé ju, alué napu 'la a'reme ju napurigá Onorúgame nulámala. Gajsalá aniáká alueka pe ralámuli Remónisi oyérame aniamé ju. <sup>39</sup> Alué sairúgameka napu echale alué chátiri gajsalá, alueka pe Remónisi kéré. 'Lige alué 'wílime aniáká, alueka napu'lige gawí amulí suwíbachi aniamé ju. 'Lige alué

† 13:32 Alé Israélíka alué gilibá a'lásini 'we 'ya nerúgame 'we re'pá jágame ochérame nile alué gilibá a'lásini.



'wime aniáká, alueka santo ánjeli aniamé ju.  
<sup>40</sup> A'chigóriga napurigá oliame ju alué chátiri gajsalá, a'chigóriga oláwili ju alué Remónisi oyérame napu'lige ye gawí suwíbachi. 'Emi 'we a'lá machí pe na'íchí 'lúlime ko alué chátiri gajsalá. <sup>41</sup> Alué rió Onorúgamete julárigame 'pa rewigáchika, alueka santo ánjeli nulémala napurigá a'miná 'lúmala alué chátiri ralámuli jena wijchimoba mochígame, alué napu chátiri 'nátili 'yame ju uché jaré ralámuli, alé napu Onorúgame nulame ju. <sup>42</sup> 'Ma na'íchí 'lúpua. 'Lige alué chátiri ralámuli nalá mochímala 'we resí nílga, 'lige majaga.† <sup>43</sup> 'Liko ralámuli 'la sébali olame napurigá nulá Onorúgame, alueka napurigá Onorúgame alarigá nímala. 'Émi ralámuli 'we a'lá najkégame níriká, 'la 'we a'lá gepuwa ye ra'íchali.

*Jena ruwimela Esusi ruwíligo Onorúgame nulachi 'we najtékame ko*

<sup>44</sup> Napu'lige Onorúgame 'we a'lá semáriga nulachi ralámuli alawálachi, pe napurigá enomí we'echi tótigame, alarigá ju. Bilé rió we'ká enomí tótigame rewisá, abajá nasosa we'ete o'póliga. 'Liko asíriga ra'sáligá asimela alué rió, 'ma simela ralinemia suwábaga tábiri napu ekí tábiri nígame ju bo'né. 'Lige alué enomite ralimela alué gawí napurigá bo'né niga neraga asimela alué enomí.

<sup>45</sup> Abiena napu'lige Onorúgame 'we semáriga nulachi ralámuli alawálachi, pe a'chigóriga ju napurigá bilé rió ralinéga nóchame, rejté 'yaga eyéname alué 'we rojsákame re'wame ba'wichí nerúgame napu «perla» anilime ju yolí ra'íchaga. <sup>46</sup> Napu'lige rewisá bilé 'we a'lá jino rejté «perla» alué napu 'we najteme ju, 'lige alué rioka ralinémala napu ekí tábiri ni bo'né, 'lige alué enomite ralimela alué 'we jino rejté. ¿Pala 'la námata 'emi ye tétali?

*Jena ruwimela Esusi ruwíligo Onorúgame ralámuli wanápimio alué tabilé a'ká 'we a'ká ralámulichi mochígame*

<sup>47</sup> 'Lige Esusi uchéchigo bilé tétali ruyele ralámuli churigá nulamio Onorúgame ralámuli 'yuga. Regá anile:

—Pe napurigá bilé morali ro'chí i'mula ba'wichí pasa bilé rió ro'chí i'mume, we'ká buínasa napu ekí ro'chí oyame ju ba'wichí. <sup>48</sup> Napu'lige bochisa alé morálíchi, alué ro'chí i'múmeka 'mi suwemi o'tome ju alué morali, 'lige alé mochíbame ju abé a'kalala ro'chí rojana, alué 'lina ro'ámala wana atabechi. 'Lige alué ta'mé a'kátirika alueka 'ma 'lúmala. <sup>49</sup> Alarigá nímala napu'lige gawí suwíbachi. Santo ánjeli buyámala ralámuli wanápamia alué cha nokame alé a'ká ralámuli mochígichi. <sup>50</sup> 'Lige alué cha

nokame ralámulika 'ma na'íchí 'lúpili ju, asíriga enárikáchi rajachi. 'Lige nalámala alué cha nokame ralámuli 'we resí nílga.

<sup>51</sup> 'Lige Esusi rukele:

—¿'La námilia 'emi ye we'ká tétali?

'Lige anile alué Esusi 'yuga jaróme:

—Ramueka 'la námilia.

<sup>52</sup> 'Lige Esusi anele:

—Bilé rió napu benírame ju Moisesi nila nulalí napu 'we a'lá benime ju churigá nulame ko Onorúgame, alueka pe napurigá bilé rió galí nígame, alarigá ju. Rekóachi ma'chí buyáname ju tabiri o'chéranti 'lige nuevo abiena. Alué rioka 'la machimela Onorúgame ra'íchálila, alueka 'la námamala 'ya nerúgame rejcholi 'lige jipe nerúgame rejcholi abiena, alué napu ne ruwí.

*Jena ruwimela Esusi simlíligo Nasareta napu bejtégame nígame 'ya*

<sup>53</sup> Napu'lige Esusi 'ma guwárisa ye tétali ruyá, 'we ilile uchéchigo bilénami simiá.

<sup>54</sup> Napu'lige sebasa alé we'ká riógichi napu bejtégame nígame alué bo'né Esusi re'malí ka (Nasareta anilíchi), chojkile ralámuli ra'íchali beniria alé u'tá re'obachi «sinagoga» anilime. 'Lige ralámulika 'we e'negá jale. Pe laa jale alué ralámuli:

—¿Koche benílepeché suwábaga ye ra'íchali? ¿Koche narélepeché a'walí napurigá newámala ye 'we semátiri tábiri napu tabilé gayéname ju newá ralámuli? —regá rukele a'bopi ra'íchaga—. <sup>55</sup> ¿Tacha ye ju alué sia 'lige mesa newame inolá alué napu José anilime nílige? ¿Tacha ye ju alué María ranala? ¿Tacha ye ju alué Jacobo ba'chila 'lige José 'lige Simoni 'lige Jurasi? <sup>56</sup> ¿Tacha jena ejperégame ju alué rió waíla jena we'ká riógachi? ¿Koche benílepeché ye rió suwábaga alué tábiri?

<sup>57</sup> Alekeri alué ralámuli majale 'lige tabilé beninálile alué rejcholi. Alekeri Esusi anele alué ralámuli:

—Bilé ra'íchali nerú regá anime: «Bilé rió napu ruyame ju napu ané Onorúgame eyénachi alé napu ochérame ju, aleka tabilé níraga etélime ju. Uché bilénami einásaká, 'we a'lá níralime ju. 'Emi alarigá nokáguru ne'chí 'yuga.»

<sup>58</sup> Alué ralámuli tabilé bijhígale alué Esusi ra'íchálila, alekeri alué Esusi tabilé we'ká ralámuli sa'wale.§

## 14

*Jena ruwimela Erere nuláligo napurigá me'liboa Juani*

<sup>1</sup> A'kinana rawé Erere, alué napu wa'lula nílige alé Galilea anilime ejiro, akele alarigá nóchame ko Esusi. <sup>2</sup> 'Liko alué Erere anele alué bo'né 'yuga nóchame:

† 13:42 Mateo anile: «Chi'námala ramelá.»

§ 13:58 E'nesi glosario «milagro».

—¿Chieri júpeché alué Esusi anilime? Siné kachi pe Juani kerékó, alué napu ralámuli rewaramé nilige. Siné kachi 'ma ku ajánalegerékó. Alekeri 'la nígame nisa a'walí napurigá sa'wámala ralámuli napu 'ma tabile sa'wimeli nile.

<sup>3</sup> Aluéchigo bo'né Erote nuláligime Juani cha'pínliga abé 'yabé 'lige 'ma galírale ba-jchale karénate bulugá pe alué Eroríasi cho-jkila gite napu Belipe upila nile alué bo'né Erote ba'chila. Alué Belipeka se'nú eyégame nile. <sup>4</sup> Juánika anélige alué Erote tabilé ikiárekó alué mukí rewisá alué Belipe 'yula. Alarigá anélige alué Juani:

—Tase 'yula neraga asiboa alué mukí, alué mué bonila upila.

<sup>5</sup> Alésiko alué Erote 'we me'lináliga etele Juani, pe iligá 'we majale ralámuli. Ralámulika 'wéchigo 'la niráligime alué Juani, 'la machíligame Onorúgame nila ra'íchali nareme níligo. <sup>6</sup> 'Lige napu'lige bamíbalí sebárichi alué Erote, Erote bilé piesta newale. 'Lige alué mukí iwé Eroríasi ranala yawile alé piéstachi. \* 'Lige alué Erote asíriga galele alué iwé yawisá. <sup>7</sup> 'Lige alué Erote asíriga we'ká e'karúgame tábiri 'yámoríle alué iwé yawigóríka, napu eki tábiri najkió 'yámoríle, 'lige aminamí suwábaga ralámuli akele napu anile. <sup>8</sup> 'Liko alué iweka anile:

—Neka najkí napurigá jeka a'pámala mué Juani mo'ola bilé bejtólíchi ajchagá.

Alarigá anile 'máchigo 'la anérigime nilígame eyélate.

<sup>9</sup> 'Liko asíriga we'ká 'nátales alué wa'lula Erote. Tabilé 'la nerale, 'lige 'máchigo akéleko suwábaga ralámuli napurigá anílige alué wa'lula Erote we'ká e'karúgame 'yámoríligo. <sup>10</sup> Alekeri nulale napurigá rijpunawa alué Juani mo'ola. 'Liko 'ma gujtachí rejpináleru Juani. <sup>11</sup> 'Lige bejtólíchi ajchigá a'pálsru alué Juani mo'ola, 'lige alué iwé 'yáleru, 'lige alué iweka eyela 'yale.

<sup>12</sup> 'Liko Juani gompaniérola ralámuli jsile 'lige 'ma o'tole alué Juani gatemia. 'Lige simíbale Esusi ruyemia.

*Jena ruwimela Esusi go'ame 'yáligo we'ká ralámuli*

<sup>13</sup> Napu'lige alieti akisá alué Esusi, 'ma simile bilé bárkochi 'mi bilena tabilé riógachi. 'Lige ralámuli machíle alemi simiá enáligo alué Esusi, 'lige alué ralámuli 'ma simíbale 'mimi wijchí jaga napu sebámili nile Esusi. <sup>14</sup> Napu'lige sebasa Esusi bárkochi, asíriga we'ká ralámuli etele, 'lige asíriga na'temaka etele, 'lige 'yole napu eki nayume nile alemi sigame ralámuli. <sup>15</sup> Napu'lige 'ma alí kachi, alué makué oká Esusi 'yuga járome ralámuli anele Esusi:

—Asíriga tabilé 'wesi riógachi ju jena. 'Lige 'ma alí júkuru. Juláwaguru ralámuli napurigá

'mi a'tabemi riógachi simámala go'ame ralímea.

<sup>16</sup> 'Lige Esúsika nejele:

—Tabilé asemí julawa, aba jena mochíralekó o'maka. 'Emi a'boi 'yáwaguru go'ame napurigá go'mela ralámuli.

<sup>17</sup> 'Lige anile alué oyérame:

—Pe malígipi baní nerúgeréke'e 'lige pe okabi ro'chí.

<sup>18</sup> 'Lige anile Esusi:

—Jeka o'tosigó alué baní 'lige ro'chítiri.

<sup>19</sup> 'Lige nulale napurigá i'kilí mochíbamala ralámuli alé wijchí gajsalachi amoba. 'Lige napu'lige u'sá alué maligi baní 'lige alué oká ro'chí, anele Onorúgame:

—Cheliérabá mué O'nó Onorúgame.

'Lige a'tabé chí'wánale alué baní. 'Lige 'yale alué makué oká bo'né 'yuga járome napurigá ralámuli 'yámala. <sup>20</sup> Suwábaga ralámuli go'ale 'lige asíriga bosaga ejtebile alué baní go'sá ro'chí 'yúriga. 'Lige alué oyérame napubule a'tabé rasiríginti alué baní 'lige ro'chí 'lige atabechi ajchale. 'Lige makué oká atabé bochíle. <sup>21</sup> We'ká ralámuli go'ale, riótiri, 'lige umugítiri, 'lige u'kuchítiri, maligi mili nile pe e'wele riocho.

*Jena ruwimela Esusi amoba ba'ichí enáligo*

<sup>22</sup> Pe'tá i'libeko Esusi júlales alué makué oká bo'né 'yuga járome napurigá bárkochi jíamala napurigá simámala uché bilena. 'Lige Esúsika alé rejpile. <sup>23</sup> Napu'lige 'ma ralámuli simasa, 'liko Esusi 'ma simile bilena rabó Onorúgame 'yuga ra'íchamia. 'Lige 'ma chonasa, alué Esúsika pe bi'neli asale. <sup>24</sup> 'Lige bárkoka 'ma 'mi nasipa walú ba'wichi enale, 'lige asíriga iwégame ekénale alémi enágichi alué barko. 'Lige aminami asíriga re'pá ílírole alué ba'wí, a'wágame chíbale ba'wí alé bárkochi o'weka neraga. Tabilé gayénale simiá. <sup>25</sup> 'Lige 'ma amulí che'lachí, Esusi simile o'wetí iligá ba'ichí amoba alé 'mi napu barko enale. <sup>26</sup> Napu'lige alué Esusi 'yuga járome etesa Esusi alé ba'ichí amoba enágichi, asíriga majale.

—¡Pe chu'í káwé alué! —anile.

'Lige bochí anile majaga.

<sup>27</sup> 'Lige Esúsika anele:

—¡Tase majawa, pe ne ju!

<sup>28</sup> 'Lige anile alué Pegro:

—Mué Wa'lula Esusi nísaká, ne'chí nulébá napurigá ne ba'ichí amoba teka enegá sebámala napu mué ílí.

<sup>29</sup> —Jeka simígó 'liko —anile alué Esusi.

'Liko alué Pegro re'kísele bárkochi, 'lige amoba ba'ichí enale 'mi alé simiá napu ilile alué Esusi. <sup>30</sup> Napu'lige ne nílasa 'we ekao, 'ma majale. 'Lige i'kilí bokuíle alé ba'wichí,

'lige napu'lige 'ma bokuía, e'wele ra'íchaga bayele Esusi:

—jMuérigo Wa'lula, ma'chí paki ne'chí!

<sup>31</sup> 'Lige Esúsika yati cha'pile sekate, 'lige anele:

—jMueka 'we pee bijchígame ju!

<sup>32</sup> Napu'lige 'ma okáraga jímasa ku bárkochi, liko 'ma asíbale eká. <sup>33</sup> 'Liko suwábaga rió napu ekí mochílige alé bárkochi, asíriga 'la neraga etele Esusi, 'lige anele:

—'La bijchiá mueka 'la Onorúgame Inolá júkuru.

*Jena ruwimela Esusi 'yóligo we'ká nayume*

<sup>34</sup> 'Lige sébale alé ejiro Genesareta anilichi.† <sup>35</sup> Napu'lige alé epperégame ralámuli machisá alé ajtigó Esusi, júlale jaré ralámuli napurigá chejaré ralámuli ruyémala alé a'bemi mochígame suwábaga. 'Lige ralámulika suwábaga nayúkame a'pagá jsile. <sup>36</sup> 'Lige alué ralámuli napu nayúkame a'pagá jsile lisensia tánele Esusi napurigá alué nayúkame Esusi o'páchilichi chébimia. Suwábaga napu ekí chébale alé Esusi o'páchilichi, 'ma sa'wile.

## 15

*Jena ruwimela Esusi aniligo tachírigo alué chátiri alawégame newame ralámuli*

<sup>1</sup> 'Lige jaré bariseo 'lige jaré alué Moisesi nila nulalí benírame Rusalénika sígame, sébale alé Esusi ajtígichi. 'Lige anile Esusi olagá:

<sup>2</sup> —Mué 'yuga járome ka tabilé 'la sébali olá alué nulalí panígilime napu nulale alué 'ya mochígame. ¿Chonigá alarigá nokame ju? Alueka tabilé panígime ju napu'lige go'ame go'mea napurigá nokiamé niru ramué.\*

<sup>3</sup> 'Lige Esúsika rukele:

—'Émika ¿chonigá tabilé 'la sébali oliágó napu nulale Onorúgame 'we 'ya? Pe a'lá sébali olame júkuru 'emi nulalíla. <sup>4</sup> Regá nulale Onorúgame: «'La niraga etewa a'boi o'nola 'lige a'boi eyélatiri.» 'Lige abiena nulale: «Napyépiri napu chúbiriga ra'íchame ju o'nola olagá 'lige eyela olagá, alueka me'liboli ju.» <sup>5</sup> 'Émika anime júkuru 'we a'lá ko bilé rió regá anea o'nola eyélatiri: «Tabilé nejkúrimala ne, neka Onorúgame 'yámolá suwábaga napu ekí nígame ju ne», <sup>6</sup> 'lige apiépiri napu anime ju regá, 'ma tabilé gu'írímili ju bo'né o'nola 'lige eyela. Neka aníguru 'ma tabilé 'la sébali olame ko 'emi alué napu nulale Onorúgame, tabilé 'la nirá 'emi Onorúgame nila nulalí, 'lige pe 'emi a'boi nila 'nátíli cha'pigá mochigo 'emi.

<sup>7</sup> j'Émika 'la tabilé 'nátanti! 'Émika asíriga 'la semáriga ra'íchame júkuru kaka ra'íchálilaká, nobi tabiléchigo 'la 'nátame kéréko 'emi a'boika, 'lige tabilé 'la sébali olame ju 'emi. Alué 'ya bejtégame Isaías anilime rió napu ruyame nile napu Onorúgame anele, osale napurigá anilige Onorúgame. Asíriga 'la ma'chígime anile pe 'emi olagá. Regá osale: <sup>8</sup> Ye ralámulika asíriga 'la semáriga ra'íchame júkuru ne'chí olagá,

ne napu ju Onorúgame, tabiléchigo oyérame júkó ne'chí.

Pe se'wináriga 'nátame ju.

<sup>9</sup> 'We a'lá nerame korime ju ne'chí,

tabiléchigo 'la nirame kéréko,

'we a'lá semáriga ra'icha

nobi pe ralámuli nulalíla benírame kame,

tabilé Onorúgame nulalíla.†

<sup>10</sup> 'Lige Esúsika alué we'ká ralámuli bayele, 'lige regá anele:

—'La 'we a'lá gepuwa. ¿'Pala 'la námata 'emi? <sup>11</sup> Bariséoka anime ju Onorúgame tabilé 'wimio alué rió go'ame go'sá tabilé panígisa. Neka aníguru tabilé chéré Onorúgame níriká go'ame ka bajkime ju bilé ralámulichi. Onorúgame níriká abé najtékame ju alué ra'íchali napu buyame ju chu'álachi. Chátiri ra'íchali buyásaká 'liko Onorúgame tabilé e'wémala alué rió.

<sup>12</sup> 'Liko alué Esusi 'yuga járome a'bé jábele, 'lige rukéliru alué Esusi:

—¿Machí mué alué bariseo tabilé ganíliga ejtebíligo alué mué ra'íchálila ajkisá?

<sup>13</sup> 'Lige Esúsika nejele:

—Napiépiri gajsalá, rojátiri, tabilé ne O'nola 'pa rewagachi ajtígame echágame, alueka 'ma bo'narúgame nímalá.‡ Alarigá ikimela alué bariseo. <sup>14</sup> Pe a'réwagó. Pe napurigá bilé rió tabilé ma'chílime uché jaré tabilé ma'chílime o'tome, pe alarigá ju. Bilé rió tabilé ma'chílime uché bilé rió tabilé ma'chílime o'tome pe okáraga rujsúmala bilena rejkolichi.

<sup>15</sup> 'Liko Pégroka anele Esusi:

—¿Chonime ke aní mué? Aka ruwíbá.

<sup>16</sup> 'Lige Esúsika anele:

—¿'Émichigó tabilé 'la námaliachigó?

<sup>17</sup> ¿Tacha machí 'emi suwábaga go'ame napu chu'ichíkana bajkí wamí rojpachíkana simírume ko, a'kinana ma'chíname ko? Tabilé chátiri alawégame gayéname ju. <sup>18</sup> Nobí ra'íchali chu'ichíkana ma'chíname ka, alueka ma'chíname júkó napurigá 'nátame ju bilé rió. 'Liko alué ra'íchali tabilé 'la nísaká, 'liko alué rió 'ma chátiri alawégame gayéname ju. <sup>19</sup> Bilé rió chátiri 'nátame, pe ralámuli me'gá einámala alué

† 14:34 Tabilé bajunile na'lé bo'náligo.

\* 15:2 Alué ralámulika mayele 'la panígisaká 'liko 'la ra'salágá asimeo

Onorúgame. † 15:9 'Enesi Isaías 29:30.

‡ 15:13 Yeka aniame kéré, Onorúgame 'ma chajkena a'remio apiépiri

ralámuli o'apiépiri ra'íchali napu tabilé Onorúgame nila ju.

rió, 'lige aminami pe apiépiri umugí 'yuga gojchigá einámala 'lige aminami pe riótiri 'yuga gojchigá einámala, 'lige chigoga einámala aminami, 'lige aminami 'we 'yégiga einámala, 'lige pe sairúgame neraga ra'íchame nímala apiépiri ralámuli olagá. <sup>20</sup> Alué chátiri 'nátili 'nátaga ra'íchasa, ralámuli 'ma chátiri alawégame gayéname ju, Onorúgame tabilé ganíluga etémala alué ralámuli, pecha chéréko rekó ta panige sekala go'ame go'mea.

*Jena ruwimela Esusi ruwíligo bilé muki tabilé israelita 'we al'á bijchígaligo 'la a'wali nígame ko Esusi napurigá sa'wámala*

<sup>21</sup> 'Liko Esusi simile alé Tiro anilichi we'ká riógichi 'lige Sironi anilichi we'ká riógichi, napu epperégame nile alué ralámuli tabilé israelita. (Alué ralámuli israelita napurigá o'kochí alarigá neraga etele alué ralámuli.)

<sup>22</sup> 'Lige bilé muki alé bejtégame napu tabilé israelita nílige, alemi sébale napu enale Esusi 'lige anile e'wele ra'íchaga:

—¡Muériga Wa'lula, Rabí rijimela, 'la na'temápuaká ne'chí! Ne ranala iwé bilé u'tabela remónisi ajchágame ju, 'lige asiriga resí nilia ajtí.

<sup>23</sup> 'Lige Esusi tabilé nejele. 'Lige alué 'yuga járomeka anele Esusi:

—'Ma julawa alué muki jena, jeka gwánaka e'wele ra'ícha aníguru.

<sup>24</sup> 'Lige anile Esusi:

—Pe ralámuli israelítacho gu'iriniliga nulérigime ju ne Onorúgamete. Alué mukika pecha israelita júkó.

<sup>25</sup> 'Lige alué muki sébale alé napu ilile Esusi, 'lige chojkóbisiga ilíbale, 'lige anele:

—¡Mué Wa'lula nulame, ne'chí gu'iri!

<sup>26</sup> 'Lige Esusi anele:

—Tabilé 'la ju u'tátiri baní bujilá 'lige o'kochí 'yamia.

<sup>27</sup> Abichilubi 'we anele alué muki:

—Bijchiá ju napu aní mué, alué o'kochí abirigá go'yame ju alué kuchí baní mojágame rujsúkame.

<sup>28</sup> 'Liko Esusi anele:

—¡Mué muki, mueka 'la bijchigi 'la sa'wame ko ne apiépiri nawilí! 'La sa'wimela mué ranala.

'Lige yati neraga sa'wile alué muki ranala.

*Jena ruwimela Esusi we'ká ralámuli 'yóligo*

<sup>29</sup> 'Liko Esúsika simile alé asigá 'lige sébale suweke wa'lú ba'wí manígichi Galilea anilichi, 'lige 'pami rabó simile 'lige alé rabomi asale. <sup>30</sup> 'Lige asiriga we'ká ralámuli sébale alé napu asale alué Esusi, 'lige we'ká nayume a'pale ralámuli sujirigame, 'lige aminami tabilé ma'chílime, 'lige aminami tabilé gayéname ra'ícha, 'lige alé a'bé a'páliku napu Esusi ajtíle. 'Lige Esúsika sa'wale alué

nayúkame ralámuli. <sup>31</sup> 'Lige ralámulika 'we ra'sálale napu'lige 'ma ku ra'íchachi alué tabilé ra'íchame, 'lige alué sujiriginti 'ma ku 'la e'yénachi, 'lige tabilé ma'chílime 'ma ku ma'chílichí. 'Liko alué ralámuli anile asiriga 'la nejkúrame ko Onorúgame, alué Onorúgame napu gu'irime ju alué ralámuli israelita.

*Jena ruwimela Esusi naó mili rasígame ralámuli go'ame kóligo*

<sup>32</sup> 'Liko Esusi bayele alué 'yuga járome 'lige anele:

—Neka 'we na'temá ye ralámuli. 'Ma bakiá rawé mochikuru jena ne'chí 'yuga, 'lige tabilé nutugégeme júkuru napurigá go'mela. Pe arigá simásaká ku galírale, pe boichimi rekupámala e'luíka.

<sup>33</sup> 'Lige alué Esusi 'yuga járomeka anele:

—¿Churigá kóchimiyéna rewibówé go'ame napurigá ye ralámuli go'mela? Jénaka pe jami júkuru tabilé riógichi.

<sup>34</sup> 'Lige Esusi rukele alué bo'né 'yuga járome:

—¿Chékí baní o'kame nírukó 'emi?

'Lige nejele alué oyérame:

—Ramueka pe gichao baní o'kame niru, 'lige pe u'kabi ro'chí 'yúriga —anile.

<sup>35</sup> 'Lige Esusi anele:

—Nulewa ralámuli napurigá i'kilí mochímala wijchí.

<sup>36</sup> 'Lige cha'pile alué gichao baní, 'lige o'wétiri rewagachi e'nénaga cheliera 'yale Onorúgame. 'Lige nasípasí ch'i'wánale baní

'lige ro'chítiri. 'Lige alué oyérame 'yale napurigá nachutámala, 'lige nachútele.

<sup>37</sup> 'Liko suwábaga go'ale 'lige asiriga 'la ganíluga ejtebile asiriga bosaga. We'liko 'ma o'pasasa alué ralámuli, gichao atabé bochile rasígame go'ame. <sup>38</sup> Naó mili nile pe riocho tase tétiga umugí 'lige aminami tase tétiga u'kuchítiri. <sup>39</sup> Abé i'libeko Esusi suwábaga ralámuli julasa ku epperélachi, Esusi 'lige alué 'yuga járome sí, 'ma jímale bárkochi 'lige 'mí a'bé Magarani anilichi we'ká riógachi simíbale.

## 16

*Jena ruwimela alué bariseo 'lige saruseo nuléligo Esusi napurigá 'we semátiri tábiri newámala alué napu ta'wesi rió gayéname ju*

<sup>1</sup> Jaré bariseo 'lige saruseo simíbale Esusi e'nemia. Owile napurigá 'we semátiri tábiri newámala napu ralámuli tabilé gayéname ju, pe machínaliga nokale pa'lá Onorúgamete julárigame ko. Mayele tabilé gainamio newá 'lige alarigá ralámuli tabilé oyéramio Esusi.

<sup>2</sup> 'Lige Esúsika anele:

—Napu'lige 'emi 'pa rewagachi e'nesa, 'we al'á machime júleké u'kumeo o tabilé u'kumeo ma. 'Lige 'emi etea rewigá 'we sejtániga ilígichi alí, asiriga 'la machime

júlké 'emi melénala rawé tabilé nolégame rainamio. <sup>3</sup> Napu 'lige be'á be'li 'we sejtániga ilisá 'pa rewagachi 'lige aminami nolega ilisá, a'lige abiena 'la machime júkuru 'emi u'kumeo. 'La tabilé 'nátanti 'emi, aka 'émika 'we a'lá námame képa ye tábiri kaka nobi uchéchigo jaré tábiri tabiléchigo námame júkó 'emi. Neka asiriga we'ká e'karúgame newame júkuru 'we semátiri napu tabilé 'wesi gayéname ju ralámuli newá, 'émika tabiléchigo námame júkó tachiri ruyame ko alué. <sup>4</sup> 'Emi cha nokame ralámuli 'ma a'reme ju Onorúgame na'tálila 'lige uché bilé tábiri oyérame ju 'nalina napu tabilé Onorúgame ju, pe aminacho eténilime júkuru alué 'we semátiri tábiri. Pe bi'lepi tábiri etémala 'emi 'we semátiri. 'Émika etémala 'we semáriga ikichi ne i'libeko rawé, alué napu etémala 'emi pe ruyame nímala napu ikile alué Jonasi anilime rió. Alueka bakiá rawé bo'ílekuru pachágana ro'chí rojpálíchi. Pe bilé tábiri ruwime kéréle alakiá Jonasi.

'Lige Esusi simile alé asigá.

*Jena ruwimela Esusi ruwíligo alué bariseo ko napurigá kawali*

<sup>5</sup> 'Lige Esusi simile bo'né 'yuga járome si ba'wichi bajuniga na'lebo 'nálige, 'lige tabilé nélegá simíbale baní alué Esusi 'yuga járome. <sup>6</sup> 'Lige Esúsika anele:

—'La 'we a'lá 'nátaga alué bariseo nila kawali 'lige saruseo nilatiri.

<sup>7</sup> 'Lige alué oyérame anile a'bopi ra'ichaga: —¿Chonigá alaníbhiché? ¿Pe baní tabilé a'pásiga alaníréko?

<sup>8</sup> 'Lige Esusi 'la machile alaniá mochígichi, 'lige rukele:

—'Émika 'we pee bijchígime júkuru Onorúgame 'we a'lá nejkúrimio. ¿Chonigá ra'icha 'emi a'boi tabilé a'pigárika baní? <sup>9</sup> ¿Ta'chó nama 'emi, 'lige tabilé nélá 'emi pe maligi banite bosárigo ne maligi mili rió? ¿Tabilé nélá 'emi chekí atabé rasírigo baní? <sup>10</sup> ¿Abiena tabilé nélá 'emi pe gichao banite bosárigo ne naó mili ralámuli? ¿'Lige chekí atabé go'ame rasírigo? <sup>11</sup> ¿'Lacha tabilé námatu pe tabilé baní olagá anió ne? Uchéchigo siné ruimé ne, 'la 'we 'la 'nátaga alué bariseo nila kawali, 'lige saruseo nilatiri.

<sup>12</sup> 'Liko 'ma námale tabilé alué kawali olagá aniligo alué Esusi, námale 'we a'lá 'nátaga mochímilikó 'nalina napurigá tabilé oilámala alué bariseo nile rejcholi, 'lige alué saruseo nila rejcholi.

*Jena ruwimela Pegro ruwíligo Esusi ko 'pa rewigáchika julárigame*

<sup>13</sup> Napu 'lige Esusi sebase alé a'bé Sesarea Bilipo rewégichi we'ká riógachi, 'lige Esusi

rukele alué makué oká rió bo'né 'yuga járome:

—¿Chonigó ralámuli, chieri korí ne napu nawale 'pa rewagáchika rió neraga?

<sup>14</sup> 'Lige anile alué bo'né 'yuga járome:

—Jaré ralámuli aní mué Juaní kará, alué napu ralámuli rewaramé nílige. 'Lige jaré aní mué Elíasi kará, alué napu ruyame nílige napu anélige Onorúgame, alué napu 'ya bejtégame nílige. 'Lige jaré aní mué Jeremíasi kará napu abiena ruwime nílíchigó napu anele Onorúgame. 'Lige jaré aní mué kará uché bilé napu ruwime ju napu anele Onorúgame.

<sup>15</sup> —'Lige 'émika, ¿chieri koriágó ne'chí? — anile Esusi.

<sup>16</sup> 'Lige Simoni napu abiena Pegro anilime nile anile:

—Mueka pe Kristo ju Onorúgame Inolá, alué Onorúgame napu nabí ajagá ajtime ju.

<sup>17</sup> 'Lige Esúsika anile:

—Mué Simoni, Jonasi inolá, pe Onorúgame 'smi mué gu'ira napurigá mué 'la námamala chieri ko ne, 'lige ralámulika tabilé gu'irile napurigá námamala mué. <sup>18</sup> Mué Pegro, mué rewala 'rejté' aníame kéré. Mueka napurigá bilé rejté napu ajchilime ju alé re'le chojkichí napu galí eláwili ju, alarigá ju mué. Mueka napurigá bilé benírame nímala ne'chí oyérame ralámuli benírame. 'Lige rekó suwigé abiena ne'chí si mochímala 'pa rewagachi. <sup>19</sup> Neka mué 'yámala lisensia napurigá nulame nímala mué. Mué anisáká 'we a'lá ko bilé 'nátili, Onorúgame 'we a'lá nirámalachigó alué 'nátili. Mué anisáká tabilé 'la ko bilé 'nátili, Onorúgamechigó tabilé 'la nirámala alué 'nátili.

<sup>20</sup> 'Lige Esusi 'we a'lá anele bo'né 'yuga járome napurigá tabilé 'wesi ruyémala Kristo ko bo'né, Onorúgamete julárigame.

*Jena ruwimela Esusi ruwíligo 'ma me'liboli ko alué Esusi*

<sup>21</sup> 'Lige Esusi chojkile ruyea alué bo'né 'yuga járome 'ma simeo alé Rusaleni anilíchi. 'Lige alué e'wélala nulame, 'lige alué e'wélala balé, 'lige alué Moisesi nila nulalí benírame 'we resi olamio alué Esusi 'lige 'ma me'límeo, 'lige bakiá rawé kachi 'ma ku ajánimio. <sup>22</sup> 'Lige Pegro a'mibemi chakena bayérale Esusi, 'lige ne'óchale, regá anele:

—¡Mué wa'lula tase alarigá ra'ichawa, tajsiné sebarímili júkuru alué rawé! ¡Onorúgame tabilé a'rémala mué alarigá ikichi!

<sup>23</sup> 'Lige Esusi o'wé e'nele alué Pegro, 'lige anele:

—¡Mué Satanasi, se'wí, simigá 'mimi mejkami! Mueka pe nejkumega eyena

ne'chí 'yuga. Mueka 'nátame ju napurigá 'nátame ju ralámuli, tase napurigá Onorúgame.

<sup>24</sup> 'Lige anele Esusi alué bo'né 'yuga járome:

—Jaré ralámuli ne'chí oyéranilisaká, nabí rawé e'wámili ju napu ne nulá 'lige 'ma a'rémili ju alué napu bo'né najkí. Rekó 'we resí nilie abirigáchigo senibí rawé 'we a'lá oyéramili ju ne'chí. <sup>25</sup> Alué rió napu majame ju me'libólikó ne'chí oyérame kóriká, alueka tase rewimela semati raweli. Alué rió napu ne'chí oyérame ju 'lige bilé rawé me'lisuga ne'chí oyérame kóriká, alueka 'la semati raweli rewimela 'pa rewagachi. <sup>26</sup> Tabilé a'lá ju rekó bilé rió we'ká meme ke enomí, alué rió alawálaka wamí 'légana injiérnochi simeli júkuru. ¿Chekí najtétimála alué rió napurigá bo'né alawála tabilé simela injiérnochi? <sup>27</sup> 'Ma pe'wé uchéchigo siné nawámala alué napu ju Onorúgamete julárigame 'pa rewigáchika, 'lige asíriga 'la semáriga nawámala Onorúgame a'walilate 'lige aminami santo ánjeli si smela, 'lige ralámuli napu 'la sébali olale Onorúgame 'yuga 'la narémili ju napu Onorúgame 'yámili ju. Alué ralámuli napu tabilé 'la sébali olale Onorúgame 'yuga, alueka gastigo narémili ju. <sup>28</sup> Neka 'la bijchiá aníguru, jaré ralámuli napu jena mochí, tabilé 'cho suwimela napusí etesa alué napu 'pa rewagáchika nawale rió neraga 'we semáriga nulachi.

## 17

### *Jena ruwimela Esusi se'winati gayénaligo*

<sup>1</sup> A'kinana usani rawé kachi Esusi o'tole Pegro 'lige Santiago, 'lige Juani, Santiago bonila, 'lige simíbale bilena re'pá rabó. <sup>2</sup> 'Lige alé Esusi 'ma se'winátiri gayénale alemi alué bakiá rió Esusi 'yuga járome jágichi. Banalá napuyeri rayénali alieri gayénale. 'Lige o'páchalaka rojsákame gayénale 'la rapanti napurigá ra'ósali. <sup>3</sup> 'Lige pe anaga neraga etele oká rió Esusi si ra'icha jágichi, bilé Moisesi nile 'lige uché bilé Elíasi, alué napu 'ya epperégame nílige. <sup>4</sup> 'Lige Pegro anele Esusi:

—Muérigo nulame, ¡'láchigo jena nauptitiko'é ramué! 'La ikisá koko newáwa'é bakiá galí rojsate, napurigá 'emi mochímala alé, bilé mué galila 'lige bilé Moisesi galila, 'lige bilé Elíasi galila.

<sup>5</sup> Napu'lige Pegro bijí ra'icha ilígichi, bilé nolí rapame re'kinale 'pa rewigáchikana, 'lige 'ma na'pólale suwábaga. 'Lige bilé ra'ichame anile nolíralekana e'wele ra'ichame, pe Onorúgame nile, regá anile:

—Ye Esusi ne Inolá júkuru, asíriga galé ne. Asíriga ganílga ajtí ne alué 'yuga. 'We a'lá gepuwa napu aní alué.

<sup>6</sup> 'Lige alué akigá wijchí ajkaná bi'tíbale alué bakiánika, pe asíriga charigá majale. <sup>7</sup> 'Lige Esusi a'bé nawile 'lige nochale 'lige anele:

—Yati ku o'michísawa, tase majawa.

<sup>8</sup> Napu'lige e'nénale alué bakiá rió, 'ma tabilé 'wesi i'tele, pe Esúsicho.

<sup>9</sup> Napu'lige ku 'pákana rabókana e'yéniga Esusi 'we sulile napurigá tabilé 'wesi ruyémala alieti etéligo. Regá anele:

—Tabilé 'wesi ruyewa etéligo 'emi alué Moisesi 'lige Elíasi napusí alué Onorúgamete julárigame 'pa rewagáchika 'ma ku ajánisa, a'lige kulí ruyewa.

<sup>10</sup> 'Lige alué oyérameka rukele:

—¿Chonigá alué Moisesi nila nulalí benírimeka aníaniché Elíasi bajchá nawámili ko 'lige alué uché bilélaka napu Onorúgame julámili ju 'pa rewigáchika napurigá ralámuli gu'írimala, alueka nujubá nawámili ko?

<sup>11</sup> 'Lige Esúsika nejele:

—'We bijchiá ju Elíasi bajchá nawamio napurigá gatemio suwábaga. <sup>12</sup> Neka aníguru Elíasika 'ma nawáligó, 'lige alué ra'íchali benírime pecha machigó. Tabilé machile, iligá 'we cha olale. Alué e'wélala jena wijchimoba mochigame jipe 'we resí olámalachigó alué 'pa rewigáchika julárigame napurigá rió neraga.

<sup>13</sup> 'Lige 'la machile alué Esusi 'yuga járome Juani olagá anió alué Esusi, alué Juani napu ralámuli rewaramé nílige, Juánika níligo napurigá Elíasi.

### *Jena ruwimela Esusi 'yóligo bilé re'malí rekúpame*

<sup>14</sup> Napu'lige Esusi sebase alué bakiá bo'né 'yuga járome 'yuga alé napu mochile we'ká ralámuli, 'lige bilé rió a'bé nawile Esusi, 'lige chojkóbisiga ilíbale alué rió alé o'wemi napu ilile Esusi, 'lige anele alué rió:

<sup>15</sup> —Mué Wa'lula, pe rekó na'temápuaka ne inolá. Asíriga rekúpame ju, 'lige aminami asíriga resí nílga ajtíme ju. P'sínimi 'ma na'ichí wijchime ju 'lige aminami ba'ichimi. <sup>16</sup> Jena a'pigéturu ne napurigá sa'wámala alué mué oyérame, alueka tabiléchigo umébatigó sa'wá.

<sup>17</sup> 'Lige Esúsika anile:

—¡Tachiti ralámuli! ¿Tabilé bijchígime ju 'emi Onorúgame a'walí nígime ko napurigá 'la umbámala sa'wá? ¿Chekí rawé asiati káréko ne 'emi 'yuga napurigá 'emi 'we a'lá benimela? ¿Chiéniko si anachamio ne 'emi 'yuga? Jeka o'tobógó 'liko alué re'malí.

<sup>18</sup> 'Liko Esusi ne'óchale alué u'tabela remónisi 'lige ma'chínale alué u'tabela remónisi alué re'malichí, 'liko 'ma sa'wile alué re'malí, a'lige si tabilé uché rekúpale.

<sup>19</sup> 'Lige pe'tá i'libékorikáchi alué Esusi 'yuga járome Esusi si ra'ichale aminami, a'mibemi waná rukele:

—¿Chonigá tabilé umabárupeché ramué alué u'tabela remónisi ma'chí pa?

<sup>20</sup> Lige Esusi anele:

—'Émika tabilé bijchígame kanko 'la umébane ko ne ralámuli sa'wá. 'Emi rekó pe bijchígie 'la a'walí nígame ka Onorúgame, 'liko regá anesa 'emi bilé rabó: «Uchéchigo bilena ilibáwaká», 'la yati e'wámikuru alué rabó.\*

*Jena ruwimela Esusi uchéchigo siné ruwíligo mukumeo*

<sup>22</sup> Napu'lige Esusi alé Galilea anilichi ejiro asigá, anele alué Esusi alué bo'né 'yuga járome:

—Onorúgamete julárigame 'pa rewagáchika, alué cha nokame ralámulite cha'piboli ju. <sup>23</sup> Lige 'ma me'liboli ju. 'Lige bakía rawé kachí ku ajánamala.

Napu'lige alué Esusi 'yuga járome akisá alué ra'íchali, asiriga seweka mochíbale.

*Jena ruwimela Esusi najtétame níligo alé wa'lú re'obachi*

<sup>24</sup> Napu'lige Esusi sebasa alué bo'né 'yuga járome 'yuga alé Kapernaumi anilichi we'ká riógichi, alué ralámuli napu enomí goblálome nile wa'lú re'obachi unélime Rusaleni ilígame re'obá, Pegro e'nemia simíbale, 'lige rukele:

—¿Pala najtétame júkó alué wa'lula mué benírame?

<sup>25</sup> Lige Pégroka nejele:

—Abiena.

Napu'lige galírale sebasa, Esusi bajchá ra'íchale Pegro 'yuga, regá anele:

—Mué Simoni, ¿mueka chonígobá? ¿Chieri najtétamarágo enomí alué e'wélala nulame, napu jena wijchimoba mochí, a'boi 'kúchila gobláliga aní o uchéchigo jaré ralámuli?

<sup>26</sup> —Uchéchigo jaré ralámuli —anile Pegro.

'Lige anile Esusi:

—Kúchika pecha najtétimili júkó. <sup>27</sup> Alarigá júkuru ramué 'yuga, ramueka Wa'lula O'nó Onorúgame 'kúchila nírukuru, ramueka pecha najtétimile júkó alué o'nó 'yuga. Jípeko abirigá najtétawaleké napurigá tabilé ayoga ejtebímala alué enomí goblálome. Alekeri 'mi ba'wí ilígichi simibógó benolí pamia, napu'lige mué ro'chí chewasa, alé alué ro'chí chu'álachi rewimela mué bilé enomí plata, 'lige ma'chí pápuaká, 'lige alué enomí goblálome 'yáwaká. Aluete 'ma suwábaga najtétarigime nímala, nétiri 'lige 'émitiri.

## 18

*Jena ruwimela Esusi ruwíligo chieri ko abé najtékame*

\* **17:20** Jarena osilichi 'we 'ya nerúgame Onorúgame ra'íchálila tabilé chujkume ju bersíkulo **21** napu regá anime ju: Yeti Remónisi tabilé ma'chíname ju tabilé tániliká nejkúrali Onorúgame 'lige tabilé ayunalia. \* **18:11** Jaré osilí 'we 'ya nerúgame tabilé chujkú ye bersíkulo.

<sup>1</sup> Alígerikáchi alué Esusi 'yuga járome alemi a'bemi jábale napu asale Esusi 'lige regá anele:

—¿Chieri abé najtékame ju napu'lige Onorúgame nulachi ralámuli alawálachi?

<sup>2</sup> 'Lige Esúsika bayele bilé u'tá towí 'lige alé nasípa elale, 'lige regá anele alué bo'né 'yuga járome:

<sup>3</sup> —Neka 'la bijchiá aníguru. Tabilé a'résaká 'emi gunarua, 'lige niwa napurigá ye u'tátiri napu tabilé riólame ju, 'liko 'emi tabilé siné elimala napurigá Onorúgame 'emi nulémala. <sup>4</sup> Alué tabilé riólame alué 'nalina abé najtékame ju napu'lige Onorúgame nulachi ralámuli alawálachi. <sup>5</sup> 'Emi 'la na'temaka eteme nísaká ye towí napu ne 'we na'temaka eté, 'liko 'la ne'chí oyérame nímala 'emi.

*Jena ruwimela Esusi ruwíligo napurigá a'lá 'nátaga mochiwa napurigá tabilé chátiri nóchali nochawa*

<sup>6</sup> Bilé rió resítiri 'nátili 'yame bilé ta towí kulí benime Onorúgame nila ra'íchali, abé 'la nímala ba'íchi rojkógachi pásiga wa'lú majtá golótiga. <sup>7</sup> 'We sewékame ju ralámuli jena wijchimoba mochíggame cha we'ká ralámuli mochíggame 'we resí nokame, alué napu re-jome ju uché jaré ralámuli napurigá oilámala resí nokiachi! ¡Alarigá ikimela, nobi 'we resítiri nímala alué rió uché jaré ralámuli oilárisa resítiri nochálichi!

<sup>8</sup> Bilé 'emi sekala o ronola kómá 'we resí nokisá, rejpnúaga 'lúpua 'lina. Abé alá ju rewagachi moinalia tpe bi'lepi sekega o pe bi'lepi ronega. Tabilé 'la nímala 'la okánika sekega, o okánika ronega simiá 'légana in-jjiérnuchi napu senibí rajá ilí. <sup>9</sup> 'Lige bilé 'emi 'we chátiri na'tasa pe bilé tábiri etega, ma'chí pápu alué busí 'lige 'ma pápu, abé 'la nímala 'pa rewagachi simiá, napu'lige mukusuga pe bi'lepi busega. Tabilé 'la nímala 'la okánika busega simiá 'légana in-jjiérnuchi napu rajá ilí.

*Jena ruwimela Esusi ruwíligo bilé tétali bilé bo'á we'kágame*

<sup>10</sup> Tase gawéliga etewa ye u'kuchítiri. Neka 'la bijchiá aní, alé 'pa rewagachi senibí tani mochí alué santo añjeli Onorúgame, napurigá Onorúgame gu'írimala alué u'kuchítiri. <sup>11</sup> Alué Onorúgamete julárigameka nawáligime 'la bowechi jawamia alué ralámuli 'we i'níliga e'yéname.\*

<sup>12</sup> ¿'Émika choniágó? Bilé rió bujkéggame nisa bilé sientó bo'á 'lige bilé bo'á we'kasa, ¿tacha yati simime júkó 'yamia alué bo'á we'kággame, alé jamí a'resa alué gi makuesa makué na gi makué? <sup>13</sup> Lige ku rewisá

alué bo'á we'kágame, 'we ra'sálame ju alué bo'á we'kágame etea, me'tigá alué bo'á tabilé we'kágame napu a'rele alé jami alué we'kágame 'yamia simea. <sup>14</sup> 'Emi o'nola 'pa rewagachi ajtígame tabilé najkíchigó napurigá bilé u'kuchítiri we'kámala.

*Jena ruwimela Esusi ruwíligo churigá e'kálime ka uché bilé Onorúgame oyérame*

<sup>15</sup> › Mué cha olásiga bilé riote napu Onorúgame oyérame korime ju, yati 'yuga ra'ichawa waná 'la bi'neli, 'lige 'we alá ruyewa bilé rejcholi napurigá 'la tabilé che 'sika inámala. 'Ma 'la tabilé che 'simorisáká 'liko 'ma neyúrigame kérélamala mué. <sup>16</sup> 'Lige tabilé 'la nírásiká mué alué riote, 'liko oká ralámuli bayewa napurigá testigo nímala 'la rejcholi ruyéligo mué. <sup>17</sup> 'Lige tabilé e'wísachigó alué oká ralámuli, 'liko ruyewa alué e'wélala re'obachi nóchame 'we cha olárigo mué alué riote, 'lige tabilé e'wasa alué rió rekó alué e'wélala 'la rejcholi ruyesa, 'liko a'rewa 'lige etewa napurigá bilé rió tabilé Onorúgame oyérame.

<sup>18</sup> › Neka 'la bijchiá aníguru, Onorúgame 'we alá niramio napu 'emi nulé alué Onorúgame oyérame.

<sup>19</sup> › Abiena regá ané ne, oká 'emi bi'lepi 'nátaga tánsa Onorúgame napurigá nejkúramala, 'liko ne O'nola Onorúgame, alué napu 'pa rewagachi ajtí, yati nejkúramala. <sup>20</sup> Oká bakiami rió napuísaká bi'lepi 'nátili 'nátaga ne'chí 'yuga, 'liko ne alawala alé asimela napu napuile alué ralámuli.

<sup>21</sup> 'Liko Pegro rukele Esusi:

—Mué Wa'lula, bilé rió Onorúgame oyérame abisibi cha olasa ne'chí, ¿chekisá e'kawa? ¿Gicháosa?

<sup>22</sup> 'Lige Esúsika anile:

—Neka pecha gicháosa anígó. Pe ikisá cha'sichí nabí e'kálime júkuru, 'lige amiami nabí 'we alá etélime júkuru rekó we'sá cha'sié.

*Jena ruwimela Esusi ruwíligo bilé tétali bilé rió tabilé e'kálígo uché bilé rió*

<sup>23</sup> › Ne bilé tétali ruwimela churigá ka napu 'lige Onorúgame nulachi. Pe a'chigóriga ju napurigá bilé wa'lula rey goblálile alué bo'né 'yuga nóchame wikame. <sup>24</sup> 'Lige júlale bilé wikame bayéniliga, 'lige bilé nawale alué abé we'ká miyoni wikame, <sup>25</sup> 'lige alué rió tabilé enomíggame nile napurigá najtétamala. Alekeri alué wa'lula rey nulale napurigá napinewa alué rió 'ma mukí 'yúriga, 'lige 'ma 'kúchilatiri 'lige suwábaga napu ekí nígame nile. 'Lige alué enomika alué wa'lula rey o'ká rejpmili nile, alué enomite 'ma najtétirigime nímili nile alué nóchame wikalila, napu ekí wikame nílige alué nóchame. <sup>26</sup> 'Liko alué nóchameka chojkóbisiga ilíbale alé a'bé alué wa'lula ajtígichi, 'lige anile amulí nalaka:

«Muérigo wa'lula 'la na'temápua ne'chí, 'la i'libesi buwewa abiena 'la najtétamala ne suwábaga.» <sup>27</sup> 'Liko alué wa'lula rey 'we na'tamale alué nóchame, 'liko 'ma tabilé goblálorimoré, 'liko 'ma tabilé najtétimili nile alué nóchame. 'Lige 'ma su'pánale. <sup>28</sup> Napu 'lige 'ma ma'chínasa alué rió napu 'we na'temáliku alué wa'lula reyte, alué rioka najtépale uché bilé rió nóchame napu alué rió wikeme nile 'lige gujtachí gamínale 'lige anele: «¡Yati najtétawa ne suwábaga napu ekí wiké mué ne'chí!» <sup>29</sup> 'Liko alué rió chojkóbisiga ilíbale alé a'bé napu ilile alué napu na'temaka etéliku alué wa'lula reyte, 'lige anele: «'La na'temápua ne'chí 'la i'libesi buwewa, abiena 'la suwábaga najtétamala ne.» <sup>30</sup> 'Lige alué napu 'we na'temaka etéliku alué wa'lula reyte tabilé najkile, iligá 'ma galírale bajchale, napusí najtétasa ma'chí pame olale. <sup>31</sup> Napu 'lige uché jaré nóchame akisá ala'síligo asíriga seweka mochíbale 'lige simíbale wa'lula rey e'nemia, 'lige suwábaga ruyele. <sup>32</sup> 'Lige alué wa'lula reyka júlale bayéniliga alué nóchame napu 'la na'temaka etélige 'lige anele: «Mué cha'sime, neka 'la na'temaka etégituru mué 'lige, alekeri pe arigá a'rigéturu ne napurigá tabilé najtétimila mué. <sup>33</sup> Muéchigó a'chigóriga na'temá télíkuru alué nóchame 'yuga, a'chigóriga napurigá ne mué na'temake.» <sup>34</sup> 'Lige wa'lula asíriga ayole. Nulale napurigá gastigáriwa napusí najteta suwábaga napu ekí wikame nílige.

<sup>35</sup> 'Liko Esusi 'ma guwárasa ye tétali ruwiyá, anile:

—O'nó Onorúgame 'pa rewagachi ajtíggame, a'chigóriga gastigárimili júkuru 'emi, 'emi tabilé na'temásaká uché bilé Onorúgame oyérame. 'La e'kálime júkuru, 'lige uchéchigó siné ku 'la neraga etélime júkuru.

## 19

*Jena ruwimela Esusi rejcholi ruwíligo napurigá suwábaga newíkame tabilé rojámala*

<sup>1</sup> Napu 'lige alué Esusi 'ma suwénasa alué rejcholi ruyá, 'ma simile alé Galilea anilichí ejiro asigá, simile na'lebo 'nálige alé Jorani anilichí bakochi 'omi neraga napu ma'chíname ju rayénali. <sup>2</sup> 'Lige we'ká ralámuli alemi guwánami simíbale, 'lige Esúsika alemi 'we 'yole nayúkame.

<sup>3</sup> 'Lige jaré bariseo jsile alemi napu Esusi asale 'lige rukele Esusi machínaliga chonirá Esusi, se'wináriga nejésaká alué Esusi, 'liko nejimo lala. Regá rukele:

—¿Churigá aní ramué nila nulalí? ¿'La ju bilé mukí a'rilía 'ma newíkame níriga?

<sup>4</sup> 'Lige Esúsika regá rukele:

—¿Tacha leérame júkó 'emi alué osilí Onorúgame nila napu ruwime ju rió 'lige



mukí newáligo pe kulí newá ralámuli jena wijchimoba?

<sup>5</sup> 'Lige alarigá rukesa, kúchigo regá anele Esusi alué bariseo:

—Alekeri regá anile Onorúgame, bilé rió 'ma a'rémili ko bo'né o'nola 'lige bo'né eyela, 'lige rewimeli ko bilé mukí 'lige okaka 'la bi'lepi 'nátili na'támili ko. <sup>6</sup> Alésíko 'ma tabilé oká ralámuli neraga níkala, pe bi'lepi kárélamala. Onorúgame napubule, alekeri tabilé 'la ju rojanalia alué newíkame.

<sup>7</sup> 'Lige alué bariséoka anele:

—'Liko chonigá 'la anile ko alué Moisesi 'la ko napurigá bilé apeli newawa alé ra'ichali gatélíchi ruwime 'ma a'rélígo bo'né upila?

<sup>8</sup> 'Lige Esúsika anele:

—'Emi cháchigo resí nokagá járome kanko umugí a'regá 'lige uchéchigo bilé rewigá, alekeri Moisesi anile 'la ko pe bilé apeli newagá a'rílía bilé mukí. 'Ya chojkiná raweka tabiléchigo alarigá nílekó. Onorúgameka tabilé najkile napurigá rojámala. <sup>9</sup> Neka regá aníbá: Bilé rió a'resa bo'né upila 'lige uché bilé mukí rewisá, alué alarigaka 'we resíruga ju. Abiena newisa uché bilé mukí a'rérígame 'yuga, abiénachigó wa'lú resítiri ju. Bilé rió rewisá bo'né upila se'nú rió 'yuga gojchíchi, 'liko 'la ju a'rílía alué mukí, 'liko 'la ju uché bilé mukí 'yuga newília.

<sup>10</sup> 'Lige alué Esusi 'yuga járome ka regá anele Esusi:

—Alarigá nísaká rió níriga, 'liko abé 'la ju tabilé newília.

<sup>11</sup> 'Liko Esúsika anele alué bo'né 'yuga járome:

—Tabilé o'má ralámuli nama ye napu ne ruwimela, pe alué ralámulicho napu Onorúgame wanápule napurigá 'la námamala. <sup>12</sup> Jaré rió o'chéráme ju napurigá ga'libúrígame neraga. 'Lige jaré 'ma e'wele o'chérísa ga'libume ju uché jaré riote. 'Lige jaré tabilé newime ju Onorúgame níla nóchali nóchiga. 'La námápua ye 'la námame níriká.

*Jena ruwimela Esusi tánaligo Onorúgame napurigá tebúmala u'kuchí 'kuchi*

<sup>13</sup> 'Lige alué we'ká ralámuli a'pile jaré u'kuchí 'kuchi Esusi alemi napu ilíle, napurigá nochagá iwérali 'yámala alué u'kuchítiri 'kuchi, 'lige napurigá iwérali tánimala Onorúgame, 'lige alué makué oká rió Esusi 'yuga járomeka yati sulile napurigá tabilé a'pámala u'kuchítiri alé. <sup>14</sup> 'Lige Esúsika anele:

—A'rewa napurigá alué u'kuchítiri jeka smela tase sulíwa. Onorúgame nuleme ju sulachí alué ralámuli napu ju napurigá

u'kuchí 'kuchi napu yati nareme ju napu'lige i'lía bilé tábiri.

<sup>15</sup> 'Lige alué Esusi alué u'kuchítiri nochagá tánale Onorúgame napurigá 'we a'lá repúmala alué u'kuchítiri 'kuchi, 'lige simile.

*Jena ruwimela Esusi ra'ichaligo bilé re'malí 'we nígame 'yuga*

<sup>16</sup> 'Lige Esusi boichimi enágichi, alemi nápale bilé re'malí 'lige regá rukele:

—Mué benírame, 'ztachiri chu'simía 'we a'lá ju napurigá moinawa 'pa rewagachi alé asimea senibí?

<sup>17</sup> 'Lige Esúsika anele alué re'malí:

—Mueka, 'zchonigá rukéché mué tachiri 'la ko? Onorúgamecho ju 'we a'lá sébali olame. 'La moinánílisaká 'pa rewagachi mué, 'liko 'la sébali olawa napu nulale Moisesi 'we 'ya.

<sup>18</sup> 'Lige alué re'malika rukele:

—'zTachiri nulálekó alué Moisesi?

'Lige Esúsika anele:

—Tase me'liboa ralámuli. Tase e'sena umugí 'yuga gojchíboa, pe mué bo'né upílacho 'yuga gojchíboa. Tase chigowa. Tase 'wesi ralámuli 'yuga 'yega ra'ichawa. <sup>19</sup> 'We a'lá nírawa mué bo'né eyela 'lige mué bo'né o'nola. 'We a'lá níraga etewa apíépiri uché jaré ralámuli napurigá níra mué bo'nepi.

<sup>20</sup> 'Lige alué re'malika nejele:

—Suwábaga alué 'la sébali olame ju ne 'yasi u'tá towí ka. 'zTachiri chu'sílíme rokaréko?

<sup>21</sup> 'Lige Esúsika regá anele:

—Ralinewa napu ekí tábiri ní mué, 'lige kógiwa alué enomí alué tabilé nígame, 'liko ne 'yuga einawa, a'liko a'kinana semati raweli narémala mué 'pa rewagachi.

<sup>22</sup> Alarigá anesa alué Esusi, alué re'malí 'we sewele, 'lige 'ma ku simile cháchigo we'ká i'karúgame nígame níligame.

<sup>23</sup> 'Liko Esusi anele alué bo'né 'yuga járome:

—Neka 'la bijchíá aníbá, 'we nóchali níkala bilé rió 'we nígame níriga sébali olá napurigá najkí Onorúgame. <sup>24</sup> We'ká ralámuli 'we nígame, we'ká bujkégame akasí, chibátiri, bo'átiri, tabilé néléme ju Onorúgame, alekeri tabilé moinámili ju napu ajtí Onorúgame. Abé 'la néléme ju Onorúgame alué tabilé nígame.\*

<sup>25</sup> Alué Esusi 'yuga járome tabilé námale alieti akea, 'lige rukele:

—'zChieri 'la rewagachi moinámala napu'lige mukusá?

<sup>26</sup> 'Lige Esúsika e'nénele 'lige anele:

—Bilé rió bo'né 'nátaga tabilé lisenasia 'yame ju napurigá Onorúgamete nulewa, Onorúgameka 'la nejkúrime ju, alarigaka

\* **19:24** Matéoka regá anile: Abé tabilé nóchali olame ju bilé kameyo simira wejchá ewalachi, abé nóchali olame ju bilé 'we nígame moyena rewagachi napu ajtí Onorúgame.

'la sebawa rewagachi. Onorúgame nírika suwábaga tabilé nóchali kame ju.

<sup>27</sup> 'Liko alué Pégroka anele alué Esusi:

—Ramueka 'ma a'reru suwábaga tábiri napu nígame nírige ramué mué 'yuga e'yénimia. Alekeri tachiri nóchali 'yámala Onorúgame ramué 'pa rewagachi.

<sup>28</sup> 'Lige Esúsika anele:

—Neka 'we a'lá bijchiá aní, napu'lige jena wijchimoba ku 'we a'lá kachi, napu'lige alué napu Onorúgamete julárigame ju napurigá rió neraga 'ma chojkiasa nulá alé 'pa rewagachi, suwábaga 'emi abiena mochúbamalachigó alé makué oká e'wele siachi napu mochime ju alué e'wélala nulame. 'Lige alaké makué okaná siachi mochiga, nulámala 'emi alué makué okaná chojkégame ralámuli Israeli anilichi mochigame. <sup>29</sup> Apiépiri rió napu a'rele bo'né galila, 'lige bonila, 'lige ba'chila, 'lige go'chila, 'lige wailatiri, 'lige o'nólatiri, 'lige eyélatiri, 'lige upila, 'lige 'kúchilatiri, ne'chí oyériniliga, alueka bilé sientu uché rajpé 'yámala Onorúgame. 'Lige 'la 'pa rewagachi simela alé asimea senibí. <sup>30</sup> We'ká napu bajchá jánilí, alueka pe guwana juláwili ju. 'Lige alué 'we guwana jágame ka, alueka 'mi bajchá juláwili ju. We'ká alué napu 'we nígame ju, alueka tabilé narémili ju semati raweli 'pa rewagachi, 'lige we'ká napu tabilé nígame ju jena wijchimoba, alueka 'we a'lá semati raweli narémili ju 'pa rewagachi.

## 30

*Jena ruwimela Esusi ruwíligo bile rió we'ká i'wili ('uba) echágame 'we a'lá najtétiligó alué bo'né yuga nóchame*

<sup>1</sup> Napu'lige Onorúgame nulachi ralámuli alawálachi, pe a'chigóriga ju napurigá bilé rió we'ká i'wili echágame, napu simile jaré nóchame owimia napurigá nochámala alué i'wili echégichi. <sup>2</sup> 'La gatele alué nóchame 'yuga, 'we a'lá najtétimorile napu ekí meme nile bilé rió nóchaga bilé rawé, 'lige júlale alé i'wili echégichi. <sup>3</sup> Be'á, pe'wera rainasa, uchéchigo simile alé napu we'ká napuime nile ralámuli, 'lige alemi etele uché jaré rió pe alemi mochíginti tabilé nocha. <sup>4</sup> 'Lige anele: «'Émichigó simasi nochawa alé we'ká i'wili echégichi, 'lige 'la sébali najtétimala ne», anele. 'Lige alué rioka yati simíbale nochamia. <sup>5</sup> Alué i'wili echágame 'ma rawili uchéchigo simile alé napu we'ká ralámuli napuime nile, 'lige 'ma abé aligítili uchéchigo simile alé napu we'ká ralámuli napuime nilige, 'lige owile jaré rió napurigá simámala nochamia alé i'wili echégichi. <sup>6</sup> 'Lige 'ma abé alí, 'ma amulí rapagachi, uchéchigo simile alé we'ká rioga ilígichi nasípami, 'lige etele alemi uchéchigo jaré rió pe mochigo

alemi tabilé nocha, 'lige rukele: «¿Chonigá pe jemi mochíripeché 'émika rukuchégame tabilé nóchaga?» <sup>7</sup> 'Lige alué pe alemi mochígame rioka nejele: «Ramueka pe jemi mochíru pecha 'wesi rejome nochálíchi, anile. 'Lige alué we'ká i'wili echágame rió anele: «'Émichigó simáwaguru nochawa alé napu echá ne i'wili, 'lige 'we a'lá najtétimala ne.»

<sup>8</sup> 'Lige napu'lige 'ma chonasa, alué rió alué we'ká i'wili echágame regá anele alué nóchame nuleme: «Bayewa alué nóchame 'lige najtétiwaká, bajchá alué abé alí mo'ígame najtétíwa, 'lige kúchigo abé ta'mé alí mo'ígame, 'lige abé nububaka alué be'á mo'ígame pe kulí rayénachi.» <sup>9</sup> 'Lige alemi jsile alué rió napu 'ma alí mo'ile nochamia 'ma amulí rapagachi, 'lige rekó pe'wera nóchaga mele napu ekí meme nile bilé rió rukuchégame nóchaga. <sup>10</sup> 'Lige alué be'á chojkime nocha pe kulí rayénachi, alué najtétiru, 'lige mayele abé we'ká memo me'tigá alué alí mo'ígame, 'lige pe alakí mele napu ekí mele alué 'we alí rapagachi chojkime. <sup>11</sup> 'Lige alué be'á mo'ígame nocha 'ma najtétisiga chojkile ayonia alué echerúgime nígame, <sup>12</sup> regá anigá: «Ye ralámuli 'ma alí mo'ígame nocha asíriga 'la mékuru 'la napu ekí metu ramué napu 'la rukachégame nocharu 'we rajtálaga ramíná.» <sup>13</sup> 'Liko alué echerúgime nígame regá anele alué bilé ayome rió: «Muké rió, neka tase gaweli mué, neka tase abé u'kabi najtétiniliga 'smi mué, neka 'la sébali najteti mué napu ekí najtétimorié ne mué, ¿tacha 'la ra'ichárukó bajchá pe bilé rawé nochárigime najtétimio ne? <sup>14</sup> Yati nareki napu ekí mele mué 'lige yati ku simiboa. Neka abiena pe alakí najtétima olá ne alué napu abé alí chojkile nocha, a'chigó ekí napu ekí mele 'emi. <sup>15</sup> ¿Tacha 'la júkó napurigá najtétimala ne napurigá ne bo'né najkí?, napugiti ye enomika pe ne nila kame. O ¿'wéchala enowéliru ala'sichi ne, 'we a'lá najtétíchi ne, neka 'wéchigo a'lá sébali olame rió kame?» <sup>16</sup> Alarigá alué ralámuli napu 'nátame ju 'we najtékame ko me'tigá uché jaré ralámuli, machimela tabilé najtékame ko, 'lige alué napu 'la machime ju tabilé najtékame ko, alueka machimela 'we najtékame ko —anile Esusi.

*Jena ruwimela Esusi uchéchigo siné ruwíligo 'ma me'liboli ko*

<sup>17</sup> Boichimi 'yéniga Rusaleni simiba, 'lige alué Esúsika waná bayele alué makué oká Esusi 'yuga járome, 'lige regá anele:

<sup>18</sup> —'La gepúsibá, ya 'ma simawa alé 'pa rabó alé Rusaleni anilichi. Ramueka 'a e'nárukurú Rusaleni simiba. Alué napu Onorúgamete julárigame ju 'pa rewagáchika 'ma cha'piboli ju, 'lige 'ma o'toboli ju alé napu mochí alué e'wélala walú re'obachi

nulame 'lige alué Moisesi nila nulalí benírame. Alueka animela me'liáté alué rió, <sup>19</sup> 'lige 'ma o'tomela e'sena ralámuli mochígichi napurigá me'liboa. 'Lige ta'chó me'á, alué sontalo 'we gawélimala 'lige a'kachípamala 'lige wejpisópua, 'lige gulusichi ujchagá me'liboa, 'lige pe bakiá rawé kachi ku ajánamala —anile Esusi.

<sup>20</sup> 'Alige alué Sebereo 'kúchila eyela nawale alemi alué Sebereo 'kúchila 'yuga, 'lige alemi sébaga yati chojkóbaka ilíbale o'wemi Esusi ilígichi 'lige tánale napurigá bilé nóchali 'yawa alué ejtemali. <sup>21</sup> 'Lige Esúsika anele:

—¿Tachiri nóchali i'lime najkí mué alué ejtemali?

'Lige alué mukika anele:

—Napu'lige 'ma chojkichi nulá mué 'pa rewagachi, nuláwaká napurigá ye oká ejtemali ne 'kúchila mochímala alé mué 'yuga, bilé o'iná 'lige bilé wajtoná.

<sup>22</sup> 'Liko Esúsika anele:

—Tabilé machí mué napu najkí. ¿'La anachámala 'emi resí nilia napurigá ne?\*

'Lige alué ejtemálika anele:

—Aka 'lágurú.

<sup>23</sup> —'La bijchiá ju 'emi 'we resí nilamala napurigá ne —anele Esusi— iligá tabilé ne 'simála mochía alé napu ne asimela alé a'naguka. Onorúgame bo'né 'la machí chieri mochiamia alé a'naguka napu ne asimela nulá.

<sup>24</sup> Napu'lige alué oká rijimá alanichi, akele alué uché jaré makué rió Esusi 'yuga járome, 'lige 'we na'áwale alué oká rió 'yuga. <sup>25</sup> 'Liko Esúsika bayele alué makué oká rió bo'né 'yuga járome, 'lige anele:

—Alué e'wélala rey napu nuleme ju ralámuli tabilé bijchíggame Onorúgame ra'ichálila, alueka 'we nochárima ju alué ralámuli napurigá ajágame neraga. <sup>26</sup> 'Emi e'wélala nínilisaká, tabilé alarigá nokimeli ju 'emi, bajchá 'we alá gu'irimili júkuru ralámuli. <sup>27</sup> Alué napu wa'lula nínili, bajchá pe nóchame niraga nímili júkuru, 'lige aminami tabilé gunarume nímili júkuru. <sup>28</sup> Nímili ju napurigá alué 'pa rewagáchika julárigame Onorúgamete napurigá rió neraga. Tase nawale napurigá gu'iriwa ralámulite, alueka iligá nawale gu'irimia ralámuli, 'lige mukumea we'ká ralámuli gu'iriga.

*Jena ruwimela Esusi sa'wáligo oká rió tabilé ma'chílime*

<sup>29</sup> Napu'lige alué Esusi 'lige alué 'yuga járome 'ma simasa alé Jerikó anilichi mochiga, we'ká ralámuli najátale. <sup>30</sup> 'Lige oká rió tabilé ma'chílime mochile alé

boichimi, 'lige akisá alemi enegó Esusi, yati chojkile ra'icha, regá anea:

—¡Muérigo Wa'lula Nulame Rabí rijimala, 'we a'lá na'temápua ramué!

<sup>31</sup> 'Lige ralámuli alemi si e'yénigime sulile alanichi alué oká rió tabilé ma'chílime, 'lige alué oká rioka aminabi abé a'wágame bayea mochile:

—¡Muérigo Wa'lula Nulame Rabí rijimala, pe rekó 'we na'temápua ramué!

<sup>32</sup> 'Lige alué Esúsika ilíbale 'lige bayele alué tabilé ma'chílime, 'lige anele:

—¿Tachiri cholliame najkígó 'emi?

<sup>33</sup> 'Lige alué tabilé ma'chílimeka anile:

—Mué Wa'lula Nulame, ramueka najkiá napurigá ku 'la ma'chílime gainámala ramué busila.

<sup>34</sup> 'Liko Esúsika 'we na'temale, 'lige nochale busila, 'lige pe yati 'ma ku 'la ma'chílile alué oká rió tabilé ma'chílime, 'lige Esusi 'yuga simíbale alué oká rió.

## 21

*Jena ruwimela Esusi 'ma sébaligo Rusaleni rewégichi*

<sup>1</sup> Napu'lige 'ma a'mulipi e'yéniga amulí seba Rusaleni rewégichi, sébale alé bilena a'bé Be'tagé rewégichi, Olibo anilichi rabó re'leberi. Alé sebaso Esusi júlale oká alué bo'né 'yuga járome, <sup>2</sup> 'lige anele:

—Simíbaga 'mi alé riógachi, 'mi alé napu ma'chigá ju, 'lige alé riógichi sebaso 'emi, etémala 'emi bilé bulito mukila chériga chujkúgame bilé u'tá bulito ranégame. Su'panasa, jeka a'páwaká alué bulito mukila 'ma alué ranala 'yúriga. <sup>3</sup> 'Lige bilé rió rukisá chonigá su'panalio alué bulito, yati anewa: «Alué Wa'lula Esusi najkí napurigá tanewa ye bulito, pe yati ku rolonawa ramué», anewa —anile Esusi.

<sup>4</sup> Alarigá ikile napurigá 'la sébali ikimela napurigá anilige 'we 'ya alué rió napu ruyame nilige napu anélige Onorúgame, napu'lige regá anile:

<sup>5</sup> Regá anéwaká alué Sioni (Rusaleni) ejperégame ralámuli:

«'Emi ralámuli, alué wa'lula rey napu 'emi nuleme ju,

aleka ená,

'we a'lá i'kilí tabilé che anisia,

bilé bulito ranala asigá.»\*

<sup>6</sup> 'Liko alué Esusi 'yuga járome yati simíbale 'lige alarigá sébali olale napurigá nuléligo Esusi. <sup>7</sup> Yati a'pale alué bulito mukila 'lige alué bulito ranala 'yúriga, 'lige alué okánika bulito pérale alué Esusi 'yuga járome alué a'boi gemala chiní i'weli, 'lige alué Esúsika yati asele bulito ranala, napu tabilé siné asérigame nile. <sup>8</sup> 'Lige

\* 20:22 Matéoka regá osale, ¿'La bajímala 'emi alek'é básochi napu bajímala ne?

\* 21:5 E'nesi Zacarias 9:9.

suwábaga ralámuli napu we'ká nile, alemi wijchí pesia e'yénale alué chiní i'weli a'boi gemala alemi boichimi, 'lige jaréchigo rajkú sawala ro'asia e'yénale boichimi. <sup>9</sup> 'Lige suwábaga ralámuli guwánami e'yénigime 'lige bajchabemi e'yénigime 'we ra'sálásia e'yénale regá anisia:

—¡Hosana (salva)! ¡'La sébakuru mué jena! ¡Mué Esusi Rabí rijimala, mueka wa'lula nímala napurigá alué wa'lula Rabí anilime 'ya ajtígame! ¡'We a'lá semáriga nulale alué, alarigá nulámala mué! ¡Hosana! ¡'Láchigo sébakuru mué jena!

<sup>10</sup> Napu'lige alué Esusi 'ma sebasa alé Rusaleni rewégichi we'ká riógichi, ralámulika majale 'lige anile:

—¿Chieri júché ye rió?

<sup>11</sup> 'Lige we'ká ralámuli anile:

—Ye rioka pe ju Esusi, napu ruyame ju napu ané Onorúgame, alé Nasareta ejiro Galílea bejtégame.

*Jena ruwimela Esusi 'ma mabúligo alué ralineme ralámuli alé wa'lú re'obachi ra'pichí mochígame*

<sup>12</sup> 'Lige bajkile Esusi alé wa'lú re'obachi ra'pichí Onorúgame galílahi, 'lige 'ma mabule suwábaga napu ralineme nile, 'lige napu ralame nile alé pachá re'obachi ra'pichí mochíga, 'lige 'ma re'nubuga 'lule suwábaga mesa napu enomí nakulílichí nile, 'lige 'ma re'nubule alué banco napu jale alué wakali chulugí baloma ralinélime. <sup>13</sup> 'Lige regá anile:

—Aka osiruga chukúché osilichi: «Ne galílaká Onorúgame 'yuga ra'ichálime júkuru», 'lige 'émika chigórigame resola newálekuru.

<sup>14</sup> 'Lige jsile alemi alé Esusi ilírachi tabilé ma'chílime ralámuli 'lige jaré na'lime, 'lige yati sa'wale Esusi. <sup>15</sup> 'Lige alué e'wélala balé 'lige alué Moisesi nila nulalí benírame ralámuli etele alué Esusi 'we a'lá sa'wáligo alué nayúkame, 'lige aminami akele alué u'kuchí ejtemali regá anichi:

—¡Hosana! ¡'La sébakuru mué jena! ¡Mué Esusi Rabí rijimala, mueka wa'lula nímala napurigá alué Wa'lula Rabí anilime 'ya ajtígame!

Alieti akisá, 'we ayole alué e'wélala balé 'lige alué Moisesi nila nulalí benírame, <sup>16</sup> 'lige regá anéliru Esusi:

—Mué Esusi, ¿'la aké mué alaniá jago alué ralámuli?

'Lige Esúsika anele:

—Ju, 'la aké ne. ¿Tabilecha siné leera 'emi Onorúgame nila ra'ichalichi napu aní:

Alué u'kuchítiri 'kuchi bijí chi'ime chu'álachika

ma'chínamala Onorúgame wikala?

<sup>17</sup> 'Lige alemi a'rigá alué ralámuli, 'ma simile alé we'ká riógachi asigá, Betania anilichí simile 'lige alé che'lévale.

*Jena ruwimela Esusi 'we ená anegá ne'óchaligo alué chuná tabilé rakeme*

<sup>18</sup> Melénala rawé ku Rusaleni simiá enale Esusi, e'lowile. <sup>19</sup> 'Lige etele bilé chuná 'lige simile e'nemia 'lige etele tabilé pe'tá rakégame ko alué chuná, pe sawálacho, we'ká sawégame rewale, 'lige anele alué chuná:

—¡Tabilé siné go'mela ralámuli mué chuná rakala, 'máchigo ta siné rakémempá mué! —anele.

'Lige pe yati wakíbale alué chuná. <sup>20</sup> Alieti etega alué Esusi 'yuga járome tabilé námaka regá anile:

—¿Churigá 'la wakíbalaché pe yati pe alanésiga alué chuná?

<sup>21</sup> 'Lige Esúsika regá anele:

—'La bijchíá ruwí ne, 'we a'lá bijchígime nisaká 'emi wa'lú a'walí nígame ko Onorúgame, pecha pe bilé chuná wakebáchimiko 'emi, 'émika 'la umabámikuru 'mimi wa'lú ba'wí manígichi elá ye wa'lú rabó pe regá anegá: «Se'wí iliboa, iliboa alé nasipa wa'lú ba'wí ilígichi», 'lige yati e'wámikuru ye rabó. <sup>22</sup> 'We a'lá bijchígiga tánisa 'emi Onorúgame, 'liko suwábaga napu tani 'emi, Onorúgame 'we a'lá nejmála.

*Jena ruwimela e'wélala rukéligo Esusi chonigá buyánaligo alué ralámuli alé ra'pichí wa'lú re'obachi mochígame ralinéa*

<sup>23</sup> Napu'lige alé ra'pichí wa'lú re'obachi bajkisá alué Esusi, 'lige alemi ilígichi alué Esusi ralámuli beniria, yati alemi jsile alué e'wélala balé 'lige alué jurío ralámuli nuleme, 'lige anele:

—¿Tachiri gite buyánaché mueka alué ralámuli alé wa'lú re'obachi ra'pichí mochígame ralinéa? ¿Chíérite ajchárigame júkó mué Wa'lula neraga? ¿Tachiri najtékame nóchali nígame júkó mué 'siá?

<sup>24</sup> 'Lige Esúsika anele:

—Ne abichigó rukémala bilé ra'íchali, 'lige 'la ma'chígime nejiásaká 'emi, ne 'la ruwimela chonigá tachiri gite buyánigo ne ralámuli jena ra'pichí mochígame ralinéa. <sup>25</sup> ¿Chieri júlale Juani ralámuli rewarániliga, Onorúgame chalá o ralámuli chalá?

'Lige alué e'wélala balé 'lige alué jurío ralámuli nuleme a'bopi rukele, regá anile:

—Onorúgame júlale anisúká 'liko animela alué Esusi: «¿'Lige chonigá ta bijchígirupaché 'emi napu ané Juani?» anile. <sup>26</sup> 'Lige anésiká pe ralámuli júlaligo alué Juani, 'liko pe majá mochiwa ralámuli, siné kachi pe ramué saíla niraga mochíbamala ralámuli, napugiti suwábaga ralámuli 'we a'lá machígá mochígame Juani ruwime níligo napu anele Onorúgame.

<sup>27</sup> 'Liko pe regá anile:

—Tabilé machirú'é chiérite julárigame nílgo alué Juani.

'Liko alué Esusi anélechigó:

—Néchigo tabilé ruwimela tachiri gite buyánigo ne suwábaga ralámuli jena ye ra'pichi wa'lú re'obachi mochígame ralineá.

<sup>28</sup> › 'Émika ¿choniágó? Bilé rió oká 'kúchigame nile, 'lige alemi a'bemi simigá napu ajtile alué bilé, regá anele: «Simigá mué jipe nochawa alé we'ká i'wílí echégichi.» <sup>29</sup> 'Lige alué towika anile: «[Tabilé siminali ne!] Nobi 'wéchigo cha láléko alanisá 'lige pe'tá 'ilibeko yati simile nochamia. <sup>30</sup> 'Lige alué rió o'ká 'kúchigame a'bemi simigá napu ajtile alué uché bilela, 'lige a'chigóriga anélechigó napurigá anélige alué uché bilela, 'lige alueka regá nejele: «La ju, kulipi simé ne.» Tabiléchigo similéko. <sup>31</sup> ¿Chieri 'nalina 'la e'wálekobá napu o'nola nulele?

'Liko alué e'wélala balé 'lige jurío ralámuli nuleme regá anile:

—Alué bajchá nulériméguru.

'Lige Esúsika anile:

—Neka 'la bijchiá aníbá, alué enomí goblálome 'lige alué we'ká rió 'yuga okome umugí, alueka bajchá 'la lisensia 'yámala napurigá Onorúgamete nulewa alawálachi, tase napurigá 'emi, <sup>32</sup> napugiti 'émika tabilé bijchíligame 'la rejcholi ruwichi alué Juani 'la o'wé jawamia ralámuli, 'lige alué enomí goblálome 'lige alué we'ká rió 'yuga okome umugí 'we alá bijchíligame rejcholi nejichi alué Juani, 'lige rekó 'emi 'la etege suwágaba yeti, tabilé pe'tá ku guwana 'nátalekuru.

*Jena ruwimela Esusi bilé tétali ruwíligo i'wílí ('uba) tebume ralámuli*

<sup>33</sup> › Gepúsibá uché bilé tétali: Bilé rió we'lé nígame wajsá. We'ká banawá jáwale i'wílí anilime, 'lige 'we alá 'yele, 'lige jole bilénami i'pichí alé me'chomia alué i'wílí rakala, napu'lige rakesa alué ba'wila ma'chí pamia, 'lige newale bilé galí re'pá ílgame napurigá alué tebume alé asigá repúmala alué we'ká banawá i'wílí.

› 'Lige owile repúniliga jaré rió alé nóchame, 'lige bo'neka simile bilénami mejkami. <sup>34</sup> Napu'lige sebasa rawé i'wíliame, alué gawígameka 'naka júlale jaré bo'né piónila napurigá rojanámala nasípasi, 'yamia napu ekí mélapá alué repume. <sup>35</sup> Alué tebuka mochígameka tabilé rojanánile 'lige 'ma cha'píliro alué gawígame piónila alemi jsichi. Bilé 'ma cho'náliro, 'lige uché bilela ka 'ma me'áliro, 'lige uché bilela ka 'ma bajsibúliro. <sup>36</sup> 'Lige alué gawígame ka uchéchigo jaré bo'né piónila júlale, 'lige alué banawá rakeme repume ka a'chigóriga olale napurigá alué bajchá julárigame pioní.

<sup>37</sup> › 'Lige 'ma guwíchimiká bo'né inolá júlale alué gawígame regá 'nátaga: «Ne inolaka 'la niraga etéwarékó.» <sup>38</sup> 'Lige alué banawá tebume ka, napu'lige etesa alué gawígame inolá, regá anile a'bopi: «Alué bi'lepi júkuru alué rió gawígame inolá, 'lige alué júkuru alué o'nola nila nachuámili napu'lige o'nola mukusá, alekeri me'liboa. Alarigá 'la ramué niga ejtebiwa ye gawí o'nola mukusá», anile. <sup>39</sup> 'Lige cha'pisá 'ma me'ale 'lige i'rachi ma'chige pale.

<sup>40</sup> › Napu'lige nawasa alué gawígame, ¿cholámalawé alué banawá repume?

<sup>41</sup> 'Liko alué e'wélala balé 'lige alué jurío ralámuli nuleme anele Esusi:

—Alué 'we ená nokágame ka 'ma me'liboli ju tabilé na'temaka, 'lige uché jaré 'yámala repúniliga alué we'ká banawá jágame, 'lige alueka 'la rojanámala alué banawá rakala napu'lige 'ma rakesa.

<sup>42</sup> 'Lige Esúsika anile:

—¿Tabilé siné leérame ju 'emi osilí Onorúgame nila?, alé napu anime ju:

Bilé rejté tabilé galegá etérigame alué galí newame ralámulite

tabilé machime nile 'we alá ko alué rejté chijtochi ajchíliá.

'Lige alué rejté abé alá nile alé chijtochi ajchalíá.

Onorúgame bo'né alarigá elale.

Napu Onorúgame 'sile newá 'we alá semátiri ju ramué níriga.†

<sup>43</sup> › Neka 'we alá bijchiá aníbá Onorúgame 'ma tabilé nulamio 'emi alawálachi, 'lige alué Onorúgame nulémala uché jaré ralámuli napu 'we alá e'wímili ju Onorúgame. <sup>44</sup> 'Lige napíepiri rió alé rejtechi bo'ibasa, 'ma chí'wámala. 'Lige bilé rió me'táchisa alué rejtechi, 'ma chí'laga rejpmala.

<sup>45</sup> 'Lige alué ra'íchalí akigá alué e'wélala balé 'lige alué ralámuli bariseo, machíle pe alué olagá aníligo alué Esusi alieti ra'íchaga.

<sup>46</sup> 'Liko alué e'wélala balé 'lige alué bariseo 'we cha'pinálile alué Esusi, pe iligá 'we majale cha'pigá, 'wéchigo 'la bijchíligime suwábaga ralámuli 'la Onorúgame ra'íchalíla nareme nílgo Esusi.

## 22

*Jena ruwimela Esusi ruwíligo bilé tétali bilé piesta newigime*

<sup>1</sup> 'Lige Esúsika uchéchigo siné ruwile bilé tétali, regá anile:

<sup>2</sup> —Napu'lige Onorúgame nulachi ralámuli alawálachi, a'chigóriga ju napurigá napu'lige bilé wa'lula rey napu wa'lú piesta newile bo'né inolá newichi. <sup>3</sup> Júlale bo'né 'yuga nóchame bayéniliga we'ká ralámuli napurigá smela go'mea, napu 'ma bayérigame nílgo, 'lige alué bayérigame tabilé simánili alué

newigime nerúgichi go'ame go'mea. <sup>4</sup> 'Liko alué newime o'nólaka júlafe uchéchigo jaré bo'né 'yuga nóchame napurigá regá anémala alué 'ma bayérigame: «Ruyéwaká alué ralámuli napu 'ma baigé ne 'yabé 'ma newáriga iligó go'ame, nuligó ne me'línaliga akasí 'lige ajágame abé 'la sa'pégame 'lige suwábaga 'ma 'la listo iligó, yati bayewa napurigá jeka smela go'ame go'mea.» <sup>5</sup> 'Lige alué napu 'ma bayérigame nílige go'ame go'achi tabilé simíbale go'ame go'mea alé newigime nerúgichi, jaré pe 'mi wasá bo'ígichi simíbale nochamia 'lige jaré pe che jarénami simíbale nochamia, <sup>6</sup> 'lige jaréchigo napu tabilé simánale alé newigime nerúgichi 'ma cha'pile alué wa'lula rey 'yuga nóchame, 'lige 'we resí oláliku 'lige me'áliku. <sup>7</sup> 'Liko alué newime o'nólaka napu wa'lula rey nile, 'we ayole machisá 'ma me'líliko alué ralámuli julárigame alué ralámuli bayénaliga, 'lige júlafe bo'né sontálola napurigá me'limela alué ralámuli cha nokame, napu 'ma me'ale alué wa'lula reyfe julárigame, 'lige 'ma me'líliku alué cha nokame 'lige 'ma e'kósiliku suwábaga galí. <sup>8</sup> 'Liko alué wa'lula rey alué newime re'malí o'nola anele alué bo'né piónila napu mochile alemi, regá anele: «Go'ámeka 'ma listo ilí, iligá alué napu bayérigame nílige, alueka tabilé simánili, 'ma tabilé lisensia nígama ju napurigá smela. <sup>9</sup> Alekeri yati simawa alé napu e'yéname ju ralámuli, 'lige apiépiri ralámuli napu eteru alemi bayéwaká napurigá smela go'ame go'mea jena newigime nerúgichi.» <sup>10</sup> 'Lige alué wa'lula rey piónila ka simíbale alemi napu napuíme ju ralámuli 'lige yati bayele suwábaga napu ekí najtépafe alemi, napurigá simámala go'ame go'mea alé newigime nerúgichi, alarigá 'la we'ká ralámuli jsile alé alué re'malí newichi, suwábaga 'la go'ale alué go'ame.

<sup>11</sup> › 'Lige alemi bajkile alué wa'lula rey alué newime re'malí o'nola, napu go'yá mochile alué ralámuli bayérigame newíkichi, 'lige etele bilé rió tabilé o'páchigime alué o'pacha napu o'páchaga simiame nile bilénami newigime nerúgichi. <sup>12</sup> 'Lige regá anele alué rió: «Mué rió, ¿churigá 'la bajkíché mué jena peka o'páchaga nawasa napu o'páchaga nawilime ju bilé newigime nerúgichi?» 'Lige alué rioka tabilé pe'tá nejele rukíla. <sup>13</sup> 'Liko alué wa'lula reyka anele alué napu go'ame ro'ame nile: «Ronola bulesí ye rió 'ma sekala 'yúriga, 'lige alé ma'chige pápua chonárale napu nalámala resí nílige 'lige napu chí'namela ramalá majaga.» <sup>14</sup> We'káchigo kame bayérigame 'lige u'kabi ju napu 'la sébame ju alé newigime nerúgichi.

*Jena ruwimela Esusi ruwíligo Onorúgame yalime ko napu Onorúgame 'yáwili ju*

<sup>15</sup> 'Alige pe'tá ilibeko alué bariseo simíbale alué Esusi rukemia jaré ra'íchali pe machínaliga chonirá. Se'winá anisáká yati cha'pibó olale. <sup>16</sup> 'Lige alué bariseo júlafe jaré a'boi gompaniérola 'lige alué wa'lula Erote gompaniérola napurigá regá anémala alué Esusi:

—Mué Esusi, ramueka 'we a'lá machiaa 'we a'lá ganilime ko mué 'la o'wé ra'íchiga tase 'yéigiga, 'lige 'we a'lá benírame ko mué churigá ka alué 'we a'lala bowé. 'Lige 'we a'lá machiaa ramué mué 'la niraga eteme ko ralámuli, rekó e'wélafe kachi 'lige rekó pioní kachi. <sup>17</sup> Alekeri najkíá napurigá ruwimela mué: ¿Pala 'la ju nejilía alué enomí napu nejilime ju alué wa'lula rey Sesar i'lime? ¿Tabiléchala?

<sup>18</sup> Alúe Esúsika 'we a'lá machile pe resítiri 'nátaga aníligo alué ralámuli, machile pe Esusi resí olánaliga aníligo, 'lige anile Esusi:

—¿Chonigá alaníbiché 'émika pe resí olánaliga ne'chí? 'Émika 'we a'lá ra'íchame ju pe iligá chátiri 'nátame júkó. <sup>19</sup> Aka jeka a'pásigo bilé enomí chijtúlígame napu najtétiwili ju alué wa'lula rey.

<sup>20</sup> 'Lige Esúsika anele alué bariseo 'lige alué Erote gompaniérola:

—¿Chieri mo'ola ju ye mo'ó jena enomichi ajtígama, 'lige chieri rewalá chujkú ye enomichi?

<sup>21</sup> 'Lige alué bariseo 'lige alué Erote gompaniérola anele:

—Aka alué wa'lula rey Sesar anilime.

'Lige Esúsika anile:

—Napu alué wa'lula Sesar nila ju, alueka alué wa'lula Sesar 'yáwaguru, 'lige alué napu Onorúgame nila ju, alueka Onorúgame 'yáwaguru —anile Esusi.

<sup>22</sup> Alieti akigá tabilé machile churigá nejemia 'lige simíbale, tabilé che olale.

*Jena ruwimela Esusi ruwíligo 'la rewagachi simíbame ko alué a'ká ralámuli alawala napu 'lige suwisá*

<sup>23</sup> Pe a'lige rawé alué saruseo anilime ralámuli, alué napu anime ju tabilé sébame ko rewagachi alué suwígama alawala, Esusi 'yuga ra'íchale, regá anele:

<sup>24</sup> —Mué Esusi, ralámuli benírame. Moisesi a'rele bilé osilí regá anime 'we 'ya: Bilé rió mukusá 'lige bi'neli rejipisa mukí tabilé 'cho 'wesí 'kúchiga, alué mukúgame bonila rewimeli ju alué mukí napurigá 'kúchigame nímala alué mukí gunámakame, alué mukúgame bonila 'yuga asigá, 'lige alué mukúgame bonila 'kúchila o'chérisa napurigá alué mukúgame 'kúchila kárélamala —anile alué ralámuli saruseo.

'Lige abiena regá anele:

<sup>25</sup> —Sinéchigo mochile gichao ejtemali bi'lepi o'nógama, 'lige alué wa'lula ba'chila rewale sineko, 'lige mukule ba'chila tabilé

'cho 'wesi 'kúchiga, 'lige alué abé u'tabela alué chega bonila rewale alué mukí gunámakame, 'lige 'ma mukúlechigó tabilé 'cho 'wesi 'kúchiga. <sup>26</sup> Lige alarigá ikile alué u'tabela 'lige alué abé u'tabélachigó, 'lige alarigá suwile suwábaga a'boi najarémala. <sup>27</sup> Alué gichao rió suwírisa, mukule alué mukí gunámakame.

<sup>28</sup> Lige alarigá anesa, kúchigo regá rukéliru Esusi:

—Napu'lige alé rewagachi sebase alué gichao ejtemali 'lige alué mukí aleka, ¿chieri 'nalina upila nímawé alué mukí? Jena wí-jchimóbaka suwábaga gichao ejtemali upila nligame.

<sup>29</sup> Liko Esúsika regá anele alué ralámuli:

—'Émika tabilé machigá mochí. Tabilé machí 'emi Onorúgame nila ra'íchali, nibilé machí 'emi churigá ko Onorúgame a'walila. <sup>30</sup> Alué napu eki seba rewagachi, nibilé umugí nibilé riótiri newímala, aleka suwábaga ralámuli napurigá santo ánjeli rewagachi mochígame nímala. <sup>31</sup> Aka alué bo'né Moisesi osálige'é pe u'kabi osilí, napu Onorúgame anílige napu ruwí rewagachi simíbame ko alué ralámuli suwisá. ¿Tabilé síné leérame ju 'emi alué ra'íchali? Anime ju: <sup>32</sup> «Ne ju Onorúgame napu Abraámi, Isaki 'lige Akobo oyérame ju.» Onorúgame níriká tabilé 'wesi suwígame kéré, suwábaga ajágame ju.

<sup>33</sup> Alieti ra'íchali akisá, we'ká 'nátales alué ralámuli, aliena 'la benigá ruwichi alué Esusi.

*Jena ruwimela Esusi ruwíligo tachiri ko alué nulalí rejcholi abé najtékame*

<sup>34</sup> Liko alué bariseo abé i'libeko kachi akele 'we a'lá benigá nejéligo alué Esusi, 'lige tabilé aminabi ra'íchiga jábigo alué ralámuli saruseo, 'liko alué bariséoka napuile o'maka 'lige simíbale napu ajtile Esusi. <sup>35</sup> Lige bilé rió napu Moisesi nila nulalí benírame nile, regá rukele alué Esusi pecha olániliga se'winá anisáká:

<sup>36</sup> —Mué Esusi, benírame ralámuli Onorúgame nila ra'íchali, ¿tachiri júkó alué nulalí rejcholi 'we najtékame?

<sup>37</sup> Lige Esúsika nejele:

—'We galewa Onorúgame, 'la bi'lepi 'nátile 'nátiga. <sup>38</sup> Alué ju abé najtékame nulalí rejcholi. <sup>39</sup> Lige alué uché bilé nulalí rejcholi regá anime ju: «Napurigá galé 'emi a'boi alawala, alarigá galewa uché jaré ralámuli.» <sup>40</sup> 'We a'lá sébali e'wásaká 'emi ye oká nulalí rejcholi 'we najtékame, 'liko 'we a'lá sébali olámala 'emi suwábaga alué uché jaré nulalí rejcholi napu osale Moisesi, 'lige uché jaré napu ruyame ju napu ané Onorúgame.

*Jena ruwimela chieri ko alué Onorúgamete jullárigame*

<sup>41</sup> Napu'lige napuika mochígichi alué bariseo, Esusi regá rukele alué bariseo:

<sup>42</sup> —'Émika ¿choniágó, chieri koriágó alué Kristo? ¿Chieri rijimale kori 'emi alué?

'Lige alué bariséoka anile:

—Pe Rabí.

<sup>43</sup> Lige Esúsika anile:

—¿'Lige chonigá wa'lula aneme júché alué Rabí alué Kristo olagá? Onorúgame Alawala gu'írale napurigá animela regá:

<sup>44</sup> Onorúgame anele alué Wa'lula Kristo ne'chí nuleme:

«Jena asá wajtoná

napusi neyuro ne mué saíla 'yuga.»

<sup>45</sup> Aka alué bo'né Rabí aneme ju «ne'chí nuleme» alué Kristo, 'liko abéchigo najtékame júleké alué Kristo me'tigá alué Rabí.

<sup>46</sup> 'Lige tabilé 'wesi ralámuli 'la gayénale nejea, 'lige aleké rawé si tabilé 'wesi e'wérali olale rukea aminabi ra'íchali.

## 23

*Jena ruwimela Esusi ruwíligo churigá ka bilé ralámuli gunarúgame*

<sup>1</sup> Pe'tá i'libeko Esusi ra'íchale alué we'ká ralámuli 'yuga 'lige alué bo'né 'yuga járome, regá anele:

<sup>2</sup> —Alué ralámuli Moisesi nila nulalí benírame 'lige alué bariseo, alueka abé machí churigá ko alué Moisesi nila nulalí.

<sup>3</sup> 'Émika 'we 'la e'wiwa tabiri tábiri napu nulá, pe iligá tase alarigá nokíboa, napurigá nokame ju alué bariseo, 'lige alué Moisesi nila nulalí benírame, napugiti alueka regá anime kame: «Jípeko regá nochátékuru.» 'Lige pe se'wináriga nóchame ju bilé nóchali, tase napurigá anílige. <sup>4</sup> 'We a'wágame nuleme ju ralámuli, 'lige alué a'boika tabilé tábiri nóchame ju. <sup>5</sup> Alueka 'we ganílime ju ujchagá e'yénaga gorá, 'lige sekachí korea bulugá e'yéname ju napu osirúgime ju pe u'kabi ra'íchali Onorúgame nila ra'íchali, napurigá ralámuli etémala.

'Lige aminami i'weli reboso gemagá e'yéname ju, napu a'naguchi chitochi i'weli se'wégame ju. Alarigá nokame ju napurigá ralámuli na'támala 'we a'lá sébali oyérame ko Onorúgame. <sup>6</sup> Lige najkime ju napurigá 'we a'lá semáriga kógiwa bilena wa'lú go'ame go'achi. Lige mochime ju alé napu mochímili ju alué abé e'wélala alé u'kuchi re'obachi pachá «sinagoga» rewégame, <sup>7</sup> lige aminami najkime ju napurigá 'we 'la níraga repóriwa uché jaré ralámulite alemi napu we'ká ralámuli mochí. 'Lige najkime ju napurigá regá anewa ebreo ra'íchaga: «Rabí» (napu aníame kéré benírame).

<sup>8</sup> » 'Émika tabiléchigo alarigá nokibógó, tase najkime niwa napurigá anewa «benírame», péchigo bi'lepi kame alué benírame Onorúgame nila ra'íchali, pe alué

napu ju Kristo, 'lige suwábaga 'émika bi'lepi O'nógame júkuru napu ju Onorúgame. <sup>9</sup> Lige tabilé 'wesi «o'nó» anewa alué uché jaré ralámuli, O'noka péchigo bi'lepi kame, pe aluecho napu 'pa rewagachi ajtí. <sup>10</sup> Lige tabilé najtkiá mochiwa napurigá «benírame» anewa 'emi napugiti bo'né benírame ka pe bi'lepi kame pe Kristocho Onorúgamete julárigame. <sup>11</sup> Alué napu wa'lula ju suwábaga gu'irimili ju. <sup>12</sup> Alué rió napu mayeme ju 'we najtérame ko, alueka pe tabilé najtérame kérélamala. Alué napu tabilé riólame ju, alué 'nalina nímala abé najtérame Onorúgame níriga.

<sup>13</sup> › ¡Resí 'emi Moisesi nila nulalí benírame 'lige 'emi bariseo, tabilé sébali olame ju 'emi 'la sébali olámirisá! 'Émika tabilé a'reme kame ralámuli napurigá e'wíwala Onorúgame napurigá Onorúgame alué ralámuli nulémala. 'Lige 'emi tabilé e'wame ju. Aminami tase elime ju 'emi napurigá sébali olámala alué uché jaré ralámuli napu 'la sébali olánilime ju.

<sup>14</sup> › ¡Resía 'emi ralámuli Moisesi nila nulalí benírame 'lige 'emi bariseo, tabilé 'la sébali olame ju 'emi! 'Émika 'ma bujeme ju galí alué umugí gunámakame galila, 'lige jame ju 'emi Onorúgame tania iwérali re'obachi we'lisi napurigá suwábaga ralámulite etewa 'emi. Alekeri 'émika abéchigo wa'lú gastigo narémala.

<sup>15</sup> › ¡Resía 'emi ralámuli Moisesi nila nulalí benírame 'lige 'emi bariseo, tabilé 'la sébali olame ju 'emi 'la sébali olámirisá! 'Émika ichúrimi e'yéname ju ralámuli 'yuga ra'ichiga napurigá alué oyérame gainámala, 'lige 'emi oyérame gainasa abéchigo resí nokame ju me'tigá 'emi, 'lige simámala injiérnochi napurigá 'emi.

<sup>16</sup> › ¡Resía 'emi, 'émika uchéchigo jaré beníriniliguru nobi tabiléchigo námame júkó 'emi! ¡'Émika pe siego neraga ju uché bilé ralámuli siego o'tome! 'Émika aní bilé ralámuli 'we alá sébali olama orisá Onorúgame 'yuga, anigá alué re'obá e'negá iligó napurigá 'la sébali olámala, alarigaka tabilé najtérame ju. 'La sébali olama orisá Onorúgame 'yuga anigá alué 'oro pachá re'obachi ajtígame e'negá iligó, napurigá 'la sébali olámala, alueka 'la najtérame ju. <sup>17</sup> ¡'Émika pe tonto julke 'lige aminami siego! ¿Tachiri abé najtérame júkó, 'oro o re'obáchala alé napu 'oro nerú? Tabilé nerúlasaká 'oro alé re'obachi Onorúgame galilachi, 'liko pe tabilé 'me najtérame nímiliké. <sup>18</sup> Abiena anisá 'emi: «'We alá sébali olama olá ne Onorúgame 'yuga mesa e'negá iligame alé pachá wa'lú re'obachi

iligame», 'liko tabilé sébali olámili ju. 'Lige regá anisá 'emi: «'We alá sébali olame ne Onorúgame 'yuga, e'negá iligame go'ame re'pá mészachi iligame», 'liko 'we alá sébali olame ne. <sup>19</sup> ¡'Emi 'we siego ju! ¿Tachiri abé najtérame ju, go'ame Onorúgame kógilime o mészachala? Tabilé mészachi jásaká go'ame, 'liko pe napuyépiri go'ame neraga jámilike. <sup>20</sup> Alué rió napu 'we alá sébali olámori anigá alué mesa pachá re'obachi iligame e'negá iligó, pe abiena anigá aní alué go'ame mészachi jágame abiena e'negá jago. <sup>21</sup> Alué rió napu aní 'we alá sébali olámori anigá re'obá e'negá iligó, abiena anigá aní Onorúgame e'negá ajtígó napu alé pachá re'obachi bejtégame ju, alekeri 'we alá sébali olámori. <sup>22</sup> Alué rió napu 'we alá sébali olámori anigá rewagá e'negá ajtígó, pe abiena anigá aní e'negá iligó alué wa'lú sia napu Onorúgame ajtime ju, 'lige abiena e'negá ajtígó Onorúgame.

<sup>23</sup> › ¡Resía 'emi Moisesi nila nulalí benírame 'lige 'emi bariseo, tabilé sébali olame ju 'emi napu aní! 'Émika wanápame ju pe'tá alué gajsalá 'we alá semá júkame napu go'ame ajchilime ju (yerbabuena, anís, komino) Onorúgame kógilime, 'lige alué abé alá najtérame 'nátalika 'ma tabilé néléme ju 'emi. Tabilé sébali olame ju 'emi napu nulá Moisesi alé bilena osilichi, alué napu ju 'we alá sébali gatélime ra'ichali ralámuli 'yuga, 'lige 'la na'temaka etélime ralámuli, 'lige 'la bi'lepi oyérilime pe Onorúgamecho. Suwábaga ye júkuru napu 'la sébali olámili ju 'emi. <sup>24</sup> ¡'Émika pe siego neraga kéré napu o'tonálime ju uché jaré ralámuli bilénami! ¡'Émika alá saweme ju alué ba'wí tabilé 'yúruga bajimia u'kuchí se'walí, nobi 'máchigo a'wame júkó 'emi alué wa'lú ajágame kameyo anilime!\*

<sup>25</sup> › ¡Resía 'emi ralámuli Moisesi nila nulalí benírame 'lige bariseo, 'émika tabilé e'wame ju napu aní 'emi! 'Emi 'we alá bi'weme ju alué baso 'lige alué bejtoli pe amoba, 'lige pacháganaka 'we chóligame ju. <sup>26</sup> 'Emi bariseo siego: 'we alá bi'wewa alué baso pachágana 'lige bejtoli, napurigá 'la bi'wígame nímalachigó ma'chímána. 'Émika napurigá alué baso 'lige alué bejtoli alarigá ju 'emi. Amóbaka 'we bi'igá e'yéname ju nobi pacháganaka 'we chátiri 'nátame ju 'emi. Abiena 'we alá bi'wígame niwa pacháganachigó napurigá alué baso.

<sup>27</sup> › ¡Resía 'emi ralámuli Moisesi nila nulalí benírame 'lige bariseo, 'émika tabilé e'wame ju napu aní 'emi! 'Émika ju napuyépiri suwígame bi'tígichi galila, napu 'we alá semáriga ju ma'chígiká, nobi pacháganaka

\* 23:24 Yeka pe aníame kéré alué bariseo 'we alá 'nátaga 'la sébali olániliga alué nulalí ta'mé najteme, 'lige tabilé 'la 'nátaga sébali olale alué abé najteme nulalí Moisesi nila.



we'ká bi'tígame kéréko alué suwígame o'chilá 'lige we'ká sa'pá bikágame. <sup>28</sup> Alarigá ju 'emi, 'émika 'we a'lá ralámuli káré e'nériká péchigo tabilé 'la 'nátame júkó 'emi, pe chibiyeti 'nátame kéréko.

<sup>29</sup> , ¡Resía 'emi ralámuli Moisesi nila nulali benírame 'lige bariseo, 'émika tabilé e'wame ju napu aní 'emi! 'Émika pe galírime ju amoba napu bi'ti alué 'ya suwígame ralámuli napu ruyame nile napu Onorúgame anélige, 'lige e'karúgame 'we a'lá semátiri tábiri jáwame ju 'emi alé amoba napu bi'ti tótiga ralámuli 'we a'lá sébali olame, <sup>30</sup> 'lige regá anime ju 'emi: «'Ya epperélisiga ramué pecha síchigo nokibókó ramué me'á alué ralámuli, napu ruwime nílige napu Onorúgame anele.» <sup>31</sup> Alanigá 'emi a'boi aníguru alué 'ya mochígame rijimála ko 'emi alué napu me'ale alué 'ya mochígame ralámuli, napu ruwime nile napu Onorúgame anélige. <sup>32</sup> ¡Suwénisigó 'liko napu 'ma o'winalepa alué 'ya mochígame 'emi rijimála!

<sup>33</sup> , ¡'Émika ju napurigá sinowí! ¿Churigá 'la neyúsimala 'emi napurigá tabilé rujsúmala 'légana injiérnochi? <sup>34</sup> Alemi julámala ne jaré ralámuli ruwime napu ané Onorúgame, 'lige jaréchigo 'we ehebénigame 'lige jaréchigo benírame, 'lige 'émika jaré 'ma me'limela gulusichi ujchagá, 'lige jaréchigo 'ma wejpisómala 'emi alemi u'kuchi re'obachi «sinagoga» rewégame mochígichi, 'lige jaréchigo 'ma najátamala 'emi ichúrimi we'kanami we'ká riógichi e'yénachi me'lináliga. <sup>35</sup> Alekeri 'emi narémala alué walú gastigo suwigórikábá suwábaga alué 'we a'lá ralámuli, suwábaga alué napu me'líliru napusí me'líliru alué Abeli anilime rió 'we 'ya ajtígame. Alué Abeli me'lisuga akiná si we'ká me'líliru napusí ocheró alué Sakaríasí, Berekíasí inolá. 'Émika alé rapíchí me'ale alué Sakaríasí alé nasipa napu e'kósime nile ajágame Onorúgame kógimia, 'lige alué walú re'obá ilígichi. <sup>36</sup> Neka 'we a'lá bijchiá anibá suwábaga ralámuli jipe epperégame walú gastigo naremio, cha we'ká ralámuli me'líligime 'we 'ya. 'Émika pe alekí chátiri 'nátali 'nátame ju napurigá 'nátame nile alué ralámuli 'ya mochígame.

*Jena ruwimela Esusi naláligo ralámuli Rusaleni epperégame na'temaka*

<sup>37</sup> , ¡'Emi ralámuli Rusaleni epperégame, 'émika me'ame ju alué napu ruwime napu Onorúgame ané, 'lige aminami rejtete bajsibuga me'ame ju 'emi alué ralámuli Onorúgamete julárigame! ¡Neka we'sá 'we napabúnilige 'emi napurigá bilé o'tolí ra'kome ju bo'né a'tanala, nobi 'émika tabiléchigo elárigó! <sup>38</sup> 'We a'lá e'nésibá, 'emi epperélachi tabilé rioga rejipímala, 'lige Onorúgame tabilé asimela alé. <sup>39</sup> Neka 'we

a'lá bijchiá aní, jípesí 'ma tabilé etémala 'emi ne'chí napusi regá anichi 'emi: «'¡'We a'lá ju alué napu ju Onorúgamete julárigame!»

## 24

*Jena ruwimela Esusi ruwíligo 'ma na'mináwili ko alué walú re'obá*

<sup>1</sup> Esusi ma'chínale alé walú re'obachi ra'pichila, 'lige alué 'yuga járome a'bé nawile Esusi napu'lige ma'chige ilígichi, 'lige anele: —Asíriga walú ju alué re'obá, asíriga semati.

<sup>2</sup> 'Lige Esúsika anele:

—¿'La etiá 'emi alué re'obá? Neka 'la bijchiá aní, 'ma na'mináwili ko ye re'obá. Tabilé pe bilé rejte rejpmio uché bilé rejtechi amoba.

*Jena ruwimela Esusi ruwíligo churigá nimio napu'lige amulí suwíbachi gawí*

<sup>3</sup> 'Liko alé rabó simíbale Olibo anilichi. Napu'lige Esusi i'kilí ajtígichi alé alué makué okáraga Esusi 'yuga járome nawile Esusi rukemia. 'Lige tabilé najkile napurigá uché jaré ralámuli akimela ra'íchachi. Regá anele:

—Ramueka machinálilike'é, ramué ruyéwaká chiéniko na'mináwili ko alué walú re'obá. ¿Chieti tábiri nerúlámala ruyame mué ku sebamio? ¿Chieti tábiri nerúlámala napu'lige gawí suibámichi?

<sup>4</sup> 'Liko Esúsika anele:

—'La 'nátiga mochiwa napurigá tase 'yéigiga ra'íchámala che jaré ralámuli 'emi 'yuga. <sup>5</sup> We'ká ralámuli smela Onorúgamete julárigame korísiga, a'chigóriga a'wágame a'wali nígame korimela napurigá ne. Regá animela: «Ne ju Kristo, alué napu ju Onorúgamete julárigame.» 'Lige alantigá asíriga we'ká ralámuli 'yégamala. <sup>6</sup> 'Emi 'la akiméleké 'we nakóráo ralámuli ichúrimi, tabiléchigo majáwagó 'emi níriga. Abiriga alarigá nímili júkuru, nobi ta'chóchigo gajúmalagó gawiká. <sup>7</sup> Ralámuli bilena se'wináriga ra'íchame nakómala uché jaré ralámuli se'wináriga ra'íchame 'yuga. Bilé gobierno julámala we'ká sontalo napurigá sayega nakómala uché jaré sontalo 'yuga. 'Lige aminami asíriga gurúlámala go'ame. 'Lige aminami gawítiri nokimela ichúrimi. <sup>8</sup> Alué tábirika pe kulí 'la ruwime nímala alarigá nimio abé i'libeko.

<sup>9</sup> , 'Liko alé napu gatélime ju ra'íchali nejiwili ju 'emi napurigá alué walúla cha olámala. 'Lige aminami 'ma me'liboa 'emi. Suwábaga ralámuli jena wijchimoba mochígame asíriga ayómala 'emi 'yuga ne'chí oyérame kóriká, alekeri asíriga cha olawa 'emi. <sup>10</sup> Napu'lige alarigá ikisá, we'ká ralámuli ne'chí oyérame 'ma tabilé oyéramala ne'chí, pe na'áwamala uché jaré ne'chí oyérame 'yuga, 'ma saírúgame

neraga mochímala. 'Lige alé napu ra'íchali gatélime ju nejímala. <sup>11</sup> 'Lige aminami asíriga we'ká ralámuli nímala 'yégame. Onorúgamete 'yárigame korimela nóchali, 'lige pe lanigá asíriga we'ká ralámuli 'yégame. <sup>12</sup> Aminacho we'ká tábiri buyámili ju asíriga enátiri. 'Ma amulí suwábaga ralámuli tabilé ganíliga járomala a'bopi. <sup>13</sup> Bilé rió 'la abisibi oyérasaká ne'chí napusí alué tábiri simiro, alueka 'la sebámili júkuru rewagachi ne'chí 'yuga. <sup>14</sup> Alué 'we semátiri ra'íchali, alué napu ruyeme churigá nulamio Onorúgame ralámuli alawálachi, alueka bochígimi ruitúgame nímala jena wijchimoba napurigá suwábaga chojkégame ralámuli akimela. Napu'lige 'ma suwábaga chojkégame ralámuli akisá, a'lige kulí suwábaga suwábaga.

<sup>15</sup> › Alekeri napu'lige etea alué chátiri tábiri alé re'obachi, alué napu 'ma gajúname ju suwábaga tábiri (Ranieli 'sile osá ye ra'íchali napu ruwime nile napu Onorúgame anele, ta'lá námata 'emi.), <sup>16</sup> 'emi Jurea anilíchi ejiro mochígame, 'ma júmasimili júkuru wamí 'pami rabó. <sup>17</sup> Alué rió re'pá galíchi amoba iligame tabilé re'kínimili júkuru tábiri 'mea, iligá pe 'másimili júkuru. <sup>18</sup> Alué rió jamí nóchame pecha simeli júkó ku galírale alué we'lí o'pacha nolamia, pe iligá 'mi 'másimili júkuru. <sup>19</sup> ›Asíriga enáriga nímala umugí o'pachágame níriga! 'i'Lige alué u'kuchítiri chí'franti níriga abiena 'we enáriga nímala! '¿Churigá júmasamalawé? <sup>20</sup> 'La táníwa Onorúgame napurigá tabilé alarigá nímala 'we rulágachi, nibilé rawé resíbilíchi. \* <sup>21</sup> 'We enáriga nímala a'lige rawé. Tajsíné alarigá ikí napu'lige Onorúgame gawí newasa, 'lige tajsíné alarigá nímala abé i'libeko. <sup>22</sup> Onorúgame tabilé a'rémala napurigá we'lisi nerúlmalala ye resítiri tábiri. Tabilé alarigá nisaká, pecha we'lisi anachámili ko ye ralámuli. Onorúgame 'we galeme ju ralámuli napu bo'né wanápilige, alekeri tabilé a'rémala napurigá we'lisi nerúlmalala ye chátiri tábiri.

<sup>23</sup> › 'Liko tase bijchígiwa rekó regá aníchi bilé ralámuli: «Jena ajtípá alué Onorúgamete julárigame», o regá anisá ma: «'Mí ajtípá alué Onorúgamete julárigame.» <sup>24</sup> Asíriga smela ralámuli 'yégame. 'Lige jaré ralámuli Kristo korimela Onorúgamete julárigame napurigá ralámuli gu'írimala. 'Lige jaré ralámuli ruwime kolimela napu anele Onorúgame, 'lige aminami asíriga semá nokimela ralámuli 'yéginiliga. 'Lige 'la umabásaká abiena 'yéginimela alué ralámuli napu Onorúgame anile bo'né oyérame nímala. <sup>25</sup> 'Ma ruyékuru ne 'emi ye tábiri bijí ta'chó sébachi napurigá 'la listo mochímala. <sup>26</sup> 'Lige napu'lige anisá ralámuli:

«Néguru, 'mi alé ajtíkuru Kristo alé napu tabilé rió», tase simawa e'newa. 'Lige aminami anisá: «Néguru, jena ajtíkuru chíboka», tase bijchígiwaká 'emi alaníchi ralámuli. <sup>27</sup> Napu'lige alué Onorúgamete julárigame napurigá rió neraga ju nawá napurigá alué u'kí ne'wílala 'we ra'ósame napu bochígimi ma'chígime ju, alarigá nímala. <sup>28</sup> Suwábaga ralámuli machime ju alé napu napúime ju alué wílú, alé bo'ígó bilé mukúgame. Alarigá nímala napu ne ku nawachi, suwábaga ralámuli machimela.

*Jena ruwimela Esusi ruwíligo churigá nawamio uchéchigo siné*

<sup>29</sup> › Yati neraga pe simírisa alué resítiri raweli, rayénali 'ma chóniga asibámala, 'lige mechaka tabilé ra'ósiga asimela, 'lige so'píka 'ma rujsúmala 'pákana rewagáchikana. Suwábaga napu ekí nerú 'pa rewagachi 'ma nokimela. <sup>30</sup> 'Alíko 'la nélémalala 'pa rewagachi e'nénilia alué ko napu Onorúgame júlale jékana wijchimoba. Suwábaga chojkégame ralámuli jena wijchimoba mochígame 'ma nalámala sinaka 'we cha lagá. 'Lige etémala alué ralámuli alué rió Onorúgamete julárigame napurigá rió neraga 'pákana enágichi nolíralekana. 'Lige asíriga a'wagá nawámala 'lige ra'ósaga. <sup>31</sup> 'Lige akémala bilé trompeta gusuchi, 'lige akigá alué santo ánjeli simámala bochígimi gawíchi napabunia suwábaga ralámuli napu ekí wanápilige bo'né kúchila neraga.

<sup>32</sup> › Jípeko 'la benibóká alué tétali churigá ka alué chuná: Napu'lige 'we chí'lame kachi chalawala 'lige yáachi sawala, 'liko 'émika 'ma machime ju amulí seba bamunú. <sup>33</sup> Napu'lige 'emi etea ye resítiri tábiri, abiena 'la machigá mochiwa 'emi 'ma sebio alué napu ne ruwílige. <sup>34</sup> Neka 'la bijchiá ruwí suwábaga alarigá ikimeo bajchabé ta'chó suwíchi we'ká ralámuli jípe ejperégame. <sup>35</sup> Alué rewagá 'lige gawí suwibámili júkuru, ne nila ra'íchalika tabiléchigo siné suwibámala. <sup>36</sup> › Pecha 'wesi machígó a'lige rawé suwibamio, o alué 'ora alakimeo alué tábiri. Alué santo ánjeli 'pa rewagachi mochígame pecha machígóchigo, nibilé alué Onorúgame Inolá machígó, pe Onorúgameka 'la machí.

<sup>37</sup> › Napu'lige uché nawachi alué 'pa rewagáchika julárigame napurigá rió neraga, pe a'chigóriga nímala napurigá 'ya napu'lige Noé asalige. <sup>38</sup> Napu'lige wa'lú u'kule, a'lige pe bajchabé ralámulika asíriga ganíliga go'yá mochígeturu 'lige aminami i'wílí ba'wíla bajiga rekútame, 'lige aminami umugítiri rewigá, napusí napu'lige Noé bajkísá bárkochi. <sup>39</sup> Ralámulika tabilé u'kirá mayele 'lige arigá 'ma wa'lú u'kule, 'lige

\* 24:20 Jurío nulálilala elame nile napurigá e'yéniwa pe a'berni rawé resíbulíchi.

'ma u'lísale suwábaga alu'é ralámuli. Alarigá nímala napu'lige alu'é Onorúgame julálila nawámala 'pa rewagáchika napurigá rió neraga. <sup>40</sup> Napu'lige sebasa, 'lige oká rió nokisá asarachi, bilé o'toboli ju, 'lige bilé abajá a'réwili ju. <sup>41</sup> 'Lige oká umugi uchusa rusiá bilé 'ma o'toboli ju, 'lige alu'é uché bilélaka abajá a'réwili ju.

<sup>42</sup> › Alekeri 'la e'negá mochílime júkuru, pecha machimea 'emi aliéniko nawamio alu'é wa'lula 'emi nuleme. <sup>43</sup> Bilé rió gali nígame 'la machisáká alu'é 'ora nawamio chigórigame rukó, 'we a'lá listo asimékuru tabilé a'remia alé galírale bajkichi. <sup>44</sup> 'Émika 'we listo mochímili júkuru pecha machiá 'emi alu'é 'ora nawamio alu'é rió 'pa rewagáchika julárigame Onorúgamete, pe bilé rawé nawámili júkuru tabilé 'me buwechi.

<sup>45</sup> › Ruwimé ne churigá nóchame ko bilé nóchame 'we a'lá sébali nóchame. Napu'lige bilé batroni a'resa bilé nóchame napurigá 'yámala go'ame uché jaré nóchame, 'liko alu'é 'we a'lá sébali olámili ju. 'La 'yámili ju go'ame. <sup>46</sup> 'Lige alu'é wa'lula ku sebasa 'lige etesa alu'é nejkúriime 'we a'lá nóchachi, 'liko alu'é nejkúriime 'we a'lá semátiri narémala tábiri alu'é wa'lula nila. <sup>47</sup> Neka 'la bi-jchiá aníguru, alu'é wa'lula 'la nejmála napurigá suwábaga tábiri nocha asíboa alu'é wa'lula nila nóchali. <sup>48</sup> Siné kachi anisáká alu'é tebútiga ajchárigame: «Asírige we'ká rawé tabilé ne 'siá'é alu'é wa'lula. Pecha 'we nawámaréko.» <sup>49</sup> 'Lige o'winasa alu'é che jaré nóchame wejpisoa, 'lige go'sá 'lige bajisa tégali 'yuga. <sup>50</sup> 'Liko napu'lige ku seba wa'lula, ta'mé buwechi 'lige aminami ta'mé listo ajtígachi, <sup>51</sup> alu'é wa'lula asírige a'wágame wejpisómalu alu'é nóchame, 'lige julámala alé napu mochí alu'é uché jaré ralámuli napu tabilé sébali olale. 'Lige alu'é ralámulika 'ma nalámala 'lige aminami nolo chí'námala ramalá resí níliga.

## 25

*Jena ruwimela Esusi ruwíligo 'we a'lá 'nátaga mochílime ko napu'lige ku nawachi Onorúgamete julárigame*

<sup>1</sup> 'Lige Esusi uché rajpé anile: —Uchéchigo siné ruimé ne churigá ka napu'lige Onorúgame nulachi ralámuli alawálachi. Pe napurigá makué i'wé napu simíbale alu'é rió newímili najtepamia lámpara o'ká aseite\* ro'ilime. Bilena newigime nerúgichi, pe alarigá ju. <sup>2</sup> 'Lige alu'é maligi i'wé 'we a'lá 'nátame nile, 'lige alu'é uché jaré malígika tabilé 'la 'nátame nile. <sup>3</sup> Alu'é maligi napu tabilé 'la 'nátame nile, alueka tabilé o'tole aseite uché ro'ilime 'ma cho'isá alu'é lámpara. <sup>4</sup> 'Lige alu'é napu ekí 'la 'nátame ka, alueka 'la o'tole aseite

botéachi ro'igá. <sup>5</sup> 'Lige 'ma alíle 'lige ta'wé nawale alu'é newímili rió, 'lige alu'é iweka 'ma gojchinálile, 'lige arigá 'ma okole. <sup>6</sup> 'Liko nasipa rukórikáchi ma'chí anile bilé siname, 'lige regá anile: «'Ma aleka ená alu'é newímili rió, yati buyásiga najtepawa!» <sup>7</sup> 'Liko suwábaga alu'é i'wé 'ma o'mochísale lámpara rajemia. <sup>8</sup> 'Lige alu'é tabilé 'la 'nátame napu tabilé o'tole aseite anele alu'é uché jarela i'wé: «Ramué aseite tanéwaká, 'ma tabilé rajinali ye lámpara.» <sup>9</sup> 'Lige alu'é i'wé 'we a'lá 'nátame ka anile: «Tabilé, 'emi tanésiká tabilé nachuwawa ramué nibilé 'emi. Napurigá tabilé rokarélamala, simáwagó ralíboa aseite 'mi ralinélichí.» <sup>10</sup> 'Lige pe kulí a'minami e'yénigichi alu'é aseite ralímea alu'é newímili rioka 'ma nawale. 'Lige alu'é i'wé napu 'la niga mochile aseite mo'ile alu'é newímili rió galíachi napu piesta oláwili nile newika, 'lige alu'é rió newímili 'ma 'yérale yochi. <sup>11</sup> 'Lige alu'é i'wé aseite ralogá e'yénameká, abé i'libeko sébale 'lige anile: «'Mué Wa'lula, i'pú yochi!» <sup>12</sup> 'Lige alu'é rió newímili anele: «Tabilé. Neka 'la bi-jchiá aníguru tabilé machí ne 'emi.» 'Lige tabilé i'pule.

<sup>13</sup> › Alekeri 'emi 'we a'lá listo mochiwa, pecha machiame 'emi aliéniko nawamio alu'é napu Onorúgame julámala 'pa rewagáchika.

*Jena ruwimela Esusi ruwíligo bilé tétali enomí*

<sup>14</sup> › Napu'lige Onorúgame nulachi ralámuli alawálachi, pe a'chigóriga ju napurigá bilé rió napu'lige ta'chó simiá bilénami mejká bayele alu'é bo'né 'yuga nóchame 'lige alu'é 'yale enomí.

<sup>15</sup> › Bilé rió maligi mili ijchirúlame enomí plata 'yale. 'Lige uché bilélaka pe oká mili 'yale. 'Lige uché bilélaka pe bilé mili 'yale. Alu'é abé benégame nóchaga, alueka abé we'ká 'yáleru. 'Lige alu'é ta'mé jebénigame nóchaga, alueka pe u'kabi 'yáliuru. 'Lige alarigá 'yasa 'ma simile mejkami. <sup>16</sup> 'Lige alu'é maligi mili ichirúlame enomí 'yárigame yati simile nochamia alu'é enomite, 'lige uchéchigo maligi mili enomí mele. <sup>17</sup> 'Lige alu'é oká mili 'yárigame abiena nóchale 'lige mele uchéchigo oká mili. <sup>18</sup> Alu'é bilé mili 'yárigame ka, alueka jole we'echi, 'lige alé gatele toka alu'é enomí plata alu'é wa'lula nila.

<sup>19</sup> › 'Lige a'kinana 'ma we'ká rawé kachi ku nawale alu'é wa'lula, 'lige bayele alu'é nóchame machínaliga chekí méliga alu'é enomí nóchame 'yárigame. <sup>20</sup> 'Lige alu'é maligi mili enomí narékame sébale alé, 'lige yati 'yale alu'é wa'lula makué mili. 'Lige anele i'gá alu'é enomí nejkigame repúniliga: «Mué wa'lula, maligi mili ijchirúlame

\* 25:1 E'nesi glosario «lámpara».

enomí nejígeturu mué, 'lige alué maligi mílite uchéchigo maligi míli mératuru ne.»  
<sup>21</sup> 'Liko alué wa'lula enomí nígame anele: «'We a'lá ju, asíriga 'la nóchame ju mué 'lige aminami asíriga 'la sébali olame. Mué 'we a'lá sébali olákuru rekó pe u'kabi 'yásiga, jípeko uché rajpé nejímala ne, 'we a'lá ganíliga asiboa ne 'yuga nocha.»  
<sup>22</sup> 'Lige abé we'liko nawale alué oká míli enomí narékame, 'lige anile: «Mué wa'lula, oká míli nejígeturu mué, jena mochi, 'lige alué oká mílite uchéchigo oká míli mératuru ne, jena mochíkuru.»  
<sup>23</sup> 'Liko alué wa'lula enomí nígame anele: «'We a'lá ju, asíriga 'la nóchame ju mué, 'lige aminami asíriga 'la sébali olame. Mué 'we a'lá sébali olákuru rekó pe u'kabi 'yásiga, jípeko uché rajpé nejímala ne, 'we a'lá ganíliga asiboa ne 'yuga nocha.»  
<sup>24</sup> 'Lige pe'tá nujubapi sébale alué pe bilé míli enomí narékame, 'lige alueka anile: «Mué wa'lula, neka 'we a'lá machí tabilé 'wesi na'temame ko mué, mueka panápuri 'wíime júturu rekó tabilé asemi echasá, 'lige napubume ju mué ri'ligó napu mué tabilé wejpimole.»  
<sup>25</sup> Alekeri neka majawáturu, alekeri toka mochíturu ne mué enomíla. Jena mochíkuru alué enomí napu mué nejí 'síe.»  
<sup>26</sup> 'Liko alué wa'lula enomí nígameka anele: «'La tachiti rió, 'la tabilé sébali olanti, 'la machié panápuri 'wíime ko ne rekó tabilé asemi echigé ne, 'lige napubume ko ne ri'ligó rekó tabilé wejpimoke ne.»  
<sup>27</sup> Alekeri 'yáteliko ye enomí bilé rió enomí nígame napurigá nochárimala alué enomite, alarigá 'la mémikuru enomí pe u'kabi kabá.»  
<sup>28</sup> 'Liko alué enomí nígame anele alué ralámuli napu jale alemi: «Bujewa alué enomí ye rió, 'lige 'yawa alué rió makué enomí nígame, napugiti alué abé nígame, alueka uché rajpé 'yáwili kame, 'lige alué napu tabilé nígame ju, alueka 'ma bujéwili ju alué pe u'kabi napu ekí ní.»  
<sup>30</sup> 'Lige alué nóchame tabilé 'nátame ka, alueka ma'chí pápua chóniga ilígichi, 'lige alé asigá nalámala 'lige chí'námala ramalá resí níliga.»†

*Jena ruwimela Esusi ruwíligo Onorúgame wanápamala alué ralámuli chátiri 'nátame*

<sup>31</sup> Napu'lige uchéchigo nawá wa'lú a'wali niga jena wijchimoba alué Onorúgamete julárigame 'pa rewagáchika napurigá rió neraga, 'lige suwábaga santo ánjeli 'yuga, a'lige kulí asibámala wa'lula neraga alué Onorúgamete julárigame.  
<sup>32</sup> A'lige napuímala suwábaga ralámuli jena wijchimoba mochi'game, 'lige rojanámala ralámuli napurigá rojáname ju bilé rió alué chibá bo'á 'yuga uchusa, waná uchúchame ju chibá 'lige waná uchúchame ju bo'á.  
<sup>33</sup> 'Lige wajtoná mochiámala alué ralámuli tabilé

resí nokame, 'lige o'iná mochiámala alué ralámuli resí nokame.

<sup>34</sup> A'ligeko alué Wa'lula Onorúgamete julárigame alé nasipa asigá regá anémala alué wajtoná mochi'game: «Jeka simasi 'emi napu iwérali 'yárigame ju Onorúgamete. Jeka simasi napu ajti ne napurigá ne 'kúchila neraga. Neka 'ma 'la gatega ajti 'we 'yasi napu'lige gawí newálige Onorúgame.  
<sup>35</sup> Napu'lige ne e'lowika eyénachi, 'émika 'we a'lá kónature go'ame. Napu'lige ne balámachi 'émika 'we a'lá nejíturu ba'wí bajilime. Pe mejkaka nawágame kéturu ne 'lige 'émika 'la bayéturu ne'chí napurigá pachá galírale bajkimela ne.  
<sup>36</sup> 'Lige ne tabilé o'páchigime kéturu, 'lige 'émika nejíturu o'pacha. 'Lige ne 'we nayume kéturu, 'lige 'émika asíriga 'la nesératuru ne'chí. 'Lige ne galírale bajcháriga ajtígéturu, 'lige 'émika asíriga 'la jsime kéturu alemi ne'chí e'nemia.»  
<sup>37</sup> 'Lige alué a'ká ralámulika animela: «Mué wa'lula, ¿chiéniko etérukó ramué 'we e'lowika eyénachi mué napurigá go'ame 'yawa mué? Ramueka tajsiné 'yalíwé go'ame mué. ¿Chiéniko etérukó ramué 'we balámaka eyénachi mué napurigá ba'wí 'yawa mué? Ramueka tajsiné 'yalíwé ba'wí mué.  
<sup>38</sup> ¿Chiéniko etérukó ramué mejkaka nawachi mué napurigá galírale bayériwa mué? Ramueka tasiné etéliwé mejkaka nawachi mué 'lige ta siné bailíwé galírale. ¿Chiéniko etérukó ramué tabilé o'páchiga ajtígime mué napurigá o'pacha kógiwa? Ramueka tasiné 'yalíwé o'pacha mué.  
<sup>39</sup> ¿Chiéniko etérukó ramué 'we nayua ajtigó mué o galírale bajcháriga ajtígichi mué napurigá simawa alemi e'newa alemi mué ajtígichi?»  
<sup>40</sup> 'Lige alué wa'lula animela: «Neka 'we a'lá bijchiá aníba, napu'lige 'emi gu'irile suwábaga ralámuli ne'chí oyérame, napu tabilé nígame níle, pe ne'chí gu'irime kéréle.»

<sup>41</sup> 'Lige alué wa'lula abiena regá anémala alué o'iná mochi'game: «Se'wí, a'minami simasi 'emi napu ekí gastigáriwili ju alé na'ichí napu tabilé siné cho'ime ju, alé napu pápili ju alué Remónisi alué bo'ne kompaniérola u'kuchípala remónisi 'yúriga.  
<sup>42</sup> Napu'lige ne asíriga e'lowika eyénachi 'émika tabilé pe'tá nejíturu go'ame. Napu'lige ne asíriga balámaka eyénachi 'émika tabilé pe'tá nejíturu ba'wí.  
<sup>43</sup> Neka mejkaka nawáturu 'lige 'émika tabilé repáraturu napurigá ne 'emi galíachi bajkimela. Neka tabilé o'páchigime kéturu 'lige 'émika tabilé nejíturu o'pacha. Ne galírale bajcháriga ajtígichi, 'émika tajsiné nolínaturu ne'chí e'nemia.»  
<sup>44</sup> 'Liko alué 'we i'nílime ralámuli rukémala alué wa'lula: «Mué Wa'lula, ¿chiéniko tabilé 'yárukó go'ame mué

† 25:30 E'nesi San Lucas 13:28.

e'lowika eyénachi 'lige balámaka eyénachi? ¿Chiéniko tabilé 'yárukó o'pacha tabilé o'páchaga eyénachi mué? ¿Lige chiéniko tabilé e'nénilekó mué napu'lige galírale bajcháriga ajtígichi mué?»<sup>45</sup> 'Liko alué wa'lula animela: «Neka 'we a'lá bijchiá anibá, 'emi napu tabilé gu'íriale alué ralámuli ne'chí oyérame tabilé nígame, tabilé gu'írame kéré ne'chí.»<sup>46</sup> 'Liko alué ralámuli tabilé nejkúrame simámala bilena 'we resírikáchi gastigo naremia, alé napu senibí resi nilia mochime ju ralámuli. 'Lige alué 'la a'ká ralámulika 'we ganíliga mochímala Onorúgame 'yuga 'pa rewagachi senibí.

## 26

*Jena ruwimela Esusi saíla 'ma cha'pinánligó Esusi*

<sup>1</sup> Napu'lige Esusi 'ma 'we a'lá ruisá ye ra'íchali, anele alué bo'né 'yuga járome:

<sup>2</sup> —'Emi 'la machilke 'ma okabi rawé rokárikó Páskua anilime piesta seabamio, 'lige ye piéstachi cha'piboli ju alué rió 'pa rewagáchika julárigame Onorúgamete napurigá rió neraga, 'lige 'ma me'liboli ju gulusichi ujchagá.

<sup>3</sup> 'A'lige rawé napuúle alué e'wélala balé, alué Moisesi nila nulalí benírame, 'lige alué e'wélala ralámuli jurío nuleme. Napuúle alué abé wa'lula balé galílahi, alué napu Kaipasi rewégame nile. <sup>4</sup> 'Lige alé napuúsa 'we a'lá ra'íchale a'bopi churigá cha'pimea Esusi 'yéigiga, 'lige me'limea olale cha'pisá. <sup>5</sup> Regá anile:

—Pecha che nokiamé júkó piéstachika, 'ma ayómala ralámuli bo'né gompaniérola, alué ralámulika cháchigo 'la niraga etéeme Esusi.

*Jena ruwimela bilé mukí 'we semá júkame ba'wí ro'éligo Esusi mo'ólachi*

<sup>6</sup> 'Lige Esusi simile Betania anilichi we'ká riógichi, 'lige alé Simoni galílahi ajtile, alué Simoni napu 'we nayume nílige sa'pachí amoba abé i'bé. <sup>7</sup> 'Lige alé sébale bilé mukí, 'lige bilé botea rejte newárigime o'kame nile. Pachágana botéachi ro'ágame nile ba'wí semá júkame, 'lige asíriga najteme nile. Napu'lige Esusi alé mesa ilígichi ajtígichi, alué mukika alué ba'wí semá júkame mo'chí ro'ele Esusi. <sup>8</sup> Napu'lige alué Esusi 'yuga járome etesa alieti, asíriga ayole 'lige anile:

—¿Chonigá najsabúché alué mukika alué ba'wí semá júkame? <sup>9</sup> Iligá ralineti asíriga we'ká enomichi, 'lige alué tabilé nígame ralámuli gu'íritékuru alué enomite.

<sup>10</sup> 'Lige Esusi machigá alanichi alué ralámuli, anele:

—¿Chonigá alanilibaché ye mukí? Neka 'we a'lá niraga etiá ye mukí alué ba'wí semá júkame ro'echi. <sup>11</sup> Abiena mochímala jena ralámuli tabilé nígame 'emi 'yuga, neka tabiléchigo asimélagó. <sup>12</sup> Napu 'sile ye

mukí, alanokame ju bilé ralámuli mukusá, ba'wí 'we semá júkame ro'eme ju. 'We a'lá na'tawa tachiri ruwime ko ne. 'Ma listáriga 'smi ne'chí napu'lige gatéwili ju ne bilena resochí ne mukusá. <sup>13</sup> Neka 'la bijchiá aníguru. Panápuri ra'icháwili ju napurigá 'síligo ne, abiena ra'icháwili ju napurigá 'síligo ye mukí. Alarigá 'la tabilé we'káwaga mochímala ralámuli ala'síligo ye mukí.

*Jena ruwimela Jurasí chojkligo 'nata churigá 'la ka Esusi cha'piá*

<sup>14</sup> 'Liko bilé alué makué oká Esusi 'yuga járome, napu Jurasí Iskariote rewégame nile, simile alé napu e'wélala balé mochile, <sup>15</sup> 'lige rukele:

—¿Chekí enomí najtétamala 'emi, ne nejkúrisa Esusi cha'piá?

'Liko alué e'wélala baleka baisá makué ijchirúlime enomí plata najtétamoríle nejkúrisaká Esusi cha'piachi. <sup>16</sup> 'A'lige sí chojkile alué Jurasí Iskariote 'nata chiéniko 'la níliga alué Esusi cha'piá.

*Jena ruwimela Esusi go'áligo go'ame Páskua anilime piesta sebasa*

<sup>17</sup> Napu'lige sebasa raweli Páskua piéstachi baní go'yachí tase kawali ro'ígá newárigime, a'lige rawé alué Esusi 'yuga járome rukele alué Esusi, regá:

—¿Koché 'la nítéko go'ame newalía napurigá go'mela mué o'rako rukó?

<sup>18</sup> 'Lige Esúsika anile:

—Simíbaga alé we'ká riógichi, 'lige sebawa bilé rió galílahi napu 'ma machí 'emi, 'lige anéwaká: «Alué Wa'lula ramuúle nuleme regá aní: 'Ma pe u'kabi rawé rokáré napurigá me'liboa ne. Mué galílahi newámala ne go'ame jipe go'yame Páskua piéstachi, ne 'yuga járome 'yuga go'mé olá ne.»

<sup>19</sup> 'Lige alué Esusi 'yuga járome simíbale alé we'ká riógichi napurigá nuléligé Esusi, 'lige newale go'ame a'lige rukó go'yame.

<sup>20</sup> 'Ma rukó 'ma chonasa, Esusi alé re'lé ilígime mésachi a'bé kilí bo'íbale gayena sekate machoka wijchí, alué makué oká bo'né 'yuga járome 'yuga. <sup>21</sup> Napu'lige alé go'yá mochiga, Esúsika anile:

—Neka 'la bijchiá anibá, bilé 'emi, ne saíla gu'írimio ne'chí cha'piachi.

<sup>22</sup> 'Lige alué Esusi 'yuga járome ka 'we cha lale alieti akisá, 'lige chojkile regá rukea Esusi:

—Mué Wa'lula, ¿ne júpá ala'símili?

<sup>23</sup> 'Liko Esúsika anile:

—Alué rió napu chua chujkú jena bejtólíchi ne 'yuga, alué 'símala nejkura ne'chí cha'piachi. <sup>24</sup> Neka regá ruwibá, alué napu ju Onorúgamete julárigame 'pa rewagáchika napurigá rió neraga, mukumeli ju napurigá aní Onorúgame nila ra'íchali, 'lige resía alué napu nejkúrimala cha'piachi alué napu ju

Onorúgamete julárigame 'pa rewagáchika napurigá rió. Abé a'lá nílige tabilé ocheria alué rió.

<sup>25</sup> A'liko alué Jurasi rewégame, alué napu nejímili nile Esusi saíla napurigá cha'pimela Esusi, anile:

—Mué benírame, ¿ne ju alué?

'Lige Esúsika anele:

—Juli, mué ju.

<sup>26</sup> Napu'lige go'yá mochiga go'ame, Esúsika 'wile bilé baní, alué baní napu tabilé ro'igá newárigime nile kawali, 'lige cheliera 'yale Onorúgame, 'lige 'ma cheliera 'yasa Onorúgame, 'lige chí'wánale, 'lige 'yale alué bo'né 'yuga járome 'lige regá anele:

—Go'sí, yeka ne sa'pala ju.

<sup>27</sup> 'Lige 'wile alué baso i'wili ba'wila ro'ágame napu rekútame ju, 'lige 'ma cheliera 'yasa Onorúgame, 'yale alué bo'né 'yuga járome regá anigá:

—Bajisi o'maka. <sup>28</sup> Ye pachágana manígime ne elalá ju, alué elá napu ma'chínimili ju ne me'liachi, 'lige ne mukugá wa'lú gu'irimili ju ne 'emi ralámuli, 'liko Onorúgame 'la e'kámala. Regá gatele Onorúgame. <sup>29</sup> Neka 'la ruwí tabilé uché bajimio ne ye pachágana manígime i'wili ba'wila napusi chojkí nulá Onorúgame ralámuli alawálachi.

*Jena ruwimela Esusi ruwíligo Pegro tabilé machióriméla Esusi*

<sup>30</sup> 'Ma go'sá go'ame, wikarale Onorúgame wikálala, 'lige wikarasa simíbale na'lebo rabó Olibo rewégichi. <sup>31</sup> 'Lige Esúsika anele:

—Suwábaga 'emi makué oká rió ne 'yuga járome, 'ma a'rémala 'emi ne'chí jipe rukó. Aka regá anime chujkúché alé Onorúgame nílá osilichi: «'Ma me'limé ne alué bo'á bo'élome, 'lige alué bo'aka 'ma ra'lá mo'bámala.»\* <sup>32</sup> 'Lige neka a'kinana ku ajánasa, alé Galilea simé ne bajcháchigo ta'chó jsichi 'emi alemi.

<sup>33</sup> 'Lige Pégroka regá anele:

—Rekó suwábaga uché jaré 'ma simíbige, 'ma bi'neli a'resa mué, neka abichilubi mué 'yuga einámala.

<sup>34</sup> 'Lige Esúsika anele alué Pegro:

—Neka 'we a'lá bijchiá aníbá, jipe rukó be'bé ta'chó sinachi o'tolí, baisá animela mué: «Tabilé machí ne Esusi.»

<sup>35</sup> 'Lige alué Pégroka uchéchigo abichilubi regá anele:

—Rekó me'liáe ne, neka tabilé majámala ruigá 'we a'lá machime ko ne mué.

Suwábaga alué Esusi 'yuga járome alanilechigó.

*Jena ruwimela Esusi tánaligo Onorúgame napurigá 'la gu'trowa Onorúgamete alé Jetsemani anilichi*

<sup>36</sup> 'Lige Esusi simile alué bo'né 'yuga járome sí, 'lige sébale alé bilena Jetsemani rewégichi we'ká rojégichi olibo anilime rojá. 'Lige alé alué Esusi regá anele alué bo'né 'yuga járome:

—Jena mochisi buigá, pe'wera simé ne Onorúgame tánimia iwérali alé 'minami simigá.

<sup>37</sup> 'Lige bayérole alué Pegro 'lige okánika alué Sebereo 'kúchila (Santiago 'lige Juani) napurigá alué 'yuga simámala, 'lige alé 'we sewele, 'lige aminami asrīga we'ká 'nátale Esusi alemi waná. <sup>38</sup> 'Lige alemi Esusi regá anele alué bo'né 'yuga járome:

—Asrīga sewé nílí ne pachágana ne alawálachi, amulí mukú ne seweka. 'Émika jena ejtebíwagó 'lige 'la e'negá mochiwaká.

<sup>39</sup> 'Lige Esúsika abé a'mibemi simile, 'lige ajkaná chujkíbale gorá wijchí chega, 'lige regá anele Onorúgame:

—Mué O'nó, neka tabilé najkí napurigá ralámuli resí olámala ne'chí. Mué alarigá najkisáká, a'lá ju, resí ikiméleké ne.

<sup>40</sup> 'Lige nawale ku alé napu ejtebílige alué bakiá rió bo'né 'yuga járome, 'lige 'ma okoka bi'tígame rewale, 'lige anele Pegro:

—¿Tabilé anacharu e'negá mochiga bilé 'ora? <sup>41</sup> 'We a'lá e'negá mochiwa, 'lige 'we a'lá tania mochiwa Onorúgame napurigá ta neyúrimala Remónisi na'tálila. 'Émika 'we a'lá sébali olánili, tabiléchigo nígame júkó a'wali.

<sup>42</sup> 'Lige uchéchigo simile Esusi Onorúgame 'yuga ra'ichamia, 'lige regá anele Onorúgame:

—Mué O'nó Onorúgame, resí ikimeli nisaká ne a'lá ju, resí ikiméleké ne. A'lá sébali olánili ne napu najkí mué.

<sup>43</sup> Uchéchigo ku nawale alué Esusi 'lige okókame rewale, 'wéchigo gojchinalia mochíligime. <sup>44</sup> 'Lige alé a'rele okókame 'lige uchéchigo simile Onorúgame 'yuga ra'ichamia a'chigóriga napurigá be'bepi.

<sup>45</sup> 'Lige Esusi uchéchigo nawale alemi napu bi'tile okoka alué bo'né 'yuga járome 'lige Esusi anele:

—¿'A bijí okoka bi'tí 'emi? 'Ma sébapá raweli, 'lige alué Onorúgamete julárigame 'pa rewagáchika napurigá rió neraga, 'ma cha'piboli ju alué i'nílime ralámulite. <sup>46</sup> O'weti mochisi, 'ma a'beka ená alué napu ne 'yuga eyéname nílige, 'ma a'beka ená nejkúrimia ne'chí cha'piachi. Nabá najtepawa.

<sup>47</sup> Bijí ra'icha ilígachi alué Esusi alemi sébale alué Jurasi napu Esusi 'yuga ilírome nílige. Alué Jurasi we'ká rió 'yuga enale, 'lige alué we'ká rió siparina o'ká e'yénale, 'lige e'wele gujsitiri. Alué e'wélala balé 'lige alué e'wélala ralámuli jurío nuleme, aluete julárigame nile alué we'ká rió Esusi

\* 26:31 E'nesi Zacarías 13:7.

cha'pínliga. <sup>48</sup> Alué Jurasi napu nejkúriska enale cha'piachi Esusi, 'ma 'la regá anélige alué we'ká rió:

—Alué napu chu'migá repori ne alué ju Esusi, yati cha'pibóaká 'lige o'tobóaká.

<sup>49</sup> 'Lige alemi sébaga Jurasi regá anele alué Esusi:

—¡Kuíra mué benírame!

'Lige alarigá anesa yati chu'mile banichí.

<sup>50</sup> 'Lige Esúsika anele:

—Mué gompaniero, 'la sébali olawa napu 'sima olá mué.

'Liko alué we'ká rió napu 'yuga enale Jurasi a'bemi jábale, 'lige yati cha'pile alué Esusi.

<sup>51</sup> 'Lige bilé rió napu Esusi 'yuga eyéname nile yati ma'chí pale siparina 'lige alué wa'lula balé piónila najkala rejpnale.

<sup>52</sup> 'Liko Esúsika anele:

—Tase che 'sípua alué siparínate, ku gaté alé gatélachi. Suwábaga napu eki siparínate me'ame ju, siparínate me'liboli júchigo. <sup>53</sup> ¿Mueka mayé tabilé julamio Onorúgame jipe tánisa ne, napurigá julámala 'pa rewagáchika we'ká mili santo ánjeli napurigá ne'chí repúmala? <sup>54</sup> 'Lige Onorúgame ne'chí gu'rasaká jipe, ¿churigá 'la sébali ikimélewé napu anime chujkú osilichi?

<sup>55</sup> 'Alígerikáchi regá anele Esusi alué ralámuli Esusi saíla:

—¿'Émika chonigá i'weli siparíniga 'lige gujsíliga síché ne'chí cha'pimea napurigá bilé chigórigame neraga? Neka nabí rawé ajtime kéturu alé rapíchí wa'lú re'obachi beniria Onorúgame nila rejcholí, 'lige aleka tabilé siné cha'píturu 'emi ne'chí. <sup>56</sup> Peba alarigá nímili nilige napurigá aní alué osilí napu osale alué 'ya mochúgame napu ruwime nile napu Onorúgame anélige.

Alésíko suwábaga alué Esusi 'yuga járome 'ma bi'neli a'rele Esusi, 'ma júmasale.

#### *Jena ruwimela 'ma o'tólrigo Esusi*

<sup>57</sup> Alué ralámuli Esusi cha'pígame 'ma o'tole Esusi alé napu ajtí alué abé wa'lula balé alué Kaipasi rewégame, alé napu napuíka mochíle alué Moisesi nila nulalí benírame, 'lige alué ralámuli jurío nuleme. <sup>58</sup> Napu 'lige Esusi o'tiachi alemi guwánami enale alué Pegro, 'lige alué Pegro alemi ra'pichimi si sébale alé wa'lula balé galíachi ra'pichí, 'lige alé asíbale sujkálige re'obachi tebume 'yuga. Machínaliga 'sílige chukumeli nilige Esusi.

<sup>59</sup> 'Lige alué e'wélala balé 'lige suwábaga alué uché jaré e'wélala, pe najkigá nokale churigá 'la nligo gastigárlila, 'lige me'liá alué Esusi. Alekeri owile jaré testigo pe 'yégalí ra'íchame. <sup>60</sup> We'ká ralámuli ra'íchale Esusi e'chéwaga, pe 'yega ra'íchale, tabilé chátiri nile napu anile alué 'yégame, alekeri tabilé

umébale me'á. 'Lige abé i'libeko alemi jsile oká rió <sup>61</sup> napu anile:

—Ye rioka aniéturu: «Neka na'minámala alué wa'lú re'obá Onorúgame galíla, 'lige bakiá rawé kachi uchéchigo bilé newámala ne.»

<sup>62</sup> 'Lige o'weti ilísaga alué wa'lula balé rukele Esusi:

—¿Tabilé aké mué napu aní mué e'chéwaga? ¿Tabilé pe'tá ne'je mué? ¿Chongá lanilí mué alué ralámulite?

<sup>63</sup> 'Lige Esúsika pe i'kilí ilile tabilé nejega. 'Liko alué wa'lula balé anele:

—Alué Wa'lula Onorúgame alué napu ajagá ajtí, 'we a'lá e'negá ajtí, alekeri 'we a'lá ra'ichálime júkuru 'la bijchiga 'we a'lá ruyéwagó ramué, ¿pala 'la Kristo ka mué, alué napu Onorúgame Inolá ju?

<sup>64</sup> 'Lige Esúsika anele:

—Ju, aka mué 'we a'lá ma'chígime aniché, 'lige aminami aní ne etemio 'emi alué napu nile Onorúgamete julárigame 'pa rewagáchika napurigá rió neraga, alé wajtoná ajtígame napu ajtí Onorúgame wa'lú a'walí nígame. 'Lige aminami abiena etémala 'emi ku 'pákana rewigáchikana nolíraleka enágame.

<sup>65</sup> 'Liko alué wa'lula balé banasuka chí'wánale bo'né o'páchala, regá anigá:

—¡Ye rió tabilé niráchine Onorúgame! Ya 'ma 'we a'lá sébali akirúké'é, tase rokaré uché bilé rió testigo. 'Émi 'we a'lá akékuru tabilé 'la niráchinio Onorúgame ye rió Esusi.

<sup>66</sup> 'Émika ¿choniágó?

'Lige alué we'ká ralámulika anile:

—Me'liáté alué rió alanime.

<sup>67</sup> 'Liko bulele buichí bilé ba'nisólite, 'lige a'kachípale banachí 'lige wejpale sekate banachí <sup>68</sup> regá anegá:

—Mué Kristo, ruwíba, ¿chieri ka napu mué wejpá?

#### *Jena ruwimela Pegro aniligo tabilé machiórigo Esusi*

<sup>69</sup> Loliachi Esusi, Pégroka alé ma'chige asale ra'pichí, 'lige alemi nawile bilé mukí go'ame newame, 'lige regá anele:

—Muéchigo Esusi 'yuga eyéname kéturu alué Esusi Galilea anilichi bejtégame.

<sup>70</sup> 'Lige alué Pégroka 'yégame regá anigá suwábaga akériga:

—Neka tabilé machí chonigá anió mué.

<sup>71</sup> 'Lige Pégroka alemi yochi ilibale, ma'chimi simea enale, 'lige uché bilé mukí etele, 'lige alué mukíchigo anele alué alemi yochi jágame:

—Ye rió abiena Esusi 'yuga eyéname kéturuchigó, alué Nasareno anilime.†

<sup>72</sup> 'Lige alué Pégroka uchéchigo 'yégame, regá anigá:

—Neka 'la bijchiá aní. Neka tabilé machiáwé alué rió.

† 26:71 E'nesi glosario «nasareno».

<sup>73</sup> Lige pe'tá nujubapi alué ralámuli napu alemi jale a'bemi jábale napu ilile Pegro, 'lige anele:

—Mueka Esusi 'yuga eyéname kánkoke'é, napugiti mueka napurigá alué galileo ralámuli ra'íchame kame.

<sup>74</sup> Lige Pégroka yati regá anile:

—Neka 'la bijchiá aní. Neka tabilé machiáwé alué rió. Onorúgame ne'chí gastigárimala tabilé bijchiá anisáká ne.

A'ligerikáchi sinale o'tolí. <sup>75</sup> Liko alué Pegro nélále napu anilige Esusi rapakónala alí. Esúsika anélige alué Pegro: «Ta'chó sinachi bilé o'tolí, baisá animela mué tabilé machiórió mué ne'chí.» 'Lige alué Pegro ma'chínale alé 'minami, 'lige nalale 'we chálagá.

## 27

*Jena ruwimela 'ma nejlirigo Esusi alé napu ajtí Pilato*

<sup>1</sup> Napu'lige che'lisá, suwábaga balé e'wélala, 'lige alué e'wélala ralámuli jurío nuleme, 'we 'alá anile Esusi me'limea. <sup>2</sup> 'Lige 'ma bulugá o'tóleru 'lige sontálochi nejleru, alué Ponsio Pilato sontálola. Alué Ponsio Pilátoka pe wa'lula selígame nile Rómaka julárigame.

*Jena ruwimela 'ma ojaga mukúligo Jurasí*

<sup>3</sup> Napu'lige Jurasí, alué napu Esusi nejlige, etesa Esusi me'libólikó, asírige seweka asíbale ala'síkariká, 'ma ku 'yale alué baisá makué ijchirúlime enomí plata alué e'wélala balé 'lige alué e'wélala ralámuli jurío nuleme. <sup>4</sup> 'Lige Jurasí anele:

—Ne bo'né 'we resí 'síleke'é. Nejléke'é ne bilé rió peka chojkila kachi napurigá me'liboa.

'Lige alué e'wélalaka anile:

—Ramueka pecha che aniágó alieti, mué bo'né machíliké.

<sup>5</sup> Liko alué Jurasí alé re'obachi pachá 'lule alué enomí, 'lige 'ma simile gujtachí ojaga mukumea.

<sup>6</sup> Liko alué balé e'wélala 'wile alué enomí, 'lige anile:

—Pecha 'la júlkó alé gajónichi ajchilía ye enomí, napu ralámuli mochime ju enomí Onorúgame kogia, ye enomika pe bilé rió me'lináliga najtétarigime kame.

<sup>7</sup> Lige 'we 'alá anigá ejtebile napurigá bilé we'é ralimea a'boi, 'lige alué we'eka «Sikolí Newalíchi» anilime rewégame nile. Alué we'é ralale ralámuli tomia alé Rusaleni suwígame, alué napu tabilé alé epperégame nílige.\* <sup>8</sup> A'lígesí «Elá We'é» anilime ju alué we'é.

<sup>9</sup> Alarigá sébali oláleru napurigá anilige alué Jeremíasí napu ruwime nile napu Onorúgame anélige. Regá anile

alué Jeremíasí: «Alué e'wélala israelita unele alué enomí baisá makué ijchirúlime enomí plata, napu alué najtegala nile, <sup>10</sup> 'lige alué enomite ralálékuru alué we'é Sikolí Newalíchi. Alarigá nuláleturu alué Wa'lula Onorúgame.»

*Jena ruwimela gustisia oláligo Pilato alué Esusi*

<sup>11</sup> Esusi Pilato ajtígichi o'tóleru. Alué Pilátoka wa'lula selígame nile. 'Lige rukéleru Esusi:

—¿Mué ju wa'lula ralámuli jurío nuleme?

'Lige nejele:

—Alarigá ju napurigá mué aní.

<sup>12</sup> Liko napu'lige alué e'wélala balé 'lige alué e'wélala ralámuli jurío nuleme, saírúgame neraga ra'ichasa alué Esusi olagá, Esúsika tabilé nejele. <sup>13</sup> Alekeri alué Pilato anile:

—¿Tabilé aké mué suwábaga napu aní mué olagá saírúgame neraga?

<sup>14</sup> Lige Esúsika abiena tabilé nejele. Liko alué selígameka pe i'kilí ilíbale.

*Jena ruwimela Pilato nuláligo Esusi me'liniliga*

<sup>15</sup> Pe nabí bamí alarigá sime nile alué wa'lula selígame piesta nerúgichi Páskua anilime, bilé rió ma'chí pame nile galírale bajchárígame, alué napu 'la ikí ralámuli napurigá ma'chí pápua. <sup>16</sup> A'lígerikáchi ajtile bilé rió galírale bajcháríga 'lige ralámuli 'we machime nile alué rió. Barabasi anilime nile alué rió galírale bajcháríga ajtígígame.†

<sup>17</sup> Liko napu'lige 'ma suwábaga ralámuli napuika mochígichi, alué wa'lula Pilato rukele suwábaga ralámuli chieri 'la ka ma'chí pasía. Regá anile:

—¿Chieri 'la nerago 'émika napurigá ma'chí pápua, Barabasi o Esusi, alué napu Kristo anilime ju?

<sup>18</sup> Lige alué Pilato 'we 'alá machile alué e'wélala jurío nokáligo Esusi nejlá pe Esusi gíchiga. Alekeri 'we 'alá 'nátale churigá su'panamio Esusi.

<sup>19</sup> Biji Pilato gustisia olá ajtígichi, alué mukí Pilato 'yula nulale napurigá anewa: «Tase che olawa alué Esusi, alué rioka pecha chojkila júkó. Neka asírige resí nílaturu alué rió remuka be'áruko rukó.»

<sup>20</sup> Lige alué e'wélala balé, 'lige alué e'wélala ralámuli jurío nuleme, 'we anele ralámuli napurigá alué ralámuli 'we anémala Pilato napurigá ma'chí pápua Barabasi, 'lige aminami napurigá Esusi me'liboa. <sup>21</sup> Lige alué selígame uchéchigo siné rukele alué we'ká ralámuli:

—¿Chieri 'la niti káréko napurigá su'panawa?

'Lige ralámulika anele:

\* 27:7 Jaréchigo aní bo'né Jurasí abé 'yabé raláligo alué we'é.

† 27:16 Oká rewégame nile, Esusi Barabasi anilime nile.



—jBarabasi!  
 22 'Lige Pilátoka anile:  
 —'Lige Esúsika, alué napu Kristo anelime ju, ¿chólámala ne?  
 'Lige suwábaga nejele:  
 —jAlueka gulusichi ujchigá me'libógurú!  
 23 'Lige Pilátoka rukele:  
 —¿Chonigá? ¿Tachiri najsabúgime kékó?  
 Ralámulika pe abisibi bochí aníá jale tabilé akeme neraga:

—jMe'liboa gulusichi ujchigá! —anile.  
 24 Napu'lige Pilato etea tabilé e'wamio alué ralámuli, aminacho bochí aníá jago, 'liko pe'tá ba'wí tale 'lige alué ba'wite panígile alué bo'né sekala napurigá suwábaga ralámuli etémala. 'Lige anile:  
 —Neka tabilé chojkila nímala ye ríó me'lisuga. 'Emi a'boi chojkila nímalaké —anile panígila.

25 'Lige ralámulika anile:  
 —'We a'lá ju alarigá, gastico nerúlasaká, ye ríó me'lisuga, ramué naréputi júkuru, 'lige ramué kúchilatiri abiena narémili júkuru alué gastico.

26 'Liko alué Pilato 'ma ma'chí pale Barabasi, 'lige nulale napurigá Esusi we-jpisópua, 'lige 'ma lisensia nejlle napurigá gulusichi ujchigá me'liboa.

27 'Liko alué selígame sontáloka 'ma o'tole Esusi alé napu mochime ju alué sontalo, 'lige alé suwábaga sontalo nólígá napuile napu ilígile alué Esusi. 28 'Lige 'ma bujele o'páchala, 'lige uchéchigo bilé o'pacha sejtákame we'lí ujchele. 29 'Lige aminami bilé gorona wejchégame mo'kótale mo'chí. 'Lige bilé baká wajtoná sekachí cha'pírale, alué baká napurigá bilé resó wa'lula uneme nile. 'Lige sontáloka chojkóbisiga jábele alé a'bé napu ilile alué Esusi, 'lige asíriga gawélele. Regá anele:

—jKuirá wa'lula ralámuli jurío nuleme!  
 30 'Lige aminami a'kachípale. 'Lige alué baká 'wile, 'lige alekete wejpale mo'ólachi.  
 31 'Lige 'ma alarigá gawélesa, 'liko 'ma bujele we'lí o'pacha sejtákame, 'liko bo'né o'páchala o'pachátirile. 'Liko 'ma o'tole me'limea gulusichi ujchigá.

*Jena ruwimela 'ma me'líriligo Esusi gulusichi ujchagá*

32 Napu'lige simiba e'yéniga, boichimi bilé ríó najtépane. Alué ríó Sírene anilichi we'ká riógichi bejtégame nile. 'Lige alué rioka Simoni rewégame nile. 'Lige alué sontáloka alué ríó nulele napurigá gulusi majtórimala napu Esusi ujchawili nile.

33 Alarigá sébale alé rabó Gólgota anilichi (napu aníame ju «Anayáwali Mo'ola»).  
 34 'Lige alé 'yáleru Esusi i'wili ba'wila pee a'wágame 'we chijpúgame na'lóriga. (Alué ba'wilaka nile napurigá tabilé o'kómala alué

Esusi.) Chébale Esusi chu'álachi alué ba'wila, nobi Esúsika tabiléchigo chunurúlekó.

35 Napu'lige Esusi 'ma gulusichi ujchásiga, alué sontáloka i'taga re'ele. «¿Chieri meta Esusi o'páchala?» anile. 36 'Lige abajá mochile Esusi repuka alué sontalo. 37 'Lige alé napu Esusi mo'ega chujkule re'pá amóbige ujchale bilé rabileta osirúgime, napu ruwime nile chonigá me'lílirugo Esusi, regá anime nile: «Yeka Esusi júkuru Wa'lula Rey ralámuli jurío nuleme.»

38 'Lige abiena uchucháliru gulusichi oká chigórigame, bilé wajtoná ujcháleru napu Esusi chujkule 'lige bilé o'iná. 39 Ralámuli alé a'bemi simáriga mo'loka, asíriga chátiri ra'íchali ra'íchale Esusi olagá. 40 Regá anile:  
 —Mué júkuru alué wa'lú re'obá na'mínámili, 'lige bakíá rawé kachi uchéchigo siné ku newámili júkuru mué. Bo'nepi nejkúriwaguru. 'La Onorúgame Inolá níriká, 'ma re'kisiwaguru alé gulusichi.

41 Abiena a'chigóriga gawélele Esusi alué balé e'wélala, 'lige alué Moisesi nila nulali benírame, 'lige alué ralámuli napu nuleme nile ralámuli jurío. Regá anile a'boi ra'íchaga:

42 —Alueka uché jaré buyánale chátiri bowechi, alué bo'népika tabilé gayena gu'iria. Wa'lula nísaká israelita nuleme 'la re'kísimala ke alé gulusichi, a'liko 'la bijchígwiwimpá ramué Onorúgame júlaligo. 43 Alueka anime ke Onorúgame 'we a'lá gu'irame ko, jípeko Onorúgame gu'írimalaké, aluéchigo bo'né koriamé Onorúgame Inolá.

44 'Ma alué chigórigametiri napu gulusichi uchule abiena gawélele Esusi.

*Jena ruwimela 'ma mukúligo Esusi*

45 'Liko rawilírikáchi 'ma chóniga ilíbele bochígimi gawichí, 'ma nasípagana enegá ku rayénale alué rayénali, 46 'lige 'ma abé alírikáchi ta'chó ma'chígichi, Esusi e'wele ne'ole bo'né ra'íchálila ra'íchaga. Regá anile:  
 —Elí, Elí, ¿lama sabáktani?

Yeka pe aníame nile, «O'nó Onorúgame, O'nó Onorúgame, ¿chonigá bi'neli a'répaché mué ne'chí?»

47 'Lige jaré anile alé a'bemi jáginti akisá:  
 —Ye rioka baigá aní alué napu ruwime nílige napu Onorúgame anélige, alué 'ya bejtégame napu Elíasi anilime nílige.

48 'Lige bilé ríó alé a'bemi ilígame, yati iwégame 'male bilé chiní nolamia, 'lige sa'nabáchale i'wili ba'wila chijpúgame, 'lige iguchi ujchale alé re'pá Esusi chu'álachi chébbimia, napurigá Esusi chunurúmala alué i'wili ba'wila. 49 'Lige uché jaré ralámuli anile:

—A'réwagó, pala nawara Elíasi napurigá gu'írimala.

50 'Lige Esusi uchéchigo siné sinale asíriga a'wágame. 'Liko 'ma mukule. 51 'Liko aba'lige napu'lige e'wele sinale Esusi,

alué walú chiní napu walú re'obachi chujkúgame nílige, 'ma chi'wale oká neraga nílale. 'Pákana chi'wale, wamí 'légana si. 'Lige gawitiri abiena nokale, 'lige rejté e'wele 'ma gajsile. <sup>52</sup> 'Lige 'ma i'púriga jábale alé napu bi'tile suwígame. 'Lige asírige we'ká ralámuli suwígame ku ajánele, alué napu Onorúgame oyérame nílige. <sup>53</sup> A'kinana 'ma Esusi bajchá ajánasa, 'lige alueka asírige we'ká riógachi mo'ile alé Rusaleni anilichi, 'lige alé we'ká ralámuli etele.

<sup>54</sup> 'Liko alué gapitani 'lige sontálotiri napu Esusi repuka mochúlige, napu'lige etesa gawí nokao, 'we majale 'lige anile:

—La bijchiá Onorúgame Inolá núlekuru ye rió.

<sup>55</sup> 'Lige asírige we'ká umugí jale alé mejkabeka e'negá. Alué umugika Esusi oyérame nile alé ejiro Galilea anilíchika sígame, 'lige aminami gu'irame nile. <sup>56</sup> Bilé mukí María anilime nile Magalena bejtégame. 'Lige uchéchigo bilé mukí María anilimechigó, Santiago eyela 'lige Osétiri. 'Lige uché bilé mukí Sebereo 'kúchila eyela nile.

*Jena ruwimela 'ma gatélirigo Esusi*

<sup>57</sup> Napu'lige 'ma alí kachi, bilé rió sébale 'we nígame enomí José anilime rió. Arimatea anilichi we'ká riógichi bejtégame nile alué rió. Alué rioka abiena 'we oyérame nile Esusi. <sup>58</sup> 'Lige Pilato e'nemia simile, 'lige tánale Esusi mukúgame. 'Lige Pilátoka yati lisensia 'yale. <sup>59</sup> 'Liko Joseka yati o'tole alué Esusi mukúgame. 'Lige 'we a'lá chiní rosákame bi'wigamechi kabile, <sup>60</sup> 'lige rekale bilena ewachi napu rekáwili nile bilé mukúgame, napu bo'né nulálige newániliga abé i'bé alé bilena wejtosá rejtechi. 'Lige 'ma 'yérasa alé yochi bilé walú rejtechi. 'Lige 'ma 'yerasa alé yochi bilé walú rejtechi. 'Liko 'ma simile. <sup>61</sup> 'Lige María Magalena bejtégame alé asale e'negá, 'lige uchéchigo bilé María abiena asale alé, alé 'na o'weka ewachi neraga mochile napu rekáleru alé Esusi.

*Jena ruwimela sontalo 'we repuka mochíligo alué ewachi*

<sup>62</sup> Melénala rawé sawalachi, napu'lige resíbame nile alué ralámuli jurío, alué e'wélala balé 'lige bariseo, simíbale alué Pilato 'yuga ra'ichamia. <sup>63</sup> Regá anele:

—Mué Wa'lula, néláruke'e alué rió 'yégame napu aníanié: «A'kinana bakiá rawé kachi ku ajánamala ne.» Alarigá anime kéturu napu'lige bijí ajagá asigá. <sup>64</sup> Alekeri nulawa mué repúniliga bakiá rawé alé napu gatéliru Esusi, napurigá tabilé smela alué oyérame rukó chigomia alué Esusi mukúgame, napurigá tabilé animela ralámuli abé i'libeko: «'Ma ku ajánale.» 'Liko alué 'yégalí abéchégo enátiri nímala, me'tigá alué 'yégalí napu ra'ichale abijí ajagá asigá napu'lige anile, «Kristo ju ne.»

<sup>65</sup> 'Lige Pilátoka anele:

—'Liko jaré sontalo 'yuga simáwagó, 'lige asírige 'la repúpua alé napu bo'í alué Esusi.

<sup>66</sup> 'Lige simíbale 'lige sebasa bile tábiri ujchele alé resochi yochi napu 'yérigame nile, machináliga pala ta'wesi i'pura yochi. 'Lige sontálaka abajá a'r'éleru tebuka.

## 28

*Jena ruwimela ku ajániligo Esusi*

<sup>1</sup> Napu'lige simírasa alué rawé resíbilichi pe kulí rapé siné che'limechi romíkichi, alué María Magalena anilime 'lige uchéchigo bilé María, 'mi ewachi simíbale e'nemia. <sup>2</sup> 'Lige yati neraga nokale gawí. 'Lige bilé santo ánjeli Onorúgame 'yuga nóchame re'kinale 'pákana rewagáchika, 'lige alé ewachi sebasa 'ma bujele rejté alé yochi ajtígame, 'lige amoba rejtechi asibale. <sup>3</sup> 'Lige alué santo ánjeli napurigá u'kí ne'wime aliena ra'ósame nile, 'lige o'páchalaka napuyeri gepá aliena rojsákame nile. <sup>4</sup> 'Lige alué sontalo, alué Esusi tebúkame, 'ma 'áwale majaga. 'Lige napurigá suwígame alarigá bi'tíbale. <sup>5</sup> 'Lige alué santo ánjeli anele alué umugí:

—Tase majawa, neka 'la machí 'emi Esusi 'yaga e'yenio, alué napu gulusichi ujchigá me'lílirige. <sup>6</sup> Alueka pecha bo'íko jena, alueka 'ma uchéchigo narélekuru a'walí napurigá ku ajagá asimela jena wijchimoba, napurigá bo'né anilige 'ya. Aka jeka simáwabala e'newa napu bo'ílige. <sup>7</sup> 'Lige yati simáwaká kumí, 'lige anéwaká alué oyérame: «Alueka mukúlekuru kaka nobi máchigo ku ajagá ajtkó. 'Lige simela alé Galilea anilime ejiro alé buwemia, alé etémalek'emi.» Pe ye ra'ichilicho ruimeo oláturu ne.

<sup>8</sup> 'Liko alué umugí yati ku simíbale asírige iwégame napurigá majame neraga, 'lige 'we ra'salagá e'yénale. 'Lige asírige iwégame júmala ra'ichali ruyemia alué oyérame. <sup>9</sup> 'Lige 'ma e'yénale napu'lige Esusi ma'chínale alemi napu e'yénilige alué umugí, 'lige Esusi repórale alué umugí. 'Lige alué umugika a'bé nawile alué Esusi asírige 'la neraga gomurule chajpáchigana. <sup>10</sup> 'Liko anile Esusi alué umugí olagá:

—Tase majawa. Yati simawa ne'chí oyérame ruyewa napurigá Galilea anilichi ejiro simámala, 'lige alé etémalawé ne'chí.

*Jena ruwimela napu ruwíligo alué sontalo*

<sup>11</sup> Bijí boichimi e'yénigichi alué umugí, jaré alué sontalo napu tebume nílige alé napu Esusi bo'ílige 'mi we'ká riógichi simíbale. 'Lige ruyele alué e'wélala balé alaklígigo 'mi alé. <sup>12</sup> 'Liko alué e'wélalaka simíbale ruyemia alué e'wélala ralámuli jurío nuleme, napurigá 'la ra'ichamia a'bopi

chonokimeo. 'Lige asíriga we'ká enomí najtétíli ru alué sontalo. <sup>13</sup> 'Lige anéleru:

—Anéwaká ralámuli rukechi: «Okoka bi'tirúgichi, alué Esusi oyérame 'ma chigole alué Esusi mukúgame.» <sup>14</sup> 'Lige alué wa'lula selígame Pilato machisáká, 'liko ramuéchigó 'we a'lá ra'íchawa alué wa'lula selígame 'yuga, napurigá tajché anewa 'emi, 'lige 'émika tabilé che olawa.

<sup>15</sup> 'Liko natétisiga alué sontalo, 'ma simíbale alarigá ra'ichamia napurigá anélirige. Alarigá ruwime júkuru jurióka jipe rawé si.

*Jena ruwimela napu anele Esusi alué makué bilé Esusi 'yuga járome*

<sup>16</sup> 'Liko alué makué bilé Esusi 'yuga járome, 'ma simíbale alé Galilea anilime ejírochi alé bilena rabó napurigá anélige Esusi. <sup>17</sup> 'Liko napu'lige sébale alé Esusi e'nemia, asíriga 'la galegá etele. 'Lige jaré aba tabilé 'cho 'me 'la machile pala 'la bijchiá Esusi ko. <sup>18</sup> 'Liko Esusi a'bé nawile alué oyérame, 'lige anele:

—Onorúgameka a'walí 'yákuru ne'chí napurigá nulámala ne bochígimi 'pa rewagachi, 'lige aminami jemi wijchimo. <sup>19</sup> Napu'lige simásiga 'emi alé napu suwábaga chojkégame ralámuli mochí, 'la benírawaká churigá ka ne'chí oyénilia. Rewaráwaká alué ralámuli napurigá 'la machimela churigá ko O'nó Onorúgame, 'lige alué Onorúgame Inolá, 'lige alué Onorúgame Alawala. \* <sup>20</sup> 'Lige 'la benírawaká napurigá 'la sébali olámala napu ne nuligé. 'Lige neka senibí asimela 'emi 'yuga, napusí suwiba gawí.

Pe ikí kápá ye ra'íchali. Wa'lú cheliérabá.

\* **28:19** Griego ra'ichalika, alué ra'ichali rewarálime i'sinimi tabilé aniname kéré ba'wichi bokuika rewarálime, i'sinimi anime kéré 'we a'lá sébali oyérame niwa Onorúgame 'yuga.

## Regá Anime Osale Marko Ruigá Chu'síligo Esukristo Jena Wijchimoba Asagá

*Jena ruwimela Juani ralámuli rewarame níligo o'wé jáwaga ralámuli napurigá 'la listo mochímala napu'lige Esukristo sébachi*

<sup>1</sup> Ye ju semátiri ra'íchali napu ruwime ju alué nóchali Esukristo nochálila, alué napu ju Onorúgame Inolá.

<sup>2</sup> Peba alarigá o'wínale ye ra'íchili 'we 'ya napurigá chujkú jena apélichu napu Isaiasi anilime rió osale, alué rió napu ruyame nile napu anele Onorúgame. Isaiasi regá anime osale:

Alemi julámala ne bilé rió ne'chí gu'írame bajchabé neraga napurigá 'la o'wé jáwámala ralámuli.

<sup>3</sup> Alué rió 'we e'wele ra'íchámala jami tabilé riógichi,

napu 'we wakígame gawí ju.

Alué ralámuli alé sebámala napu ajtí alué bo'né,

'lige regá animela:

«'La bí'igame 'nata mochiwa, 'ma pe 'we nawámala Wa'lula.»

Alarigá osale alué rió Isaiasi. <sup>4</sup> 'Lige alakile napurigá anile ye ra'íchili, nawale alué Onorúgame gu'írome, Juani anilime rió. 'Lige chojkile rewará, alé ba'wichí jáwaga. Anele alué ralámuli 'ma a'réwagó alué chátiri 'nátili 'lige rewaráwagó napurigá Onorúgame 'la e'kámala. <sup>5</sup> We'ká rawé nokale simiba we'ká ralámuli Rusaleni mochígame 'lige we'kaná riógichi mochíggame alé napu nile Jurea anilichí ejiro ra'íchili akimea Juani ra'ichálila 'lige akisá alué ra'íchili 'lige ruwile 'we resítiri 'nátili 'nátame ko alué a'boi ralámuli. 'Lige Juánika rewarale suwábaga alué ralámuli napu ekí e'kali tánele Onorúgame alé napu ename ju wa'lú ba'wí Jorani anilime bakochi.

<sup>6</sup> Juánika o'páchgime nile kameyo anilime ajágame gupala newárigimete, 'lige wi'chí wajsíbalagame nile, 'lige ojchi go'yame nile, 'lige jami nerúgame ijampre ba'wila abiena go'yame nilechigó. <sup>7</sup> 'Lige regá anime rejcholi ruyele suwábaga ralámuli:

—Pe abé i'libeko nawámala bilé rió abé najtékame me'tagá ne'chí. Neka pe abé u'tabela ju, napurigá bilé pioní alarigá ju ne. Napu'lige sebasa alué abé najtékame, 'we alá niraga etémala ne alué rió.\* <sup>8</sup> Neka pe rewarákuru suwábaga 'emi. Alué wa'lúlaka abé semá 'símala. Alueka

Onorúgame Alawala nejímala napurigá 'émichi mochímala bejttega alué Onorúgame Alawala.

*Jena ruwimela Juani rewaráligo Esusi*

<sup>9</sup> 'Alige bilé rawé napu'lige Juani rewará ilígichi, Esusi nawale alé Galilea ejíroka simigá. Simile alé napu Juani ilile. 'Alige Juánika rewarale alé napu ename ju wa'lú ba'wí Jorani anilime bakochi. <sup>10</sup> Napu'lige ma'chínasa Esusi ba'wichika, etele ewagá ilíbago rewagá, 'lige etele Onorúgame Alawala 'pákana enágichi napuyeri bilé baloma neraga. <sup>11</sup> Al'Ígerikáchi anile Onorúgame 'pa rewagáchika:

—Mué ju ne Inolá. 'We galé ne mué. 'We ganliga ajtí ne mué 'yuga —anile Onorúgame.

*Jena ruwimela Satanasi 'we najkíligo napurigá Esusi e'wímala alué Satanasi*

<sup>12</sup> 'Alige pe yati Onorúgame Alawala o'tole Esusi bilénami jami 'we wakígichi tabilé rojégichi 'lige tabilé riógichi. <sup>13</sup> Esusi alé 'mi asale oká liá rawé. 'Lige Satanasi (Remónisi)† alemi nawile 'yégimia napurigá Esusi 'la e'wímala Satanasi. Esúsika tabilé e'wile. 'Alige napu'lige Esusi alé jami tabilé riógichi ajtígichi, alé napu 'we nerú tábiri ajággame jobátigame, Onorúgame júlale we'ká santo ánjeli napurigá Esusi gu'íromala.

*Jena ruwimela Esusi 'ma chojkíligo ralámuli beniria alé ejiro Galilea anilichí*

<sup>14</sup> Galírale bajcháliru alué Juani, 'lige a'kinana Esúsika ku Galilea ejiro anilichí simile, 'lige ra'íchale alué a'lala Onorúgame nila ra'íchali. <sup>15</sup> Regá anile:

—'Ma seba raweli napu sebámili nílige napurigá Onorúgame nulámala ralámuli alawálachi napurigá e'wámala ralámuli. 'Aresi alué resítiri 'nátili, tase cha nokiboa. 'La bijhígíwaká alué ra'íchili 'we alá semátiri Onorúgame nila ra'íchili —anile Esusi.

*Jena ruwimela Esusi owíligo naó rió ro'chí wejame napurigá 'yuga járome nímala*

<sup>16</sup> Esusi enale bilena ba'wichí suweke, we'lesi manígime ba'wí Galilea anilime.† 'Lige oká rió ro'chí e'mume etele. Alué oká rió wa'lú morali iwíate newárigime o'kame, 'lige alué morálite i'mua uchule ro'chí. Bilé Simoni anilime nile 'lige uché bilé Antresi anilime nile, Simoni bonila. <sup>17</sup> Esusi regá anele alué oká rió:

—Nabá ne'chí 'yuga, ralámuli napabúnigala nulémala ne 'emi.‡

<sup>18</sup> Pe yati simúbale alué ralámuli Esusi 'yuga alué wa'lú morali ro'chí wejame alé a'resa.

\* 1:7 Yolí ra'íchaga anile Juani: «No soy digno de desatarle las correas de sus huaraches.» † 1:13 E'nesi glosario «Satanás». ‡ 1:16 E'nesi glosario «Galilea». § 1:17 Esusi anile: «Íjpeko ralámuli i'mume nímala 'emi.»

<sup>19</sup> Alige Esusi simile uché rajpé. 'Lige pe kulí e'téli mi enagá Akobo najté pale 'lige Juani síchigó napu Sebereo 'kúchila nile okánika. Alé bárkochi\* mochile alué ralámuli ku mo'yea alué morali ro'chí wejiamé napu chí'wale. <sup>20</sup> 'Lige Esusi yati bayérole alué oká rióchigó. 'Lige yati simíbale okánika 'ma alé a'resa a'boi onolá Sebereo anilime alué bo'né nóchame 'yúriga.

*Jena ruwimela Esusi ma'chí páligo bilé remónisi u'tabela bilé riochi ajtígame*

<sup>21</sup> Esusi 'lige alué 'yuga járome sébale 'lige alé Kapernaumi anilíchi. 'Ma sébachi resibulíchi rawé, Esusi bajkile alé bilena u'tá re'obachi «sinagoga» anilime, 'lige ra'íchale Onorúgame ra'íchálila. <sup>22</sup> Ralámulika pe i'kilí mochíbale e'negá napu'lige ra'íchachi Esusi, 'wéchigo 'la semáriga ra'íchaligame, 'we a'lá benegá, tase napurigá alué Moisesi nila nulalí beníriame. Esúsika 'la Onorúgame a'walílate ra'íchame nile. <sup>23</sup> Bilé rió asale alé pachá u'tá re'obachi, alué rioka chátiri alawá ajchágame nile, 'lige alué chátiri alawá e'wele ne'oka ra'íchárole alué rió:

<sup>24</sup> —Mué Esusi Nasareta anilíchi ajtígame Rabí rijimála,† mueka pe nejkumemia nawale. ¿Mueka nawapa ramué me'línea? Ne 'la machí Onorúgamete wanápurigame ko mué —anile alué rió chátiri alawá ajchágame.

<sup>25</sup> A'lige alué Esúsika a'wágame ne'óchale alué chátiri alawá, anele:

—i'kilí asá! ¡yati ma'china ye riochi!

<sup>26</sup> A'lige alué chátiri alawá alué rió wí-chí rekábale 'we rawaruka chí'poka bo'írale alué rió. Alué chátiri alawá iwégame sinaka ma'chínale alé riochi. <sup>27</sup> Suwábaga ralámuli napu eki e'negá jale pe i'kilí jábale. 'Lige regá rukégá jale a'bopi:

—¿Chieri júché ye rió? Tabilé siné akirume kéturu sineko ye tételi. 'La semáriga ra'íchanti júkuru 'la benegá. Alueka 'la wa'lula neraga nulame ju ne'óchiga alué chátiri alawá, 'lige 'la e'weme ju alué chátiri alawá.

<sup>28</sup> 'We yati akele suwábaga ralámuli Galilea anilíchi ejiro epperégame, ala'síligo Esusi.

*Jena ruwimela Esusi sa'wáligo Simoni Pegro wasila*

<sup>29</sup> Napu a'lige buyasa alé u'tá re'obachi «sinagoga» anilime, Esusi simile Akobo 'yuga 'lige Juani 'yúgachigó napu epperégame nile Simoni 'lige Antresi. <sup>30</sup> Simoni wasila 'we iná bo'ile. Napu'lige Esusi sebasa yati ruyéleru 'we nayua bo'igá Simoni wasila. <sup>31</sup> A'lige Esusi a'bemi nawile, sekala cha'pigá o'weti ajchale. A'lige yati sa'wile

alué mukí. Sa'wisá yati go'ame newale napurigá Esusi 'lige alué Esusi 'yuga járome go'mela.

*Jena ruwimela Esusi we'ká nayume sa'wáligo*

<sup>32-33</sup> Napu'lige rayénali bokuíchi, 'ma chónachi, suwábaga ralámuli alé riógichi mochígame napalle alé yochi napu Esusi ajtile. 'Lige a'pili ralámuli, nayúkame a'pagá jsile, 'lige abiena ralámuli u'kuchípala remónisi mochígame. <sup>34</sup> Esusi sa'wale suwábaga nayúkome, 'lige abiena buyánale alué chátiri alawá. Esusi tabilé a'rele napurigá ra'íchámala alué chátiri alawá, alué chátiri alawá 'la machíligame chieri ko alué Esusi.‡

*Jena ruwimela Esusi rejcholi nejlíligo alé Galilea anilíchi ejiro*

<sup>35</sup> Be'á amulí che'lachi, bijí chóniga ilígichi, Esusi asísiga simile 'miná mejká tabilé riógichi napurigá ta nejkumémala ralámuli ra'íchálíchi Onorúgame 'yuga. <sup>36</sup> A'lige napu o'mochísisa Simoni 'lige alué uché jaré Esusi 'yuga járome, simíbale Esusi 'yamia. <sup>37</sup> Napu'lige rewisá, regá anele:

—We'ká ralámuli mué 'yaga e'yena.

<sup>38</sup> A'lige Esúsika anile:

—Nabá jarénami riógichi napu ta'mé mejká ju. 'La ruyema olá néchigó alué ralámuli Onorúgame nila ra'íchili. Alekeri nawá ne jena wijchimoba.

<sup>39</sup> A'lige Esusi bochígimi eyénale Galilea anilíchi ejiro, 'lige napu ekiná u'kuchí re'obachi «sinagoga» anilime sébaga ruwile Onorúgame nila ra'íchálila, 'lige buyánale suwábaga chátiri alawá napu eki ajchágame nile we'ká ralámuli.

*Jena ruwimela Esusi sa'wáligo bilé rió sa'pachí amoba nayume*

<sup>40</sup> Bilé rawé bilé rió 'we chátiri nayume «lepra» anilime, § alé a'bé simile napu Esusi ajtile, 'lige chojkóbisiga ilíbbale, 'lige anele:

—Mué bo'né 'la machílike pala 'la umubátiká ye nawilí sa'wá napurigá 'la elíwa ne alé u'tá re'obachi bajkichi.

<sup>41</sup> Esúsika 'we na'temale alué rió, 'lige sekate nochale 'lige anele:

—Neka najkí napurigá sa'wimela mué.

<sup>42</sup> Pe alanisá alué Esusi, yati sa'wile alué rió. <sup>43</sup> Bajchabé ta'chó simíchi, rejcholi ruyele Esusi alué rió, regá anele:

<sup>44</sup> —Tabilé 'wesi ralámuli ruyewa ne 'síligo sa'wá mué. 'Mi alé simibóaká napu ajtí alué balé napurigá 'la machimela 'ma tabilé nayume ko mué, 'lige go'ame kógiwaká

\* 1:19 Ta'mé 'we walú nile alué barko napu uneme nile alé Galilea. Siné kachi amulí gi makué metro nile napu bochime nile makué oká na rasígame ralámuli. † 1:24 E'nesi glosario «ancestor». ‡ 1:34 Alué chátiri alawá remónisi gompaniérola nile, 'lige alekeri Esusi tabilé najkile napurigá ruwimela chieri ko bo'né. § 1:40 E'nesi glosario «lepra».

Onorúgame napurigá nulale Moisesi, napurigá suwábaga ralámuli machimela 'ma tabilé nayume ko mué, napurigá 'ma 'la eliuwa mué napurigá 'la bajkimela alé u'tá re'obachi.

<sup>45</sup> Lige simile alué rió. 'Lige alué rió tabilé e'wale napurigá anélirige Esúsita. Pe ruwile bochígimi riógichi eyénaga 'ma sa'wigá nayua. Alekeri Esusi mejká tabilé riógichi asale we'ká rawé napurigá tabilé 'wesi ralámuli etémala. Esusi tabilé najkile napurigá we'ká ralámuli sebámala alé Esusi e'nemia. Rekó 'mi alé ajtígichi, we'ká ralámuli sébale.

## 2

*Jena ruwimela Esusi ko wa'lula 'la e'kame resítiri 'nátili*

<sup>1</sup> A'kinana rawé Esusi uchéchigo nawale alé we'ká riógichi Kapernaumi anilichi, 'lige suwábaga ralámuli akele ku alé riógichi ajtígó Esusi. <sup>2</sup> 'Lige we'ká ralámuli napaile alé galírale napu ajtíle Esusi. We'ká ralámuli jsile, 'ma bochi ilíbale alé pachá napusí tabilé gainárume ju alemi nasípami simírilia. 'Lige alé ma'chige si abiena we'ká ralámuli jale, 'ma tabilé ganárume alé yochi bajkiá. Onorúgame nila ra'íchili beniría ilile Esusi alué ralámuli. <sup>3</sup> Napu'lige Esusi ra'icha ilígichi, naó rió jsile bilé sujígame majtoga bilena tabachi rekagá. Alué nayúmeke tabilé gayéname nile ronola noká. <sup>4</sup> Tabilé gayénale mo'yá alé napu Esusi ilile, cha we'ká rioga ilíligame alé. 'Alíko arigá alé galimopa o'tole alué nayume, 'lige alé galimopa ewarale napu ilile Esusi ra'íchili ruyá, 'lige alégana re'kibule alué nayume bilé gemachi rekagá, alé napu ilile Esusi. <sup>5</sup> Napu'lige Esusi etesa alué ralámuli alanokachi, 'la bijchigio alué ralámuli, a'lige anele alué nayume:

—Mué re'malí, ya 'ma e'kárigime ju mué alué chátiri 'nátili—anele.

<sup>6</sup> Alé mochile jaré rió Moisesi nila nulalí beníriame. Alué akele alaníchi Esusi. 'Alíge alué Moisesi nila nulalí beníriame regá 'nátale: <sup>7</sup> «Alué Esúsika pe Onorúgame gawéliga aní alaniá. Pe Onorúgameka 'la e'kámaleké resítiri 'nátili.» Alarigá 'nátale alué Moisesi nila nulalí beníriame. <sup>8</sup> Esusi 'la machile alarigá 'nata mochígichi alué ralámuli. Alekeri regá anele:

—Tabilé 'la 'nata mochí 'emi, 'émika 'nata Onorúgame gawéliga anió ne. <sup>9</sup> ¿Chieri abé nóchali kame ju, e'kalia o 'yolia? ¿Regá anilía: «'Ma e'kárigime ju mué», o regáchala: «O'weti asá, ro'miná mué gemala 'lige simigá ku galírale?» <sup>10</sup> Jipe 'la machimela 'emi, ne napu ju Onorúgamete julárigame 'pa rewagáchika napurigá rió neraga\* 'la nígame

ju ne Onorúgame a'walila 'lige lisensia nígame ju ne napurigá e'kámala apiépiri ralámuli.

'Alíge Esusi anele alué nayume:

<sup>11</sup>—O'weti ilísiwa, ro'miná mué alué gemá 'lige simigá ku galírale—anele.

<sup>12</sup> 'Alíge alanésiga alué nayume, pe yati sa'wile, 'lige ma'chínale gemá majtoga. Suwábaga ralámuli napu ekí mochílige alemi, pe kilí mochíbale napurigá majágame neraga, 'we ra'sálame kéréle abiena rekó kilí mochige napurigá majame. 'Lige anile:

—¡Uja, 'la wa'lú ju Onorúgame! ¡Tabilé siné etérige ramué aliena semátiri nóchali newachi alué napu eteru jipe!—anile.

*Jena ruwimela Esusi owiligo Lebí napurigá alué 'yuga ilírome nímala*

<sup>13</sup> A'kinana uché simile Esusi alé wa'lú ba'wichí suweke Galilea anilichi. Pe yati we'ká ralámuli napaile alé, 'lige Esúsika benírale Onorúgame nila ra'íchili. <sup>14</sup> 'Lige alemi etele bilena galírale bilé rió enomí gobilala ajtígó, enomí napu napubúlime nile alué wa'lula rey romano i'líme, 'lige alué rioka Lebí anilime nile, Alípeo anilime rió inolá. 'Lige Esúsika regá anele:

—Nabá, muéchigó ne'chí 'yuga ilírome niwa.

'Lige Lebí ilísale, 'lige simile Esusi 'yuga.

<sup>15</sup> 'Lige a'kinana rawé Esusi 'lige Esusi 'yuga járome bayéleru napurigá simámala go'mea Lebí bejtélachi. 'Alíge rawé we'ká napu nóchame nile enomí gobilalia, enomí napu nejlíme nile, 'lige uché jaré ralámuli napu cha nokame nile, alé mochile go'yá Esusi 'yuga 'lige alué Esusi si járome 'yuga. <sup>16</sup> Jaré Moisesi nulalila beníriame 'lige jaré bariseo abiena mochile alé, 'lige anele alué Esusi 'yuga járome:

—Alué Esusi tabilé go'meli júkuru alué enomí goblálome 'yuga, 'lige nibilé alué uché jaré ralámuli cha nokame 'yúgachigó—anele.

<sup>17</sup> Esúsika akele alaníchi, 'lige anele:

—Bilé 'yome ka, nayúkame 'yome júkuru, tase tabilé nayume. Neka a'chígoriga 'sime júkuru. Neka gu'irimia nawákuru suwábaga napu ekí 'la machí resítiri rawelí nígame ko a'boi. Alué 'we a'lá bi'íggame alawégame korime ka, alué alieri ralámulika tabilé gu'irimala ne.

*Jena ruwimela Esusi napu'lige alué saílata o'tosuga a'lige kulí ayunamio alué bo'ne 'yuga járome*

<sup>18</sup> Bilé rawé Juani 'yuga járome 'lige jaré alué bariseo ayuna mochígichi, 'lige jaré ralámuli jsile alé napu ajtíle Esusi, 'lige anele:

\* 2:10 E'nesi glosario «Hijo del Hombre».

—¿Chonigá ta ayuna mué 'yuga járome ka? Juani 'yuga járome 'lige bariséochigó suwábaga alueka 'la ayuna —anele.

<sup>19</sup> Esúsika regá nejle:

—Napu'lige bilé rió newichi, ralámulika tabilé ayúname ju alué rió 'yuga mochiga. 'Ma tabilé ajtígachi alué rió, a'lige kulí ayunámala. 'Lige alarigá nokiamé niru ramué. Ne 'yuga járome ka tabilé ayúnachigó jipe, <sup>20</sup> nobi pe 'we nawámalagó ne saila ne'chí o'tomea, a'lige kulí 'la ayunámala suwábaga alué ne 'yuga járome.

<sup>21</sup> Ne 'yuga járome ne nila rejcholi oyérame nísaká, 'lige 'ya nerúgame rejcholi oyérame nísachigó, pe napurigá chiní pachókime nímala napurigá pachókia bilé chiní o'chéráme bilé nuebo chinite. Tabilé 'la ju alarigá sukia, bilé chiní nueboká 'we cho'yome kame 'lige abéchigo we'lesi chí'wame ju alé napu pachókirige.

<sup>22</sup> Abiena regá anile Esusi:

—Pe i'wilí ('uba) ba'wila rekútume ro'linti kárélamala bilena o'chéráme chiliwilachi wi'chite newárigime. Alué i'wilí ba'wila rekútume pe kulí ro'árigame ka chiliwilachi wi'chite newárigime asríga a'wágame ronome ju, 'lige alué wi'chí chiliwila o'chéráme nísaká 'ma chí'wame ju 'lige 'ma go'lime ju alué i'wilí ba'wila rekútume, 'lige alué chiliwilaka 'ma pe chí'wámala. Pe kulí newalime i'wilí ba'wílaka 'la nuebo chiliwilachi wi'chite newárigime ro'lime ju —anile Esusi.

*Jena ruwimela Esusi ko napu nejime ju lisensia tachiri nochátikó napu'lige resíbilichi rawé ju*

<sup>23</sup> Bilé rawé resíbilichi, Esusi simírole bo'né 'yuga járome 'yuga bilena ri'ligó echégichi. Alé sebasa, alué Esusi 'yuga járome ka ri'ligó mulalá rejpúniga mosika go'ale. Jaré bariseo etele alanokachi alué Esusi 'yuga járome. <sup>24</sup> Alué bariséoka anele alué Esusi:

—E'né chonoká noká mué 'yuga járome. 'Ya mochígame nulame napurigá tabilé alarigá nokíboa resíbilichi rawé.

<sup>25</sup> A'lige Esúsika anele:

—Tabilé siné akenti ka aníaní 'emi alekí ra'íchili napurigá 'sile alué 'ya ajtígame Rabí anilime rió e'lowika. <sup>26</sup> Alué rioka bajkile Onorúgame galíachi napu'lige Abiata anilime wa'lula kachi alé Onorúgame galíachi, 'lige go'lé alué baní napu Onorúgame kógilime nile. Tabilé lisensia nile napurigá go'mela bilé rió napu tabilé balé nile, pe alué balecho 'la nígame nile lisensia napurigá go'mela alué baní. Nobí Rabika arigáchigo go'ale ko rekó tabilé balé ke, 'lige nachútaga go'ale alué napu bo'né 'yuga oyame nílige.

<sup>27</sup> Lige aminami regá anele:

—Onorúgameka newale alué rawé resíbilime napurigá gu'írowa ralámuli, tabilé nejile napurigá gastigáririgame neraga mochiwa. <sup>28</sup> Ne, Onorúgamete julárigame 'pa rewagáchika napurigá rió neraga, ne ju nulame resíbilichi rawé.

### 3

*Jena ruwimela Esusi sa'wáligo bilé rió sujígame sekégame*

<sup>1</sup> A'kinana uché bilé rawé resíbilichi Esusi simile alé ut'á re'obachi «sinagoga» rewégame. Alé asale bilé rió sujígame sekégame. <sup>2</sup> Jaré bariseo alé jale e'negá pala 'yoya sita anía. Tabilé lisensia nile napurigá 'yowa bilé nayume resíbilichi rawé, alarigá anime nile alué ralámuli jurío nulalila. Esusi alué nayume 'yósaká a'liko alué bariseo yati ruyema olale e'wélala napurigá Esusi gastigáriwa. <sup>3</sup> A'lige alué Esúsika anele alué sujígame sekégame:

—Jeka simí. Jena nasipa ilí.

<sup>4</sup> A'lige Esúsika rukele bariseo:

—¿Choni 'emi nila nulalí? ¿Chu'simía 'la ju resíbilichi rawé? ¿Tachiri abé a'lá ju, ralámuli nayúkame sa'walía o tabilé sa'walía chalá? ¿Cha 'sika enalia o tabilé cha 'sika enalia? ¿Gu'írilia o me'liá?

Bariséoka pe i'kilí jábale tabilé pe'tá ra'íchiga. <sup>5</sup> Lige Esúsika 'we ayole alué bariseo 'yuga, 'lige 'we seweka ilíbale machisá tabilé na'temao alué uché jaré ralámuli alué bariseo. 'Lige Esúsika anele alué sujígame sekégame rió:

—Wajchiná mué alué seká.

A'lige alué rió wajchinale sekala sujígame. 'Lige yati sa'wile. <sup>6</sup> Napu'lige etesa alué alieti yati ma'chimi simíbale alué bariseo. A'lige napáile alué bariseo, 'lige jaré alué ralámuli jurío napu nirame nile alué wa'lula Eróresi anilime, 'lige 'we a'lá suériga ra'íchale churigá 'la nítikó Esusi me'liá.

*Jena ruwimela Esusi we'ká ralámuli sa'wáligo alé wa'lú ba'wí manígichi Galilea anilichí suweke*

<sup>7</sup> Bilé rawé Esusi simile bo'né 'yuga járome si alé wa'lú ba'wí manígichi Galilea anilichi. 'Lige we'ká ralámuli Galilea ejiro\* mochígame najátale. <sup>8</sup> Napu'lige Esusi ajtígichi alé, 'jsile we'ká ralámuli Jurea anilichi ejiro mochígame, 'lige Rusaleni anilichi we'ká riógichi mochígame abiena jsílechigó, 'lige Irumea anilichi ejiro mochígame abiena jsílechigó, 'lige Jorani anilichi bakochi na'lebo baona mochígame abiena jsílechigó, 'lige Tiro anilichi we'ká riógichi mochígame abiena jsílechigó, 'lige Sironi anilichi we'ká riógichi mochígame

\* 3:7 Alué wa'lú ba'wí Galilea anilime alé pachá ju napu ju Galilea anilichi ejiro. E'nesi glosario «Galilea».

abiena jsilechigó, machúligame 'we alá 'yóome ko Esusi. <sup>9-10</sup> Esusi we'ká nayúkome sa'wale, alekeri noli rajkibuga uchútales alué ralámuli Esusi nochániliga sa'wináliga. 'Liko anele alué Esusi bo'né 'yuga járome:

—Senibí 'la 'nátaga mochiwa 'la ujchugá bilé barko. Siné kachi we'ká napuísá ralámuli bárkochi 'moma ne —anile.

<sup>11</sup> Alemi jálechigó jaré ralámuli napu chátiri alawá ajchágame nile. Napu'lige sebasa alé a'bé napu Esusi ilile, alé napu Esusi ilile o'wemi neraga, alué chátiri alawá wijchí 'lule alué ralámuli 'lige a'wágame ra'íchale:

—¡Mué ju Onorúgame Inolá, napu re'pá rewagáchika nawale! —anile.

<sup>12</sup> 'Lige Esusi 'we anele napurigá tabilé ruwimela chieri ka bo'né.

*Jena ruwimela Esusi owlígó makué oká rió napurigá alué bo'né 'yuga járome nímala senibírawé*

<sup>13</sup> Abé alí Esusi simile bilena rabó bo'né 'yuga járome si. <sup>14</sup> Alé sebasa alué ralámuli, makué oká owile bo'né napurigá 'la nabí bo'né 'yuga járome nímala Onorúgame ra'íchálila beniria.† <sup>15</sup> Abiena 'la 'yale a'walí napurigá 'la buinámala chátiri alawá napu ajchágame nile jaré ralámuli. <sup>16</sup> Ye ju napu nile alué makué oká rió napu Esusi 'yuga járomili nile nabí: Simoni, napu Pegro anilime rewá 'yáleru Esúsíte, <sup>17</sup> Jakobo 'lige Juani, napu Sebereo inolá nile okánika, napu Boanérjesi anilime rewá 'yáleru okánika Esúsíte. Boanérjesika aniame ju «ralámuli jobátigame».‡ <sup>18</sup> 'Lige abiena Antresi, Belipe, Bartolomé, Mateo napu Lebí anilime nile siné abé 'yako, Romasi 'lige Santiago, napu Aripeo inolá nile, 'lige Tareo, 'lige uché bilé Simoni, alué napu 'we alá benégame nile ra'íchaga ralámuli gu'iriga (siné kachi nekoga oyame níligeréko),<sup>19</sup> 'lige Jurasi Iskariote, alué napu Esusi saíla neraga ilibale a'kinana rawé.

*Jena ruwimela Esusi chega rijimala mayéligo 'ma tabilé 'la 'nátaga eyéneo Esusi*

'Alige pe yati ku sébale bilena galírale Esusi alué makué oká rió 'yuga, alué napu bo'né 'yuga e'yéname nílige. <sup>20</sup> Uchéchigo we'ká ralámuli napaile. Tabilé cherigá ikírole Esusi go'ame go'yá 'lige alué bo'né gompaniérolachigó, cha we'ká rióligame. <sup>21</sup> Napu'lige alué Esusi chega rijimala machísá we'ká ralámuli jsíligo alemi alué Esusi ajtígichi, alué rijimálaka yati o'tomé olale. Anile:

—'Ma lo'iro alué Esusi.

*Jena ruwimela alué e'wélala Moisesi nulálila beníriame mayéligo Esusi pe Remónisi alawálate chapiruga eyéneo*

<sup>22</sup> 'Lige jaré Moisesi nila nulalí beníriame sébale Rusalénika simúbaga, 'lige alueka anile:

—Alué Esúsika pe Remónisi alawala ajchágame ju, alué wa'lula remónisi Belsebú anilime, 'lige alué 'sime ju a'walí 'ya napurigá alué Esusi 'la buinámala alué chátiri alawá napu mochígame ju jaré ralámuli.

<sup>23</sup> 'Alige Esúsika bayele alué Moisesi nila nulalí beníriame, 'lige ruyele bilé ra'íchili oká tétili ruwime. Anile:

—Alué wa'lula remónisi tabilé buyáname ju alué chátiri alawá napu pe bo'né 'yuga járome ju. <sup>24</sup> Bilé selígame 'lige bo'né 'yuga járome 'ma na'áwasa a'bopi, tabilé we'lisi napuika nochámala. <sup>25</sup> Onolá 'lige 'kúchila 'ma na'áwasa, tabilé we'lisi anachámala 'kúchila alé mochiga onolá 'yuga. <sup>26</sup> Alarigá ju Satanasi ra'íchálilachigó. Satanasi wa'lula tabilé nulame ju napurigá buinawa alué chátiri alawá napu jaré ralámuli niga mochí. Pe alué bo'né nulésaká napurigá ku buyásimala alué chátiri alawá, a'liko 'ma najsuímala alué Remónisi nochálila. Tabilé we'lisi anachámala alué Satanasi wa'lula asagá.

<sup>27</sup> 'We alá na'tawa napurigá animela ne jena. Bilé rió chigónilisa bilena galírale bilé a'wágame rió bejtélachi, bulumeli júkuru bajchá 'lige kulí 'la umubámala chigoa. A'chigóriga 'smikuru ne, 'ma bulékuru ne alué wa'lula Satanasi. Alekeri 'la buinámala ne alué chátiri u'kuchípala alawá napu mochí alé jaré ralámulichi.

<sup>28</sup> 'La gepusi napu ruwimela ne jipe. Onorúgame 'la anáchame ju napu'lige ralámuli Onorúgame gawéliga ra'íchachi, Onorúgame 'la e'kame ju alarigá ra'íchachi alué ralámuli, 'la Onorúgame tánasaká alué ralámuli napurigá e'kámala, <sup>29</sup> nobi neruko jaré abé chátiri ra'íchili napu Onorúgame tabilé ganílime ju napu'lige alarigá ra'íchachi ralámuli, 'we chátiri ra'íchili ju napu'lige ralámuli anichi pe Remónisi alawala ko napu ralámuli nayúkome sa'wao napu'lige pe Onorúgame Alawala kachi napu ralámuli nayúkome sa'wá. Onorúgame tabilé e'kame ju alué alieri ra'íchame ralámuli rekó alué ralámuli Onorúgame tanie napurigá e'kámala.

<sup>30</sup> Alarigá anele Esusi alué ralámuli 'yuga ra'íchaga, Remónisi alawala ajchágame koríligame Esusi olagá alué e'wélala napu Moisesi nila nulalí beníriame nile.

† 3:14 E'nesi glosario «apóstol».

‡ 3:17 «Boanérjesi» abiénachigó aniame ju «ra'name 'kúchila».



*Jena ruwimela Esusi ruwligo chieri ralámuli ko napu bo'né Esusi bonila ju 'lige waíla ju 'lige bo'né eyela*

<sup>31</sup> A'lige pe yati sébale Esusi eyela 'lige jaré napu nile Esusi nasípasi waíla 'lige nasípasi bonila. Tabilé chérigá sebasa nílile Esusi ajtígichi, cha we'ká ralámuli mochíligame, a'lige pe ma'chika jábale. <sup>32</sup> 'Lige júla jaré ralámuli Esusi bayéniliga. 'Lige alarigá machíle ralámuli alé ma'chika iligó alué Esusi eyela 'lige jaré alué Esusi bonila 'lige waíla. <sup>§</sup> 'Lige regá anele alué ralámuli napu mochíle alé a'bé pachá galírale napu ajtíle alué Esusi:

—Mué eyela alé ma'chika ilí 'lige mué bonila alé ma'chika jáchigó 'lige mué waíla alé ma'chika ja chigó, mué 'yaga e'yena.

<sup>33</sup> 'Lige Esúsika nejele:

—Jipe 'la animé ne chieri ka ne eyela, 'lige ne waíla, 'lige ne bonila.

<sup>34</sup> 'Lige e'nénaga alemi noligá mochígame, aníle:

—Jena mochí ne eyela 'lige ne bonila 'lige ne waíla. <sup>35</sup> Suwábaga napu 'la bijchíá Onorúgame oyérame ju, alueka napurigá ne bonila ju, 'lige napurigá ne waíla, 'lige napurigá ne eyela, alarigá etewá ne suwábaga alué ralámuli.

## 4

*Jena ruwimela Esusi ruwligo bilé ra'íchili chukligo bilé rió ri'ligó weroka echame 'lige jaré ralámuli tabilé námaligo*

<sup>1</sup> Uché bilé rawé Esusi o'wíname beniria Onorúgame nila ra'íchili ba'wíchí suweke, alé wa'lú ba'wí manígichi Galilea anilichí. We'ká ralámuli napaíle alé ba'wíchí suweke. Alekeri Esusi tabilé ga ra'íchale, arigá alé bárkochi 'mole 'lige pe abé rokógichi o'tole alué barko alé asagá ra'ichamia, 'lige alué ralámulika pe alé suwé rejpile. <sup>2</sup> 'Lige alé bárkochi asagá rejcholi ruyele ralámuli. <sup>3</sup> 'Lige anele:

—'We a'lá gepusi. Bilé rawé bilé rió weroka echale ri'ligó, <sup>4</sup> 'lige jaré alué talí weroka echerúgime boichimi rujsule, alueka 'ma chulugi go'ale. <sup>5</sup> 'Lige jaré alué talí rujsule alé bilena i'pichí napu tabilé ru'nágame we'é ajtígichi, alueka aba'lá yati ya'wile, <sup>6</sup> nobi péchigo abiéniko wakíbale ko sawala 'lige nawálatiri, pe abiéniko wakíbale tabiléchigo 'la a'wágame nawégame nílgame. <sup>7</sup> 'Lige uché jaré alué talí rujsule napu alué we'ká nawala wejchá bi'tile, 'lige 'yale alué nawá, 'liko tabilé 'la semáriga ya'wile alué talí napu rujsule alé. <sup>8</sup> 'Lige alué uché jaré alué talí rujsusa bilena napu 'we a'lá we'echi nile, alué talika 'we a'lá semáriga

ya'wile. 'Lige alué ralámuli we'ká 'wile alué ri'ligó.

<sup>9</sup> 'Lige Esusi aminami anile:

—'La bijchíá beninálisaká 'emi Onorúgame nila rejcholi, 'liko 'we a'lá semáriga gepuwa napurigá aní ne.

<sup>10</sup> Napu'lige Esusi 'ma suwénasa ra'icha, napu'lige 'ma simasa amulí suwábaga ralámuli, alué makué oká bo'né Esusi 'yuga járome 'lige uché jaré ralámuli rukele alué Esusi:

—Ruwí, ¿chonime ke aní alué tétíli?\*

<sup>11</sup> A'lige Esúsika anele:

—'Emi 'la 'yáleru Onorúgamete lisensia napurigá 'la machimela churigá nuleo Onorúgame 'emi ralámuli, nobi mochí ko jaré ralámuli tabilé oyérame ne'chí, alué ralámuli tabilé 'la nirame, tabilé siné námamala. <sup>12</sup> Alué ralámulika senibí e'negá jame ju nobi tabiléchigo siné eteme júkó alué 'we semátiri napu nejí Onorúgame. Alué ralámulika senibí gepua jame ju nobi tabiléchigo siné námame júkó napu aní Onorúgame nila ra'íchili. Yeka pe ruwime júkuru tabilé Onorúgame oyérame ko alué ralámuli. 'La námame nisaká alué ralámuli e'kali tánimili ju 'lige 'la e'kávili ju alué ralámuli Onorúgamete.†

*Jena ruwimela Esusi 'we a'lá ruwligo alué tétíli alué rió echame*

<sup>13</sup> Esusi abiena 'la ruyele alué ralámuli:

—¿Tabilé 'la nama 'emi ye ra'íchili? A'liko ¿churigá 'la inámamaché 'emi uché bilé ra'íchili rejcholi oká 'nátíli ruwime?

'Lige ruyele choniname ka alaniá:

<sup>14</sup> —Alué rió napu echale, alué rioka napurigá Onorúgame nila ra'íchili beníriame, alarigá júkuru. <sup>15</sup> Napurigá ikí jaré ralámuli jipe, pe a'chigóriga ju napurigá ikile ri'ligó weroka echerúgime napu bowé bo'ígichi rujsule. 'Lige alué ralámuli akisá Onorúgame nila ra'íchili, yati neraga nawame ju Satanasi 'lige se'winátiri 'nátíli 'yame ju napurigá alué rió yati we'kuámala Onorúgame nila ra'íchili. <sup>16</sup> 'Lige napurigá ikí jaré ralámuli jipe, pe a'chigóriga ju napurigá ikile alué ri'ligó weroka echerúgime napu rujsule tabilé ru'nágame we'é chujkúgichi i'pichí. 'La gepume ju Onorúgame ra'icháíla 'lige 'la ganúliga oyérame ju nobi tabiléchigo we'lisi námame júkó alué a'lala rejcholi. <sup>17</sup> Napu'lige e'karú anilá uché jaré ralámulite Onorúgame oyérame kóriká, yati seweka mochíbame ju, a'liko 'ma a'reme ju Onorúgame nila ra'íchili oyeria. <sup>18-19</sup> 'Lige napurigá ikí jaré ralámuli jipe pe a'chigóriga ju napurigá ikile alué ri'ligó weroka echerúgime napu rujsule wejchá nawala bi'tígichi. Alué ralámulika

§ 3:32 Esusi bonila 'lige waíla José 'kúchila nile nobi ralámulika tabilé námale ko.

\* 4:10 E'nesi glosario «parábola».

† 4:12 E'nesi Isaías 6:9-10.

'we a'lá gepume ju Onorúgame nila ra'íchili, nobi senibí rawé 'we resí lagá e'yéname júkó e'karúgame tábiri, 'we nóchame ju pe 'nátaga churígáriga 'la we'ká enomíggame gainátíká, 'lige churigá 'la we'ká e'karúgame nígame ganátíká. Pe alieti 'nátaga, 'ma tabilé 'nátame ju Onorúgame nila ra'íchili, 'lige tabilé siné sébili 'nátame gayéname ju. <sup>20</sup> Nobi uché jaré ralámulika se'winá ikí jipe, 'lige alué ralámulika a'chigóriga ikí napurigá ikile alué ri'ligó weroka echerúgime napu rujsule alué 'we a'lála we'é nerúgichi. Napu'lige ye ralámuli 'we 'la gepusa ye ra'íchili Onorúgame nila ra'íchili, 'we a'lá nirame ju, 'lige 'we a'lá ganíliga epperéggame ju senibí rawé, 'lige tabilé resílagá e'yéname ju we'ká e'karúgame tábiri. Alué ralámulika napurigá ri'ligó 'we a'lá o'chérigame, alarigá ju, 'we ganíliga epperéggame ju. 'Lige we'ká ralámuli 'la oyérame ju alué ra'íchili Onorúgame nila ra'íchili napu beníriame ju alué ralámuli.

*Jena ruwimela Esusi ruwíligo churigá 'la gainárame ko Onorúgame ra'ichálila námalia*

<sup>21</sup> A'lige anélechégó:

—'Lige apiépiri ralámuli bilé chojpé rajesa napurigá 'la ma'chilimala, tabilé o'pólime ju bilé sikolite, nibilé gojchílachi pachárale tabátale rekame ju, alué ralámulika bilena re'pami elame ju 'nalina napurigá 'la ma'chilimala. A'chigóriga júchigó ye ra'íchili Onorúgame nila. <sup>22</sup> Ye ra'íchilika osirúgime ju napurigá alué ralámuli 'la inámomala alué 'nátíli napu tabilé inámome nile.

<sup>23</sup> > 'La akeme níriká 'emi, 'la gepuwa ye ra'íchili —anélechégó.

<sup>24</sup> 'Lige abiena anélechégó:

—'We a'lá gepusi napu animela ne jipe, 'émi 'we a'lá sébali olásaká napu 'la namo 'liko Onorúgame 'la gu'írimala 'emi napurigá 'la inámomala uché rajpé. <sup>25</sup> 'Emi 'we a'lá sébali oyérasaká Onorúgame ra'ichálila 'liko 'la sébali inámomalachigó Onorúgame ra'ichálila. 'Lige ralámuli napu ekí 'we najsínáme ka, Onorúgame tabilé gu'íromala alué ralámuli napurigá námamala cherajpé.

*Jena ruwimela Esusi ruwíligo napu'lige ri'ligó o'chérachi a'chigóriga ko napurigá Onorúgame nulachi*

<sup>26</sup> 'Lige abiena anélechégó Esusi:

—A'chigóriga ju napu'lige Onorúgame nulechi ralámuli alawálachi a'chigóriga ju napurigá bilé rió echisá talí. <sup>27</sup> 'Ma suwénasa echá, senibí alí gojchime ju alué rió echágame 'lige senibí be'á asísime ju. Alué talika ya'wisá abichilubi o'chera jame ju. 'Lige alué rió echágameká tabilé machime ju churigá o'chera jago. <sup>28</sup> Pe alué we'é 'sime ju yaria alué talí echerúgime.

Bajchá sawala ochérame ju, 'lige arigá 'ma muleme ju, arigá 'ma kilimi uláname ju alué ri'ligó. <sup>29</sup> Napu'lige 'ma ulánasa, 'liko alué rió echágame 'ma 'wime ju alué we'ká ri'ligó.

*Jena ruwimela Esusi ruwíligo alué gilibá a'lásini (mostasa) rakala ochérachi a'chigóriga ko napurigá Onorúgame nulachi*

<sup>30</sup> 'Lige anélechégó:

—¿Churigá ju Onorúgame nulechi ralámuli alawálachi? ¿Churigá ra'ichawa napurigá 'la a'chigóyéri nímala napurigá Onorúgame nulechi ralámuli alawálachi, 'lige napurigá 'la inámomala 'emi? <sup>31</sup> Napurigá 'smi Onorúgame ralámuli gu'iria, pe alarigá júchigó napurigá alué a'lásini rakala napu 'we u'tá ju me'tagá ri'ligó rakala. <sup>32</sup> Alué gilibá rakálaka 'we u'tá ju nobi 'wéchigo walú ochérame júkó napu'lige ya'wisá, 'lige chulugá alé jsime ju kábimía.†

<sup>33</sup> Esusi 'we ra'ichale rejcholi pe tétalite tabilé inámutume napu'lige Onorúgame nila ra'íchili beniria ralámuli napurigá 'nata mochímala chonime níligo alué rejcholi 'we nóchili kame inámalia. <sup>34</sup> Pe alué bo'né 'yuga járomeka 'la ruyeme nile chonime níligo alué ra'íchili napu'lige 'oni ejtebisa.

*Jena ruwimela Esusi nuláligo napurigá tabilé aminami ekemela*

<sup>35</sup> Aba'lige alí Esusi anele alué bo'né 'yuga járome:

—Jípeko bajoniwa ye wa'lú ba'wichí 'lebo 'nálige sebawa.

<sup>36</sup> A'lige Esusi 'yuga járome ka jímoale alé bárkochi napu Esusi ajtíle. 'Lige ariosi anisá, simíbale alemi o'wépomi bajonimia. Aminami uché jaré barko e'yénale alemi.

<sup>37</sup> Nasipa walú ba'wichí enágichi alué barko, nolínale alué 'we a'wágame eká, asíriga re'pá ilírole ba'wi, walú maníbale alé u'tá bárkochi, amulí bochile ba'wí alé bárkochi, 'lige amulí bokuile alué barko re'lé ba'wichí. <sup>38</sup> Esúsika gojchigá bo'ile.‡ Alué 'yuga járomeka ajchale alué Esusi. 'Lige e'wele ra'ichiga anele:

—jMué Wa'lula! ¿Tabilé chéla mué rekó ye barko ba'wichí bokuichi?

<sup>39</sup> 'Liko Esusi asísiga ne'óchale alué eká 'lige anele alué ba'wí asíriga re'pá ilírochi:

—j'Ma tase ayowa mué ba'wí! —anele.

'Lige yati 'ma tabilé ekale 'lige alué ba'wí tabilé ená 'sile. <sup>40</sup> Alige Esúsika anele alué makué oká bo'né 'yuga járome:

—¿Chonigá aliena majáché 'emi? ¿'Emi tabilé 'cho 'la bijchigi Onorúgame 'la sébali nejkúrame ko? —anele.

<sup>41</sup> Esusi 'yuga járomeka 'we majale. 'Lige pe a'bopi ra'ichale:

† 4:32 Alé Israeli alué gilibá a'lásini 'we 'ya nerúgame 'we re'pá jágame ochérame nile. § 4:38 Jaré aní Esusi bo'ligo bilé rejté mo'sobeka. Alué rejteka unelime nile napurigá tabilé gayena enámala alué barko.

—¿Chieri júché ye rió? ¡Ba'wí 'lige eká 'la akérinti júkuru!

## 5

*Jena ruwimela Esusi buyánaligo chátiri alawá napu mochile bilé riochi*

<sup>1</sup> Alige sébale aminá suwé, aleka 'ma Gerasa anilichi ejiro nile. <sup>2</sup> Alé bárkochi re'kisa Esusi, bilé rió we'ká chátiri alawá Remónisi u'kuchípala ajchágame nawale. Alué rió bo'né bejtélachika simigá nawale, 'lige alué rioka napu suwígame bi'tí alé bejtégame nile. <sup>3</sup> 'We lo'íriga eyénale alué rió, tabilé 'wesi umébale i'kilí ajchá karénate bulegá. <sup>4</sup> We'sá ajchárigame nile karénate bulegá ronola 'lige sekala, 'lige senibí 'ma rijpúnaga pame nile karena. Tabilé 'wesi tábiri nurale alué rió. <sup>5</sup> Rukomi 'lige rawemi nabí eyénale nile napu bo'né bejtégame nile, panápuri eyénale nile sinaka ejeliga rejete me'choga bo'né. <sup>6</sup> Aleké rawé napu'lige Esusi etele mejkaka iligá, 'maga sébale alué rió 'mi alé napu Esusi ilile, 'lige chojkóbisiga ilíbalé alé a'bé sébaga napu Esusi ilile. <sup>7</sup> 'Lige alué Remónisi alawála ra'íchárilé alué rió. E'wele ra'íchaga anele alué Esusi olagá:

—Mué Esusi, Onorúgame Inolá, ¿tachiri najki mué ne'chí 'yuga? Tase nijkumewa ne'chí 'yuga.

<sup>8</sup> Alarigá anele e'wele ra'íchaga alué rió, regá anéligame alué Esusi alué we'ká remónisi u'kuchípala:

—Yati buyasi aleké riochi.

<sup>9</sup> Alige rukele Esusi alué rió:

—¿Cho anilime ju mué?

'Lige alué rioka anile:

—Neka Lejioni\* anilime ju, ramueka we'ká nírigime —anile.

<sup>10</sup> Alige alué rió 'we tánale Esusi:

—¡Tase mejká juláwaka ramué! —alarigá ra'íchárilé alué we'ká u'kuchípala remónisi alué rió.

<sup>11</sup> Alé a'bemi we'ká uchule gowí gajsalá go'yá. <sup>12</sup> Alige anile alué rió:

—Lisensia 'yawa ramué napurigá ramué mo'iboa alé we'ká gowíchigana.

<sup>13</sup> Alige Esúsika lisensia 'yale napurigá alué chátiri alawá mo'imela alé gowíchigana. Alige alué chátiri alawá alué riochi buyásiga mo'ile alé we'ká gowíchigana. We'ká gowí uchule alé, amulí oká mili. 'Lige 'ma júmasele alé alué gowí. 'Le o'wékana juma mo'ibásale, ba'íchí rujsule, alé suwile si'lika.

<sup>14</sup> 'Lige alué rioka gowí neseme majaga júmasele ruyemia suwábaga ralámuli alé we'ká riógichi 'lige a'tabemi riógichi. We'ká ralámuli simíbale e'nemia alemi chukíliga alué gowí. <sup>15</sup> 'Lige sebasa alué ralámuli alé napu Esusi ajtíle, alemi etele 'ma 'la

o'páchiga, 'ma 'we a'lá kilí ajtígame alué rió napu Lejioni rewégame korlíge. Napu'lige etesa alué rió, 'we majale suwábaga alué ralámuli. <sup>16</sup> Napu ekí mochílige alé napu'lige suwíchi gowí, ruyele uché jaré ralámuli jsichi. <sup>17</sup> 'Lige suwábaga alué ralámuli alemi sígame ayole Esusi 'yuga, 'lige anele:

—¡Mejká simigá! —anéleru Esusi.

<sup>18</sup> Napu'lige Esusi 'mochi ku bárkochi, alué napu Lejioni anilime koríle, alué rioka si simináloríle alué Esusi 'yuga. <sup>19</sup> Esúsika tabilé a'rele napurigá si simela alué rió 'lige anele:

—Ku galírale simibógó, 'lige ruyéwaka mué rijímala 'we a'lá gu'írlirigo mué Onorúgamete 'lige 'we na'temáliku mué.

<sup>20</sup> 'Lige alué rió bochígimi simírale Rekápolichi ejiro ruyesia suwábaga ralámuli 'we a'lá gu'írlirigo Esúsita. 'Lige suwábaga napu ekí akele 'we ra'sálale 'lige tabilé námale napu 'sile Esusi.

*Jena ruwimela Jairo bayéligo Esusi napurigá sa'wámala alué malala*

<sup>21</sup> Napu'lige Esusi bajonisa wa'lú ba'wí ilígichi 'na bilena suwé, uchéchigo siné napáile we'ká ralámuli. <sup>22</sup> Bijí ajtígichi Esusi alé ba'wichí suweke, bilé rió sébale Jairo anilime, u'tá re'obachi nulame «sinagoga» anilime. 'Lige a'bé simile napu Esusi ajtíle e'nega, chojkóbisiga ilíbalé alé o'wemi. <sup>23</sup> 'Lige anele:

—Ne malala 'we nayua bo'í. Amulí mukú. Nabá e'newa yati ne'chí 'yuga nocháwaka mué napurigá sa'wimela napurigá 'la we'ká bamí asimela ajagá.

<sup>24</sup> Esusi simile alué rió 'yuga, 'lige we'ká ralámuli simíbale Esusi 'yuga. Tabilé ga simile Esusi, cha we'ká ralámuli 'yéniligime boichimi. <sup>25</sup> Bilé mukí enale alemi nasípami napu makué oká bamílige elá ma'china, nabí tabilé rejpuríle ma'china elá. <sup>26</sup> We'ká 'yome 'yole napurigá sa'wimela alué mukí, tabilé 'wesi umébale sa'wá, abéchigo rajpé resi ikime nile alué mukí 'yolia. Suwábaga enomí suwábale 'yome najtétiga. <sup>27-28</sup> Alué mukí akele sa'wame ko Esusi, alekeri 'nátale: «Ne Esusi o'páchala pe nochasa sa'wiméréko ne», regá 'nátale alué mukí. 'Lige guwánaka simigá nochale Esusi o'páchala. <sup>29</sup> 'Lige yati machile 'ma sa'wíliga bo'né, abisí tabilé ma'chínale elá. <sup>30</sup> Aba'lige yati sayele Esusi, bo'né Esusi a'walílate bilé ralámuli sa'wáliga. Abajá ilíbalé, 'lige gu'liga rukele ralámuli:

—¿Chieri nochá ne'chí o'páchala?

<sup>31</sup> 'Lige Esusi 'yuga járomeke anele:

—¿Chonigá rukéché mué chieri nocháligo mué o'páchala? Aliena we'ká rajchiga e'yénachi kachi ralámuli jena —anele.

\* 5:9 «Lejioni» aniaká «we'ká» aniname ju.

<sup>32</sup> 'Lige Esúsika abiena echúromi e'nena ilile machínaliga chieri 's'ligo nochá. <sup>33</sup> Alué mukí 'we majaga chojkóbisiga ilíbalé, 'áwalía ilile majaga, 'wéchigo 'la machíligame sa'wíliga bo'né.

—Ne 'siétigó mué nochá— anile alué mukí alé iligá chojkóbisiga.

<sup>34</sup> 'Liko Esusi anele:

—Resía mué mukí, mueka 'we a'lá 'nátales 'la sa'wame ko ne. Alekeri Onorúgame 'la sa'wákuru mué. Jipe 'we ganíliga simíboa mué ku galírale, 'ma tabilé nayume kame mué. Tabilé uchéchigo siné ujchábamala mué ye nawíli.

<sup>35</sup> Napu'lige Esusi bijí ra'icha ilígichi alué mukí 'yuga, jaré rió jsile Jairo galílachika simíbaga, 'lige anéleru Jairo alué ralámulite:

—Ma mukúpá mué malala, 'ma tabilé nejkumewa—anele alé sigá.

<sup>36</sup> 'Lige Esusi, napu'lige alanichi alué ralámuli, anile:

—Jairo, tase che lawa, 'we a'lá niraga etewa ne'chí.

<sup>37</sup> 'Lige Jairo bejtélachi simile Esusi Jairo 'yuga, pe bakía bo'né 'yuga járome 'yuga: Pegro, Akobo, 'lige Juani Akobo boníla.

<sup>38</sup> Esusi sébachi alé galírale, ralámuli nalá mochile, 'lige sinaka nalá 'ma mukugáriká ta tewé. <sup>39</sup> 'Lige Esusi bajkile alé pachami. 'Lige anele ralámuli:

—¿Chonigá aliena nalá mochípeché 'emi? Alué ta tewé pecha mukugá bo'íkó, pe gojchigá bo'í.

<sup>40</sup> Ralámulika pe achile alanichi Esusi. Ralámuli 'la machíle mukugá bo'ígó alué ta tewé. 'Alige Esúsika ma'chí júlale ralámuli, a'lige simile alé napu bo'íle ta tewé, alué ta tewé o'nola 'yuga, eyélatiri, 'lige alué bakía rió napu 'yuga járome nile. <sup>41</sup> 'Lige alué ta tewé sekala cha'pile Esusi 'lige anele:

—Talita kumi—anele arameo ra'íchaga napu ra'íchame nile Esusi. (Alueka pe anigá anile: «Mué tewé, asísiwa.»)

'Lige alanésiga alué tewé, <sup>42</sup> pe abiéniko neraga o'weti asísile alué u'tá tewé makué oká bamígame, 'lige eyénale. 'Lige o'nola 'lige eyélatiri 'ma ra'sálále. 'Lige lalé: «¿Churigá 'la ku ajcháleché ye tewé mukúgame?» <sup>43</sup> 'Lige Esúsika anile:

—Tabilé 'wesi ralámuli ruyewa ye tewé ku ajánilirigo ne.

'Lige anílechigó:

—La 'yasi go'ame ye tewé.

## 6

*Jena ruwimela ralámuli Nasareta ejperégame tabilé niráligo Esusi*

<sup>1</sup> 'Lige simíbale ku 'mi Esusi bejtélachi napu bejtégame nile re'malí, alué 'yuga járome abiena si 'yuga 'yéname. <sup>2</sup> Resíbilichi rawé sebasa, simile u'tá re'obachi «sinagoga»

anilime, Onorúgame ra'ichálila beníríma. We'ká ralámuli kilí mochile gepuga Esusi ra'íchachi. 'Lige ra'íchale rukigá a'bopi:

—¿Koche ma'chí páleché ye 'nátíli? ¿Koche beníleché alueka alakí ra'íchíli? 'We a'lá sa'wame ju nayúkome 'lige 'la ajalí 'yame ju suwígame. <sup>3</sup> ¿Tacha pe alué mesa newame ju, María ranala, Akobo ba'chíla, José ba'chíla, Jurasí ba'chíla, 'lige Simoni ba'chílachigó? ¿Tacha jena riógichi mochí alué rió waila?—anile alué ralámuli.

Tabilé niraga etele. <sup>4</sup> 'Alige anile Esusi:

—Bilé rió napu ruyame ju napu ané Onorúgame 'we a'lá nirálime ju bochígimi riógichi, nobi alé we'ká riógachi napu ochérale tabilé 'la nirálime júkó, nibilé bo'né galílahi, nibilé bo'né rijimálate.

<sup>5</sup> Alekeri Esusi tabilé we'ká sa'wale alé napu bejtégame nile re'malí ka. Esusi pe u'kabi 'la 'yole sekate nochigá mo'ola. <sup>6</sup> 'Lige Esúsika lalé: ¿Chonigá ta bijchígiché ne ra'ichálila?

*Jena ruwimela Esusi júlaligo alué makué oká bo'né 'yuga e'yénale napurigá Onorúgame nila ra'íchíli beníramala*

'Lige Esusi we'kaná riógichi eyénale Onorúgame ra'ichálila beníríga. <sup>7</sup> 'Lige bilena sebasa, bayele alué makué oká 'yuga járome 'lige yati napaile, 'lige a'walí 'yale napurigá 'la gainámala buyana alué chátiri alawá napu mochígime nile alué we'ká ralámulichi. Júlale oká riocho. <sup>8</sup> Esusi anele:

—Arigá simáwaká, tabilé tábiri o'ká, tabilé go'ame o'ká, tabilé gemátiri, tabilé enomítiri, pe bilé gujsí resola o'ká simáwaká. <sup>9</sup> Tabilé o'ká simáwaká o'pacha, pe alué o'pacha napu o'páchaga e'yena 'emi, pe aluecho o'páchaga simáwaká.

<sup>10</sup> 'Lige abiena anélechigó:

—Napu'lige sebasa alé bilena we'ká riógichi, 'lige bayérisiga alé bilena riógichi, alé mochíwaká we'lisi. Uché jaré repárasa aminá uché jarena galírale, tase simáwaká. <sup>11</sup> Sebasa bilena we'ká riógichi, 'lige tabilé 'wesi repárasa napurigá simámala 'emi alé bilena galírale o' tabilé gepúníliisa napu ra'ícha 'emi, a'liko sawéwaká we'é ronochí chujkúgame napurigá 'la machimíla alué 'ma tabilé gu'irimio Onorúgame alué ralámuli, a'lige aminá simáwaká uché bilena we'ká riógichi.

<sup>12</sup> 'Aliko simíbale alué Esusi 'yuga járome 'la ruyemia ralámuli napurigá 'la a'rémala alué resítiri 'nátíli. <sup>13</sup> 'Ma buyánale alué chátiri alawá alué ralámulichi mochígime. 'Lige jaré nayúkome aseite ujchéliru mo'ólachi 'lige alarigá sa'wale.

*Jena ruwimela Eróre mayéligo pe Juani ko alué Esusi*

<sup>14</sup> Alué wa'lula Eróre akele 'we semá 'sime ko Esusi 'wéchigo ruigá e'yénaligime

suwábaga ralámuli 'we a'lá umébane ko Esusi nayúkome sa'wá. 'Lige anile:

—Alué rió Juani ju napu rewarame ke, alekeri 'we a'lá nígame ju a'walí 'lige 'la umébane ju sa'wá nayúkome.

<sup>15</sup> 'Lige jaréchigo anile:

—Pe Eliasi ju, alué napu 'ya ajtígame nile napu ruyame nile napu anele Onorúgame.

'Lige jaréchigo anile:

—Pe uché bilé rió ju napu ruwime ju napu ruwí Onorúgame, a'chigóyéri napurigá 'ya mochíggame nílige.

<sup>16</sup> 'Lige Eróreka napu'lige akisá alanichi alué we'ká ralámuli, anile:

—Pe Juani ju alué rió, alué napu rewarame ke, napu ne nulagé mo'ola ri-jpunániliga. 'Ma ku ajánale —anile.

<sup>17</sup> Aluéchigo bo'né Eróre nuláligime cha'píniliga alué Juani abé 'yabé 'lige 'ma galírale bajchálige karénate bulugá pe alué Eróre upila chojkila gite, napu Eróríasi anilime nile, napu Belipe upila nile bajchá. Alué Belípeka alué Eróre ba'chíla nile, se'nú eyéggame nile Belípeka. <sup>18</sup> Alué Juánika pe anélige alué Eróre napu'lige 'ma bujesa alué ba'chíla upila:

—¿Chonigá bujéché mueka alué mué ba'chíla upila? Moisesi nulalila tabilé elá napurigá alarigá nokiboa.

<sup>19</sup> 'Lige alésíko alué Eróre upila (napu Eróríasi anilime nile) 'we me'lináliga ilírome nile alué Juani eligá alué Eróre tabilé elile napurigá me'limela alué Juani <sup>20</sup> napugiti alué Eróre 'wéchigo majáligime alué Juani me'agá, Juánika 'wéchigo 'la rió nílgame 'we a'lá Onorúgame oyérame. Eróre 'we ganílgame nile Juani si ra'íchaga nobi tabilé siné námame nile alué Juani ra'ichánila. <sup>21</sup> A'lige bamime nile Eróre. Piesta newale, bayele e'wélala nulame, alué sontalo e'wélalachigó 'lige chéchigo jaré we'ká enomí nígame alé Galílea mochíggame, abiena bayélechigó. 'Ma napaísa alé mochile go'yá. <sup>22</sup> Alemi bajkile bilé mukí iwé alué mukí Eróríasi ranala, napu rió mochile alemi yawile alué mukí iwé. 'We ganíle alué we'ká rió alué iwé yawichi. Alué Eróre anele alué iwé:

—Táwaká suwábaga tábiri napu najkí mué, ne 'la nejímala. <sup>23</sup> Neka 'la bijchiga aní. We'é najkistúká nasípasi we'é nejímala ne napu nulame ju ne —anele.

'Lige alué iweka tabilé nejega, yati simile eyela rukemia. 'Lige regá rukele:

—¿Tachiri tániwa alué wa'lula Eróre?

<sup>24</sup> A'lige eyélaka nejele:

—Juani mo'ola tániwagó.

<sup>25</sup> Alué iwé 'we yati ku nawale alé napu asale alué wa'lula Eróre, 'lige anele:

—Neka najkí napurigá jeka a'pawa be-jtólíchi ajchagá alué Juani mo'ola, alué napu rewarame ju ralámuli.

<sup>26</sup> 'Lige Eróreka 'we seweka asíbale napu'lige alanísá alué iwé. Tabilé pe arigá rejpnále 'máchigo akéligime suwábaga ralámuli napu mochile alé go'yá piesta nerúgíchi, 'la 'máchigo 'la sébili olámoríligame napu anélige bo'né, 'lige 'la sébili olale.

<sup>27</sup> Eróre pe yati bilé sontalo júlale Juani mo'ola rejpunániliga. <sup>28</sup> 'Lige alué sontálaka bajkile alé pachá galírale napu ajtile alué Juani galírale bajcháriga, 'lige Juani mo'ola rejpnále, 'lige a'pale Juani mo'ola bilena bejtólíchi ajchagá, 'lige alué mukí iwé 'yáleru alué Juani mo'ola, 'lige alué iweka eyela 'yale.

<sup>29</sup> Napu'lige machísá Juani 'yuga járome Juani 'ma me'lírigo, simíbale nolamia 'lige gatele bilena resoquí newárigime napu gatélime nile suwíggame. Alarigá me'líriu Juani.

*Jena ruwimela Esusi kógiligo go'ame maligi mili ralámuli aminá uchéchigo rajpé*

<sup>30</sup> 'Lige alué makué oká Esusi 'yuga járome ku napaíle echúromi we'kaná riógíchi e'yénasa Onorúgame nila rejcholi beníriga, ruwile suwábaga napu nokáligo alué a'boi 'lige napu 'yóligo, 'lige napu ekí benírigo Onorúgame nila rejcholi. <sup>31</sup> We'ká jsíle ralámuli. Jaré simíbachi uchéchigo jaré jsíle, alekeri tabilé chérigá go'sá nílile Esusi 'lige bo'né 'yuga járomechigó. A'lige Esusi anele alué bo'né 'yuga járome:

—Nabá 'mi napu tabilé rió napurigá 'la ganíliga resibupua.

<sup>32</sup> Bilena bárkochi jímale 'lige alé mochiga simíbale resíbmia 'mi alé napu tabilé rirole. <sup>33</sup> Nobi we'káchigo ralámuli etélekó simíbachi, 'lige machile kochiena simiba 'yénaligo. Bochígimi epperéggame ralámuli júmala ba'wichí suweke, bajchabé sébale alué ralámuli alé napu alué barko sebamíli nílige. <sup>34</sup> Napu'lige re'kínachi alué Esusi alé bárkochi 'ma we'ká rioga ilile, 'lige Esusi alué ralámuli etesa, na'temale, machíligame pe 'oni mochigo napurigá bo'á tabilé bo'éligime, alekeri benírile Onorúgame nila ra'íchili 'lige we'ká rejcholi. <sup>35</sup> 'Lige abé alí bo'né 'yuga járome anile:

—'Ma alí ju, kulipi chonámala, jena tabilé i'té go'ame. <sup>36</sup> Julawa ralámuli 'mimi riógíchi napurigá go'ame ralimela napurigá go'mémpá.

<sup>37</sup> 'Lige Esúsika anele:

—Emi 'yáwaguru go'ame.

'Lige Esusi 'yuga járomeka nejele:

—Asíriga we'ká enomí najkibóleké napurigá 'la umubawa alakí ralámuli go'yame go'ame ralá, napu ekí meme ju bilé rió osá naó mechá nóchaga —nejele.

<sup>38</sup> 'Lige Esúsika anele:

—Rukéwagó ralámuli chekí baní nu'tugégame ka.

'Lige alué makué oká Esusi 'yuga járomeka simíbale rukemia, 'lige ku sébaga anele:

—Pe maligí baní o'kame ju ralámuli 'lige oká ro'chí 'yúriga.

<sup>39-40</sup> 'Lige Esusi nulele ralámuli napurigá mochímala 'mimi gajsalachi amoba, napurigá 'megami namó mochímala nasipa sientto neraga, 'lige bilé sientto neraga. <sup>41</sup> 'Liko Esusi 'wile alué maligí baní 'lige alué oká ro'chí 'yúriga, 'lige o'weti rewagachi e'negá iligá 'lige cheliera 'yale Onorúgame.\* 'A'lige tabé chí 'wánaga alué baní, 'yale alué bo'né makué oká 'yuga járome napurigá alué ralámuli kógimala. Abiena a'chigó olale alué ro'chíchigó, chí'wánale alué oká ro'chí 'lige ralámuli kógile. <sup>42</sup> Suwábaga ralámuli bosaga go'ale alué baní ro'chí 'yúriga. <sup>43</sup> 'Lige makué oká atabé bochile alué u'kuchí baní mojágame rasírigame ro'chítiri 'yúriga. <sup>44</sup> Maligí mülí rió nile napu alué baní go'ale 'lige ro'chítiri. Abiena go'ale we'ká umugí 'lige we'ká u'kuchítiri.

*Jena ruwimela Esusi ba'wichí amoba enáligo*

<sup>45</sup> 'Alige pe yati nulale Esusi napurigá alué bo'né 'yuga járome jímamala alé bárkochi 'lige júla napurigá bajonímala alé wa'lú ba'wí ilígichi napurigá simámala alé Betsáira anilichi. 'Lige Esúsika abajá rejpile ralámuli kumi galírale julia. <sup>46</sup> Esusi pe i'libeko simile re'pá bilena rabomi 'lige Onorúgame 'yuga ra'íchale. <sup>47</sup> Napu'lige 'ma chonaso 'lige alué barks nasipa wa'lú ba'wichí enale, 'lige Esúsika bijí alé re'pá rabó ilile. <sup>48</sup> 'Lige amulí che'lachi 'lige Esusi etele 'we nóchali olao alué barks o'toa alué bo'né 'yuga járome 'we a'wágame ekáligime, 'lige Esúsika simile ba'wichí amoba simigá tabilé a'kega bajonimia na'lebo tabilé asigá barks 'lige sébale napu alué bo'né 'yuga járome mochíle bárkochi. <sup>49-50</sup> 'Lige alué bo'né 'yuga járomeka majale alué Esusi etesa alé ba'wichí amoba enágichi. Mayele bilé mukúgame alawala ko 'lige bochí anile majaga. 'Lige Esúsika yati anele:

—¡Ne Esusi ju, tase majawa!

<sup>51</sup> 'Lige 'mole alé bárkochi Esusi, 'lige 'ma asíbale eká. 'Lige alué 'yuga járomeka 'nátale: «¿Churigá 'la yati asíbale eká? ¿Churigá 'la eyena ba'wichí amoba?» <sup>52</sup> 'Lige aminami 'nátale: «¿Churigá 'la bosárite alakí ralámuli pe maligí banite 'lige oká ro'chite?» Alarigá 'nátale tabilé 'cho machilígame chieri ko Esusi.

*Jena ruwimela Esusi nayúkame 'yóligo*

<sup>53</sup> Napu'lige sebasa wa'lú ba'wichí suwé alé napu Genesareta anilichi nile, alé

a'rele chega alué barks.† <sup>54</sup> Napu'lige pe kulí re'kichi Esusi, suwábaga ralámuli alé ejperégame machíle Esusi ko alué bárkochi re'kime. <sup>55-56</sup> 'Lige ralámuli simíbale nayúkame nolamia echúrimi riógichi 'lige a'pale alemi napu Esusi eyénale, napápurí napu eyénale Esusi alemi a'pile nayúkame 'lige tánale Esusi napurigá nayúkame Esusi o'páchala nochámala. Suwábaga nayúkame napu ekí nochale Esusi o'páchala sa'wile nayua.

## 7

*Jena ruwimela Esusi ne'óchaligo alué ralámuli bariseo 'lige alué ralámuli Moisesi nila nulalí beníriame*

<sup>1</sup> Bilé rawé jaré bariseo 'lige jaré Moisesi nila nulalí beníriame a'bemi jábale napu Esusi asale, 'lige alué ralámuli Rusalénika jsilige. <sup>2</sup> Napu'lige etesa tabilé panígisa go'yó go'ame alué Esusi 'yuga járome napurigá nokame nile alué a'boi, a'liko ruyeale ayoga tabilé 'la ko alarigá nokiá. <sup>3</sup> (Bariséoka 'lige alué ralámuli Moisesi nila nulalí beníriame pe ralámuli jurío nile 'lige alué ralámuli panígime nile sekala napu'lige go'mea a'chigóriga napurigá nokame nile alué 'ya mochígame. Tase regá 'nátaga nokame nile: «Panígime nébá cha chóligame sekégame kame ne», pe eligá regá 'nátaga nokame nile: «Panígime neba go'mea, alarigá Onorúgame abichilubi 'la na'temámala ne'chí.» <sup>4</sup> Napu'lige go'ame ralímea simasa ku sébaga yati panígime nile tabilé 'cho go'yá go'ame. 'We a'lá panígisiká 'la Onorúgame 'kúchila kolale a'boi 'la sébili olame kóriká. Aminami 'we a'lá pagome nilechigó bejtoli 'lige sikoli regá 'nátaga: «'We a'lá pagómala ne bejtoli 'lige sikoli, alarigá Onorúgame abichilubi na'temámala ne'chí», 'lige we'ká e'karúriga nokale napurigá nokame nile a'boi.) <sup>5</sup> 'Alige bariseo 'lige alué Moisesi nila nulalí beníriame si rukele Esusi: —¿Chonigá mué 'yuga járome ka tabilé panígisa go'áché, napurigá nokale alué 'ya mochígame ralámuli? —anele.

<sup>6</sup> 'Lige Esúsika anele:

—'Émika 'we a'lá 'nátame kolale ke, peka alarigá nulame kachi Onorúgame. 'We a'lá bijchiá anile napu'lige rejcholi nejía 'ya alué Isafási alué napu ruwime nile napu anéligo Onorúgame, alué regá osale:

Ra'icha 'emi napurigá 'la nirame Onorúgame, nobi tabiléchigo Onorúgame 'yuga 'nátame kéréko 'emi.

<sup>7</sup> Rekó 'la piesta newae pecha 'la júkó pecha 'la Onorúgame 'yuga 'nátame ka 'emi,

\* **6:41** Alué israelita ralámuli 'ya mochígame alarigá nokame nile napu'lige go'mea, Onorúgame 'yuga ra'íchame nile, cheliera anegá Onorúgame 'la nejgorikabá go'ame. † **6:53** Tabilé sébale alé Betsáira anilichi, uchéchigo bilena sébale.

'émika pe a'boi nulalila beníriame ju,  
'lige 'la Onorúgame nulalila korime ju 'emi  
alué nóchili newagá.

Ye rejcholi nejile alué Isaíasi. <sup>8</sup> Alarigá  
ju 'emi bariseo 'lige 'emi Moisesi nulalila  
beníriame. 'Emi 'ma tabilé e'wame ju napu  
nulá Onorúgame, pe napurigá nokame ju  
'emi a'boi, pe alueka 'la oyérame ju 'emi.

<sup>9</sup> Abiena anele Esusi:

—Gu'línaga ra'icha 'emi, 'ma a'rele 'emi  
Onorúgame nila ra'íchili, 'ma tabilé nírame  
ju 'emi Onorúgame nila ra'íchali, pe a'boi  
ra'íchálila 'la nirá 'emi. <sup>10</sup> Alué Moisesi osale  
Onorúgame ra'íchálila 'ya, regá anime:  
<sup>11</sup> «'La niraga etéwaká mué bo'né o'nola  
'lige eyélatiri. Bilé towí o'nola 'lige eyela  
saíla neraga ra'íchame, alué towika o'toboli  
ju me'liboa.» Alarigá anime osale Moisesi.  
<sup>12</sup> Nobi 'emi ralámuiika beníriame júkó  
'we a'lá kóriká tabilé gu'írilia bo'né o'nola,  
eyélatiri, 'emi 'we a'lá beníriame ju ralámuli  
napurigá animela: «Tabilé ni ne enomí,  
suwábaga napu ni ne alueka 'korban' ju.»  
(Korban aniáká: «Onorúgame kógilime» ani-  
ame ju.) 'Lige anime júchigó 'emi suwábaga  
napu ekí alanime ka 'ma tabilé gu'írímili ju  
bo'né o'nola 'lige eyélatiri. <sup>13</sup> Alarigá nokogá  
'ma Onorúgame saíla neraga ra'icha 'emi,  
'lige abiena uché jaré we'ká ra'íchali ben-  
ime ju 'emi, alué ra'íchali Onorúgame tabilé  
galeme ju —anele Esusi alué bariseo 'lige  
alué Moisesi nila nulalí beníriame.

<sup>14</sup> A'lige Esusi ralámuli bayele, 'lige anele:

—'We a'lá gepusi ye ra'íchili. Ta'lá námota  
'emi. <sup>15</sup> Bilé rió chólígame sekégame ka,  
alueka tabilé resítiri alawégame kérélamala.  
Bilé rió pe charigá 'nátaga 'lige chárigá  
ra'íchaga resítiri alawégame ju. <sup>16</sup> 'We a'lá  
benínálisiká 'we a'lá gepuwa napu aní ne  
—anile Esusi.

<sup>17</sup> Pe'tá i'libeko Esusi ralámuli a'rele,  
'lige galírale bajkile. 'Lige alué bo'né  
'yuga járomeka 'we rukele napurigá  
Esusi ruwimela chonime ke aníliga Esusi  
napu'lige alaniá. <sup>18</sup> 'Lige Esúsika anele:

—¿'Émichigó tabilé namo napu aní ne?  
¿Tabilé machí 'emi tabilé go'ame ko napu  
ralámuli resítiri alawégame newá? Go'ame  
ka tabilé resítiri ju. <sup>19</sup> Go'ame ka pecha  
sulachí asíbame júkó. Go'ámeke pe rojpachí  
asíbame ju 'lige ma'chíname ju. (Alarigá anile  
Esusi, Onorúgame tabilé resítiri neraga eteo  
ralámuli rekó pe apiépiri go'ame go'yachi  
ralámuli.)

<sup>20</sup> Esúsika abichilubi ra'íchale 'lige anile:

—Ralámulika resítiri gayéname ju we'ká  
e'karúgame 'nátaga 'lige chátiri nóchali  
nóchaga. <sup>21</sup> Suwábaga resítiri 'nátili sulachí  
ochérame ju. <sup>22</sup> Bilé rió chátiri 'nátame pe  
apiépiri umugí 'yuga gojchigá einámala,  
apiépiri ralámuli me'ligá einámala, pe

chigoga einámala, we'ká e'karúgame tábiri  
koruka einámala, 'lige 'yéigá einámala,  
'we riólíga einámala, 'we gichíga einámala  
uché jaré ralámuli, 'we se'wináriga ra'íchaga  
einámala peka 'la bijchíá kachi (chisme),  
ruigá einámala napu nokame ju uché jaré  
ralámuli peka nóchali nígame ke napurigá  
ruigá einámala, 'we gawéliga einámala uché  
jaré ralámuli, tabilé 'la niraga eteme nímalá  
uché jaré ralámuli, 'lige e'karúriga 'símala,  
suwábaga alué resítiri 'nátalíka sulachí  
o'chérame ju. <sup>23</sup> Suwábaga yeri 'nátili  
pe ralámulichika buyame ju, 'lige alarigá  
na'tasa 'ma cha ikime kéré alawala.

*Jena ruwimela ma'chí pdligo Esusi bilé  
chátiri alawá bilé u'tá mukichi ajtígame tabilé  
israelita mukí*

<sup>24</sup> Alé yéniga, Esusi simile alé Tiro  
anilichi we'ká riógichi. Napu'lige sebasa  
bilena galírale bajkile napurigá tabilé 'wesi  
ralámuli machimela alé ajtígó. Abirigá  
machile ralámuli. <sup>25</sup> Pe abieníko machile  
bilé mukí 'we a'lá ma'chí pame ko Esusi  
apiépiri chátiri alawá. Alué mukika bilé  
iwé chátiri alawá ajchágame eyela nile, 'lige  
alué iwé eyela galírale a'resa alué iwé, simile  
alé napu ajtíle Esusi 'lige chojkóbisiga ilíbale  
alemi o'wemi neraga napu Esusi ilíle, 'lige  
'we e'wérile anele napurigá ma'chí pámalá  
alué chátiri alawá napu ajchágame nile alué  
iwé. <sup>26</sup> Alué mukí iwé eyélaka tabilé ralámuli  
israelita nile, se'nú ra'íchame nile, pe grígo  
ra'íchame nile. <sup>27</sup> 'Lige Esúsika anele:

—'La a'rewa napurigá bajchá go'mela  
go'ame 'kuchi, tabilé 'la ju 'ma bujilía alué  
go'ame 'lige pe o'kochí i'lía alué go'ame.  
(Yeka pe aniame nile tabilé 'la ko bajchá  
ralámuli tabilé israelita gu'írilia.)

<sup>28</sup> 'Lige alué mukika nejele:

—Alarigá ju napurigá aní mué, nobi abi-  
ena o'kochí mésachi pachárale mochime,  
napu'lige bilé u'tátiri go'yachi abiena pe'tá  
nachume ju rujsúkame alué o'kochí.

<sup>29</sup> 'Lige Esúsika anele:

—Mueka 'we a'lá ma'chígame aní. Simigá  
ku galírale. Ya'má ma'china alué chátiri  
alawala mué ranálachi.

<sup>30</sup> 'Lige alué mukika yati simile galírale,  
'lige rewale ranala kilí bo'ígime tabachi go-  
jchíachi 'ma tabilé chátiri alawégame. Alué  
chátiri alawá 'ma ma'chínilige.

*Jena ruwimela Esusi sa'wálígo bilé rió na-  
jkacholo 'lige tabilé 'me 'la gayéname ra'icha*

<sup>31</sup> A'kinana rawé Esusi simile we'ká  
riógichi Sironi anilichi. Abiena simile  
ejiro Rekápoli anilichi. A'lige ku sébale  
alé wa'lú ba'wí ilígichi Galílea anilichi. <sup>32</sup> 'Lige  
alemi bilé rió o'tóleru najkícholo,  
tabilé 'me 'la gayéname ra'icha. 'Lige alué  
ralámuli 'we anele napurigá nochámala  
sekate napurigá sa'wímela. <sup>33</sup> Esúsika o'tole

a'miná chajkénami, 'lige makúsate nochale najkachí. A'lige Esusi a'kasole makúsala, 'lige nochale inalá nayume.<sup>34</sup> A'lige e'nénale rewagachi, sewékame iwile. 'Lige anile Esusi arameo ra'íchaga:

—¡Epata! («!puga ilibawa», anime ke anile.)

<sup>35</sup> A'lige yati 'we 'la akeme gayénale alué rió, 'lige 'ma 'la gayénale ra'icha, 'lige o'wínale ra'icha 'we a'lá ma'chígame. 'Lige Esúsika anele ralámuli:

—Tase rupóaká 'emi ralámuli sa'wáligo ne ye najkacholo 'lige tabilé gayénale ra'icha.

<sup>36</sup> 'Lige alué ralámulika tabilé e'wale. Abiénachigo ruwíliko ralámuli rekó we'sá anelíe. <sup>37</sup> Suwábaga alué ralámuli napu akele, anile:

—¿Churigá 'la umébame júché sa'wá alué tabilé 'la ra'íchame 'lige tabilé akeme? 'We a'lá 'yole. Najkacholo 'ma 'la akeme newale. Tabilé ra'íchame 'ma 'la ra'íchame newale.

## 8

*Jena ruwimela Esusi kógiligo go'ame we'ká ralámuli*

<sup>1</sup> A'kinana napu 'lige alué Esusi bijí alemi eyénachi, uchéchigo siné we'ká napale ralámuli alé napu Esusi ajtile. 'Lige bakiá rawé kachi 'ma suwale nu'tugala. A'lige bayele Esusi alué bo'né Esusi 'yuga járome, 'lige regá anele:

<sup>2</sup> —Na'temá ne ralámuli. Bakiá rawé mochígame jena ne'chí 'yuga. 'Ma suwale nu'tugala. <sup>3</sup> Ku galírale julámala ne, boichimi rekupámala jeloka, jaré 'we e'megá ejperégame nisa —anile Esusi.

<sup>4</sup> —Jena tabilé 'wesi bejté. Tabilé asé reiboa go'ame —anele alué Esusi 'yuga járome.

<sup>5</sup> 'Lige rukele Esusi:

—¿Chekí baní o'kame niru 'emi?

—Gichao —anile alué 'yuga járome.

<sup>6</sup> A'lige Esusi nulele napurigá wijchí mochímala ralámuli. 'Lige 'wile baní, cheliera 'yale Onorúgame, a'tabé chí'wánale, 'lige 'yuga járome 'yale. 'Lige alué Esusi 'yuga járome ralámuli 'yale. <sup>7</sup> Abiena bi'tile pe u'kabi u'kuchí ro'chí. 'Lige Esusi cheliera 'yale Onorúgame, 'lige alué 'yuga járome 'yale alué ro'chí napurigá 'yámala ralámuli. <sup>8-9</sup> Naó mili rasíggame ralámuli nile. Suwábaga ralámuli go'ale, suwábaga o'pasale. 'Lige alué 'yuga járome gichao morali bochíle go'ame rasírigame. 'Lige Esusi júlale alué we'ká ralámuli ku ejperélachi, <sup>10</sup> 'lige Esusi 'mole bárkochi 'yuga járome si, 'lige simíbale alé Ralmanuta anilichi.

*Jena ruwimela Bariseo machinalio Esusi ta'lá bijchiá Onorúgamete julárigame ko*

<sup>11</sup> Napu a'lige Esusi sebasa alé, jaré bariseo simíbale Esusi e'nemia. Alé o'wínale ra'icha alué Esusi 'yuga regá anigá:

—Aka sa'wawa bilé nayume o 'yawa a'walí bilé mukúgame. Machináli ru ramué pala 'la bijchiá Onorúgamete julárigame ka mué.

<sup>12</sup> 'Liko Esusi sewékame iwile. Tabilé galele 'lige regá anele:

—¿Chonigá machinali 'emi pala 'la Onorúgame júlaligo ne'chí? 'Emi etériga tabilé che'simia ne napu 'emi tani ne'chí —anele.

<sup>13</sup> 'Lige bárkochi 'mole 'yuga járome si. Simíbale na'lebo 'nálige. (Pe a'bé nile napu alué ralámuli simíbale.)

*Jena ruwimela Esusi ruwligo bariseo 'we resiti' nátame ko, 'lige abiena Erote*

<sup>14</sup> Esusi 'yuga járome ta néléle baní. Alé bárkochi bi'lepi baní o'ká mochíle. <sup>15</sup> 'Lige Esusi anele alué 'yuga járome:

—'La 'nátaga. Alué bariseo, Erote si, napurigá kawali baní ro'líme alarigá ju —anele.

<sup>16</sup> —Esúsika alaní tabiléchigo a'páligame ramué baní —anile alué Esusi 'yuga járome ka a'bopi.

<sup>17-18</sup> Esusi 'la machíle tabilé inámiligó. 'Lige anele:

—¿Chonigá alaniáché 'emi: «Tabilé a'paru baní»? ¿Tabilé inámolia 'emi? Rekó 'la buségame ke 'emi tabilé ma'chíli 'emi. Rekó 'la najkéggame ke 'emi, tabilé aké 'emi. ¿Tabilé nélá 'emi, <sup>19</sup> napu a'lige ne chí'wana maligi baní a'tabé, maligi mili miná rasíggame ralámuli kógimia? ¿Tabilé nélá 'emi alakí rasirigo baní a'tabé chí'wággame?

—Makué oká atabé rasiro —regá nejele alué Esusi 'yuga járome ka.

<sup>20</sup> —Aminami abé 'yabé napu a'lige chí'wana ne gichao baní a'tabé, naó mili rasíggame ralámuli kógimia, ¿chekí rasiríko a'lige a'tabé chí'wággame baní? —rukele Esusi.

'Lige alué Esusi 'yuga járome ka anile:

—Gichao morali rasiro a'liko.

<sup>21</sup> A'lige anile:

¿Chonigá tabilé 'cho námuliché 'lige? —anele Esusi.

*Jena ruwimela Esusi sa'wáligo bilé rió tabilé ma'chílime*

<sup>22</sup> Napu 'lige sebasa Betsáira anilichí, jaré rió a'pale bilé rió tabilé ma'chílime alé Esusi ajtígichi. 'Lige 'we anele Esusi napurigá sa'wámala nochagá. <sup>23</sup> 'Liko Esusi cha'pile sekala, o'tole a'miná suwemi tabilé riógichi. Alé a'kachípale busila. A'lige nochale busila, 'lige rukele:

<sup>24</sup> —¿Jipe 'la ma'chí? ¿'La etiá mué tábiri?

—Etiá ne ralámuli e'yénale, 'la rojá kárépaché —nejele alué rió.

<sup>25</sup> 'Lige Esusi uchéchigo siné nochale busila, 'lige alué rioka abé 'la ma'chílime.

<sup>26</sup> 'Lige Esusi anele:



—Jipe simigá ku galírale, tase simibóaká alé we'ká riógichi.

*Jena ruwimela Pegro ruwiligo Esusi ko Onorúgamete julárigame*

<sup>27</sup> Esusi, 'lige alué makué oká rió bo'né 'yuga járome, simíbale Sesarea Belipo anilíchi ejiro a'tabemi riógichi. Boichimi enagá rukele Esusi bo'né 'yuga járome:

—¿Chieri korí ralámuli ne'chí?

<sup>28</sup> 'Lige alué 'yuga járomeke nejele:

—Jaré aní mué ko Juani ralámuli rewarame, ku ajánaligo mayé. 'Lige jaré aní mué kará Elíasi, napu ruwime nile napu anélige Onorúgame 'we 'ya. 'Lige jaré aní mué kará uchéchigo bilé 'we 'ya ajúgame napu ruwime nílige napu anélige Onorúgame —anele alué Esusi 'yuga járome.

<sup>29</sup> —¿Émika, choniágó? —rukele Esusi.

'Lige alésíko Pegro nejele:

—Mueka ju Wa'lula Kristo.\*

<sup>30</sup> 'Lige Esúsika anele:

—Tabilé 'wesi ruyéwaká.

*Jena ruwimela Esusi ruwiligo 'ma me'libóliko alué bo'né*

<sup>31</sup> A'lige Esusi ruyele bo'né 'yuga járome, alué Onorúgamete julárigame napurigá rió neraga 'we ejelímio 'lige 'we gawélimio alué e'wélala jurío 'lige alué e'wélala balé 'lige alué Moisesi nila rejcholi beníriame 'lige 'ma me'libóliko 'lige bakiá rawé kachi ku ajánimio. <sup>32</sup> Suwábaga 'we alá ma'chígame ruyele. A'lige Pégroka Esusi o'tole a'mibemi 'lige ne'óchale:

—Tase alarigá ra'ichawa.

<sup>33</sup> Esusi gu'lile e'nemia uché jarela bo'né 'yuga járome. A'lige Esusi ne'óchale Pegro. Anele:

—Se'wí alé. Mueka ra'icha napurigá Remónisi. Mueka tabilé 'nata napurigá Onorúgame najkí. Mueka 'nata napurigá pe ralámuli.

<sup>34</sup> A'lige Esusi bayele ralámuli, 'lige bo'né 'yuga járome. 'Lige anele:

—Bilé rió ne'chí oyérame nisa, tabilé na'támili ju alué rió napurigá najkí alué bo'né. Na'támili júkuru napurigá najkíba ne bo'né. Anáchaga asimeli júkuru rekó resí oliaé 'lige tabilé a'rigá ne'chí oyeria.

<sup>35</sup> Bilé rió tabilé mukunálime resí nílige ne'chí oyérame kóriká abiena mukumeli ju, tabilé simela re'pá rewagachi. Bilé rió me'lisuga ne'chí oyérame kóriká Onorúgame nila ra'ichili beníriga eyénaga, yati re'pá rewagachi simela alué rió bejtélimia Onorúgame 'yuga. <sup>36</sup> Pecha 'la júkó rekó bilé rió we'ká e'karúgame níggame ke, tabilé 'la Onorúgame oyérame nísaká, 'ma chátiri gainámala bo'né alawala. <sup>37</sup> Alésíko

'ma tabilé gainámala rewagachi moyena. Abéchigo najtékame ju bi'wíggame alawega enalia. <sup>38</sup> Bilé rió chijunasa ne'chí oyériga 'lige ne ra'ichálila beníriga a'lige ne napu ju Onorúgamete julárigame napurigá bilé rió neraga, 'we chijunámala néchigo alué rió 'yuga napu'lige ne uché nawá rewagáchika wa'lú a'walí niga Onorúgame nila, santo ánjeli 'yuga.

## 9

<sup>1</sup> 'Lige aminami regá anele:

—Neka 'we alá ma'chígame ruwí jaré 'emi napu mochí jena tabilé suwimeo 'ma 'la etesa bajchá aliena 'la semáriga nulao Onorúgame jena wijchimoba.

*Jena ruwimela Esusi ruwiligo pe'wera se'winátiri gayénaligo*

<sup>2</sup> Ujsani rawé kachi a'kinana, Esusi simile re'pá rabó Pegro si, 'lige Jakobo si, 'lige Juani si. Napu a'lige moinasa, Esusi se'winati gayénale pe'wera. <sup>3</sup> O'páchala rosákame gayénale, 'we chárigá rosákame ta'wesi anaga. <sup>4</sup> Yati jsile alé oká rió 'we 'ya ejperégame Elíasi 'lige Moisesi. Ra'ichale Esusi 'yuga. 'Lige alué bakiá rió Esusi 'yuga járomeke etele. <sup>5</sup> 'Lige Pégroka anele Esusi:

—Mué Wa'lula, 'we alá ju ramué jena jágichi. Jipe bakiá kuchí galí newawa, bilé mué galila, 'lige bilé Moisesi galila, 'lige bilé Elíasi galila.

<sup>6</sup> Pe alarigá ra'ichale, tabilé machile chonimea. 'We majale alué bakiá rió Esusi 'yuga járome. <sup>7</sup> A'lige yati nótale alé rabó napu'lige alé mochígichi. 'Lige ma'chí anile bilé ra'ichili alé nolíraleka. Regá anime:

—Yeka ne Inolá ju napu 'we galé ne. E'wáwaká napurigá nulá ne Inolá.

<sup>8</sup> A'lige 'we yati neraga, alué bakiá rió Esusi 'yuga járome echúromi e'nénale 'lige tabilé rewale Elíasi 'lige Moisesi. Esusi bi'neli ilíggame etele.

<sup>9</sup> Napu'lige ku e'tegínasa, Esusi anile:

—Tase ruyéwaká ralámuli napu eteru. Napu a'lige ne, napu julárigame ju Onorúgamete napurigá rió neraga, ku ajánasa, a'liko 'la ju ruyá. <sup>10</sup> 'Lige alué bakiá rió tabilé ruwile. We'sá anile a'bopi: «¿Chonigá alanílepué ku asísimio?» anile a'boi.

<sup>11</sup> A'kinana, boichimi 'yéniga, alué Esusi 'yuga járome rukele alué Esusi:

—¿Chonigá aní alué Moisesi nila nulalí beníriame seabamio bajchabé bilé rió Elíasi rewéggame ta'chó nawachi alué Kristo?

<sup>12</sup> 'Lige Esúsika regá anele:

—Elíasi\* bajchá sébale 'we alá o'wé bowechi jawamia ralámuli jena wijchimoba napurigá 'la sébili mochímala napu'lige

\* 8:29 E'nési glosario «Cristo».

nile ba'wichi bokobuga.

\* 9:12 Alué Esusi Elíasi anía pe Juani olagá anile, alué Juani napu ralámuli rewarame

sébachi alué Onorúgamete julárigame. 'Lige 'ma sebasa alué Elíasi ralámuli o'wé ajawamia, ¿chonigá alué osilí alarigá ruwí 'we resí olawa alué Onorúgamete julárigame napurigá rió neraga? <sup>13</sup> 'We a'lá animé ne. Rekó we'ká ralámuli 'we a'lá e'wilige alué Elíasi, abiena 'we resí oláliku, napurigá resí oláliku ju alué Onorúgamete julárigame napurigá rió. Suwábaga alué 'we 'ya osirúgime nile alarigá ikimeo jipe.

*Jena ruwimela Esusi 'yuga járome tabilé umébaligo bilé chátiri alawá ma'chí 'pa*

<sup>14</sup> Napu a'lige Esusi ku sebasa napu mochile alué Esusi 'yuga járome, Esúsika etele we'ká ralámuli mochigo alemi 'lige etele jaré Moisesi nila nulalí beníriame e'wele ra'íchachi ayoga alué Esusi 'yuga járome 'yuga. <sup>15</sup> Napu a'lige etesa aleka enagó Esusi yati simíbale repórimia 'we ra'sálagá suwábaga alué we'ká ralámuli, 'lige 'we a'lá niraga repórire. <sup>16</sup> A'lige Esusi rukele alué ralámuli:

—'Émika ¿tachiri ra'ichalia alué Moisesi nila nulalí beníriame si? Bochí aníá aníchaneguru.

<sup>17</sup> 'Lige bilé ralámuli nejele:

—Mué beníriame, jeka a'pá ne ye towí, ne inolá, chátiri alawá ajchágame ju, tabilé gayéname ju ra'icha. A'pá ne napurigá mué ma'chí pámalá alué chátiri alawá. <sup>18</sup> Wijchí rekábame ju, ronuega bo'írame ju chu'ala, chí'name ju ramalá a'wágame i'kiga, a'wáraga bo'írame ju rekúpaga, 'ma ruyé ne mué 'yuga járome, tabilé umeba ma'chí 'pa alué chátiri alawá.

<sup>19</sup> Esúsika anele ralámuli:

—¿Chéniko si 'la machimélaché 'emi ralámuli 'lige 'emi ne 'yuga járome churigá 'yólime ka? 'Ma we'ká rawé ajtíkuru ne 'emi 'yuga. Jeka o'tó alué towí.

<sup>20</sup> 'Liko alé o'tóliku alué towí. Napu'lige alué towí etesa Esusi, alué chátiri alawá yati wijchí rekábale alué towí gajjalaka, ronuegame chu'ega. <sup>21</sup> Esusi rukele o'nola:

—¿Chékí rawé ju alué chátiri alawala bajkísa ye towichí?

'Lige o'nólaka nejele:

—'Ma wa'lubé kachi bajkile. <sup>22</sup> Alué chátiri alawá panápurimi pame ju na'ichimi, 'lige ba'wichimi, me'lináliga. Na'temápuaká ramué. Gu'írowaká ramué 'la umubásaká mué.

<sup>23</sup> 'Lige Esúsika anele:

—¿Mueka chonigá anéché «'la umubásiká mué»? Mué 'la bijchígasaká 'la umégame ko ne, 'la umubámala ne.

<sup>24</sup> Alué towí o'nólaka anile:

—Ne 'la bijchigi 'la umégame ko mué. Tabilé we'ká namo ne. Gu'írowaká ne napurigá abé 'la bijchígimala ne uché rajpé 'la umégame ko mué.

<sup>25</sup> Napu'lige Esusi etea namó mochíbachi ralámuli alemi napu ilile, anele alué chátiri alawá alué towichí ajtígame:

—Mué 'sile najkacholo newá ye towí. Mué 'sile tabilé ra'íchame newá ye towí. ¡Ma'chini, tabilé siné uché bajkibóaká ye towichí! —anele Esusi.

<sup>26</sup> 'Ma ma'chínamia alué chátiri alawá, a'wágame sinale 'lige gajjalaka rekárale alué towí ronuega chu'ega, 'lige ma'chínale, wijchí rekábasa a'rele napurigá mukúgame neraga alué towí.

'Lige ralámulika anile alué towí etega:

—¡'Ma mukúgame ju!

<sup>27</sup> A'liko Esusi cha'pile sekala, 'lige o'weti elale. Ajágame nile.

<sup>28</sup> Napu'lige bilena galírale mochiga, Esusi 'yuga járome rukele alué Esusi:

—¿Chonigá tabilé gainárupeché ramueka ma'chí 'pa alué chátiri alawá?

<sup>29</sup> 'Lige Esúsika nejele:

—Napu'lige ma'chí 'pa bilé chátiri alawá bilé ralámulichi ajtígame, 'we a'lá na'tawa Onorúgame 'yuga 'lige iwérali tánisa a'lige kulí gainámala 'emi ma'chí pa alieti alawá. Tabilé tánisa 'emi iwérali Onorúgame, tabilé umubámala 'emi —anile Esusi.

*Jena ruwimela Esusi uchéchigo siné antígome 'liboli ko 'lige ku ajánimili ko*

<sup>30</sup> A'kinana simile Esusi 'lige bo'né 'yuga járome. Simíbale alé ejiro Galilea anilíchi. 'Lige Esusi tabilé najkile napurigá ralámuli Galilea ejperégame machimela alé mochigo alé Galilea alué Esusi 'lige 'yuga járome.

<sup>31</sup> Alué Esusi bi'neli asinálile beniria bo'né 'yuga járome, 'lige regá anele:

—Napu ju Onorúgamete julárigame 'pa rewagáchika napurigá rió neraga 'ma cha'piboli ju pe 'wemi 'lige 'ma me'liboli ju. Me'lisuga, pe bakiá rawé kachi ku ajánamala. (Alué Esúsika pe bo'né olagá anime ke anile.)

<sup>32</sup> Alué Esusi 'yuga járome tabilé námale napu anile Esusi. Majale rukegá. A'kinana Esusi 'yuga járome boichimi 'yéniga ra'íchale a'boi:

—¿Chieri 'nalina abé Wa'lula júpué ramué? —anile.

<sup>33</sup> Napu'lige sebasa we'ká riógachi Kaper-naumi anilíchi mo'ile pachá galírale napu che'labámili nile 'lige Esúsika rukele alué bo'né 'yuga járome:

—¿Tachiri choniae 'emi boichika 'yénaga?

<sup>34</sup> 'Lige alué Esusi 'yuga járome ka tabilé nejele machiligame ayomio Esusi. <sup>35</sup> 'Liko asíbale Esusi, 'lige bayele alué makué oká bo'né Esusi 'yuga járome 'lige anele:

—Wa'lula nínlisiká, gu'írimili júkuru suwábaga ralámuli. Tabilé bo'nepi na'temámili júkuru.

<sup>36</sup> Alige Esusi mutule bilé ta towí 'lige anele alué makué oká rió:

<sup>37</sup> —'Emi napu 'we a'lá niraga eté bilé ta towí 'la ne'chí oyériga, 'liko 'we a'lá nirame ju ne'chí. 'Emi ne'chí nirasa 'liko 'la nirame ju Onorúgame, alué napu júlale ne'chí —alarigá anile Esusi.

<sup>38</sup> 'Lige alué Juani, napu Esusi 'yuga ilírome nile, anele Esusi:

—Mué Wa'lula, alé 'mi ajtí bilé rió 'we buyáname u'kuchi remónisi alawala ralámulichi mochígame regá anigá: «Esusi a'walílate buyasa 'la kápá 'emi chátiri alawá, yati buyasi, a'rewa ye rió.» 'Lige ramueka sulíruturu, pecha ramué 'yuga oyame kame alué rió.

<sup>39</sup> 'Liko Esúsika anele:

—Tabilé che anétéliko. Bilé rió buyáname chátiri alawá regá anigá: «Esusi a'walílate buyasa 'la kápá 'emi chátiri alawá», bilé rió alarigá nóchame ka 'we a'lá ra'ichámala ne'chí olagá. <sup>40</sup> Ralámuli tabilé saíla nisa ramué, ramué gompaniérola kéré. <sup>41</sup> Bilé rió rekó pe bilé alabá ba'wí 'yae 'emi ne'chí oyérame kóriká, 'liko Onorúgame 'la semati raweli 'yámala alué rió.

<sup>42</sup> › Bilé rió resiti 'nátili 'yame bilé ta towí kulí benime Onorúgame nila ra'ichili, abé 'la nímala si'líka mukusá ba'ichí rojkógachi pásiga majtá golótiga. <sup>43</sup> Mué 'we cha 'sisa mué bo'né sekálate, 'ma rejpnawa alué seká. Abé a'lá nímala Onorúgame e'wília tabilé sekega, tase simiá oká sekega o'wékana jiérnochi alé napu tabilé siné cho'ime ju na'í. <sup>44</sup> Alé alué kuchili tabilé siné a'remili ju ralámuli sa'pala go'yá. 'Lige alé nabí rajame ju na'í. Tabilé siné cho'ime ju.† <sup>45</sup> Mué resí 'sika enasa mué ronólate, rejpnawa ronola. Abé a'lá ju Onorúgame e'wília tabilé ronega, tase simiá re'lé jiérnochi oká ronega. <sup>46</sup> Alé alué kuchili tabilé siné a'reme ju ralámuli sa'pala go'yá. 'Lige alé nabí rajame ju na'í. Tabilé siné cho'ime ju. <sup>47</sup> Mué 'we chátiri na'tasa chátiri etega, ma'chí buinawa alué busí. Abé a'lá nímala Onorúgame e'wília tabilé busega, tase simiá re'lé jiérnochi oká busega.‡ <sup>48</sup> alé napu alué kuchili tabilé siné a'reme ju ralámuli sa'pala go'yá. 'Lige alé nabí rajame ju na'í. Tabilé siné cho'ime ju.

<sup>49</sup> › Apiépiri ralámuli ne'chí najátasaká resí ikimela. Alué resí ikíame ju napurigá oná. <sup>50</sup> Oná 'we a'lá ju 'la ajkabasa go'ame. Tabilé ajkabasa go'ame, pe tabilé 'la ajkabame ju alué oná.§ Alarigá ju alué resí

ikíame napurigá oná. Alué resí ikíame 'la gu'írame nisa ralámuli 'we a'lá 'nata Onorúgame 'yuga a'liko napurigá oná 'la ajkabame alarigá ju. Alué resí ikíame tabilé gu'írome nísaká alué ralámuli 'we a'lá 'nata Onorúgame 'yuga, a'liko tabilé 'la ju. 'Liko alué resí ikíame ju napurigá oná tabilé ajkabame. Tase we'kuawa alué resí ikíame gu'írome ko Onorúgame si na'talia 'liko 'we ganílga ejjerélamala 'emi suwábaga.

## 10

*Jena ruwimela Esusi rejcholi ruyéligo suwábaga alué ralámuli newíkame napurigá tabilé rojámala*

<sup>1</sup> Alé Kapernaumi asigá, simile alé bilena alé a'bé bakochi Jorani anilíchi, aleka napu ma'chínape ju alué rayénali napu Jurea anilíme nílechigó napurigá alué ejiro Jurea anilíme.\* Nabí rawé we'ká ralámuli napaíle. 'Lige Esúsika benírale rejcholi alué ralámuli. Alarigá 'sime nile. <sup>2</sup> 'Lige alé jsile bariseo pe rukemia chonirá Esusi. 'Lige rukele:

—¿'La ju bilé rió mukí a'rea newíkame?

<sup>3</sup> 'Lige Esúsika rukele:

—¿Tachiri rejcholi nejile ko alué rió Moisesi 'ya? —rukele Esusi.

<sup>4</sup> 'Lige alué bariséoka anile:

—Moisesi anile 'la ko bilé mukí a'rílía, bilé apeli 'yásiká regá anime: «Jípesi 'ma tabilé napaíka ejjerélamala napugiti 'ma rojágame kame ye oká ralámuli, 'ma tabilé newíkame», anime nísaká alué apeli.

<sup>5</sup> Esúsika anele:

—Ralámuli cha nokame kame. Alekeri Moisesi benírale alué rejcholi. <sup>6</sup> 'Ya bajhabé Onorúgame tabilé benírale alué rejcholi. Onorúgame nila ra'ichili regá aní: «Napu'lige Onorúgame newale gawí, newale bilé rió, 'lige bilé mukí.» <sup>7</sup> Alekeri newime ju 'lige waná galírame ju, <sup>8</sup> 'lige napuíka okome ju. Alésíko napurigá bi'lepi ralámuli 'nátame nímala okaka, <sup>9</sup> 'lige Onorúgame tabilé najkí napurigá rojanawa napu bo'né napabule.

<sup>10</sup> Abé alí, napu'lige galírale mochiga, alué Esusi 'yuga járome ka rukele Esusi:

—¿Chonime ke napu mué ruyá aní kulipi?

<sup>11</sup> 'Lige Esúsika nejele:

—Bilé rió mukí a'resa, uché bilé mukí rewame ju, tabilé 'la ju alué 'nátili. <sup>12</sup> Abiena 'we resítiri ju ala'simía bilé mukí rió a'resa uché bilé rió rewisá, tabilé 'la ju alué 'nátili. 'We resítiri ju ala'simía.

*Jena ruwimela Esusi tánligo Onorúgame napurigá gu'írimala 'kuchi*

† 9:44 E'nési Isaiás 66:24. ‡ 9:47 Bersíkulo 44 'lige 46 tabilé uchú alué 'we 'ya osirúgime osilíchi. § 9:50 Onaka abiena unilime ju 'yowa. Abiena unilime ju napurigá tabilé bikimela sa'pá. Abiena unilime ju napurigá bi'wewa jiero. Abiena unilime ju telsante niraga. Abiena uneme nile alué ralámuli ebreo napu'lige Onorúgame kógime nile go'ame ruigá Onorúgame tabilé siné chajkena ilíbame ju, nabí 'we a'lá sébali olame ju napu aní bo'né. \* 10:1 Jaréchigo aní simáriligo alé ejiro Jurea 'lige bajunligo alé bakochi Jorani anilíme.

<sup>13</sup> Ralámulika u'kuchí 'kuchi a'pile alemi alué Esusi napurigá cha'pimela sekate. Napu a'lige machísá alué 'yuga járome, ne'óchale alué ralámuli u'kuchítiri. <sup>14</sup> Esúsika ayole alué Esusi 'yuga járome 'yuga. Anele:

—Tase che anewa, a'rewa 'nalina napurigá jeka smela alué u'kuchítiri. 'Emi alué u'kuchítiri etega, benimela 'emi Onorúgame e'wiga. Suwábaga ralámuli napu 'we a'lá e'wame ju napurigá ye u'kuchítiri, alueka 'we a'lá nulálíame ju sulachí Onorúgame. <sup>15</sup> Neka 'we a'lá bijchiga aní. 'Emi tabilé e'wisa Onorúgame napurigá nokame ju ye u'kuchítiri, tabilé siné ganlíga e'yénamala 'emi Onorúgame 'yuga. Napurigá bilé u'tátiri 'we yati e'wime Onorúgame, a'chigóriga nímili júkuru 'émichigó napurigá alué u'tátiri 'la yati e'wime Onorúgame.

<sup>16</sup> A'lige alué Esusi mutule alué u'kuchítiri 'lige mo'ola nochale 'lige tánale Onorúgame napurigá repúmala.

*Jena ruwimela bilé rió 'we nígame tabilé oyéraniligo Esusi*

<sup>17</sup> Bilé rawé Esusi enale simiá, 'lige bilé rió nawá 'we 'maga, 'lige chokóbasiga ilíbale alé o'wemi napu Esusi iligé. 'Lige alué rió anele alué Esusi:

—Mué 'we a'lá beníriame, ¿tachiri chu'simíá 'la ju napurigá bejtélamala ne 'pa rewagachi nabí? —anile alué rió.

<sup>18</sup> 'Lige Esúsika anele:

—¿Chonigá aniché mué: «'We a'lá beníriame»? Pe bi'neli Onorúgame ju 'we a'lá beníriame. <sup>19</sup> 'La machí mué napu Onorúgame nulale. Regá nulale Onorúgame: «Tabilé me'liboa ralámuli, tabilé chigowa aminami, tabilé se'nú mukí 'yuga gojchíboa, tabilé 'yega ra'icháwáká, tase bujewa bilé rió tábiri o'ká enágame 'yégiga, 'la niraga etewa mué o'nola 'lige mué eyela» —alarigá anele Esusi.

<sup>20</sup> 'Lige alué rioka anile a'lige:

—Neka 'we a'lá sébali olá suwábaga alué nulalí u'tá ka jipe abiena si.

<sup>21</sup> 'Lige Esúsika 'we na'temale, 'lige anele:

—Aba bilé tábiri rokáré. Bilé tábiri tabilé 'cho 'la sébali olá mué. Simigá ralinéwaká suwábaga alué mué nila tábiri, 'lige kógiwaká alué enomí alué ralámuli tabilé nígame. 'Lige ne'chí najátawa. Alarigáká 'la narémala mué semati raweli 'pa rewagachi.

<sup>22</sup> 'Liko alué rió kilí ilíbale, seweka simiá kibale cha we'ká tábiri nígame nilígame. Tabilé ralinénele bo'né nila.

<sup>23</sup> 'Liko Esusi e'néniga bo'né 'yuga járome, anele:

—We'ká alué ralámuli 'we nígame we'ká e'karúgame tabilé elime ju napurigá

Onorúgame nulewa sulachí. Pe napurigá a'boi 'nata, pe alarigá 'la sébili nirá.

<sup>24</sup> 'Lige alué Esusi 'yuga járome ka lale: «¿Chonigá aniché Esusi alaniá?» 'Lige Esúsika anele uchéchigo siné:

—We'ká ralámuli napu 'we 'nátame ju we'ká e'karúgame niga asinálime, tabilé najkime ju napurigá Onorúgame nulewa sulachí. <sup>25</sup> We'ká rió we'ká bukégame akasí, chibátiri, bo'átiri, tabilé nélé Onorúgame. Bo'né bi'neli 'nata. 'We nóchili olámala alué rió napurigá lisensia 'yámala Onorúgame napurigá Onorúgame nulémala.†

<sup>26</sup> 'Lige akisá alué Esusi 'yuga járome, tabilé inámole. 'Lige anile a'bopi:

—¿Chieri 'la sebámalawé alé rewagachi?

<sup>27</sup> 'Lige Esúsika e'néniga anele:

—Bilé rió bo'né 'nátame tabilé sebámala rewagachi. Onorúgameka 'la nejkúrime ju, alarigáká 'la sebawa rewagachi.

<sup>28</sup> A'lige Pégroka anele:

—Ramueka suwábaga tábiri a'réruché mué 'yuga e'yénimia —anile Pegro.

<sup>29</sup> 'Lige Esúsika anele:

—Apiépiri rió a'resa galí, rejimátiri, o'nólatiri, eyélatiri, 'kúchitiri, gawítiri, ne 'yuga e'yénimia, benírimia ralámuli Onorúgame nila ra'íchili, <sup>30</sup> Onorúgame wa'lú ganílili 'yámala. 'We ganílimala alué ralámuli Onorúgame oyérame 'yuga. Abiena 'we resí olawa 'lige resí anewa cha nokame ralámulite. 'Lige mukusá 'pa rewagachi asiméleké nabí. <sup>31</sup> Alué napu bajchá ilinálime ju, alueka pe guwana juláwili ju. 'Lige alué 'we guwana ilígame, alueka 'mi bajchá eláwili ju.

*Jena ruwimela uchéchigo siné aniligo Esusi 'ma me'liboli ko 'ma baisá nile alésíko alaniá Esusi*

<sup>32</sup> E'yénale bowesia Rusaleni simiba. Esusi bajchá enale. 'Lige alué we'ká oyérameka nujubami 'yénale, 'lige regá na'tasia e'yénale: «¿Esúsika 'la tabilé majantli!» napugiti Esúsika abirigá alemi Rusaleni simiá enalígame rekó machié me'liboli ko alé Rusaleni. Uchéchigo jaré napu abé guwana e'yénale 'we majale. 'Lige Esúsika waná bi'neli o'tole alué makué oká rió bo'né 'yuga járome. <sup>33</sup> 'Lige regá anele:

—Ramueka 'a e'nárururu Rusaleni simiba. Alué napu ju Onorúgame julárigame 'pa rewagáchika napurigá rió neraga 'ma cha'piboli ju, 'lige 'ma o'toboli ju napu mochí alué e'wélala balé 'lige alué Moisesi nila nulalí beníriame. Alué e'wélala o'tomela a'miná uchéchigo bilena e'sena ralámuli mochígichi napu tabilé jurío ju napurigá alemi me'liboa. <sup>34</sup> 'Lige tabilé

† 10:25 Esúsika regá anile: —'We nóchali olámala bilé rió we'ká bukégame ajágame napurigá lisensia 'yámala Onorúgame nulelia. Abé 'la tabilé nóchali olámala bilé kameyo bilena wejchá ewalachi simiria.

'cho me'á, alué ralámuli 'we gawélimala 'lige a'kachípamala 'lige wejpisópua, 'lige me'liboli ju. Mukusá pe bakiá rawé kachi ku ajánamala —anile Esusi.

*Jena ruwimela Jakobo (Santiago) 'lige Juani tánaligo nóchali Esusi*

<sup>35</sup> Alige Jakobo, 'lige Juani, Sebereo 'kúchila, <sup>36</sup> a'bemi simíbale Esusi ajtígachi 'lige anele:

—Mué beníriame, pe rekó, nóchali 'yáwaká ramué.

<sup>37</sup> —¿Tachiri nóchali najkiá 'emi? —rukele Esusi.

—Napu'lige mué wa'lula selígame asibasa, ramueka a'naguka mochíwaká mué ajtígichi napurigá e'sélikame u'kuchípala nímala ramué, bilé wajtoná, bilé o'iná.

<sup>38</sup> Lige Esusi anele:

—'Emi tabilé machí aliena nóchali ko. ¿'Lacha anachasa júkó 'emi ne'chí 'yuga? ¿'Lacha anachámala 'emi resí ikiá napurigá ne resí ikimela?

<sup>39</sup> —Abiena 'la anacháwaleké —nejele Akobo 'lige Juani.

—Bijchiá resí ikimela 'emi. Me'liboa ne. Abiena me'liboa 'emi. <sup>40</sup> Tabilé ne 'símala a'naguka e'wélala mochía 'emi. Pe Onorúgameka 'la machí chieri mochiamio napurigá nochámala alué nóchali —anile Esusi.

<sup>41</sup> Uché jaré Esusi 'yuga járome machile nóchali táligo, alekeri na'áwale. 'Lige Esusi bayele suwábaga alué makué oká bo'né 'yuga járome, <sup>42</sup> 'lige anele:

—'Emi 'la machíguru napu ekí e'wélala 'we riólame ka, 'lige 'we iwégame nulame ka, napuchibi olagá ralámuli, 'lige alué e'sélikame u'kuchípala a'chigóriga nulame ju. <sup>43</sup> 'Emi tabilé alarigá nulámili júkuru. <sup>44</sup> Alué abé wa'lula nínilisi ka, gu'irimili júkuru uché jaré ralámuli, tabilé riólaga, napurigá nóchame neraga. <sup>45</sup> Alué Onorúgamete julárigame 'pa rewagáchika napurigá rió neraga tabilé nawápá napurigá gu'iriwa ralámulite. Alueka nawákuru gu'irimia uché jaré ralámuli, alué bo'nepi mukugá buinamia chátiri bowechi we'ká ralámuli.

*Jena ruwimela Esusi sa'wáligo bilé rió tabilé ma'chílime*

<sup>46</sup> Alige sébale we'ká riógichi Jerikó anilichi. Napu'lige Esusi 'ma simichi alé Jerikó yéniga alué bo'né 'yuga járome si, 'lige we'ká ralámuli napu Kapernaúmika si 'yénale, 'lige alemi boichimi asale bilé rió tabilé ma'chílime, Bartimeo anilime (Bartimeo aniáká Timeo inolá aniamé ju). Alé asale boichí suwemi enomí taa. <sup>47</sup> Napu a'lige alué tabilé ma'chílime machisá Esusi Nasareta bejtégame a'bemi enegó, a'wágame ra'íchaga bayele regá anigá:

—¡Mué Esusi, Rabí rijimela, Rabí 'we 'ya ajtígame, pe rekó na'temápuaká ne'chí! —anile.

<sup>48</sup> We'kaka sulile alanichi napurigá tabilé aminabi a'wágame ra'ichámala. 'Lige alué rioka tabilé e'wale. Aminabi anile rekó sulílie:

—¡Mué Esusi, Rabí rijimela, alué rabí napu 'we 'ya asale, pe rekó, na'temápoqó ne! —anele.

<sup>49</sup> Akisá yati kilí ilíbale Esusi, 'lige anile:

—Jeka bayéwagó.

'Lige alué Esusi 'yuga járomeka simíbale bayemia. 'Lige anele nawiga:

—Tase chélawa. 'Mi simérá mué. Esusi repá 'naka.

<sup>50</sup> 'Liko alué rió tabilé ma'chílime alué gemá wijchí pasa, iwégame o'pochile, 'lige simile alé napu Esusi ilile. <sup>51</sup> Esúsika rukele:

—¿Tachiri najki mué?

'Lige alué tabilé ma'chílimeka nejele:

—Mué beníriame, najki ne napurigá ne'chí 'yómala mué napurigá 'la ma'chílimala ne ku.

<sup>52</sup> Esúsika anele:

—Simigá ku mué bejtélachi. Sa'wíkuru mué, 'la bijchígiligame mué 'la sa'wame ko ne —anele.

Yati 'la ma'chílile alué tabilé ma'chílime. 'Lige tabiléchigo simíleko galírale, pe simile alemi guwánami napu we'ká ralámuli 'yénale.

## 11

*Jena ruwimela ralámuli e'wele ra'íchaga aníligo Wa'lula ko Esusi*

<sup>1</sup> Napu'lige 'ma amulí seba 'yéniga alé Rusaleni alué Esusi 'lige gompaniérola jábale alé Olibo rewégichi rabó re'leberi, alé napu okaná we'ká riógichi nile, bilena Be'tagé 'lige uché bilena Betania rewégachi. <sup>2</sup> Lige Esúsika anele oká alué bo'né 'yuga járome:

—Simíbaga alé 'mi we'ká riógachi, 'mi alé napu ma'chigá ju, 'lige alé riógichi se-basa, 'emi etémala bilé bulito u'tá chériga chujkúgame tabilé 'cho asilime. 'Lige 'ma su'panasa jeka o'tobóaká baniriga. <sup>3</sup> 'Lige bilé rió rukisá chonigá su'panalio alué bulito, yati anewa: «Alué Wa'lula najki napurigá tanewa ye bulito, pe yati ku ronolawa ramué», anile Esusi.

<sup>4</sup> 'Liko alué oká rió Esusi 'yuga járome yati simíbale 'lige alé bilénami riógichi sebasas etele bilé bulito u'tá chériga chujkúgame bilé o'tónachi alé a'bé yochi galírale, 'lige su'panale.

<sup>5</sup> 'Lige jaré rió jale alé 'lige bilé alué rió alemi ajtígame rukele:

—¿Chonigá su'panaru alué bulito?

<sup>6</sup> 'Liko alué Esúsika julárigame ruyele 'la sébili napurigá anélige Esusi. 'Liko alué rió

rukeme yati 'la elile napurigá 'la o'tomela.  
 7 Alésiko yati o'tole alué bulito napu alé  
 Esusi ajtile. 'Lige alué a'pasa alué bulito,  
 bujale alué i'weli o'pacha a'boi o'páchala  
 'lige pérale alué bulito, 'lige Esúsika yati  
 asele alué bulito, 'lige asigá simile. 8 'Lige  
 we'ká ralámuli pésiga 'yéname boichimi a'boi  
 o'páchala i'weli, 'lige alué bulito alemi  
 amóbami simírole, 'lige jaréchigo sa'ó sawala  
 ro'asia e'yénale alemi boichimi.

9 Suwábaga ralámuli guwánami 'yénigame  
 'lige bajchabemi 'yénigame 'we ra'sálása  
 'yéname regá anisia:

—¡Wa'lula ju Onorúgame! ¡'We a'lá semá  
 'sime ju alué Onorúgamete julárigame!  
 10 ¡Onorúgame 'ma a'lá nulémala ralámuli!  
 ¡'Ma nawá alué Rabá rijimala! ¡Suwábaga 'we  
 semátiri nímala!\*

11 Alarigá bajkile Esusi alé we'ká riógichi  
 Rusaleni anilichi aleké bulito asigá 'lige  
 re'kile bulitochi 'lige re'kisa bajkile abé  
 pachami alé wa'lú re'obá ilígichi ra'pichí,  
 'lige 'we a'lá e'nesa bochígimi alé ra'pichí,  
 'ma simile alé Betania rewégichi ta'mé  
 we'ká riógachi,† 'ma 'we alí nílgame amulí  
 chónachi, alué makué oká rió 'yuga simile  
 bo'né 'yuga járome.

*Jena ruwimela Esusi 'we ená anegá  
 ne'óchaligo bilé chuná napu tabilé rakeme nile*

12 Melénala be'á 'ma simíbale alé Betania  
 mochige, 'lige boichimi e'yéniga 'we e'lowile  
 Esusi. 13 'Lige etele bilé chuná alemi ilígame  
 boichimi a'bemi 'lige Esúsika yati simile  
 e'nemia pala rakégame ka alué chuná, tabilé  
 rakega ilile alué chuná, pe 'we a'lá sawega  
 ilile, tabilé 'cho sébale raweli napu rakeme  
 nile alué chuná.»† 14 'Liko Esúsika anele alué  
 chuná:

—Tabilé siné go'mela ralámuli mué chuná  
 rakala, 'máchigo tabilé siné rakémili kame  
 mué—anele.

'Lige alué Esusi 'yuga járomeka akele  
 alanichi Esusi.

*Jena ruwimela Esusi 'ma mabúligo alué  
 ralineme ralámuli alé wa'lú re'obachi ra'pichí  
 mochígame*

15 A'lige sebasá ku alé Rusaleni, Esusi  
 bajkile alé wa'lú re'obachi ra'pichí, 'lige  
 chojkile buyana alué ralámuli napu ekí  
 ralineá jale 'lige tábiri alé ra'pichí, 'ma  
 re'nubuga 'lule suwábaga mesa napu enomí  
 nakulíichi nile, 'lige mutuka 'ma re'nubule  
 chulugí baloma ralinéime wakali. 16 Tabilé

a'rele napurigá alemi ra'pichí mochiámala  
 ra'lánaga we'ká e'karúgame tábiri ralinéime.  
 17 'Lige alué e'karúgame tábiri rujsuna 'lige  
 gajuna 'we ruyele Onorúgame nila ra'íchili.  
 Regá anele:

—¿Tacha machí 'emi regá anime chu-  
 jkugó alé osilichi napu Onorúgame nila  
 ra'íchili chujkú? Regá anime chujkúché:  
 «Ne galílaká uneme nímala suwábaga  
 ralámuli jena gawichí ejperégame napurigá  
 ra'ichámala Onorúgame 'yuga 'lige napurigá  
 iwérali tánamala. 18 Alarigá aní Onorúgame  
 nila ra'íchili. 'Émika unéguru ye re'obá  
 Onorúgame galila napurigá pe bilé resó pe  
 chigórigame resola niraga, tabilé 'la nirá  
 'emi—anele.\*

18 'Lige alué e'wélala balé abiena alué Moi-  
 sesi nila nulalí beníriame akele alanichi alué  
 Esusi 'lige chojkile 'nata churigá 'la nítikó  
 me'liá alué Esusi. Me'linálile 'lige 'nátale  
 majaga «we'ká ralámuli alué rió oyera.» 'Lige  
 tabilé chérigá me'ale alué Esusi napugiti 'we  
 majáligame alué ralámuli, cha we'ká nílgame  
 alué ralámuli alemi jágame 'we a'lá 'nátaga  
 gepua alué Esusi benírachí alué rejcholi.  
 19 'Ma alí 'ma chónachi simile Esusi bo'né  
 'yuga járome 'yuga. 'Ma simíbale alé Rusaleni  
 mochige.

*Jena ruwimela Esusi ruwíligo churigá ka  
 napu'lige 'la bijchígisiga 'la a'walí nígame ko  
 Onorúgame*

20 Uché melénala be'á simíbale alé a'bemi  
 alué chuná ilígichi 'lige etele alué chuná 'ma  
 waktigame chojkichí si, 'ma nawala 'yúriga  
 wakíbale alué chuná. 21 'Lige Pegro nélále  
 napu anile alué Esusi rapakónala. Regá  
 anile Pegro:

—Mué Esusi Wa'lula, e'nérigo ye chuná  
 napu mué ne'óchale 'we ená anigá rapako,  
 'ma wakile.

22 'Lige Esúsika nejele 'lige regá anele:

—Aka 'we a'lá bijchígíwaguru 'la wa'lú  
 a'walí nígame ko Onorúgame. 23 Neka 'we  
 a'lá bijchiga aní, 'emi nulesa ye gawí Olibo  
 anilime 'liko 'la simela 'mi mejká wa'lú  
 ba'wí ilígichi napu e'wele barko e'yéname  
 ju, 'lige 'we a'lá bijchígiga anesa 'emi 'we  
 a'lá nejkúromio Onorúgame bo'né a'walílate,  
 'liko Onorúgame 'la nejkúromala, 'liko 'la  
 simela ye gawí 'mi wa'lú ba'wí ilígichi.  
 24 Apiépiri tábiri 'la nejkúromala Onorúgame  
 'la bijchíá bijchígiga tánasaká mué alué ne-  
 jkúri. 25-26 Napu'lige Onorúgame 'yuga  
 ra'íchachi mué, 'la e'kawa apiépiri ralámuli

\* 11:10 E'nesi Salmos 118:25-26.

† 11:11 Rusalénika 'we we'ká riógame nile, 'lige Betaniáká ta'mé 'we we'ká riógame  
 nile.

‡ 11:13 Alé Israeli alué chuná bajchá rakeme ju marso mechá napu'lige 'yame ju chuná sawala. 'Lige abiena  
 rakeme ju abé nujubame. Tabilé rakésaká napu'lige 'yame ju sawala, tabilé rakémili nile abé nujubapi. Siné kachi Esusi  
 anile alué chuná ju napurigá alué bariseo. Bariséoka 'we a'ká ralámuli káré nobi tabiléchigo a'ká ralámuli nilekó. Alué  
 bariseo nile napurigá alué chuná napu 'we rakéganti káréle 'we sawega ilígame nobi tabilé rakégame niliko. § 11:17

E'nesi Isaiás 56:7. \* 11:17 E'nesi Jeremías 7:11.

alué napu 'we resi 'sika ilírome nile mué 'yuga. Mué 'la e'kásaká alué rió 'liko Onorúgame 'la e'kámalachigó mué napu'lige iwéřilí tánichi mué. Mué tabilé e'kásaká 'liko alué Onorúgame rewagachi ajtígame tabilé e'kámalachigó —anile Esusi.

*Jena ruwimela e'wélala rukéligo Esusi chonigá buyánaligo alué ralámuli alé wa'lú re'obachi ra'pichí mochígame ralineá*

<sup>27</sup> 'Lige ku sébale alé Rusaleni, 'lige alemi wa'lú re'obá ilígichi ra'pichí eyénachi alué Esusi, yati alemi jsile alué e'wélala balé, abiena alué Moisesi nila nulalí beníriame, 'lige alué ralámuli jurío nuleme. <sup>28</sup> 'Lige anele:

—Mué Esusi, ¿tachiri najtékame nóchali nígame ju mué? ¿Chířite ajcharu mué napurigá Wa'lula nulame níkala mué? ¿Tachiri gite buyánaché mué ralámuli wa'lú re'obá ra'pichí mochígame ralineá?

<sup>29</sup> 'Lige Esúsika anele:  
—Ne abiénachigó rukimela bilé ra'íchili, 'la ma'chígame nejiáwaká, 'lige 'la ma'chígame nejiásaká 'emi ne 'la ruwimela chonigá tachiri gite buyánigo ne ralámuli jena ra'pichí mochígame ralineá. Nejiásibá: <sup>30</sup> ¿Chieri júaliga Juani ralámuli rewarániliga? ¿Onorúgame o pe ralámuli?

<sup>31</sup> 'Alíko alué e'wélala o'maka chojkile ra'ícha a'bopi rukegá, regá anile:

—¿Churigá nejiáwa? «Onorúgame júlale», anisúká 'liko animela alué Esusi, <sup>32</sup> «'Liko ¿chonigá ta bijchígirupaché 'emi napu anié Juani?» animela alué Esusi. «Aka pe ralámuli nuléleché», anisúká, alué ralámuli jena ra'pichí mochígame 'we ayómala ramué 'yuga, 'wéchigo 'la bijchígíligame o'maka ralámuli 'we 'la Onorúgamete julárigame níligo alué Juani. <sup>33</sup> 'Alígeko regá anile alué ralámuli Esusi olagá:

—Tabilé machiáwé chířite julárigame níligo alué Juani ralámuli rewarániliga.

'Liko Esusi anile:

—Néchigó tabilé ruwimélachigó tachiri gite buyánigo ne suwábaga ralámuli jena ra'pichí ye wa'lú re'obachi mochígame ralineá.

## 12

*Jena ruwimela Esusi ruwíligo chonokáligo alué we'ká banawá go'yádame rakeme tebume*

<sup>1</sup> 'Lige chojkile Esusi regá anea alué ralámuli:

—Bilé rió 'yele we'lé alé bo'né gawílachi, 'lige we'lé echale we'ká banawá go'ame rakeme i'wilí anilime. Rejkolichi newale bilena i'pichí alé me'chomia alué banawá rakala napu'lige rakesa alué ba'wila ma'chí pamia, 'lige newale bilé galí re'pá ilígime napurigá alué tebume alé asagá tebúmala alué we'ká banawá rakeme.

› 'Lige owile jaré rió nóchame napurigá tebúmala, nasípasi meka alué banawá rakala, 'lige alué rió gawígameka simile bilénami mejkami. <sup>2</sup> Napu'lige sebasa rawé 'wíliame, alué gawígame 'naka júlale bilé piónila napurigá rojanámala nasípasi napu nachume nile alué rió gawígame.

<sup>3</sup> Alué tebuka mochígameka tabilé nejinile 'lige 'ma cha'pile alué gawígame piónila alé nawachi, 'ma cho'nale 'lige 'ma kumi júlale 'we ejechasa. 'Liko alué rió 'ma kumi simile tabilé o'ká alué banawá rakala. <sup>4</sup> 'Liko alué gawígame uchéchigo bilé piónila júlale, 'lige 'ma sébachi alué piónila alé 'mi 'ma che'wáliru mo'ola bajsibuga rejteje 'lige 'ma kumi julářiru ne'ochasa. <sup>5</sup> 'Liko alué gawígame uchéchigo bilé piónila júlale, 'lige 'ma sébachi alué piónila yati me'lířiru. Alarigá olářiru suwábaga napu eki sísiame alemi napu júlale alué gawígame alé. Jaré 'we ejelígame a'rele 'lige jaré 'ma me'ale.

<sup>6</sup> › Alésíko pe alué gawígame inolacho rejpíle napu 'we a'lá eteme nile 'we a'lá galegá, 'lige abiena aluéchigó júlale mayega 'we a'lá níraga etemio. Regá 'nátales: «Yeka 'la níraga etémalaké ne inolá kame.» Napu'lige alué gawígame inolá sébachi 'mi alé alué banawá jágichi, 'lige anile alué a'boi tebukame: <sup>7</sup> «Pe aluecho ju alué rió gawígame inolá, 'lige alué júkuru alué o'nola nila nachuámili ye gawí napu'lige o'nola mukusá, alekeri me'liboa, alarigá 'la ramué niga ejtebiwa ye gawí o'nola mukusá», anile. <sup>8</sup> 'Lige cha'pisá 'ma me'ale 'lige 'ma pale i'rachi ma'chímama —anile Esusi.

<sup>9</sup> 'Lige abichílubi anile Esusi:

—¿Alésíko chu'símalawé alué gawígame? Alueka nawámala suwábaga me'limea alué tebume, 'lige uché jaré mochiámala tebutígata alé.

<sup>10</sup> › ¿Tabiléchala machí 'emi napurigá aní alué osíři napu chujkú Onorúgame nila ra'íchili? Alué rejte napu gawéřile nóchame galí newame, 'lige alué rejteka abé a'lá ma'chínale alé chijtochí ajchaliá.

<sup>11</sup> Onorúgame bo'né alarigá elale. 'Lige ramué a'boi nířiga 'we a'lá semářiga na'tawa

'lige 'we a'lá ganířiga mochiwa

'we a'lá semářiga nejkúřichi Onorúgame —anile Esusi.\*

<sup>12</sup> Alué e'wélala balé, abiena alué Moisesi nulalila beníriame, 'lige abiena alué ralámuli jurío nuleme, abichílubi 'we me'linalia jale alué Esusi 'we a'lá inámaka akéřigime suwábaga alué e'wélala ne'óchiga aníligo alué Esusi alaniá, iligá 'we majale cháchigo we'ká

\* 12:11 Esusi pe anime ke anile tabilé galegá etémili nile.

jáligame ralámuli alemi. Alésíko pe a'rele alué Esusi 'lige 'ma simíbale, tabilé che olale.

*Jena ruwimela Esusi ruwíligo Onorúgame yalime ko napu Onorúgame yáwili ju*

<sup>13</sup> Alésíko alué e'wélala balé 'lige alué Moisesi nulalila beníriame, 'lige alué e'wélala napu nuleme ju alué ralámuli jurío, júlale jaré bariseo 'lige jaré Erote gompaniérola rukéniliga jaré ra'íchili pe machináliga chonirá Esusi. <sup>14</sup> 'Lige alué bariseo 'lige alué Erote gompaniérola alemi sigá napu ajtile alué Esusi. Regá rukele:

—Mué beníriame Onorúgame nila ra'íchili, suwábaga ramué 'we a'lá machiaa 'we a'lá bijhigala anió mué suwábaga napu aní mué. Tabilé chélame ko mué napu aní uché jaré ralámuli. Rekó cha anichí ralámuli mueka abisibi 'we a'lá beníriame ju Onorúgame nila ra'íchili. Mueka tabilé 'yégalí ra'íchili beníriame ju. ¿Pala 'la ju nejilía alué enomí napu jena nejilime ju alué wa'lula rey Sesar i'lime? ¿Tabiléchala?

<sup>15</sup> Alué Esúsika 'we a'lá machile pe resítiri 'nátaga anió alué ralámuli, machile pe resi olániliga anió Esusi alué ralámuli 'yéliga ra'íchanelega, 'lige anile alué Esusi:

—¿Chonigá alaníbhé 'émika pe resi olániliga 'yéliga ra'íchaga? Aka jeka a'pásigo bilé enomí.

<sup>16</sup> Liko alué bariseo 'lige jaré alué Erote gompaniérola yati a'pile bilé enomí chítúligame bewárigame alué Esusi, 'lige Esúsika rukele:

—¿Chieri mo'ola ju ye mo'ó jena enomichi ajtigame, 'lige chieri rewalá chujkú ye enomichi?

'Liko alué bariséoka 'lige alué Erote gompaniérola anele:

—Pe alué Wa'lula Sesar.

<sup>17</sup> Liko Esúsika anile:

—Napu alué Wa'lula Sesar nila ju, alueka alué Wa'lula Sesar yáwaguru, 'lige alué napu Onorúgame nila ju, alueka alué Onorúgame yáwaguru —anile Esusi.

'Lige alué bariséoka 'lige alué jaré Erote gompaniérola 'ma aminabi tabilé che anele, 'ma umérasiga Esúsita.

*Jena ruwimela Esusi aníligo 'la rewagachi simíbame ko alué 'we a'lá a'ká ralámuli alawala napu 'lige suwisá*

<sup>18</sup> Abiena jsile alemi alué saruseo anilime ralámuli, alué napu anime ju tabilé sébame ko rewagachi alué suwígame, 'lige Esusi 'yuga ra'íchale pe'wera, regá anele:

<sup>19</sup> —Mué Esusi ralámuli beníriame, Moisesi a'rele bilé osilí 'we 'ya regá anime: Bilé rió mukusá, 'lige a'resa mukí tabilé 'cho 'wesi 'kúchiga, 'liko alué mukúgame bonila rewimeli ju alué mukí napurigá 'kúchigame nímala alué mukí gunámakame

alué mukúgame bonila 'yuga asigá, 'lige alué mukúgame bonila 'kúchila o'chérisa napurigá alué mukúgame 'kúchila kárélamala —anele alué ralámuli saruseo.

'Lige abiena regá anele:

<sup>20</sup> —Sinéchigo mochile gichao ejtemali napu rejimá nile, 'lige alué wa'lula ba'chila rewale mukí sineko, 'lige mukule ba'chila tabilé 'cho 'wesi 'kúchiga. <sup>21</sup> 'Lige alué bonila rewale alué repola 'lige 'ma mukúlechigó tabilé 'cho 'wesi 'kúchiga, <sup>22</sup> 'lige alué abé u'tabela rewale alué repola 'lige 'ma mukúlechigó tabilé 'cho 'wesi 'kúchigachigó. 'Lige alarigá ikile alué gichao napu chega rijimala nile. Alarigá suwile suwábaga alué rijimá. Alué gichao ejtemali suwírisa, mukule alué mukí —anile alué ralámuli saruseo.

'Lige alarigá anesa, 'lige regá rukele:

<sup>23</sup> —Napu'lige alé rewagachi sebasa alué gichao ejtemali 'lige alué mukí, aleka ¿chieri 'nalina upila nímawé alué mukí napu alué gichao rió gunámakame nile?

<sup>24</sup> 'Lige Esúsika nejele:

—Tabilé 'la námaka mochí 'emi tabilé 'la machí 'emi Onorúgame nila ra'íchili, tabilé machí 'emi churigá ko Onorúgame a'walila. <sup>25</sup> Alué napu ekí seba rewagachi nibilé umugí nibilé riótiri newímala, aleka suwábaga ralámuli napurigá santo ánjeli nímala, alué 'pa rewagachi mochigame santo ánjeli. <sup>26</sup> Aka alué bo'né Moisesi osálige'é pe'kabi osilí napu ruwí rajá illigó alué u'tá rojá, alé pe'kabi osilichi ruwí rewagachi simíbame ko ralámuli suwisá. 'Lige alé ruwí regá: «Ne ju Onorúgame 'lige Abraámi ne'chí oyérame ju, 'lige Isaki 'lige Akobo», anime chujkúture alé osilichi.† <sup>27</sup> Onorúgame níriká tabilé i'té suwígame. Suwábaga ajágame ju. 'Émika tabilé machí.

*Jena ruwimela Esusi ruwíligo tachiri ko alué nulali rejcholi abé najtékame*

<sup>28</sup> Alemi nawale bilé alué napu Moisesi nila nulalí beníriame nile, alué benírameka akea asale alieri benírachi Esusi, akea asale 'we a'lá nejechi alué Esusi. 'Lige alué benírameka regá rukele alué Esusi:

—¿Tachiri júkó alué nulalí 'we najtékame?

<sup>29</sup> 'Lige Esúsika nejele:

—Alué 'we najtékame nulalí regá anime júché: «'Emi ralámuli israelita, 'we a'lá 'nátaga gepúwaká ye ra'íchili. Bi'lepi ju Onorúgame abé Wa'lula. Tabilé 'wesi i'té uché bilé. <sup>30</sup> O'maka 'we galewa Onorúgame, 'la bi'lepi nátili 'nátaga Onorúgame 'yuga.» Alué ju 'we najtékame nulalí rejcholi. 'Lige uché bilé nulalí rejcholi regá anime júché: <sup>31</sup> «Napurigá galé 'emi a'boi alawala, alarigá galewa uché jaré ralámuli.» Ye oká nulalí

† 12:26 E'nesi Éxodo 3:1-6.



rejcholi 'we najtékame ju. Tabilé i'té uché bilé nulalí abé najtékame —anile alué Esusi.

<sup>32</sup> 'Liko alué benírameka regá anile:

—'We a'lá ju napurigá aní mué, 'we a'lá bijchiga aníbá mué bi'lepi ko Onorúgame, 'lige tabilé 'wesi i'tego uché bilé Onorúgame. Abiena 'we a'lá ju napu aní mué, regá aníá: <sup>33</sup> «O'maka 'we galewa Onorúgame, 'la bi'lepi 'nátili 'nátaga Onorúgame 'yuga. Napurigá galé 'emi a'boi alawala alarigá galewa uché jaré ralámuli.» 'We a'lá ju napurigá aní mué alarigá olásiká 'we a'lá ganíluga asimeo Onorúgame. Onorúgame níriká pecha 'me najtékame kéréko go'ame kógilia napu ju senteno 'lige ri'ligó 'lige baní 'lige me'liá ajágame napu ju akasí, bo'á, 'lige chibá e'kósimate alé amoba napu e'kósilime ju ajágame mayega 'we a'lá ne-jkúrimio Onorúgame alarigá olásiká —anile alué benírame.

<sup>34</sup> 'Liko Esúsika akisá 'we a'lá machigá ra'íchachi alué Moisesi nila nulalí benírame, regá anele:

—Amulí 'we a'lá elí mué Onorúgame napurigá alué Onorúgamete nulalime nímalá mué alawálachi —anele.

'Lige alésíko 'ma ta'wesi aminabi rukele.

*Jena ruwimela Esusi ruwílugo nóchali yárigame ko Onorúgamete*

<sup>35</sup> Esusi alemi ilile alé wa'lú re'obachi ra'pichí ralámuli beniria Onorúgame nila rejcholi. 'Lige Esusi regá rukele alué ralámuli napu jale alemi gepua:

—¿Chonigá aniché alué napu Moisesi nila nulalí benírame ju ralámuli, pe Rabí inolá ko alué Kristo? <sup>36</sup> Aka aba alué bo'né Rabí anileché 'ya, 'lige Onorúgame Alawala gu'irile:

Alué Wa'lula (Kristo) ne'chí nuleme ju.

'Lige Onorúgame anele alué Wa'lula:

«Jena asá wajtoná napasí neyuro ne mué saíla 'yuga.»

<sup>37</sup> Rabí «Wa'lula» aneme ju 'lige ¿'lacha Rabí inolá nímalawé alué Wa'lula?

'Lige alué ralámulika 'we a'lá gepua jale 'we ra'salagá.

*Jena ruwimela Esusi ruwílugo churigá ka bilé ralámuli gunarume*

<sup>38</sup> 'Lige Esúsika abichilubi 'we benírame alué we'ká ralámuli, regá anile:

—'Emi suwábaga ralámuli tase 'yuga e'yénawa alué we'ká ralámuli Moisesi nila nulalí benírame, alueka 'we riólame ju i'weli o'páchaga e'yénaga, 'lige 'we najkime ju napurigá 'we a'lá niraga repóriwa alemi we'ká riógichi. <sup>39</sup> 'Lige mochínilime ju alé napu mochime ju alué abé najtékame ralámuli alé pachá u'kuchí re'obachi «sina-goga» anilime. 'Lige mochínilime ju go'ame go'mea napu mochime ju ralámuli abé najtékame napu'lige piesta nerúgichi. <sup>40</sup> 'Lige

we'lisi jame ju iwérali tania Onorúgame alé re'obachi napurigá pe a'boi najkime ju napurigá suwábaga ralámuli machimela. 'We a'lá 'nátaga, alué Moisesi nila nulalí benírame 'ma bujeme ju galí alué umugí gunámakame. Alueka abéchigo wa'lú gastigo narémalagó.

*Jena ruwimela bilé mukí gunámakame nejílugo re'obachi suwábaga enomí napu nígame nile*

<sup>41</sup> Esusi alé re'obachi asagá kilí a'bé napu gajoni bo'ile enomí mochígame, alé etele Esusi we'ká rió 'we inígame enomí mochichi alé gajónichi. <sup>42</sup> Abiena etele bilé mukí gunámakame mochichi oká enomí ejchirúlgame 'we pee najteme. <sup>43</sup> 'Liko alué Esusi bayele alué bo'né 'yuga járome, 'lige anele:

—'La bijchiá ye mukí gunámakame 'we resitiri tabilé we'ká enomí mochíkuru enomí pe napu ekí nígame nílige. Onorúgame níriká abé najtékame ju napurigá 'sile alué mukí me'tagá alué ralámuli 'we enomígame, <sup>44</sup> napugiti suwábaga ralámuli 'we enomígameka nejime ju enomí pe rasírigame, 'lige ye mukika 'ma nejikuru suwábaga napu ekí nígame nílige, go'ame raliméleké aleké enome. Tabilé nígame nile uchérájpé —anile Esusi.

## 13

*Jena ruwimela Esusi ruwílugo 'ma gajumio alué wa'lú re'obá Onorúgame galila*

<sup>1</sup> Napu'lige ma'chínasa Esusi alé ra'pichí wa'lú re'obachi, bilé alué 'yuga eyéname anele:

—E'né mué, ramué benírame, ¡chiena 'la e'wele rejete newáriliga ye re'obá, 'lige chiena 'la wa'lú re'obá newárilu, 'we semátiri!

<sup>2</sup> 'Lige Esúsika nejele regá anigá:

—Júwé, 'we semati júké'é, nobi 'máchigo gajunáwili júkó bilé rawé, suwábaga ye rejte napu eté 'emi ye wa'lú re'obá newárigime wijchí mochímala gajuga.

*Jena ruwimela Esusi ruwílugo churigá nimio napu'lige amulí suwibachi gawí*

<sup>3</sup> 'Alige Esusi simile alé na'leho 'nálige gomichi Olibo rewégame rabó 'lige alemi asíbale. 'Lige alué 'yuga járome Pegro, 'lige Santiago, 'lige Juani 'lige Antresi, alé mochíga rukele alué nao rió alué Esusi:

<sup>4</sup> —¿Chiéniko gajúmala alué wa'lú re'obá napurigá aní mué? ¿Churigá 'la machiboa 'ma sebamio raweli 'ma gajúmili ko alué wa'lú re'obá?

<sup>5</sup> 'Lige Esúsika nejele, regá anile:

—'We a'lá 'nátaga mochíwa napurigá tabilé 'wesi 'yégamala se'nú ra'íchili ruigá napurigá oyéramala 'emi. <sup>6</sup> E'yénamala we'ká

ralámuli regá anisia: «Ne júkuru 'la bijchíá Onorúgamete julárigame», animela.

<sup>7</sup> > 'Lige we'ká ralámuli bijchígimela alué 'yégalí. 'Lige napu'lige ruyésiga 'emi nakó nerúlímio, tabilé majawa napugiti nerúlímili kame nakólime bajchá, nobi tabiléchigo 'cho suwibámili júkó ye gawí. <sup>8</sup> Alué we'ká ralámuli bilena gawichí ejerégame nakómala uché bilena gawichí ejerégame sayega 'yuga. 'Lige gawí a'wágame nokamela ichúrimi gawichí, 'lige 'we gurúlámala go'ame, tabilé itélimempá go'ame, 'lige nerúlámala naulítiri. Alakichi, tabilé 'cho sebámala aleké rawé, uché rajpé resíriga nímala abe.

<sup>9</sup> Abiena anele alué Esusi alué naó rió bo'né 'yuga járome:

—'We a'lá 'nátaga mochiwa 'emi. Sebámala bilé rawé napu a'lige o'toboli ju 'emi galírale mo'amia. Abiena o'toboli ju 'emi alé u'kuchí re'obachí napu «sing-ogoga» anilime ju, alé o'togá wejpisópua 'emi, 'lige abiena o'toboa 'emi alé napu e'wélala selígame mochí 'lige alé napu ajtí alué wa'lula rey ruwimela 'emi 'we a'lá bijchígime ko 'emi Onorúgame ra'íchálla. <sup>10</sup> Bajchibé ta'chó gajuchi gawí, bojchígimi gawichí sebámili júkuru ye ra'íchili 'we a'lala Onorúgame nila. <sup>11</sup> Napu'lige o'towá 'emi galírale mo'amia, tase we'ká natáwaká alarigáriga animea. Napu'lige o'wina 'emi ra'icha 'mi alé ra'íchili gatélichí, Onorúgame nejímala iwérali napurigá 'la gainámala 'emi ra'icha, pe bi'lepi nátili ra'íchámala 'emi, pe alué nátili napu nejí Onorúgame napugiti tabilé 'oni nímala 'emi ra'íchame, Onorúgame Alawala\* ra'íchámala 'emi chu'álachi. <sup>12</sup> 'Lige bilé rió ba'chirúgame tabilé oyérame ne'chí, bo'né bonila nejímala alé 'mi ra'íchili gatélichí napurigá cha'piboa 'lige napurigá me'liboa cha'pisá pe ne'chí oyérame kóriká. O'nola tabilé oyérame nisa ne'chí, 'lige kúchila 'la oyérame nisa ne'chí, o'nola 'ma nejímala alé ra'íchili gatélichí alué kúchila napurigá me'liboa alué kúchila ne'chí oyérame kóriká. 'Lige jaré 'kuchi tabilé oyérame nisa ne'chí 'lige o'nólaka 'la oyérame nisa, 'ma nejímala alué a'boi o'nola o eyela ma napurigá me'liboa ne'chí oyérame kóriká. <sup>13</sup> Suwábaga alué ralámuli ne'chí oyérame, we'ká ralámulite tabilé galewa. Suwábaga ralámuli ne'chí oyérame 'la anachasa napusí suwí, alueka 'la 'pa rewagachi sebámala.

*Jena ruwimela Esusi ruwligo bajkimeo bilé rió alé wa'lú re'obachí 'we cha'sime napurigá Remónisi*

<sup>14</sup> > Napu'lige etea 'emi alué rió pe 'yégalí ruwime alé pachá re'obachí, 'we 'yégame

napurigá Remónisi, 'we a'lá na'tawa napurigá anime osale alué Ranieli 'we 'ya. Napu ekí 'la osilí ra'íchame nile alué apeli 'we a'lá inámaka ra'íchawa. A'lige rawé napu ekí mochírúpá alé Jurea anilichí ejiro 'lige etésiga alué 'yégalí ruyeme ralámuli yati júmisiwa chíbimía alé gawichíkami. <sup>15</sup> 'Lige napu ekí alé galimopa mochiga etésiga alué 'yégalí beníriame ralámuli, tase mo'iboa alé a'boi galíachi pachá tábiri 'mea, yati júmisiwa 'nalina. <sup>16</sup> 'Lige apiépiri ralámuli alé 'mi asarachi mochisa napu ju echíachi, alé mochiga etesa alué 'yégalí beníriame ralámuli tabilé simawa ku galírale we'lí o'pacha nolamia, aminá júmisiwa 'nalina. <sup>17</sup> ¡Resía alué umugi napu rojega mochí a'lige rawé o napu ekí u'kuchí 'kúchiga mochí a'lige rawé, tabilé gainámala júmasia! <sup>18</sup> Onorúgame tániwa napurigá tabilé romó nolínámala alué rió 'yégalí beníriame ralámuli, <sup>19</sup> napugiti cha resíríká nímempá a'lige rawé, ta'wesi rawé anaga. 'Yako tabilé siné aliena enárigá nile, napusí sebasa alué rió 'yégalí ruyeme ralámuli a'lige kulí 'we enárigá nímala. 'Lige abé a'kinana tabilé enárigá nímala. <sup>20</sup> Onorúgame tabilé elámala napurigá we'ká rawé resí ikimela ralámuli. Onorúgame elásaká napurigá we'ká rawé resí nilámala ralámuli 'liko 'ma suwimela suwábaga ralámuli. Onorúgame 'we galé alué ralámuli napu ekí 'la bijchígime ju Onorúgame nila ra'íchili, alekeri pe'wera resí nílímala ralámuli.

*Jena ruwimela Esusi ruwligo tabilé bijchígime ko napu animela alué ralámuli 'yégalí ruwime*

<sup>21</sup> Abiena anele Esusi:

—Napu'lige sebasa raweli, tase bijchígíwaká napu aní ralámuli. Jaré ralámuli regá animela: «E'nésibá, jena ajtí alué Onorúgamete julárigame rió o'wé jawániliga.» 'Lige jaréchigo animela: «E'nesi, 'mi ajtí alué Onorúgamete julárigame rió o'wé jawániliga.» Tase oilawa, tabilé Onorúgamete julárigame ju alué rió. <sup>22</sup> We'ká sebámala alué 'yégame Onorúgamete julárigame korime ralámuli o'wé jawániliga, 'lige jaréchigo ruwime korimela napu anele Onorúgame. 'La suériga ra'íchiga 'yegámala, 'we a'lá semá nokimela, 'la 'yonti ka nokimela, napurigá 'la najátamala suwábaga napu ju 'emi ne'chí oyérame. <sup>23</sup> 'We a'lá 'nátaga, ne 'we a'lá ruwíguru jipe bajchabé tabilé 'cho alakichi.

*Jena ruwimela Esusi ruwligo uchéchigo nawamio*

<sup>24</sup> > Napu'lige 'ma simírisa alué resítiri raweli, rukuámala, 'lige alué rayénali 'ma tabilé ra'ósiga asimela, 'ma tabilé mechega ilimela rukó, <sup>25</sup> 'lige so'pili

\* 13:11 Napu ju Espíritu Santo yolí ra'íchaga.

rujsúmala, 'lige suwábaga nokomela alé rewagachi nerúgame. <sup>26</sup> A'lige etémala 'emi re'kíname alué Onorúgamete julárigame alé 'pa rewagáchikana napurigá rió neraga nolíralekana (napu ju Esusi), 'we a'wágame 'lige 'we semátiri, 'we alá nírálime. <sup>27</sup> 'Lige yati julámala we'ká santo ánjeli alé 'pa rewagachi mochígame alué ralámuli napubúnliga napu ju alué Onorúgame oyérame ralámuli, bochígimi gawichí julámala alué santo ánjeli 'lige bochígimi alé 'pami rewagachi julámala napubúnliga.

*Jena ruwimela Esusi ruyéligo bo'né 'yuga járome amulí sébachi bamunú 'ma sawarame ko alué chuná*

<sup>28</sup> › 'We alá benisíba ye 'nátili churigá ka bilé chuná: Napu'lige ku uché 'we chí'lame kachí alué chuná atawala guwala, 'lige 'ma ku sawarachi, «'ma amulí seba bamunú» aniamé jíturu. <sup>29</sup> A'chigóriga júkuru, napu'lige 'ma mukusá rayénali 'lige rujsuchi so'pili, machíboa 'ma a'mulipi ko raweli Onorúgamete Julárigame ku nawámichi. <sup>30</sup> Neka 'la bijchiá 'la ruwí, suwábaga alarigá ikimeo ta'chó suwichi ralámuli jipe ejperégame.† <sup>31</sup> Rewagá 'lige gawítiri siné rawé 'ma tabilé ne ikimela nobi ne nila ra'íchalika tabiléchigo siné we'kámalagó.

*Jena ruwimela Esusi ruwíligo tabilé 'wesi 'la machió aliéniko ku sebamio uché alué Onorúgamete Julárigame*

<sup>32</sup> › Tabiléchigo 'wesi machió aliéniko alakimeo, nibilé alué santo ánjeli 'pa rewagachi mochígame machí, nibilé alué Onorúgame Inolá machí, pe Onorúgamecho 'la machí aliéniko alakimeo.

<sup>33</sup> › 'We alá 'nátaga mochiwa, 'lige 'we alá tania mochiwa Onorúgame a'walila napurigá tabilé che ikimela 'emi, pecha 'wesi machigá mochígame aliéniko ku uché nawamio Onorúgame Inolá. <sup>34</sup> Alué 'nátika a'chigóriga ju napurigá alué rió napu simile mejkami, 'lige a'rele alué bo'né galila 'lige nóchame a'rele repútiga alué galí, 'lige a'pílipi nóchame 'yasa a'rele nóchali 'wana, 'lige ajchale bilé rió alé yochi 'lige 'we alá anele napurigá 'we alá 'nátaga asimela 'we alá repuka. <sup>35</sup> 'We alá 'nátaga mochísígo, pecha 'wesi 'la machigá mochígame aliéniko nawamio alué galí nígame, chónachi nawámaré siné kachí o nasipa rukomí nawámaréma siné kachí, o'tolí sinachi sebámaréma siné kachí, 'ma che'lachi sebámaréma, pecha machirua. <sup>36</sup> 'We alá 'nátaga mochiwa 'la e'negá, napurigá 'la tabilé okoka bi'tígame rewimela ku nawagá. <sup>37</sup> Ye ra'íchili napu

ruyé ne 'emi, ruwí ne napurigá suwábaga ralámuli machigá mochímala. ¡'We alá e'negá mochísígo!

## 14

*Jena ruwimela Esusi saíla 'ma cha'pinániligó Esusi miéklichí rawé*

<sup>1</sup> 'Ma oká rawé rokáréle sebamia raweli wa'lú omégachi napu wa'lú piesta newame nile ralámuli jurío, Páskua anilime omali napu baní go'yame nile alué ralámuli jurío, tase kawali (lebarura) ro'igá newárigime baní. 'Lige alué e'wélala balé 'lige alué we'ká rió Moisesi nílala nulalí beníriame 'nátales churigá 'la níligo cha'piá Esusi 'yégiga ra'íchaga, 'lige me'liá. <sup>2</sup> 'Lige jaré alué balé 'lige jaré alué Moisesi nílala nulalí beníriame anile:

—Tabilé chérigá me'liboa wa'lú piesta nerúgichi, cha we'ká rioga ilimémpá, we'ká ralámuli mochímala Esusi machime, 'lige bochí animela akiná.

*Jena ruwimela bilé mukí ba'wí ro'éligo Esusi mo'ola, 'we semá júkame ba'wí*

<sup>3</sup> Esúsika similige alé we'ká riógichi Betania rewégichi, Simoni rewégame rió bejtélachi napu abé 'yabé 'we nayume nilige alué 'we chátiri wejchagoni («lepra») anilime nayulí yolí ra'íchaga). Napu'lige alé galírale ajtígichi go'ame go'yá alé re'lé ilígame mésachi kilí gayena asagá go'yame nile go'ame, a'lige bajkile bilé mukí alemi bilé u'tá botea rejtete newárigime o'ká nawá ba'wila ro'ágame 'we semá júkame. (Yolí ra'íchaga «nardo» anilime ju alué nawá.) 'We najteme nile, tabilé na'lógame ba'wí. Alué mukí 'ma gajsínale alué u'tá botea o'palala 'lige Esusi mo'ólachi ro'ele alué ba'wí 'we semá júkame. <sup>4</sup> 'Lige jaré alemi mochígame tabilé galele, 'we ayole, 'lige regá anile a'boi:

—¿Chonigá suwábaga ro'éleché alué nawá ba'wila Esusi mo'ólachi? 'Ma cha olákuru, 'ma suwábaga go'líkuru. <sup>5</sup> 'We alá najtegachi raliné'télikuru, napu ekí meme ju bilé rió bilé bamí nóchaga. 'Lige suwábaga alué enomí alué 'we resítiri ralámuli kógitélikuru tabilé enomígame.

Alarigá anile alué ralámuli 'lige 'we ayola mochile alué mukí 'yuga.

<sup>6</sup> 'Liko Esúsika anele alué ralámuli:

—'Ma tabilé chati 'nata mochisi. Ye mukika 'we alá semá 'smíkuru alué nawá ba'wila 'we semá júkame ro'ea ne'chí mo'ola.

<sup>7</sup> Alué 'we resítiri ralámuli tabilé nígame, alueka senibí mochímala napu 'emi mochí, 'lige 'la gu'írinilisiká 'emi, gu'íriwagó alué ralámuli tabilé nígame enomí napu'lige 'emi gu'írinilisa, nobi neka tabiléchigo we'lisi asimélagó 'emi 'yuga. <sup>8</sup> Ye mukika 'ma

† 13:30 Jaréchigo aní 'la ikimeo ta'chó suwíbachí alué ralámuli jurío. 'Lige jaréchigo aní 'la ikimeo napu'lige nawámili ju uchéchigo Esusi. Tabilé 'la machirú.

bajchabé neraga ro'ékuru ne'chí alué nawá ba'wila 'we semá júkame napu ro'émili nilige ne'chí napu'lige ne mukú. Ye mukika 'we a'lá semá 'smíkuru. <sup>9</sup> Neka 'we a'lá bijchiá aníbá, napu'lige ralámuli napunápurimi yawáchi beniria Onorúgame nila ra'íchili, 'we a'lá ruká ra'íchámala napurigá 'sile ye mukí jipe rawé, alarigá 'la machigá mochímala ralámuli, 'lige tabilé siné we'kuámala.

*Jena ruwimela Jurasí chojkíligo se'wináriga 'nata*

<sup>10</sup> A'ligerikáchi alué Jurasí Iskariote, bilé alué makué oká Esusi 'yuga járome, simile alué e'wélala balé 'yuga ra'íchamia, regá anemia:

—Ne 'la nejkúrimala Esusi cha'piá.

<sup>11</sup> Napu'lige akisá alué e'wélala balé 'we a'lá nerale 'lige 'we ra'sálale, 'lige regá anile: —Ramué najtétíwa mué 'la nejkúrisaká Esusi cha'piachi.

Alésíko alué Jurasí Iskariote chojkile 'nata chíeniko kochiena 'la ko Esusi cha'piá.

*Jena ruwimela Esusi gompaniérola newáligo go'ame Páskua anilime piesta sebasa go'yame*

<sup>12</sup> Sébale raweli Páskua piesta oliame,\* baní go'achi tase kawali ro'igá newárigime, a'lige rawé napu ekiná riógichi me'liame nile galírale bilé bo'á Onorúgame kógimia. (Alueka pe 'nátaga nokame nile napu'lige alué santo ánjeli tabilé me'ale alué bajchá o'chérigame ejtemali israelita alé Ejipto.) A'lige rawé alué Esusi 'yuga járome rukele alué Esusi:

—¿Koché 'la nítékó alué go'ame newalía Páskua piesta oliachi go'yame?

<sup>13</sup> 'Lige Esúsika júlale oká alué bo'né 'yuga járome regá anegá:

—Simíbaga alé Rusaleni, 'lige alé najtepámala 'emi bilé rió ba'wí o'kame bilena sikolichi, 'lige yati najátawa, <sup>14</sup> 'lige napu bajkí alé galírale osámama iligame, anewa alué rió galí nígame: «Alué wa'lula ramué nuleme regá aní: ¿Koché go'mela ne go'ame ne 'yuga járome 'yuga alué go'ame jipe alí go'yame Páskua anilime piesta sebasa?» <sup>15</sup> 'Lige alé o'toboli ju 'emi bilé galí osámama iligame, alué galí amoba iligame tanéwili ju 'emi, 'lige regá animela alué galí nígame: «Ye galí amoba iligame unéwagó, jena newawa go'ame, 'ma 'la sébali nerúture suwábaga tábiri napu unémala 'emi», animela. 'Lige 'emi alé newawa go'ame, o'maka ramué go'ame.

<sup>16</sup> 'Lige alué oká rió Esusi 'yuga járome simíbale alé Rusaleni 'lige najtépaile bilé rió ba'wí o'kame bilena sikolichi, 'lige yati najátale 'lige mo'ile 'pa amoba osámama

iligame galichi, 'lige etele 'ma 'la sébale nerugo suwábaga tábiri go'ame newala, 'lige alé newale alué go'ame Páskua anilime piesta sébachi go'yame.

<sup>17</sup> A'lige 'ma chonaso sébale Esusi bo'né 'yuga járome 'yuga. <sup>18</sup> 'Lige 'ma alé mésachi mochiga go'yá, Esusi anele alué bo'né makué oká 'yuga járome:

—Bilé 'emi ne bo'né 'yuga eyéname napu go'yá ajtí jena ne 'yuga, 'ma ne saíla kéré. Nejkúrimala ne'chí cha'piachi.

<sup>19</sup> Napu'lige akisá alué Esusi 'yuga járome alanichi Esusi, suwábaga 'we sewele, 'lige a'pilipi anele alué Esusi:

—Neka tabilé júché.

<sup>20</sup> 'Lige Esúsika regá anele:

—Pe bilé ne 'yuga járome ju, napu ne 'yuga go'yá ajtí jena. <sup>21</sup> Onorúgamete julárigame 'pa rewagáchika napurigá rió neraga 'ma me'liboli ju napurigá aní osilichi napu ju Onorúgame nila. 'Lige alué rió napu nejkúrimala ne'chí cha'piá wa'lú gastúgo rewimela. Abé 'la nítéligé alué rió tabilé ocheria.

<sup>22</sup> Napu'lige go'yá mochiga go'ame, Esúsika 'wile bilé baní,† alué baní napu tabilé ro'igá newárigime nile kawali, 'lige cheliera 'yale Onorúgame, 'lige 'ma cheliera 'yasa Onorúgame, chí'wánale alué baní, 'lige 'yale alué makué oká rió bo'né 'yuga járome, 'lige regá anele:

—Go'sí, yeka ne sa'pala ju.

'Lige go'ale.

<sup>23</sup> 'Lige 'wile alué baso napu ro'agá bajlíme nile i'wili ba'wila rekútame, 'lige 'ma cheliera 'yasa Onorúgame, 'yale alué bo'né 'yuga járome 'lige o'maka bajíle, <sup>24</sup> 'lige Esusi regá anele alué bo'né 'yuga járome:

—Ye i'wili ba'wila pachágana manígime ne elalá ju, alué elá napu ma'chínimili ju ne me'liachi, 'lige ne mukugá wa'lú gu'irimili ju ne 'emi ralámuli, regá gatele Onorúgame ralámuli jipe ejperégame gu'irimia napurigá 'la bi'wígime alawégame nímalá. <sup>25</sup> Neka 'la ruwí, tabilé uché bajímio ne ye pachágana manígime i'wili ba'wila, napu'lige uché chokia ralámuli Onorúgame nulea, a'lige kulí uchéchigo bajímala ne.

<sup>26</sup> 'Ma go'sá 'lige wikarale Onorúgame wikala, 'lige wikarasa simíbale na'lebo 'nálige rabó Olibo rewégichi.

*Jena ruwimela Esusi ruwíligo bi'neli a'réwali ko bo'né Esusi*

<sup>27</sup> 'Lige Esusi regá anele alué makué oká rió bo'né 'yuga járome alé rabó:

—Jipe rukó, suwábaga 'emi ne 'yuga járome, 'ma a'rémala 'emi ne'chí. Aka regá anime chujkúché bilena alé Onorúgame nila

\* 14:12 Alué ralámuli israelita piesta aneme ju a'boka alué Páskua rewégame rekó tabilé yawime ke a'lige rawé.

† 14:22 Alué baní se'unátiri nile tase napuyeri alué jena nerúgame.

apélíchi: «'Ma me'liboli ju alué bo'á neseme, 'lige alué bo'áka 'ma ralá mo'bámala ichúrimi.»<sup>†</sup> 28 'Lige ne ku ajánasa, alé Galilea simé ne bajchabé ta'chó jsichi 'emi alemi —anile Esusi.

29 'Lige Pégroka anele Esusi:

—Rekó uché jaré 'ma suwábaga simúbige, neka abichilubi mué 'yuga einámala.

30 'Lige Esúsika regá anele alué Pegro:

—Jipe rukó be'bé ta'chó sinachi o'tolí osá, baisá animela mué: «Tabilé machí ne Esusi.»

31 'Lige Pégroka uchéchigo abichilubi, regá anele:

—Rekó me'liáe ne, neka tabilé majámala ruigá 'we a'lá machime ko ne mué.

Suwábaga alué Esusi 'yuga járome alanilechigó.

*Jena ruwimela Esusi tánligo gu'lrili Onorúgame alé Jetsemáni anilíchi*

32 'Lige sébale alé we'ká Olibo nerúgachi Jetsemáni rewégichi, 'lige alé alué Esusi regá anele alué bo'né 'yuga járome:

—Jena ejtebíwagó 'emi, neka Onorúgame tánimala iwérali.

33 'Lige pe alué Pegro 'yuga simile alué Esusi, abiena alué Santiago (Akobo) 'lige alué Juani, 'lige 'we sewele alemi alué Esusi.

34 Regá anele alué Esusi alué bakiá rió:

—'We chálá ne, amulí mukú ne seweka. 'Emi bakiá jena ejtebíwagó, 'lige tase okópua, 'la e'negá mochiwa.

35 Alésíko alué Esusi simile abé a'mibemi waná Onorúgame 'yuga ra'ichamia, iwérali tánimia, 'lige alé wijchí chujkábale ajkaná, 'lige tánale Onorúgame napurigá tabilé resi ikimela alué bo'né Esusi. 36 Regá anile Esusi:

—Mué ne O'nola («Abba» anile bo'né ra'ichálíla), mueka walú a'wali nígame ju, neka tabilé najkí napurigá ralámuli resi olámala ne'chí. Mué najkísaká, abirigá resi ikiméleké ne —anile.

37 'Lige sébale ku alé napu a'rélige alué bakiá bo'né 'yuga járome, 'lige 'ma okókame rewale. 'Lige Esusi anele alué Simoni (napu abiena Pegro anilime nile):

—¿Gojchigá bo'í mué Simoni? ¿Nibilé pe bilé 'ora anáchapá mué tabilé gojchigá? 38 'We a'lá e'negá mochiwa, 'we tana mochiwa Onorúgame napurigá ta neyúrimala Remónisi nila 'nátíli. 'Émika 'we a'lá sébali olánilime ju, eligá 'emi tabilé sébali olame ju.

39 Esúsika uchéchigo simile Onorúgame 'yuga ra'ichamia iwérali tánimia a'chigóriga napurigá pe be'bepi. 40 'Lige uchéchigo siné ku sébale napu a'rélige alué bo'né 'yuga járome 'lige uchéchigo siné okókame

rewale. Noli 'ma tabilé gayena e'negá mochiga, 'lige nobi tabilé chérigá nejiasa nílile rukílíla Esúsita chonigá okoka bi'tigó.

41 'Lige uchéchigo siné simile Onorúgame si ra'ichamia 'lige uchéchigo nawale Esusi alé napu a'rélige bo'né 'yuga járome, 'ma baisá nile. 'Lige regá anele bo'né 'yuga járome:

—¿Abijí okoka bi'tirú? 'A bujsirésibá. 'Ma we'lisi okole 'emi, ya 'ma cha'piboli júpá ne jipe kulipi alué napu Onorúgamete julárigame ju 'pa rewagáchika napurigá rió neraga. 'Ma aleka e'yena alué ralámuli cha nokame. 42 ¡O'weti mochisi, 'ma simawa, 'ma a'beka ená alué napu ne 'yuga eyéname nílige, 'ma a'beka ená nejkúrimia ne'chí cha'piá!

*Jena ruwimela 'ma cha'pílirigo Esusi*

43 Bijí ra'icha ilígichi Esusi alemi sébale alué Jurasí napu 'yabeko Esusi 'yuga eyéname nílige. Jurasí we'ká rió 'yuga enale 'lige alué we'ká rió siparina o'ká e'yénale 'lige i'welí gusitiri. 'Lige alué e'wéla balé 'lige alué Moisesi nila nulalí beníriame 'lige alué jurío ralámuli nuleme, aluete julárigame nile alué ralámuli Esusi cha'píniliga. 44 'Lige alué Jurasí napu nejkúrisia enale cha'piachi Esusi, regá anele alué we'ká ralámuli: «Alué napu chu'migá repori ne alué ju Esusi, yati cha'pibóaká 'lige o'tobóaká», regá anele.

45 'Lige alemi sébaga alué Jurasí regá anele alué Esusi:

—¡Mué Wa'lula ramué beníriame!

'Lige alarigá anesa, yati chu'mile banachí. 46 Alésíko alué we'ká ralámuli yati cha'pile alué Esusi.

47 'Lige bilé rió Esusi 'yuga eyéname yati ma'chí pale siparina 'lige 'ma rejipúnale najkala bilé alué wa'lula balé piónila. 48 'Lige Esúsika regá anele alué we'ká ralámuli:

—¿Chonigá sirúpaché siparina o'ká igútiri ne'chí cha'pimea? ¿Chigórigame ju ne? 49 Aka ne alé wa'lú re'obachi ra'pichí a'sáché 'emi beniria Onorúgame nila ra'íchili, aka aleka peka siné cha'píché 'emi ne'chí. Peba alarigá nímili nílige, siné rawé cha'piboli nílige ne napurigá aní alué Onorúgame nila ra'íchili.

50 'Liko suwábaga alué Esusi 'yuga járome 'ma júmasale, 'ma bi'neli a'réleru Esusi.<sup>S</sup>

51 Napu 'lige Esusi o'tiachi, nujubá enale bilé re'malí, pe bilé chiní manta gemagá, tase o'páchaga, 'lige alué Esusi o'tome ka me'lisale alué re'malí 'lige pe alué chiní manta cha'pile, 52 iligá alué re'malika neyúsale 'lige 'ma 'yeri 'ma kíbale, pe alué chiní manta cha'pigá rejpile alué cha'pime ka.

† 14:27 E'nesi Zacarías 13:7. S 14:50 Pe jena olagá anime nile napu 'lige aniá Esusi abé i'bé (e'nesi 14:27): «'Ma ra'lá mo'bámala alué bo'á 'lige bi'neli rejipimala alué bo'elo bo'á neseme.»

*Jena ruwimela e'wélala gustisia oláligo Esusi*

<sup>53</sup> Lige 'ma o'tóliru alué Esusi alué wa'lula balé bejtélachi. Alé napaile alué e'wélala balé, 'lige alué jurío ralámuli nuleme, 'lige alué Moisesi nila nulali beníriame. <sup>54</sup> Napu'lige Esusi o'tiachi, alemi guwánami enale alué Pegro 'naka boichika, 'lige alué Pegro alemi ra'pichimi sébale alé wa'lula balé galilachi ra'pichí, 'lige alé asíbale sujkáliga re'obachi tebume 'yuga.

<sup>55</sup> 'Lige alué e'wélala balé 'lige suwábaga alué e'wélala nuleme 'we jale rukea e'karúriga, pe machínaliga chonirá 'lige churigáriga 'la nílga me'liá alué Esusi, tabilé rewale napurigá me'liboa Esusi. <sup>56</sup> Jaré 'we jale 'yégalí ruyá, tabiléchigo neyúrale ko pe ichúromi chibirigá ra'pichí, 'lige jaréchigo se'wináriga ruwiligame, tabilé bi'lepi 'nátale. <sup>57</sup> 'Lige jaréchigo abiénachigó pe 'yéliga, regá anile:

<sup>58</sup> —Ramueka akirúrturu regá anichi ye: «Ye wa'lú re'obá ralámuli newálala 'ma gajunámala ne 'lige bakíá rawé kachi uchéchigo bilé newámala ne, alueka tabilé ralámuli newalila nímala» aniéturu.

<sup>59</sup> We'ká ra'íchale kákobá, tabiléchigo bi'lepi 'nátali ra'íchale ko, cha ichúromi chibirigá ruwiligame.

<sup>60</sup> 'Liko alué wa'lula balé o'weti ilísale, 'lige alé iligá rukele alué Esusi:

—¿Bijchiga aní ye ralámuli napurigá aní? ¿Chonigá ta neje mué?

<sup>61</sup> Esúsika tabilé nejele. 'Liko alué balé wa'lula uchéchigo rukele, regá anele:

—¿Mué ju alué Kristo, alué Onorúgame Inolá?\*

<sup>62</sup> —Júwé, ne ju —anile alué Esusi—. 'Lige 'emi etémala alué napu Onorúgamete julárigame ju 'pa rewagáchika rió neraga napu'lige ku 'pa rewagachi ajtígachi Onorúgame 'yuga, 'lige abiena etémala 'emi napu'lige ku 'pa rewagáchikana nolíralekana enágichi.

<sup>63</sup> 'Liko alué wa'lula balé banasuka chí'wánale bo'ne o'páchala. (Alueka ruwime nile 'we ayóligo alué wa'lula balé alanichi alué Esusi.) 'Lige regá anile:

—Ya 'ma 'we a'lá sébali akirúke'é, tase rokáré uché bilé rió napurigá ra'íchámala Esusi saíla neraga. <sup>64</sup> Suwábaga 'emi 'we a'lá aké Onorúgame saíla niraga ra'ichio ye Esusi. ¿'Émika chonígó? ¿Cholátékobá?

'Lige suwábaga ralámuli 'we anile napurigá me'liboa alué Esusi ra'ichaligo Onorúgame saíla neraga. <sup>65</sup> Jaré ralámuli a'kachípale gawéliga alué Esusi, 'lige bulele busila 'lige a'wágame o'chole, 'lige regá anele:

—¿Machígobá chieri 'siá mué o'choa!

'Lige alué re'obachi repúmeke 'we o'chole Esusi banachí sekate.

*Jena ruwimela Pegro tabilé machiórligo Esusi*

<sup>66</sup> Napu'lige Pegro alé ra'pichí ajtígichi, alemi nawale bilé mukí napu newime nile go'ame wa'lula balé, <sup>67</sup> 'lige alué mukí Pegro etesa alemi ajtíggame sujkáliga, we'lisi e'negá ilile, 'lige anele:

—Muéchigó abiena 'yuga eyénituru alué Esusi Nasareta bejtéggame.

<sup>68</sup> Lige Pégroka anele:

—Neka tabilé machime ju alué Esusi, neka pecha machígó chonigá anió mué.

'Lige abé a'mibemi simile Pegro alé yochi. Alígerikáchi sinale bilé o'tolí owila. <sup>69</sup> 'Lige alué mukí go'ame newime balé wa'lula napu'lige etesa alé yochi alué Pegro, anele uché jaré napu e'yénale alemi yochi:

—Ye rió Esusi 'yuga eyéname ju.

<sup>70</sup> Al'iko Pégroka chéchigo siné anile:

—Neka tabilé machiáwé Esusi.

'Lige alué ralámulika regá anile:

—Bijchiá mué alué Esusi 'yuga eyéname ju, mué Galilea bejtéggame kámechigó, napugiti napurigá Galilea ejperéggame ra'íchame kame mué.

<sup>71</sup> 'Liko Pégroka uchéchigo siné tabilé machiórile Esusi:

—Onorúgame gastigárimé ke ne'chí ta bijchiga anisáká ne —anile Pegro.

<sup>72</sup> Al'ige uché sinale o'tolí, 'ma osá nile siná. 'Liko alué Pegro nélále napu anélige Esusi. Regá anélige Esusi: «Mué Pegro, ta'chó osá sinachi o'tolí owila, baisá 'yegámala mué, tabilé machióríméla mué ne'chí.» Alieti nélegá, e'wele nalale alué Pegro.

## 15

*Jena ruwimela wa'lula selígame Pilato gustisia oláligo Esusi*

<sup>1</sup> Napu'lige che'lisá, ralámuli alé alué e'wélala balé 'lige alué jurío rapáile nuleme 'lige alué Moisesi nulalila beníriame, napaile alé o'maka ra'ichamia machimea cholátiká alué Esusi. 'Ma suwénasa ra'icha, o'tole alué Esusi 'we a'lá bulugá sekala alé 'mi wa'lula selígame Pilato ajtígichi. <sup>2</sup> 'Lige alemi o'tosá Pilátoka rukele Esusi:

—¿Mué ju Wa'lula rey alué ralámuli jurío nuleme?

'Lige Esúsika anile:

—Júwé, tase napurigá mué 'nata —anile Esusi.

<sup>3</sup> 'Lige alué balé e'wélalaka abiena we'ká ra'icha jale alué Esusi sayega, 'we cha

\* **14:61** Yolí ra'íchaga, alué balé wa'lula anile «Hijo del Bendito». Alué ralámuli judío tabilé siné anime nile «Onorúgame» olagá, cha najtékame nile alué ra'íchili rewá.

'síkame kóríle Esusi. <sup>4</sup> 'Liko alué Pilato uchéchigo rukele:

—¿Ta nejíama olá mué? 'La chekí tábiri ruyániguru alué e'wélala balé.

<sup>5</sup> Esúsika abirigá tabilé pe'tá nejele. Alué wa'lula selígame Pilátoka lala: «¿'La chonigá tabilé majáché? Peka nejé aníguru», 'lale.

*Jena ruwimela Pilato nuláligo gulusichi ujhagá me'íniliga Esusi*

<sup>6</sup> Nabí bamí Páskua piéstachi, Pilato su'páchame nile bilé nejkógame galírale bajchárige ajtígame. Ralámuli a'boi 'la aníme nile chieri 'la nútíká ma'chí pasía. <sup>7</sup> A'lige rawé mochile jaré rió me'ágame galírale mo'áriga, 'lige bilé Barabasi\* anilime nile. Barabasi 'lige alué uché jaré rió napúka e'yéname nile nakoga. <sup>8</sup> 'Lige alemi napaíle ralámuli, 'lige tánale alué wa'lula selígame Pilato napurigá ma'chí pámalá bilé napurigá 'sime nile alué Pilato napu'lige alué Páskua piesta nerúgichi. <sup>9</sup> 'Lige Pilátoka rukele ralámuli:

—¿Najkí 'emi napurigá su'panawa alué Wa'lula Rey ralámuli jurío nuleme? (Pe Esusi olagá anile alué Pilato.)

<sup>10</sup> Alarigá anile alué Pilato, 'we a'lá machíligame pe gíchiga o'tóligo alué e'wélala balé. <sup>11</sup> 'Lige alué e'wélala baleka abéchigo 'we jale ruyea ralámuli napurigá 'we animela ralámuli ma'chí pánalia alué Barabasi 'nalina tase alué Esusi. <sup>12</sup> 'Lige Pilato uchéchigo síné rukele alué ralámuli:

—¿'Émika choliame najkí alué napu 'emi Wa'lula Rey ralámuli jurío nuleme aneme ju?

<sup>13</sup> 'Lige ralámuli regá anile a'wágame:

—¡Gulusichi ujhawa! —noli bochí anile.

<sup>14</sup> 'Lige Pilátoka uchéchigo rukele:

—¿Tachiri chu'síkame júkó ye rió?

'Lige ralámulika uchéchigo anile abé a'wágame:

—¡Gulusichi ujhawa! —anile o'maka alué ralámuli.

<sup>15</sup> 'Liko alué Pilátoka ma'chí pale alué Barabasi pe napurigá 'la ra'sálagá ejtebímala ralámuli, tabilé ayoga alué Pilato 'yuga. 'Lige nulale napurigá we'sá wejpisópua alué Esusi wi'chite jiero uchúkame 'lige o'chí. 'Lige 'ma wejpisosa, 'ma lisensia nejile napurigá gulusichi ujhawa alué Esusi.

*Jena ruwimela sontalo 'we gawéligo Esusi*

<sup>16</sup> Alésíko alué sontalo o'tole alué Esusi alé ra'pichí wa'lula selígame bejtélachi, 'lige alé bayele suwábaga sontalo. <sup>17</sup> We'lí o'pachátirile chónaga sejtákame chinite newárigime, 'lige ujchele mo'chí gorona banawá wejchégame newárigime. <sup>18</sup> 'Lige repórale regá anigá:

—¡Kuíra mué Wa'lula Rey ralámuli jurío nuleme!

<sup>19</sup> 'Lige mo'chí wejpale we'sá bakate 'lige a'kachípale, 'lige chojkóbaka jaga napurigá 'we 'la nírame, pe gawéliga aníme ke anile.

<sup>20</sup> 'Ma suwénasa gawéliga Esusi, 'ma ku bujele alué we'lí o'pacha chóname sejtákame chinite newárigime, 'lige ku o'pachátale bo'né Esusi o'páchala, (Bujéliku o'pacha alué Esusi napu'lige Pilato nuláligo wejpisóniliga.) 'lige alésíko 'ma o'tóleru gulusichi ujchamia.

*Jena ruwimela 'ma gulusichi ujháririgo Esusi*

<sup>21</sup> Napu'lige pe kulí alemi o'towachi alué Esusi gulusichi ujchamia, bilé rió Sirene bejtégame Simoni anilime alemi seba enale napu Alejantro o'nola nile 'lige Rupo o'nola. 'Lige alué rió nuléleru alué sontáloté napurigá nejkúrimala alué gulusi o'towachi. <sup>22</sup> 'Lige o'tóleru Esusi bilena rabó alé napu Gólgota anilíchi nile, napu «Anayáwali Mo'ola», aníame kéré. <sup>23</sup> Napu'lige alé sebasá i'wílí rakala ba'wila 'yáleru rekútume «mira» anilime na'lógame, 'lige Esúsika tabilé chunule. <sup>24</sup> 'Lige re'pá gulusichi ujháleru klabo jáwaga sekala, 'lige alué sontáloka nachútale alué Esusi o'páchala bilé re'gí re'eka (napu «dado» anilime ju yolí ra'íchaga).

<sup>25</sup> Be'á tabilé 'cho rawilíchi, (Bakía 'ora enágichi rayénali ma'chínasa.) 'lige ujháliku Esusi gulusichi. <sup>26</sup> 'Lige alué sontáloka ujhale alué bilé rabileta osirúgime alé napu Esusi mo'ega chujkule re'pá amóbige napu ruwime nile chonigá ujháririgo alué Esusi alé gulusichi, regá aníme nile alué osilí: «Wa'lula rey, ralámuli jurío nuleme», aníme nile alué osilí. <sup>27</sup> 'Lige abiena ujhucháleru oká chigórigame gulusichi alé a'bé napu Esusi chujkúlige. Bilé chigórigame waj-toná ujháleru, 'lige bilé o'iná ujháleru. <sup>28</sup> Alarigá sébali olale napurigá aní alué Onorúgame nila ra'íchili regá aníme: «Resí oláliku alué ralámuli cha nokame 'yúriga.»

<sup>29</sup> Napu ekí ralámuli simárole alé, napu chibi anele, regá anele mo'loka:

—¡Ajá, mué napu na'mínátorié alué wa'lú re'obá, 'lige napu pe bakía rawé kachi ku newátorié mué uché alué wa'lú re'obá!  
<sup>30</sup> ¡Ku re'kiwa 'lige bo'nepi neyúsiwagó!

<sup>31</sup> Alué balé e'wélala, 'lige alué Moisesi nulalila beníríame, 'lige alué Esusi gawéliga regá anile a'bopi:

—Esusi we'ká ralámuli gu'írile, bo'népika peka gayénaché neyusia.

<sup>32</sup> 'Lige aminami regá anile 'we gawéliga:

—Re'kisa 'la kúpá alé gulusichi alué Kristo, alué wa'lula selígame rey israelita ralámuli nuleme, napurigá 'la bijchígiwa 'la

\* 15:7 Barabasi aniaká «bilé o'nó inolá» aníame nile.

bijchiá 'la nóchali 'yárigame ko Onorúgamete —aniá jale.

'Lige okánika chigórigame napu uchule Esusi chujkúgichi a'naguka, abiena 'we cha anele gawéliga.

*Jena ruwimela mukúligo Esusi*

<sup>33</sup> 'Lige 'ma rawilichi 'lige 'ma chónale rayénali, 'lige chónaga ilíbale bochígimi alé gawichí. Nasípagana enagá ku rayénale alué rayénali. <sup>34</sup> Aba'lige 'ma ku rayénachi alué rayénali, Esusi e'wele ra'íchaga regá anile:

—Eloi, Eloi ¿lama sabáktani? (Pe arameo ra'íchaga anile.)

Pe regá anigá anile: «Muérgo Onorúgame ne O'nola, ¿chonigá a'réché mué ne'chí?»

<sup>35</sup> 'Lige alué ralámuli napu ekí jale alé a'bé, napu akele alanichi Esusi, anile:

—¡Gepusil! ¡Elíasi bayéchane, napu ruwime nile napu anéligo Onorúgame 'we 'ya!

Tabilé 'la námaka akele alué ralámuli.

<sup>36</sup> A'lige biléchigo yati 'male bilé chiní sa'nabáchamia banawá rakala ba'wílachi pee rekútume 'we chijpúgame 'lige iguchi ujchale ba'nasoli kaboka, 'lige 'pa owele chu'chí napurigá Esusi chunumela ba'wila, regá anigá owele:

—Akabá pala nolínara Elíasi re'kíbumia gulusichi ye rió —anigá 'sile.

<sup>37</sup> 'Lige Esúsika a'wágame sinale, 'lige 'ma mukulé. <sup>38</sup> 'Lige yati chi'wale o'wékana re'kínaga alué wa'lú chiní pachá wa'lú re'obachi chujkúgame. <sup>39</sup> 'Lige alué wa'lula sontalo napu ilile alé o'wemi napu Esusi chujkule, etesa se'wináriga mukuchi Esusi, tase napurigá uché jaré rió, anile:

—Bijchiá 'la Onorúgame Inolá nile ye rió.

<sup>40</sup> Abiena jale jaré umugí e'negá mejkaka, alé ilile María Magdalena, Magdalena anilichi bejtégame, 'lige uché bilé María Santiago eyela 'lige José eyela (Santiago José bonila nile), 'lige uché bile mukí Salomé anilime.

<sup>41</sup> Alué umugí Esusi gu'írome nilige napu 'lige eyénachi Esusi ejiro Galilea. 'Lige uché jaré umugi jale alé, napu abiena moyénalige alé we'ká riógichi Rusaleni anilichi Esusi 'yuga.

*Jena ruwimela gatélirigo Esusi bilena ewarárigichi napuyeri wa'lú resó*

<sup>42-43</sup> Asale bilé rió José rewégame, Arimatea bejtégame we'ká riógachi. Alué rió 'lige uché jaré ralámuli e'wélala, alué ralámuli jurío nuleme nile. Alué rioka 'we alá najkílige napurigá yati sebámala raweli napurigá nulame nímala Onorúgame ralámuli alawálachi. 'Lige alemi ilile alué José etea me'liachi Esusi. 'Lige 'ma amulí chónachi rapakónala resíbilichi rawé,† alué

José simile napu Pilato asale lisensia tánimia o'tomea alué Esusi gatemia, napugiti chonásaká 'ma resíbilichi nílige. <sup>44</sup> 'Lige Pilátoka lalé: «'Macha mukúlepué.» 'Lige yati bayele alué wa'lula sontalo, 'lige rukele:

—¿Pala bijchiá mukule Esusi?

'Lige alué wa'lula sontáloka anele:

—Ya 'ma mukule.

<sup>45</sup> 'Liko Pilato alieri akisá, Pilato yati 'la elile José napurigá o'tomela Esusi mukúgame, <sup>46</sup> 'lige Joseka yati ralale bilé chiní rojsákame, 'lige re'kabusa alué Esusi gulusichi ujchárigame, alué chinite kabisa, o'tole gatemia 'mi alé ewarárigichi wejtosá rejtechi pachami, yóchika u'tá nile 'lige pachaka we'lé nile, 'lige 'yérale alé yochi bilé wa'lú chijtúligame rejteche 'we bejtégame. <sup>47</sup> 'Lige alué María Magdalena anilime, 'lige alué María, José ('lige Santiago) eyela, 'we alá etea jale alé rekálíachi Esusi.

## 16

*Jena ruwimela ku ajánaligo Esusi*

<sup>1</sup> Rawé resíbilichi simírasa, a'lige alué María Magdalena anilime, 'lige uché bilé María Santiago (Akobo) eyela, 'lige Salomé, alué bakía umugi ralale yowí rakala Esusi bo'ígichi mochiamia 'lige abiena ralale yowí rusurúgame 'we semá júkame alué Esusi ujchemia. <sup>2</sup> 'Lige 'ma romíkichi,\* be'á rayénali ma'chínachi, simíbale alué yowí 'we semá júkame ujchemia alué Esusi napu rekáliku Esusi, <sup>3</sup> 'lige anisia e'yénele alué bakía umugi:

—¿Chieri 'la nejkúrimala alué wa'lú rejte se'wí ajchalichi alé yochi ajtíggame?

<sup>4</sup> Napu 'lige sebasa alé yochi a'bemi, etele 'ma tabilé alé yochi ajtígó alué wa'lú rejte. <sup>5</sup> 'Lige mo'ile alé pachami ewarágichi alué bakía umugi. 'Lige etele alé mo'isá bilé santo ánjeli re'malí wajtoná ajtíggame. We'li o'páchigime nile alué santo ánjeli 'we rojsákame o'pacha. 'Lige alué umugika 'we majale, <sup>6</sup> 'lige alué santo ánjelika anele:

—Tase majasi. Ne 'la machí Esusi 'yaga e'yéneo 'emi, alué Esusi napu Nasareno anilime nile, napu gulusichi ujchagá me'líliku. 'Ma ku ajánale, tabilé bo'í jena, aka e'nésibá jena napu rekáliku, 'ma tabilé néré. <sup>7</sup> Simíbaga 'lige anéwaká Pegro 'lige alué uché jaré Esusi 'yuga járome, Esusi 'ma simela bajchabé alé Galilea rewéigichi ta'chó sébachi 'emi alemi, napurigá anilige ta'chó mukía.† Alé Galilea etémala 'emi napurigá anilige bo'né Esusi.

† 15:42-43 Alué ralámuli jurío níriká, abiena rawé aneme nile rukó, 'lige rawé abiénachigó.

\* 16:2 Alué ralámuli

níriká, yanchi ali rapagasa chojkime nile resíbilime rawé. Yanchi rukó che'lébagá resíbilichi nile 'lige melénala rukachégame resíbilichi nile. Esusi ajánasa aniwínala neraga nile.

† 16:7 E'nesi San Marcos 14:28.

‡ 16:8 Alué rió Mateo osale

bo'né nila líbrochi napu anime ju alué umugí 'we ra'salagá e'yénaligo.



<sup>8</sup> Liko alué umugí júmaka buyásele 'áwalisia majaga, 'lige tabilé 'wesi ruyele boichimi e'yénaga majaga.†

(Jaré osilí osirúgime 'we 'ya nerúgame pe jena suwéname ju. 'Lige jaré osilí osirúgime abé we'ká osirúgime ju, napu ma'chíname ju abé re'légana.)

*Jena ruwimela María napu Magdalena anilíchi bejtégame nile etéligo Esusi*

<sup>9</sup> Napu'lige ku ajánasa Esusi, María Magalena napu Magdalena bejtégame nile, alué bajchá etele alué Esusi be'á be'lí napu'lige chojkichi tarali (romíkichi). Abé 'yabé Esusi buyánilige gichao remónisi u'kuchípala alawá alaké mukichi. <sup>10</sup> Alué mukika simile ruyemia alué uché jarela napu nile Esusi 'yuga járome napu 'we seweka mochile nalá biji. Ruyele Esusi 'ma ku ajánaligo. <sup>11</sup> Akisá alué Esusi 'yuga járome, tabilé bijhígale.

*Jena ruwimela oká ralámuli etéligo Esusi*

<sup>12</sup> A'kinana, boichimi e'yénale oká ralámuli napu 'we alá niraga eteme nílige 'yabé ta'chó mukuchi Esusi. Alemi boichimi ma'chínale Esusi napuyeri pe apiépiri rió 'lige alué oká rioka tabilé machile. <sup>13</sup> Napu'lige 'ma 'la machisá pe Esusi níligo, ku ro'ile 'lige ku sébaga ruyele alué uché jarela Esusi 'yuga járome, 'lige alueka tabilé bijhígale.

*Jena ruwimela makué bilé Esusi 'yuga járome Esusi etéligo*

<sup>14</sup> A'kinana alué makué bilé rió Esusi 'yuga járome go'yá mochile, 'lige alemi ma'chiná ilíbale Esusi napu'lige go'yá mochígichi méssachi. 'Lige Esusi a'wágame ne'óchale alué makué bilé rió tabilé bijhígiligame ku ajánaligo Esusi, napu'lige regá anésiga abé 'yabé uché jaré ralámulite: «Eteru ramué Esusi, ku ajánale.» <sup>15</sup> 'Lige anele Esusi alué makué bilé Esusi 'yuga járome:

—Bochígimi gawichí simárowaká alué 'we a'lala ra'íchili benírsia suwábaga ralámuli. <sup>16</sup> Ralámuli napu ekí 'la bijhíggame ju Onorúgame nila ra'íchili 'lige napu a're alué chátiri bowé 'lige napu cha'pí alué 'we a'lala bowé,§ alueka napu'lige mukusá tabilé resí ikimela, alué alawálaka 'pa rewagachi moinámala mukusá. 'Lige suwábaga napu ekí tabilé bijhígigi napu aní alué Onorúgame nila ra'íchili, alueka 'we resí ikimela, 'légana na'ichí mo'ibámala. <sup>17</sup> Napu ekí 'la bijhígigi napu aní Onorúgame nila ra'íchili, ne 'yámala a'walí napurigá 'la buinámala remónisi u'kuchípala alawala ralámulichi pachágana mochíggame. 'Lige 'la gainámala se'nú ra'íchili

ra'icha yati neraga, <sup>18</sup> cha'pimela sinowí 'we oporúgime\* 'lige tabilé che ikimela alué oyérame, 'lige bajisa bilé tábiri sowé tabilé che ikimela, 'lige sekate nochasa bilé nayume, yati sa'wimela.

*Jena ruwimela ku rewagachi moyénaligo Esusi*

<sup>19</sup> Napu'lige alué Esusi suwénasa ra'icha alué 'yuga járome si, Onorúgame rewagachi o'tole Esusi. Alé sebasá, wajtoná asíbale Onorúgame ajtígichi. <sup>20</sup> Esusi 'yuga járome e'yénale bochígimi gawichí ralámuli benírsia Onorúgame nila ra'íchili rejcholi. 'Lige Esusi Alawala gu'irile alué Esusi bo'né 'yuga járome napurigá 'la sa'wámala nayúkame napurigá 'la oyéramala alué Onorúgame nila ra'íchili rejcholi 'lige aminami napurigá 'la bijhígimela 'la walú a'walí nígame ku Onorúgame.

Pe ikí képá ye ra'íchili. Wa'lú cheliérabá.

§ 16:16 Marko osale alué osilí rewarálime. Alué ra'íchili rewarálime i'sínimi tabilé aniane ju ba'wichí bajkigá rewarálime, abiena aniane ju napu'lige a'resa alué chátiri bowé 'lige cha'pisá alué 'we a'lala bowé. E'nesi glosario «bautismo».

\* 16:18 Alé Israeli tabilé 'tégame ju alué sayawí, abiénachigo nerúgame júkó sinowí 'we o'parúgime.

## Regá Anime Osale Lukasi Ruigá Chu'síligo Esukristo Jena Wijchimoba Asagá

*Jena ruwimela chonigá osáliga Lukasi ye ra'ichali*

Regá anele Lukasi alué Teópilo bilena os-ilichi:

Kuira mué Teópilo. 'We 'la ganiliga repori ne mué.

<sup>1</sup> We'ká ralámuli osale apélichí napu nóchale 'lige napu benírale Esusi jena wijchimoba. <sup>2</sup> Osale napu akele napurigá ruwile alué ralámuli napu Esusi 'yuga e'yénale alué napu a'kinana ralámuli benírime gayénale Esusi ra'ichálila 'we a'lá ra'ichali rejcholi. <sup>3</sup> Mué rió Teópilo, 'we 'la nirá ne mué. Ne bo'né 'we a'lá 'nátaga ruké we'sá alué ralámuli Esusi 'yuga e'yénale regá: «¿Churigá ochérale u'tá towí ka 'lige churigá nóchale Esusi napu'lige si chojkile nocha alué Esusi 'lige napusí suwénale nocha 'lige churigá 'yole nayúkame 'lige churigá benírale suwábaga ralámuli?» Regá ruké ne alué ralámuli. Ne 'la nerá nili napu ruwile, alekeri osá ne ye osilí jena apélichí 'la sébali ruigá suwábaga churigá nile, <sup>4</sup> napurigá mué Teópilo 'la sébali machigá asimela alarigá niliga napu mué Teópilo beníriliro alué we'ká ra'ichali.

*Jena ruwimela bilé santo ánjeli ruwíligo a'kinana ochérimio alué Juani*

<sup>5</sup> Napu'lige alué Erere\* wa'lula selígame kachi alé alué wa'lú gawí bo'ígichi Jurea anilichi, a'lige bejtele bilé balé wa'lú re'obachi Onorúgame galíachi† nulame Sakaríasí rewégame. Alué baleka alué Abíasí chojkégame gompaniérola nile,‡ alué Abíasí napu 'we 'ya bejtégame balé nile me'tagá Sakaríasí, Sakaríasíka a'kinana ochérigame nile. Alué Sakaríasí upila Sabeli rewégame nile. Alué mukí Sabélíka Aroni rijimala nile, Aróníka 'we 'ya bejtégame nile 'lige Sabélíka 'we a'kinana ochérale.§ <sup>6</sup> Alué Sakaríasí 'lige upila si 'we a'lá sébali e'wame nile suwábaga napu Onorúgame nulale 'we 'ya, 'lige Onorúgame 'we a'lá galegá etele alué okáníka. <sup>7</sup> Tabilé siné 'kúchigame nile alué ralámuli. Aminami 'ma 'we o'chéráme nile okáníka. <sup>8</sup> Sébale bilé rawé napu nóchame nile Sakaríasí alué we'ká balé 'yuga alé wa'lú re'obachi alué balé napu alé wa'lú re'obachi nulame nile. <sup>9</sup> Re'eme nile, 'lige Sakaríasí mele re'eka

bajkiame abé pachá o'kuí molélachi alé wa'lú re'obachi. <sup>10</sup> Napu'lige Sakaríasí molea ilígachi, ralámuli 'we jale Onorúgame 'yuga ra'icha iwérali tania ma'chíge. <sup>11</sup> 'Lige yatí neraga ma'chiná ilíbale bilé santo ánjeli Onorúgamete julárigame rewagáchíka, alé wajtoná ilíbale alé mésachí napu e'kósilime nile o'kuí alé napu ilile Sakaríasí. <sup>12</sup> Napu'lige etesa Sakaríasí alué santo ánjeli, 'we majale. <sup>13</sup> 'Lige alué santo ánjelíka anele:

—Mué Sakaríasí, tase majawa. Onorúgame 'we a'lá aké mué alué Onorúgame 'yuga ra'ichachi tániga napurigá ranélamala mué upila. 'Lige mué upila Sabeli ranélamala bilé towí. Mué ajchémalá rewá alué towí «Juani» anilime rewá. <sup>14</sup> 'We ganilimála 'lige mué. Abiena we'ká ralámuli 'we ra'sálámala alué towí ochérasa, <sup>15</sup> napugítí alué Onorúgame Wa'lula neraga etémempá wa'lú ochérasa alué towí. Aminami tabilé siné bajímala i'wílí ('uba) ba'wíla rekútame. 'La Onorúgame Alawala ajchégame nímala pachágana bajchabé ta'chó ocheria. <sup>16</sup> We'ká ralámuli alé Israeli epperégame ku o'wé jábamala, Wa'lula Onorúgame oyérame gainámala alué Juani rejchólíla akígá. <sup>17</sup> Alué Juáníka rejcholi ruyeme nímala alué ralámuli wa'lú a'walíte alué Onorúgame nila, napurigá alué Elíasí rewégame napu ruwime nile napu anele Onorúgame 'we 'ya. Alué Juáníka ku o'wé jawámala alué we'ká ralámuli napu 'kúchíga mochímala, ku ge'láramala napurigá ku ganíliga epperélamala 'kúchíla 'yuga, abiena napurigá ku a'lá o'wé na'támala alué ralámuli napu 'we resí nokagá járome nímala a'lige. Juáníka bajchá ta'chó nawachi alué Wa'lula, 'we semáriga beníríga asimela we'ká ralámuli, napurigá alué ralámuli 'we a'lá galegá etémala nawachi alé alué bi'neli neyúríga Wa'lula.

<sup>18</sup> Sakaríasíka rukele alué santo ánjeli:

—¿Churigá 'la bijchígamala ne alarigá nimio suwábaga napu aní mué? Aka neka 'ma 'we o'chéráme júpaché, 'lige ne upílachígó 'we o'chéráme ju.

<sup>19</sup> 'Lige alué santo ánjelíka regá anele:

—Neka santo ánjeli ju Gabrieli rewégame. Neka Onorúgame 'yuga ajtime ju. Alué nulé ne'chí napurigá ne mué ruyémala mué upila ranélimio bilé towí mué inolá. <sup>20</sup> Jipe mué tabilé bijchíge ye ra'ichali napu ne mué ruyé. Jípeko tase ra'ichame gainámala mué napusí ochérisa mué inolá, a'lige kulí gainámala mué ku ra'icha. 'La bijchíá alarigá nímala napurigá aní ne.

<sup>21</sup> 'Lige Sakaríasí pachá ilígichi, ralámulíka ma'chíge jale buigá, aníá:

\* 1:5 E'nesi glosario «Herodes». † 1:5 E'nesi glosario «templo». ‡ 1:5 Nerule bilé lía na oká chojkégame balé napu tebumé nile wa'lú re'obá, 'lige a'pilipi balé we'ká gompaniérogame nile. § 1:5 E'nesi glosario «ancestor».

—¿Chonigá ta'wé ma'chínaché alué Sakaríasika alé pachaka ye wa'lú re'obáchika? —anile we'ká 'nátaga.

<sup>22</sup> Arigá ma'chínale alué Sakaríasi, 'ma tabilé gayéname ra'icha. Tabilé gayéname alué rió ra'icha ma'chínasa aleka, yati 'we machile ralámuli Onorúgame alarigá rekíligo alué rió alé pachá wa'lú re'obachi. Pe sekate ra'ichale Sakaríasi, pecha gayéniliga ra'icha.

<sup>23</sup> 'Ma sébali olasa alé wa'lú re'obachi napu ekí rawé nochámili nílige alué Sakaríasi, 'ma ku galírale simile. <sup>24</sup> A'kinana alué mukí Sakaríasi 'yula Sabeli rojparale. 'Lige maligi mechá tabilé asé eyénaga asale. 'Lige 'nátale alué mukí: <sup>25</sup> «Alué Wa'lula Onorúgame bo'né alarigá rekile ne'chí ye raweli napurigá ranélamala ne, napurigá 'la tase gawélimala ralámuli ne'chí tabilé 'kúchime kóriká.»

*Jena ruwimela bilé santo ánjeli ruwíligo alué Esusi ochérimio*

<sup>26</sup> Usani mechá a'kinana rojparasa Sabeli, Onorúgame júlale bilé santo ánjeli Gabrieli rewégame 'mi alé we'ká riógachi Nasareta anilichi napu pachá ju Galilea anilime gawí bo'ígichi napurigá bilena ejiro. <sup>27</sup> Júlale alué mukí iwé María rewégame e'néniliga. Alué mukika amulí newímili nile alué rió José rewégame 'yuga. Alué José Rabí rijimale nile, Rabí napu abé 'ya bejtégame nile ta'chó ochérachi José. <sup>28</sup> 'Lige alué santo ánjeli sébale napu asale María, 'lige anele:

—Kuíra mué mukí wanápurigame Onorúgamete. Wa'lula Onorúgame 'we a'lá semáriga gu'iri mué mukí.

<sup>29</sup> Alué mukí alué santo ánjeli etesa, majaga we'ká 'nátale 'lige lale: «Yeka ¿chonigá alarigá reparábaché?»

<sup>30</sup> 'Lige alué santo ánjeli uchéchigo ra'ichale, 'lige anele:

—Mué María tase majawa. Onorúgame alarigá rekile raweli mué. <sup>31</sup> Jipe rojparámala mué 'lige ranélamala mué bilé u'tátiri towí.\* 'Lige ajchémala mué Esusi† anilime rewá. <sup>32</sup> Alué rioka 'we najtékame nímala. Regá anélime nímala «Wa'lula Onorúgame Rewagachi Ajtígame Inolá.» Onorúgame Wa'lula selígame anémala a'chigóriga napurigá alué 'we 'ya bejtégame Rabí, <sup>33</sup> napurigá nuleme nímala alué we'ká ralámuli israelita senibí rawé.

<sup>34</sup> 'Liko Mariáka rukele alué santo ánjeli:

—¿'Lacha ranélamalawé ne? Neka tabilé 'yúgame júpaché rió.

<sup>35</sup> 'Liko alué santo ánjelika anele:

—Onorúgame Alawala gite rojparámala mué tabilé 'yuga asagá rió, Onorúgame a'walila alarigá elímala mué. Alekeri alué mué inolá 'la wanáparigame nímala

Onorúgamete, 'lige Onorúgame Inolá anélime nímala. <sup>36</sup> Mué rijimale Sabeli abiena ranélamala rekó o'chérame ke. 'Ma usani mechá ju wa'lú rojpega asagá. We'ká ralámuli mayé tase ranélimio. <sup>37</sup> Onorúgameka suwábaga gayéname ju napurigá bo'né 'nata. Alekeri bilé mukí rekó 'ma o'chérame ke 'la ranélamala Onorúgame alarigá elásaká.

<sup>38</sup> 'Liko Mariáka anile:

—Neka pe nóchame ju alué Onorúgame 'yuga. Onorúgame alarigá elásaká ne'chí napurigá aní mué ranélamaréko ne 'liko bilé towí.

Alésíko 'ma tané ikía kíbale alué santo ánjeli.

*Jena ruwimela María simíligo e'nemia bo'né rijimale Sabeli*

<sup>39</sup> 'Lige pe a'kinana rawé alué María 'we jigaga simile alé bilena we'ká riógachi iwérachi napu nile Jurea anilime gawí bo'ígichi. <sup>40</sup> 'Lige sebasa Sakaríasi bejtélachi, pachá galírale bajkile 'lige repórale pe a'bemi iligá alué Sabeli. <sup>41</sup> Napu'lige akisá alué Sabeli María reporachi, alué u'tátiri Sabeli rojpálachi ajtígame nokale. 'Lige Onorúgame Alawala bajkile alué Sabélichí pachágana <sup>42</sup> 'lige e'wele ra'ichaga anile Sabeli:

—'We a'lá semáriga gu'irilia mué María Onorúgamete ta'wesi uché jaré umugí anaga 'lige mué ranala abiénachigó. <sup>43</sup> ¿Chieri júpaché ne napurigá nawámala mué María ne'chí e'nemia mué napu ju alué Onorúgamete julárigame eyela nímili? <sup>44</sup> Napu'lige akisá ne mué reporachi, 'lige yati noká u'tátiri ne rojpálachi ra'salágá. <sup>45</sup> Mueka 'we a'lá sébali bijchígime napurigá anile alué Onorúgame. Alekeri gite 'we ganíligo bejtélamala mué.

<sup>46-47</sup> 'Liko Mariáka anile:

Neka wa'lú cheliera 'ya Onorúgame napu bi'neli Wa'lula ju.

Neka 'we ra'salá napugiti Onorúgame ne'chí bujéligame resitiri 'nátili.

<sup>48</sup> Onorúgameka 'we 'la nirá ne'chí rekó ne peka najtékame kachi. Jípesí aminako ralámuli 'we a'lá niraga etémala ne'chí.

<sup>49</sup> Alué Onorúgame wa'lú a'walí nígame ju, 'we a'lá semáriga gu'iri ne'chí.

Onorúgame rewála 'we najtékame ju.

<sup>50</sup> Onorúgame senibí 'la na'temame ju alué ralámuli

napu 'la nirame ju Onorúgame, <sup>51</sup> machíriale ralámuli wa'lú a'walí nígame ko. 'La umérole alué ralámuli 'we gunarume.

<sup>52</sup> Alué e'sélikame rió 'ma bujele nóchali,

\* 1:31 Pe alué Onorúgame Alawala gite rojparale alué María. aniname kéré.

† 1:31 Esusi aniaká «bujeme resiti 'nátili ralámuli»

alué tabilé nígame 'nalina 'we najtékame  
nóchali 'yale.

<sup>53</sup> Alué ralámuli 'we e'lowika epperégame  
'ma 'we nígame newale go'ame,  
'lige alué 'we nígame rioka pe sekega a'rele.  
<sup>54</sup> 'We a'lá semáriga gu'irile alué we'ká  
ralámuli israelita

napu Onorúgame nocháililachi nóchame ju.  
Tase siné a'rele na'temá alué ralámuli.

<sup>55</sup> Alarigá gu'irimioríle Onorúgame  
alué 'we 'ya bejtégame Abraámi  
aminami alué Abraámi rijimala 'we  
a'kinana o'chérage  
napu ramué rijimala júchigó,  
senibí gu'irimioríle.

Regá ra'íchale alué María.

<sup>56</sup> Alué María alé asale bakiá mechá alué  
Sabeli 'yuga, arigá a'kinana kumi bejtélachi  
simile.

*Jena ruwimela ochérligo alué Juani*

<sup>57</sup> Sebárale raweli a'kinana napu  
ochérimili nile alué towí Sabeli ranala,  
'lige Sabeli ranele bilé towí. <sup>58</sup> Alué  
u'tátiri ochérasa, alué a'mulipi riógame 'lige  
abienna alué rijimala napuile alé napu  
asale Sabeli, 'we ra'sálagá simíbale o'maka  
e'nemia alué Sabeli,† machisá Onorúgame  
'we semati raweli rekíligo alué mukí  
napurigá ranélamala rekó 'we o'chérage  
kachi. <sup>59</sup> Osánó rawé ajtígachi ochéraga,  
sikirélliru pe'tá isílala wi'chíla napurigá  
nokame nile alué ralámuli israelita.‡ 'Lige  
ralámulika ujchénale o'nola rewalá Sakaríasi  
anilime rewá. <sup>60</sup> Eyélaka anile:

—Tase. Juani anilime rewá ujchewa.

<sup>61</sup> 'Liko rukele alué ralámuli:

—¿Chonigá? Tase 'wesi i'tépaché alarigá  
rewégame alué Sakaríasi rijimala.

<sup>62</sup> 'Liko pe sekate ra'íchaga rukéliru alué  
Sakaríasi machínaliga chonilime rewá  
ujchénelia. <sup>63</sup> 'Liko Sakaríasika tale bilé  
rabileta alé osimea, 'lige osale regá anime:  
«Juani anilime rewá ujchewa.» 'Liko  
suwábaga alué ralámulika lale: «¿Chonigá  
alanilime rewá ujchéneleché?» lale. <sup>64</sup> A'lige  
yati neraga ku ra'íchale alué Sakaríasi, 'lige  
anele Onorúgame 'we ra'sálagá:

—Mué Onorúgame 'we a'lá semáriga gu'iri  
mué ne'chí—anele.

<sup>65</sup> Suwábaga alué ralámuli alemi a'mulipi  
epperégame 'we majale machisá. Abienna  
we'ká ralámuli napu eperere alemi  
iwérachi napu Jurea anilichi nile ruigá  
e'yénale suwábaga tábiri napurigá ikile alé.

<sup>66</sup> Suwábaga ralámuli napu ekí akele alué  
ra'íchali anigá e'yénale a'bopi:

—¿Tachiri nóchame nímalawé alué towí  
wa'lú ochérasa? Alarigá anile napugiti 'la bi-  
jchiá machíligame a'ligesi wa'lú a'walí 'yáligo  
Onorúgame alué towí.

*Jena ruwimela Sakaríasi wikaráligo  
Onorúgame wikala*

<sup>67</sup> Alué Juani o'nola Sakaríasi 'we a'lá re-  
jcheruga ra'íchale Onorúgame Alawala gíte  
napurigá ikimeli níliga abé nujubami, regá  
anile:

<sup>68</sup> Wa'lú a'walí nígame ju alué Onorúgame  
napu gu'irime ju ramué ralámuli israelita.  
Jipe 'a nawákuru jena we'ká riógachi  
a'kabámama jawamia ramué.

<sup>69</sup> 'Ma júlane Onorúgame alué resítiri 'nátili  
bujeme ralámuli

Rabí rijimala 'we 'ya ajtígame,  
alué Rabí napu Onorúgame nocháililachi  
nóchame nile

<sup>70</sup> napurigá ruyele Onorúgame alué 'ya  
epperégame ralámuli

napu ruwime nile napu anele Onorúgame,

<sup>71</sup> semáriga nejkúrimio napurigá ta  
neyúrimala ramué saíla,

abienna alué 'we gichime ramué,  
<sup>72</sup> 'we na'temamio alué 'ya mochígame ra-  
mué rijimala,

'we 'la nélegá asimeo,  
'lige julamio alué wa'lula ramué gu'irime,  
jipe 'ma júlane.

<sup>73</sup> Alarigá gatele Onorúgame Abraámi 'yuga  
julamio Onorúgame alué ramué gu'irime.

<sup>74</sup> Ruwile Onorúgame ramué gu'irimio  
napurigá umérowa ramué saíla,

napurigá nochawa Onorúgame nocháililachi  
tase majaga,

<sup>75</sup> 'la bi'ígame alawega,  
'la sébali olagá napu aní Onorúgame nila  
ra'íchali.

<sup>76</sup> Mué Juani, ne inolá,  
mueka bilé rió nímala ruyame napu ané  
Onorúgame.\*

Mueka ra'íchali rejcholi ruyeme nímala  
ralámuli

napurigá 'la niraga etémala  
Wa'lula Onorúgamete Julárigame sébachi,

<sup>77-78</sup> napurigá machiboa ramué ralámuli is-  
raelita

'ma bujérigame níriga alué resiti 'nátili,  
'lige Onorúgame 'la nejkúrimio 'we 'la  
na'temaka

napurigá ta aminabi chátiri na'tawa.  
Ramué O'nola Onorúgame 'we galegá  
na'temá ramué.

Wa'lula Onorúgame wamí 'paka rewagachi  
asagá

'we a'lá nejkúria ajtí  
<sup>79</sup> napurigá 'la bi'ígama raweli narépua

† 1:58 Alué ralámuli israelítaka simíbame nile napu'lige bilé mukí sa'wisá u'tátiri ochérasa, 'we ra'sá lagá repórimo nile.

‡ 1:59 E'nesi glosario «circuncisión». \* 1:76 E'nesi glosario «profeta».

resíriga ejperégame rálámuli, napurigá pe bi'lepi semáriga 'nátame niwa, napurigá 'nátame niwa wa'lú nejkúrame ko Onorúgame.

<sup>80</sup> Alué towí Juani 'we rejchirúgame ochérale, 'lige 'we a'lá nirame Onorúgame, 'lige simile bilénami jami tase ba'égichi, tase rojégichi, 'lige tase gajsalégichi, 'lige we'ká bamí bejtele alé jami napusí chojkile rálámuli ra'íchali rejcholi ruyea alué we'ká rálámuli israelita alemi jsísime.

## 2

### *Jena ruwimela ochérligo Esusi*

<sup>1</sup> 'Ya a'lige u'tá kachi Juani, asale wa'lula nulame rey Augusto rewégame. Alué rioka nuleme nile rálámuli romano 'lige israelita. Alué wa'lúlaka nulale apélichu uchuchánilia rewalá napurigá a'kinana enomí nejímala suwábaga rálámuli wa'lúlachi. <sup>2</sup> Pe kulí siné nile rálámuli simiba a'boi rewalá uchuchamia apélichu wa'lúlachi Sirenio selígame kachi alé Siria anilíchi. <sup>3</sup> Suwábaga simámili nile napu o'chérigame nile 'ya siné apélichu uchuchamia a'boi rewalá.

<sup>4</sup> Joseka simile alé Beleni we'ká riógachi Nasareta asagá. Nasarétake alé pachá nile Galilea rewégame gawí bo'ígichi. Sébale alé Beleni napu nile alé pachá Jurea rewégame gawí bo'ígichi, napu ochérigame nile alué wa'lula selígame rey Rabi 'we 'ya, alué Joseka Rabi rijímala nile, abé 'ya ajtígame we'ká bamí ta'chó ochérachí José. <sup>5</sup> Joseka simile alé Beleni apélichu ujchamia bo'né rewalá. María abiena si simile, alué José 'yuga newímili, 'lige alué mukika 'ma wa'lú rojépégame nile. <sup>6</sup> Napu'lige alé Beleni mochiga, <sup>7</sup> sebarale raweli napurigá ochéramala alué María ranala Esusi, 'lige 'ma ochérale alué u'tá towí Esusi. Pe kulí bilé nile María ranala alué towí ochérachí. 'Lige eyélaka gemele ba'nísólite, 'lige rekale bilénami ganuwachi 'we 'la kabika napu go'yame nile akasí. Alemi rekale alué u'tátiri pecha bilena galíchi nílígame napu ochérale alué towí Esusi.

### *Jena ruwimela bilé santo ánjeli ruwílígo ma ochérligo Esusi*

<sup>8</sup> Alemi jami Beleni rewégame a'mulipi mochile jaré bo'elo bo'á repuka rukó. <sup>9</sup> 'Lige pe yati neraga ma'chiná ilíbale alemi bilé santo ánjeli. 'Lige alué Wa'lula Onorúgame a'walíla gite nolígá ra'ósiga ilíbale alé napu mochile alué bo'elo. 'Lige alué bo'élaka 'we majale. <sup>10</sup> 'Liko alué santo ánjelika anele:

—Tase majawa 'emi. Neka 'we a'lá semati ra'íchali ruímea nawá. Suwábaga rálámuli 'we ra'sálámala akísá ye a'lala ra'íchali. <sup>11</sup> Jipe 'ma ocheri bilé towí jena

we'ká riógachi napu ochérlige Rabi 'we 'ya. Alueka bujémala alué chátiri 'nátali 'emi 'lige suwábaga rálámuli, alueka Onorúgamete julárigame ju napu wa'lula nímalá suwábaga rálámuli nuleme. <sup>12</sup> Napurigá abé a'lá bijchígimála 'emi, etémála 'emi alué towí gemériga bo'ígime alé ganuwachi. Napu'lige etesa 'emi, 'la machimela 'la bijchiá ko suwábaga napu aní ne.

<sup>13</sup> 'Alígérikáchi pe yati we'ká santo ánjeli ma'chiná jábale 'pa rewagáchika simíbágame alé napu ilile alué uché bilela santo ánjeli, 'lige anile 'we ra'salágá:

<sup>14</sup> ¡'We a'lá ju Onorúgame 'pa rewagachi ajtígame!

¡'We ganíliga ejperélamala alué rálámuli napu semáriga gu'írilia Onorúgamete!

<sup>15</sup> Napu'lige alué santo ánjeli ku 'pa rewagachi simasa, 'liko alué bo'elo anile a'bopi regá anigá:

—Simáwa'é 'liko alé Beleni e'newa napu ruwí alué santo ánjeli napu alué Wa'lula Onorúgame júlale ramué ruyénaliga alué ra'íchali.

<sup>16</sup> 'We sajpuka simíbale e'nemia, 'lige sébale alé napu mochile María, 'lige José, 'lige u'tá simaloni alué napu bo'ile bilena ganuwachi. <sup>17</sup> Napu'lige etesa, simíbale ichúrimi we'ká rálámuli ruyemia napu ruwile alué santo ánjeli churigá nimia alué u'tá towí. <sup>18</sup> Alué we'ká rálámuli napu akele alarigá nímaraó wa'lú ochérasa alué towí, 'we ra'salále. <sup>19</sup> Mariáka a'lá niralé suwábaga napu anile alué bo'elo, pe bo'nepi 'nátaga. <sup>20</sup> Alué bo'élaka ku sébale napu a'rélige alué bo'á wa'lú cheliera 'yasía Onorúgame, 'we ra'salágá napugiti 'la bijchiá nílígame napurigá anílígame alué ánjeli.

### *Jena ruwimela alué towí Esusi o'tólrigo alé wa'lú re'obachi*

<sup>21</sup> Osá naó rawé ajtígachi ochéraga alué towí, sikiréliru pe'tá isílala wi'chila napurigá nokame nile alué rálámuli israelita. 'Lige ujchele Esusi anilime rewá. Alué santo ánjeli nulélige 'yabé alué María napurigá Esusi anilime rewá ujchémala ta'chó rojparachi alé María.\*

<sup>22</sup> Napu'lige 'ma simírisa oká liá rawé omawa alué María, alésíko simile alé Rusaleni alué towí Esusi mutuka alé wa'lú re'obá ilígichi ruyemia Onorúgame alué Onorúgame nochálilachi nochamio alué towí wa'lú ochérasa, 'lige aminami bi'wimea alué María napurigá nulale alué Moisesi 'ya bejtégame. Abiena si simile alué José. <sup>23</sup> Alemi wa'lú re'obachi o'tóleru alué towí napugiti bo'né Onorúgame alarigá nuláligime osilíchi, suwábaga alué bajchabé o'chérigame towí 'we najtégame nimio. Onorúgame 'yuga nóchame nimio. <sup>24</sup> Abiena kógile go'ame

\* 2:21 Tabilé rewaraga ajchéli ruwá alué Esusi.

Onorúgame napurigá nulale Onorúgame 'we 'ya oká baloma oká cho'lopoki kómá.

<sup>25</sup> 'Ya a'lige rawé bejtele bilé rió Simioni rewégame alé Rusaleni. Alué rioka 'we a'lá oyérame nile Onorúgame, 'lige buigá asale napurigá Onorúgame julámala bilé wa'lula, ra'ámame, napurigá 'ma 'la i'kilí mochímala alué ralámuli israelita ku 'we 'la ganílga. Alué Onorúgame Alawala 'we a'lá semáriga gu'íriale alué Simioni <sup>26</sup> napurigá machimela ta'chó etea ka alué Onorúgamete julárigame tabilé 'cho mukumeo, etesa kulí mukumeo. <sup>27</sup> Alué Simioni 'we siminali nílile alé wa'lú re'obá ilígachi, Onorúgame alarigá na'tárilé. Napu'lige alué Esusi o'nola 'lige eyela a'pasa alué towí Esusi alé wa'lú re'obachi Onorúgame galila sébali olagá napurigá nulale Onorúgame nila osilí, <sup>28</sup> alué Simiónika mutule alué towí, 'lige Onorúgame 'yuga ra'íchale 'we a'lá niraga, regá:

<sup>29</sup> Mué Wa'lula Nulame, jípesíko 'la nímala napurigá ne mué oyérame mukimela, mueka ya 'ma sébali olá napurigá ané mué ne'chí 'yabé,

'we ganílga ajtí ne.

<sup>30</sup> Jípesíko 'ma etiákuru ne alué napu bujémala chátiri 'nátili ralámuli

<sup>31</sup> napu mué júlale jena wijchimoba napurigá suwábaga ralámuli etémala.

<sup>32</sup> Alué nímala Wa'lula bujsireli 'yame alué tase ralámuli israelita, alekeri alué napu ju tabilé ralámuli israelita 'we 'la nírámala alué ralámuli israelita mué 'kúchila.

<sup>33</sup> Alué Esusi eyela 'lige o'nola we'ká 'nátaga ejtebile 'we ra'sálagá akísá alarigá nímili nílga alué towí. <sup>34</sup> 'Liko alué Simioni anele Onorúgame napurigá iwérlí 'yámala alué bakiánika, 'lige anele alué Esusi eyela María:

—Ye towí wa'lú ochérasa rejcholi ruyémala jena alué ralámuli israelita. Ye towí wa'lú ochérasa 'la ma'chí nérélamala we'ká ralámuli tabilé oyerio Onorúgame 'lige we'ká ralámuli 'la oyerio Onorúgame. We'ká ralámuli tabilé galémala ye towí wa'lú ochérasa, gichiga etémala 'lige 'we resí olámala, <sup>35</sup> 'lige 'la ma'chígime néríká ilibámala churigá ka alué ralámuli na'tálila. 'Lige mué María níriga, 'we chálámala etega alarigá ikichi.

<sup>36</sup> Alé re'obachi asale bilé mukí napu nile alué Onorúgame nila ra'íchali benírame ralámuli Ana rewégame, Panueli malala.

Aseri† chojkégame kompaniérola nile alué Ana. Alué mukíka 'ma 'we o'chérame nile. 'We u'tá iwé ka newile alué mukí, pe gichao bamí bejtele gunega 'lige mukíriale riola. <sup>37</sup> 'Ma osánósa makué miná naó

bamí nile bi'neli asagá alué mukí gunámasa. Alué Ana 'we nawame nile alé wa'lú re'obachi ayunamia.† Alé asame nile che'léballi 'lige rukachégame Onorúgame 'yuga ra'ícha iwérlí tania. <sup>38</sup> Napu'lige alé wa'lú re'obachi mochígichi alué José, alué María, 'lige alué u'tá towí Esusi, sébale alé alué Ana anilime mukí, 'lige wa'lú cheliera 'yale Onorúgame, 'lige ruyele suwábaga alué ralámuli Rusaleni ejperégame churigá nímili nílga alué u'tá towí Esusi wa'lú ochérisa napu eki buigá mochile napurigá bujémala alué chátiri 'nátili.

<sup>39</sup> Napu'lige 'ma sébali olasa alé wa'lú re'obachi, ku Nasareta simíbale napu ju pachá wa'lú gawí bo'ígichi Galilea rewégame. <sup>40</sup> 'Lige alué towí wa'lú ochérale 'we a'lá rejchirúgame 'we a'lá 'nátame napugiti Onorúgame 'we a'lá semáriga gu'íriligime.

*Jena ruwimela alué towí Esusi alé wa'lú re'obachi rejplígo*

<sup>41</sup> Alué Esusi o'nola 'lige eyela nabí bamí simíbame nile alé Rusaleni alué Páskua§ anilime omali sébachi napu o'inálime nile yawiyame. <sup>42</sup> Napu'lige Esusi bamísá makué oká, 'liko simíbale bakiánika alé Rusaleni napurigá nokame nile alué omali sebasea. <sup>43</sup> Napu'lige o'nola 'lige eyela ku ejperélachi simíbachi 'ma guwárasa alué omali, alué towí Esúsika abajá Rusaleni rejpile. 'Lige alué o'nola 'lige eyela tase machile abajá rejplígo. <sup>44</sup> Mayele alué towí Esusi enegó 'yuga alué we'ká ralámuli. Alarigá bilé rawé simíbale bowesia. Arigá chojkile 'yaa 'lige rukea rijimala 'lige machirume, <sup>45</sup> 'lige tase asé rewale. 'Liko ku simíbale 'yáamia alé Rusaleni. <sup>46</sup> 'Ma bakiá rawé kachi kulí rewale alé wa'lú re'obachi alé Rusaleni. Alé ajtíle alué re'mali Esusi alué we'ká rió 'yuga ra'ícha napu nile Moisesi nila ra'íchali rejchólila benírame. Abiena gepua asale ra'íchali abiena rukea. <sup>47</sup> Alué jaré rió Moisesi a'rélala ra'íchali rejcholi benírame akísá Esusi ra'íchachi 'we a'lá rejchiruga ra'icho, 'we a'lá niraga, regá anile: «Asíriga machime ju ye towí», anile alué benírame. <sup>48</sup> Napu'lige alué o'nola 'lige eyela etesa aliena benegá ra'ícha ajtígichi alué ralámuli 'yuga, pe i'kilí jábale, 'lige pe'tá nujubapi eyélaka anele:

—Mué towí, ¿mueka chonigá ala'simípitché? Ramueka 'we chálagá e'yénilie 'yaga mué.

<sup>49</sup> 'Liko alué re'malí Esusi anele:

—¿Chonigá 'yárupaché 'émika ne'chí? ¿Tacha machiché 'émika neka nochámali ko ne O'nola galílachi?

<sup>50</sup> 'Lige o'nola 'lige eyela tase námale alieti olagá anió.

† 2:36 Alué Asérika Akobo inolá nile. E'nesi glosario «los doce tribus». E'nesi glosario «Páscoa».

‡ 2:37 E'nesi glosario «ayuna». § 2:41

<sup>51</sup> 'Liko simile ku Nasareta rewégachi o'nola 'lige eyela 'yuga, alé asagá a'lá sébali e'wile o'nola 'lige eyela. Eyélaka bo'nepi tabilé we'káwaga ilírome nile napu ikile 'yasi napusi alué santo ánjeli alué María 'yuga ra'íchale ranélimio María bilé towí. <sup>52</sup> 'Lige alué Esusi aminacho wa'lú ochérale abiena 'we a'lá rejchirúgame, 'lige 'we a'lá galegá etéliru Onorúgamete, abiena alué we'ká rálámulite.

### 3

*Jena ruwimela Juani rejcholi ruyéligo rálámuli jami bakochi tabilé riógachi*

<sup>1</sup> 'Ma makué maligi bamí wa'lula gobierno kachi alué Tiberio, 'lige e'sélikameka nile Ponsio Pilato 'lige Eróre 'lige Lisania. Alué Ponsio Pilátoka alé Jurea rewégame gawí bo'ígichi nulame nile. 'Lige alué Eróreka nulame nile Galilea rewégame gawí bo'ígichi. 'Lige alué Belípeka\* nulame nile okaná gawichí Iturea 'lige Trakonite rewégachi. 'Lige alué Lisániaka nulame nile alé Abilinia rewégame gawí bo'ígichi. 'Lige alué gobierno Tibérioka nulame nile alé bochgími napu nulame nile alué e'sélikame. <sup>2</sup> Abiena mochile oká e'wélala balé Anasi 'lige Kaipasi. 'Alige bamí alué Onorúgame alué Juani Sakaríasi inolá 'yuga ra'íchale alé bilénami jami gawichí tabilé 'me u'kume nile, tabilé gasalégichi, 'lige tabilé rojégichi, 'lige alé a'bemi ename nile ba'wí Jorani rewégame bakó. <sup>3</sup> Alué Juánika simile alemi suweke bakochi rejcholi ruyemia rálámuli napurigá a'rémala alué resítiri 'nátili, ruigá alarigá 'la e'kamio Onorúgame alué rálámuli. Anele:

—'La rewarárigame† niwa ba'wichí bokuíka napurigá machiboa 'ma a'reo 'emi chátiri 'nátili.

<sup>4</sup> 'La bijchiá alarigá ikile napurigá anile alué osilí napu osale alué rió 'we 'ya ajtígame napu ruyame nílige napu anéligo Onorúgame, alué Isaíasi rewégame. Alué osilí regá anime:

Ma'chí animela bilé a'wágame ra'íchali rejcholi alé jami,

regá anime:‡

«Newiwa bilé bowé Wa'lula Onorúgame, newiwa bilé bowé 'la wajchígame,

<sup>5</sup> Bochígimi re'ná newiwa,

tabilé nerúlamala gomí,

nibilé gawí re'pá jágame,

'lige alué bowé nojkóligime 'la wajchígame nímala,

'lige 'la re'wame nímala,

bochgími napurigá epó neraga ilibámala.

<sup>6</sup> 'Lige 'la etémala suwábaga rálámuli

alué napu Onorúgame julámala

bujéniliga rálámuli resítiri 'nátili.»

<sup>7</sup> Napu'lige alué rálámuli sébachi alé rewarárigame nimia ba'wichí, 'lige Juánika anele:

—'We chátiri 'nátame ju 'emi. ¿Chieri ané 'emi tabilé naremio alué gastigo napu jipe 'ma a'mulípika ená? ¿Mayé 'emi tabilé naremio alué gastigo 'ma rewarárigame kóriká? Rekó 'la rewarárigame ke 'emi 'lige cha nokogá járome nisa 'emi, abirigá narémala 'emi gastigo. <sup>8</sup> 'We a'lá sébali olawa napurigá nulá Onorúgame, a'rewa chati nocha napurigá 'la ma'chígime nérélamala ku guwana 'nata 'emi. Tase lawa 'emi a'bopi: «Abraámi rijimala niru ramué, alué 'we 'ya ajtígame, 'lige 'we najtékame niru ramué.» Neka regá aníbá: Onorúgame tabilé nejkúrimala rekó alarigá 'nátachi 'emi. Bo'né Onorúgame najkisáká rekó pe rejte kachi 'la Abraámi rijimala newámala. <sup>9</sup> 'Émika napurigá masana tabilé rakeme alarigá ju, alué masana napu 'ma na'minálime ju rejpulante me'teka chojkichí ajchagá 'lige e'kósilime ju ta rakésaká. Yeka ruwime kéré 'emi 'ma e'kósiwili ko na'íchi mochiga tabilé 'la nóchame kame 'emi.

<sup>10</sup> 'Lige alué rálámulika rukele:

—¿Cho nokibóché 'liko?

<sup>11</sup> Juánika regá anele:

—Jaré 'emi oká o'páchigime nisa, 'lige bilé kógimili júkuru alué tabilé nígame. 'Lige jaré 'emi 'we 'la nígame nisa go'ame abiena kógimili júkuru alué tabilé nígame.

<sup>12</sup> Abiena jsile rewarárigame nimia jaré rió enomí nareme alué enomí napu nejilame nile alé wa'lúlachi, 'lige rukéliru Juani:

—Muérigo benírame, ¿ramueka churigá nochawa?

<sup>13</sup> 'Liko Juánika anele:

—Tase rasígime tániwa enomí rálámuli, pe sébali tániwa enomí rálámuli napu ekí nejímili ju.

<sup>14</sup> Abiena jaré sontalo regá rukele:

—Ramuégó ¿churigá nochawa?

'Lige Juánika regá anele:

—Tase bujewa rálámuli tábiri resí anigá majáriga, aminami tase e'chwawa alué rálámuli tabilé chojkika kachi. 'La ganíluga ejtebiwa 'emi napu ekí meme ju 'emi.

<sup>15</sup> Rálámulika 'we buigá mochíligo alué Kristo,§ 'lige sebasa Juani 'nátale rálámuli

\* **3:1** Belípeka alué Eróre nasípasi ba'chila nile. E'nesi glosario «Herodes». † **3:3** Napu'lige rewará alué rálámuli a'bopi tabilé rewá ajchagá rewarame nile. Napu'lige rewará alué rálámuli pe ruigá nokame nile 'ma a'reo chátiri 'nátili 'lige chátiri nóchali. ‡ **3:4** Jena ruwimela Juani ra'íchaligo tétalite uché bilé ra'íchali ruwime. E'nesi glosario «parábola». Napu ra'íchale, ruwime kéréle rálámuli 'la na'támili níluga 'lige 'la 'nátaga mochímili napu'lige sébachi alué napu Onorúgame julámili nile wanápurigame napurigá Wa'lula Nulame nímala, aniname kéré. § **3:15** E'nesi glosario «Cristo».

a'bopi: «¿Pala alué júpué Kristo?»<sup>16</sup> Juánika regá anele alué we'ká ralámuli:

—Neka rewarame ju ba'wichí jáwaga, nobi uché bilé sebámalagó abé najtékame. Alueka abé wa'lú a'walí nígame ju me'tagá ne'chí. Neka pecha anámalagó alué. Alueka 'la bi'wémala 'emi alawala Onorúgame Alawálate, 'lige 'we a'lá sébali olámala gustisia.<sup>17</sup> Alué rioka 'ma o'ká ená ri'ligó ekisula. 'Ma gatémala alué ri'ligó rakala alé rekóachi, 'lige sa'nagálaka 'minami ajchagá e'kósimala na'ichí, alué na'í napu tasiné cho'ime ju.\*

<sup>18</sup>Ye 'we a'lala ra'íchali rejcholi ruigá Juani ruwime ke anile 'ma pe 'wemi sebamio bilé rió ralámuli buyáname chátiri bowechi.

<sup>19</sup>Aminami alué Juani ne'óchale alué selígame Eröre rewégame napugiti mukí bujéligame alué ba'chila Belipe rewégame, alué mukí napu Eróríasi rewégame nile. Belipe se'nú eyégame nile. Aminami we'ká e'karúgame chati nóchigariká alué Eröre,<sup>20</sup> nobi alué Eróreka abéchigo cha 'sile ko, galírale bajchale Juani.

*Jena ruwimela Esusi rewaráirigo alé bakochi*

<sup>21</sup>Bajchabé ta'chó galírale bajchilichi Juani, we'ká ralámuli sébale alemi napu Juani asale rewarárigame nimia, abiena nawale Esusi rewarárigame nimia 'lige rewaráiriru alué Esusi. Napu'lige Esusi Onorúgame 'yuga ra'icha íligachi, 'lige rewagá ewagá ílibale,<sup>22</sup> 'lige alué Onorúgame Alawala re'kinale alé napu ilile Esusi napuyeri bilé baloma neraga. 'Lige rewagáchika ma'chí anile bilé ra'íchali regá anime:

—Mué ju ne Inolá napu 'we galé ne. Neka 'we ra'salagá ajtí mué etega.

*Jena ruwimela chieri 'lige chekí nílga alué Esusi rijimela abé 'ya ejperégame ta'chó ochérachi Esusi*

<sup>23</sup>Mayelia Esusi chojkíligo beniria Onorúgame nila ra'íchali baisá makué bamígame ka. Esúsika napurigá José inolá nile.

Joseka alué Elí inolá nile.

<sup>24</sup>Elika alué Matati inolá nile.

Matátika alué Lebí inolá nile.

Lebika alué Melkí inolá nile.

Melkika alué Jana inolá nile.

Jánaka alué José inolá nile.

Joseka alué Matatía inolá nile.

<sup>25</sup>Matatíaka alué Amosi inolá nile.

Amósika alué Naumi inolá nile.

Naúmika alué Esli inolá nile.

Eslika alué Nagái inolá nile.

<sup>26</sup>Nagaika alué Maati inolá nile.

Máatika alué Matatíasi inolá nile.

Matatíasika alué Semeí inolá nile.

Semeíka alué Oseki inolá nile.

Osékika alué Jurá inolá nile.

<sup>27</sup>Juraka alué Joana inolá nile.

Joánaka alué Resa inolá nile.

Résaka alué Sorobabeli inolá nile.

Sorobabélika alué Salatieli inolá nile.

Salatiélika alué Neri inolá nile.

<sup>28</sup>Nérika alué Melkí inolá nile.

Melkika alué Ari inolá nile.

Árika alué Kosami inolá nile.

Kosámika alué Elmorami inolá nile.

Elmorámika alué Eri inolá nile.

<sup>29-30</sup>Erika alué Josué inolá nile.

Josueka alué Elieseri inolá nile.

Eliesérika alué Jorimi inolá nile.

Jorímika alué Matati inolá nile.

Matátika alué Lebí inolá nile.

Lebika alué Simioni inolá nile.

Simiónika alué Jurá inolá nile.

Juraka alué José inolá nile.

Joseka alué Jonami inolá nile.

Jonámika alué Eliakimi inolá nile.

Eliakímika alué Melea inolá nile.

<sup>31</sup>Meléaka alué Mainani inolá nile.

Mainánika alué Matata inolá nile.

Matátaka alué Natani inolá nile.

Natánika alué Rabí inolá nile.

Rabika alué Isaí inolá nile.

<sup>32</sup>Isaíka alué Oberi inolá nile.

Obérika alué Bosi inolá nile.

Bósika alué Salmoni inolá nile.

Salmónika alué Naasoni inolá nile.

<sup>33</sup>Naosónika alué Aminarabi inolá nile.

Aminarábika alué Arami inolá nile.

Arámika alué Esromi inolá nile.

Esrómika alué Páresi inolá nile.

Páresika alué Jurá inolá nile.

<sup>34</sup>Juraka alué Akobo inolá nile.

Akóboka alué Isaki inolá nile.

Isárika alué Abraámi inolá nile.

Abraámika alué Taré inolá nile.

Tareka alué Nakori inolá nile.

<sup>35</sup>Nakóríka alué Serugi inolá nile.

Serúgika alué Ragau inolá nile.

Ragáuika alué Pelegi inolá nile.

Pelégika alué Eberi inolá nile.

Ebérika alué Sala inolá nile.

<sup>36</sup>Sálaka alué Kainani inolá nile.

Kainánika alué Arpásari inolá nile.

Arpásaríka alué Semi inolá nile.

Sémika alué Noé inolá nile.

Noeka alué Lameki inolá nile.

<sup>37</sup>Lamékíka alué Matusaleni inolá nile.

Matusalénika alué Enoko inolá nile.

Enókoka alué Jareri inolá nile.

Jarérika alué Majalaleli inolá nile.

Majalalélika alué Kainani inolá nile.

<sup>38</sup>Kainánika alué Enosi inolá nile.

Enósika alué Seti inolá nile.

\* 3:17 Ye bersíkulo pe ruwime kéré 'ma amulí sebio raweli napu'lige ralámuli narémala gastigo.



Sétika alué Arani inolá nile.

Alué Aránika Onorúgame newale 'ya kulí siné ta'chó 'wesi ralámuli i'tégichi jena gawichí.

#### 4

*Jena ruwimela alué Satanasi 'we najkíligo napurigá Esusi alué Satanasi e'wímala*

<sup>1</sup> Alué Esusi 'we a'lá sébali e'wagá alué Onorúgame Alawala simile alé bakochi Jorani rewégachi asagá. Simile alemi tabilé riógachi, tabilé ba'wégichi, 'we wakígichi, tabilé i'tégichi nibilé rojá, nibilé gajsalá. Alé asale oká liá rawé. <sup>2</sup> Lige alué Remónisika alemi nawile 'yégimia alué Esusi napurigá tabilé e'wímala Onorúgame, napurigá pe alué Remónisicho e'wímala. Lige alué Esusi tase go'ale go'ame alakí rawé, arigá 'ma e'lowile.

<sup>3</sup> Liko alué Remónisika anele:

—'La bijchiá Onorúgame Inolá níriká, nulewa 'liko ye rejte napurigá baní gainámala.

<sup>4</sup> Esúsika regá nejele:

—Alué Onorúgame nila osilí regá aní: «Tase pe go'ame go'gá ejjerélamala ralámuli, abiena alué semati ra'íchali Onorúgame nila rejcholi 'nátaga ejjerélamala ralámuli.»

<sup>5</sup> Liko alué Remónisika o'tole alué Esusi bilena re'pá rabó, alé tabilé rojégichi 'lige tabilé gasalégichi, 'lige etérole pe yati neraga si'népiriga suwábaga gawí napu echilú ju jena wijchimoba. Lige anele:

<sup>6-7</sup> —Mué 'la e'wásaká, aminami 'la sébali nirasá mué ne'chí, 'liko ne nejmala alué ye suwábaga napu echulú eteri ne mué ye gawí, bochígimi gawichí nulame nímala mué. Neka 'yárigame kame walú nóchali 'we najtékame jena wijchimoba, 'lige ne alué nóchali 'yámala mué napugiti neka a'lá lisensia nígame kame napurigá 'yámala alué nóchali apiépiri napu 'yánili ne, napu'lige nulame kachi mué 'la niraga etewa mué suwábaga ralámulite.

<sup>8</sup> Esúsika regá nejele:

—Alué Onorúgame nila osilí regá aní: «Pe alué Wa'lula Onorúgamecho 'we a'lá nirawa, pe aluecho e'wewa.»

<sup>9</sup> Pe nujubapi Remónisi o'tole alé we'ká riógachi Rusaleni anilichí, 'lige alé sebase, abé re'pá alué walú re'obachi Onorúgame galila 'mórale, 'lige anele:

—'La bijchiá Onorúgame Inolá níriká, 'légana o'pochikabá jena iligá. <sup>10</sup> Aka alué osilí napu ruwí churigá ka Onorúgame regá aniché:

Onorúgame julámala we'ká santo ánjeli napurigá repúmala mué.

<sup>11</sup> Cha'pimela sekate

napurigá ta iwégame chibámala mué 'légana wijchí.

<sup>12</sup> Esúsika regá nejele:

—Aka abiena regá aniché alué Onorúgame nila osilí: «Tase nochawa bilé nóchali machináliga pala bijchiá nira napu aní Onorúgame.»

<sup>13</sup> Alésíko alué Remónisi tase umubásaká umeria alué Esusi, 'liko a'rele pe u'kabi rawé.

*Jena ruwimela Esusi chojkíligo nocha alé Galilea*

<sup>14</sup> Lige Esusi ku simile alé Galilea, Onorúgame Alawala 'we a'lá gu'irile alemi enágichi, 'lige suwábaga ralámuli napu ekí rirole bochígimi alé Galilea anile:

—Alué rió Esúsika 'la bijchiá Onorúgamete gu'irilia —regá anile a'bopi machíligame 'we a'lá gu'irilio Esusi Onorúgamete.

<sup>15</sup> Lige napu ekiná riógachi sébaga 'we benírale alué Onorúgame nila ra'íchali rejcholi alé u'kuchí re'obachi «sinagoga» rewégame. Lige suwábaga ralámuli 'we a'lá nirale alué Esusi.

<sup>16</sup> Esusi ku simile alé Nasareta\* we'ká riógachi napu 'ya alé asagá wa'lú ochérigame nile. Lige bilé rawé resibulichi bajkile alé bilena u'tá re'obachi «sinagoga» rewégame napurigá 'sime nile bo'né 'lige alé asibale pachá. Lige pe'tá i'libeko o'weti ilísale osilí ra'ichamia. <sup>17</sup> Lige 'yálsru apeli kabítigame osilí napu osálige Isaiási 'we 'ya ochérigame napu'lige ta'chó ochéachi Esusi napu nile Onorúgame nila ra'íchali rejcholi benírame ralámuli. Napu'lige ra'lanasa alué apeli kabítigame, 'lige pe'wera 'yáasa alé rewale 'lige ra'ichale osilí regá anime:

<sup>18</sup> Alué Wa'lula Onorúgame Alawala 'we a'lá gu'iri ne'chí,

napugiti wanápuligame ne'chí nóchali 'yagá napurigá ne beníramala semati rejcholi alué ralámuli tabilé nígame enomí.

Jula ne'chí su'lanánaliga Remónisite

cha'piruga mochígame ralámuli,

abiena napurigá ma'chúlime newámala ne

alué tase ma'chúlime ralámuli,

abiena napurigá gu'irimala

alué resí oliame ralámuli

napurigá tabilé aminabi resí olawa,

<sup>19</sup> abiena napurigá ruwimela ne 'ma sebío raweli

'we a'lá semáriga gu'irimio Onorúgame 'emi.†

<sup>20</sup> Alésíko alué Esusi ku kabile alué apeli, 'lige 'yale alé u'tá re'obachi nóchame rió 'lige kilí asíbale. Suwábaga ralámuli napu ekí mochile alé abichilubi 'we e'nagá mochile aleké Esusi. <sup>21</sup> Lige alué Esúsika ra'íchile, regá anele:

\* 4:16 Nasarétake pachá nile Galilea rewégachi, 'lige Galiléake pachá nile Israeli rewégachi. Galiléake napurigá bilé «estado» nile, 'lige Israélike napurigá bilé «país» nile. † 4:19 E'nesi Isaiás 61:1-2.

—Ma 'la machí 'emi alarigá ikiá napurigá ruwile alué Isaíasi ye osilíchi, napu ruwime nile churigá nímili nílga ne.

Regá anele Esusi. Alueka pe bo'nepi olagá anile bo'né ala'simio.

<sup>22</sup> 'Liko suwábaga ralámuli Esusi saega ra'íchale napugiti ta'mé a'lá semáriga ra'íchaligame Esusi alué ralámuli níriga.† 'Lige anile a'bopi:

—Ye rioka pe José inolá ke, 'lige ruyá aníguru ralámuli gu'írame nímio.

<sup>23</sup> 'Liko Esúsika anele:

—'Emi ralámuli anémala ne'chí: «Mué, ralámuli 'yome, ralámuli 'yowa jipe jena.» 'Lige aminami anémala ne'chí: «Jena Nasarétachi napu mué ochérale, a'chigóriga nochawa napu aké ramué semátiri nóchali nóchaligo mué alé we'ká riógachi Kapernaumi anilíchi.»

'Lige aminabi 'we ra'íchale, anile:

<sup>24</sup>—Neka 'la bijchiá ruwimela tabilé 'wesi rió napu ruyame ju napu ané Onorúgame tabilé galegá etélime 'ínilio napu bo'né ochérale. <sup>25</sup> Neka 'la machí we'ká umugí gunámakame mochíligo jena wa'lú gawí bo'ígichi Israeli anilíchi 'ya napu'lige bejtele alué rió Elíasi napu'lige tabilé u'kule bakíá bamí miná nasipa 'lige napu 'we gurule go'ame bochígimi jena Israeli anilíchi.

<sup>26</sup> Elíasi tase juláiru umugí gunámakame gu'írimita jena Israeli, iligá 'nalina juláiru wamí chebilena mejká riógachi Sarépata rewégachi napurigá gu'írimala alé ajtígame mukí gunámakame a'mulipi alé Sironi rewégachi we'ká riógachi. <sup>27</sup> Abiena mochile we'ká rió jena Israeli sa'pachí amoba nayume napu'lige asale alué Eliseo rewégame rió napu ruyame nílge napu anélige Onorúgame, 'lige tase 'wesi ralámuli israelita nayúkame 'yóleru Eliséote, pe alué 'mi mejká bejtégame riocho Namani rewégame Siria rewégame gawí bo'ígichi bejtégame 'yóleru —anile Esusi.

<sup>28</sup> Alué ra'íchali akisá alué we'ká ralámuli alé pachá mochígame 'we ayole, pe ne'óchaga anime kéréligame ralámuli alué Esusi. <sup>29</sup> 'Lige yati jásiga, wamí o'tole alé we'ká riógachi suwé bilena rabó pamia rajkibuga bilena rejkuata. <sup>30</sup> 'Lige alué Esúsika tabilé neti neyúsale alemi, pe nasípami simírole 'minami simiá.

*Jena ruwimela bilé rió bile u'tabela Remónisi ajchágame nlligo*

<sup>31</sup> Nasareta asagá Esusi alé Kapernaumi rewégachi we'ká riógachi re'kinale. Kapernaúmká Galílea rewégame gawí bo'ígichi pachá nile. 'Lige alé Kapernaumi 'we

benírame nile Onorúgame nila ra'íchali rejcholi alué we'ká ralámuli rawé resibulíchi alé pachá u'tá re'obachi «sinagoga» anilime.

<sup>32</sup> Ralámulika 'we ra'salále akigá alarigá benífrachi, napugiti 'la bijchiá Onorúgame a'walila gite ra'íchaligame 'we rejchiruga.

<sup>33</sup> Alé pachá napu napuíme nile alué ralámuli jurío asale bilé rió chátiri remónisi u'tabela§ ajchágame, 'lige alué remónisi u'tabela e'wele ra'íchárole alué rió regá:

<sup>34</sup> —¡Wamí simigá mué! Mueka ¿chonigá nawíbáché ne'chí mué Esusi Nasareta\* bejtégame? ¿Mueka nawá cha olamia ramué? Neka 'la machí mué: ¡Mueka wanápurigame ju Onorúgamete!

<sup>35</sup> 'Lige Esúsika ma'chí pale alué chátiri remónisi u'tabela alué riochi regá anegá:

—¡Tase che anigá, a'rewa ye rió!

'Liko alué remónisi u'tabela wijchí rekábale alué rió alué we'ká ralámuli jágichi, 'lige ma'chínale alé riochi tabilé ejelíriga.

<sup>36</sup> 'Liko suwábaga ralámuli 'we majale, 'lige anile a'bopi ra'íchaga:

—¿Churigá 'la uméroché ye rioka alué remónisi u'tabela pe ra'íchaga, 'la ma'chípá 'smíguru alué u'tabela remónisi ye riochi?

<sup>37</sup> 'Lige suwábaga ralámuli ichúrimi riógachi machile 'lige ra'íchale a'bopi 'we a'lá sa'wame ko alué Esusi.

*Jena ruwimela Esusi nayúkame sa'wáligo*

<sup>38</sup> 'Lige Esusi simile alé u'tá re'obachi asagá «sinagoga» rewégame, 'lige simile Simoni galíflachi. Alué Simoni wasila 'we iná bo'ile, 'lige alué Esusi 'we e'weríli tániliru ralámulite napurigá 'yómala alué mukí. <sup>39</sup> 'Liko Esúsika rojpóchaga chujkíbale alé a'bé 'lige ma'chí pale alué nayulí inawí regá anegá:

—¡A'rewa ye mukí!

'Liko alué mukí yati sa'wile iná. 'Lige yati asísiga kógile go'ame alué ralámuli alemi mochígame.

<sup>40</sup> Rayénali bokuíchi, we'ká ralámuli nayúkame a'píliro alué Esusi, we'ká e'karúgame nawillite nayume ralámuli. 'Lige Esúsika nochale alué a'pílipi nayume 'lige yati sa'wile alué nayúkame. <sup>41</sup> Jaré alué we'ká ralámuli nayume remónisi u'kuchípala mochígame nile, alué u'kuchípala remónisi abiena 'ma buyánale, 'lige ne'ole buyásiga regá:

—¡Mueka Onorúgame Inolá júkuru!

'Lige alué Esúsika tase najkile napurigá alarigá anewa, alekeri ne'óchale, tase a'rale napurigá ra'íchámala alué u'kuchípala remónisi napugiti alué u'kuchípala

† 4:22 Siné kachi tabilé 'cho yati ayole ralámuli alarigá aníchi Esusi, siné kachi abé nujubapi ayole 'nalina, napu ju 'ma bersículo 28. § 4:33 E'nesi glosario «Satanás». \* 4:34 Alué Remónisika «Nasareta bejtégame» aníá pe «Rabí rijimala ju mué, Rabí 'we 'ya bejtégame» anime ke anile. E'nesi glosario «nasareno». † 4:41 E'nesi glosario «Cristo».

remónisika machime nílgame Kristo† ko alué Esusi.

*Jena ruwimela tabilé najkíligo ralámuli napurigá simela Esusi*

<sup>42</sup> Che'lachi simile alé we'ká riógachi asagá alué Esusi, simile a'minami tase riógachi. 'Lige ralámulika 'we 'yáale, 'lige napu'lige rewisá ralámulika tase najkíle napurigá simela. <sup>43</sup> 'Lige Esúsika anele:

—Neka benírimili júkuru alué a'lala rejcholi Onorúgame nila alé uché bilena riógame ralámuli churigá nimio napu'lige nulachi Onorúgame jena wijchimboba napu'lige 'ma 'la sébali ikisá napurigá najkí bo'né Onorúgame. Alekeri gite julárigame kame neka Onorúgamete.

<sup>44</sup> Alésíko eyénale Esusi beníriga alué rejcholi we'kanami u'kuchí re'obachi «sinagoga» rewégame alemi Jurea rewégame gawí bo'ígichi.

## 5

*Jena ruwimela alué ro'chí i'mume we'ká ro'chí wejáligo*

<sup>1</sup> Sinéchigo rawé alué Esusi beniria ilígachi alé suweke walú ba'wí ilígichi Galilea\* rewégachi, we'ká ralámuli napuíle alé, rajchini járole akináliga Esusi ruwichi tachiri najkiá Onorúgame. <sup>2</sup> Esusi etele oká u'kuchí barko ro'chí i'mula alé ba'wichí suweke uchúkame arikame. Alué ro'chí i'mume rioka 'ma e'tegílige, alemi ba'wichí suweke uchule morali pogo ro'chí wejila. <sup>3</sup> 'Lige Esúsika 'mole alé bilena bárkochi alé chujkúgame ba'wichí suweke napu nile Simoni nila. 'Lige nulale napurigá abé a'mibemi ba'wichí o'toboa alué u'tá barko. 'Lige Esusi alé bárkochi 'mole 'lige asíbale, 'lige alé asagá abichilubi 'we benirale alué ra'íchali tachiri najkiá Onorúgame.

<sup>4</sup> Napu'lige suwénasa ra'íchali rejcholi beniria, anele alué Simoni:

—O'tó ye barko 'mi 'we rojkógachi, alé pápua alué morali ro'chí wejila, we'ká ro'chí chemimela alé.

<sup>5</sup> Simónika regá nejele:

—Mué benírame, ramueka che'lebaru i'mua ro'chí, 'lige tabilé 'wesi ro'chí chewaru. Abirigáchigo pámalagó ne ye morali mué alarigá nulame.

<sup>6</sup> Napu'lige pasa alué morali alé, 'liko we'ká ro'chí che'wale, amulí ch'i'wale morali bejtéliga. <sup>7</sup> 'Liko sekate ra'íchaga bayele alué chebilena u'tá bárkochi mochígame rió napurigá nejkúrimala. 'Liko alué rió yati simibale alemi nejkúrimala. We'ká nile alué ro'chí, napu'lige wejiá 'ma

bochile okánika alué u'kuchí barko 'lige amulí bokuíle bejtéliga ro'chí.

<sup>8</sup> Etesa we'ká ro'chí chewíligo, alué Simoni Pegro chojkóbisiga ilíbale alé a'bé napu ilile Esusi. 'Lige anele:

—Mué Wa'lula, pe rekó simigá 'minami uché bilénami napugiti neka 'we resitiri alawégame kame.

<sup>9</sup> Alarigá anile napugiti majáligime napugiti machíligame Onorúgame a'walila gite chewíligo alué we'ká ro'chí. Abiena majale alué uché jaré rió napu alé u'tá bárkochi mochile si etesa we'ká ro'chí chewichi. <sup>10</sup> Abiena majale alué Seberoo 'kúchila Santiago 'lige alué Juani napu alué Simoni 'yuga nóchame nile.

'Lige alué Esúsika anele alué Simoni:

—Tase majawa mué rió, jípesiko 'ma tabilé ro'chí i'mume nímala mué. Jípesiko ra'íchali rejcholi ruyeme nímala mué ralámuli napurigá ku 'la na'támala.†

<sup>11</sup> 'Lige alué u'kuchí barko o'tosá 'miná wakígichi, alé a'rele alué u'kuchí barko 'lige suwábaga tábiri, 'lige simíbale Esusi 'yuga.

*Jena ruwimela Esusi sa'wáligo bilé rió sa'pachí amoba nayume*

<sup>12</sup> Bilé rawé Esusi ajtígachi alé bilena we'ká riógachi we'ká galí jágichi, 'lige bilé rió nawale alé sa'pachí amoba nayume «lepra» anilime nawilí yolí ra'íchaga.‡ 'Lige alué rió etesa alué Esusi, alé a'bé ilíbale chojkóbaka 'lige rojppóchaga chujkíbiga. 'Lige regá anele:

—Mué Esusi, mueka 'we a'lá umégame ju sa'wá Onorúgame gite. Sa'wánilisaká sa'wawa ne'chí ye chati nayulí.

<sup>13</sup> 'Liko Esusi nochale sekate regá anigá:

—'La nímala. Jípeko sa'wimela mué!

'Lige pe yati sa'wile alué nayume.

<sup>14</sup> 'Lige Esusi 'we a'lá anele:

—Si'né simiboa mué napu ajtí alué balé, tase ichúrimi riógachi eyénaga. Kógiwa go'ame Onorúgame napurigá nulale alué Moisesi 'we 'ya, a'lígeko alué we'ká ralámuli 'la machimela mué 'ma 'la sa'wígame ko, 'lige 'la lisensia nígame ko mué napurigá 'yuga einámala mué alué 'la a'ká ralámuli.

<sup>15</sup> Esusi sa'wasa alué rió, aminacho 'we machile we'ká ralámuli 'la umégame ko sa'wá Esusi, 'lige we'ká ralámuli napuíme nile alemi napu eyénale nile Esusi, Esusi ra'íchálila gepumia, 'lige jaré napurigá 'yowa nayume nísaká. <sup>16</sup> 'Lige Esúsika i'sínimi a'mibemi uché bilénami simime nile tabilé riógachi 'lige alemi iligá ra'íchame nile Onorúgame 'yuga.

*Jena ruwimela Esusi sa'wáligo bilé sujírígame*

\* 5:1 Abiena Genesareta anilime ju alé walú ba'wí ilígichi Galilea. † 5:10 Esúsika anile: «jípeko ralámuli i'mume nímala mué.» 'Lige ramueka ujcharu alé bersíkulo napu ruwime ke anile alué Esusi. ‡ 5:12 E'nesi glosario «lepra».

17 Bilé rawé Esusi beniria ilígichi ra'íchali rejcholi ralámuli, 'lige mochile jaré ralámuli bariseo chojkégame alemi a'mulipi, 'lige abiena jaré rió benírame ra'íchali rejcholi napu a'rele Moisesi we'kaná riógachika sígame Galilea rewégame gawí bo'ígichi 'lige Jurea rewégame gawí bo'ígichi, abiena sígame Rusalénika we'ká riógachi. 'Lige Esusi Onorúgame a'walila gite 'we a'lá semáriga sa'wale alué we'ká ralámuli nayume alemi sígame. 18 'Lige jsile jaré rió majtógame bilé rió sujirigame tabachi rekagá. 'Lige pachá galírale o'tonáile a'bé rekamia alé napu ilile Esusi. 19 'Lige tase gayénale pachá mo'yá napugiti cha rajchini jáligame ralámuli alé yochi. 'Liko jímole galimopa galichi 'lige ewarale alé 'lige alégana re'kibule alué nayume, gemachi o'wiga iwíate,§ nasipa we'ká ralámuli jágichi alé a'bé Esusi ilígichi.

20 Napu'lige Esusi machisá 'we a'lá bi-jchigio alué ralámuli alué nayume a'págame 'we a'lá sa'wame ko Esusi, 'liko anele alué nayume:

—Mué rió, 'ma bujé ne mué nila chátiri 'nátili, jípeko 'we a'lá bi'wígame alawégame ju mué napurigá 'la moinámla rewagachi.

21 'Lige alué rió Moisesi rejchólila benírame abiena alué bariseo 'nátale: «¿Chieri júpaché ye rioka sikaniá tabilé níranti Onorúgame? 'La bujenti koriá aníguru ralámuli chátiri 'nátili napurigá 'la moinámla rewagachi. Pecha 'wesi rió bujémalagó chátiri 'nátili ralámuli, pe Onorúgameka 'la bujémala napurigá 'la moinámla rewagachi», 'nátale.

Alué bariseo níriká 'we chátiri nile alué napurigá 'sile Esusi bujea chátiri 'nátili.\*

22 'Lige Esúsika 'la machile alarigá 'nátachi alué ralámuli, 'lige rukele:

—Émika ¿chonigá alieri 'nata mochípeché?

23 ¿Churigá anilía 'nalina abé 'la nitékó pala regá anilía?: «Mué rió, 'ma bujé ne mué nila chátiri 'nátili napurigá 'la moinámla mué rewagachi», regáchala anilía: «¡O'weti ilísiga, yati einawa!» 24 Jipe ne napu julárigame ju Onorúgame 'pa rewagáchika napurigá rió neraga,† 'la machírimala ne 'emi ralámuli wa'lú a'wali nígame ko ne Onorúgame nila napurigá bujémala ne chátiri 'nátili ralámuli jena wijchimoba ejperégame.

'Lige anele alué rió sujirigame:

—O'weti ilisi mué, simigá kumi galírale 'ma majtoga gemá.

25 'Lige alué rió sujirigame yati ilísale alué we'ká ralámuli etériga, 'wile alué gemá napu ajchagá re'kibúlirige, alésiko simile kumi galírale, wa'lú cheliera 'yasia enale Onorúgame, 'ma 'la sa'wígame. 26 Alésiko alué

we'ká ralámuli 'we ra'sálale, 'lige wa'lú cheliera 'yale Onorúgame. 'Lige aminámichigó pe'tá majaga regá anile:

—Jipe rawé eteru alué Onorúgame a'walílate sa'wame. Tabilé 'wesi ralámuli alarigá sa'wame ju bilé sujirigame.

*Jena ruwimela Esusi bayériligo Lebí napurigá 'yuga einámala*

27 'Lige pe nujubapi Esusi ma'chínale, 'lige etele bilé rió alemi ajtígame enomí goblalia alé napu ajtime nile enomí narea, Lebí rewégame. Alué enomika alué wa'lula i'lime nile alé Roma nulame. 'Lige Esúsika anele:

—Nabá ne'chí 'yuga.

28 'Liko alué Lebí ilísile, suwábaga abajá a'resa alué nóchali simile Esusi 'yuga 'we 'la oyériga.

29 'Lige Lebí pe abé alí wa'lú go'ame newile alué Esusi alé bo'né Lebí galilachi. 'Lige we'ká rió enomí goblálome napuile alé, abiena uché jaré we'ká ralámuli mochile alé a'bé méssachi alué Esusi 'yuga. 30 'Lige jaré rió bariseo, 'lige jaré rió Moisesi nila ra'íchali rejcholi benírame, chojkile ra'icha alué Esusi 'yuga benime sayega. Regá anele:

—¿Chonigá go'áché 'emi 'lige bají 'emi alué ralámuli enomí goblálome 'yuga 'lige aminami alué ralámuli 'we chátiri 'nátame 'yuga?

31 'Lige Esúsika regá anele:

—Ralámuli tase nayume tase najkí bilé rió 'yome, pe alué nayume ralámulika 'la najkimela bilé 'yome. 32 Neka tabilé nawákuru alué a'ká ralámuli gu'írimia, iligá nawá ne ra'íchali rejcholi benírímia alué resiti alawégame chátiri 'nátame ralámuli napurigá 'ma a'rémala alué chátiri 'nátili. Neka nawákuru e'nemia napu ralámuli 'we resilá mochí bilé nejkúrima.

33 'Lige alué ralámuli rukele alué Esusi:

—Alué Juani 'yuga benime, abiena alué ralámuli bariseo, ¿chonigá 'we ayúname ju 'lige 'we tánime iwérali Onorúgame? 'Lige ¿chonigá mué 'yuga benímeka tabilé síné alarigá nokame juché?

34 'Lige alué Esúsika nejele regá anigá:

—¿'Lacha nulémalawé 'emi napurigá ayunámala alué ralámuli kólime newigichi sígame alué rió newímili sí ajtígachi? Tabilé nulémala 'emi. 35 Nobi sebámalagó bilé rawé napu 'lige me'liboli ju alué newímili, 'lige alué ralámuli sígame ka 'oni ejtebímala. A'lige kulí ayunámala.

36 Abiena uché bilé ra'íchili ruyeje regá anime:

—Ta'wesi ralámuli chí'wanámala alué uché bilé o'pacha tabilé unérigame pachókimia alué o'pacha o'chéráme. 'Lige alarigá olásiga alué o'pacha tabilé unérigame

§ 5:19 Sineko bilena tabachi rekagá a'páliku alué nayume. Napu 'lige galimópaga re'kibua alué rió nayume, pe gemachi ajchigá re'kibúliku. \* 5:21 Chátiri 'nátage ainalia ka pe a'chigó aliene resríga ju napurigá resí 'sika ainalia. † 5:24 E'nesi glosario «Hijo del Hombre».

'ma najsuámala, aminami alué o'pacha o'chérigame tase 'la ikiárélamala alué tabilé unérigame chiní 'yúriga. <sup>37</sup> A'chigóríga alué i'wílí ba'wila bíjí gayena ilígame tase ro'alime júkuru 'we o'chéráme chíliwílachi w'chite newárigame. Alué i'wílí ba'wila bíjí gayena ilígame alé ro'ásiga, 'ma a'támala alué chíliwila, 'lige alué i'wílí ba'wila bíjí gayena ilígame 'ma go'límala. <sup>38</sup> Alekeri alué i'wílí ba'wila bíjí gayena ilígame tabilé unérigame chíliwílachi ro'alime ju napurigá ta a'támala. Alué chíliwila tabilé unérigame 'la ojtome ju alué i'wílí ba'wila bíjí gayena ilígame ro'ásiga. <sup>39</sup> Ralámuli napu bajime ju alué i'wílí ba'wila 'ma 'we 'la gayénigime tase bajínilime ju alué bíjí gayena ilígame napugiti abé korume kame alué i'wílí ba'wila 'ma 'we gayéniga ilígame.

Esúsika pe regá anime ke anile:

—Tabilé 'wesi a'rénili ra'íchali rejcholi 'ya nerúgame. Neka benírímia nawá alué jipe nerúgame ra'íchali ne ra'ichálila nobi tabiléchigo 'wesi benínalígó, pe alué o'chérigame ra'íchali 'nalina 'we galé.†

## 6

*Jena ruwimela Esusi nulame korlígo 'lige yome resbulichi rawé*

<sup>1</sup> Bilé rawé resbulichi alué Esusi enale alemi ri'lígó echégichi alué bo'né benírame 'yuga, 'lige alué ralámulika rejpunasia e'yénale ri'lígó mulalá 'lige mojsika go'sisia rakala. <sup>2</sup> 'Lige alué jaré rió bariseo etele 'lige rukele:

—¿Chonigá alarigá nokáché 'émika jipe rawé resbulichi? 'Emi 'we a'lá machí osáligo Moisesi ra'íchali rejcholi napu ruwime ju Onorúgame tabilé lisensia nejío napurigá rijpunawa nibilé pe u'kabi ri'lígó mulalá rawé resbulichi.

<sup>3</sup> Esúsika regá rukele:

—¿Tacha machíché 'emi alarigá 'sílego siné rawé alué Rabí 'ya bejtégame e'lowisa 'lige aminami alué rió 'yuga e'yéname? <sup>4</sup> Bajkílekuru alué rió Rabí pachá Onorúgame galíachi,\* 'lige w'ílekuru alué baní Onorúgame kórigame 'lige go'ale, abiena kógile bo'né 'yuga e'yéname rekó tabilé nígame ke lisensia napurigá go'mela. Pe alué we'ká balecho 'la go'yame nile alué baní.

<sup>5</sup> Abiena regá anele:

—Ne napu julárigame ju Onorúgamete 'pa rewagáchika napurigá rió neraga, neka 'la nulame ju resbulichi rawé.

† **5:39** Esúsika pe ruwime ke anile tabilé na'lowálime ko Esusi nila ra'íchali uché jaré ra'íchali 'yúriga tabilé Esusi nila ra'íchali. Tase okáraga na'tawa. Aminami regá anime kéré Esusi tabilé a'páligo uché bilé se'nú ra'íchali, iligá a'páligo alué napu 'we 'yasi nerúgame nile. \* **6:4** 'We 'ya napu 'lige bejtégichi alué Rabí tabilé i'tele alué wa'lú re'obá Onorúgame galila «templo» anilime yolí ra'íchaga. Alé napu bajkile alué Rabí u'tá re'obá nile, tabilé napu echilú alué «templo». † **6:13**

E'nesi glosario «apóstol». † **6:14** Pégroka rejte aniamé kéréle. § **6:16** Iskariote aniáká pe Kiriote bejtégame aniamé ju.

<sup>6</sup> Uché bilé rawé resbulichi Esusi bajkile alé u'tá re'obachi «sinagoga» rewégame, 'lige beniria ilígichi ralámuli, 'lige alé asale bilé rió sujírígame sekégame wajtoná. <sup>7</sup> 'Lige alué ralámuli Moisesi a'réla ra'íchali rejcholi benírame 'lige abiena alué ralámuli bariseo 'we e'négá mochile alué Esusi machináliga pala 'yósita rawé resbulichi. 'Yósaká 'liko nejiwa olale alué Esusi. <sup>8</sup> 'Lige alué Esúsika 'la machile alarigá 'nátachi alué ralámuli, 'lige anele alué rió sujírígame sekégame:

—O'weti ilí alé nasipa.

'Liko alué rió o'weti ilísale 'lige alé nasipa ilíbale. <sup>9</sup> 'Lige alué Esusi anele alué uché jaré ralámuli:

—Ne bilé ra'íchali rukirá 'emi. ¿Tachiri chu'simía 'la lisensia ju rawé resbulichi? ¿Gu'írilia ralámuli, resí oliáchalá? ¿Sa'walia ralámuli, a'rilíachalá napurigá mukumela? ¿Churigá nulale alué Moisesi?

<sup>10</sup> 'Liko alué Esusi e'néniga a'pílipi alué ralámuli napu ekí mochile alemi tachiri nejí anirá, 'lige tabilé nejechi alué ralámuli anele alué rió sujírígame sekégame:

—¡Wajchiná mué sekala!

'Lige alué rioka yati e'wale 'lige 'ma sa'wile. <sup>11</sup> 'Lige alué bariseóka 'lige alué Moisesi a'réla ra'íchali rejcholi benírame ralámuli 'we ayole etesa sa'wachi. Alésiko chojkile ra'ícha a'bopi churigá 'la níliga alué Esusi me'liá.

*Jena ruwimela Esusi wanápaligo makué oká rió napurigá nulámala bo'né nochálalachi*

<sup>12</sup> Siné rawé Esusi simile bilena rabó Onorúgame 'yuga ra'íchamia, 'lige che'lébale Onorúgame 'yuga ra'ícha. <sup>13</sup> 'Lige rayénali chúbachi, bayele alué bo'né 'yuga benime we'ká ralámuli, 'lige wanápale makué oká rió napurigá nulámala bo'né nochálalachi.†

<sup>14</sup> Bilé alué Simoni nile, 'lige ujchele uché bilé rewá Pegro† anilime. Uché bilé alué Antresi nile. Alueka nile Simoni bonila. 'Lige uché bilé alué Santiago nile, uché bilé alué Juani nile, uché bilé alué Belipe nile, uché bilé alué Bartolomé nile, <sup>15</sup> uché bilé alué Mateo nile, uché bilé alué Romasi nile, uché bilé alué Santiago nile alué Alipeo inolá, 'lige uché bilela Simoni napu nile geriyero bilé chojkégame geriyero gompániérola alué alé Roma mochígame ralámuli saíla, <sup>16</sup> uché bilé alué Jurasi nile alué Santiago bonila, 'lige uché bilela Jurasi Iskariote§ napu a'kinana Esusi cha olale nejía.

*Jena ruwimela Esusi beníriligó we'ká ralámuli*

<sup>17</sup> Esusi 'ma ku re'kínale alué makué oká rió 'yuga, 'lige sébale alé bilena epomi. 'Lige alé epomi jale we'ká ralámuli napu epperégame nile we'kaná riógachi Jurea gawí bo'ígichi, abiena napu epperégame nile we'ká riógachi Rusaleni rewégachi, abiena napu epperégame nile okaná we'ká riógachi Tiro 'lige Sironi napu nile suweke alé wa'lú ba'wí ilígichi Meriteráneó rewégame ba'wí. Alué ralámulika napuile alé gepumia alué Esusi rejchólila abiena napurigá 'yóowa jaré ralámuli nayume, <sup>18</sup> abiena alué nayume alué chátiri u'kuchípala remónisi mochígame. <sup>19</sup> Esusi 'ma buyánale alué u'kuchípala remónisi. Suwábaga alué ralámuli nochánilia jale alué Esusi, abiena pe o'páchala ke nochánilia jale, napugiti pe nochasa alué ralámuli yati ma'chíname nílgame alué Esusi a'walila, 'lige yati sa'wime nile alué ralámuli.

*Jena ruwimela chieri 'we ra'sálárililigó Onorúgamete*

<sup>20</sup> 'Lige alué Esusi e'nele alué bo'né benírime, 'lige anele:

—Onorúgame 'we ganílga eteme ju 'emi (yolí ra'íchagáká anime chujjú «dichoso») rekó tabilé enomíggame ke 'emi napugiti 'we alá gu'írilime 'emi Onorúgamete.

<sup>21</sup> › Onorúgame 'we ganílga eteme ju 'emi napugiti rekó jipe e'lowika epperége, 'we 'la o'pasaga epperélimili kame 'emi.

› Onorúgame 'we ganílga eteme ju 'emi napugiti rekó jipe nalaka epperége 'we chálagá, 'we ra'sálagá epperélimili kame 'emi.

<sup>22</sup> › Onorúgame 'we ganílga eteme ju 'emi rekó ta galilíe, rekó 'mi mabulie, rekó resí anilíe, rekó chibi anilíe pe ne'chí oyérame kóriká ne napu ju 'pa rewagáchika nawágame napurigá rió neraga. <sup>23</sup> Alarigá anilíe, 'we ra'sáláwa 'emi ralámuli napugiti narémili kame 'emi semati raweli 'pa rewagachi. Alué 'ya epperégame napu ruwime nílgame napu anélige Onorúgame a'chigóriga aliena resí oláliru alué tabilé a'ká ralámulite napu nile rijimala alué jipe mochígame ralámuli tabilé a'ká.

<sup>24</sup> › Resía 'emi ralámuli 'we nígame, 'émika we'ká rawé ganílga epperékuru nobi tabiléchigo narémiligó 'emi semati raweli 'pa rewagachi nerúgame.

<sup>25</sup> › Resía 'emi ralámuli jipe 'la o'pasaga epperégame, pe a'kinánami 'we e'lowika epperélamala 'emi.

› Resía 'emi ralámuli jipe riólaga epperégame 'we ra'sálagá, 'we nígariká suwábaga tábiri, pe a'kinánami 'we nalaka epperélamala 'emi chalagá.

<sup>26</sup> › Resía 'emi ralámuli 'we a'ká ralámuli ko ruwame ralámulite. Alué ralámuli 'ya

epperégame anime nílechigó 'we a'ká nílgame alué ralámuli napu ruwime nile napu anele Onorúgame.

Abiena anele:

<sup>27</sup> —Neka nulé regá anegá 'emi ralámuli napu gepua ja: Rekó sairúgame ralámuli ke, alá galewa, 'la gu'íriwa alué ralámuli 'emi gichime, <sup>28</sup> 'la niraga ra'ichawa alué ralámuli 'yuga alué ralámuli chátiri 'nátame 'emi gichiga, tániwa Onorúgame napurigá Onorúgame 'la e'kámala alué ralámuli napu 'emi resí aneme ju. <sup>29</sup> Bilé rió nejchosa bilena banachí, 'lige abiena owewa uché bilela banalá napurigá nejchómala. Bilé rió nejposa alué gemá chiní gemagá enálime, abiena 'yawa alué o'pacha. <sup>30</sup> Apiépiri rió táachi bilé tábiri, yati 'yawa, 'lige bilé rió 'wísisa tábiri, tase ku tániwa. <sup>31</sup> 'Emi najkisáká napurigá 'la niraga nejkúramala apiépiri ralámuli, 'liko 'emi bajchá 'we 'la niraga gu'írimili júkuru apiépiri ralámuli.

<sup>32</sup> › 'Lige 'emi ralámuli galésaká pe alué ralámuli napu 'emi machime ju, ¿'wecha alá ju alarigá nokiá? Alarigá nokame ju alué ralámuli napu galeme ju aminá uché jaré ralámuli napurigá 'la galéwachigó. 'Émika 'la galémili júkuru alué ralámuli 'emi galeme, abiénachigó alué ralámuli tabilé galeme 'emi. <sup>33</sup> 'Emi ralámuli 'la gu'írisa pe alué ralámuli napu 'emi gu'írame ju, ¿'wecha alá ju alarigá nokiá? Alarigá nokame ju alué ralámuli tabilé oyérame Onorúgame. 'Émika abé a'ká ralámuli nímili júkuru, me'tagá alué ralámuli tabilé oyérame Onorúgame. <sup>34</sup> 'Emi tanesa tábiri alué bilé rió napu ku 'la gu'linásaré, ¿'wecha alá nímawé alarigá nokiá? Alarigá nokame ju alué ralámuli tabilé oyérame Onorúgame. Tanesa, buigá mochime ju ku gu'linilime. <sup>35</sup> 'La galewa 'nalina alué sairúgame, 'la semáriga gu'íriwa, tanewa tábiri alué ralámuli 'lige tase 'nata mochíwa 'lige buigá napurigá ku nejímala e'karúgame tábiri napu tanele 'emi. Alarigá 'la ma'chí nérélamala Onorúgame 'kúchila ko 'emi alué Onorúgame napu 'we galeme ju alué ralámuli napu tabilé néléme ju Onorúgame. <sup>36</sup> 'Emi 'la na'temame niwa alué we'ká ralámuli, a'chigóriga napurigá Onorúgame 'we na'temame ju 'emi. Alarigáká 'we alá ju.

Abiena anele:

<sup>37</sup> —Tabilé che anewa ralámuli a'bopi 'we resí nokagá járome níriká, 'we cha anésaká 'emi, a'boi 'we resí nokagá e'yéname ke 'liko Onorúgamete gastigáriwa 'emi. Tase na'áuka epperélawá 'emi ralámuli, alarigá Onorúgame tase ayónamala 'emi. 'La e'kawa 'emi uché jaré ralámuli 'lige alarigá e'kámala Onorúgame 'emi. <sup>38</sup> 'La kógiwa 'emi tábiri uché jaré ralámuli, alarigá Onorúgame uché rajpé we'ká tábiri 'yámala 'emi ralámuli. 'We

a'lá sébali tétiga nejísaká 'emi, 'la rajchíní ajchagá, 'liko 'we a'lá sébali tétiga narémala 'émichigó, 'la rajchíní ajchagá.

<sup>39</sup> Lige aminami alué Esusi rukele:

—¿'La 'yúrimerele bilé rió tase ma'chílime uché bilé rió tase ma'chílime? ¿Ta rusúmerelé okáraga alé bilénami rejkolichi? <sup>40</sup> Tase 'wesi alué benime anaga benégame níkala alué benírame. Napusí suwénasa 'ma suwábaga beniá 'liko 'la anámala alué benírame.

<sup>41-42</sup> › 'Lige ta machisá mué bo'né walú wejkolí ajchágame ko mué bo'né busilachi, 'lige ¿chonigá regá aneme ju mué alué rió: «Muérigó, aka ne ma'chí pátirigo alué u'tá wejkolí mué busilachi ajtígame»? 'La ma'chí pápua mué bo'né bajchá alué walú wejkolí mué busilachi ajtígame a'liko 'la ma'chí pákala mué alué u'tá wejkolí alué rió busilachi ajtígame.\*

<sup>43</sup> Abiena anele:

—Bilé masana tabilé nayume tabilé chátiri masana rakémala, 'we a'lá a'ká rakémala. Alué masana nayume tabilé a'ká masana rakémala, alueka chátiri masana rakémala. <sup>44</sup> A'pílipi rojá bilena galírale jágame napu rakeme ju pe rakala etega 'la machirume ju. Tase rakémala alué chuná rakala go'ame alé bilena masana rojala atuálachi. Tase rakémala i'wilí alé golálachi. <sup>45</sup> Alué 'we a'lala rió 'we semati ra'ichame ju napugiti 'we a'lá 'nátame kame. Alué 'we cha'sime rioka 'we chátiri ra'ichame ju napugiti 'we chátiri 'nátame kame. Bilé rió ra'ichame ju napurigá 'nata bo'né.

Abiena anele:

<sup>46</sup> —'Émika ¿chonigá walula nulame anéché ne'chí, peka sébali olame ke napurigá nulé ne 'emi? <sup>47</sup> Neka 'la ruyémala 'emi ralámuli tachiri káriká alué rió napu jeka nawame ju rejcholi gepumia 'lige 'la sébali olame napurigá nulé ne. <sup>48</sup> Alué rioka kárékuru alué bilé rió napu 'la re'lé joka elale galí napu tabilé na'mile rekó a'wágame rajkichochi alué ba'wí walú u'kusá 'lige walú bo'ibasa ba'wí napugiti 'we 'la re'lé ililigame, 'we a'lá a'wagá. <sup>49</sup> Alué rió napu akeme ju ra'ichali 'lige tase e'wame, alué rioka káré napurigá alué bilé rió 'we amoba elágame galí tase re'lé joka napu 'ma na'minaga pale alué ba'wí walú u'kusá 'lige walú bo'ibasa, a'wágame rajkichoga.

Suwábaga ye ra'ichali rejcholi ruwile Esusi alemi epomi.

## 7

*Jena ruwimela Esusi sa'wáligo bilé walula sontalo 'yuga nóchame*

<sup>1</sup> Esusi suwénasa ra'ichali beniria alué we'ká ralámuli, a'lige simile pe u'kabi riógachi Kapernaumi rewégachi. Alé asale bilé wal'ula sontalo romano. <sup>2</sup> Alué nulame sontalo ajchagá asale bilé rió nóchame napu 'we galeme nile. Alué nóchame tabilé meka nóchame nile enomí napurigá oliame nile jaré ralámuli 'we 'ya.\* Alué nóchame 'we nayua bo'ile, amulí mukiá bo'ile. <sup>3</sup> Lige alué nulame sontalo akisá sa'wame ko alué Esusi, 'lige júlale jaré rió ralámuli jurío nuleme Esusi bayénaliga napurigá 'we sajpuka nawámala 'yomia alué rió nóchame nayua bo'ígime. <sup>4</sup> Lige alué rió julárigame Esusi bayénaliga sebasa alé Esusi ajtígachi, nawile a'bé alué Esusi, 'lige 'we sajpuka 'we e'wérili bayérole, regá anegá:

—Alué rió nulame sontalo 'la nité gu'írilia <sup>5</sup> napugiti 'we a'lá galeme ramué ralámuli jurío.† 'Lige alué gite 'la gayénarukuru ramué nila «sinagoga».

<sup>6</sup> Liko alué Esusi yati simile alué ralámuli 'yuga. Napu'lige 'ma a'mulipi e'yénigichi seba alé galírale, alué nulame sontalo jaré machirume ralámuli júlale regá anéniliga alué Esusi:

—Mué Wal'ula, tase chérekará rekó mué ta sébage alé pachá galírale, napugiti pe apiépiri rió koriame alué sontalo, <sup>7</sup> alekeri tase nawagóri mué 'yuga ra'ichamia. Pe jena iligá sa'wámará mué alué nayume Onorúgame a'walila gite alué sontalo piónila. <sup>8</sup> Alué sontáloka nuléime korí e'wéalate, abiena nuleme korí sontalo u'kuchípala napu nuleme ju bo'né. Napu'lige julusa bilé sontalo alué bo'né, yati simime kará, 'lige napu'lige bayesa bilé sontalo alué bo'né, yati nawame kará, 'lige napu'lige nulesa alué bo'né 'yuga nóchame, yati e'wame kará. <sup>9</sup> Ye ra'ichali akisá, Esusi napurigá nábole alué sontalo, 'liko 'we ra'sálale, 'lige e'nele alué we'ká ralámuli napu alemi si e'yénale, 'lige anele:

—'La bijchiá ye rioka 'la sébili bijchígame ju 'we a'lá sa'wame ko ne Onorúgame a'walila gite. Jena napu epperé ralámuli israelita pecha 'wesi ralámuli i'teko uché jaré aliena 'la sébali bijchígime 'we a'lá sa'wame ko ne.

<sup>10</sup> Napu'lige alué julárigame ku galírale sebasa, rewale 'ma a'lá sa'wígame alué rió nóchame.

\* **6:41-42** Estúsika pe ruwime ke anile bilé ralámuli semátiri rejcholi 'yánalio alué uché jaré ralámuli napurigá ku 'la semáriga na'támala 'lige bo'neka abéchigo chátiri resí 'sika ilírome ke. Alué rioka, bo'né bajchá 'la tánimilí júkuru Onorúgame napurigá 'la bujémala alué chátiri 'nátili napu 'nátaga eyéname ju alué bo'né, napurigá 'la semátiri rejcholi 'yámala alué rió uché jaré ralámuli. \* **7:2** E'nese glosario «esclavo». † **7:5** Alué jurío ralámuli 'lige israelita 'lige ebreo pe aba alué bi'lepi chojkégame ralámuli kéré.

*Jena ruwimela Esusi ku ajánlirigo bilé mukúgame bilé mukí gunámakame ranala*

<sup>11</sup> Pe a'kinana Esusi simile uché bilena we'ká riógachi Naíni rewégachi, 'lige si e'yénale alué bo'né benírame abiena uché jaré we'ká ralámuli. <sup>12</sup> 'Lige alé we'ká riógachi seba etele bilé re'malí mukúgame o'towame tomia bilena tabachi rekagá majtoga. 'Lige alué mukúgame pe bi'neli nile, napugiti pe alué bi'lepi ranégame nílgame alué eyela gunamia. We'ká ralámuli alemi riógame e'yénale alué mukúgame o'towachi. <sup>13</sup> 'Lige alué Esusi etesa alué mukí, 'we na'temale, 'lige anele:

—Ma tase nalápua mué mukí.

<sup>14</sup> 'Lige alué Esusi a'bé nawile alué mukúgame, 'lige nochale alué tabali. 'Lige alué ralámuli majtoga e'yénigime ka kilí jábale. 'Lige alué Esusi anele alué mukúgame:

—¡Mué re'malí, o'weti asá!

<sup>15</sup> 'Liko alué mukúgame ku ajánale 'lige o'weti asísale, 'lige chojkile ra'icha alué re'malí. 'Lige Esúsika anele alué eyela:

—Ku o'togá mué inolá re'malí.

<sup>16</sup> 'Lige alué we'ká ralámuli etesa alué Esusi mukúgame ajánlirigo, 'we majale, 'lige walú cheliera 'yale Onorúgame 'lige anile:

—Onorúgame 'ma júlale bilé rió napu ruwime ju napu ané Onorúgame napurigá ramué gu'írame nímala.

<sup>17</sup> Suwábaga ralámuli napu ekí ejperele alé Jurea rewégame gawí bo'ígichi abiena a'mulipi ejperégame machile alarigá Esusi ajánlirigo bilé mukúgame.

*Jena ruwimela Juani júlaligo oká rió bo'né yuga benime rukéniliga Esusi*

<sup>18</sup> Juani ralámuli rewarame machile sa'wáligo we'ká nayúkame 'lige ajánlirigo bilé re'malí mukúgame alué Esusi napugiti ruyéligame alué ralámuli napu Juani benírame ju,† <sup>19</sup> 'lige júlale oká alué bo'né benírame alé napu asale Esusi rukéniliga pala alué nílga nejkúrame napu nawámili nílge jena wijchimoba, uché bilé chalá buwémili nílga.

<sup>20</sup> Alué oká rió napu júlale Juani sébale alé napu asale Esusi, 'lige anele:

—Juánite jularu ramué, alué Juani ralámuli rewarame, rukéniliga napurigá ruwimela mué, ¿pala mué ka napu nawámili nílge Onorúgamete julárigame? ¿Uché chalá bilé buwewa?

<sup>21</sup> Alué oká rió sebase alemi, Esusi 'we 'yoo ilile we'ká ralámuli sa'wá e'karúgame naulite nayume ralámuli, abiena buyana u'kuchípala remónisi ralámulichi mochígame, abiena ma'chiria alué ralámuli tase

ma'chilime. Abichilubi 'we 'yole. <sup>22</sup> Pe'tá i'libeko Esusi regá nejele:

—Ya kumi simíbaga ruyewa Juani napu etiá 'emi aminami napu aké 'emi. Ruyewa alué tase ma'chilime ralámuli ku sa'wao ne, sujírgame abiena ku sa'wao ne, alué sa'pachí amoba nayumeS ku sa'wao ne, alué najkacholo ku 'la akeme newao ne, alué suwíggame ku ajanio ne, 'lige alué ralámuli resiti tase níggame enomí a'lá ruyeo ne alué a'lala ra'ichali Onorúgame nila. <sup>23</sup> 'We ganílga mochí apiépiri ralámuli napu tase ayoga gepume ju ne ra'ichálila.

<sup>24</sup> Napu'lige 'ma ku simasa alué oká rió napu Juani júlale, Esúsika chojkile ra'ichali ruyea alué ralámuli churigá nílga alué Juani, regá rukega:

—Napu'lige 'emi e'yenia e'néniga alué Juani alé jami, ¿chieti mayéliko alué rió? ¿Péchala mayelie nimio napurigá pe bilé gajsalá ekate noká ilime? <sup>25</sup> 'Lige ta alieti rió e'néniga e'yénisiká 'emi, 'liko ¿tchiri e'néniga e'yéniliché 'emi alemi? ¿E'néniga e'yéniliché 'emi bilé rió 'we semati o'páchigime? 'Lige 'emi 'we machíguru alué rió 'we semati o'páchigime ka 'we ganílga semárikáchi bejtégame ko alé walú galichi napurigá bilé rió 'we enomígame. 'Liko ¿tchiri e'néniga e'yéniliché 'emi alemi alué ralámuli?

<sup>26</sup> ¿E'néniga e'yénale 'emi alué napu ruwime ju napu ané Onorúgame? Ju, alué e'néniga e'yénale 'emi, alueka júkuru abé walú a'walí níggame me'tagá alué uché jaré napu ruwime ju napu ané Onorúgame. <sup>27</sup> 'Lige alué Juani júkuru napu alé Onorúgame nila osilichi ruwí. Alé osilichi ka 'we a'lá sébali ruwí alarigá nímili nílga alué Juani, pe aba alé osilichi napu ruwile 'we 'ya Onorúgame churigá nímili nílga ne. Regá ruwí alé osilichi:

Ne jula bilé rió ne nila ra'ichali ruwime

bajchabé ta'chó sébachi mué

napurigá benía mochímala alué ralámuli ne nila ra'ichali.

Alarigá 'we a'lá niraga etémala mué sébachi. Regá aní alé osilichi.

<sup>28</sup> > Alué rió napu Onorúgame júlale pe Juani ju. Neka 'la ruwí tase 'wesi ralámuli i'tego jena wijchimoba 'we najtégame nóchali níggame me'tagá alué Juani. Neka abiena ruwí bilé rió tase najtégame ke, 'ma bi'wisá alawala alué rió 'liko 'we najtégame nimio Onorúgame nírige me'tigá Juani nochálila.

<sup>29</sup> Mochile alé alué enomí goblólome 'lige uché jaré ralámuli napu 'la niraga bijchígale napu nulale Onorúgame abé 'yabé napu 'la elile napurigá rewarawa alué Juánite 'yabé bajchabé rawé, alueka 'we 'la niraga akele

† 7:18 Juánika galíra bajchárige asagá júlale oká rió bo'né benírame rukéniliga Esusi.

§ 7:22 E'nesi glosario «lepra».



alué Esusi ra'ichálila. <sup>30</sup> Lige alué bariséoka 'lige alué Moisesi rejchólila benirame tabilé eilele 'ya rawé napurigá rewarawa Juánite, alarigá gawélele Onorúgame.

<sup>31</sup> Alué Esusi abiena regá anele:

—¡'La chieti ralámuli jipe riógame! <sup>32</sup> Pe alué okaná chojkégame kuchí 'kuchi kárékuru napu mochime ju alé we'ká riógachi nasípami re'ea, napu re'énilime ju napurigá pe a'bocho najkí. Napu regá aneme ju alué bilena chojkégame kuchitiri napu 'yuga re'eme ju:

Simérukururu ramué bilé wiká napurigá yawimela 'emi,

'lige 'emi tase yawí.

Wikarárukururu ramué bilé wiká 'we sewékame,

'lige 'emi tase nalagá.

Lige abichilubi ra'ichale Esusi regá:

<sup>33</sup> —Nawálekuru alué Juani 'lige tase we'ká e'karúgame go'ame go'yame ju 'lige tase bajime ju rekútame, 'lige ralámuli jipe ejperégame tabilé e'wime júkuru, 'lige u'tabela remónisi ajchágame korí alué Juani ralámuli rewarame. <sup>34</sup> Lige nawákuru ne napu 'pa rewagáchika nawágame ju napurigá rió neraga, neka go'yame júkuru we'ká e'karúgame go'ame, abiena bajime alué i'wilí ba'wila a'wágame newárigime.

'Lige 'emi 'we cha ané ne'chí, go'yechi ané, 'lige bajechi ané 'emi ne'chí, 'lige aní 'emi gompaniérola ko ne alué resí nokogá járome ralámuli, abiena alué enomí nareme alué wa'lula romano nareme. <sup>35</sup> Nobi 'láchigo ma'chúgime néréko Onorúgame a'wallila ne nochálila gite, 'lige Juani nochálila gite.

*Jena ruwimela bilé mukí we'ká rió 'yuga gojchime 'la bijchígigo 'la Onorúgame a'wallila nígame ko alué Esusi*

<sup>36</sup> Bilé rió bariseo bayérale Esusi bo'né galílachi go'ame kógimia. 'Lige alué Esúsika simile alé alué bariseo bejtélachi, alé se-basa asíbale a'bé mésachi. <sup>37</sup> 'Lige bilé mukí we'ká rió 'yuga gojchime napu bejtele alé we'ká riógachi, machisá Esusi simíligo alé bariseo bejtélachi go'ame go'mea, alué mukíka yati alemi sébale bilé u'tá botea gajpírame rejtele newárigime o'ká ba'wí 'we semá júkame ro'ágame. <sup>38</sup> 'Lige 'we nalaka a'bé Esusi ajtígichi alé a'bé raláchí chujkíbale rojpóchaga. 'Lige chojkile pagoa Esusi ralala alué bo'né mukí bo'né o'kiálate, 'lige wakele bo'né gupálate. Abiena 'we chu'mile ralala napurigá nokame nile, 'lige ro'eale alué ba'wí 'we semá júkame.

<sup>39</sup> Etesa bo'né bariseo napu Esusi bayélige, regá 'nátales: «'La bijchíá ruwime nísaká napu Onorúgame ané, 'liko machimékuru

alieti mukí ka ye mukí, 'we chátiri mukí júkuru we'ká rió 'yuga gojchime.»

<sup>40</sup> 'Liko Esúsika machigá alarigá 'nata ajtigó alué bariseo anele:

—Mué Simoni, ne bilé ra'ichali ruwimela.

'Lige alué rió bariséoka regá nejele:

—Ruwígó mué benirame.

<sup>41</sup> Esúsika anile:

—Oká rió wikele bilé rió enomí taneme, 'lige bilé rió maligi siento enomí wikame nile, bilé wikame nile malígisa makué.

<sup>42</sup> 'Lige okánika tase umébale ku gu'lina. 'Lige alué enomí tanémeká 'la e'kale alué wikame okánika alué rió. ¿Chieri 'nalina abé ganíliga rejpiékobá alué rió enomí taneme 'yuga?

<sup>43</sup> Simónika regá nejele:

—Alué rió napu abé we'ká wikame nile.

Esúsika regá anile:

—'La bijchíá aní mué.

<sup>44</sup> 'Liko alué Esusi e'néniga alué mukí anele alué Simoni:

—'La etiá mué ye mukí alarigá 'sichi. Neka bajkíkuru mué galílachi, 'lige mueka tase nejíkuru ba'wí napurigá ne ralala pagómala. 'Lige ye mukíka ne'chí ralala pagókuru alué bo'né o'kiálate, 'lige wakékuru bo'né gupálate. <sup>45</sup> Mueka tase chu'míkuru ne'chí napurigá nokame niru ramué,\* 'lige ye mukíka napusi seba tase a're ne'chí ralala chu'miá napugiti 'we a'lá nirame ne'chí. <sup>46</sup> Aminamí mueka tase ujchékuru alué aseite ne mo'ólachi 'we a'lá niraga napurigá nokame niru ramué, 'lige ye mukíka ro'ékuru ne ralálachi alué ba'wí 'we semá júkame. <sup>47</sup> Alekeri aní ne: «Ye mukíka wa'lú e'kárigime ju», ma'chúgime nérékuru napugiti 'we a'lá nirame ne'chí. Alué ta'mé wa'lú e'kárigime ka, pee semá 'sime ju. <sup>48</sup> Alésíko alué Esusi anele alué mukí:

—Mué mukí, wa'lú e'kárigime ju mué. Jípeko 'la sebámala mué 'pa rewagachi.

<sup>49</sup> Alué ralámuli bayérigame napu mochile alé si, alueka chojkile ra'icha a'bopi, regá anigá:

—¿Chieri júché ye rió síkaniá napu 'la e'kágorianíguru? Pe alué Onorúgameka 'la e'kame ju.

<sup>50</sup> 'Lige Esusi abiena uchéchigo anele alué mukí:

—Mué mukí, mueka 'we 'la bijchigi 'la e'kame ko ne ralámuli, alekeri 'ma tabilé gastigáriwa mué Onorúgamete. Ganíliga enawa kumi.

\* <sup>7:45</sup> Alué ralámuli israelítika sekachí chu'migá rejporime nile abiena banachí rekó pe rió ke napurigá nokame ju señora jena ramué ejperélachi, alué señora napu banachí a'nagupi chu'migá reporame ju a'nagupi.

## 8

*Jena ruwimela jaré umugí a'pime níligo go'ame Esusi*

<sup>1</sup> Pe a'kinana alué Esusi we'kaná we'ká riógachi eyénale abiena pe tabemi riógachi benírísia Onorúgame nila ra'íchali rejcholi, 'we a'lá ma'chígime ruigá churigá ka napu'lige 'ma 'la sébali ikísá napu najkí Onorúgame. 'Lige e'yénale si alué makué oká rió napu nulame nile Esusi nochálilachi, <sup>2</sup> abiena si e'yénale alué jaré umugí napu alué Esusi buyánilige u'kuchípala remónisi pachágana alué umugichi mochígime, abiena napu Esusi sa'wálige nayulí. Bilé alué mukí Maria rewégame nile napu ochérigame nile Magalena anilíchi, alué mukí napu gíchao u'kuchípala remónisi buyánirigame nile Esúsíte. <sup>3</sup> Abiena si enale Juana rewégame mukí, alué Chusa rewégame rió upila, alué rió napu wa'lula nulame nile alé wa'lula selígime Erote bejtélachi. Abiena si eyénale bilé mukí Rusana rewégame, abiena uché jaré we'ká umugí. Suwábaga alué umugí napu si e'yénale Esusi 'yuga alemi a'pame nile tábiri go'ame napurigá go'mela Esusi 'lige alué makué oká rió napu nulame nile Esusi nochálilachi.

*Jena ruwimela Esusi ruwíligo bilé ra'íchali chukúligo bilé rió ri'ligó weroka echame*

<sup>4</sup> 'Lige we'ká ralámuli napuile napu sébale Esusi, napuile we'kaná riógachi epperégame ralámuli. Alué ralámuli alemi napuísá, Esúsika ra'íchale, regá anigá.\*

<sup>5</sup> —Bilé rió simile ri'ligó echimea, 'lige weroka echale 'ma sebasá bo'né gawílachi. 'Lige alé bo'né gawílachi nasipa bo'ígime nile bilé bowé 'lige jaré ri'ligó rakala rujsule alé bowechi napu bo'ile alemi asarachi, 'lige 'ma re'keréle ralámuli alemi simáriga, abiena 'ma chulugí go'lele. <sup>6</sup> 'Lige jaré ri'ligó rujsule alemi napu nile i'píchi tabilé ru'nágame we'é ajtígichi, 'lige alué ri'ligó ya'wisá alé, 'ma wakíbale, pecha sa'mime níliga alué we'é. <sup>7</sup> 'Lige jaré ri'ligó rujsule pe alemi suwékimi wejchárale, 'lige tabilé 'la ya'wile alué ri'ligó. <sup>8</sup> 'Lige jaré ri'ligó rujsule 'we a'lá asarachi 'we a'lá sa'michi, 'lige 'we a'lá ya'wile, 'lige alué ri'ligoka 'la we'ká rakele. We'ká 'wile alué rió echágame.

Regá anísá Esusi, aminami regá anilechigó a'wágame ra'íchaga:

—'Emi ralámuli 'la akeme niri ka, 'la námaka gepuwa —regá anile.

<sup>9</sup> 'Lige alué makué oká ralámuli Esusi benírimeka anele:

—Ruyá aníguru mué jaré ri'ligó rujsúligo tabilé 'la we'echi 'lige tabilé 'la rakéligo, 'lige

jaré ri'ligó rakala rujsúligo 'we a'lá we'echi 'lige 'we a'lá rakéligo.

'Lige rukele:

—¿Tachiri ruwime ke aní mué?

<sup>10</sup> Esúsika anele:

—'Émika a'lá ma'chígime ruyémala ne napu tabilé námale 'emi. 'Lige uché jaré ralámuli ka tabilé 'la ma'chígime ruyémala ne ta'mé námutame, napurigá alué ralámuli tabilé pe'tá námaka ejtebímala

rekó 'la etee 'lige rekó abiena 'la akéé.†

<sup>11</sup> 'Lige aminami anele alué Esusi:

—Ye ra'íchalika ruwime kéré Onorúgame nila ra'íchali neraga ko alué ri'ligó rakala. <sup>12</sup> Alué boweka ruwime kéré alué ralámuli napu pe kulí chojkime ju Onorúgame ra'íchálila beniá 'lige alué Remónisi nawasa 'ma bujeme ko alué Onorúgame ra'íchálila napurigá ta oyéramala napurigá ta bi'wimela alawala. <sup>13</sup> 'Lige alué we'é tase ru'nágame ka ruwime kéré alué ralámuli napu akeme ju Onorúgame nila ra'íchali rejcholi, ganliga gepume ko sineko 'lige tase we'lisí námaka mochime ko. Napu'lige resí ikía ku a'reme ko alué ra'íchali rejcholi.

<sup>14</sup> Alué wejchaka, alueka ruwime kéré alué ralámuli rekó 'la 'nátaga akeme ke alué Onorúgame nila ra'íchali rejcholi 'lige tase a'reme ko alué tabilé Onorúgame nila ra'íchali rejcholi, 'we 'nátame ko enomí méliame 'lige alué uché jaré e'karúgame tábiri nochálime tase 'la Onorúgame nila, 'lige tase 'la o'wé nóchaga e'yéname ko Onorúgame nochálalachi. <sup>15</sup> 'Lige alué we'é a'lálaká alueka ruwime kéré alué ralámuli napu ra'íchali rejcholi akeme ju 'la sébali e'wame ko, tasiné a'reme ko e'wá alué Onorúgame nila ra'íchali rejcholi, senibí 'la sébali olame ko.

Abiena Esusi anele:

<sup>16</sup> —Tabilé 'wesi ralámuli rajeme ju bilé chojpe wa'lú bejtólite o'póluga rekamia, nibilé elamia bilénami sejkóchimi rajagá, iligá re'pabo elame ju napurigá 'la ma'chílimala ralámuli alemi mo'ime. <sup>17</sup> Ye ra'íchalika ruwime kéré jena wijchimóbaka tase 'wesi 'nátali nerúlimio nasótigame, abiena a'kinana 'ma suwábaga machiboli ko churigá 'nata ajtígó bilé ralámuli. <sup>18</sup> 'Liko 'la 'nátaga gepusi 'emi: Alué napu 'la námame ju bile ra'íchali rejcholi ruilía 'lige uché jaré ralámuli benírame alué ra'íchali rejcholi, alueka uchérajpe 'yáwali ju 'nátali Onorúgamete. Alué napu 'la námame ju bilé ra'íchali rejcholi 'lige tabilé benírame uché jaré ralámuli alué ra'íchali rejcholi, alué u'kabi napu ekí námale 'ma we'kuámala —regá anele Esusi.

\* 8:4 E'nesi glosario «parábola». † 8:10 E'nesi Isaías 6:9.

*Jena ruwimela Esusi ruwíligo chieri ka 'la napurigá Esusi eyela 'lige Esusi bonila 'lige waíla*

<sup>19</sup> Napu'lige Esusi bijí ra'icha ilígichi, alué Esusi eyela 'lige suwábaga alué nasípasi bonila 'lige nasípasi waíla sébale alé napu asale 'lige tase cherigá a'bé nawile cha we'ká jáligame ralámuli alemi. <sup>20</sup> 'Lige bilé ralámuli ruyele alué Esusi regá:

—Mué eyela 'lige mué bonila 'lige mué waíla alé ma'chika jawí 'lige mué 'yuga ra'ichánili—anele.

<sup>21</sup> 'Lige Esúsika anile:

—Alué napu 'la 'nátaga gepume ju Onorúgame nila rejcholi abiena 'la sébali olame napurigá aní alué rejcholi, alueka 'la napurigá ne eyela júkuru 'lige napurigá ne bonila 'lige napurigá ne waíla.

*Jena ruwimela Esusi eká geléchaligo 'lige ba'wí*

<sup>22</sup> Bilé rawé Esusi 'mole 'yuga alué makué oká rió alué bo'né Esusi benírame bilé u'tá bárkochi, 'lige anele:

—Wamí 'lebo bajoniwa ye bárkochi mochiga jena wa'lú ba'wí ilígichi Galilea anilime.

'Lige simíbale alé u'tá bárkochi mochiga. <sup>23</sup> 'Lige alemi nasipa ba'wichí e'yénaga Esúsika gojchile. 'Lige pe yati neraga a'wágame ekénale alemi, 'lige a'wágame chíbale ba'wí alé bárkochi, wa'lú maníbale alé pachágana, amulí bokuíle. <sup>24</sup> 'Lige alué makué oká rió yati ajchale Esusi regá anegá:

—¡Muérigo ramué nuleme! ¡'Ma bokuichi ye barko! ¡'Ma amulí sí'lilia ramué!

'Liko alué Esusi asísale 'lige a'wágame ne'óchale alué eká 'lige alué ba'wí, 'ma kilí elábale alué eká abiena alué ba'wí a'wágame chúbachi alé bárkochi, alésíko 'ma asíbale alué eká. 'Lige anele alué makué oká rió:

<sup>25</sup> —¿Chukirúpeché? ¿Chonigá tabilé bi-jchigi 'emi pe Onorúgame gite 'la asibamio ye eká?

'Lige alué ralámulika e'karúgame 'nátaga, a'bopi rukele:

—¿Chieri júché ye rió? Aka 'la e'wárinti ka'e ekátiri.

*Jena ruwimela Esusi sa'wáligo bilé rió alué u'kuchípala remónisi mochígame*

<sup>26</sup> Arigá sébale na'lebo baona napu ejperégame nile alué ralámuli Garáraka sígame, alué gawika bo'ile na'lebo bajoniga o'wépoka Galilea rewégachi gawí. <sup>27</sup> Esusi re'kisa alé bárkochi 'lige sébale bilé rió alemi abalemi bejtégame. Alué rioka 'ma we'ká bamí lo'í nile alué remónisi u'kuchípala gite. 'We chátiri na'tárime nile alué u'kuchípala remónisi. Alué rioka tase o'pachátame nile, aminami tase bejtégame nile bilena galírale,

pe resochí bejtégame nile napu ro'ilime nile suwígame. <sup>28</sup> 'Lige alué rió Esusi etesa a'wágame sinale, 'lige 'male a'bemi napu ilile Esusi 'lige a'bé ilíbale chojkóbisiga napu ilile Esusi, 'lige e'wele ne'oka anile:

—¿Tachiri najkí mué Esusi, Onorúgame 'pa rewagachi ajtígame inolá? ¡Pe rekó tase resí olawa ne'chí!

<sup>29</sup> Alarigá anile napugiti alué Esusi nuléligime bilé remónisi u'tabela napurigá ma'chínamala alé riochi. Alué remónisi u'tabela i'sinimi 'we a'wágame newame nile alué rió 'lige 'we lo'í. Ralámulika buleme nile sekala alué rió abiena ronola karénate napurigá ta ichúrimi júmamala, 'lige alué rioka pe gáriga rejppname nile alué karenana. Alué remónisi u'tabela gite 'másame nile jami lo'íriga.

<sup>30</sup> Esúsika rukele alué lo'í:

—¿Chonilime ju mué?

Alué lo'ika regá nejele:

—Neka Lejioni† rewégame ju.

Alarigá anile alué rió napugiti we'ká remónisi u'kuchípala mochígame nligame pachágana alué riochi. <sup>31</sup> 'Liko alué remónisi u'kuchípala anele Esusi napurigá ta 'lúpua bilena 'we re'lé ewágachi tajsiné chibálime.

<sup>32</sup> 'Lige alemi a'mulipi we'ká gowíS uchule rojí go'yá, 'lige alué remónisi u'kuchípala lisensia tánale alé gowichi mo'imea. 'Lige alué Esúsika 'la lisensia 'yale. <sup>33</sup> 'Lige alué remónisi u'kuchípala buyale alé riochi, 'lige mo'ile alé gowichi. 'Lige alué gowí 'ma lo'íriale, alésíko júmasele bilena 'we go'nágana 'we enárikáchi alué wa'lú ba'wí ilígichi Galilea rewégame, 'lige alé 'ma suwile alué gowí sí'lika.

<sup>34</sup> Alué gowí neseme etesa alarigá ikisao yati júmasele majaga, simíbale ruyemia ralámuli alé we'ká riógachi abiena alemi 'we e'megá riógachi. <sup>35</sup> 'Liko alué ralámuli akisá alué ra'íchali yati júmale e'nemía pala bijchiá nligá. 'Lige sebasa alé napu ilile alué Esusi, etele alué rió napu Esusi we'ká u'kuchípala remónisi buyánale, etele a'bé ajtígame raláchí chega napu ilile Esusi, 'ma 'la o'páchiga abiena ku 'la rió. 'Liko alé ajtígame etesa ralámuli, majale. <sup>36</sup> 'Lige alué ralámuli napu etele sa'wichi alué rió lo'í ruyele uché jaré ralámuli sa'wíligo alué rió napu we'ká u'kuchípala remónisi mochígame nligé pachágana. <sup>37</sup> Suwábaga ralámuli Garara rewégachi ejperégame chojkile alué Esusi mabua napurigá uché bilénami simela napugiti alué ralámulika majáligime. 'Liko Esúsika ku 'mole alé bárkochi 'lige simile alué barko asagá.

† 8:30 Lejioni aniaká we'ká aniame kéré alé Israeli ejperégame níriká.

§ 8:32 We'ká gowí nile, oká mili neraga.

<sup>38</sup> 'Lige alué rió napu Esusi we'ká u'kuchípala remónisi buyánirile, ta'chó simichi Esusi, anele:

—Neka si siminali mué 'yuga.

'Lige Esúsika tabilé elile napurigá si simela, 'Lige Esúsika anele:

<sup>39</sup> —Mueka ku galírale simiboa, 'lige suwábaga rupoa alarigá gu'íriliriga mué Onorúgamete.

'Lige alué rioka yati simile 'lige chojkile we'ká ralámuli ruyea alemi we'ká riógachi eperégame 'we a'lá gu'íriliga Esúsita.

*Jena ruwimela Esusi sa'wáligo oká umugi*

<sup>40</sup> Esusi ku sebasa alé na'lebo, 'lige alué we'ká ralámulika 'we ra'sálále ku nawachi Esusi napugiti suwábaga 'we buigá mochíligame. <sup>41</sup> 'Lige alemi nawale bilé rió Jairo rewégame. Alué rioka nulame nile alé u'tá re'obachi «sinagoga» rewégame. Alué rioka alé a'bé Esusi ralálachi ílbale chojkóbisiga, 'lige 'we e'wérali bayérale regá anigá:

—Pe rekó, nabá ne bejtélachi <sup>42</sup> napurigá 'yómala mué ne malala —anele.

Alué rioka pe alué bi'lepi malégame nile makué oká bamígame, 'lige 'we nayua bo'ile alué iwé, amulí mukíá bo'ile.

—'La ju. Nabágó líkó —anele alué Esusi.

'Lige alué Esusi alé Jairo bejtélachi simiá enágichi, we'ká ralámuli si simíbale rajchini namó járole simiba napu Esusi enale. <sup>43</sup> 'Lige alemi si enale bilé mukí 'ma makué oká bamí nayume, alué mukíka rojpachí nayume nile, tabilé siné sa'wime nile elena rojpachí, rasígame eléname nile. 'Lige 'ma suwábalige suwábaga enomí 'yome najtétiga, 'lige tase 'wesi umébale sa'wá. <sup>44</sup> 'Lige alué mukíka a'bé nawile alué Esusi alemi guwana simigá, 'lige nochale alué Esusi o'páchala we'lí se'wala, 'lige alarigá 'sisa alué mukí, 'lige yati sa'wile.

<sup>45</sup> 'Liko Esúsika rukele:

—¿Chieri nochá ne'chí o'páchala se'wala?

'Lige o'maka anile:

—Ta'wésigurú.

'Lige Pégroka anile:

—Mué Wa'lula, alué ralámulika 'we namó járo'é jemi 'we rajchini. «¿Chieri nochá ne'chí o'páchala se'wala?», aníá aníguru mueka. Ramueka tabilé machirú.

<sup>46</sup> 'Lige Esúsika regá anile:

—Aka bilé ralámuli nochátubá ne o'páchala se'wala, aka ne 'la ne nili nilíché sa'wá alué ne nila a'walite.

<sup>47</sup> 'Liko alué mukí tabilé ikírísa mejkabemi simiá chúbamia, 'liko simile áwalisia, 'lige a'bé chujkíbbale rojpóchaga napu ilile Esusi. 'Liko

anele we'ká ralámuli akériga sa'wináliga gite nocháligo alué Esusi o'páchala we'lí se'wala, 'lige anele yati sa'wáligo alué Esusi o'páchala se'wala nochasa. <sup>48</sup> 'Liko alué Esúsika anele:

—Mué mukí, jípeko 'ma sa'wígame ju mué 'lige 'ma 'la bi'wígame alawégame napugiti 'we a'lá sébali bijchígíligame mué a'walí nígame ko ne. Jípeko 'we ra'sálagá enawa kumi.

<sup>49</sup> Bijí ra'ícha ilígichi alué Esusi alué mukí 'yuga, 'lige sébale alé bilé rió alué wa'lula Jairo galílachika simígame. 'Lige anele alué Jairo:

—Mué malala 'ma mukú. 'Ma tase aminabi bayérowa ye benírame Esusi.

<sup>50</sup> 'Lige Esusi akísá alué ra'íchali, anele:

—Tase majawa mué rió mayega 'ma bijchiá mukúligo, pe 'la bijchígíwa 'la a'walí nígame ko ne, 'lige mué malala ku ajánamala.

<sup>51</sup> Napu'lige sebasa alé galírale Jairo bejtélachi, 'lige Esúsika tase elile napurigá uché jaré ralámuli si mo'imela alé pachá, pe bakiá bo'né benírame Pegro, Santiago, 'lige Juani, 'lige alué tewé eyela, abiena alué tewé o'nola. <sup>52</sup> 'Lige alué tewé we'kasa, alué we'ká ralámuli suwábaga 'we nalá jale sulachí o'choa a'bopi napurigá nokame nile alué ralámuli.\*

'Lige Esúsika anele:

—Tase nalasi 'emi. Ye u'tá teweka tase mukugá bo'í, pe gojchigá bo'í.

<sup>53</sup> 'Lige ralámulika tase bijchígíle, pe gawélele, 'la machíligame mukugá bo'igó alué iwé. <sup>54</sup> 'Lige Esúsika bajkile napu bo'ile alué iwé, 'lige cha'pile sekala, 'lige anele e'wele ra'íchaga:

—¡Mué iwé, asísiwa!

<sup>55</sup> 'Lige alué iwé ku ajánale, 'lige yati ku o'weti asísale. 'Lige Esusi nulale napurigá kógiwa go'ame. <sup>56</sup> 'Lige alué o'nola eyela si 'we ra'sálále. 'Lige alué Esúsika nulele napurigá tabilé 'wesi ralámuli ruyémala ku ajánilirigo.

## 9

*Jena ruwimela Esusi júlaligo nochániliga alué makué oká rió Esusi benírame*

<sup>1</sup> Esusi bayele alué makué oká rió Esusi benírame, 'lige 'yale a'walí 'lige nóchali napurigá ma'chí buinámala alué remónisi u'kuchípala ralámulichi pachágana mochígame abiena napurigá sa'wámala alué nayúkame. <sup>2</sup> Júlafe napurigá beníramala churigá nimia napu'lige sébali ikichi jena wijchimoba napu najkí Onorúgame, <sup>3</sup> Regá anegá júlafe:

\* 8:52 Alué ralámuli israelita napu'lige bilé ralámuli mukusá, a'wágame nalame nile rijimale napurigá yolí 'lige aminami o'chome nile a'bopi sulálachi. Alueka ruwime nile 'we chalagá mochígo alué ralámuli bilé ralámuli mukusá. 'I'sinimi najtétiga bayeme nile ralámuli napurigá alé smela a'wágame nalamia o'choga sulachí.

—Tabilé tábiri o'ká simawa. Tase o'ká simawa resola, nibilé sibula, nibilé enomí, nibilé nutugega. Tase pabega simawa uché bilé o'pacha re'lé ujchalime nujubami o'pachátilime. <sup>4</sup> Alé bilena we'ká riógachi se-basa, 'la bi'lénapi galírale mochiga nochawa napu'lige 'yoa ichúrimi e'yéniga, napusí simiba uché bilena we'ká riógachi a'lige kulí a'rewa alué galí. <sup>5</sup> 'Lige aminami alemi we'ká riógachi se-basa 'emi, 'lige alé tase galésiga 'emi, 'liko yati uché bilena we'ká riógachimi simawa. 'Lige 'we a'lá sawesa simawa we'é ronochí chujkíbigame. Alueka ruyame nímala Onorúgame gastigárimio alué ralámuli tabilé nejjóriká bilé galí napurigá alé mochiga nochámala 'emi ralámuli 'yoa ichúrimi e'yéniga.

<sup>6</sup> Alésíko simíbale alué makué oká rió ichúrimi, we'ká riógachi e'yénale benírísia ralámuli alué 'we a'lála rejcholi Onorúgame nila, abiena nayúkame sa'wasia.

<sup>7-8</sup> Alué wa'lula selígame rió Erote rewégame akísá suwábaga alarigá 'sió alué Esusi 'lige alué makué oká rió, e'karúriga 'nátales 'lige tase machile chieri rió ka alué napugiti aníligame jaré ralámuli:

—Juani ku ajánale.

Jaréchigo mayele alué 'ya ajtíggame ko Elíasi rewégame napu ruwime nílige napu anele Onorúgame, alué ku ajánaligo mayele. 'Lige jaréchigo mayele ku ajánaligo uché bilé rió alué 'ya ajtíggame napu ruwime nílige napu anélige Onorúgame. <sup>9</sup> 'Lige alué wa'lula selígame Erote Antípasi rewégameka regá anile:

—Aka 'ma nuligéché ne me'línliga Juánika 'lige 'ma a'p'rigeturu ne alué Juani mo'ola riipúniga gujtala, 'lige ¿chieri júché alué rió? 'We ruwanti júkuru alué rió.

'Lige alué wa'lula selígame Erote eténale alué Esusi.

<sup>10</sup> Napu'lige ku se-basa alué Esusi nochálilachi nulame alué makué oká rió, ruyele 'la beníríligo Onorúgame nila ra'íchali rejcholi ralámuli 'lige 'yóligo ralámuli. 'Lige alué Esúsika bayérole alué makué oká rió alé 'minami tase riógachi alé a'mulípi pe'kabi riógachi Betsáira rewégachi. <sup>11</sup> 'Lige ralámulika machísá alemi simíbaligo, yati najátale. 'Lige Esúsika 'we galegá etele alué we'ká ralámuli, 'lige ruyele churigá nulame ko Onorúgame, abiena sa'wale ralámuli nayúkame.

*Jena ruwimela Esusi 'yáligo go'ame we'ká ralámuli*

<sup>12</sup> 'Lige 'ma alichí, alué makué oká rió nawile a'bé alué Esusi, 'lige anele:

—Mué Esusi, ya a'rewa ye ralámuli napurigá simámala 'minami resíbamia go'ame 'yáamia 'minami we'kaná a'tabemi

riógachi. Jena napu ramué mochiru tabilé i'té go'ame.

<sup>13</sup> 'Lige alué Esúsika anele:

—Aka 'emi kógiwagurú go'ame.

'Lige alué makué oká rioka anile:

—Tase we'ká nerú baní, pe malígipi mochí, 'lige pe okabi ro'chí bi'tí. Wa'lú ralisúká go'ame 'la nímaleké 'liko 'la o'pasámaleké ye we'ká ralámuli. ¿Koché ralibóaché alakí go'ame? —anile alué makué oká rió.

<sup>14</sup> We'ká ralámuli mochile alé, we'ká umugí 'lige we'ká u'kuchítiri. Siné kachí maligí míli mochíligeréko pe riocho. 'Lige alué Esúsika anele alué makué oká rió:

—We'kaná chojkégame neraga mochiawá malígisa makué neraga.

<sup>15</sup> 'Liko alué makué oká rió yati alarigá nulele ralámuli. <sup>16</sup> 'Lige Esusi 'wile alué maligí baní 'lige alué oká ro'chí, 'lige 'pa rewagachi e'negá iligá wa'lú cheliera 'yale Onorúgame. 'Lige Esusi nasípasi chí'wanasa alué maligí baní 'lige alué oká ro'chí, 'yale alué makué oká rió kóginiliga alué we'ká ralámuli. <sup>17</sup> 'Lige alué we'ká ralámuli 'we a'lá sébali o'pasale, 'lige pe nujubapi napubule alué makué oká rió alué go'ame rasírigame, 'lige bochile makué oká e'wele atabé alué baní a'tabé rasírigame abiena ro'chí 'yúriga.

*Jena ruwimela Pegro ruwíligo Onorúgamete julárigame ko alué Esusi*

<sup>18</sup> Bilé rawé alué Esusi Onorúgame 'yuga ra'ícha ilígachi waná bi'neli alué makué oká rió alué Esúsita benírílime alemi mochílechigó. 'Lige rukele:

—¿Chieri korí alué ralámuli ne'chí?

<sup>19</sup> Alué ralámulika regá nejele:

—Jaré ralámuli aní mué Juani ko napu ralámuli rewaramé nile ba'wichí jáwaga. 'Lige jaréchigo ralámuli aní Elíasi ko mué. Jaréchigo ralámuli aní mué ko bilé alué 'ya mochígame napu ruwíggame nílige napu anélige Onorúgame ku ajánaligo mayé.

<sup>20</sup> 'Liko Esúsika rukele:

—'Émika ¿chieri koriágó ne'chí?

Pégroka anile:

—Mueka pe alué Kristo \* ju.

<sup>21</sup> 'Lige alué Esúsika 'we a'lá ruyele alué makué oká rió napurigá ta'wesi ruyémala.

<sup>22</sup> 'Lige anele Esusi alué makué oká rió:

—Ne napu julárigame ju Onorúgamete 'pa rewagáchika napurigá rió neraga 'we resí ikimela ne. 'We gawélimala ne'chí alué e'wélala ralámuli jurío nulame abiena alué e'wélala balé, abiena alué ralámuli napu benírame ju alué nulalí napu a'rele 'we 'ya alué Moisesi. 'Lige arigá 'ma me'liboa ne, pe bakíá rawé mukugá bo'mé ne 'lige Onorúgame ku ajánirimala ne'chí.

\* 9:20 E'nesi glosario «Cristo».

<sup>23</sup> Alige pe nujubapi Esusi anele alué makeú oká rió:

—Alué ne'chí oyérinilime, nabí rawé e'wámili ju napu ne nulá, 'lige' ma a'rémili ju chátiri' nátili 'nata. Alueka 'la sébali machigá asimeli júkuru tabilé majaga rekó ralámuli 'ma me'linálichí ne'chí oyérame kóriká. 'Lige senibí rawé 'la oyérinili júkuru ne'chí.  
<sup>24</sup> Alué rió majame mukugá ne'chí oyériga, alueka tase rewimela semati raweli. Alué rió napu ne'chí oyérame ju 'lige bilé rawé mukusá, alueka 'la semati raweli rewimela rewagáchí. <sup>25</sup> ¿Churigá 'la nímawé rekó bilé rió 'we a'lá nígame ke peka 'la 'nátame rió ke pe chibi 'sika eyéname ke? <sup>26</sup> 'Lige bilé rió 'we chijúnáme ne'chí oyériga mayega 'we cha anéwali ko uché jaré ralámulite ne'chí oyérame kóriká, 'liko ne napu nawágame ju 'pa rewagáchika napurigá rió neraga chijunámalachigó alué rió 'yuga napu'lige ne ku nawasa walú ra'ósili noligá, niga alué a'walí ne bo'né O'nola nila, abiena alué santo ánjeli a'walila niga. <sup>27</sup> Jaré 'emi napu jena mochí jipe, bajchabé ta'chó suwiyá 'la machimela churigá nulame ko Onorúgame† —regá anile Esusi.

*Jena ruwimela Esusi se'winati gayénaligo*  
<sup>28</sup> Ye ra'íchali ruisá, osánó rawé kachi nerágirigá a'kinana, Esusi simile bilénami re'pá rabó Onorúgame 'yuga ra'íchamia alué bakiá rió 'yuga, Pegro, Santiago, 'lige Juani. <sup>29</sup> 'Lige bijí Onorúgame 'yuga ra'ícha iligá alué Esusi, se'winati gayénale bo'né banalá, abiena o'páchala, 'we rojsákame gayénale, 'we rapame. <sup>30</sup> 'Lige yati neraga jsile oká rió alé napu 'we 'ya epperégame nile ta'chó ajtígachi Esusi, 'lige Esusi 'yuga ra'íchale. 'Lige bilé nile Moisesi, 'lige uché bilélaka Elíasi. <sup>31</sup> 'Lige alé noligá 'we ra'ósaga ilíbale. 'Lige alé ra'íchale o'maka churigá mukimeo Esusi alé we'ká riógachi Rusaleni pe a'kinana. <sup>32</sup> 'Lige alué Pegro 'lige okánika alué gompaniérola okoka bi'tile 'lige yati bujsale, 'lige etele 'we ra'ósiga iligó noligá napu jale alué bakiá rió. <sup>33</sup> 'Lige alué Moisesi 'lige Elíasi 'ma simiba e'yénigichi alé Esusi iligachi, Pégroka anele alué Esusi:

—Mué nulame, 'láchigo jena napútu'ké ramué. 'Lige newawa bakiá galí rojsate, bilé mué Esusi nila, uché bilé Moisesi nila, 'lige uché bilé Elíasi nila.

'Lige alué Pégroka tabilé machigá, pe ra'íchaga alarigá anile.

<sup>34</sup> 'Lige bijí ra'ícha jágichi, re'kínale bilé nolí 'lige 'ma na'pólale suwábaga alué usani rió. 'Lige 'we majale alué Esúsíte benírilime nolite na'pólisa. <sup>35</sup> 'Lige anile bilé ra'íchali alé nolírale regá anime:

—Ye Esusi ne Inolá ju napu ne nóchali 'ya, 'we a'lá e'wiwa 'emi bakiá rió ye rió nulachi.

<sup>36</sup> Alué ra'íchali ma'chí anisá, pe a'lige yati neraga alué bakiá rió etele Esusi bi'neli iligame. 'Lige alué bakiá rioka tase 'wesi ruyele tabilé 'cho mukuchi ka alué Esusi alakiligo alemi.

*Jena ruwimela alué Esusi benírimé tabilé umébaligo sa'wá bilé re'malí nayume*

<sup>37</sup> Melénala rawé ku e'teginele alé rabókana, 'lige we'ká ralámuli simíbale najtepamia alué Esusi. <sup>38</sup> 'Lige bilé rió anile alemi we'ká ralámuli jágichi nasípami iligá a'wágame ra'íchaga:

—Muérgo Benírame, pe rekó na'temaki ne inolá re'malí, pe ye bi'lepi inógame ju ne. <sup>39</sup> Alué u'tabela remónisite cha'piame ju ye re'malí alawala, abiena ronowégame chu'ega bo'írame ju. 'We resí olasa, ku a'reme ju. <sup>40</sup> Neka 'ma nulugé mué 'yuga benime napurigá ma'chí pákala alué u'tabela remónisi, 'lige tabiléchigo umébalekó.

<sup>41</sup> 'Lige Esúsika regá anile:

—'Emi ralámuli cha nokame tabilé bi-jchígime, chíéniko si asimélaché ne 'emi 'yuga napurigá 'la bijchígamala 'emi. Jeka o'tó mué inolá.

<sup>42</sup> Napu'lige alué re'malí o'nola alé sekachí cha'pigá o'tochi alé Esusi iligachi alué re'malí, 'lige alué remónisi u'tabela yati wijichí rekábale alué re'malí, 'lige bo'írale ronobútiga chu'ala. 'Lige Esúsika ne'óchale alué remónisi u'tabela, 'lige ma'chí pale. 'Lige ku o'nola 'yuga júlae. <sup>43</sup> 'Lige suwábaga ralámuli napu eki etele, 'we ra'sálale etesa alachilú a'walí nígame ko Onorúgame.

*Jena ruwimela alué Esusi benírimé tabilé námaka mochigo Onorúgame rekiligo napurigá mukumela alué Esusi*

Napu'lige suwábaga alué ralámuli 'we ra'sálaga mochígichi etesa Esusi ma'chí pachi alué u'tabela remónisi, 'liko Esúsika anele alué makeú oká rió aba alué bo'né Esúsíte benírilime:

<sup>44</sup> —'We a'lá 'nátaga gepusi ye ra'íchali, tase siné we'kuawa: Ne napu nawágame ju 'pa rewagáchika napurigá rió neraga, bilé rawé o'toboli ju ne alé sairúgame mochígichi.

<sup>45</sup> 'Lige alué makeú oká rioka tase námale alieti olagá anió Esusi, napugiti bo'né abalarigá ra'íchaligame napurigá ta námamala, 'lige alué ralámuli Esúsíte benírilime majale rukegá napurigá abé a'lá ruwimela alieti olagá anió Esusi.

*Jena ruwimela Esusi ruwiligo chieri ka abé najtérame rió*

† 9:27 Esusi ruwigá anime ke anile, alué Pegro 'lige Santiago 'lige Juani etemio alué Esusi alué Elíasi 'lige Moisesi 'yuga ra'íchachi, o jaré ralámuli etemio Esusi ku ajánachi, o alé Rusaleni iligame walú re'obá 'ma gajunálíchi kómá.

46 'Lige alué makué oká rió chojkile ra'icha a'bopi abé najtékame nínilia bilé.  
47 'Lige alué Esúsika machile alieti 'nata jago alué ralámuli, 'liko bilé towi bayele 'lige alé a'bé elale. 48 'Lige anele alué ralámuli:

—'Emi a'lá na'temaka etéeme nísaká ye towi napu ne 'we a'lá na'temaka eté 'liko 'la ne'chí nírame nímala 'emi. 'Lige ne'chí níraká 'emi, 'liko 'la nírame ju 'emi Onorúgame. Alué a'lá na'temaka eteme suwábaga ralámuli, alué nímala abé najtékame Onorúgame níruga.

*Jena ruwimela alué Esúsíte benírilime tabilé najkile napurigá 'yome nímala uché jaré ralámuli*

49 'Liko Juánika anele alué Esusi:

—Mué Wa'lula, ramueka eteru bilé rió u'kuchípala remónisi buyánachi napurigá buyáname ju mué. 'Lige alué rió regá anigá buyáname ju alué u'kuchípala remónisi: «Esusi a'walila gite 'la buyasa 'la kápá muechi alué u'kuchípala remónisi.» 'Lige ramueka suliru, alueka pecha lisensia níggame kame napurigá ralámuli 'yoga einámala, pecha ramué 'yuga eyéname ka alué rió.

50 'Liko alué Esúsika anele:

—Tase sulíwa alué rió. Alué tase sairúgame ju ramué 'yuga, alueka ramué gompaniérola ju.

*Jena ruwimela Esusi ne'óchaligo alué Akobo 'lige Juani*

51 Napu'lige 'ma sébachi raweli Esusi ku rewagáchi moinámichi, 'we 'la iwega a'lá b'ilepi 'nátaga simile Esusi alé Rusaleni. 52 Alé boichimi enegá júlale jaré rió bajchá alé bilénami ralámuli samaritano epperélachi 'yániliga galí okola. 'Lige alué ralámulika yati simíbale bajchá galí 'yamia alé samaritano epperélachi. 53 'Lige alué ralámuli samaritanoka tase 'yale galí napurigá alemi gojchimela alué Esusi 'lige alué 'yuga e'yénigime napugiti machíligame alué Esusi Rusaleni simiá enáligo.† 54 'Liko alué oká rió Esúsíte benírilime, Santiago 'lige Juani, anele alué Esusi:

—Mué Wa'lula, ¿ta najkí mué napurigá nulawa napurigá bilé na'í 'pa rewagáchikana re'kínamala napurigá suwábaga rajimela alué ralámuli alé rióggame napurigá 'sile alué 'ya ajtúgame rió Elíasí rewéggame napu ruwime nilige napu anele Onorúgame?

† 9:53 Alué ralámuli Samaria epperéggameka bilena rabó simíbame nile pe abalé Samaria iwérali tánimia Onorúgame 'lige tabilé siné 'la nírame nile napurigá alué ralámuli jurío simámala iwérali tánimia Onorúgame Rusaleni anilíchi. E'nesi glosario «samaritanos».

\* 10:2 Napu'lige Esusi regá anía: «'We we'lesi ju ri'ligó echerúgime 'lige 'we rakega ilí», pe anime ke anile we'ká nílgo ralámuli napu machinalia mochile Onorúgame nila ra'íchali. 'Lige napu'lige anía: «Alué 'wime 'we u'kabi ju», pe anime ke anile 'we u'kabi nílgo ralámuli Onorúgame ra'íchálla benírame. Napu'lige anía: «Echirúgame níggame anewa napurigá julámala 'wíniliga chejaré 'wime», pe anime ke anile: tániwa Onorúgame napurigá julámala we'ká alué Onorúgame nila ra'íchali benírame.

55 'Lige alué Esúsika e'nele alué oká rió, 'lige ne'óchale regá anigá:

—¿Chonigá e'kósiniliché 'émika alué ralámuli?

56 Alésíko simíbale uché bilena rióggachi.

*Jena ruwimela choníligo alué napu Esusi oyéranile*

57 'Lige boichimi e'yéniga alué ralámuli, najtépale bilé rió 'lige anele alué Esusi:

—Mué Wa'lula, neka 'we a'lá sébali oyérinili mué.

58 'Lige Esúsika regá nejele:

—Geyóchika níggame júkuru resó, 'lige chulugika 'la ra'sóggame júkuru. Ne napu nawággame ju 'pa rewagáchika napurigá rió neraga, neka tabilé asé galéggame ju napurigá gojchimela ne. 'Lige mueka 'la simináliri, mué bo'né ma'chíleké.

59 Esusi anele uché bilé rió:

—Nabá ne'chí 'yuga ne'chí oyériga.

'Liko alué rioka anile:

—Mué Wa'lula, pe'wera buwé ne'chí, ne o'nola mukúgame tomia simé ne bajchá.

60 'Lige Esúsika regá anele:

—Nulewa alué tase oyérame Onorúgame napurigá tómala alué mué o'nola mukúgame. Mueka simiboa 'nalina we'kaná ichúrими ralámuli ruyemia churigá ka napu'lige 'ma 'la sébali ikisá napu najkí Onorúgame jena wijchimoba.

61 'Lige anile uchéchigo bilé rió:

—Mué Wa'lula, néchigó abiena siminali mué 'yuga. Iligá pe'wera buwéggame ne galírale ro'ísa'é ruyemia galírale mochígame.

62 'Lige Esúsika anele:

—Alué bilé rió asará chujkúgame, 'lige ku guwana e'nasia ename, alueka tase wajchígame asarámala.

## 10

*Jena ruwimela Esusi wanápaligo napurigá nochámala gicháosa makué miná oká rió*

1 Pe nujubapi Esusi wanápale gicháosa makué miná oká rió, 'lige júlale bajchabemi pe okacho neraga i'wana chojkéggame. Júlale alemi we'kaná rióggachi napu simírímili nílge alué Esusi. Tabilé júlale si alué makué oká rió bo'né benírame. 2 Regá anegá júlale:

—'We we'lé ju ri'ligó echerúgime, 'lige alué 'wime ka 'we u'kabi ju. Alekeri alué echerúgime níggame anewa napurigá julámala 'wíniliga uché jaré 'wime.\*

<sup>3</sup> 'Lige anele:

—Simíbagá 'emi okacho neraga. Neka jula 'emi napu mochí 'we jobátigame ralámuli napurigá u'kuchí bo'á a'tanala alé napu olí e'yéname ju. <sup>4</sup> Tase o'ká simawa sibula go'ame ra'kólime, aminami tase enomí ra'kola, 'lige tabilé pabega aká nujubami akarálime. Aminami tase jábawa boichimi ralámuli 'yuga we'lisi ra'icha. Pe bi'lepi 'nátaga e'yénawa pe benírilinecho ralámuli Onorúgame nila ra'ichali.

<sup>5</sup> › Napu'lige seba bilena galírale, repóriwa alué ralámuli regá anegá: «Onorúgamete 'la 'yásiga 'la ke 'emi semati raweli jena galírale.» <sup>6</sup> Alé galírale 'we ganíliga epperélasa alué ralámuli, 'liko abéchigo ganíliga epperélamala Onorúgame nila ra'ichali akísá. Ta ganíliga epperégame nísaká 'liko abé tabilé ganíliga ejtebímala tabilé 'la nirasa Onorúgame nila ra'ichali. <sup>7</sup> 'La bi'lénapi galírale okópua alé bilena we'ká riógachi, tase ichúrimi galírale okópua alé. 'Lige go'poa go'ame napu koni alué ralámuli alé riógame, napugiti nóchameka go'ame meka nóchame kame.

<sup>8</sup> › Bilena riógachi sébachi 'emi, 'la ganíliga etésiga 'emi alé, 'lige go'ame kógisiga, yati go'poa alué go'ame tabilé gawéliga. <sup>9</sup> Abiena 'la sa'wawa ralámuli nayume alé galírale riógame, 'lige anewa: «'Ma sébapá raweli napu 'la sébali ikimeli nílige jena wijchimoba napurigá najkí Onorúgame.» <sup>10</sup> 'Lige 'emi sebasá alé bilena riógachi 'lige tase galegá etésiga 'emi, yati sawewa alué we'é ralachí chujkíbigame napurigá suwábaga ralámuli etémala 'lige regá aniboa: <sup>11</sup> «Ye we'é napu chujkíba ramué ralálachi jemi 'emi epperélahi, 'ma sawilí ramueka. Yeka ruwime ju 'ma tabilé cheri kame nírigo ramué 'emi si. 'Lige Onorúgame 'ma tabilé gu'írimala 'emi. 'La machigá mochiwa 'ma sébigo alué raweli napu'lige Onorúgame nulámili nile jena napu 'emi epperé, 'émika tabiléchigo najkígó napurigá nulámala.» Alarigá anesa 'liko yati simawa 'minami uché bilena riógachi. <sup>12</sup> Neka 'la ruwíba napu'lige seba alué gastigo alé riógachi napu tabilé ganíliga etéliru 'emi, alué gastigoká uchéchigo rajpé abé a'wágame nimio me'tagá alué napu Soroma† sébale napu 'we cha nokame ralámuli riolé 'we 'ya.

<sup>13</sup> › Resía alué ralámuli Korasini epperégame. Resía alué ralámuli Betsaira epperégame. 'We a'lá semáriga sa'wagéturu ne alé epperégame ralámuli Onorúgame a'walílate napu tabilé 'wesi

ralámuli gayéname ju alarigá sa'wá, 'lige 'emi abirigá tabilé a'réturu alué resítiri nóchali. 'Lige ne a'chigóriga semáriga gu'írisa alé Tiro epperégame ralámuli 'lige Sironi rewégachi napu epperé alué cha nokame ralámuli, alueka o'pachátimikuru o'pacha 'we chajótigame 'lige mochíbimikuru bilena najpisoche† napurigá machimela ralámuli 'ma ku guwana 'nátame ko. Alué ralámulika ya 'ma 'la Onorúgame oyérame nímikuru. Alué Korasini epperégame 'lige alué Betsaira epperégame etiáturu semáriga nejkúrichi ne 'lige tabilé ku guwana 'náturu. <sup>14</sup> Napu'lige seba raweli gastigo narémichi alué ralámuli Korasini epperégame 'lige alué Betsaira epperégame, a'lige rawé alué ralámuli uchérájpé a'wágame gastigo narémala me'tigá alué Tiro epperégame 'lige Sironi epperégame. <sup>15</sup> 'Lige alué ralámuli Kapernaumi epperégame 'we gunarume, 'we a'ká ralámuli ko lame a'boi 'lige mayeme o'toboli ko alé 'pa rewagachi, iligá 'lúpili ju 'légana Remónisi bejtélachi —anile Esusi.

<sup>16</sup> 'Lige anele alué ralámuli alemi jágame makué gichao miná oká:

—Napu 'la bijchigi 'emi ra'ichálila, alueka 'la ne'chí oyérame nímalá napugiti 'emi ra'ichálila ka, alueka kame napu ne 'ya 'emi. Alué napu tabilé 'la nirá 'emi ra'ichálila, alueka pe tabilé 'la niramé kérélamala ne ra'ichálila. 'Lige alué ralámuli tabilé 'la niramé ne'chí, alueka tabilé 'la niramé júchigó Onorúgame napu ne'chí júlale.

<sup>17</sup> 'Lige ku sebasá alué gicháosa makué miná oká rió, 'we ra'salágá sébale, regá anesia Esusi:

—Mué Wa'lula, alué remónisi u'kuchípala 'we a'lá e'wí ramué mué a'walíla gite.

<sup>18</sup> Esúsika anele:

—Ne 'la etiátigó alué wa'lula Remónisi 'pákana rewagáchikana pasichi Onorúgamete. <sup>19</sup> Neka wa'lú a'walí 'ya 'emi napurigá tajché olawa alué sinowite 'lige alué machílite napu'lige amóbami re'keka simárochi 'emi, 'lige napurigá ta umérowa 'emi Remónisite. <sup>20</sup> 'Lige 'emi tabilé ra'saláwa umérome kórika remónisi u'kuchípala, iligá 'we ra'saláwa 'nalina napugiti 'emi rewala 'ma uchuchárigame kame alé Onorúgame nila apélíchi alé rewagachi.

<sup>21</sup> Al'ígirikáchi Esusi 'we ra'salále alué Onorúgame Alawala gite, 'lige anile:

—Mué Onorúgame 'pa rewagachi ajtíggame abiena jena wijchimoba, neka 'we ra'salágá ajtí etega 'we a'lá semáriga gu'íríchi mué ralámuli jena wijchimoba epperégame.

† **10:12** Soroma anilíchi epperégame ralámuli 'we cha nokagá epperégame nile a'bopi, abiénachigó 'we jobátigame, alekeri Onorúgame 'ma me'ale suwábaga alué ralámuli wa'lú na'ite. E'nesi Génesis 19. † **10:13** Napu'lige alué ralámuli 'ya mochíggame 'we chálá mochiga 'we chátiri nóchigoriká abé 'yabé bajchabé rawé, alueka o'pachátame nile o'pacha 'we chajótigame 'lige mochíbame nile amoba najpisoche tabilé rajame. Alueka ruwime nile 'ma ku a'reo alué chátiri' nátili.



Mueka 'la 'ya 'nátili suwábaga 'la kilí ralámuli napurigá 'la ma'chígime námamala churigá nejkúrime ka mué Onorúgame jena wijchimoba, alué 'nátili napu tabilé 'yale mué alué 'we jebénigame ralámuli, alarigá najkíligame mué bo'né O'nó —alarigá anele Esusi alué Onorúgame.

<sup>22</sup> 'Lige regá anile aminami:

—Ne O'nola suwábaga 'ya ne'chí nóchali, 'nátili, 'lige a'walí. Tase 'wesi machí chieri ko Onorúgame Inolá napu ne ju, pe ne O'nola Onorúgame 'la machí, 'lige ta'wesi machí chieri ka ne O'nola Onorúgame, pe bo'né Inolaka 'la machí, pe neka 'la machí. 'Lige 'la machimélachigó alué ralámuli napu ekí 'la najkí ne napurigá machimela.

<sup>23</sup> 'Lige e'nele alué makué oká rió bo'né benírame, 'lige anele:

—'We ganiliga mochí alué ralámuli napu etémala napu 'emi etiá 'we a'lá semáriga 'yochi ne, 'la semáriga benírachi ne, 'lige 'la semáriga gu'írichi ralámuli ne. <sup>24</sup> 'Lige alué 'ya mochígame napu ruwime nílige napu anélige Onorúgame 'we eténelie 'we a'lá semáriga 'yochi ne, 'we a'lá semáriga benírachi ne 'lige 'we a'lá semáriga gu'írichi ne ralámuli, abiena alué e'wélala nulame rey eténelie ye napu etiá 'emi, tabiléchigo etélekó. Abiena akinálile ye napu 'emi aké, tabiléchigo akéleko.

*Jena ruwimela 'we 'la e'welime ko napu nulá Onorúgame*

<sup>25</sup> 'Lige bilé rió ra'íchali benírame, alué ra'íchali napu a'rele Moisesi 'we 'ya, simile a'bé Esusi 'yuga ra'íchamia rukemia pe machináliga churigáriga anirá pala pe'tá chajkena nejiara, 'lige regá rukele:

—Mué Benírame, ¿chu'símala ne napurigá 'la moinámala ne 'pa rewagachi?

<sup>26</sup> Esúsika regá rukele:

—¿Churigá anigó alué ra'íchali napu a'rele Moisesi? ¿Churigá námogo mué?

<sup>27</sup> Alué rioka regá nejele:

—Regá aníché alué ra'íchalika: «'We a'lá nirawa Onorúgame 'la bi'lepi 'nátaga. 'We a'lá niraga etewa apiépiri uché jaré ralámuli napurigá nirá mué bo'nepi.»

<sup>28</sup> 'Liko Esúsika regá anele:

—'We a'lá sébali neje mué. 'We 'la sébali olásaká mué napurigá aní mué, a'liko 'la moinámala mué rewagachi.

<sup>29</sup> 'Lige alué rió ra'íchali benírameka alué ra'íchali napu a'rele Moisesi 'we 'ya, napurigá a'lá rió neraga regá rukele chonirá Esusi, pala pe'tá chajkena nejiara:

—¿Chieri ju alué uché jaré ralámuli napu 'la niraga etémili ju ne?

<sup>30</sup> 'Liko Esúsika anele:

—Bilé rió enale re'kínasia go'nágana alé Rusaleni 'yéninga Jerikó simea. 'Lige jaré rió chigórigame najtépale boichimi,

'lige 'ma chigóli ru suwábaga tábiri 'ma o'páchatiri, abiena 'we wejpisosa a'réliru, amulí mukume a'réliru. <sup>31</sup> 'Lige bilé rió balé enale alemi boichimi 'lige etesa pe chajkena simírole. <sup>32</sup> 'Lige uché bilé rió alué wa'lú re'obá tebume Onorúgame galila enale alemi boichimi, 'lige etesa alué rió abiena chajkena simírole. <sup>33</sup> 'Lige uché bilé rió enale alemi boichimi Samaria bejtégame, alué rioka bulito 'mékame nile, alué rioka 'la na'temale etesa alemi bo'ígichi alué rió. <sup>34</sup> 'Lige a'bé nawile alué rió, 'lige 'yole chi'wágichi, ujchele yowí, abiena bulele ba'nísólite. 'Lige alé re'pá bulítóchi ajchale, 'lige o'tole alé bilena galírale galí gojchiame ilígachi, 'lige alé repule. <sup>35</sup> 'Lige melénala be'á alué rió samaritano 'ma simea, najtétile oká enomí alué rió galí nígame, 'lige anele: «'La tebúpua ye rió, 'lige wikagá rejpísaká ye rió, kuka simíruga najtétimala ne.»

<sup>36</sup> Esúsika 'ma suwénasa ye ra'íchali ruyá, rukele:

—¿Chieri alué bakiá rió abé na'temaka etélekoká?

<sup>37</sup> 'Lige alué rió Moisesi a'rélala ra'íchali benírameka anile:

—Alué rióguru napu 'yole alué rió.

'Lige alué Esúsika anele:

—Muéchigó 'we na'temápua suwábaga ralámuli.

*Jena ruwimela tabilé a'chigóriga 'nátiligó alué Marta napurigá María*

<sup>38</sup> Regá anisá Esusi uchéchigo abichilubi 'we simile bowesia 'lige sébale alé bilena pe'kabi riógachi. 'Lige sébale alé galírale Marta bejtélachi, 'lige Mártaka 'la ganúliga repórale Esusi. <sup>39</sup> Alué Marta binégame nile María rewégame. 'Lige alué Mariaka yati a'bé asíbale Esusi ra'íchálila gepumia. <sup>40</sup> 'Lige alué Mártaka, ta'mé ikía níliga tabilé nejkúrachi alué binila go'ame newilichi, 'lige a'bé nawile Esusi 'lige anele:

—Mué Esusi bi'neli neyúriga wa'lula, ¿tabilé chéla mué rekó ne binila tabilé gu'írie ne'chí go'ame newalichí? Pe rekó nulérigó napurigá gu'írimala ne'chí.

<sup>41</sup> Alué Esúsika nejele:

—Mué Marta, mueka pe we'ká go'ámecho newalime 'nata jipe kulipi rekó ne jena ajtígichi. <sup>42</sup> 'Lige jipe kulipi abé a'lá ju pe bi'lepi 'nátili, abé a'lá ju ne ra'íchálila gepulia 'emi níriga, 'lige Mariaka pe alué 'nátili pe ne'chí gepugámecho cha'pile, 'lige tabilé 'wesi bujémala alué 'nátili ne'chí gepugime.

## 11

*Jena ruwimela Esusi ruwiligó churigá ra'íchálime ka Onorúgame 'yuga*

<sup>1</sup> Sinéchigo alué Esusi Onorúgame 'yuga ra'ícha ilile alé bilena, 'lige suwénasa, bilé alué bo'né benírame anele:

—Mué Wa'lula, ramué beniri churigá ra'ichálie ka Onorúgame 'yuga napurigá Juani benírale alué bo'né benírame, alué Juani ralámuli rewaramé ba'wichí jáwaga.

<sup>2</sup> Lige Esúsika anele:

—Napu'lige Onorúgame 'yuga ra'icha ka, regá anibóaguru:

Mué O'nó 'pa rewagachi ajtígame.

Ramué najkiáke'é

napurigá 'we alá nirawa mué suwábaga ralámulite.

'We yati nulasa 'la kékuru mué jena wijchimo.

<sup>3</sup> La sébali 'yawa go'ame ramué jipe rawé.

<sup>4</sup> E'kawa ramué suwábaga chátiri 'nátili,

ramueka abiena 'la e'kálime kame

alué resí nokogá járome ralámuli resí olagá ramué.

Tase a'rewa ramué napurigá rujsúpua alé napu nerú chátiri 'nátili,

iligá gu'íriwa ramué.

<sup>5</sup> Lige regá anile bilé alué bo'né benírame 'yuga ra'icha:

—Mué bilé rió machime nisa, 'lige mué bejtélachi sebasa nasipa rukó 'lige anésiga mué ma'chika iligá: «Muérigo gompaniero, pe rekó anáchaga ne'chí 'yárigó bakiá baní, <sup>6</sup> alué bilé machirume sébake'é alé ne bejtélachi, 'lige tase nike ne baní napurigá kógimala.» <sup>7</sup> Lige mueka tabilé regá nejiámala alé pachaka galírale: «Tase nejkumewa mué, 'ma 'yériga ilí jena yochi, 'lige ne 'kúchila 'we okoka bi'tí jena yochi ne'chí 'yuga a'bé yochi. Tase cherigá umubámala ne i'pua yochi.» Tabilé regá nejiámala mué. <sup>8</sup> Abirigá asísimala mué 'yamia go'ame alué rió alemi ilígama go'ame taa napugiti pe alarigá nokame kame ralámuli jemi, napurigá tabilé se'winá lámala alué nawágama go'ame táame 'lige uché jaré ralámuli. Asísimala mué regá 'nátaga: «Resía ye rió, 'yama ne baní.» Bilena galírale 'yériga ilisá yochi, e'wérali olawa napurigá i'púmala yochi alué pachá mochígama ralámuli.

<sup>9-10</sup> Onorúgame senibi 'la 'yámala semati raweli napu abé 'la nirá bo'né. Alekeri abichilubi tániwa Onorúgame semati raweli, 'liko Onorúgameka nejiámala semati raweli. 'Yáwa 'emi 'lige abiena 'la rewimela 'emi. Napu'lige tabilé 'la semáriga simichi bilé nóchali, tániwa Onorúgame 'lige alué nejiámala 'nátili churigá nochátiká napugiti alué kame ramué O'nola. Apiépiri rió napu 'la tánime ju iwérali Onorúgame, alueka 'la narémala iwérali.

<sup>11</sup> Mué inógama nisa, 'lige alué mué inolá remé táachi, ¿'lacha rejté 'yámalawé mué? 'Lige bilé ro'chí táachi mué inolá, ¿'lacha sinowí 'yámalawé mué? <sup>12</sup> Lige bilé ga'wá táachi mué inolá, ¿'lacha majchili 'yámalawé mué? <sup>13</sup> Mué rió 'we resí 'sime ke, 'la

bi'wígama go'ame 'yame ju mué bo'né inolá, 'lige alué Wa'lula Onorúgame 'pa rewagachi ajtígama, alueka abéchigo semáriga 'yámala alué bo'né alawala alué ralámuli napu taní Onorúgame Alawala.

*Jena ruwimela we'ká ralámuli ne'óchaligo Esusi Remónisi gompaniérola kóriká*

<sup>14</sup> Esúsika bilé rawé ma'chí pa ilile u'tabela remónisi alé bilé riochi ajtígama napu tase ra'ichame newale. Napu'lige alué chátiri Remónisi 'ma ma'chínasa alé riochi, alué rioka yati ku ra'ichale. 'Lige jaré ralámulika 'we ra'sálale 'la ku ra'ichame gainasa. <sup>15</sup> Lige uché jaré ralámulika tabilé galele, 'lige anile:

—Ye rioka alué wa'lula remónisi Belsebú gompaniérola ju alekeri 'la buyánama ju remónisi u'kuchípala.

<sup>16</sup> Lige jaré ralámuli anele Esusi pe gawéliga 'lige umériniliga:

—Aka re'kibúbá bilé na'í 'pa rewigáchika 'la Onorúgame nila a'walí ajchágama níriká.

<sup>17</sup> Lige bo'né Esúsika 'la machile chátiri 'nátaga anió alué ralámuli, 'lige anele:

—Bilena gawichí 'ma pe na'áwasa ralámuli, pe 'ma suwimela a'bopi nakoga. Alué ralámuli bilena galichí riógama na'áwasa a'bopi, pe na'áuka epperélamala. <sup>18</sup> Lige alué wa'lula remónisi sairasa u'kuchípala remónisi, 'ma bi'neli rejpímala alué wa'lula remónisi. 'Lige neka alarigá ruwíguru, 'émika cha cha aniamé, 'émika aníguru ma'chí buyánama ko ne alué chátiri u'kuchípala remónisi alué wa'lula remónisi Belsebú a'walílate. <sup>19</sup> Ne alué Belsebú gompaniérola nísaká, ¿'lacha buinámapué ne alué u'kuchípala remónisi ralámulichi pachágana mochígama? 'Emi 'yuga nóchame 'la buyánama ju alué remónisi u'kuchípala Onorúgame gite, a'ligeko 'emi abiena 'la machí buyánama ko ne u'kuchípala remónisi Onorúgame gite, pe iligá tabilé 'la ma'chígama ruwíguru 'emi. <sup>20</sup> Lige neka 'la bijchiá alué Onorúgame a'walílate buyánama júkuru alué chátiri remónisi u'kuchípala. Yeka ruyame ju Onorúgame 'ma nulao jena napu 'emi mochí.

<sup>21</sup> Napu'lige bilé rió 'we a'wágama 'we a'lá siparinaga asísá, 'lige 'we alá semáriga repuka asimela bo'né galila. Alué we'ká tábiri alé nerúgame tase che ikimela. <sup>22</sup> Lige sebasa uché bilé 'lige abé a'wágama nílase me'tagá alué rió 'we alá siparinagame, 'lige alueka 'ma umérimala, 'lige 'ma bujémala alué siparina napu mayele alué rió alué siparina gite tabilé 'wesi chigomio, 'lige 'ma bujémala suwábaga tábiri 'lige 'ma nachutámala alué gompaniérola alué tábiri.

<sup>23</sup> Alué napu ta ne'chí gu'írame ju, alueka pe ne'chí sairúgame ju. Alué napu tabilé gu'írame ju ne'chí ralámuli repua, alueka pe

chátiri 'nátili ruigá eyéname ju ralámuli napurigá tabilé oyéramala ne'chí.

Esusi abichilubi regá anele:

<sup>24</sup>—Alué bilé u'tabela remónisi ma'chínasa alé bilé riochi, eyéname ju jami gawichí wakígichi 'yaga bilena resíbulime, 'lige tase asé rewisá alemi resíbulime 'liko 'nátame ju: «Ku simé ne napu ajtigé ne 'yabé siné.»<sup>25</sup> 'Lige ku sebasa napu bejtélige, rewame ju 'we a'lá pechítigame.<sup>26</sup> 'Lige simime ju uché jaré gichao u'kuchípala remónisi bayernia abéchigo chátiri, 'lige suwábaga mo'ime ju ejperélimia alé riochi. 'Liko alué rió abéchigo cha 'sime gayéname ju me'tigá 'ya bajchá rawé napu'lige pe bi'lepi u'tabela remónisi ajtigáchi.

*Jena ruwimela Esusi ruwíligo churigá ka alué ganílili 'la bijchíá*

<sup>27</sup> Napu'lige alué Esusi bijí ruyá ilígachi ye ra'íchali, bilé mukí alemi we'ká ralámuli jágichi a'wágame ra'íchale regá anigá:

—'We a'lá ganílga ajtí alué mukí napu ju mué eyela napu mué ochéirile 'lige napu chí'íririle mué!

<sup>28</sup> 'Liko Esúsika anile:

—Abé a'lá ganilga ejperé alué ralámuli napu 'la námaka akeme ju abiena 'la e'wame napurigá nulá Onorúgame.

*Jena ruwimela Esusi ruwíligo alué cha nokame ralámuli tabilé 'la na'tánilio*

<sup>29</sup> Alué ralámulika aminacho we'ká napuile alé noligá napu Esusi ilile, 'liko Esúsika regá anile:

—Ralámuli jipe ejperégameká 'we chátiri 'nátame ju, alué ralámulika ania aníguru: «Aka re'kibúbá bilé na'í 'pa rewigáchika 'la Onorúgame nila a'walí ajchágame níriká.» Neka 'wéchigo 'la ma'chígime ruimélagó alué napurigá 'sile alué Jonasi 'we 'ya ajtigame napu ruwime nile napu anele Onorúgame: <sup>30</sup> Alueka ne'óchale alué Nínibe ejperégame ralámuli. 'Lige a'chigóriga olámalachigó ne jipe ejperégame ralámuli, ne'ochámala ne alué ralámuli, ne napu nawágame ju 'pa rewagáchika napurigá rió neraga. 'Emi níriká 'ma tabilé nulétékuru ne'chí napurigá re'kibúmala ne na'í 'pa rewagáchika, pe 'la e'wátékuru napu nulá ne.

<sup>31</sup> Napu'lige sebasa raweli gastigo narémichi jipe ejperégame, 'lige alué wa'lula nulame mukí napu 'we 'ya bejtégame nile 'mimi o'iná 'tumi rayénali bokuichi e'negá iliruga ku ajánamala a'lige rawé, 'lige ne'ochámala 'emi ralámuli. Alué mukika napu'lige bijí ajagá asagá, 'we mejkaka nawálekuru gepumia alué Salomoni nila rejcholi 'we benegá ra'íchame, 'lige jipe jena ajtikuru ne

napu abéchigo benegá ra'íchame ju me'tigá alué Salomoni, 'lige 'émika tabilé gepúnili ne nila ra'íchali. <sup>32</sup> Alué ralámuli napu ejperégame nile alé Nínibe rewégachi abiena ku ajánamala a'lige rawé gastigo narémichi jipe ejperégame ralámuli 'lige ne'ochawa 'emi alué mukite, napugiti alué ralámuli Nínibe ejperégame 'la ku guwana 'nátaligame napu'lige Jonasi ruyele Onorúgame nila rejcholi. 'Lige jena ajtí ne napu abéchigo benegá ra'íchame ju me'tagá Jonasi 'lige 'emi tase a'rénili resítiri 'nátili.

*Jena ruwimela Esusi ruwíligo 'la sébali 'nátame rioka 'la tabilé chátiri alawégame ko*

Esusi abiena anele:

<sup>33</sup>—Tase 'wesi ralámuli rajeme ju bilé chojpé nasoka elamia, iligá 'we a'lá re'pá ma'chí elame ju napurigá 'la ma'chílimala ralámuli alemi mo'igá.\* <sup>34-35</sup> Aminami napu'lige bilé rió rajesa bilé chojpé, 'lige 'we a'lá ma'chílame nisa, 'la ma'chílimala. Tabilé 'la ma'chílame nísaká, tabilé 'la ma'chílimala rekó 'la rajériga ilígichi chojpé.† <sup>36</sup> Mué 'la sébali 'nátaga inásaká, 'lige tabilé chátiri 'nátame nisa mué, alarigáká nímala napurigá bilena 'la ma'chigá ilígachi chojpé rajachi rukó.

*Jena ruwimela Esusi ne'óchaligo alué ralámuli bariseo 'lige alué Moisesi ra'íchali rejcholi benírame*

<sup>37</sup> Napu'lige alué Esusi a'resa ra'icha, 'lige bilé rió bariseo bayérale galírale go'ame go'achi. 'Lige Esúsika yati oyérale, 'lige bajkile alé pachá galírale 'lige asbale alé a'bé mésachi, alué mesa 'we re'lé ilígime gayena bo'igá go'yame.

<sup>38</sup> 'Lige alué rió bariséoka se'winá lale etesa tabilé panígisa go'yachi alué Esusi napurigá nokame nile a'boi napurigá 'we a'lá oyéranti neraga Onorúgame. <sup>39</sup> 'Lige alué Esúsika anele:

—'Emi ralámuli bariseo pe ma'chíminachó pagome ju bejtoli 'lige pacháganaka tabilé pagome ju napu'lige Onorúgame kogia go'ame napurigá 'la najtékame nímala Onorúgame níriga. 'Émika 'la semáriga panígisa go'yame ju napurigá 'we a'lá semáriga oyérame Onorúgame nobi pacháganaka 'wéchigo chátiri alawégame kéré ko 'emi. <sup>40</sup> 'La churikanti 'emi ralámuli! 'Émika ¿tacha machibeché alué Onorúgame newáligo 'emi sa'pala abiena alué 'emi alawala? <sup>41</sup> 'We 'la semáriga gu'írínilisaká 'emi alué tabilé nígame bajchá 'la bi'wígame 'nátame niwa. 'La bi'wígame 'nátame nísaká

\* **11:33** Esúsika pe ruwime ke anile ra'íchamio Esusi bilena napurigá 'la suwábaga 'la akimela. † **11:34-35** Esúsika pe ruwime ke anile bile ralámuli 'la semáriga 'nátame 'la oyérimio Esusi nila ra'íchali 'la bi'wígame alawega einamia. 'Lige 'we chátiri 'nátili nígame nísaká tabilé 'la oyéramio Esusi nila ra'íchali. Tabilé 'la sébali nimio alué rió na'tátila ka.

'emi 'liko 'la semáriga gu'írimala 'emi apiépiri ralámuli.

<sup>42</sup> › Resía 'emi ralámuli bariseo, 'la senibi 'la kógime ju 'emi go'ame alué Onorúgame, nobi tase 'la sébali olame júkó 'emi ralámuli 'yuga, aminami tase 'la sébali nirame ju 'emi Onorúgame. 'La ju kógilia Onorúgame nobi abiena tabiléchigo a'réwagó nirá alué Onorúgame.

<sup>43</sup> › Resía 'emi ralámuli bariseo, 'émika pe rióchaga mochime ju alé mutélachi alé napu mochime ju alué e'wélala alé u'kuchi re'obachi «sinagoga» rewégame, aminami najkime ju 'emi napurigá 'we a'lá niraga repóriwa uché jaré ralámulite alemi nasípami we'ká rioga ilígichi.

<sup>44</sup>, Resía 'emi, 'émika ju pe napurigá bilena suwígame bi'tígichi 'we tabilé ma'chiná bi'tígime 'lige ralámuli amóbbami e'yéname ju tabilé machigá alemi bi'tigó alué suwígame tótiga.†

<sup>45</sup> 'Liko bilé rió alué ra'íchali benírame napu Moisesi benírale ralámuli nejele regá anigá:

—Mué Esusi ralámuli benírame, mué alarigá ne'óchaga alué bariseo, pe 'ma ramué 'yúriga ne'óchame ke aní mué, ramué napu rejcholi benírilime niru ralámuli alué ra'íchali rejcholi napu Moisesi ralámuli benírale 'we 'ya.

<sup>46</sup> 'Lige Esúsika regá anele:

—Resía 'emi ralámuli ra'íchali benírame napu Moisesi benírale ralámuli 'we 'ya, 'emi we'ká e'karúgame nóchali nuleme ju alué ralámuli, 'lige 'émika tabilé pe'tá gu'írame júkuru.

<sup>47</sup> › Resía 'emi ralámuli, 'emi ralámulika pe galírame ju amoba napu bi'tí alué 'ya suwígame ralámuli napu ruwime nílige napu Onorúgame anélige napu me'ale alué ralámuli 'ya epperégame 'emi rijimala. <sup>48</sup> 'Lige 'emi ralámuli abalaké nóchali oyérame júkuru, chátiri nóchali napu nóchale 'emi rijimala 'ya riógame.

<sup>49</sup> › Alekeri Onorúgame bo'né 'la machigá alakimeo a'kinana regá anile: «Julámala ne, ne napu ju Onorúgame, jaré rió ne nila ra'íchali ruyeme ralámuli 'lige jaré rió ne nila nóchali nulame, 'lige jaré 'ma me'liboa cha nokame ralámulite, jaré najátaga cha'piboli nímala», regá anile Onorúgame.

<sup>50</sup> Abichilubi 'we ra'íchale Esusi regá:

—'Lige alué ralámuli jipe epperégame Onorúgameka wa'lú gastigo 'yámala. Alueka tabilé me'ale alué 'ya mochígame ralámuli napu ruwime nílige napu anélige Onorúgame, Onorúgameka abirigáchigo

gastigárialagó napugiti a'chigóriga cha resí nokagá járome kámechigó napurigá alué rijimala 'we 'ya epperégame. Alué 'we 'ya epperégame ralámuli cha olale, me'ale Onorúgame nila ra'íchali benírame ralámuli 'we 'ya epperégame, <sup>51</sup> napu'lige pe kuli bilé rió me'líliuru Abeli rewégame 'ya ajtígime, 'lige abé guwichí a'kinana Sakaríasí<sup>§</sup> me'líliuru napu me'líliuru alé wa'lú re'obá ilígichi, Onorúgame galílachi ma'chímama a'mulipi napu ille tegoli mesa napu kógime nile go'ame ajágame Onorúgame alué ralámuli.\* 'Lige alekeri 'la ruwí ne, alué Onorúgameka 'emi ralámuli jipe epperégame gastigárialagó suwigórigá alué 'ya epperégame ralámuli Onorúgame nila ra'íchali rejcholi benírame ralámuli.

<sup>52</sup> › Resía 'emi ralámuli benírame ra'íchali rejcholi napu Moisesi benírale ralámuli 'we 'ya, tabilé sébali olame ju 'emi napurigá aní ra'íchali napu Moisesi benírale ralámuli, aminami tase élime ju 'emi napurigá sébali olámala alué uché jaré ralámuli napu 'la sébali olánilime ju.

<sup>53</sup> Napu'lige Esusi ruyesa ye ra'íchali, alué ralámuli ra'íchali rejcholi benírame napu Moisesi benírale ralámuli 'we 'ya abiena alué ralámuli bariseo, 'we ayole Esusi 'yuga 'lige we'ká e'karúgame ra'íchali rukele, <sup>54</sup> machináliga pala 'la sébali nejjiara, 'lige se'wináriga nejjiásaká nejjiálaga nokale.

## 12

*Jena ruwimela Esusi ruwíligo napurigá 'la 'nátaga nokísimala ralámuli*

<sup>1</sup> 'Lige we'ká mili ralámuli napuile alé napu ille Esusi, rajchini járole cha we'ká nílgame. 'Lige Esúsika chojkile ra'ícha alué bo'né benírame 'yuga. Regá anele:

—'La 'nátaga mochiwa 'emi, alué bariséoka 'we semáriga ra'íchame ju, tabiléchigo 'la sébali olame kéré ko. Tase alarigá nokiboa 'émichigó, <sup>2</sup> napugiti abirigá machiboli kame a'kinana rekó nasoka se'wináriga nokisá 'emi, <sup>3</sup> alekeri rekó 'emi ra'íchalige jami chonárale jaga, abiena akimeli ju ralámuli alué ra'íchali melénala rawé. 'Lige suwábaga napu 'emi ra'íchalige nasoka 'yériga mochiga pachá galírale a'bé najkachí, uché jaré ralámulika asírige a'wágame ra'íchámala napu nasoka ra'íchale 'emi.

Aminami regá anélechigó:

<sup>4</sup>—'Emi ruyé ne ye ra'íchali ralámuli ne'chí 'yuga e'yéname: tase majaga járowa 'emi alué ralámuli me'ame. <sup>5</sup> Neka 'la ruwimela

† **11:44** Esúsika anigá anile chátiri alawégame gayéneo alué a'ká ralámuli pe alué bariseo e'wiga tabilé machigá chátiri ralámuli ko alué bariseo napugiti alué bariseo pe se'wináriga nóchame nílgame. E'nesi Números 19:16. § **11:51** Alué Sakaríasí 'we 'ya bejtégame nile we'kabé sientó bamí abé 'ya ta'chó ochérachi Esusi. Alué Sakaríasí tabilé Juani o'nola nile.

\* **11:51** E'nesi glosario «altar».

chieri 'nalina 'la majátiká. Majawa 'nalina Onorúgame, alué napu nígame ju wa'lú a'walí napurigá me'limela 'lige napurigá 'lúmala 'emi alé 'légana na'íchi. Alueka 'la 'we majawa.

6 › 'Émika tabilé najtegachi ralinéame ju alué u'kuchí maligi chulugí, pe oká pésochi ralineme ju 'emi, nobi Onorúgameka 'wéchigo a'lá repuka ajtíkó alué maligi u'kuchí chulugí. 7 Abiena alué gupá 'emi mo'ólachi jágame, Onorúgameka 'la sébali tétega ajtí a'pílipi alué gupá. Tase majawa 'emi, 'émika uché rajpé najtékame ju me'tagá alué we'ká u'kuchí chulugí.

Abiena anele Esusi:

8 —Alué rió tase chijúnaga ruyeme alué uché jaré ralámuli ne'chí oyérame ko, 'lige ne napu nawágame ju 'pa rewagáchika napurigá rió neraga, abiena 'la semáriga ruyémala ne alué we'ká santo ánjeli ne'chí oyérame ko alué rió. 9 'Lige bilé alué rió tabilé ne'chí oyérame korisá, 'liko ne ruyémala alué we'ká santo ánjeli tabilé ne'chí oyérame ko alué rió.

10 › Apíepiri rió se'winá anesa ne'chí, ne napu nawágame ju 'pa rewagáchika napurigá rió neraga, alué rioka aba'lá e'káwili ju Onorúgamete 'la e'kali tánisaká Onorúgame. Bilé rió enáriga ra'íchame alué Onorúgame Alawala olagá, alueka tase siné e'káwili ju Onorúgamete rekó 'we tachi e'kali.

11 › Napu'lige 'emi o'tosuga alé u'tá re'obachi «sinagoga» rewégame, siné kachi o'tosuga 'ma 'emi alé napu ra'íchali gatélachi ju, 'lige 'émika tase we'ká na'tawa alarigáriga animea, 12 'emi sebasa alé, alué Onorúgame Alawala 'we a'lá semáriga gu'irimala 'emi churigáriga ra'ichátiká 'emi níriga.

*Jena ruwimela napurigá 'la 'nátaga epperéawa, tase najkigá alué we'ká e'karúgame tábiri 'we najteme*

13 'Lige bilé rió alemi nasípami we'ká napaika jágichi alemi iligá anele alué Esusi:

—Mué Esusi ralámuli benírame, nulewa alué ne ba'chila napurigá ne'chí 'yámala alué napu ne nachuámili ju napu ne o'nola nila nile.

14 'Liko Esúsika regá anele:

—Mué rió, ¿chieri 'ya ko ne'chí nóchali napurigá ne ra'íchali gateme níkala, rojáname alué tábiri?

15 Aminami Esusi anile:

—'We a'lá 'nátaga, tase najkiboa alué we'ká tábiri. Rekó bilé rió we'ká tábiri nígame ke, alué we'ká tábiri ka tase nejkrímala Onorúgame oyérilichi.

16 'Lige aminami regá anele:

—Bejtele bilé rió we'lé echame bo'né gawíachi, 'lige alué go'ame napu echale 'we rakele. 17 'Lige alué rioka 'nátale: «¿Cholama ne jipe alaki go'ame?» lale. «Tase níkuru

ne walú rekoa alé gatélime alaki go'ame.»

18 'Lige arigá regá 'nátale: «Gajúnámala ne ye rekoa, 'lige bilé abé walú rekoa newámala ne. 'Lige alé gatémala ne ye go'ame, abiena alué uché jaré we'ká tábiri.» 19 'Lige lámala ne bo'nepi: «Jipeko we'ká go'ame iní ne gatérigime we'ká bamí go'yáame. A'rema ne echá pe'kabi bamí, 'we ganíliga bejtémala ne, abiena 'we bajía asimé ne.»

20 › 'Lige alué Onorúgameka anele: «Mué rió tase 'la 'nátame, rekó we'ká 'wige mué go'ame, jipe rukó mukumela mué rió. Alué we'ká go'ame napu mué 'wile, alueka ¿chieri niga rejípimala 'lige?»

21 › Pe alarigá ikime ju alué rió napu we'ká tábiri niga asinálime ju bo'né bi'neli, 'lige ta'mé 'la oyérame ju Onorúgame, pee suériga oyérame ju.

22 Pe nujubapi Esusi anele alué bo'né benírame:

—Neka 'la ruwí: Tase pe go'ámecho mélime na'tawa jena wijchimoba epperega, aminami tase pe o'páchicho najkiboa. 23 Pe alarigá na'tálíka tabilé 'la ju, iligá Onorúgame 'yuga 'we a'lá sébali na'tálime ju 'nalina. 24 Aka alué golachi ta siné echame ke, senibí go'yame ká'é go'ame napugiti Onorúgame 'we a'lá gu'rame kame. 1 'Émika abé najtékame ju Onorúgame níriga me'tagá alué golachi! 25 Rekó 'we re'pá jágame gainánilie 'emi, tase uché rajpé re'pá jágame gainámala 'emi. 26 Tabilé aminabi ochérame nísaká bilé rió pe napu echílú ju, 'liko ¿chonigá cha lámala? 'Lige aminami ¿chonigá 'we cha lámala tabilé nígariká go'ame, enomí 'lige galí, 'lige e'karúgame tabiri tábiri?

27 › Aka 'we 'la 'nátaga e'nésibá Sempuali jami jágame aka chiena 'la semáriga o'chérame ká'é. Tase siné nóchame ju nibilé sume ju o'pacha, nobi 'wéchigo semáriga jame júkó sewagá. Alué wa'lula selígame Salomoni rekó 'we semati o'pachátame ke tabiléchigo aliena semati go anaga alué Sempuali jami jágame. 28 Onorúgameka pe gajsalá kachi 'la semáriga nesérome ká'é, alué gajsalá napu pe jami jame ju jipe, alué napu pe 'ma na'yáwili ju bilé rawé. 'La tabilé machinti 'emi abéchigo 'la semáriga gu'íriwili ko 'emi Onorúgamete. 29 Alekeri 'emi tase na'tawa pe go'ámecho. 30 Alué ralámuli jemi wijchimoba epperégame pe alieti 'nátaga epperégame ju. Onorúgameka napu 'emi oyérame ju 'la sébali machí 'emi alieti resí laa mochigo. 31 'Émika tase alarigá 'nátaga e'yénawa, abichilubi 'la sébali machigá mochiwa churigá nulame ka Onorúgame, 'lige suwábaga 'we a'lá sébali nejímala Onorúgame resí lasa 'emi bilé tábiri.

Abiena anílechigó Esusi:

32 —Tase majawa 'emi napu ne 'we a'lá semáriga repú. Rekó pe u'kabi ke

'emi, Onorúgame 'emi O'nola 'we alá semáriga ganíliga ajtí bo'né a'wallila 'yamia 'emi. <sup>33</sup> Ralinewa 'emi napu ekí tábiri nílige, 'lige kógiwa alué enomí napu resí lame ju. 'La sébali olawa napurigá najkí bo'né Onorúgame, alarigaka 'la 'yawa 'emi semati raweli Onorúgamete 'lige tabilé 'wésite bujewa 'emi alué semati raweli. <sup>34</sup> Suwábaga tábiri napu ni 'emi, pe aluecho 'la repugime 'nátame ju 'emi, tabilé 'la nélegá Onorúgame bilé rió pe we'ká umugí 'yuga gojchiamé 'nátame nisa, alueka tabilé 'la nirame ju Onorúgame.

*Jena ruwimela Esusi ruwíligo 'we a'lá buigá mochílime ko napu'lige ku sebámachi bo'né*

Abiena anile Esusi:

<sup>35</sup> —'La 'nátaga mochiwa alué Onorúgamete julárigame nawachi. <sup>36</sup> Niwa napurigá jaré rió nóchame napu buigá mochime ju bilé rió wa'lula napu eyena kóliga alé newíkime nerúgichi, napu yati i'pume ju yochi kuka nawachi. <sup>37-38</sup> 'We ra'sálagá etéwili ju alué ralámuli rukó nóchame galí repume 'la tase gojchigá mochime rukó, 'la e'negá mochime buigá alué wa'lula, na'igá napusi seba, rekó alué wa'lula nawachi nasipa rukó che'láchimi kómá. 'Lige alué wa'lúlaka 'we ra'sálagá etémala, 'lige mochíámala alé mésachi go'ame kógimia. 'Lige alué wa'lula anémala «Neka 'we ra'salá. 'Emi tabilé okole rekó 'we we'liko rukó sébachi ne.»

<sup>39</sup> > Aka gepúsibá: Bilé rió galí nígame 'la machisá aliéniko nawamia alué chigórigame alé galírale, 'liko e'negá asimeli júkuru napurigá alué chigórigame ta i'púmala alué galí tábiri chigomia. <sup>40</sup> 'Lige a'chigóriga 'emi 'la 'nátaga mochíwachigó. Bilé rawé tase sanátiga nolínamala ne napu nawágame ju 'pa rewagáchika napurigá rió neraga.

<sup>41</sup> 'Liko Pégroka rukele:

—Mué Wa'lula, ¿chieri 'nalina ruigá aní mué ye ra'ichali? ¿Pe ramuecho, suwábaga chalá?

<sup>42</sup> 'Liko rukele alué Esusi:

—¿Chieri kárékobá alué bilé rió wa'lubela nóchalichi nulame 'la sébali olame? ¿Pala alué rió kárékobá napu galí nígame a'reme ju repúniliga alué galí napurigá kógimála go'ame alué ralámuli nóchame 'la sébali alé, 'la tase 'cho 'we charigá e'lowichi alué ralámuli? <sup>43</sup> 'We 'la ra'sálagá etéwili ju alué rió alué galí nígamete alué rió 'la semáriga nóchaga ajtígame alé galírale napu'lige ku nawachi alué galí nígame. <sup>44</sup> 'Liko alué galí nígame nulémala napurigá nulame nímalá 'lige repume napu ekí tábiri nerú alé. <sup>45</sup> Pe iligá tabilé 'la sébali olame nísaká alué rió galí tebua ajtígame mayesa we'liko seabamio alué galí nígame, 'lige chojkiasa

resí olá alué nóchame abiena alué umugí alé galírale nóchame, aminami chojkiasa go'ame go'yá napu tabilé go'meli nílige abiena chojkiasa bajía rekuka, <sup>46</sup> 'lige alué galí nígame ku alé nawasa tase sayétiga alué galí tebua ajtígame, sebasá napu'lige tase buigá ajtígichi pe bajía i'wilí ba'wila rekútame, alésíko alué galí nígame wa'lú gastigo 'we chátiri 'yámala, 'lige 'ma o'tomela alé napu mochí alué uché jaré ralámuli tase 'la sébali olame.

<sup>47</sup> > Bilé rió nóchame 'we machime nisa alarigá najkí alué wa'lula 'lige tase sébali olasa, aminami tase e'wasa, 'liko wa'lú gastigo 'yáwili ju 'we wejpisoka. <sup>48</sup> 'Lige bilé rió nóchame ta machigá 'sílása 'lige chati nochasa, alueka ta'mé we'sá wejpisópili ju gastigo 'yaa. Bilé rió wa'lú nóchali 'yárigame Onorúgamete, 'la sébali nochámili ju ralámuli 'yuga. Alué rió 'la niraga etélime, alueka 'we owigime nímalá.

Abiena anile Esusi:

<sup>49</sup> —Neka nawákuru na'áwali o'inamia jena 'emi ralámuli epperélachi. <sup>50</sup> 'Lige neka siné rawé resí nílimili júkuru mukía. Najkí ne napurigá yati alarigá ikimela. <sup>51</sup> ¿'Lacha mayé 'emi ralámuli ne nawáligo ra'mamia 'emi ralámuli jena wijchímoba nakoga epperégame? Neka ruwí tase ra'mamia nawagó. Neka iligá nawákuru sairárimia. <sup>52</sup> Jipe si aminako maligi ralámuli riógame bilena galírale, bakiá alué ralámuli alué uché jarela oká ralámuli sayégame nímalá. <sup>53</sup> Alué o'nólaka bo'né 'kúchila ejtemali sairámala. Alué eyélaka alué ranala tewé sairámala. Alué wasirúgameka mo'lila sairámala.

<sup>54</sup> Alésíko alué Esusi alué we'ká ralámuli 'yuga ra'ichale, regá anele:

—'Emi ralámuli etesa alué nolí o'wichi alé tuaka, 'lige 'la machime ju 'emi u'kumeo, 'lige 'la bijchíá u'kume ju. <sup>55</sup> Napu'lige ekachi o'inaka rayénali bokuichi e'negá iliruga, 'la machime ju 'emi rajtálímio. <sup>56</sup> Rekó 'émika 'la machime ke chiéniko u'kumeo 'lige chiéniko rajtálímio, 'lige ¿chonigá ta machíché 'emi alarigá ikimeo nujubami rawé rekó 'la etee ne'chí nochálila 'lige rekó 'la akéeme ke ne ra'ichátíla?

Abiena anile Esusi:

<sup>57</sup> —¿Chonigá ta gateme júkó 'emi a'boi alué na'áwali? <sup>58</sup> Bilé riote nejísiga mué alé wa'lúlachi, 'lige simiboa alué rió 'yuga, 'lige ta'chó sebalia alé napu ajtí alué wa'lula, gatewa alué na'áwali waná 'emi napurigá ta sebawa alé napu ajtí alué wa'lula. Alé sebásiká, alué wa'lúlaka nulémala alué sontalo galírale bajchániliga mué. Alésíko alé galírale bajchawa mué. <sup>59</sup> 'Lige neka 'la ruwí we'ká rawé asimeo mué alé galírale 'lige 'ma suwábaga najtétisa mué a'lige kulí ma'chínímio mué alé galírale bajcháriga asagá.

## 13

*Jena ruwimela Esusi ruwíligo churigá a'rilíme ko alué tabilé 'la nóchali*

<sup>1</sup> Pe aba'lige yati ruyele jaré ralámuli alué Esusi ye ra'íchali:

—Kulí me'lilirigará jaré rió jena Galilea epperégame alé wa'lú re'obá ilígachi alé Rusaleni napu ajágame me'lisá jale alé ra'pichí Onorúgame kógimia. Alué wa'lula seligame Pilato rewégame nulálegara alué ralámuli me'línliga.

<sup>2</sup> 'Lige alué Esúsika rukele:

—Aka 'we a'lá na'tásibá 'emi, ¿mayé 'emi me'lilirigo alué we'ká rió galileo 'we resi nokame kóriká me'tagá alué uché jaré rió galileo?

<sup>3</sup> 'Lige anile pe aba alué bo'né Esusi:

—Tabilé, pe a'chigóriga resí nokame nile suwábaga. 'Lige 'emi ralámuli tase ku guwana na'tasa alué 'nátili 'lige resí ikimela 'émichigó.

<sup>4</sup> 'Lige uchéchigo rukele:

—¿'La bijchiá mayé 'emi ralámuli wa'lú gastigo nígame nílgo alué makué osánó ralámuli napu suwile alé Siloé alué re'pá ilígame galite me'táchaga, me'tagá alué uché jaré pe abalé Rusaleni epperégame?

'Lige anele:

<sup>5</sup> —Tabilé, pe a'chigóriga aliena resítiri chátriri alawégame nile suwábaga. 'Lige 'emi tase ku guwana na'tasa, resí ikimela 'émichigó.

<sup>6</sup> Aminami Esusi anele:

—Bilé rió echágame nile bilé chuná alé nasípami we'ká i'wili\* jágichi. 'Lige simile e'nemia pala rakega iligá, 'lige tase rakega ilile. <sup>7</sup> 'Liko anele alué rió napu repume nile alemi echerúgime: «Neka 'ma bakiá bamí nawáguru jena e'nemia ye chuná pala rakega iligá, 'lige tasiné rakéguru ye chuná. 'Ma me'teka pápua, pe nejkumea ilí jena i'wili jágichi.»

<sup>8</sup> › 'Lige alué echerúgime repúmeka regá anile: «Mué wa'lula, pe a'réwa'é bijí ye bamicho. 'Lige ne we'pínamala alué we'é alé chojkirá 'lige wa'lú bo'íta ajchékala ne.

<sup>9</sup> Alarigá siné kachi 'la rakésabá, 'lige jipe bamí ta rakésaká 'ma me'tépua.»

*Jena ruwimela Esusi sa'wáligo bilé mukí rejpopa rumúligame bilé rawé resibulichi*

<sup>10</sup> Sinéchigo rawé resibulichi, alué Esusi Onorúgame ra'ichálila benirira ilile ralámuli bilena u'tá re'obachi «sinagoga» rewégame, <sup>11</sup> 'lige asale alé bilé mukí 'ma makué osánó bamí nayume. Wa'lú rumúligame nile rejpopa alué mukí. Alarigá a'réliru bilé u'tabela remónisite. Alué mukika tase

gayéname nile wajchía, rojpóchaga oyame nile. <sup>12</sup> 'Lige alué Esusi etesa, bayele 'lige nochale rejpopa 'lige anele:

—Mué mukí, jipeko ya 'ma sa'wí mué alué nayulí napu nayume nile mué.

<sup>13</sup> 'Lige alué mukika pe yati 'la wajchile, 'ma 'la sa'wile alésíko. 'Lige alué mukí chojkile wa'lú cheliera 'yaa Onorúgame.

<sup>14</sup> 'Lige alué nulame alé u'tá re'obachi 'we ayole napugiti alué Esusi 'yóligame rawé resibulichi. 'Lige alué nulame anele alué we'ká ralámuli:

—Nerú usani rawé napurigá 'yoboa, a'lige rawé 'yoboa, tase rawé resibulichi ka.

<sup>15</sup> 'Liko Esúsika regá anele alué nulame:

—¡Tabilé sébali olame ju 'emi napurigá aní a'bopi! ¿Tacha su'páname ju 'emi alué roló alué bulito kómá rawé resibulichi o'tomea ba'wí bajírímia? <sup>16</sup> Ye mukika Abraámi rijimala† ju a'chigóriga napurigá niru ramué, 'lige nayua ajtkuru ye mukí cha olásiga u'tabela remónisite, makué osánó bamí nayume júkuru. ¿'Lige tacha 'yówaché ye rawé resibulichi? <sup>17</sup> 'Lige alué Esusi regá anisá, 'lige suwábaga alué ralámuli Esusi saíla chíjúniga ejtebile, 'lige alué ralámuli tabilé Esusi saílaka 'we ganliga ejtebile asíriga ra'salagá alué Esusi 'we a'lá sa'wasa alué mukí nayume.

<sup>18-19</sup> 'Lige anile Esusi:

—¿Churigá ruyésiga 'la nímalaché 'emi napurigá 'la námamala churigá ka napu'lige ralámuli 'la sébali olachi alué napu nulá Onorúgame? Bajchá bilé ralámuli benime ju Onorúgame ra'ichálila 'lige uché jaré ralámuli benírame ju, 'lige pe yati we'ká ralámuli 'la oyérame ju alué ra'íchali. Alué Onorúgame ra'ichálilaka napurigá alué a'lásini rakala, alarigá ju. 'We u'tá ju nobi 'wéchigo wa'lú ochérame ju me'tigá ri'ligó, 'lige chulugí alé jsime ju kábimia.†

› Ruwimé ne bilé ra'íchali: Bilé gajsalá rakala 'we u'tá ke 'lige alué gajsalá rakala ya'wisá wa'lú ochérame ju re'pá ilígame, 'lige alué chulugí jsime ju 'lige alé mochíbame ju. Alarigá júkuru Onorúgame nulachi jena wijchímoba.

<sup>20</sup> Abiena anile Esusi:

—¿Churigá ruyésiga 'la nímalaché napurigá 'la námamala 'emi churigá ka napu'lige ralámuli 'la sébali olachi Onorúgame ra'ichálila? <sup>21</sup> Alueka ju napurigá alué kawali (lebarura) alué arina na'loasa bilé mukí. 'Lige bochígimi nabame ju alué kawali, 'lige 'la semáriga a'pome ju alué arina wejsótigame. Alué kawálaka káréke'é bilé rió nawasa bilena riógichimi Onorúgame ra'ichálila benírímia 'lige pe

\* **13:6** Jaré ralámuli u'lí anime ju 'lige jaré pe 'uba aneme ju alué i'wili. † **13:16** Abraámika abé 'ya bejtégame nile, alué mukí rejpopa nayúmeka abé a'kinana ochérigame nile oká mili bamí abé a'kinana. ‡ **13:18-19** Alé Israeli alué gilíbá a'lásini 'we 'ya nerúgame 'we re'pá jágame ochérame nile.

i'kilimi aminacho we'ká ralámuli oyérame ju Onorúgame ra'ichálila.

*Jena ruwimela Esusi ruwíligo 'we nóchali kame ko moinalia rewagachi*

<sup>22</sup> Alué Esusi enegá bowesia alé Rusaleni simiá, 'lige 'we benírísia enale Onorúgame nila ra'ichali rejcholi alemi we'kaná we'ká riógachi simíraga abiena pe u'kabi riógachimi. <sup>23</sup> 'Lige bilé rió rukele:

—Mué Wa'lula, ¿pala pe u'kabi ju alué ralámuli napu moínámili ju rewagachi napu'lige suwisá?

Esúsika anele:

<sup>24</sup> —'We e'wérali olawa napurigá mo'iboa alé u'tá yógame galichi. Neka ruwí we'ká ralámuli 'we mo'inálimio alé yochi 'lige tase gainamio mo'yá napugiti 'ma 'yériga il-ímémpá alué galí. <sup>25</sup> Alué rió galí nígame ilísiga 'yérisa 'yera 'lige 'emi ralámuli jaré ma'chika jaga regá animela: «Mué rió, i'pú yochi.» 'Lige alué galí nígameka animela: «Neka tase machí chieri ka 'emi.»

<sup>26</sup> › 'Liko 'emi ralámuli regá animela: «Ramueka napuúka go'tuge go'ame, abiena mué ruigéturu semati rejcholi alemi ramué eperélahi.»

<sup>27</sup> › 'Lige alué rioka pachaka iligá animela: «Neka 'ma ruwí tase machiá chieri ka 'emi. ¡ku simibaga 'emi suwábaga chátiri resítiri nóchame!»

<sup>28</sup> › 'Lige nalámala 'emi, abiena 'we chi'námala ramalá 'we ayoga etega alé pachá mochigo Abraámi, abiena Isaki abiena Akobo abiena alué we'ká rió napu ruwime nílige napu anélige Onorúgame, 'lige nalámala 'emi ma'chika a'résiga. <sup>29</sup> Alé pachá mo'imela ralámuli, bochígimi mejkaka sígame mo'imela alé pachá. 'Lige alé pachá mochibamala go'ame go'mea Onorúgame 'yuga. <sup>30</sup> We'ká alué ralámuli jurío napu bajchá akele alué Onorúgame ra'ichálila, alueka tabilé mo'imela alé pachá galichi. 'Lige we'ká alué ralámuli tabilé jurío napu akele abé nujubapi, alueka 'la mo'imela alé pachá galichi. §

<sup>31</sup> Pe a'lige rawé sébale jaré bariseo, 'lige anele Esusi:

—Mué Esusi, 'másawa jena Galilea asagá, alué wa'lula selígame Erere me'linali mué.

<sup>32</sup> 'Lige alué Esúsika regá nejele:

—Simasi e'newa alué cha'sime rió napu pe majáriga mabúnili ne'chi, 'lige ruyewa jipe rawé 'lige be'lí ma'chí buinamio ne alué remónisi u'kuchípala, abiena sa'wamio ne alué nayúkame ralámuli, 'lige anuwí kulí suwénamio ne. <sup>33</sup> 'Lige jipe raweka abiena 'we enámili júkuru ne bowesia Rusaleni simiá, ne napu ruwime ju napu

ané Onorúgame alé Rusaleni mukumeli kame, tase uché bilena.

<sup>34</sup> › 'Emi ralámuli Rusaleni ejperégame, me'ame ju alué ralámuli napu ruwime ju napu ané Onorúgame, 'lige aminami rejete bajsibuga me'ame ju 'emi alué ralámuli napu Onorúgame júlale! Neka we'sá 'we napubúnilige 'emi napurigá bilé o'tolí ra'kome ju bo'ne a'tanala, 'lige 'émika tasiné napuúku. <sup>35</sup> 'Lige alekeri Onorúgame 'ma tabilé asimela 'emi 'yuga. 'Lige jípeko tabilé siné etewa ne napusi seba alué raweli napu'lige 'emi regá animela: «'We a'lá sébali nóchame ju alué wa'lú a'walí nígame napu Onorúgame neraga rawá.»

## 14

*Jena ruwimela choníligo Esusi napu'lige sa'wasa bilé nayume*

<sup>1</sup> Bilé rawé resíbulichi alué Esusi simile go'ame go'mea alé galírale bilé wa'lula bejtélachi bariseo sefínala, 'lige uché jaré bariseo e'negá mochile e'negá chu'siá sita aleké resíbulichi rawé pe cha'pinálige. <sup>2</sup> 'Lige alé a'bemi asale bilé rió bajbichigime, 'we nayume. <sup>3</sup> 'Lige alué Esúsika rukele alué ra'ichali benírame ra'ichali napu Moisés benírale ralámuli, abiena alué bariseo alemi mochígame:

—¿Tacha 'la lisensia ju 'yólichí bilé rió nayume rawé resíbulichi?

<sup>4</sup> 'Lige alué ralámulika kilí mochile tase nejega. 'Liko Esúsika cha'pile alué nayume, 'lige sa'wale, 'lige kumi júlale. <sup>5</sup> 'Lige Esúsika ra'ichale alué bariseo 'yuga 'lige alué benírame 'yuga, 'lige rukele:

—Bilé 'emi inolá wijchisá rawé resíbulichi, bilé roló kómá 'emi bujkula alé rejkolichi napu maníbame ju ba'wí bajlíme i'pichí napu newalime niru ramué jena Israeli 'we rojkógachi, ¿tacha ku ma'chí pákala 'emi? ¿Abajáchala a'rémala 'emi?

<sup>6</sup> 'Lige alué ralámulika tabilé anigá ejte-bile.

<sup>7</sup> Alué jaré ralámuli bayérigame alé alué bariseo bejtélachi go'achi, alueka alemi sigá yati mochíbale bajchami napu mochime nile alué ralámuli e'wélala. 'Lige alué Esúsika etesa alarigá nokachi, 'la ruyele bilé bariseo uché jarela akériga:

<sup>8</sup> —Napu'lige mué bayésiga alé newigime nerúgichi, tase asibawa alé mutélachi alué abé 'la semáriga bayérigame ralámuli mochímichi 'we semáriga bayérigame kóriká bo'nepi. Sebasa alué rió abé 'la semáriga bayérigame alé mutélachi asibámala, <sup>9</sup> 'lige alué repágame newigichi nolínamala regá anisia: «Pe rekó 'ya ye rió alué mutela napu mué ajtí.» 'Lige chijunámala mué ilísiga alé mutélachi, 'lige simela mué



'yamia uché bilé mutela napu mochime ju alué tabilé 'la semáriga bayérigame. <sup>10</sup> Napu'lige bayésiga mué, 'lige sebasa mué alé newigime nerúgichi, iligá asibawa alé 'na guwánaka, 'lige alarigá alué napu repale regá animela: «Mueka asiboa 'mi bajchá napu mochímili ju abé 'la semáriga bayérigame.» Alé bajchámana ajchásiga mué, alarigá 'la machimela alué uché jaré ralámuli mué rió abé 'la semáriga bayérigame ko. <sup>11</sup> Yeka aniname kérékuru alué rió napu mayeme ju 'we najtékame ka Onorúgame níriga, alueka pe tabilé najtékame kérélamio. Alué pe kilí rió, alué 'nalina nímio abé najtékame Onorúgame níriga.

<sup>12</sup> 'Lige Esusi abiena regá anele alué bariseo napu repale:

—Napu'lige go'ame kogia mué alué ralámuli, 'lige tase bayewa alué ralámuli mué gompaniérola, aminami tase bayewa mué ba'chila, mué go'chila, mué bonila, mué waíla, abiena tase bayewa mué rijimela, abiena tase bayewa alué ralámuli 'we nígame jemi a'mulipi riógame najkigá napurigá ku repámala a'kinana. <sup>13</sup> Napu'lige go'ame newá mué go'mea we'ká ralámuli 'yuga, iligá bayéwaká alué ralámuli 'we resitiri tase nígame, 'lige alué tase gayéname e'yena, alué sujirigame, alué tase ma'chílime. <sup>14</sup> 'Liko 'we ganíliga etewa mué alué ralámulite. Alueka tabilé siné rawé ku gu'linamala nibilé pe'tá go'ame, 'lige alarigá wa'lú raweli rewimela mué 'lige 'pa rewagachi moinámala mué napu'lige mukusá.

<sup>15</sup> Alué ye ra'íchali akisá alué alé mésachi mochígame, bilé rió napu asale alé anele alué Esusi:

—Asíriga ganílimala alué ralámuli napu'lige go'ame go'yá alé rewagachi Onorúgame nila go'ame.

<sup>16</sup> 'Liko Esúsika anele:

—Bilé rió nulale wa'lú go'ame newániliga. Bajchabé ta'chó newá go'ame we'ká ralámuli bayele napurigá go'ame go'mela. <sup>17</sup> Napu'lige sebasa raweli go'ame go'mechi ralámuli bayérigame, 'ma gayéniga ilígichi alué go'ame, júlale bilé rió bo'né 'yuga nóchame bayéniliga alué ralámuli napurigá smela alé galírale go'ame go'mea. <sup>18</sup> Alué ralámuli bailime ka tase ikíromoríle simiba go'ame go'mea. Alué bilé rió anile: «Ralá ne bilé wasá, 'lige simé olá ne e'nemia, tabilé ikírimala ne alemi simiá go'ame go'mea.» <sup>19</sup> 'Lige uché bilé regá anile: «Ralá ne malígana chojkégame oisí asarame, 'lige asarama olá ne pala 'la asarara. Tabilé ikírime ne simiá.» <sup>20</sup> 'Lige uché bilé rió regá anile: «'We kulí newíkame ju ne, tabilé

ikírime ne simiá.» <sup>21</sup> 'Lige alué rió nóchame ku sebasa, ruyele alué nulágame go'ame newániliga tabilé 'wesi jsnali. 'Liko alué nulágame 'we ayole, 'lige anile: «Jípeko uché bilena simiboa 'liko 'we sajpuka alemi napu mochí alué ralámuli 'we resitiri tabilé nígame 'lige alué sujirigame 'lige tase ma'chílime, jeka bayéwaká.» <sup>22</sup> 'Lige pe abé alimi alué nóchame ku nawagá anile: «Mué rió, neka a'má sébali olá napurigá nulá mué, 'lige 'we u'kabi rewá ne ralámuli, 'lige go'ame ka 'we wa'lú ju.» <sup>23</sup> 'Liko alué nulágame go'ame newániliga anele alué nóchame: «Uchéchigo simigá 'yawa uchérajpe ralámuli pe alemi we'kanami boichimi e'yénigime, 'lige 'la sébali napabuwa napu ekí najkí ne. <sup>24</sup> 'Lige alué ralámulika 'la semáriga bayérigame tase jsíkuru napu bajchá baigé ne, jípesiko alué ralámuli tase siné go'mela go'ame jena ne bejtélachi» —regá anile Esusi alé a'bé mésachi asagá.

*Jena ruwimela 'we nóchali kame ko Esusi oyérialia*

<sup>25</sup> We'ká ralámuli Esusi 'yuga e'yénale, 'lige Esúsika gu'lile 'lige anele alué we'ká ralámuli:

<sup>26</sup> —Bilé rió, abé nirame nisa bo'né o'nola, bo'né eyela, bo'né upila, bo'né kúchila, bo'né ba'chila, bo'né go'chila, bo'né bonila, bo'né waíla, 'lige bo'nepi, me'tigá ne'chí, a'lígeko tabilé ne'chí oyérame nímala alué rió. <sup>27</sup> Tabilé resí ikinálasa alué rió ne'chí 'yuga eyenia, tabilé ne'chí oyérame nímala. <sup>28</sup> 'Lige bilé rió wa'lú galí re'pá iligame\* newánilisa, bajchako 'we a'lá e'némili júkuru alué rió chekí enomí sebatíká. <sup>29</sup> 'Lige ta'lá sébali e'nesa 'lige chojkiasa newá galí, 'lige rokárélasa alué we'ká enomí, 'liko alué we'ká ralámuli etéeme gawélime ju alué rió. <sup>30</sup> Anime ju: «Alué rioka pe chojkiasa, tase gayénale.»

<sup>31</sup> 'Lige anelechigó Esusi:

—Bilé rió wa'lula selígame rey tase ne'jkome ju bilé lía mili sontalo sayega makué mili gompaniéroga, senibí bajchá 'we a'lá 'nátame ju. <sup>32</sup> 'Lige tase chérigá neyúrasa nílase ka, 'liko ta'chó seba, júlame ju jaré rió ruyéniliga alué saíla tabilé ne'jkónilio. <sup>33</sup> Bilé rió ne'chí oyérinilisa ka tase 'we chárigá najkime nímala suwábaga alué e'karúgame napu ekí tábiri ni. 'Lige 'we chárigá najkime nisa ka bilé rió alué we'ká tábiri, tase ne'chí oyérame nímala.

Abiena anile Esusi:

<sup>34</sup> —Onaka† 'la ju napu'lige bíjí ajkágame kachi. Alué oná 'ma najsuwisa, tase siné ku a'lá gainámala. <sup>35</sup> Aminami tase go'mela

\* **14:28** Siné kachi pe bilé u'tá galí olagá anime ke anile Esusi alaniá, rejté newárigime napu asame nile alué tebume echerúgime tebuka. † **14:34** Esúsika alarigá anele napugiti alué 'ya nerúgame onaka 'we najsuíme níligame, 'lige pe pasime nile. Jipe nerúgame onaka tabilé najsuíme ju.

ajágame, pe pápili ju alésíko. 'We a'lá 'nátaga gepusi ye ra'íchali.

## 15

*Jena ruwimela Esusi ruwíligo Onorúgame 'we ra'sálame ko ku guwana 'nátasa bilé rió 'we resí 'sika ílírome*

<sup>1</sup> We'ká rió enomí goblálome alué enomí napu nejílime nile alé wa'lúlachi. 'Lige abiena alué resí nokogá járome rió, alemi jsile gepumia alué Esusi ra'íchachi. <sup>2</sup> Lige alué napu benírame nile ralámuli Moisesi nila ra'íchali, abiena alué bariseo napu jálechigó alemi, tase galele alué Esusi, a'bopi ra'íchaga regá anile:

—Ye rioka 'la galeme ju alué resí nokogá járome ralámuli 'lige 'yuga go'yame ju go'ame.

<sup>3</sup> Liko Esúsika anele:

<sup>4</sup>—Bilé rió bujkégame nisa bilé sientu bo'á, 'lige bilé bo'á we'kasa, ¿tacha yati simime ju 'yamia alué bilé we'kágame alé jami a'resa alué gi makuesa makué miná gi makué? Napusi rewísá a'reme ju 'yaa. <sup>5</sup> 'Lige yati gujtámachi rekagá o'tome ju rewísá alué bo'á 'we ra'sálagá. <sup>6</sup> Lige sebasa ku galírale, bayeme ju alué abé machirume abiena alué a'mulipi riógame, 'lige regá aneme ju: «Bilé bo'á we'káwige ne 'lige 'ma ku rewá ne alué bo'á we'kágame, 'lige 'we ra'sálagá eyena ne 'lige alekeri repari ne galírale go'ame go'achi», animela. ¿'Emi ta lonikiméréchigó? <sup>7</sup> Alué Onorúgameka a'chigóriga ra'sálámala etega ku guwana 'nátachi bilé rió. 'Lige etega alué gi makuesa makué na gi makué ralámuli napu mayeme ju 'we a'ká ralámuli ko a'bopi, alué etega ka tase 'me alarigá ra'sálámala Onorúgame.

Aminami anile Esusi:

<sup>8</sup>—Abiena, bilé mukí makué enomígame enomí plata 'lige we'kawasa bilé alué enomí, ¿'lige tacha rajémalawé chopé 'yamia alué enomí 'lige arigá tacha 'ma pechímalawé 'yaga 'la kilí alé galírale napusi rewá si alué enomí? <sup>9</sup> 'Lige rewísá alué enomí, alué abé machirume umugí 'lige alué uché jaré umugí alemi a'mulipi riógame regá anémala: «'We ra'sálá ne napugiti 'ma ku rewagame ne alué enomí napu we'káwage ne, 'lige alekeri repari ne galírale go'ame go'achi», regá anémala. <sup>10</sup> Neka 'la ruwí, aliena semáriga ra'sálalí nerúlamo alé re'pá rewagachi napu mochí alué santo ánjeli Onorúgame 'yuga nóchame ku guwana na'tasa bilé rió resí 'sika ílírome.

<sup>11</sup> Esusi abiena regá anile:

—Bilé rió oká inógame nile. <sup>12</sup> 'Lige alué abé u'tabela re'malí anele alué bo'né o'nola: «Ne'chí ya'má 'yawa alué we'ká tábiri napu

ne nachuámili ju mué mukusá.» 'Liko o'nólaka 'ma rojánale, 'yale alué we'ká tábiri alué oká ejtemali. <sup>13</sup> 'Lige pe u'kabi rawé kachi a'kinana, alué re'malí abé u'tabela 'ma re'wániga ralinele alué napu ekí tábiri nachule. Alésíko mejká simile uché bilena gawichí. Alé gawichí asagá 'ma suwábaga suwábale alué enomí, tabilé 'la repule. <sup>14</sup> Napu'lige 'ma suwábaga suwábasa enomí alué re'malí, 'lige sébale raweli 'we resítiri, 'we gurule go'ame alé gawichí. <sup>15</sup> Alésíko simile bilé rió e'nemia we'lé nígame gawí nóchali tánimia. 'Lige alué rió gawí nígame júrale gowí neséniliga na'minami bo'né nila wasachi. <sup>16</sup> Alemi eyénaga gowí nesegá 'we e'lowile alué re'malí pe alué rojí go'ale napu gowí go'gá e'yénale. Ta'wesi ralámuli kógile go'ame alué re'malí.

<sup>17</sup>, 'Liko regá 'nátale: «We'ká ralámuli ne o'nola 'yuga nóchame, alueka 'we ganíliga noká nocha tabilé e'lowika. ¡Neka jemi eyéniga 'ma amulí mukú e'lowika! <sup>18</sup> Alekeri kumi simé ne ne o'nola bejtélachi, 'lige regá anémala ne: «Mué o'nó, neka 'we resí 'siá 'sile 'yabé napu'lige bijí mué 'yuga bejtega napu tabilé 'la ju Onorúgame níriga 'lige mué níriga.» <sup>19</sup> 'Ma tase napurigá mué inolá neraga etewa ne. Jípeko pe bilé rió mué 'yuga nóchame neraga etewa ne, alarigá anémala ne.»

<sup>20</sup>, A'liko kumi simile alué re'malí bo'né o'nola bejtélachi.

> 'Lige bijí a'nabeka enágichi alué re'malí, alué bo'né o'nólaka etele, 'lige 'we na'temaka etele aleké re'malí. 'Lige 'male najtepamia, 'lige najtépa gomuruka repóile. <sup>21</sup> 'Lige alué re'malí regá anile: «Mué o'nó, jípeko chátiri alawégame ju ne. Neka 'we resí 'sile napu tabilé 'la ju Onorúgame níriga 'lige mué níriga 'lige uché jaré ralámuli níriga, alekeri 'ma tase napurigá mué inolá neraga etewa ne.»

<sup>22</sup>, 'Lige alué re'malí o'nólaka anele alué bilé bo'né 'yuga nóchame: «'We sapuka ma'chí pápua o'pacha 'we a'lala, 'lige o'pachátiriwa ye re'malí, abiena ujchewa makúsachi alué bilé u'tá jiero chijtúligame 'we najtame. Abiena akáriwa. <sup>23</sup> 'Lige abiena nolawa alué u'tá roló abé a'lá sa'pégame, 'lige me'liboa. 'Lige abiena wa'lú go'ame newasa ra'sálagá go'poa o'maka ramué. <sup>24</sup> Ye re'malika napurigá 'ma mukúgame neraga ke, jípeko 'ma napurigá ku ajánigame ju. 'Lige 'we chátiri 'nátame ke 'yabeko, jípeko 'ma ku guwana 'nátale. 'Lige napurigá we'kágame ke 'yabeko, jípeko

\* **15:18** Alué re'malika 'we resí 'síkame káréle napugiti alué re'malika tániligame alué o'nola suwábaga tábiri napu nachuámili nílige alué o'nola mukusá, peka 'cho we'kachi kachi.

napurigá ku rewurúgame ju napugiti 'ma ku nawagame», † alarigá anile alué o'nola.

Abichilubi ra'ichale Esusi:

<sup>25</sup> —Alésíko chojkile alué wa'lú yawiyame. Alué re'mali ba'chílaka 'mimi epomi echégichi eyénale. 'Lige kuka seba a'nabeka enegá akele rabisime yawiyame. <sup>26</sup> 'Liko bayele bilé alué rió nóchame 'lige rukele: «¿Tachiri gite rabisía mochí ralámuli alé galírale?» <sup>27</sup> 'Lige alué nóchameka regá anele: «Alué mué bonila 'ma ku nawá, 'lige mué o'nola nulá me'línalia bilé roló ranala abé sa'pégame napurigá o'maka go'poa, napugiti a'lá nawagame tase nayume.»

<sup>28</sup> › 'Lige alué re'mali ba'chílaka 'we ayole alarigá ruyésiga. Alésíko alué re'mali ba'chila tase sebánale alé galírale o'nola bejtélachi. 'Lige alué o'nólaka ma'chínale bayemila napurigá bajkimela pachá galírale. <sup>29</sup> 'Lige alué re'malika anele alué o'nola: «Mué 'la sébali machí alakí bamí gu'iria ne mué. 'Lige neka senibí 'la e'weme ju mué, 'lige mueka tasiné nejime ju nibilé rekó pe bilé chibá u'tátiri kachi napurigá ne newámala bilé yawiyame ne gompaniérola 'yuga. <sup>30</sup> 'Lige jípeko nawálekuru mué inolá napu mué nila enomí suwábaga suwábale umugi 'yuga eyénaga, 'lige alueka 'la me'líguru mué alué besero napu abé sa'pégame nile.»

<sup>31</sup> › 'Lige anile alué o'nólaka: «Mué ne inolá, mueka senibí nejkúrime ju, 'lige suwábaga napu ne nígame ju mué nila ju.» <sup>32</sup> Jípeko 'la ju newalía ye go'ame go'yame ra'salágá napugiti mué bonila napurigá mukúgame nígame 'lige jípeko napurigá ku ajánagame ju. We'kálige we'ká rawé 'lige jipe napurigá rewurúgame ju. †

## 16

*Jena ruwimela Esusi ruwíligo bilé ra'ichali bilé rió nóchalichi nulame tabilé 'la nóchaligo*

<sup>1</sup> Alué Esusi abiena anele alué bo'né benírame:

—Bejtele bilé rió nochálíchi nulame, alué rioka nile gu'írame bilé rió we'lé nígame gawí. 'Lige jaré alué nóchame simíbale ruyemia alué abé wa'lula echerúgime nígame regá: «Tabilé 'la nocha alué nóchalíchi nulame.» <sup>2</sup> 'Liko alué nóchali nígame bilé rió júlale bayéniliga alué nulame, 'lige 'ma

nawasa alué nulame, anele: «Tabilé 'la nóchame kará mué. Jípeko 'ma ku nejíwa mué alué nóchali, 'ma suwábaga alué apeli 'yúriga. 'Ma tabilé nochámala mué ne 'yuga.»

<sup>3</sup> › 'Lige alué nóchalíchi nulámeka 'nátale regá: «Jípeko ¿tachiri nochámalaché ne bujésiga nóchali? Tase benégame ju ne bejtégame nóchaga, 'lige chijuna ne pe taga go'gá», alarigá 'nátale alué rió. <sup>4</sup> 'Lige kúchigo regá 'nátale: «Pe regá olásiga 'la kéréko, napurigá ne 'la galewa bilena galírale napu'lige 'ma tabilé nocha ne, a'lige ta'chó suwábaga nejía ne ye apeli, i'pílipi bayémala ne alué ralámuli napu wikeme ju alué wa'lula nóchali nígame.»

<sup>5</sup> › 'Lige bayesa alué bilé rió, rukele: «¿Cheki wiké mué alué wa'lula nóchali nígame?» <sup>6</sup> 'Lige alué rioka regá nejele: «Bilé sientu miná usánisa makué bote bilé liá litro chewame olibo rakala ba'wila wiké ne.» \* 'Liko anile alué rió nóchalíchi nulame: «'La bijchiá ju, jena chujkú napu mué wiká, asíriga we'ká wiká mué. Alekeri gu'irimala ne mué, pe nasípasi najtétimala mué, pe osá nosa makué bote olibo rakala ba'wila, 'lige pe alakí ujchawa jena apélíchi mué bo'né.»

<sup>7</sup> › 'Lige uché bilé rukele: «Mueka ¿cheki wikégó alué wa'lula nóchali nígame?» 'Lige alué rió rukilime ka regá nejele: «Neka bilé sientu gostali ri'lígo wikáre'é.» 'Liko anile alué rió nóchalíchi nulame: «'La bijchiá ju, jena chujkú napu mué wiká, asíriga we'ká wiká mué, alekeri gu'irimala ne mué, pe osá nosa makué gostali ri'lígo najtétimala mué, 'lige pe alakí ujchawa jena apélíchi mué bo'né.»

<sup>8</sup> › 'Lige alué echerúgime nígameka anile alué nulame 'we rejchirúgame níligo pe u'kabi gobláligo alué wikame ralámuli.

› Apiépiri rió chati nóchame 'we rejchirúgame ju a'boi nochálilachi nóchaga.

'Lige Esusi abiena regá anile:

<sup>9</sup> —Neka 'la ruwí: 'We 'la semáriga gu'írowa ralámuli kógiga we'ká e'karúgame tábiri napu iní 'emi jena wijchimoba napurigá we'ká gompaniérogame nímala 'emi, 'lige napurigá Onorúgame nejímala napu tabilé siné suwíbame ju napu'lige 'ma suwíbasa suwábaga alué e'karúgame tábiri.

<sup>10</sup> › Bilé rió pee nígame nisa, 'lige 'we gu'írame nisa ralámuli, a'ligeko abé we'ká tábiri nígame nisa 'la we'ká ralámuli

† **15:24** Alué re'malika 'ma tabilé lisensia nígame nile napurigá ku sebámala o'nola bejtélachi, ku alé bejteramia. Nobi abiénachigo ku alé nawale ko 'lige o'nólaka ku 'la e'kale 'lige lisensia 'yale napurigá ku alé bejterámala alué re'mali. Yeka ruwime ju Onorúgame 'la e'kame ko apiépiri ralámuli ku 'la semáriga na'tasa alué ralámuli napu 'we resí 'sika lílrome níligo 'yabé bajchabé sineko. † **15:32** Alué re'mali o'nólaka, napu'lige napurigá mukúgame anípe pe anime ke anile: «'We chatíri 'nátame níligo alué re'mali.» 'Lige napurigá ajánagame aníaká pe anime ke anile: «'Ma a'rele cha'sika eyena 'lige resí 'nátaga.» Aminami alué ralámuli níriká napu'lige bilé re'mali tánisa bo'né o'nola napu nachuámuli níligo alué o'nola nila napu'lige o'nola mukusá, 'lige alué re'malika 'ma mukúgame neraga nile. \*

\* **16:6** Alué olibo rakala ba'wila 'we sowime ju, 'lige alué ralámuli 'ya epperégame alekete gísáriga go'yame nile go'ame, abiena 'we yowí nile, abiena uneme nile lámparami ro'agá rajemía. E'nési glosario «lámpara».

gu'irimala. 'Lige pee nígame nisa 'lige tabilé gu'irame nisa ralámuli, a'kinana rekó we'ká tábiri nígame ke, tabilé gu'irimala ralámuli. <sup>11</sup> 'Lige alué rió tabilé 'la semáriga uneme nisa alué we'ká tábiri napu iní jena wijchimoba, a'ligeko churiga 'la semáriga uneme nímawé alué Onorúgame nílá semátiri nátili. <sup>12</sup> 'Lige tabilé 'la repume nisa alué tábiri uché jaré ralámuli nílá, alésíko 'ma tabilé 'yawa Onorúgame alué tábiri napu 'yáwali nilige napurigá bo'né niga neraga asimela.

<sup>13</sup> › Alué bilé rió nóchame tase alá nochámala oká rió nóchali nígame 'yuga, napugiti alué rió nóchame tase galémili ju bilé alué nóchali nígame. Pe bi'lepi 'la sébali e'wímala. Yeka regá ruwime kéré: Tase 'we najkiboa pe enomicho 'lige we'ká tábiri napu ni 'emi, iligá 'we a'lá oyérawa Onorúgame.

<sup>14</sup> Alué ralámuli bariseo pe enomicho najkime, aké mochile alarigá ra'íchachi alué Esusi, 'lige 'we gawélele i'kirú anigá. <sup>15</sup> 'Liko Esúsika regá anele:

—'Emi ralámulika 'la a'ká ralámuli korime ju a'bopi, nobi Onorúgameka 'wéchigo a'lá machígó 'emi alarigá 'nátame ko. Ralámuli 'nátachi 'we a'lá ko a'bopi 'lige 'we najtékame korisá a'bopi, Onorúgameka 'we gichime ju alué ralámuli na'tálila.

*Jena ruwimela Esusi ruwíligo tabilé siné suwíbame ko Onorúgame nílá semati rejcholi*

<sup>16</sup> › 'We 'ya ta'chó ochérachi alué Juani ralámuli rewarama, ya 'ma nerule alué Moisesi nílá ra'íchali rejcholi, 'lige alué ra'íchali rejcholi napu ruwime nílá napu anele Onorúgame abiena nerúlechigó. Alué Juani ochérasa a'lige si akiná nerú ra'íchali rejcholi napu ruwime ju churigá ka napu'lige 'we 'la 'nátaga eyénachi bilé rió Onorúgame 'yuga. We'ká ralámuli 'nátame ju pe napurigá a'boi 'nata. Jaré noli nakome ju uché jaré ralámuli 'yuga regá anigá: «Alarigá nulá Onorúgame napurigá nakowa.» <sup>17</sup> Ralámulika tabilé siné lisenisia nilamala napurigá nokimela napurigá a'boi najkí. Suwábaga alué Onorúgame rejchólila seníbi nerúlamala, 'lige 'we a'lá sébali olámili ju ralámuli.

<sup>18</sup> › Aka regáriga aníruba alué Onorúgame nílá rejcholi: Bilé rió a'resa bo'né upila 'lige uché bilé mukí 'yuga rewisá, alarigáká 'we resíriga ju. Abiena rewisá uché bilé mukí a'rérigame 'yuga, abiénachigó walú resítiri ju.

*Jena ruwimela Esusi ruwíligo ejperéligo oká rió, bilé rió 'we enomígame 'lige bilé rió tabilé enomígame Lasro rewégame*

Abichilubi ra'íchale Esusi, regá anile:

<sup>19</sup> —Bejtele bilé rió 'we enomígame, 'we a'kalala o'pacha o'pachátame 'we najteme, nabí rawé 'la e'karúgame go'ame go'yame 'we ra'sati 'we najteme. <sup>20-21</sup> 'Lige bilé rió bejtele tabilé enomígame 'we nayume wejchagónite, Lasro rewégame. Alé yochi alué rió 'we nígame bejtélachi ajchalime nílá napurigá go'ame rujsúkame go'mela, 'lige alué o'kochí alemi nawime nílá cha'mimea alé wejchágachi. <sup>22</sup> 'Lige bilé rawé arigá 'ma mukule alué Lasro 'lige alué alawala o'tole alué santo ánjeli 'pa rewagáchika sígame alé ajchamia napu ajtí Abraámi 'we semárikáchi. Alué rió 'we enomígame abiena mukúlechigó a'kinana, 'lige o'tóliru na'polamia.

<sup>23</sup> › 'Lige alué rió 'we enomígame alawala asagá alé re'lé na'íchí napu mochime ju alué cha nokame ralámuli suwígame alawala, 'we resí nilia asale, 'lige etele wamí 'pa rewagachi ajtígame alué Abraámi alué Lasro 'yuga. <sup>24</sup> 'Lige e'wele ne'ole regá: «Muérigo Abraámi, neka mué rijimela ju 'we a'kinana ochérigame, mueka 'we 'ya bejtele, pe rekó na'temákarigó ne'chí. Nulewa alué Lasro napurigá sa'nabáchamala pe'tá alué makúsala 'lige napurigá jeka simela rulabáchamia ne'chí inalá, asíriga resí nilia ajtí ne jena re'lé na'íchí.» <sup>25</sup> Abraámika regá nejele: «Muérigo towí, aka 'we a'lá na'tábá, mué asíriga 'la ganúliga bejtele bijí ajagá asagá, 'lige alué Lásroka 'we resí niliga bejtele bijí ajagá asagá. 'Lige ye Lásroka jipe 'we a'lá ganúliga ajtí jena, 'lige mueka 'we resí nilia ajtí alé re'lé na'íchí. <sup>26</sup> Aminami 'we re'lé enari kachí ju alemi, tase chérigá gainawa ramué alemi e'tegía, aminami muéchigó tase chérigá gainámala jeka 'moa.»

<sup>27</sup> › 'Liko anile alué rió napu 'we enomígame nilige alé na'íchí asagá: «Muérigo Abraámi, liko juláwagó alué Lasro alé 'mi ne o'nola bejtélachi, <sup>28</sup> alé napu mochí ne ba'chila 'lige ne bonila, maligí ju, napurigá simela Onorúgame nílá ra'íchali rejcholi ruymia napurigá 'la tase 'lúpua jeka na'íchí 'we resí ikiachi.» <sup>29</sup> 'Liko alué Abraámika anile: «Ya 'ma we'sá gepú alué napu mué ba'chila ju 'lige bonila alué ra'íchali rejcholi Onorúgame nílá alué napu Moisesi osale abiena alué napu osale alué napu ruwime nílá napu anele Onorúgame. Alueka alué ra'íchali rejcholi gepúrale ko 'nalina.»

<sup>30</sup> › 'Lige alué rioka napu 'we enomígame nilige regá anele: «Muérigo Abraámi, alué ralámulika tase bijchígime ju rejcholi ruilía, 'lige alué Lasro mukúgame aluete nawísiká alué ralámuli, ku guwana na'támala resiti nocha.»

<sup>31</sup> › 'Lige alué Abraámika regá anile: «'Lige tase bijchígisa napurigá ruwile alué Moisesi

† 16:31 Chátiri nátili na'talia pe a'chigó aliéna resíriga ju napurigá chátiri nochalia.

abiena napu ruwile alué napu ruwime nile napu anele Onorúgame, abichilubi tabilé a'rémala chátiri 'nata† rekó ku ajánige bilé mukúgame.»

## 17

*Jena ruwimela Esusi ruwíligo napurigá a'lá 'nátaga mochiwa napurigá tabilé chátiri nóchali nochawa*

<sup>1</sup> Esúsika regá anele alué bo'né benírame: —Seníbí rawé mochímala jaré rió alué semati 'nátili najsibume, rekó 'ma simíbage 'lige rekó 'ma tané ikigé, aba nawámala uché bilé rió ra'íchali najsibume, resía 'lige alué rió. <sup>2</sup> Wamí wa'lú ba'wichí páteke'é alué rioka wa'lú rejté ri'ligó ruseme golótiga napurigá tabilé aminabi benírimala chátiri 'nátili alué uché jaré ralámuli ta'chó 'la sébali machime Onorúgame nila ra'íchali. <sup>3</sup> 'i' We a'lá 'nátaga 'emi!

› Cha anésiga mué bilé riote, ruyewa alué rió alué 'we a'lala rejcholi, 'lige a'lá sébali gepúsaká alué rejcholi, 'liko ku 'we a'lá galegá etewa. <sup>4</sup> Napu ekísá cha anísá alué rió 'lige ku e'kali tasa, yati ku e'kawa alué rió.

<sup>5</sup> 'Lige alué makué oká rió nulame Esusi nocháililachi anile:

—'Yáwagó ramué alué 'nátili napurigá abé a'lá bijchígiwa napu aní Onorúgame ra'íchálila.

<sup>6</sup> 'Lige alué Esúsika anele:

—Rekó 'emi péemili bijchígame nisa Onorúgame ra'íchálila 'liko anesa 'emi Onorúgame: «O'pó mué alué rojá 'lige elawa alé wamí wa'lú ba'wichí nasipa 'lige wa'lú ochérioriwa», 'lige Onorúgameka yati e'wámala.

<sup>7</sup> Abiena anile Esusi:

—Bilé rió nóchali nígame bilé rió ralisá tabilé najtétiga nochárimia\* 'lige 'minami julasa asarániliga, 'lige kuka nawasa alemi 'sisa asará, 'mimi einasa 'ma ajágame nesigá, 'lige ¿'lacha regá anémalawé alué rió nóchali nígame?: «Pachaka asagá, go'ya asá remé», ¿'lacha regá anémalawé? <sup>8</sup> Tase alarigá anémala alué rió, pe regá 'nalina anémala: «Wajsewa go'ame, 'lige 'la e'negá asiboa tachiri rokárika jena méshachi ne go'yá ajtígachi. Pe nejubapi go'poa muké.» <sup>9</sup> 'Lige ¿'lacha aneme júkó alué rió 'ma bosasa che-liérabá? ¿Tacha alieri 'íniligo jaré ralámuli?

<sup>10</sup> › A'chigóriga 'emi napu'lige ya 'ma sébali olasa suwábaga nóchali napu nulá Onorúgame, regá aniboa 'emi: «Mué Onorúgame, ramueka pe nóchame niru, 'lige napu mué nulá sébali olaru.»

*Jena ruwimela Esusi sa'wáligo makué ralámuli wejchagónite nayume*

<sup>11</sup> Esusi enegá alé Rusaleni simiá, simírole alemi napu napuí alué Samaria rewégame gawí Galilea rewégame gawí si. <sup>12</sup> 'Lige a'mulipi enágichi alé bilena u'kabi riógachi, alé simíbale Esusi najtepamía makué rió sa'pachí amoba nayume lepra anilime naulite yolí ra'íchaga. 'Lige alé a'nabeka jábale alué nayúkame rió, <sup>13</sup> 'lige regá anele Esusi a'wágame ra'íchiga:

—i'Muérigo Wa'lula Esusi, pe rekó na'temápua ramué!

<sup>14</sup> 'Lige alué Esusi etesa, regá anele:

—Simíbaga balé e'newa u'tá re'obá ilígachi «sinagoga» rewégame.

'Lige boichimi eyéniga 'ma tané ikile alué naulí alué makué rió sa'pálachi. <sup>15</sup> 'Lige bilé alué rió etesa 'ma tané ikíligo alué naulí, yati ku ro'ile, 'lige ku sébaga napu ilile Esusi, wa'lú cheliera 'yale Onorúgame e'wele ra'íchaga, <sup>16</sup> chojkóbisiga rojpo'chaga chujkíbalé a'bé napu ilile Esusi wa'lú cheliera i'gá. Alué rioka Samaria bejtégame nile. <sup>17</sup> 'Liko alué Esusi regá rukele alué ralámuli alé jágame e'negá:

—¿Tacha makué rió ke sa'wígame? 'Lige ¿koche mo'íbaleché alué uché jaré gi makué rió? <sup>18</sup> Ye riocho uché bilena gawichí bejtégame 'la kuka nolina wa'lú cheliera 'yamía Onorúgame.

<sup>19</sup> 'Lige Esusi anele alué rió:

—Ilísiga, ya 'ma bi'wígame alawégame ju mué jípesí. Yati ku simigá.

*Jena ruwimela Esusi ruwíligo churigá nulame ka Onorúgame*

<sup>20</sup> Alué ralámuli bariseo rukele Esusi:

—¿Chiéniko si 'la machí nérélamala Onorúgame 'ma nulao?

'Lige Esúsika regá nejele:

—Napu'lige nulachi Onorúgame, tase 'wesi etémala, <sup>21</sup> napugiti alué Onorúgameka pachágana sulachí asimémpá, pecha 'wesi regá animela: «¡Jena ajtí nulá Onorúgame!» «¡Alé 'miná ajtí nulá Onorúgame!»

<sup>22</sup> 'Liko regá anele bo'né benírame:

—Sebámala bilé rawé napu buwémala 'emi ne'chí, ne napu nawágame ju 'pa rewagáchika napurigá rió neraga, tabiléchigo etémalagó 'emi. <sup>23</sup> 'Lige jaré regá animela: «Jena 'ma nulá Onorúgame», 'lige jaré regá animela: «Alé 'miná 'ma nulá Onorúgame.» 'Lige 'emi tase simawa e'newa, aminami tase najátawa alué alanime ralámuli, pecha bijchiá nimia. <sup>24</sup> Ne napu nawágame ju 'pa rewagáchika napurigá rió neraga, napuriga u'kí ne'wílala 'we ra'ósame alarigá nímala nawachi ne alé 'pákana rewagáchika napu'lige alué raweli sebasea. <sup>25</sup> 'Lige bajchako me'liboa ne ralámulite jipe eperégame. We'ká ralámuli pe gawéliga gepúmala ra'íchali rejcholi

\* 17:7 E'nesi glosario «esclavo».

ruwichi ne. <sup>26-27</sup> Alué ralámuli napu ejperele 'ya napu'lige bejtele Noé rewégame rió, alué ralámulika pe ejperégame nile, pe mo'norúacho mochime nile 'lige go'ame go'ya 'lige bajía rekútame, aminami pe resítiri nocha. Napusi Noé bajkile bilena wa'lú bárkochi a'rele resítiri nocha napugiti wa'lú u'kúligame 'lige suwábaga ralámuli suwile si'lika. A'chigóriga nímalachigó napu'lige sébachi ne napu nawágame ju 'pa rewagáchika napurigá rió neraga. 'We chátiri nocha mochímala ralámuli 'lige tabilé sayémala nawachi ne.

Abichilubi anile:

<sup>28</sup> —A'chigóriga ejperele alué 'ya ejperégame ralámuli napu'lige bejtele alué Loti rewégame rió. Pe go'ame go'yacho mochime nile, 'lige bajía rekútame, 'lige ralgá tábiri 'lige ralineá, 'lige pe echá mochime nile, abiena pe galí newagá ejperégame nile, <sup>29</sup> napusi alué rió Loti 'másasa alé we'ká riógachi Soroma asagá, napu'lige na'í rujsule abiena asupre rewégame rejté rajame 'pákana rewagáchika, 'ma re'wániga suwile alué ralámuli, 'ma suwábaga tábiri 'ma galítiri 'yúriga rajale. <sup>30</sup> 'We resíriga nímalachigó uchéchigo nawachi ne napu ju bi'neli neyúriga tabilé se'winá 'sime. Chátiri nocha mochímala ralámuli 'lige tabilé sayémala nawachi ne.

<sup>31</sup> › Napu'lige sebasá rawé napu'lige ne kuka sébachi 'pa rewagáchika, 'lige jaré ralámuli galíchi amoba mochisa, 'lige alué we'ká tábiri alué ralámuli nila alé re'le pachá galírale mochisa, tase e'tegímili ju buinamia alué tábiri o'tomea júmisisimia. 'Lige jaré ralámuli wasachi e'yénasa, tase ku galírale simámili ju. <sup>32</sup> Aka churigá ikíliga'é alué mukí Loti upila, ku guwana e'nesa 'ma oná gayénale. <sup>33</sup> Alué napu jena wijchimoba nerúgame tábiricho 'we koruka eteme ju 'lige majame ju Onorúgame ra'ichálila beníriga ralámuli pe me'liboa mayega, alueka tabilé narémala semati raweli. Alué napu tabilé majame ju mukigá Onorúgame nochálilachi nóchiga, alueka 'la narémala semati raweli 'pa rewagachi.

<sup>34</sup> › Neka 'la bijchiá ruwí. A'lige rukó oká ralámuli bi'timela alé bi'lénapi tabachi okoka, 'lige alué bilé o'toboli ju 'pa rewagachi, 'lige bilé abajá a'réwali ju. <sup>35</sup> Oká umugí napuika rusiá uchusa, bilé o'toboli ju 'pa rewagachi, 'lige bilé abajá a'réwali ju. <sup>36</sup> Oká rió nokisá nocha wasachi, 'lige bilé o'toboli ju 'pa rewagachi, 'lige bilé abajá a'réwali ju.

<sup>37</sup> 'Lige alué benímeka rukele Esusi:

—Mué Wa'lula, ¿koche ikimela 'lige alué alarigá?

'Lige Esúsika regá nejele:

—Alé napu bo'í mukúgame, alé napuímala gonoli 'lige wilú.

## 18

*Jena ruwimela Esusi ruwíligo 'we a'lá ne-jkúrame ko Onorúgame napu'lige iwérali tánachi apiépiri ralámuli*

<sup>1</sup> Aminami Esusi ra'ichale alué bo'né benírame 'yuga bilé ra'ichali napu ruwime nile senibí ra'ichálime ka Onorúgame 'yuga.\*  
<sup>2</sup> Regá anele:

—Bejtele bilé rió ra'ichali gateme† alé bilena we'ká riógachi. Alué rioka tase niramame nile Onorúgame, aminami tase niramame nile ralámuli. <sup>3</sup> Abalé we'ká riógachi bejtélechigó bilé mukí gunámakame. 'Lige alué mukika ya 'ma we'sá simílige alué rió ra'ichali gateme e'nemia napurigá gu'írowa na'áwili gatélíchi.

<sup>4</sup> › 'Lige we'ká rawé alué ra'ichali gateme tase gu'irile alué mukí na'áwili gatea. 'Lige arigá regá 'nátale: «Rekó ne ta niramame ke Onorúgame aminami ta'wesi ralámuli, <sup>5</sup> abirigá 'la gu'írimala ne ye mukí gunámakame napugiti cha nejkumeme napurigá ta aminabi nejkumémala 'lige napurigá ta che animela ralámuli akiná.»

<sup>6</sup> 'Lige anile alué Esusi:

—'La na'tásibá alué rió ra'ichali gateme tase 'la sébali nóchame rió ke, aka alué rió 'la gu'irilige'é alué mukí, <sup>7</sup> 'lige alué Onorúgameka, ¿'lacha ta'lá semáriga gu'írimalawé ralámuli Onorúgame oyérame alué napu Onorúgame 'yuga ra'ichame ju iwérali tániga? <sup>8</sup> Alueka tase we'lisi buwémala, 'we yati gu'írimala. Ne rukerabá bilé ra'ichali 'emi: Napu'lige uchéchigo nawá ne napu nawágame ju 'pa rewagáchika napurigá rió neraga, ¿'la rewimérelé ne alué ralámuli bijí 'la bijchigia mochígame 'we a'lá nejkúrame ko Onorúgame napu'lige iwérali táachi apiépiri ralámuli?

<sup>9</sup> Esusi abiena anele alué jaré ralámuli napu mochime nile alemi 'we gunarume 'lige gawéliga eteme uché jaré ralámuli. Regá anele:

<sup>10</sup> —Oká rió simíbale alé re'pá rabó wa'lú re'obá ilígachi, 'lige bilé alué rió bariseo nile, 'lige alué uché bilé rioka enomí nareme nile napu nejlíme nile alé wa'lula ajtígachi. <sup>11</sup> 'Lige alué rió bariséoka o'weti ilígá Onorúgame 'yuga ra'ichale bo'nepi 'we gunaruga regá: «Mué Onorúgame, neka wa'lú cheliera 'ya mué napugiti neka 'we a'lá rió kame, tase chigoga oyame, tase chati nóchaga oyame, tase we'ká umugí 'yuga gojchime, 'lige tase napurigá alué rió enomí goblálome. <sup>12</sup> Neka 'we ayúname ju tabilé go'gá che'lébaga 'lige melénala rawé

\* 18:1 E'nesi glosario «oración». † 18:2 Yolí ra'ichaga «juez» anilime ju bilé wa'lula ra'ichali gateme.

rukachégame 'yúriga. Osá ayúname ju ne alarigá bilé tarali. Makué peso mesa ne, bilé peso 'yame ju ne mué Onorúgame.»

<sup>13</sup> 'Lige alué enomí goblálomeka 'mí waná ilile rojpóchaga tase e'nénaga 'pa rewagachi, pe iligá mo'loa ilile rojpóchaga, regá aníá: «Mué Onorúgame, pe rekó e'kárigó ne'chí, 'we chátiri alawégame ju ne.» <sup>14</sup> 'Lige alué rió enomí goblálome 'ma ku galírale simile, 'we a'lá e'káriga Onorúgamete, napugiti bilé ralámuli napu abé wa'lula neraga 'nátame ka bo'nepi me'tagá uché jaré ralámuli, alueka tabilé na'temaka etewa Onorúgamete. Alué bariséoka tabilé na'temaka etéliru Onorúgamete. 'Lige alué abé a'lá niraga eteme uché jaré ralámuli me'tagá bo'nepi, alueka 'we na'temaka etewa Onorúgamete.

*Jena ruwimela napurigá 'we a'lá oyériga nokísiwa alué Esusi tase 'nátaga uché bilé tábiri*

<sup>15</sup> 'Lige alué we'ká ralámuli a'pile jaré u'kuchítiri Esusi alé napurigá cha'pimela Esusi alué u'kuchítiri, 'lige alué Esúsita benírilime ralámuli etesa u'kuchítiri a'pichi ralámuli, yati sulile napurigá tabilé a'pímala alué u'kuchítiri alé. <sup>16</sup> 'Lige Esúsika bayele alué ralámuli bo'né benírame, 'lige anele:

—A'rewa napurigá alué u'kuchítiri jeka smela, tase suliwa. Onorúgame 'yame ju a'walí alué ralámuli napu ju napurigá u'kuchí 'kuchi napu yati nareme ju napu'lige i'lía bilé tábiri. <sup>17</sup> Neka 'la bijchígaga ruwí, alué ralámuli tase alarigá nokisá napurigá alué u'kuchí 'kuchi, tasiné elimio Onorúgame napurigá nulémala alué ralámuli.

*Jena ruwimela Esusi ruwíligo 'we 'la nirálime ko Onorúgame me'tagá alué we'ká e'karúgame 'lige alué uché jaré ralámulichigó*

<sup>18</sup> Bilé wa'lula ralámuli jurío nuleme rukele alué Esusi:

—Mué, benírame, 'we a'lá rió, ztachiri nochámili ju ne napurigá moínámala ne re'pá rewagachi nabí alé asimea?

<sup>19</sup> Esúsika regá nejele:

—Mueka zchonigá «'we a'lá rió» anéché ne'chí? Alué 'we a'laka pe Onorúgame ju. <sup>20</sup> Mué 'la sébali machíguru alué osilí napu a'rele Moisesi napu anime chujkú: «Tase we'ká umugí 'yuga gojchiboa, pe mué bo'né upílacho 'yuga gojchiboa, tase me'liboa ralámuli, tase chigowa, tase 'wesi ralámuli 'yuga 'yéigiga ra'ichawa, 'la nirawa mué bo'né o'nola abiena mué eyela.»

<sup>21</sup> 'Lige alué rioka regá anile:

—Neka 'we a'lá rió ju 'yasi bijí u'tá rió ka napurigá nulá alué Moisesi nila rejcholi.

<sup>22</sup> 'Lige Esúsika alué ra'ichali akisá, regá anele:

—Bijí tabilé 'cho bi'wígame alawégame rió kéré mué: Suwábaga tábiri ralinewa napu ekí ni mué, 'lige kógiwa mué alué enomí alué tabilé nígame ralámuli, alésiko 'la bi'wígame alawégame rió nímala mué Onorúgame níriga. Alarigá 'la mémala mué alué bi'wígame raweli 'pa rewagachi. Napu'lige suwábaga tábiri ralinésa mué, ku nawawa ne'chí 'yuga einamia.

<sup>23</sup> 'Lige alué rió alarigá nulésiga, 'we sewele napugiti we'ká tábiri nígame níligame alué rió. <sup>24</sup> 'Lige alué Esusi etesa 'we sewéligo alué rió, regá anele:

—'We nóchali nímala bilé rió 'we nígame níriga sébali olá napurigá najkí Onorúgame. <sup>25</sup> Bilé rió 'we nígame pe 'we korua ajtime ju e'karúgame tábiri napu ni bo'nepi tabilé nélagá Onorúgame, alué rioka tabilé sebámala 'pa rewagachi.†

<sup>26</sup> 'Lige alué ralámuli napu akele alué ra'ichali, regá anile:

—'Liko zchieri la sébali olámalaché napurigá Onorúgame nulá napurigá sebámala rewagachi?

<sup>27</sup> 'Liko Esúsika regá anile:

—Ralámuli jena wijchimoba ejperégameka tabilé gayéname ju 'la sébali olá napurigá 'la o'toboa Onorúgamete 'pa rewagachi, pe Onorúgame gite ka 'la sébali olame ju 'la moínamia 'pa rewagachi.

<sup>28</sup> Alué Pegro abiena alé eyénale Esusi 'yuga, 'lige anile:

—Ramueka 'ma suwábaga a'reru alué we'ká tábiri napu nígame níriga ramué mué 'yuga e'yénimia.

<sup>29</sup> 'Liko Esúsika regá anile:

—Tase 'me a'lá ju Onorúgame níriga rekó 'we galegá etee alué tábiri napu ni bo'né bilé rió, 'lige rekó 'we a'lá galegá etee bo'né upila, bo'né ba'chila, bo'né bonila, bo'né go'chila, bo'né waíla, bo'né o'nola, bo'né eyela, 'lige bo'né kúchila, peka a'lá sébali olae alué rió napurigá najkí Onorúgame. Abé a'lá ju 'la sébali olá bilé rió napurigá najkí Onorúgame. <sup>30</sup> Alarigá sébali olame nisa bilé rió 'liko Onorúgame 'la 'yámala alué 'la bi'wígame raweli jena wijchimoba ajtígachi, 'lige 'pa rewagachi ajtígachi senibí. Abiena bilé mukí níriga a'chigóriga júchigó.

*Jena ruwimela Esusi ruwíligo uchéchigo siné churigá mukumeo*

<sup>31</sup> Alué Esusi waná bayele alué makué oká rió Esusi nochálalachi nulame 'lige regá anele:

—'La gepúsibá, ya'má simawa alé 'pa rabó Rusaleni anilichí. Alé sebámala raweli napurigá osale alué 'ya ejperégame napu ruwime nile napu anele Onorúgame

† 18:25 Lukasi osale regá anime napu'lige néchigó ye ra'ichali 'ya kulí siné: Abé ta'mé nóchali olámala bilé wa'lú ajágame kameyo anilime alé wejchá buslachi simiria. Regá anime.

alarigá ikimeo ne napu nawágame ju 'pa rewagáchika napurigá rió neraga. <sup>32</sup> O'toboli ju ne alé napu mochí tabilé jurío ralámuli, 'lige 'we gawéliwili ju ne abiena 'we resí anéwali ju ne, noli a'kachípali ju ne. <sup>33</sup> Aminami 'we wejpisópili ju ne 'lige 'ma me'liboli ju ne. 'Lige neka pe bakiá rawé kachi ku ajánamala me'lisuga.

<sup>34</sup> 'Lige alué makué oká rioka tabilé námale alarigá anichi alué Esusi. Onorúgame tabilé 'yale 'nátali napurigá námamala chonigá aníligo alué Esusi.

*Jena ruwimela Esusi sa'wáligo bilé rió tase ma'chílime*

<sup>35</sup> Napu'lige Esusi 'ma a'mulipi enágichi alé we'ká riógachi Jerikó rewégachi, 'lige bilé rió tabilé ma'chílime asale alemi boichimi taa enomí. <sup>36</sup> 'Lige akisá we'ká ralámuli simárochi alemi, rukele:

—¿Cho nokogá aní alué ralámuli?

<sup>37</sup> 'Lige ralámulika anele:

—Alué Esusi Nasareta<sup>§</sup> bejtégame 'naka ená we'ká ralámuli 'yuga.

<sup>38</sup> 'Liko e'wele ra'íchale alué rió:

—¡Muérigo Esusi, Rabí rijimale alué 'ya ajtígame, pe rekó na'temaki ne'chí!

<sup>39</sup> 'Lige alué ralámuli bajchabemi e'yénigime sulile napurigá tajché anía asimela alué rió, 'lige alué rioka aminacho e'wele ra'íchale:

—¡Muérigo Esusi, Rabí rijimale, pe rekó na'temaki ne'chí!

<sup>40</sup> 'Liko Esusi ilíbale 'lige nulale napurigá aleka a'piwa alué rió tabilé ma'chílime. 'Lige 'ma alé a'písiga alué rió, rukele:

<sup>41</sup> —¿Tachiri choliame najkí mué?

'Lige alué rió tase ma'chílime ka regá anile:

—Mué bi'neli neyúriga wa'lú a'wali nígame, neka najkí napurigá mué ne'chí 'yómala busila napurigá ku 'la ma'chílamala ne.

<sup>42</sup> 'Lige Esúsika regá anele:

—Ku ma'chílimala mué, napugiti 'we alá sébali bijhígame mué Onorúgamete julárigame ko ne.

<sup>43</sup> 'Lige pe yati ku ma'chílale alué rió, 'lige alué Esusi 'yuga simile, wa'lú cheliera 'yasia enale Onorúgame ra'sálagá. 'Lige alué we'ká ralámuli napu ekí etele ku 'la ma'chílio alué rió, abiena wa'lú cheliera 'yasia e'yénale Onorúgame ra'sálagáchigó.

## 19

*Jena ruwimela Esusi 'lige Sakeo napuka go'áligo*

<sup>1</sup> 'Lige Esusi sébale alé we'ká riógachi Jerikó rewégachi. Enale alemi nasípami we'ká galí jágichi. <sup>2</sup> 'Lige alé bejtele bilé rió

'we enomígame Sakeo rewégame. Alueka wa'lula nile enomí nareme alé Roma anilichi wa'lúlachi enomí nejfíchi. <sup>3</sup> Alué rioka 'we eténile alué Esusi alemi enágichi, 'lige tase chériga etele alemi wijchí iligá, cha we'ká rióligame alemi 'lige aminami alué Sakeo cha re'lé ilígame rió nílgame. <sup>4</sup> 'Liko alué rió bajchami 'male 'lige re'pá rojachi 'mole, alé iligá e'nemia Esusi. Alemi simírímili nílgame alué Esusi we'ká ralámuli 'yuga. Alué rojaka napuyeri chuná nile jami jágame 'we re'pá jágame. <sup>5</sup> 'Lige alué Esusi alemi enegá, e'nele alé re'pami rojachi, 'lige etesa Sakeo anele:

—Muérigo Sakeo, 'we sapuka re'kí, nabá mué bejtélachi, neka simeli ju alemi mué galíachi.

<sup>6</sup> 'Lige alué Sakeo 'we sapuka re'kile, 'lige 'we ra'sálagá anele:

—Nabágó 'liko.

<sup>7</sup> Alué we'ká ralámuli etesa alué Sakeo galíachi bajkígó Esusi go'ame go'mea, 'lige alué ralámuli chojkile a'bopi ra'icha sayega alué Esusi. Anile alué Esusi bajkíligo alé galírale enomí bujeme ralámuli rió bejtélachi.

<sup>8</sup> 'Lige alué Sakeo 'ma go'sá o'weti ilísale, 'lige anele alué Esusi:

—Mué Wa'lula, neka nasípasi kógimale alué ralámuli tase nígame alué we'ká tábiri napu ne ni, 'lige chigógite' e' ne enomí 'yéigiga alué ralámuli, jípeko naosa rasígame ku 'yámala ne a'pílipi.

<sup>9-10</sup> 'Lige Esúsika regá anile:

—Ne napu nawágame ju 'pa rewagáchika napurigá rió neraga, neka 'yasia nawá resí nokagá ejperégame ralámuli semati rejcholi ruyemia, jípe ya 'ma ku a'rele ye rió chátiri 'nátali napu ju Abraámi rijimale, alué Abraámi napu 'we 'ya bejtégame nile. Alek-eri gu'iri ne napurigá ku guwana na'támala, 'lige 'la ku guwana 'nata.

*Jena ruwimela Esusi ruwligo bilé tétali enomí*

<sup>11</sup> Alué ralámuli napu alemi mochile gepua alué ye ra'íchali, 'lige mayele a'lige yati pe alé Rusaleni sebasa o'maka Wa'lula Rey gainamio Esusi alé Israeli nulame. <sup>12</sup> 'Lige Esúsika regá anele se'wináriga 'nata mochígichi:

—Bejtele bilé rió 'we enomígame, 'lige mejká simile wa'lula rey ajtígachi napurigá wa'lula selígame ajchawa, selígame nawamia bo'né gawílachi. <sup>13</sup> 'Lige ta'chó simiá, bayele alué makué rió bo'né 'yuga nóchame, 'lige 'yale a'pílipi makué enomí 'we najteme 'lige anele: «Nocháriwa 'emi ye enomí napusí ku nawachi ne.»

<sup>14</sup> › 'Lige we'ká ralámuli alé ejperégame napu bejtele alué 'we enomígame rió tase galele alué rió napurigá selígame nímala,



'lige júlale nujubami sulínliga alé 'mi wa'lula nulame ajtígachi riógame ralámuli regá anéniliga: «Tabilé najkiá ramueka napurigá wa'lula selígame nímala ye rió ramué gawílachi.»

15 › Alué rioka abirigá wa'lula selígame ajcháliru, 'lige ku sébale bo'né bejtélachi. 'Lige ku sebasa bo'né galílachi, 'lige bayele alué makué rió bo'né 'yuga nóchame rukemia chekí méliga enomí nocháriga alué a'pílipi rió.

16 › 'Lige alué bilé rió bajchá nawágame regá anile: «Mué Wa'lula, alué enomí napu mué nejí 'sié makué enomí 'we najteme merá bilé sientó enomí.»

17 › 'Liko alué enomí nígame regá anele: «'We a'lá sébali nóchame rió ju mué, alek-eri nulame newámala ne mué makuémina we'ká riógachi.»

18 › 'Lige uché bilé rió nóchame sébale alé. Alueka regá anele: «Mué Wa'lula, alué makué enomí napu mué nejí 'sié, alueka pe malígisa makué méte'é.»

19 › 'Liko alué enomí nígame anele alué rió: «Mué rió, malígina we'ká riógachi nulame nímala mué.»

20 › 'Lige uché bilé rió nóchame sébale alé, 'lige anele: «Mué Wa'lula, jena mochi ye enomí napu mué nejí 'sié. Neka ye enomí banítochi ra'koga gatega ajtigé<sup>21</sup> napurigá ta e'wagámala, napugiti mué rió 'we ená anime kame. Mueka niga asíbame ju napu tabilé mué bo'né nila ju, mueka 'wíime ju bilena peka echisá.»

22 › 'Lige anile alué rió enomí nígame: «Tabilé 'nátanti. Mué 'la sébali machí ne 'we ená anime rió ko, niga asíbame ko ne napu tabilé ne nila ju, 'lige 'wíime ko ne napu tabilé echá. 23 'Lige ¿chonigá ta nochari ko mué alué enomí alé enomí gatélachi mo'ogá? Alarigaka 'la uché rajpé narémikuru ne alué enomí ku nawagá.»

24 › 'Lige alué rió enomí nígame anele alué ralámuli napu jale alemi: «Bujewa alué enomí ye rió, 'lige 'yawa alué napu mele bilé sientó.»

25 › 'Lige alué ralámulika anile: «¡Mué Wa'lula, aka 'máchigo ni ko alueka bilé sientó enomí napu mele!»

26 › 'Lige alué rió enomí nígameka regá nejele: «Neka 'la sébali ruwí, alué abé mékame enomí nocháriga, alueka abéchigo abé we'ká 'yámala ne. 'Lige alué tase mékame enomí nocháriga, alueka bujémala ne napu ekí 'ya ne. 27 'Lige alué ralámuli sairúgame napu tase najkile napurigá ne wa'lula selígame nímala, alueka jeka a'pawa 'lige 'ma me'liboa jena ne'chí etériga», alar-igá anele.

*Jena ruwimela 'ma sébaligo Esusi we'ká riógachi Rusaleni anilichi*

28 Pe nujubapi 'ma alarigá ra'ichasa alué Esusi, uché 'we simile Rusaleni simea, alésíko rewiná nile. 29 'Lige amulí seba Be'tagé 'lige Betania 'ámuli riógachi napu nile re'leberi Olibo rewégachi rabó 'lige alé yéniga júlale oká rió bajchá napu nile bo'né benírame, regá anigá:

30 —Simawa alé 'pari pe'kabi riógachi Be'tagé rewégachi 'lige 'emi alemi sébaga rewimela 'emi bilé bulito o'wiga ujchárigame bijí ranala ta'chó murútilime. 'Lige su'panasa jeka o'toboa o'wiga alué bulito. 31 'Lige ralámuli rukésaká chonigá su'panalia alué bulito, regá anewa: «Alué Wa'lula najkí bulito.»

32 'Lige alué oká rió bo'né Esusi benírame simíbale 'lige 'la rewale bulito napurigá anile Esusi. 33 'Lige alué bulito su'pana uchúkachi, alué upugégame ka anele:

—¿Chonigá su'panaliché 'emi alué bulito?

34 'Lige alué oká rioka regá nejele:

—Alué Onorúgame a'walila nígame najkí ye bulito.

35 Alésíko o'tóile alué bulito Esusi alé nalégana, 'lige alué oká rió gemala chiní i'weli bujusá pérale alué bulito 'lige alé asérale alué Esusi. 36 'Lige alé rabó moyena alué we'ká ralámuli bajchabemi pésiga e'yénale gemala chiní i'weli napurigá nokame nile napu 'lige nawasa napunápuri riógachi bilé wa'lula rey.

37-38 'Lige alé rabó Olibo na'kolígana e'yéniga napu pe 'wechi ma'chígime nile Rusaleni, suwábaga alué we'ká ralámuli alué Esusi oyérame chojkile e'wele sinaka ra'icha ra'salagá, abiena 'we a'lá niraga ra'icha Onorúgame. Regá anigá:

—¡jipe 'ma seba alué Wa'lula Rey Onorúgamete julárigame, Onorúgame a'walila nígame, ramueka 'we a'lá niralia ye rió! ¡Wa'lú ra'salalí nerú 'pa rewagachi!

Regá anile alué ralámuli napugiti wa'lú a'walí nígame níligame alué Esusi, 'we sa'wame nile ralámuli tabilé ma'chilime, 'lige ajánarime nile alué suwígame. Abiena 'la o'pasárale maligi mili ralámuli 'ya bajchabé rawé maligi banite 'lige oká ro'chite. Onorúgame 'yame nile a'walí bo'né nila.

39 'Lige jaré bariseo napu jale alemi we'ká ralámuli jágichi, alueka anile:

—Muérigo benírame, sulíwa alué mué 'yuga e'yéname napurigá kilí jámala.

40 'Liko alué Esúsika regá nejele:

—Neka 'la bijchiá aní, ye ralámuli a'résaká siná a'liko rejté sinaka ra'ichámala.

41 Napu 'lige Esusi enagá alé 'ma bochígimi ma'chígichi Rusaleni, 'lige nalale alué we'ká alé riógame ralámuli na'temaka, 42 regá anigá:

—Neka 'we seweka ená jipe alué ralámuli na'temaka. 'We 'la képa alué ralámuli 'la 'nátaga akisá jipe rawé 'la bi'wígame

alawégame gayéname ko apiépiri ralámuli 'la 'nátaga akeme aleké ra'íchali rejcholi napu benírige ne alué ralámuli 'yabé rawé, jípeko 'máchigo nasótiga ajtikó alué rejcholi, pecha bijchígilime alué ralámuli. <sup>43</sup> 'Lige sebámala bilé rawé 'we resí ikimeli alué ralámuli. Alué saíla alé 'beka tegóchika we'é namó ajchámala nakomia aleka uchuka, mo'imea pachami, <sup>44</sup> 'lige 'ma re'wániga me'limela alué ralámuli Rusaleni ejperégame, abiena 'ma re'wániga gajunámala galí. Alarigá ikimela alué ralámuli pecha bijchígilime Onorúgame nawachi ralámuli gu'irimia ku guwana ro'inamia alué resiti nóchame.

*Jena ruwimela Esusi ne'óchaligo alué ralineme alé wa'lú re'obachi Onorúgame galílachi mochígame*

<sup>45</sup> 'Lige alué Esusi bajkile alé rap'ichí wa'lú re'obachi Onorúgame galílachi, 'lige 'ma ma'chí buyánale alué ajágame ralineme ralámuli alé. <sup>46</sup> 'Lige anele:

—Alé bilena apélichí regá ruwí: «Ne galílaká Onorúgame 'yuga ra'ichálime nímala 'lige iwérali tánilime», 'lige 'émika uné napurigá resó chígórigame nila.

<sup>47</sup> Alué Esúsika senibí rawé benírime nile Onorúgame nila ra'íchali alé wa'lú re'obachi Onorúgame galílachi, 'lige alué e'wélala balé abiena alué Moisesi a'rélala ra'íchali benírame ralámuli abiena alué e'wélala nulame alé we'ká riógachi, alueka 'nátale churigá 'la nimio me'liá alué Esusi. <sup>48</sup> 'Lige tabilé che ikísá nilile alarigá 'la nimio me'liá, cha we'ká ralámuli jáligame alé alué ra'íchali rejcholi gepuga 'lige 'nata.

## 20

*Jena ruwimela Esusi ne'óchaligo alué e'wélala*

<sup>1</sup> Bilé rawé napu'lige Esusi ajtígichi alé rap'ichí re'obá ilígichi Onorúgame galila, beniria Onorúgame nila ra'íchali we'ká ralámuli 'lige aminami rejcholi ruyea napurigá 'we alá e'wámala napu nulá Onorúgame. A'lige alemi a'bemi jábale alué e'wélala balé, abiena alué napu benírame nile alué ra'íchali rejcholi napu a'rele Moisesi 'we 'ya, abiena alué ralámuli jurío nuleme. <sup>2</sup> 'Lige alué ralámulika regá anele alué Esusi:

—Mué Esusi, ¿tachiri najtékame nóchali nígame ju mué? ¿Wa'lula ju mué? ¿Chíérite ajcharu mué napurigá wa'lula nímala mué?

<sup>3</sup> 'Liko Esúsika regá anele:

—Ne abichígó rukumela bilé ra'íchali, 'lige chonirá 'emi: <sup>4</sup> «¿Chieri júlale Juani napurigá rewarámala ralámuli ba'ichí jáwaga, Onorúgame o pe apiépiri ralámuli?»

<sup>5</sup> 'Liko alué ralámulika chojkile ra'icha a'bopi rukégá, regá anile:

—¿Churigá nejíawa? «Onorúgame júlale», anisúgáká, 'liko regá animela: «¿'Lige chonigá ta bijchígileché 'emi?» animela. <sup>6</sup> 'Lige tase chérigá rupoa pe apiépiri ralámulite julárigame nílgo. Alarigá ruisúká ramué 'liko 'ma me'limela ralámuli bajsibuga ramué napugiti 'la machigá mochígime Juani 'la Onorúgamete julárigame nílgo.

<sup>7</sup> Alarigá anile majaga alekeri tase machiórile aluete julárigame nílgo alué Juani ralámuli rewarániliga ba'ichí jáwaga. <sup>8</sup> 'Liko Esúsika regá anele:

—Néchigó tabilé ruwimela 'liko chíérite ajchárígame ka ne wa'lula neraga.

*Jena ruwimela Esusi ruwílgo cha nokálgo jaré rió i'wílí echerúgime repume*

<sup>9</sup> 'Lige chojkile Esusi ra'icha ralámuli 'yuga, regá anigá:

—Bilé rió jáwale we'ká i'wílí\* bo'né gawílachi, 'lige owile repúnliga jaré rió nóchame, 'lige alué bo'né rió i'wílí nígame ka simile bilénami mejká. Alé mejká asale we'kabé bamí, alakí bamí kachi 'ma chojkile rakea alué i'wílí. <sup>10</sup> Napu'lige 'ma rakesa 'lige 'ma wachi, júlale bilé rió nóchame napurigá 'wímala alué i'wílí rakala napu nachuámili nile alué rió i'wílí nígame. 'Lige alué owítigime i'wílí repúkichi 'ma wejpisole alué rió julárigame 'wíniliga, 'lige pe sekega júlale kumi. <sup>11</sup> 'Liko alué rió i'wílí nígame uchéchigo bilé rió nóchame júlale 'wíniliga. Abiena alué rió 'we ne'ochálruchigó, abiena wejpisólriru, abiena tase 'yálriru alué i'wílí rakala napu 'núliga julálriru. <sup>12</sup> 'Lige alué i'wílí nígame uchéchigo bilé nóchame rió júlale i'wílí 'wíniliga, 'lige abiénachigó 'we jéchiga wejpisole, 'lige 'ma kumi júlale.

<sup>13</sup> 'Lige arigá 'nátale alué i'wílí nígame: «¿Churigá olásiga 'la nímalaché? Jípeko julámala ne ne bo'né inolá. Siné kachi alueka 'la niráwaréko.»

<sup>14</sup> 'Liko alué owítigime ralámuli i'wílí jáwame repúnliga etesa alué rió alé a'nabeka enágichi, 'liko anile a'bopi ra'íchaga: «Alué rió júkuru alué o'nola nila nachuámili napu'lige o'nola mukusá, alekeri me'liboa alué rió, alarigá 'la ramué niga ejtebiwa ye wasá i'wílí jawárigame.» <sup>15</sup> 'Liko alésíko 'minami mejkabé o'togá me'ale.

Alarigá anele Esusi alué ralámuli 'lige rukele:

—¿Cholámalawé alué wasá i'wílí nígame alué ralámuli alué re'malí me'ágame? <sup>16</sup> Alemi simela 'lige 'ma me'limela alué ralámuli owítigime i'wílí jawárigame

\* 20:9 Jaré ralámuli u'lí aneme ju, 'lige jaré pe 'uba aneme ju alué i'wílí.

repúniliga, 'lige uché jaré 'yámala alué i'wili jawárigame repúniliga.

'Lige akisá alué ralámuli alanichi Esusi, 'lige regá anile:

—†Tase siné alarigá nokisuga 'la kápá! —anile majaga.

<sup>17</sup> 'Lige Esúsika e'néniga anele:

—‡'Lige tachiri ruwime ju alué osilí napu uchú osiruga alé bilena apélichí napu uchú Onorúgame wikárika regá anime?:

Jaré rió galí newame gawélele bilé rejté, 'lige alué rejteka 'we a'lá a'wagá asíbale alé chjíttochi ajchásiga.†

Alanime júturu alué osilí napu uchú alé bilena apélichí napu uchú Onorúgame wikárika.

<sup>18</sup> 'Lige uchérappé anile alué Esusi:

—Apiepiri rió alé rejtechi bo'ibasa, 'ma chí'wámala. 'Lige bilé rió me'táchisa alué rejte, 'ma chí'laga rejpímala. Alué rejte aniáká pe ne'chí olagá aniname kéré.

*Jena ruwimela Esusi ruwiliigo Onorúgame yalime ko napu Onorúgame yáwili ju*

<sup>19</sup> E'wélala balé 'lige alué Moisesi a'rélala ra'íchali rejcholi benírame ralámuli, alueka cha'pináilile alué Esusi a'lige yati alé, napugiti alué ralámulika 'we a'lá machíligame alieti olagá anió alué Esusi rejte gawélirigime ruyá, aminami 'we a'lá machile ne'ochalia alué ralámuli, iligá alué ralámulika majale alué uché jaré ralámuli, alekeri tabilé cha'pile.

<sup>20</sup> 'Lige júlale jaré rió napurigá pe i'kilí e'yenamala Esusi e'néniga, 'la a'ká ralámuli neraga pala se'winá anigá enara alué Esusi 'lige se'winá anigá einásaká yati cha'piboa olale o'tomea alé wa'lula seligame ajtigachi.

<sup>21</sup> 'Lige arigá siné rawé regá rukele:

—Mué, benírame, ramueka 'la machiaa 'we semáriga benírame ko mué, suwábaga ralámuli 'la nirame ko mué, 'lige 'la sébali benírame ko mué napurigá nulá Onorúgame. <sup>22</sup> Ruwibá mué, †pala a'lá ju enomí i'lía alué wa'lula seligame rey alé Roma ajtigame, tabiléchala 'la ju?

<sup>23</sup> Alué Esúsika 'la machile chátiri 'nátaga rukeo alué ralámuli, 'lige anele:

<sup>24</sup> —'Emi bilé ralámuli, jeka o'tóbá bilé enomí.

'Lige bilé ralámuli yati 'yale bilé enomí chjítúligame bawérigame. 'Lige Esúsika rukele alué we'ká ralámuli:

—‡Chieri mo'ola ju ye mo'ó jena enomichi ajtigame? 'Lige †chieri rewalá ju napu chujkú jena?

'Lige alué ralámulika regá nejele:

—Aka aluéguru wa'lula gobierno enomí nareme.

<sup>25</sup> 'Liko Esusi anele alué ralámuli:

—Napu alué wa'lula nila ju, alueka ku aba alué 'yáwaguru, 'lige alué napu Onorúgame nila ju, alueka alué Onorúgame 'yáwaguru.

<sup>26</sup> 'Lige alué Esusi tabilé se'wináriga nejele, alekeri tabilé che ikile alué ralámuli rekó o'tonalie. Alésiko kilí jábale alué ralámuli, suwábaga tábiri 'we benegá nejéligime alué Esusi.

*Jena ruwimela rukélirigo Esusi pala biji ajagá e'yéname ka alawala ralámuli suwisá*

<sup>27</sup> Pe nujubapi jaré alué saruseo chójkégame ralámuli simíbale Esusi 'yuga ra'íchamia. Alué ralámuli saruseo napu tase bijchígime nile rewagachi simíbame ko ralámuli suwisá, regá anele alué Esusi:

<sup>28</sup> —Mué, benírame, bilé rió mukusá 'lige bi'neli rejpisa upila tase 'cho kúchiga alué rió 'yuga, 'lige alué rió mukúgame ba'chila o bonila rewimeli kará alué mukí gunámakame, 'lige kúchigame nímará alué mukí 'yuga, 'lige alué rió kúchilaka alué mukúgame kúchila kárelamará. Alaniché alué osilí napu osale alué Moisesi 'we 'ya ajtigame. <sup>29</sup> Sinéchigo mochile gichao ejtemali a'boi rijimela. Newile bilé alué re'malí bajchá ochérigame, 'lige 'ma mukule ta'chó 'wesi kúchiga alué mukí 'yuga. <sup>30</sup> 'Liko alué rió mukúgame bonila newile alué mukí gunámakame 'yuga, abiena 'ma mukúlechigó tase kúchiga. <sup>31</sup> Alarigá nokale suwábaga alué gichao ejtemali repola 'yuga newía, 'lige suwábaga gichao ejtemali tase kúchiga suwile. <sup>32</sup> Alésiko arigá 'ma mukule alué mukí. <sup>33</sup> Napu'lige alé rewagachi sebasa alué we'ká ejtemali 'lige alué mukí, aleka †chieri 'nalina upila nímalawé alué mukí?

Alarigá rukele rekó tabilé bijchígime ke rewagachi simíbame ko suwígame.

<sup>34</sup> 'Lige Esúsika nejele:

—Jena wijchimoba ka rió 'lige umugítiri newime ju, <sup>35</sup> alué napu ekí seba rewagachi nibilé umugí nibilé riótiri newime ju <sup>36</sup> aminami tabilé siné suwimeli ju. Aleka suwábaga ralámuli napurigá santo ánjeli nímalá. 'Lige Onorúgame kúchila nímalá alé 'pa rewagachi 'ma senibí neraga. <sup>37</sup> Aka aba alué bo'né Moisesi osáligé'é pe'kabi osilí napu ruwí rajá ilíligo alué bilé u'tá rojá, alé pe'kabi osilichí ruwí rewagachi simíbame ko ralámuli suwisá. Alé pe'kabi osilichí ruwí alué Abraámi 'lige Isaki 'lige Akobo alé 'pa rewagachi mochigo jipe Onorúgame 'yuga, alué bakiá napu suwile 'we 'ya napu'lige ta'chó o'chérachi Moisesi.‡ <sup>38</sup> Onorúgame níriká tabilé 'wesi suwígame kéré.

<sup>39</sup> Alígeko jaré e'wélala alué Moisesi rejchólila benírame anele:

—Mué, benírame, 'la bijchiá ju.

† 20:17 E'nesi Salmos 118:22. ‡ 20:37 E'nesi Éxodo 3:2-6.

<sup>40</sup> Alésíko 'ma tabilé aminabi rukele alué ralámuli.

*Jena ruwimela Esusi ruwíligo abé najtékame ko Onorúgamete julárigame me'tigá Rábí*

<sup>41</sup> Esúsika rukele alué e'wélala:

—'Émika ¿chonigá regá aní Onorúgamete julárigame pe alué Rábí rijimalko ko alué Rábí 'we 'ya ajtígame? <sup>42</sup> Aka alué bo'né Rábí osáleché alé osilíchi Onorúgame Wikálala:

Alué Onorúgameka anéturu alué wa'lula ne'chí nuleme:

«Asagá ne 'yuga jena wajtoná

<sup>43</sup> napusí ne 'ma umérasa mué saíla.» §

<sup>44</sup> Aka alué Rábí osálig'e 'wa'lula ne'chí nuleme» anime, 'liko alué Onorúgamete julárigame abé najtékame ju me'tigá Rábí.

*Jena ruwimela Esusi ruwíligo alué e'wélala Moisesi rejchólila benírame sayega ra'íchaligo alué olagá*

<sup>45</sup> We'ká ralámuli gepua mochile, 'lige alué Esúsika anele alué benírame:

<sup>46</sup> —'We alá 'nátaga alué 'yuga napu ju ra'íchali rejcholi benírame napu Moisesi a'rele 'we 'ya, alueka 'we riólame ju i'weli o'páchaga e'yénaga, 'lige najkime ju napurigá 'la niraga repóriwa alemi we'ká riógachi. 'Lige mochínilime ju alé napu mochime ju alué e'wélala najtékame nóchali nígame alé u'kuchí re'obachí «sinagoga» rewégame, 'lige najkime ju napurigá 'la semáriga kógiwa bilénami wa'lú go'achi. <sup>47</sup> 'Ma bujeme ju galí alué umugi gunámakame. We'lisi jame ju Onorúgame tania iwérali re'obachí we'lisi napurigá pe a'boi najkime ju napurigá suwábaga ralámuli etémala. Nobí alueka abéchigo wa'lú gastigo narémalagó.

## 21

*Jena ruwimela Esusi ruwíligo Onorúgame níriká 'we najtékame níligo alué enomí napu nejile mukí gunámakame*

<sup>1</sup> Esúsika etele alué 'we enomígame ralámuli mochichi enomí alé gajónichi alé wa'lú re'obachí Onorúgame galíla, <sup>2</sup> 'lige etélechigó bilé mukí gunámakame 'we resiti pe u'kabi enomígame suwábaga mochichi napu ekí enomígame nile, pe okabi ejchírúligame enomí nile 'we pee najteme. <sup>3</sup> A'ligeko alué Esusi anile:

—'La bijchiá ye mukí gunámakame 'we resitíri tabilé we'ká enomígame pe oká enomí mochíkuru, pe napu ekí nígame nile. <sup>4</sup> Suwábaga ralámuli 'we enomígame ka pe u'kabi mochime 'ínile alué enomí pe rasírígame 'lige ye mukíka 'ma neji suwábaga napu ekí nígame nile.

*Jena ruwimela Esusi ruwíligo gajunáwili ko alué wa'lú re'obá*

<sup>5</sup> Esusi abiena etélechigó jaré ralámuli ra'ícha mochigo alarigá níligo alué wa'lú re'obá Onorúgame galíla, 'lige aliena semati níligo alué e'wele rejté alué wa'lú re'obá newárigime, 'lige 'we semati níligo alué suwábaga tábiri napu uchúchale 'lige napu jáwale ralámuli alé pachá re'obachí napu ralámuli a'pime nile Onorúgame. 'Lige Esúsika anile:

<sup>6</sup> —Sebámala bilé rawé napu'lige ye wa'lú re'obá Onorúgame galíla 'ma gajunáwili ju, suwábaga ye rejté napu eté 'emi wa'lú re'obá newárigime wijchí mochímala gajuga.

<sup>7</sup> A'liko rukéliru alué Esusi:

—Mué Wa'lula, ¿chiéniko gajunáwili júko ye wa'lú re'obá? ¿churigá 'la machiboa 'ma sebamio raweli gajunáwili ko ye wa'lú re'obá?

<sup>8</sup> Esúsika nejele:

—'We alá 'nátaga mochíwa napurigá tabilé 'wesi 'yégamala se'nú ra'íchali ruigá napurigá oyéramala 'emi. E'yénamala we'ká ralámuli ichúrimi ra'laga anisia: «Ne júkuru 'la bijchiá Onorúgamete julárigame. 'Ma seba raweli napu 'emi gu'írimili níligo ne.» Alarigá animela alué ralámuli, nobí 'émika tabiléchigo bijchígíwagó.

<sup>9</sup> —'Lige napu'lige ruyésiga 'emi nakó nerúlímio, tabilé majawa napugiti nerúlímili kame nakoli bajchá, nobí tabiléchigo 'cho suwíbámili nímalagó ye gawí a'lige.

<sup>10</sup> 'Lige aminabi ruwile alué Esusi:

—Alué we'ká ralámuli bilena gawichí ejperégame nakómala chebilena gawichí ejperégame sayega. <sup>11</sup> A'wágame nokimela ichúrimi gawichí, 'lige abiena gurúlmalala go'ame, 'lige nerúlmalala naultitíri, 'lige 'pa rewagachí 'we e'karúgame chátiri buyame etémala ralámuli.

<sup>12</sup> > Tabilé 'cho alarigá ikichi suwábaga ye tábiri, 'we najátawili ju 'emi 'lige 'ma cha'piboli ju 'emi. 'Lige 'ma o'toboli ju 'emi e'wérali rukemia ra'íchali alé u'kuchí re'obachí «sinagoga» rewégame, 'lige 'ma mo'áwili ju 'emi galírale ne'chí oyérame kóriká, 'lige 'ma o'toboli ju 'emi alué e'wélala mochígichi ra'íchali gatélachi. <sup>13</sup> A'lige alé o'tosuga 'emi, 'émika 'la sébali ma'chígime rupoá alarigá ko ne. <sup>14</sup> Tabilé e'karúganti ná'tawa bajchabé churigá nemítiká, <sup>15</sup> ne 'nalina 'la nejímalá semátiri ná'tili churigá nemímala 'emi. A'liko tabilé umérowa 'emi. <sup>16</sup> 'Lige o'toboli ju 'emi napurigá galírale mo'awa 'emi o'nólate 'lige 'emi e'yélate, 'lige 'emi ba'chílate 'lige 'emi rijimálate, 'lige 'emi 'yuga oyame. 'Lige jaré 'emi 'ma me'liboli ju. <sup>17</sup> 'Lige suwábaga ralámulite gichíwili ju 'emi ne'chí oyérame kóriká, <sup>18</sup> nobí neka 'la senibí repuka asimélagó 'emi. <sup>19</sup> 'La anachásaká

'emi rekó gichilie a'lígeko 'la sebámala 'emi rewagachi.

<sup>20</sup> › Napu'lige 'emi etea noligá mochigo sontalo jena Rusaleni we'ká riógachi, machíboa 'ma pe yati gajunáwili ko alué we'ká galí. <sup>21</sup> A'lígeko suwábaga 'emi napu mochí a'lige alé Jurea anilichi gawichí 'ma júmasiwa re'pá rabomi. 'Lige suwábaga 'emi napu mochí a'lige jena Rusaleni, 'ma júmisiwa. 'Lige suwábaga napu mochí a'lige alé 'mi jami, tabilé 'ma sboa jena Rusaleni <sup>22</sup> napugiti 'we enárelamala a'lige alakichi. A'lige 'ma alarigá ikimela suwábaga napurigá aní wa'lú apélichu chujkúgame osilí Onorúgame ra'ichálila alué apeli kabítigame. <sup>23</sup> Resía umugí alué napu a'lige rawé rojpega mochígichi, 'lige alué umugí napu u'kuchí 'kúchigame bijí ch'i'me a'lige rawé, napugiti 'we resíríká nímala a'lige rawé jena wijchimoba. Onorúgame alarigá elámala. <sup>24</sup> Ajaré siparínate ejchega me'liboa, 'lige jaré 'ma cha'piboli ju 'lige bochgími gawichí o'toboli ju. 'Lige alué tabilé ralámuli israelita 'ma neyúriga mochímala jena Rusaleni napusí seba raweli napu'lige Onorúgame 'ma tabilé gu'ímalala semátiri na'táilate alué ralámuli tabilé israelita.

<sup>25</sup> › 'We e'karúgame chátiri buyámala alé re'pá rayénalichi 'lige mechachi 'lige so'pilichi. Alueka ruwime nímala 'ma gajumio gawí. 'Lige jena wijchimoba we'ká ralámuli we'kaná riógame tabilé machimela chonigá ala'si'o a'lige rawé, 'lige 'we majámala ená 'sichi a'wágame rolochi alué wa'lú ba'wí jena wijchimoba iligame. <sup>26</sup> 'Lige alué we'ká ralámulika 'ma rekupámala majaga etega alarigá ikíchi ye gawí napugiti a'wágame nokimémpá rayénali, 'lige mechátiri, 'lige so'plítiri alué 'pa rewagachi mochíggame. <sup>27</sup> A'lígeko etémala 'emi ne'chí aleka enágichi ne re'kinasia bilena nolichi wa'lú a'walí niga 'lige ra'ósali ne napu nawágame ju 'pa rewagáchika napurigá rió neraga. <sup>28</sup> Napu'lige ya 'ma alakichi, 'we a'lá iwériga mochiwa 'lige buigá mochiwa napugiti pe a'kinana 'ma tabilé resí ikíá mochímempá 'emi.

<sup>29</sup> Abiena regá anele:

—'Emi 'la machí napu'lige rojá <sup>30</sup> yáachi, a'kinana sebamio bamunúsili. <sup>31</sup> A'chigóriga napu'lige 'emi etea i'kirú ikichi alé 'pa rewagachi, 'we a'lá machíboa 'emi pe a'kinana uché ku nawamio ne.

<sup>32</sup> › Neka 'la bijchíá ruwí, suwábaga alarigá ikimeo bajchabé ta'chó suwichi ralámuli jipe ejperégame. <sup>33</sup> Rewagá 'lige gawítiri siné rawé 'ma tabilé ne ikimela, nobi ne nila ra'íchalika tabiléchigo siné we'kámalagó.

<sup>34</sup> › 'We 'la 'nátaga e'yénawa 'emi, tase 'nátaga e'yénawa bajlíme 'lige e'karúgame

tábiri mélime napu nerú jena wijchimoba, a'lige rawé tase sanátiga sebámala ne napu 'emi mochí napu'lige 'emi tabilé 'nátaga mochígichi <sup>35</sup> napugiti yati neraga nawámili kame ne 'lige suwábaga ralámulite etéwili kame ne. <sup>36</sup> 'We 'la 'nátaga mochiwa Onorúgame 'yuga ra'icha, a'walí tania napurigá 'emi tabilé che ikimela napu'lige e'karúgame tábiri cha ikichi jena wijchimoba, napurigá 'la simámala 'emi tabilé chijúniga alé napu asimela ne, ne napu nawágame ju 'pa rewagáchika napurigá rió neraga —alanele Esusi alué ralámuli.

<sup>37</sup> Esúsika rawé 'we benírame nile alé wa'lú re'obachi Onorúgame galíachi, 'lige rukoka simime nile alé na'lébori nasípari Olibo rewégame rabó. <sup>38</sup> We'ká ralámuli simíbame nile senibí be'á alé wa'lú re'obachi gepumia Esusi ra'ichálila.

## 22

*Jena ruwimela Jurásichi bajkíligo alué Remónisi alawala*

<sup>1</sup> 'Ma a'mulipi enale raweli sebamia Páskua anilime omali napu baní go'ame nile tase lebarura ajchigá newárigime,\* <sup>2</sup> 'lige alué e'wélala balé 'lige alué we'ká rió ra'íchali rejcholi benírame ralámuli napu Moisesi a'rele 'we 'ya, 'nátale churigá 'la nílga Esusi me'liá 'we nasoka napugiti 'we majáligime alué we'ká ralámuli. <sup>3</sup> Liko alué Remónisi alawala chátiri bajkile alé Jurasi Iskariote sa'pálachi, alué Jurasi napu nile bilé alué makué oká rió nulame Esusi nochálalachi. <sup>4</sup> 'Lige alué rioka simile e'nemia alué balé e'wélala, abiena alué e'wélala sontalo wa'lú re'obachi tebume Onorúgame galila, 'lige alé sebase anele:

—Ne 'la nejkúrimala cha'piá alué Esusi.

<sup>5</sup> 'Lige alué ralámulika 'we ra'sálale, 'lige enomite najtétimorile alué Jurasi. <sup>6</sup> Alésíko Jurasi chojkile 'nata: «¿Churigá chíéniko 'la nímala'we cha'piá Esusi tase etériga ralámuli?» regá 'nátale.

*Jena ruwimela Esusi go'áligo go'ame Páskua omégachi ta'chó me'liachi*

<sup>7</sup> Sébale raweli Páskua† omégachi baní go'yachi tase kawali ro'igá newárigime. A'lige rawé napu ekiná riógachi galírale me'liame nile bilé bo'á Onorúgame kógimio. <sup>8</sup> 'Lige Esusi júlale alué Pegro 'lige Juani, regá anegá:

—Simíbaga, newawa alué go'ame ramué go'yame o'rako ali chónachi.

<sup>9</sup> 'Lige alué oká rioka rukele:

—¿Koché 'la nítéko alué go'ame newalía?

<sup>10</sup> 'Lige alué Esúsika regá anele:

—Napu'lige 'emi sebase alé we'ká riógachi, alé najtepámala 'emi bilé rió sikolí

\* 22:1 E'nesi glosario «levadura». † 22:7 E'nesi glosario «Páscua».

majtochi iligá enágame ba'wí ro'ágame, 'lige 'emi alué rió najátawa napusí seba bilena galichi, 'lige sebámala bilena galírale osámána ilígame, <sup>11</sup> 'lige anewa 'emi alué rió galí nígame ne napu ju benírame najkió bilé galí napurigá go'mé ne 'emi makué oká rió 'yuga o'rako alí chónachi. <sup>12</sup> 'Lige 'emi alué galí amoba ilígime 'nalina 'yáwili ju abiena 'ma 'we a'lá pechítigame, 'lige alé newawa 'emi alué go'ame.

<sup>13</sup> 'Lige alué rioka simíbale 'lige rewale alué rió sikolí majtochi iligá enágame napurigá anígame alué Esusi 'lige najátale. 'Lige jímore bilena galichi osámána ilígamechi, 'lige newale alé alué go'ame a'lige rawé Páskua omégachi go'yáame.

<sup>14</sup> Napu'lige 'ma wajsigá ilígichi go'ame 'lige 'ma ro'áriga ilígichi, sébale Esusi go'mea, alé rel'é ilígame mésachi kilí bo'ibale gayena sekate machoka wijchí, alué makué oká rió nulame 'yuga. <sup>15</sup> 'Lige anile Esusi:

—Neka 'we najkié napurigá napuika go'poa ramu'é ye go'ame jípe alí chónachi Páskua omégachi bajchabé ta'chó mukíá ne. <sup>16</sup> Pe jípe go'sá go'ame 'emi 'yuga, we'lisi tabilé uché ku napuika go'poa napusí 'ma 'la sébali ikisá napu najki Onorúgame.

<sup>17</sup> 'Lige cha'pile alué baso i'wili ba'wila rekútame ro'ágame, 'lige 'ma cheliera 'yasa Onorúgame, regá anele bo'né benírame:

—Nachútaga bajisi 'emi ye i'wili ba'wila rekútame. <sup>18</sup> Neka 'la ruwí, tabilé uché bajimia ne napusí 'ma 'la sébali ikisá napu najki Onorúgame.

<sup>19</sup> Pe nujubapi 'wile alué baní tabilé kawali ro'igá newárigime 'lige wa'lú cheliera 'yasa Onorúgame, chí'wánale alué baní 'lige 'yale alué makué oká rió, 'lige anele:

—Go'sí 'emi. Ye baní ne sa'pala ju. Yeka ruwime ju 'ma me'liboli ko ne, 'lige mukimeli ko ne 'emi neraga.† 'Lige 'emi 'la senibí a'chigóriga nokoboa a'kinana ne mukusá ne'chí nélegá.

<sup>20</sup> 'Lige abiena 'wile alué baso i'wili ba'wila ro'ágame napu rekútame ju, 'lige anile:

—Ye pachágana manígime i'wili ba'wila ne elalá ju, alué elá napu ma'chínamili ju ne me'liá, 'lige ne mukugá wa'lú gu'irimili ju 'emi ralámuli. Regá gatele Onorúgame ralámuli jípe e'jperégame gu'irimia napurigá 'la bi'wigame alawégame nímala. 'Lige a'lá sébali alarigá ikimeli júkuru ne napurigá aní Onorúgame nila ra'íchali. <sup>21</sup> 'Lige alué rió napu gu'irimili ju ne saíla ne'chí cha'piá jena ajtikuru jípe ramu'é 'yuga jena mésachi. <sup>22</sup> Ne Esusi napu nawágame ju 'pa rewagáchika napurigá rió neraga mukumeli júkuru ne

napurigá najki bo'né Onorúgame, 'lige resía alué rió napu gu'irimili ju ne saíla ne'chí cha'piá.

<sup>23</sup> Alésíko chojkile rukea a'bopi alué makué oká rió chieri níliga gu'irimili Esusi saíla Esusi cha'piá.

<sup>24</sup> Alésíko chojkile alué makué oká rió ra'icha 'we bochí anigá a'pilipi e'wélala neraga mochíniliga. <sup>25</sup> 'Lige Esúsika anele:

—Alué e'wélala selígame alé bilena wa'lú gawichí nulame, alueka 'we nochárima ju alué ralámuli napurigá ajágame, 'lige alué ralámuli e'wélalaka 'la semáriga gu'irame mayame ju alué ralámuli. <sup>26</sup> 'Lige 'emi ralámulika tase alarigá niwa. Alué bilé rió abé najtékame ka, alueka nímili júkuru napurigá alué bilé rió re'malí nóchame tabilé gunarume. Alué nulame ka nejkúrima nímili júkuru napurigá pe bilé nóchame. <sup>27</sup> ¿Chieri júkó abé najtékame, alué mésachi asíbame go'ame go'mea, alué chalá go'ame ro'ame? ¿Tacha alué mésachi ajtígama abé najtékame ju? Neka pe napurigá bilé rió ju go'ame ro'ame. 'Émichigó a'chigóriga niwa napurigá ne. <sup>28</sup> 'Émika senibí ne'chí 'yuga e'yénale ne'chí resí olánilichi ne saíla. <sup>29</sup> Neka alekeri 'yámala 'emi a'walí napurigá ne O'nola 'yale ne'chí <sup>30</sup> napurigá go'mela 'emi 'lige bajímala alé ne nila mésachi mochiga napu'lige ne uché ku sebas, 'lige alé mochíbamala 'emi mutélachi napu ju e'wélala mochime napurigá gatémala 'emi ra'íchali alué makué okáná chojkégame ralámuli israelita 'yuga.

<sup>31</sup> Alésíko alué Esusi Simoni 'yuga ra'íchale regá:

—Mué Simoni,§ alué Remónisika tala resí olániliga 'emi, wejpisóniliga napurigá ri'ligó wejpimókime napurigá a'rémala 'emi oyeria ne nila ra'íchali rejcholi. <sup>32</sup> Neka 'wéchigo tánigo Onorúgame napurigá tase siné a'rémala mué bijchigia 'la gu'irilime ko mué Onorúgamete napu'lige 'ma chajkena o'tosuga mué alué Remónisite. Napu'lige 'ma ku uchéchigo ku oyérasa mué ne'chí, 'lige gu'iriwa mué gompaniérola ruigá wa'lú a'walí nígame ko Onorúgame.

<sup>33</sup> Lige Pégroka anele:

—Mué Wa'lula, neka aba'lá simé olá mué 'yuga rekó galírale bajchalíe, rekó me'liruge.

<sup>34</sup> 'Liko Esúsika nejele regá anegá:

—Pegro, be'lí be'á napu'lige ta'chó sinachi o'tolí, baisá 'yegámala mué ta machióriká ne'chí.

<sup>35</sup> 'Lige Esusi rukele aba alué makué oká rió:

—¿'We rokáré bilé tábiri napu'lige júlige ne 'emi tabilé o'ká sibula tabilé enomítiri, 'lige tabilé pabega aká nujubami akarálime?

† 22:19 «Gu'iriga» aniaká Esusi pe anime ke anile suwábaga ralámuli alawala 'la bi'wimeo 'la oyérasaká Onorúgame alué ralámuli. § 22:31 Alué Simoni oká rewégame nile, Pegro anilime nílechigó. 'Lige i'sínimi Esusi Simoni Pegro anilime nile.

'Lige alué ralámulika nejele:

—Tabilé tábiri rokáré.

<sup>36</sup> Alígeko Esusi regá anele:

—Jípeko 'la o'toboa chiwela, 'lige enomítiri. 'Lige bilé 'emi tabilé nílaská siparina 'liko ralinewa bo'né o'páchala, siparina raliboa 'lige. <sup>37</sup> Neka 'la ruwí: Bijchiá me'liboli ju ne napurigá aní alué osilí Onorúgame nila 'we 'ya newárigime ta'chó ochérachi ne, regá anime: «'We resí oláwili ju alué rió, napurigá pe apiépiri rió cha 'sime alarigá etéwili ju.» Alarigá ruwí alué osilí, 'lige 'la bijchiá alarigá ikimeli ju napurigá ruwí alué osilí Onorúgame nila.

<sup>38</sup> 'Lige bilé alué makué oká rioka anele:

—Mué Onorúgame a'walila nígame, jena bi'tí oká siparina.

'Lige Esúsika regá anele:

—Alá ju.

*Jena ruwimela Esusi ra'ichaligo Onorúgame 'yuga alé Rusaleni na'lebo rabori Olibo anilichi*

<sup>39</sup> 'Lige Esusi simile Rusaleni na'lebo rabori Olibo rewégachi napu simime nile bo'né Onorúgame 'yuga ra'ichamia, 'lige alué 'yuga benime najátale. <sup>40</sup> 'Lige sebasea alé rabori anele:

—Tániwa iwérali Onorúgame napurigá ta neyúrimala Remónisi na'tálila.

<sup>41</sup> 'Lige Esusi alé a'mibemi waná simile, 'lige alé chojkóbisiga ilíbale Onorúgame 'yuga ra'ichamia, 'lige Onorúgame 'yuga ra'icha regá anele:

<sup>42</sup> —Mué O'nó, neka tabilé najkí napurigá ralámuli resí olámala ne'chí. Mué abalarigá najkisáká, abirigá resí ikiméleké ne.

<sup>43</sup> 'Lige pe yati neraga ma'chínale bilé santo ánjeli alé 'paka rewagáchika simígame a'walí 'yamia Esusi. <sup>44</sup> 'Lige Esusi we'ká 'nátaga resí niliga, 'we iwégame ra'ichaga Onorúgame 'yuga 'we chilénale napieri elá 'lige wijchí pachule. <sup>45</sup> 'Lige ku o'weti ilísisa alé napu chojkóbaga ilile Onorúgame 'yuga ra'icha, 'lige ku simile napu mochile bo'né nochálalachi nulame, 'lige 'ma okókame re-wale, 'ma okole resibaka chálagá we'ká 'nátaga. <sup>46</sup> 'Lige anele:

—¿Chonigá okoka bi'tirúché 'émika? Mochísiga o'weti, ra'ichawa Onorúgame 'yuga, iwérali tániwa napurigá ta neyúrimala Remónisi nila 'nátili.

*Jena ruwimela Esusi cha'pílirigo sailate*

<sup>47</sup> Esusi bijí ra'icha ilígichi, alué Jurásika napu nílige bilé alué makué oká rió Esusi nila nóchali nulame we'ká ralámuli 'yuga sébale alemi. 'Lige a'bé nawile Esusi, banachí chu'migá repórule napurigá nokame nile alué ralámuli, <sup>48</sup> 'lige Esúsika anele:

—Mué Jurásika ne'chí chu'miá banachí pe ruigá 'smi mué ne ko Esusi napu 'yaga

e'yena ne saíla, ne alué rió napu nawágame ju 'pa rewagáchika napurigá rió neraga.

<sup>49</sup> Alué Esusi benírameka etesa alarigá olibo achi Esusi, regá rukele:

—Mué Onorúgame a'walila nígame, ¿pala sásiwa ramué siparinate?

<sup>50</sup> 'Lige bilé alué Esusi nila nóchalichi nulame rejúpónale najkala wajtoná ilígame alué rió wa'lula balé 'yuga nóchame. <sup>51</sup> 'Lige Esúsika anele:

—¿Tase che olawa, a'rewa 'emi!

'Liko Esusi ku na'chúchale alué rió najkala.

<sup>52</sup> 'Lige Esusi anele alué e'wélala balé abiena alué e'wélala sontalo alué wa'lú re'obá Onorúgame galila tebume abiena alué e'wélala rió ralámuli jurío nuleme, napu sébale o'tomea alué Esusi:

—'Émika we'ká siparina, igútiri o'ká si. ¿Chigórigame ju ne? <sup>53</sup> Napu'lige ne nabí rawé ajtígachi alé wa'lú re'obachi, 'lige tase siné che olá 'emi ne'chí. 'Lige jípeko a'má seba raweli napu'lige 'emi resí olámala ne'chí. 'Ma umérialia 'emi resíti 'nátalite.

*Jena ruwimela Pegro tabilé machiórliigo alué Esusi*

<sup>54</sup> 'Lige alésiko cha'píliru alué Esusi 'lige o'tóliru alé wa'lula balé bejtélachi. 'Lige alué Pégroka najátasia enale pe mejkabeka. <sup>55</sup> 'Lige alé ra'pichí nasipa na'yasa mochíbale alué saíla, alemi mochíbale sujkáliga, Pegro abiena alemi asíbalechigó. <sup>56</sup> 'Lige bilé mukí go'ame newame etesa alemi ajtígachi Pegro sujkáliga, kilí ilíbale e'negá, 'lige anile:

—Neka eteme ke ye rió Esusi 'yuga eyénachi.

<sup>57</sup> 'Lige alué Pégroka 'yégame regá anigá:

—Mué mukí, neka tase machí alué rió.

<sup>58</sup> 'Lige pe nujubapi bilé rió etele alué Pegro, 'lige anele:

—Ne abiena eté mué Esusi 'yuga eyénachi.

'Lige Pégroka nejele:

—¿Mué rió, neka tase 'yuga eyene alué rió!

<sup>59</sup> Pe nujubapi uché bilé rió anile:

—'La bijchiá ye rioka Esusi 'yuga eyéname ju, napugiti napurigá Galilea rewégachi ejperégame, alarigá ra'ichame kame.

<sup>60</sup> 'Lige alué Pégroka regá anele:

—¿Mué rió, neka tase machí tachiri olagá aní mué!

Pe aba'lige yati bijí ra'icha ajtígachi alué Pegro, sinale bilé o'tolí. <sup>61</sup> 'Lige alué Esúsika gu'lile 'lige e'nele alué Pegro. 'Lige alué Pégroka nélale alarigá anésiga alué Esúsita rapakónala alí, 'yegamio baisá alué Pegro ta'chó sinachi bilé o'tolí. <sup>62</sup> 'Liko alué Pegro ma'chínale alé 'minami, 'we chálagá nalale.

*Jena ruwimela gawéirigo Esusi*

<sup>63</sup> Alué ralámuli Esusi tebúkame 'we gawélale alué Esusi 'lige a'kuérami chibi

olale abichilubi 'we gawéliga. <sup>64</sup> Busila bulesa ba'nasólite abichilubi 'we chibi olale 'lige rukele:

—Machígobá ¿chieri 'siá nejchoa?

<sup>65</sup> Aminami we'ká e'karúriga chíbiriga anele.

*Jena ruwimela Esusi o'tólrigo e'wélalachi ra'ichali gatélichi*

<sup>66</sup> 'Lige che'lachi napuíle e'wélala ralámuli jurío nuleme, abiena alué e'wélala balé, 'lige alué Moisesi rejchólila benírame, 'lige o'tólrigo alué Esusi alé ra'ichali gatélichi. <sup>67</sup> 'Lige alé iwégame rukéliru:

—Ruwí: ¿Pala mué ju nejkúrimili Onorúgamete julárigame?\*

'Lige alué Esúsika nejele:

—Rekó anisá ne «ne ju», 'emi tase bi-chígimá, <sup>68</sup> 'lige ne rukisá 'emi chieri ka ne, 'lige tase ruwimela 'emi chieri ka ne. <sup>69</sup> Ne napu nawágame ju 'pa rewagáchika napurigá rió neraga, jípesiko asimela ne alé 'we najtechí napu ajtí alué Onorúgame wa'lú a'walí nígame.

<sup>70</sup> 'Lige suwábaga alué ralámuli regá rukele:

—¿'Liko mué Onorúgame Inolá korime ke aní mué?

'Liko Esúsika regá nejele:

—Ju, aka 'emi 'we a'lá ma'chígime aníché a'boi.

<sup>71</sup> 'Liko regá anile alué ralámuli:

—Ya 'ma 'la sébali machirúke'é, tase rokáré uché bilé rió machime napugiti bo'né 'la sébali ruyame.

## 23

*Jena ruwimela Esusi o'tólrigo alué selígame Pilato ajtígichi*

<sup>1</sup> Alésíko suwábaga alué e'wélala jásele 'lige o'tole Esusi alé napu asale alué selígame Pilato anilime, napu nóchali 'yárigame nile alué romano e'wéalate napurigá alé Jurea nulámala. <sup>2</sup> 'Lige alé chojkile e'chewa regá anegá:

—Ramueka etelia ye rió ramué epperélachi ramué nila gawí bo'ígichi se'nú ra'ichali ruyachi, tase najtétiwará ramué alué wa'lula gobierno Roma nulame, abiena ruwí alué Onorúgamete julárigame ka, 'lige aminami wa'lula gobierno korí.

<sup>3</sup> 'Liko rukele alué selígame Pilato:

—¿Mué ju wa'lula rey ralámuli jurío nuleme?

Esúsika regá nejele:

—Ju, ne ju.

<sup>4</sup> Alésíko alué Pilato ruyele alué wa'lula balé abiena alué uché jaré ralámuli regá anegá:

—Ne níriká, tabilé cheri kanti káwé ye rió.

<sup>5</sup> 'Liko alué ralámulika aminabi anele 'we a'wágame ra'ichaga:

—Tabilé 'la ra'ichali beniri ralámuli jena Jurea rewégame gawí bo'ígichi epperégame. Alé Galilea anilime gawí bo'ígichi chojkile sineko, 'lige jípeko 'ma jeka Jurea seba.

<sup>6</sup> 'Lige alué Pilato akisá alé Galilea anilichi chojkíligo, rukele pala Galilea bejtégame ka alué rió Esusi. <sup>7</sup> 'Lige ruyésiga Galilea bejtégame ko Esusi, 'liko nulale o'tóniliga alé napu asale alué selígame Erote napu nile selígame alé Galilea anilime gawí bo'ígichi nulame. 'Lige rawé eyénale alué wa'lula selígame Erote alé Rusaleni rewégame.

*Jena ruwimela Esusi 'ma o'tólrigo napu asale alué wa'lula selígame Erote*

<sup>8</sup> 'Lige alué wa'lula selígame Erote Esusi etesa 'we ra'sálale. Abé 'yabesi we'ká rawé 'we eténilia asálige alué Esusi, napugiti akéligime Onorúgame a'walíla nígame ko alué Esusi. 'Lige 'we eténile asálige pala 'la bijchiá ko a'walí nígame ko. <sup>9</sup> 'Lige we'ká ra'ichali rukele 'lige alué Esúsika tase nejele. <sup>10</sup> Abiena alé jale alué e'wélala balé abiena alué ralámuli ra'ichali rejcholi benírame alué Moisesi a'rélala, 'lige 'we iwégame e'chewa jale. <sup>11</sup> 'Liko alué selígame Erote 'lige abiena alué sontalo chojkile gawelia. 'Lige o'pachátarile alué o'pacha 'we semati napu alué bo'né selígame Erote o'pachátame nile, 'lige pe gawéliga lolale. 'Lige alué selígame Erote nulale napurigá ku alé Pilato ajtígichi o'toboa alué Esusi. <sup>12</sup> 'Lige alésíko alué selígame Erote 'lige selígame Pilato 'we a'lá gomaniero gayénale, 'yabé bajchabé raweka na'áuka járome nígame.

*Jena ruwimela uchéchigo o'tólrigo Esusi alué Pilato ajtígichi*

<sup>13</sup> 'Liko alué selígame Pilato bayele alué e'wélala balé, abiena uché jaré rió e'wélala, abiena we'ká ralámuli, <sup>14</sup> 'lige anele:

—Émika akiná a'pá ye rió ra'ichali najsibuga eyénale kóriká. 'Lige neka 'ma 'la rukékuru 'emi akériga, 'lige ne níriká tabilé se'winá 'síkame ka'é ye rió napurigá 'emi e'chewámala ye rió ra'ichali najsibuga eyénale ko. <sup>15</sup> Nibilé alué selígame Erote níriga tabilé chieri kame ka'é napurigá me'liboa ye rió. <sup>16</sup> Pe nulámala ne napurigá wejpisópa ye rió, 'lige pe yati ku elímala ne napurigá simela a'minami—anile Pilato.

<sup>17</sup> Napu'lige Páskua omégachi sebase senibí bamí, alué Pilato ma'chí pame nile bilé rió galírale bajchárígame, alekeri pe wejpisosa a'rémoríle alué Esusi. <sup>18</sup> Iligá alué we'ká ralámuli tase elale, 'lige chojkile ne'oa regá anegá:

\* 22:67 Napu'lige Esusi rukilía: «¿Pala mué napu nejkúrimili ju Onorúgamete julárigame?» Pe regá rukilime kéréle: «¿Pala mué ju Kristo?»



—¡Tase pe wejpisosa a'rewa alué rió!  
¡Barabasi 'nalina ma'chí pápua!

<sup>19</sup> Alué rió Barabásika galírale bajcháriga asale napugiti nakó o'wínaligime alé Rusaleni we'ká riógachi abiena me'álige bilé rió.

<sup>20</sup> Pilato tabilé bajchánile galírale alué Esusi, alekeri uchéchigo siné ruwile pe yati ku elimio napurigá 'minami simela, <sup>21</sup> 'lige alué ralámulika abéchigo a'wágame ne'ole 'liko regá anigá:

—¡Gulusichi ujchawa! ¡Gulusichi ujchawa!

<sup>22</sup> 'Lige Pilato uchéchigo regá anile, alésiko 'ma baísá nile:

—¿Tachiri chátiri nasibule ko ye rió? Ne níriká tabilé se'winá 'sírame ju ye rió napurigá me'liboa. 'Lige neka pe nulámala napurigá wejpisópua, 'lige pe yati ku elimio ne napurigá simela 'minami.

<sup>23</sup> 'Lige alué ralámulika abichilubi 'we nulale e'wele ne'oka napurigá gulusichi ujchawa alué Esusi. 'Lige 'we ne'ole alué ralámuli abiena alué e'wélala balé, arigá 'ma umébafe anigá napurigá najkile a'boi. <sup>24</sup> 'Liko alué Pilato e'wale napurigá najkile alué ralámuli. <sup>25</sup> 'Liko ma'chí pale alué uché bilé rió galírale bajchárigame napu alué ralámuli najkile ma'chí pasime napu nakó o'wínalige alé Rusaleni we'ká riógachi abiena napu me'álige bilé rió. 'Liko alué Pilato elile alué e'wélala balé napurigá alarigá olámala napurigá najkile a'boi.

*Jena ruwimela Esusi majtórilirigo alué wa'lú gulusi*

<sup>26</sup> Napu'lige sontalo 'ma 'yuga e'yéniga Esusi gulusi\* majtórige alé gulusichi ujchamia, 'lige bilé rió cha'pile alemi eyéname kólige Siréneka nawágame Simoni rewégame napurigá gu'írimala gulusi majtórilichi. 'Lige majtóriliru napurigá guwana enámala majtoga napu Esusi enale. <sup>27</sup> 'Lige we'ká ralámuli e'yénale najátasia, abiena we'ká umugí e'wele nalasia e'yénale chálaga na'temaka Esusi o'towachi. <sup>28</sup> 'Lige alué Esúsika e'nele 'lige anele:

—'Emi umugí jena Rusaleni ejperégame, tase nalápua ne'chí na'temaka, pe iligá 'emi a'bopi na'temaka 'nalina nalápua abiena 'emi a'boi 'kúchila. <sup>29</sup> Sebámala raweli 'we resiti raweli tase anachárume 'lige alué umugí chí'ime a'tanégame abiena ojtábégame alueka uchérápe abé resí nilimala, 'lige ta'mé 'we rasigá resí nilimala alué umugí tabilé 'kúchigame ka. <sup>30</sup> Abiena anile: «Alué we'ká ralámuli najkimela napurigá amoba gajúmala re'pá jágame rabó nokogá.» «Abiena najkimela napurigá

na'póliwa re'lé jágame rabote.» <sup>31</sup> 'We cha nokame ju ye ralámuli, ne 'la Onorúgamete julárigame kachi chiena 'we resí oliá ne, 'lige a'kinana abéchigo resí oláwili júkuru 'emi.

<sup>32</sup> Abiena 'yuga e'yénale oká rió gulusi majtórígachigó 'we i'nílime me'limea alué Esusi 'yúrigachigó.

*Jena ruwimela Esusi gulusichi ujchálirigo*

<sup>33</sup> 'Lige sebasa bilena rabó Anayáwali Mo'ola rewégachi,† gulusichi ujcháliru Esusi me'limea, nasipa ujcháliru.

<sup>34</sup> 'Lige alué Esusi alé re'pá gulusichi ujchásiga Onorúgame 'yuga ra'íchale regá:

—Mué O'nó, pe rekó e'káwagó ye ralámuli rekó lonokachi, tase machí resí nokao ye ralámulika.

Alésiko alué sontálaka chojkile re'ea† chieri meta alué Esusi o'páchala.

<sup>35</sup> 'Lige alué we'ká ralámuli alemi jale e'negá, abiena alué e'wélala ralámuli jurío nuleme, 'lige 'we gawélele alué Esusi, regá anegá a'bopi:

—Esusi we'ká ralámuli gu'íriale, jípeko bo'nepi neyúsamale ke 'la bijchiá Onorúgamete julárigame nísaka.

<sup>36</sup> Alué we'ká sontalo abiena gawélele alué Esusi a'bemi jaga i'wilí ba'wila pee a'wágame 'we cho'kógame owigá <sup>37</sup> regá anegá:

—Mué Wa'lula, rey níriká ralámuli jurío nuleme, bo'nepi neyúsiwagó.

<sup>38</sup> 'Lige alué sontálaka ujchale bilé rabileta osirúgime alé gulusichi alé mo'rákana napu Esusi chujkule regá anime: «Ye ju wa'lula rey, ralámuli jurío nuleme.»

<sup>39</sup> Abiena alué bilé rió cha 'sime alé chujkúgame 'we gawélele, regá anegá:

—¡Mué níriká Onorúgamete julárigame, bo'né neyúsiwa, abiena gu'íriwa ramué napurigá neyúsiwa!

<sup>40</sup> 'Lige alué uché bilé rioka ne'óchale alué uché bilé rió, regá anegá:

—Mueka ¿tacha majawáché alué Onorúgame? Ramueka a'chigóriga me'liboli júkuru napurigá ye rió. <sup>41</sup> Ramueka asírige wa'lú gastigo narigíguru, najtétiga napu resí nokarúpa ramué. 'Lige ye rioka tabilé inílame rió júkuru.

<sup>42</sup> 'Lige alarigá anesa alué rió 'lige Esusi 'yuga ra'íchale. Anele:

—Mué Esusi, 'we alá sébali néléwa mué ne'chí napu'lige rewagachi moínasa 'ma 'la sébali olasa jena wijchimoba.

<sup>43</sup> 'Lige Esúsika regá nejele:

—Mué rió 'we alá nirá ne'chí, alekeri jípesíko 'we alá sebámala mué ne'chí 'yuga asímea alé 'pa rewagachi.

\* 23:26 Mayelia siné kachi Esusi majtórilirigo alué gulusi re'pá o'wepo nasipa bo'ígime rabileta ru'nágame alué gulusi newalime. Mayelia alué uché bilela rabilétaka o'weti iligame 'ma alé rabó ilifige. † 23:33 Yolika «Calvario» aneme ju alué rabó, 'lige aminami «Gólgota». ‡ 23:34 Alué re'ígi napu re'ele alué sontalo alé napurigá «dado» nile alué re'ígi.

*Jena ruwimela mukúligo Esusi*

<sup>44</sup> 'Lige 'ma rawilichí 'ma chónale rayénali, 'lige chónaga ilíbale bochígimi gawichí. Nasípagana enagá ku rayénale alué rayénali. <sup>45</sup> Napu'lige chóniga ilíbasa, alué chiní alé wa'lú re'obachi Onorúgame galílachi chujkúgame nasípagana chí'wale. <sup>46</sup> 'Lige Esusi a'wágame ra'íchaga regá anele Onorúgame:

—Mué O'nó, 'ma ku o'tobógó ne alawala, 'lige 'we 'la repúpua.

Alarigá anísá, 'ma mukule.

<sup>47</sup> Napu'lige alué sontalo wa'lula we'ká sontalo nuleme etesa alarigá ikísá, 'lige 'we alá níraga ra'íchale Onorúgame regá anígá:

—'La bijchiá ye rió 'we alá rió nile, tase se'winá 'síkame.

<sup>48</sup> 'Lige alué we'ká ralámuli napu jale etea mukuchi Esusi 'lige we'ká e'karúriga ikichi, 'minami simíbale sulachí o'chosia chálagá napurigá nokame nile a'boi bile ralámuli mukusá. <sup>49</sup> Alué we'ká ralámuli napu ekí nile alué Esusi machime, abiena alué we'ká umugí napu si e'yénale Galiléaka Esusi 'yuga, alueka a'nabeka mejkabé jale e'negá alarigá oliachi.

*Jena ruwimela Esusi gatélirigo bilena ewachi napu ewararigime nile napu rekáwili nile bilé mukúgame*

<sup>50</sup> Ajtíle bilé rió jurío 'we alá rió José rewégame, Arimatea rewégachi ochérigame we'ká riógachi napu nile pachá Jurea rewégame gawí bo'ígichi, alueka bilé wa'lula nile ralámuli jurío nuleme. <sup>51</sup> Alué rió Joseka tase najkílige napurigá me'liboa Esusi. Uché jaré e'wélala juríoka 'we najkílige napurigá me'liboa Esusi. Alué Joseka 'we alá oyérame nile alué Onorúgame nila rejcholí, 'lige buigá asale bilé rawé napu sebámili nile napu'lige 'ma 'la sébali ikimeli nílige jena wijchimoba napurigá najkíle Onorúgame. <sup>52</sup> 'Lige alué rió simíle e'nemia alué Pilato, 'lige lisensia tánale alé gulusichi chujkúgame mukúgame Esusi re'kibumia o'tomea a'minami gamemia. <sup>53</sup> 'Lige re'kibusa alé gulusichi chujkúgame, 'lige kabíle rojsákame chinichi, 'lige o'tole 'lige rekale bilena ewararigichi wejtosa rejtechí pachami bajkigá napu ta'chó 'wesi mukúgame gatérigime nile alé. <sup>54</sup> A'lige rawé 'we jigale ta'chó rapagachi alaké yanchi rawé, napugiti rapagásaká 'ma resíbulichi níligame melénala rukuchégame abiena.

<sup>55</sup> 'Lige alué umugí napu si e'yénale alué Esusi 'yuga Galiléaka, alueka 'la etele alemi alarigariga gatélíchi alué Esusi. <sup>56</sup> 'Lige ku sebasa alé galírale napu bejtébaga mochíle, 'lige gajsalá basule 'we semá júkame alué mukúgame ro'emía alué gajsalá

ba'wila, 'lige gajsalá yowí rusule alué Esusi mukúgame ujchemia. 'Lige resíbulíchi, resíbale napurigá nulame nile Moisesi nila ra'íchali rejcholí.

**24***Jena ruwimela Esusi ku ajánligo*

<sup>1</sup> Romíkíchi 'we be'á simíbale alué umugí alé napu bo'ile alué Esusi pachá napu rekáririge gatériga. 'Lige o'ká simíbale alué ba'wí 'we semá júkame 'lige alé gajsalá yowí rusurúgame o'ká. <sup>2</sup> 'Lige alé ewágachi sébaga, etele chajkena ajtígó rejté napu ajchárigame nile ma'chímanaka 'yériga alé napu rekáriru Esusi. <sup>3</sup> 'Lige mo'ile, 'lige tase rewale Esusi mukúgame alé gatérigime.

<sup>4</sup> Alésíko kilí jale 'nata: «¿Chukíleché Esusi?» laa jale. 'Lige yati neraga etele oká santo ánjeli napu Onorúgame julárigame nile, o'tosákame ra'ósame o'páchigime alé a'bemi jággame. <sup>5</sup> 'Lige alué umugíka majaga wijchí rojppóchaga uchúpale. 'Lige bilé alué santo ánjelíka rukele:

—¿Chonigá 'yamíché 'émika Esusi jemi suwígame gatélíchi? <sup>6</sup> ¡'Ma ku ajánleché, tabilé néré jemi! Aka 'la na'tásibá alarigá ra'íchaligo alé Galílea asagá. <sup>7</sup> Ruwile alué napu nawágame ju 'pa rewagáchika napurigá rió neraga, nejíwili níliga alé e'wélala ralámuli mochígíchi napu 'we resí nokame ju, 'lige alué bo'né Esusi 'ma gulusichi ujchagá resí oláwili níliga, 'lige 'ma mukumeli níliga alé gulusichi chujkugá, 'lige pe bakíá rawé kachi ku ajánamio.

<sup>8</sup> 'Liko alué umugíka nélále alarigá anélirigo alué Esúsíte.

<sup>9</sup> 'Lige pe nujubapi yati kumi simíbale galírale, 'lige ruyele alué makué bilé rió Esusi nochálilachi nulame abiena suwábaga alué uché jaré ralámuli alé. <sup>10</sup> Alué umugí napu e'yénale alé napu Esusi gatélirige nile María Magalena rewégachi bejtégame, 'lige Juana, 'lige María alué Santiago eyela, 'lige uché jaré umugí. Alué umugí nokale ruyea alué makué bilé rió\* Esusi nochálalachi nulame. <sup>11</sup> 'Lige tabilé bijchígíle alué makué bilé rioka alé umugí alarigá ruwíchi, iligá regá 'nátale: «¿'Lacha bijchiá nímalawé napurigá aní ye umugí?» <sup>12</sup> 'Lige alué Pégroka ma'chínale 'lige yati 'male e'nemia alé 'mi napu bo'ílige gatériga Esusi. 'Lige alé sebasa pe chinícho rewale, 'liko ku galírale simíle, 'we na'tasia enale kumi ta rewísaká alué Esusi gatérigime alé ewararigíchi.

*Jena ruwimela alemi Emausi simime bowé bo'ígichi ma'chínaligo Esusi*

<sup>13</sup> A'lige rawé napu alué Pegro ro'ínasa napu bo'ile alué Esusi gatériga, a'lige rawé simíle alué rió Kleopási rewégame 'lige uché

\* **24:10** Napu'lige Esusi me'lisuga alésíko 'ma pe makué bilé ejtebile 'la Esusi oyérame napugiti Jurásika 'ma tabilé oyérligame Esusi.

bilé ralámuli 'yuga, simíbale alé pe'kabi riógachi Emausi rewégachi napu epperégame nile alué ralámuli. Emaúsika pe a'mulipi nile alé Rusaleni. Alué oká ralámulika tabilé nulame nile Esusi nocháilachi, pe gompaniérola nile alué Esusi 'yuga nóchame makué bilé rió. <sup>14</sup> 'Lige alemi boichimi e'yénaga bijí ra'ichasia e'yénale 'we chálagá etesa mukúligo alué Esusi alé gulusichi. <sup>15</sup> 'Lige ra'ichasia e'yénigichi alué ralámuli, 'lige pe yati neraga ma'chínale alemi Esusi, 'lige si simile. <sup>16</sup> Rekó 'la etee 'lige tase machile alué Esusi ko. <sup>17</sup> 'Lige Esúsika rukele:

—¿'Émika tachiri ra'ichasia i'nárikó jemi bowesia?

<sup>18</sup> 'Liko alué rió Kleopasi regá nejele chálagá:

—Suwábaga ralámuli machíché alarigá ikíluga kul'rikáchi alé Rusaleni. 'Lige ¿pe muecho tabilé machí alarigá ikíluga alé?

<sup>19</sup> 'Lige Esúsika rukele:

—¿Chukirú ko alé?

'Lige bilé alué ralámulika regá anile:

—'Ma me'líli ru alué Esusi Nasareta bejtégame,† alué napu ruwime nile napu anele Onorúgame. 'We 'la benégame nile we'ká e'karúgame nóchaga abiena rejcholi ruigá napugiti Onorúgame a'walila nígame nílgame. Onorúgame 'we a'lá nirale suwábaga napurigá 'sile alué Esusi abiena ralámulichigó. <sup>20</sup> 'Lige alué e'wélala balé 'lige ramué nuleme e'wélala 'ma nejele napurigá me'liboa gulusichi ujchagá alué Esusi. <sup>21</sup> Ramueka mayelie alué Esusi 'simio aminá jula alué ramué saíla napuriga táché olawa ramué jena Israeli epperégame. Ya 'ma bakia rawé ju mukusá Esusi. <sup>22</sup> Aminami jaré umugi ramué 'yuga e'yéname simíbale che'lachi alé napu bo'ile gatériga Esusi, <sup>23</sup> 'lige tabilé rewale alué Esusi gatérigime. 'Lige ku jsíturu galírale ruwisia jaré santo ánjeli Onorúgamete julárigame etéliga, 'lige alué santo ánjeli ruwíligo ku ajániligo alué Esusi. Rekó 'la ma'chígime ruwíchi ramueka ta'mé 'la bijchíguru. <sup>24</sup> Jaré alué Esusi nocháilachi nulame simíbale alé ewararígichi napu Esusi gatériga bo'ile, 'lige alueka abiena etele napurigá anile alué umugi, etele tabilé nérekó Esusi alé.

<sup>25</sup> Alígeko alué Esusi anele:

—'La tabilé 'nátanti ju 'emi, tabilé o'má bijchíginti napu anilige alué 'ya mochígime napu ruwime nile napu anele Onorúgame! <sup>26</sup> ¿Tabilecha resí oláwili nílige alué rió Onorúgamete julárigame napu'lige ta'chó moyena ku rewagachi Onorúgame 'yuga asimea?

<sup>27</sup> 'Lige chojkile ruyea suwábaga alué ra'ichali napu uchú alé apélichí Moisesi

osilila 'lige abiena suwábaga napu ruwile napu anele Onorúgame napu ruwime júchigó churigá nochámili nílige alué Esusi.

<sup>28</sup> Napu'lige sebasa pe u'kabi riógachi Emausi rewégichi napu simiba e'yénale alué Kleopasi 'lige alué uché bilé ralámuli, 'lige Esúsika aminabi abichilubi 'we simélti ka 'síá 'sile. <sup>29</sup> 'Lige alué ralámulika bayérole alemi galírale, regá anegá:

—Jena che'lebáwaguru ramué 'yuga ramué galílichí, 'ma 'we alí kame, 'ma amulí chona.

'Liko Esúsika simile alemi galírale.

<sup>30</sup> 'Lige alué oká ralámuli 'yuga asagá alé mésachi, 'wile alué baní napuyeri remé, 'lige Onorúgame cheliera 'yasa, 'lige nasípasi 'yale a'pílipi alué oká ralámuli. <sup>31</sup> Alige alué ralámulika pe yati neraga machile pe Esusi ko alué rió. 'Lige pe yati abajá tané ikiá kíbale. <sup>32</sup> 'Lige regá anile a'bopi ra'ichaga:

—'La bijchiá alué Esusi nílige alué rió, gite 'we a'lá ga kanti ra'ichaniétigó 'naka boichika enegá ruyá alué Onorúgame nila ra'ichali rejcholi. Bochígimi sulachí 'we a'lá ga kéturu akiá alué ra'ichali.

<sup>33</sup> 'Liko tase we'ká 'nátaga, ku yati simíbale alé Rusaleni. 'Lige rewale napuika mochígime alué makué bilé rió nulame Esusi nochálalachi, abiena mochile uché jaré ralámuli Esusi oyérame. <sup>34</sup> 'Lige alué we'ká ralámuli anele alué oká ralámuli:

—'La bijchiá ku ajánale alué Esusi! Aka alué Simoni (Pegro) 'la bijchiá etégoriché.

<sup>35</sup> 'Liko alué oká ralámulika ruwile alé boichimi ma'chínaga ikílugo bilé rió. 'Lige napu'lige alué rió baní 'yasa alué oká ralámuli alé galírale a'lige kulí machíligo Esusi nílige alué rió.

*Jena ruwimela Esusi ma'chínaligo alemi alué we'ká ralámuli jágichi*

<sup>36</sup> Napu'lige bijí ra'icha jágichi alué ra'ichali, 'lige yati neraga ilíbale alé nasipa alué Esusi, 'lige reporale regá anegá:

—Riosi kuira.

<sup>37</sup> Alué ralámulika 'we majale, pe bilé alawá ko lale. <sup>38</sup> Nobi Esúsika anele ko:

—¿Chonigá majawíché 'emi? 'Émika tabilé 'cho bijchígi ne Esusi ku ajániligo. <sup>39</sup> Aka e'nésibá ne'chí sekala, 'lige ne'chí ronola. Chieti ka go. Ne'chí nochásibá, bilé alawaka tabilé sa'pégame ju 'lige tabilé o'chégame napurigá etiá 'emi ne'chí.

<sup>40</sup> 'Lige regá anesa, etérale bo'né sekala 'lige bo'né ronola. <sup>41</sup> 'Lige alué ralámulika etea alué Esusi lale: «¿'Lacha Esusi júpué? Aka Esúsika 'ma me'lílruché. ¿Ku ajánalegerémá?» A'kuérami 'la bijchígale.

'Lige Esúsika rukele:

—¿Ta nerú go 'ame jena?

† 24:19 E'nesi glosario «nasareno».

<sup>42</sup> 'Lige alué ralámulika 'yale pe'tá ro'chí awérigame, <sup>43</sup> 'lige Esúsika yati nareka go'ale alué ralámuli etériga. <sup>44</sup> 'Lige anele:

—'La sébali alarigá ikile napurigá ne ruiyé napu'lige ne biji 'emi 'yuga eyena, 'la alarigá ikimeli nílige ne napurigá aní alué Moisesi nila ra'íchali rejcholi, abiena napurigá aní alué osilí 'we 'ya osirúgime napu osale alué napu ruwime nile napu anélige Onorúgame, 'lige napurigá aní alué apeli Onorúgame Wikárilime uchúkame.

<sup>45</sup> 'Liko Esusi 'ma 'la machírale alué osilí Onorúgame ra'ichálila chujkúgame, <sup>46</sup> regá anegá:

—Alué osilika ruwime ju mukumeli nílige ne Onorúgame julárigame 'lige pe bakía rawé kachi ku ajánamili nílige ne me'lisuga.

<sup>47</sup> 'Lige alué ra'íchili 'we a'lá ra'lanárigame nímala napurigá suwábaga ralámuli 'la machimela alarigá ikimeli nílige ne. Jena Rusaleni o'winámala 'emi, suwábaga ralámuli jena wijchimoba mochígame ruyea ye rejcholi napurigá ku guwana na'támala alué ralámuli chátiri resitiri nóchaga járome.

<sup>48</sup> 'Lige 'emi 'la machigá mochímili júkuru, 'lige 'la ma'chígime ruyémili ju ralámuli ku ajániligo ne. <sup>49</sup> 'Lige ne nejímala alué a'walí napu Onorúgame nejímorile napu alé 'pa rewagachi asagá 'yámorílige, 'lige 'émika jena mochiwa we'ká riógachi Rusaleni napusi 'ma naré 'emi alué a'walí Onorúgame nejílala —alarigá anile Esusi.

*Jena ruwimela Esusi rewagachi simílige*

<sup>50</sup> Alué Esúsika 'yuga simile alué we'ká ralámuli alé na'pami rabó chebilena riógachi Betania anilichi a'mulipi. 'Lige bo'ne sekala o'winiga, iwérali 'yale suwábaga alué ralámuli. <sup>51</sup> 'Lige 'ma iwérali 'yasa, 'ma simile rewagachi. <sup>52</sup> Alué ralámulika 'ma ku e'tegínele Rusaleni 'we ra'sálagá. <sup>53</sup> 'Lige alé wa'lú re'obachi Onorúgame galíachi senibi mochime nile 'we ra'sálagá semáriga ra'icha a'walí nígame ko Onorúgame.

Pe ikipi kápá ye ra'íchali. Wa'lú cheliérabá.

## Regá Anime Osale Juani Ruigá Chu'síligo Esukristo Jena Wijchimoba

*Jena ruwimela chu'síligo Esusi jena wijchimoba*

<sup>1</sup> Ta'chó nerúgichi gawí 'lige rewagá, alué Kristo\* Onorúgame 'yuga bejtégame nile. Nabí asame nile, Onorúgame nile. <sup>2</sup> Alué Kristoka Onorúgame si asale 'ya bajchá rawé napu'lige Onorúgame ta'chó newachi ye gawí 'lige rewagátiri. <sup>3</sup> 'Ya bajchá tabilé tábiri nerule, 'lige napu alué Kristo 'náta,le, yati neraga nerule gawí 'lige rewagá. Suwábaga napu eki nerú jena, alué 'sile newá pe bo'né 'nátaga. <sup>4</sup> Alué Kristoka bo'né alawala 'yale ralámuli jena wijchimoba mochígame napurigá 'la na'támala Onorúgame 'yuga 'lige napurigá tabilé e'yenamala chónagachi. <sup>5</sup> Alué Onorúgame na'táliká ju napurigá ra'ósali 'lige 'ma sébale alé napu mochí alué ralámuli chátiri 'nátili 'nátame, nobi alué chátiri 'nátaliká tabiléchigo neyúramalagó Onorúgame na'tálla 'yuga.

<sup>6</sup> Jena asale bilé rió Juani anilime. Onorúgameka júla,le napurigá benírimala ralámuli. <sup>7</sup> Alué Juani benírale ralámuli churigá ko alué napu rewigáchikana nawale. Alueka pe ruwime nile napurigá alué ralámuli 'la bijchígimale alué ra'íchali alué napu rewigáchika nawale. <sup>8</sup> Tabilé Juani nile napu rewigáchika nawálige. Alueka pe iligá benírale napurigá alué ralámuli 'la bijchígimale alué ra'íchálila alué napu rewigáchika nawale napu ju napurigá ra'ósali. <sup>9</sup> Alué napu rewigáchika nawale, alué rioka 'la bijchígili ra'íchame nile, 'lige alué rioka a'pílipi rió 'yame nile 'nátili napu ju napurigá ra'ósali napurigá a'pílipi rió 'la námamala churigá ko Onorúgame.

<sup>10</sup> Alueka suwábaga tábiri newale napu eki nerú jena wijchimoba nobi ralámulika tabiléchigo machigá etélekó alué rió. <sup>11</sup> Nawale jena wijchimoba napu mochíle alué ralámuli Onorúgamete rojanárigame, nobi alué ralámulika tabilé galeme nile, 'lige tabilé nirame nile. Pe u'kábaka 'la nírale, <sup>12</sup> 'lige suwábaga napu eki 'la nírale, alué napu 'la bijchígale napu Onorúgame anile, alueka 'la lisensia 'yáleru napurigá 'la Onorúgame 'kúchila nímala alué ralámuli. <sup>13</sup> 'Liko alué ralámuli narele Onorúgame Alawala, alekeri Onorúgame 'kúchila ju. Tabilé alué alawá alawega o'chérame ju ralámuli napu'lige o'chérasa, se'nú alawá

nareme ju alué ralámuli 'ma Onorúgame oyérasaká.

<sup>14</sup> Ye rió napu rewagáchika nawale pe jena ochérale 'lige walú rió ochérale napurigá ralámuli, 'lige aba jena ajtíle bejtega ramué 'yuga, ramueka eteru walú a'waliga ochérigo napurigá Onorúgame Inolá. Alueka tabilé tábiri resílále napu Onorúgame nejime ju, pe bi'lepi bo'né nila nílgame, suwábaga napu eki ra'íchale asíriga 'la suwábaga 'la bijchiá nile. <sup>15</sup> Juani 'we alá ruwile churigá nimio alué napu 'pákana rewagáchika nawámili nílgame, regá anile iwégame ra'íchiga:

—Neka 'ma ruyéturu 'emi churigá nimio ye rió. Regá aniéturu ne: «Alué rió napu nawámili ju, alué rioka abéchigo najtégame ju me'tagá ne'chí. Alueka asíriga 'yasi bejtégame nile, napu'lige ne tabilé 'cho ochéra'chi 'ma asale.»

<sup>16</sup> Alué rioka asíriga 'la sébali 'nátame ju. Aminami 'we alá semátiri 'nátili nejime ju. Ramueka asíriga o'maka naretu alué semátiri 'nátili napurigá 'nátame ju alué rió. <sup>17</sup> 'Yako naréturu nulaí Moisesi nejlála. Onorúgame 'yale alué nulaí napurigá Moisésika ramué beníramala. Jípeko abéchigo 'la semátiri 'nátili nejí Esukristo, peba alué bo'né 'smíguru nejkuria rekó se'nú 'nátili 'nátame nírige, 'lige aminami asíriga 'la bijchiá beniri ramué. <sup>18</sup> Ralámuli jemí mochígame ka pecha siné etégó alué Onorúgame, pe iligá machiaa napu ruwile alué rió napu pe napuyépiri rió neraga nawale rewagáchika napu ju Onorúgame Inolá. Jípeko Onorúgame sí ajtí uchéchigo siné.

*Jena ruwimela Juani, napu ralámuli rewarama ba'wichí bokobuga, bilé ra'íchali ruwíligo*

<sup>19</sup> Alué e'wélala jurío Rusaleni anilichi mochígame napu'lige machisá ralámuli rewará ajtigó Juani, a'lige julálrú jaré balé, 'lige jaré ralámuli napu lebita anilime nile, napurigá regá rukémala alué Juani:

—¿Chierí ju mué?

<sup>20</sup> 'Lige Juánika 'we alá ma'chígime ruyele napurigá 'la sébali námamala. Regá nejele: —Tabilé ne ju alué napu rewigáchika juláwili nile ralámuli gu'írímia, alué napu Kristo anilime ju, neka tabilé alué ju.

<sup>21</sup> 'Liko rukéleru Juani alué ralámulite:

—Alígeko, ¿mué ju alué 'ya bejtégame napu Elíasi anilime nílgame, alué napu ruwime nile napu anele Onorúgame?

'Lige Juánika anele:

—Neka tabilé ju.

'Lige ralámuli uchéchigo siné rukele:

—¿Alué napu ruwime nile napu anele Onorúgame, alué napu nawámaré, alué júleke' é mué 'liko? —anile alué ralámuli.

\* 1:1 Yolí ra'íchaga «verbo» o «ra'íchali» anime chujkú Bíbliachi.

'Lige Juánika anele:

—Tabilé.

<sup>22</sup> 'Lige alué ralámulika anele:

—¿Chieri ju mué 'liko? 'La rupóagurú napurigá ramué 'la ma'chígime ruyéwampá alué e'wélala ku sebasa. ¿Chonigó mueka?

<sup>23</sup> 'Lige Juánika anele napu anile alué rió 'ya aítigame Isaíasi anilime, alué napu ruwime nile napu anele Onorúgame.† Anele Juani:

—Neka pe bilé rió e'wele ra'íchame ju, alué napu e'wele ra'íchame ju alé napu pee u'kume ju† regá anigá: «'We alá o'wé gatesi alué bowé napu simírímili ju Wa'lula Onorúgame.» (Yeka anime ju suwábaga ralámuli 'ma tabilé chátiri 'nátili 'nátame nímili ko.)

<sup>24</sup> Uché jaré napu julárigame nile alé Rusalénachika, alueka bariseo nile, <sup>25</sup> 'lige alueka rukele:

—Mué tabilé alué rewagáchika nawágame nísaká, 'lige tabilé Elíasi nísaká mué, 'lige tabilé alué uché bilé rió nísaká mué napu ruwime nile napu anele Onorúgame, 'liko ¿chonigá rewará mué ralámuli?

<sup>26</sup> 'Lige Juánika nejele:

—Neka pe iligá ba'wite rewarama ju. Bilé rió aítí jena a'bé napu mochi 'emi, napu 'emi tabilé machí chieri ko alué rió. <sup>27</sup> Alué napu pe'wé nawámili ju, abé wa'lula ju me'tigá ne'chí. Neka ju napurigá bilé pioni, pe abé u'tabela ju ne.‡

<sup>28</sup> Alakile alé Betania anilichi, alé bajoniga bakochi Jorani anilichi 'omi niraga napu rayénali ma'chínime ju, alé napu asale Juani ralámuli rewará.

*Jena ruwimela Juani etéligo Onorúgame Inolá*

<sup>29</sup> 'Lige melénala rawé be'á be'lí Juánika etele Esusi a'mibeka enágichi. 'Lige Juánika anele ralámuli:

—'We alá e'nesi, jeka enákuru bilé rió napu Onorúgame júlale pe napurigá bilé bo'á neraga napu me'liboli ju napu alué ralámuli buinámili ju chátiri bowechi! <sup>30</sup> ¿Tacha nélé 'emi napu ne ruyánié 'yabé? Regáriga aniéturu ne: «Pe 'we nawámala bilé rió abé rajpé najtékame me'tigá ne'chí. Alueka abéchigo 'yasi bejtégame nile ta'chó ochérichi ne. Alueka nabí bejtégame ju.» <sup>31</sup> Neka tabilé machiéke' alué ko. Neka iligá pe rewaramia nawá ba'wite ralámuli israelita napurigá alué ralámuli israelita 'la machimela churigá ko alué napu nawámili ju rewagáchika.

<sup>32</sup> 'Lige siné rawé Juani anile:

—Neka 'la etéturu Onorúgame Alawala sébachi jena wijchimoba, napurigá bilé baloma neraga, alarigá nawáturu, 'lige alué baloma Esúsichi asibaturu. <sup>33</sup> Neka pecha machié ko chieri rió nimio, napu'lige Onorúgame ne'chí nulé ralámuli rewarániliga ba'wite a'lige ruyé Onorúgame ne'chí regá: «Napu'lige mué etea Onorúgame Alawala 'pa rewigáchika re'kínichi alé alué riochi asibasa, alué rió nímala ralámuli rewarama bo'né Onorúgame Alawálate, ye Onorúgame Alawala 'yámala ralámuli.» <sup>34</sup> 'Lige etéturu ne narechi Onorúgame Alawala, neka 'emi ruyéguru ye rioka Wa'lula Onorúgame Inolá ko.

*Jena ruwimela pe kulí chojkligo Esusi oy-eria jaré ralámuli*

<sup>35</sup> Melénala rawé alué Juani ilile uché jaré oká rió 'yuga bo'né 'yuga járome. <sup>36</sup> 'Lige Juánika uchéchigo siné etele Esusi alemi eyénachi 'lige anile alué Juani:

—'We alá e'nesi, alué ju Onorúgame julálila 'pa rewigáchika pe napurigá bilé bo'á neraga napu me'liboli ju napurigá alué ralámuli buinámala alé tabilé 'la bowechi e'yéname!

<sup>37</sup> 'Liko napu'lige alué oká rió akisá alanichi Juani, yati simíbale Esusi najátamia. <sup>38</sup> 'Liko Esusi, napu'lige gu'lía etele alué oká rió guwánaka e'yénigo, 'lige rukele:

—¿Tachiri 'yaga e'yénili 'emi? —anele.

'Lige alué oká rioka nejele:

—Mué benírame, ¿koche che'lébame ju mué?

<sup>39</sup> 'Liko Esúsika anele:

—Ne'chí 'yuga simasi, a'lige 'la machimela 'emi.

Pe be'á be'lí nile pe'wera rainasa napu'lige nápane Esusi. 'Lige simíbale alué Esusi 'yuga, 'lige 'la machile alemi che'lébame níligo. 'Lige alé mochile alué 'yuga rukachégame rawé.\*

<sup>40</sup> Ye oká rió, Antresi anilime nile bilé, napu Simoni Pegro bonila nile. <sup>41</sup> 'Lige alué Antresi yati simile bo'né ba'chila 'yamia Simoni (Pegro) anilime, 'lige rewisá anele:

—'Ma rewirú alué Mesíasi. (Mesíasi aniáká pe Kristo aniname ju.)†

<sup>42</sup> 'Lige 'mi o'turú Simoni bo'né bonílate Antresi anilime alé napu asale Esusi. 'Lige Esúsika Simoni etesa, regá anele:

—Mueka Simoni anilime ju Juani inolá. A'kinana rawé Sepasi anilime nímala mué. (Sepasi aniáká pe Pegro aniname ju. Alué okánika, Sepasi 'lige Pegro, pe rejte aniname ju.)

† 1:23 E'nesi Isaías 40:3. ‡ 1:23 'We pee u'kume nile, abiena nerúgame nile bajisoli 'lige nerúgame nile gomichi napu ename nile ba'wí, alé rewarama nile Juani. § 1:27 Juánika anile: Neka tabilé ikiáré napurigá gu'fírmala ne alué rió akalá koréala su'pana. \* 1:39 Jaréchigo mayele alí níligo napu'lige simíbilige Esusi 'yuga. † 1:41 E'nesi glosario «Cristo».

*Jena ruwimela Esusi bayéligo alué Belipe  
'lige Natanaeli*

<sup>43</sup> Melénala rawé Esusi simeli nílige Galilea anilichi ejiro, 'lige simile, 'lige alé Galilea anilichi najtépale Belipe anilime rió. 'Lige Esusi anele alué rió:

—Nabá. Ne'chí oyériwa.

<sup>44</sup> Belípeka Betsáira anilichi riógichi bejtégame nile, 'lige alué Antresi 'lige alué Pegro abiena alé Betsaira ejperégame nilechigó.

<sup>45</sup> 'Lige alué Belípeka Natanaeli najtépale, 'lige anele:

—Moisesi osale 'we 'ya bilé rió nawamio, napu Onorúgame julámili nílige, 'lige abiénachigó alarigá osale alué ralámuli napu ruwime nílige napu anele Onorúgame, jipe 'ma eteru. Pe Esusi ju napu Nasareta anilichi riógichi bejtégame ju, napu José inolá nílige.

<sup>46</sup> 'Lige Natanaélíka anele:

—Tabilé 'wesi i'té a'ká ralámuli alé Nasareta anilichi.†

'Lige Belípeka anele:

—Jeka simigá e'newa, 'liko 'la machiboa.

<sup>47</sup> Napu'lige Esusi etesa alué Natanaeli sébachi napu Esusi asale, Esúsika regá anele:

—E'né, aleka ená bilé israelita asíríga 'la, tasiné 'yégiga ra'ichame.

<sup>48</sup> Natanaélíka akele alanichi Esusi 'lige anile:

—¿Churigá machígó mué ne'chí?

'Lige Esúsika nejele:

—Neka alé 'mi chunachi pachárale ilígichi eté ne mué abé bajchabé ta'chó bailichi mué Bilípete.‡

<sup>49</sup> 'Lige Natanaélíka anele:

—Mué benírame, mué ju Onorúgame Inolá. Mué ju Wa'lula ralámuli israelita nuleme.

<sup>50</sup> 'Lige Esúsika nejele:

—Neka 'la machigá ajtigéturu mué bilé chuná ilígichi pachárale ajtigó, alekeri 'la nirá mué ne'chí. Abé i'libeko rawé abéchigo 'la semátiri e'karúgame etémala mué.

<sup>51</sup> 'Lige regá anele uchérápé:

—Neka 'la bijchiá anígurú. Mueka etémili júkuru rewagá ra'pachi, 'lige abiena etémala mué alué santo ánjeli jímochi 'pari rewagachi, 'lige abiena etémala mué alué santo ánjeli e'tígichí napu ajtí ne. Neka bilé rió ju pe napurigá 'emi. Ne ju rewagáchika nawágame napurigá rió neraga.

† 1:46 Alué rió Natanaeli bejtégame nile alé Kaná anilichi we'ká riógichi. Abé nile Nasareta anilichi, 'lige abé wa'lú nile Kaná. Siné kachi ta'mé ganiliga ejperégame nile alué oká pueblo, a'naguka nakoga ejperégame nile. § 1:48 Esúsika

la nígame nile a'walí, rekó mejká ajtigé abirigá machime nile e'karúgame tábiri 'lige ralámullitiri. \* 2:6 Alué sikolichi manígime ba'wí uché bilena ro'ame nile napu wa'lú rejkolichi nile, 'lige alé bajkime nile bilé ralámuli, suwábaga bokuíme nile alé. 'Lige alarigá nokogá anime nile Onorúgame ku 'we a'lá narémala alué ralámuli. Alarigá nokame nile napu'lige sa'wisá bilé naulite nayupasa o bilé mukúgame nochasa, 'lige napu'lige chibi ikisá, 'lige aminami 'we a'lá na'tániliga Onorúgame 'yuga.

## 2

*Jena ruwimela newigime nerúligo alé  
Kaná anilichi*

<sup>1</sup> 'Lige a'kinana bakiá rawé kachi bilé newigime nerule alé we'ká riógichi Kaná anilichi, napu alé wa'lú ejiro bo'ígichi Galilea anilime, 'lige alé asale Esusi eyela.

<sup>2</sup> Esusi 'lige alué Esusi 'yuga járome abiena bayérigame nile alé newigime nerúgichi.

<sup>3</sup> 'Liko alé newigime nerúgichi i'wilí ba'wila rekútame 'ma suwile. 'Lige Esusi eyela anele alué Esusi:

—'Ma suwí i'wilí ba'wila.

<sup>4</sup> 'Lige Esusi nejele:

—¿Mueka, chonigá alaniché? Ta'chó sébago ne nila raweli.

<sup>5</sup> 'Liko, Esusi eyela anele alué we'ká ralámuli nóchame:

—'La e'wawa suwábaga napu nulá alué.

<sup>6</sup> Usani sikolí jale alé, rejtete newárigime sikolí. A'pili sikolí osá naosa makú litro aminá pe u'tá bochime nile.\* <sup>7</sup> 'Lige Esúsika anele alué nóchame ralámuli:

—Bochiasí ba'wí alé sikolichi.

<sup>8</sup> 'Lige o'maka nóchame 'ma bochiasa a'rele, 'liko Esúsika anele:

—Jípeko bilé alabate 'tuka ma'chí pasi pe'tá ba'wí, 'lige o'towa napurigá bajímala ye jena newigime nulame.

'Lige alarigá nokale alué ralámuli nóchame. <sup>9</sup> 'Lige alué newigime nulame bajile alué ba'wí. Napu'lige alué rió bajichi alué ba'wí 'ma i'wilí ba'wila gayénigime nile, 'lige tabilé machile koche yénika ma'chínigame níligo alué i'wilí ba'wila, alué we'ká nóchame ka 'la machile. 'Lige alué newigime repúmeka bayele alué rió napu newímili nílige, <sup>10</sup> 'lige anele:

—Suwábaga ralámuli bajchá ma'chí pame ju i'wilí ba'wila 'we a'lá gayénigime bajchá bajímia. 'Lige napu'lige 'ma suwábaga suwasa a'lige kulí ma'chí pame ju alué abé ta'mé ená kame i'wilí ba'wila. Nobi mueka tabiléchigo alarigá 'smíkó. Mueka nujubá ma'chí pákuru 'we 'la gayénigame i'wilí ba'wila.

<sup>11</sup> Ye nílekuru napu newálige alué Esusi 'we semátiri napu tabilé gayéname ju newá apíepiri rió tabilé gu'irasaká Onorúgame. Alé Kaná anilichi riógichi newale ba'wite alué i'wilí ba'wila rekútame pe bo'né 'nátaga. Alarigá 'la machile ralámuli alué Esusi 'la gayenio 'we semátiri newá. Alué Esusi 'yuga

járome ka asíriga 'la bijchígale alué Esusi níligo napu Onorúgame julámiorile.

<sup>12</sup> 'Lige pe abé i'libeko simíbale alé wa'lú gomichitu 'tumi neraga, Kapernaumi anilichi we'ká riógichi simíbale, alé suwékimi napu ilí alué wa'lú ba'wí Galilea anilime. 'Lige simile Esusi alué bo'né eyela 'yuga 'lige bo'né nasípasi bonila 'yuga, 'lige bo'né nasípasi wa'la 'yuga, 'lige alué Esusi oyéramechigó, 'lige alé Kapernaumi anilichi mochile pe u'kabi rawé.

*Jena ruwimela Esusi simligo alé wa'lú re'obachi*

<sup>13</sup> Napu 'lige 'ma amulí sébachi wa'lú piesta Páskua anilime napu ralámuli jurío newame ju nélegá napu 'lige alué Onorúgame ánjelila tabilé me'áligo alué abé bajchá o'chérigame u'kuchítiri israelita alé Ejipto anilichi, 'lige Esusi moyénale Rusaleni anilichi. <sup>14</sup> 'Lige alé wa'lú re'obá ra'pichílachi rewale jaré ralámuli o'toló ralineá mochíggame, 'lige bo'átiri, 'lige baloma ralineá mochíggame. Alué ajágame ralisá, Onorúgame kógilime nile. 'Lige abiena etele jaré ralámuli enomí nakulíá mochíggame, alué romano enomíla 'lige jurío enomíla. <sup>15</sup> 'Liko Esusi 'ma mabule suwábaga ralámuli napu ekí alé mochíggame alé re'obá ra'pichílachi, 'lige alué bo'átiri, 'lige alué o'tolótiri. Esusi jaré iwia napubusa 'lige mo'yesa, aluete wejpísiga 'mélele alué ajággame alé uchúkame. 'Lige alué we'ká mesa napu alé jale enomí mochíggame 'ma na'mínale, 'lige alué enomíka 'ma rajsule ra'laga alemi. <sup>16</sup> 'Lige Esusi e'wele ra'íchaga anele alué baloma ralineme:

—'Ma buinasi ye baloma jena jággame. Ye galika ne o'nola galila júkuru. Ye gali pecha alekeri newárigime júkó napurigá ralinewa jena. ¡'Ma a'rélime júkuru yeti nocha!

<sup>17</sup> 'Alige alué Esusi 'yuga járome nélále a'kinana ku ajánasa Esusi alué ra'íchili napu uchule 'ya osirúggame Onorúgame ra'íchálila. Regá anime ra'íchili:

—Neka asíriga galé ye galí ne o'nola galila 'lige 'we a'lá repú ne, alekeri me'liboli júkuru ne.

<sup>18</sup> 'Liko napu 'lige etea 'ma suwábaga ralámuli mabuchi, alué ralámuli juríoka anile:

—Mué a'lá nulérigime nísaká Onorúgamete napurigá ala'símala, newáwagó 'liko bo'né 'nátaga 'we semátiri tábiri napu tabilé gayéname ju ralámuli newá napurigá ramué machibómpá 'la Onorúgamete 'yárigame ko mué alieri a'wali.

<sup>19</sup> 'Lige Esúsika nejele:

—'Ma na'minasi ye re'obá ne ku newámampá, pe bakiá rawé kachi 'ma gainámala ne newá.

<sup>20</sup> 'Lige anile alué ralámuli jurío:

—Oká liá aminá usani bamí nochárigame ju ye re'obá newá, mueka pe bakiá rawé kachi 'ma gayénimorí. ¿Churigá 'la gayénimi oláché mué aliena yati pe bakiá rawé kachi?

<sup>21</sup> Tabilé námale alué ralámuli jurío Esusi tabilé alué re'obá olagá aníligo napu napuíme nílige alué ralámuli jurío, pe bo'nepi olagá anile, napu 'lige me'lisuga alué Esusi ku ajánamio pe bakiá rawé kachi.

<sup>22</sup> 'Liko a'kinana napu 'lige me'lisuga 'lige uchéchigo siné ku ajánasa alué Esusi, alué Esusi 'yuga járome nélále napu anílige alué Esusi, a'liko abéchigo 'la bijchígale napurigá anile Onorúgame nila osilí 'ya nerúgame,† 'lige alué Esusi ra'íchálatiri.

*Jena ruwimela Esusi 'la machime níligo chieti ko alué ralámuli*

<sup>23</sup> Napu 'lige Rusaleni anilichi asagá piesta Páskua nerúgichi, asíriga we'ká ralámuli etele alué Esusi 'we semá 'sichi pe bo'né 'nátaga, 'lige asíriga 'la galegá etéleru Esusi alué ralámulite 'lige aminamí asíriga 'la machile Onorúgamete julárigame ko. <sup>24</sup> Esúsika tabiléchigo 'me we'ká ra'íchale ko alué ralámuli 'yuga. Tabilé 'la ruwile chieri níligo alué bo'né. Bo'neka 'we a'lá machile churigá ko ralámuli, aliena tabilé 'la 'nátame ko. <sup>25</sup> Esúsika asíriga 'la machile alieri ko alué ralámuli na'tálila, tabilé ruilime najkile Esusi alué uché jaré ralámulite, pe bo'neka 'we a'lá machile.

### 3

*Jena ruwimela Nikoremio Esusi 'yuga ra'íchaligo*

<sup>1</sup> Bilé rió bariseo asale Nikoremio anilime, alué rioka wa'lula nile ralámuli jurío nuleme. <sup>2</sup> Chíboka simile bilé rukó napu asale Esusi, 'lige anele:

—Mué benírame, 'we a'lá machiaa ramué Onorúgamete nulérigime ko mué napurigá beníramala. Pe Onorúgame A'walílate 'la gainawa alué semati e'karúgame napu newá mué pe bo'né 'nátaga.

<sup>3</sup> 'Liko Esusi anele:

—Neka 'la bijchíá ruwígurú, bilé rió tabilé osá neraga ochérasaká 'liko tabilé lisen-sia 'yámala alué rió napurigá Onorúgame nulémala. Onorúgame tabilé siné 'yámala a'wali.

<sup>4</sup> 'Lige Nikorémioka rukele:

—¿Churigá 'la uchéchigo siné ochérimalewé bilé rió 'ma we'ká bamíggame nisa? ¿Ku eyela rojpálachi bajkimela napurigá uchéchigo siné ochéramala?

<sup>5</sup> 'Lige Esúsika nejele:

—Neka 'la bijchíá anígurú. Bilé rió napu 'lige ochérasa, alawéggame ju nobi rokáré ko alué uché bilé alawá 'la bi'wíggame,

† 2:22 E'nese Salmos 16:10.



alué Onorúgame Alawala. Ta naresi ka Onorúgame Alawala, tabilé lisenia 'yámala napurigá Onorúgamete nulewa. <sup>6</sup> Bilé rioka alawá nareme ju napu'lige ochérasa bo'né eyélachi, nobi a'kinana napu'lige 'la elisa Onorúgame napurigá nulewa Onorúgamete, 'liko Onorúgameka bo'né Alawala 'yámili júkuru. Yeka uchéchigo siné ochérimime niraga júkuru. <sup>7</sup> 'Liko tase we'ká na'tawa regá anichi ne: «Osá niraga ochérimili júkuru suwábaga ralámuli tabilé injiérnochi siminálisaká.» <sup>8</sup> Ekaka panápuri oyame júkuru. T'sínimi akirume júkuru eká nobi tabiléchigo machirume júkó aleka enegó nibilé etérume júchigó alemi 'mao. Alueka tabilé etérume ju. Alarigá júkuru Onorúgame Alawálachigó, tabilé etérume ju, panápuri eyéname ju, 'lige tabilé machiaa chieri ralámulichi bajkimeli ko, nobi 'láchigo machirume júkó napu'lige bilé ralámuli 'la naréligo alué Onorúgame Alawala, 'ma ku a'kabámana 'nátame ju.

<sup>9</sup> 'Liko Nikorémioka uchéchigo rukele:  
—¿Churigá 'la alarigá nímawé ye?  
¿Churigá 'la gainámalawé bilé rió Onorúgame Alawala narea?

<sup>10</sup> 'Lige Esúsika nejele:  
—Mué Nikoremio, mueka benírame júkuru alué ralámuli israelita 'lige tabilé námaguru mué ye. ¿Chonigá? <sup>11</sup> Neka 'la bijchiá aní: Ramué napu alawégame niru Onorúgame Alawala napu ekí ehebénigame niru 'lige napu ekí eteru pe lakí ruyáguru, nobi mueka tabiléchigo bijchigó ye ramué ra'ichália. <sup>12</sup> Mueka tabilé bijchigi ye ra'ichili napu ne ruwí, ye ra'ichilika ruyame júkuru alakió jena wijchimoba. 'Liko ne ruisáká alakió 'pa rewagachi, a'liko abéchigo pecha námamalogó mué.

<sup>13</sup> , Tabilé 'wesi moyénale rewagachi, pe aluecho napu 'pa rewagáchika nawale napurigá rió neraga. <sup>14</sup> Alarigá napu 'sile Moisesi alé napu tabilé 'me u'kume nile, Moisesi ujchale bilé sinowí jíerote newárigime bilena iguchi 'lige o'weti elale napurigá tabilé suwimela ralámuli. Alarigá oláwili ju alué rió napu nawale 'pa rewagáchika, bilena gulusichi ujcháwili ju.\* <sup>15</sup> Al'iko suwábaga napu ekí nírime ju napurigá 'sime ju alué rió (napu ju ne Esusi) ralámuli gu'iriga, alué ralámulika 'la rewagachi mochímili júkuru napu'lige suwisá.

<sup>16</sup> › Onorúgameka 'we galele ralámuli, alekeri bo'né bi'lepi Inolá júlale napurigá alué 'símala ralámuli gu'iria. Suwábaga ralámuli napu ekí 'la Onorúgame Inolá oyérame ju, alueka tabilé simámili júkuru injiérnochi. Alueka 'pa rewagachi simámili júkuru ejperélimia nabí. <sup>17</sup> Onorúgameka pecha júlalekó bo'né Inolá napurigá 'légana

injiérnochi júlámala ralámuli. Alueka júlale napurigá buinámala ralámuli chátiri bowechi.

<sup>18</sup> › Bilé rió 'la narésaká alué Onorúgame Inolá na'tálila, 'liko Onorúgameka tabilé siné saíla neraga etémala alué rió. Bilé rió tabilé bijchigime ka napurigá 'sile alué Onorúgame Inolá, alueka asíriga walú gastigo narémala napugiti pecha bijchigime kame churigá nile alué bi'lepi rió Onorúgame Inolá. <sup>19</sup> Alué Onorúgame Inolá nawale napurigá ra'ósili jena gawichí, nobi ralámulika abéchigo niráleko 'lina alué chónali napu ju alué 'nátali napu pe Remónisi nejí. Alué ralámulika gastigáriwili ju. <sup>20</sup> Suwábaga napu ekí tabilé 'la nírime ju, tabilé narénilime ju alué semátiri a'walí Onorúgame nila. Tabilé najki napurigá Onorúgamete etewa 'we cha nokame ko a'boi, napugiti pecha najkiá napurigá Onorúgamete gastigáriwa. <sup>21</sup> Bilé rió 'la sébili olame napurigá Onorúgame najki, alué rioka tabilé majame ju Onorúgamete etelia, alué rioka najki napurigá ralámuli 'la machimela 'la Onorúgame na'tálila 'nátame ko. Alué rioka tabilé chónigichi eyéname ju. Alueka 'la ra'ósigichi eyéname ju, tabilé chonárale.

*Jena ruwimela Juani ruwíligo pe nekúrame ko*

<sup>22</sup> A'kinana Esusi simile bo'né 'yuga járome si alé Rusaleni mochiga 'lige 'letu gomichi simúbale. 'Lige alé gomichi mochiga rewarale ralámuli. <sup>23-24</sup> 'Lige abiena eyénale alé a'bemi alué Juani, alué Juani ta'chó bajchalía galírale. Enoni anilichi ajtile, a'bé alé Salima anilichi. 'Lige walú ba'wí iligame nile alé. 'Lige ralámulika simúbale alé Juani ajtígichi, 'lige Juánika rewarale ba'ichí bokobuga suwábaga ralámuli alé jsime.

<sup>25</sup> 'Lige boichí anile na'áwaka jaré alué Juani 'yuga járome bilé ralámuli jurío 'yuga machináliga tachiri ruwime ko napu'lige bilé rió ba'wichí bokobuga rewaralia. <sup>26</sup> 'Lige Juani 'yuga e'yénameka simúbale Juani ajtígichi, 'lige anele:

—Mué benírame, alué rió napu mué si ajtigáriké 'yabé Jorani anilichi bakochi na'lebo 'nálige bajoniga, alué napu mué ra'ichia anié, ralámuli rewará ajtí, 'lige suwábaga ralámuli simiba napu alué rió ajtí.

<sup>27</sup> 'Lige Juánika anele:

—Bilé rió pecha nígame júkó alué nóchali Onorúgame tabilé 'yásaká alué rió napurigá alué rió ralámuli rewarámala. <sup>28</sup> 'Emi a'boi 'la néláwa napu ne anié: «Neka tabilé Kristo ju napu nawá 'pa rewagáchika, neka pe bajhabemi enágame júkuru gatesia ralámuli 'yuga.» <sup>29</sup> Ralámulika alué si simíbaguru napugiti alué kame walúla abé najtégame

\* 3:14 E'nesi Números 21:4-9.

me'tigá ne'chí. Neka pe nejkúrame júkuru. Neka pe napurigá bilé amígola ju napu gu'írime ju napu'lige newichi bilé rió. 'Lige napu'lige aké ne alué rió ra'íchachi 'we ra'sálame ju ne, 'lige jípeko 'we ganílga ajtí ne. <sup>30</sup> Alué rioka abé najtékame nímili júkuru, 'lige neka 'ma ta'mé najtékame nímili júkuru.

*Jena ruwimela Onorúgame 'sílgo Esusi jula 'pa rewagáchika*

<sup>31</sup> Abiena anile Juani:

—Alué 'pa rewagáchika nawágame, alué ju suwábaga ralámuli nuleme. Neka pe jena wijchímoba bejtégame ju, neka pe napu ekí bení jena wijchímoba pe lakí ra'íchame ju ne. Alué napu rewagáchika nawágame ju, alué júkuru suwábaga benégame 'lige suwábaga nulame. <sup>32</sup> Alueka ruwime júkuru napu etele bo'né 'lige napu akele alé 'pa rewagachi, nobi we'ká ralámuli jena wijchímoba mochíggame tabilé bijchígigó.

<sup>33</sup> Ralámuli 'la bijchígime ka alué ra'íchali, 'we a'lá machimela 'la bijchígili ra'íchame ko Onorúgame. <sup>34</sup> Alué napu Onorúgame júlale 'pa rewagáchika, alueka ra'íchame ju napu anéliru Onorúgamete. Onorúgameka asírige 'la ra'sáligá 'yale alawá bo'né alawala, napurigá alué rió 'la gainámala Onorúgame ra'íchálila ra'icha. Alué rioka tabilé resí lame ju napugiti Onorúgame 'yame kame suwábaga. <sup>35</sup> Alué O'nó Onorúgameka

'we galé bo'né Inolá, 'lige a'walí 'yale napurigá suwábaga ralámuli nulémala. <sup>36</sup> Bilé rió 'la oyérasaká Onorúgame Inolá, alueka asírige 'la semáriga na'támala jena wijchímoba asagá, 'lige aminami nabí bejtéga asimela Onorúgame 'yuga 'pa rewagachi napu'lige mukusá. Bilé rió sairúgame nísaká Onorúgame Inolá 'yuga, alueka tajsíné bejtélamala Onorúgame 'yuga, Onorúgameka pe aminacho resítiri raweli 'ya asimela.

## 4

*Jena ruwimela Esusi ra'ichaligo bilé mukí 'yuga Samaria bejtéggame*

<sup>1</sup> Alué we'ká bariseo machile abéchigo we'ká ralámuli oyérame ko alué Esusi me'tagá alué Juani, 'lige aminami abé we'ká rewarao ralámuli alué Esusi. <sup>2</sup> (Tabiléchigo Esusi nilikó napu rewarale, pe alué bo'né oyérame nokale rewará.) <sup>3</sup> 'Lige alué Esusi 'we a'lá machile alieti 'nata mochigo alué bariseo. Tabilé najkile napurigá nakó nerúmala alué bariseo 'yuga alekeri simile alé Jurea anilichi asagá. Simile uché bilena alé 'mimi niraga napu bo'í alué ejiro Galilea anilichi.

<sup>4-5</sup> Simíroma olale napu bo'í Samaria rewéggame ejiro, 'lige sébale alé napu nile ejiro Samaria Sikari anilichi we'ká riógachi.

Abé nile alé we'é bo'ígichi napu Akobo 'yálige alué bo'né inolá José anilime.\* <sup>6</sup> 'Lige alé ilile bilé poso 'we re'lé jótigime napu alué Akobo jólige 'we 'ya. 'Lige alué Esusi 'we risibaka sébale alé, 'lige alé a'bé asíbale alé jótigichi, rawilí nile. <sup>7</sup> 'Lige alé sébale bilé mukí Samaria anilichi bejtéggame, alué mukika sébale ba'wí 'tumia. 'Lige Esusi anele alué mukí:

—To pe'tá ba'wí, 'we balama ne.

<sup>8</sup> Alué Esusi oyérameka alé we'ká riógachi simíbalige go'ame ralime, 'lige ta'chó sébale kuka alué go'ame pabega.

<sup>9</sup> 'Lige alué mukí Samaria bejtéggame ka anele:

—Mueka ralámuli jurío ju. Ralámuli Samaria ejperéggame ka tabilé 'yuga ra'íchame ju alué ralámuli jurío 'yuga. ¿Mueka chonigá tánibaché ne'chí ba'wí bajimia? Neka Samaria bejtéggame mukí júkuru.

<sup>10</sup> Liko nejele Esusi:

—Mué 'la machisáká alieti nejime ko Onorúgame, 'lige mué 'la machisáká chieri ko napu aní: «To pe'tá ba'wí», 'liko támili júkuru mué 'lige neka nejímili júkuru alué ba'wí bajichi ma'chíname napu ename ju. (Alueka ruwime kéré Onorúgame a'walila ko.)

<sup>11</sup> 'Lige alué mukika tabilé námale 'lige anile:

—Mué Wa'lula, mueka tabilé ni bilé sikolí, asírige re'lé rojkógichi ilí ba'wí. 'Liko ¿koche ni mué alué ba'wí napu ená ilí? <sup>12</sup> ¿Mueka ju abé najtékame me'tagá alué Akobo napu ramué rijimála nílige, napu 'we 'ya bejtéggame nílige? Alué 'sílekuru ye rekolí newá 'lige aminami jena bajílekuru ba'wí alué rió, 'lige aminami alué 'kúchilatiri abiena bajile, 'lige alué ajággame alué rió bujkula abiena jena bajile ba'wí.

<sup>13</sup> 'Lige Esusi nejele:

—Suwábaga napu ekí bajime ba'wí jena ilígame uchéchigo siné balámumala. <sup>14</sup> Alué ba'wí bajísaká napu ne nejímili ju tajsíné balámumala 'emi. Alué ba'wí napu ne nejímili ju, alué ba'wí tajsíné suwimeli ju, nabí ená ilimela. Alué ba'wí bajísaká 'la nabí ejperéga mochiwa Onorúgame 'yuga.

<sup>15</sup> Liko anele alué mukí:

—Mué Wa'lula, ne'chí 'ya alué ba'wí napurigá ne tajsíné rawé balámaka einámala, 'lige aminami napurigá tajsíné 'túmimpá ne alué ba'wí jena ilígame.

<sup>16</sup> 'Lige Esusi anele alué mukí:

—Jeka bayéwagó alué rió mué gunala, 'lige muéchigó uchéchigo siné nawawa alué rió 'yuga.

<sup>17</sup> 'Lige anile alué mukí:

—Neka tabiléchigo 'yúgame júkó rió.

'Lige Esúsika anele:

\* 4:4-5 E'nesi Génesis 33:19 'lige Josué 24:32.

—Mueka 'la bijchiá aní tabilé 'yúgame kori mué rió. <sup>18</sup> Mué mukika maligi rió 'yúgame nílekuru, 'lige alué napu mué 'yuga ajtí jipe, tabilé 'la mué 'yula ju.

<sup>19</sup> 'Lige anile alué mukí:

—Mué Wa'lula, mué ra'íchanti ju napurigá bilé rió napu ruwime ju napu ané Onorúgame. <sup>20</sup> Ramué samaritano nabí jena rabó newalime kéturu alué go'ame Onorúgame kógimia, nobi 'emi juríoka anígó pe alé Rusalénicho nímili ko alué go'ame kógilime.

<sup>21</sup> 'Lige Esúsika anele:

—Mué mukí, 'la bijchígiwa ye: bilé rawé sebámala napu tabilé kógiwa go'ame O'nó Onorúgame nibilé jena nibilé alé Rusaleni. <sup>22</sup> 'Émika piesta newame júkuru nobi tabiléchigo machime júkó alué ko Onorúgame. Ramué juríoka asíriga 'la machiaa chonigá newilime ka piesta. Alué rió napu ralámuli a'kabámama jawámili ju, alué rioka pe jurío rió nímili ju. Alekeri newalime júkuru piesta ramué jena wijchimoba. <sup>23</sup> Sébakuru raweli napurigá Onorúgame Alawala ralámuli gu'irimala napurigá 'la Onorúgame 'yuga 'nátaga mochímala nabí rawé panápuri mochiga. Alué wa'lú O'nó Onorúgameka 'yaga eyena chieri alá e'wame ko alué Onorúgame ra'ichálila. <sup>24</sup> Onorúgame pe alawá ju. Alué júkuru ralámuli alawá 'yame. Alekeri 'we alá bi'lepi 'nátaga mochílime júkuru Onorúgame Alawala 'yuga, 'lige 'la e'wiwa Onorúgame Alawala.

<sup>25</sup> 'Lige alué muki anele:

—Neka 'la machí nawamio bilé rió napurigá ramué buinámala alé chátiri bowechi, alué napu Kristo (Mesías) anilime ju. Napu'lige alué sebasa, suwábaga tábiri beníramala ramué.

<sup>26</sup> 'Lige Esusi anele:

—Alué napu mué 'yuga ra'icha ilí jipe pe Kristo ju. Ne júkuru alué.

<sup>27</sup> 'Alige ra'icha jágichi, sébale alué ralámuli Esusi oyérame, 'lige alué oyérame pe i'kílí jale e'negá 'nata: «¿Chonigá 'yuga ra'icha ilí paché alué mukí Samaria bejtégame 'yuga?» Tabiléchigo che aníleko nibilé tábiri rukélechigó.† <sup>28</sup> 'Lige alué mukí 'ma simile, abajá a'resa sikolí, 'lige simile alué mukí 'mi we'ká riógachi, 'lige anele ralámuli alé ejperégame:

<sup>29</sup> —'Mi ajtíte'é bilé rió, neka tajsiné eteme kéte'é alué rió 'yako, 'lige suwábaga ruwíguru, 'lige aminami abiena machí alieri nóchaga oyame ko ne. Nabá e'newa alé 'mi. Kristo kéréma siné kachi alué.

<sup>30</sup> 'Lige simíbale alué ralámuli alué Esusi e'nemía. <sup>31</sup> 'Lige ta'chó sébachi alué ralámuli

we'ká riógichi mochígame, alué ralámuli Esusi oyérame ka 'we go'núlale Esusi alué go'ame napu ralálige, anele:

—Mué Benírame, yati go'á.

<sup>32</sup> 'Lige alueka anile:

—Neka nígame ju go'ame napurigá go'mela. 'Émika tabilé machí chieti ka alué go'ame.

<sup>33</sup> 'Lige alué oyérameka tabilé námale napu anile alué Esusi, 'lige anile alué oyérame a'bopi ra'íchaga:

—¿Siné kachi pe jaré ralámuli a'pilegeréko go'ame?

<sup>34</sup> 'Lige alué Esusi abé 'la ruyele alué oyérame, regá anele:

—Neka tabilé chéla ye go'ame. Neka 'we a'lá sébali olánili alué nóchali napu 'yálige Onorúgame ne'chí.

'Lige aminami anele:

<sup>35</sup> —Tabilé aniboa: «Naó mechá rokaré napurigá 'wiwa go'ame.» Neka aníguru: «'We 'la e'newa 'la 'nátaga alué echerúgime. 'Ma 'la níté 'wília.» Ralámuli we'ká mochíkuru 'we resílame, 'lige 'we alá listo mochiwa 'emi napurigá nejkúrimala alué ralámuli. Pecha builime júkó. <sup>36</sup> Nóchame ka yati najtétilime ju echerúgime 'wisa. (Echerúgime aniname kéré napurigá 'la benimela ralámuli Onorúgame ra'ichálila, alué ralámuli 'we a'lá ejperélamala nabí Onorúgame 'yuga 'pa rewagachi.) Alué echáme asíriga ganíliga mochí napu'lige 'we we'lé nerúgichi echerúgime, 'lige abienachigó alué 'wime abiena asíriga 'la ganíliga mochí. <sup>37</sup> Bilé ra'ichali nerú regá anime: «Bilé rió echame júkuru 'lige uché bilé napabume júkuru napu'lige 'ma rakesa alué echerúgime.» Ye ra'ichalika asíriga 'la bijchiá ju. <sup>38</sup> 'Émika pecha bajchá benírele ko ye ra'ichali, uché jaré asíriga a'wágame nóchale ye ra'ichali beníriga. Alekeri napu'lige benírame ju 'emi, we'ká ralámuli 'we a'lá oyérame ju alué ra'ichali. 'Émika 'wime júkuru napu uché jaré echale.

<sup>39</sup> Napu'lige alué ralámuli Samaria ejperégame ta'chó simíbachi alé we'ká riógichi mochiga, alué mukí anele alué ralámuli Esusi 'we a'lá ruwíguru alieri nóchaga oyame níligo alué mukí abé 'ya bajchabé rawé. Esúsika rekó tabilé etee abiena machióríle. Liko alué ralámuli yeti ra'ichale akisá, asíriga 'la bijchígale alué rioka Onorúgamete julárigame níligo 'pa rewígachika. <sup>40</sup> Liko alué Samaria ejperégame sebasa alé napu asale Esusi, 'lige 'we owile napurigá alé asimela Esusi alué ralámuli 'yuga. Liko Esusi oká rawé asale alé. <sup>41</sup> Liko alué uché jaré ralámuli Samaria ejperégame napu'lige alué ra'ichili gepusa

† 4:27 Alué ralámuli jurío tabilé siné ra'ichame nile alué Samaria ejperégame 'yuga, alekeri 'nátale «¿Chonigá ra'icha ilíché alué Esusi alué mukí Samaria bejtégame 'yuga?»

alué Esusi ra'ichálila, asíruga a'lá bijchígale alué we'ká ralámuli Esusi Onorúgamete julárigame níligo. <sup>42</sup> 'Lige alué ralámuli anele alué mukí:

—Bajchá 'la bijchíguru napu mué ruyánié alanió ye rió. Jípeko ramué a'boi akiáguru alué ra'ichálila, alekeri 'la machiáguru ye rioka 'we a'lá bijchiá alué ko napu suwábaga ralámuli buyáname ju alé resítiri bowechi.

*Jena ruwimela Esusi sa'wáligo bilé towi nayume*

<sup>43</sup> Anawínala Esusi simile alé asisá, 'mimi simile uché bilena ejiro Galilea anilichi. <sup>44-45</sup> Alé napu Galilea anilime ejiro bo'ígichika, alé wa'lú ochérale alué Esusi. (Esúsika anilige: «Ralámuli tabilé nirame ju bilé rió napu ruwime ju napu ané Onorúgame bo'né bejtélachi asagá.») Napu'lige Esusi sébachi alé Galilea, alué ralámuli alé mochígame 'we a'lá ganliga repórale, a'boika 'la etéligame napu 'sile alé Rusaleni napu'lige nerule alué piesta Páskua anilime. Pe bo'né 'nátaga we'ká ralámuli sa'wale.

<sup>46</sup> 'Liko alué Esusi uchéchigo siné simile alé Kaná anilichi we'ká riógichi. Alé we'ká riógichi nile napu alué Esusi pe bo'né na'tálate newale i'wili ba'wila rekútame pe ba'wite. 'Lige alé sébale bilé wa'lula romano Esusi bayérimia alé Kapernaumi anilichi napurigá sa'wámala alué rió inolá, 'we nayume nile alué rió inolá. <sup>47</sup> Alé Kapernaumi asale alué wa'lula romano, 'lige napu'lige akisáká Kaná sébaligo Esusi, 'lige alué rioka simile alé Kaná anilichi we'ká riógichi owimia Esusi napurigá simela alué rió inolá 'yomia, 'ma amulí mukíá bo'ile alué rió inolá. <sup>48</sup> 'Lige Esusi anele alué rió:

—Émika ta etéaká ne sa'wá bilé ralámuli pe bo'né a'walálate, tabilé bijchigi ne ra'ichálila.

<sup>49</sup> 'Lige alué wa'lula románoka anele:

—Mué Wa'lula, nabá yati ta'chó mukuchi ne inolá.

<sup>50</sup> 'Lige Esusi anele:

—'Ma ku galírale simiboa. 'La ku sa'wimela mué inolá.

Alué rioka 'we a'lá bijchígile napu anile alué Esusi, 'lige yati simile. <sup>51</sup> Napu'lige ta'chó sébachi galírale, alué bo'né piónila najtépale 'lige ruwile 'ma a'lá sa'wigá ajtjgo alué nayume.

<sup>52</sup> Napu'lige rukechi chiéniko sa'wíligo, anéleru:

—Rapako rawilí ajchábaturo iná.

<sup>53</sup> 'Liko alué rió nayume o'nola 'we a'lá machile pe a'lige yati sa'wíligo napu'lige Esusi ruwilige sa'wiméráo alué nayume napu'lige regá anélige: «'La ku sa'wimela mué inolá.» 'Liko alué u'tátiri o'nola 'we a'lá bijchígile Esusi ra'ichálila. Suwábaga alué ralámuli napu ejerégame nile alé napu alué

nayume ajtime nile, suwábaga oyérale alué Esusi.

<sup>54</sup> Pe kulí nawá Esusi alé Kaná Juréaka simigá, i'wili ba'wila rekútume newale ba'wite pe bo'né 'nátaga. Uché osá nawagá, sa'wale alué towi nayume pe bo'né a'walálate bo'né 'nátaga.

## 5

*Jena ruwimela Esusi sa'wáligo bilé sujírige a'bé napu wa'lú ba'wí maní*

<sup>1</sup> Abé a'kinana rawé, uchéchigo siné simile Esusi alé Rusaleni piesta nerúgichi napu newame nile ralámuli jurío. <sup>2</sup> Tegótigame nile 'we re'pá ilígame tegoli noligá alé we'ká riógichi Rusaleni anilichi. We'kaná yógame nile alué tegoli napurigá mo'imela ralámuli 'lige ajágamechigó. Bilena yochi Bo'á Simárome anilime nile, 'lige a'bé alé yochi wa'lú ba'wí manígime nile napu Betsata anilime nile. Betsátaka bilé ra'ichali ju ebreo ra'ichálila (o arameo ra'ichálila). Maligi ulumí rojsate netétigime jale a'bé alé ba'wí manígichi. <sup>3</sup> Alué ulumí jágichi we'ká nayume ralámuli bi'tile 'we resítiri. Jaré tabilé ma'chilime nile, jaré tabilé gayéname o'weti jasia, tabilé gayéname simiba, napurigá sujírige, 'lige jaré ta'mé nokame bochígimi sa'pálachi. <sup>4</sup> Pe i'sínimi nokame nile alué ba'wí, pe napu'lige sebase bilé ánjeli 'pa rewagáchika. 'Lige apiépiri ralámuli bajchá bajkisá alégana ba'wichíkana napu'lige noká ilígichi alué ba'wí, yati sa'wime nile alué ralámuli apiépiri nawilí. <sup>5</sup> Bo'ile alé bilé rió napu 'ma baisá makué na osá naó bamí nayume nile. <sup>6</sup> Esúsika etele i'kilí bo'ígichi alué nayume 'lige machile we'ká bamíó alué nayua. 'Lige Esusi rukele:

—¿Sa'winale mué?

<sup>7</sup> 'Lige alué nayúmeka nejele:

—Mué Wa'lula, alué ba'wí nokachi tabilé 'wesi i'té napurigá ne'chí o'tomela alé ba'ichí. Neka tabilé gayena simiá 'lige senibí neyuro uché jaré.

<sup>8</sup> Esúsika anele:

—O'weti ilisi, ro'miná mué gemala, 'lige simigá.

<sup>9</sup> Pe abiéniko 'ma sa'wile alué nayume. 'Lige 'ma ro'minasa bo'né gemala 'lige simile.

Alué rawé napu alué rió 'yóliru bilé rawé sawalachi nile napu alué ralámuli jurío resíbame nile. <sup>10</sup> 'Liko alué e'wélala ralámuli jurío anele alué 'yórigame olagá:

<sup>11</sup> —Jipe raweka wa'lú resibulichi júkuru 'lige bo'né gemala o'tuáká wa'lú resibulichi rawé tabilé nerálime niraga júkuru ramué nila nulalí.

'Lige alué rioka nejele:

—Alué rió napu ne'chí sa'wale ané ne'chí: «Ro'miná mué gemala 'lige simigá.»

<sup>12</sup> Alige rukéleru alué rió:

—¿Chieri júkó alué rió napu anile: «Ro'miná mué gemala 'lige simigá»? <sup>13</sup> Alué rió 'yórigame ka tabilé machile chieri níligo alué rió. Abiéniko tané ikíligame Esúsika, cha we'ká rióligame alé. <sup>14</sup> Abé a'kinana Esusi etele alué rió alé ra'pichí walú re'obachi, 'lige anele:

—'La machíguru mué, 'ma 'la sa'wígame rió júkuru mué. Ya 'ma pe alé si a'rewa cha 'síá. Tabilé a'resa ka mué alué chátiri 'nátili, a'liko abéchigo cha ikimela mué.

<sup>15</sup> 'Liko simile alué rió 'lige ruyele alué ralámuli jurío e'wélala Esusi 'siligo alué rió 'yóa. <sup>16</sup> 'Liko alué ralámuli jurío e'wélala Esusi najátale chibi olániliga, napugiti 'yóligame alué rawé resíbulichi. <sup>17</sup> 'Liko Esusi anele alué e'wélala jurío:

—Ne O'nola Onorúgame senibí nocha ajtí rekó resíbulichi rawé kachi, néchigó abiena alarigá nocha.

<sup>18</sup> 'Liko alué e'wélala juríoka me'linálile Esusi. 'We ayole alué nayume sa'warígoriká Esusi alué rawé resíbulichi. 'Lige 'we ayoa mochílechigó napugiti anéligame Onorúgame bo'né O'nola ko. Yeka anime nile a'chigóriga kóríle napurigá Onorúgame.

<sup>19</sup> Alige Esusi anele alué ralámuli jurío e'wélala:

—'La bijchiá ju napu ne ruwimela jena. Alué napu ju Onorúgame Inolá (napu ne ju) pecha bo'né benile ko 'yoga. Alué rioka pe a'chigóriga 'smíguru napurigá etele ala'sichi alué bo'né O'nola Onorúgame. Bilé towika a'chigóriga 'smíguru napurigá 'smi bo'né o'nola. <sup>20</sup> Bilé o'noka 'la 'we 'la niraga eteme ju bo'né inolá 'lige benírame ju suwábaga napu newá bo'né. Onorúgame ne o'nola benírimala ne'chí bilé 'nátili abé semátiri me'tigá napu'lige sa'wale ne alué rió. 'Lige 'emi e'negá jábamala. <sup>21</sup> Wa'lula O'nó Onorúgame alawá ku 'yame ju suwígame napurigá uchéchigo ajánamala. 'Lige Onorúgame Inolá abiena 'yame ju alawáchigó napu ekí alué bo'né najkí. <sup>22</sup> 'Lige alué O'nó Onorúgame tabilé gustisia olame ju ralámuli. Alué Onorúgameka ye nóchali 'yale alué bo'né Inolá. <sup>23</sup> Onorúgame 'yale ye nóchali alué bo'né Inolá napurigá ralámuli animela alué Onorúgame Inolá wa'lula ko 'lige aminami napurigá 'we a'lá nirawa. Bilé rió tabilé niraga eteme Onorúgame Inolá tabilé niraga eteme júchigó O'nola napu ju Onorúgame, Onorúgame napu júlale bo'né Inolá.

<sup>24</sup>, Abiena 'la bijchiá ju napu ne ruwimela jena. Alué rió napu 'la gepú ne ra'ichálila 'lige napu 'la nirá Onorúgame, alué rioka 'la senibí bejtélamala Onorúgame 'yuga. Onorúgameka tabilé siné gastigárimala

alué rió napu 'la nirá Onorúgame, alué rioka 'máchigo naréligime Onorúgame Alawala. Tabilé siné waná bejtélamala napu Onorúgame bejté. <sup>25</sup> Neka 'la bijchiá aníguru. Jipe ya 'ma seba raweli napu'lige ralámuli akémala alué Onorúgame Inolá ra'ichachi, alué ralámuli napu tabilé machime ju Onorúgame ko Wa'lula, 'lige alué napu 'la gepume ju 'lige e'wame ju 'la semáriga ejperélamala Onorúgame 'yuga 'nátiga. <sup>26</sup> Ne O'nola Onorúgame bo'né Alawala nígame ju napurigá uché jaré 'yámala. 'Lige Onorúgame bo'né Alawala 'yale alué rió bo'né Inolá napurigá uché jaré 'yámala. <sup>27</sup> Onorúgameka ne'chí 'yákuru napurigá gustisia olámempá ne alué ralámuli napugiti neka nawagame 'pa rewagáchika napurigá rió neraga. <sup>28</sup> Tase e'karúgame na'tawa 'emi napu ne alanichi. Bilé rawé sebámala napu suwábaga suwígame akimela ne ra'ichachi alé gaposántochi. <sup>29</sup> 'Lige alué ralámuli napu 'la semáriga nokale napu bijí ta'chó suwiyá, alué ralámulika ku ajánamala napurigá 'la semáriga ejperélimala Onorúgame 'yuga, 'lige alué ralámuli napu 'we cha nokáligé, alueka ku ajánamala walú gastigó naremia.

<sup>30</sup>, Neka pecha bo'né 'nátiga gustisia olago ralámuli, neka napurigá Onorúgame nulá alarigá e'wáguru. 'Lige napu ne aní 'la bijchiá ju. Neka pecha napu ne bo'né 'nata, pecha alarigá ruwígó. Neka ruwíguru napurigá aní alué napu ne'chí jula.

'Lige Esusi aminabi ra'ichale, regá anile:

<sup>31</sup> —Ne bo'nepi ruisáká chu'sime ko ne, alué ra'ichali ka tabilé najtékame ju. <sup>32</sup> Neka aníguru uché bilé 'ma ruigó chieti ko ne, 'lige alué rioka Juani anilime nílekuru. Neka 'la machí 'la bijchiá ko napu anile. <sup>33</sup> 'Lige 'émika júlale jaré rió Juani rukéniliga chieti ko ne, 'lige Juánika tabilé 'yégiga ruwile. <sup>34</sup> Neka tabiléchigo resí lágó napurigá bilé rió 'la semáriga ruwimela ne'chí olagá churigá ko ne. Neka pe ruwíguru ye ra'ichali 'emi gu'iriga 'lige napurigá 'la buyásamala 'emi alé resítirichi. <sup>35</sup> Juánika napurigá bilé ra'ósali nile napurigá 'emi 'la etémala chónagachi. Alueka tabilé 'yégali ruwilekuru 'lige 'la gu'irilikuru suwábaga ralámuli Onorúgame 'yuga na'tálichí. Alueka ruwilekuru chieti ko ne, 'lige 'émika 'we a'lá ra'sálagá mochile 'we ganiliga pe u'kabi rawé alué ra'ichali akisá. <sup>36</sup> 'We najtékame ju napu Juani ruwile, napu ne ruwí abéchigo najtékame ju. Etega alué nóchali napu ne newá, a'lige kulí 'la námamala 'emi Onorúgamete julárigame ko ne. <sup>37</sup> O'nó Onorúgame napu ne'chí júlale jékana, alué bo'né ruwí chieri ko ne. 'Émika tabilé siné 'cho aké Onorúgame ra'ichachi, 'lige aminami 'émika tabilé siné etéchigó Onorúgame. <sup>38</sup> Tabilé bijchigi 'emi napu aní alué napu Onorúgame júlale

napugiti 'émika tabilé oyera Onorúgame ra'ichálila. <sup>39</sup> 'Émika 'we alá benime ju Onorúgame ra'ichálila aminabi benínaliga. 'Émika 'la benimeli mayé ye ra'ichali churigá eperélatikó Onorúgame 'yuga senibí niraga, nobi tabiléchigo námago 'emi ye ra'ichali. Ye ra'ichali Onorúgame ra'ichálila ruwí chieti ko ne, <sup>40</sup> nobi 'émika tabiléchigo bijhígimiligó napu ne ruwí napurigá 'la ganílga eperélamala 'emi Onorúgame 'yuga 'nata.

<sup>41</sup> › Neka tabilé chéla rekó 'la nirachi ne'chí 'emi o rekó tabilé 'la nirachi ne'chí. <sup>42</sup> Neka 'we alá sébali machí 'emi, 'lige 'la machí ne 'emi tabilé 'la ganílga eto Onorúgame. <sup>43</sup> Ne O'nola Onorúgame jula ne'chí 'pa rewagáchika, bi'lepi 'nátame niru ramueka, 'lige 'émika tabilé 'la oyeri ne'chí. Siné kachi bilé rió sebasa bilé nóchali o'ká napu pe bo'né 'nata, a'lígeko 'emi 'la semáriga oyéramala alué rió. <sup>44</sup> 'Émika 'we ganílme ju tabiri nóchali newigá napurigá uché jaré 'la semáriga nírámala, napurigá 'we alá niraga ra'ichámala 'emi olagá. Nobi tabiléchigo 'la 'nátago 'la semá nokiamé napurigá 'we alá niraga ra'ichámala Onorúgame 'emi olagá. Alekeri tabilé 'la bijhígimála napu ne ruwí. <sup>45</sup> 'Emi tase mayewa ne 'emi saíla niraga ra'ichamio napu'lige Onorúgame 'yuga ra'ichachi ne. Uchéchigo bilé rió 'ma ra'ichale 'emi saíla niraga. Moisesi ju alué napu 'emi saíla niraga ra'ichale, alué napu 'emi 'we galele. 'Émika buwé mochí napurigá gu'rimala nobi alueka 'máchigo 'emi saíla niraga ra'ichale ko, 'lige osiruga chujukú apélichí napu ra'ichale Moisesi. <sup>46</sup> 'La bijchiá ju 'emi tabilé bijhígimiligó Moisesi ra'ichálila, alueka ne'chí gu'iriga osale 'lige 'émika tabilé bijhígimiligó napu ne ruwí. <sup>47</sup> 'Emi tabilé bijhígimásaká napu Moisesi osale, 'liko tabilé bijhígimála napu ruwimela ne.

## 6

*Jena ruwimela Esusi 'yáligo go'ame maligi mili rió tase tétiga umugi 'lige u'kuchítiri*

<sup>1</sup> 'Lige nujubapi 'ma ra'ichasa Esusi ye ralámuli 'yuga alé Rusaleni, simile alé wa'lú ba'wí ilígichi napu Galilea anilime ju. 'Lige abiena Tibérisi anilime nílechigó alé napu alué ba'wí maní. 'Lige bajonile alé wa'lú ba'wí manígichi.\* <sup>2</sup> We'ká ralámuli Esusi najátale, etéligame alué ralámuli 'we alá semáriga sa'wachi jaré ralámuli 'we nayume. Pe bo'né 'nátaga sa'wale Onorúgame a'walílate. Alué ralámuli etele Onorúgame gu'irio alué Esusi. <sup>3</sup> 'Lige Esúsika bilena rabomi simile 'lige alemi asale alué

makué oká rió Esusi oyérame 'yuga. <sup>4</sup> Pe u'kabi rawé rokaréle napurigá sebámili nílige raweli napu piesta newame nile alué ralámuli jurío napu Páskua aneme nile alué a'boi. <sup>5</sup> Esúsika etele we'ká ralámuli moyena e'yénigichi alérimi Esusi ajtígichi. 'Alige Esusi anele Belipe:

—¿Koché raliboa baní napurigá go'mela alakí ralámuli?

<sup>6</sup> Alarigá anele Esusi, pe machínaliga pa'lá bijhígigo wa'lú a'wali nígame ko Esusi. Esúsika 'ma 'la machile churigá 'yamio go'ame alakí ralámuli, Esúsika pe rukele. <sup>7</sup> Belipeka nejele:

—Ne, rekó enomígame nísaká osá naó mechá nochárigame, pecha sebárimilikó ne baní ralá alakí ralámuli kógimia, pecha o'má nachuámiligó rekó nasípasi chí'wánaga 'yalía a'pílipi ralámuli.

<sup>8</sup> 'Lige Antresi, napu Simoni Pegro ba'chila nile, alué napu abiena Esusi oyérame nílechigó, 'lige alué rioka anele Esusi:

<sup>9</sup> —Jena ajtí bilé re'malí maligi baní o'kame sebárate newárigime 'lige oká ro'chí, nobi asíriga u'tá go'ame júkó napurigá go'mela alakí ralámuli.

<sup>10</sup> 'Lige Esusi anile:

—Jena rabó kilí mochíniliwa ralámuli.

'We gajsalégichi nile alé rabó. 'Ikilí mochíbale alué maligi mili pe riocho tétiga, tabilé tétiga umugi nibilé u'kuchítiri. <sup>11</sup> 'Lige Esusi alué baní 'wile 'lige cheliera 'yale Onorúgame 'lige suwábaga ralámuli 'yale alé mochígichi. 'A'chigóriga olale alué ro'chí 'yuga. Ralámuli kógime napusi 'ma bosasa. <sup>12</sup> Napu'lige 'ma bosasa alué ralámuli, Esúsika alué bo'né gompaniérola nulele:

—'Ma napubuwa suwábaga napu rasírigame. Tabilé pe'tá pápu.

<sup>13</sup> 'Ma napubule suwábaga go'ame rasírigame 'lige bilé rosena a'tabé bochile. <sup>14</sup> 'Lige etesa alué ralámuli ala'sichi Esusi, alué ralámulika anile:

—Bijchiá ye rió ruwime ju napu ané Onorúgame, alué napu nawámili nílige jena wijchimoba.

<sup>15</sup> Esúsika machile umériga o'toboli ko alué ralámulite wa'lula rey nulame newániliga, alekeri chúbika simile bilena rabó bi'neli asínaliga.

*Jena ruwimela Esusi ba'wichí amoba enáligo*

<sup>16</sup> Pe a'lige rawé 'ma alí, alué makué oká ralámuli Esusi 'yuga járome ku wa'lú ba'wí manígichi simíbale, pe a'bé nile napu go'ame go'ale ralámuli. <sup>17</sup> 'Lige bilé bárkochi jímole alué ralámuli 'lige simíbale alé we'ká riógichi niraga Kapernaumi anilichi, pe alé ba'ichí

\* 6:1 Alué wa'lú ba'wí bilena amulí makué bilé kilómetro niraga nile, 'lige bilena bilé líá aminá bilé kilómetro neraga nile, 'lige 'we rojkógame nile malígisa makué metro neraga.

bajuniga ju alé we'ká riógichi Kapernaumi. 'Ma chónale bijí bárkochi mochiga e'yénigichi alué ralámuli. Tabilé enale Esusi alué ralámuli 'yuga. <sup>18</sup> Asrīga a'wágame eká ilile 'lige 'we o'pochía ilile ba'wí alé bárkochi. <sup>19</sup> Napu'lige 'ma we'límana e'yénaga alué barko asagá maligi o usani kilómetro we'límana alé ba'ichí amoba, 'lige alué makué oká Esusi 'yuga járome etele Esusi 'naka enágichi ba'ichí amóbaka, napurigá we'echi amoba neraga enale ba'ichí kachi, 'lige 'we majale suwábaga alué makué oká ralámuli. <sup>20</sup> 'Lige Esúsika regá anele:

—Pe ne ju, tase majawa.

<sup>21</sup> 'Liko 'ma tabilé majale alué ralámuli, bayele napurigá mómala Esusi alé bárkochi alué ralámuli 'yuga. 'Lige pe yati neraga 'ma sébale alué barko alé we'ká riógichi.

*Jena ruwimela ralámuli Esusi 'yaga e'yéniligo*

<sup>22</sup> 'Lige melénala rawé ralámuli napu ta'chó bajuniga ejtebile alé ba'wí manígichi, alué ralámulika machile pe bi'lepi barko chujkúligo alé, 'lige Esusi oyérame alé bárkochi simíboligo, 'lige Esusi tabilé simíligo alé bárkochi alué ralámuli 'yuga. A'liko regá 'nátale: «¿Kochiena ajtí Esusi?» <sup>23</sup> 'Lige jaré barko jsile alé we'ká riógichi Tiberiasika simíbigame. Alé a'bé sébale re'lege napu alué we'ká ralámuli go'álige baní napu Esusi cheliera 'yálige Onorúgame. <sup>24</sup> 'Lige machisáká tabilé ajtígó Esusi 'lige alué bo' né Esusi oyérame, suwábaga alué ralámuli jímore alé jaré bárkochi 'lige simíbale we'ká riógichi Kapernaumi anilichí Esusi 'yamia.

*Jena ruwimela Esusi ruwlígo alué nóchali napu Onorúgame 'yáligo*

<sup>25</sup> 'Lige 'ma seba bajuniga, alé asale Esusi, 'lige alué ralámulika rukele:

—Mué benírame, ¿chiéniko seba mué jena?

<sup>26</sup> Esúsika nejele:

—Neka 'la bijchiá aní, 'émika ne'chí 'yaga e'yena 'láchigo semáriga bosáligimempá 'emi alué banite napu ne 'ya. <sup>27</sup> Tabilé 'la ju pe go'ámecho meka go'náliga nochalia. Go'ámeke tabilé anáchame ju. Abé a'lá júkuru 'yamia alué abé a'lá 'nátli napu nejí alué rió napu nawá 'pa rewagáchika. Alué a'lala 'nátli cha'pisúká 'la nabí mochímala 'emi 'pa rewagachí. Alué 'nátli abé a'lá ju me'tigá go'ame. O'nó Onorúgameka 'we ra'sálígá ajtí alué rió 'yuga.

<sup>28</sup> 'Liko alué ralámulika regá anele:

—¿Chonikiboli ju ramué napurigá 'la cha'piboa alué 'nátli?

<sup>29</sup> 'Lige Esúsika regá anele:

—Onorúgameka pe najkíguru napurigá 'la bijchígiwa alué rió ra'ichálila napu

Onorúgame júlae. <sup>30</sup> 'Lige anile alué ralámuli:

—Newágó pe bo'né a'walílate 'nátaga alué nóchali 'we semátiri napurigá 'la etéwampá ramué. A'ligeko 'la oyériwa alué mué na'tálila. ¿Chu'simi olágó mué? <sup>31</sup> Moisésika newale bilé nóchali semátiri napurigá narémili nilige alué rijimala 'ya mochígame.† Alé 'we wakígichi, Moisési 'yale go'ame rewagachi nerúgame napu maná anilime nile. Regá aní 'ya nerúgame ra'ichali. Mué Esúsika, ¿chu'simi olágó?

<sup>32</sup> Esúsika anile:

—Neka 'la bijchiá aníguru. Oká baní nerúkuru rewigáchika sígame. Napu Moisési 'yáleru alueka pe go'ame nile. Uché bilélaka abé najtégame ju. Ne O'nola Onorúgame 'sime ju nejia. <sup>33</sup> Onorúgame nila baní, alueka ju alué rió napu rewagáchika nawágame ju 'lige alawá 'yame ju ralámuli jena wijchímoba mochígame.

<sup>34</sup> 'Lige ralámulika anele:

—Mué Wa'lula, ramué 'yawa alué baní senibí rawé.

<sup>35</sup> 'Lige Esúsika nejele:

—Ne ju alué baní napu alawá nejime ju. Alué ralámuli napu 'la oyera napu aní ne senibí 'la iwériga bejtélamala, tabilé siné e'luímala 'lige tabilé siné balámumala. <sup>36</sup> Nobi 'émika 'láchigo etégó ne'chí napu newá ne, abirigáchigo tabilé oyéramala 'emi ne'chí. <sup>37</sup> Ne O'nola Onorúgame 'ya ne'chí nóchali 'lige we'ká ralámuli, 'lige ne 'yuga nokísamala alué ralámuli. Neka tabilé mabúmala alué ralámuli. Neka 'la gu'irimala alué ralámuli. <sup>38</sup> Ne rewigáchika nawákuru tase pe napu ne newánili newamia. Neka 'la newamia nawákuru napu najkí alué ne O'nola napu ne'chí júlae. <sup>39</sup> Alué ne O'nólaka najkí napurigá tabilé 'wesi we'kuámala ne alué ralámuli napu 'ya ne'chí. Onorúgameka najkí napurigá ku 'la ajánamala napu'lige Onorúgame gustisia olachi alué ralámuli. <sup>40</sup> Ne O'nola Onorúgameka najkí suwábaga alué ralámuli napu ekí oyérame ju ne'chí napu Onorúgame Inolá ju ne. Neka ku ajánirimala alué ralámuli napu'lige 'ma guwíchí kachi ye gawí. Alué ralámulika ejperélamala Onorúgame 'yuga 'pa rewagachí senibí.

<sup>41</sup> 'Liko ralámuli jurío Esusi saíla neraga ra'ichale napugiti bo'nepi regá aníligame Esusi: «Ne ju baní rewigáchika nawágame.»

<sup>42</sup> 'Lige rukigá járiga a'bopi anile:

—¿Tacha Esusi ju ye rió, alué José inolá? 'We a'lá machiame ke ye rió o'nola, 'lige 'we a'lá machiáa ye rió eyela. A'ligeko ¿chonigá rewigáchika nawágame koríbeché?

<sup>43</sup> 'Lige regá nejele Esusi:

† 6:31 E'nesi glosario «ancestor».

—Ma a'rewa alieti ra'icha. <sup>44</sup> Tabilé 'wesi oyéramala ne'chí tabilé bayésaká Onorúgame alué ralámuli, alué Onorúgame napu ne'chí jula 'pa rewagáchika, uchéchigo ku ajánirimala alué ralámuli napu'lige seba raweli Onorúgame nawámili gustisia olamia ralámuli. <sup>45</sup> Regá anime osale alué ralámuli 'we 'ya napu ruyame nilé napu anele Onorúgame: «Onorúgame benírimili ju suwábaga alué ralámuli.» Alué napu 'la bení Onorúgame ra'ichálila 'lige napu 'la námaka benime ju, alué ralámuli júkuru napu ne'chí oyérame ju.

<sup>46</sup> › Jena tabilé 'wesi etiáguru O'nó Onorúgame, pe necho, neka napu Onorúgame ajtí aleka nawagámpá. Pe necho júkuru Onorúgame etégame. <sup>47</sup> 'La bijchígowa ne ra'ichálila. Alué ralámuli napu 'la oyerá ne'chí ra'ichálila 'lige napu 'la e'wá napu ne nulá, alueka 'la Onorúgame 'yuga asimeli júkuru senibí. <sup>48</sup> Ne júkuru napurigá alué baní a'walí nejime napurigá 'la epperélawá jena gawichí. <sup>49</sup> Alué baní napu go'ale alué 'emi rijimala 'ya mochígame, maná anilime, alué baní napu go'ale bilena waktígichi e'yéniga tabilé riógichi, alué banika tabilé 'yale iwérali alué ralámuli napurigá sebámala rewagachi. <sup>50</sup> Ne júkuru alué baní napu 'pa rewagáchika nawágame ju, 'lige alué ralámuli napu 'la bijchígime ju napu ne ruyé, alueka 'la senibí epperélamala.

<sup>51</sup> 'Lige aminabi anele:

—Neka napurigá baní ju, alué napu rewagáchika nawale. Bilé rió ye baní go'sáká, senibí niraga bejtélímili júkuru. Ye banika ne sa'pala júkuru 'lige neka ne bo'né sa'pala nejíguru napurigá me'liboa ne napurigá ralámuli jena wijchimoba epperégame buyásimala chátiri bowechi —alarigá anile Esusi.

<sup>52</sup> 'Lige ralámuli jurío 'we ayoga ra'ichale a'bópika. 'Lige anile:

—¿Churigá bo'né sa'pala nejímalabeché ye rió napurigá go'mela ralámuli?

Alarigá anile tabiléchigo námalakó napu anile Esusi.

<sup>53</sup> 'Lige Esúsika aminabi anile:

—Neka 'la bijchiá aníguru, 'emi tabilé go'sáká ne sa'pala, ne napu nawágame ju 'pa rewagáchika napurigá rió neraga, 'lige tabilé bajísaká ne elalá, 'liko 'emi tabilé Onorúgame Alawala alawégame nímala. Tabilé 'la na'támala Onorúgame 'yuga. <sup>54</sup> Bilé rió napu ne sa'pala go'yame ju 'lige ne elalá bajime ju, alueka 'la Onorúgame Alawala nígame ju 'lige 'la senibí 'la Onorúgame 'yuga bejtélamala. (Esúsika pe anigá anile: «Alué rió napu 'la cha'pime ju ne ra'ichálila 'lige 'la e'wame ju, alueka 'la Onorúgame 'yuga asimela.»)

'Lige anile:

—Neka alawá 'yámala uchéchigo siné napu'lige 'emi suwisá. Regá 'símala ne napu'lige seba raweli napu'lige Onorúgame wanápachi alué ralámuli chátili nátame 'lige 'we alá nátame. <sup>55</sup> Ne sa'pala go'sáká abé a'lá ju me'tagá go'ame go'yáa. Alueka 'la bijchiá 'la rewagachi sebárimé kame. Abiénachigó abé a'lá ju ne elalá bajilia, alué kame 'la bijchiá sebárimé ju 'pa rewagachi. <sup>56</sup> Alué napu go'á ne sa'pala 'lige napu bají ne elalá, alueka 'la ne'chí sa'pálachi asimeli ju 'lige neka alué sa'pálachi asimeli júchigó. (Yeka regá anime júkuru, 'emi 'la oyérasaká ne'chí, neka tabilé siné a'rémala 'emi. Ne alawálaka 'la senibí 'la 'emi sa'pálachi asimela.) <sup>57</sup> O'nó Onorúgame júkuru alawá nejime, alué 'silekuru ne'chí jula 'pa rewagáchika. Neka alué alawálate bejtékuru napu 'ya ne'chí. Bilé rió 'la oyérasaká ne'chí, a'lige neka bo'né alawala 'yámala alué rió. <sup>58</sup> Alarigá ju baní napu rewagáchika nawá. Tabilé napurigá baní ju napu go'ale alué israelita 'ya mochígame, alué banika napu go'ale alué 'ya mochígame tabilé gu'irale rewagachi moyena. Bilé rió 'la go'yame ka ne nila baní, alueka 'la senibí bejtélamala. Rekó 'ma mukigé, uchéchigo siné ku narémala alawá. (Ye ra'ichalika regá anime júkuru: Bilé rió 'la e'wame Onorúgame ra'ichálila, alueka 'la tabilé injiérnochi simela.)

<sup>59</sup> Alarigá ra'ichale Esusi napu'lige benírole jurío ralámuli alé u'tá re'obachi «sinagoga» anilime, alé Kapernaumi anilichi we'ká riógichi.

*Jena ruwimela jaré ralámuli tabilé bijchígigo Esusi nila ra'ichali*

<sup>60</sup> Napu'lige akesa ye ra'ichali we'ká Esusi oyérame, anile a'bopi:

—Asíruga nóchali kame ju ye ra'ichali beniaa. Tabilé 'wesi námamala.

<sup>61</sup> Esúsika tabilé akele regá ra'ichachi ye ralámuli, nobi láchigo machíleko se'wináriga ra'icha jago alué ralámuli, 'lige regá rukele:

—¿Ya 'ma guwana rujsúnale 'emi tabilé námame kóriká? ¿'Ma tabilé oyéranili 'emi ne'chí? <sup>62</sup> 'We e'karúgame na'tálaka ne 'la ruwichi ye ra'ichali, ¿chulámalaché 'emi ne'chí etea napu'lige re'pá rewagachi simichi ne napu asale ne 'yabé bajchabé rawé? <sup>63</sup> Onorúgame Alawala júkuru iwérali nejime napurigá 'la semáriga epperélawá. Ralámulika tabilé 'la semáriga epperélamala tabilé Onorúgame Alawala 'yúgaká. 'La oyérasaká ra'ichali napu ne ra'icha, a'lige 'la nílmalala 'emi alawá napu ne'ji ne. <sup>64</sup> Nobí jaré 'emi tabiléchigo bijchíginiligó ne ra'ichálila.

Esúsika 'la machile napusí o'winale ye nóchali, chieri ralámuli tabilé bijchíginili ye ra'ichali 'lige 'la machílechigó chieri 'símio



nejía alué Esusi. <sup>65</sup> Lige aminabi ra'íchale Esusi:

—Jaré 'emi tabilé bijchígini ne ra'íchálila, alekeri anéturu ne 'emi 'yabé bajchabé rawé tabilé 'wesi gainamio ne'chí oyeria tabilé narésaká O'nó Onorúgame nila iwérali.

<sup>66</sup> Liko we'ká Esusi 'yuga e'yéname 'ma tabilé aminabi si simíbale Esusi 'yuga, 'máchigo guwana rujsúligame. <sup>67</sup> Lige Esusi rukele alué makué oká rió Esusi oyérame napu abé kompaniérola nile Esusi 'yuga:

—¿'Émichigó simánili 'lige 'ma a'rénili 'emi ne'chí?

<sup>68</sup> Lige Simoni Pégroka regá anele:

—Mué Wa'lula, ¿chieri 'yuga simáwawé ramué? Mué júkuru napu ra'íchame ju ra'íchali napu 'la nejkúrame ju napurigá rewagachi sebawa 'lige 'la Onorúgame 'yuga ejerélewa senibí niraga. <sup>69</sup> 'La bijchígiliguru ramué mué ra'íchálila 'lige 'la machiáachigó mué ko Onorúgamete wanápurigame napurigá gu'írimala ralámuli.

<sup>70</sup> Liko Esusi anele:

—Ne bo'né wanapa 'emi makué oká rió, 'lige 'emi bilé tabilé 'la 'nata, i'ma riablo na'tálla náta!

<sup>71</sup> Jurasí olagá anile, alué napu Simoni Iskariote inolá nile. Jurásika bilé nile alué makué oká rió Esusi oyérame, nobi abé i'libékomi 'ma nejlíru Esusi alué riote napurigá Esusi 'ma o'toboa alué Esusi saíla mochígichi.

## 7

*Jena ruwimela alué Esusi nasípasi bonila 'lige nasípasi waíla ta'mé 'la niráligo Esusi*

<sup>1</sup> 'Ma a'kinana Esúsika eyénale bochígimi ejiro Galilea anilichi. Tabilé eyénale alé Jurea anilichi napugiti alué e'wélala ralámuli jurío nuleme 'yaga e'yéniligime alué Esusi me'lináliga. <sup>2</sup> 'Ma amulí sébachi nile alué piesta napu newame nile rojsate u'kuchí gali 'lige alé okome nile. (Alarigá nokame nile alué ralámuli jurío nélegá churigá nokame níligo 'we 'ya napu'lige e'yénilige alué ralámuli israelita Moisesi 'yuga 'we wakígachi tabilé rojégichi.) <sup>3</sup> 'Alige alué Esusi nasípasi bonila 'lige nasípasi waíla regá anéleru Esusi:

—'Ma a'rewa ye ejiro Galilea, 'mi Jurea anilichi ejiro simiboa napurigá mué oyérame ralámuli 'la etémempá 'we semá 'sichi mué. <sup>4</sup> Najkiáká napurigá we'ká ralámulite najátawa mué, tabilé chíbaka rejpíime júkuru. 'La simiame júkuru napurigá ralámuli 'la etémala. Mueka we'ká e'karúgame semá 'smíguru pe bo'né 'nátaga. Alekeri simibóguru napurigá ralámuli 'la etémala.

<sup>5</sup> Regá anía jale, tabilé bijchígiga Onorúgamete julárigame niligo Esusi. <sup>6</sup> 'Lige Esusi regá anile:

—Tabilé 'cho seba raweli napu'lige Onorúgame jula ne'chí alé napu Jurea anilichi ejiro ju. Pe 'émika 'la simámala napuyéniko simánili. Tabilé chéré rekó pe napuyéniko simibie, 'émika pecha Onorúgamete nulérigime ka. <sup>7</sup> Cha nokame ralámuli jena mochígame ka tabilé ayoga etiá 'emi a'bopi. 'Lige 'émika tabilé ayoga etiáchigó alué ralámuli, pe a'bopi kame 'emi, nobi ne'chika tabiléchigo ganílga etiágó alué ralámuli. Neka 'la ruyéguru ralámuli jena wijchimoba ejerégame tabilé 'la ko napurigá noká alué ralámuli. <sup>8</sup> Simasi 'emi alé piesta nerúgichi. Neka tabilé 'cho simela, tabilé 'cho sébampá raweli napurigá simeli ju ne.

<sup>9</sup> Regá anigá, alé Galilea anilichi rejpile.

*Jena ruwimela Esusi simíligo alé piéstachi*

<sup>10</sup> 'Lige napu'lige 'ma simasa alué Esusi nasípasi bonila 'lige nasípasi waíla alué piesta kólimia, Esusi abiena simile abé nujubapi. Esúsika chíbika simile. Tabilé najkile napurigá alué we'ká ralámuli etémala. <sup>11</sup> Alué ralámuli jurío e'wélala 'we 'yaga e'yénale Esusi alé piéstachi, regá anigá a'bopi:

—¿Koché ajtípué alué rió?

<sup>12</sup> 'Lige alué ralámuli jurío tabilé e'wélala abiena ra'íchiga e'yénale alarigá ko Esusi, pe i'kilí ra'íchaga e'yénale alué ralámulika napurigá tabilé akimela alué uché jaré ralámuli alanigá e'yénachi alué ralámuli. Jaré ralámuli 'we a'lá rió kóríle Esusi. Jaréchigo tabilé 'la rió kóríle Esusi, 'lige pe 'yégiga ra'íchame kóríle.

<sup>13</sup> Alué ralámuli jurío ka napu ekí tabilé e'wélala 'we majaga e'yénale alué jurío e'wélala, alekeri i'kilí ra'íchiga e'yénale.

<sup>14</sup> Alué piesta 'ma osá no rawé kachi suwíbame nile, 'lige 'ma nasípasi rawé enágichi alué piesta newásiga, 'lige Esúsika simile alé wa'lú re'obachi ra'pichi 'lige benírale. <sup>15</sup> 'Lige jurío e'wélala pe e'negá ejtebile, 'lige regá anile alué ralámuli a'bopi:

—Ye rioka tabilé simígime ke eskuélachi. ¿Churigá 'la machibeché suwábaga alué ra'íchali?

<sup>16</sup> Esúsika akele alanichi alué ralámuli, 'lige regá nejele:

—Ye ra'íchalika napu ne beniri tabilé ne nila ju. Ye ra'íchalika Onorúgame nila ju, alué napu ne'chí júla. <sup>17</sup> Bilé rió 'la sébali olánalisaká napu Onorúgame najki, a'lígeko alué rió 'la machimela 'la Onorúgame nila ko ne ra'íchálila o tabilé Onorúgame nila ko. <sup>18</sup> Bilé rió wa'lúlate julárigame napurigá rejcholi ruyémala uché jaré ralámuli, 'lige alué rió rejcholi ruyésaká uché jaré ralámuli

napurigá 'we a'lá niraga etewa alué bo'né tase alué wa'lula, alarigá ka tabiléchigo 'la júkó. Nobi bilé rió 'la najkime ka napurigá 'la nerawa alué wa'lula napu ajchame ju, alueka 'we a'lá ra'íchame ju tabilé 'yégali. Alué rioka 'la semáriga 'nátame ju.

Esúsika aminabi ra'íchiga rukele:

19 —¿'La bijchiá ju Moisesi 'siligo beniria alué nulali 'emi? 'Lige 'emi tabilé 'wesi 'la sébali olá alué nulali. 'Liko ¿chonigá ne'chí 'yaga e'yénaché 'emi ne'chí me'lináliga?

20 'Lige ralámulika anile:

—Mueka Remónisi alawala ajchágame ju. ¿Chieri rió me'linali mué?

21 'Lige Esúsika anile:

—Ne bilé rió 'yóturu sawalachi rawé, napu ju resíbalichi rawé, 'lige 'émika 'we e'karúgame 'nata mochikuru. 22 Moisésika 'emi nulélékuru napurigá rijpunawa isílala pe'tá guwala wi'chila u'kuchi kachi osá naó rawé kachi ochérisa, 'lige i'sínimi 'emi abirigá rijpúnime ju napu'lige rawé resíbulichi ju osá naó rawé ajtúgachi. ('Lige aminámichigó 'émika pe we'kaga ra'íchale tabilé machigá. Moisésika tabilé alué bo'né 'sile ye ra'íchali newá. Ye ra'íchali nulali 'we 'yasi nerúgame nile ta'chó ochérisa Moisesi.) 23 'Lige pe 'la sébali olániliga napurigá nulale Moisesi, 'lige ¿chonigá ayóbeché 'emi ne'chí 'yuga 'la 'yochi ne bilé rió sawalachi rawé napu resíbulichi ju? 24 Tabilé ayowa ne'chí 'yuga pe etega napu 'smi ne. 'We a'lá na'tawa Onorúgame 'yuga. Alarigá machimela 'emi ne 'we a'lá sébali olao.

25 'Lige jaré ralámuli napu Rusaleni ejperégame nile regá anile:

—¿Tabilé ye rió ju napu e'wélala me'lináliga e'yena? 26 Ma'chiná ra'icha ilikuru 'lige alué e'wélalaka tabilé che anégurú. ¿'Ma mayéligirémá alué ko napu Onorúgame julámorilige jena napurigá ralámuli gu'irimala, alué Kristo anilime? 27 Ramueka tabilé mayeliza Kristo ko ye rió. Kristo sebásaká pecha machibógó chieri puébloka nawigó. Ramueka 'la machiaa kochiénaka nawigó ye rió.

28 'Lige alieti akigá Esusi napu'lige beniria ilile alé ra'pichí, anile a'wágame ra'íchaga:

—'Émika 'la machí ne'chí, 'lige kochiena bejtégame ko ne, nobi tabiléchigo machígó 'emi alué wa'lula napu ne'chí jula jékana. Neka tabilé pe bo'né 'nátaga nawá jena. Neka julárigame júkuru alué gite napu 'la bijchiá ju. 'Lige 'émika tabilé machí alué. 29 Neka 'la machí, neka alué 'yuga bejtégame kame. Alué 'smi ne'chí jula jékana.

30 'Lige alué ralámuli Esusi cha'pinánile nobi tabiléchigo umébale ko alué ralámuli. Onorúgame tabilé 'cho najkile napurigá ralámuli Esusi cha'pimela. 31 We'ká ralámuli 'la bijchígile Onorúgamete julárigame ko Esusi, 'lige anile:

—Ye rioka 'la semátiri nóchame ju pe bo'né 'nátaga napu tabilé umébame ju newá uché jaré ralámuli. ¿Chieri uché bilé arigá 'nátame nímawé? Bi'neli alué Kristo júkuru 'we a'lá semáriga newame pe bo'nepi 'nátaga.

32 Jaré bariseo machile alarigá ra'íchiga e'yenio uché jaré ralámuli pe tabilé bariseo. A'lige jaré alué bariseo 'lige balé e'wélala júlale jaré alué 'yuga nóchame sontalo Esusi cha'píniliga. 33 'Lige Esusi regá anile:

—Neka pe u'kabi mechá asimela jena 'emi 'yuga, 'lige 'ma simea olá ne ku napu ajti alué napu ne'chí jula. 34 'Émika ne'chí 'yáamala, 'máchigo tabilé rewimélagó 'emi ne'chí. Pecha gainámalagó seba napu ne asimela.

35 'Lige alué ralámuli jurío a'bopi regá anile:

—¿Kochiena simé olawé ye rió napu ramué tabilé rewiboa? ¿Alé uché bilena riógachi simé olale napu jaré ralámuli jurío mochí alué uché jaré ralámuli 'yuga napu se'wináriga ra'íchame ju, amináchigo uché jaré ralámuli benírimia? 36 Ye rió aní ramué simáwaráo 'yawa alué rió 'lige tabilé rewibóráo, 'lige aminami tabilé sebáwaráo napu asimeo bo'né. ¿Chionióribeché alarigá?

37 'Lige 'ma abé guwichí kachi, napu abé wa'lúlachi rawé kachi, Esúsika o'weti ilisale 'lige bilé ra'íchali ruwile a'wágame ra'íchiga:\*

—'We balámisiká 'lige 'la oyérasaká ne ra'ichálila, akiná simasi 'lige bajiwa ba'wí. 38 Alarigá anime nile Onorúgame ra'ichálila 'ya nerúgame: «Alué rió napu 'la oyeri ne'chí aleké riochi ba'wí ma'chínamala ba'wí napu nejime ju iwérali napurigá 'la ejperélawa.»

39 Ye ra'íchali ka ruwime nile ralámuli napu ekí 'la bijchígime ju Esusi ra'ichálila 'la narémili níligo Onorúgame Alawala. Ralámulika tabilé 'cho narea mochile alué Alawá, tabilé 'cho 'moga asálgame Esusi ku 'pa rewagachi.

40 Jaré ralámuli akesa alanichi Esusi, anile alué ralámuli:

—'La bijchiá ye rió ruwime ju napu ané Onorúgame.

41 'Lige jaré regá anile:

—Ye rió Esusi alué Kristo ju, napu ralámuli buinámili ju chátiri bowechi.

'Lige jaré regá anile:

\* 7:37 Ye piéstachi suwábaga ralámuli Onorúgame tánale napurigá 'la u'kumela. A'lige abiena simibale ba'wí 'tumia bilena bajsochi re'obachi o'tomea. Alué ba'wí napu bajisochi ma'chínime ju «ba'wí ajágame» anilime nile. † 7:42 Tabilé machile alué ralámuli alué Esusi alé Beleni ochérigame níligo. Abé a'kinana Galiléachi bejtele Esusi.

—Křístoka pecha ejiro Galiléachi ochérimili júkó. <sup>42</sup> 'Ya nerúgame ra'íchalika Onorúgame ra'íchálila aní Křísto Rabí rijimala nimio 'lige alé Beleni anilichi ochérimio napu bejtégame nile Rabí.†

<sup>43</sup> 'Lige we'ká 'nata mochile, 'lige we'ká ra'íchale a'bopi. Jaréchigo 'la galeme nile Esusi, 'lige jaréchigo tabilé galeme nile. Alarigá 'nata mochile. <sup>44</sup> Jaré ralámuli Esusi cha'pinánile nobi tabiléchigo 'wésite cha'píliriko Esusi.

<sup>45</sup> 'Lige 'ma ku ro'isa alué sontalo, alué e'wélala balé 'lige bariseo rukele alué sontalo regá:

—¿Chonigá tabilé a'pápupaché?

<sup>46</sup> 'Lige sontáloka nejele:

—Tabilé siné akeme nírige ramué aliena semátiri ra'íchame napuyena alué rió.

<sup>47</sup> 'Lige bariseoka anile:

—¿'Ma umériru 'émichigó alué riote alarigá ra'íchiga? <sup>48</sup> ¿Alué e'wélala ralámuli jurío nuleme 'lige alué bariseo e'wélala 'ma bi-jchigile alué rió ra'íchála? Tabilé siné bi-jchigilime niru ramueka nibilé alué e'wélala. <sup>49</sup> Ralámulika napu ekí Esusi ra'íchálila bi-jchigame tabilé pe'ta machí Moisesi nila rejcholi. Alué Esusi oyérameka pe se'wináriga 'nátame ju. Onorúgame 'ma suwábamala suwábaga alué ralámuli.

<sup>50</sup> 'Liko bilé rió Nikoremio anilime ruwile bilé ra'íchali. Alué rioka bariseo nile 'lige simile bilé rukó Esusi e'nemia 'Lige anile:

<sup>51</sup> —Regá aní ramué nila ra'íchalika: tabilé lisensia nígame niru ramué napurigá gastigáriwa bilé rió tabilé akésiga ramué a'boi alanichi bilé rió. 'La 'we a'lá machiame júkuru bajchá.

<sup>52</sup> —¿Chonigá alaníbhiché mué? —anile uché jaré ralámuli—. ¿Muéchigó Galilea bejtégame júchigó? ¿Alué rió gompaniérola niraga ra'ícha mué? 'We a'lá e'newa osilí 'ya nerúgame Onorúgame nila. 'Lige alé machimela mué tabilé Galiléaka nawamio bilé rió napu ruwime ju napu ané Onorúgame.

<sup>53</sup> 'Alige a'pílipi ralámuli simíbale ku a'boi ejperélachi.

## 8

*Jena ruwimela a'páirigo bilé mukí chátiri nóchame alé napu Esusi ajtíle*

<sup>1</sup> Esúsika simile alé rabomi alé a'bé napu ju Rusaleni anilichi napu we'ká jale rojá Olibo anilime. <sup>2</sup> 'Lige melénala 'ma che'lisá, Esúsika alé wa'lú re'obachi ra'pichí simile. Suwábaga ralámuli napu alé wa'lú re'obachi ra'pichí mochile a'bemi jábale alemi napu Esusi sébachi, 'liko Esusi alé asíbale 'lige benírale. <sup>3</sup> 'Alige alué we'ká benírame napu

Moisesi ra'íchálila benírame nile 'lige aminami jaré bariseo bilé mukí a'pale alé. Alué mukika bilénami rewirúgame nile uché bilé rió 'yuga gojchichi napu tabilé alué bo'né mukí 'yula nile. 'Lige alé nasipa elale. <sup>4</sup> 'Lige anéliru Esusi:

—Mué benírame, ye mukika cha'pirú gojchiá bo'ígichi bilé rió 'yuga napu tabilé bo'né 'yula nílige. <sup>5</sup> Moisesi ra'íchálila anime júturu me'liame ko rejete basibuga bilé mukí ala'sime napurigá 'sile ye mukí. ¿Mueka chonigó?

<sup>6</sup> Alué ralámuli benírame 'lige bariseo alarigá rukele. Alué ralámulika pe najkigá nokáligime napurigá Esusi se'wináriga animela tase napurigá anile Moisesi, 'lige gastigáriniliga nokale Esusi se'winá anisáká.

'Liko Esusi rojpóchiga wijchí e'nagá asíbale 'lige osale makúsate wijchí we'echi. <sup>7</sup> 'Lige alué we'ká benírame 'lige bariseo aminabi rukele, 'lige Esusi o'weti ilisiga alué ralámuli mochígichi e'nele 'lige anele:

—Apíépiri napu tabilé resi 'sika ilírome ju, alué bajchá basibúmilí ju ye mukí.

<sup>8</sup> Uchéchigo ku rojpóchiga asíbale 'lige abichilubi osale wijchí we'echi. <sup>9</sup> 'Lige ralámuli akísá alanichi Esusi, 'liko alué ralámuli simíbale. Bilé bajchá simile 'lige uchéchigo bilé. Abé bajchá simíbale alué abé o'chérame ralámuli. \* 'Ma bi'neli rejpíle Esusi alé pe alué mukicho 'yuga napu bijí alé ilile.

<sup>10</sup> 'Alige Esusi o'weti ilisiga, 'lige rukele:

—¿Koché simíbale? Tabilé 'wesi it'ékuru napu mué bajsibuga me'lináíle.

'Lige alué mukika regá nejele:

<sup>11</sup> —'Ma tabilé 'wesi it'é.†

'Lige Esúsika anele:

—Néchigó tabilé che olámala mué. Jípeko simigá 'lige tase se'winá 'sika einawa.

*Jena ruwimela Esusi ruwíligo napurigá ra'ósali ko bo'né*

<sup>12</sup> 'Liko Esusi uchéchigo ra'íchale alué ralámuli 'yuga alé ra'pichí, regá ra'íchiga:

—Ne júkuru napu ra'ósali nejime ju jena gawichí. Pe necho ju ralámuli gu'írime Onorúgame 'yuga na'tálíchi. Alué napu ne'chí oyérame ju, alueka 'la nílimala Onorúgame nila 'nátíli napurigá 'la machimela churigá ko Onorúgame, 'lige aminami napurigá 'la machimela chieti ko ralámuli cha nokame. Alué ne'chí oyérame ka tabilé Remónisi 'yuga na'támala. Alueka tabilé chónagachi niraga e'yénamala.

<sup>13</sup> 'Liko alué bariseo regá anele:

—Mueka ruwí churigá ko mué bo'nepi. Tabilé najtégame ju alarigá. Rokaré bilé rió napurigá ruwimela churigá ko mué.

<sup>14</sup> 'Alige Esusi regá anele:

\* 8:9 Siné kachi alué ralámuli alué mukí 'yuga okórigiréko. napu ju 7:53-8:11.

† 8:11 Jaré osilí 'we 'ya osirúgime tabilé uchúkame ye osilí

—Tabilé chéré rekó bo'nepi ruyé ne churigá ko ne. Ye ra'ichali napu ruwí ne 'we najtékame ju. Neka 'la machí kochiénaka nawagó ne 'lige kochiena simea ne, 'émika pecha machígó kochiénaka nawagó ne 'lige kochiena simea ne. <sup>15</sup> 'Émika tabilé e'wame ju napu aní Onorúgame, 'émika pe e'wame ju napu aní ralámuli. Neka 'la e'wame ju napu aní Onorúgame 'lige tabilé gustisia olame ju ne ralámuli. <sup>16</sup> Ne gustisia olásaká jaré ralámuli, 'lige napu ne ruimeli ju 'la bijchiá nímala, néchigó 'yuga ajtigámpá alué Wa'lula O'nó napu ne'chí jula. <sup>17</sup> 'Emi bariseo nila ra'ichalika anime júkuru: napu'lige oká rió 'la a'chigóriga ruwisá bilé ra'ichali, 'la najtékame ko alué ra'ichali napu ruwí alué ralámuli. <sup>18</sup> Neka ruwíguru napu nocha ne bo'né 'lige alué ne O'nola napu júlane ne'chí ruwíguruchigó napu nocha ne. Alekeri 'la najtékame ju napu ne ruwí.

<sup>19</sup> 'Liko rukéliru Esusi alué ralámulite:

—¿Kochiena ajtí mué o'nola?

'Lige Esúsika regá anele:

—'Émika tabilé machí chieri ko ne, 'lige tabilé machí chieri ko ne O'nola. 'La machime nísaká 'emi chieri ko ne a'ligeko 'la machimeli ke 'emi chieri ko ne O'nola.

<sup>20</sup> Esusi ye ra'ichali ruwile alé wa'lú re'obachi alé ra'pichí iligá alé napu enomí ajchame nile ralámuli Onorúgame kógiga. 'Lige tabilé 'wésite cha'píliro Esusi, tabiléchigo 'cho sébachi niligame raweli napurigá cha'piboa Esusi.

*Jena ruwimela alué ralámuli cha nokame tabilé siné simámili ko napu ajtí Esusi*

<sup>21</sup> 'Liko Esusi regá anele:

—Neka simela 'lige 'émika ne'chí 'yáamala, 'lige suwimela 'emi tabilé bi'wigá chátiri 'nátili. 'Émika pecha gainámalawé simiba napu ne simeli ju.

<sup>22</sup> 'Lige alué ralámuli jurío e'wélala regá anile:

—Alué rioka ruwíguru tabilé siné gaináwaráo simiba ramué alé napu simeli ju alué bo'né. ¿Pe bo'nepi me'lináliga aniérema? ¿Ala'síniliga aniérema napurigá tabilé rewibómpá ramué simásiga alué 'yasia?

<sup>23</sup> Esúsika regá anele:

—'Émika pe napurigá ralámuli jena wijchimoba mochígame alarigá 'nátame ju. Neka napurigá Onorúgame alarigá 'nátame júkuru. 'Émika jena wijchimoba epperégame júkuru. Neka jena wijchimoba bejtégame ju, nobi 'pa rewagáchika nawágame júkó ne. <sup>24</sup> Neka 'ma 'la aniétturu suwimeo 'emi tabilé 'la bi'wigá alué chátiri 'nátili, 'emi 'yuga rejpioimo alué chátiri 'nátili. Tabilé bijchígásaká 'emi ne

ko napu aní ne 'liko suwimela 'emi chátiri 'nátili 'yuga.

<sup>25</sup> 'Lige alué ralámuli jurío regá rukele:

—¿Chieri ju mué?

'Lige Esúsika regá nejele:

—Neka 'ma ruwíturu 'yabé bajchibé rawé. <sup>26</sup> We'ká e'karúgame ra'ichali nerú napu tabilé ruimé néká rekó ne 'emi saíla niraga ra'ichie, 'we cha nokágame kórigá 'emi, nobi tabiléchigo ruiméligó ne napu ne bo'né 'nata. Jena wijchimóbaka pe napu aké ne alué wa'lula ra'ichálila, pe aluecho ruwimela ne. Alué wa'lula napu júlane ne'chí, alueka nabí 'la tabilé 'yéigiga ra'ichame ju.

<sup>27</sup> Alué ralámuli tabilé machile alué O'nó Onorúgame olagá anió. <sup>28</sup> 'Lige Esusi regá anele alué ralámuli:

—Jípeko napurigá bilé rió, alarigá ju ne napurigá 'emi. Napu'lige ne gulusichi ujchagá me'lisuga, ne napu ju Onorúgamete nulérigime 'pa rewagáchika napurigá rió neraga, 'lige 'ma ku rewagachi simísá ne, a'lige kuli machimela 'emi ne ko napu ne koriáni ne bo'né.† Neka tabilé 'wesi nóchali newame ju ralámuli na'táililate. Neka pe napurigá nuleru O'nó Onorúgamete, pe alarigá gacho nóchame ju ne. <sup>29</sup> Alué napu ne'chí jula, ne 'yuga ajtí jena wijchimoba. Ne O'nola tabilé bi'neli a're ne'chí. Neka nabí 'la sébali olame ju napu 'la galeme ju alué bo'né, alekeri jena ajtí ne'chí 'yuga.

<sup>30</sup> Ye ra'ichali ruyá ilígichi Esusi, we'ká ralámuli 'la bijchígale. 'La bijchígale alué rió ko napu korlíge bo'né.

*Jena ruwimela we'ká ralámuli 'we chátiri 'nátali cha'pime níligo*

<sup>31</sup> 'Liko Esusi regá anele alué ralámuli jurío napu 'la bijchígile alué Esusi ra'ichálila:

—'Emi aminabi cha'písiga nokísasaká ye ra'ichali ne ra'ichálila, a'ligeko 'la bijchiá ne'chí oyérame nímala 'emi. <sup>32</sup> 'Lige 'we 'la machimela 'emi 'la bijchiá ra'ichali. 'Lige tabilé cha'piruga mochímala 'emi alué Remónisi na'táililate. 'Lige tabilé nochámala 'emi pe napurigá ralurígume niraga.

<sup>33</sup> 'Lige alué ralámuli juríoka regá anile:

—Ramueka Abraámi rijimala niru 'we 'ya bejtégame. 'Lige tabilé siné napurigá ralurígume ralámuli niru ramué bilé wa'lúlate. A'ligibeché, ¿chonigá alaníché mué napurigá bilé wa'lúlate ralurígume ralámuli nírgo ramué? Peka ralurígume nírgichi ramué.

<sup>34</sup> 'Lige Esúsika regá anele:

—Neka tabilé 'yéigiga aníguru. Bilé rió 'we resí 'sime, alué rioka chátiri 'nátalite cha'pirúgame júkuru. <sup>35</sup> Bilé rió 'la bo'né o'nola ranálaka 'la lisensia nígame

† 8:28 Esúsika pe ruwime ke anile Onorúgame ko bo'né.

ju napurigá nulámala bo'né bejtélachi a'chigóriga napurigá bo'né o'nola, lige bilé pe ralurúgame, alueka tabilé lisensia nígame ju napurigá nulámala alé galírale. O'nó mukusáká, pe bo'né inolacho niga rejjímala alué o'nola nila. <sup>36</sup> 'La námasaká 'emi ne ra'ichálila, 'liko 'la Onorúgame 'kúchila nímala 'emi, tase napurigá bilé rió ralurúgame nímala 'emi. <sup>37</sup> Neka 'la machí Abraámi rijimala ko 'emi, nobi tabiléchigo bijhígimilígó 'emi napu ruwí ne, 'lige alekeri 'émika 'ma me'linali ne'chí. <sup>38</sup> Neka 'la sébali oláguru napu ne O'nola nulé ne'chí. 'Lige 'émika 'la sébali oláguru napu 'emi o'nola nulé.

<sup>39</sup> Alué ralámuli juríoka regá anele:

—Ramueka Abraámi rijimala niru. Alueka pe napurigá ramué o'nola, alarigá ju.

Nobi Esúsika regáchigo anélekó:

—'Emi 'la bijhíchi Abraámi rijimala nísaká, a'chigóriga nokimélaké 'emi napurigá 'sile Abraámi. <sup>40</sup> Neka tabilé 'yégame ruwiguru churigá benírgo Onorúgame ne'chí, nobi abirigáchigo 'ma me'línaligo 'emi ne'chí. Abraámika tabilé siné alarigá 'sile. <sup>41</sup> 'Émika a'chigóriga nokáguru napurigá nokame nile alué 'emi o'nola.

'Lige alué ralámuli juríoka regá anele:

—Ramueka 'la bijhíchi Onorúgame 'kúchila niru. Tabilé waná o'nógame. Ramueka pe bi'lepi Wa'lula O'nógame niru napu ju Onorúgame.

<sup>42</sup> 'Lige Esúsika regá anele:

—'La bijhíchi Onorúgame 'kúchila nísaká 'emi, a'lige 'emi 'la ganíliga etémiliké 'emi ne'chí, neka Onorúgamechika nawágame kame 'lige nocha ajtí ne jena nóchali napu bo'né Onorúgame 'ya ne'chí. Neka tase pe bo'né nátaga nawá jena wijchimoba. Alué napu ne'chí jula, alué 'smi ne'chí ajchá jena. <sup>43</sup> ¿Chonigá tabilé námaché 'emi napu ruwí ne? ¿Tabilé akénili ne ra'ichálila?

<sup>44</sup> 'Émika Remónisi 'kúchila júleké 'liko, 'lige 'we a'lá e'wéguru 'emi napu nulá alué 'emi o'nola. Remónisika 'we nejkógame ju we'ká ralámuli me'ágame 'lige tabilé siné 'la bijhíggame ju alué 'la tabilé 'yégame ra'ichali. Alueka tabilé pe'tá bijhigí alué 'la semátiri ra'ichali 'la tabilé 'yégame. Alué ju 'la bijhíchi 'yégame me'tigá suwábaga, 'lige o'nola ju suwábaga ralámuli napu 'yégame ra'ichame ju. Alueka senibí napu ra'icha, pe 'yégalicho ra'ichame ju. Alieri ju alué Remónisi. <sup>45</sup> Neka tabilé 'yégame ruwiguru 'lige 'émika tabilé bijhígimilí ye ne nila ra'ichali. <sup>46</sup> ¿Chieri 'emi 'la machígó ne cha 'sika ilírome ka? Ruisigó. Neka peka siné 'yégame ra'ichame kachi, 'lige ¿chonigá tabilé bijhígibeché 'emi napu aní alué ra'ichali? <sup>47</sup> Bilé ralámuli

napu 'la Onorúgame ranala ju, alueka 'we a'lá gepume ju Onorúgame ra'ichálila. 'Émika tabilé gepúnilime ju ye ra'ichali, tabilé Onorúgame 'kúchila kame 'emi.

<sup>48</sup> 'Liko alué ralámuli jurío regá rukele:

—¿Tabilé bijhíchi ju alé wa'lú ejiro Samaria anilichi bejtégame ko mué? § 'Lige ¿remónisi u'kuchípala alawala ajchágame ju mué?

<sup>49</sup> Esúsika regá nejele:

—Neka tabilé remónisi u'kuchípala alawala ajchágame ju. Neka 'la nirame ju ne O'nola, nobi 'émika tabiléchigo nirágó ne'chí. <sup>50</sup> Napu'lige semá 'sichi ne, neka tabilé najkigá 'smi napurigá ralámuli wa'lula neraga etémala ne'chí. Abiena ajtí uché bilé napu najkí napurigá ralámuli 'la wa'lula neraga etémala ne'chí 'lige 'we a'lá niraga. Alué napu gustisia olame ju ralámuli, alueka Onorúgame ju. <sup>51</sup> Neka tabilé 'yégame aníguru, 'la bijhíchi ju napu ruwí ne. Bilé rió 'la sébali olásaká napu nulá ne nila ra'ichali, alué rioka tabilé siné mukumela.

<sup>52</sup> Regá anile 'liko alué ralámuli jurío:

—Jípeko abé 'la bijhíchi mayelia bilé remónisi ajchágame ko mué. 'Ma mukule Abraámi 'lige alué 'ya mochíggame ralámuli napu me'tigá alué Abraámi napu anele Onorúgame, 'lige mueka aní: «Bilé rió 'la sébali olásaká napu nulá ne nila ra'ichali, alué rioka tabilé siné mukumela.» <sup>53</sup> ¿Mueka abé najtékame ju me'tigá alué Abraámi napu ramué rijimala ju, alué napu 'ya asale jena? Alueka 'ma 'ya mukule 'lige alué ralámuli napu ruwime nile napu anele Onorúgame 'ya mochíggame abiénachigó 'ma suwile. ¿Mueka chieri korígó mué bo'nepi?

<sup>54</sup> 'Lige Esúsika anele:

—Bo'né anisáká ne 'we najtékame ko ne, 'lige 'we a'wágame ko ne, wa'lú nígame ko ne a'walí, a'liko tabilé najtékame ju alué ra'ichali. Neka tabiléchigo alarigá anígó. Ne O'nola Onorúgame ju napu aní 'we najtékame ko ne, 'lige alué ju napu ne'chí 'ya iwérali. 'Émika abiena alaníchigó 'emi O'nola ko alué Onorúgame. Aba alué ju napu 'we a'lá niraga eté ne'chí. <sup>55</sup> 'Émika tabilé machí alué Onorúgame nobi neka 'we a'lá machígó. Ne anisáká tabilé machime ko ne alué Wa'lula Onorúgame, 'liko 'we 'yégame nímili ke ne napurigá 'emi. Neka 'láchigo machígó alué Onorúgame 'lige 'la sébali olame ju ne napu ne'chí nulé Onorúgame. <sup>56</sup> 'Emi rijimala, alué napu 'we 'ya bejtéggame nile, Abraámi anilime, 'we ra'salígá asale, alueka 'máchigo 'la machígá asalíggame siné rawé nawámili níligo ne jena wijchimoba. Alueka etele ne'chí, alekeri 'we ra'salále.

<sup>57</sup> 'Lige alué ralámuli juríoka regá anile:

—Mueka pecha malígisa makué bamígame júkó, 'lige mueka 'la etégorí alué

Abraámi. Napu'lige bejtele alué Abraámi jena 'ma we'ká sientio bamí júkuru.

<sup>58</sup>—Neka 'la bijchiá aní —anile Esusi— tabilé 'cho ochérachi Abraámi, neka 'ma jena ajtígéturu. Neka nabí jena ajtime ju.\* Alarigá ju.

<sup>59</sup>'Liko rejté 'wile alué ralámuli jurío Esusi basibumia, nobi Esúsika simile alé nasipa we'ká jágichi ralámuli alé ra'pichí wa'lú re'obachí.

## 9

*Jena ruwimela Esusi sa'wáligo bilé rió tabilé ma'chílime*

<sup>1</sup>'Lige Esusi abisibi 'we eyénale, 'lige alemi enegá etele bilé rió tabilé ma'chílime, alué rioka aba alieri ochérigame nile. <sup>2</sup>'Lige alué Esusi oyérame rukele:

—Mué benírame, ¿chonigá tabilé ma'chílime ochérite ye rió? ¿Cha nokale alué bo'né o'nola 'lige eyela, alekeri gite alarigá ochérale? O ¿alué bo'né 'we resí 'sika ilírome nile?\*

<sup>3</sup>'Lige Esúsika nejele:

—Alué rioka tabilé siné resí 'sika oyame nile napurigá nayúmala, nibilé alué o'nólatiri cha 'sika oyame nile nibilé eyélatiri. Ye rioka tabilé ma'chílime júkuru napurigá ralámuli etémala chiena a'wágame ko Onorúgame, 'lige 'la bijchiá sa'wame ko Onorúgame. <sup>4</sup>Neka 'yóma olágurú jipe. Abirigá sa'wámili júkuru ne napurigá nulá Onorúgame jipe ta'chó sébachi resítiri raweli. Pe 'we sebámili júkuru chátiri raweli, 'lige ta'wesí ralámuli gainámala sa'wá bilé nayume. <sup>5</sup>Ne bijí jena wijchimoba eyena 'we gu'iriga suwábaga ralámuli napurigá 'la machimela chiena a'wágame ka Onorúgame. Napurigá bilé ra'ósali niraga ju ne napurigá alarigá 'la buyásiwa alé resítiri bowechi.

<sup>6</sup>Pe nujubapí alué Esusi napu'lige ra'ichasa, alé wijchí a'kichile 'lige pe'tá we'é wejsole a'kiate, 'lige alué rió tabilé ma'chílime busílachi ujchele. <sup>7</sup>'Lige anele:

—Simigá bisigome alé 'mi wa'lú ba'wichi napu Siloé anilichí ju.

Siloeke pe, «julárigame» aniamé ju.

'Liko Esúsita julásiga alué rió tabilé ma'chílime, 'liko similé 'lige bisigole, 'ma pagole bo'né busila, 'lige napu'lige 'ma ku nawá 'ma ma'chílime nawale. <sup>8</sup>'Liko alé a'bemi riógame napu 'yasi eteme nile alué rió tabilé ma'chílime, anile a'bopi:

—¿Tabilé ye rió ju alué napu i'kilí asagá enomí táame ke?

<sup>9</sup>'Lige jaré anile:

—Alué rió júpeché.

'Lige jaré anile:

—A lalanti júke'é kaka, nobi tabiléchigo alué júkó.

'Lige alué rió bo'né anile:

—Ne júpeché.

<sup>10</sup>'Liko rukéleru:

—¿Churigá 'la ma'chili mué jípeko?

<sup>11</sup>'Lige alué rioka regá nejele:

—Alué rió napu Esusi anilime ju pe'tá we'é wejsó a'kiate 'lige ujché ne busílachi, 'lige aníturu: «Simigá 'mi wa'lú ba'wichi Siloé anilime 'lige bisigówaká.» 'Lige neka yati simíturu alé wa'lú ba'wichi bisigomia. 'Lige 'ma bisigosa ne, yati 'la gayénaturu ne ma'chilia.

<sup>12</sup>'Liko rukéleru:

—¿Koche ajtiko alué rió?

'Liko alué rió anele:

—Neka tabilé machí.

<sup>13</sup>'Liko cha'pigá o'tóleru alué rió napu tabilé ma'chílime nílige alé 'mi napu mochile bariseo. <sup>14</sup>A'lige rawé napu'lige Esusi 'yole alué tabilé ma'chílime wa'lú rawé nile sawalachi rawé napu jurío resíbume nile, alueka tabilé nóchame nile 'lige tabilé 'yome nile a'lige rawé. A'lige alekeri alué ralámuli cha'pile alué rió napu tabilé ma'chílime nílige 'lige o'tóleru 'mi alé napu mochile alué bariseo. <sup>15</sup>Alué bariséoka tabilé ganílile Esusi alieti 'yosa a'lige rawé wa'lú rawé resibulichi, alekeri 'we iwégame rukéleru alué 'yórigame rió churigá 'la ma'chilia. 'Lige alué rioka regá nejele:

—Wejsogá ujché ne busílachi 'lige neka bisigótoru, 'lige 'we a'lá ma'chili ne jipe.

<sup>16</sup>'Liko jaré bariseo anile:

—Alué rioka napu ye 'yole pecha Onorúgamete nulérigime júkó, napugiti pecha nerame kame wa'lú rawé. Alekeri tabilé Onorúgame oyérame júkuru alué rió.

'Lige jaré anile:

—¿Churigá 'la gayénabeché aliena 'la sa'wá napu 'we resí 'sika ilírome ke?

Tabiléchigo 'la a'chigóriga 'nátiga aníleko alué bariséoka. <sup>17</sup>'Liko uchéchigo siné rukéleru alué rió napu tabilé ma'chílime nílige abé 'ya:

—Mueka, ¿chonigó alué rió olagá napu 'yole mué?

'Lige alué rioka anile:

—Neka aníguru pe bilé rió ko napu ruwime ju napu ané Onorúgame.

<sup>18</sup>'Lige alué jurío e'wélala tabilé bijchígale alué rió tabilé ma'chílime nílige 'lige 'yólrigo Esúsita alué rió. 'Liko alué rió o'nola 'lige eyela bayéleru. <sup>19</sup>'Lige rukéleru:

—¿'Emi inolá ju ye rió napu tabilé ma'chílime koriánié 'emi, napu tabilé ma'chílime ochérigame koriánié 'emi? ¿Churigá 'la ma'chilibeché jipe?

\* 8:58 Esusi aní «Neka nabí jena ajtime ju», pe ruigá anile Onorúgame ko bo'né.

\* 9:2 Alué ralámuli Esusi oyérame mayele alué rió tabilé 'cho ochérachi 'ma resítiri alawégame nílige.

<sup>20</sup> Lige eyela 'lige o'nola regá nejele:  
—'La machiáguru ye rió ramué inolá ko 'lige aminami tabilé ma'chílime ochériga 'ya. <sup>21</sup> Tabiléchigo machiágó churigá jipe 'la ma'chília, 'lige aminami tabilé machiáguru chieri 'síligo busila 'yóa. Rukéwagó bo'né, 'ma 'la ruméleké alué 'síligo 'yóa, 'ma wa'lú kame.

<sup>22</sup> Alué eyela 'lige o'nola pe lanile majaga. Wéchigo 'la machíligame mabúwilikó ne'óchiga alué juríote alé u'tá re'obachi napu «sinagoga» anilime ju napuyépiri ralámuli napu bijchigi Esusi Onorúgame te julárigame ko. <sup>23</sup> Alekeri aníá mochile: «Alué bo'né rukéwaguru, 'máchigo wa'lú rió kame.»

<sup>24</sup> 'Liko alué bariseo uchéchigo siné bayele alué rió napu tabilé ma'chílime nílige 'ya, 'lige anele:

—'La ma'chígime rupoa, Onorúgame gastigárimala mué tabilé 'la ruisáká, ramueka 'la machiáguru asíriga wa'lú resítiri 'sísi.

<sup>25</sup> 'Liko alué rioka anile:  
—Neka tabilé machí alarigá ko alué rió aliena resítiri ko. Neka pe bi'lepi tábiri machíguru, ne tabilé ma'chílime kéturu 'lige jípeko 'la ma'chíliguru ne.

<sup>26</sup> Lige uchéchigo siné rukéleru alué rió:  
—¿Churigá 'la sa'wárúkó mué alué riote?

<sup>27</sup> 'Lige alué rioka regá nejele:  
—'Ma ruwí ne, 'émika tabiléchigo bi-jhíginiligó. ¿Chonigá najkíché 'emi napurigá uchéchigo siné ruyewa? ¿'Émichigó alué oyérame gainánili?

<sup>28</sup> 'Liko alué bariseóka asíriga ená anigá ra'íchale alué rió olagá. 'Lige anele:  
—Mueka alué rió oyérame júkuru, 'lige ramueka Moisésí oyérame nírukuru. <sup>29</sup> Ramueka 'we a'lá machiáguru Onorúgame Moisésí 'yuga ra'íchiligo, nobi alué uché bilé rioka tabilé machiaa. Tabilé machiaa alemi bejtégame ko alué rió.

<sup>30</sup> 'Liko alué rió regá nejele:  
—¿'La choninti 'emi? ¿'Émika tacha e'wélala níru? Ye rioka asíriga 'la nóchali nóchiga eyénaguru, 'la sa'wákuru ne'chí. 'Lige 'émika tabilé machíóríguru kochiena ajtígama ko. ¿'Émika tacha machíbeché ye?

<sup>31</sup> 'We a'lá machirúguru Onorúgameka tabilé gepume ko alué ralámuli napu 'we resí nokigá e'yéname ju, Onorúgameka pe alué napu tabilé resí nokigá e'yéname ju, pe aluecho gepume ju, pe aluecho napu 'la e'wame ju napu Onorúgame nulá. <sup>32</sup> Tajsiné akiame kéturu bilé rió Onorúgame a'walila nígame ko napurigá bilé ralámuli sa'wámala tabilé ma'chílime ochérigame. <sup>33</sup> Alué rió tabilé nígame nísaká Onorúgame a'walila 'liko pecha gainámalakó sa'wá bilé rió tabilé ma'chílime ochérigame.

<sup>34</sup> 'Liko alué bariseo anele 'we ayóniga:

—Mueka, asíriga resítiri sulega ochérale, alekeri tabilé ma'chílime ochérale mué. ¿Churigá 'la benírumalawé mué ramué?

'Liko 'ma mabúliuru alé napu e'wélala mochile.

<sup>35</sup> 'Liko alué Esusi akele 'ma mabúliuru alé u'tá re'obachi alué rió napu tabilé ma'chílime nílige, 'lige Esusi simile 'yamia alué rió 'lige 'ma rewísá alué rió, anele:

—¿Mueka 'la bijchigi 'ma nawáligo alué Onorúgame te julárigame 'pa rewagáchika napurigá rió níraga?

<sup>36</sup> 'Lige alué rioka anile:  
—Mué Wa'lula, ne'chí ruyéwagó chieri ka alué napurigá ne 'la níramempá aminami 'la bijchígimempá ne alué rió ra'íchálila.

<sup>37</sup> 'Lige Esúsika nejele:  
—'Ma etiá mué. Alué napu mué 'yuga ra'ícha, alué júkuru. Ne júkuru.

<sup>38</sup> 'Liko alué rioka chojkóbisiga ilíbale alé o'wemi níraga napu ilile Esusi, 'lige anele:

—Mué Wa'lula, neka 'la bijchigi alué ra'íchali napurigá mué aníá aní.  
Alué rioka asíriga 'la níraga etele alué Esusi.

<sup>39</sup> 'Liko anile alué Esusi:  
—Neka jena wijchímoba nawákuru gustisia olamia ralámuli. 'Lige abiena nawá ne 'yomia alué napu tabilé ma'chílime ju, 'lige alué tabilé ma'chílime newamia alué napu 'la ma'chílime ju.

<sup>40</sup> Jaré bariseo napu Esusi si napuíka jale akele alanichi alué Esusi. 'Lige alué bariseo alieti akísá rukele:

—¿Tachiri ra'íchali júpeché alué? ¿Ramuéchigó tabilé ma'chílime níru?

<sup>41</sup> 'Liko Esúsika aminabi ra'íchale regá anigá:

—Tabilé ma'chílime nísaká 'emi, pecha 'emi chojkíla nímelikó wa'lú resi nokágama ka 'emi. 'Émika asíriga 'la ma'chílime kóriguru. Yeka aniame júkuru 'émika 'we a'lá námame ko Onorúgame ra'íchálila, iligá 'émika tabilé sébali olame júkuru napurigá nulá Onorúgame, alekeri 'we chojkíla ju 'emi.

## 10

*Jena ruwimela Esusi bilé tétali ruwíligo bilé bo'elo bo'á neseme*

<sup>1</sup> 'Liko Esusi anile:  
—Bilé go'lé iligéturu rejete tegoka newárigime, 'lige 'yérigame kéturu alué tegoli. 'Lige bilé rió ilime kéturu yochi tebuka. 'Lige bilé rió sébaturu alé go'lechi 'lige alué rió tabilé bajkígéturu alé yochi simiriga, pe re'pami amókami 'máraturu, alué rioka pe bilé rió chigórigame júkuru. <sup>2</sup> Alué bujkégame ka napu bo'á neseme ju 'mimi jami, alueka 'la alé yochi bajkimeli júkuru. <sup>3</sup> 'Lige alué napu tebuka ilime ju alé yochi, alueka

i'púmili júkuru alué bo'á neseme sebasa alé. 'Lige alué bo'aka asírige 'la gepume júkuru alué bo'elo ra'ichálila. 'Lige alueka asírige 'la rewagá bayeme júkuru a'pílipi alué bo'á bo'né bujkula, 'lige alué bo'aka yati buyásime júkuru.\*<sup>4</sup> Napu'lige 'ma suwábaga buyasa alué bo'né bujkula, 'liko alué bo'éloka bajchá ename júkuru 'lige alué bo'aka guwana e'yéname júkuru alué bo'elo najátiga, napugiti 'wéchigo 'la machime kame alekí aníchinio ne'oa.<sup>5</sup> Tabilé siné najátamala alué bo'á bilé ralámuli tabilé machime nísaká alué bo'á alué bo'elo.

<sup>6</sup> Esúsika ye ra'íchali ra'ichame nile nobi ralámulika tabiléchigo námame núlekó alieti ruyame ko ye ra'íchali.

<sup>7</sup> Alekeri Esúsika uchéchigo bilé ra'íchali ruyele. Regá anele:

—Neka 'la bijchiá aní. Neka napurigá bilé yochi napu bo'á simárame ju, pe alarigá ju ne. Yeka aniamé júkuru ralámuli napu ekí 'la moínánilime ju rewagachi, asírige 'la e'wámili júkuru napu ne nulá.<sup>8</sup> Suwábaga rió napu ekí sébale alé go'lechi bajchá ta'chó sébachi ne pe napurigá chigórigame nile, pe alarigá nile alué ralámuli. 'Lige alué bo'aka tabilé e'wame ju alué ralámuli nulachi. Pe a'chigóriga ju alué ne oyérame 'yuga. Alueka tabilé e'wame ju uché jaré ralámuli nulachi, pe ne'chika 'la e'wime ju.<sup>9</sup> Napu'lige alué bo'á 'ma mo'isá alé pachami go'lechi 'liko alué bo'á 'ma tabilé che ikimeli júkuru. Napu'lige buyásisa alué bujkégame 'yuga abiena tabilé che ikimeli ju. Pe a'chigóriga ju ralámuli alué ne'chí oyérame.

<sup>10</sup> › Bilé rió chigórigame ka pe chigomia nawame ju alé go'lechi, pe me'ligá suwábimia suwábaga ajágame. Neka pecha ala'símia nawákó. Neka ralámuli gu'irimia nawákuru napurigá abé 'la ganílga ejperélamala, napurigá 'we a'lá sébali ralámuli nímala.<sup>11</sup> Neka pe napurigá bilé rió bo'elo ju napu 'we a'lá nesérame ju bo'né bujkula bo'á. Bilé rió bujkégame bo'á 'we a'lá neseme ju bujkula, alueka tabilé chéláme ju rekó mukié nemika napu'lige ajágame jami oyame o ralámuli chigórigame chigónilichi alué bo'á alué rió bujkula.<sup>12</sup> Bilé rió pe iligá enomí meka neseme ajágame, alueka tabilé alarigá ju napurigá bukégame rió, napu'lige etea bilé olí (lobo) 'naka enágichi pe a'reme ju bo'á. Pe bo'nepi na'temame ju, alekeri 'másame ju. Tabilé chéláme ju 'lige tabilé na'temame ju alué rió pecha bo'né bujkula kame alué ajágame napu neseka eyena. 'Lige alué olí bo'á me'lísachi 'lige uché jaré

bo'aka 'ma suwábaga ra'lá mo'ibámili júkuru majaga.<sup>13</sup> Alué rioka pe 'másame ju napugiti alué rioka péchigo nóchame kame, tabilé chéláme ju rekó alué ajágame o'lite chigóriga pecha bo'né bujkula kame. Pe enomí meka nóchame kame.

<sup>14</sup> › Neka asírige 'la repume ju alué ne'chí oyérame ralámuli. Neka asírige 'la machíguru alué ne'chí oyérame ko, 'lige alué ne'chí oyérameka asírige 'la machíguru ne'chí,<sup>15</sup> napurigá ne O'nola 'we a'lá machí ne'chí, 'lige néchigó 'we a'lá machí ne bo'né O'nola. Neka mukumeli júkuru alué ne'chí oyérame gu'iriga, a'ligeko 'ma listo ajti ne mukumea.<sup>16</sup> Uchéchigo jaré ralámuli mochí, alué napu tabilé ralámuli jurío ju. Aluéchigó abiena ne'chí oyéramili ju, alueka gepúmili júkuru napurigá aní ne, 'lige abiena ne'chí oyérame gainámala a'chigóriga napurigá alué ralámuli jurío. Neka Wa'lula nímili júkuru suwábaga ralámuli nuleme, napurigá bilé bo'á neseme.

<sup>17</sup> › Neka 'ma listo ajtikuru mukumea 'lige uchéchigo siné naremia alawá napurigá uchéchigo ajagá asimémpá ne. Alekeri ne O'nola Onorúgame 'we galé ne'chí.<sup>18</sup> Ta'wesi me'limela ne'chí, ne tabilé nejisaká lisenisia napurigá ne'chí me'limela. Neka 'la lisenisia níkuru, neka mukumeli júkuru napu'lige ne bo'né mukunali, 'lige abiena 'la lisenisia nígame ju ne napurigá ku ajánamala ne. Alué ne O'nola Onorúgame nulá ye 'nátili.

<sup>19</sup> Napu'lige alué ralámuli jurío akisá ye ra'íchali, ta'mé 'la ganílga ejtebile.<sup>20</sup> Jaré alué ralámuli jurío regá anile:

—Alueka bilé remónisi alawala ajchágame ju pachágana, pe lo'í ju. ¿Chonigá gepúlibeché?

<sup>21</sup> 'Lige jaré anile:

—Bilé rió u'tabela remónisi alawala ajchágame nísaká pachágana pecha aliena 'la semátiri ra'ichámilikó napurigá ra'icha ye rió. Bilé u'tabela remónisika pecha gainámalogó bilé ralámuli tabilé ma'chílime sa'wá.

*Jena ruwimela jaré ralámuli jurío tabilé galeme nítigo Esusi*

<sup>22</sup> Romó nile a'lige. Alé we'ká riógichi Rusaleni anilichi wa'lú piesta nerule, alué piesta nélálime aliéniko gatélirigo alué wa'lú re'obá,† nabí bamí piesta newame nile a'lige rawé.<sup>23</sup> 'Lige Esúsika alé wa'lú re'obachi ra'pichí eyénale napu bilé bortali ilile napu Salomóni anilime nile alué bortali.<sup>24</sup> 'Liko we'ká ralámuli jurío napuile

\* **10:3** Jaré bo'á neseme mo'ale alé go'lechi 'lige melénala be'á a'pili bayele bo'á a'boi bujkula. Alué bo'á nesemeka bajchá ename nile, tase napurigá jena iwéerachi. † **10:22** 'We 'ya bilé sientto na baisá makué maligi bamí ta'chó ochérachi Esusi, alué ralámuli Siria ejperégame 'we resítiri nóchale alé wa'lú re'obachi pachá tabilé niraga Onorúgame. 'Lige abé a'kinana alué ralámuli jurío 'la gatsa alué re'obá 'lige 'ma suwénasa, newale wa'lú piesta napu «hanukká» anilime nile.



noligá alé napu ilile Esusi rukéniliga uché rajpé. 'Lige rukele:

—¿Chiéniko ruimé olá mué chieri ko mué bo'né? 'La bijchíá ruipóguru, ¿mué ju Kristo napu buinámala ralámuli chátiri bowechi?

<sup>25</sup> 'Lige Esúsika nejele:

—'Ma ruwí ne, tabiléchigo bijchígíniligó 'emi. Ne O'nola Onorúgame 'ya ne'chí bilé nóchali napurigá 'we a'lá semátiri tábiri nochámala ne bo'né 'nátaga napu ta'wesi rió newame ju. 'Emi 'ma etiáturu ne alieri nóchachi, alekeri 'la machiati kárékuru chieri ko ne. <sup>26</sup> Nobi 'émika tabilé bijchígigo napu ne ruwí, pecha ne'chí oyérame kame. 'Émika napurigá bo'á tabilé ne bujkula, alarigá ju 'emi. <sup>27</sup> Alué bo'á 'la ne bujkúlaka, alueka asíriga 'la machime ju ne ra'ichálila, alekeri 'la najátame ju ne'chí. <sup>28</sup> Neka alawá 'yáguru alué ne'chí oyérame napurigá uchéchigo siné ku ajánamala napu'lige suwisá, 'lige alué ne'chí oyérame ka pecha 'wesi nejpósimalagó. <sup>29</sup> Alué ne'chí oyérame ne O'nola nejkuru. Alueka asíriga wa'lú júkuru suwábaga me'tigá, napu ekí alué nilaka pecha 'wesi umabámalawé bujea, napugiti bo'né neseme kame. <sup>30</sup> Ne 'lige ne O'nola si pe bi'lepi 'nátuli 'nátame niru.

<sup>31</sup> 'Liko alué ralámuli bariseo uchéchigo siné bajsibúnilile alué Esusi napurigá abé i'bé. <sup>32</sup> 'Lige Esúsika anele:

—Neka asíriga we'ká semátiri nóchali nóchaturu napurigá 'emi etémala, O'nó Onorúgame a'walílate newáturu ne alué semátiri nóchali. ¿Tachiri nóchame korigá bajsibúwaché ne?

<sup>33</sup> 'Lige alué ralámuli juríoka regá nejele:

—Tabilé alekeri gite bajsibuwa mué 'we semátiri tábiri newigáriká. Bajsibuwa mué napugiti pecha nirame kame mué alué Onorúgame. Mueka pe apiépiri rió ju, pe alarigá júkuru, pe iligá napurigá Onorúgame neraga ra'icha mué, peka Onorúgame ke, pe iligá rió ke.

<sup>34</sup> 'Lige Esúsika regá anile:

—Alué 'emi nila ra'ichalika regá aní, alué napu Onorúgame anilige: «'Émika napurigá Onorúgame júkuru.» <sup>35</sup> 'We 'la machiáguru alué napurigá anile Onorúgame 'we 'ya ('lige napu anile Onorúgame 'ya abiena sirbe ju jipe). Onorúgame anele alué ralámuli «napurigá Onorúgame ju 'emi», alué ralámuli napu ruwime nile napu anele Onorúgame. <sup>36</sup> 'Lige alarigá nisa, 'lige ¿chonigá gastigáriniliché ne'chí Onorúgame Inolá korichi ne bo'né? Onorúgameka ne'chí wanápale 'lige alekeri júlale ne'chí jékana wijchimoba. ¿Chonigá laniché 'émika ne tabilé nirame ko Onorúgame? <sup>37</sup> Ne tabilé sébali olásaká napu najkí ne O'nola, 'liko tabilé bijchígilime júkuru ne ra'ichálila. <sup>38</sup> Tabilé bijchígíliká napu ne

aní, abirigáchigo 'la bijchígilime júkó napu ne sébali olá napu Onorúgame najkí. Siné kachi 'la e'wame nísaká ne napu nulá alué Onorúgame, 'liko 'emi níruga 'la bijchígilime júkuru ne wa'lú a'walí nígame ko napu Onorúgame 'yale ne'chí. Aminami neka 'we a'lá 'nátaga eyéname ju Onorúgame na'tálila.

<sup>39</sup> 'Lige uchéchigo siné cha'pináilile, pe iligá tabilé cha'píliuru Esusi.

<sup>40</sup> 'Liko alué Esusi simile alé bakochi na'lebo 'nálige Jorani anilichi 'omi niraga napu rayénali ma'chínime ju, 'lige alé sébale Esusi (napu Betánea anilichi ju). Alé ju bilena napu 'ya asale Juani rewará ralámuli. <sup>41</sup> We'ká ralámuli simíbale alemi e'nemia Esusi, 'lige anile a'boi ra'ichaga:

—Juánika tajsiné newáturu 'we semátiri nóchali napurigá Esusi, tabilé siné sa'wale ralámuli nayúkame. Suwábaga napu ra'ichale Juani alué Esusi olagá, 'we a'lá bijchíá nilekuru.

<sup>42</sup> We'ká ralámuli napu ekí alé napuile 'we bijchígale napu anile Esusi alé, aminami asíriga 'la e'wele napu anile.

## 11

### *Jena ruwimela mukúligo Lasro*

<sup>1</sup> Bilé rió asale Lasro anilime, 'we nayua, 'lige alué rió Betania anilichi pe'kabi riógichi ejiro Jurea bejtégame nile. Alué umugí Lasro go'chila María anilime nile bilé, 'lige Marta anilime nile uché bilé, abiena alé ejperégame nile. <sup>2</sup> Ye María 'símili nile alué napu botéachi manígime a'kinana ro'émili nile alué Esusi ronola, ba'wí 'we semá júkame, 'lige yati wakémili nile bo'né gupálate alué bo'né María. <sup>3</sup> 'Lige alué oká umugí júlale jaré rió Esusi ruyéniliga:

—Mué Wa'lula, alemi jula ramué mué ruyénaliga 'we nayua bo'igó alué rió napu mué gompaniérola ju.

<sup>4</sup> Napu'lige alué Esusi akisá alanichi ralámuli, anile:

—Mukumeli júkuru nobi tabiléchigo mukugá rejpímili júkó. Alué rioka 'we a'wágame nayulí chujkélekuru pe napurigá machiboa chiena 'la semá 'sime ko Onorúgame, 'lige abiena chiena 'la semá 'sime ko Onorúgame Inolá.

<sup>5</sup> Esusi 'we galegá eteme nile alué bakíá rijimá, <sup>6</sup> nobi napu'lige Esusi akisá ra'ichali 'we nayua bo'igó Lasro, tabilé yati simile e'nemia, uchéchigo oká rawé rejpíle alé napu asálige. <sup>7</sup> 'Liko anele alué oyérame:

—Nabá uchéchigo siné alé 'mi Jurea anilichi ejiro.

<sup>8</sup> 'Liko alué oyérame anele:

—Mué Benírame, pe kulírikáchi alué ralámuli jurío alé mochígime mué me'linálituru bajsibuga. ¿Chonigá uchéchigo ku alé siminali che mué?

<sup>9</sup> 'Liko Esúsika nejele:

—Makué oká 'ora ma'chigá ilime ju ra'ósiga. 'La rawé e'yéniliká tabilé toroka e'yéniwa w'échigo 'la ma'chigá ilime kame raweka. <sup>10</sup> Rukó e'yéniliká asíriga toroka e'yéniwa napugiti pecha ma'chigá ilime kame rukóká.\*

<sup>11</sup> 'Lige Esusi uchéchigo rajpé anile:

—Alué Lasro ne gompaniérola ka, 'ma go-jhílekuru, nobi neka 'ma ajchámalogó.

<sup>12</sup> 'Liko alué oyérameka regá anile:

—Mué Wa'lula, ¿pe gojchigá bo'isáká, a'liko 'la sa'wimela?

<sup>13</sup> Bo'né Esúsika anigá anile: «'Ma mukugá bo'í.» 'Lige alué oyérameka 'la bijchigale pe gojchigá bo'igó alué Lasro. Tabilé námale ralámuli alarigá ra'ichachi Esusi. <sup>14</sup> 'Liko 'we a'lá ma'chígime ruyele:

—Lásroka 'ma mukúlekuru. <sup>15</sup> Ra'sá la ne tabilé asisá alé napu'lige Lasro mukuchi. Alarigá 'we a'lá ju napurigá bijchígimale Onorúgame a'walí 'yame ko ne'chí. Nabá e'newa.

<sup>16</sup> 'Liko alué Romasi napu Kuate anilime nílige, anile uché jaré oyérame 'yuga:

—Ramué abiena simasa Esusi 'yuga, alué ralámuli jurío me'limela ramué. Chu'simalawé rekó suwiyae ramué, Esusi 'yuga simawa.

<sup>17</sup> 'Liko napu'lige sebasa alé Betania anilichi, alué Lásroka 'ma naó rawé bo'ile mukugá alé resoquí ewachi. <sup>18</sup> Alé Betania pe a'bé nile Rusaleni anilichi pe bakiá kilómetro niraga. <sup>19</sup> We'ká ralámuli jurío e'yénale alemi e'néniga alué María 'lige alué Marta napurigá tabilé chélámala alué bonila mukusá. <sup>20</sup> Napu'lige alué Marta akisá aleka enegaráo Esusi, yati ma'chínale najtepania. Alué Mariaka pe galírale rejpile. <sup>21</sup> 'Liko alué Marta anele alué Esusi:

—Mué Wa'lula, mué jena asisáká, pecha mukumeli ke ko ne bonila. <sup>22</sup> Nobi neka 'láchigo machígó Onorúgame suwábaga ne-jimio napu mué tani.

<sup>23</sup> 'Lige Esúsika anele:

—Mué bonílaka ku ajánamala.

<sup>24</sup> 'Liko alué Marta anile:

—Neka 'la machí ku ajánimio napu'lige 'ma guwichí kachi napu'lige Onorúgame nawasa ralámuli gustisia olamia.

<sup>25</sup> 'Lige Esusi anele:

—Ne júkuru ralámuli ku 'yáame alawá napu'lige suwisá napurigá ku ajagá mochímala, 'lige aminami ne ju ralámuli a'walí 'yame napurigá 'we ganluga ejperélamala. Tabilé chéré rekó bilé rió mukugé, pe 'la bijchígime nísaká Wa'lula ko ne, 'liko 'la 'yámala ne alawá napu'lige mukusá. <sup>26</sup> Suwábaga napu eki nígame

ju ne alawala 'lige aminami napu eki 'la bijchígime ju ne ra'ichálila, rekó mukugé, bo'né alawálaka tabiléchigo mukumélígó. ¿'La bijchigi mué napu ne aní?

<sup>27</sup> 'Lige Mártaka anele:

—Juli mué wa'lula, neka 'we a'lá bijchigi mué ko Kristo anilime Onorúgame Inolá, alué napu nawámili nílige jena wijchimoba.

<sup>28</sup> Abé we'liko napu'lige 'ma ra'ichasa Marta, 'ma simile María bayemia. 'Lige i'kilí ra'ichale tabilé akériga uché jaré ralámuli. Regá anele:

—Jena ajtí alué benírame, 'lige mué bayea ajtkuru.

<sup>29</sup> Napu'lige akisá alué ra'ichali yati niraga ilísale 'lige yati simile alé napu ajtile alué Esusi. <sup>30</sup> 'Lige Esusi tabilé 'cho sébalige alé pe'kabi riógichi, alé 'mi ajtile abajá napu najtépilige alué Marta. <sup>31</sup> 'Lige alué ralámuli jurío napu María 'yuga mochile alé María galilachi, napu'lige etesa María ilísachi 'lige simichi ma'chimi, yati simíbalechigó alué ralámuli jurío María najátasia. Alué ralámuli juríoka pe 'mimi simea mayele resoquí nalamia napu bo'ile Lasro, alarigá mayele.

<sup>32</sup> 'Liko alué María napu'lige sebasa alé Esusi ajtígichi, yati niraga choj'kóbisiga ilíbale alé a'bemi Esusi ronólachi anigá nalale:

—Mué Wa'lula, mué jena asisáká pecha mukumeli ke ko ne bonila.

<sup>33</sup> Napu'lige Esusi etesa alué María nalachi, 'lige etélechigó alué ralámuli jurío abiena nalásiga e'yénigo, 'lige asíriga sewele Esusi, <sup>34</sup> 'lige anile:

—¿Kochiena rekaru ko alué mukúgame?

'Lige anéleru:

—Mué Wa'lula, aka simáwa'é e'newa.

<sup>35</sup> 'Lige Esúsika 'ma nalálechigó. <sup>36</sup> Alekeri anile alué ralámuli jurío:

—Alueka asíriga 'la gompaniérola níligeleku alué Lasro.

<sup>37</sup> Nobi jaréchigo ralámuli jurío se'winá anile ko, regá anile:

—Alueka bilé tabilé ma'chúlime 'la ku sa'wáturu. ¿Chonigá tabilé 'yóleché alué Lasro napurigá tabilé mukumela?

<sup>38</sup> 'Lige Esusi alé resoquí sébale alé ewachi napu bo'ilige alué Lasro, 'lige uchéchigo siné 'we sewele, asíriga we'ká 'nátale. 'Lige bilé wa'lú rejté ajcháriga ajtile alé resoquí yochi.

<sup>39</sup> 'Lige anile alué Esusi:

—Se'wí ajchawa alué rejté.

'Liko anile alué Marta alué mukúgame go'chila:

—Mué Wa'lula, asíriga cha jubáleké alé pachami, 'máchigo naó rawé kame mukusá.

<sup>40</sup> 'Lige Esúsika anele:

\* 11:10 Yeka aniame júkuru alué Esusi oyérame ka tabilé che ikimeli ko. Alué chátiri ralámuli jurío tabilé chibi olámili ju rekó chibi olánile, napu'lige Onorúgame lisenisia 'yasa a'lige kulí cha nokimela.

—Ne 'ma anéturu mué 'la bijchígasaká napurigá aní ne, 'liko 'la machimela mué chiena a'wágame ko Onorúgame.

<sup>41</sup> 'Liko 'ma se'wí ajchale alué wa'lú rejté. 'Lige alué Esusi 'pa rewagachi e'negá iligá anile:

—Mué O'nó, wa'lú cheliera 'ya ne mué, mué 'we alá semáriga gepúmpá ne ra'íchálila. <sup>42</sup> Neka 'la machí mué nabí 'la akeo ne'chí. Pe yecho aní ne napurigá ye ralámuli 'la machimela ye 'nátili, napurigá 'la bijchígimempá mué 'síligo ne'chí jula.

<sup>43</sup> 'Lige abé i'libeko ye ra'ichasa, e'wele ra'íchale:

—¡Mué Lasro, yati ma'china!

<sup>44</sup> 'Lige 'ma ma'chínale alué napu mukúlige. 'Lige bochígimi o'póligime nile asíriga we'lí chinite. 'Lige mo'chí bilé banito o'póligime nile. 'Lige Esusi anele alué ralámuli:

—'Ma bujewa ye chiní 'lige banito abiena bujewa, 'lige a'rewa simichi.

*Jena ruwimela bariseo Esusi me'lináligo*

<sup>45</sup> 'Lige alieti etega we'ká ralámuli jurío napu napu'lige María bejtélachi 'la bijchígale Onorúgame Inolá ko alué Esusi. <sup>46</sup> Nobi jaréchigo pe iligá bariseo 'yuga ra'ichamia simíbale ko. 'Lige ruyele napu 'sile Esusi. <sup>47</sup> 'Lige jaré bariseo 'lige alué e'wélala balé júlae napurigá napabúnliga alué uché jaré e'wélala, 'lige anile a'boi ra'íchaga:

—¿Chonokiboa? Ye rioka asíriga i'kirú 'siá simíguru tabilé siné etérume. <sup>48</sup> Arésaká ye rió napurigá aminabi alieri 'símala 'liko asíriga we'ká ralámuli oyéramala ye rió, a'lige alué sontalo romano napu jena nulame ju 'ma tabilé elámala napurigá nocha mochímala ramué jena wa'lú re'obachi 'lige aminami bochígimi jena Israeli.

<sup>49</sup> 'Lige alué bilé Kaipasi anilime nile, alué napu wa'lula balé nile bi'neli neyúruga nulame 'ya a'lige bamí, alueka anile:

—'Émika tabilé machime ju. <sup>50</sup> Abé 'la ju bi'lepi rió mukusá, uché jaré tabilé suwisá 'la ju. ¿Tabilé machí 'emi ye 'nátili?

<sup>51</sup> Alueka tabilé bo'né 'nátalite anile ye ra'íchali. Alué nile wa'lula balé, alekeri Onorúgame 'yale 'nátili napurigá 'la gainámala ruiyá a'kinana mukumeo Esusi alué ralámuli jurío gu'iriga. <sup>52</sup> 'Lige abiena alué Esusi mukugá wa'lú nejkúramili ju uché jaré ralámuli 'yuga. Asíriga we'ká ralámuli gu'irimili ju Onorúgame 'kúchila napu ekí epperégame ju jena wijchimoba. Nejkúramili ju napurigá 'la bi'lepi 'nátame nímala Onorúgame na'tálichacho. <sup>53</sup> 'Liko a'lige rawé alué jurío e'wélala 'we alá 'nátale alarigá me'liati ko alué Esusi.

<sup>54</sup> Alekeri alué Esusi 'ma tabilé 'me eyénale alé we'ká ralámuli jurío mochígichi. Uché

bilena we'ká riógichi simile alé a'bemi napu tabilé we'ká mochile alué Esusi me'linálime, alé pe'kabi riógachika Epraíni anilichi nile alé a'bé wa'lú gawí wakígachi napu tabilé 'me u'kume nile. Alé asale Esusi alué ralámuli oyérame 'yuga.

<sup>55</sup> Pe u'kabi rawé rokáréle napurigá sebámala ralámuli jurío piéstala alué Páskua anilime piesta.† Asíriga we'ká ralámuli simíbale alé 'pa Rusaleni anilichi ba'wíchí mo'ímea ta'chó sébachi alué piesta, napurigá 'la gainawa bajkiá alé wa'lú re'obachi. <sup>56</sup> 'Lige ralámulika 'we 'yaga e'yénale Esusi. Napu'lige ra'icha jale alé wa'lú re'obachi ra'pichí, regá rukigá jarale a'bopi:

—¿'Émika choniágó? ¿Pala nawamio mayelia 'émika Esusi napu'lige nerúgichi alué piesta?

<sup>57</sup> Alué bariseo 'lige alué e'wélala balé galírale bajchamio olale Esusi, alekeri júlae jaré ralámuli rukénliga 'la machísaká 'la rumémpá koche ajtigó Esusi, 'lige ruyésiga pe cha'pináliga.

## 12

*Jena ruwimela María ro'éligo 'we semá júkame ba'wí Esusi ronólachi*

<sup>1</sup> Ujsani rawé kachi bajchabé ta'chó sébachi alué piesta, Esusi uchéchigo simile alé Betania napu bejtégame nile alué Lasro, alué napu Esusi ku ajánalige napu'lige mukúlige alué Lasro. <sup>2</sup> 'Lige go'ame newale alé Lasro bejtélachi napurigá Esusi go'mela, 'lige uchéchigo jaré bayele. Alué Marta nejkúrale go'ame 'yaa ralámuli. <sup>3</sup> 'Lige María ba'wí a'pale nasípasi litro neraga 'we semá júkame ba'wí. Alué ba'wí 'we najteme nile. 'Lige Esusi ronólachi ro'ele, 'lige bo'né gupálate wakele. Bochígimi pachá galírale 'we semá juka ilíbale. <sup>4</sup> 'Lige napu'lige alué go'ame go'yá mochígichi ralámuli, alé asale alué Jurasí Iskariote anilime, Simoni inolá. Alué rioka bilé nile alué makué oká rió napu Esusi oyérame nile. 'Lige alué Jurasí 'simili nile alué Esusi ne'já napurigá cha olawa alué Esusi saílate. Anile:

<sup>5</sup> —¿Chonigá tabilé ralinérupeché ye ba'wí 'we semá júkame napurigá alué enomí tabilé nígame ralámuli kógiwa? Asíriga najteme júkuru alué ba'wí semá júkame, napu ekí meme ju bilé rió bilé bamí nóchiga.

<sup>6</sup> Jurásika pecha 'la ralámuli tabilé nígame na'temaka aníleko, alueka pe lanílekuru napugiti pe chigórigame nígame 'sika ania, pe bo'né cha'pináliga anile alué enomí. Alueka nile enomí ajchala repume napu ajchame nile alué makué oká rió Esusi oyérame, 'lige chigome nile alué Jurasí alué enomí. <sup>7</sup> 'Liko Esúsika anele:

† 11:55 E'nesi glosario «Pascua».

—Aréwagó. Ye mukika 'ma bajchabé niraga ro'éguru ne'chí alué ba'wí 'we semá júkame napu ro'émili ju ne'chí napu'lige ne mukú. <sup>8</sup> Alué ralámuli tabilé nígame senibí 'emi 'yuga mochímala, nobi neka tabiléchigo nabí 'yuga asiméligó 'emi.

<sup>9</sup> We'ká jurío akele Esusi alemi ajtigáráo, 'lige simíbale e'nemia. 'Lige abiena e'nema olale alué napu Lasro anilime nile, alué napu ku ajánilige Esusi. <sup>10</sup> Alué e'wélala balé 'we a'lá ra'íchale a'bopi, abiena me'liméorile Lasro. <sup>11</sup> We'ká alué jurío asíriga 'la niraletesa Esusi 'yochi alué Lasro, 'lige alué juríoka 'máchigo 'la overa mochíligame alué Esusi. Alekeri alué e'wélala balé 'ma me'lináilile alué Lasro 'lige Esúsitiri.

*Jena ruwimela we'ká ralámuli simíbaligo Esusi e'nemia*

<sup>12</sup> 'Lige melénala rawé Esusi 'mimi Rusaleni anilichi neraga enale. We'ká ralámuli mochile alé Rusaleni napugiti piesta nerúligime. Napu'lige akisá alué ralámuli enegáráo Esusi, <sup>13</sup> rajkú sawala o'ká simíbale najtepamia, 'lige a'wágame ra'íchaga regá anile:

—¡Hosana (salva)! '¡We a'lá ju Onorúgame! '¡We a'lá ju alué Onorúgamete julárigame! '¡We a'lá júkuru alué Wa'lula alué ralámuli Israeli epperégame nuleme!

<sup>14</sup> 'Lige Esúsika bilé bulito majalégame asagá enale. Alarigá nile napurigá anilige Onorúgame ra'ichálila 'we 'ya. Regá anile:

<sup>15</sup> Tase majawa 'emi ralámuli jena Rusaleni mochígame.

Aleka ená wa'lula mué nuleme bulito ranala asagá.\*

<sup>16</sup> Alué Esusi oyérameka tabilé námale tachiri ruyame ko alué ra'íchali Onorúgame ra'ichálila churigá ko Esusi, 'lige a'kinánaka 'la námale. Napu'lige Esusi uchéchigo siné naresa alawá napu'lige mukusá, 'liko alué oyérame 'la námale ye ra'íchali 'la ruwíligo churigá 'simio alué Esusi. 'La nélále bijchiá a'chigóruga níligo napurigá anilige Onorúgame ra'ichálila 'we 'ya.

<sup>17</sup> We'ká ralámuli sébale alé napu enale Esusi bulito asagá napugiti ralámuli etéligame napu'lige Esusi ku ajánilige Lasro. Alué napu etele simíbale ra'ichasia, 'lige we'ká ralámuli akele. <sup>18</sup> Alekeri we'ká jsile alé Esusi e'nemia. <sup>19</sup> 'Lige alekeri alué bariseo anile a'boi ra'íchiga pe Esusi ayóniga, regá anile:

—¡Alué rioka 'ma neyúraguru! ¡Suwábaga ralámuli 'ma alué rió oyéraguru!

*Jena ruwimela jaré ralámuli griego ra'ichame Esusi 'yaga e'yéniligo*

<sup>20</sup> 'Lige jaré ralámuli sébale alé Rusaleni piesta nerúgichi Onorúgame niramia. Griego ra'ichame nile alué ralámuli. <sup>21</sup> 'Lige

a'bé jábale Belipe anilime rió ilígichi. Alué Belípeka alé Betsáira anilichi bejtégame nile ejiro Galilea anilichi. Alueka Esusi oyérame nile. 'Lige alué jaré rió regá anele:

—Mué rió, ramueka Esusi si ra'ichamia jsirú.

<sup>22</sup> 'Lige simile Belipe 'lige Antresi ruyele, 'lige okaka simíbale Esusi ruyemia. <sup>23</sup> 'Lige Esúsika anele:

—Ne ju alué rió napu nawágame ju 'pa rewagáchika napurigá rió neraga. Ya 'ma sébaguru raweli napurigá ralámuli ne'chí etémala churigá ko ne. Asíriga 'la niraga etémala Onorúgame ne'chí. <sup>24</sup> Jena ruimé ne bilé ra'íchali. 'We a'lá bijchiá ju napu ruwí ye ra'íchali. Bilé ri'ligó tabilé we'echi echiruga asisáká, pecha ya'wime júkó. 'Lige tabilé nerúlumala napurigá 'wiwa. Napu'lige 'la we'ete o'pólga echiruga asisáká, 'liko 'we a'lá ya'wimela. Neka napurigá ri'ligó rakala alarigá ju ne. <sup>25</sup> Ralámuli jena wijchimoa mochígame napu 'we nígame ju asíriga ganíliga epperégame ju aminacho 'nata tabiri tábiri korua nobi a'kinana suwábaga tábiri tabilé niga mochíbamala. Alué ralámuli napu tabilé 'nátame ju tabiri tábiri niga asinálime, alueka abisibi 'we a'lá ganíliga bejtégame ju jena wijchimoba 'lige abiena 'pa rewagachi. <sup>26</sup> Bilé 'la nejkúrínilisa nóchame niraga ne 'yuga, alueka ne'chí najátimili júkuru. Napu ne ajtí, alé simámili júkuru alué nóchamechigó. 'Lige ne O'nólaka asíriga 'la niraga etémala alué ne'chí gu'írime.

*Jena ruwimela Esusi ruwíligo churigá mukímeo bo'né*

<sup>27</sup> 'Lige Esusi aminabi anile:

—Jípeko asíriga we'ká 'nata ne. We'ká 'nata ajtí ne alakímeo ne. ¿Chonimela ne? ¿Tánamala ne O'nola Onorúgame napurigá tabilé che ikimela ne napu'lige resí ikimeli ju ne pe 'we? Tabilé tánamala ne alieti. Neka jena wijchimoba nawákuru resí ikímea.

<sup>28</sup> 'Liko Esusi anele Onorúgame:

—Mué O'nó, ralámuli etériwa chiena 'la semá 'sime ko mué.

'Liko Onorúgame 'pa rewigáchika, regá anile:

—Neka 'ma eteri ralámuli aliena 'la semá 'sime ko ne, 'lige uchéchigo siné etérimio olá ne.

<sup>29</sup> Ralámuli alé jágame akele alé alué ra'íchali. Jaré bilé re'ome aniórile 'pa rewagachi. 'Lige jaré bilé santo ánjeli ra'icha orile.

<sup>30</sup> 'Liko anile alué Esusi:

—Onorúgameka pecha ne'chí gu'iriga anile ko e'wele ra'icha. Alueka e'wele ra'ichalekuru napurigá 'emi akimela. <sup>31</sup> 'Ma pe'wé nawámili ko Onorúgame gustisia olámia. 'Ma pe'wé nawámala Onorúgame

\* 12:15 E'nesi Zacarías 9:9.

alué wa'lula Remónisi rekábamia, alué napu nulá ajtí jena wijchimoba. <sup>32</sup> Re'pá bilé gulusichi ujchásiga ne, suwábaga ralámuli machimela chieri ko ne.

<sup>33</sup> Alarigá anile Esusi napurigá machimémpá ralámuli alarigá mukumeo. <sup>34</sup> Lige ralámuli anile:

—Alué Onorúgame ra'ichálila 'ya nerúgame 'we a'lá ruwime ju alué rió napu ramué buinámili ju alé resítiri bowechi, alué rió 'la nabí bejtélímili ju. Lige ¿chonigá laní mué alué rewigáchika nawágame gulusichi chujkugá mukumeli ko? ¿Chieri júpaché 'lige alué rió 'pa rewigáchika nawágame?

<sup>35</sup> Lige Esúsika anile:

—Alué 'we a'lá nejkúramiliká napurigá 'we a'lá na'támala 'erni 'ma pe u'kabi rawé asimeli ju jena napurigá ra'ósali. 'La alué 'yuga na'tálime júkuru bijí jena ajtigachi alué, napurigá tabilé neyúramala alué chátiri 'nátili. Bilé rió chátiri 'nátiga oyame ka tabilé machime ju alemi enegó bo'né. Alueka napurigá bilé rió rukó oyame neraga ju, nobi bilé rió 'la e'wame ka ne ra'ichálila, alueka 'la rawé neraga eyéname ju. <sup>36</sup> Ne júkuru abé 'la 'nátili nejime. Bijí jena asagá, 'la bijchígilime júkuru ne ra'ichálila napurigá 'la Onorúgame 'kúchila niwa Onorúgame na'tálila 'nátame.

Napu'lige 'ma guwárisa ra'icha, 'ma simile, 'ma chíbale, 'lige tabilé 'wesi ralámuli etele.

*Jena ruwimela jaré ralámuli jurío tabilé bijchígigó Esusi ko Onorúgamete julárigame*

<sup>37</sup> Esúsika pe bo'né 'nátiga e'karúgame semati newale, nobi ralámulika tabilé bijchígili ko Onorúgamete julárigame nílugo Esusi. <sup>38</sup> Alarigá nímili nilekuru, asíriga 'ya osirúgame nilekuru alué osilí napu osálige alué Isaiási anilime rió napu ruwime nile napu anele Onorúgame. Regá anime nile:

Mué Wa'lula, ralámulika tabilé bijchigi ramué ra'ichálila.

¿Chieri ralámuli etiágó chiena a'wágame ka mué?

<sup>39</sup> Alué Isaiási abiena osale chonigá tabilé bijchígiga alué ralámuli. Anile:

<sup>40</sup> Onorúgame bo'né alarigá rekile 'nátili napurigá tabilé námamala, napurigá siego niraga mochímala, napurigá tabilé námamala alué 'we a'lá semátiri 'nátili napurigá tabilé Onorúgame oyérame nímala, 'lige napurigá neka tabilé buinámala resítiri bowechi.

<sup>41</sup> Alanile Isaiási Onorúgame etérligime. 'Lige etele Esusi ta'chó nawachi, etele nawamia 'we semáriga nochamia jena wijchimoba.

<sup>42</sup> We'ká ralámuli jurío bijchígale Esusi ra'ichálila. We'ká alué jurío e'wélala 'la

bijchígale, pe iligá tabilé che anile napugiti 'wéchigo majá mochíligame alué bariseo. 'Nátale bariseo mabúnilia mayele alé u'tá re'obachi «sinagoga» anlichí mochígichi. <sup>43</sup> Alué e'wélalaka najkile napurigá 'la niraga etémala ralámuli alué a'bopi, tabilé chélále rekó Onorúgame ta nirae.

*Jena ruwimela Esusi ruwíligo alué napu 'we a'lá nirame ju Esusi abiena nirame ko Onorúgame*

<sup>44</sup> Liko a'wágame ra'ichale Esusi:

—Napu'lige bilé rió ne'chí oyérame, tabilé ne'chicho oyérame ju, abiena oyérame ju napu ne'chí júlale 'pa rewagáchika.

<sup>45</sup> Napu'lige bilé rió ne'chí etee abiena eté alué napu ne'chí júlale 'pa rewagáchika.

<sup>46</sup> Neka pe napurigá ra'ósali ju. Neka jena wijchimoba nawákuru ralámuli gu'irimia napurigá tabilé chonárale e'yénamala. <sup>47</sup> Ne ra'ichálila gepume ka 'lige tabilé e'wásaká alué ra'ichali, neka tabilé alué ju napu gustisia olámili ju alué ralámuli.

Neka ralámuli buinamia nawákuru alé resítiri 'nátalichi. <sup>48</sup> Bilé ralámuli tabilé oyérame ne'chí 'lige aminami tabilé e'wasa napu ne nulá, Onorúgame gastigárimili ju alué ralámuli.

Onorúgameka ruyémala tabilé bijchígigó alué ra'ichali napu ne ruyé.

<sup>49</sup> Neka pecha bo'né 'nátiga ra'ichakó. Alué ne O'nola Onorúgame napu ne'chí júlale, alué nuláuru tachiri rupoa 'lige churigá rupoa. <sup>50</sup> Alué ra'ichalika napu ne ruyéleru Onorúgamete napurigá ra'ichámala ne, alué ra'ichalika ju napurigá ralámuli 'la nabí ejperélamala 'pa rewagachi. Alué napu ne ruwí pe a'chigóriga ju napurigá nulele Onorúgame ne'chí napurigá ra'ichámala ne ralámuli 'yuga. 'Lige bilé ralámuli tabilé bijchígisa ne ra'ichálila pe tabilé bijchígime kéré Onorúgame nila ra'ichali.

## 13

*Jena ruwimela Esusi pagóligo alué bo'né gompaniérola ronola*

<sup>1</sup> Ma amulí sébachi alué piesta Páskua anilime 'lige rapakónala nile, Esúsika 'we a'lá machile 'ma sebio raweli napurigá 'ma simeo jena wijchimoba asagá 'ma tabilé jena bejtélímio, ya 'ma simeli nilekuru bo'né O'nola Onorúgame 'yuga. Esúsika asíriga nabí 'la galeme nile ralámuli jena wijchimoba mochígame, alué napu Onorúgame oyérame nile. Tabilé we'káwale alué ralámuli, nabí 'la galegá etele.

<sup>2</sup> Esusi 'lige alué Esusi oyérame go'yá mochile alí. Jurasí Iskariote anilime, Simoni inolá, abiena alé asálechigó. Riábloka 'ma chátiri 'nátili ajchele alé Jurasí sulálachi, 'nátili ajchele napurigá Esusi nejímala.

<sup>3</sup> Esusi 'we a'lá sébali machile Onorúgame nejíligo a'walí napurigá Wa'lula nímala

Esusi. Abiena machúlechigó bo'né Esusi Onorúgame 's'ligo jula 'pákana rewagáchika, 'lige a'kinana rawé simeo ku 'pa napu Onorúgame ajtí. <sup>4</sup> Alarigá 'nátaga alué Esusi o'weti íl'sale go'yá ajtigé, 'lige o'pacha bujale we'lí amoba chujkúgame, 'lige bilé chinite bulale alé umichipo, <sup>5</sup> 'lige ba'wí ro'ale bilena sikolichi. 'Lige alué makué oká Esusi oyérame ronola pagole alué ba'wite. 'Lige 'ma wakele alué chinite napu umichipo bulálige bo'né.

<sup>6</sup> Napu'lige pagoma olálige alué Simoni Pegro ronola, ye ríó Simoni Pégroka regá rukele:

—Mué Wa'lula, ¿ne'chí ronola pagoma olá mué?

<sup>7</sup> 'Lige Esúsika nejele:

—Jípeko tabilé námaguru mué chonigá pagó ne 'emi ronola, nobi abé i'libékoka 'láchigo námamalogó mué.

<sup>8</sup> 'Lige Pégroka anele:

—Ne'chika pecha siné pagómalogó mué, mueka pecha pioni ka.

'Lige Esúsika anele:

—Ne tabilé pagósaká mué ronola, a'lígeko tabilé ne gompaniérola nímala mué.

<sup>9</sup> 'Lige anile alué Simoni Pegro:

—'Liko mué Wa'lula, 'la ju, pagókigó 'liko ne'chí ronola, sekala 'lige mo'ola abiénachigó.

<sup>10</sup> 'Lige Esúsika anile:

—Alué 'ma 'úbigame ka 'ma bi'ígame júkuru, pecha uchéchigo siné pagókime júkó, pe ronólacho pagókime júkuru napugiti ronoka cha a'kué chólígame gayéname kame. 'Emi suwábaga asírige 'la bi'wígame júkuru, pe bi'lepi tabilé.

<sup>11</sup> Alué u'bárigame aniáká, pe anime ke anile Esusi 'ma bujéligo alué wa'lú resítiri gastigo. 'Lige abiena ruwile bilé ríó tabilé bi'wígame karao, 'we machile cha 'simio alué ríó. Pe Esusi resi olánila ajtligo alué ríó.

<sup>12</sup> 'Lige Esusi napu'lige 'ma pagosa ronola, 'liko 'ma uché ku o'pachátale alué amoba chujkúgame o'pacha. 'Lige uchéchigo siné asíbale alé mésachi, 'lige rukele:

—¿'La námilia chonigá pagó ne 'emi ronola? Neka pagókuru mué ronola napurigá 'la námamala 'emi, churigá gu'íritika ralámuli. <sup>13</sup> 'Émika benírame aneme júturu ne'chí 'lige aminami wa'lúlatiri, napugiti 'émika 'láchigo machigá aníame, neka aluéchigo kame napu 'emi aní. <sup>14</sup> Neka benírame júkuru 'lige wa'lúlatiri. Ne 'emi ronola pagosa, 'émichigó abiena pagómili júkuru ronola a'nagupi nakúriga. <sup>15</sup> Neka pagókuru mué ronola napurigá 'emi alarigá nokímela, napurigá tabilé riólame niwa asírige 'la suwábaga gu'írilime júkuru. 'La a'chigóriga nochálime júkuru napurigá

nocha ne. <sup>16</sup> Neka 'we a'lá bijchiá ruwíguru. Bilé ríó nóchame ka pecha abé najtégame júkó me'tigá bilé batroni. Napu'lige bilé ríó júlusa uchéchigo bilé ríó tábiriti 'núliga, alué napu a'pame ka pecha abé wa'lula júkó me'tigá alué nulame. <sup>17</sup> 'La námasaká 'emi ye ra'íchali 'lige aminami 'la sébali olásaká, alarigá nokisaká napurigá aní ye ra'íchali 'liko 'we ra'sálagá mochímala 'emi.

<sup>18</sup> > Neka pecha suwábaga 'emi 'yágó ye rejcholi. Neka 'la machí alué napu ne cha'píligo napurigá ne'chí oyéramala. Aba alarigá ikimeli júkuru napurigá anílige Onorúgame ra'íchálila 'we 'ya. Regá anile: «Alué napu ne'chí si ajtíle go'yá, alueka 'ma sairúgame gayénale jipe ne'chí 'yuga.»\*

<sup>19</sup> Neka ye ra'íchali ruwíguru ta'chó sébachi raweli. Napu'lige sebasa ye raweli 'liko 'emi abéchigo 'la námamala ne ko alué napu senibí bejtégame ju. <sup>20</sup> Neka 'la bijchiá aníguru. Napu'lige bilé ríó oyérasa napu ne jula, pe a'chigóriga ju napurigá oyérlila ne'chí, 'lige bilé ríó ne'chí oyérasaká, pe a'chigóriga ju napurigá Onorúgame oyérlila, alué napu ne'chí júlale.

*Jena ruwimela Esusi aníligo Jurasi Esusi saíla niraga gainámili ko*

<sup>21</sup> 'Lige napu'lige 'ma ra'íchasa ye ra'íchali, asírige seweka asíbale Esusi. 'Lige 'la ma'chígime anele:

—Neka 'we a'lá bijchiá ruwíguru, 'emi makué oká ne'chí oyérame bilé júkuru ne'chí saíla niraga gainámili.

<sup>22</sup> 'Lige alué Esusi oyérameka a'nagupi e'nénale a'bopi, tabilé machile alué olagá aníó Esusi. <sup>23</sup> Bilé alué makué oká ríó Esusi oyérame napu Juani anilime nile napu Esusi 'we galéligo, alueka Esusi si go'yá asale. <sup>24</sup> Simoni Pegro sekate ra'íchale Juani 'lige anele:

—Ruké chieri ka alué ríó napu Esusi saíla gainamio.

<sup>25</sup> 'Liko alué Juani abéchigo a'bé asíbale napu asálige alué Esusi, 'lige rukele:

—Mué Wa'lula, ¿chieri júkó?

<sup>26</sup> 'Lige Esúsika anile:

—Pe'tá baní sa'nabáchamala ne, 'lige alué napu kóriga ne, alué ríó ju napu ne saíla gainámala.

'Liko alarigá 'sile, baní sa'nabáchale, 'lige alué Jurasi 'yale, alué Simoni Iskariote† inolá. <sup>27</sup> Abiéniko neraga Jurasi baní go'sá, Remónisi alawala yati neraga pachágana Jurásichi bajkile. 'Liko Esusi anele alué Jurasi:

—Alué napu mué 'símili ju, 'we yati oláwagó.

<sup>28</sup> Alué aminá jareka napu ekí go'yá mochíligo tabilé 'wesi námale alanime ko

\* 13:18 E'nesi Salmos 41:9. † 13:26 Iskariote aniáká pe Kiriote bejtégame aníame ju.

alué ra'íchali Esusi ra'ichálila. <sup>29</sup> Alué Jurasi nile repume alué makué oká Esusi oyérame enomíla. Alekeri jaré mayele júliga anió Esusi alué rió napurigá ralimela bilé tábiri alé piéstachi o'towame, o napurigá go'ame 'yawa ralámuli tabilé nígame. <sup>30</sup> Napu'lige alué Jurasi go'sá alué baní, yati simile. 'Ma rukó nile.

*Jena ruwimela Esusi ruwíligo nejimio uché bilé nuebo nulali*

<sup>31</sup> Abé we'liko napu'lige Jurasi 'ma simisá, Esusi anile:

—Ne júkuru alué rió napu nawágame ju 'pa rewagáchika napurigá rió neraga, jipe asrígá 'la etémala 'emi aliena 'la semá 'sime ko ne. Alué nóchali napu ne nocha, ralámulika etémala 'we a'lá semáriga nochio Onorúgame. <sup>32</sup> 'Lige ralámuli 'we a'lá nirásaká Onorúgame etega 'we a'lá semáriga nóchachi ne, 'liko Onorúgame 'we a'lá niraga etémala ne'chí, ne napu nawágame ju 'pa rewagáchika napurigá rió neraga. 'Lige Onorúgame 'we yati gatémala ye 'nátali. <sup>33</sup> Neka 'we galé 'emi napurigá ne bo'né 'kúchila neraga. 'Ma pecha we'lisi asimilé júkó ne 'emi 'yuga. 'Émika ne'chí 'yaga e'yénimili júkuru, nobi tabiléchigo gainámalagó simiba alé napu simeli ju ne. Neka 'we 'ya anéturu ye ra'íchali alué e'wélala jurío, jípeko 'emi ruyéguru ne. <sup>34</sup> Neka nuebo nulali nejíguru: 'We a'lá niraga járilime júkuru 'emi a'bopi, 'lige 'we a'lá niraga járilime júkuru uché jaré ralámuli. Neka asrígá 'la galegá eteme kéturu 'emi. Alarigá 'la galegá eteti kárékuru 'emi a'boi a'nagupi. <sup>35</sup> 'Emi 'la galegá e'yénasaká a'bopi 'lige 'la niraga 'liko ralámuli jena wijchimoba mochígame 'la machimela 'emi 'la ne'chí oyérame ko.

*Jena ruwimela Esusi ruwíligo Pegro tabilé machióriméla Esusi*

<sup>36</sup> Napu'lige Esusi anílige tabilé gainamio simiba ralámuli napu simeli nílige bo'né, 'lige Simoni Pegro Esusi rukele:

—Mué Wa'lula, ¿koche simé olá mué?

'Lige Esúsika nejele:

—Napu simé olá ne, tabilé gainámala mué ne'chí najatía. Pe abé i'libeko najátamala mué ne'chí.

<sup>37</sup> 'Liko Pégroka anele:

—¿Chonigá tabilé najátawa mué jipe? Tabilé chéré rekó me'liruge ne, neka abirigá 'we a'lá listo ajtíkuru mué si simea.

<sup>38</sup> 'Lige Esusi nejele:

—¿'La bijchiá listo ajtí mué napurigá me'liboa mué ne'chí gu'irame kóriká? Neka ta'mé mayé nili. Neka 'la bijchiá aníguru. Be'lí be'á o'tolí ta'chó sinachi, tabilé machióriméla mué ne'chí baisá neraga.

## 14

*Jena ruwimela Esusi ruwíligo rewagachi gatémio ramué galila*

<sup>1</sup> 'Lige Esusi anile:

—Tase seweka mochiwa tase we'ká 'nátiga. 'La nerawa Onorúgame, 'lige 'la nerawa ne'chí. <sup>2</sup> Alé 'pa ne O'nola galíilachi asrígá we'kaná nerú napurigá ejperega mochímala 'emi. Ta bijchiá nísaká, pecha animé ko ne alé simeo 'we a'lá gatemia napurigá 'emi ejperélamala. <sup>3</sup> 'Lige a'kinana ne simisá 'lige 'ma gatesa, uchéchigo ku nawama olá ne 'emi o'tomea 'pa rewagachi napurigá 'emi alé bilena mochímempá napu ne asimé olá. <sup>4</sup> 'Émi 'la machíguru bowé napu sébame ju napu ne simé olá.

<sup>5</sup> 'Lige anele alué Romasi:

—Mué Wa'lula, tabilé machiaa ramué alé napu simé olá mué. 'Lige ¿churigá machibówé alué ko bowé alé simime?

<sup>6</sup> 'Lige Esusi regá anele:

—Ne júkuru alué bowé. Neka 'la bijchiga ruwíguru, ne júkuru uché rajpé nejime a'walí napurigá 'la ajagá mochiwa. Tabilé 'wesi sebámala napu ajtí O'nó Onorúgame bo'né a'walila gite, ne a'walila gite 'la sebámala 'emi. <sup>7</sup> 'Emi 'ma asrígá 'la machí alué ko ne. Alekeri 'we a'lá machimela 'emi ne O'nola Onorúgame. 'Ma machíguru 'emi Onorúgame, 'máchigo we'sá eteme kame Onorúgame, ne'chí etega.

<sup>8</sup> 'Liko alué Belipe anele:

—Mué Wa'lula, 'la elawa napurigá ramué e'newa alué O'nó Onorúgame. Pe e'nésiga a'lá nímaleké.

<sup>9</sup> 'Liko Esusi anile:

—Mué Belipe, 'ma asrígá we'ká rawé ajtíkuru ne 'emi 'yuga, ¿bijí tabilé 'cho machí mué ne'chí? Bilé rió ne'chí eteme ka, alueka ne O'nola Onorúgame abiena eteme júkuru. 'Liko ¿chonigá tánebeché mué ne'chí napurigá elawa napurigá mué 'la etémala alué O'nó Onorúgame? <sup>10</sup> ¿Tabilé bijchigi mué ne O'nó Onorúgame ajtígó ne 'lige O'nó Onorúgameka ne'chichi ajtígó? Alué Onorúgame 'lige ne si pe bi'lepi 'nátame niru. Alué ra'íchili napu ne ruwí, alueka pecha bo'né 'nátiga ruwígó ne, alué O'nó Onorúgame napu ne sa'pálachi ajtí, alué 'smíguru nocharia ne'chí. <sup>11</sup> 'We a'lá bijchígwi na ra'ichálila, neka Onorúgamechi ajtíkuru 'lige Onorúgameka ne sa'pálachi ajtíkuru. Tabilé bijchiginilisaká alué ra'íchali napu ne ruwí, pe a'lá bijchígisa 'la ju alué nóchali napu ne nocha. <sup>12</sup> Neka 'we a'lá bijchiá aní, alué napu ekí 'la nirame ju ne'chí, alueka 'la gainámala sa'wá napurigá ne, 'lige aminami abé wa'lú nóchali newámala. Neka alé napu wa'lula O'nó Onorúgame ajtí, alé simé oláguru. 'Liko alé asigá 'yámala ne a'walí 'emi. <sup>13</sup> 'Lige 'emi

ne'chí tásaká a'walí bi'lepi n'átíli nátaga ne'chí 'yuga, 'liko 'la 'yámala ne napu ta 'emi. Neka ala'sima oláguru napurigá ralámuli etémala chiena 'la ka O'nó Onorúgame. <sup>14</sup> 'Emi tásaká napuyépiri tábiri 'la níraga ne'chí, 'liko 'we ganílga nejkúrimili júkuru ne.

*Jena ruwimela Esusi anligo Onorúgame Alawala nábolimio*

<sup>15</sup> 'Lige Esusi aminabi anile:

—'Emi 'la nírásaká ne'chí 'liko 'la 'we a'lá e'wámala napu nulá ne. <sup>16</sup> 'La e'wásaká 'emi 'liko tánime ne Onorúgame napurigá Onorúgame julámempá uché bilé nejkúrame 'lige nabí 'emi 'yuga asimémpá. <sup>17</sup> 'Ye nejkúrame ka pe Onorúgame Alawala ju, alueka asíriga 'la bijchígili benírame ju. Ralamuli tabilé ne'chí oyérame ka, alueka tabilé narémala alué alawá, pecha námame kame ye 'nátíli churigá ka Onorúgame Alawala, alekeri tabilé gainámala narea, nobi 'émika 'láchigo machígó. 'Ye alawaka 'emi 'yuga rejpímili ko 'lige aminami 'emi sapálachi rejpímili ko. <sup>18</sup> Tabilé 'oni a'rémala ne 'emi napurigá ba'ligéchili. Abiena nawámala ne 'emi si asimea. <sup>19</sup> 'Pe u'kabi rawé kachí ralámuli napu ekí tabilé ne'chí oyérame ju, alueka tabilé uché etémala ne'chí, 'émika 'la etémala ne'chí. Neka uchéchigo ajánamili júkuru mukusá 'lige 'émichígó. <sup>20</sup> 'A'lige rawé napu'lige ne naresa alawá uchéchigo siné napurigá ku ajánamala ne, a'lige 'la machimela 'emi Onorúgame si ajtigó ne. Neka bo'né alawala 'yámili júkuru 'emi napurigá 'emi ne'chí 'yuga natámala. <sup>21</sup> Alué napu 'la akeme ju ne nulalíla 'lige 'la e'wame ju, alueka 'we a'lá galeme júkuru ne'chí. 'Liko ne O'nola Onorúgame 'we a'lá ganílga asimela alué ralámuli 'yuga, 'lige néchigo 'we ganílga asimela alué ralámuli 'yuga. 'Ne bo'né 'la machírimala churigá ko ne bo'né.

<sup>22</sup> 'Lige Jurasi asale alé, alué napu tabilé Jurasi Iskariote nile, 'lige anile:

—Mué Wa'lula, ¿churigáriga júpaché? ¿Chonigá pe ramuecho benírama oláché mué chieri ko mué, 'lige chonigá tabilé benírama oláché mué uché jaré ralámuli chieri ko mué?

<sup>23</sup> 'Lige Esúsika nejele.

—'Émika 'we galéguru ne'chí, 'lige uché jareka tabilé galé ne'chí. Alué napu ekí 'we galé ne'chí, alueka 'la e'wame júkuru alué 'nátíli ne nejlála. 'Ne O'nola Onorúgame 'we galémala alué ralámuli napu ekí ne'chí 'we galeme ju. 'Ne O'nola 'lige ne si mo'íboa alé riochi, 'lige abalé ejperélawa ramué. Alueka ramué alawala nígame nímili júkuru. <sup>24</sup> 'Ne'chí tabilé galeme ka, alueka tabilé e'wame ju ne ra'ichálila. 'Ne ra'ichálilaka

pecha ne bo'né na'táililate ma'chíname júkó, pe ne O'nola Onorúgame na'táilila júkuru, napu ne'chí júlale.

<sup>25</sup> › Neka suwábaga ye ra'íchili ruwíguru jipe bijí 'emi 'yuga asagá jena. <sup>26</sup> Napu'lige ne simísá napu Onorúgame ajítí, Onorúgame náomala bo'né alawala ne gite. Alueka 'la bijchiá ruimeli júkuru napurigá 'la nélámala 'emi suwábaga napu ne ruwílige.

<sup>27</sup> › Neka a'walí a'réguru napurigá tabilé we'ká 'nátaga ejtebímala 'emi, tabilé seweka, napurigá 'we a'lá sébali ralámuli nímala 'emi. 'Ye a'walika pe ne bo'né nila júkuru. Ralámuli jena wijchimoba mochígame 'we benírame ju churigá ka alué a'walí napurigá tabilé we'ká 'nátaga mochiwa, tabiléchigo nígame júkó ne a'walila. 'Emi níriga tabilé we'ká 'nátaga mochilime júkuru, tase majaga. <sup>28</sup> 'Ma akele 'emi ralámuli ne 'ma simeo, 'lige uchéchigo siné nawamio ne 'emi si asimea. 'Emi 'we galésaká ne'chí, 'liko 'we ra'sálámilikuru ne simichí O'nó bejtélachi, alué kame abéchigo najtékame me'tigá ne'chí. <sup>29</sup> Neka bajchabé neraga ruwíguru ta'chó sébachi alué rawé. Napu'lige sébachi alué rawé, 'émika 'ma 'nátaga mochímala ne aníligo ye ruyá. 'Liko abéchigo 'la semátiri narémala ne nila 'nátíli.

<sup>30</sup> › Tabilé we'ká ra'ichámala ne 'emi 'yuga, ya'má nawámili kame alué wa'lula jena wijchimoba, alué Remónisi anilime. Alueka tabilé nígame ju a'walí napurigá ne'chí uméramala. <sup>31</sup> Abirigáchigo a'rema olágó neka napurigá resí olámala ne'chí alué Remónisi, napurigá ralámuli jena wijchimoba mochígame 'la machimémpá ne 'we galeo O'nó Onorúgame, napurigá 'la etémempá ne 'la e'wame ko napu ne O'nola Onorúgame nulá.

'Liko Esusi anele alué oyérame:

—'Ma mochísiwa. 'Ma simawa.

## 15

*Jena ruwimela Esusi ruwíligo napurigá bilé baniá ko bo'né*

<sup>1</sup> 'Liko Esusi bilé tétilite ra'íchali ruwile. Regá anile:

—Neka pe napurigá bilé baniá 'we ra'ígame rakeme, pe alarigá ju ne. Alué ne O'nola Onorúgame 'sime ju baniá repua. <sup>2</sup> Alueka 'ma rejpúnname júkuru napuyépiri atuala tabilé rakeme. 'Lige alué wakígame a'tuwégame nísaká 'ma rejpúnname ju napurigá 'la rakémala alué baniá. <sup>3</sup> 'Émika 'ma bi'wígame alawégame júkuru 'we a'lá oyériligame ne nila ra'ichálila. <sup>4</sup> 'La bi'lepi 'nátaga nokisiwa pe ne na'táililacho 'lige ne bi'lepi 'nátíli na'támala 'emi 'yuga. Bilé baniá atuala pecha rakémalawé 'ma rijpunásiká

\* 15:2 Yeka aniname júkuru bilé rió tabilé e'wásaká Onorúgame nila ra'íchali, 'liko Onorúgameka 'ma se'wí páмили júkuru.



alué a'tuwá. Abirigá chégame nímili júkuru abe alé baniachi. Yeka ruwime júkuru 'emi tabilé gainamio 'we semátiri 'nátili 'nata tabilé ne'chí 'yuga na'tásaká 'emi.

<sup>5</sup> › Neka napurigá bilé baniá alarigá ju, 'émika napurigá alué baniá atuala ju. Bilé rió ne'chí 'yuga 'nátaga inásaká 'lige ne abiena 'we 'yasa iwérali, alueka asiriga 'la semáriga bejtélamala. Tabilé nígame nísaká ne nila a'walí, 'liko tabilé 'la semáriga bejtélamala. <sup>6</sup> Bilé rió tabilé ne'chí 'yuga 'nátaga rejpísaká, alueka pe napurigá bilé chalawá pátigime niraga rejpímala. 'Ma wakisáká chalawá 'lige alueka pe e'kósilime júkuru.

<sup>7</sup> › 'Emi 'la ne'chí 'yuga na'tásaká 'lige aminami 'la e'wásaká, 'liko 'we támili júkuru e'karúginti, 'liko asiriga 'la nejmála ne. <sup>8</sup> Napu'lige 'emi 'we a'lá sébali olasa, 'liko 'we a'lá machimela ralámuli 'emi ne'chí oyérame ko. 'Lige aminami ralámuli asiriga 'la nerámala Onorúgame. <sup>9</sup> Ne O'nola Onorúgameka asiriga galéguru ne'chí, alekeri néchigó 'we galéguru 'emi. 'We a'lá na'tawa ne'chí 'yuga napurigá 'la ganlíga e'yénawa 'emi a'bopi. <sup>10</sup> 'La e'wásaká 'emi alué napu ne nulá, 'we a'lá ganlíga asimela ne 'emi 'yuga. Alarigá júkuru ne ne O'nola 'yuga. Neka 'la e'wíguru Onorúgame napu ne'chí nuleme ju, alekeri alueka 'we galé ne'chí.

<sup>11</sup> › Neka alarigá ruyéguru 'emi napurigá 'we ganlíga mochímala napurigá ne. Alarigaka 'la ra'salagá mochiwa. <sup>12</sup> Ne nulalíla ye júkuru: 'We a'lá ganlíga járowa 'emi a'bopi 'lige aminami uché jaré 'yuga, a'chigóriga napurigá galeme ju ne 'emi. <sup>13</sup> Bilé rió mukusáká bo'né amígola gu'íriga, tabilé nerú bilé 'nátili abé semátiri me'tigá alieri 'nátili. 'Liko alarigá 'la machiboa ye rió 'we galéligo alué bo'né amígola. <sup>14</sup> 'Émika ne'chí amígola júkuru 'la e'wásaká napu ne nulá. <sup>15</sup> Neka 'ma tabilé «pioni» anémili júkuru 'emi. Bilé piónika pecha machime júkó alué batroni na'tálila. Neka «amigo» aneme ju 'emi. Suwábaga napu ekí beniri O'nó Onorúgame ne'chí, neka 'emi beniruguru suwábagachigó. <sup>16</sup> 'Émika pecha owile ne'chí. Neka 'la owikuru 'emi napurigá si simámala 'emi napurigá semátiri ra'íchali benirimia alué ralámuli, 'lige aminabi nokísimala benírísia, 'lige uché jaré abiénachigó alarigá nokísimala, 'lige tabilé ku guwana rujsuka nokísimala. 'Liko O'nó Onorúgame 'la suwábaga nejmála napu ekí tánili 'la ne na'tálila 'nátame niri ka. <sup>17</sup> Ye nulalí júkuru napu ne nejí: 'We 'la ganlíga járowa a'bopi.

*Jena ruwimela alué cha nokame ralámuli tabilé ganlíga mochíligo Esusi oyérame 'yuga*

<sup>18</sup> › Ralámuli tabilé oyérame Onorúgame tabilé siné ganlíga eteme ju 'emi. Nibilé néchigó ganlíga etélime kéturu 'yako,

ne ta'chó 'yuga eyénachi 'emi. <sup>19</sup> 'Emi alué ralámuli gompaniérola nísaká, 'liko 'we galémilikuru 'emi napurigá galeme ju a'boi gompaniérola, nobi tabiléchigo alarigá júkó.

'Émika 'yako alué cha nokame ralámuli gompaniérola nílekuru, 'lige ne bayéturu 'emi. Jípeko 'ma pecha alué gompaniérola júkó 'emi. Alekeri tabilé ganlíga mochí alué cha nokame ralámuli 'emi 'yuga. <sup>20</sup> 'La néláwa napurigá aníligo ne: «Bilé nóchame ka pecha abé najtékame júkó me'tigá bilé batroni.» Ne'chí cha anesa, 'emi abiénachigó resi anéwali júkuru. Alué ralámuli napu ekí 'la e'wale ne nila rejcholi, abiénachigó e'wámala alué rejcholi napu 'emi nila ju. <sup>21</sup> Alué cha nokame ralámuli 'we cha olámala 'emi ne'chí oyérame kórigá. Alueka tabilé machime ju alué napu ne'chí júla, alekeri 'we resi oláwili ju 'emi.

<sup>22</sup> › Neka jena nawáturu 'lige ralámuli 'yuga ra'íchaturu ne. Alekeri napu'lige 'we resi nokigá járisa, asiriga walú chojkila ju. 'La machime ju napu'lige chátiri nóchiligo. <sup>23</sup> Ralámuli tabilé galeme ka ne'chí tabilé galeme júchigó ne O'nola. <sup>24</sup> Neka asiriga 'la semátiri 'nátaga newáturu napu ta'wesi rió gayéname ju newá. 'Lige alué ralámuli etiáturu alué napu ne bo'né 'nátaga newá, 'lige rekó etee alué semati e'karúgame newárigime, tabilé ganlíga etele ne'chí, 'lige alué ne O'nola 'yúgachigó. <sup>25</sup> 'We 'ya osirúgime osilí regá aní: «Neka peka chátiri nóchige abirigáchigo nabí tabilé ganlíga etuí ne.» 'Liko alué cha nokame ralámuli jípe e'jperégame 'ma sébali oláguru napurigá anile 'ya nerúgame ra'íchali. Alarigá nímili nílekuru, tabilé galéwili nile ne.

<sup>26</sup> › Bilé rawé sébámala Onorúgame Alawala napu 'we na'temame ju. Ye alawaka asiriga 'la bijchiga ra'íchame nímala, 'lige asiriga 'la ruwimela alieti eteme ka larigá nóchame ko ne. <sup>27</sup> 'Émichigó abiena ruyémili ju uché jaré ralámuli alieti etéligo 'emi ne'chí 'yuga e'yéniga 'ya kulí siné.

## 16

<sup>1</sup> › Neka ye ra'íchali ruwíguru napurigá 'emi tabilé a'rémala ne nila rejcholi. <sup>2</sup> 'Lige 'emi 'ma mabuwa alé u'tá re'obachi «sinagoga» anilime mochígichi alué cha nokame ralámuli. 'Ma pe'wé alué ralámuli 'ma 'emi me'linálimala Onorúgame gu'írame kóriká. <sup>3</sup> Alanokimela alué ralámuli napugiti pecha siné oyérame ka O'nó Onorúgame nibilé ne'chitiri. <sup>4</sup> Neka yeti ruwíguru napurigá 'emi napu'lige ye raweli sébachi 'la nelámempá ne aníligo yeti ikimeo jena wijchimoba. Neka sinékó tabilé che anéturu 'emi ye ra'íchali bijí 'emi 'yuga ajtigá.

*Jena ruwimela Esusi ruwíligo chu'sime ko Onorúgame Alawala*

5 › Jípeko 'ma simé ne alué napu ne'chí júlafe jékana alué 'yuga asimea. 'Lige 'émika tabilé ruké ne'chí: «¿Koche simé olá mué?» 6 Iligá 'émika 'we sewelákuru alanichi ne. 7 Neka 'we alá bijchiá aní. Napu'lige ne simisá, julámala ne alué Onorúgame Alawala. Alekeri 'emi níriká abé 'la júkuru napurigá ne simela. Ne tabilé simisáká 'liko pecha nawámalagó alué napu 'we na'temame ju ralámuli, alué napu Onorúgame Alawala ju. Ne simisáká 'liko 'la julámala ne alué na'temame jeka napurigá 'emi gu'ira asimémpá. 8 Napu'lige alué ralámuli na'temame nawasa, yati machírimala ralámuli jena wijchímoba epperégame napurigá námamala 'we chátiri 'nátali 'nátaga e'yenio, 'lige 'we alá ruwimela nerugo bilé 'nátali 'we semátiri 'lige 'we animela napurigá oyériwa alué 'nátali, 'lige abiena ruwimela Onorúgame gustisia olamio ralámuli. 9 'We alá ma'chígama nérélamala 'we chátiri 'nátali 'nátaga e'yéname ko alué ralámuli napugiti tabilé 'la oyérima nímime ne'chí. 10 'Lige 'we alá ma'chígama nérélamala alué alála 'nátali, napugiti Onorúgame 'yuga simiá kibámimpá ne napu 'emi tabilé 'wesi etémala ne'chí. 11 'Lige 'we alá ma'chígama nérélamala Onorúgame 'we alá sébali olame ko gustisia, napugiti Onorúgameka 'ma umériga asimémpá alué napu ju jena wijchímoba nulame napu júpá Remónisi, neyúriga asimela Onorúgame.

12 › Asíriga we'ká ra'íchali ruimeli júkuru ne, iligá 'emi 'lina tabilé anachámala jipe. 13 Napu'lige sebasea alué Alawá 'we alá bijchiá benírame 'la ruwimela suwábaga 'la bijchiá. Pecha bo'né 'nátaga benírimiligó. Alueka benírimili júkuru pe napurigá nulé Onorúgame. 'Lige abiena ruwimela alakimeo abé i'libeko jena wijchímoba. 14 Ye alawaka ralámuli benírimili júkuru. Ye alawaka asíriga 'la akeme ju ne ra'ichálila napurigá aní ne, 'lige ku 'emi ruyeme ju. 'Lige ralámuli asíriga 'la niraga etémala ne'chí. 15 Suwábaga napu e'ki nígame ju ne O'nola, néchigó abiena si nila ju. Alekeri aníguru ne ye alawaka 'la gepume ju ne'chí 'lige 'emi ruyémala.

*Jena ruwimela Esusi ruwíligo alué bo'né gompaniérola seweka mochíligo 'lige ku 'we ra'sáligá mochíbaligo*

16 › 'Ma pe'wé 'émika pecha etémalagó ne'chí, nobi pe abé i'libeko 'la etémala 'emi ne'chí.

17 'Liko anile jaré alué oyérame a'bopi ra'íchaga:

—¿Tachiri ju alué napu ruyá aní? Regá aníaníguru: «Pe u'kabi rawé kachi pecha etémalawé 'emi ne'chí.» 'Lige aníaníguru: «Pe abé i'libeko 'la etémala 'emi ne'chí.» 'Lige

aminami aníaníguru: «Neka O'nó bejtélachi simeo oláguru, alekeri tabilé etémala 'emi ne'chí.»

18 'Lige alué oyérame uché rajpé rukele:

—¿Tachiri ruyame ju napu'lige alarigá ra'icha «pe u'kabi rawé» kachi anía? Tabilé námalia ramué alieti ra'íchiga anió.

19 'Lige Esusi machile e'karúgame rukénilia jago, 'lige Esusi anele:

—Neka aniéuru pe u'kabi rawé kachi 'emi 'ma tabilé etemio ne'chí. 'Lige aníturu ne pe'kabi rawé kachi 'ma ku etemio 'emi ne'chí. ¿Alué ju napu 'emi a'bopi rukea mochí? 20 Neka 'la bijchiá aníguru. 'Émika nalámala 'lige aminami asíriga seweka mochímala, nobi alué ralámuli napu tabilé oyérame ju ne'chí, alueka asíriga ganíliga mochímala. Nujubaka ku 'we alá ra'sálagá mochímala 'emi. 21 Napu'lige bilé mukí ranélimili nisa, asíriga seweka ajtime ju, 'láchigo machime kame o'komio. Napu'lige 'ma ranega asagaka 'liko 'ma we'káwame ju alué o'kólime. 'Ma asíriga 'la ra'sálagá ajtime ju napugiti 'ma ochériligame alué u'tátiri. 22 Alarigá júkuru 'emi 'yuga. Jípeko 'we seweka mochíkuru 'emi, nobi pe'wé ku 'la asíriga ra'sálagá mochímala 'emi 'lige aminami tabilé 'wesi gainámala 'emi sewelégame newá uchéchigo siné.

23, Napu'lige seba raweli 'liko 'ma pecha rukémala 'emi ne'chí, Onorúgame Alawálaka 'máchigo 'la beniria asimémpá. 'Lige alué O'nó Onorúgame nejímala napu'lige 'emi tánisa bilé tábiri napu nígame ju alué bo'né, 'emi 'la bi'lepi 'nátiga mochísaká pe ne'chicho 'nátiga, 'lige 'emi 'la e'wásaká napu ne nulá. 24 'Émika ta'chó tániguru Onorúgame, pecha 'cho 'la bi'lepi 'nátame kame 'emi. Jípeko 'la júkuru tánilia, yati nejímala 'lige 'émika yati narémalachigó, 'lige asíriga wa'lú ganílii narémala 'emi.

*Jena ruwimela Esusi 'ma umériligo alué cha nokame ralámuli 'lige jipe neyúriga ajtigó*

25 › Neka tételite ruwíguru napu'lige biji jena wijchímoba asagá napurigá na'támala 'emi churigá ko ne na'tálila, nobi pe 'we 'ma tabilé alarigá ra'ichama olago ne, pe iligá 'we alá bi'wígama ra'ichama olá ne napurigá 'la námamala 'emi churigá ko ne O'nola Onorúgame. 26 'Émika 'la tánimili júkuru Onorúgame, ne'chí 'yuga 'nátaga. Neka tabilé tánamala Onorúgame napurigá 'emi gu'írimala, 27 Onorúgame 'we galeme ju 'emi. Onorúgame 'emi galéguru napugiti 'émika ne'chí galeme kame, 'lige 'émika 'we alá bijchígile ne ra'ichálila. 'Émika 'la machíguru Onorúgame bejtélachika nawágama ko ne. 28 Neka Onorúgame bejtélachika nawáturu, 'lige jeka wijchímoba nawáturu ne. 'Lige jípeko 'ma simé olá ne, 'ma ku O'nó Onorúgame bejtélachi.

<sup>29</sup> Lige alué oyérameka anile:

—Jípeko 'la námatame ra'ícha mué, 'we a'lá námíla ramué alué ra'íchali. <sup>30</sup> 'We a'lá machirú mueka suwábaga 'la namio, mueka 'we a'lá machí alieti 'nata mochigo ralámuli, asíruga 'la nejiámala napu chibiyeti rukinani ta'chó rukilichi. Alekeri 'la machiaa Onorúgame bejtélachika nawágame ko mué.

<sup>31</sup> 'Lígeko Esusi rukele:

—¿'La bijchiá bijchigi 'emi? <sup>32</sup> 'Ma pe'wé 'emi 'ma pecha napuika mochímala. Asíruga ra'laga mochímala 'emi. 'Ma bi'neli a'rémala 'emi ne'chí, nobi alué ne O'nola Onorúgame síchigo ajtíko ne 'yuga. Alekeri tabilé bi'neli ajtíko ne. <sup>33</sup> Neka ye ra'íchali ruwiguru napurigá 'emi 'la sébali ralámuli nímala tabilé we'ká 'nátame, 'lige aminami napurigá 'la bi'lepi 'nátame nímala 'emi. 'Émika asíruga resí nílimala jena wijchimoba, nobi tabiléchigo seweka mochíwagó, 'we iwériga mochiwa tabilé seweka, napugiti neka 'máchigo umérigame alué chátiri 'nátili.

## 17

*Jena ruwimela Esusi Onorúgame tániligo napurigá a'lá repúmala bo'né oyérame*

<sup>1</sup> 'Ma ruwisá Esusi ye ra'íchali, pa o'wétiri e'nele 'lige Onorúgame 'yuga ra'íchale, regá anile:

—Mué O'nó, 'ma seba raweli, mué Inolá ju ne, gu'iri ne'chí napurigá suwábaga ralámuli 'la námaka etémala chiena semá 'simé ko ne. Ne napu mué Inolá ju, 'la suwábaga ralámuli gu'irimala beniria chiena semá 'sime ko mué Onorúgame. <sup>2</sup> Mué ne'chí a'walí 'ya napurigá ne nulémala suwábaga ralámuli napu mué wanápale, 'lige napurigá 'la rewagachi ejperélamala senibí niraga mué 'yuga. <sup>3</sup> 'La mué Onorúgame oyérasaká ye ralámuli 'lige ne'chí oyérasaká, 'liko 'la rewagachi simámala alué ralámuli. Mué júkuru 'la bijchiá bi'neli Wa'lula Onorúgame, 'lige mueka ne'chí júlakuru jena wijchimoba.

<sup>4</sup> › Ne beniri alué ralámuli chiena a'lá ko mué, 'ma suwaba ne alué nóchali napu mué nulá. <sup>5</sup> Mué O'nó, jípeko mué 'yuga asinali ne uchéchigo siné. Ne'chí 'yawa alué a'walí uchéchigo siné napurigá nile 'yabé ta'chó nerúgichi ye gawí, napu'lige mué 'yuga ajtigé ne.

<sup>6</sup> › Alué ralámuli napu mué wanápale 'ya napurigá ne'chí oyérame nímala 'lige ne 'la ruyéturu chieri ka mué. Mué ju alué Wa'lula alué ralámuli nuleme 'lige repume 'lige mué 'ya ne'chí a'walí napurigá ne 'simala nulea alué ralámuli. Suwábaga alué ralámuli 'la e'wá napu nulá mué ra'íchálila. <sup>7</sup> Ne ruyé alué ralámuli, suwábaga napu ne nígame ju, alueka mué Onorúgame nejíturu. <sup>8</sup> Ne ruyé alué ra'íchali napu mué 'ya ne'chí, alué ralámuli 'la bijchigi ye ra'íchali. 'La machí

alué ralámuli napu mué ajtí, aleka nawáligo ne. 'Lige 'la bijchígile mué 'síligo ne'chí jula jena wijchimoba.

<sup>9</sup> › Ne taní napurigá 'la gu'irimala mué alué ne'chí oyérame. Tabilé taní ne napurigá suwábaga ralámuli gu'írowa, pe alué ralámulicho napu mué 'ya ne'chí napurigá nulémala ne. Alué ralámuli mué nila ju. <sup>10</sup> Suwábaga alué ralámuli napu ne nulé mué nila ju, 'lige suwábaga alué ralámuli napu mué nila ju abiena ne nila ju, 'lige etega uché jaré ralámuli chiena 'la sébali olame ko alué ne'chí oyérame, 'lige 'we a'lá nirá ne'chí. Napu'lige uché jaré ralámuli machisá churigá ko ye ralámuli mué ra'íchálila oyérame, a'lige 'la machimela rewagáchika nawagó ne napu mué ajtí.

<sup>11</sup> › Ne pe'wé simé olá napu mué ajtí, tabilé jena wijchimoba asimé olá ne. Suwábaga napu ne'chí oyérame ju, alueka jena wijchimoba mochímala. 'La repúpuaka mué alawálate alué ralámuli napu mué wanápale. Mué O'nó, mué ju bi'lepi Onorúgame, 'lige mué alawala ju napu ralámuli gu'irame ju napurigá 'la bi'lepi 'nátili 'nátame nímala napurigá mué 'lige ne si 'la bi'lepi 'nátili 'nátame niru. <sup>12</sup> Napu'lige ne bijí alué ralámuli 'yuga eyena, neka mué alawálate repume kéturu alué ralámuli. Ne repume kéturu 'lige tabilé 'cho we'ká, abiena we'ká bilé, Jurasi anilime ju alué rió. Alarigá anile Onorúgame ra'íchálila 'ya nerúgame, 'lige 'la sébali ikimeli ju napurigá anílige alué ra'íchali.

<sup>13</sup> › Pe 'we simé olá ne napu mué ajtí. Ne ruyé ralámuli alué ra'íchali bijí jena wijchimoba asagá, napurigá 'la ganíliga mochímala napurigá ne. <sup>14</sup> Ne 'la beniri alué ralámuli ramué oyérame alué ra'íchali napu beniri mué ne'chí. Suwábaga ralámuli napu tabilé oyérame ju ne'chí senibí tabilé ganíliga mochime ju napugiti tabilé a'chigóriga 'nátame kame. Neka tabilé 'nata napurigá 'nátame ju alué ralámuli tabilé oyérame ne'chí. <sup>15</sup> Tabilé taní ne napurigá 'ma buinawa jena gawichí alué ralámuli ne'chí oyérame, pe 'we repúkíame najkí ne napurigá 'la tabilé cha'pimela alué chátiri 'nátili. <sup>16</sup> Neka tabilé oyérame ju alué chátiri 'nátili napu nerú jena gawichí, alué ralámuli napu ne si e'yéname ju, alueka tabilé oyérame ju alué chátiri 'nátili. <sup>17</sup> 'We a'lá niraga etewa alué napu mué oyérame ju, nóchali 'yawa napurigá mué najkí. 'La 'nátili 'yawa napurigá 'la rejchirúgame nímala beniriga mué ra'íchálila. Mué ra'íchálila 'la bijchiá ju. <sup>18</sup> Ne nulé alué ralámuli napurigá gu'irimala uché jaré ralámuli napurigá mué nulé ne'chí suwábaga ralámuli gu'iríniliga. <sup>19</sup> Jena ajtí ne 'la listo mukumea napurigá alué ralámuli ne'chí oyérame 'la bi'wígame alawégame

nímala napurigá waná mochímala, tase napurigá alué ralámuli chátiri alawégame.

<sup>20</sup> Neka abiena ta ajtí napurigá gu'írowa alué ralámuli napu nujubá oyéramili ju ne'chí napu'lige akisá alué ra'íchali napu ruimeli ju alué ne'chí oyérame ralámuli jipe mochígame. <sup>21</sup> Mué O'nó, taní ne napurigá gu'írimala mué napurigá 'la bi'lepi 'nátili 'nátame nímala suwábaga alué ne'chí oyérame. Najkí ne napurigá 'la bi'lepi 'nátili na'támala pe ramuecho 'yuga, napurigá ne 'la pe bi'lepi 'nátili 'nata pe muecho 'yuga. Bi'lepi na'tálime najkí ne napurigá bijchígimala uché jaré ralámuli mué 'siligo ne'chí jula. <sup>22</sup> Neka 'we a'lá nirá alué ralámuli napurigá mué 'we a'lá nirá ne'chí napurigá 'la bi'lepi 'nátame nímala napurigá ramué bi'lepi 'nátame niru. <sup>23</sup> Mué 'smi alawá 'ya ne'chí 'lige néchigó alawá 'ya alué ralámuli napurigá 'la sébali bi'lepi 'nátili 'nátame nímala, napurigá uché jaré ralámuli 'la machimela mué 'siligo ne'chí ajchá jena napu ajtí ne jipe, 'lige napurigá 'la machimela mué 'we galeo ne alué ralámuli napurigá galé mué ne'chí.

<sup>24</sup> Mué O'nó, mué 'sile ne'chí 'ya suwábaga ye ralámuli napu 'la oyérame ju ne'chí, 'lige najkí ne napurigá suwábaga alué ralámuli ne 'yuga mochímala senibí, 'lige napurigá 'la machimela chieri ko ne, napurigá 'la machimela 'we a'lá ganíliga etéligo mué 'lige iwérali 'yáligo mué ne'chí. Mué 'we a'lá galegá etele ne'chí napu'lige tabilé 'cho nerúgichi ye gawí. <sup>25</sup> Mué O'nó, mué ju napu 'la sébali olame ju. Tabilé 'me suwábaga ralámuli machí chieri ko mué, neka 'láchigo machígó chieri ko mué, 'lige alué ralámuli napu 'la oyérame ju ne'chí 'la bijchiga nirá mué 'siligo ne'chí jula. <sup>26</sup> Ne 'ma 'la sébali ruyé chieri ko mué, 'lige aminabi ruyémala ne napurigá 'la galegá etémala mué alué ralámuli a'chigóriga napurigá galé mué ne'chí, 'lige napurigá 'la ne alawala alawega mochímala.

## 18

### *Jena ruwimela 'ma cha'píirigo Esusi*

<sup>1</sup> Ma ra'ichasa Esusi ye ra'íchali, simírole alé gomichi napu Segroni anilime gomí nile, suwábaga alué makué bilé rió napu Esusi 'yuga járome nile. Alé bilena napu we'ká jale rojá olibo anilime, alé simile bo'né 'yuga járome 'yuga. <sup>2</sup> Jurasi, napu Esusi saila gayénale, alué rióchigó abiena machime nile alé, Esusi 'ma we'sá napubúlige alué ralámuli alé. <sup>3</sup> Lige alué rió Jurásika simile najátasia Esusi we'ká sontalo 'yuga, alué gobierno romano sontálola, 'lige jaré sontalo 'yúgachigó, alué walú re'obachi tebumé. Júlale alué e'wélala balé 'lige alué bariseo. E'wele siparinaga 'yénele alué

sontalo. Lámpara aseite ro'érigame o'ká e'yénele 'lige chojpé rajigáchigó. <sup>4</sup> Esúsika 'ma machigá asale suwábaga alakimeo, alekeri etesa, pe'tá simile najtepania, 'lige rukele:

—¿Chieri 'yamía 'emi?

<sup>5</sup> 'Lige nejele alué sontalo:

—Esusi, Nasareta anilichi bejtégame.

A'lige Esusi anele:

—Ne ju.

Alué Jurasi abiena alé ilílechigó alué sontalo 'yuga. <sup>6</sup> Napu'lige Esusi anesa, «Ne ju», suwábaga alué sontalo guwana bi'tíbale wijchí. <sup>7</sup> A'ligeo Esusi uchéchigo siné rukele:

—¿Chieri 'yamía 'emi?

'Lige sontálola nejele:

—Esusi, Nasareta anilichi bejtégame.

<sup>8</sup> —Ya'má ruwíkuru ne ko —anile Esusi—, Ne'chí 'yamía ka, ye uché jaré ralámuli a'rewa napurigá simámala.

<sup>9</sup> Regá anile napurigá a'lá alarigá nímala napurigá anile 'yabé bajchabé rawé. Anile bo'né: «Tabilé 'wesi ralámuli we'kámala, alué ralámuli napu O'nó Onorúgame wanápale napurigá ne bo'né repúmala.» <sup>10</sup> A'lige Simoni Pegro anilime bilé siparina o'kame nile, 'lige ma'chí pale, 'lige rejúnale bilé rió najkala Malko anilime, wajtoná ilígame najká. Málkoka alué wa'lula balé piónila nile. <sup>11</sup> Lige Esúsika nulele Pegro:

—Ku reká alué siparina alé napu ma'chí pa mué. Ne O'nola Onorúgame ajchárigame ju ne napurigá ejelímala. ¿Tabilé mayé mué 'la sébali olamio ne ye resí ikiamé?

### *Jena ruwimela 'ma o'tóirigo Esusi Anasi bejtélachi*

<sup>12</sup> A'lige alué sontalo romano 'lige alué wa'lula sontalo si, 'lige alué uché jaré sontalo 'ma cha'pile Esusi, 'lige 'ma bulele, <sup>13</sup> 'lige Anasi bejtélachi o'tóleru. Alué rió Anásika Kaipasi sí'lá nile napu wa'lula balé nile aleké bamí. <sup>14</sup> Ye Kaipásika pe aba alué nile napu anile tabilé mukusáká Esusi a'ligeo alué sontalo romano we'ká jurío me'liméráo, 'lige abé 'la nirale napurigá pe bi'lepi rió mukíaríka tase we'ká.

### *Jena ruwimela Pegro aniligo tabilé machi'óríligo Esusi*

<sup>15</sup> Napu'lige 'ma o'tosuga Esusi, Simoni Pégroka 'lige uché bilé Esusi oyérame Esusi najátasia e'yénale. Alué rió napu Pegro 'yuga enale 'ma we'sá etérigame nile alué balé wa'lúlate, alekeri napu'lige Esusi bajkichi alé ra'pichí alué wa'lula galíflachi, abiena 'la 'yáleru lisensia alué rió alué yochi repúmete napurigá 'la bajkimela alé ra'pichí. <sup>16</sup> Pégroka ma'chika rejpile alé a'bé yóchika. A'lige alué uché bilé rió napu bajkile alé ra'pichí ku yati ma'chínale 'lige ra'íchale alué mukí 'yuga napu tebuka ilile

alé yochi. A'lige ku uchéchigo bajkile, Pegro 'yuga. <sup>17</sup> Lige alué mukika alé yochi repume regá rukele Pegro:

—¿Tabilé alué ju mué alué rió gompaniérola napu a'paru?

—Tabilé —anile Pégroka—. Tabilé alué gompaniérola ju ne.

<sup>18</sup> 'We rulágachi nile, 'lige alué sontalo wa'lú re'obachi tebume 'lige nóchamechigó na'yasa sujkáliga jale. 'Lige Pégrochigó alé simile sujkálimia alué ralámuli 'yuga.

*Jena ruwimela Esusi 'we a'wágame ra'íchiga rukéirigo bilé wa'lula balete*

<sup>19</sup> Pachá galírale, alué wa'lula balé chojkile rukea Esusi chieri ko alué suwábaga ralámuli napu Esusi gompaniérola níligo 'lige tachiri níligo napu alué Esusi benírole alué ralámuli Esusi oyérame. <sup>20</sup> Esúsika regá anile:

—Neka 'la senibí 'la benírite'é alé bilena napu 'la suwábaga alué ralámuli 'la ma'chígime akimela. 'Ma suwábaga beniri ne alé u'tá re'obachi «sinagoga» anilime 'lige abiena alé wa'lú re'obachi ra'pichí, alé kame napu we'ká ralámuli napuíme ju, tase siné chíboka beniri ne. <sup>21</sup> ¿Chonigá ne'chí rukéliaché suwábaga ye ra'íchali? Alué ralámuli napu ne'chí gepule, alué rukéwaguru suwábaga ra'íchali rukewa napu aníligo ne. Alué ralámuli 'la machí suwábaga napu aníligo ne.

<sup>22</sup> Regá anichi Esusi, bilé sontáloka, alué wa'lú re'obachi nóchame, Esusi wejpalé banachí, 'lige regá anele:

—¿Alarigá nejeme ju mué ye wa'lula balé?

<sup>23</sup> Esúsika regá nejele:

—Ne se'winá charigá aniákó, ruwígó churigá ko. 'Láchigo 'la bijchiá kágobá napu aní ne. ¿Lige chonigá wejpapaché mué ne'chí?

<sup>24</sup> A'lige Anásika Esusi júlale sekachí bulugá Kaipasi ajtígichi.

*Jena ruwimela Pegro uchéchigo siné ra'íchaligo tabilé machióríligo Esusi*

<sup>25</sup> Napu'lige alakichi ye, Simoni Pégroka biji sujkáliga ilile alé a'bé na'beta. 'Lige uchéchigo rukéleru Pegro uché jaré ralámulite, regá rukéleru:

—¿Tacha Esusi gompaniérola ju mué?

'Lige Pégroka 'yéliga nejele:

—Neka tabilé Esusi gompaniérola ju.

<sup>26</sup> Alé ilile bilé rió alué wa'lula balé piónila, alué rió rijimala napu Pegro najkala re'jpunale. 'Lige regá rukéleru Pegro alué riote:

—¿Tacha eté ne mué alé napu we'ká ja rojá olibo Esusi 'yuga eyénachi mué?

<sup>27</sup> 'Lige uchéchigo siné anile Pegro tabilé alué rió ko. A'ligerikáchi bilé o'tolí sinale.

*Jena ruwimela 'ma o'tóirigo Esusi Pilato bejtélachi*

<sup>28</sup> 'Ma che'lachi ma'chí páliro Esusi Kaipasi galílachi, o'tóleru Esusi alué wa'lula selígame romano bejtélachi. Alué jurío e'wélala napu o'tole Esusi, alueka tabilé mo'ile alé galichi Esusi 'yuga, napugiti alarigá nokame nílgame alué a'bopi ka, alué juríoka tabilé mo'ime nile tabilé jurío bejtélachi bilé piesta nerúgichi. Wa'lú piesta nile Páskua anilime. 'Ma mo'isáká a'lígeko tabilé elílime nile alué go'ame go'yachi piesta nerúgichi. <sup>29</sup> Alekeri alué selígame Pilato anilime ma'chínale alé pachaka galíraleká, 'lige regá rukele:

—¿Tachiri gite nejiga e'yénila 'emi ye rió?

<sup>30</sup> Regá nejele alué e'wélala jurío:

—Tabilé cha 'sísaká ye rió, a'lígeko pecha a'pawili ko ramué ye rió.

<sup>31</sup> Pilátoka regá anile:

—'Emi o'togá go, 'lige bilé gastigo 'yawa 'we a'lá sébali napurigá oliame ju.

Alué e'wélala juríoka ku regá nejele:

—Ramué juríoka tabilé lisensia nígame niru napurigá me'liboa bilé ralámuli, pe 'emi ralámuli románoka 'la lisensia nígame ju.

<sup>32</sup> ('Ya bajchabé rawé Esusi alarigá anile bilé gulusichi chujkugá mukuméoríle.)

<sup>33</sup> Pilátoka ku pachá simile bo'né galílachi Esusi bayemia 'yuga ra'ichamia. 'Lige regá anile:

—¿Mué ju alué jurío wa'lula rey?

<sup>34</sup> 'Lige Esusi regá nejele:

—¿Mué bo'né alarigá machinali? ¿O péchala pe iligá ruké mué napugiti uché jaré ralámuli aniamé?

<sup>35</sup> Pilátoka regá nejele:

—Neka tabilé chéla wa'lula ko mué o tabilé wa'lula ko mué. Neka tabilé jurío ju. Alué ralámuli jurío 'lige alué balé e'wélala nokale mué nejía. Mué jurío júchigó. ¿Tachiri chu'síkame júkó mué?

<sup>36</sup> Esúsika regá nejele:

—Napu ne nulame ju, tabilé jena wijchimoba ju. Alarigá nísaká, a'lígeko suwábaga ne gompaniérola nakómiliké napurigá tabilé o'toboa ne alé napu mochí e'wélala jurío. Neka tabilé nulámili ju jena wijchimoba.

<sup>37</sup> A'lige Pilátoka regá rukele:

—'Liko ¿mué ju wa'lula rey ralámuli jurío nuleme?

Esúsika regá nejele:

—Wa'lula ju ne napurigá aní mué. Nawá ne jena wijchimoba 'lige jena ochérigame ju ne napurigá wa'lula nímala. Nawá ne bilé ra'íchali ra'ichamia 'we najtékame. Suwábaga ralámuli napu 'la e'wame ju alué 'la bijchiá ra'íchali, 'la gepume ju ye ra'íchali napu ra'icha ne.

<sup>38</sup> 'Lige Pilátoka regá rukele:

—¿Tachiri júkó alué 'la bijchiá ra'íchali?

*Jena ruwimela Pilato nuláligo napurigá me'liboa Esusi*

'Lige 'ma rukésaká, Pilátoka ma'chínale alué ralámuli jurío 'yuga ra'ichamia, 'lige regá anele:

—Neka tabilé se'wináriga etiá ye rió napurigá me'liboa. Tabilé cha 'síkame ju. <sup>39</sup> Senibí bamí Páskuachi bilé jurío su'páname ju ne napu 'yériga mochí, 'lige 'ma su'panásaká, 'ma tabilé uché ku cha'piame ju alué. ¿Najkí 'emi napurigá su'panawa ye rió Esusi, wa'lula rey ralámuli jurío nuleme?

<sup>40</sup> Alígeko suwábaga alué ralámuli jurío anile:

—¡Ye rioka tabilé supanawa! ¡Barabasi 'lina su'panawa!

Barabásika geriyero nile, napu galírale ba-jcháriga ajtile.

## 19

<sup>1</sup> 'Lige Pilato jaré sontalo nulele napurigá o'tomela Esusi wejpisomia. <sup>2</sup> 'Lige alué sontalo newale bilé gorona\* wejchate 'lige Esusi mo'ólachi ajchele. Alígeko bilé chónaga sejtákame chinite gemele napurigá bilé wa'lula neraga. <sup>3</sup> A'liko alué sontalo alé a'bé jábale Esusi ilígichi 'lige regá anele, chibi anigá gawéliga:

—¡Mué rió jurío Wa'lula Rey, we'ká bamí bejtélasa 'la ju!

'Lige banachí wejpigá nokigá anile alué ralámuli sontalo.

<sup>4</sup> A'lige Pilato uchéchigo ma'chínale 'lige ra'ichale alué ralámuli jurío 'yuga, 'lige regá anele:

—'La e'nesi, ma'chí pákala ne ye rió napugiti tabilé machiame ne chonigá me'liboli ko ye rió.

<sup>5</sup> 'Lige pachaka ma'chínale Esusi wejchá gorónaga, 'lige chónaga sejtákame chiní gemagá. A'lige Pilato regá anile:

—'La e'nesi, jena ilíkuru ye rió!

<sup>6</sup> 'Lige alué balé e'wélala 'lige alué sontalo napu repume ju alué wa'lú re'obá, Esusi etesa, a'wágame ra'ichaga anile:

—¡Bilé gulusichi ujchugá me'libóguru alué rió!

A'lige Pilato regá anile:

—'Emi a'bopi o'togóg. 'Lige bilé gulusichi ujchugá me'liboa. Neka tabilé machí tachiri chu'síkame ka ye rió napurigá me'liboa.

<sup>7</sup> Alué ralámuli juríoka regá anile:

—Ramueka regáriga machiiaa ye ra'ichali Onorúgame nulalila, ye rió me'liátikó, alué rió Onorúgame Inolá koriánturu. Tabilé che animeli ju ye rió napuyeti Onorúgame koriá. Abirigá mukumeli ke.

<sup>8</sup> Napu Pilato akisá regá anichi ye ralámuli, uché abé majale. <sup>9</sup> Ku pachá galírale bajkile Esusi 'yuga, 'lige rukele:

—¿Koché bejtégame ju mué?

Esúsika tabilé tábiri nejele.

<sup>10</sup> A'lige Pilato regá anele:

—¿Ne'chí tabilé nejémala mué? ¿Tabilé machí mué ne ko wa'lula napurigá nulámala ne mué me'liachi bilé gulusichi ujchugá, 'lige napurigá su'panámala napurigá simela mué? ¿Tabilé machí mué?

<sup>11</sup> Esúsika regá nejele:

—Mué tabilé lisensia 'yásiga Onorúgamete napurigá wa'lula nímala mué, tabilé nulémilikuru mué ne'chí me'líniliga. Alué ralámuli napu ne'chí a'pale jena, alué ralámuli abé wa'lú cha nokágame ju, peka napurigá mué. Alué ralámulika se'winá nokale, tabilé napurigá nulá Onorúgame.

<sup>12</sup> A'lige si Pilato 'we 'nátale churigá su'panamio Esusi. Tabilé najkile napurigá me'liboa. 'Lige uchéchigo siné ra'ichale ralámuli jurío 'yuga, 'lige alué ralámuli jurío e'wele ra'ichaga anile:

—'Ma su'panásaká mué Esusi, a'lígeko tabilé alué wa'lula nulame rey gompaniérola ju mué, alué napu Roma ajtí. Alué bo'né Esusi aniéturu wa'lula rey ko, suwábaga ralámuli nuleme, a'lígeko saíla ju alué wa'lula 'yuga Roma ajtígame.

<sup>13</sup> Napu'lige Pilato akisá alanichi alué ralámuli jurío, ma'chí pale Esusi uchéchigo siné. 'Lige Pilato asibale alé bilé siachi napu gustisia oliame nile ralámuli alé napu anilime nile Gabata ebreo ra'ichaga. Gabata aniáká «Rejté Chijpérigime Pétigame» aniname kéré. <sup>14</sup> Bilé rawé bajchabé nile napu newame nile wa'lú piesta Páskua anilime.† Amulí rawilí nile. A'lígeko Pilato regá anele alué ralámuli jurío:

—¡Jena ilí wa'lula rey 'emi nuleme!

<sup>15</sup> Alué suwábaga ralámuli jurío uchéchigo a'wágame ra'ichaga regá anile:

—¡O'togá, o'togá ye rió, bilé gulusichi ujchugá me'liboa!

Pilátoka regá anile:

—¿Najkiá 'emi napurigá me'liboa ye rió 'emi nuleme bilé gulusichi ujchugá?

'Lige alué e'wélala balé regá nejele:

—Alué rioka tabilé wa'lula ju ramué nuleme. Bi'lepi wa'lula ju, alué napu ajtí alé Roma anilichi.

<sup>16</sup> A'lige Pilato lisensia nejile napurigá me'liboa Esusi bilé gulusichi ujchugá. A'lige sontalo 'ma o'tole Esusi.

*Jena ruwimela Esusi bilé gulusichi ujchagá me'ltlirigo*

<sup>17</sup> Esusi bo'né o'tole alué gulusí majtoga, 'lige sébale bilena rabó Anayáwali Mo'ola anilichi. Alué ralámuli jurío Gólgota aneme nile. <sup>18</sup> Alé wijchí rekagá klabo jáwale sekachí 'lige ronólachi, 'lige o'weti elale alué gulusí. Abiena uché jaré oká rió

\* 19:2 E'nesi glosario «corona». † 19:14 E'nesi glosario «Páscua».

ujchálechigó uché jaré gulusichi alé a'bé napu ujcháliru Esusi, 'lige Esusi alé nasipa ujcháliru alué oká ríó uchúkichi. <sup>19</sup> Pilátoka nulele alué sontalo romano napurigá ujchawa bilé rabileta osirúgime alé gulusichi, mo'ochí amóbage napu chujkule Esusi. Regá anime osilí: «Esusi Nasareta anilichi bejtégame, alué wa'lula rey ralámuli jurío nuleme.» <sup>20</sup> We'ká ralámuli jurío e'nénale 'lige leérale alué osilí, a'bé niligame Rusaleni anilichi napu ujcháliru Esusi alué uché oká ríó 'yúruga. Alué osilí bakiá se'wináriga ra'íchiga osirúgime nile, napurigá ra'íchame nile ralámuli jurío, 'lige romano, 'lige griégochigó. <sup>21</sup> Alué e'wélala balé tabilé galele napurigá regá ujchawa alué osilí. 'Lige alekeri anele alué Pilato:

—«Wa'lula rey ralámuli jurío nuleme», anime ju alué osilí, 'lige ramueka tase nakiae napurigá alanime ujchawa. Regá anime ujchawa 'lina: «Ye ríó Wa'lula rey korí ralámuli jurío nuleme.»

<sup>22</sup> 'Lige Pilátoka anele:

—Napurigá ujchá ne, alarigá rejpímala.

<sup>23</sup> 'Lige alué sontalo 'ma re'pá gulusichi ujchasa Esusi, 'ma napabule Esusi o'páchala, 'lige chí'wánale naómána neraga alué o'pacha 'lige alué a'bópika nachútale. Naó sontalo nile alué noká. 'Lige ajtílechigó bilé o'pacha we'lí Esusi o'páchala napu re'lé ujchame nile (napu túnika anime ju yolí ra'íchaga), mo'yériga newárigime nile, tabilé suka newárigime. <sup>24</sup> 'Lige alué sontalo anile a'bópika:

—Tabilé chí'wanawa alué we'lí o'pacha, bilé re'gí re'épua napurigá 'la machiboa chieri ne'yúrra.

Alarigá 'la sébali ikile napurigá anile Onorúgame ra'ichálila 'yabé bajchabé rawé, regá anime ra'íchili: «Ma nachútale ne o'páchala, 'lige bilé re'gí re'ele ne o'páchala méniliga.»<sup>†</sup> Alarigá nokale alué sontalo.

<sup>25</sup> Esusi eyela, 'lige Esusi i'chilala, 'lige María napu Kleopasi 'yula nile, 'lige Mariachigó napu Magalena anilichi bejtégame nile, suwábaga alué ralámuli alé jale, alé a'bé napu Esusi chujkule gulusichi. <sup>26</sup> Esusi etele alué bo'né eyela 'lige bilé alué Esusi gompaniérola 'yúruga etélechigó, alué napu Esusi 'we galegá eteme nile. <sup>§</sup> 'Lige Esusi anele alué bo'né eyela:

—'La repúpua ka ye ríó napurigá mué bo'né ranala neraga.

<sup>27</sup> 'Ligechigó alué ríó anéleru Esúsíte:

—'La repúpua ka ye mukí napurigá mué bo'né eyela neraga.

'Alige si 'we a'lá repule ye ríó 'la napurigá bo'né eyela neraga.

### *Jena ruwimela 'ma mukúligo Esusi*

<sup>28</sup> Esúsika machigá anile napu 'ma sébali oláligo napu aníligo alué Onorúgame ra'ichálila 'yabé bajchabé rawé. 'Alige regá anile:

—'We balamu ne.

<sup>29</sup> Alé a'bé ilile bilé sikolí i'wilí ba'wila 'we cho'kógame ro'árigame. Bilé ba'nasoli sa'nabáchasa alué i'wilí ba'wílate, bilé balichi ujchale alué ba'nasoli, 'lige Esusi chu'álachi owele alué ba'nasoli. <sup>30</sup> 'Lige napu 'lige Esusi 'ma chunusá alué ba'nasoli regá anile:

—Suwábaga 'ma 'la sébali olá ne.

'Alígeko 'ma go'ná rojpóchiga chujkíbale mo'ola, 'ma mukule.

### *Jena ruwimela bilé selate ejchélerigo Esusi a'chigachi re'lege*

<sup>31</sup> Bilé rawé rapakónala nile napu newame nile wa'lú piesta Páskua anilime 'lige sawalachi nímili nile resíbulichi rawé, 'lige alué ralámuli jurío tabilé najkile napurigá bakiánika ríó gulusichi ejtebímala resíbulichi rawé. Alekeri alué ralámuli anele Pilato:

—'Ma gajponawa alué bakiá ríó gulusichi uchúkame gajsila napurigá abé a'lá yati suwirálikó.

Abiena najkílechigó alué ralámuli napurigá 'ma re'kabuwa alué ralámuli alé gulusichi uchúkame. <sup>32</sup> 'Alige alué sontalo simíbale alué bakiá ríó gajsila gajponamia. Bajchá bilé ríó gajsila gajpónale. 'Lige uché bilé ríó gajsila gajpónale. <sup>33</sup> Alué sontalo machile 'ma mukugá chujkúligo alué Esusi, alekeri tabilé gajponáriru Esusi gajsila.

<sup>34</sup> Abirigáchigo bilé sontalo bilé selá o'kame nílekó 'lige ejchele aluete a'chigachi re'lege, 'lige Esusi wa'lú elénale aminami ba'wítiri ma'chínalechigó. <sup>35</sup> Alué ríó Esusi oyérame suwábaga ye etele, 'lige a'kinana ruwí napurigá 'la machimela 'emi alakíligo. Alué ra'íchali napu ruwile ye ríó 'la bijchiá ju. Alué bo'né 'la machí 'la bijchiga ra'íchiligo napurigá 'emi 'la bijchígimala. <sup>36</sup> Alakile ye suwábaga napurigá 'la sébali nimia napurigá anile Onorúgame 'ya bajchabé rawé. Regá anile: «Tabilé 'wesi o'chíla gajponáwili ju.»\* <sup>37</sup> Alué Onorúgame ra'ichálila anílechigó 'ya bajchabé rawé: «'Emi etémala alué napu ejchéleru selate.»<sup>†</sup>

### *Jena ruwimela 'ma o'tólrigo Esusi rekamia bilena resochí newárigime*

<sup>38</sup> 'Lige 'ma suwábaga alakisá, bilé ríó José anilime Arimatea anilichi bejtégame, lisensia tánale Pilato alué Esusi o'tomeo. Joseka bilé Esusi oyérame nile, tasiné ruwile Esusi oyérame ko alué e'wélala

<sup>†</sup> 19:24 E'nesi Salmos 22:18.

<sup>§</sup> 19:26 Jipe mayé ralámuli Juani niligo alué ríó.

\* 19:36 E'nesi Salmos 34:20.

<sup>†</sup> 19:37 E'nesi Zacarias 12:10.

jurío majaga. Pilátoka 'la lisensia 'yale, a'ligeko alué rió José anilime o'tole Esusi 'ma mukúgame. <sup>39</sup> Abiena enálechigó alué Nikoremio anilime, alué napu 'yabé siné rukó simile Esusi 'yuga ra'ichamia. Alué rió Nikoremio baisá makué kilo niraga o'ká enale gajsalá yowí, oká na'lórigame, alué Esusi mukúgame ujchemia. Alué okaná chojkégame gajsalá «mira» anilime nile bilé 'lige «áloe» anilime nile uché bilé gajsalá. <sup>40</sup> Alué oká rió kabile Esusi we'lí chinite 'lige alué gajsalá na'lórigame ajchigá alégana chinichi. Alanokale alué oká rió napurigá nokame nile alué ralámuli jurío bilé mukúgame gatemia. <sup>41</sup> Alé a'bé napu mukule Esusi ajaré iwísi rakeme jale 'lige alé a'bé ilile bilé resó newárigime napurigá bilé mukúgame rekawa. Tabilé 'wesi mukúgame rekárigame nile alé ewachi. <sup>42</sup> Alé rekáliku alué Esusi 'la a'bé nílgame, 'lige 'ma chojkíamichi nile resíbilichi napu'lige suwábaga ralámuli jurío resíbame nile. Resíbilichika yanchi alí chojkime nile rapagachi 'lige sawalachi alí suwéname nile.

## 20

*Jena ruwimela 'ma tabilé rewílirigo Esusi napu rekáliku gatega*

<sup>1</sup> Romíkichi be'á ta'chó che'lachi, María, napu Magalena anilichi bejtégame nile, simile alé napu rekáliku alué Esusi mukúgame. Alé sébaga etele alué wa'lú rejté 'ma se'wí ajtigó napu ajchárigame nile alé resó 'yériga. <sup>2</sup> Ku 'we 'maga simile alé napu asale Simoni Pegro 'lige alué uché bilé rió napu Esusi 'we galeme nile, \* 'lige regá anele:

—Ma tabilé i'té alué mukúgame napu alé resoquí rekárige, tabilé machí ne koche bo'igó.

<sup>3</sup> 'Lige Pegro 'lige uché bilé rió simúbale alé resoquí napu rekáliku Esusi. <sup>4</sup> Okánika rió 'we a'wágame júmaka simúbale. Pégroka ta'mé 'we sajpume nile, alué uché bilé rió bajchá sébale alé napu Esusi bo'ilige. <sup>5</sup> 'Lige alué rió pachami resoquí e'nénale. 'Lige pe alué chiní rosákamecho etele alemi 'lútiga mochigo, tabiléchigo bajkíleko pachami resoquí. <sup>6</sup> 'Lige sébale Simoni Pegro. Alueka bajkile pachami resoquí, abiena pe chiní rosákamecho etele. <sup>7</sup> 'Lige abiena etele Pegro alué uché bilé chiní napu Esusi mo'ola buléliru. 'La suériga ro'mínariga ajtile waná. <sup>8</sup> 'Lige alué uché bilé rió bajkile 'lige aluéchigo tabilé asemi etele alué mukúgame, a'lige 'la bijhígile napu anlige María. <sup>9</sup> Tabilé 'cho 'la námale alué ralámuli napu anlige Onorúgame 'yabé bajchabé rawé Esusi ku ajanamio. <sup>10</sup> 'Lige alué

oká rió napu Esusi oyérame nile ku galírale simúbale.

*Jena ruwimela Esusi ilíbaligo napu ajtile alué María napu Magalena anilichi bejtégame nile*

<sup>11</sup> Uchéchigo siné sébale María alé resoquí 'lige alé resoquí ma'chika asíbale nalá. Bijí nalaka pachami e'nénale, <sup>12</sup> 'Lige oká santo ánjeli etele pachami mochigo napu Esusi rekárilige. Bilé napu Esusi mo'ega bo'ile, alé ajtile alué santo ánjeli, 'lige bilé napu ronega bo'ile Esusi. <sup>13</sup> 'Lige alué santo ánjelika rukele alué María:

—Mué mukí, ¿chonogá nalá mué?

Maríaka regá nejele:

—'Ma pecha néréko Esusi jena napu rekárilige, 'lige tabilé machí ne kochiena bo'igó.

<sup>14</sup> Regá anisá 'ma pe'tá guwana simile 'ma ku simea, 'lige alé etele bilé rió. Tabilé machile Esusi níligo. <sup>15</sup> 'Lige Esusi regá anele:

—Mué mukí, ¿chonogá nalá mué? ¿Chieri 'yaga eyena mué?

'Lige María alué repume mayega, regá anele:

—Mué rió, mué 'sísaká alué Esusi o'toa, ruywena ne koche bo'igó, 'lige ne bo'né 'simala ku jena a'pá.

<sup>16</sup> 'Lige Esúsika regá anele:

—¡María!

'Lige Maríaka gu'lile napu Esusi ilile, 'lige regá anele jurío ra'ichálila ra'ichaga:

—¡Raboní!

(Raboní anía ka pe benírame aniórile alué a'bopi ralámuli jurío.)

<sup>17</sup> 'Liko regá anele Esusi:

—Ta'chó cha'piboa ne,† tabilé 'cho seba ne napu Onorúgame ajtí, 'lige anewa ka alué ne gompaniérola ralámuli, ne 'ma simeo napu ajtí Onorúgame napu ne O'nola ju 'lige alué ne oyérame O'nola júchigó, alué Onorúgame napu ne'chí tebume ju 'lige abiena tebume ju 'emi.

<sup>18</sup> Alué María napu Magalena anilichi bejtégame nile yati simile alué Esusi oyérame ruyemia alué Wa'lula Esusi etéligo 'lige ruyémichigó napu anligo Esusi alé napu María etele.

*Jena ruwimela Esusi ilíbaligo alué makué bilé bo'né oyérame mochígichi*

<sup>19</sup> A'lige 'ma abé alí romíkichi, suwábaga Esusi oyérame napu'ka mochile bilena galírale 'we 'la 'yériga. 'We majá mochile e'wélala jurío sirá mayega. A'lige alé ma'chiná ilibale Esusi pe yati neraga, suwábaga alué ralámuli mochígichi ilibale, 'lige anele:

\* **20:2** Alué uché bilé rió Juani anilime nile, alué napu osale ye osilí. † **20:17** Jaré aní «su'paná ne» anile Esusi María olagá.



—'La sébali ralámuli niwa 'emi Onorúgame 'yuga 'nátame.

<sup>20</sup> 'Ma alanísá, bo'né Esusi getúriale alué ralámuli bo'né sekala napu klabo jale alé gulusichi chujkúgichi, 'lige napu ejchéli ru alué selate. Suwábaga alué ralámuli 'we ra'sálale alué Wa'lula etega. <sup>21</sup> 'Lige Esusi uchéchigo anele:

—'La sébali ralámuli niwa 'emi, bi'lepi 'nátali 'nátame niwa pe Onorúgamecho 'yuga. Onorúgame ne'chí júlale 'lige neka 'emi nuléguru.

<sup>22</sup> Esúsika buchigá anele alué ralámuli:

—Naresi Onorúgame Alawala. <sup>23</sup> 'Emi e'kásaká alué ralámuli cha nokame, Onorúgame chigó 'la e'kámala alué ralámuli. 'Emi tabilé e'kásaká alué ralámuli cha nokame, Onorúgamechigó tabilé e'kámala alué ralámuli.

*Jena ruwimela Esusi Romasi 'yuga ra'ichaligo*

<sup>24</sup> Alé nawachi Esusi alué oyérame 'yuga, tabilé asale Romasi anilime rió napu nile bilé alué makué oká Esusi oyéramechigó. Romásika «Kuate» anélime nile. <sup>25</sup> 'Ma i'libeko kulí ruyele alué ralámuli alué Romasi etesa, regá anele:

—Eteru ramué alué Wa'lula Esusi. 'Ma tabilé mukugá bo'í.

'Lige Romasi anile:

—Tabilé etésaká ne alué Esusi sekala napu klábote ulunáuru, 'lige tabilé nochasa ne alé a'chigachi re'lebege, a'ligeko tabilé bi-jchígamala ne Esusi ko alué rió.

<sup>26</sup> 'Ma bilé tarali kachi, alué ralámuli Esusi oyérame bilena galírale mochile, 'lige Romasi 'la ajtíle a'lige rawé. 'We a'lá 'yériga mochile yochi, 'lige Esusi alé ma'chiná ilíbale tabilé i'puga yochi, alé nasipa ilíbale alué ralámuli mochígichi. 'Lige regá anigá repórale regá anigá:

—'La sébali ralámuli niwa 'emi Onorúgame 'yuga 'nátame.

<sup>27</sup> 'Lige regá anele Romasi olagá:

—Ne sekala e'nébá, makúsate nochá, 'lige sekate nochábá napu ejcheru ne selate 'lige 'la bijchígíwa pe abalúe ko ne. 'La bijchígíwa uchéchigo ku ajagá ajtigó ne.

<sup>28</sup> 'Lige Romásika regá anele:

—¡Mué ju Wa'lula ne nuleme 'lige amí-nami Onorúgamechigó!

<sup>29</sup> 'Lige Esusi regá anele:

—Mué 'ma eté ne'chí, alekeri 'la bijchígíwa ku ajagá ajtigó ne. Uché jaré ralámuli 'la bijchígímalá ku ajagá ajtigó ne rekó tabilé etee ne'chí. 'Lige alué ralámuli 'we a'lá narémala napu ne'j Onorúgame. 'We a'lá ganíliga mochímala rekó tabilé etee ne'chí.

*Jena ruwimela Juani 'la ruwíligo chonigá osáligo ye libro*

<sup>30</sup> Esusi bijí alué bo'né oyérame 'yuga asagá, pe bo'né 'nátaga e'karúgame semáriga newale napu tabilé 'wesi ralámuli gayéname ju a'chigóriga noká. Tabilé osá ne suwábaga jena líbrochi napu 'sile Esusi. <sup>31</sup> Napu osá ne ye jena líbrochi bilé ra'ichali ju napurigá 'la bijchígamala 'emi Esusi ko alué Kristo, napu julárigame nile Onorúgamete rewagáchika, alué Onorúgame Inolá. 'Lige 'emi 'la bi-jchígiga mochisa ye rió Esusi Onorúgame náboligo, a'lige 'la nareka mochímala 'emi iwérali napurigá 'la ganíliga epperélamala 'emi jena wijchímoba 'lige alarigá simámala 'emi 'pa rewagachi epperélimia.

## 21

*Jena ruwimela Esusi alé ilbáligo napu gíchao alué bo'né oyérame mochíligo*

<sup>1</sup> Abé a'kinana Esusi ma'chínale alé napu alué bo'né gompaniérola mochile alé wa'lú ba'wí manígichi alé napu Tibéyasi anilichi nile napu Galilea anilime nilechigó.

<sup>2</sup> Napuika mochile Simoni Pegro, 'lige Romasi napu «Kuate» anélime nile, 'lige Natanaeli napu Kaná anilichi bejtégame nile Galilea ejiro, 'lige oká rió Sebereo anilime rió 'kúchila, 'lige uché jaré oká ralámuli Esusi gompaniérola. <sup>3</sup> 'Lige Simoni Pegro anele suwábaga alué ralámuli:

—Ro'chí i'mumia simé olá ne.

—Ramuéchigó simawa mué 'yuga —anile alué uché jaré ralámuli.

'Lige bilena bárkochi simíbale alué ralámuli, 'lige che'lébale ro'chí i'mua tabiléchigo 'wesi ro'chí ma'chí pale ko. <sup>4</sup> 'Ma che'lachi nile 'lige Esusi alé suwé ilíbale, nobi alué bárkochi e'yéname tabiléchigo machile Esusi ko. <sup>5</sup> 'Alige regá rukele Esusi alué bárkochi e'yéname:

—'Emi gompaniero, ¿tabilé 'wesi ro'chí boinaru?

'Lige nejele alué ralámuli:

—Tabilé 'wesi.

<sup>6</sup> 'Lige Esusi regá anele:

—Pasi alué morali alé 'mi wajtoná, a'lige 'la boinámala ro'chí 'emi.

Alarigá nokale alué ralámuli, a'lige we'ká ro'chí buyánale alué morálite, 'we bejtégame asíbale 'ma tabilé umébale banisúka o'toa. <sup>7</sup> 'Lige alué rió napu Esusi 'we najkíligo anele Pegro:

—¡Alué rió ju Wa'lula Esusi!

Simoni Pegro akísá Wa'lula ko Esusi, alué bo'né o'páchala umuchipo bulísá, ba'wichí o'pochile. <sup>8</sup> A'kega sébale alé suwé napu Esusi ilile. Uché jaré ralámulika alué bárkochi mochiga sébale, alué morali o'ká sébale baníruga bochí ajchagá ro'chí. Alé napu ro'chí wejale, bilé sientto metro niraga nile sebamia alé ba'wichí suwé. <sup>9</sup> Bárkochi e'tigisa 'yéname alué ralámuli, 'lige etele

raja iligó 'lige aminami etele bilé ro'chí alé amoba sawichi bo'igame 'lige abiena etélechigó bilé baní. <sup>10</sup> Esusi regá anele:

—Jeka a'pasi pe'kabi ro'chí alué napu pe kulipi wejá 'emi.

<sup>11</sup> 'Lige Simoni Pegro 'mole alé u'tá bárkochi 'lige wijchí baníriga o'tole a'bemi suwé alué morali bochí ajchigá ro'chí. Bilé sientó malígisa makué na bakiá ro'chí bi'tile alé morálíchi. 'La we'ká ro'chí kachi tabilé ch'i'wale alué morali. <sup>12</sup> 'Lige Esusi regá anele:

—Jeka simasi, 'ma go'poa.

Suwábaga alué ralámuli mayele ye rió Wa'lula Esusi ko, nobi majale ko rukea pala 'la Wa'lula Esusi ko. <sup>13</sup> 'Lige Esusi abé na'ibeta ilibale, 'lige alué baní 'wile 'lige nachútale suwábaga ralámuli. Alué ro'chí abiena nachútale.

<sup>14</sup> Alígésí 'ma baisá nile napu'lige alué ralámuli ku etea Esusi 'ma ku ajánasa.

*Jena ruwimela Esusi Pegro 'yuga ra'ichaligo*

<sup>15</sup> 'Ma go'sá go'ame, Esúsika Simoni Pegro 'yuga ra'ichale, 'lige regá anele:

—Simoni Pegro, Juani inolá, ¿'we a'lá galegá eté mué ne'chí me'tigá ye ralámuli 'lige tábiri?

'Lige Simoni Pégroka regá anele:

—Alarigá ju. Mué 'la machí, ramué okaka 'we a'lá gompaniero niru.

'Lige Esusi regá anele:

—'Liko 'we a'lá semáriga 'yawa go'ame ne bujkula bo'á.\*

<sup>16</sup> 'Lige uchéchigo siné rukele Esusi:

—Simoni Pegro, Juani inolá, ¿'we 'la galegá eté mué ne'chí?

Simoni Pégroka regá nejele:

—Alarigá ju, mué 'we a'lá machí 'we a'lá gompaniero nírgo.

'Lige Esusi regá anele:

—'We a'lá repúpua ne bukula bo'á.

<sup>17</sup> 'Lige 'ma baisá niraga rukele Esusi:

—Simoni Pegro, Juani inolá, ¿'we a'lá gompaniero niru ramué?

'Lige Simoni Pégroka 'we seweka asíbale uchéchigo alarigá rukésiga. Alige regá nejele Simoni Pegro 'we seweka:

—Esusi mué 'la machí suwábaga. Mué 'la sébali machí 'we a'lá gompaniero nírgo.

Esusi regá anele:

—'We a'lá semáriga 'yawa go'ame ne bukula bo'á. <sup>18</sup> 'La bijchiá aní ne. Abijí re'malí ka mué bo'né o'pochátíme kéturu ichúrimi einamia, napu'lige mué o'chéráme ka sekala wajchínaga o'pochátiriwa mué 'lige 'ma o'toboa mué rekó tabilé siminalie.†

<sup>19</sup> Ye ra'ichalika pe ruwime nile churigá mukumeo Simoni Pegro abé a'kinana bamí, 'lige Simoni Pegro mukusá we'ká ralámuli 'we a'lá niramio Onorúgame.

Esusi regá anele:

—¡Nabágó!

<sup>20</sup> Simoni Pégroka gu'lile 'lige etele alué rió enágichi, alué rió napu Esusi 'we galeme nílige, alué rió napu a'bé asale go'yá Esusi 'yuga napu'lige napuika go'alige bijí ta'chó cha'piá Esusi, alué napu regá rukele: «¿Chieri ju alué napu mué sayega ilibámala?»

<sup>21</sup> Simoni Pégroka etesa alué rió enágichi, regá rukele alué Esusi:

—Mué Wa'lula Esusi, ¿alué rioka chukimeli ju?

<sup>22</sup> Esúsika regá nejele:

—Ne bo'né a'résaká napurigá tabilé mukumela ye rió napusí ne ku bo'né nawasa, ¿tachiri chureko mué sí? Mueka pe iligá ne'chí 'yuga enáwaguru.

<sup>23</sup> Alekeri chojkile a'bopi ra'icha alué we'ká ralámuli Esusi oyérame, alué ra'ichali napu regá anime ju «tabilé mukumeli ju ye rió», nobi Esúsika tabiléchigo alarigá anime ke anile. Pe anile: «Ne bo'né nerásaká napurigá tabilé mukumela ye rió napusí ne ku bo'né nawasa, ¿tachiri chureko mué sí?» pe regá anile.

<sup>24</sup> Alué bo'né rió anile ye ra'ichili ruyá 'lige bilé apélichí osale. 'Lige alué rió ne ke. 'La sébali machirú 'la bijchiá ko ye ra'ichali.

<sup>25</sup> Abechigó we'ká e'karú 'sile Esusi. Suwábaga osisuga ka apélichí, tabilé asemi nerúlímaleké gawichí bilena napu mochiawa alué apeli ra'ichali newárigime, 'ma bochímikuru, asírige we'ká nímiliké.

Pe ikipi ra'ichali ruimé nébá. Wa'lú che-liérabá.

\* 21:15 Napu'lige Esusi regá aní: «Ne bujkula bo'á» pe «ne oyérame» anime ke anile. † 21:18 Jaréchigo aní napu'lige anile Esusi «sekala wajchínaga», pe ruwime ke anile Pegro mukumeo gulusíchi chujkagá.

## Regá anime osale Lukasi Ruigá Chonokáligo Alué 'Ya Mochígame Esukristo Oyérame

Kuira mué Teópilo.

<sup>1-2</sup> Ne Lukasi 'we 'ya nábolige uché bilé osilí apélichí ujhachárigame mué ruigá napurigá 'sile Esukristo bijí jena wijchimoba asagá ta'chó simiá alé 'pa rewagachi. 'We a'lá benírale rejcholi alué napu bo'né Esusi owile.\* 'Lige Onorúgame Alawala gu'irile alué Esusi napurigá 'la 'we semáriga benírimala. Alué Esusi mukusá, ku ajánale. <sup>3</sup> 'Lige ku ajánisa Esusi, ra'íchale alué makué bilé rió 'yuga, oká liá rawé 'yuga eyénale napurigá alué ralámuli 'la machimela 'la bijchiá ajággame ko alué bo'né Esusi. 'Lige abiena ruyele Esusi alué ralámuli churigá nulame ko Onorúgame jena wijchimoba.

<sup>4</sup> Bilé rawé napu'lige go'yá mochílige, Esusi anele alué makué bilé rió:

—Tase sinawa 'emi ralámuli jena wa'lú we'ká riógachi Rusaleni anilíchi, 'emi ralámuli 'la buwigá mochiwa Onorúgame Alawala. Onorúgame bo'né 'la aniéturu 'ya napurigá nejimio bo'né alawala, julámorié alé 'pákana rewagáchikana, napurigá 'we semáriga gu'irimala 'emi ralámuli jami ichúrimi e'yénachi alué rejcholi ruigá. 'Lige alué ra'íchali 'ma ruyéturu ne 'emi 'ya. <sup>5</sup> 'Yako, Juani anilime rió nulea ilime nile napurigá mo'imela alé wa'lú ba'wichí alué ralámuli napurigá machiboa Onorúgame oyérame ko, alarigá rewaramé nile alué Juani. Pe u'kabi rawé kachi Onorúgame rewarámili ju 'emi ralámuli bo'né alawálate —alarigá anile alué Esusi.

*Jena ruwimela Esukristo ku alé rewagachi moyénaligo*

<sup>6</sup> 'Lige alé ajtígachi, rukele alué ralámuli alué Esusi, anele:

—Mué Wa'lula, zjípeko mué e'wélala niraga mochiámala ramué ralámuli israelita napurigá nílige 'ya napurigá tabilé piónila niraga mochiámala ramué?† —alarigá rukeleke'é alué ralámuli.

<sup>7</sup> 'Lige Esúsika anele:

—Onorúgame tabilé elá napurigá 'emi machimela alué 'nátli alarigá nimio, bi'neli machí Onorúgame, alueka wa'lula kame, bo'né 'we 'la sébali machí. <sup>8</sup> 'Émika 'ma pe'wé narémala Onorúgame Alawala. Napu'lige naresa 'emi, a'liko 'we 'la sébali a'wággame alawega mochiámala 'emi. 'Liko 'la ichúrimi

e'yénamala 'emi. 'Émika ruyémala ralámuli chieri ka ne, napurigá 'sile ne, napu benírilige ne. 'Emi ruyémala ralámuli jena we'ká riógichi Rusaleni ejperéggame, 'lige alué ralámuli ejiro Jurea mochíggame, alé ejiro Samaria mochíggame abiénachigó. 'Lige 'emi ruyémala bochiógimi gawichí ejperéggame —anele.

<sup>9</sup> 'Lige suwénasa ra'icha, Esusi rewagachi simile. Suwábaga ralámuli etele napu ekí rióilige alé, Esusi 'párimi bokuí kíbachí nolírilimi. Alésiko 'ma tabilé etéleke'é ralámuli rekó 'pari e'negá jage. <sup>10</sup> Ralámuli 'pari e'negá jágichi, sébale oká santo ánjeli, o'tosákame o'páchigime. <sup>11</sup> Anele:

—'Emi ralámuli Galilea ejperéggame, tase e'negá jawa o'wétiri. Esúsika 'ma ku 'pa rewagachi simile, pe nujubapi ku nolínamaleké pe abalieri napuyeri kbigé.

*Jena ruwimela Jurasí nila nóchali uché bilé 'yalirigo*

<sup>12</sup> 'Lige alué ralámuli suwábaga, 'légana simíbale alé rabó mochige. (Alé rabó Olibo anilíchi alé yéniga simile Esusi rewagachi.) 'Lige ku Rusaleni simíbale alué ralámuli, pe a'bé nile. <sup>13</sup> Alé sebásaká, simíbale 'miná bilena galírale osámama ilíggame galí. Alé sebásaká jímole alé napu che'lébame nile. Alé mochile we'ká rió napu nile Pegro, Santiago, Juani, Antresi, Belipe, Romasi, Bartolomé, Mateo, uché bilé Santiago napu Alipeo inolá nile, 'lige Simoni napu geriyero nile, 'lige Jurasí napu Santiago inolá nile. <sup>14</sup> Uché jaré ralámuli abiena mochiélechigó alé. Alué Esusi nasípasi bonila 'lige nasípasi wa'la, 'lige Esusi eyela María abiena asálechigó alé, uché jaré umugí abiena we'ká mochile alé. Nabí rawé napu'le ralámuli alé galírale cheliera 'yamia Onorúgame 'lige 'we a'lá 'nátaga tánimia Onorúgame.

<sup>15</sup> Alé napu'le ralámuli bilé sientó rasíggame miná bilé liátiri mayelia. Suwábaga alué ralámuli Esukristo oyérame nile. 'Lige bilé rawé alé nasípa napu suwábaga alué ralámuli napu'ka jale alé iligá alué Pegro, 'lige anele:

<sup>16</sup> —'Emi Esukristo oyérame napurigá ne, 'yako Onorúgame Alawala gu'irale osachi alué 'ya bejtéggame Rabí anilime rió, osálekuru napurigá 'símala alué rió Jurasí. Osálekuru 'we 'ya Jurasí gu'irimili nílige cha'piachi Esusi alué Esusi sailate. A'chigóriga napurigá osálige alarigá nímili nile a'lige a'kinana. <sup>17</sup> Alué Jurasí ramué gompaniérora nile 'yako, ramué 'yuga nóchame nile. <sup>18</sup> 'Lige Jurasí gu'irile Esusi sa'la napurigá cha'pimela Esusi. Alué Esusi sa'la najtétale we'ká enomí alué

\* 1:1-2 'Enesi glosario «apóstol». † 1:6 Alué e'wélala ralámuli romano nuleme nile alué ralámuli israelita.

Jurasi napurigá nejkúrimala. A'kinana ojale bo'nepi alué rió Jurasi bilé rojá atuálachi 'lige alé chujkugá mukule. 'Lige alé chujkugá, 'ma wijchile, 'ma a'tale rojpala, 'lige ma'chínale siwala. 'Lige alué ralámuli e'wélala jurío ralale gawí alué Jurasi enomílate 'ma mukusá alué rió.†  
 19 Alige alué ralámuli Rusaleni ejperégame machísá mukúligo alué rió Jurasi, 'lige alué gawí Akelama anilime rewá uchele napu elá aníame ju. 20 Alué Rabí osale bilé ra'íchili 'we 'ya ta'chó ochérachi Jurasi: Ta'wesi bejtégame nímala alé gawichí. Alué gawika nabí bi'neli ilimela. Abiena osale alué Rabí: Alué nóchili napu iní alué rió, uché bilé rió 'yáwagó.

Anigá osale alué Rabí 'ya a'lige. §

21-22 › Alekeri uché bilé rió 'yáwa'é alué nóchali. Bilé rió napu 'la etele Juani rewarachi ba'wite, 'lige napu alué Wa'lula Esusi 'yuga eyénilige, 'lige napu 'la etele alué Esusi rewagachi simichí, alué rió 'yawa nóchali. Alué rioka 'la ruyémala uché jaré ralámuli alarigá ku ajánaligo alué Esusi.

23 'Lige wanápale oká rió. Matíasi anilime nile bilé. Uché bilé José napu Barsabasi anilime nile. Abiena Justo anilime nile. Bakiá rewégame nile alué rió. 24 Alige alué ralámuli tániga nejkúrali Onorúgame, anele:

—Mué Onorúgame, mué 'la sébali machí alarigá 'nátame ko ralámuli. ¿Chieri 'nalina 'yawa alué nóchali, 25 alué nóchali napu Jurasi a'rélige? Yako alué Esusi 'yálige alué nóchali, 'lige alué Jurasi tabilé 'la 'nátale, 'ma simile napu simeli nile —alarigá anele.

26 Alige u'kuchí rejte 'luka re'ele.

—¿Chieri meta? —anigá nokale. Alué Matíasi mele. 'Lige 'yáleru nóchali napu Jurasi nila nílige. Alésíko kúchigo 'ma 'la makué oká rió nile uchéchigo.

## 2

*Jena ruwimela 'ma sébaligo Onorúgame Alawala*

1 Napu'lige sébale piesta ri'ligó 'wílichí (napu Pentekostesi anilime nile yolí ra'íchaga), napuile suwábaga napu ekí alué Esukristo oyérame nile. 2 'Lige alé mochiga akele napurigá iwégame ekame. Alarigá aníchane 'pa rewagáchikana. Sébale 'lige alé galírale napu mochílige alué ralámuli. Bochígimi alé pachami bajkile alué napurigá eká anime 'pákana. 3 'Lige napuyeri na'í alieri re'kínale alé mo'ochíkana a'pili ralámuli mo'ólachi, napurigá na'í rajame cha'mélome niraga. 4 Pe Onorúgame Alawala kéréle alué na'í. Alarigá narele Onorúgame Alawala alué Esukristo oyérame. Alige

o'wínale ra'icha we'ká se'wináriga ra'icha, a'bópika tabilé síné benile alué ra'íchali. Onorúgame Alawala gu'írole. Sineko tabilé alarigá ra'íchame nile.

5 We'ká ralámuli jurío simíbale Rusaleni anilichí piesta olamía, ichúrими mochúgame ralámuli jsile alé. 'Nátale piesta newalime, alarigá nakíó mayele Onorúgame. 'We a'lá oyérame nile Onorúgame alué ralámuli. Ra'íhale we'ká ra'íchili se'wináriga. Onorúgame Alawala gu'írole alué ralámuli Esukristo oyérame napurigá 'la gainámala ra'icha se'winátiri ra'íchali napu ra'íchame nile alué ichúrими e'megá mochúgame ralámuli napu sébale alé. 6 Napu'lige akisá alué ichúrими mochúgame, we'ká napuile ralámuli alé. 'We 'nata jale. Anile:

7 —¿Churigá 'la alarigá ra'íhaché alué ralámuli Esukristo oyérame? Pe Galiléachi ejperégame káwé alué ralámuli, tabilé ramué ejperélachi mochúgame káwé alué ralámuli. 8 ¿Aka abalieri ra'íchame júpaché? ¿Churigá júpaché? Ramueka wanáchigo ejperégame niru. 9 Jaré Partia ejperégame ralámuli ju ramué. Uché jaré chéchigo bilena ejperégame Melia anilichí ejperégame ju jaré. Uché jaré Elami ejperégame ju. Uché jaré Jurea ejperégame ju. Uché jaré Mesopotamia ejperégame ju. Uché jaré Kaparosia ejperégame ju. Uché jaré Ponto ejperégame ju. Uché jaré Asia ejperégame ju. 10 Uché jaré Pirigia ejperégame ju. Uché jaré Pampilia ejperégame ju. Uché jaré Ejipto ejperégame ju. Uché jaré Libia anilichí ejperégame ju, pe a'bé ju Sirene anilichí. Jaré Roma anilichí mochúgame ju. 11 Jaré ralámuli jurío ju. Uché jaré tabilé jurío ju, 'ma jurío gayénale jípeko. Abiena mochí ralámuli Kreta ejperégame, alé Arabia ejperégame abiénachigó. 'We 'la ra'íchame ju alué ralámuli Esukristo oyérame ramué ra'íchálla, we'ká se'wináriga ra'íchali. Ra'íchame ju napurigá Onorúgame newale e'karúgame 'we semátiri —alarigá anile.

12 Suwábaga alé jale e'negá. Tabilé machiá alarigá ko. Jaré rukele machínliga:

—¿Chonigá alieri ra'íhálíché? —anile.

13 Uché jaré gawélele. Anile:

—Wa'lú bajile alué i'wílí ('uba) ba'wila rekútame nokogá anía —anile.

*Jena ruwimela Pegro 'we beníraligo we'ká ra'íchali*

14 'Lige Pegro, uché jaré makué bilé rió napu Esusi 'yálige nóchali, alué suwábaga o'weti jásele, e'wele ra'íchaga anele Pegro alué ralámuli napu napuile alé:

—'Emi Jurea ejperégame, suwábaga ralámuli napu ekí mochí jena Rusaleni ejperégame abiénachigó, 'we 'la gepúsigobá

† 1:18 E'nesi San Mateo 27:3-8.

§ 1:20 E'nesi Salmos 69:25 'LigeSalmos 109:8.

ne ra'ichálila. <sup>15</sup> Tabilé tégili niru ramué, pecha bajilia. 'We be'á ju bijí. <sup>16</sup> 'We 'yako osale bilé rió napu ruwime nile napu anele Onorúgame, Joeli anilime. Osale napu ruyele Onorúgame. Onorúgame ruyele alué rió churiga nimio jipe. Anele Onorúgame:

<sup>17</sup> Napu'lige gawí amulí gajuchi, a'lige julámala ne ne Alawala. Napu'lige naresa 'emi 'kúchila ne Alawala, a'lige alueka ra'ichámala ne ra'ichálila. Ne Alawálate etérimala alué ejtemali 'lige

umugí i'wé

napurigá we'ká tábiri etémala.

Ne Alawala gu'írimala alué o'chérame napurigá remúmala ne'chí.

<sup>18</sup> Alué ralámuli napu ekí ne'chí 'yuga nóchame ju,

ne 'yámala ne Alawala.

A'liko 'la ruwimela napurigá aní ne.

<sup>19-20</sup> 'We e'karúriga 'simala rewagá.

Rayénali mukumela.

Mechá sejtákame nílimala napuyeri elá.

Jena wijchimbola we'ká e'karúriga 'simalachigó.

Pe neka 'la gainámala alarigá nocha.

'We nerúmala elá, na'ítiri, molítiri.

Napu'lige 'ma simarsa alué we'ká e'karúgame,

a'lige nawámala Wa'lula Onorúgame ralámuli gu'írima.

Alué rawé nímala wa'lú rawé 'we semati.

<sup>21</sup> Napu ekí 'la taní e'kali alué wa'lula Onorúgame,

'liko 'la buyásamala alué ralámuli chátiri bowechi e'yéname.

Alarigá anele Onorúgame alué Joeli 'we 'ya.

<sup>22</sup> 'Lige aminabi ra'ichale Pegro. Anile:

—'Emi ralámuli jurío napurigá ne, 'we 'la gepusi ne ra'ichálila. Alué Esusi Nasareta bejtégame napu Rabí rijimale nile,\* we'ká e'karúgame 'we semátiri 'sile napu tabilé gayéname ju ralámuli alarigá noká. 'Émika 'la etele alarigá 'sichi. Alekeri 'we 'la machí 'emi Onorúgame nuléligo alué Esusi. Onorúgame gu'íriale alué Esusi. <sup>23</sup> 'Emi nokale Esusi cha'piá. 'Lige 'yale 'emi Esusi alué ralámuli 'we cha nokame. Gulusichi ujchagá me'ale. Onorúgame 'we 'la machile 'ya siné alarigá nokimeo 'emi. Alekeri 'we 'la e'negá asale Onorúgame. <sup>24</sup> Napu a'lige mukusá Esusi, Onorúgame 'yale cherajpé iwérali 'lige a'walí. Yati ku ajánale. Onorúgame tabilé a'rale napurigá we'lisi mukugá bo'mela.

<sup>25</sup> Alué rió Rabí anilime 'ya bejtégame 'la ruwile Esusi tabilé we'lisi mukumeo. Anile: Onorúgameka 'la ne'chí 'yuga eyéname ju. Tabilé siné a'reme ju.

Ne'chí 'yuga eyéname ju napurigá tajché ikimela ne.

<sup>26</sup> Alekeri 'we 'la ganiliga ajtí ne.

'We ganiliga ra'ichame ju ne.

Rekó mukugé 'la machí ne ku ajánamio.

<sup>27</sup> Onorúgame tabilé a'rémala ne alawala napu mukúgame bi'tí.

'Lige aminami tabilé a'rémala ne sa'pala napurigá bikámala.

<sup>28</sup> Onorúgame beníruru ne'chí

napurigá 'la sebámala ne rewagachi.

Alé sebásaká 'we ganiliga asimela ne Onorúgame 'yuga.

'We 'yako alarigá anile Rabí.

<sup>29</sup> Lige aminabi ra'ichale Pegro. Anile:

—'Emi ralámuli jurío napurigá ne, 'we 'la námatame ra'ichámala ne. Ramué 'la machiá'é Rabí ramué rijimale níligo. 'We 'ya mukule. Bilena resoquí gatéliru. Alué resoka pe joka newárigime nile. Abalé ilí bijí alué resó. Ramué 'la machiáa alé gatélirigo. <sup>30</sup> Alué Rabí ruwime nile napu anele Onorúgame. Onorúgame gu'íriale napurigá machimela alarigá nímio a'kinana. Onorúgame ruyele Rabí bilé bo'né rijimale ralámuli wa'lula nimio, alué wa'lula nimio napurigá Rabí. <sup>31</sup> 'We 'la bijchiá aní Onorúgame. Alekeri Rabí 'la machile Onorúgame 'yamio uché rajpé iwérali mukusá alué rió napu Onorúgame julámorlíge napu Kristo anilime nilige.

Alekeri 'la ruyele Rabí Onorúgame tabilé we'lisi a'remio alué Kristo alawala mukugá bo'ígichi. 'La machile tabilé bikimeo alué Kristo sa'pala. Ta'chó mukiá Rabí suwábaga 'la machile suwábaga alieti. <sup>32</sup> Esusi ju alué Kristo. Napu a'lige mukusá, Onorúgame 'yale uché rajpé ajalí. Ramué 'la machiáguru bijí bejtego, ramueka 'la eteru. <sup>33</sup> Onorúgame bayele ku rewagachi. A'lige rewagachi sebasa wa'lula newáliru Onorúgamete. A'lige Onorúgame 'yale bo'né Alawala alué Esusi. 'Liko Esúsika júlale alué Alawala 'pákana. Naréturu ramué alué Alawá. Alekeri 'la we'ká se'wináriga ra'icharu ramué Onorúgame Alawala gite. 'Emi etele suwábaga alieti aminami akele. Alué Esukristo nejkúriale napurigá alarigá ra'ichawa ramué. <sup>34</sup> Alué Rabí tabilé gu'íriale. Alué Rabika tase alarigá simile rewagachi napurigá simile Esusi. 'We 'ya alarigá osale Rabí:

Onorúgame anele ne Wa'lúlala:  
«Asagá jena a'bé wajtoná.  
Mué abiénachigo Wa'lula kame.  
<sup>35</sup> Ne 'la uméromala mué saíla,  
re'keka asimela mué alué mué saíla», anele Onorúgame.

Alarigá osale Rabí.

<sup>36</sup> A'lige anele Pegro uché rajpé:

—'Emi ralámuli Israeli eiperégame, 'we 'la gepuga. 'La bijchiá aní ne. Esusi ju alué rió Wa'lula, alué napu 'emi a'boi ujchale alé

\* 2:22 E'nesi glosario «ancestor».

gulusichi. Jipe Onorúgame ajchale alué abé wa'lula napurigá ralámuli gu'iria asimela jena wijchimoba. Alueka pe Kristo ju —alarigá anile Pegro.

<sup>37</sup> Napu'lige alanichi Pegro, alué ralámuli kilí mochile 'we seweka. A'lige ralámuli rukele Pegro uché jaré makué bilé Esusi 'yuga járome si:

—'Emi ralámuli israelita napurigá ramué, ¿chukiboa jipe?

<sup>38</sup> 'Lige anele Pegro:

—Abisi a'réwaká chátiri 'nátli. Tabilé cha nokiboa aminabi, 'la kilí mochísiga 'nalina 'la nímala. A'lige alarigá rewaráwaká alé ba'ichí bokubuga napurigá 'la machimela ralámuli 'la Esukristo oyérame ko 'emi. Alarigá níriká 'la e'kámala Onorúgame. 'Liko Onorúgame 'la 'yámala bo'né Alawala. <sup>39</sup> Onorúgame 'yámala bo'né Alawala 'emi 'kúchilachigó, alué nujubá o'chérigame, 'la bijchígisaká napu Onorúgame 'la sébali olámiorile. Suwábaga napu ekí bayé alué Wa'lula Onorúgame, alué suwábaga 'yámala bo'né Alawala. 'Ya bo'né 'la anile alarigá 'simia —anile Pegro.

<sup>40</sup> Pegro ra'ichale we'ká ra'ichili 'we semátiri, we'ká rejcholi ruyele alué ralámuli. Anele:

—Ku 'la na'tawa. Tase oyérawa ralámuli chátiri 'nátame napu jipe nerú —anele.

<sup>41</sup> 'Lige alué ralámuli napu 'la bijchígale, a'lige rawé rewarárigame gayénale. A'lige rawé bakiá mili ralámuli chojkile Esukristo oyeria napurigá anílige Pegro. <sup>42</sup> 'Lige alué bakiá mili ralámuli 'we 'la gepule napu benírilige alué makué oká rió napu Esusi 'yale nóchali. 'Lige napuika eperere alué ralámuli. 'We ganíliga mochile. Bi'lepi 'nátaga mochile suwábaga. 'We tánele Onorúgame napurigá 'la gu'írimala. Aminami tabé chi'wánale alué baní 'lige go'ale napurigá 'la 'nátaga mochímala Esusi. Alarigá benírale bo'né Esusi 'ya ta'chó mukíá.

*Jena ruwimela alarigá epperégame niligo alué Esukristo oyérame*

<sup>43</sup> Suwábaga alué ralámuli 'we 'la e'negá mochile alanokachi alué makué oká rió. Onorúgame gu'írole alué makué oká rió napurigá we'ká e'karúriga nokimela, 'lige ralámuli sa'wámala. <sup>44</sup> Suwábaga alué Esukristo oyérame napuika mochile. Tabiri napu a'boi nígame nilige, o'maka nachútale, 'yale alué tabilé nígame napurigá 'la niga mochímalachigó. <sup>45</sup> Jaré galí ralinele. Alekí enomí 'yale uché jaré ralámuli. Uché jaré we'ká e'karúgame ralinele abienachigo. Enomí 'yale napurigá 'la niga mochímala suwábaga alué ralámuli. <sup>46</sup> Nabí rawé simíbale alé wa'lú re'obachi. (Yolí ra'ichaga «templo» anilime nile.) A'lige

simíbale galírale. Chi'wánale alué baní alé pachá galírale, a'bopi a'tabé chi'wánaga nachútale go'mea alué baní napurigá 'nátaga mochímala Esusi. Abiena 'we ganíliga go'ale uché jaré go'ame alé galírale, bi'lepi 'nátaga Onorúgamecho. <sup>47</sup> We'ká ra'ichale Onorúgame ra'ichálila 'we semátiri. Wa'lú cheliera 'yale Onorúgame. Suwábaga alué ralámuli Rusaleni epperégame 'we 'la e'negá mochile alé Esukristo oyérame. Nabí rawé uché rajpé ralámuli bijchígale Onorúgame ra'ichálila napu ra'ichale alué Esukristo oyérame.

### 3

*Jena ruwimela sujírigame ronégame rió sa'wálrigo*

<sup>1</sup> Bilé rawé Pegro 'lige Juani simíbale alé wa'lú re'obachi, 'ma alí 'ma 'túgana nasípagana ajtígichi alué rayénali. Ralámuli israelita Onorúgame 'yuga ra'ichame nile alí 'ma 'túgana nasípagana ajtígichi alué rayénali nabí rawé. Pegro 'lige Juani sébale alé re'obachi. <sup>2</sup> 'Lige alé asale bilé rió sujírigame, tabilé gayéname nile eyena alué rió sujírigame. Abalieri ochérale alué rió. 'Lige ralámuli nabí rawé o'tole alé wa'lú re'obachi alué rió sujírigame, napurigá alé ra'pichí yochi asagá tákala enomí. 'Lige alé alué ra'pichí yochi «Semati» anilime nile alué yochi. <sup>3</sup> Alué Pegro 'lige Juani alé sébachi, alué rió sujírigame táneleke'énale enomí. <sup>4</sup> 'Lige alué Pegro 'lige Juani kilí jábale e'negá alué rió sujírigame. 'Lige alué Pegro anele alué rió sujírigame:

—Aka ramué e'nérigo mué rió —anele.

<sup>5</sup> 'Lige alué rió sujírigame 'we a'lá e'nele 'lige: «¿Tachiri 'yárilibá ne?» lale. 'Lige Pegro anele:

—Tabilé o'ká ne enomí —anele Pegro alué rió sujírigame.

<sup>6</sup> 'Lige anele Pegro aminabi:

—Abiena 'la nejktúrimala ne. Alué Esukristo alé Nasaréachi bejtégame napu Rabí rijimala nile a'walí 'yale ne'chí napurigá sa'wámala ne mué. Alekeri 'la 'yómala ne mué. O'weti ilibá, simí —anele alué Pegro.

<sup>7</sup> 'Lige Pegro cha'pile sekate alé wajtoná, 'lige o'weti elale. 'Lige alué rió sujírigame yati sa'wile. 'Ma tabilé sujírigame ronégame nile. <sup>8</sup> 'Lige jibóchile alué rió sa'wisá, 'liko 'ma 'la eyénale. 'Lige alué Pegro alé pachá wa'lú re'obá ra'pichila bajkile Juani 'yuga. 'Lige alué rió napu sujírigame ronégame nilige, alé si bajkile, 'lige alé pachá alemi ra'pichí jibóchiga eyénale alué rió ra'salágá. 'Lige cheliera 'yagá eyénale Onorúgame, we'sá cheliera 'yale. <sup>9</sup> 'Lige suwábaga ralámuli etele napu ekí mochile alé ra'pichí alué rió cheliera nejiga eyénachi.

<sup>10</sup> Lige alué ralámuli 'we majaga ejtebile. «¿Churigá sa'wilepeché alué rió?», lale. Lige alué ralámuli 'we a'lá machile alué rió we'ká bamí sujirigame nílgo. Lige aminami 'we a'lá sébali machile alué ralámuli alué rió ko napu alé ra'pichí yólachi nawame nílge enomí tamia.

*Jena ruwimela Pegro alé rapichí benírame nílgo*

<sup>11</sup> Alé ra'pichí suwé simíbale portálchi napu «Salomoni» anilime nile alué portali. Alué rió napu sujirigame nílge aba alué Pegro 'lige Juani 'yuga eyénale. Alué sujirigame 'we cha'pígá eyénale alué oká rió, tabilé su'pániga eyénale alué oká rió. A'lige yati we'ká napuile ralámuli. Alé sebase, e'negá jale alué ralámuli. <sup>12</sup> Pegro anele alué ralámuli:

—'Emi ralámuli Israeli mochígame. ¿Chonigá e'negá ja 'emi? ¿'Yome mayéleké 'emi ramué? 'Emika mayéleké 'we a'lá a'walí nígama ko ramué, alekeri 'la sa'wálgo mayéleké alué rió. Tabilé bijchiá ju. Esusi júkuru sa'wame ka. <sup>13</sup> Onorúgame, napu oyérame nile alué Abraámi, 'lige Isaki 'lige Akobo, alué Onorúgameka 'we a'lá nirale alué Esusi napu suwénale Onorúgame nila nóchali, 'lige 'emi nejile alué Esusi alé wa'lúlachi. Napu'lige alué wa'lula Pilato sulíchi napurigá tabilé me'liboa, 'émika tabiléchigo elálekó napurigá a'rémala, napurigá tabilé me'liboa. <sup>14</sup> Alué Esukristo 'we a'lá nátales Onorúgame 'yuga, tabilé siné che'sile. 'Emi anile: «Tabilé a'rewa alué Esusi. Iligá alué rió nejkome 'nalina a'réwaguru.» Alarigá anile 'emi. <sup>15</sup> Esukristo ju napu 'yame ju Onorúgame Alawala alué ralámuli. 'Emi nejile napurigá me'liboa alué Esusi. Napu'lige mukule Esukristo, ku ajánale. 'We 'la bijchiá aníá ramué. Ramué eteru a'kinana ku ajánaligo. <sup>16</sup> Alué rió napu sujirigame nílge, 'emi 'we 'la machíguru. Ne 'la ruwimela alarigá 'yólgo. Ramué 'we a'lá machiríguru Esusi 'la 'yome ko. Alué rió a'lá machílechigó Esusi 'la 'yome ko. Alekeri 'la sa'wile alué rió. Esukristo 'yale a'walí napurigá 'la sa'wimela. 'Emi etele 'ma ku sa'wílgo.

<sup>17</sup> › 'Emi ralámuli jurío napurigá ramué, ne 'we a'lá machí: 'emi tabilé machile Onorúgame júlaligo alué napu 'emi nulale me'línliga. Alué ralámuli e'wélala napu nuleme ju 'emi, alueka tabilé machílechigó. <sup>18</sup> Alué 'ya mochígama napu ekí Onorúgame 'yale 'nátili napurigá ruyémala ralámuli, alueka alarigá benírale 'we resí ikimeli nílgo alué Kristo napu Onorúgame júlamorílige wa'lula niraga. Esusi nile alué wa'lula napu júlale Onorúgame. <sup>19</sup> Jipe 'la machí 'emi 'we cha olálgo 'emi, 'ma me'ale 'emi alué Esusi. Jipe we'ká 'nata

'emi me'lisá alué Esusi. Jípeko alekeri ku ro'iwa, 'we a'lá 'nátaga járowa Onorúgame 'yuga. Alarigaka 'la e'kámala Onorúgame. <sup>20</sup> Onorúgame na'tálala 'nátaga járowaká, 'liko 'we ganíliga mochiwa, tabilé majaga. Pe nujubapi Onorúgame júlamala 'pákana rewagachi alué Kristo napurigá gu'írimala 'emi. Esusi ju alué Kristo. <sup>21</sup> Alué rejpímala rewagachi napusí seba alué raweli napu'lige Onorúgame 'we 'la gatesa jena wijchimoba napurigá 'sílge 'ya. Alarigá ruyele Onorúgame suwábaga alué rió 'we 'ya mochígama napu ruyame nile napu anele Onorúgame. A'lige alué ralámuli alarigá ruyele uché jaré ralámuli. <sup>22</sup> Alué rió Moisesi anilime 'ya ajtígama anile: «Alué Wa'lula Onorúgame ruyele ne'chí napurigá ne benírimala alué ralámuli Onorúgame ra'ichálila. Abé a'kinana Onorúgame 'yámala ye nóchali uché bilé rió napurigá ruwimela Onorúgame ra'ichálila. Alué rió nímala napurigá ne. 'We 'la gepúwaka alué ra'ichali. 'We 'la e'wewa napurigá nulá alué rió nawasa. <sup>23</sup> Suwábaga ralámuli napu ekí tabilé e'wame ju, 'ma buináwili ju alé we'ká riógachi.» Alarigá anile alué rió Moisesi anilime.

<sup>24</sup> › Uché bilé rió 'we 'ya ajtígama Samuéli anilime napu ruwime nile napu anele Onorúgame, abiena ruwile napurigá nokale jena. Suwábaga alué rió napu ruwime nile napu anele Onorúgame, alué a'kinana ejperégama, a'chigóriga ruwile, <sup>25</sup> alué ralámuli napu 'emi rijimala nílge. Onorúgame 'we a'lá ruyele alué rijimala gu'írimo napugiti 'emi rijimala kame. Onorúgame ruyele alué rió 'ya bejtégama Abraámi anilime. Anele Onorúgame: «Bilé alué rió nujubapi nawágama, mué rijimala nímala, gu'írimala suwábaga ralámuli jena wijchimoba mochígama.» Alarigá anile Onorúgame. <sup>26</sup> Esusi nile alué napu nawale. Onorúgame ajchale alué wa'lula. Onorúgame júlale napurigá gu'írimala ramué, napurigá ramué a'rewa alué chátiri 'nátili. Ramué ralámuli jurío bajchá beníruru alué 'nátili. 'La na'talia ka Onorúgame 'we 'la ganílili nejímala—alarigá anile Pegro.

#### 4

*Jena ruwimela Pegro 'lige Juani si gustisia olíriruga alé balé e'wélala mochígichi*

<sup>1</sup> Biji benírira mochile Pegro 'lige Juani, jaré balé jurío sébachi alé. Alué wa'lula re'obá repume abiena sébalechigó. Uché jaré jurío, saruseo anilime, sébalechigó. <sup>2</sup> 'We ayoga sébale alué ralámuli saruseo anilime. Pegro 'lige Juani ruyele mukusá, ku ajánaligo alué Esusi. Abiena ruyele mukusá uché jaré ralámuli, ku ajánamio. Alekeri 'we ayole alué ralámuli saruseo. <sup>3</sup> A'lige

cha'píliru Pegro 'lige Juani, galírale mo'áliru. A'lige rawé tabilé gustisia oláleru, 'we alí nile. <sup>4</sup> Ta'chó cha'piachi, we'ká ralámuli akele Pegro, 'lige Juani ra'íchachi. Jaré 'la bijchígile. Alué Esukristo oyérame suwábaga amulí sébale maligi mili rió, umugí uché rajpé we'ká nile.

<sup>5</sup> Yati pe melénala rawé napuile alé wa'lú we'ká riógichi Rusaleni anilichi, napuile alué we'ká e'wélala jurío. Alué napu ruwime nile 'ya nerúgame rejcholi abiena sébalechigó. <sup>6</sup> Bilé alué wa'lula balé Anasi anilime nile. Uché bilé alué Kaipasi anilime nile. Uché bilé Juani anilime nile. Uché bilé Alejantro anilime nile. Alué bakiá Anasi rijimala nile. <sup>7</sup> Napu a'lige napuísá alué e'wélala, alué Pegro 'lige Juani nasipa jawáleru. A'lige bilé alué wa'lula rukele Pegro 'lige Juani:

—¿Chieri nejí lisenisia napurigá 'yowa alué sujirigame? —anele.

<sup>8</sup> A'lige Onorúgame Alawala gu'irile Pegro napurigá ra'íchámala. Anile Pegro:

—'Emi e'wélala ralámuli jurío. <sup>9</sup> 'Émika rukéguru ramué: «¿Chonigá gu'iri alué rió sujirigame?» 'Émika machinali: «¿Chieri nuléliga ramué napurigá 'yowa alué rió?» <sup>10</sup> 'We 'la 'nátaga gepuwa ye ra'íchali napu ne ra'icha. Suwábaga 'emi ralámuli Israeli epperégame 'we a'lá gepuwa. Alué Esukristo Nasareta bejtégame napu Rabí rijimala nile, nejí a'walí napurigá 'yowa alué sujirigame. 'Emi ujhale gulusichi alué Esukristo. Napu'lige mukusá, Onorúgame uchéchigo siné 'yale a'walí. <sup>11</sup> 'Yako osáliru Onorúgame julámorile bilé wa'lula napu selígame neraga níbili nílige. Abiena osáliru we'ká ralámuli tabilé niramio alué wa'lula. Esukristo nile alué wa'lula. 'Ya osáliru alué nimio napurigá bilé rejté. Regá anime:

Napu newá uchule bilé galí,

pale alué rejté tabilé najtékame mayega,

'lige uchéchigo bilé o'tole alué rejté

'lige unele alué rejté 'we najtékame kórika. Alarigá oláleru alué Esusi napurigá tabilé najtékame neraga, pe apiépiri ralámuli neraga. <sup>12</sup> Alué Esukristo bi'lepi ju ralámuli e'kame 'lige buyáname ralámuli resítiri bowechi e'yéname. Onorúgame júrale pe aluecho. Jena gawichí tabilé 'wesi i'té uché bilé napurigá e'kámala ralámuli. Bi'lepi ju Esukristo ramué e'kame —anile Pegro.

<sup>13</sup> Napu'lige akisá alué e'wélala, anile:

—Tabilé majaga ra'icha alué oká rió, 'we ejobéniga ra'icha rekó tabilé ejobénigame ke osagá. Tabilé siné mochígame nile eskuélachi, pe apiépiri ralámuli ju. Iligá Esusi 'yuga epperégame nile alué ralámuli. Alekeri tabilé majaga ra'íchame ju —alarigá anile.

<sup>14</sup> Alué e'wélala tabilé chérigá anisá nílile: «Ye oká rió 'we cha nokagá e'yena.» napugiti alé ilígame alué napu sujirigame rió nílige. 'We a'lá sa'wigá. <sup>15</sup> A'lige alué e'wélala ma'chí júrale alué Pegro 'lige Juani alué sujirigame 'yúriga. A'lige ra'íchale alué a'bopi e'wélala ka. <sup>16</sup> Anile:

—¿Cholásiga 'la nímala alué oká rió? 'La sa'wale alué sujirigame. Suwábaga alué Rusaleni mochígame machíguru aliena 'la sa'wáliga. Alekeri tabilé chérigá anewa, pecha aniboa tabilé sa'wale. <sup>17</sup> Tabilé najkiá ramueka napurigá akimela uché jaré ralámuli alué Esusi ra'ícháila. Alekeri anewa Pegro 'lige Juani: «Tabilé aminabi ra'íchawa. Aminabi ra'íchásaká gastigáriwa 'emi.» Alarigá anewa —alarigá anile e'wélala.

<sup>18</sup> 'Lige ku bayéleru alué bakiá rió, 'lige anéleru:

—Tabilé ruiboa aminabi alué Esusi nila ra'íchali —anéleru.

<sup>19</sup> 'Lige Pegro anele:

—'We 'la na'tawa 'emi. Onorúgame nulé ramué napurigá ra'íchawa. 'Émika nulá napurigá tabilé ra'íchawa. Ramueka noki-bo a napurigá nulá Onorúgame. <sup>20</sup> Ramueka ra'ícháwaleké napu ekí eteru, napu ekí akerú, suwábaga alué. Ramueka tabilé a'réwaleké alué ra'icha, alueka Onorúgame nulémpá ramué —anele Pegro.

<sup>21</sup> A'lige uchéchigo siné ruyele alué e'wélala. Anele:

—Tabilé ruiboa aminabi alué Esusi nila ra'íchali. —Alarigá anéleru alué bakiá rió.

'Lige ku su'pánale, tabilé umébale gastigaria, 'we majale ralámuli Rusaleni mochígame. Alekeri tabilé gastigárie. Alué ralámuli alé Rusaleni mochígame wa'lú cheliera 'yale Onorúgame, 'la sa'wárigame alué rió sujirigame. <sup>22</sup> 'Ma o'chérame nile alué rió sujirigame. 'Ma oká liá mináchigo rasígame bamígame nile alué rió.

*Jena ruwimela Esukristo oyérame táneligo Onorúgame napurigá tabilé majame nímala*

<sup>23</sup> Pegro 'lige Juani, napu'lige ku su'pinásiga simíbale napu mochile uché jaré Esukristo oyérame. Alé sebasa ruyele napurigá anélige e'wélala. <sup>24</sup> Napu'lige akisá, suwábaga alué ralámuli yati ra'íchale Onorúgame 'yuga bi'lepi 'nátaga suwábaga. 'Lige anile bilé alué Esukristo oyérame:

—Mué Onorúgame nulame ju suwábaga. Mué newale rewagá, rayénalitiri, mechátiri, so'polítiri, suwábaga gawí, 'lige ba'wítiri abiénachigó. <sup>25</sup> Mué Alawala gu'irile alué Rabí anilime 'ya bejtégame napurigá ra'íchámala napurigá najkile mué. Anile alué rió:

¿Chonigá 'we na'áwaché suwábaga jena gawichí epperégame?



'Lige ¿chonigá 'nátaché alué chátiri 'nátili?

Tabilé gayena rekó 'natie.

<sup>26</sup> Suwábaga alué napu ekí e'wélala ju jena wijchimoba ejperégame

saíla níraga mochí Onorúgame,

'lige alué Kristo napu Onorúgame júlale abiena sayega mochí.\*

<sup>27</sup> › Alarigá nokale a'kinana jena we'ká riógachi. Alué wa'lula Erore, 'lige alué Ponsio Pilato anilime, we'ká alué ralámuli israelita, alué e'sena ralámuli abiena, suwábaga alué Esusi saíla nile, alué Esusi napu mué Onorúgame júlale jena. Mué nulele Esusi napurigá nuleme nímala ralámuli. <sup>28</sup> Mué 'we a'lá machile 'ya bajchabé rawé. Mué elile alué cha nokame ralámuli napurigá resí olámala Esusi. <sup>29</sup> Mué Wa'lula Onorúgame, 'we a'lá e'nagá asiboka 'lige 'we 'la repuka napu alué ralámuli cha nokame cha olánilichi ramué. Mué nulálilale nochálime ju ramué. Gu'írowaká ramué napurigá tabilé majaga ra'ichawa mué ra'ichálila. <sup>30</sup> Sa'wawa alué nayume mué a'walílate. Gu'írowaká ramué napurigá e'karúriga gayéname nímala ramué mué a'walílate, alué napu tabilé gayéname ju ralámuli. Alarigá nokiboa alué a'walite napu Esusi nígame nile napu'lige jena ajtigá, 'we 'la sébali olale napurigá nuléligé mué Onorúgame. Alueka nabí mué 'yuga 'nátame nile —alarigá tánale Onorúgame alué Esukristo oyérame.

<sup>31</sup> Napu'lige suwénasa a'walí tania Onorúgame, Onorúgame nokele alué galí napu mochíligé alué ralámuli. A'lige Onorúgame Alawala abé a'wágame 'yale a'walí alué ralámuli alé mochígame napurigá tabilé majaga ra'ichámala Onorúgame nila ra'ichali. Suwábaga napu ekí mochíligé alé narele a'walí.

*Jena ruwimela o'maka 'la nakúriligo Onorúgame oyérame*

<sup>32</sup> Suwábaga alué Esukristo oyérame bi'lepi 'nátame nile. Tabilé 'wesi anile bi'neli nígame koriá. O'maka nila korile. Alarigá nile suwábaga alué Esukristo oyérame. 'We a'lá kóniga go'yame nile alué go'ame. <sup>33</sup> Alué makué oká rió napu Esukristo 'yale nóchali, we'ká ra'íchili beníriale ralámuli Esukristo ra'ichálila. 'We a'lá semáriga ra'íchale, tabilé majaga. A'boi etéoríle ku ajánichi Esusi. Onorúgame 'we 'la gu'íriale suwábaga alué Esukristo oyérame. <sup>34</sup> Bilé tábiriti resílásaká jaré alué Esukristo oyérame, bilé rió ralineme nile bilé wasá o bilé galí. A'lige aleké enomí narésaká, <sup>35</sup> 'yame nile alué makué oká rió 'lige alueka 'yame nile alué uché jaré ralámuli tabilé nígame. Alekeri 'we a'lá niga mochile suwábaga. <sup>36</sup> Bilé rió napu

bilé wasá ralinele, José anilime, Chipre bejtégame nile 'yako alué rió. Lebí rijimale nile alué rió, alué Lebí napu 'ya bejtégame nile. Alué makué oká rió napu Esukristo 'yáligé nóchali se'nú rewá ujchele alué José. Bernabé anilime rewá ujchéliiru. Alué Bernabé anía ka «ralámuli oilárimé» aníame ju. 'We a'lá ralámuli nile alué. <sup>37</sup> Napu'lige ralinesa alué wasá, aleké enomí 'yale alué makué oká rió napurigá 'yámala uché jaré tabilé nígame.

## 5

*Jena ruwimela tabilé 'la 'nátligo bilé rió 'lige bo'né upila*

<sup>1</sup> Uché bilé rió Ananíasi anilime 'lige bo'né upila, Sapira anilime, ralinele bilé wasá.

<sup>2</sup> Alué rió 'yale nasípasi alué enomí alué makué oká rió, tabilé suwábaga 'yale. Anile suwábaga 'yágoríle, pe lanile, tabilé bijchiá anile. Alué okánika 'la bi'lepi 'nátame nile.

<sup>3</sup> A'lige anile Pegro:

—Mué Ananíasi. ¿Chonigá bi'lepi 'nátame ju mué Remónisi 'yuga? Mué 'yégame Onorúgame Alawala. Tabilé suwábaga a'pale mué enomí alué wasá ralinérigame. <sup>4</sup> ¿Aka mué nila képaché alué wasá? Napu'lige ralinesa alué wasá, aka enomí abiénachigó mué nila júpeché. Alekeri 'la gayénale mué napurigá najkile mué. Tabilé 'yégatélikuru mué. Mueka pe ramuecho 'yégame iliro oláleké, Onorúgame abiena 'yégame iliro mué —anile Pegro.

<sup>5</sup> Napu a'lige akísá, mukugá bo'iba alué Ananíasi. Suwábaga napu ekí e'tele alué mukúgame 'we majale. <sup>6</sup> A'lige jaré ejtemali kabile mántachi rosákame, a'lige o'tole miná tomia.

<sup>7</sup> A'lige alué Ananíasi upila peyati, bakiá 'ora kachi, nawale alé napu ajtíle Pegro. Tabilé machigá nawale mukúligo alué rió. <sup>8</sup> 'Lige Pegro etérale alué enomí 'lige rukele:

—¿Suwábaga ju ye enomí alué wasá ralinérigame?

—Julí, suwábaga júpeché —anile alué mukí.

<sup>9</sup> A'lige anele Pegro:

—Mueka, mué gunala si bi'lepi 'nátame nile. ¿Chonigá saíla níru alué Alawá napu júlale alué Wa'lula Esukristo? ¡E'néwagru! Alué napu be'bé mo'íbage tomia mué gunala, a'má ku aleka e'yénakuru. Jípeko mué o'tomela.

<sup>10</sup> Yati mukule alué mukí abajá. Napu a'lige sébale alué ejtemali, 'ma mukúgame rewale alué mukí. A'lige o'tole tomia napubúriga rekale alué rió 'yuga. <sup>11</sup> Suwábaga alué Esukristo oyérame 'we majale. Uché jaré ralámuli e'sena abiena majálechigó akísá.

\* 4:26 E'nese Salmos 2:1-2.

*Jena ruwimela Onorúgame gu'íriligo alué makué oká rió napurigá we'ká e'karúriga 'we semáriga nokimela*

<sup>12</sup> Onorúgame gu'íriligo napurigá e'karúriga 'we semáriga nokimela alué makué oká rió. Ralámuli tabilé siné gayénale alieri aliena semati noká. Suwábaga alué ralámuli napu ekí Esukristo oyérame nile napuile alé walú re'obachi bortálíchi, Salomoni anilime bortali. <sup>13</sup> Alué ralámuli tabilé bijhíggame tabilé e'yénale alué Esukristo oyérame 'yuga. Abiena 'la nirame nile kaka, iligá majale. <sup>14</sup> Nabí rawé aminacho we'ká ralámuli oyérale alué Wa'lula Esukristo, riótiri 'lige umugítiri. <sup>15</sup> Ralámuli o'tole we'ká nayúkame, alé boichí mochíle nayúkame pera (petate) peka, jaré gemá peka. Alé boichí mochíleke'é napurigá sa'wámala alué Pegro káililate. <sup>16</sup> Alué ralámuli a'mulipi epperégame alé Rusaleni abiena o'tólechigó alué ralámuli nayúkame alé. U'kuchípala remónisi alawala mochígame abiena o'tólruchigó alé. Suwábaga ralámuli napu ekí nayúkame nile sa'wáliku alé.

*Jena ruwimela e'wélala tabilé galeme níligo alué makué oká rió Esusi oyérame*

<sup>17</sup> A'lige alué balé wa'lula, abiena alué ralámuli saruseo\* anilime, tabilé galegá etele alué makué oká rió. <sup>18</sup> A'lige alué wa'lula balé nulale cha'píniliga alué makué oká rió, 'lige galírale mo'áliku. <sup>19</sup> A'lige rukó júlale Onorúgame bilé santo ánjeli napurigá i'púmala yochi. 'Ma buyánale alué makué oká rió. Anele alué santo ánjeli:

<sup>20</sup> —Simasi alé walú re'obachi ra'pichí. Alé ra'pichí ra'icháwaká, rupóká alué ra'ichali napurigá Esukristo gu'íriligo napurigá 'la ganiliga epperélawa 'lige napurigá 'la moínawa rewagachi —anele.

<sup>21</sup> 'We a'lá gepule alué makué oká rió. A'lige che'lisáká simíbale alé walú re'obachi ra'pichí ruyemia alué ralámuli napu ekí alé ra'pichí sébame nile.

Alué e'wélala tabilé 'cho machíle buyásiligo. Napu'lige alué wa'lula balé sebasa gompaniérola 'yuga alé napu ra'ichali gatélime nílige, bayele suwábaga alué uché jaré e'wélala. Napu'lige napuusa suwábaga alué e'wélala, júlale buínániliga alué makué oká rió galírale mo'árigime ra'ichali gatemia. <sup>22</sup> Napu'lige sébale alé galírale, tabilé rewale alué makué oká rió, 'lige kuka sebasa anile:

<sup>23</sup> —'We 'yériga ilile alé yochi, tabiléchigo mochíle ko alué rioka alé pachá. Alué napu alé asálige repuka tabilé sayele buyachi, abalé asale kaka. Pe alarigá ilile kaka 'yériga. Napu'lige i'púsiká tabilé i'tele. Pe arigá ilile —alarigá anile.

<sup>24</sup> Napu'lige akisá, we'ká 'nátale alué wa'lula sontalo alué napu re'obá repume nile 'lige alué e'wélala balé.

—¿Ijipe chonokibóbeché? —anile alué e'wélala.

<sup>25</sup> 'Lige sébale bilé rió. 'Lige anile:

—'We a'lá gepusi 'emi e'wélala. Alué ralámuli napu 'emi galírale mo'álige, 'mi walú re'obachi ra'pichí mochí ralámuli beniria —anile.

<sup>26</sup> 'Lige simile alué wa'lula sontalo, gompaniérola abiénachigó, aleké si simile nolamia. Alé sebasa, 'we 'la kilí bayérale. 'We majaga nórale nepabasa mayele alué ralámuli alé mochígame. Ralámuli alé re'obachi ra'pichí mochígame 'we galele alué makué oká rió. <sup>27</sup> Alué makué oká rió pe yati jásigá simíbale alué sontalo 'yuga. Napu'lige ku sebasa alé napu mochí e'wélala, nasipa mochíáliku alué makué oká rió. A'lige anele alué wa'lula balé:

<sup>28</sup> —Ramué 'la aniáturu kulí napurigá tabilé siné ra'ichámala alué Esusi ra'ichálila. 'Émika tabilé e'wale arigáchigó. 'Émika 'ma bochígimi we'ká riógichi ra'lánalekuru ye ra'ichali alué Esusi ra'ichálila. ¡'Émika e'chewa ramué alué Esusi mukusá! —alarigá anele alué wa'lula balé.

<sup>29</sup> 'Lige anile Pegro:

—¡Ramuéka Onorúgame 'nalina e'wériguru, tase pe ralámuli ra'ichálila! <sup>30</sup> 'Emi nulele Esusi me'íniliga gulusichi ujchagá.

<sup>31</sup> A'lige Onorúgame uché rajpé 'yale ajalí. Onorúgameka wajtoná ajchale Wa'lula neraga. Gu'írome ju alé Esusi napurigá ramué ralámuli israelita ku a'rewa chátiri 'nátali. Alueka 'la e'kámala ke ramué.

<sup>32</sup> Ramué 'we a'lá ruyá napurigá 'sile Esusi. Ramué a'boi etewíturu napu 'sile alué rió. Alué Onorúgame Alawala nejí a'walí napurigá machimela ralámuli 'la bijhíá ka napu ra'ichalia ramué. Onorúgame 'ya bo'né Alawala alué ralámuli napu 'la e'weme ju Onorúgame —alarigá anile Pegro.

<sup>33</sup> Napu'lige akisá e'wélala, 'we ayole, me'linálike alué makué oká rió. <sup>34</sup> 'Lige bilé rió o'weti ilísile, Gamalieli anilime nile alué rió. Bariseo nile alué rió benírame 'nátali 'ya nerúgame rejcholi. Suwábaga ralámuli 'we a'lá nirame nile alué rió. Napu'lige ilísasa o'weti, ma'chí júlale alué makué oká rió napu Esusi 'yálike nóchali. <sup>35</sup> 'Lige anele Gamalieli alué uché jaré e'wélala:

—'Emi ralámuli israelita, 'we 'la na'táwaká napu noká 'emi. <sup>36</sup> 'Yako bilé rió Teúراسi anilime rió napu wa'lula kórlé, naó sienta gompaniérogame nile alué rió. 'Lige me'líliku a'kinana. 'Lige ichúrimi ra'lale bo'né gompaniérola. Alésíko abisí suwíbale alué 'nátali. <sup>37</sup> 'Lige a'kinana napu'lige tétale ralámuli

\* 5:17 E'nesi glosario «sadgeo».

alué gobierno, alué rió Jurasí Galiléachi bejtégame sairale alué gobierno. Jurásika we'ká gompaniérogame nile. 'Lige Jurasí 'ma me'líiru. 'Lige ichúrimi ra'lale gompaniérola. <sup>38</sup> Iligá a'résiga 'la júleké 'nalina alué makué oká rió. Tabilé che olawa. Ye ralámuli pe a'bopi 'nátaga alanokagá e'yénasaká, 'ma pe suwibámala alué 'nátali. <sup>39</sup> Onorúgame 'la gu'irisaká alué makué oká rió, 'émika pecha umubámalagó cha olá alué ralámuli. 'La 'nátaga mochiwa, tabilé sairaga mochiwa Onorúgame. Alekeri abé 'la júkuru a'rílía —alarigá anile alué Gamalieli.

<sup>40</sup> Alué e'wélala 'we galele lanichi alué Gamalieli. 'Lige bayéleru alué makué oká rió napu Esusi 'yáligé nóchali. 'Lige we'sá wejpisóloru iwégame w'i'chite.

—Tabilé siné ra'ichawa alué Esusi ra'ichálila —anele wejpisoka.

'Alige a'rele napurigá buyásimala alué makué oká rió. <sup>41</sup> 'Lige alué makué oká rió simíbale 'we ra'sálagá napugiti 'we resí niligame 'lige 'we resí olárligime Esusi oyérame koriká. Onorúgame elale napurigá resí ikimela. Alekeri 'we ra'sálale. <sup>42</sup> Nabí rawé simíbale alé walú re'obá ra'pichila ra'ichamia alué ra'ichali 'we alá bi'igame napurigá Onorúgame nulele Esusi napurigá gu'irimala ralámuli. We'kaná galírale abiena simíbale ra'ichamia.

## 6

*Jena ruwimela gichao rió 'yálorugo bilé nóchali*

<sup>1</sup> Aminabi we'ká nile alué Esukristo oyérame. Jaré ralámuli alé Rusaleni ejperégame se'winati ra'ichame nile, griego anilime nile bilé ra'ichali. Alué ralámuli abiena oyéralechigó Esukristo. 'Lige na'áule alué ralámuli. Anile:

—Alué umugí gunámakame griego ra'ichame tabilé nareme ju go'ame —anile.

'Lige alué ralámuli napu ra'ichame nile ebreo anile:

—Tabilé bijchiá káwé —anile.

<sup>2</sup> 'Lige alué makué oká rió napu Esusi nóchali 'yáligé bayele suwábaga alué Esukristo oyérame, 'lige anele:

—Ta'mé 'la káwé ramué go'ame nachutalia. Go'ame nachútame níriká ramué tabilé cherigá ikíriwa benírira ramué alué ralámuli Onorúgame nila ra'ichali. <sup>3</sup> Iligá uché jaré 'yáwagó 'minami gichao rió, napurigá nachutámala alué go'ame, alué abé alá rejchirúginti 'nalina. Alá níralinti ralámulite suwábaga alué gichao rió, Onorúgame Alawala a'walila nígame. Ye gichao rió repútuwa ye nóchali. <sup>4</sup> Ramueka abisibi nokásiwa Onorúgame 'yuga ra'icha.

Ramueka aminabi benírira Onorúgame ra'ichálila —alarigá anile alué makué oká rió.

<sup>5</sup> Suwábaga alué ralámuli 'we alá galele alué ra'ichali. 'Lige owile gichao rió: bilé Siteba anilime nile. 'We alá bijchígume nile Onorúgame ra'ichálila. Bi'lepi 'nátame nile Onorúgame Alawala 'yuga. Uché bilé Belipe anilime nile. Uché bilé Prokorsi anilime nile. Nikanori anilime nile uché bilé. Timoni anilime nile uché bilé. Parmenasi anilime nile uché bilé. Nikolasi we'ká riógachi Antiokía anilichi bejtégame nile 'yako. Tabilé jurío nile sinékó, 'ma jurío gayénale a'kinana. <sup>6</sup> Napu'lige owisa alué gichao rió, bayérale alemi napu mochile alué makué oká rió. 'Lige alé sebas, alué makué oká rió tánele Onorúgame napurigá gu'irimala alué gichao rió. Mo'ochi nochale. 'Liko 'yale alué nóchili napurigá e'wélala nímalá alué gichao rió.

<sup>7</sup> Nabí rawé we'ká ralámuli akele Onorúgame ra'ichálila alué ta'chó akeme. Alé Rusaleni mochígume we'ká ralámuli chojkile Esukristo oyeria. We'ká balé jurío abiénachigo.

*Jena ruwimela cha'plirigo Sitaba*

<sup>8</sup> Alué rió Siteba anilime, Onorúgame 'yale 'nátali napurigá 'we semáriga ra'ichámala. Onorúgame 'yalechigó napurigá we'ká e'karúgame 'we semátiri gainámala newá napu tabilé gainárima ju bo'né tabilé gu'irisiká Onorúgame. Alekeri Siteba we'ká ralámuli sa'wale. <sup>9</sup> 'Lige jaré ralámuli Siteba saíla nile. Jaré alué saíla mochígume nile alé Rusaleni napu ilí bilé u'tá re'obá napu «sinagoga» anilime ju. Alué ralámuli alé e'yéname, alueka «libertado» anélime nile yolí ra'ichaga.\* Uché jaré ralámuli Siteba saíla, alueka 'yako mejkaka sígame nile alé Rusaleni, jaré Sirene anilichi ejperégame nile 'yako. Uché jaré Alejantría anilichi ejperégame nile 'yako. Uché jaré Silisia anilichi ejperégame nile 'yako. 'Lige uché jaré Asia anilichi ejperégame nile 'yako. 'Lige alué ralámuli chojkile ra'icha najisaká Siteba 'yuga. <sup>10</sup> Siteba saíla tabilé gayénale neyuria. Onorúgame Alawala gu'irile Siteba napurigá ra'ichámala. Alekeri 'la neyúriale Siteba. <sup>11</sup> 'Lige alué Siteba saíla najtétiga nulele jaré ralámuli napurigá ra'ichámala Siteba sayega. Najtétale napurigá ra'ichámala 'yégaga. Anile:

—Ramué 'we alá akirú sayega ra'ichachi alué Siteba Moisesi olagá. 'Lige Onorúgame sayega ra'ichachi abiena akirúchigó ramué. 'We chatíri ra'icha alué Siteba —alarigá anile alué saíla.

\* 6:9 Siné kachi 'yako ralirúgame níleréko «esklabos», alué ralámuli a'wágume nocháriniliga, nobi abé a'kinana 'ma buyásile alué ralámuli.

<sup>12</sup> 'Lige alué Siteba saíla we'ká ralámuli oilárilé alué Rusaleni mochígágame napurigá ra'íchámala Siteba sayega, 'lige alué e'wélala rió abiénachigó, alué ralámuli napu 'ya nerúgame rejcholi ruwime nile abiénachigó. 'Lige alué ralámuli 'ma cha'pile alué Siteba. 'Lige 'ma o'tole gustisia olamia alé napu asale alué wa'lula balé 'lige uché jaré e'wélalachigó. <sup>13</sup> 'Lige uchéchigo najtétale jaré ralámuli napurigá ra'íchámala 'yéga. Anile alué enomíte najtétirigime:

—Ye rió Siteba tabilé siné guwébame ju ra'icha chátiri ra'íchali. Sayega asame ju alué wa'lú re'obá alé napu ajtime ju Onorúgame, 'lige Moisesi nulalila abiénachigó sayega asame ju. <sup>14</sup> Akérituru ramué Siteba ra'íchachi, 'lige anichi alué Esusi Nasareta bejtégágame napu Rabi rijimale nile, gajunámorile alué wa'lú re'obá 'lige nakulímorile Esusi suwábaga Moisesi na'tálatiri —alarigá anile suwábaga alué 'yégame.

<sup>15</sup> 'Lige Siteba banalá 'we alá néreká asale napurigá bilé santo ánjeli. (Bo'néchigo Onorúgame 'siligame alarigá ajchá.) Alé gustisia oliachi mochígágame, suwábaga 'we o'wé e'nele.

## 7

### *Jena ruwimela napu Siteba ra'ichale*

<sup>1</sup> 'Lige alué wa'lula balé rukele alué Siteba:

—¿'La bijchiá ju napu aní alué ralámuli? —anile.

<sup>2</sup> 'Lige Sitébaka alarigá nejele:

—Emi ralámuli israelita napurigá ne 'lige napu e'wélala ju 'we alá gepuwa ne ra'ichálala. Alué Onorúgame napu ra'ichale ramué rijimale 'yuga alé nolíraleka, abiena ra'ichale alué Abraámi anilime rió 'yuga, alué abé 'ya ajtígágame. Ramué rijimale nile alué rió. Onorúgame ra'ichale alué rió 'yuga biji alé Mesopotamia ajtígachi, ta'chó simichi Jarani anilichi we'ká riógachi. <sup>3</sup> Onorúgame anele: «A'rewa alué mué gawila 'lige mué rijimálatiri, suwábaga a'rewa. Simiboa napu mochí uché jaré ralámuli, ne 'la ruwimela alé ko», anele Onorúgame alé ajtígichi. <sup>4</sup> 'Lige Abraámika simile alé asagá napu mochílige alué ralámuli Kalrea ra'ichame napu Mesopotamia anilime nile alué gawí. Uché bilena simile Jarani anilichi we'ká riógichi. 'Lige alé bejterale. Napu'lige mukusá o'nola, Onorúgame nulele Abraámi napurigá jena nawámala napu epperégágame ju 'emi. <sup>5</sup> Onorúgame tabilé 'yale gawí. Tabilé pe u'tá 'yale. Pe lensia 'yale napurigá jena asimela. Onorúgame 'yámorile gawí alué Abraámi rijimale napu a'kinana o'chérímili nile.

Onorúgame 'la bijchiá anile. Abraámi tabilé 'cho inógame nile a'lige. <sup>6</sup> Onorúgame abiena anele Abraámi: «Abé nujubapi mué rijimale buyásimale jena. Alé uché bilena sebasa (Ejipto), a'kinana ralinérigame niraga mochímala alué mué rijimale. Naó sientio bamí kachi 'we resí i'kimela alé alué mué rijimale. <sup>7</sup> 'Lige gastigárimale ne alué ralámuli nokao napu mué rijimale resí olá. 'Lige mué alué Abraámi ku smela jena. Napu'lige sebasa jena, ne'chí oyéramala», anile Onorúgame. <sup>8</sup> 'Lige Onorúgame nulele o'chérísichi isíla rejpunániliga pe u'tá guwala napurigá tabilé we'kuámala Onorúgame 'kúchila ko. Napu'lige Abraámi inolá o'chérasa, a'kinana osá no rawé kachi abiénachigó rejpúnale isílala pe u'tá guwala. Isaki anilime nile alué Abraámi inolá. 'Lige a'kinana alué Isaki inógame nile. Akobo anilime nile alué inolá. A'kinana Akobo makué oká inógame nile. Suwábaga alué ralámuli ramué rijimale nile.

<sup>9</sup> Bilé alué Akobo inolá José nile. Uché jaré alué Akobo inolá tabilé galegá etele alué José. Cha'pile alué José, 'lige ralinele uché jaré ralámuli. 'Lige alé ralisá, o'tole alué ralágágame Ejiptochi anilichi. Mejká simile, Onorúgame abiena 'la 'yuga eyénale. <sup>10</sup> 'We resí oliachi, Onorúgame 'we 'la gu'irile. Alekeri tabilé mukule rekó resí oliáe. 'Lige alué wa'lula Ejipto nulame 'we galegá etele alué José. Baraoni\* anélime nile alué wa'lula alé Ejipto nulame. Onorúgame gu'irile alué José napurigá 'we alá na'támala. Alué Baraoni 'we alá gepule alué José rejcholi ruwichi. 'Lige Baraoni wa'lula seligame neraga ajchale alué José bochígimi alé Ejipto. Alé galírale ajchale nulame nerágachigó napurigá nulámala nóchili alé nerúgame.

<sup>11</sup> A'kinana alé Ejiptochi 'we gurule alué go'ame. Alé napu eperere José rijimale abiénachigó, Kanani anilichi. 'We resí ikile alé. 'Lige alué José rijimale tabilé rewale go'ame. Alé Ejipto ta'mé 'we gurule go'ame. Alá nuteka mochile go'ame, e'wele rekochi mo'agá muchile go'ame. <sup>12</sup> 'Lige alué Akobo júlae bo'né 'kúchila alé Ejipto go'ame pabéniliga. A'kinana júlae uchéchigo siné. Sinéko tabilé machile José ko. <sup>13</sup> A'kinana kulí bo'né alué José ruwile: «Ne 'emi bonila júpaché», anile alué José. 'Liko 'la machile. Sinéko tabilé machile Baraoni chieri rijimale niligo alué José. A'kinana machile alué rijimale sebasa alé. <sup>14</sup> 'Lige alué José anele: «Jeka simawa 'emi o'maka napurigá jena mochíwa», anele. A'lige jsile alé napu José ajtile alué José rijimale napu gicháosa makué miná maligi ralámuli nile. <sup>15</sup> 'Lige a'kinana mukule alué Akobo 'lige 'kúchilatiri

\* 7:10 Baraoni aniáká pe bisirente anieme ju, tabilé ralámuli rewalá nile.

alé Ejipto mochiga. <sup>16</sup> 'Lige a'kinana o'tóleru alué Akobo 'kúchila o'chila alé 'mi Sikémichi anilichi.† Alé ilile bilé resó napu ralálige Abraámi 'ya bajchabé rawé. Alué Jamori anilime 'kúchila, alué ralinele alué resó. Alé ro'álieru alué Akobo 'kúchila o'chila.

<sup>17</sup> 'A'kinana we'ká bamí kachi we'ká nile alué José rijimale alé Ejipto ejperégame. 'Lige ta'mé we'ká bamí rokáréle napurigá 'yámala alué gawí Kanani anilichi napurigá anele Onorúgame alué Abraámi 'we 'ya. <sup>18</sup> 'Lige 'we 'ya mukule alué Baraoni, alué napu José gu'írilige 'ya. 'Lige a'kinana ajtígame wa'lula alé Ejipto nulame tabilé machile chieri ko José. <sup>19</sup> 'Lige alué wa'lula tabilé nirame nile alué José rijimale. Regá aneme nile alué bo'né 'yuga nóchame: «'U'kuchí o'chéresichi alué ralámuli israelita 'kúchila, wamí ma'chí 'lúpuá alé bi'tigá suwirálikó», aneme nile. <sup>20</sup> 'Lige ochérale bilé rió napu Moisesi anilime nile. 'We sematí towí nile. Onorúgameka 'we galegá etele alué towí. 'Lige onolá, eyélatiri 'we galegá etélechigó, bakiá mechá nasoka mochile alué u'tá towí. <sup>21</sup> Alési 'ma tabilé ikírole nasoa, 'mi wa'lú ba'wichí rekale alué u'tá towí bilena ganástachi bakate newárigime. 'Lige Baraoni malala rewale alé ba'wichí enágichi. 'Lige o'tole neséramia napurigá bo'né ranala neraga. <sup>22</sup> 'Lige Moisesi wa'lú ochérasa 'we a'lá benile napu ekí benírilige alé Ejipto asagá. Suwábaga 'we a'lá benile napu ekí nóchali nerúlige alé. 'Ma wa'lú ochérasa 'we semáriga ra'íchale 'lige 'we a'lá sébali nóchale alué rió.

<sup>23</sup> 'Ma oká liá bamígame ka, Moisesi 'nátalesime kólimia alué ralámuli israelita bo'né rijimale. <sup>24</sup> 'Lige alé sébaga Moisesi, etele bilé rió ejipsio wejpa chukúgachi bilé rió Moisesi rijimale. 'Lige Moisesi gu'írile alué bo'né rijimale. Me'ale alué rió Ejipto bejtégame. <sup>25</sup> «Suwábaga ne rijimale 'we a'lá machimela jípeko Onorúgame nuléligo ne'chí. Ne 'la nejkúrimale napurigá buinámala alué ne rijimale napurigá simámala uché bilena.» Alarigá 'nátalesime Moisesi. Alué rijimale tabilé alarigá 'nátalesime. <sup>26</sup> 'Lige melénala Moisesi etele oká bo'né rijimale nakó uchúkachi. 'Lige Moisesi tabilé najkile napurigá aminabi nakómala. Anele: «Aka rijimale júpaché 'emi, ¿chonigá nakóliché?», anele. <sup>27</sup> 'Lige alué abé chojkila rajkibule Moisesi. Anele: «Mueka pecha selígame júko napurigá gustisia olámala ne'chí. <sup>28</sup> ¿Me'limé olá mué ne'chíchigó napurigá me'ale mué alué rió ejipsio?», anele. <sup>29</sup> Napu'lige alietí akisá alué, Moisésika yati 'másale mejká. Mariana anilichi simile. 'Lige alé bejterale. Pe alé asale nocha, pe nawágame nílige. 'Lige alé

rewale mukí. Oká inorale alué rió alé.

<sup>30</sup> , Alé asale oká liá bamí. Bilé rawé eyénale alé napu tabilé riógachi nile. Amí-nami 'we wakígachi nile alé. Alé ilile bilé rabó Sinai anilime. Alé 'minami alué rió najtépele bilé rojá wejchégame napurigá bainoro rajá ilime. Alé nasipa ilile Onorúgame bilé santo ánjeli neraga. <sup>31</sup> Moisesi 'we o'wé e'negá ilile. 'Alige simile abé a'bé e'nemia alué rojá wejchégame rajame. Alé sebasa, akele Wa'lula Onorúgame ra'íchachi. <sup>32</sup> «Ne ju Onorúgame», anile. «Alué 'ya mochígame mué rijimale Abraámi, Isákítiri, Akóbotiri, 'we 'la nirame kéturu ne'chí», anile Onorúgame. 'Liko Moisesi 'we majale, 'we 'áwalia ilile. 'Lige se'wí e'nenailile, tabilé e'nénele napu ilile Onorúgame. <sup>33</sup> 'Lige anele alué wa'lula Onorúgame: «Bujá mué akalá. Jena 'we najtékame ju napugítijena ajtígame Onorúgame», anile. <sup>34</sup> «Ne 'la etiárubá ne 'kúchila 'we resi núlia mochí alé Ejipto. 'Ma tabilé anacha ne. Nawá ne jena buinamia alué resi núlia mochígame ralámuli 'mi Ejipto. Alé julámala ne mué napurigá buinámala mué ne 'kúchila», Onorúgame anele alué rió Moisesi.

<sup>35</sup> , 'Lige ku Ejipto simile alué Moisesi. Onorúgame ajchale alué Moisesi wa'lula neraga napurigá buinámala alué bo'né rijimale alé Ejipto mochígame napurigá simámala uché bilena napurigá tabilé resi nilamala. 'Yako alué Moisesi bijí alé Ejipto bejtégachi, tabilé galélliriru a'boi rijimálate. Anele alué rijimale: «Mueka tabilé selígame ju napurigá ra'íchali gatega einámala ramué 'yuga», anele. Onorúgame napurigá bilé ánjeli niraga napu Moisesi etele alé 'mi o'weti ilígame wejchachi nasipa rajá ilígame, alué Onorúgameka júlale alué Moisesi. <sup>36</sup> Moisesi 'sílikuru buyana alué ramué rijimale napurigá simámala uché bilena. 'We e'karúriga 'sile 'we semáriga alué Moisesi Onorúgame a'walila gite. Bajonile bilena wa'lú ba'wichí, Wa'lú Ba'wí Sejtákame anilichi. Oká liá bamí eyénale alé 'mi jami wakígachi napu tabilé riógachi nile we'ká ralámuli 'yuga. 'Lige alemi eyénaga 'we e'karúriga 'sile alué Moisesi alué ralámuli gu'írige. <sup>37</sup> Alué Moisesi anele alué rijimale: «Onorúgame uché abé nujubapi julámala uché bilé rió napu ruimeli ju napu anele Onorúgame napurigá ruyame ju ne», anele. <sup>38</sup> Alué Moisesi eyénale alé wakígachi napu tabilé riógachi nílige alué 'ya ejperégame ralámuli 'yuga. Alué Onorúgame napuyeri santo ánjeli, Moisesi 'yuga ra'íchale alé 'mi rabomí Sinai anilichi. 'Lige alué Moisesi Onorúgame ra'íchálila ruyele uché jaré ralámuli. Napu ramué niga mochiru ye rejcholi, alué Moisesi nejlála ju.

† 7:16 Alué Akobo o'chila uché bilena o'tólieru Ebroní anilichi. E'nesi Génesis 49:29-33.

<sup>39</sup> Ramué rijimala 'ya epperégame tabilé e'wale. Tabilé galéiruru alué Moisesi selígame kachi. Ralámuli ku Ejipto simánioríle. 'Liko Moisesi 'pa rabomi simile. <sup>40</sup> 'Lige alué ralámuli anele Moisesi bonila, Aroni anilime: «Tabilé machirú alué Moisesi koche simíligo, alué napu ramué buyánilige 'naka Ejiptochi. Jípeko newáwagó jaré mono napurigá ramué tebuma nímalá», anile. <sup>41</sup> 'Lige newale bilé besero. 'Lige we'ká e'karúgame ajágame me'ale alué besero kógimia. 'Lige aminami wa'lú piesta newale alué ralámuli. 'We ra'sálagá mochile a'lige alué besero newasa napurigá Onorúgame neraga eteme nile. <sup>42</sup> Onorúgame tabilé galele alué alarigá nokame. Alésíko Onorúgame a'rele alué ralámuli. A'má tabilé gu'írile alué ralámuli. 'Lige alué ralámuli tabilé oyérame nile Onorúgame. Pe mechá oyérame nile. Pe rayénali, pe so'pili oyérame nile. 'Yako Onorúgame jaré rió 'yale 'nátili napurigá ruyémala ralámuli. Alué jaré rió osale napurigá anile Onorúgame. Onorúgame anile: 'Emi ralámuli israelita 'émika e'yénale oká liá bamí alé jami napu tabilé riógichi ju.

'Émika me'lisá alué ajágame pe se'núchigo kógile, tabilé ne'chí. 'Émika tabilé tábiri kógile ne'chí.

<sup>43</sup> 'Émika newale bilé tábiri napuyeri rayénali, napu Moloka anilime ju.

'Lige aminami newale napuyeri bilé so'pili napu Repani anilime ju.

'Émika alieti newasa gu'írili tánime nile napurigá Onorúgame níraga. Alekeri gastigárimala ne 'emi.

Mejká julámala alé we'ká riógachi Babilonia anilichi aminami.

Alarigá osale alué ralámuli napurigá anile Onorúgame — anile Siteba.

<sup>44</sup> A'lige anile uché rajpé alué Siteba:

—Napu'lige alué ramué rijimala 'ya epperégame ralámuli bijí jami e'yénachi, Onorúgame nulele Moisesi napurigá newámala bilé re'obá wi'chite newárigime napurigá anele Onorúgame. Onorúgame alé nawámorile ralámuli 'yuga ra'ichamia alué re'obá gainasa. Alué re'obá wi'chite newárigime su'panálime nile, 'lige pabega e'yénale nabi alué ralámuli alé jami.

<sup>45</sup> Napu'lige Moisesi mukusá, 'liko Josué ajcháleru wa'lula níraga. 'Lige 'ma su'panasa, pabérale alué re'obá wi'chite newárigime napu'lige mo'ile alé Kanani anilichi wa'lú gawí bo'ígichi. Onorúgame suwábaga mabule alué bo'né saíla. 'Lige alé ilile alué re'obá wi'chite newárigime we'ká bamí napusi Rabí wa'lula asíbachi. <sup>46</sup> Onorúgame 'we galegá etele alué Rabí.

'Lige alué Rabí Onorúgame tánile lisensia napurigá newámala bilé wa'lú re'obá tabilé wi'chite, rejtete newárigime 'nalina. Najkile bilé re'obá napu Onorúgame alé asimela bejtage, alué bo'né Onorúgame napu Akobo oyérame nílege 'we 'ya rawé. <sup>47</sup> Onorúgame tabilé lisensia 'yale 'lige. A'kinana lisensia 'yale alué Rabí inolá, Salomoni anilime, napurigá newámala alué wa'lú re'obá, Onorúgame galila.

<sup>48</sup> Alué Wa'lula Onorúgame re'pá ajtíggame tabilé bejtéggame ju alé pachá re'obachi napu newame ju ralámuli. Bilé rió napu ruwime nílege napu anele Onorúgame, 'ya bajchá rawé osale napurigá anilige Onorúgame. Onorúgame anile:

<sup>49</sup> Neka pe rewagachi ajtime ju

'lige bochígimi wijchimoba teka asame ju ne.

¿Chieti galí elimo olago mué ne'chí, napurigá ne resibumala?

Ne nulá suwábaga.

Neka panápuri eyéname kame.

Neka panápuri resíbame júkuru.

<sup>50</sup> Neka 'ma newagame suwábaga tábiri jena wijchimoba

'lige re'pá rewagachi abiena.

Alarigá anele Siteba alué we'ká ralámuli.

<sup>51</sup> A'lige 'we a'wággame anele Siteba:

—'Emi e'wélala, 'we neyúrigame ju 'emi, tabilé akenti, 'lige tabilé e'wame ju 'emi napurigá Onorúgame nulá. Pe abalieri kéturu 'emi rijimala alué 'ya mochíggame. Nabí sayéggame mochime ju 'emi Onorúgame Alawala 'yuga. <sup>52</sup> 'Emi a'chigóriga nokame ju napurigá 'emi rijimala 'ya epperéggame. Alué 'emi rijimala tabilé nírame nile alué ralámuli napu ruwime nílige napu anele Onorúgame, 'lige me'líiru alué ralámuli napu anile uché bilé nawamio ralámuli gu'írímia. Jipe pe kulí kachi nejile 'emi alué gu'írame Esusi. 'Emi nulele me'línalaga alué.

<sup>53</sup> 'Emi narele Onorúgame nulalila napu 'emi 'yálrige santo ánjelite. 'Émika peka oyérame ke Onorúgame nulalila!

*Jena ruwimela Siteba rejtete basibuga me'líriligo*

<sup>54</sup> 'Liko alué e'wélala iwéggame ayole Siteba 'yuga. 'We chátiri e'negá jale ayonia alué Siteba 'lige 'ma ramalátiri chi'ná jale ayoga. <sup>55</sup> Onorúgame Alawala gu'írile uché rajpé alué Siteba. 'Lige alué Siteba o'weti rewagachi e'nénale. 'Lige 'we semati etele alué Siteba alé 'pa rewagachi napu ajtí Onorúgame. 'We rapá ilile. Esukristo alé 'pa rewagachi ilile Onorúgame 'yuga, wajtoná. Anile 'lige alué Siteba:

<sup>56</sup> —E'nésirigó 'pa rewagachi. Ewagá ilíbakuru rewagá. Neka eté aba alué napu Onorúgame júlale 'pa rewagáchika napurigá

bilé rió neraga.† Alé 'pa ilíkuru wajtoná Onorúgame 'yuga —anile alué Siteba.

<sup>57</sup> 'Lige alué ralámulika najkala na'ómale ta akináliga, aminami a'wágame ne'oa jale. 'Liko yati júmaka cha'pile alué ralámuli alué Siteba. <sup>58</sup> 'Lige o'tole alé 'mi suwami tabilé riógachi. Alué ralámuli bujale alué we'lí o'pacha amoba chujkúgame a'boi o'páchala Siteba bajsibumia. 'Lige alué we'lí o'pacha bujisá alué ralámuli, alemi paka 'yale bilé rió Sauli anilime napurigá repuka asimela alué Siteba bajsibúlichí. Alué rió Sauli 'we re'malí nile. <sup>59</sup> Napu'lige rejete bajsibua uchúkachi alué ralámuli me'lináliga alué Siteba, 'lige alué Siteba ra'íchale e'wele sináká, anile:

—Mué Wa'lula Esusi, narépogo ne alawala —anele.

<sup>60</sup> Alige alué Siteba chojkóbisiga ilíbaga e'wele sináká anele Onorúgame:

—Mué Wa'lula, tabilé ayónawagó ye ralámuli napurigá noká. Tabilé chélagá etewa ye ralámuli rekó cha nokame ke —anele.

'Lige alanisá yati mukule alué Siteba.

Alué Saúlíka bi'lepi 'nátame nile alué ralámuli 'yuga napu Siteba me'ale.

## 8

*Jena ruwimela Sauli suwábaga me'lináligo alué Esukristo oyérame*

<sup>1-2</sup> Jaré rió napu 'la sébali olame nile napurigá Onorúgame nulá, alué o'tole alé 'mi tomia alué Siteba mukusá. 'Lige 'we seweka nokale alué ralámuli alué Siteba toa. 'We nalaka nokale alué ralámuli chálagá. 'Lige aba'lige rawé 'we resí oláleru alué ralámuli alué Esukristo oyérame alé Rusaleni mochígame. Alarigá nile a'kinánasi alé we'ká riógichi. 'Lige 'ma ra'lale alué ralámuli Esukristo oyérame ichúrimi. Jaré ralámuli simíbale ejiro Jurea anilichí 'lige jaré ralámuli simíbale ejiro Samaria anilichí. Alué makué oká rió, alué napu Esusi nóchili 'yálige 'ya bajchá rawé napurigá nulámala 'lige ruwimela Onorúgame nílá ra'íchali, alueka tabilé simíbale alé Rusaleni, abe abajá mochile. <sup>3</sup> 'Lige alué Sauli nile alué 'we resí olame alué Esukristo oyérame. 'Lige bochígimi galírale eyénale alué rió Sauli alué Esukristo oyérame 'yuga. 'Lige rewisáká, banasuka buyánale alé galírale pachá mochígame. 'Lige suwábaga galírale mo'ale alué rió napu ekí nile alué Esukristo oyérame, alué umugítiri abiénachigó.

*Jena ruwimela Esukristo oyérame ralámuli ra'íchali ruyéligo alué Samaria mochígame*

<sup>4</sup> Napu'lige ra'lasa alué Esukristo oyérame, simíbale ichúrimi we'ká riógichi ruwisia

alué Esukristo ra'íchálila. <sup>5</sup> 'Lige bilé alué Belipe anilime rió simile alé bilena we'ká riógachi alé ejiro Samaria anilichí. 'Lige alé sebasa, alué rió Belipe ruyele alué Esukristo ra'íchálila alué ralámuli alé mochígame. Anele 'lige:

—Onorúgame nulele alué Kristo napurigá gu'írimala ramué ralámuli —anile alué rió Belipe.

<sup>6</sup> 'Lige we'ká ralámuli napu'le alé alué ra'íchili gepumia. 'Lige alué ralámuli 'we a'lá gepule alué Belipe ra'íchachi alé. 'Lige etele alué ralámuli alué Belipe 'we e'karúriga semáriga 'sichi alé. Alué Onorúgame gu'írile alué rió Belipe napurigá 'la gainámala alarigá 'siá. <sup>7</sup> 'Lige alué ralámuli we'ká u'kuchípala remónisi mochígame nile alé pachágana sulachí. 'Lige alué Belipe 'ma buyánale alué remónisi u'kuchípala. 'Lige e'wele sinale alué remónisi u'kuchípala buyásiga alé ralámulichí. 'Lige uché jaré ralámuli mochile tabilé gayéname noká. 'Lige mochílechigó jaré ralámuli sujírígame alé. 'Lige alué Belipe suwábaga alé 'ma sa'wale. <sup>8</sup> Alekeri alué ralámuli alé we'ká riógachi 'we ra'sálale.

<sup>9</sup> Alé 'mi we'ká riógichi asale bilé rió Simoni anilime. 'We inílame nile alué rió, 'we sujkurúgame. Tabilé machile ralámuli alarigá 'sime ko alué rió. 'Lige suwábaga alué Samaria epperégame 'we e'nagá mochile alarigá 'sichi alué rió. Bo'neko wa'lula korile. <sup>10</sup> 'Lige alué ralámuli tabilé nígame 'we bijhígale ala'sichí alué rió, 'lige alué ralámuli 'we nígame abiena bijhígalechigó. 'We a'lá gepule napu'lige ra'íchachi alué rió. Mayele alué ralámuli:

—Ye rioka Onorúgame a'walila nígame ju.

<sup>11</sup> We'ká bamí asale alué rió ralámuli 'yegia, alekeri ralámulika 'la e'wime nile bijhígaga alué 'yégali. <sup>12</sup> Napu'lige alué Belipe sebasa alé, 'lige ra'íchaleke'é alué Esukristo ra'íchálila. 'Lige alué ralámuli rió umugítiri yati bijhígaleke'é alué Belipe ra'íchachi alé sébaga. 'Lige alué Belipe ruwile 'ma sébaligo Onorúgame a'walila ralámuli gu'írimala. Abiena ruwile Esukristo ko alué a'walí ne'jime. 'Lige alué ralámuli napu ekí 'la bijhígale alué ra'íchili, ba'íchikana bokuika bochígimi, alarigá rewaramé nile, napurigá 'la machimela alué uché jaré ralámuli alué Esukristo oyérame ko. <sup>13</sup> 'Lige alué Simoni abiena bijhígile alué ra'íchili, 'lige abiena rewaráleru. 'Lige alué Simoni eyénale alué Belipe 'yuga. Alué Belipe 'we e'karúriga 'sile 'we semáriga. Onorúgame gu'írileke'é alué Belipe napurigá 'la gainámala 'la 'siá. 'Lige alué rió Simoni 'we e'negá ilile alarigá 'sichi alué Belipe.

† 7:56 E'nesi glosario «Hijo del Hombre».

<sup>14</sup> 'Lige akisá alué makué oká rió alé Rusaleni mochígame, alué ralámuli alé Samaria mochígame 'la oyéraligo Onorúgame, 'lige alué makué oká rió júlale oká rió napu a'bopi nile, Pegro nile bilé, 'lige uché bilé Juani, alué juláliru alé Samaria napurigá gu'írimala alué ralámuli alé Samaria epperégame Onorúgame oyérame. <sup>15</sup> 'Lige alé Samaria sebasea alué oká rió, Onorúgame tánele napurigá 'la semáriga 'yámala Onorúgame bo'né alawá alué ralámuli alé Samaria mochígame. <sup>16</sup> Ta'chó narékame nile alué ralámuli Onorúgame Alawala, pe iligá rewarárigame nile 'nalina napurigá 'la Esusi oyérame niraga mochímala. <sup>17</sup> 'Lige Pegro 'lige Juani, alé sebasea, nochale alué ralámuli mo'ólachi alé mochígame alé Esusi oyérame, 'lige alué ralámuli narele Onorúgame Alawala.

<sup>18</sup> 'Lige alué Simoni etesa alué ralámuli narechi Onorúgame Alawala napu'lige alué Pegro 'lige Juani nochachi alué ralámuli mo'ola, alué bo'né Simoni alarigá najkile alué a'walí napurigá 'la 'yámala Onorúgame Alawala alué uché jaré ralámuli. 'Lige enomí 'yámorile alué oká rió napurigá alué oká rió 'yámala alué a'walí. <sup>19</sup> 'Lige alué Simoni anele Pegro 'lige Juani:

—Ne'chí 'yáwaká alué a'walí napurigá ne nochásachigó alué ralámuli mo'ólachi, 'liko 'la narémala Onorúgame Alawala. Ne najtémala enomite.

<sup>20</sup> 'Lige alué Pegro anele 'we a'wágame ra'íchaga:

—'Pe injierno simela mué alué enomite, mueka raliame koláleké Onorúgame Alawala! 'jabilé chérigá raliboa napu Onorúgame neji tabilé gobláliga! <sup>21</sup> Tabilé 'la 'nátame ju mué Onorúgame 'yuga. Mueka pecha 'la ralámulika napurigá alué a'walí narémala. <sup>22</sup> A'réwagó alué resitiri 'nátali. Onorúgame e'kali tániwagó napurigá 'la nejkúrimala napurigá 'la ku e'kámala mué. <sup>23</sup> Neka 'la machí mué 'ma cha'piruga ajtigó alué chátiri 'nátalite.

<sup>24</sup> 'Lige alué Simoni anile 'we majaga ra'íchaga:

—E'kali tániwagó 'emi Onorúgame ne'chí neraga napurigá ne ta'mé 'we resí ikimela napurigá aní 'emi —alanile alué Simoni.

<sup>25</sup> 'Lige Pegro 'lige Juani tabilé 'cho ku simíbale Rusaleni, alé we'kaná we'ká riógachi ruyele churigá 'we a'lá semáriga gu'íriliga Onorúgame alué oká rió. Abiena benírale Onorúgame ra'íchálila. 'Liko 'ma ku simíbale alé Rusaleni.

*Jena ruwimela alué Belipe gu'íriligo alué wa'lula rió alé Etiopía bejtégame*

<sup>26</sup> 'Lige Onorúgame júlale bilé santo ánjeli napurigá ruyémala bilé ra'íchali alué Belipe.

'Lige anile alué santo ánjeli alé sébaga napu asale alué Belipe:

—Ya'má ilísiga cha'piboa alué bowé alué Rusaleni simime bowé 'lige Gasa simime napu 'we wakígichi ju napu tabilé riógachi ju.

<sup>27</sup> 'Lige yati ilísiga simile alué rió, 'lige simile alé 'mimi boichimi. Alé 'mimi boichimi enagá najtépale bilé rió alé Etiopía bejtégame. Alué rioka enomí napubume nile alé wa'lú páisichi napu Etiopía anilíchi nile napu nulame nile alué mukí selígame napu Kanrasi anilime nile. 'Lige alué rió enomí napubume alé 'naka Rusalénika simile. 'Lige alé wa'lú re'obá ra'píchila me'álige bilé ajágame alué rió Onorúgame kógimia. <sup>28</sup> 'Lige 'ma ku galírale simiá enale alué rió napu'lige alué Belipe najtépale. Alué rioka kareta asagá enale. Alué karétaka pe chítúlame ralégame nile. 'Lige alué rió kareta aségame, osilí ra'íchasia enale alué osilí napu osálige alué rió Isaíasi anilime 'ya bejtégame, alué napu ruyeme nile ralámuli napu anele Onorúgame. Alué osilí ra'íchasia enale alué rió alué kareta asagá alemi.

<sup>29</sup> 'Lige Onorúgame Alawala anele alué Belipe:

—Simigá alé 'mi napu ená alué rió kareta asagá, alé a'bemi enáwaká.

<sup>30</sup> 'Lige alué Belipe yati iwégame 'máleke'é 'la anésiga Onorúgame Alawálate, 'male alé napu enale alué kareta. 'Lige alué rió Belipe akéleke'é alué rió osilí ra'íchasia enágichi alemi. Akele napu ra'ícha asale alué rió. Akele napu Isaíasi osálige 'we 'ya, alué Isaíasi napu ruyame nile napu anele Onorúgame. 'Lige alué rió Belipe rukele alué rió osilí ra'íchasia enágichi:

—¿'La namo mué alué osilí napu mué ra'íchasia ená?

<sup>31</sup> 'Lige anile alué rió:

—Tabilé, pecha 'wesi i'tigá napurigá ruyémala ne'chí.

'Lige bayéleru alué Belipe alé re'pá napurigá alé si enámala alé asagá.

<sup>32</sup> 'Lige alué rió aba 'we ra'íchasia enale alué osilí napu Isaíasi osálige, anísiga enale: Napurigá bilé bo'á me'liame alieri nile alué rió.

Napurigá bilé bo'á napu'lige gupala sikiá tabilé nalame ju,

alieri nile alué rióchigó.

Kilí rió nile alué rió.

<sup>33</sup> 'Lige tabilé niráliru alué rió, pe napurigá bilé ajágame pe alarigá etéliru alué rió.

Pe gastigáriliru alué rió ralámulite,

pe tabilé niraga olale.

'We cha nokame nile alué ralámuli alé mochígame.

'Ma me'ale alué rió.



Alarigá tabilé 'kúchigame nile alué rió napu me'liliru.\*

Alarigá osale alué Isaíasi anilime rió 'ya ajtígame.

<sup>34</sup> 'Lige alué rió Etiopía bejtégame rukele alué Belipe:

—Pe rekó, ¿chieri rió nile alué napu tabilé galegá etéliru, napu me'liboli nile? ¿Aluéchala Isaíasi nile, o uché bilé nile?

<sup>35</sup> 'Lige alué Belipe nejele:

—Pe alué Esusi nile alué napu tabilé galéliru napu me'liliru —anile.

'Liko 'la ruyele alué ra'íchali 'we semati napu aní júlaligo Onorúgame alué Esusi napurigá buinámala ralámuli alé tabilé 'la bowechi. <sup>36-37</sup> 'Lige aba 'we simíbale alué alé karétachi mochiga, 'lige sébale alé ba'wí ilígichi.

—Aka jena 'la ilipaché ba'wí, ¿chonigá ta rewaráwabaché mué ne'chí? 'Ma 'la oyérame ju ne Esukristo —anile alué rió Etiopía bejtégame alé ba'wí ilígichi sebasa.

'Lige anile alué Belipe:

—'La nímaleké.

<sup>38</sup> Napu 'lige sebasa alé ba'wí wa'lú ilígichi, 'lige alué rió nuláke'é uychábanalaga alué kareta. 'Lige alé sebasa e'tegísile alué okánika rió 'lige alé ba'wíchi mo'ile. 'Lige alué rió Etiopía bejtégame bochígimi bokuúle alé ba'wíchi. <sup>39</sup> Onorúgame Alawálaka yati mejká o'tóleke'é alué Belipe. 'Lige alué Etiopía bejtégame rioka tabilé rewale alemi kíbaga alué Belipe. 'Lige alué rió Etiopía bejtégameka uchéchigo simile alé 'mimi boichimi, 'we ra'salagá enale alué rió alemi boichimi napugítí 'ma Esukristo oyérame niligame alué rió, alekeri 'we ra'salagá enáleke'é alué rió. <sup>40</sup> 'Lige alué Belipe pe kulipi niraga sébale alé 'mi uché bilena we'ká riógichi Asoto anilichi. 'Lige alé sébaga ra'íchale alué Belipe churigá níluga Esusi. 'Lige uché bilena simile alué rió alué ra'íchali ruwisia. We'kaná we'ká riógichi simile ruwisia alué ra'íchali, 'lige alé sébale alé Sesarea anilichi we'ká riógichi.

## 9

*Jena ruwimela alué Sauli 'ma a'réligo alué resti 'ndáti*

<sup>1</sup> Alué Sauli we'ká rawé eyénale 'we ayoga me'lináluga alué Esukristo oyérame. 'Lige alé 'mi simile napu asale alué wa'lula balé, <sup>2</sup> 'lige tánale bilé apeli osirúgime lisenia taga ma'chí buinániliga alué ralámuli napu oyérame nile alué nuevo bowé (Esukristo oyérame) napu 'lige mochilige alé we'ká u'kúchi re'obachi napu «sinagoga» anilime nile alé wa'lú we'ká riógichi Ramáskochi. Ma'chí buinánile alué 'ma suwábaga riótiri 'lige umugítiri. 'Lige abiena 'la lisenia tánale alué ralámuli Esukristo oyérame

karénate bulugá o'towá alé Rusaleni. 'Lige alué apeli newísiga, pe yati simile alué rió alé Ramasko. <sup>3</sup> 'Lige amulí sébachi alé wa'lú we'ká riógichi 'lige ra'ósale alé 'pákana rewagáchika. 'Lige alué rió 'we rasóleke'é. <sup>4</sup> 'Lige 'ma wijhíchi bo'íbale. 'Lige alé bo'igá akele bilé ra'íchili. Anile alué ra'íchili:

—Sauli, Sauli chonigá sairúgame niraga ajtípíche mueka ne'chí 'yuga —anile alué ra'íchili.

<sup>5</sup> —¿Chieri ju mué Wa'lula sikaniá? —rukele alué Sauli.

—Neka pe Esusi júke'é, pe aba alué ju ne napu mué 'yuga ayome ju. <sup>6</sup> Jípeko ilísiya simibóká alé 'mi wa'lú we'ká riógichi. Alé buwéwaká, ne julámala bilé rió alemi napurigá ruyémala chu'similiká mué —alarigá anile alué ra'íchili.

<sup>7</sup> Sauli gompaniérola, alué ralámuli abiena akele alué ra'íchali 'lige tabilé 'wesi etele. 'Lige 'we majaga mochile. <sup>8</sup> 'Lige ku asísile alué rió Sauli. 'Lige rekó e'nene tabilé ma'chílile alué rió. 'Lige alué gompaniérolaka cha'pile sekala. 'Lige sekachí cha'pigá o'tole alé 'mi wa'lú we'ká riógachi Ramasko. <sup>9</sup> 'Lige bakiá rawé asale alué Sauli tabilé ma'chíluga, 'lige aminami tabilé go'gá ajtile go'ame, 'lige aminami tabilé ba'wítiri bajiga.

<sup>10</sup> 'Lige asale bilé rió alé we'ká riógachi Ramasko anilichi, Ananíasi anilime rió. 'Lige Esukristo oyérame nile alué rió Ananíasi. 'Lige Esukristo etérole bo'né alué rió. 'Lige alué Esukristo anele alué Ananíasi:

—¡Ananíasi!

'Lige alué Ananíasi anele:

—Tachíríba, mué Wa'lula. Jena ajtíke'é neka.

<sup>11</sup> 'Lige alué Wa'lula anele alué rió Ananíasi:

—Simibóaká alé 'mi galírale alé bowé Wajchígame anilime bo'ígichi Jurasí bejtélachi. 'Lige alé rukéboká alué rió alé Társochi ochérigame rió 'ya bajchá rawé napu Sauli anilime rió ju. Jipe ne'chí 'yuga ra'ícha ajtí 'lige aminami e'kali tana ajtí ne'chí. <sup>12</sup> Ne 'ma anéturu Sauli mué Ananíasi simélikó alé napu ajtí alué Sauli napurigá nochámala mué alué rió napurigá 'la ku ma'chílimala alué Sauli busila —alarigá anile alué Esukristo.

<sup>13</sup> 'Lige anele alué Ananíasi:

—Mué Wa'lula, we'ká ralámuli aní alué rió Sauli 'we cha 'sime rió ko. Tabilé 'la nirame karáché alué mué oyérame, 'ma me'linálime karáché alué mué oyérame alé Rusaleni mochígame. <sup>14</sup> Jípeko abiénachigó lisenia nígame karáché napurigá cha'pimela alué mué oyérame jemi Ramáskochi mochígame. Alué e'wélala wa'lú re'obachi nulame, alué lisenia 'yale napurigá cha'pimela alué

napu nejkúrali tánime ju mué Esukristo —anele alué Ananíasi.

'Lige tabilé siminálile alué rió Ananíasi napu asale alué Sauli. 'We majale alué rió alué Sauli.

<sup>15</sup> 'Lige anele Esukristo:

—Yati simibóguru tase che anigá, e'wágurú napurigá nulá ne. Aka ne 'ma owítuba alué rió, jipe 'ma ne'chí oyérame jútura alué rió Sauli. Ne julámala alué rió Sauli alé 'mimi napu tabilé ralámuli jurío mochí napurigá ruwimela alué rió ne nila ra'íchali, alé napu e'wélaa gobierno mochí abiénachigó, alé napu mochí alué uché jaré ralámuli israelita abiénachigó. <sup>16</sup> 'Lige 'we resí nílga einámala alué rió alemi, 'we najtepámala alué rió 'we cha nokame ralámuli napu'lige ne nila ra'íchali ruigá eyénachi —anile Esukristo.

Alarigá ruyele alué Esukristo alué Ananíasi.

<sup>17</sup> 'Lige simile alué Ananíasi alé galírale napu asale alué Sauli. 'Lige alé galírale sébaga alué Ananíasi alé pachá bajkile 'lige nochale alué Sauli. 'Lige anele:

—Mué Sauli napu Esukristo oyérame ju napurigá ne, alué Wa'lula Esusi, alué napu ra'íchale mué 'yuga alé boichimi, jula ne'chí napurigá 'yóomala ne mué napurigá ku 'la ma'chílimala mué busila. 'Lige 'we a'lá bi'lepi na'támala mué Onorúgame Alawala 'yuga —anele alué Ananíasi.

<sup>18</sup> 'Lige pe yati rujsule alué napu o'pólga chujkúlige alué busila. \* 'Lige alué rujsúsaká pe yati ma'chíliile alué rió busila. 'Lige asísile alué rió 'lige rewarálriru alé ba'wichí bochígimi bokuíle napurigá ralámuli 'la machimela alué rió 'ma 'la Esukristo oyérame ko. 'Lige 'ma rewarásiká <sup>19</sup> 'lige alué rió 'ma go'ale go'ame. 'Lige alésíko 'ma a'wali narele alué rió.

*Jena ruwimela Sauli ra'íchaligo Onorúgame nila ra'íchali alé Ramáskochi*

<sup>20</sup> Alué Sauli asale alé wa'lú we'ká riógichi Ramasko anilíchi pe u'kabi rawé alué ralámuli Esukristo oyérame 'yuga. 'Lige alué Sauli eyénale alé we'kaná u'kuchí re'obachi napu «sinagoga» anilime nile. 'Lige alé sebasa ra'íchale alué ralámuli jurío 'yuga. Anile:

—Aka alué Esusi 'la Onorúgame Inolá júpaché alé 'pákana rewarágichika nawágame.

<sup>21</sup> 'Lige alué ralámuli 'we e'negá jale alué Sauli Onorúgame nila ra'íchali ra'íchachi alé u'tá re'obachi iligá. Anile:

—¿Ye ju alué rió napu tabilé galeme nile alué ralámuli Esusi oyérame? ¿Tabilé nawale alué rió jena cha'pimea alué Esusi oyérame

ralámuli napurigá o'tomela alé Rusaleni e'wélala balé 'yamia? —anile alué ralámuli.

<sup>22</sup> 'Lige alué Sauli aminacho 'we a'lá benile 'lige abé a'lá benigá ra'íchame nile tabilé chíjúnaga tabilé chélagá. Benírole Onorúgame ra'íchálila napu 'ya osirúgime nile, napu anime nile Esusi nílgo alué Kristo napu Onorúgame julámili nílgo napurigá gu'írimala ralámuli. 'Lige alué ralámuli napu akele alué ra'íchali 'la námale 'la bijchiá ko, tabiléchigo e'wale ko alué ralámuli.

'Lige alué ralámuli abisí tabilé che anigá jábaleke'é. Arigá neyúruleke'é alué Sauli.

*Jena ruwimela alué Sauli neyúsaligno alué ralámuli jurío me'linálíchi*

<sup>23</sup> 'Lige napuíle we'ká ralámuli alé a'kinana we'ká rawé kachi. 'Lige ra'íchale alué we'ká ka napuísa alé. Anile:

—Me'libó'é alué rió —anile alué ralámuli napuísa alé we'ká ka.

<sup>24</sup> 'Lige bilé rió ruyele alué Sauli me'libólikó:

—Nabí iwigá mochí ralámuli jena Ramáskochi mué me'linalia, rukomi rawemi abiena, alé yochi mochí —anele.

'Lige alé wa'lú we'ká riógachi Ramáskochi 'we re'pá iligame nile alué tegoli nologá alé suweke, 'lige 'we ru'nágame nile alué tegoli. <sup>25</sup> 'Lige bilé rukó jaré alué Sauli gompaniérola simíbale alé Sauli 'yuga alé 'mi we'ká riógachi suweke alé tegochi ewágachi. 'Lige alé sebasa, atabechi ajchagá o'wiga kolígana ma'chí re'kibule.

*Jena ruwimela alué ralámuli jurío me'linálíligo alué Sauli alé Rusaleni*

<sup>26</sup> Napu'lige ma'chínasa alué rió Sauli alé Ramasko anilíchi, simile alé Rusaleni anilíchi wa'lú we'ká riógachi. 'Lige alé Rusaleni alué Esukristo oyérame tabilé najkile napurigá si asimela alué rió Sauli. 'Lige alué ralámuli alué Esukristo oyérame tabilé bijchígale alué rió Esukristo oyérame ko. Pe majaga etéleru alué rió Sauli alé. <sup>27</sup> 'Lige alué Bernabé anilime rió gu'írile alué Sauli alé. Bayérole alé 'mi napu mochile alué makué oká rió napu nulame nílge Esusi nocháilíchi. 'Lige alué Bernabé ruyele alué ralámuli alué rió Sauli etéligo alué Esusi alé boichimi enágichi napu bo'í bowé Ramáskochi simime, 'lige alé ra'íchiligo alué Esukristo alué Sauli 'yuga. 'Lige anile alué rió Bernabé:

—Alé Ramáskochi tabilé majaga ruwile ye rió Sauli alué Esusi ra'íchálila napugiti alué Esusi alarigá 'yáligame alué nátile —alarigá ruwile alué Bernabé anilime rió.

'Lige alué ralámuli alué Esukristo oyérame 'ma a'lá bijchígale alésíko.

\* 9:18 Alué napu busila o'pólga ujchule nile pe alieti napuyeri alué ro'chí gajela napu anilime ju «escama» yolí ra'íchaga.

—'La bijchiá júkó —anile. <sup>28</sup> Alésíko napuúle alué Sauli alué Esukristo oyérame 'yuga Rusaleni mochígame. 'Lige alué Sauli eyénale alé wa'lú we'ká riógichi Rusaleni bochígimi alué Esusi ra'ichálila ruigá. 'Lige tabilé majaga ra'ichale alué rió Sauli alué Esusi ra'ichálila ruigá. <sup>29</sup> 'Lige 'we a'wágame ra'ichale alué ralámuli jurío 'yuga napu griego ra'ichame nile. 'Lige alué ralámuli 'ma me'linálele alué rió Sauli. <sup>30</sup> 'Lige alé jaré ralámuli alué Esukristo oyérame machile alué rió Sauli me'liboli ko. 'Lige alué ralámuli chíboka simíbale Sauli 'yuga alé 'mi uché bilena we'ká riógichi Sesarea anilichi we'ká riógichi. 'Lige alésíko uchéchigo bilena mejká júla alué ralámuli alué rió Sauli. Tarso anilichi we'ká riógichi nile alé napu juláiru alué rió Sauli. 'Lige alé ochérigame nile alué rió Sauli 'ya bajchá rawé.

<sup>31</sup> 'Lige alué Sauli simisáká alé uché bilena mejká, tabilé na'áuka mochile alué ralámuli jurío Esukristo sayégame alué Esukristo oyérame si pe'wera, alué oyérame napu ejperégame nile alé ejiro Jurea 'lige alé ejiro Galilea 'lige alé ejiro Samaria. 'Lige alué Esukristo oyérame abé rejchirúgame gayénale 'lige 'we a'lá nirame nile alué Wa'lula Esukristo. 'Lige alué Onorúgame Alawala abé a'lá oilárole alué ralámuli 'lige aminacho we'ká ralámuli oyérale Esukristo.

*Jena ruwimela Pegro sa'wáligo bilé rió sujirigame*

<sup>32</sup> Alué Pegro we'kaná we'ká riógichi eyénale alué Esukristo oyérame gu'iriga. 'Lige sébale alé bilena we'ká riógichi Lira anilichi we'ká riógichi, alué Esukristo oyérame kólimia simile alemi. <sup>33</sup> 'Lige alé najtépale bilé rió 'we nayume, Enéasi anilime rió. 'Lige alué rió sujirigame nile. 'Lige osá naó bamí pe bo'ígime nile alué rió, tabilé gayéname nile asisia. <sup>34</sup> Pegro anele alué rió nayume:

—Mué rió Enéasi, ye Esukristo 'la 'yómala mué jípe, jípeko 'ma sa'wimela mué nayua. Yati asisiwa mué, ro'minawa pétigame —anile alué rió Pegro.

'Lige alué rió nayume yati asísile, 'ma sa'wile nayua alué rió. <sup>35</sup> 'Lige alué ralámuli alé we'ká riógichi Lira anilichi mochígame, 'lige alué Saroni mochígame, napuúle alé napu asale alué rió 'yórigame. Pe e'nemia jsile alué ralámuli alué rió sujirigame sa'wigame. 'Lige alué ralámuli napu ekí nile alé sébagame, 'ma suwábaga bijchígale alué Wa'lula Esukristo ra'ichálila. 'Ma Esukristo oyérame gayénale alué ralámuli.

*Jena ruwimela ku ajánligo bilé mukí mukusá*

<sup>36</sup> Alé we'ká riógichi Jopa anilichi asale bilé mukí, Esukristo oyérame nile alué mukí, Tabita anilime nile alué mukí. 'Lige griego

ra'ichaga ka Rorka anilime nile alué mukí. 'Lige alué laniá pe chomali aniamé nile griego ra'ichaga. 'Lige alué mukí nabí 'we semáriga 'nátame nile Onorúgame 'yuga. Aminami 'we a'lá nirame nile uché jaré ralámuli, 'we a'lá gu'irame nile alé ralámuli tabilé nígame. <sup>37</sup> 'Lige nayúnale alué mukí, 'lige mukule alué mukí nayuka. 'Lige alué ralámuli 'we a'lá u'bárele, napurigá nokame nílige alué ralámuli. 'Lige bilé galí nile osámama ilíggame. 'Lige 'ma u'barsa alué mukí mukúgame, alé galimopa rekale alué mukí mukúgame. <sup>38</sup> Napu'lige mukuchi alué mukí, alué Pegro alé we'ká riógichi Lira asale. 'Lige alé Lira pe a'bé nile alé Jopa yéniga. 'Lige alué ralámuli alué Esukristo oyérame alé Jopa ejperégame akele alué Pegro alemi ajtígáráo. 'Lige yati júla alé rió napurigá bayémala alué Pegro. 'Lige alué oká rió sebasa alé napu ajtile Pegro, yati bayérole, anele:

—Pe rekó, ¡yati simawa ramué 'yuga! —anele alé sebasa.

<sup>39</sup> 'Lige alué Pegro yati simile alué oká rió 'yuga alé 'mi napu mochile alué ralámuli. 'Lige alé sebasa yati o'tóliro alé re'pá napu bo'ile alué mukí mukúgame. 'Lige alé we'ká umugí gunámakame mochile. Bochí anía ilile nalá alué umugí alé re'pá, alé napu bo'ile alué mukí mukúgame. 'Lige alué o'pacha napu súlige alué mukí mukúgame, e'nérale nalaka alué Pegro alué umugí. <sup>40</sup> 'Lige alué Pegro 'le wíchí júla alué umugí alé mochiga anichi. 'Lige alué Pegro alé 'le wíchí júlasa alué umugí gunámakame, 'lige chojkóbisiga ilíbale alé a'bé napu bo'ile alué mukí mukúgame. 'Lige Pegro alé chojkóbisiga iligá, 'lige tánele Onorúgame napurigá gu'irimala alué mukí mukúgame. 'Lige 'ma tánesa Onorúgame, 'lige anele alué mukí mukúgame:

—Mué Tabita ku asisi —anele alé iligá.

'Lige lanésiga yati e'nénele alué mukí mukúgame. 'Lige alué mukí etele alué Pegro alé ilígichi. 'Lige o'weti asísile alué mukí. <sup>41</sup> 'Lige alué Pegro sekachí cha'pígá o'weti elale alué mukí. 'Lige 'ma o'weti elasa 'lige bayele alué Esukristo oyérame alé ku re'pá napurigá e'némala alué mukí ku ajánagame. 'Lige alué gunámakame umugí abiena bayelechígó napurigá e'némala alué mukí ku ajánagame. <sup>42</sup> 'Lige pe yati bochígimi machíleru larigá níligo alé we'ká riógichi Jopa. 'Lige we'ká alué ralámuli yati 'we a'lá bijchígile Wa'lula ko Esukristo. 'Lige 'ma Esukristo oyérame nile alésíko alué ralámuli. <sup>43</sup> 'Lige alué Pegro we'ká rawé asale bejtega alé Jopa anilichi we'ká riógichi alé Simoni galíachi, alué Simoni napu waketa newame nile.

## 10

*Jena ruwimela Onorúgame nuléligo alué Pegro napurigá gu'irimala alué wa'lula sontalo*

<sup>1</sup> Alé we'ká riógachi Sesarea anilichi asale bilé sontalo wa'lula, alué sontalo gapitani. Kornelio anilime nile alué rió. 'Lige usani siento sontalo nuleme nile alué sontalo gapitani. 'Lige alué we'ká sontalo suwábaga alé Italia anilichi paísichi mochígame nile. <sup>2</sup> 'Lige alué Kornelio nabí rawé tánime nile e'kali Onorúgame, 'we a'lá 'nátame nile Onorúgame 'yuga. 'Lige alué upila abiénachigó alieri nile, 'we a'lá nirame nile Onorúgame. 'Lige alué 'kúchila abiénachigó alieri nile, 'we a'lá nirame nile Onorúgame. 'Lige alué Kornelio 'we a'lá nirame nile alué uché jaré ralámuli, 'lige 'we a'lá gu'irime nile alué ralámuli tabilé nígame. <sup>3</sup> 'Lige siné alí alé nasípagana ajtígachi alué rayénali, pe yati niraga Onorúgame etérale alué Kornelio bilé santo ánjeli, alué napu júlilige Onorúgame alé rewagáchika. Alé a'bé sébale alué santo ánjeli napu ajtile alué Kornelio. 'Lige anele alué santo ánjeli alé sébaga:

—¡Kuirá ganili Kornelio! —anele alé sébaga alué santo ánjeli.

<sup>4</sup> 'Lige alué Kornelio 'we majale alué alieti etega. 'Lige alué rió Kornelio rukele:

—¿Tachiri najkí mué Wa'lula? —anele alué rió Kornelio.

'Lige anele alué santo ánjeli:

—Onorúgame 'la aké mué e'kali tánichi. 'Lige Onorúgame 'we galegá etiá mué Kornelio napugiti 'we a'lá gu'irime kame mué alué ralámuli tabilé nígame. <sup>5</sup> Jípeko julawa mué oká rió alé 'mi we'ká riógachi Jopa anilichi napurigá bayémala alué rió oká rewégame napu Simoni anilime ju 'lige aminami napu Pegro anilime ju. <sup>6</sup> Alé ajtí alué tokáyola 'yuga napu Simoni anilime ju, alué waketa newame, alé a'bé ba'wí walú ilígichi, alé bejtégame ju alué rió —anele alué santo ánjeli.

<sup>7</sup> 'Lige alué Kornelio bayele oká rió napu nóchame nile alé galírale 'lige bilé alué sontalo abiena. 'We a'lá oyégame nile alué sontalo Onorúgame. Nabí rawé 'yuga eyéname nile alué sontalo alué Kornelio tebuka. <sup>8</sup> 'Lige alué Kornelio ruyele alué bakiá rió napurigá anele alué santo ánjeli. 'Lige Kornelio júlale alué bakiá rió alé we'ká riógichi Jopa anilichi napurigá bayémala alué Pegro.

<sup>9</sup> 'Lige melénala rawé 'mole alué Pegro alé re'pá galimopa Onorúgame 'yuga ra'ichamia. 'Lige alué bakiá rió pe biji 'naka boichika e'yénale, ta'chó sébale alé galírale. 'Lige rawilí nile alué Pegro alé re'pá galimopa 'mochi. <sup>10</sup> 'Lige alué Pegro

e'luile alé galimopa asagá. Alué go'ame tabilé 'cho wajsile alé galírale. 'Lige alé re'pá galimopa asagá Onorúgame etérale go'ame alué Pegro. 'Lige etele alué rewagá ewagá ilíbachi. <sup>11</sup> 'Lige etele alué apieri gemá alé 'pa alékana ewágachika ma'chínachi. Pe kilí enale alé 'pákana, naógana chijtochi cha'pirúgame, alarigá enale alué gemá alé 'pákana. <sup>12</sup> 'Lige alé amoba we'ká ajágame uchúkame nile: alué naó ronégame ajágame (gowí, bo'á, chibá, akasí) 'lige alué we'ká sinowí, 'lige ochá 'lige alué ajágame napu i'nime ju, (chulugí, wilú, a'wé), 'lige uché jaré we'ká e'karúgame ajágame uchule alé. <sup>13</sup> 'Lige alué Pegro akele bilé ra'íchili. Anile alué ra'íchili:

—Pegro, ilísiwa, yati me'gá go'póaká alué ajágame —regá anele alué ra'íchili.

<sup>14</sup> 'Lige alué Pegro anele:

—Mué Wa'lula, neka tabilé chérigá go'mela alué ajágame, pecha elírigime níriga ramulé ralámuli jurio. Neka tabilé siné go'yame ju alué ajágame napu tabilé elílime ju napurigá go'póa —anile alué Pegro.

<sup>15</sup> 'Lige alué ra'íchili anele:

—Tase che aníboa mué Onorúgame 'yuga. Ne 'la elá napurigá mué me'agá go'mela alué ajágame\* —regá anile alué ra'íchili.

<sup>16</sup> 'Lige baisá chojkégame etérale Onorúgame Pegro alué gemá alué ajágame uchúkame. 'Lige 'ma tabilé etérale Onorúgame alué gemá, 'ma ku 'pa rewagachi 'mole alué gemá. <sup>17</sup> 'Lige alué Pegro we'ká 'nata asale alué alieti etesa. «Tachiri ruwime ke 'smiwé alué alieti la'siá», la asale alé alué Pegro. 'Lige alué 'nata ajtígichi biji alué Pegro, 'lige sébale alué bakiá rió alué napu júlilige alué Kornelio. <sup>18</sup> 'Lige alué bakiá rió rukele alé yochi jaga alué ralámuli alé mochígame:

—¿Tala asé ajtí jena alué Simoni napu Pegro anilime júchigó? —anile alé sébaga alué bakiá rió.

<sup>19</sup> 'Lige alué Pegro biji alé re'pá alé galimopa asagá, we'ká 'nata asale. 'Lige Onorúgame Alawala anele alué Pegro:

—Mué Simoni, alé jaí bakiá rió mué 'yame. <sup>20</sup> Re'kísiga repórawa 'lige 'yuga ra'íchawa. Tase majawa alué 'yuga simiá. Ne julá alué ralámuli —anele Onorúgame Alawala.

<sup>21</sup> 'Lige yati re'kísele alué Pegro. 'Lige anile alué Pegro alé yochi ilíbaga alué rió alé jágame etega:

—Ne ju napu 'emi 'ya. ¿Chonigá 'yamí 'emi ne'chí? —anele Pegro.

<sup>22</sup> 'Lige nejele alué bakiá rió:

\* **10:15** Alué ralámuli jurio tabilé go'yame nile ajaré ajágame. Alueka anime nile tabilé bi'wígame kórlie jaré ajágame. Alueka aníame ju tabilé lisensia nígame nile napurigá go'mela alué jaré ajágame. E'nesi glosario «purificar».

—Kornelio anilime rió sontalo gapitánila, aluete jularu ramué alé 'naka. Alué rió 'we a'lá oyérame ju Onorúgame. 'Lige ralámuli jurío 'we a'lá niramé ju alué rió, napugiti 'we a'lá rió kame. Bilé santo ánjeli nulele alué Kornelio napurigá julámala ramué jena napurigá bayérowa mué. Simérátu mué alé 'mi ra'íchili ruyemia —anele alué bakiá rió napu'lige etesa alué Pegro.

<sup>23</sup> 'Lige alué Pegro alé pachami bayérole alué bakiá rió. 'Lige alé pachá mochiga, go'ame kógile alué bakiá rió. 'Lige 'ma bosásaká, 'yale gemá napurigá gemagá okómala napurigá alé che'labámala alué bakiá rió. 'Lige alé che'labasa, be'á simíbale. 'Lige alué Pegro simile alué bakiá rió 'yuga, 'lige uché jaré ralámuli napu Esukristo oyérame nile alé Jopa mochígame, abiena simíbale alué ralámulichigó.

<sup>24</sup> 'Lige simasa, melénala kulí sébale alé Sesarea anilichi we'ká riógichi. 'Lige alué Kornelio alé asale buigá alué ralámuli. 'Lige alué bo'né Kornelio rijimala abiena mochile aléchigó. 'Lige alué Kornelio gompaniérola abiena we'ká mochile aléchigó alué ralámuli buigá. Alué ralámuli Kornéliote bayérigame nile. <sup>25</sup> Napu'lige alué Pegro alé sébachi, yati ma'chínale alé galírale alué Kornelio alué Pegro najtepamia. 'Lige alué Kornelio alué Pegro najtépage, 'lige chojkóbisiga chukíbale alé bajchabeka. Ala'sile alué rió Kornelio, pe Onorúgame neraga etele alué Pegro. <sup>26</sup> 'Lige alué Pegro chijúnale la'sichi alué rió Kornelio. 'Lige sekala cha'pígá anele:

—Ílísíwa o'weti. Neka pe iligá rió ju napurigá mué, tase Onorúgame ju ne —anele alué Pegro.

<sup>27</sup> 'Lige alé pachami simíbale ra'ichasia alé napu mochile alué uché jaré we'ká ralámuli. <sup>28</sup> 'Lige anile alué rió Pegro alé pachá iligá:

—'La 'we a'lá sébali machiáa 'emi napurigá niru ramué ralámuli jurío. Ramueka tabilé siné oyame niru alé napu epperé alué ralámuli tabilé jurío. Onorúgameka regá benírole ne'chí suwábaga ralámuli 'we a'lá niráwará, rekó tabilé jurío kachi abiena 'we a'lá niráwará. Onorúgame newale suwábaga ralámuli. <sup>29</sup> 'Lige napu'lige Kornelio júlale alué ralámuli ne'chí bayéniliga, ne yati e'wá tabilé chélagá rekó 'émika e'sena ralámuli kachi. ¿Chonigá jula mué Kornelio alué ralámuli ne'chí bayéniliga? ¿Tachiri nakiágó 'emi ralámuli?

<sup>30</sup> 'Lige alué rió Kornelio nejele.

—Kulí, 'ma naó rawé ju, ne ra'icha ilígichi Onorúgame 'yuga, nasípagana ajtígichi alué rayénali, 'lige alé ma'chínaturu bilé rió rapame o'páchigime, pe yati niraga ma'chínaturu alué rió alé. Pe santo ánjeli nile. <sup>31</sup> 'Lige anile alué santo ánjeli: «Onorúgame 'la aké mué ra'ichachi aleké

'yuga 'lige 'we 'la sébali machí mué 'we a'lá gu'irime ko alué ralámuli tabilé nígame. <sup>32</sup> Jípeko juláwagó jaré rió alé 'mi Jopa anilichi napurigá bayémala alué rió Pegro alé Jopa ajtígime. Pegro alé 'mi Simoni bejtélachi ajtí napu waketa newame ju. Alué Simoni anilime rió bejtégame ju alé a'bé napu alué ba'wí wa'lú ilígichi.» Alarigá anile alué santo ánjeli rapame o'páchigime. <sup>33</sup> 'Lige júlaturu ne alué ralámuli napurigá bayémala mué. 'La yati e'wale mué. 'We 'la ju mué nawasa. 'Lige jípeko jena mochírukuru ramué, 'lige Onorúgame 'la etiágoru ramué jena mochírigo. Jípeko buigá mochírukuru ramué akinalia alué ra'íchili. Napurigá Onorúgame nulele mué napurigá ruyémala mué alué ra'íchili jena jipe, aleké ra'íchili akinalia mochiru ramué jipe jena —anile alué Kornelio.

*Jena ruwimela napu ra'ichaligo Pegro alé Kornelio bejtélachi*

<sup>34</sup> 'Lige alué Pegro anile:

—Jípeko 'la nama ne napurigá aní Onorúgame. Onorúgame suwábaga ralámuli 'la 'we a'lá niramé ju rekó tabilé jurío kachi. <sup>35</sup> Onorúgame nareme ju apiépiri rió napu 'we a'lá niramé ju Onorúgame napu 'we a'lá sébali olame ju Onorúgame 'yuga. <sup>36</sup> Alué ra'íchili napu nulele Onorúgame ramué ralámuli Israeli epperégame, alué ra'íchili aní Esukristo ko Wa'lula suwábaga ralámuli nuleme jena wijchimoba mochígame. 'Lige alué rió napu 'we a'lá niramé ju alué Esukristo, alueka 'la sébali nímala, tabilé we'ká 'nátame nímala. <sup>37-38</sup> 'Émika 'we a'lá sébali machí napu ikílogo we'kaná jena Israeli. Onorúgame 'yale Esusi bo'né alawala 'we a'wágame a'walí, alué Esusi napu bejtégame nile alé Nasareta. Napu'lige Juánite rewarásiga alué Esusi, 'lige kulí simile alé Galilea, 'lige alé chojkile ralámuli gu'íria 'lige 'yola ralámuli napu Remónisite cha'pirúgame nílige. Alarigá 'la gayénale napugiti Onorúgameka alué 'yuga asáligame. <sup>39</sup> 'Lige ramué 'la etéuturu larigá yochi nayúkame alué Esusi alé 'mi wa'lú we'ká riógachi Rusaleni, 'lige alé uché bilena we'kaná we'ká riógachi 'mi alé napu epperégame ju ralámuli jurío. 'Lige ramué alé mochírigituru etea larigá yochi Esusi. 'Lige alué ralámuli tabilé niramé nile alué Esusi, 'ma me'ale alué Esusi alé gulusichi ujchagá. <sup>40</sup> 'Lige mukusá alué Esusi, pe bakiá rawé kachi Onorúgame ku ajánale alué Esusi. 'Lige jena eyénituru alué rió Esusi ku ajánasa. <sup>41</sup> 'Lige tabilé suwábaga ralámuli etele jena eyénachi napu'lige ku ajánasa. Pe ramué u'kabi ralámuli eteru, pe napu ekí cha'pílige bo'né Onorúgame napu ramué ralámuli nílige. Ramueka napuíka go'túgeturu 'lige bajiruturuchigó

alué si napu'lige ku ajánasa. <sup>42</sup> 'Lige alué Esukristote nulérituru ramué napurigá ramué ruyewa Onorúgame ra'ichálila. 'Lige aminami nuléruturu napurigá ramué ruyémala Onorúgame ajcháligo wa'lula níraga alué Esusi napurigá wanápame nímala alué resiti 'nátame ralámuli, alué napu bijí ajagá mochi 'lige suwígame abiena. <sup>43</sup> Suwábaga alué ralámuli 'we 'ya ejperégame napu ruwime nile napu anele Onorúgame, anile nawamio alué Esusi 'lige napu eki ralámuli 'la bijchígime ju Esusi ra'ichálila, alueka 'la e'kawa Onorúgame resítiri alawégame 'la bijchígime ka chieri ka Esusi.

*Jena ruwimela 'ma bajkíligo Onorúgame Alawala alé ralámulichi tabilé jurío*

<sup>44</sup> Napu 'lige alué Pegro bijí ra'icha ilígichi alé pachá galírale, Onorúgame Alawala bajkile suwábaga ralámulichi. 'Lige pe si'népiriga bochígimi bajkile alué alawá alé ralámulichi. <sup>45</sup> 'Lige alué ralámuli alué napu napu'ka jsíligo Pegro 'yuga, alué ralámuli jurío napu 'ma oyérame nile Esukristo, alueka 'we e'negá jale alué ralámuli Onorúgame Alawala bajkichi. A'boi ralámuli juríoka tabilé mayele Onorúgame Alawala bajkírao alué ralámulichi tabilé jurío, alekeri 'we e'negá jale. <sup>46</sup> 'Lige alué ralámuli napu 'ma nígame nile Onorúgame Alawala, alueka chojkile ra'icha we'ká se'winátiri ra'ichili napu 'yako tabilé alarigá ra'ichame nílige. Ra'ichale chiena semáriga ko Onorúgame. <sup>47</sup> 'Lige Pegro anile:

—Alué ralámuli 'ma nígame ju Onorúgame Alawala napurigá ramué. Pecha che anéwagó napurigá tabilé rewarárigame nímala alué ralámuli ba'wichí bochígimi buku'ka —anile Pegro.

<sup>48</sup> 'Lige Pégroka nulele rewarániliga alué ralámuli, napurigá alué uché jaré ralámuli 'la machimela alué ralámuli 'ma a'réligo napu bajchabé 'nátame nílige 'lige 'la bijchiá alué Esukristo oyérame ko. 'Lige alué ralámuli 'we anele alué Pegro napurigá alé asimela pe'wera alué ralámuli 'yuga.

## 11

*Jena ruwimela Pegro ruwíligo napu lakíligo alé Sesarea*

<sup>1</sup> Alué makué oká ralámuli napu Esusi nóchili 'yálige, 'lige alué uché jaré ralámuli Esukristo oyérame alé Jurea anilichí ejiro mochígime, suwábaga alué ralámuli machile alué ralámuli tabilé jurío 'ma oyérligo Onorúgame nila ra'ichali. <sup>2</sup> Napu 'lige sebase alué Pegro alé Rusaleni, alué ralámuli Esukristo oyérame alé Rusaleni mochígime sairaga ra'ichale alué Pegro olagá. <sup>3</sup> Anele:

—Mué rió, ¿chonigá simi mué alué ralámuli kólimia alé tabilé jurío ralámuli

ejperélachi? 'Lige alé go'ame go'ale mué alué ralámuli 'yuga. 'Lige alué ralámuli tabilé alarigá nokame ju napurigá nokiamé niru ramué.\* —anele alué ralámuli.

<sup>4</sup> 'Lige Pégroka 'we a'lá ruyele napurigá ikíligo bo'né:

<sup>5</sup> —Ne alé we'ká riógachi Jopa anilichi ajtigéturu. 'Lige Onorúgame 'yuga ra'icha ajtigé ne alé. 'Lige alé asagá Onorúgame etératuru ne'chí we'ká e'karúgame. Etéturu ne napuyeri gemá alé 'pákana rewagáchikana ma'chínichina. 'Lige alé 'pákana o'wékana enáturu alué gemá. 'Lige alué napuyeri gemá napurigá naógana chitochi cha'pirúgame alarigá enáturu alué gemá alé 'pákana rewagáchikana. 'Lige alé a'bé asibaturu napu ne ajtigé. <sup>6</sup> 'Lige ne 'we a'lá e'néturu alué napuyeri gemá alé asibasa. 'Lige etéturu ne alé amoba we'ká ajágame naó ronégame uchúkachi alé gemachi. 'Lige uchuke alué we'ká ajágame alé galírale bukurúgame, 'lige alué jami oyame abiena, 'lige alué i'nime, 'lige alué sinowí, 'lige uché jaré jami oyame ajágame. <sup>7</sup> 'Lige aké ne bilé ra'ichili. Aníchane alué ra'ichili: «Mué Pegro, ilísiwa mué alé, 'lige me'gá go'poa alué ajágame.» <sup>8</sup> 'Lige neka enáturu: «Tase alarigá aniboa mué Wa'lula. Neka alué jaré ajágame tabilé siné go'yame ju, tabilé alarigá nokiamé niru ramueka.» <sup>9</sup> 'Lige alué ra'ichili aníchane: «Tase saega ra'ichawa mué Onorúgame olagá. Onorúgame 'la elá napurigá alué ajágame me'gá go'mela mué», alarigá aníchaneturu alué ra'ichili. <sup>10</sup> 'Lige baisá aníchane alué ra'ichili alarigá. 'Lige 'ma baisá anisá alué ra'ichili, 'lige ku alé rewagachi kíbuturu alué apieri gemá. <sup>11</sup> 'Lige alé galírale napu ne ajtigé, a'lige seba bakiá rió napu alué Kornelio júlalige alé 'naka Sesaréachi anilíchika. <sup>12</sup> Onorúgame Alawala ruyéturu ne'chí alué ralámuli alé galírale sébaligo napu ajtigé ne. 'Lige aníturu Onorúgame Alawala simerá ne alué bakiá rió 'yuga. Alekeri ne tabilé we'ká 'nátaga simi ne. 'Lige usani rió alué Esukristo oyérame alé we'ká riógichi Jopa mochígime, alué si simíbaturu ne'chí 'yuga alé Sesarea anilichi. Suwábaga ka simáruturu ramué alé Kornelio bejtélachi. <sup>13</sup> 'Lige alué Kornelio ruyéturu bilé santo ánjeli etéoriéturu alé bo'né bejtélachi. Aniaráturu alué santo ánjeli: «Mué rió, julawa jaré rió alé we'ká riógichi Jopa napurigá bayémala alué oká rewégime rió, alué Simoni napu Pegro anilime ju. <sup>14</sup> Alué rió bayésiga 'la ruwimela churigá 'la ma'chínamala mué alé resiti bowechi 'lige churigá 'la buyásimili ko alué resiti bowechi alué ralámuli napu eki mochí jena mué bejtélachi.» <sup>15</sup> 'Lige alué Kornelio suwénasa ra'icha, 'lige ne ralámuli rejcholi

\* 11:3 E'nesi glosario «circuncisión».

rueya ajtígichi alé, Onorúgame Alawala yati bajkile alué ralámulichi. Alué alawá bajkile alé ralámulichi pe a'chigóriga napurigá bajkile alué alawá 'ya ramuechi. <sup>16</sup> 'Lige ne 'nata napurigá anílige alué Wa'lula Esusi. Aniéтуру alué Wa'lula: «Alué Juánika pe ba'wite rewarame nile. Jipe 'émika Onorúgame Alawálate rewarárigame nímala», aniéтуру Esusi. <sup>17</sup> Onorúgame 'yásaká bo'né Alawala alué ralámuli tabilé jurío a'chigóriga napurigá 'yale ramué napu'lige ramué 'la bijchígirige alué Wa'lula Esukristo ko, 'lige ¿ne 'lacha animela tabilé 'la ko Onorúgame Alawala bajkiá alué ralámulichi? ¿Chieri ju ne napurigá Onorúgame saega asimela?

<sup>18</sup> 'Lige alué ralámuli alé Rusaleni mochígame, alué ra'íchali akisá, tabilé che aníg mochíbale. Tabilé ne'óchale alué Pegro. Pe iligá cheliera 'yale 'nalina Onorúgame. Anilé:

—¡Onorúgame 'la elile alué ralámuli tabilé jurío napurigá 'la a'rémala alué ralámuli alué resiti 'nátili, napurigá 'la bi'ígame alawega mochímala 'pa rewagachi nabí Onorúgame 'yuga!

*Jena ruwimela bijchígiligo Onorúgame ra'íchálila alué ralámuli Antiokía mochígame*

<sup>19</sup> Napu'lige me'líiru Síteba, júmasele we'ká alué ralámuli Esukristo oyérame we'kaná ichúrimi. 'Lige jaré abé mejká simíbale alé ejiro Benisia anilichi. 'Lige jaré simíbale alé Chipre anilichi rabó alé nasipa wa'lú ba'wichí, 'lige jaré alé Antiokía anilichi wa'lú we'ká riógichi. 'Lige alemi sebasa 'we ruyele alué Esukristo ra'íchálila alué ralámuli jurío napu alé mochígame nile. Tabilé ruyele alué ralámuli tabilé jurío. <sup>20</sup> 'Lige jaré ralámuli Rusaleni júmasilige Chipre mochígame nílige 'lige jaré Sirene mochígame nílige. 'Lige alué júnisiga sébale alé Antiokía. 'Lige alé sebasa chojkile ra'íchali ruyea alué ralámuli jurío 'lige alué ralámuli tabilé jurío abiénachigó napu griego ra'íchame nile.† 'Ma ruyele alarigá nílige alué Wa'lula Esusi. <sup>21</sup> Onorúgame gu'irile alué ralámuli napurigá 'la ruwimela, 'lige we'ká ralámuli 'la bijchígile alué ra'íchali, 'liko 'ma we'ká ralámuli a'rele bo'né 'nátili 'lige oyérame alué Wa'lula Esusi na'tálila.

<sup>22</sup> 'Lige alué we'ká ralámuli Esukristo oyérame alé Rusaleni mochígame akele alakió alué ralámuli alé Antiokía mochígame. 'Lige alarigá akisá, júlale alué rió Bernabé anílime alé Antiokía. <sup>23</sup> 'Lige alué rió alé Antiokía sebasa, etele Onorúgame 'we a'lá gu'irio alué ralámuli alé mochígame. 'Lige 'we ra'sálágá asale alué Bernabé etega 'we a'lá gu'irio Onorúgame, alekeri 'we ra'sálále. 'Lige ruyele alué ralámuli bilé rejcholi

napurigá alué ralámuli 'la nabí oyéramala Wa'lula Esusi tabilé we'ká 'nátaga, 'la bi'lepi 'nátaga. <sup>24</sup> 'Lige alué Bernabé 'we a'lá rió nile, Onorúgame Alawala alawégame nile. 'Lige 'we a'lá bijchígime nile Onorúgame ra'íchálila. 'Lige alué uché jaré we'ká ralámuli napu ekí akele alué Bernabé ra'íchálila, 'we a'lá oyérame alué Wa'lula Esusi ra'íchálila.

<sup>25</sup> 'Lige alué Bernabé simile alé Tarso anilichi we'ká riógichi alué rió Sauli bayemia. <sup>26</sup> 'Lige rewisá alué Sauli, 'lige 'yuga simile alé Antiokía. 'Lige alé Antiokía sebasa alé mochile bilé bamí alué oká rió, Esukristo ra'íchálila beniria alué we'ká ralámuli alé mochígame Esukristo oyérame. 'Lige alé chojkile pe kulí siné «Kristiano» aníá alué ralámuli Onorúgame oyérame. «Kristiano» aniáká «Kristo Oyérame» aniamé ju.

<sup>27</sup> 'Lige pe a'kinana sébale jaré rió Esukristo oyérame napu benílige Onorúgame ra'íchálila. 'Lige alué rió alé Rusalénika simíbagame nile. Sébale alé Antiokía. <sup>28</sup> 'Lige alué bilé rió Agabo anilime alé a'bé ilíbale napu mochile alué Esukristo oyérame ralámuli. 'Lige alé iligá ra'íchale alué rió. 'Lige Onorúgame Alawala gite machigá anile alué rió ra'íchali ruyá alarigá nimio a'kinana rawé. 'Lige 'we gunarúmerá alué go'ame alé, tabilé nerúmará go'ame alé bochígimi gawichí we'ká rawé kachi. 'Lige 'la bijchiá nile. ('Lige a'kinana alué Kláurio anilime rió wa'lula nilige tabilé nerule go'ame. 'Lige alé Jurea wa'lú ejírochi abéchigo rajpé, tabilé i'tele go'ame.) <sup>29</sup> 'Lige alué ralámuli alé Antiokiachi ejperégame alué Esukristo oyérame, 'nátale juláime alé ejiro Jurea anilichi jaré rió alué Esukristo oyérame, enomí o'tóriga julamia, napurigá gu'irimala alué ralámuli Esukristo oyérame alé Juréachi ejperégame. A'pílipi ralámuli nejile enomí napu ekí ikiro. Jaré abé nígame, alueka abé we'ká nejile, alué tabilé we'ká nígame pe'kabi nejile. <sup>30</sup> 'Lige 'ma napabusa, juláiru enomí o'tóriga alué Bernabé anilime rió 'lige alué Sauli sí alé 'mi Jurea napurigá 'yámala alué e'wélala napu Esukristo oyérame nuleme nilige alé Jurea mochígame.

## 12

*Jena ruwimela alué wa'lula Erore 'we rest oláligo alué Esukristo oyérame*

<sup>1</sup> 'Lige alué rió wa'lula Erore napu nulame nilige alé Juréachi, cha olánile alué ralámuli Esukristo oyérame, 'lige alekeri nulele alué sontalo cha'píniliga jaré alué ralámuli Esukristo oyérame. <sup>2</sup> 'Liko cha'píiru alué Santiago (Akobo) 'lige me'líiru we'lí

† 11:20 Alué ralámuli Chipre ejperégame 'lige Sirene ejperégame griego ra'íchame nile. 'Lige alué Barnabasi Chipre bejtégame nile.

siparínate. Santiago Juani ba'chila nile.  
<sup>3</sup> 'Lige alué jaré ralámuli jurío tabilé  
 Esukristo oyérame 'we ra'sálagá rejpilé alué  
 Santiago me'lisuga. 'Lige alué rió wa'lula  
 Erere machisá alué ralámuli 'we ra'sálagá  
 mochigo alué Santiago me'lisuga, 'lige  
 nulale alué Erere napurigá cha'pibóachigó  
 alué rió Pegro anilime. Napu'lige piesta  
 newáliku napu go'yame nile alué baní  
 tabilé ro'érigame kawali, a'lige cha'píliku  
 alué Pegro. <sup>4</sup> 'Lige cha'pisuga alué Pegro,  
 galírale bajcháliku. 'Lige alé napu asale alué  
 Pegro galírale, alé mochile makué usani  
 sontalo alué Pegro tebuka. Naoka repume  
 nile siné, 'lige uché jaré naó abé i'libeko  
 repume nile. 'Lige alué Erere o'tiame  
 'nátales gustisia olamia alé we'ká ralámuli  
 mochígichi nujubapi, 'ma suwisá alué piesta  
 Páskua anilime. Najkile napurigá we'ká  
 ralámuli etémala. <sup>5</sup> 'Lige alué piesta ta'chó  
 suwénachi, 'lige alué uché jaré ralámuli  
 alué Esukristo oyérame 'we iwégame tania  
 mochile nejkúrali Onorúgame napurigá  
 taché olawa alué rió Pegro alé galírale.

*Jena ruwimela Onorúgame 'we a'lá  
 gu'iriligo Pegro*

<sup>6</sup> 'Lige rapakónala rukó napu'lige alué rió  
 Erere ma'chí pánilichi alué rió Pegro, 'lige  
 Pégroka 'we gochigá bo'ile alué oká karénate  
 bulériga. Alué bilé karena guwala alué  
 sontálochi chérigame nile, 'lige alué uché bilé  
 karena guwala alé uché bilena sontálochi  
 chérigame nile. 'Lige alué uché jaré sontalo  
 alé yochi repuka mochile. <sup>7</sup> 'Lige pe abé  
 i'libeko pe yati niraga ma'chínale alué santo  
 ánjeli alé napu bo'ile Pegro, alué santo ánjeli  
 napu alué Wa'lula Esukristo júale. 'Lige  
 alué santo ánjeli ajchale a'chigachi nochagá.  
 'Lige anele ajchasa alué Pegro:

—Wériga Pegro, ilísiwa o'weti.

'Lige alué karena pe yati rujsule sekachi  
 bulurúgame. Pe a'boi su'pale alué karena.

<sup>8</sup> 'Lige anele alué santo ánjeli:

—Yati o'pachátawa, 'lige yati akarawa.

'Lige alué rió Pegro yati e'wale lanília.

'Lige anile alué santo ánjeli:

—Ne'chí najátawaká —anile.

<sup>9</sup> 'Lige alué Pegro yati simile alemi  
 guwana napu enale alué santo ánjeli. 'Lige  
 alué Pegro tabilé 'la machile, tabilé bijchiá  
 kolale alué. Pégroka pe remua bo'igó  
 mayele. <sup>10</sup> 'Lige simárale alé napu alué  
 oká sontalo mochile alé a'bemi alué Pegro  
 repuka. 'Lige alemi simárale napu mochile  
 uché jaré sontalo. 'Lige arigá sébale alé  
 napu ilile alué 'we enati 'yera. 'Lige alué  
 'yera jierote newárigime nile. 'Lige alué  
 'yera jiero pe bo'né i'pule alemi sébachi  
 'lige buyásele alemi ma'chimi. 'Lige buyasa  
 pe'wera e'yénele okaka alé 'mimi we'ká  
 riógichi niraga. 'Lige pe alemi si pe yati tané

ikile alué santo ánjeli. <sup>11</sup> 'Liko alué Pegro  
 'la bijchígile alué santo ánjeli 'siligo ma'chí  
 'pa galírale bajcháriga ajtígichi. Anile alué  
 Pegro:

—Neka 'la machí alué Wa'lula Esukristo  
 júaligo bilé santo ánjeli ma'chí pamia galírale  
 bajcháriga ajtígichi ne resí olánilichi ne'chí  
 alué Erere 'lige aminami alué ralámuli jurío.  
 Alué Wa'lula Esukristo 'sile ne'chí gu'iria.

<sup>12</sup> 'Lige machisá alué Pegro 'la bijchiá ko,  
 'lige 'we yati simile napu María bejtélachi  
 nile. Alué María alué Juani eyela nile, alué  
 Juani napu Marko anilime nílechigó. Alé  
 napu María bejtégame nile we'ká mochile  
 ralámuli Esukristo oyérame alé napuíka  
 Onorúgame tania napurigá alué Pegro tabilé  
 me'liboa alé galírale bajcháriga ajtígichi.  
<sup>13</sup> 'Lige alué Pegro alé yóchika reporale alé  
 galírale sébaga alué mukí María bejtélachi.  
 'Lige bilé mukí iwé simile alé yochi e'nemia.  
 Alué mukí Rora anilime nile. <sup>14</sup> 'Lige  
 alué mukí Rora yati machile alué Pegro  
 ra'ichálila ko. 'Lige machisá Pegro ko, 'we  
 ra'sálale 'lige 'we yati 'male ruyemia uché  
 jaré ralámuli napu mochile alé nibilé i'pusa  
 yochi, tabilé nélabale alué 'yera i'púlime.  
<sup>15</sup> 'Lige alué ralámuli alé pachá mochígame  
 anele:

—'La abé tóntatiri júpaché mueka  
 —anéleru alué mukí ruyachi.

'Lige alué mukí anile:

—Neka tabilé 'yega aní, 'la bijchiá ju  
 —anile alué mukí.

'Lige anile alué ralámuli:

—Pe Pegro alawálala júleké alué aleka  
 ilígame —anile alué ralámuli.

<sup>16</sup> 'Lige alué Pégroka abéchigo a'wágame  
 rejporeale alé yóchika. 'Lige alué ralámuli  
 arigá i'pule alué 'yera. 'Lige alué ralámuli  
 etele alué 'yera i'pusa aleka iligó alué Pegro.  
 'Lige 'we majale alué ralámuli alué Pegro  
 etega. <sup>17</sup> 'Lige alué Pegro sekate sulile alué  
 ralámuli. 'Lige anele:

—¡Kilí jasi 'emi ralámuli! —anele.

'Lige ruwile alué Pegro Onorúgame ma'chí  
 páliga alé galírale bajcháriga ajtígichi.

'Lige anile:

—Ruyesi Santiago alué napu Esusi  
 nasípasi bonila ju, chukíligo ne, 'lige abiena  
 alué uché jaré ralámuli Esukristo oyérame.

'Lige pe u'kabi ra'ichasa, simile chíbamia  
 uché bilénami.

<sup>18</sup> 'Lige che'lisá we'ká 'nata mochile alué  
 sontalo alué Pegro repúkame.

—¿Koche kiba alué Pegro? —anile alué  
 sontalo.

<sup>19</sup> 'Lige alué wa'lula Erere 'we a'wágame  
 nulale 'yánaliga alué Pegro. 'Lige alué  
 sontalo tabilé asé rewale alué Pegro. 'Lige  
 alué sontalo tase rewisá alué Pegro, alué  
 Erere 'la iwégame rukele alué makué usani  
 sontalo, alué napu Pegro repuka mochílige



galírale bajcháriga ajtígachi. 'Lige tabilé ruyele koche ajtígá Pegro, pecha machlíga alemi ajtígó alué Pegro. 'Lige alué Erote uché jaré sontalo owile napurigá me'limela alué sontalo Pegro repúkame. 'Lige pe a'kinana alué wa'lula Erote simile Rusaleni asagá 'lige 'letu simile Sesarea anilichi we'ká riógichi, 'lige alemi we'ká rawé asimeli nile alué rió Erote.

*Jena ruwimela mukúligo alué wa'lula Erote*

<sup>20</sup> 'Lige alué wa'lula Erote 'we ayoga asale alué ralámuli we'ká riógachi Tiro mochígame 'yuga. 'Lige alué ralámuli alé we'ká riógachi Sironi mochígame ralámuli 'yuga abiena 'we ayoga asale alué rió Erote. 'Lige alué ralámuli machisá alué wa'lula Erote 'we ayoga ajtígó, 'lige ra'ichale alué we'ká ralámuli a'bopi ka, napurigá simámala alué wa'lula Erote e'nemia. 'Lige alué ralámuli alé Sesarea sebase, 'lige gompaniétale bilé rió alé ajtígame Blasto anilime rió. Alué rió Blasto alué Erote galila repume nile alé. 'Lige alué Blasto gatele napurigá ra'ichámala alué ralámuli alué Erote 'yuga. Alué ralámuli alé okaná we'ká riógichi mochígame tabilé najkile napurigá ayoga asimela alué Erote napugiti alué go'ame alé 'nólame níligame alué ralámuli, alué Tiro mochígame. 'Lige alué Sironi mochígame ralámuli abiénachigó alé 'nólame nile go'ame, alé napu Erote nulame nile. <sup>21</sup> 'Lige napu'lige sébale alué rawé napu ra'icháwili nile, alué Erote o'pachátale bilé o'pacha 'we semati ta'wesi anaga. 'Lige alué o'pachátasa, asíbale alé wa'lú mutélachi. 'Lige alé asagá ra'ichale bilé ra'ichili. <sup>22</sup> 'Lige alué ralámuli anile alué ra'ichali akisá, e'wele ra'ichaga anile:

—¡Tabilé ralámuli ju alué 'sika anía, pe bilé Onorúgame ju 'sika anía alué! —anile alué ralámuli.

<sup>23</sup> 'Lige alué santo ánjeli sébale alé pe yati neraga. 'Lige alué santo ánjeli 'we a'wágame nayulí 'yale alué Erote. Alué rió wa'lula Onorúgame mayérimé níligame. Alekeri Onorúgame 'nátale nayulí 'yamia. 'Lige alekeri nayulí 'yale alué santo ánjeli. 'Lige 'ma kuchile alué rió. 'Lige mukule alué rió Erote kuchiga.

<sup>24</sup> 'Lige alué ralámuli alué Esukristo oyérame we'kaná simíbale Onorúgame ra'ichálila benírisia alué ralámuli, alé ichúrimi we'ká riógichi. 'Lige alué we'ká ralámuli aminacho we'ká oyérale Onorúgame ra'ichálila.

<sup>25</sup> Alué Bernabé, 'lige alué Sauli, 'ma nachutasa alué enomí alé Rusaleni, 'lige

bayérole alué Juani napu Marko anilime nílechigó, 'lige ku sébale alé Antiokía anilichi.

## 13

*Jena ruwimela Onorúgame Alawala nóchili 'yáligo oká rió*

<sup>1</sup> Alé we'ká riógichi Antiokía anilichi mochile we'ká ralámuli alué Esukristo oyérame. 'Lige jaré alué Esukristo oyérame ruwime nile napu anele Onorúgame. 'Lige uché jaréchigo rió mochile Onorúgame ra'ichálila benírame. Bilé alué Bernabé anilime nile, 'lige uché bilé Simoni napu Chókame anélime nile, 'lige uché bilé Lusio, 'lige uché bilé Manaeni, 'lige uché bilé Sauli. Alué Lusio alé Sirene ochérigame nile. 'Lige alué Manaeni napu'lige 'ya bijí u'taka, Erote gompaniérora nile, alué Erote napu a'kinánaka wa'lula níle. <sup>2</sup> 'Lige bilé rawé ayuna mochile alué ralámuli, 'lige a'walí tania alué Wa'lula Onorúgame. 'Lige a'walí ta jaga alué ralámuli, akele Onorúgame Alawala ra'ichachi. 'Lige anile ye ra'ichili:

—Neka najki napurigá julámala 'emi alué Bernabé 'lige alué Sauli si alé uché bilena napurigá beníramala ralámuli alé mochígame ne nila ra'ichali —anile alué ra'ichili.

<sup>3</sup> 'Lige alué ra'ichili akisá alué ralámuli, aminabi ayúnale alué ralámuli 'lige a'walí tale. 'Lige mo'chí nochale alué oká rió napurigá 'we a'lá sébali nochámala alué nóchali, 'lige júlale alué oká rió alé 'mimi.

*Jena ruwimela Bernabé 'lige Sauli ruwíligo Onorúgame ra'ichálila alé Chipre*

<sup>4</sup> 'Lige Onorúgame Alawala júlale alué oká rió alé Selusia anilichi we'ká riógichi alé wa'lú ba'wichí suweke. 'Lige alé sebase alé 'mi uché bilena simíbale alué oká rió. Bárkochi simíbale. 'Lige alé napu sébale alué oká rió, Chipre anilichi nile alé napu ilile wa'lú gawí wa'lú ba'wichí nasipa. 'We riógame nile alé abiena. We'kaná we'ká riógichi nile alé rabó. <sup>5</sup> 'Lige sébale alué oká rió alé bilena we'ká riógichi Salamina anilichi. 'Lige alé sebase, simíbale alué oká rió alé u'tá re'obachi «sinagoga» anilime. 'Lige we'kaná u'kuchí re'obachi e'yénale alué rió alemi. 'Lige alué oká rió alemi bilena u'tá re'obachi sebase, 'lige benírale Onorúgame ra'ichálila. 'Lige alué rió Juani napu Marko anilime nile, abiénachigó eyénale alué oká rió 'yuga alemi, nejkúriga eyénale alemi. <sup>6</sup> 'Lige we'kaná we'ká riógichi e'yénale, arigá sébale alé Papo anilichi we'ká riógichi. 'Lige alé natépale bilé rió jurío napu sujkurúgame nile. Oká rewégame nile alué rió, Bar-Esusi anilime nile bilé rewalá, 'lige Elímasi anilime nile uché bilé rewalá.\* 'Lige 'we 'yégame nile,

\* 13:6 Bar-Esusi aniáká Esusi inolá aniame nile. Elímasi aniáká pe sujkurúgame aniame nile.

Onorúgame ra'ichálila nareme kórile alué rió. <sup>7</sup> Lige alué wa'lula Chipre nulame pe sujukurúgame gompaniérola nile. Lige alué rió wa'lula Serjio Páulo anilime nile 'lige 'we rejchirúgame nile ra'íchaga, 'we a'lá 'nátaga gateme nile ra'íchali. Lige alué rió wa'lula bayele alué Bernabé 'lige Sauli si napurigá smela alé napu ajtile alué rió wa'lula napurigá ruwimela alué ra'íchili Onorúgame ra'ichálila alé sébaga alué oká rió. <sup>8</sup> Lige alué rió sujukurúgame 'ma sairale alué oká rió. Lige tabilé najkile napurigá alué wa'lula bijchígamala Onorúgame nila ra'íchali. <sup>9</sup> Lige alué rió Sauli anilime rió oká rewégame nile, 'lige uché bilela rewalá Páulo anilime nile. Lige Onorúgame Alawala 'we semáriga gu'irile alué Sauli. Lige alué Sauli o'wé e'nele alué rió sujukurúgame. <sup>10</sup> Lige anele o'wé e'negá iligá alué Sauli alué rió sujukurúgame:

—Mueka pe Remónisi inolá júke'é. Pe ralámuli 'yégiga oyame rió ju mué. 'We inílga eyéname rió ju mué. Pe sayégame ju mueka suwábaga a'lala. Pe nasabua ajtime ju mué Onorúgame nejílala 'nátili. ¿Chonigá tabilé a'kabámana rekame júpaché mué alué bowé Onorúgame nila? <sup>11</sup> Jípeko Onorúgamete gastigáriwa mué. Jípeko 'ma tabilé ma'chílime gainámala mué napusi Onorúgame najki.

Lige alué rió yati tabilé ma'chílime gayénale anésiga. Alué níriga ka rukó niraga nile. Lige tabilé ma'chílime gainasa alué rió, 'lige 'yale bilé ralámuli sekate nochagá napurigá o'tomela alé 'minami sekachí cha'pigá. <sup>12</sup> Lige alué wa'lula lakime etesa alué rió tabilé ma'chílime gayénichi, 'lige 'we a'lá semáriga bijchígale alué ra'íchali napu ruwilige alué Páulo alé iligá. 'We a'lá nírál ilile alué rió wa'lula alué Páulo ra'íchachi.

*Jena ruwimela simíbaligo alué ralámuli uché bilena*

<sup>13</sup> Lige alé Pápochi bárkochi jímale alué rió Páulo (Sauli) 'lige alué gompaniérola si, 'lige bajonile alé na'lebo 'nálige uché bilena Perge anilichi we'ká riógichi alé Pampilia anilime ejirochi. Lige alué rió Juani pe alé Pérgechi ro'ile alué Páulo 'yuga enegé, pe ku guwana simile, ku alé Rusaleni anilichi sébale alué rió. <sup>14</sup> Lige alué ralámuli simíbale alé 'mi uché bilena Antiokía rewégichi we'ká riógichi. Lige Pisilia ejiro nile alé. Lige alé sebasa, bilé rawé sawalachi resíbulichi nile, simíbale alué oká rió alé 'mi u'tá re'obachi «sinagoga» anilime. Lige alé re'obachi sebasa, alé pachá mo'ile alué oká rió. <sup>15</sup> Lige alé pachá bilé rió ra'íchale alué osilí napu alué Moisesi osálige 'ya bajchá rawé. Abiénachigó ra'íchale alué osilí napu osálige 'ya rawé alué ralámuli napu ruwime nilige napu anele Onorúgame. Lige alué

ralámuli re'obachi nulame bayele alué Páulo napurigá ra'ichámala alé re'obachi. Lige anele:

—'Emi ralámuli israelita napurigá ramué, nerúsaká bilé ra'íchali napurigá oiláriwa ralámuli napu ekí jena mochí, anibóaguru jipe.

<sup>16</sup> Lige o'weti ilísale alué Páulo 'lige sekate anele napurigá kilí mochímala alué ralámuli. Lige anele:

—'La gepusi 'emi ralámuli israelita napurigá ne, 'lige abiénachigó 'emi ralámuli tabilé israelita napu ekí 'la 'we a'lá nírame ju Onorúgame. <sup>17</sup> Alué Onorúgame napu ramué ralámuli israelita 'we 'la nírál, alueka 'we 'yasi 'we gu'irile alué ralámuli israelita napurigá 'la we'ká o'chéramala napu 'lige biji Ejipto mochiga pe sígame níriga. Lige a'kinana Onorúgame bo'né a'walílate buyánale alué ralámuli israelita alé Ejipto mochígichi. <sup>18</sup> Lige alué ralámuli israelita oká líá bamí mochile alé jami wakígachi napu tabilé 'wesi ralámuli ejperele. Lige 'we i'nílime nile alué ralámuli israelita alé jami mochiga, nobi Onorúgame abirigáchigo 'la anáchale ko. <sup>19</sup> Lige Onorúgame gu'irile napurigá 'la neyúrimala alué ralámuli israelita alué uché jaré e'sena ralámuli Kanani mochígame 'yuga nakoa. Lige alué ralámuli israelita 'ma alué gawí niga ejtebile Kanani nerúgame. Alué ralámuli Kanani mochígame we'kaná chojkégame ra'íchame nile, gicháomana chojkégame ra'íchame nile alué ralámuli alé Kanani mochígame. Lige alé ejperele alué ralámuli israelita napurigá 'la a'boi gawila níriga. <sup>20</sup> Bajchaka Ejipto mochile naó sientó bamí, 'lige naosa makué bamí mochile alé wakígachi, 'lige makué bamí nokale nakoa Kanani anilichi. Lige Onorúgame ajchale bilé wa'lula selígame ra'íchali gateme, 'lige mukusáká chéchigo bilé ajcháliru. Lige a'kinana we'ká bamí kachi, alué Samueli nachule alué selígame asibálime. <sup>21</sup> Lige alué ralámuli alé mochígame Onorúgame tánele napurigá ajchámala bilé rió abé wa'lula bochígimi gawichí nulame alé Israeli. Lige Onorúgameka alué Sauli anilime rió ajchale napurigá wa'lula nímala napu alué Siso inolá nile. Alué Benjamini rijimale nile alué Siso, alué 'we 'ya ajtígame rió. Lige alué Sauli oká líá bamile alé wa'lula asagá. <sup>22</sup> Lige alésíko alué bo'né Onorúgame bujele nóchili alué Sauli. Lige bo'né Onorúgame uchéchigo bilé wa'lula ajchale napu Rabí anilime nile. Lige alué bo'né Onorúgame ruyele alué ralámuli alarigá ko alué rió Rabí. Lige anile Onorúgame: «Isaí inolá ju alué Rabí anilime. Lige alué Rabí 'la bí'lepi 'nátame ju ne'chí 'yuga. Lige 'la sébali olámala alué rió napurigá nulémala ne bo'né», anile Onorúgame. <sup>23</sup> Bilé alué

Rabí rijimala nujubá ochérigame Esusi nile. Onorúgame júlale napurigá ralámuli israelita a'kabámána jawámala. 'La bijchiá nile napurigá anilige Onorúgame 'ya. <sup>24</sup> 'Lige pe bajchabé abé 'yabé bijí ta'chó nóchachi alué Esusi, alué rió Juani anele suwábaga alué ralámuli Israeli mochígame: «A'rewa alué chátiri 'nátali, 'lige 'la rewarárigame niwa alé ba'wichí bochígimi bokuíka 'nalina 'emi ralámuli napurigá alué uché jaré ralámuli 'la machimela 'emi ralámuli Onorúgame oyérame ko.» <sup>25</sup> 'Lige napu'lige amulí mukíá alué Juani, anile alué Juani: «'Emi ralámuli buwewa bilé wa'lula napu Onorúgame julámioríle. Neka tabilé alué ju, neka pe se'nú ju. Alué napu 'emi buwé, alueka 'ma amulí seba, pe'wé pe'kabi rawé kachi 'ma sebámala alué wa'lula. Alueka 'we najtékame nímala. Neka tabilé alarigá najtékame ju, neka pe apiépiri rió kame.»

<sup>26</sup> › 'Emi ralámuli jurío Abraámi rijimala, 'lige 'emi ralámuli tabilé israelita, 'emi napu 'we a'lá nirame ju Onorúgame, suwábaga 'emi 'we a'lá gepusi ye ra'íchili rejcholi. Ye rejchólíka ju napurigá buyásiwa resítiri bowechí. Suwábaga 'emi nílá ju ye rejcholi. <sup>27</sup> Alué ralámuli napu alé Rusaleni epperégame nile, 'lige suwábaga alué e'wélalachigó, tabilé námale alué osilí alué napu osálige alué 'ya mochígame rió napu ruwime nílige napu anele Onorúgame. Alé osilíchi 'we 'la ruwime nile churigá nímala alué Esusi. 'Lige nabí rawé sawalachi resíbulichí 'we akeme nile alué ra'íchali alué ralámuli. 'Lige abirigáchigo tabiléchigo námale ko. 'Lige alué ralámuli Rusaleni mochígame anile: «Me'libóleké alué Esusi.» 'Lige alarigá 'la sébali olale napurigá osirúgime nile 'ya rawé. <sup>28</sup> 'Lige alué ralámuli alué Rusaleni mochígame, napu'lige cha'písá alué Esusi, tabilé chérikáme nile Esusi napurigá me'liboa. 'Lige alué ralámuli pe alarigá tánale alué wa'lula Pilato napurigá me'liboa. <sup>29</sup> 'Lige 'la alarigá oláliru alué Esusi napurigá osálige alué 'ya mochígame ralámuli, 'lige 'ma me'lisá alé gulusichí ujhagá alué Esusi, 'lige re'kibúli ru alué Esusi 'ma mukúgame, 'lige o'tole 'mi reso chí joka newárigime rekamia alué mukúgame. <sup>30</sup> 'Lige alué bo'né Onorúgame uchéchigo siné ajánale. <sup>31</sup> 'Lige alué ralámuli napu Esusi gompaniérola nílige napu'lige Galiléachi simasa 'mi Rusalénichí si sebasa ta'chó mukuchi, alué ralámulika we'sá etele Esusi a'kinana napu Esusi ku ajánasa. Jípeko alué ralámuli júkuru napu ra'íchali ruigá e'yena ralámuli jurío churigá nílige Esusi 'ya rawé 'lige jipe churigá ka Esusi.

<sup>32</sup> › 'Lige ramué jipe jena mochiru

napurigá rupoa alué ra'íchili semati. Onorúgame bo'né anele alué ralámuli 'ya mochígame ramué rijimala ralámuli gu'irimoríle. <sup>33</sup> Jípeko 'ma a'lá sébali olale. Napu'lige ku ajánisa alué Esusi, 'ma a'lá sébali olale napu anilige 'ya. 'Lige alé bilena apélichí napu uchú alué osilí Onorúgame ra'íchálila, alé uchú jaré osilí wikarame (napu Salmo anilime ju yolí ra'íchaga), 'lige alarigá wikarame ju alué wiká:† «Mueka 'la ne'chí inolá júkuru, jípeko 'ma ajchámala ne mué napurigá wa'lula nímala mué jena wijchimoba bochígimi nulame.» Alarigá anile Onorúgame. <sup>34</sup> Napu'lige mukule Esusi Onorúgame ku ajchale, jípesiko 'ma tabilé siné mukumela alué Esusi. Alué ra'íchali 'ya nerúgame ka alarigá aní:‡ «Ne 'la gu'irimala mué napurigá anele ne alué Rabí anilime rió 'ya bejtégame. 'Lige 'la bijchiá aní ne», anile Onorúgame.» <sup>35</sup> 'Lige alé uché bilena apélichí napu uchú alué osilí alué wikarame, anime ju: «Onorúgame tabilé a'remio orile napurigá bikimela alué rió sa'pala mukusá alué rió napu 'we bi'wígime sulégame ju.» <sup>36</sup> 'Lige alué Rabí nóchale napurigá nulele Onorúgame. 'Lige mukule alué Rabí a'kinana. 'Lige alé reso chí rekáliru gatega alué Rabí rijimálala 'yúriga. 'Lige 'ma bikale alué sa'pala alé bo'igá. <sup>37</sup> Alué Esúsika, alué napu Onorúgame ku ajánilige, alueka tabilé bikale. <sup>38-39</sup> Neka najkí napurigá machimela 'emi, pe Esusi 'la bi'weme ju resítiri 'nátali ramué na'tálila. Rekó 'la sébali olálige napu nulálige Moisesi tabilé siné naréuturu bilé e'kali ramué. Pe bi'lepi Esúsicho júkuru 'la e'kame ramué. Alué Esusi gite 'la bi'wígá mochírukuru ramué jipe. <sup>40</sup> 'La 'we a'lá 'nátaga 'emi ralámuli napurigá tabilé che ikiboa napurigá anilige alué ralámuli napu ruwime nílige napu anele Onorúgame. Regá anile:

<sup>41</sup> 'Emi ralámuli, napu'lige etesa napu nocha ne,

tané ikíá mo'bawa,  
napugiti rekó etee 'emi ne semá 'sichí,  
tabilé bijchígamala 'emi,  
rekó jaré 'we semáriga ma'chígime ruwichi.  
Pe ikipi ruwile alué rió Páulo.

<sup>42</sup> 'Lige alué Páulo 'lige alué Bernabé alé u'tá jurío re'obálachi buyachi, alué ralámuli alé mochígame uché a'kinana sawalachi resíbulichí uché bayéliru alué rió Páulo 'lige alué Bernabé. <sup>43</sup> 'Lige alué rió Páulo 'lige alué Bernabé, alé re'obachi buyásiga simíbale kumi. 'Lige alemi napu e'yénilige alué oká rió 'lige napuika e'yénale alué oká rió 'yuga we'ká ralámuli jurío 'lige abiénachigó alué ralámuli tabilé jurío napu oyérame nile alué jurío na'tálila. 'Lige alué

† 13:33 E'nesi Salmos 2:7. ‡ 13:34 E'nesi Isaías 55:3.

Páulo 'lige alué Bernabé rejcholi ruyésiga e'yénale alué ralámuli suwábaga napu ekí si e'yénale alué oká rió 'yuga napurigá tabilé guwana rujsúmala Onorúgame oyeria.

<sup>44</sup> 'Lige a'kinana uché bilé tarali sawalachi resíbulichi, we'ká ralámuli napuíle alé utá jurío re'obálachi. Amuli suwábaga ralámuli napu ekí ejperélige alé we'ká riógichi napuíle akimea Onorúgame ra'ichálila alé re'obachi. <sup>45</sup> 'Lige alué ralámuli jurío tabilé oyérame Esukristo napu'lige etesa alué we'ká ralámuli napuíka mochígame alé re'obachi, tabilé ganíliga rejpile, 'we gunaruga etele alué oká rió, 'lige saega ra'ichale napu anílige Páulo. <sup>46</sup> 'Lige alué Páulo 'lige alué Bernabé, 'we a'wágame ra'ichale tabilé chéligá, tabilé majaga. 'Lige anile alué Páulo:

—Onorúgameka najkí napurigá 'emi jurío bajchá akímela ye Onorúgame ra'ichálila. 'Lige 'émika nasibua alué ra'ichali napu Onorúgame nejí. 'Lige pe 'emi a'boi ojchígíla ju jípeko. 'Émika tabilé mochínilinti káréke'é alé 'pa rewagachi Onorúgame 'yuga senibí. Jípeko alekeri tabilé ruyewa ramué 'emi alué ye rejcholi. Jípeko simawa ra'ichali ruyewa alué ralámuli tabilé jurío. <sup>47</sup> Onorúgame alarigá nulele ramué 'ya bajchá rawé. Onorúgame alarigá anile:

Neka nuléguru mué  
napurigá ruyémala mué ne ra'ichálila alué  
ralámuli tabilé jurío  
napurigá buyásimala alé 'we resítiri  
bowechi.

Mejká simela mué bochígimi alé gawichí  
ruyemia Onorúgame ra'ichálila alué ralámuli  
alé mochígame.

<sup>48</sup> 'Lige napu'lige akisá alué ralámuli tabilé jurío napu alé mochile akea, 'we ra'sálale. 'Lige anile:

—We semati ju Onorúgame ra'ichálila  
—anile alué ralámuli. 'Lige alué ralámuli  
alé mochígame napu bo'né Onorúgame  
wanápulige 'pa rewagachi mochímala  
Onorúgame 'yuga nabí, alueka 'la bijchígale  
Onorúgame ra'ichálila. <sup>49</sup> 'Lige we'ká  
ralámuli akele alé bochígimi riógame. <sup>50</sup> 'Lige  
jaré alué ralámuli jurío tabilé galegá akele  
alé ra'ichali. 'Lige alué ralámuli 'ma  
a'lá ra'ichale jaré umugí 'yuga 'la nirame  
Onorúgame napu 'we nígame nile, 'lige  
jaré rió 'yuga napu 'we nígame nílechigó,  
napurigá saega ra'ichámala alué Páulo olagá  
'lige Bernabé. 'Lige alué suwábaga ralámuli  
cha anele alué Páulo 'lige alué Bernabé, 'ma  
mabúli ru alué oká rió. 'Lige arigá júlale alé  
mejká napurigá ta a'bemi e'yénamala alué  
oká rió alieti ra'ichali ruigá. <sup>51</sup> 'Lige alué  
oká rió ta'chó simiba aká bujale, 'lige aká  
bujasá 'lige sawele alué aká. Yeka ruwime  
nile tabilé bijchígíligo alué ralámuli jurío

Onorúgame ra'ichálila. 'Lige simíbale alué  
oká rió alé we'ká riógichi Ikonio anilichi.  
<sup>52</sup> 'Lige alué ralámuli alué Esukristo oyérame  
alé Antiokíachi 'we ganíliga mochile. 'Lige  
'la bi'lepi 'nátali 'nátame nile Onorúgame  
Alawala 'yuga.

## 14

*Jena ruwimela júmasíligo alué oká rió Iko-  
nia anilichi we'ká riógichi mochiga*

<sup>1</sup> Napu'lige sebasa alué oká rió alé  
we'ká riógichi Ikonio anilichi, simíbale  
alé utá jurío re'obálachi alué Páulo 'lige  
Bernabé. 'Lige alé re'obachi sebasa, ra'ichale  
Onorúgame ra'ichálila. 'Lige alué ralámuli  
alé napu akele alué ra'ichili, alué ralámuli  
jurío 'lige alué ralámuli tabilé jurío abiena,  
'we 'la bijchígale alué ra'ichali. <sup>2</sup> 'Lige alué  
ralámuli jurío, alué napu tabilé bijchígile  
alé Onorúgame ra'ichálila, alueka pe  
sayega ra'ichale alué oká rió olagá. 'Lige  
alé ralámuli jurío chátiri 'nátaga ra'ichale  
alé ralámuli tabilé jurío 'yuga napurigá  
alé ralámulíchigó najísaká ra'ichámala  
alé oká rió olagá. <sup>3</sup> 'Lige alué oká rió  
abalé mochile abéchigo we'ká rawé. 'Lige  
tabilé majaga ra'ichale alué oká rió. 'Lige  
abiena 'we e'karúriga gayénale noká alué  
oká rió napu bi'nélika tabilé gainawa  
e'karú 'siá ta nejkúrisaká Onorúgame.  
Alarigá gu'íriale Onorúgame napurigá 'la  
bijchígimale ralámuli napurigá anílige Páulo  
'lige Bernabé. <sup>4</sup> 'Lige jaré ralámuli alué  
Ikonio ejperégame, alué Páulo 'lige alué  
Bernabé gompaniérola gayénale, 'lige alué  
uché jaré ralámuli pe saíla gayénale alué oká  
rió napu Onorúgame júlale. <sup>5</sup> 'Lige napu ekí  
alé Páulo saíla ralámuli jurío 'lige alué tabilé  
jurío abiénachigó ra'ichale alué e'wélala 'yuga  
napurigá me'limela alué oká rió rejte  
te basibuga. <sup>6</sup> 'Lige alué oká rió machisá  
me'liboli ko alé, 'lige yati júmasele mejká  
alé oká rió. 'Lige alué oká rió alé júmisisa  
'lige sébale alé bilena we'ká riógichi Lистра  
anilichi 'lige simíbale uché bilena we'ká  
riógichi Lerbe anilichi. Alué okaná we'ká  
riógichi ejiro Likonia nerúgame nile. 'Lige  
alé uché jarénami we'ká riógichi a'mulipi  
abiena simíbale alué rió. <sup>7</sup> 'Lige alé abiena  
ruwile alué 'we a'lala ra'ichali.

*Jena ruwimela bile rió sa'wíligo nayua*

<sup>8</sup> Napu'lige alué oká rió alé Lистра  
mochígichi, alé asale bilé rió sujirígame  
ronégame. Tabilé gayéname nile alué rió  
eyena, pe abalieri ochérigame nile alué rió.  
<sup>9</sup> 'Lige alé asale alué Páulo Onorúgame nila  
ra'ichali ruyea alué ralámuli alé mochígame,  
'lige alué rió sujirígame alé asale gepuga.  
'Lige alué Páulo etele alué rió alé ajtígichi.  
'Lige pe etega 'la machile Páulo alué rió  
'we a'lá galegá gepúligo Onorúgame nila

ra'ichali ku sa'wináliga. 'Lige Páulo o'wé e'nele alué rió sujírige. <sup>10</sup> 'Lige anele iwégame ra'ichaga:

—O'weti ilisi bi'neli —anile alué rió Páulo.

'Lige yati ilísiga o'weti o'pochile alué rió lanésiga, 'lige alemi eyénale alué rió.

<sup>11</sup> 'Lige alué ralámuli alué napu eki etele alué rió ronola sa'wisá, e'wele sinale alué ralámuli a'boi ra'ichaga napurigá ra'ichame nílige alué alé ejiro epperégame a'boi ralámuli. Anile alué ralámuli:

—¡Ma e'tegínele alué oká riosi napuyeri ralámuli neraga! —anile alué ralámuli.

'Lige pe riósicho kolale alué oká rió alué Páulo 'lige alué Bernabé.

<sup>12</sup> Bernabeka riosi Seusi (Júpiter) anilime rewá ajchéliu. 'Lige Páuloka riosi Érmesi (Mekurio) anilime rewá ajchéliu. Alieri rewá ajchéliu alué rió Páulo, alueka abéchigo ra'ichame nílige. 'Lige Bernabeka ta'mé ra'ichame nílige. <sup>13</sup> Alé pe'tá suwemi alé we'ká riógichi ilile bilé re'obá Érmesi nila. 'Lige bilé balé nulame nile alé re'obachi. 'Lige alué balé nólale jaré roló napurigá me'liboa alé we'ká riógichi suwemi yochi napurigá kógimala alué Páulo 'lige alué Bernabé riosi kóriká alué oká rió. 'Lige alué sewátiri abiena 'yúriga a'pale alé alué roló 'yúriga. <sup>14</sup> 'Lige alué oká rió machisá largigá oliáo, 'lige pe yati chí'wánale alué a'boi o'páchala. (Yeka anime nile tabilé 'la ko napu alarigá noká alué ralámuli.) 'Lige 'ma chí'wanasa o'pacha, 'lige pe yati jumasiga alé nasípa jábale napu jale we'ká ralámuli. 'Lige alé jaga ra'ichale e'wele sinaka alué oká rió. Sinale:

<sup>15</sup> —¿Chonigá alarigá nokiábaché 'émika? Ramueka pe iligá rió niru napurigá 'emi, tase riosi niru ramueka —anile alué rió alé jaga napu alué ralámuli we'ká jágichi jaga—. Jipe jena jaru ramué napurigá ruyewa 'emi napurigá tabilé alarigá nokimela 'emi. Pe Onorúgame alé rewagachi bejtégame ka, alueka 'la bijchiá Onorúgame júkuru. Alué Onorúgame 'nalina oyérawaguru. Alué Onorúgame alé rewagachi ajtgame newale newale wí gawí, 'lige 'ma wa'lú ba'witiri. Suwábaga napu eki tábiri nerú jipe jena wijchimoba Onorúgame rewagachi ajtgame newalila júkuru ye suwábaga. Bi'lepi re'pá ajtgame Onorúgame newalila júkuru suwábaga tábiri. <sup>16</sup> 'Lige 'yako a'reme nile ye Onorúgame napuchibi nokagá járomala alué ralámuli. <sup>17</sup> Alueka nabí 'we a'lá na'temaka etuá ramué. 'We semáriga u'kírime nile Onorúgame, aminami 'we semáriga rakérime nile alué go'ame napurigá go'poa ramué ralámuli jena wijchimoba mochígame, napurigá

'la ganílga mochiwa ramué ralámuli jena wijchimoba —anile alué oká rió alé jaga.

<sup>18</sup> Rekó anílige tabilé riosi ko, abirigáchigo piesta olámoríle ko alué ralámuli. Tabilé bijchígileké alué oká rió tabilé riosi korichi. Riosi mayéleké a'boika. Alué ralámuli 'we me'lináale alué roló alué oká rió kógimia riosi kóriká. Abirigáchigo tabilé me'áleko alué roló, alué oká rió pecha eláligime.

<sup>19</sup> 'Lige jsile jaré alué ralámuli jurío alé Antiokía epperégame. Abiénachigo jsile alé jaré ralámuli jurío napu Ikonio we'ká riógichi epperégame nile. 'Lige alué ralámuli jurío sayega ra'ichale alé jsisá. Alué suwábaga ralámuli 'ma bi'lénapi nilele, 'ma gompaniérotele. 'Ma tabilé 'wesi gompaniérole alué oká rió. 'Lige alué we'ká ralámuli rejete basibule alué Páulo. 'Lige basibuga 'ma rekábale na'tagega. 'Ma mukúgame mayele. 'Lige o'tole alé 'mi we'ká riógichi suweke alé pamia, pe banagá o'tole wijchí rekagá. <sup>20</sup> 'Lige alé pasa alué Páulo, 'ma ku simíbale alué we'ká ralámuli. 'Liko alé sébale alué ralámuli Esukristo oyérame. 'Lige alué Páulo 'ma ku asísile alé na'tagega bo'ísá. 'Lige asísisa ku alé we'ká riógichi nasipa simile. 'Lige melénala simíbale Páulo 'lige Bernabé alé uché bilena we'ká riógichi Berbe anilichi.

<sup>21</sup> 'Lige alé we'ká riógichi Berbe sebase alué oká rió 'lige abiena ruyele Onorúgame ra'ichálila alué ralámuli alé mochígame. 'Lige alué alé mochígame ralámuli we'ká 'la 'we semáriga bijchígale Onorúgame ra'ichálila. 'Lige 'ma Onorúgame oyérame gayénale alué ralámuli alé mochígame. 'Lige alésiko ku ro'ile alué oká rió. 'Lige bajchá sébale alé we'ká riógichi Listra anilichi, 'lige alé we'ká riógichi Ikonio, 'lige kúchigo alé we'ká riógichi Antiokía anilichi. <sup>22</sup> Apílipi we'ká riógichi napu sébame nílige, oilárimé nile alué Esukristo oyérame ralámuli, 'lige rejcholi ruyeme nile napurigá tabilé a'rémala Onorúgame nila ra'ichali oyeria. 'Lige abiena anile alué oká rió:

—'We resí nílga lisensia 'yalime ju ramué napurigá Onorúgamete nulémala ramué.

<sup>23</sup> 'Lige alué Páulo 'lige Bernabé e'wélala mochíle pe u'kabi rió alé bakiná we'ká riógichi napurigá alué e'wélala ralámuli gu'irime nímala Esukristo oyérame ralámuli. 'Lige ayúnale alué rió napu 'lige alué e'wélala mochíbasa alué alé a'pili we'ká riógichi. 'Lige tánale Onorúgame napurigá repúmala alué ralámuli napu 'la bijchígime nile alué Esukristo ra'ichálila.

*Jena ruwimela alué oká rió ku sébaligo alé napu a'boi epperégame nílige*

\* **14:12** Alué riosi Érmesika ra'ichali o'tóime nile alué uché jaré riosi, anime nile alué ralámuli alé mochígame. 'Lige alué Seusi wa'lula nile suwábaga riosi nuleme nile.

<sup>24</sup> 'Lige alué oká ríó alé bakiná we'ká ríogichi simárasa, simárele alé bilena ejiro Pisilia anilichi. 'Lige sébale alé uché bilena ejiro Pampilia anilichi. <sup>25</sup> 'Lige alé bilena we'ká ríogichi sébale alué oká ríó napu Perge anilichi nile. 'Lige alé sebasa, ruyele alué ralámuli Onorúgame nila ra'íchali. 'Lige alé e'yéniga, simúbale alé alué we'ká ríogichi Atalia anilichi. <sup>26</sup> 'Lige alé we'ká ríogichi pe wa'lú ba'wíchi suweke nile. 'Lige alé e'yéniga bárkochi jímale alué oká ríó, 'lige alué barko alé 'mi uché bilena Antiokía simime nile. 'Lige alé o'wísigime nile alué oká ríó 'ya síné. Alé nile napu alué Esukristo oyérame Onorúgame tánele napurigá Onorúgame 'we a'lá semáriga gu'írimala alué oká ríó alé 'mimi e'yénachi alué Esukristo ra'íchálila beníriga. 'Lige 'ma sébali olale alué oká ríó napurigá nulélirige. <sup>27</sup> 'Lige alé sebasa alué oká ríó, nulale bayéniga suwábaga alué ralámuli alué Esukristo oyérame napurigá akimela alué ríó ra'íchachi napurigá Onorúgame 'we a'lá semáriga gu'íriliga alué oká ríó. 'Lige alué oká ríó ra'íchale alé napuísá alué ralámuli. Anile:

—Onorúgame 'we semáriga nejkuro napurigá 'la 'we semáriga bijchígimala alué ralámuli tabilé jurío Onorúgame ra'íchálila, napurigá Onorúgame oyérame nímala alué ralámuli napurigá ramué jurío.

<sup>28</sup> 'Lige Páulo 'lige Bernabé we'ká rawé mochile alé alué Esukristo oyérame ralámuli 'yuga.

## 15

*Jena ruwimela nerúligo bilé wa'lú napúkime alé Rusaleni*

<sup>1</sup> 'Lige jaré ralámuli jsile alé 'naka Juréaka simúbagame. Sébale alé we'ká ríogichi Antiokía anilichi, napu mochile alué ralámuli Páulo 'lige Bernabé. 'Lige alé sebasa, benírile alué ralámuli Esukristo oyérame. Anele alué ralámuli alé mochígame:

—'Emi ralámuli rijpunáwaká pe'tá alué guwala alué isílala. 'Lige 'emi ta rijpunásaká alué isílala pe'tá guwala, tabilé moínámala 'emi rewagachi alé napu Onorúgame ajti. Aka larigá aniché alué rejcholi napu ruwile alué ríó 'ya ajtígame Moisesi anilime —anile alué ralámuli alé Jurea ejperégame ralámuli alé sigá.

<sup>2</sup> 'Lige Páulo 'lige Bernabé 'we iwégame ra'íchale najisáká alué ralámuli 'yuga. 'Lige ta 'wesi gayénale gatea alué ra'íchali rekó 'we bochí anié. 'Lige alué ralámuli Esukristo oyérame alé Antiokía mochígame júlale alé 'pami Rusaleni anilichi we'ká ríogichi napurigá gatémala alué ra'íchili alé simúbaga. Juláiru alué Páulo 'lige alué Bernabé. 'Lige

uché jaré ralámuli 'yúriga juláiru alé napurigá ra'íchámala 'yuga alué makué oká ríó napu 'yáiru Esúsíte nóchali 'lige alué uché jaré e'wélala 'yúgachigó alé mochígame, alué Esukristo oyérame nulame.

<sup>3</sup> 'Lige alué ralámuli yati simúbale julásiga, 'lige simárale alué ralámuli okaná ejiro. Bilena ejiro Benise anilichi, 'lige uché bilena ejiro Samaria anilichi. 'Lige alemi ejiro sebasa, ruyele alué ralámuli Esukristo oyérame 'ma 'la Onorúgame oyérame gayénaligo we'ká ralámuli tabilé jurío. 'Lige alué ralámuli Esukristo oyérame akigá, 'we ra'sálagá mochíbale.

<sup>4</sup> 'Lige alé Rusaleni sebasa alué Páulo 'lige alué Bernabé alué uché jaré ralámuli 'yuga, alué ralámuli alé Rusaleni mochígame 'we ra'sálagá etele alué ralámuli alé sisao. Alé mochile buigá alué makué oká ríó napu 'yáiru nóchali Esukristote 'lige alué uché jaré e'wélalachigó, 'lige alué uché jaré Esukristo oyéramechigó. 'Lige alué Páulo 'lige Bernabé ruwile churigá 'la semáriga gu'íriligo Onorúgame alué oká ríó alemi ichúrimi e'yénachi napurigá 'la Onorúgame oyéramala alué ralámuli tabilé jurío. <sup>5</sup> 'Lige alué ralámuli Esukristo oyérame napu bariseo nílige, anile bijí ra'ícha jágichi alué oká ríó alé:

—Nulewa alué ralámuli tabilé jurío napurigá rijpunámala pe'tá isílala guwálala, nulewa napurigá 'la sébali olámala napurigá nulá Moisesi —anile alué ralámuli alé jaga.

<sup>6</sup> 'Lige alué makué oká ríó napu nóchali 'yárilige Esúsíte 'lige alué uché jaré e'wélala napuile alé napu mochile alué ralámuli Páulo 'lige alué Bernabé, alué suwábaga napuile alué ra'íchili gatemia. <sup>7</sup> 'Lige 'ma we'ká ralámuli ra'íchasa 'lige o'weti ílisale alué ríó Pegro, 'lige anile:

—'Emi ralámuli jurío napurigá ne, 'emi ralámuli 'la machí napurigá Onorúgame 'yáligo ne'chí 'ya bajchá rawé alué ye nóchili napurigá ruyémala ne Onorúgame ra'íchálila alué ralámuli tabilé jurío. 'Lige we'ká ralámuli 'we 'la bijchígile ye ra'íchili napu ne ruyele, alué ralámuli tabilé jurío.

<sup>8</sup> Onorúgame 'we a'lá sébali machí suwábaga ralámuli churigá 'nata. 'Lige 'we a'lá sébali machile alué ralámuli tabilé jurío 'ma bijchígiligo alué Esukristo ra'íchálila. Alekeri Onorúgame 'yale bo'né Alawala alué ralámuli napurigá 'yáiru ramuéchigó.

<sup>9</sup> Onorúgameka suwábaga pe alarigá etuá bi'lepi niraga. 'Lige alué bo'né Onorúgame bi'wele alué ralámuli alawala, napugiti 'we semáriga bijchígilime alué Esukristo na'tálila rejcholi. <sup>10</sup> ¿Chonigá alanokiábaché 'emi Onorúgame tabilé niraga? Alué isílala rijpunálime nulalika napurigá bilé mo'sogola 'we bejtégame tabilé anachálime, alarigá júkuru alué isílala rijpunali ka. Alué

ralámuli ramué rijimála 'ya mochígame tabilé anáchale alué alarigá nulalí. <sup>11</sup> Ramué 'we semáriga sebawa alé rewagachi alé napu ajtí Onorúgame napugiti Esukristo 'we semáriga galéligime ramué, alekeri 'la sebawa ramué alé rewagachi. 'Lige mukule alué Esukristo, 'nátaga mukule napurigá ramué nila gastigo bujémala. 'Lige ramué jipe 'la machiáa alekeri 'la moinawa alé rewagachi ramué. Pecha alué nulalite rijpunálime alué pe'tá isila, pecha alekete gite moinawa alé 'pa rewagachi. 'Lige alué ralámuli tabilé jurío pe a'chigóriga moinámala alé rewagachi —anile alué Pegro.

<sup>12</sup> 'Lige alué uché jaré ralámuli 'ma kilí mochíbale alué ra'íchili gepuga. 'Lige alué rió Páulo 'lige alué Bernabé, uchéchigo siné chojkile ra'íchili ruyá. Anele alué ralámuli:

—Alué Onorúgame rewagachi ajtígame, 'we semáriga gu'iri ramué ralámuli alé 'mimi ichúrimi e'yénilichi ramué napurigá ramué 'we semáriga gainawa e'karúriga noká napu tabilé 'wesi rió gayéname ju jena wijchimoa mochígame. Alué e'karúriga nokiachi 'we semáriga nejkuro Onorúgame. 'Lige ramué e'karúriga nokiae alé napu epperé alué ralámuli tabilé jurío.

<sup>13</sup> 'Lige Páulo 'lige Bernabé suwénasa ra'icha alué rió Santiago (Akobo) chojkile ra'icha. Anile alué rió:

—'Emi ralámuli o'maka Esukristo oyérame 'we alá gepuwa ye ra'íchili. <sup>14</sup> Alué ye rió Simoni (Pegro) 'we alá sébali ruwíguru napurigá Onorúgame gu'irile alué ralámuli tabilé jurío. 'Lige alué bo'né Onorúgame wanápale jaré alué ralámuli napurigá bo'né 'kúchila niraga mochímala. <sup>15</sup> Alué 'ya mochígame rió napu ruwime nile napu anele Onorúgame osale ye ra'íchili. Napurigá anile alué bo'né Onorúgame, alarigá osale alué ralámuli. 'Lige anime ju alué osilí:

<sup>16</sup> Ku galirámala ne alué galí Rabí galila, ku gatémala ne napu gajúlige galí ku o'inámala ne alué galí,

<sup>17</sup> napurigá suwábaga alué ralámuli napu tabilé jurío ju,

napu ne wanapa, ne'chí 'yámala.

Alarigá aní Onorúgame

napu suwábaga tábiri newame ju

<sup>18</sup> napu nabí machime ju suwábaga ye 'nátili.\*

<sup>19</sup> 'Lige aminabi anile alué Santiago anilime rió:

—Neka regá 'nata nili bo'neko, 'ma tabilé umériga nulewa alué ralámuli tabilé jurío napurigá 'la sébali olámala alué 'nátili 'we nóchali kame, alué ralámuli napu 'ma 'la

Onorúgame 'kúchila ju jipe. <sup>20</sup> Abé 'la júkuru bilé apeli osigá náolia alué rejcholi ruwigá napurigá ta go'mela alué sa'pá napu kógilime nile alué tábiri rejete newárigime napu eteme nile Onorúgame neraga. 'Lige aminami alué rió mukí 'yúgame, tabilé se'nú mukí 'yuga gojchimeli ju. 'Lige alué mukí tabilé se'nú rió 'yuga gojchimeli ju, pe bo'né gunala 'yuga gojchimeli ju. 'Lige aminami tabilé go'mela alué ajágame sa'pala tabilé ma'chí pásirigime elalá. 'Lige aminami tabilé go'mela alué elaláchigó. <sup>21</sup> Alarigá ruwile Moisesi 'we 'ya, 'lige we'ká ralámuli tabilé jurío 'ma akele alué ra'íchali napugiti we'kaná we'ká riógichi nerú alué u'kuchí jurío re'obala «sinagoga» anilime napu ra'ichame ju alué Moisesi osilila nabí sawalachi resibulichi. Tabilé najkiá ramueka napurigá saega mochiwa alué ra'ichálila 'yuga.

<sup>22</sup> 'Lige alué makué oká rió napu Esukristote 'yárilige nóchali, 'lige alué uché jaré e'wélala selígime, 'lige suwábaga alué uché jaré Esukristo oyérame, 'ma napuíka ra'ichale 'la ko julalía jaré rió napurigá simámala alué oká rió 'yuga, alué Páulo 'lige Bernabé si, napurigá o'tomela alué apeli alé Antiokía anilichi we'ká riógichi. <sup>23</sup> Bilé alué rió julárigame Jurasi anilime nile. Alué uché bilé Silasi anilime nile. Alué Jurasi oká rewégame nile, Barsabasi anilime nilechigó. Alué oká rió 'we 'la nirálime nile alué we'ká ralámulite. Alué apeli osirúgime regá anime nile:

«Ramué makué oká rió napu nóchili 'yárilige Esúsiste, 'lige aminami ramué ralámuli e'wélala jena Rusaleni mochígame, suwábaga ramué 'we repóralia 'emi Esukristo oyérame tabilé jurío napu we'ká riógichi Antiokía mochígame ralámuli ju, 'lige napu ejiro Siria mochígame ralámuli ju abiénachigó, 'lige 'emi ralámuli alé Silisia mochígame 'we repóralia ramuéchigó. <sup>24</sup> Ramué akirú bilé ra'íchili jena mochiga. Jena Rusaleni mochígame rió simíbale alé 'mi napu epperé 'emi ralámuli 'lige alué rió 'we se'wináriga ra'ichale 'emi ralámuli 'yuga alé sebasa. 'Emi alué ra'ichali akisá, tabilé ganíliga akele, 'we nejkumele alué ra'ichali 'emi 'yuga. Ramueka pecha aseme julalía alué ralámuli alé 'mi 'emi epperéachi. <sup>25</sup> Alekeri bi'lepi na'tálituru ramué oká rió julamia alemi oká rió napubúriga bilé Bernabé anilime 'lige bilé Páulo napu 'we alá ralámuli ju ramué 'yuga. <sup>26</sup> Amulí u'suwile i'sínimi alué Wa'lula Esukristo ra'ichálila ruigá e'yénachi Páulo 'lige Bernabé. <sup>27</sup> 'Lige ramué juláruturu alué Jurasi 'lige alué Silasi napurigá abé 'la ruyémala 'emi 'la anime

\* 15:18 Yeka ruwime ju Onorúgame gatémio alué ralámuli jurío 'yuga napurigá Onorúgame ra'ichálila sebámala napu mochí alué ralámuli tabilé jurío.

ko alué ra'íchali apélichí osirúgime napurigá tabilé nejkumega e'yénamala alué uché jaré rió alemi. <sup>28</sup> 'Lige Onorúgame Alawala gu'iri ramué ralámuli jena mochígame napurigá ramué a'lá na'tawa napurigá tabilé náolawa bilé nátili nejkumeme. Pe náolawa 'nalina napurigá 'la sébali olámala 'emi bilé nátili abé resí lálime. <sup>29</sup> Aréwagó alué sa'pá go'yá alué napu kógilime ju alué tábiri rejete newárigime. 'Lige alué elá tabilé go'póachigó. 'Lige alué sa'pá alué ajágame sa'pala me'lrúgame alué tabilé ma'chí pátigime elalá, alué sa'pá tabilé go'póachigó. 'Lige aminami tabilé se'nú mukí 'yuga gochiboa, pe bo'né upila si. 'Lige alué mukí tabilé se'nú rió 'yuga gochimela, pe bo'né gunala 'yuga gochimela. 'Lige alarigá nokisáká 'emi liko 'wé a'lá nímala. Pe ekí júpá ye ra'íchili, cheliérabá, ariósibá 'emi ralámuli.»

<sup>30</sup> 'Lige alué ralámuli alé Rusaleni mochígame júlale alué naó rió alé Antiokía anilichí. 'Lige alué rió sebasa alé Antiokía, 'lige bayele alué ralámuli alé Antiokía mochígame ralámuli alué Esukristo oyérame. 'Lige we'ká napubusa alué ralámuli alé Antiokía, 'lige 'yale alué apeli alué ralámuli Antiokía mochígame. <sup>31</sup> 'Lige alué ralámuli alué napu narele alué apeli rejcholi ra'íchame, 'lige naresa yati ra'íchale alué osilí. 'Lige 'ma ra'íchasa alué osilí, 'we ra'sálagá mochime nile alué ralámuli. <sup>32</sup> 'Lige alué rió Jurasi 'lige alué Silasi we'ká ra'íchale alé jaga napu Onorúgame 'yálige alué ra'íchali. Oilárule alué ralámuli alé Antiokía mochígame Esukristo oyérame napurigá aminabi nokísimala Esukristo oyerá napurigá tabilé we'kuámala alué nátili. <sup>33</sup> 'Lige mochile alué ralámuli alé we'kabé rawé. 'Lige ku julálriru alé Rusaleni alué Jurasi 'lige Silasi wa'lú cheliera 'yániliga alé Rusaleni mochígame ralámuli Onorúgame oyérame. <sup>34</sup> Nobi Silásika abajá rejpinaleké' alé Antiokiachi. <sup>35</sup> 'Lige Páulo 'lige Bernabé abalé Antiokía ejtebíchigó. Alué oká rió uchéchigo jaré si Onorúgame ra'íchálila beniria mochile alé.

*Jena ruwimela Páulo 'lige Bernabé uchéchigo simíbaligo, 'ma osá nile simiba*

<sup>36</sup> 'Lige pe abé a'kinana, 'lige anele Páulo alué Bernabé:

—Uchéchigo siné simáwa'é alué ralámuli Esukristo oyérame e'newa chonoká mochíga —anele alué rió—. Simáwa'é e'newa alué ralámuli alué napu ramué ruyélige alué Esukristo ra'íchálila 'ya alemi we'kaná we'ká riógichi —anele alué Páulo.

<sup>37</sup> 'Lige alué Bernabeka bayérole alué Juani napu oká rewégame nile, Marko anilime nílechigó, napurigá si simélachigó napurigá 'ya. <sup>38</sup> 'Lige alué rió Páuloka

tabilé najkile napurigá si simela uchéchigo napugiti 'ya bajchá rawé tabilé sébali oláligime alué rió si simisá. Pe alé Pampilia si ku ro'ile. Pecha si simíliga nejkúrimia Onorúgame ra'íchálila benirilichí alué ralámuli. <sup>39</sup> 'Lige alué oká ralámuli 'we bochí anile alué alieti ra'íchaga, Páulo 'lige Bernabé. 'Lige arigá tabilé napuíka simíbale alué oká ralámuli anigá. Pe i'wana simíbale. 'Lige alué rió Bernabé alué Marko 'yuga simile bilena bárkochi. 'Lige alué barko alé Chipre anilime gawí ilígachi alé ba'wichí nasipa, alé simime nile alué barko. <sup>40</sup> 'Lige alué Páuloka uché bilé rió bayérole napurigá si simela. Alué Silasi anilime rió nile. Ta'chó simíbachi alué oká rió, alué ralámuli alé mochígame tánele Onorúgame napurigá 'we a'lá semáriga repúmale alué oká rió 'mimi boichí e'yénigichi. <sup>41</sup> Alé Antiokía anilichí we'ká riógichi alé chojkile simiba, 'lige e'yénale alé ejiro Siria Esukristo oyérame 'yuga ra'íchasia. 'Lige simárale alué oká rió ra'íchasia alué ralámuli Esukristo oyérame 'yuga alemi ejiro Silisia anilichí. Oilárule suwábaga alué ralámuli Esukristo oyérame alemi mochígame. 'Lige alué ralámuli oilárisiga 'lige abiénachigó 'we welagá e'yénale alué ralámuli alué Esukristo oyérame.

## 16

*Jena ruwimela alué rió Timoteo simíligo alué Páulo 'lige Silasi 'yuga*

<sup>1</sup> 'Lige alué rió Páulo 'lige Silasi sébale alé we'ká riógichi Rerbe anilichí. 'Lige pe abé nujubapi sébale alé we'ká riógichi Lистра anilichí. 'Lige alé Lístachi najtépale alué rió Timoteo anilime. Esukristo oyérame nile alué rió. 'Lige alué rió Timoteo eyela alué Esukristo oyérame nílechigó. 'Lige alué Timoteo eyela ralámuli jurío nile. 'Lige alué o'nólaka tabilé jurío nile, pe griego nile alué rioka. <sup>2</sup> 'Lige alué ralámuli alé Lистра mochígame alué Esukristo oyérame, 'we a'lá niramé nile alué Timoteo. 'Lige alué ralámuli alé we'ká riógichi Ikonio mochígame Esukristo oyérame 'we a'lá niramé nílechigó alué rió Timoteo. <sup>3</sup> 'Lige alué rió Páulo najkile napurigá si simela alué rió Timoteo. 'Lige bajchá alué Páulo nulele rijpunániliga pe'tá alué isílala alué Timoteo napurigá nokame nílige alué ralámuli jurío. Alué ralámuli napu e'yénale alemi 'la machile Timoteo o'nola tabilé jurío níliga. <sup>4</sup> 'Lige we'kaná we'ká riógichi e'yénale alué rió alemi simasa, 'we ruwile alué ra'íchili napurigá nulálige alué ralámuli alé Rusaleni mochígame ralámuli, alué makué oká rió napu Esusi 'yálige nóchili 'ya, 'lige alué ralámuli napu e'wélala nile alué Esukristo oyérame 'yuga alé Rusaleni mochígame.



<sup>5</sup> 'Lige alué ra'íchili ruyésiga abéchigo a'wágame sulega mochile alué ralámuli alemi we'ká riógichi mochígame Esukristo oyérame. Nabí rawé we'ká ralámuli napu tabilé bijhígime nílige, 'ma 'la bijhígile alué Esukristo ra'íchálila. 'Lige alué napu bijhígile alué ra'íchálila 'ma alué Esukristo oyérame gayénale.

*Jena ruwimela Onorúgame etéraligo Páulo bilé rió*

<sup>6</sup> 'Lige Onorúgame Alawala tabilé najkile napurigá simámala alué bakiá rió alé napu bo'í alué wa'lú gawí Asia rewégame napurigá ruyémela alué Esukristo ra'íchálila alemi simábaga alué bakiá rió, tabilé elile. Alekeri uché bilena simárele alué bakiá rió. Pe alemi simárele napu bo'ile alué ejiro Prisia rewégame. 'Lige alué uché bilé ejiro Galasia anilime gawí pe alé chega bo'ile aluéchigó. 'Lige alué rió alemi simárele nasípami, napu nile alué oká ejiro. <sup>7</sup> Napu'lige sébale ejiro Misia anilichi, wa'lú gawí Bitinia anilichi simáninile, iligá tabiléchigo elíliko Esusi Alawala. <sup>8</sup> 'Lige alekeri pe si'né simábale alé bilena we'ká riógichi Tróasi anilichi. 'Lige alemi we'ká riógichi Tróasi alué ba'wí wa'lú pe a'bé ilile alé yéniga. <sup>9</sup> 'Lige alé sebasa, we'liko rukó alué Páulo Onorúgamete etérale bilé rió alé wa'lú gawí Maseronia ajtíggame rió. 'Lige anile alué rió:

—Pe rekó jeka Maseronia simasi 'emi rió, pe rekó ramué jena Maseronia mochígame ralámuli gu'iriwaká 'emi rió, 'we sapuka simasi —anele alué rió napu Onorúgame etérale.

<sup>10</sup> Napu'lige alué Páulo anele ramué napu etele, o'maka ramué 'ma yati jigáruturu.\* O'maka 'la na'talia ramué Onorúgame 'la bayéligo ramué napurigá simawa alé Maseronia anilichi napurigá beníriwa Onorúgame ra'íchálila alué ralámuli alé mochígame.

*Jena ruwimela galírale mo'áriligo Páulo lige Silasi*

<sup>11</sup> Lige alésíko bárkochi simáruturu ramué alé Samotrasia simime barko. 'Lige si'né simáruturu ramué alé 'mi rabó napu ilí alué gawí Samotrasia anilime gawí. 'Lige alué Samotrasia anilichi, alé ba'wichi nasipa ilígame ju alué gawí. 'Lige alé e'yéniga uché melénala simáruturu alé 'lebo 'nálige baona we'ká riógichi Neápolis anilichi. <sup>12</sup> 'Lige alésíko simáruturu alé 'párimi we'ká riógichi Bilipo anilichi. 'Lige alé we'ká riógichi we'ká ralámuli mochile alé we'kanaka sígame. Alué Romano anilime ralámuli we'ká mochile alé ejperega. 'Lige alé mochíruturu ramué pe u'kabi rawé. <sup>13</sup> 'Lige bilé rawé

sawalachi resíbulichi simáruturu ramué alé 'minami we'ká riógichi suwemi napu a'bé bakochi nile 'yamia koche napuíme ko ralámuli jurío Onorúgame ra'íchálila gepumia 'lige Onorúgame 'yuga ra'ichamia. 'Lige sebáruturu ramué alé bakochi suweke, alé napu napuíme nile alué ralámuli jurío. 'Lige alé mochílituru pe'kabi umugí 'lige alé mochiga ra'icháruturu ramué alué umugí 'yuga. 'Lige we'ká ra'icháruturu ramué Onorúgame ra'ichálila alué umugí 'yuga. <sup>14</sup> 'Lige bilé mukí ajtígéturu alé, Liria anilime mukí, alé Tiatira anilichi ochérigame nile alué mukí. 'Lige alué mukí chiní 'we a'lala ralineme kéturu alué mukí, chiní chóniga-sejtákame 'we a'lala. 'Lige alué mukí 'we a'lá 'nátame nile Onorúgame 'yuga. 'Lige alué mukí akea asale Onorúgame ra'ichálila 'lige Onorúgame bo'né 'yale 'nátali alué mukí napurigá alué mukí 'we a'lá námamala Onorúgame ra'ichálila napu ruwile alué Páulo. 'Lige alué mukí 'we semáriga oyérale alué rejcholi alué napu ruwile alué Páulo alé asagá. <sup>15</sup> 'Lige 'ma rewarárigame gayénale alué mukí alé wa'lú ba'wichi bochgími bokuika. 'Lige alué ralámuli alué napu ekí mochile alé napu bejtele alué mukí, 'ma rewarárigame gayénalechigó, Esukristo oyérame anilime gayénale alué ralámuli. 'Lige anile alué mukí:

—'Emi 'la bijchiá 'la bijhígisaká 'la Esukristo oyérame ko ne, 'liko simáwagó alé ne galílachi napurigá 'emi alé ne bejtélachi mochímala we'kabé rawé —anile alué mukí.

'Lige we'sá anile alué mukí reparia 'lige arigá simaru ramué alué mukí bejtélachi.

<sup>16</sup> 'Lige uché a'kinana rawé simáruturu ramué alé bakochi suweke alé napu napuíme nile alué ralámuli jurío Onorúgame 'yuga ra'ichamia alé mochiga, 'lige ramué alemi boichimi e'yénaga najtepáruturu bilé mukí iwé. 'Lige alué mukí iwé u'tabela remónisi ajhággame nile, alekeri alué mukí 'we a'lá machime nile alarigá nimio pe nujubapi. Jaré rió bujkú niraga nuleme nile alué mukí. 'Lige alué rió 'we meme nile enomí alué mukite napugiti alué mukí 'we a'lá machime nílígame alarigá nímio a'kinana rawé. <sup>17</sup> 'Lige alué mukí iwé najátele Páulo 'lige ramué. 'Lige 'we iwégame ra'ichaga anile alué mukí:

—Ye ralámuli nóchame ju alué Wa'lula Onorúgame 'yuga napu re'pá rewagachi ajtíggame ju. Alueka anéguru churigá 'la buyásitika alué tabilé 'la bowechi —alanísiga enale alué mukí alemi nujubá.

<sup>18</sup> 'Lige we'kabé rawé eyénale alué mukí lanigá alemi. 'Lige alué rió Páulo arigá nasinale alué alieti ra'íchili akea. Bo'neka 'la

\* 16:10 Jena Lukasi chojkile Páulo 'yuga eyena.

nénílile tabilé 'la ka, tabilé ganíliga eyénale napugiti alué u'tabela remónisi 'we ne-  
jkuméligime. 'Lige alué mukí lanechi Páulo,  
Páuloka gu'liga ilíbale 'lige anele ayóniga alué  
Remónisi:

—Mué remónisi ma'chínawa alé mu-  
kichi. Neka nulá Esukristo a'walila gite  
ma'chínawa mué remónisi alé iwé mukí  
sulálachi —anele alué rió Páulo.

'Lige alué u'tabela remónisi alé sulachi  
ajtígame pe yati ma'chínale alé alué mukí  
sulálachi ajtigé, alué Páulo alanísá.

<sup>19</sup> 'Lige alué rió napu ajchigá mochile alué  
mukí, napu'lige machísá tabilé 'la ko alé  
enomí melia alué mukite, 'lige cha'píliro  
alué Páulo 'lige alué Silasi. Banasuka o'tóliro  
wijíchi ro'ogá alué oká rió alé napu mochile  
alué e'wélala <sup>20</sup> alé nasipami we'ká riógichi.  
Alué ralámuli alé napuíme nile alué ra'íchili  
gatemia. 'Lige anile bilé rió alé a'pasa alué  
oká rió:

<sup>21</sup> —Ye oká rió pe jurío ju, 'lige asíriga cha  
noká ye rió jena jsísá. 'Ma se'winati ra'íchili  
beniria ralámuli jena mochígame. 'We ne-  
jkumea mochí alué oká rió. 'Lige ramueka  
tabilé najkiá alué alieti ra'íchali napugiti ra-  
mueka pe ralámuli romano nírigime, alek-  
eri tabilé najkiá ramué alué ra'íchili —anile  
alué ralámuli alé a'pasa alué oká rió.

<sup>22</sup> 'Lige alué ralámuli napu okí akele alué  
ralámuli lanichi alé jaga, suwábaga alué  
ralámuli 'ma sairale alué oká rió Páulo 'lige  
Silasi. 'Lige alué ralámuli e'wélala nulale  
alué o'pacha bujénalaga alué oká rió. 'Lige  
'ma bujesa alué o'pacha, 'lige nulale we-  
jpisóniliga gusite alué oká rió. 'Lige 'la  
iwégame wejpisole alué oká rió. <sup>23</sup> 'Lige  
'ma suwénasa wejpisoa alué oká rió, o'tóliro  
galírale mo'amia. E'wélala nulele galírale  
repume napurigá 'we 'la repúmala napurigá  
ta buyásimala alé mochiga. <sup>24</sup> 'Lige alué rió  
alé galírale mo'árigame repume mo'ale alé  
galichi abé pachami napurigá ta buyásimala  
alué oká rió. 'Lige alé pachá mochile ronola  
mo'igá alé rabilétachi ewágachi alué oká  
rió. 'Lige alué rió Páulo 'lige alué Silasi alé  
mo'agá mochiáleru alué ronola. 'Lige 'ma  
tabilé gayénale noká ronola.

<sup>25</sup> 'Lige pe aba a'lige nasipa rukó alué  
oká rió Onorúgame 'yuga ra'icha mochile  
aminami wikará mochile Onorúgame  
wikala 'we ra'sálagá, tabilé sewele alué  
ralámuli rekó galírale mo'áriga mochige.  
'Lige uché jaré ralámuli galírale mo'áriga  
mochilechigó alé, 'lige alué akea mochile  
alué oká rió Onorúgame a'walí tánichi, 'lige  
aminami wikarachi Onorúgame wikala.

<sup>26</sup> 'Lige pe aba a'lige yati nokale gawí,  
'we a'wágame nokale gawí. 'Lige alué  
galí 'ma nokale napugiti cha a'wágame  
nokáligame. 'Lige alué galí 'yéila 'ma  
i'púriga ilíbalechigó. 'Lige alué ralámuli

galírale mo'áriga mochígame, 'ma supásile  
karénate buluriga mochígame. 'Lige pe  
bo'né su'pásale alué karena alué rabileta  
bulurígame cha a'wágame nokáligame alué  
gawí. 'Lige alué ralámuli napu ekí mochílige  
alé pachá, 'ma tabilé bulériga mochíbale.

<sup>27</sup> 'Lige alué rió galírale mo'árigame repume  
pe alé a'mibemi galírale bo'ile gojchigá.  
'Lige pe yati asísiga e'nele alué 'yera alué  
galí napu mochile galírale mo'árigame. 'Lige  
etele i'púriga iligó alué galí. 'Lige larigá  
iligame rewísá alué galí 'lige 'we we'ká  
'náta alué rió. Mayele 'ma buyásiligo alué  
ralámuli. 'Lige ma'chí pale alué siparina  
napu o'kame nílige alué rió bo'né. 'Lige  
ma'chí pasa bo'nepi me'limé olale alué  
rioka napugiti alué rioka alué ralámuli  
'ma buyásiligo mayega. Machime nílige  
me'libólikó alué e'wéalate. <sup>28</sup> 'Lige Páulo  
etele alué rió siparina ma'chí pachi. 'Lige  
iwégame ra'íchaga anele:

—Tase che 'sípua mué rió, ramué ralámuli  
napu ekí galírale mo'árigame mochiru jena  
mochiru suwábaga —anele alué rió la'sime  
etesa.

<sup>29</sup> 'Lige alué rió repume alué chojpé ra-  
jigá tale 'we sapúkame alé pachami e'nemia.  
'Lige 'we 'maga bajkile alé pachami alé  
napu jale alué Páulo 'lige alué Silasi. 'Lige  
alué rió 'we majásiga 'male alemi, áwílisia  
'male alué rió majaga. 'Lige alé pachá se-  
basa alé napu jale alué rió Páulo 'lige alué  
Silasi, 'lige alé a'bé chojkóbisiga ilíbale alué  
rió repume 'we alá niraga alué rió Páulo  
'lige alué Silasi. <sup>30</sup> 'Lige yati ma'chí buyánale.  
'Lige alué rió repume ma'chí buinasa alué  
ralámuli Páulo 'lige alué Silasi, 'lige rukele  
bilé ra'íchili:

—'Emi rió ¿churigá 'símala ne napurigá 'la  
e'kámala Onorúgame ne'chi? —anile alué rió  
alé iligá.

<sup>31</sup> 'Lige alué Páulo 'lige alué Silasi nejele,  
anile:

—Mué rió 'la bijchígawaguru alué Esusi  
ra'ichálila napurigá nulá. 'Lige alué ralámuli  
napu ekí mochí alé galírale mué bejtélachi,  
alué 'we semáriga bijchígiwa alué Esusi  
ra'ichálilachigó. 'Lige larigá nokisáká 'emi  
'we alá e'kámala Onorúgame 'emi ralámuli  
—anile Páulo 'lige alué Silasi.

<sup>32</sup> 'Lige Páulo 'lige Silasi 'we ruyele  
Onorúgame nila ra'íchali alué rió repume  
'lige suwábaga ralámuli napu ekí mochile alé  
alué repume bejtélachi. <sup>33</sup> 'Lige pe aba'lige  
rukó alué repume pagole alué rió Páulo  
alé chí'wágichi, 'lige alué Silasi abiénachigó.  
'Lige yati 'ma rewaráleru alé wa'lú ba'wichí  
bochígimi bokuika suwábaga alué ralámuli,  
'ma Esukristo oyérame gayénale alué  
ralámuli. <sup>34</sup> 'Lige alué rió repume, bayérole  
alué oká rió bo'né bejtélachi alué Páulo 'lige  
Silasi. 'Lige alé galírale sebasa, go'ame

kógile Páulo 'lige Silasi. 'Lige suwábaga alué ralámuli repume bejtélachi mochígame 'we ra'sálagá mochile napugiti 'ma Onorúgame oyérligame alué ralámuli.

<sup>35</sup> 'Lige melénala be'á alué e'wélala nulame alé Bilipo anilichi we'ká riógichi júlate jaré rió gapitani napurigá anémala alué repume napurigá 'ma ku buinámala alué oká rió galírale mo'árigame.

<sup>36</sup> 'Lige alué rió repume akisá, anele alué rió Páulo 'lige alué Silasi:

—Alué e'wélala 'ma nuléleke'é ne'chí napurigá buinámala ne 'emi. Alekeri 'la kilí simáwagó 'emi, tabilé e'karúgame ra'íchaga.

<sup>37</sup> 'Lige alué Páulo anele alué ralámuli sontalo gapitani:

—Aka ramué ralámuli romano nirupachéigó napurigá 'emi. 'Lige ¿chonigá lolárupaché ramué jena? ¿Chonigá aliena iwégame wejpisótupaché ramué alé we'ká ralámuli mochígichi jáwaga? 'Lige wejpisosa, galírale mo'ákuru 'emi nokisá. 'Lige 'emi napu'lige alé we'ká riógichi a'pasa, peka pe'tá rukékuru ramué tachiri nasibúliga ramué 'emi 'yuga. 'Lige pe jipe nasoka buinánili 'emi nokisá. 'Lige ramueka tabilé simawa alarigáká. 'Lige jípeko jeka siráleké alué e'wélala ramué buinamia —anele Páulo.

<sup>38</sup> 'Lige alué ralámuli gapitani ruwile alué ra'íchali napurigá anilige alué Páulo, ruyéleke'é alué e'wélala alé 'mi mochígame. 'Lige alué e'wélala 'we majale alué ra'íchili ruyésiga, alué oká rió romano nílechigó. <sup>39</sup> 'Lige alué e'wélala simibale alé 'mi napu mochile alué Páulo 'lige Silasi. 'Lige alué e'wélala alé sebasa napu mochilige alué Páulo 'lige Silasi, e'kali tánele napurigá tabilé nejímala uché jarena abé e'wélalachi alué Páulo 'lige Silasi. 'Lige 'ma e'kali tánsa, 'lige ma'chí buyánele alué oká rió alé galírale mo'áriga mochígame. 'Lige anele:

—Pe rekó jípeko simáwagó 'minami mejká jena we'ká riógichi —anele.

<sup>40</sup> 'Lige alé buinásiga alué rió Páulo 'lige Silasi, 'lige simíbale alué rió alé miná napu bejtele alué mukí Liria anilime. 'Lige alé napuile alué ralámuli Esukristo oyérame. 'Lige Páulo 'lige Silasi, 'we semáriga ruyele napurigá 'we a'lá semáriga a'wágame sulega mochímala alué ralámuli Esukristo oyérame. 'Lige Páulo 'lige Silasi simíbale alé we'ká riógichi mochiga. Uché bilena we'ká riógichi simíbale.

## 17

*Jena ruwimela we'ká ralámuli ayóniligo alué Páulo 'lige Silasi*

<sup>1</sup> 'Lige simárele alué oká rió bilena we'ká riógichi Anpípolisi anilichi. 'Lige uchéchigo bilena Apolonia anilichi we'ká riógichi simárele alué oká rió. 'Lige alé okaná

we'ká riógichi simárasa, 'lige sébale alé uchéchigo bilena we'ká riógichi Tesalónika anilichi. 'Lige alé ilile alué u'tá re'obá jurío re'obala, «sinagoga» anilime. <sup>2</sup> Páuloka simile alé re'obachi bo'né gompaniero si, bilé rawé sawalachi resibulichi. 'Lige alarigá nokame nile alué ralámuli. 'Lige bakía tarali sawalachi rawé resibulichi simúbame nile alé re'obachi. 'Lige Páulo ra'íchame nile alué ralámuli 'yuga alé re'obachi asagá. We'ká e'karúgame ra'íchali a'bopi rukigá machináliga. <sup>3</sup> 'Lige benírale churigá ania alué ra'íchili alé osilichi uchúkame ra'íchili Onorúgame nila ra'íchali, alué 'ya nerúgame rejcholi. 'Lige Páulo ra'íchia ilile alué apeli leéraga 'lige ruyea ilile ralámuli churigáriga Onorúgame a'réligo napurigá resí ikimela 'lige me'líririgo alué rió napu bo'né Onorúgame júlalige alé 'pákana rewagáchika. 'Lige ku ajániligo alué rió me'lisuga. 'Lige anile alué Páulo:

—Alué Esusi, alué napu nawale jena wijchimoba kulí pe u'kabi bamí kachi, alué nile napu Onorúgame julámuli nílige alé 'pákana rewagáchika. Alué ju napu ruyé ne 'emi ralámuli.

<sup>4</sup> 'Lige alué rejcholi ruyésiga alué ralámuli, jaré alué ralámuli jurío 'we a'lá oyérale alué rejcholi. 'Lige aminami alué we'ká ralámuli alué griego ra'íchame ralámuli napu 'we a'lá nirame nile Onorúgame, alueka 'we a'lá oyérale alué rejcholi alué napu ruyele alué Páulo alé re'obachi iligá. 'Lige aminami alué umugí napu 'we a'lá nirame nile 'lige 'we nóchame nile, we'ká alué umugí 'we semáriga oyérale Onorúgame ra'ícháliga. <sup>5</sup> 'Lige alué ralámuli jurío, alué napu tabilé oyérale rejcholi napu ruyele alué Páulo, alueka 'we gawelia mochile alué ralámuli etea. 'Lige alué ralámuli jurío owile jaré ralámuli 'we najsínakuli, pe jami e'yéname, pe chátiri ra'íchaga chibi anigá e'yéname alué ralámuli. 'Lige alué we'ká ralámuli napuile alué ralámuli jurío 'yuga, alué tabilé bijchígime Onorúgame nila ra'íchali. 'Lige alué uché jaré we'ká ralámuli abiena napuile alué 'yuga, gepumia alué chátiri ra'íchali. 'Lige alué we'ká ralámuli cha nokame napuisa, 'lige 'la iwégame cha anigá e'yéname alué ralámuli. 'Lige suwábaga alué ralámuli alé we'ká riógichi mochígame 'ma ayole. 'Lige sébale alé bilena galírale alué rió Jasoni anilime rió bejtélachi alué Páulo 'lige Silasi 'yasia. 'Lige alé mochigo mayele alué oká rió. Alué oká rió cha'pináliga nokale alué ralámuli o'tonáliga napu mochile alué e'wélala. <sup>6</sup> 'Lige alé Jasoni bejtélachi tabilé rewáliku alué oká rió. 'Liko pe alué rió Jasoni alé bejtégame cha'pile alué ralámuli. 'Lige cha'písá, wijchí rekagá banasuka ma'chí páliku alué rió Jasoni. 'Lige alarigá banagá o'tole alé 'mi napu mochile alué

ralámuli e'wélala. 'Lige alué uché jaré ralámuli Esukristo oyérame ralámuli 'ma cha'píliruchigó. 'Lige abiena o'tóli ru alué ralámuli alé 'mi napu mochile alué ralámuli e'wélala. 'Lige alé sebasa, alué ralámuli napu o'tole alué uché jaré ralámuli e'wele sinaka ne'ole:

—Alué oká rió napu jsile jena 'we cha anigá e'yena jemi bochígimi we'ká riógichi. <sup>7</sup> 'Lige ye rió Jasoni alé bo'né galíachi mochiga ajtime ju alué oká rió. 'Lige 'we gompaniérola ju ye rió alué oká rió. 'Lige 'ma sayega ra'íchame ju alué ralámuli alué wa'lula nulame rió romano olagá. 'Lige aniárá alué ralámuli uché bilé wa'lula seligame ajtigará, napu Esusi anilime kará —anile alué ralámuli tabilé Onorúgame oyérame.

<sup>8</sup> 'Lige alué ra'íchili akisá alué e'wélala 'lige alué uché jaré ralámuli napu ekí mochile alé, alué uché rajpé 'la iwégame ayole alué Esukristo oyérame 'yuga. 'Lige 'la iwégame we'ká ra'íchaga ne'óchale. <sup>9</sup> 'Lige alué e'wélala goblálile alué rió Jasoni napurigá ma'chínamala, 'lige Jasónika bo'né najtétisa, ma'chínale. 'Lige alué uché jaré ralámuli Esukristo oyérame najtétiga buyale.

*Jena ruwimela Páulo 'lige Silasi simíbaligo alé Berea anilichi we'ká riógichi*

<sup>10</sup> 'Lige alué ralámuli Esukristo oyérame yati júlale alué Páulo 'lige alué Silasi alé we'ká riógichi Berea anilichi. Pe rukó juláiru alué oká rió chíbaka napurigá ta cha'piboa saílate. 'Lige alé Berea sebasa alué rió Páulo 'lige alué Silasi, 'lige pe abé i'libeko simíbale alué ralámuli alé u'tá jurío re'obálachi. <sup>11</sup> 'Lige alué ralámuli jurío alé ejperégame 'la 'we beninálime nile alué ra'íchili, tase napurigá alué ralámuli alé Tesalónika mochígame. 'We galegá akele alué rejcholi napu ruwile alué Páulo alé iligá. 'Lige nabí rawé benime nile alué apeli osirúgame Onorúgame ra'íchálila machínáliga pala 'la bijchiá ka napurigá ruwile alué Páulo. <sup>12</sup> 'Lige we'ká ralámuli jurío alé Berea mochígame 'we 'la bijchígale alué rejcholi napu ruwile alué Páulo alé iligá. 'Lige aminami alué we'ká umugí alué griego ra'íchame, 'we nóchame umugí, alueka 'we 'alá oyérale alué rejcholi. 'Lige aminami alué we'ká rió griego ra'íchame, alueka 'la oyéralechigó alué rejcholi napu ruwile alué Páulo. <sup>13</sup> 'Lige alué ralámuli jurío alé Tesalónika mochígame akele alué rió Páulo alémi eyénaráo alué Esukristo ra'íchálila beníría ralámuli Berea mochígame.\* 'Lige

machisá alémi eyénaráo alué Páulo, 'lige yati simíbale alué ralámuli alémi napu ajtime alué Páulo e'nemia. 'Lige alué ralámuli alé Berea sebasa, asíriga chátiri ra'íchili ra'íchale. 'Lige se'wináriga ruyele alué ra'íchili alé Berea mochígame ralámuli, napurigá alué ralámuli Berea mochígame ayónimala alué Páulo. <sup>14</sup> 'Lige jaré ralámuli alué Esukristo oyérame alé Berea mochígame, yati 'légana bayérole alué Páulo alé 'mi ba'wichí suweke, alé wa'lú ba'wí ilígichi. 'Lige alué rió Silásika abajá alé Beréachi rejpile alué Timoteo 'yuga. <sup>15</sup> 'Lige alué ralámuli napu alué Páulo 'yuga simíbale, 'we mejká simíbale Páulo 'yuga bárkochi simíbale wami wa'lú we'ká riógichi Atena anilichi. 'Lige alé we'ká riógichi Atena anilichi ro'ile alué ralámuli alué Páulo 'yuga simíbagame. 'Lige alué rió Páuloka alé we'ká riógichi Atena rejpile. 'Lige Páulo anele alué ralámuli alé Berea mochígame ku simíbachi:

—Jeka juláwaká alué rió Silasi 'lige alué Timoteo 'we yati neraga —anile Páulo alé Atena anilichi rejpigá.

*Jena ruwimela alué rió Páulo alé Aténachi asáligo*

<sup>16</sup> 'Lige Páulo alé Aténachi asale alué oká rió buigá Silasi 'lige Timoteo. 'Lige alé asagá, alué Páulo etele larigá nokao alué ralámuli alé Atena we'ká riógichi mochígame. 'Lige alué ralámuli alé Atena mochígame we'ká e'karúgame newame nile. 'Lige alieti newasa Onorúgame neraga eteme nile 'lige e'kali tánime nile alué ralámuli alé Atena mochígame. 'Lige alué Páulo alieti etega, tabilé ganílile. We'ká 'nátales, 'we sewele. Bo'neka 'la machígame tabilé 'la ko. <sup>17</sup> 'Lige alué alieti etesa alué Páulo, 'lige simile alé u'tá jurío re'obálachi «sinagoga» anilime, simile ra'íchamia alué ralámuli 'yuga. 'Lige alé re'obachi ra'íchale alué ralámuli jurío 'yuga 'lige griego ra'íchame ralámuli 'yuga napu 'we 'la nirame nile Onorúgame. 'Lige nabí rawé 'we ra'íchale alué Páulo apiépiri ralámuli 'yuga alé we'ká riógichi iligá, alé napu ralinélime nile e'karúgame tábiri. <sup>18</sup> 'Lige jaré ralámuli mochile alé Pekurio oyérame. 'Lige jaré mochile alué Seno anilime ra'íchili oyérame ralámuli.† 'Lige alué ralámuli anile akisá Páulo ra'íchachi:

—¿Chieri júko ye rió 'we we'ká ra'ichanti, ramueka tabiléchigo námaturgó?

'Lige jaréchigo anile:

—Pe uché bilé riosi najátitime najkigá anía káwe ye rió.

\* 17:13 Alué ralámuli jurío tabilé galeme nile alué 'ya nerúgame ra'íchali Onorúgame ra'íchálila napu ruwime nile nawámili ko Esusi. † 17:18 Alué ralámuli napu Pekurio oyérame nile tabilé bijchígame nile ajtigá Onorúgame. Pe mochime nile go'yá 'lige bajía, 'lige 'we newame nile yawiyame, 'we ganíliga mochime nile pe a'bopi 'nátaga. Alué ralámuli napu Seno oyérame nile bijchígame nile bochígimi ajtigó Onorúgame, 'lige pe kilí mochime nile, anáchaga mochime nile, tase napurigá alué Pekurio oyérame.

Alué rió Páulo ruwile alué Esusi ra'ichálila, 'lige abiénachigó ra'ichale ku ajániligo Esusi mukusá. Alekeri mayele alué rálámuli: «Pe uché bilé riosi najátlime najkigá aniá káwé ye rió.»<sup>19</sup> 'Lige bayéleru alué Páulo alé bilena Areópago anilichi, alé napu napuime nile alué rálámuli alué ra'íchili gatemia. 'Lige anile alué rálámuli alé mochígame:

—Ramué rálámuli machínáloru alué ra'íchali, ztáchiri ruyame ko alué ra'íchili, alué napu mué ruyá aní? <sup>20</sup> 'Yako tasiné akiame ke alarigá ra'íchame jemi. Suwábaga alué ra'íchali machínáloru ramué rálámuli.

<sup>21</sup> 'Lige alué rálámuli alé Atena mochígame 'we benínalime nile alué uché bilé ra'íchili se'nú nuebo. 'Lige 'we ra'ichánilime nile alué ra'íchili alué apiépiri ra'íchili se'nú nuebo. Alarigá nile alué rálámuli 'yasi. 'Lige alé Atena we'ká rálámuli mejkaka sígame we'ká mochile alé Atena ejperega. 'Lige alué rálámuli abiena 'we benínalime nile alué uché bilé se'nú ra'íchili nuebo. <sup>22</sup> 'Lige alué Páulo o'weti ilísale alé Areópago ra'ichamia alé we'ká rálámuli mochígichi. 'Lige anile alué Páulo o'weti ilísisa:

—'Emi rálámuli jena we'ká riógichi Atena mochígame, neka eteme ju 'emi we'ká riosi nígame ko 'lige 'we tánime ju a'walí alué riosi 'emi. <sup>23</sup> Ne jemi eyénaturu e'néniga, we'ká e'karúgame etiáturu ne 'emi a'boi newálala 'emi a'boi riósila. 'Lige alé rewá ne bilena napu kógime nile Onorúgame. 'Lige jaré ra'íchili osilí uchú alé anime: «siné kachi ajtigérekó bilé Onorúgame tabilé machirume. Jena jawawa alué go'ame napurigá go'mela alué Onorúgame.» 'Lige Onorúgame napu tánime ju 'emi tabilé machigá, 'we alá machí ne alué ko Onorúgame. 'Lige ne 'la ruwimela chieri ko Onorúgame napu 'emi rálámuli tabilé machí.

<sup>24</sup> › Onorúgame newale ye gawí, alueka suwábaga nulame ju jena wijchimoba 'lige 'pa rewagachi abiena. Onorúgame tabilé bejtégame ju alé re'obachi, alué re'obá alué rálámuli newálila jena wijchí ejperégame. <sup>25</sup> 'Lige Onorúgame tabilé resilá napurigá gu'riwa rálámulite. Onorúgame nejíguru alawá 'lige buchéguru suwábaga rálámuli. Alueka suwábaga nejime júkuru napu eki resiláru ramué.

<sup>26</sup> › 'Lige sineko pe bi'lepi rió newale Onorúgame. 'Lige Onorúgame 'we alá gu'riile napurigá we'ká o'chéramala rálámuli jena wijchimoba. Alígésiko we'kaná o'chérale rálámuli se'wináriga ra'íchame, a'bopi ra'ichálila ra'íchame. Bo'né Onorúgame 'la 'nátale koche o'chéramala rálámuli 'lige chiéniko. Arigá 'nátale 'we 'ya we'ká bamí ta'chó newá rálámuli. <sup>27</sup> 'Lige Onorúgame newale alué rálámuli napurigá 'la na'támala, «¿Koche ajtigá Onorúgame 'lige churigá ko Onorúgame?» 'lige alarigá 'la oyérawa

Onorúgame, 'lige siné kachi alué rálámuli 'la oyéramala Onorúgame. 'Lige Onorúgame tabilé mejká ajtí napu mochiru ramué rálámuli, ramueka tabilé etewía alé ajtigó Onorúgame. <sup>28</sup> 'Lige Onorúgame gite ajáluru ramué rálámuli jena wijchimoba mochígame. 'Lige ma'chílime nírukuru ramué Onorúgame gite, 'lige akeme nírukuru ramué rálámuli Onorúgame gite. 'Lige Onorúgame ta nejkúrisaká, 'lige pecha ajáliwakó ramué rálámuli jena wijchimoba mochígame. A'chigóriga 'la anime osale jaré rálámuli jena mochígame 'la jebénigame osagá, 'la anime osale: «Onorúgame 'kúchila nírukuru ramué, Onorúgame newale ramué rálámuli», anime ju alué osilí. <sup>29</sup> Bijchiá Onorúgame 'kúchila niru ramué rálámuli. 'Lige Onorúgame 'kúchila níriga, 'lige zalúe tábiri a'boi newárigime 'lacha Onorúgame nímalawé? 'Lige alueka pe jena wijchí mochígame rió newálila júkuru, pe rejtele newárigime ju, 'lige 'órote 'lige plátate, 'lige alué rálámuli pe a'boi 'nátaga newálekuru alué tábiri. <sup>30</sup> 'Ya bajchá rawé tabilé e'chéwale Onorúgame alué rálámuli, jípeko Onorúgame najki napurigá buyámala resitiri 'nátalichi. <sup>31</sup> 'Lige Onorúgame 'ma anile chiéniko olamio gustisia rálámuli. 'Lige alué bo'né Onorúgame nulémala alué bilé rió napurigá ruwimela chieri ka resitiri 'nátame 'lige chieri ka tabilé resitiri 'nátame. Suwábaga rálámuli 'la machíguru ye rió 'we alá bijchiá animeli ju napugiti Onorúgame ajániligo alué rió.

<sup>32</sup> 'Lige alué ra'íchili akisá alué rálámuli Onorúgame ku ajánaligo bilé rió, 'lige jaré rálámuli 'we gawéliga akele alué ra'íchili. 'Lige alué uché jaré rálámuli anile:

—Ramuéka najkiá napurigá uchéchigo siné nawawa alué ra'íchali ra'ichawa —anile alué rálámuli.

<sup>33</sup> 'Lige alué Páulo a'rele alué ra'icha iligé alé, 'lige simile. <sup>34</sup> 'Lige jaré alué rálámuli najátele alué Páulo 'lige 'we alá niraga akele alué ra'íchali. 'Lige alué bilé alué Onisio anilime rió, wa'lula nile nulame alé we'ká riógichi. 'Lige bilé mukí nile Ramárisi anilime mukí. 'Lige uché jaré rálámuli abiena 'we galeme nile Onorúgame ra'ichálila.

## 18

*Jena ruwimela Páulo simlígó Korinto anilichi we'ká riógichi*

<sup>1</sup> 'Lige a'kinana simile alué Páulo alé we'ká riógichi Korinto anilichi. <sup>2</sup> 'Lige alé we'ká riógichi Korinto najtépale bilé rió jurío Akila anilime. 'Lige alué rió Akila alé we'ká riógichi Ponto anilichi ochérigame nile. 'Lige pe kulí nawágame nile alué rió Akila alé Korinto alué upila 'yuga napu Prisila anilime nile. Alé 'naka simibale alué

oká ralámuli alé napu mochí alué ralámuli italiano ra'ichame. Alé we'ká riógichi wa'lúlachi Roma ejperégame nile 'yako. Abijí alé Roma mochiga Akila 'lige Prisila, alué wa'lula napu Kláurio anilime nile suwábaga alué ralámuli jurío 'ma mabule, 'lige jaré alué ralámuli jurío alé Roma mabúsiga 'ma jumasile 'lige sébale alé Korinto.

<sup>3</sup> 'Lige alué Páulo simile alué ralámuli kólimia Akila 'lige Prisila. 'Lige alué Páulo pe aba alué nóchili nígame nile a'chigóriga napurigá alué ralámuli. 'Lige alué Páulo alé asale nocha alué ralámuli 'yuga. Alué Páuloka u'kuchí galí newame nile gemá napisúligamete.\*

<sup>4</sup> 'Lige alué Páulo alé asagá, nabí rawé sawalachi resibulichi simime nile alé alué ralámuli jurío re'obálachi «sinagoga» anilime. 'Lige alé re'obachi iligá ruwime nile alué Páulo Onorúgame ra'ichálila. We'ká ralámuli jurío mochile alé 'lige abiena mochile we'ká alué ralámuli tabilé jurío. 'Lige alué ralámuli 'we rukeme nile. 'Lige alué rió Páulo najkime nile napurigá alué ralámuli 'la bi-jhígimala alué ra'ichili napu ruwile alué Páulo.

<sup>5</sup> 'Lige sébale alué oká rió alué Silasi 'lige alué Timoteo ejiro Maseróniaka simíbaga. 'Lige alué sebasa alé, a'rele alué Páulo nocha alué gemá napisua napu newalime nile galí, alésiko pe Onorúgame nila rejcholi ruyme nile. Ruyeale alué ralámuli jurío Esusi níligo napu Onorúgame júlale napurigá gu'rimala alué ralámuli. <sup>6</sup> 'Lige jaré alué ralámuli jurío alé mochígame sairaga mochile 'lige 'we gawélele alué Páulo ra'ichálila. 'Lige alué Páulo alué o'pacha bujasá sawele. Alueka ruwime nile tabilé chókila ko. 'Lige anile alué Páulo ala'sika:

—Onorúgame gastigárimala 'emi ralámuli, 'liko neka tabilé chókila nímala. 'Lige jípeko ne simela alé napu mochí alué ralámuli tabilé jurío alué ye ra'ichili rejcholi ruyemia —anile alué Páulo.

<sup>7</sup> 'Lige alué Páulo 'ma lanisá, ma'chínale alé re'obachí. 'Lige alué Páulo alé ma'chínasa, 'lige simile alé a'bé uché bilena galírale alé napu bejtele alué Justo anilime rió. Alué rió 'we a'lá nirame nile Onorúgame. Alé re'obá ilígachi chega bejtégame nile alué rió.

<sup>8</sup> 'Lige alué Krispo anilime rió napu wa'lula nile alé re'obachí nulame, alué rió 'we a'lá bijhígile alué Esukristo ra'ichálila napu ruwílige Páulo alé iligá, 'we 'la oyérale, 'lige suwábaga alué ralámuli alé galírale mochígame alué Krispo bejtélachi 'we 'la oyéralechigó alué Esukristo ra'ichálila. 'Lige we'ká alué uché jaré ralámuli alé

we'ká riógichi Korinto mochígame 'we 'la oyéralechigó alué napu ruwílige alué rió Páulo. 'Lige 'ma rewaráliku alué ralámuli alé wa'lú ba'wichí bokuúka bochígimi.

<sup>9</sup> 'Lige bilé rukó Onorúgame etérale alué Páulo alué Wa'lula Nulame Esukristo. 'Lige anile alué Esukristo:

—Tase majawa mué rió Páulo, aminabi rupoa ne ra'ichálila. <sup>10</sup> Neka nabí alé a'bé ajtikuru mué repuka napurigá tabilé 'wesi cha olámala mué. Neka najkí napurigá aminabi ruwimela mué ne ra'ichálila, we'ká ralámuli mochígame jena we'ká riógichi napu oyérimli ju alué ra'ichali —anile alué Esukristo.

<sup>11</sup> 'Lige alué rió Páulo asale alé we'ká riógichi Korinto bilé bamí miná nasipa. 'Lige 'we semáriga beniria asale alué ralámuli alé we'ká riógichi Korinto mochígame Onorúgame ra'ichálila.

<sup>12</sup> 'Lige alué rió Galioni selígame kachi alé ejiro Akaya anilichi, alé napu wa'lú we'ká riógichi Korinto bo'í, 'lige we'ká alué ralámuli jurío sairale alué rió Páulo. 'Lige alué ralámuli jurío cha'pile alué Páulo, 'lige cha'pisá, o'tole alé napu gatélime nile alué ra'ichili, alé napu asale alué rió wa'lula Galioni anilime. <sup>13</sup> 'Lige anele alué ralámuli jurío alué wa'lula Galioni:

—Ye rioka 'we ané ralámuli napurigá Onorúgame oyéramala nobi se'unáriga ruwígó Onorúgame oyérilime tase napurigá nulá ramué nulalila.†

<sup>14</sup> 'Ma amulí ra'ichale Páulo, 'lige yati neraga bajhá ra'ichale alué wa'lula Galioni. Alué rió Galioni anele alué ralámuli jurío:

—'Emi ralámuli e'chewa mochí ye rió chibí 'sime kóriká o nejkome kóriká, 'liko alarigá nísaká, 'la gatémala ne. <sup>15</sup> 'Lige alué napu 'emi ruwí pe 'emi a'boi ra'ichálila kárékuru, 'lige 'emi a'boi nulalila. Alueka pe 'emi a'boi gatéwagó alé 'minami simíbaga. Neka tabilé wa'lula nínili alué alieti ra'ichili gatélichiká. Neka pecha alué nóchali nígame kame —anile alué rió wa'lula.

<sup>16</sup> 'Lige lanasa, alué Galioni 'ma buyánale alué ralámuli jurío alé napu gatélime nile ra'ichali. <sup>17</sup> 'Lige ta'chó simíbachi alué ralámuli jurío, cha'pile bilé rió Sóstene anilime napu nulame nile alué jurío re'obala. 'Lige alué rió cha'pisá alé, wejpísóliku. 'Lige alué wa'lula Galioni 'lige alué uché jaré e'wélala pe alé jale e'negá. 'Lige alué rió Galioni tabilé chélále rekó alieti etea, tabilé che'sile.‡

*Jena ruwimela Páulo ku simíligo alé Antiókia*

\* **18:3** Alué gemaka chibá gujpálate newárigime nile. † **18:13** Bilé nulalí romano anime nile tabilé chojkiawa uché bilé nuebo ra'ichali napurigá oyéramala ralámuli. 'Lige alué ralámuli juríoka anile Páulo uché bilé nuebo ra'ichali ra'icha ajtigárá, tase napurigá Moisesi denírlige. ‡ **18:17** E'nesi I Corintios 1:1.

<sup>18</sup> 'Lige alué Páulo alé Korinto asale we'kabé rawé. 'Lige we'kabé rawé asisá, ariosi anele alué we'ká ralámuli Onorúgame oyérame, 'lige 'ma simile. 'Lige jímole alé bárkochi alué Páulo alué mukí Prisila anilime sí, 'lige alué Prisila gunala Akila abiena si simile, 'lige uché jaré ralámuli abiénachigó. Ta'chó jimia bárkochi alé Senkrea anilichi, sikale bo'né gupala re'wániga ajchagá alué Páulo,<sup>§</sup> 'liko 'ma jímale alé bárkochi. <sup>19</sup> Napu'lige bajonisa, 'lige alé we'ká riógichi Ebeso sébale. 'Lige alésíko alué Prisila 'lige alué Akila uchéchigo bilena simíbale, 'lige alué Páulo alé rejpile bi'neli. 'Lige alué Páulo simile alé na'minami u'tá jurío re'obálachi. 'Lige alué Páulo alé re'obachi iligá, alué we'ká ralámuli jurío 'yuga ra'íchale alé. <sup>20</sup> 'Lige alué ralámuli jurío anele alué Páulo:

—Mué Páulo, pe rekó we'kabé rawé asibóká jena we'ká riógichi —anéleru alué Páulo.

'Lige alué Páulo tabilé we'lisi asinálile alé.\* <sup>21</sup> 'Lige ariosi anele alué ralámuli alé mochígume, 'lige anile:

—Uché nawame ne jeka 'emi ralámuli e'nesia, Onorúgame 'la elásaká —anile alué Páulo.

'Lige alanisá, simile bárkochi asagá alué Páulo. 'Lige simile alé uché bilena we'ká riógichi mejká Sesarea anilichi. <sup>22</sup> 'Lige alé we'ká riógichi Sesarea sebasa alué Páulo, 'párimi simile alé we'ká riógichi Rusaleni anilichi alué ralámuli Esukristo oyérame kólimia. 'Lige alé we'ká riógichi Rusaleni asisá pe'wera, 'lige uchéchigo bilena simile alué Páulo. Simile alé Antiokía<sup>†</sup> anilichi. <sup>23</sup> 'Lige alé Antiokía pe'wera asisá 'lige uchéchigo bilena simile alué Páulo. Simile alé 'mimi ichúrimi we'ká riógichi enamia ra'íchali ruigá alué Esukristo oyérame napurigá abé 'la na'támala Onorúgame 'yuga. Okaná ejírochi eyénale, bilena Galasia anilichi 'lige uché bilena Priijia anilichi.

*Jena ruwimela nawáligo alué rió Apolo alé we'ká riógichi Ebeso*

<sup>24</sup> A'lige rawé sébale bilé rió jurío alé we'ká riógichi Ebeso anilichi, Apolo anilime rió. 'Lige alué rió Apolo alé we'ká riógichi Alejantría ochérigame nile. 'Lige alué rió 'we al'á benégame nile Onorúgame ra'íchálila ra'íchali ruigá. <sup>25</sup> 'Lige alué rió uché jaré ralámulte beníriligame nile 'ya churigá 'sile alué Wa'lula Nulame Esusi. 'Lige alué rió Apolo 'we al'á semáriga ruwile alué rejcholi. Alué rió al'á námale Juani rewaráligo ralámuli napurigá a'rémala alué tabilé 'la nátili. Alué Apolo tabilé machile

alué ralámuli naréligo Onorúgame Alawala pe'tá nujubapi Esusi mukusá. <sup>26</sup> Napu'lige sebasa alé Ebeso, simile alé u'tá jurío re'obálachi «sinagoga» anilime 'lige ruwile Onorúgame nila ra'íchali tabilé majaga. 'Lige alué mukí Prisila 'lige alué Prisila gunala Akila, alué oká ralámuli akele alué Apolo alé ruyá iligachi. 'Liko alué oká ralámuli bayérole alué Apolo alé a'boi ejperélachi napurigá ruwimela abé 'la churigá ko Onorúgame bowela. <sup>27</sup> 'Lige a'kinana alué rió Apolo siminálile alé ejiro Akaya anilichi Onorúgame ra'íchálila ruyemia. 'Lige alué ralámuli Esukristo oyérame alé Ebeso 'nátales 'we 'la ko napurigá simela. 'Lige jaré alué rió Esukristo oyérame osilí osale napurigá o'ká simela alué Apolo. 'Lige anime nile alué osilí: «'La 'we semáriga galegá etéwaká ye rió Apolo alé we'ká riógichi Akaya sebasa», anime nile alué osilí. 'Lige alué Apolo alé Akaya sebasa, 'we semáriga gu'íriale alué ralámuli alé mochígume, alué ralámuli napu Onorúgame gu'írilige napurigá 'we al'á bijchígime nímala Onorúgame ra'íchálila. <sup>28</sup> 'Lige alué Apolo 'we a'wágume ra'íchale Onorúgame ra'íchálila alué ralámuli jurío 'yuga. 'Lige alué ralámuli abiénachigó 'we a'wágume ra'íchale rukigá alué Apolo. Bo'né Apolo 'we al'á ma'chígume ruwile Onorúgame ra'íchálila alué Esusi níligo alué napu Onorúgame julámiorlige. 'Lige alué ralámuli jurío tabilé siné neyúrale alué Apolo 'yuga.

## 19

*Jena ruwimela Páulo ruwíligo chukíligo alé Ebeso*

<sup>1</sup> 'Lige alué rió Apolo alé we'ká riógichi Korinto ajtígichi, alué rió Páuloa enale alé 'mimi iwérachi. 'Lige arigá sébale alué rió alé 'mi bilena we'ká riógichi Ebeso anilichi. 'Lige alé we'ká riógichi Ebeso Páulo najtépale jaré rió Esusi oyérame. <sup>2</sup> 'Lige alué Páulo rukele alué alé mochígume ralámuli:

—Napu'lige 'emi 'la bijchígilige Onorúgame ra'íchálila, 'la bajkile Onorúgame Alawala alé 'émichi?

'Lige alué ralámuli alé mochígume nejele:

—Ramueka tabilé machiáke'é Onorúgame Alawala bajkime ko alé ralámulichi.

<sup>3</sup> 'Lige alué Páulo uchéchigo siné rukele, anile:

—'Lige 'tchiri gite rewarárigame júkó 'emi? —anile alué Páulo.

'Lige alué ralámuli uchéchigo nejele, anile:

—Rewarárigame niru ramué ralámuli napurigá anilige Juani.

<sup>§</sup> 18:18 Alué gujpá sikiáká, alueka anieme ju Páulo cheliera 'ya asale Onorúgame napugiti 'we 'la repúluga kóriká alé Korintochi. \* 18:20 Siné kachi Páulo pe alé siminálime ke anile Rusaleni anilichi piesta oliachi. Alekeri 'we jigale.

<sup>†</sup> 18:22 Alé Antiokía chojkile beniria Onorúgame nila ra'íchali 'ya siné bakía bamí.

4 'Lige alué Páulo anele:

—Alué Juani rewarale pe ba'wite alué ralámuli napu a'rele alué resitiri 'nátili. 'Lige anile alué Juani: «'La bijhígíwa alué rió ra'ichálila, alué napu nawámili ju pe'wé», anile alué Juani. 'Lige alué rió napu nawámili nile a'kinana, alueka Esusi nile.

5 'Lige alué ra'íchili akisá alué ralámuli, 'lige 'ma rewarárigame gayénale alué ralámuli, alué Wa'lula Nulame Esusi oyérame nímala. 6 'Lige alué Páulo alué ralámuli mo'ólachi nochale. 'Lige Onorúgame Alawala bajkile alé ralámulichi. 'Lige alué ralámuli Onorúgame Alawala bajkisá, 'lige chojkile alué ralámuli se'wináriga ra'icha napu tabilé gayénalige ra'icha bajchá. 'Liko 'ma chojkile ruyea Onorúgame nila ra'ichali. Sineko tabilé námale alué ra'ichali. Onorúgame Alawala gu'íriale. 7 'Lige suwábaga alué ralámuli makué oká rió nile.

8 'Lige Páulo nabí tarali sawalachi resibulichi simime nile alé alué u'tá jurío re'obálachi. Bakiá mechá alarigá 'sile. A'wágame ra'ichale alué ralámuli 'yuga napu napuíme nile alé re'obachi. Ruwile Onorúgame churigá nuleme ko alué suwábaga ralámuli. 'Lige alué ralámuli we'ká rukele. 9 'Lige ajaré alué ralámuli tabilé benínáilile 'lige aminami tabilé bijhígíle alué Páulo ra'ichálila. 'Lige 'we gawélele alué 'we semati 'nátili 'we a'lala bowé napu we'ká ralámuli oyérame nile. Alekeri Páulo 'ma tabilé simile alé jurío re'obálachi 'lige bayérole Esukristo oyérame. Simile bilena eskuélachi, Tirano anilime nila nile alué eskuela. Alé napuíme nile nabí rawé. 10 'Lige larigá benírale alué Páulo alé oká bamí, 'lige we'ká ralámuli jsime nile alé eskuélachi Onorúgame ra'ichálila benime. 'Lige alué ralámuli alé akisá alué ra'íchili, 'lige alé 'mimi simíbaga ruyeme nile alué ralámuli alé 'mimi mejká mochígame. 'Lige alarigá suwábaga alué ralámuli alé ejiro Asia mochígame akele Onorúgame ra'ichálila. Jaré alué ralámuli jurío nile, 'lige jaré tabilé jurío nile. 11 'Lige Onorúgame 'we a'wágame a'wali 'yale alué Páulo napurigá 'we 'la semáriga sa'wámala ralámuli nayúkame. 12 'Lige alué ralámuli o'tóime nile ba'nasoli napu Páulo bulame n'lige mo'ochí napurigá ta simíromala alué chiliá alé buichíkana. 'Lige abiena o'toime nile alué lantaria napu u'chugá nóchame nile alué Páulo. O'toime nile alé 'mi napu asale alué nayume, 'lige chévale alué nayume alué ba'nisoli 'lige lantaria. 'Lige alarigá olasa, yati sa'wime nile alué nayume. 'Lige we'ká u'kuchípala remónisi alé ralámuli sulálachi mochígame 'ma buyásime nile. 'Lige pe Onorúgame gite sa'wile alué ralámuli nayua.

13 'Lige jaré alué ralámuli jurío, alué napu alué u'tabela remónisi buyánele alé

ichúrimi e'yénaga, alueka anele alué u'tabela remónisi alé ralámulichi mochígame:

—'Emi remónisi 'ma buyásiwa alé mochiga. Ramué nulame niru alué Esusi a'walila gite napurigá buyásiwa alué ralámuli sulálachi. Ye Esusi ju alué napu ruwime ju alué Páulo —anele alué ralámuli alué remónisi alé ralámulichi mochígame ma'chí buyániga.

14 'Lige bilé rió jurío nile Eskeba anilime, wa'lula balé nile alé re'obachi. 'Lige alué rió gichao inógame nile. 'Lige alué gichao ejtemali 'yome nile alué ralámuli nayúkame napu remónisi u'kuchípala mochígame nile. «Esusi a'walilate 'yome niru ramué», 'la anigá 'yome nile. 15 Nobi siné nejele alué u'tabela remónisi, anele:

—Neka 'la machí alué ko Esusi, 'lige alué Páulo aba aké néchigó. 'Lige 'émika, ¿chieri júpaché nokagá anía? —anile alué remónisi u'tabela.

16 'Lige alué rió napu ajchágame nile alué u'tabela remónisi, nejkósile alué gichao ejtemali 'yuga. 'Lige asíriga a'wágame nile nejkoga alué rió remónisi ajchágame suláchí. Asíriga jecháliru wejpisoka alué gichao ejtemali. 'Lige alué ejtemali o'páchala 'ma chí'wánale wejpisokia alé pachá galírale. 'Lige alué ejtemali alé galírale pe 'yeri buyásile elénasiga. 17 'Lige suwábaga alué ralámuli jurío alé Ebeso ejperégame, 'lige alué ralámuli tabilé jurío, napu 'lige akisá 'la ikíligo alué ejtemali wa'lula balé 'kúchila, 'lige alá iwégame majale alué akisá. 'Lige anile alué ralámuli:

—Ye Esusi ju 'la Wa'lula, ta'wesi umérame —anile 'we 'la niraga.

18 'Lige alué ralámuli alué Esukristo ra'ichálila bijhígime, 'ma suwábaga bejsarale alé o'weka jaga napu 'we resí nokame nile. 19 'Lige we'ká ralámuli alé Ebeso ejperégame 'we chátiri benime nile alé apélichi e'néniga napurigá sujkurúgame nímala. 'Lige alué ralámulika 'ma a'pale alué we'ká apeli kabítigame osirúgime e'kósimia alé napu we'ká ralámuli mochile e'negá. 'Lige 'ma e'kósisa 'lige 'nátale chekí najteme níligo alué apeli osirúgime. 'Lige malígisa makué míli enomí napu plata nile, alakí najteme nile alué apeli osirúgime. 20 'Lige larigá 'la we'ká ralámuli aminacho we'ká benile alué Wa'lula Nulame Esukristo ra'ichálila. Nabí rawé 'we we'ká benile alué Esukristo ra'ichálila ralámuli. 'Lige alué ra'íchili 'we a'wágame nejkúrale.

21 'Lige Páulo 'nátale simiame alé Rusaleni we'ká riógachi. Bajchaka siminálile alé ejiro Maseronia anilíchi. 'Lige alésíko uché bilena ejiro siminálile Akaya anilíchi. 'Lige alésíko siminálile alé Rusaleni anilíchi we'ká riógichi. Bo'né 'nátaga anile:



—Alé Rusaleni síkó arigá simeli ju ne alé Roma anilichi wa'lú we'ká riógichi.

<sup>22</sup> 'Lige júlale oká rió bo'né gu'rame alé Maseronia anilichi ejiro. Timoteo anilime nile bilé 'lige Erasto anilime nile alué uché bilé. 'Lige alué Páuloka alé we'ká riógichi Ebeso rejpile we'kabé rawé.

*Jena ruwimela we'ká ralámuli na'áwaligo alé we'ká riógichi Ebeso anilichi*

<sup>23</sup> 'Alige rawé alué ralámuli alé we'ká riógichi Ebeso mochígame 'we ayole, tabilé galegá alué 'we semati 'nátili Onorúgame boílá. <sup>24</sup> 'Lige alé asale bilé rió Remetrio anilime. 'Lige alué Remetrio newame nile alué u'kuchí re'obá apieri alué wa'lú re'obá napu ilile alé we'ká riógichi Ebeso, 'lige plátate newame nile alué u'kuchí re'obá. 'Lige alué wa'lú re'obá alé Ebeso ilígame alué mono Riana (Artemisa) nila nile alué re'obá alé ilígame.\* 'Lige alué rió ralineme nile alué u'kuchí re'obá plátate newárigime, 'we we'ká enomí meme nile alué rió 'lige alué uché jaré ralámuli nóchame abiénachigó. <sup>25</sup> 'Lige alué Remetrio, bayele suwábaga alué 'yuga nóchame, 'lige abiena alué uché jaré ralámuli abiénachigo napu mele ralinéga alué u'kuchí re'obá. 'Lige anele alué suwábaga bayesa alé:

—'Emi ralámuli, ramué ralámuli napu ekí alué u'kuchí re'obá ralineme niru, 'we ganíliga mochiru jena we'ká riógichi Ebeso ejperega napugiti 'we alá meme nírigime enomí alué u'kuchí re'obá ralinéga. <sup>26</sup> Alué Páulo 'we cha aní jena we'ká riógichi nawasa. 'Emi ralámuli 'la etiáguru alué Páulo la'sichi jena we'ká riógichi nawasa. 'Lige 'la akéguru 'emi ralámuli alieri ra'íchili benirio. Alué rió aníguru: «Alué tábiri napu ralámuli newá, tabilé 'la bijchiá Onorúgame ju.» 'Lige we'ká ralámuli jena we'ká riógichi mochígame 'ma alué Páulo oyérame júkuru. 'Lige amulí bochígimi jena ejiro Asia larigá mochí alué ralámuli alué Páulo ra'íchilála oyeria. <sup>27</sup> 'Lige tabilé 'la nímala alué ralámuli suwábaga alué Páulo oyérasa. Pe'wé 'ma tabilé 'la ra'íchámala alué ramué nochálála olagá. 'Lige 'ma tabilé napuínili ralámuli alé mono Riana re'obálachi. 'Ma tabilé nirámala ralámuli alué wa'lula Riana. Jipe bochígimi jena ejiro Asia alué Riana† oyérame ralámuli nírukuru. 'Lige aminamí bochígimi gawichí alarigá nírukuru. 'Lige pe abé 'libékomi alué ralámuli 'ma a'rémala alué Riana oyeria.

<sup>28</sup> 'Lige alué ralámuli alué ra'íchili akisá, 'lige 'la iwégame ayole alué ralámuli alué Páulo 'yuga. 'Lige a'wágame sináké ne'ole:

—¡Ye Riana wa'lula ju napu ramué ralámuli oyérame niru jena we'ká riógichi Ebeso mochígame! —sinale alué ralámuli.

<sup>29</sup> 'Lige suwábaga alué ralámuli napu ekí mochile alé we'ká riógichi Ebeso 'la iwégame ayole alué Páulo 'yuga. 'Lige oká rió Páulo gompaniérola cha'píliru alué ralámulite. Bilé Gayo anilime nile, 'lige bilé Aristarko. 'Lige alué oká rió cha'pisá, 'lige wijchí rekegá banagá o'tole alé 'mi napu napuime nile alué ralámuli alé we'ká riógichi Ebeso mochígame ra'íchili gatemia. <sup>30</sup> 'Lige alué Páulo siminálile alé napu o'tóleru alué oká rió. 'Lige alué ralámuli alué Esukristo oyérame tabilé elile napurigá simela alué Páulo alé 'mi napu o'tóleru alué oká rió. <sup>31</sup> 'Lige alué uché jaré rió e'wélala alé ejiro Asia ejperégame, napu alué Páulo amígola nile, alué ralámuli nábole ra'íchali anime napurigá tabilé simela Páulo alé napu o'tóleru alué oká rió. <sup>32</sup> 'Lige alué ralámuli napu napuile alé, 'la iwégame ne'ole alé jaga. We'ká alué ralámuli tabilé machile chonigá napuífuga alé. 'Lige pe'wé chibi anía jale alué ralámuli alé jsisá. <sup>33</sup> 'Lige alué ralámuli jurío júlale bilé rió alé napu mochile alué ralámuli tabilé jurío napurigá alué ruyémala alué ralámuli jurío tabilé chojkila níligo, Páulo 'nalina chojkila níligo. Alué rió julárigame Alejantro anilime nile. 'Lige alué Alijantro sekate anele napurigá alué ralámuli i'kilí jámala napurigá 'la gainámala ra'icha. <sup>34</sup> 'Lige alué ralámuli machisá jurío ko, 'lige abéchigo bochí anile alué ralámuli. 'Lige oká 'ora jale alué ralámuli ne'oa alé. 'Lige sinale alué ralámuli:

—¡Ye Riana wa'lula ju napu ramué ralámuli jena we'ká riógichi Ebeso mochígame oyérame niru! —sinale alué ralámuli alé jaga.

<sup>35</sup> 'Lige bilé rió wa'lula alé we'ká riógichi, alué rioka 'la umébafe alué ralámuli kilí jawia alé laniá jágichi. 'Lige anele kilí jábasa alué ralámuli:

—Suwábaga ralámuli napu ekí ejperéiru jena we'ká riógichi Ebeso, ramué ralámuli nírukuru alué nóchili napurigá repúpua alué wa'lú re'obá jena we'ká riógichi ilígame, alué wa'lula Riana re'obala. 'Lige alué wa'lula napu alé rewagáchika wijchile napu alué Riana ju, alué abiena repugime júkuru ramué ralámuli jena we'ká riógichi mochígame. <sup>36</sup> Napu aní ne 'la bijchiá ju. Tabilé 'wesi che animela tabilé bijchiá ko. Alekeri kilí jawa 'emi ralámuli, pecha che aniboa ta'chó 'la machigá. Bajchá 'we a'lá na'tawa. <sup>37</sup> 'Lige alué oká rió napu 'emi a'pale jeka, alué rió peka 'wesi tábiri chigólekuru alé re'obachi. 'Lige aminami

\* 19:24 E'nesi glosario «ídolo». † 19:27 Alué ralámuli Ebeso ejperégame tánime nile nejkúrali alué mono Riana napurigá 'la kúchigame nímala. E'nesi glosario «ídolo».

peka sayega ra'ichaguru alué Riana 'yuga. <sup>38</sup> 'Lige alué Remetrio, 'lige alué uché jaré napu newame ju u'kuchí re'obá plátate, ayósika alué rió 'yuga, 'lige 'la nerúkurú bilé rawé napurigá gatewa alué ra'íchili. 'Lige aminami 'la mochíkurú alué ralámuli e'wélala alué ra'íchili gateme. Alué 'yuga gatélime júkuru alué ra'íchili. <sup>39</sup> 'Lige tabilé gatésiga alé, 'liko uchéchigo bilena gatélime júkuru abé wa'lúlachi. <sup>40</sup> E'wélala sontalo jsisáká jena napu ramué mochí, ¿chonewa? Pecha chériká nílga ramueka. Alueka ramué 'yuga ayómala, ramué nejkumea mochiga mayega. 'Lige alué e'wélala ayosa, 'lige 'we ená nokimela.

<sup>41</sup> 'Lige alué rió wa'lula larigá anísá, 'ma ku júlale alué ralámuli a'boi ejperélachi.

## 20

*Jena ruwimela Páulo 'nátligo simea alé Siria anilichi*

<sup>1</sup> 'Lige 'ma kilí mochíbasa alué ralámuli alé we'ká riógichi, 'lige alué rió Páulo bayele alué ralámuli Esukristo oyérame alé mochígame ralámuli. 'Lige alué Páulo alé napubusa alué Esukristo oyérame, anele napurigá tabilé majaga mochímala alué ralámuli 'lige aminabi nokísimala Onorúgame oyérisia. 'Liko ariosi anele alué ralámuli alé mochígame, 'lige simile uché bilena alé ejiro Maseronia anilichi. <sup>2</sup> 'Lige alé ejiro Maseronia sebasa alué Páulo, 'we we'kaná we'ká riógichi eyénale oiláriga alué Esukristo oyérame ralámuli. 'Lige alé eyéniga uché bilena ejiro simile alué Páulo, Gresia anilime ejiro. <sup>3</sup> 'Lige alé ejiro Gresia asale alué Páulo bakiá mechá. 'Lige alésíko bárkochi simé olálige alé Siria anilichi, 'lige ta'chó 'moa alé bárkochi, machile alé bárkochi e'namio jaré rió jurío alué Páulo saíla alué Páulo me'linálime. 'Liko Páulo larigá machísáká, anile:

—Pe wijchí iligá ku alé Maseróniami simíroma ne —anile alué Páulo.

<sup>4</sup> Jaré rió 'yénale Páulo 'yuga. Bilé alué rió Sópate anilime nile, 'lige alué Sópate alé we'ká riógichi Berea bejtégame nile, Piro inolá nile. 'Lige uché bilé rió Aristarko anilime nile napu enale Páulo 'yúgachigó, 'lige uché bilé Segunto anilime nile. Alué oká rió alé ejiro Tesalónika mochígame rió nile. 'Lige uché bilé rió Gayo anilime si enale alemi alué Páulo 'yuga, Rerbe bejtégame nile. 'Lige alué rió Timoteo abiena enálechigó alemi. 'Lige alué rió Tíkiko, 'lige alué Trópimo abiena 'yénalechigó alemi. Alué oká rió alé ejiro Asia mochígame nile. <sup>5</sup> 'Lige bajchá simíbale alué Tíkiko 'lige alué Trópimo alé we'ká riógichi Tróasi anilichi. Alé buwele alué ralámuli ramué. <sup>6</sup> Ramueka bajchá, ta'chó simiba alé Tróasi, Bilipo simáruturu.

Napu'lige piesta suwisá napu go'yame nile baní tabilé kawali ro'érigame, 'lige bárkochi simáruturu alé Tróasi anilichi. Maligi rawé e'náruturu alé bárkochi. 'Lige alué ralámuli alué bajchá simíbagame alé, we'ká riógichi Tróasi mochile. 'Lige ramué alé Tróasi sebasa, alé mochíruturu gichao rawé alué ralámuli 'yuga.

*Jena ruwimela we'lisi ra'ichaligo Páulo Onorúgame nila ra'ichali*

<sup>7</sup> Pe kulí bilé rawé sawalachi rukó, napuítuturu ramué alé bilena galírale baní chi'winamia a'tabé napurigá ramué ralámuli 'la néláwa alué Esukristo. 'Lige alué rió Páulo we'ká ra'ichale Onorúgame nila ra'ichali bajchá ta'chó go'yá. Melénala uché bilena we'ká riógichi simínálile alué Páulo, alekeri we'lisi ra'ichale nasipa rukó si.

<sup>8</sup> 'Lige alué galí napu mochile alué ralámuli gepuga, baisámína chojkégame nile alué galí 'we re'pá iligame. Alé abé re'pá galíchi mochile alué ralámuli gepuga. 'Lige alé pachá we'ká uchule rajame aséitete rajérigame. <sup>9</sup> 'Lige bilé rió re'malí Eútko anilime, alé bentánachi asale gepuga alué ra'ichali. 'Lige alué re'malí gojchiá asale 'lige arigá gojchile alué ra'ichali gepuga ajtigé, cha we'lisi ra'icha illigame Páulo. 'Lige alué re'malí gojchigá ajtigé alé bentánachi, 'ma wijchile alé bentánachi ajtigé, 'lige 'ma mukule alé wijchí wijchigá. <sup>10</sup> 'Lige alué rió Páulo yati re'kile alué re'malí wijchisao alé. 'Lige sébaga napu bo'ile alué re'malí mukugá, gomuruka chujkibale alué rió mukúgame, 'lige anele alué uché jaré ralámuli alé jággame:

—'Emi ralámuli pecha majawa, pecha sewépuá, ye rió Eútko 'ma ku ajánale —anile Páulo alué ralámuli.

<sup>11</sup> 'Lige alué Páulo ku alé 'pa 'mole alé galíchi napu mochílige siné. 'Lige alué rió ku alé re'pá sebasa, 'lige chi'wánaga nachútale alué baní alé napurigá alué ralámuli Esukristo oyérame ralámuli 'we a'lá 'nátaga mochímala alué Esukristo. 'Lige alué baní go'sá bajchá, 'lige nujubá go'ale alué uché jaré go'ame. 'Lige bosasa, 'liko uchéchigo siné chojkile ra'icha alué Páulo, 'lige napusí che'lisá a'rele ra'icha. 'Lige simile alué Páulo uché bilena we'ká riógichi.

<sup>12</sup> 'Lige alué ralámuli 'ma ku galírale 'yúrale alué re'malí ku ajánigame. 'Lige 'we ra'sálale alué ralámuli alué re'malí 'ma ku ajániligame.

*Jena ruwimela Páulo 'we jigáligo sebánila alé Rusaleni*

<sup>13</sup> 'Lige ramueka bajchá simáruturu alé bárkochi mochiga alé we'ká riógichi Asoni anilichi. 'Lige alué rió Páulo pe wijchí iligá simile alésí. <sup>14</sup> 'Lige alué Páulo ramué najtepassa alé we'ká riógichi Asoni, 'lige alué Páulo 'móturu alé bárkochi ramué

'yuga. 'Lige simáruturu suwábaga ramué alé bákochi mochiga alé we'ká riógichi Mite-lene anilichi. <sup>15</sup> 'Lige melénala uchéchigo siné simáruturu bákochi. 'Lige simáruturu alé a'bemi napu gawí ilí ba'wichí nasipa Kio anilime. 'Lige uché melénala sebáruturu alé uché bilena ba'wichí nasipa ilígame gawí Samos anilime. 'Lige uché melénala sebáruturu alé we'ká riógichi Mileto anilichi. <sup>16</sup> Páulo 'we jigaga enale, yati sebánilile alé Rusaleni alé piéstachi asínaliga, alué napu Pentikostesi anilime ju napu 'lige 'wile ri'ligó. Alekeri tabilé ujhábale barko alé Eboso anilichi we'ká riógichi, ejiro Asia. Pe simírale.

*Jena ruwimela Páulo ra'íchili ruyéligo alué ralámuli alué e'wélala alé Eboso mochígame*

<sup>17</sup> 'Lige sebasa alé we'ká riógichi Mileto anilichi, alué Páulo júlale jaré rió bayénaliga alué e'wélala Esukristo oyérame nulame napurigá simámala alé napu asale bo'né Páulo. <sup>18</sup> 'Lige alué ralámuli e'wélala sebasa alé napu ajtíle Páulo, 'lige alué Páulo anele alué e'wélala:

—Emi ralámuli 'we a'lá machíguru chu'sime nílige ne napu'lige nawasa jena ejiro Asia. <sup>19</sup> 'Lige nabí rawé e'wáturu ne napurigá nuléligo Esukristo ne'chí. Neka tabilé siné rióliga eyéname ke. I'sínimi 'we seweka eyéname ke ne. I'sínami jurío ralámuli resí olánile ne'chí, abirigáchigo 'la e'weme kéturu ne alué Wa'lula Esukristo. <sup>20</sup> 'Lige ne tabilé a'réturu rejcholi ruyea 'emi ralámuli, suwábaga Onorúgame nila rejcholi, napugiti Onorúgame nila rejcholi ka 'we a'lá kame 'emi ralámuli 'yuga. 'Lige neka ruwíturu Onorúgame ra'ichálila panápurimi, we'ká riógachimi o pachami galírilimi. <sup>21</sup> 'Lige ne 'la iwégame ruyéturu alué ra'ichali alué ralámuli jurío 'lige alué ralámuli tabilé jurío abiénachigó, napurigá 'la e'wémala Onorúgame napurigá 'ma a'rémala resítiri 'nátíli, 'lige napurigá 'la bijchígimela alué Wa'lula Esusi nila ra'ichálila.

<sup>22</sup> › 'Lige jípeko alé Rusaleni simé olá ne. Pe Onorúgame Alawala gite simé olá ne alé Rusaleni, 'lige ne tabilé machí alarigá nimio alé Rusaleni. <sup>23</sup> Pe yeka 'la machí ne: napu'lige ne 'mimi ichúrimi we'ká riógichi eyénachi, Onorúgame Alawala aneme ke galírale bajcháwará ne 'lige 'we resí ikiméará ne. <sup>24</sup> 'Lige neka rekó alué alieti machié, neka tabilé chéla rekó me'liae ne a'kinana. Neka pe 'la sébali olánili napurigá nulá alué Wa'lula Esusi. Júlaturu ne ruyéniliga chiena 'la ko Onorúgame ralámuli 'yuga.

<sup>25</sup> › Neka 'la sébali machí tabilé uché etémala 'emi ne'chí, tabilé 'wesi. Ne 'ma 'la ruyé 'emi churigá nulá Onorúgame. <sup>26</sup> Alekeri jípeko tabilé chojkíla nímala ne 'emi ralámuli injierno simásaká napu'lige

suwisá. <sup>27</sup> Neka 'la ruwíturu suwábaga napurigá najkí Onorúgame. Suwábaga 'we 'la ma'chígime ruyéturu ne 'emi. <sup>28</sup> 'La 'nátaga mochiwa 'emi ralámuli e'wélala a'bopi. Abiena 'we 'la repúpa suwábaga Onorúgame oyérame napu Onorúgame Alawala 'yale napurigá repúpua. Alué Esusi mukule gu'iriga alué ralámuli napu bo'né oyérame nílige. <sup>29</sup> Ne 'la machí, napu'lige ne simísá jena, jaré ralámuli jsmela jena ralámuli najsibumia pe napurigá bilé ajágame jami oyame niraga. <sup>30</sup> Jaré 'emi a'boi abiénachigó alarigá nímala. Alueka 'yégiga ra'ichámala 'lige jaré 'emi bijchígimela 'lige 'ma si simámala. <sup>31</sup> 'We 'la 'nátaga 'emi ralámuli, tase we'kawawa napurigá 'sile ne. Bakiá bamí ruyékuru ne suwábaga ye rejcholi. Rawemi rukomi ruyé ne 'emi nalaka napurigá cha'pimela 'emi alué 'nátíli Esusi nila.

<sup>32</sup> › 'Lige jipe tani ne Onorúgame napurigá Onorúgame 'we a'lá repúmala 'emi ralámuli. Onorúgame ra'ichálila 'we 'la gu'irimala 'emi napurigá 'la sébali ralámuli nímala 'emi napurigá 'la narémala 'emi napu Onorúgame nejímorilige. <sup>33</sup> 'Lige neka tabilé siné koruka eyena uché jaré ralámuli nila enomí nibilé o'pacha. <sup>34</sup> 'Emi ralámuli 'we a'lá sébali machíguru larigá ko ne. Napu'lige ne bilé tábiri resí lásaká, bo'né sekálate nóchame nóchiga meka neka napu ne bo'né resí la. 'Lige aminami alué ye ralámuli napu ne 'yuga eyena jena, ne 'yame júkuru alué napu resí 'la alué ralámuli. <sup>35</sup> 'Lige ne nabí 'we a'lá ruwíguru churigá nochámala 'emi ralámuli. Nocháwaguru 'emi ralámuli o'maka nakúriga, alué nayume 'lige alué napu ta'mé 'we ikíronti ju nóchaga, gu'rowa nóchaga. Tabilé we'kawawa napu aní alué Esusi ra'ichálila: «Abé a'lá ju kógilia me'tagá narekia.»

<sup>36</sup> 'Lige 'ma lanisá alué Páulo, 'lige chojkóbisiga ilíbale. 'Lige 'ma suwábaga alué ralámuli chojkóbisiga jábale. Alué rió Páulo tánele Onorúgame napurigá 'la gu'irimala alué ralámuli e'wélala Onorúgame oyérame. <sup>37</sup> 'Lige alué ralámuli nalaka gomurule 'lige chu'mile alué Páulo 'we chálaga. <sup>38</sup> 'We seweka mochile napugiti Páulo aniligame 'ma tabilé uché etéwili nílige. 'Lige alué ralámuli alé si simíbale Páulo 'yuga alé napu barko chujkule.

## 21

*Jena ruwimela Páulo simíligo alé Rusaleni*

<sup>1</sup> 'Lige ramueka jmirituru alé bákochi, alué ralámuli abajá ejtebige. 'Lige simáruturu ramué bákochi si'né alé Kos anilime gawí ilígachi ba'wichí nasipa. 'Lige alé che'labaru ramué. 'Lige uché melénala simáruturu ramué alé Róراسi anilime gawí ilígachi ba'wichí nasipa. 'Lige alé simasa,

sebáruturu Pátara anilichi we'ká riógichi.  
 2 'Lige alési najteparu bilé barko napu simime nile alé Benise rewégachi. Abalé ejiro Siria nile. 'Lige ramué alué bárkochi jímirituru, 'lige simáruturu ramué.

3 'Lige ramué ba'wichimi nasípami e'yénaga etéreturu alué gawí ba'wichi nasípa ilígame alué Chipre anilime gawí. 'Lige ramueka alé wajtoná niraga simáruturu, alué gawika alé o'iná niraga iligéturu alué Chipre anilime. 'Lige ramué simáruturu alé 'mimi we'ká riógichi Tiro anilichi napu ejiro Siria ju. Alé sébale alué barko napugiti re'kíbúmilí nílígame alé alué karga napu muruka enale alué barko.

4 'Lige ramué alé bárkochi e'tigisa simáruturu alé nasípa we'ká riógichi. 'Lige ramué alé we'ká riógichi najteparu jaré ralámuli Esukristo oyérame. 'Lige ramué alué ralámuli 'yuga mochiru gichao rawé. 'Lige alué ralámuli Esukristo oyérame Onorúgame Alawala gu'írole napurigá 'la machimela alakimeo alué Páulo alé we'ká riógichi Rusaleni. 'Lige alekeri anele alué ralámuli alué Páulo:

—Tase simíboha mué rió alé we'ká riógichi Rusaleni —anele alué ralámuli alué Páulo.

5 'Lige alué Páulo tabilé e'wale rekó lánilíe. Arigáchigo simárúkó uchéchigo siné. 'Lige alué ralámuli alé mochíggame alué Esukristo oyérame rió 'lige a'boi 'yula umugi, 'lige alué 'kúchila abiena, alué suwábaga e'yénigituru ramué 'yuga alé suwemi a'bé alé napu ilí alué wa'lú ba'wí, 'lige alé sebasa chojókobisiga jábarituru ramué o'maka iwérali tánimia Onorúgame. 'Lige ariosi aneru alué we'ká ralámuli alé jággame. 6 'Lige 'ma ariosi anesa, jímirituru alé bárkochi ramué. 'Lige alué we'ká ralámulika pe alé ro'ile, ku alé a'boi galíachi simíbale.

7 'Lige ramué alé we'ká riógichi Tiro e'yénaga, sebáruturu alé we'ká riógichi Tolemáira anilichi. 'Lige alé sebasa, reporáruturu ramué alué we'ká ralámuli Esukristo oyérame alé epperéggame. 'Lige ramué bilé rawé mochíruturu alé alué ralámuli 'yuga. 8 'Lige melénala be'á uchéchigo siné simáruturu ramué napu eki e'nárigé alé alué rió Páulo 'yuga. 'Lige pe aba a'lige rawé sebáruturu ramué alé bilena we'ká riógichi alé Sesarea anilichi. 'Lige ramué alé sebasa, simáruturu alé alué rió Belipe bejtélachi. Alué rió Belipe 'we a'lá benírime nile Onorúgame ra'ichálila. Alué Belipe nile bilé alé gichao rió napu owíliru alué makué oká rió gite alé Rusalénichi alué go'ame nachutálíchi.\* 'Lige ramué ralámuli alé mochíruturu alué rió Belipe bejtélachi. 9 'Lige alué rió Belipe naó malégame rió nile, bijí i'wé nile, tabilé 'cho 'yúgame. Alué

rió nile napu ruwime nílige napu anele Onorúgame napurigá aminabi ruyémala uché jaré ralámuli. 10 'Lige ramué we'kabé rawé mochíruturu alué rió Belipe bejtélachi. 'Lige ramué alé mochírígichi nawáturu bilé rió alé Juréaka simíggame napu Agabo anilime nile napu ruwime nile napu anele Onorúgame. 11 'Lige alué rió Agabo anilime alé nawagá, bujele alué rió Páulo wasíbala. 'Lige alué wasíbala bujesa 'lige bulele alué Páulo ronólachi 'lige aminami sekálachi. 'Lige anile alué rió:

—Onorúgame Alawala ruwí ye ra'íchili napurigá ne mué ruyémala: «Alé Rusaleni mochíggame ralámuli jurío, alué ralámuli bulémala alué rió ye wasíbala o'kame. 'Liko 'ma 'yáwali ju alué ralámuli tabilé jurío napurigá gastigárimala.»

12 'Lige ramué Páulo gompaniérola 'lige alué ralámuli alé abajá mochíggame, napu'lige alué ra'íchali akisuga, 'we a'wágame anéreturu Páulo:

—¡Tase simíboha mué alé Rusaleni! —anéreturu ramué alué rió Páulo.

13 'Lige Páulo nejele alanilía:

—'Emi ralámulika, ¿chonigá naligiabaché pe ne'chí sewétigá? Tabilé chérikáwé rekó ralámulika ne'chí bulé, 'lige rekó me'ae ne'chí alé Rusaleni mochíggame ralámuli. Neka 'ma jena ajtíkuru mukumea alué Wa'lula Esusi oyériga —anile alué Páulo alanilía.

14 Páulo tabilé e'wale rekó sulilia. 'Liko 'ma tabilé che aneru ramué. 'Liko pe aneru:

—Oláwogó napurigá najkí Onorúgame —anéreturu ramué alué Páulo.

15 'Lige pe'tá i'libeko 'ma jigáruturu ramué 'lige 'ma simáruturu ramué alué Páulo 'yuga alé 'párimi Rusaleni anilichi we'ká riógichi wijchí jaga. 16 'Lige jaré alué ralámuli alé Sesarea mochíggame alué Esukristo oyérame ralámuli, alué si simíbaturu ramué 'yuga. 'Lige ramué ralámuli alé Rusaleni sebasa, 'lige simáruturu Manasoni bejtélachi 'lige we'kabé rawé mochíruturu ramué alé. Alué rió Manasoni 'yako alé Chipre anilichi bejtégame nile. Alué rió 'we 'yasi Esusi oyérame nile.

*Jena ruwimela Páulo ra'ichaligo Santiago yuga*

17 'Lige alué ralámuli alé Rusaleni mochíggame Esukristo oyérame 'we ra'sálá ramué alé sebásiga. 18 'Lige melénala alué Páulo si simíturu ramué 'yuga alué Santiago si ra'ichamia. 'Lige alé alué rió Santiago bejtélachi we'ká rió mochile alué e'wélala napu repume nile alué Esukristo oyérame. 19 'Lige alué Páulo alé sébaga repórole alué ralámuli, 'lige ruyéturu alué ra'íchili napurigá 'sílga Onorúgame alué Páulo 'yuga

\* 21:8 E'nesi Hechos 6:5.

alé 'mimi eyénachi we'kaná we'ká riógichi alué ralámuli tabilé jurío epperélachi. <sup>20</sup> 'Lige alué ralámuli alué ra'íchili akisá, 'lige yati cheliera 'yale Onorúgame. 'Lige alué a'boika anele Páulo:

—Mué Páulo Esukristo oyérame napurigá ramué ralámuli, 'la machiáguru alué ralámuli jurío we'ká mili mochigo alué Esukristo oyérame jipe jena. 'Lige alué oyérame anime ju napurigá 'la oyérawa alué nulálí napu nulale alué Moisesi. <sup>21</sup> 'Lige alué ralámuli suwábaga 'la akériguru mué saega ra'íchachi Moisesi nila nulálí olagá. Akériguru mué alanigá eyenio: «Tase nokiboa 'emi napurigá nulálige alué Moisesi 'ya ajtígame rió, 'lige tase rijpunawa alué 'emi 'kúchila isílala napurigá nokiamé niru ramué ralámuli jurío, 'lige tase oyérawa napurigá nokiamé niru ramué», alarigá akériguru. <sup>22</sup> ¿Chonokiboa ramué jipe? Napu 'lige alué ralámuli akisá mué jena ajtígaraó, we'ká napuímala mué saíla. Tabilé ganílimala jena ajtígachi mué. <sup>23</sup> Alekeri 'la sébali olawa napurigá aníá ramué. Jena we'ká riógichi mochí naó rió alué Esukristo oyérame. 'Lige alué rió ya'má sébali olale napurigá anélige 'ya Onorúgame napurigá abé 'la na'tawa Onorúgame 'yuga.† <sup>24</sup> Mué rió Páulo bayérowaká alué naó rió alé 'mi wa'lú re'obachi, 'lige alé ba'ichí bajkíboa alué ralámuli 'yuga. Yeka aniamé ju 'ma 'la bi'wígame ju mué alawala napurigá nulá Moisesi ra'ichálila napurigá 'la bajkimela mué alé re'obachi napu ajtí Onorúgame. 'Lige 'ma najtétawa alué ajágame napu kógime ju Onorúgame, 'liko 'ma 'la rijpunawa re'wániga alué ralámuli gupala. Alarigá 'la machimela alué ralámuli jurío mué 'la oyérame ko alué Moisesi nila rejcholi. Machimela tabilé bijchiá ko napu anílige alué uché jaré ralámuli jurío mué saíla. <sup>25</sup> Alué ralámuli Esukristo oyérame alué tabilé jurío, 'ma ruyérugame niru 'we 'ya ramué alué rejcholi napurigá tajché lagá mochímala alué ralámuli alué Moisesi nila rejcholi gite. Pe u'kabi alué Moisesi nila rejcholi 'la ju oyérialá, napurigá jurío tabilé ayómala alué ralámuli 'yuga. Tabilé go'poa alué sa'pá alué tábiri rejte ne'wárigime kógilime. 'Lige aminami tabilé elátiri go'poa. 'Lige aminami tabilé alé ajágame tabilé ma'chí paka me'lirúgame elalá. 'Lige bilé rió mukí 'yúgame, tabilé se'nú mukí 'yuga gojchimeli júkuru. 'Lige alué mukí gunégame, tabilé se'nú rió 'yuga gojchimeli júkurchigó. Pe ye rejcholi pe'kabi 'la oyéramili júkuru alué ralámuli tabilé jurío.

*Jena ruwimela Páulo 'we resí ikiligo*

<sup>26</sup> 'Lige alué Páulo bayérole alué naó rió. 'Lige melénala bajkile alé ba'ichí alué

ralámuli 'yuga, 'ma bi'wígame alawégame aniamé nile napurigá nulame nile Moisesi. 'Lige wa'lú re'obachi bajkile alué balé ruyemia gichao rawé kachi me'limé orile alué ajágame Onorúgame kógimia napurigá Onorúgame 'ma ku a'lá narémala alué naó rió.

<sup>27</sup> 'Lige amulí guwárachi, jaré ralámuli jurío mochile alé re'obachi ejiro Asia mochígame, alué ralámuli etele alué Páulo alé re'obachi ajtigó. 'Lige alué ralámuli 'we cha anile alé jaga. 'Lige alué uché jaré ralámuli alé mochígame 'ma na'áwale alué Páulo 'yuga, alué ralámuli ejiro Asia mochígame cha chárigá ruwíligame alué ra'íchili. 'Lige alué ralámuli cha'pile alué rió Páulo. <sup>28</sup> 'Lige anile alué ralámuli e'wele ra'íchaga:

—'Emi ralámuli israelita, nejkúrisi gastigárilichi ye rió. Ye rió ju bochígimi we'ká riógichi eyéname chátiri ra'ichali beníriga ralámuli jurío 'lige aminami tabilé jurío. 'Lige ye rió tabilé nirame ju Moisesi nila nulálí. 'Lige aminami tabilé nirame ju re'obá. 'Ma bayele jaré ralámuli tabilé israelita napurigá jena wa'lú re'obá ra'pichila e'yénamala napu tabilé lisensia 'yalime ju napurigá alemi e'yénamala. Onorúgame tabilé najkí napurigá alarigá nokimela alué ralámuli.

<sup>29</sup> 'Lige alarigá anile alué ralámuli napugiti 'yabesi etéligame alué Páulo alué rió 'yuga eyénachi alé Ebeso bejtégame rió alué Trópimo anilime. 'Lige alué ralámuli mayele alué Trópimo alé wa'lú re'obá ra'pichilachi bajkiligo alué Páulo 'yuga. 'Lige alué Trópimo tabilé jurío ralámuli nile.

<sup>30</sup> 'Lige suwábaga alué ralámuli alé we'ká riógichi mochígame 'we ayole Páulo 'yuga. 'Lige 'we júmaka jsile alué ralámuli alé napu ilile Páulo 'lige 'ma cha'pile. 'Lige alué ralámuli Páulo cha'pisá, 'lige banasuka banagá ma'chí pale alé re'obá ra'pichilachi. 'Lige alé ma'chí pasa, 'ma 'yérale alé yochi. <sup>31</sup> 'Lige alué ralámuli 'la iwégame wejpisole alué Páulo. 'Lige me'lináliga nokale alué Páulo alé. 'Lige bilé rió male alué abé wa'lula sontalo ruyemia, alé napu mochile alué sontalo. 'Lige alé sebasa, anele:

—Mué rió wa'lula, ye ralámuli jena we'ká riógichi Rusaleni mochígame 'la iwégame na'awa —anile alué rió alé sebasa napu asale alué wa'lula sontalo.

<sup>32</sup> 'Lige alué abé wa'lula sontalo, yati bayérole jaré sontalo gapitánila, 'lige we'ká sontalo 'yuga. 'Lige simíbale júmika alué we'ká ralámuli na'áwame e'nemia. 'Lige alué ralámuli alué Páulo wejpisoa uchule, 'lige alué ralámuli we'ká sontalo etesa, a'rele wejpisoa. <sup>33</sup> 'Lige alué wa'lula sontalo alé a'bé simile. 'Lige nulale cha'píniliga alué

† 21:23 E'nesi glosario «dedicar a Dios».

Páulo. 'Lige nulale buléniliga oká karénate alué Páulo. 'Lige 'ma bulugá ajchasa alué Páulo, 'lige alué wa'lula sontalo rukele alué ralámuli. Anele:

—¿Chieri ju ye rió? ¿Tachiri nasibú ye rió 'emi ralámuli 'yuga? —anele alué rió.

<sup>34</sup> 'Lige alué ralámuli pe napuchíbiriga ne'oa jale alé. Tabilé 'la bi'lepi ra'ichale alué ralámuli. 'Lige alué rió wa'lula sontalo tabilé 'la námale lanichi alué ralámuli alé jaga. 'Lige alué ralámuli cha bochí aníá jáligame. 'Lige alué wa'lula sontalo nulale napurigá o'toboa alué Páulo alé galírale napu mochime nile alué sontalo. <sup>35</sup> 'Lige amulí seba galírale napu ilile mulá, o'wíniga o'tóliru alué Páulo napurigá ta me'limela alué ralámuli, cha ayóligame alué ralámuli Páulo 'yuga. <sup>36</sup> Guwana e'yénale 'we ne'ósiga: —¡Me'lisí alué rió! —anísiga e'yénale.

*Jena ruwimela Páulo ruwíligo tabilé chojčila ko*

<sup>37</sup> Alué sontalo amulí bajchachi alué Páulo alé alué a'boi galílahi, 'lige rukele alué Páulo alué wa'lula sontalo griego ra'ichaga:

—¿'La lisensia nejí mué wa'lula napurigá ne ra'ichámala pe u'kabi ra'íchili?

'Lige alué wa'lula nejele:

—'La benégame ju mué griego ra'ichaga, neka tabilé machié mué griego ra'ichame ko. <sup>38</sup> ¿Tabilé mué ju alué rió Ejipto bejtégame napu geriyo nílige, napu 'yuga eyénilige naó mihi geriyo jami mejkami tabilé riógachi?

<sup>39</sup> 'Lige alué Páulo anile:

—Neka pe jurío ju, alé we'ká riógichi Tarso anilichi ochérigame ju ne, alé wa'lúlachi we'ká riógichi ejiro Silisia anilichi. Pe rekó lisensia 'yáwagó ne napurigá ra'ichámala ne alué ralámuli 'yuga.

<sup>40</sup> 'Lige alué wa'lula sontalo 'la elile napurigá alué Páulo ra'ichámala alué ralámuli 'yuga. 'Lige alué Páulo o'weti ilisale alé galí muláchiri re'pá ajtégé. 'Lige alué Páulo o'weti ilísiga, 'lige sekate ra'ichaga, i'kilí mochíbale alué ralámuli, 'lige anele alué we'ká ralámuli ebreo ra'ichaga:

## 22

<sup>1</sup> —'Emi ralámuli jurío napurigá ne 'lige 'emi e'wélala jurío abiénachigó, 'we 'la gepusi ye ra'íchili churigá 'la nemime ne.

<sup>2</sup> 'Lige alué ralámuli alué ebreo ra'ichachi akisá, abéchigo kilí mochíbale alué ralámuli alé. 'Lige alué Páulo anele alué ralámuli:

<sup>3</sup> —Neka pe bilé rió jurío júké'é, alé Tarso anilichi we'ká riógichi ochérigame, alé ejiro Silisia anilichi. 'Lige u'lubéka jena Rusaleni bejterá ne. 'Lige jena asagá beníruturu ne alué Gamalieli anilime riote alué nulalí 'ya nerúgame. 'Lige ne 'we oyérame ju Onorúgame napurigá nokame ju

'emi ralámuli. <sup>4</sup> 'Lige ne 'yako 'we najátame ke ne alué ralámuli napu oyérame ke alué Nuebo Bowé, riótiri 'lige umugítiri. 'Lige 'ma cha'písá, nejime ke ne alé e'wélalachi napurigá me'limela. Ne chojkila kéturu napurigá suwimela alué ralámuli. <sup>5</sup> 'Lige alué abé wa'lula balé, 'lige alué uché jaré e'wélala alé wa'lú re'obachi nulame, suwábaga alué ralámuli 'we a'lá machíguru ne alarigá 'sliigo. 'Lige alué ralámuli 'yáturu ne'chí osilí napurigá o'tomela ne alé we'ká riógichi Ramasko anilichi, napurigá ne 'yámala alué ralámuli jurío alé Ramasko mochígame napurigá eliwa ne napurigá cha'pimela ne alué ralámuli Esukristo oyérame alemi mochígame, napurigá jeka Rusaleni a'pámala ne bulugá napurigá gastigáriwa jena alué ralámuli.

*Jena ruwimela Páulo ruwíligo churigá a'réligo alué resítiri nátili*

<sup>6</sup> Páulo uché rajpé ra'íchili ruwile, 'lige anile:

—'Lige ne 'mi alemi bowichimi enágichi alé Ramasko simea, 'lige amulí sébachi ne alé we'ká riógichi Ramasko anilichi, 'lige rawé kéturu amulí rawilichi, 'lige a'wágame ra'ósaga ilíbaturu alé 'pákana rewagáchika. 'Lige noligá ra'ósiga ilíbaturu alé napu ne iligé. 'We rasórume kéturu alué ra'ósali. <sup>7</sup> 'Lige ne 'ma wijchí bo'íbaturu. 'Lige alé wijchí bo'igá bilé ra'íchali akéturu ne. 'Lige aníéturu alué ra'íchali: «Sauli, Sauli, ¿chonigá sayega eyena mué rió ne'chí 'yuga?», aníchane alué ra'íchali alé. <sup>8</sup> 'Lige ne anéturu: «¿Chieri ju mué sikaniá?», anéturu ne alué ra'íchili. 'Lige aníéturu alué ra'íchali: «Ne rió ju Nasareta bejtégame alué Rabi rijámala napu nawámili nílige, napu mué najatu resí olániliga, alué ju ne.» <sup>9</sup> 'Lige alué ralámuli napu ne 'yuga e'yénilige alemi, alueka 'we a'lá sébali etele alué ra'ósali, 'lige 'we majale. 'Lige alué ra'íchili napu ne akele, alué ralámuli tabilé akele. <sup>10</sup> 'Lige neka rukéturu: «Mué Wa'lula, ¿chu'símili júkó ne?» 'Lige alarigá nejele: «Ilísiwa mué alé, 'lige yati simiboa alé 'mimi we'ká riógichi Ramasko anilichi. 'Lige mué rió alé we'ká riógichi Ramasko sebas, alé bilé rió ruyémala mué churigá 'símio mué.» <sup>11</sup> 'Lige alué ra'ósali 'ma tabilé ma'chílime newáturu ne busila. 'Lige alué ralámuli alué napu ne 'yuga e'yénilige, alué ralámuli sekachí cha'pígá baníruturu ne'chí alé miná we'ká riógichi Ramasko anilichi.

<sup>12</sup> › 'Lige alé we'ká riógichi Ramasko anilichi asale bilé rió Ananíasi anilime. 'Lige alué rió 'we a'lá sébali olame nile alué Moisesi nila nulalí. 'Lige suwábaga alué ralámuli jurío alé we'ká riógichi Ramáskochi mochígame 'we a'lá nirame nile alué rió Ananíasi. <sup>13</sup> 'Lige alué rió

Ananías nawáturu alé napu ne ajtigé ne'chí e'nemia. 'Lige aniéturu alué rió alé nawasa: «Mué Sauli, ramué okaka jurío niru, ku 'la ma'chílime níkala mué.» Napu'lige ne lanésiga, yati ku ma'chili ne, 'lige etiáturu ne alué rió. <sup>14</sup> 'Lige aminami aniéturu alué rió Ananías: «Onorúgame 'we gu'irile alué ralámuli 'ya mochígame ramué rijimala, Onorúgameka 'nátales 'we 'ya napurigá mué rió 'la machimela churigá olánilia Onorúgame ramué, 'lige aminami napurigá mué 'la etémala Esusi 'la sébali olame tajsiné che'sime, 'lige aminami napurigá mué akimela bo'né alué rió ra'ichachi. <sup>15</sup> 'Lige Onorúgame najkíguru napurigá mué suwábaga ralámuli ruyémala alué napu etele mué abiena napu akele mué. <sup>16</sup> 'Lige jipe tabilé aminabi buwewa mué. 'Lige yati rewarárigame niwa mué rió alé wa'lú ba'wichí bochígimi bokuika, alué Wa'lula Onorúgame tániga e'kali napurigá e'kámala mué na'tálima.»

<sup>17</sup> 'Lige alué Páulo aminabi ruwile ra'ichili: —'Lige ne ku jena Rusaleni sebasa, simigéturu ne alé wa'lú re'obachi Onorúgame 'yuga ra'ichamia. 'Lige ne alé iligá Onorúgame 'yuga ra'icha, Onorúgame etiáturu ne <sup>18</sup> 'lige etiáturu ne alué Wa'lula napu ne'chí nuleme ju.

› 'Lige aniéturu alué Wa'lula: «Mué Páulo yati simiboa jena Rusaleni asagá. Alué ralámuli jena Rusaleni mochígame pecha bijchígimiligó mué ra'ichálila churigá ko ne», aniéturu alué Wa'lula. <sup>19</sup> 'Lige ne anéturu: «Mué Wa'lula, suwábaga ralámuli jena mochígame 'we a'lá sébali machí ne 'we íchúrimi u'kuchí jurío re'obálachi eyéname ko ne alué ralámuli mué oyérame 'yuga, 'lige ne nuleme ke napurigá cha'pimela galírale mo'amia alué ralámuli, 'lige aminami nula me ke ne wejpisóniliga alué ralámuli mué oyérame. <sup>20</sup> 'Lige alué Siteba me'liachi, alué mué ra'ichálila ruwime, 'lige ne alé iligéturu alué rió me'liachi. 'Lige ne 'we a'lá niráturu napurigá me'liboa alué rió. 'Lige aminami ne repúturu alué ralámuli o'páchala napu bujale alué ralámuli alué Siteba bajsibumia.» <sup>21</sup> 'Lige alué Wa'lula ané ne'chí: «Simiboa mué alé 'mimi mejká napurigá benírimala mué Onorúgame nila ra'ichali alué ralámuli tabilé jurío.»

*Jena ruwimela we'ká sontalo wejpisónaligo alué Páulo*

<sup>22</sup> 'Lige alué lakí ra'ichali gepusa alué ralámuli, 'lige uchéchigo siné chojkile alué ralámuli bochí anía ne'oa. 'Lige e'wele sináká anile alé jaga:

—Yati me'liboa alué Páulo, cha 'sime rió ju alué, tabilé we'lisi ajagá a'rewa alué rió jena —alarigá sinale alué ralámuli alé jaga.

<sup>23</sup> 'Lige alué ralámuli bijí 'we ne'oa jágichi alé, o'pacha bujagá lowagá anile alué ralámuli ayoga, 'lige aminami alué we'étiri 'pari paka anile. <sup>24</sup> 'Lige alué abé wa'lula sontalo nulele alué uché jaré sontalo alué Páulo cha'píniliga, napurigá alé galírale bajchawa alué a'boi sontalo galílachi. 'Lige aminami nulele napurigá alué sontalo wejpisoka rukémala alué Páulo tachiri najсібúliga alué ralámuli 'yuga, chonigá aliena ayóliga alué ralámuli alué Páulo 'yuga. <sup>25</sup> 'Lige amulí wejpiá alué Páulo alué wi'chí sipanárigamete, 'lige anele alué Páulo alué sontalo gapitánila alé ilígame:

—¿'La lisensia ni mué napurigá wejpisómala bilé rió romano peka 'cho rukigá tachiri najсібúliga ne?

<sup>26</sup> 'Lige alué gapitani alué ra'ichili akisá, simile alué abé wa'lula sontalo e'nemia. 'Lige simigá alué gapitani alé anele:

—'We a'lá 'nátaga, siné kachi cha 'simirépokué mué alué rió 'yuga. Alué rioka 'we najtékame ju, 'lige aminami romano ju —anile alué rió simigá alé 'mimi alué abé wa'lula sontalo e'nemia simiá.

<sup>27</sup> 'Lige alué abé wa'lula sontalo yati simile e'nemia alué Páulo. 'Lige rukele alué abé wa'lula sontalo alué Páulo nawiga alé:

—¿'La bijchiá romano ju mué? —anele.

'Lige alué Páulo nejele:

—Júwe —anile alué Páulo.

<sup>28</sup> 'Lige alué abé wa'lula sontalo, anele:

—Ne níriká we'ká enomí najtigí'é romano gainalia —anile alué abé wa'lula sontalo.

'Lige alué Páuloka nejele:

—Romano ju ne, ne o'nólaka romano nílgame, alekeri romano ju ne —anile alué Páulo.

<sup>29</sup> 'Lige alué sontalo alué Páulo wejpisónalime ku a'mibé simíbale. 'Lige alué abé wa'lula sontalo 'we majaga etele alué Páulo machisáká romano ko.

*Jena ruwimela Páulo ruwíligo e'wélala jurío 'yuga ra'ichaligo*

<sup>30</sup> 'Lige melénala alué abé wa'lula sontalo, 'we machináilile tachiri najсібúliga alué Páulo alué ralámuli 'yuga, chonigá aliena ayonia alué Páulo. 'Lige nulale ma'chí pániliga alué Páulo. 'Lige nulale napurigá suwábaga napubuwa alué balé e'wélala, 'lige aminami alué ralámuli e'wélala selígame abiena 'ma bayéiru aléchigó napurigá napubuga mochiga rukémala alué ralámuli tachiri najсібúliga alué Páulo alué ralámuli 'yuga. 'Lige alué ralámuli suwábaga 'ma napuisa, 'lige alué Páulo alé o'wemi eláleru alué we'ká ralámuli mochígichi.

## 23

<sup>1</sup> Lige alué Páulo 'we o'wé e'nele suwábaga alué e'wélala alé mochígame. Lige Páulo anele alué e'wélala:

—Emi ralámuli jurío napurigá ne, 'la e'wame ju ne napurigá nulá Onorúgame 'yasi, 'lige jipe abiena, 'lige tabilé chélagá Onorúgame 'yuga.

<sup>2</sup> Lige alué wa'lula balé Ananíasi anilime, nulele Páulo chu'ala wejpisóniliga ra'icha ilígichi. Nuléleke'é alué ralámuli alé a'mulipi jágame napu alué Páulo ilile. Lige alué Páulo nejele alué balé lanime akisá, anile:

<sup>3</sup>—Onorúgame wejpinelama mué rió. Mué rió 'we semáriga asagá aní kaka amóbaka, 'lige alué mué alawálaka 'we chóligame ke asagá aní alé. Mué 'we a'lá rejcholi ruyetékuru, 'lige pe chátiri ra'íchili ruyé aní mué alué ralámuli. Mueka ¿chonigá nulébeché ne'chí wejpiniliga? Pe sayega ra'icha mué rió alué 'we a'lala ra'íchili 'yuga.

Lige alué ralámuli alé mochígame anele alué Páulo:

<sup>4</sup>—Mué rió 'nalina 'we chátiri ra'icha alué wa'lula balé 'yuga, alué napu Onorúgame 'yale nóchili —anele alué ralámuli.

<sup>5</sup> Lige alué Páulo anele:

—Emi ralámuli, neka tabilé machié alué rió wa'lula balé ko. Neka pecha larigá ra'ichámilikó alué rió olagá, 'la machisáká ne wa'lula balé ko alué rió. Alekeri gite aní alué osilí Onorúgame ra'ichálila: «Tabilé chátiri ra'ichawa alué wa'lula nulame 'yuga.»

<sup>6</sup> Lige alué Páulo machile jaré rió mochigo alé saruseo 'lige uché jaré bariseo. Lige alekeri anile alué Páulo e'wele ra'ichaga:

—Emi ralámuli jurío, ne rió pe bariseo ju, ne o'nola 'lige ne apolóchila, bariseo kéturu suwábaga. Lige 'émika ne'chí gastigárinili anigá ne 'we cha 'sime kóriká. Lige neka 'la bijchígime ju bilé rió mukusá, ku ajáname ko, pe alekeri gite gastigárinili 'emi ne'chí.

<sup>7</sup> Lige alué ra'íchili akisá alué ralámuli saruseo 'lige bariseo a'bopi ra'ichale alué ralámuli rukega. Lige 'we bochí anile alué ralámuli, 'lige arigá na'áwale anigá alué ralámuli saruseo alué bariseo si. Lige alarigá 'ma tabilé b'lepi nátili nátale alué ralámuli. <sup>8</sup> Lige alué ralámuli saruséoka tabilé bijchígime nile ku ajáname niligo bilé rió mukusá, 'lige tabilé bijchígime nile neruga alawá nibilé santo ánjeli. Lige alué ralámuli bariséoka 'we a'lá bijchígime nile suwábaga alué, napurigá ku ajáname ko bilé rió mukusá, 'lige 'la bijchiá neruga bilé alawá 'lige santo ánjelitiri. <sup>9</sup> Lige abéchigo bochí anile na'áuka alieti ra'ichiga. Lige jaré alué bariseo napu benírame nile alué Moisesi nulalila, alueka o'weti jásele. Lige anile:

—Ye rió pecha che 'sika eyéneleko jemi. Siné kachi Onorúgame Alawálate 'we a'lá ra'ichame kéréleké ye rió. Lige siné kachi alué santo ánjeli 'yuga ra'ichame kéréleké ye rió. Lige ramué ralámuli lanelia ye rió, pe sayega ra'icháwaleké Onorúgame 'yuga —anile alué ralámuli.

<sup>10</sup> Lige alué we'ká ralámuli na'áwale alué ra'íchili akisá. Lige alué abé wa'lula sontalo abéchigo iwégame majale alué ralámuli lakí aliena bochí anichi na'áuka. Lige alué wa'lula sontalo lale, «'ma a'tabé chí'wanámala ye Páulo», 'lale. Lige alarigá jaré sontalo júlame ma'chí pániliga alué Páulo alé we'ká riógichi ajtgame napurigá ku alé 'mi o'tomela alué sontalo galíachi.

<sup>11</sup> Lige we'liko rukó sébale Esukristo Wa'lula Nulame alé sontalo galíachi napu ajtíle Páulo 'lige a'bé ilibaga anele alué Esukristo:

—Mué Páulo tabilé chéláwa, mueka 'we 'la ruyele churigá ko ne jena Rusaleni mochígame ralámuli 'yuga, a'chigóriga alarigá ruyewa alé we'ká riógachi Roma mochígame ralámuli.

*Jena ruwimela we'ká ralámuli jurío me'lináliligo alué Páulo*

<sup>12</sup> Lige melénala jaré ralámuli jurío a'bopi ra'ichale me'lináliligo alué Páulo. Anile:

—Ramué rió napu ekí alué Páulo me'linálime niru o'maka b'lepi na'tawa, 'lige tabilé go'ame go'poa ramué, 'lige tabilé ba'witiri bajiwa ramué napusi me'lisá alué Páulo. A'lige kulí go'poa ramué go'ame. Lige ramué ta me'lisuga alué Páulo, 'lige ramué najkiboa napurigá Onorúgame gastigárimala ramué ralámuli —anile alué ralámuli alué Páulo me'linálime.

<sup>13</sup> Lige we'ká rió nile alué Páulo me'linálime, oká liá rasígime rió nile. <sup>14</sup> Lige alué we'ká ralámuli alué Páulo me'linálime simíbale alé napu mochile alué e'wélala balé, 'lige alué uché jaré e'wélala ralámuli jurío nuleme. Lige alué Páulo me'linálime anele alué e'wélala:

—Ramueka 'ma gatéruturu ye ra'íchili —anirútura ramué—. Lige 'we 'la sébali oláwará, napusi Páulo me'lisá a'lige kulí go'pórá go'ame 'lige aminami a'lige kulí bajiwará ba'wí. Lige ta me'lisáká ramué alué Páulo, ramué najkibórá napurigá Onorúgame gastigárimala ramué ralámuli —anile alué we'ká rió alué Páulo me'linálime.

Abiena anile:

<sup>15</sup> —Tániwa 'emi alué abé wa'lula sontalo napurigá be'lí jeka a'pámala alué Páulo napurigá bilé ra'íchili gatémala 'emi alué Páulo 'yuga. Lige ramué alé 'mi boichí mochiwa chíboka Páulo buigá. Lige ramué aleka



enágichi me'liboa alué Páulo, ta'chó sébachi jeka.

<sup>16</sup> 'Lige alué Páulo go'chila ranala re'mali machile alué ralámuli jurío alué Páulo me'linalio. 'Lige alué re'mali machisá larigá anió alué ralámuli, 'lige simile alué re'mali alé 'mi alué sontalo galilachi alé napu asale alué Páulo. 'Lige alé sebasa, ruyele alué Páulo alaniá mochigo alué ralámuli. <sup>17</sup> 'Lige alué Páulo alué ra'íchili ruyésiga, bayele bilé alué sontalo gapitánila. 'Lige alé sebasa alué gapitani, 'lige anele:

—Ye re'mali o'tobóká alé 'mi napu ajti alué abé wa'lula sontalo, ye re'mali bilé ra'íchili ra'ichámala alué abé wa'lula sontalo 'yuga.

<sup>18</sup> 'Lige alué sontalo gapitánila o'tole alué re'mali alé 'mi napu asale alué abé wa'lula sontalo. 'Lige alé sebasa, alué sontalo gapitánila anele alué abé wa'lula sontalo:

—Alué rió napu galirale bajcháriga ajti alué Páulo anilime, aluete jularu ne ye re'mali o'toriga bilé ra'íchali ra'ichámili ju mué 'yuga.

<sup>19</sup> 'Lige alué rió abé wa'lula sontalo cha'pile alué re'mali sekala, 'lige 'minami o'tole alué ra'íchili rukemia. 'Lige rukele:

—¿Tachiri ra'íchili ruimé olá ko mué? —anile alué wa'lula sontalo.

<sup>20</sup> 'Lige nejele alué re'mali:

—Alué ralámuli jurío 'ma 'la gatega mochí ra'íchali a'bopi tánimala mué wa'lula sontalo napurigá mué alé o'tomela alué Páulo napu mochí alué ralámuli napurigá abé 'la gatémala alué ra'íchali. <sup>21</sup> 'Lige mué wa'lula tabilé bijchígíwaká rekó alanichi alué ralámuli. Oká líá rasígame rió ju alé boichimi buwémili ju chíboka Páulo me'limea. 'Lige anile alué ralámuli: «'We a'lá gatewa bi'lepi 'nátili ramué rió, tabilé go'poa ramué alué go'ame, 'lige tabilé ba'wítiri bajiwa ramué napusí me'lisá ramué alué Páulo, a'lige kulí go'poa ramué alué go'ame. Ramué ralámuli ta me'lisúká alué Páulo, najkiboa ramué ralámuli napurigá gastigárimala Onorúgame ramué», anile alué ralámuli jurío. Jípeko alué ralámuli buigá mochí ta'lá o'tomela mué alué Páulo alé.

<sup>22</sup> 'Lige alué wa'lula ku júlale alué re'mali alanigá napurigá ta'wesi ruyémala.

*Jena ruwimela Páulo o'tóriligo alé napu ajtile alué wa'lula gobierno Pélisi*

<sup>23</sup> 'Lige alué abé wa'lula sontalo bayele oká gapitani. 'Lige anele 'ma alé sisao alué gapitani:

—Ruyéwaká we'ká sontalo napurigá yati jigámala napurigá simámala alé Sesarea anilichi wa'lú we'ká riógichi. Simámala jena gi makué 'ora kachi jipe rukó. Oká sientó sontalo wijchí jaga simámala, 'lige gicháosa

makué gawé asigá, 'lige che oká sientó selá o'kame.

<sup>24</sup> 'Lige aminami nulale jaré gawé 'yániliga napurigá alué Páulo asigá enámala boichimi. 'Lige alué abé wa'lula sontalo, anele alué oká gapitani simíbachi alué Páulo o'ká:

—Asíriga 'la repúpua ye Páulo alé 'mimi boichimi, napurigá tabilé 'wesi ralámuli che olámala ye Páulo boichimi enágichi. Semáriga 'yawa alué wa'lula selígame alué we'ká riógichi Sesarea ajtígame rió Pélisi anilime.

<sup>25</sup> 'Lige alué sontalo abé wa'lula bilé apeli osilí o'toriga júlale alué we'ká sontalo, 'lige alué apeli osirúgime alué selígame alé Sesarea ajtígame 'yáwili nile alué apeli osirúgime. 'Lige anime nile alué apeli:

<sup>26</sup> «Ne rió Kláurio Lisia, 'we repori ne mué rió wa'lula selígame alé we'ká riógichi Sesarea ajtígame Pélisi. <sup>27</sup> Ralámuli jurío jena mochígame, cha'pile alué rió Páulo jena. Amulí me'líliru alué rió Páulo. Neka 'la machiéturu romano ko, alekeri simíturu ne sontalo 'yuga napurigá aminabi tabilé che olawa. <sup>28</sup> Neka machinálituru chonigá cha'píligo alué ralámuli alué Páulo. Alekeri o'tó ne napu napuíme ju e'wélala jurío rukemia tachiri najsbúliga alué Páulo alué ralámuli 'yuga. <sup>29</sup> 'Lige ne alé 'la machí alarigá ko alué. Pe a'boi na'tálila gite cha'pile alué ralámuli jurío alué Páulo. 'Lige pecha nerúgekó napurigá me'liboa alué Páulo, 'lige aminami pecha galirale bajchálime nitéko alué Páulo. <sup>30</sup> 'Lige jipe machí ne we'ká ralámuli jurío napuligo alué Páulo me'limea jena. 'Lige alekeri mué rió Pélisi jula ne alué Páulo. 'Lige ne ané ye ralámuli jena mochígame napurigá alemi simámala alué ralámuli alué ra'íchili gatemia mué rió 'yuga. Pe ekí júpá ye ra'íchili. Ariósibá mué wa'lula Pélisi.»

<sup>31</sup> 'Lige alué sontalo, napurigá anélirige 'ma sébali mochíleke'é. 'Lige bayérole alué Páulo, 'lige simíbale aba a'lige rukó gi makué 'ora kachi. 'Lige alé simasa, sébale alé Antipatri anilichi we'ká riógichi. <sup>32</sup> 'Lige alué sontalo wijchí jaga e'yéname ka pe alé ku ro'íleke'é. 'Lige ku alé galilachi napu mochime nile alué sontalo, ku alé sébale alué alé ro'isa. 'Lige alué gawé aségameka aba 'we simíbale alé Sesarea alué Páulo 'yuga. <sup>33</sup> 'Lige alé we'ká riógichi Sesarea sebasa alué sontalo, 'lige 'yale alué apeli osirúgime alué napu nábolige alué sontalo Kláurio, 'yale alué wa'lula selígame Pélisi, 'lige aminami alué Páulo alé sébaga. <sup>34</sup> 'Lige alué rió wa'lula selígame alé Sesarea ajtígame alué osilí leérasa, rukéliru alué Páulo koche ochérigame rió niligo.

'Lige alué Páulo anele:

—Neka alé ejiro Selisia ochérigame rió ju —anele alué Páulo.

'Lige alué rió wa'lula 'ma akisá alieti, <sup>35</sup> anele alué wa'lula alué Páulo olagá:

—Ne a'lá gepúmala alué ra'íchili napu ruwimela ju alué ralámuli jurío jeka jsisá alué mué cha'pígame. A'lige 'we a'lá gatémala ne alué ra'íchali —anile alué wa'lula selígame rió.

'Lige alué Páulo juláliku alé wa'lú galichi, alué galí napu bejtégame nile i'sinimi alué wa'lula Eróre 'ya. 'Lige jaré sontalo 'yuga julale alemi napurigá repúmala alué Páulo alé ajchagá.

## 24

*Jena ruwimela Páulo ra'ichaligo wa'lula Pélisi 'yuga*

<sup>1</sup> 'Lige maligi rawé nujubapi kachi sébale alué wa'lula balé Ananíasi anilime rió Rusaleni ajtígame, sébale alé Sesarea anilichi. 'Lige jaré e'wélala jurío 'yuga nawale alué rió alé. 'Lige alué rió Tértulo anilime abiena nawale aléchigó. Alué rió Tértulo anilime 'we benégame nile alué ra'íchili gatega, alekeri a'páliku alé. 'Lige alué ralámuli alé jsile napu asale alué wa'lula selígame Pélisi anilime. 'Lige alué ralámuli alué ra'íchili ruimea jsile, napurigá saega ra'ichámala alué Páulo olagá. <sup>2</sup> 'Lige Páulo alé a'pásiga, 'lige alué rió Tértulo alemi a'mulipi simigá napu asale alué Pélisi 'lige anele:

—Wa'lú cheliérabá mué wa'lula selígame, ramué ralámuli 'we ganiliga mochiru tabilé chélagá. 'We ra'sálagá mochiru ramué ralámuli, napurigá nulá mué rió wa'lula 'we a'lá ju, 'we semáriga nulame ju mué rió wa'lula Pélisi. 'We semáriga gu'irime ju mué ralámuli. <sup>3</sup> 'Lige alué napurigá nulá mué rió, bochígimi 'la larigá nokiá ramué we'ká ralámuli. 'Lige 'we ra'sálagá mochiru ramué ralámuli. Wa'lú cheliérabá. <sup>4</sup> Neka pe u'kabi ra'íchali ruwimela, ramueka tabilé we'lisi resibátinile mué. Neka taní napurigá 'we 'la gepúmala mué ye pe u'kabi ra'íchali. <sup>5</sup> Ramué ralámuli machiaa ye Páulo 'we chátiri rió ko. 'Lige 'we bochígimi gawichí eyéname ko ye rió pe alué ralámuli jurío na'áwitiga alemi we'kaná we'ká riógichi mochígame ralámuli. 'Lige wa'lula nulame ju ye Páulo alué we'ká ralámuli nuleme napu uché bilé 'nátili cha'pile napu Nasareno anélime ju. <sup>6-7</sup> 'Lige aminami tabilé nirame ju alué wa'lú re'obá ramué ralámuli nila. 'Lige ramué ralámuli alekeri cha'pirúuru ye rió Páulo, 'ma najsibúnilime ramué nila rejcholi.\* <sup>8</sup> 'Lige mué bo'né 'la rukewa alué Páulo napurigá 'la machiboa pala 'la bijchiá ko.

<sup>9</sup> 'Lige alué ralámuli jurío napu eki mochílige alé, anile:

—'La bijchiá ju napurigá aní —anile alué ralámuli.

<sup>10</sup> 'Lige alué wa'lula selígame nulele sekate ra'íchaga napurigá alué Páulo ra'ichámala alé. 'Lige alué Páulo yati ra'ichale nulésiga. Anile:

—Neka 'we ra'sálagá ruwimela ye ra'íchili jena iligá mué ajtígichi, neka pecha chokilaká. Neka 'we a'lá machí mué rió we'ká bamí ajtigá mué jena we'kaná we'ká riógichi ra'íchali gatea. 'Lige alekeri ne 'we a'lá machí mué rió 'we a'lá benégame ko ra'íchali gatega. <sup>11</sup> Ne pe kulí seba alé wa'lú we'ká riógichi Rusaleni, pe kulí makué oká rawé ju ne alé sebase. Neka alé simíturu wa'lú cheliera 'yamia Onorúgame. <sup>12</sup> 'Lige ne tabilé 'wesi che anigá ra'ichaturu alué Rusaleni mochígame ralámuli olagá. 'Lige ne tabilé 'wesi ralámuli na'áwitige alé wa'lú re'obachi. 'Lige alé u'kuchí jurío re'obálachi tabilé na'áwiti ne alué ralámuli. <sup>13</sup> 'Lige rekó 'we rukelie alué ralámuli, tabilé asé ruwimela alué ralámuli napurigá ne alieti najsibuga eyena. <sup>14</sup> 'La bijchiá ju Onorúgame oyérame ju ne napurigá alué 'ya mochígame ne rijimela. Abiénachigó oyérame ju ne alué 'nátili napu Nuebo Bowé anilime ju. 'We 'la bijchígame ju ne suwábaga napu Moisesi osálige 'lige abiénachigó bijchígame ju ne napu osálige alué ralámuli 'ya mochígame napu ruwime nilige napu anele Onorúgame. <sup>15</sup> Neka bijchigi Onorúgame ku ajánimio alué ralámuli suwígame, alué a'ká ralámuli 'lige tabilé a'ká ralámuli. Alué suwábaga bijchígime ju ne. Ye ralámuli jurío jena mochígame abiena 'la bijchigi ye ra'íchali. <sup>16</sup> Alekeri nabí 'we jirétime ju ne alué rejcholi napurigá tabilé chátiri na'támala ne Onorúgame 'yuga, 'lige aminami napurigá alué ralámuli 'yuga tabilé chélagá asimela ne.

<sup>17</sup> > 'Lige a'kinana we'kabé bamí kachi ne ichúrimi einasa, 'lige a'kinana ku alé Rusaleni simíturu ne enomí 'yamia alué ralámuli tabilé nígame alé mochígame, 'lige aminami me'limea bilé ajágame alé wa'lú re'obachi cheliera 'yamia Onorúgame. <sup>18</sup> Napu'lige ne alé ba'ichí bajkisá, 'ma bi'ígame alawégame aniname nile, 'lige nujubá etéturu ne'chí alué ralámuli jurío alé re'obachi go'ame kogi iligichi ne Onorúgame. Tabilé we'ká ralámuli e'yénituru ne'chí 'yuga 'lige tabilé 'wesi e'yénituru nejkumega. <sup>19</sup> Alué ralámuli jurío napu alé e'yénilige Asia mochígame nile. Alué niligekuru napurigá jena mochímili ne tabilé nirame núsaká alué

\* 24:6-7 Jaré apélichí anime ju: 'Lige alué abé wa'lula sontalo alué Lisia anilime, alué nolínaturu ramué cha'piachi alué Páulo alé. 'Lige pe yati 'wisíturu alué Lisia 'we enáriga nawagá we'ká sontalo 'yuga nawagá.

wa'lú re'obá, alué ralámuli etéligame ne alé ajtígachi. <sup>20</sup> Lige aminami ye ralámuli jurío napu mochí jena, 'la animéliguru tachiri gite nejírilingo ne alé Rusaleni ajtígachi alué e'wélala jurío mochígichi. <sup>21</sup> Siné kachi pe alekeri nejíligeréko ne'chí, siná ne: «Napu'lige bilé rió mukusá, ku ajánamala», aniéturu ne. Siné kachi pe alekeri chojkila kéréko ne —anile alué Páulo.

<sup>22</sup> Alué wa'lula selígame Pélisi 'we a'lá machime nile alarigá nokame ko alué ralámuli napu Bowé Nuebo aneme nile, alué Esukristo oyérame ralámuli. 'Lige alué Pélisi akisá alué ra'íchali, 'lige yati a'rele alué ra'íchili gatélime. Anile:

—Napu'lige alué abé wa'lula sontalo Lisia anilime nawasa, a'lige kulí gatewa alué ye ra'íchili —anile alué wa'lula.

<sup>23</sup> Lige alué wa'lula Pélisi, nulele bilé sontalo gapitánila napurigá aminabi repúmala alué Páulo. 'Lige yaba'lá lisensia nígame nile alué Páulo napurigá a'bemi einámala. 'La eilile napurigá sebamala alué Páulo amígola napurigá tebúmala alué Páulo.

<sup>24</sup> Lige pe u'kabi rawé kachi, nawale alué wa'lula Pélisi alé alué upila si napu Brusila anilime nile napu jurío nílige. 'Lige alé se-basa, bayele Páulo napurigá nawámala alé napu wa'lula asale bo'né upila 'yuga. 'Lige alué okánika akele Páulo ra'íchachi. Anile:

—'La bijchígiwa chieri nílga alué Kristo Esusi napu rewagáchika nawálige.

<sup>25</sup> Lige alué Páulo alé asagá alué ralámuli 'yuga, 'lige ruwile alué we'ká ra'íchili rejcholi. Ruwíleke'é napurigá 'la bi'lepi 'nátaga bejtélawa Onorúgame nila 'nátili ralámuli gu'iriga. 'Lige aminami napurigá tabilé oyérawa alué ralámuli tabilé 'la 'nátame. 'Lige aminami ruwile bilé rawé sebamio Onorúgame gastigárimia alué ralámuli cha nokame, 'lige alué ralámuli tabilé cha nokame Onorúgame 'yuga simámala. 'Lige alué rió wa'lula Pélisi 'we majáleke'é 'liko alué ra'íchili akisá.

'Lige anele alué rió Pélisi alué Páulo:

—Jípeko 'ma 'la sébali ju, ya simibógó alé ku miná. 'Lige napu'lige ne bo'né 'la ikiro, uché siné bayémala ne mué napurigá ku nawámala mué jaka ra'ichasia —anele alué wa'lula.

<sup>26</sup> Lige alué rió wa'lula selígame Pélisi 'we najkile napurigá alué Páulo najtétimala enomite napurigá ma'chínamala alué Páulo. 'Lige pe alekeri a'kué bayele aleka alué wa'lula Pélisi ra'ichamia Páulo 'yuga. <sup>27</sup> Lige oká bamí oláliku alé alarigá olá alué Páulo. 'Lige alué rió Pélisi arigá 'ma ma'chínale wa'lula selígame asagá alé. 'Lige alué rió Pélisi ma'chínasa selígame asagá alé, 'lige alué rió Porsio Besto anilime asíbale wa'lula. 'Lige alué rió Pélisi 'we a'lá niraga etélime

najkile alué ralámuli juríote, alekeri a'réliru alué Páulo galírale bajcháriga.

## 25

*Jena ruwimela Páulo ra'íchaligo wa'lula selígame Besto 'yuga*

<sup>1</sup> Lige alué rió Besto selígame asibasa alé Sesarea anilíchi, bakiá rawé nujubá kachi simile alé wa'lú we'ká riógichi Rusaleni. <sup>2</sup> Lige alué ralámuli alé Rusaleni mochíggame, alué balé e'wélala, 'lige alué ralámuli jurío selígame e'wélala, alué e'wélala anele alué wa'lula Besto alé nawasa, 'la suériga ra'íchiga anele:

<sup>3</sup> —Mué rió wa'lula pe rekó julawa alué rió Páulo bayénaliga bilé ra'íchali gatewa jena ramué alué rió 'yuga.

'Lige alué ralámuli a'bopi alarigá ra'íchale pe boichika enágichi me'limé olálige alué Páulo. <sup>4</sup> 'Lige alué rió Besto nejele, anile:

—Alué Páulo alé Sesaréachi galírale bajcháriga ajtí. Ne bo'né 'la siméréko pe'wé alé napu ajtí alué Páulo. <sup>5</sup> Ne 'yúriga julawa e'wélala napurigá gatémala alué ra'íchali. Alué rió bilé tábiri najsibúsaká 'liko alé gatewa —anile alué rió Besto.

<sup>6</sup> Lige alué rió Besto asale pe osánó rawé alé Rusaleni, siné kachi pe makué rawé kéréma. 'Lige pe lakí rawé asisá alé, 'lige ku alé Sesarea simile alué Besto. 'Lige alué rió Besto alé Sesarea sebas, pe melénala simile alé 'miná napu gateme nile ra'íchili alué rió, alé mutélachi asagá. 'Liko Besto nulele bilé sontalo napurigá a'pámala Páulo napu ajtile bo'né. <sup>7</sup> Lige alué Páulo alé bajkíchi, 'lige jaré ralámuli jurío Rusalénika sígame a'bé simíbale alé napu ilile Páulo. 'Lige alué ralámuli chojkile ra'icha Páulo saega. Pe 'yéigga ra'ichale we'ká e'karúgame najsabume kórilé. Tabilé gayénale 'la bi-jchiá ra'íchali ma'chí pa chu'síkame ko alué Páulo. <sup>8</sup> Lige alué Páulo ruwile alué ra'íchili tabilé chojkila ko, tabilé asé che 'siligo alué ralámuli 'yuga. Anile alué Páulo:

—Neka tabilé asé 'wesi chérikáwé 'emi ralámuli 'yuga, neka pecha asé saega ra'íchago alué ramué ralámuli jurío nila nulalí. 'Lige aminami tabilé tábiri 'wesi najsibú ne alé wa'lú re'obachí. 'Lige aminami pecha saega ra'icha ne alué wa'lula gobierno romano olagá, alué napu Sesar anilime ju —anile alué Páulo.

<sup>9</sup> Lige alué rió wa'lula selígame Besto 'we a'lá gu'irinile alué ralámuli jurío. Alekeri Besto rukele alué Páulo:

—Mué Páulo, ¿siminali mué alé Rusaleni napurigá ne gatémala alué ra'íchali alé se-basa?

<sup>10</sup> Lige alué Páulo anile:

—Neka tabilé siminali alé 'mi Rusaleni. Aba jena Sesaréachi gatewa ye ra'íchali.

Alarigá nuláturu alué wa'lula gobierno (bisirente) Sesar anilime. Neka ye ralámuli jurío 'yuga pecha tábiri najsibua. Mué asiriga 'la sébali machíguru alué alarigá ko ne. <sup>11</sup> 'Lige ne najsibúsaká bilé tábiri, 'liko 'la nímala me'á ne'chí 'emi. Tabilé bijchía nísaká napu aní alué ralámuli jurío, tabilé 'wesi nejimala ne'chí alué e'wélala ralámuli jurío mochígichi. Alekeri tabilé simé ne alé Rusaleni. ¡Neka najkí napurigá alué wa'lula gobierno alé Roma ajtígame gatémala ye ra'íchili! —anile alué Páulo.

<sup>12</sup> 'Lige 'ma bajchá ra'ichasa Besto alué ralámuli rejcholi ruwime 'yuga, anele alué Besto alué Páulo:

—Jipe 'ma tánikuru mué napurigá alé Roma simawa gatewa ye ra'íchali alué wa'lula gobierno Sesar 'yuga. 'Lige jipe alekeri alé jula ne mué alé Roma napurigá gatémala mué alué ra'íchili alué wa'lula gobierno Sesar 'yuga.

*Jena ruwimela Páulo ra'ichaligo alué wa'lula Agripa 'yuga*

<sup>13</sup> 'Lige a'kinana we'kabé rawé kachi, simile alué wa'lula selígame Agripa\* anilime alé Sesarea, alué go'chila si napu Berenisi anilime nile. Simíbale alué wa'lula selígame Besto repórimia alé Sesarea. 'Lige alué ralámuli alé Sesarea we'kabé rawé mochile alué wa'lula bejtélachi. <sup>14</sup> 'Lige alué wa'lula selígame Besto ruyele alué oká ralámuli churigá nílga alué Páulo. Anele:

—Jena ajtí bilé rió, Páulo anilime, napu alué wa'lula Pélisi galírale bajcháriga a'rélige. <sup>15</sup> 'Lige ne napu'lige alé Rusaleni eyénachi, alué we'ká balé e'wélala, 'lige alué we'ká ralámuli jurío e'wélala we'ká e'karúgame ra'íchili ruwí alué Páulo sayega. 'Lige 'we tale a'wágame napurigá ne nulémala alué Páulo gastigáriniliga. <sup>16</sup> 'Lige ne anéturu alué ralámuli 'la anichi: «Ramué e'wélala Romano tabilé larigá nokame niru. Pecha gastigárilime júko bilé rió tabilé 'la machigá alué alieti najsibúliga. 'Lige bajchako napubúriga mochiga rukélime júkuru alué rió cha'pime alué ayónime 'yúriga. 'Lige kulí gastigárilime júkuru alué rió 'ma a'lá machisá alué alieti najsibúliga.» <sup>17</sup> 'Lige alekeri jeka jsisá alué ralámuli, 'lige yati chojkíturu ne alué ra'íchili gatea bilé rawé a'kinana kachi. 'Lige asagá ne alé mutélachi napu alué ra'íchili gateme ju ne, 'lige yati jula ne alué Páulo bayéniliga napurigá alé a'pawa. <sup>18</sup> Neka 'we chárigá ruimé mayéke' é alué ralámuli o'weti jásiga. 'Lige tabilé larigá nílke' é. <sup>19</sup> Pe lanile Páulo saega ra'ichame kórile alué jurío nulalila olagá. 'Lige aminami anile tabilé bijchía ko napu anile alué Páulo bilé rió Esusi anilime ajagá

ajtígó. A'boika mukúgame kórile. Pe alué ra'íchali gite saega mochile Páulo 'yuga. <sup>20</sup> 'Lige neka tabilé 'la machíeke' é alué alieti ra'íchili gatega. 'Lige alekeri ne alué Páulo rukéturu, anéturu ne 'lige: «Mué Páulo, ¿pala 'la siminali mué alé we'ká riógichi Rusaleni ye ra'íchali gatemia?» <sup>21</sup> 'Lige alué rió Páulo nejele: «Neka pe najkí napurigá alué wa'lula gobierno Sesar† gatémala ne'chí 'yuga ye ra'íchili», anile alué Páulo lanilía. Ne alekeri nuléturu napurigá alué sontalo repúmala alué Páulo alé ajchagá, pe napusí ne ikiru alemi jula alé 'mi napu ajtí alué wa'lula gobierno Sesar.

<sup>22</sup> 'Lige alué wa'lula Agripa anele alué Besto:

—Néchigó akisá nílke' é alué Páulo ra'ichálila.

'Lige alué Besto nejele:

—Be'lí 'la akimela mué alué Páulo ra'ichálila —anile alué rió wa'lula Besto.

<sup>23</sup> 'Lige melénala rawé alué wa'lula Agripa 'lige alué Berenisi sebase alé, alé pachami mo'ile 'we a'lá semáriga alé napurigá 'we a'lá nirawa alué ralámulite, 'lige alué we'ká sontalo e'wélala mo'ile alé alué ralámuli 'yuga. 'Lige alué uché jaré ralámuli alé we'ká riógichi mochígame e'wélala si mo'ile alé. 'Lige alué ralámuli alé pachá mo'isá, 'lige alué wa'lula Besto nulale alué Páulo bayénaliga. <sup>24</sup> 'Lige alué wa'lula Besto anele alué ralámuli napu alé mochílige:

—Mué wa'lula selígame Agripa, 'lige 'emi ralámuli suwábaga napu ekí mochí jena napuíka jipe, jena ajtíke' é ye rió. 'Lige we'ká ralámuli jurío 'we saega ra'ichale ye Páulo olagá alé we'ká riógichi Rusaleni, 'lige jena abiénachigó jsile alué ralámuli saega ra'ichamia Páulo olagá. 'Lige alué lakí ralámuli tabilé a'rele siná Páulo me'linaliga. <sup>25</sup> 'Lige neka tabilé rewá tachiri chu'síligo Páulo napurigá me'liboa. Abirigá julámala ne alé Roma wa'lula ajtígachi napurigá gatémala alué 'yuga, alarigá táligame bo'né Páulo. <sup>26</sup> 'Lige ne tabilé ni bilé ra'íchili napurigá osémala ne alué wa'lula bilé osilí tachiri najsibúliga ye Páulo. 'Lige alekeri jena a'pá ne ye rió napu ajtí mué wa'lula Agripa 'lige uché jaré 'emi si, napurigá 'emi 'we a'lá gepúmala ye ra'íchili ye Páulo ra'ichálila napurigá suwábaga 'la rukémala ye Páulo alué alieti najsibúliga, napurigá ne 'la nílimala bilé ra'íchili napurigá ne 'la newámala bilé osilí alué wa'lula gobierno nábolime. <sup>27</sup> Neka tabilé chérigá julasa nili bilé rió galírale bajchániliga tabilé machigá tachiri najsibúliga.

\* 25:13 E'nesi glosario «Herodes». † 25:21 E'nesi glosario «Cesar».

## 26

*Jena ruwimela Páulo nemligo*

<sup>1</sup> Lige alué rió wa'lula Agripa anele alué Páulo:

—Mué Páulo 'la lisensia ni napurigá nemímala mué —anele.

'Lige alué Agripa alanesa Páulo 'lige Páulo o'weti o'wínale sekala, 'lige anile alué Páulo:

<sup>2</sup> —Mué wa'lula Agripa, ne 'we ra'sálagá nemí ye ra'íchili jena asagá mué wa'lula ajítgichi, napurigá ne 'la suwábaga 'la ruwimela ye ra'íchili napurigá lanilí ne ye ralámuli juríote. <sup>3</sup> 'Lige alué ra'íchili suwábaga ruimé ne napugiti mué wa'lula 'we alá suwábaga machí churigá nírigo ramué ralámuli jurío, ramué tabilé bi'lepi 'nátame nírigo i'sínimi. Alekeri pe rekó 'la 'nátaga gepúwagó mué wa'lula ye ra'íchili.

<sup>4</sup> Lige uché rajpé ra'íchale alué Páulo, anile:

—Alué ralámuli jurío suwábaga 'we alá machíuru churigá níliga ne utá kachí, 'lige aminami alé Rusaleni napu ne wa'lú ochérale alé asagá. <sup>5</sup> 'Lige alué ralámuli abiena 'la ruwimela ruínálasaká, neka 'ma wa'lú rió ka bariseo gayénaligo. Ramué bariséoka 'we 'la sébali olame niru Moisesi nulalíla me'tagá uché jaré ralámuli. <sup>6</sup> Jípeko nejí oliá ne, neka 'la bijchígame kame napu aníligo Onorúgame 'we 'yasi ku ajánamio oríligo ralámuli suwígame. <sup>7</sup> 'Lige ramué ralámuli israelita makué okaná chojkégame buigá mochíru napurigá 'la sébali olámala Onorúgame napurigá anílige. Alekeri 'la nirali ramué Onorúgame 'lige 'la e'wilí rawemi rukomi napurigá bo'né nulá. Mué wa'lula Agripa, neka 'la bijchígame kame Onorúgame ku mochíamili ko suwígame, alekeri nejíliru ne. <sup>8</sup> 'Emika ¿chonigá ta bijchígame júkó Onorúgame ku ajánarime ko suwígame?

*Jena ruwimela churigá najátaligo Páulo alué ralámuli Esukristo oyérame*

<sup>9</sup> Lige Páulo uché rajpé ra'íchili ruyele:

—Ne bo'neko 'yako lame ke, 'we cha nokiamé nuleme ke ne alué Esukristo oyérame ralámuli 'yuga, alué Esukristo Nasaréachi ochérigame Rabí rijimála. <sup>10</sup> 'Lige ne arigá simíturu alé we'ká riógichi Rusaleni anilichí. 'Lige alué balé e'wélalate 'yáreturu ne bilé apeli lisensia 'yagá ne'chí napurigá galírale mo'ámala ne alué ralámuli Esukristo oyérame. 'Lige napu'lige me'líliro alué ralámuli galírale mo'árigame, 'we alá nirame ke ne alué suwábaga larigá. <sup>11</sup> We'sá simíturu ne alé u'kuchí jurío re'obálala jágichi gastigárimia alué ralámuli Esukristo oyérame napurigá animela: «Tabilé Esukristo oyérame ju ne.» 'Lige we'ká riógichi mejká e'sena ralámuli epperélachi napu se'unáriga ra'íchame nile,

'mi alemi eyéname kérturu ne ralámuli najátaga Esukristo oyérame gastigárimia.

*Jena ruwimela Páulo ruwíligo churigá a'réligo chátiri 'nátili*

<sup>12</sup> Lige Páulo uché rajpé ra'íchili ruwile. Anile:

—'Lige bilé rawé enegéturu ne alé boichimi we'ká riógichi Ramasko simea alué Esukristo oyérame ralámuli najátasia. Alué apeli osirúgime o'ká enegé ne, alué balé e'wélala newálila lisensia i'gá ne'chí.

<sup>13</sup> Mué wa'lula, ne alé boichimi enágichi amulí sébachi ne alé Ramasko, 'lige ra'ósaga iliba 'pa rewagáchikana amulí rawilichí, 'lige 'we rasórumé nile me'tagá rayénili. 'Lige noligá ra'ósiga iliba alé napu ramué jale. <sup>14</sup> 'Lige ramué ralámuli 'ma wijchí bi'tibáreturu alué ra'ósalite rasoga. 'Lige alé wijchí bo'igá akéturu ne bilé ra'íchili.

'Lige aniérturu ebreo ra'ichálila ra'íchaga: «Sauli, Sauli, ¿chonigá saega eyena mué rió ne'chí 'yuga? ¿Chonigá echébaché mué alué gusite napu roló ejchela ju napurigá o'wé simámala? Alarigá simí mué, tabilé oyérame ju mué ne'chí.» <sup>15</sup> 'Lige anérturu ne: «¿Chieri ju mué wa'lula sikaniá?» 'Lige aniérturu alué ra'íchili: «Neka pe alué Esukristo ju napu mué 'we najátame ju resí olániliga», anile alué ra'íchili. <sup>16</sup> «Jípeko ilísiwagó yati, neka alekeri ra'ícha jena napurigá mué rió ne'chí 'yuga nóchame nímala. 'Lige aminami ruyémela mué uché jaré ralámuli tachiri etiá mué jena, 'lige aminami napu a'kinana etémili ju mué, 'lige alué suwábaga ruimeli ju mué. <sup>17</sup> 'Lige ne 'la nejkúrimala napurigá tabilé me'liboa mué alué ralámuli juríote 'lige tabilé juríote. <sup>18</sup> Julámala ne mué alé alué ralámuli epperélachi napurigá mué 'la ruyémala alé rejcholí, napurigá a'rémala alué ralámuli alué resítiri 'nátili napurigá 'we alá na'támala Onorúgame 'yuga, napurigá ta nulémala Satanasi, napurigá 'la Onorúgame 'nalina nulémala, 'lige aminami napurigá 'la bijchígimála ne ra'ichálila. 'Lige 'la e'káligime nímala alué 'we resítiri alawégame, 'lige aminami narémala suwábaga napu eki Onorúgame 'ya alué ralámuli napu bi'ígame alawégame ju napugiti 'la bijchígile ne ra'ichálila.»

*Jena ruwimela Páulo 'la e'wáligo napurigá nulélirige Esukristote*

<sup>19</sup> Páulo uché rajpé ruwile. Anele:

—Mué wa'lula Agripa, neka e'wáturu napurigá nulale alué ra'íchili alé rewagáchika. <sup>20</sup> 'Lige ne pe nubapí chojkí ruyá alé Ramáskochi 'lige Rusalénichi 'lige ejiro Juréachi 'lige ruyéturu ne alué ralámuli tabilé jurío. 'Lige ané ne alué ralámuli: «'Ma a'rewa 'emi ralámuli alué resítiri 'nátili, 'emi ralámuli 'la oyérame niwa Onorúgame. 'Lige 'la suériga nakúriwa 'emi napurigá

alué uché jaré ralámuli 'la machimela 'emi 'la Onorúgame oyérame ko.»<sup>21</sup> 'Lige pe ye rejcholi 'nátili gite cha'pirúkuru ne alué ralámuli juríote alé wa'lú re'obá ra'pichílachi alé Rusaleni anilíchi, 'lige 'ma me'linali ne'chí alué ralámuli.<sup>22</sup> Nobi Onorúgameka 'we a'lá gu'írigo ne'chí, alekeri 'la bijí ajagá ajtí ne jemi. 'Lige alekeri 'la ruyéguru ne suwábaga ralámuli Onorúgame nila rejcholi. 'Lige alué ralámuli e'wélala, 'lige alué pe apiépiri ralámuli abiena 'we ruyé ne. Tabilé siné che ané ne bo'né 'nátaga, pe aluecho napu Moisesi ruwile 'lige napu ruwile alué ralámuli napu ruwile napu anele Onorúgame. Pecha 'wesi ruwígó neka uché bilé ra'íchali, pe bi'lepi Onorúgame ra'íchálilacho ruwíguru neka.<sup>23</sup> 'Lige alué 'ya nerúgame rejcholi Onorúgame ra'íchálila anime ju Onorúgame julámioríllo alé 'pákana rewagáchika alué Kristo ramué ralámuli a'kabamana jawamia. 'Lige alué rió 'we resí ikimeo jena wijchimoba eyénaga. 'Lige alué rió me'lisuga 'lige ku ajánamio. 'Lige alué rió nile bajchá napu mukusá ku ajánale. 'Lige alekeri 'la machirú ramué ralámuli jurío, 'lige alué ralámuli tabilé jurío, napu'lige suwisuga ramué abiena ku ajánawili ju.\*

*Jena ruwimela Páulo najkíligo napurigá alué wa'lula bijchígimala Onorúgame nila rejcholi*

<sup>24</sup> 'Lige alué ye ra'íchili ruwichi alué Páulo, 'lige alué rió Besto o'weti ilísiga anile:

—¡Pe lo'ígame rió káwé mué Páulo! Mué Páulo cha we'ká e'karúgame benime kame, alekeri lo'íriole mué —anile alué rió Besto.

<sup>25</sup> 'Lige alué Páulo nejele alué ra'íchili akisá. Anile:

—Mué wa'lula selígame Besto, neka pecha lo'í rió júkó. Ye ra'íchili pe regá ju. Ye ra'íchili napu ne ruwí, 'we 'la bijchiá ju, 'lige 'we 'la námatékuru alué ra'íchali.<sup>26</sup> Jena ajtí ye rió wa'lula Agripa, 'lige alué rió 'we a'lá sébali machí ye ra'íchali larigá ko. Ne alekeri 'we semáriga ruwí ye ra'íchili jena napu ajtí ye wa'lula, 'lige tabilé chélagá ruwí ne ye ra'íchili. Neka machiame ye rió wa'lula 'we a'lá machió ye ra'íchili. 'Lige alué napurigá 'sile alué Esusi tabilé chíboka 'sile, iligá we'ká ralámuli etériga 'sile.<sup>27</sup> Mué wa'lula Agripa, ¿'la bijchigi mué napu aní alué 'ya mochígame ralámuli napu ruwime nilige napu anele Onorúgame? Neka 'la machí mué 'la bijchigo napu ruwile alué 'ya mochígame ralámuli.

<sup>28</sup> 'Lige anile alué wa'lula rió Agripa:

—¿Mueka 'la ikípité ra'íchilite Esukristo oyérame gainámala ne?

<sup>29</sup> 'Lige alué Páulo nejele:

—Tabilé chérikáwé rekó pe u'kabi ra'íchili ke, 'lige rekó we'ká ra'íchili ke tabilé chérikáwéchigó. 'Lige neka tani Onorúgame napurigá 'emi ralámuli jena mochígame 'la Onorúgame oyérame nímala napurigá ne, 'emi ralámuli suwábaga napu ekí mochi jena, pe iligá neka tabilé najkí napurigá 'emi ralámuli galírale mo'áriga mochímala napurigá ne —anile alué Páulo.

<sup>30</sup> 'Lige alanisá alué Páulo, ilísele alué wa'lula Besto, 'lige jásele alué uché jaré oká, alué wa'lula Agripa 'lige alué Berenísichigó, 'lige alué uché jaré ralámuli napu mochile alé suwábaga jáseleke'échigó.<sup>31</sup> 'Lige alué lakí ralámuli alé 'minami wanáchigo simíbale alué ra'íchili gatewa. 'Lige anile alué a'bopi ra'íchaga alemi mochiga:

—Ye rioka tabilé tábiri najsibule napurigá me'liboa. 'Lige aminami tabilé galírale bajchátéleke'é ye rió, pecha tábiri najsibúliga.

<sup>32</sup> 'Lige alué rió Agripa anele alué wa'lula Besto:

—Aka 'la supaná téligipaché ye rió, alué bo'né tabilé tasa ka napurigá alé Roma o'toboa napurigá alé gatémala ye ra'íchali alué wa'lula gobierno alé Roma ajtígama 'yuga.

## 27

*Jena ruwimela Páulo juláriligo alé we'ká riógichi Roma anilíchi*

<sup>1</sup> 'Lige alué wa'lula Besto 'yúriga júlale bilé sontalo gapítánila alué Páulo o'tóriga alé Roma anilíchi wa'lú we'ká riógichi uché jaré galírale mo'árigame 'yúriga. Alué sontalo Julio anilime nile. Alué bo'né nochálilaka nile napurigá o'tomela ralámuli galírale mo'áriga mochígame napurigá gatémala alué ra'íchili alé Roma napu ajtílige alué wa'lula gobierno Sesar anilime.<sup>2</sup> 'Lige ramué ralámuli jímirituru alé bárkochi. 'Lige alué barko alé 'naka Agramitio anilíchika simígama nile alué barko napu ramué cha'pirú. 'Lige alué barko simime nile alé napu bo'í alué wa'lú ejiro Asia anilime rewégame. 'Lige simíromili nile alé napu we'kaná uchúpame ju alué barko alé napu Asia anilime ejiro bo'í. 'Lige Aristarko anilime rió si enegéturu ramué 'yuga alé bárkochi. 'Lige alué rió Aristarko alé we'ká riógichi Tesalónika anilíchi bejtégame ke napu ejiro Maseronia ju alé we'ká riógichi.

<sup>3</sup> 'Lige melénala rawé kachi sebáruturu alé bilena we'ká riógichi Sironi anilíchi napu alué barko uchúpame ju, 'lige alué sontalo Julio 'we a'lá niraga etele alué Páulo, 'lige lisensia 'yale alué Páulo napurigá simela alé napu ejperégame nile alué bo'né Páulo amígola napurigá alué Páulo

\* **26:23** Napu 'sile Esusi 'lige napu anile Esusi napurigá bilé ra'ósali ju napurigá gu'írimala ramué moyena re'pá rewagachi.

amígola kógimala napu resí lále alué Páulo. <sup>4</sup> 'Lige ramué ralámuli alé we'ká riógichi Sironi alé e'yéniga simáruturu, 'lige nujubá etéruturu ramué alué gawí Chipre anilichi alé ba'wichí nasipa ilígame wa'lú gawí. 'Lige o'iná 'nalina iligéturu alué gawí ramué alemi e'nárigichi. 'Lige ramué alé na'kolínaka 'nalina simáruturu napurigá ta'mé 'we a'wágame chibámala eká. <sup>5</sup> 'Lige alué wa'lú ejiro Silisia anilime gawí bo'ígichi alé a'mulipi simáruturu ramué. 'Lige alué wa'lú ejiro Pampilia anilime gawí bo'ígichi alé a'mulipi simáruturu ramué alé bárkochi mochiga. 'Lige alé si sebáruturu ramué bilena we'ká riógichi Mira anilichi napu ejiro Lisia nílige.

<sup>6</sup> 'Lige alué sontalo gapitánila gatele napurigá ramué simawa alé bárkochi napu Alejantriáka simígame nile. 'Lige alué barko alé Italia anilichi sebámili nile, alé napu ju we'ká riógichi Roma anilichi. 'Lige alué sontalo gapitánila nuláturu napurigá ramué aleké bárkochi jimopura napurigá ramué 'we simawa bowesia. Alué we'ká sontalo abiénachigó simibaturu. <sup>7</sup> 'Lige ramué we'ká rawé e'náruturu kilí aleké bárkochi mochiga. 'Lige 'we nóchili olagá sebáruturu ramué ralámuli alué bárkochi e'yéniga alé bilena napu chukíbame ju alué barko alé a'bé Gniro anilichi we'ká riógichi. 'Lige alué eká 'we a'wágame ekáturu o'weka 'nalina napu ramué e'yénilige, alekeri chakena simáruturu. 'Lige alé na'kolínaka 'nalina simáruturu alué gawí ilígichi alé nasipa ba'wichí Kreta anilime alé pe a'bemi napu Salmoni anilichi nile. <sup>8</sup> 'Lige aminabi simáruturu 'we nóchali olagá alé a'bé Kreta anilichi, 'lige sebáruturu bilena napu uchúpame ju barko napu Buenos Puertos anilichi nile. 'Lige alé yéniga a'bé kéturu alué we'ká riógichi Lasea anilichi.

<sup>9</sup> 'Ma we'ká rawé 'we nóchali olagá e'inaru ramué, alekeri amulí sébale romósali.\* 'Lige alué Páulo ruyele alué ralámuli alé e'yénigime bilé rejcholi. <sup>10</sup> Anele:

—'Emi ralámuli, neka jipe 'we majawá ba'wichí e'nagá, 'ma amulí seba romósali. 'Lige we'ká e'karúgame pabé we'kawawa mayé nili ne alé ba'wichí e'yéniga. 'Lige aminami alué barko 'ma we'kawawa mayé nili ne. 'Lige siné kachi ramué 'ma suwibórepakué —aníleke' é alué Páulo.

<sup>11</sup> 'Lige alué rió bárkochi nulame uché bilé 'nátili 'nátale, alué sontalo gapitánila alué 'lina e'wile. Napu anile Páulo tabilé e'wile. <sup>12</sup> 'Lige alé napu mochile alué ralámuli, aleka ta'mé 'we a'lá nile romó mochilia.

'Lige alekeri amulí suwábaga alué ralámuli simánili uché bilena. 'Lige anile:

—Simáwaleké jena, pala 'la sebara ramué alé Benise alé napu uchúpame ju alué barko —anile alué ralámuli.

Alé Benise ta'mé 'we a'wágame sébame nile alué eká. Alekeri alé simánilile alué ralámuli, alé mochimia romó. 'Lige alé we'ká riógichi Benise pe aba alué wa'lú gawí ilígichi nile nasipa ba'wichí Kreta anilime.

*Jena ruwimela alué barko 'we cha ikílige alé ba'wichí enagá*

<sup>13</sup> 'Lige a'lige ekale alué eká alé o'inaka, 'lige pe kilí ekale alué eká. 'Lige alekeri 'nátale alué ralámuli uché simánilia. 'Lige alué ralámuli tabilé che ikirá mayéleke' é. 'Lige alué ralámuli simíbale alé bárkochi, 'lige alué barko alé 'mimi ba'wichí enale a'bé alué Kreta anilime gawí ilígichi ba'wichí nasipa. <sup>14</sup> 'Lige pe a'kinana 'la iwégame a'wágame ekale alué eká alé 'naka wajton-aka níruga napu alué gawí Kreta anilime ilígichi. Aleka nolina alué eká 'we a'wágame. <sup>15</sup> 'Lige alué eká alué barko 'ma se'wimi rajkibúroleke' é. 'Lige alué barko tabilé chérigá simile alé o'wemi napu simánili alué ralámuli napugiti alué eká cha a'wágame ekáligime 'lige se'wimi 'nalina enale alué barko. 'Lige alué ralámuli alué barko o'tome arigá a'rele o'wemi o'toa alué barko. Ar'éleke' é napurigá o'tomela alué eká alué barko. <sup>16</sup> 'Lige ramué a'bé simáruturu alé napu ilí alué gawí Káura anilime, alué gawí alé ba'wichí nasipa ilígame. 'Lige alemi ta'mé 'we a'wágame eká alué eká. 'Lige alué u'tá barko alué napu alué wa'lú barko banagá enale alé guwánaka ujchagá, alué 'we nóchili olagá moiburu alé re'pá amoba wa'lú bárkochi reká. <sup>17</sup> 'Lige alué ralámuli alué wa'lú barko o'tome 'we majale 'ma su'para mayele alué wa'lú barko, alekeri bochígimi bulele iwíate. 'Lige 'we majale alué ralámuli alué wa'lú barko alé satebó 'ma chibara mayele. Alué satebó Sirte anilime ajtígichi. 'Lige re'kibule alué ru'nágame chiní alué eká cha'pime. 'Lige alé chiní 'ma re'kibusu, a'rele alué barko napurigá bo'né 'we 'mámala alué ekate.† <sup>18</sup> 'Lige melénala, biji 'we a'wágame eká ilile. 'Lige alué pabé napu muruka enale alué barko, alué ralámuli ba'wichí 'lúleke' é. <sup>19</sup> 'Lige uché melénala amulí suwábaga ba'wichí 'lúleke' é napu ekí tábiri nígame nile alué barko. <sup>20</sup> 'Lige we'ká rawé tabilé eteru ramué alué rayénili, nibilé so'plítiri, nibilé mechátiri cha a'wágame u'kiá ilíggame nabí rawé 'lige rukomi. 'Lige ramué 'la bijichía tabilé neyúsira mayéleke' é.

\* **27:9** Jena tabilé aní «amulí sébale romósali», pe aní 'ma simírale alué wa'lú piesta «Yom Kippur» anilime. † **27:17** Jaré 'nata bilé jiero bejtégame pale alé guwana napu alé bárkochi guwana chériga chujkule alé bárkochi napurigá ta'mé iwégame 'mámala. E'nesi glosario «ancla».

<sup>21</sup> 'Lige we'ká rawé mochiru ramué alé bárkochi tabilé go'ame go'gá. 'Lige alué Páulo o'weti ilísituru alé napu ramué mochile. 'Lige aníeturu alué Páulo o'weti ilísiga alé:

—'Emi ralámuli, abé alá nílíkuru 'emi ralámuli 'la e'wásaká napurigá aníe ne alé 'naka Kreta. Abajá mochí télíkuru ramué alé Krétachi. 'Lige jipe asírige resi júkuru jemi cha a'wágame ekame. 'Lige jipe asírige we'ká e'karúgame we'kuárúuru ramué jena ba'wichí e'yénaga. <sup>22</sup> 'Lige jípeko 'emi ralámuli tabilé chéláwagó rekó aliena resi ke jemi ba'wichí nasípami. Pecha 'wesi rió mukumela kaka rekó ramué ye barko we'kawárigé. <sup>23</sup> Be'á rukó nawáturu bilé alué santo ánjeli alé a'bé napu ne iligé, alué napu Onorúgame júlale. Neka Onorúgame nila kame, 'lige neka Onorúgame gu'írime ju. <sup>24</sup> 'Lige anéturu ne'chí alué santo ánjeli: «Pecha chéláwa, tabilé majawa mué Páulo. Mué rió sebámili kame alé Roma alué wa'lula gobierno ajtígichi, alekeri 'we alá repúmala Onorúgame alué ralámuli napu ekí mochí jena bárkochi», anéturu alué santo ánjeli ne'chí. <sup>25</sup> Alekeri 'emi ralámuli tabilé chéláwa, tabilé majawa. 'We iwega mochiwa 'nalina. Neka 'la machiame alarigá nimio. 'La bijchiá nimia napurigá anele ne'chí alué santo ánjeli. <sup>26</sup> Pe iligá ye barko rakichómala ba'wichí enagá bilé gawí ba'wichí nasipa iligame —anéleke'é alué Páulo.

<sup>27</sup> 'Lige alué wa'lú ba'wichí napu e'yénilige ramué alué Agriátiko anilime nile alé alué ba'wí wa'lú. 'Lige ramué oká tarali e'náruturu alemi alué eká 'we a'wágame ekachi. 'Lige alué eká pe ichúrimi o'tó alué barko tabilé asé 'la bi'lénapi. 'Lige bilé rukó, nasipa rukó kachi, machile alué ralámuli alé bárkochi nóchame alué barko alé we'é ajtígichi a'bemi enagó. <sup>28</sup> 'Lige machisá 'lige tétile alué ba'wí chiena rojkógame ka alué ba'wí alé. 'Lige alué ba'wí alé pee rojkógame nile, pe bilé liá miná gichao metro rojkógame nile alué ba'wí. 'Lige pe a'mibemi uchéchigo siné tétile alué ralámuli, 'lige aleka abé ta'mé 'we rojkógame nile, pe makué usani metro rojkógame nile alémika alué ba'wí. <sup>29</sup> 'Lige alué ralámuli rakichora mayele alué barko e'wele rejtechí. 'We majale alué ralámuli. 'Lige naó jiero e'wele 'we bejtégame iwíate o'wisa alé bárkochi 'lige ba'wichíkana rajkibule alé guwánachi napurigá alué barko ta'mé iwégame simela. 'Lige alué ralámuli Onorúgame tánele napurigá 'la yati che'limela. <sup>30</sup> 'Lige alué ralámuli alé bárkochi nóchame 'we majale. Lale alué ralámuli: «¿Jipe churigá neyúsiwa ramué ralámuli jena ba'wichí? 'Ma si'líporéko ramué», láleke'é alué ralámuli. 'Liko anile alué ralámuli bárkochi nóchame:

—Ramué rekibuwa alué e'wele jiero alé 'mimi bajchabemi —anile alué ralámuli.

Pe 'yégaga anile alué ralámuli laniá.

'Lige lanigá, chokile rekibua alué u'tá barko. 'Lige alué ralámuli 'nátale napurigá pe alué 'oni neyúsimala alé ba'wichí. <sup>31</sup> 'Lige alué Páulo yati anele alué wa'lula sontalo gapitánila:

—Alué ralámuli jena bárkochi nóchame tabilé rejpsa jena wa'lú bárkochi, 'liko tabilé neyúsimala 'emi.

<sup>32</sup> 'Lige alué sontalo kapitánila nulele alué uché jaré sontalo napurigá rijpunámala alué iwíale alué u'tá barko o'wírige. 'Lige alué u'tá barko alé ba'wichí wíjchile.

<sup>33</sup> 'Lige amulí che'lachi, alué Páulo najkile napurigá alué ralámuli go'ame go'mela. 'Lige anile alué Páulo:

—'Emi ralámuli 'ma oká tarali ju tabilé gojchiá, 'lige aminami tabilé go'ame go'yá majaga barko ba'wichí bokuíta mayega. <sup>34</sup> Neka taní napurigá go'mela 'emi go'ame. 'Emi bilé a'walí najkíguru napurigá 'la ajagá e'yenámala. 'Lige 'la tabilé che ikimela, nibilé pe bilé gupá we'kuámala 'emi.

<sup>35</sup> 'Lige alué ra'íchili ra'ichasa alué Páulo, 'lige 'wile bilé baní 'lige Onorúgame cheliera 'yale alé we'ká ralámuli mochígichi iligá 'lige chí'wánale alué baní. 'Lige chí'winasa bo'né go'ale alué baní. <sup>36</sup> 'Lige alué ralámuli etesa go'yame 'lige o'maka oyéalechigó, 'lige suwábaga alué ralámuli go'ale alué baní. <sup>37</sup> 'Lige ramué we'ká ralámuli nírigeturu alé bárkochi e'yénigime. Oká sientó miná gicháosa makué miná usani ralámuli, alakí nírigé ramué ralámuli alé bárkochi e'yénigime. <sup>38</sup> 'Lige ramué ralámuli 'ma go'sá napu ekí go'ame go'nálike ramué, 'lige alué ri'ligó napu barko muruka enálige 'ma ba'ichí 'lútuturu cha bejtégá e'nárigime alué barko napurigá ta'mé 'we bejtégame enámala alé ba'wichí napurigá 'la sebámala alé satebó.

*Jena ruwimela Páulo ruwíligo 'ma rajkichóligo barko*

<sup>39</sup> 'Ma che'lisá, tabilé machile alué ralámuli alé bárkochi nóchame chonilime ko alué gawí. Etele kaka wa'lú ajtígó saté alé 'mimi síjkóchimi. 'Lige alué ralámuli 'nátale alemi simánilia 'lige regá 'nátale: «Pala 'la sebara ye barko alé napu wa'lú saté ajtí.» <sup>40</sup> 'Lige alué ralámuli alué saté etesa, rijpúnile alué iwíale alué e'wele jiero bulérigame. 'Lige a'rele alué barko napurigá 'we 'mámala alé 'mimi ba'wichimi. 'Lige bo'tánale alué iwíale alué igú bulérigame napurigá 'la o'wemi simela alué barko alé sekochi napu ajtí alué wa'lú saté. 'Lige alué chiní bajchámama chujkúgame o'wínale alué eká cha'pime napurigá alué barko o'wemi simela. 'Lige alué barko 'we 'male



alé 'mimi o'wemi alé napu ajtile alué saté. <sup>41</sup> 'Lige alué saté alé ba'wichí re'lé ajtígame, wa'lú rumúlame n'leke'é. 'Lige alué ralámuli alué barko o'tome tabilé etele alué saté alé wa'lú rumúlágame ko. 'Lige alué barko alué bajchámana enágame 'ma alé satebó re'lé toka il'baleke'é. 'Lige alé il'bale alué barko chujpala satechi re'lé bokuika. 'Lige tabilé gayénale simiá alué barko alé il'basa. 'Lige alué barko alé il'basa 'ma gajpole alé 'naka guwánaka alué ba'wite, cha a'wágame similígame alué eká ba'wí 'yuga. 'Lige alué barko 'ma a'tabé gajpóleke'é. <sup>42</sup> 'Lige alué we'ká sontalo 'ma me'lináilile alué we'ká ralámuli galírale mo'áriga mochígame alé e'yénigime napurigá ta neyúsimala, napurigá tabilé júmasimala a'kega alé 'mimi suwemi. <sup>43</sup> 'Lige alué wa'lula sontalo gapitánila najkile napurigá alué Páulo tabilé mukumela alé. 'Lige alekeri tabilé a'rele napurigá alué sontalo me'limela alué ralámuli. 'Lige alekeri nulale alué gapitani napurigá alué ralámuli abé a'lá ejobénigame a'kega, alué jibóchimala alé ba'wichí, napurigá 'la sebámala alé miná napu ajtile alué saté. <sup>44</sup> 'Lige abiena nulele napurigá alué ralámuli tabilé ejobénigame a'kega, alueka rabileta gajpógame o'ká simámili nile ba'wichí. 'Lige alué rió gapitani lamesa, yati e'wale alué ralámuli, yati jibóchile alé ba'wichí. 'Lige suwábaga 'la sébale alué ralámuli alé miná suwemi satebó, tabilé 'wesi si'lile.

## 28

### *Jena ruwimela Páulo sinowite i'kirígilo*

<sup>1</sup> 'Lige ramué 'ma suwábaga sebasa alé ba'wichí suweke, 'lige machirúuru Malta anilime gawí ko alé ba'wichí nasipa ilígame. <sup>2</sup> 'Lige alué ralámuli alé ejperégame 'we na'temaka etele ramué alé sebásiga. 'Lige alué ralámuli wa'lú na'yáuru alé ba'wichí suweke. 'Lige aleka nolínaga reparu alé miná napu rajá ilile napurigá ramué sujkáliwa alé simibaga. Ramueka 'we ukiwaga eináruturu alemi, cha u'kiamé 'lige 'we ru-lagame. <sup>3</sup> 'Lige Páulo sebasa alé napu rajá ilile, 'lige 'minami simigá napubúgéturu pe u'kabi igú ta'mé sa'mime. 'Lige alué igú alé na'ichí ro'á chujkugéturu alué Páulo, 'lige bilé sinowí 'we chátriri 'we oparúgame ma'chínaturu alé igúraleka rajtálaga alué igú rajínachi. 'Lige Páulo sekálachi i'kiruturu alué sinowite. 'Lige alé ojaga chujkibaturu alué sinowí Páulo sekálachi. <sup>4</sup> 'Lige alué ralámuli alé ejperégame, a'bopi anile alué sinowite i'kilime etesa:

—Ye rió pe nejkógame kérépukué, 'lige rekó alé ba'wichika neyúsige ye rió, Onorúgame gastigárilé ye rió napurigá mukumela jemi —anile alué ralámuli.

<sup>5</sup> 'Lige Páulo sawéturu alué sinowí alé na'ichí. 'Lige Páulo tabilé che ikíturu rekó sinowite i'kísiga alé sekálachi. <sup>6</sup> 'Lige alué ralámuli bajínara mayele Páulo sekala alé sinowite i'kirígichi. 'Lige lale alué ralámuli: «Pe yati niraga mukumérépukué», lale alué ralámuli. 'Lige 'ma we'lisi kachi 'ma tabilé che ikile alué Páulo alé sekálachi alué sinowite i'kirígichi. 'Lige alué ralámuli alé ejperégame se'wináchiriga 'nátale 'liko. 'Lige alué ralámuli alé ejperégame pe Onorúgame mayele alué Páulo.

<sup>7</sup> 'Lige alé a'mulipi napu ramué ralámuli mochirige, alé pe a'bé alemi bo'ile bilé rió gawila, Publio anilime rió gawila. Alé gawí nasipa ba'wichí ilígame, selígame nile alué rió alé we'ká riógachi. 'Lige alué rió Publio 'we a'lá ganiliga etéturu ramué. 'Lige ramué bakiá rawé mochiruturu alué rió Publio bejtélachi. <sup>8</sup> 'Lige alué rió Publio o'nola 'we nayua asale alé, 'we iname nile, 'lige 'we wijtabume nile elá. 'Lige Páulo simile alué rawé nayume e'nemia. 'Lige Páulo alé sebasa napu ajtile alué rió nayume, 'lige Onorúgame 'yuga ra'ichasa 'liko Páulo nochale alué rió nayume majtogálachi. 'Lige alué nayume sa'wile nayua. <sup>9</sup> 'Lige alué ralámuli alé Malta ejperégame machisá alué Páulo 'yome ko, 'lige uché jaré ralámuli nayume jsile alé napu asale Páulo. 'Lige alué Páulo sa'wale suwábaga ralámuli napu eki jsile alé. <sup>10</sup> 'Lige alué ralámuli alé mochígame 'we 'la niraga etéturu ramué 'lige 'we 'la gu'irituru ramué. 'Lige a'kinana uché bilena bárkochi jímochi ramué, 'lige we'ká go'ame kógiuru ramué napurigá go'sisiga i'nawa boichimi.

### *Jena ruwimela Páulo sébaligo alé wa'lúlachi we'ká riógichi Roma anilichi*

<sup>11</sup> Bakiá mechá mochirigituru ramué alé Malta anilichi gawí nasipa ba'wichí ilígame. 'Lige uchéchigo siné 'móruturu ramué bilé bárkochi, alé 'naka Alejantríaka anilíchika simígame. 'Lige alué barko alé Malta chujkule buigá napurigá simíromala romósali. 'Lige alué barko chupálachi uchúkame kéturu oká mono napu tánime nile nejkúrale alué ralámuli barko o'tome. Bilé alué mono, Kastor anilime kéturu 'lige bilé Pólusi anilime kéturu. <sup>12</sup> Napu'lige ramué simasa, sebáruturu alé bilena barko uchúpamechi Sirakusa anilichi. 'Lige alé mochiruturu ramué bakiá rawé. <sup>13</sup> 'Lige alésí simáruturu alé 'mimi a'bé suwékimi. 'Lige arigá sebáruturu ramué alé bilena we'ká riógichi Rejio anilichi. 'Lige melénala abiena ekale 'lige guwana ekale napu enale barko. 'Lige oká rawé kachi sebáruturu alé we'ká riógichi Puteoli anilichi. <sup>14</sup> 'Lige alé najteparuturu ramué jaré ralámuli alué Esukristo oyérame. 'Lige alué ralámuli

repáruturu napurigá ramué bilé tarali mochiwa alé alué ralámuli 'yuga. 'Lige alésíko wijchí jaga simáruturu ramué. <sup>15</sup> Ralámuli alé Roma mochígágame Esukristo oyérame 'ma machigá mochile ramué alemi boichimi i'náriga. 'Lige alekeri alué ralámuli alé 'naka boichika e'yénele ramué najtepamia. 'Lige alué ralámuli bajchá simíbagame alé Rómaka, alué ralámuli sébale alé Apio anilichi, alé napu we'ká go'ame ralinélichí nile. Alé najtepáruturu ramué alué ralámuli. 'Lige alué ralámuli abé nujubá simíbagame pe kulí alé napu rewé Bakiá Galí Jágichi Gojchiame, aleka e'yénele alueka bijí, alé najtepáruturu ramué alué ralámuli. 'Lige alué Páulo alué ralámuli najtepasa alemi, cheliera 'yáturu Onorúgame 'lige Páulo wa'lú a'walí narele Onorúgame gite. <sup>16</sup> 'Lige ramué alé Roma sebasa, 'lige alué Páulo wanáchigo ajcháruturu. Tabilé napubuga mochiaru alué uché jaré ralámuli 'yuga galírale mo'áriga mochígágame. 'Lige bilé alué sontalo 'yúriga ajcháruturu alué Páulo alé napurigá alué sontalo repúmala alué Páulo.

*Jena ruwimela Páulo beníraligo ralámuli Onorúgame nila ra'íchali alé Roma sebasa*

<sup>17</sup> 'Lige bakiá rawé nujubapi alué Páulo alé Roma sebasa, alué Páulo nulele bilé rió napurigá bayémala suwábaga alué e'wélala ralámuli jurío alé epperégágame. 'Lige alué ralámuli e'wélala, 'ma napuísa alé, alué Páulo anele alué ralámuli:

—'Emi ralámuli jurío, neka peka asemi che 'siéché alué ralámuli jurío 'yuga. 'Lige aminami tabilé asé nasíbú ne alué rejcholi alué 'ya nerúgame napurigá nulálige alué ralámuli 'ya mochígágame. 'Lige abirigáchigo cha'pirú ko ne alé Rusaleni, 'lige nejiru ne alé ralámuli romano mochígichi. <sup>18</sup> 'Lige tabilé asé 'la machile alué ralámuli chu 'sílgo ne tachiri najсібúliga ne alué ralámuli jurío 'yuga. 'Lige 'ma su'panánale ne'chí, tabilé asé 'la machisáká ne alieti najсібúliga. <sup>19</sup> 'Lige alekeri ne bo'né táturu napurigá a'pawa ne jena Roma wa'lúlachi napurigá gatémala ne alué ra'íchali alué wa'lula gobierno Sesar 'yuga. 'Lige ne tabilé tábiri chéríkawé alué ralámuli jurío 'yuga, pecha tábiri najсібua neka alué ralámuli 'yuga, a'bopi ralámuli nírige ramueka. <sup>20</sup> 'Lige jipe pe alekeri repáturu ne jena napurigá ne ruwimela alué ra'íchili churigá nílga alé napu ne eyénilige. 'Lige ramué ralámuli israelita pe alé rewagachi moináмили kóriká, pe alekeri gite karénate bulériga ajtíkuru ne jena.

<sup>21</sup> 'Lige alué we'ká ralámuli anele alué Páulo:

—Ramué ralámuli jena mochígágame tabilé pe bilé osilí naretu alé Juréaka simígágame

osilí napu ruwime ju churigá nílge mué. 'Lige alué ralámuli jurío 'naka sígame tabilé 'wesi saega ra'icha mué olagá. <sup>22</sup> 'Lige ramué machínáiru napu mué 'nata. Ramueka machiame alué ralámuli bochígimi mochígágame saega ra'icha alué ye nuebo rejcholi olagá.

<sup>23</sup> 'Lige alué we'ká ralámuli 'la ra'íchale a'lige rawé napuímia. 'Lige a'lige rawé we'ká napuíle alé napu Páulo asale. 'Lige alué Páulo a'lige rawé ru'kuchégame ra'íchale. 'Ma chónachi a'rele ra'icha. Ruwile alué Páulo Onorúgame Wa'lula ko ralámuli nuleme. 'Lige aminami ruwile churigá anílgo Moisesi, 'we a'lá ma'chígime ruwile Moisesi churigá nímili nílga Esusi. 'Lige aminami Páulo ruwile alué ralámuli 'ya mochígágame napu ruwime nílge napu anele Onorúgame abiena ruwílgo churigá nímili nílga Esusi.

<sup>24</sup> 'Lige jaré ralámuli 'we a'lá semáriga gepule alué ra'íchali napurigá ruwile alué Páulo alé asagá. 'Lige jaré ralámuli tabilé bijchígile alué ra'íchali. <sup>25</sup> 'Lige jaré alué ralámu tabilé 'la bi'lepi 'nátaga mochile alué uché jaré ralámuli 'yuga. 'Lige alekeri chojkile jaré alué ralámuli ku epperélachi simiba. 'Lige alué Páulo anele alué ralámuli simíbachi:

—'We 'la bijchiá ra'íchale Onorúgame Alawala alué 'ya ajtígágame rió 'yuga Isaíasi anilime napu ruwime nílge napu anele Onorúgame, 'lige alué Isaíasi ruyele ralámuli napurigá ruyélige Onorúgame Alawala. Anélekurú:

<sup>26</sup> Simígá alé 'mi napu mochí alué ralámuli 'lige anéwaká alué ralámuli:

Rekó 'we 'la gepue 'emi alué ra'íchali, tabilé siné námame ju 'emi alué ra'íchili.

Rekó 'we a'lá e'nene, tabilé siné námame ju 'emi napu eté.

<sup>27</sup> 'Emi ralámuli 'we bewárigame sulégame ju. Na'ógágame najkégágame ju 'emi napurigá tabilé akémala 'emi alué ra'íchili ruilía.

'Lige 'we na'ógágame buségame ju 'emi napurigá tabilé etémala

napurigá tabilé námamala

napurigá ta ku oyéramala ne'chí

napurigá ta sa'wámala ne 'emi.

Alarigá anile alué Isaíasi. <sup>28</sup> 'Lige 'we a'lá machigá mochiwa 'emi ralámuli jurío. Onorúgameka julámala jaré ralámuli napurigá ruyémala alué ralámuli tabilé jurío churigá Onorúgame 'la bujeme ko chátiri 'nátali napu 'nátame ju alué ralámuli. Alué ralámulika 'la gepúmala.

<sup>29</sup> 'Lige Páulo 'ma anísá ye ra'íchali, a'liko simíbale alué ralámuli jurío 'we enániga ra'íchaga a'bópika.\*

\* 28:29 Jaré ralámuli 'nata tabilé osálgo Lukasí ye bersíkulo.

<sup>30</sup> Páulo oká bamí asale galí najtétiga bejtega, 'lige 'we semáriga eteme nile alué ralámuli alé jsime alué Páulo 'yuga ra'ichamia. <sup>31</sup> 'Lige alué Páulo 'we semáriga ruyele Onorúgame ka Wa'lula suwábaga ralámuli nuleme. 'Lige aminami 'we semáriga benírale alué ralámuli alué Wa'lula Esukristo nila rejcholi. 'Lige alué ralámuli tabilé 'wesi che anele alué Páulo napurigá a'rémala alué rejcholi ruyá.

Pe ikipi ruimé ne. Wa'lú cheliérabá.

## Ye Ju Alué Apeli Napu Osele Páulo Alué Ralámuli Napu Roma Ejperégame Nílige

*Kuira 'emi ralámuli Roma ejperégame napu eki Onorúgame oyérame ju.* <sup>1</sup> Ne Páulo nulá osínilige ya osilí,\* neka wanápurigame ju Kristo Esúsíte. Alué Kristo Esúsíte nulérigime ju ne napurigá nuleme nímala ne 'lige benírame Onorúgame nila ra'íchali.†

<sup>2</sup> Ye ra'íchali Onorúgame nila 'we 'ya mochígame ralámuli osale, alué napu ruwime nile napu anele Onorúgame,‡ osale bilena apélichí, napu ju Onorúgame nila osilí. <sup>3</sup> Alué ra'íchalika ruwime nile tachíri nóchali níggame nímili níliga Wa'lula Esukristo Onorúgame Inolá, alué napu ramué nuleme ju. Alueka ralámuli nile napurigá ramué, alué napu Rabí rijimála nile.§ <sup>4</sup> 'Lige 'we 'la machiaa 'la bijchíá 'la Onorúgame Inolá nílige napugiti Onorúgame Alawala ajali 'yaligame napu 'lige me 'lisuga.

<sup>5</sup> Onorúgame nulele alué Esukristo napurigá wanápamala ne'chí napurigá Onorúgame nila nochálichí nochámala ne, 'lige napurigá beníramala ne alué ralámuli tabilé jurío churigá ko Onorúgame napurigá we'ká ralámuli 'la bijchígimála Onorúgame ra'íchálila 'lige napurigá 'we 'la e'wimála Kristo. <sup>6</sup> 'Émika 'ma a'lá wanápurigame ju Esukristote napurigá 'emi Esukristo oyérame nímala, 'emi napu alé Roma ejperégame ju.

<sup>7</sup> Reportalí náwala ne, 'emi napu 'we galilía Onorúgamete, 'lige napu wanápurigame ju Onorúgamete napurigá 'la Onorúgame oyérame nímala 'emi, Onorúgame napu ju Wa'lula ramué O'nola 'lige Wa'lula Esukristo ramué nuleme 'we a'lá semáriga gu'írisa 'la képá 'emi, 'lige aminami 'la bi'lepi 'nátili 'yasa 'la képá 'emi.

*Jena ruwimela Páulo 'we siminalio alé Roma anilichí*

<sup>8</sup> Neka wa'lú cheliera 'ya Onorúgame napugiti Onorúgameka Esukristo nuléligime napurigá bujémála tabilé a'lá 'nátili napu 'nátame nile 'emi. Bochígimi 'we a'lá semáriga ra'icha ralámuli 'emi olagá, ralámulika ra'icha 'we 'la bijchígame ko 'emi napu aní Onorúgame. <sup>9</sup> Neka 'we 'la ganílga benírame ju ralámuli Esukristo nila ra'íchali rejcholi, 'lige Onorúgame bo'né 'we a'lá machí tánime ko ne Onorúgame, napurigá 'we a'lá gu'írimala 'emi ralámuli <sup>10</sup> 'lige Onorúgame 'we a'lá machí senibí tánime

ko ne napurigá elímala ne'chí napurigá simela ne alé napu 'emi ejperé, 'la nírásaká alarigá Onorúgame. <sup>11</sup> Neka 'emi eténili 'lige oilárinili ne 'emi napurigá abé ra'sálagá mochímala 'emi a'boi alawálichí napurigá tabilé guwana rujsímala 'emi Onorúgame oyeria. <sup>12</sup> Alarigá 'la oilárimála ne 'emi 'lige 'emi 'la oilárimála ne'chí.

<sup>13</sup> 'Emi Esukristo oyérame napurigá ne, 'we siminali ne alemi 'lige tabiléchigo gayénigo ne alemi simiá. Neka 'we siminali alemi napu 'emi ejperé 'emi benírimia Onorúgame nila ra'íchali, a'chigóriga napurigá beniri ne uché jarénami, napurigá we'ká ralámuli 'la oyéramála Onorúgame. <sup>14</sup> Neka benírimili júkuru Onorúgame nila ra'íchali rejcholi suwábaga ralámuli, ralámuli griego ra'íchame o tabilé griego ra'íchame, 'we jebénigame o tabilé jebénigame. <sup>15</sup> Alekeri 'we siminali ne ye ra'íchali benírimia alé we'ká riógachi Roma anilichí napu 'emi ejperé.

*Jena ruwimela Páulo churigá ka napu 'lige bijchígilia napu aní Onorúgame*

<sup>16</sup> Neka tabilé chijúniga beníriguru Onorúgame nila ra'íchali rejcholi, alué ra'íchalika Onorúgame a'walíla ju 'lige suwábaga ralámuli napu 'la nírame ju alué ra'íchali 'lige napu 'la oyérame ju alué ra'íchali, suwisá 'la rewagachi moinámalá. Tabilé chéré rekó jurío ke o rekó tabilé jurío ke. <sup>17</sup> Alué a'lála ra'íchalika 'we a'lá ma'chígime ruwíguru churigá gatéligo Onorúgame napurigá ralámuli 'la na'támala napurigá Onorúgame najkí. Aka regá aniché Onorúgame nila ra'íchali: «Alué ralámuli napu 'la Onorúgame oyérame ju, alueka 'la bijchígame ju 'la sébali olame ko napu aní Onorúgame.»\*

*Jena ruwimela Páulo Onorúgame 'ma 'oni a'réligo ralámuli cha nokame*

<sup>18</sup> Onorúgameka 'we ayoga ajtí alué ralámuli i'nílime 'yuga tabilé 'la nírame Onorúgame, alué ralámuli napu tabilé najkí napurigá uché jaré ralámuli benimela Onorúgame ra'íchálila. <sup>19</sup> Alué ralámulika 'we a'lá machí suwábaga churigá ka Onorúgame napugiti bo'né Onorúgame 'we a'lá etériligime suwábaga napu bo'né newale. <sup>20</sup> Rekó tabilé etérume ke Onorúgame, 'láchigo etérume júkó napu newale Onorúgame, 'lige etega ralámuli suwábaga tabíri napu newale Onorúgame 'we a'lá machírú wa'lú a'walí nígame ko Onorúgame. Alekeri pecha animeli júkó tabilé machime ko churigá ko Onorúgame. <sup>21</sup> Rekó 'we a'lá machime ke churigá ko Onorúgame, tabiléchigo nírame júkó Onorúgame aminami tabilé

\* 1:1 E'nesi 16:22. † 1:1 E'nesi glosario «apóstol».

‡ 1:2 E'nesi glosario «profeta».

§ 1:3 E'nesi glosario

«ancestor». \* 1:17 E'nesi Habacuc 2:4 'lige Gálatas 3:11 'lige Hebreos 10:38.

'yame ju cheliera. Iligá pe e'karúgame chíbiriga 'nátage e'yéname ju, alekeri tabilé 'la 'nata. <sup>22</sup> Alueka 'we jebénime korí, nobi tabiléchigo jebénime júkó, <sup>23</sup> pecha nirame kame Onorúgame napu tajsíné mukume ju, pe 'we alá nirame ju we'ká e'karúgame tábiri, 'lige iwérali tánime ju, alué e'karúgame tábiri ka ju napuyeri rió napu pe mukume ju siné rawé 'lige napuyeri chulugí 'lige napuyeri alué ajágame naó ronégame 'lige aminámichigó napuyeri alué ajágame wijchí bi'tigá e'yéname napu ju sinowí. Suwábaga alieti tábiri newasa iwérali tánime ju.

<sup>24</sup> Alekeri Onorúgame 'ma 'oni a'rele alué ralámuli, alekeri alué ralámuli 'we cha noká napugiti tabilé alá 'nátame kame.† Tabilé chíjúnime ju rióchoká okoka. <sup>25</sup> 'Lige tabilé bijchigí napu aní Onorúgame, pe 'we 'la bi-jhigime ju alué 'yégalí, 'we tánime ju iwérali napu Onorúgame newale napu 'pami rewagachi mochí 'lige apíépiri tábiri napu newale Onorúgame 'lige 'ma tabilé tánime ju iwérali 'la Onorúgame. Nabí 'we 'la ra'ichálime ju Onorúgame olagá, 'lige 'we 'la wikarálime ju Onorúgame wikala. Alarigá júpá.

<sup>26</sup> Alekeri Onorúgame 'oni a'rele alué ralámuli, alekeri alué ralámuli 'we cha noká napu nokanali a'boi. Abiénachigo jaré umugí pe umugíchoká newime ju, <sup>27</sup> 'lige aminami jaré rió tabilé newínili umugí 'yuga, pe rióchoká newime ju, nobi jípeko 'we resí nilia mochiko.

<sup>28</sup> Alué ralámulika 'ma a'rele Onorúgame oyeria 'lige 'ma tabilé alá 'nata, alekeri Onorúgame 'oni a'rele alué ralámuli, alekeri alué ralámuli 'we cha noká napu nokanali a'boi. <sup>29</sup> 'We cha nokame ju alué ralámuli, 'we korume ju napu tabilé a'boi nila ju, napuime ju cha nokímea, 'lige 'we enowélame ju, 'lige me'gá e'yéname ju uché jaré ralámuli, 'lige 'we na'áuka epperégame ju alué ralámuli uché jaré ralámuli 'yuga, 'lige 'we 'yégiga ra'ichime ju. <sup>30</sup> 'We cháriga ra'ichame ju uché jaré ralámuli olagá, 'we gichime ju Onorúgame, 'we gawéliga ra'ichame ju, 'we gunarume ju 'lige 'we riólame ju. 'Nátame ju churiga cha olamia bilé ralámuli, 'lige tabilé e'wame ju napu nulé a'boi o'nola. <sup>31</sup> Tabilé bijchigime ju bilé ra'ichali ruilia, tabilé sébali olame ju 'la sébali olámirisá bilé nóchali, tabilé siné e'kame ju 'lige tabilé na'temame ju uché jaré ralámuli. <sup>32</sup> 'We alá machí alué ralámuli Onorúgame anió 'ma me'liati ko alué ralámuli alanokame, abiénachigo resí nokagá epperégame júkó, 'lige 'we ra'salagá eteme ju uché jaré ralámuli 'we i'nílime.

## 2

*Jena ruwimela Páulo ruwíligo Onorúgame 'la sébali gastigárimé ko bilé ralámuli 'we cha*

† 1:24 E'nesi bersíkulo 29-30.

'sime

<sup>1</sup> Mué napu'lige ne'ocha uché jaré ralámuli pe mué bo'né che'wime kéré, napugiti mué abiena cha 'sika ilírome kámechigó napurigá uché jaré cha nokame ralámuli. <sup>2</sup> 'We 'la machiaa Onorúgame 'we 'la etea ajtigó cha nokiachi 'lige tabilé pe arigá a'remio tase gastigárima. <sup>3</sup> Mué napu ne'óchame ju ralámuli cha nokame kóriká 'lige mué bo'né 'we cha 'sika ilírome kéchigó, tase mayewa pe arigá a'remio Onorúgame mué tabilé gastigárima. <sup>4</sup> Mueka tabilé najkiéréko napurigá Onorúgamete na'temápu. Onorúgameka tabilé yati gastigárimé ju napu'lige cha 'sisa mué, 'lige mueka abichilubi 'we cha 'sika ilírome ju. Onorúgameka najkí napurigá a'rémala mué chibi 'sika eyena. <sup>5</sup> Abichilubi chibi 'sika einásaká mué 'liko Onorúgame a'wágame gastigárimala mué napu'lige seba raweli napu'lige Onorúgame gastigárimili ju ralámuli napuchilú resí nokale. <sup>6</sup> Onorúgame semati raweli 'yámala ralámuli 'la sébali olásaká napu Onorúgame najkí 'lige gastigo 'yámala alué napu tabilé sébali olame ju. <sup>7</sup> 'La rewagachi moínámala alué ralámuli napu ekí e'wime ju Onorúgame, alué napu najkime ju napurigá na'temaka etewa Onorúgamete 'lige alué napu 'la moínánilime ju 'pa rewagachi napu'lige suwisá. <sup>8</sup> 'Lige 'we a'wágame gastigárimala alué ralámuli napu tabilé na'temaka eteme ju uché jaré ralámuli 'lige napu tabilé e'wame ju napu Onorúgame najkí. 'We ayóniga etémala Onorúgame alué ralámuli. <sup>9</sup> 'We resí nilamala suwábaga alué ralámuli napu cha nokame ju, alué ralámuli jurío 'lige abiena alué ralámuli tabilé jurío. <sup>10</sup> Onorúgameka 'we 'la nirámala alué ralámuli napu ekí tabilé i'nílime ju, alué napu 'la na'temaka e'yéname ju uché jaré ralámuli. Aminami Onorúgame 'we a'lala 'nátili 'yámala alué ralámuli, alué jurío 'lige abiena alué tabilé jurío.

<sup>11</sup> Onorúgameka a'chigó aliena na'temame ju suwábaga ralámuli. <sup>12</sup> Ralámuli tabilé jurío tabilé machime ju chonime ra'ichali chujkugá Moisesi nila nulalí napu Onorúgame 'yale, nobi 'láchigo machime júkó tabilé 'la ko cha nokiá. 'Lige alué ralámuli jurío napu cha nokame ju rekó 'we alá machime ke Moisesi nulalila, alueka 'we machí Onorúgame wa'lú gastigo nejimio. <sup>13</sup> Pecha 'wesi ralámuli bi'wime júkó alawala pe gepuga alué nulalí Moisesi nila, iligá 'la sébali olame ju suwábaga napu aní Moisesi nulalila, alueka 'la bi'wimela alawala. Abiénachigó 'la bi'wimela alué ralámuli alawala napu 'la sébali olame ju suwábaga a'boi rejchóliila. <sup>14</sup> Alué ralámuli

tabilé jurío napu tabilé nígame ju alué Moisesi nila nulalí 'lige 'la e'wame a'boi nila rejcholi rekó tabilé nígame ke alué Moisesi nila nulalí, alueka 'la a'ká ralámuli ju <sup>15</sup> napugiti tabilé 'l'níluga járome kame. Bo'né Onorúgame rekile alué 'nátili. Chibi nokasá yati ne nilime ju. Alekeri machime ju tabilé 'la ko chibi nokiá. 'Lige 'we a'lá nochasa abiena 'we 'la ne nilime ju. 'We a'lá machime ju tabilé a'lá ko cha'simía 'lige 'we a'lá machime ju 'we a'lá ko tabilé cha nokogá e'yénilia. <sup>16</sup> Napu'lige raweli sebasa Onorúgame ralámuli gustisia olámachi, Onorúgame Esukristo julámala gaténiliga ralámuli 'yuga. Esukristoka wa'lú gastigo 'yámala alué ralámuli 'we chátiri 'nata mochísaká 'lige tabilé gastigo 'yámala 'la 'nata mochime ka. Alarigá ruyeme ju ne ralámuli.

*Jena ruwimela Páulo bilé ralámuli 'la bijchiá 'la Onorúgame oyérame ka tabilé chérikáme ko rekó sikirétigame ke pe'tá guwala isílala*

<sup>17</sup> 'Émika jurío korí 'lige 'we ra'salá 'emi jurío kóriká 'lige 'we machime ju 'emi Moisesi nulalila 'lige 'we ra'salá 'emi 'la Onorúgame oyérame kame. <sup>18</sup> 'Émika 'we a'lá machime korime ju napu Onorúgame najkí, 'lige aminami 'we ejbénigame korí 'emi nóchaga napurigá Onorúgame nulá. <sup>19</sup> 'Lige 'nata 'emi 'la umubamio beniria alué tabilé machime ralámuli churigá ka Onorúgame.\* <sup>20</sup> 'Émika anime ju 'la jebénigame ko 'emi rejcholi ruyea uché jaré ralámuli, alué tabilé rejchirúgame napu pe yati simíbame ju uché jaré ralámulite bayérialia, 'lige abiena alué ralámuli napu pee machime ju Onorúgame nila ra'íchali. 'Émika niga mochime ju alué Moisesi nila nulalí 'lige alekeri 'we ejbénigame korí 'emi suwábaga 'nátili 'lige senibi rawé 'la a'lala ra'íchali ra'íchame korí 'emi tabilé 'yégalí. <sup>21</sup> 'Émika 'we 'la rejcholi benírame ju uché jaré ralámuli, ¿'lige 'emi chonigá tabilé 'la benime júkó bajchá? 'Émika benírame ju ralámuli tabilé 'la ko chigolia, ¿'lige chonigá chigome júkó 'emi? <sup>22</sup> 'Émika tabilé 'la korime ju uché jaré umugi 'yuga okokia tabilé 'la 'emi 'yula, ¿'lige chonigá 'émika 'la 'yuga okome júkó alué che jaré umugi 'yuga tase 'la 'emi 'yula? 'Émika 'we a'lá ruyeme ju ralámuli tabilé a'lá ko iwérali tánilia alué e'karúganti tábiri napu pe ralámuli newálila ju, ¿'lige chonigá 'émika chigome júché tábiri napu nerú alemi pachá alué tábiri napu iwérali tánime ju alué ralámuli napu tabilé oyérame ju Onorúgame? <sup>23</sup> 'Émika 'we machime ju napu

Onorúgame najkí, tabiléchigo 'la e'wame kéréko 'emi napu Onorúgame najkí. 'Lige ralámuli etega alanokachi 'emi tabilé 'la nirame ju Onorúgame. <sup>24</sup> Alekeri Onorúgame ra'íchálila regá aní: «'Emi ralámuli jurío tabilé e'wame ju napu nulá Onorúgame alekeri alué ralámuli tabilé jurío tabilé 'la niraga ra'íchame ju Onorúgame olagá.»†

<sup>25</sup> Sikirétigame nisa 'emi pe'tá isílala guwala 'lige 'la e'wame nisa 'emi napu najkí Onorúgame, alarigaka 'we a'lá najtékame ju. 'Lige sikirétigame nisa 'emi pe'tá isílala guwala 'lige tabilé e'wasa napu najkí Onorúgame, 'liko tabilé najtékame nímala rekó sikirétigame ke 'emi pe'tá isílala guwala. <sup>26</sup> Ralámuli tabilé jurío rekó tabilé sikirétigame ke pe'tá isílala guwala 'lige 'la e'wame nisa napu nulá Onorúgame, alué ralámulika nímala napurigá alué ralámuli napu sikirétigame ju pe'tá isílala guwala alué napu 'la e'wime ju Onorúgame. <sup>27</sup> Napu'lige 'emi etea alué ralámuli napu tabilé sikirétigame ju pe'tá isílala guwala 'we 'la sébali olao alué nulalí napu Onorúgame 'yale Moisesi, 'lige 'émika 'we chijunámala etega tabilé 'la sébali olame ko 'emi alué nulalí rekó 'we 'la machime ke alué nulalí 'lige rekó 'la sikirétigame ke pe'tá isílala guwala. <sup>28</sup> Bilé ralámuli napu 'la bijchiá 'la Onorúgame oyérame ju, tabilé chéréko rekó sikirétigame ke pe'tá isílala guwala. <sup>29</sup> Alué 'la bijchiá 'la Onorúgame oyérame ka, alueka 'la Onorúgame Alawala alawégame ju 'lige 'la e'wame ju napu nulá Onorúgame. Onorúgameka 'we a'lá ra'salágá ajtí alué ralámuli 'yuga napugiti etéeme alué ralámuli na'tálila. 'Lige pe ralámulika tabilé eteme ju alué uché bilé ralámuli na'tálila, ralámulika 'we najtékame nerame ju 'nalina alué sikirékime bilé rió pe'tá isílala guwala. Tabiléchigo machígó tachiri 'nata ajtígó.

### 3

<sup>1</sup> ¿Tacha 'la júkó jurío níruga 'lige sikerétigame níruga pe'tá isílala guwala wi'chila? <sup>2</sup> 'We 'la júpaché jurío níruga 'lige sikirétigame níruga pe'tá isílala guwala napugiti Onorúgame 'yáligame alué bo'né Onorúgame nila ra'íchali alué ralámuli jurío 'ya ejperégame 'lige jipe bijí alué ra'íchali oyérilime niru. <sup>3</sup> 'Lige ¿chukimélawé 'ma a'resa Onorúgame oyeria jaré alué ralámuli 'lige napu 'la sikirétigame nile pe'tá isílala guwala wi'chila? ¿'Lige 'lacha alekeri 'ma tabilé sébili olámawé Onorúgame napu sébili olámorílige? <sup>4</sup> Tabilé alarigá ju, Onorúgameka sébili olame ju rekó ralámulika tabilé sébili olame ke. Regá aníché Onorúgame nila ra'íchali:

\* 2:19 Yolí ra'íchaga ka regá aní: «'Émika umébate korí o'toa 'emi alué ralámuli tabilé ma'chúlime 'lige ra'ósali ko 'emi alué ralámuli chonárale mochígame.» † 2:24 E'nesi Isaias 52:5 'lige Ezequiel 36:20-23.

Mué Onorúgame, mueka tabilé siné 'yégalí ruwime ju, alekeri napu'lige rálámuli anichi 'we 'yégalí ra'íchame ko mué, mueka senibí neyúrimala.\*

<sup>5</sup> Regá 'nátame ju jaré rálámuli: «Napu'lige cha nokisuga 'lige ku guwana na'tásiga, suwábaga e'nesi chiena 'la semá 'sime ko Onorúgame ka. 'Liko tabilé 'la ju Onorúgame gastigaria ramué napu'lige cha nokisuga.» (Regá ra'íchame ju rálámuli napu tabilé Onorúgame oyérame ju.) <sup>6</sup> Tabilé 'la ju alarigá na'talia. Onorúgameka tabilé 'yégalima napu'lige raweli sebase napu Onorúgame gastigo 'yámili ju rálámuli.

<sup>7</sup> Abirigáchigo jaréchigo regá anime ju: «Napu'lige ne 'yégalí ra'íchachi, Onorúgame gu'irame kéré ne. Onorúgame pecha gastigáromili júko ne'chí.» <sup>8</sup> Jaré rálámuli anime ju, alarigá nejime kará ne rejcholi, tabiléchigo bijchiá júko, alué rálámulika gastigáriwili ju.

*Jena ruwimela Páulo ruwíligo suwábaga tabilé a'lá alawégame nírigo jena wijchimoba ejperégame*

<sup>9</sup> ¿Abé a'ká rálámuli niru ramué jurío abé a'lá 'nátame me'tagá uché jaré rálámuli? Tabilé. Napurigá aní ne, suwábaga rálámuli tabilé a'lá alawégame niru rekó jaré jurío níriga 'lige aminamí jaré tabilé jurío ke. <sup>10</sup> Regá aní Onorúgame nila ra'íchali: Tabilé 'wesi rálámuli mochí bi'wígame alawégame.

<sup>11</sup> Tabilé 'wesi i'té 'la námame churigá ka alué a'lala 'nátili.

Tabilé 'wesi i'té 'la oyérinilime Onorúgame.

<sup>12</sup> Suwábaga 'ma a'rele Onorúgame oyeria, pe napuchíbiriga 'nátaga e'yena, suwábaga 'we cha noká.

Tabilé 'wesi rálámuli mochí 'la semáriga 'nátame,

nibilé pe bilé.†

<sup>13</sup> Napu'lige ra'icha pe chibiyeti ra'íchame ju, 'lige 'we 'yégalí ra'íchame ju.‡

Asíriga ená nílime ju rálámuli alué ra'íchali gepua

napurigá kame ju bilé sinowí sowelá.§

<sup>14</sup> 'Lige 'we gawéliga ra'íchame ju rálámuli olagá,

'we ayóniga rálámuli.\*

<sup>15</sup> 'Lige 'we jigame ju rálámuli me'liachi.

<sup>16</sup> Asíriga resiriga a'reme ju rálámuli, asíriga pobre a'reme ju.

<sup>17</sup> Alué rálámulika senibí na'áuka ejperégame ju.†

<sup>18</sup> Tabilé nirame ju Onorúgame, tabilé majame ju Onorúgame.‡

Regá aní Onorúgame nila ra'íchali.

<sup>19</sup> 'We 'la machiaa 'we 'la ma'chígime anió alué ra'íchali alé osilichi napu ju Moisesi osilila napurigá 'la machiboa alué napu nígame niru alué osilí tabilé 'wesi mochigo jena wijchimoba 'la sébali olame, ye ra'íchalika júkuru napurigá machiboa alué napu nígame niru alué osilí suwábaga rálámuli tabilé a'lá alawégame niru jena wijchimoba ejperégame, 'lige suwábaga 'we cha nokame Onorúgame gastigárimala. <sup>20</sup> Rekó 'la sébali olame níriga alué nulalí Moisesi osilila pecha bi'wígame alawégame nírukó. Onorúgameka pecha animélagó: «Ye rioka 'la tabilé se'winá 'síkame neraga etewá ne.» Alué nulalí Moisesi osililaka osirúgime júkuru pe napurigá 'la machiboa tabilé a'lá alawégame níriga.

*Jena ruwimela Páulo ruwíligo Onorúgame nāwíligo Kristo Esusi napurigá o'tomela suwábaga tabilé a'lá 'nátili napu nerúlige jena wijchimoba*

<sup>21</sup> Alué Moisesi 'lige alué rálámuli napu ruwime nile napu anele Onorúgame 'la ma'chígime ruwile tabilé chérikó Onorúgame níriga rekó tabilé sébali oliae alué napu nulá alué nulalí Moisesi osilila. <sup>22</sup> Onorúgameka 'la niraga eté suwábaga rálámuli napu 'la bijchígime ju napu anile Esukristo 'lige napu 'la e'wame ju. Onorúgameka pecha chélágó rekó tabilé jurío ke rálámuli o rekó jurío ke rálámuli. <sup>23</sup> Suwábaga rálámuli tabilé 'la bijchiá 'la bi'wígame alawégame ju, 'lige tabilé sébali olame ju napu Onorúgame najkí. <sup>24</sup> Onorúgameka 'we na'temá ramué, alekeri júlale Kristo Esusi napurigá o'tomela suwábaga tabilé a'lá 'nátili (pecado). Alué 'silé suwábaga gatea. <sup>25</sup> Onorúgameka Kristo Esusi júlale napurigá ramué neraga mukumela gulusichí. 'La bijchígisiká ramué, ramué neraga mukumea nawáligo Kristo Esusi 'liko Onorúgame 'la e'kámala ramué. Regá 'we 'la ma'chígime nérékuru chiena 'la na'tamao Onorúgame ramué. 'Lige ma'chígime nélékuru Onorúgameka tabilé yati gastigáriligo alué 'ya mochígame napugiti Onorúgameka 'we 'la buweme kame napurigá ku guwana na'tawa ramué. <sup>26</sup> A'chigóriga jipe 'we 'la ma'chígime nérékuru chiena 'la na'temao Onorúgame ramué. 'Lige 'we ma'chígime nérékuru bijí 'we 'la na'tamame ko Onorúgame alué rálámuli napu 'la Esusi oyérame ju.

<sup>27</sup> Ramueka pecha regá anéwagó Onorúgame: «Ramueka 'we 'la sébali olame niru alué nulalí Moisesi nila.» Pecha 'la ju rekó alarigá ania, pecha 'la sébali olame nírigime. Onorúgameka 'we na'temá

\* 3:4 E'nesi Salmos 51:4. † 3:12 E'nesi Salmos 14:1-3 'lige Salmos 53:1-3 'lige Eclesiastes 7:20. ‡ 3:13 E'nesi Salmos 5:9. § 3:13 E'nesi Salmos 140:3. \* 3:14 E'nesi Salmos 10:7. † 3:17 E'nesi Isaías 59:7-8. ‡ 3:18 E'nesi Salmos 36:1.

ramué napugiti ramueka Esukristo oyérame nírigime. <sup>28</sup> Onorúgameka pecha regá animélagó: «Ye rioka 'we a'lá alawégame ju napugiti 'la sébali olame kame napu nulá alué nulalí Moisesi osilila.» Onorúgameka iligá regá animela: «Ye rioka 'we a'lá alawégame ju napugiti 'la bijchígime kame napu aní ne.»

<sup>29</sup> Onorúgameka tase pe juríocho ralámuli na'temame ju, Onorúgameka na'temame ju suwábaga ralámuli rekó tabilé jurío ke. <sup>30</sup> Onorúgameka pe bi'lepi ju, 'lige Onorúgame júkuru napu oyerá suwábaga ralámuli napu oyérame ju Esukristo, alué jurío ralámuli 'lige alué tabilé jurío ralámuli. <sup>31</sup> Rekó Esukristo oyérame nírigé pecha regá na'táwagó: «Ramueka 'ma 'la bijchígime níru napu aní Esukristo, 'ma pecha najtékame júkó alué nulalí Moisesi nila.» Iligá tase a'rewa alué nulalí Moisesi nila. Alué Moisesi nulalílaka abiena najtékame ju. Napu'lige Esusi mukúsá suwábaga 'la sébali ikile napu aní alué nulalí Moisesi nila.

#### 4

*Jena ruwimela Páulo ruwílago Abraámi 'we 'la bijchígiligo napu anile Onorúgame*

<sup>1</sup> Regá aniboa: ¿Churigá 'la na'temaka etele Onorúgame alué Abraámi ramué rijimale ye 'ya ajtígime? <sup>2</sup> Onorúgame 'we galegá etesa alué Abraámi pe etega 'we 'la sébali olame ko e'karúgame napu Onorúgame nulele, 'liko Abraámi animékuru: Neka 'we 'la sébali olame ju napu Onorúgame nulá, alekeri 'la rewagachi moinámalá ne. Regá animékuru, nobi Onorúgameka tabiléchigo regá 'nátaga etélekó alué Abraámi: «Ye rioka 'la rewagachi moinámalá 'la sébili olame kame napu ne nulá.» Pecha alarigá 'nátaleskó Onorúgame pe 'la sébili olagáriká alué Abraámi. <sup>3</sup> Aka neregá aníché alué osilí Moisesi osilila: «Onorúgameka regá 'nátaga etele alué Abraámi: Ye rió 'la rewagachi moinámalá napugiti 'we 'la bijchígiligo napu aní ne.»\* <sup>4</sup> Napu'lige bilé rió nochasa enomí meka, alué enomika tabilé pe kógilime nímalá alué enomí alué nóchame, alué enomika 'ma métigame júkuru, alué nóchame mélekuru. <sup>5</sup> Onorúgameka 'we 'la bi'wígame alawégame neraga eteme ju bilé ralámuli rekó cha 'sírame nílige napugiti alué ralámulika 'la bijchígiligo napu anile Onorúgame. <sup>6</sup> Aka alué bo'né Rabí anílege'é Onorúgame 'we 'la neraga eteme ko apiépiri ralámuli napu 'la bijchígime ju napu aní Onorúgame. <sup>7</sup> Regá anime osale:

'We ganíliga mochí alué ralámuli napu e'kárigime ju Onorúgamete.

<sup>8</sup> 'We ganíliga mochí alué ralámuli

napu Onorúgame e'kame ju.†

<sup>9</sup> ¿Chieri júkó alué ralámuli napu 'we ra'salá mochí, napu tabilé gastigárigle Onorúgame? ¿Pe alué napu ju 'la sikirétigame pe'tá isílala o alué tabilé sikirétigame pe'tá isílala? ¿Aka Onorúgame 'we 'la neraga etélege'é alué Abraámi, 'we 'la bijchígilime napu anile Onorúgame? <sup>10</sup> ¿Chiéniko 'la neraga etélekó? ¿Bajchá ta'chó sikirekia pe'tá alué isílala guwala o máchala nujubá 'ma sikirésiga? Aka ta'chó sikirékiaguru pe'tá isílala. <sup>11-12</sup> 'Lige a'kinana Abraámika 'ma sikiréliru pe'tá alué isílala napurigá machimela ralámuli 'ma a'lá oyérame ko Onorúgame. 'Lige ta'chó sikirekia, alueka 'la bijchígime nile napu Onorúgame anile, 'lige Onorúgame 'we a'lá níraga etele. 'Liko Abraámika ju suwábaga ralámuli o'nola napu 'la bijchígime ju napu aní Onorúgame 'lige Onorúgameka 'la níra alué ralámuli, tabilé chéré rekó sikirétigame ke pe'tá alué isílala o tabilé sikirétigame ke.

*Jena ruwimela Páulo ruwílago Onorúgame 'la sébali olame ko bilé tábiri 'la sébali olámirisá*

<sup>13</sup> Onorúgame anele alué Abraámi 'lige alué Abraámi rijimale 'we a'kinana o'chérigame: «Suwábaga ye gawí 'emi nila nímalá.» Onorúgameka pecha regá 'nátaleskó: «Abraámika 'we 'la sébali olame ju napu aní alué nulalí, alekeri 'yámala ne suwábaga ye gawí.» Pecha alarigá 'nátaleskó Onorúgameka. Onorúgameka alarigá anele alué Abraámi 'lige alué Abraámi rijimale a'kinana o'chérigame napugiti Abraámika 'wéchigo 'la bijchígiligo 'la sébali olame ko Onorúgame bilé tábiri 'la sébali olámirisá, alekeri Onorúgame sébali rió neraga etele alué Abraámi. <sup>14</sup> Onorúgame 'la bi'weme nisa ralámuli alawala pe aluecho napu 'la sébali olame ju alué Moisesi nila nulalí, 'liko pecha sirbe nímilikó rekó 'we 'la bijchígiligo napu aní Onorúgame, 'lige tabilé siné 'la bi'wígame alawégame níwilikuru. <sup>15</sup> Jaré ralámuli 'nátaga ju rewagachi simamio pe 'la sébali olagá Moisesi nila nulalí, nobi tabiléchigo alarigá júkó. Tabilé 'wesi ralámuli umébage ju sébali olá alué nulalí Moisesi nila rekó 'we iwérali olae sébali olániliga alué nulalí Moisesi nila, abirigáchigo gastigáriwili ju. 'Lige napu'lige ralámuli 'la bijchígisa 'la sébali olame ko Onorúgame napu anile, 'liko tabilé gastigo narémala alué ralámuli.

<sup>16</sup> 'We 'la najkiáká napurigá 'la ne-jkúrimala Onorúgame, 'liko 'we 'la bi-jchígilime ju napu aní Onorúgame. Alarigá suwábaga ralámuli 'la gu'iriwa Onorúgamete 'la najkisáká 'emi napurigá gu'iriwa. Onorúgame tabilé lala: «Neka gu'irimala pe aluecho napu 'we 'la sébali olame ju

\* 4:3 E'nesi Génesis 15:6. † 4:8 E'nesi Salmos 32:1-2.



alué Moisesi nila nulalí.» Onorúgameka lalé 'lina: «Neka 'we 'la gu'írimala 'lina alué napu 'la bijchígime ju napu aní ne napurigá bijchígile alué Abraámi.» Alekeri suwábaga ramué o'nola ju alué Abraámi. <sup>17</sup> Aka regá aniché Onorúgame nila osilí: «Neka mué ajchá wa'lula we'kaná gawichí mochígime ralámuli o'nola neraga.» Alué Onorúgame júkuru napu oyérale alué Abraámi, alué Onorúgame napu ajalí 'yame ju suwígime 'lige napu machime ju suwábaga napu ikimeli ju.

<sup>18</sup> Napu'lige Onorúgame anesa ochérimio alué Abraámi inolá 'lige apalóchila, ochila, umúlila, 'lige ególila, 'lige aminacho we'ká, 'we 'la bijchígile Abraámi alanichi Onorúgame. 'Lige ochérale alué Abraámi inolá 'lige apalóchila 'lige ochila, 'lige umúlila 'lige ególila 'lige aminacho we'ká, 'lige we'kanami gawichí simíbale ejperélimia. <sup>19</sup> Rekó 'ma 'we o'chérame ke Abraámi, tabilé chélalé, 'ma amulí bilé sientio bamígime nile, 'lige 'ma 'we 'la machigá asale alué Abraámi 'ma pe a'kinana mukumeo, 'máchigo 'ma 'we o'chérigame nílgame, 'lige 'we 'la machigá asale tabilé siné rojparáligo alué Abraámi upila napu Sara anilime nile, tabilé siné 'kúchigame nílgo, tabiléchigo chélalékó, iligá alué Abraámika 'we 'la bijchígale 'la bijchiá alarigá nimio napurigá anile Onorúgame, Onorúgame 'la elimio alué upila napu Sara anilime nile napurigá 'la 'kúchigame nímala. <sup>20</sup> Abraámika tabilé gawéliga akele alanichi Onorúgame, o'chérimio alué Abraámi inolá, iligá alué Abraámika abéchigo 'la bijchígale siné rawé 'la ranélimio alué Sara napurigá anile Onorúgame. 'Lige alué Abraámika anele Onorúgame wa'lú a'walí nígime ko Onorúgame <sup>21</sup> 'lige 'la sébali olame ko bilé tábiri 'la sébali olámirisá. <sup>22</sup> Alekeri Onorúgame 'la sébali olame rió neraga etele alué Abraámi 'la bi'wígime alawégame neraga.

<sup>23-24</sup> Onorúgame nila ra'íchalika ruwí Onorúgame 'we 'la bi'wígime alawégame neraga etéligo Abraámi napugiti Abraámi 'we 'la bijchígiligame napu anile Onorúgame. 'Lige ye ra'íchalika ruwime ke aní Onorúgame 'we 'la bi'wígime alawégame neraga eteo ramué a'chigóriga napurigá Abraámi, napugiti ramué 'we 'la bijchígime nírígime napu aní Onorúgame 'lige 'la bijchígime nírígime Onorúgame ajalí 'yáligo Esusi napu ju ramué nuleme. <sup>25</sup> Onorúgame alarigá elale napurigá me'liboa alué Esusi napurigá o'togá mukumela suwábaga alué gastigo napu ramué naréputi nílgame, 'lige napurigá ku uché ajanamala Esusi napurigá Onorúgame 'we 'la bi'wígime alawégame ralámuli neraga etémala ramué.

## 5

*Jena ruwimela Páulo ruwígigo Onorúgame 'la bi'wígime alawégame neraga eteo ramué*

<sup>1</sup> Onorúgame 'we 'la sébali olame ralámuli niraga eté ramué napugiti ramueka 'la bijchígime nírígime 'la sébali olame ko Onorúgame bilé tábiri 'la sébali olámirisá, alekeri 'la ganíliga ejperégame niru 'la iwérali tániga Onorúgame. Wa'lula Esukristo napu ramué nuleme ju, 'ma 'la gatele, gulusichi mukule ramué nila gastigo o'togá napurigá ramué 'la ganíliga ejperégame niwa. <sup>2</sup> 'We ra'salígá mochiru, ramueka 'wéchigo 'la machiame 'we 'la nejkura ajtigó Onorúgame napugiti ramueka 'we 'la bijchígime nírígime 'la nejúkume ko Onorúgame. Abiena 'we ra'salágá mochiru napugiti 'we 'la machiame 'la rewagachi moínawio Onorúgame 'yuga mochimia napu'lige suwisuga. <sup>3</sup> Abiénachigo 'la ganíliga ejperélikó rekó i'sínimi 'we resí nílgame ejperégame nírige. 'Wéchigo 'la machiame alarigá benírame ko anáchaga rekó resí nílgame ejperélikó. <sup>4</sup> 'Lige benisúgáká anáchaga rekó resí nílgame ejperégame nírige i'sínimi, 'we 'la ganíliga etewa ramué Onorúgamete, 'lige alésiko 'la machigá mochiwa 'la sébali olamio napurigá anílgame bo'né Onorúgame. <sup>5</sup> 'Lige alésiko tabilé chijunawa, Onorúgame 'we na'temaka eté ramué, alekeri náole bo'né alawala napurigá asimémpá ramué alawálachi.

<sup>6</sup> 'Yako tabilé a'ká ralámuli nírigeturu, pe chibi nokogá járome nírigeturu. Ramué a'boi ralámulika tabilé machime nírige churigá 'la moínawa rewagachi, alekeri Esukristo mukúlekuru ramué gu'íriga. Onorúgameka 'ma 'la machigá asale aliéniko mukumeo Kristo. <sup>7</sup> Napu'lige me'liboli nisa bilé rió tabilé che'sika oyame, 'lige uché bilé rió etesa me'libólikó alué rió tabilé che'sime, siné kachi regá animela alué rió alé ilígame etea me'libólikó alué rió tabilé che'sime: «Ne'chí 'lina me'liboa, tase alué rió.» Siné kachi tabilé che animerémá. <sup>8</sup> Esukristoka me'líliru bilena gulusichi ujchagá ramué nila gastigo o'togá rekó 'we cha nokame nírige ramué, rekó alué Esukristo saíla nírige ramué, 'lige 'we a'lá machiaa Onorúgame 'we na'temao ramué. <sup>9</sup> Jipe Onorúgame 'we 'la sébali olame ralámuli neraga eté ramué aka Kristo mukúlepeché bilena gulusichi ramué nila gastigo o'togá, alekeri Onorúgame 'la bi'wígime alawégame neraga eté ramué. Onorúgame tabilé gastigárimala ramué napu'lige 'ma sebasa raweli napu Onorúgame gastigárimili ju suwábaga ralámuli cha nokame, napu'lige rewagachi o'tomeli ju Onorúgame oyérame ralámuli. <sup>10</sup> Onorúgame saíla nírige, 'lige 'ma gatele alué bo'né inolá náoliga napurigá

me'liboa bilena gulusichi. Jípeko Onorúgame 'kúchila niru 'lige 'la rewagachi simawa napugiti Kristoka 'pa rewagachi ajtigame 'we tania Onorúgame napurigá Onorúgame 'la gu'írimala ramué. <sup>11</sup> 'Lige aminami 'we 'la ra'sálá mochiru Wa'lula Esukristo 'máchigo 'la gatéligime napurigá 'la Onorúgame kompaniérola niwa.

*Jena ruwimela Páulo ruwíligo pe bilé rió chojkila gite tabilé a'lá alawégame ochérame ko ralámuli 'lige pe bi'lepi rió 'siligo suwábaga gatea napurigá bi'wígame alawégame gainámala ralámuli*

<sup>12</sup> 'We 'ya bajchá bejtégame rió Arani anilime tabilé 'la sébali olale napu nuléligame Onorúgame 'lige mukule\* 'lige alé si se'winárigá ikile alué 'ya bajchá bejtégame rió na'tálila 'lige jípesi ejperégame tabilé a'lá 'nátame ju ralámuli 'lige suwábaga suwiboli niru. <sup>13</sup> Alué 'we 'ya ejperégame ralámuli napu'lige tabilé 'cho ochéachi Moisesi tabilé 'cho nerule alué nulali napu Onorúgame 'yale alué Moisesi, 'máchigo 'la machime nílekó tachiri 'nátili 'la a'lala ko, 'lige 'la machime nile Onorúgamete gastigáriwio cha nokisáká, abiénachigo cha nokame nílekó. <sup>14</sup> Abirigáchigo suwíleko rekó Onorúgame tabilé ra'ichige alué ralámuli 'yuga ruigá tachiri chu'simía 'la ko 'lige tachiri chu'simía tabilé 'la ko napurigá ruyele Onorúgame alué Arani 'lige Moisesi. Esúsika nile napurigá apiépiri ralámuli napurigá alué Arani nobi Esúsika 'wéchigo 'la e'wime nílekó Onorúgame.

<sup>15</sup> 'Ya chojkiná rawé Arani tabilé e'wele Onorúgame 'lige tabilé a'lá alawégame gayénale. Alué Arani chojkila ju 'lige jípeko suwábaga ralámuli abisíchigo che'wíguru 'lige alekeri tabilé a'lá alawega e'yena. Alué bi'wígame alawá napu neji Onorúgame 'we 'la ju. Onorúgame júlale alué Esukristo napurigá alué Esukristo nejímala a'lala 'nátili. <sup>16</sup> Alué tabilé a'lala 'nátili napu 'nátale alué Arani tase a'chigóriga ju napurigá alué a'lala 'nátili napu nejlé Onorúgame. Suwábaga alué ralámuli napu tabilé e'wame ju napu Onorúgame najki napurigá 'sile Arani 'we 'ya, alueka narémala walú gastigo. 'Lige alué ralámuli napu 'la e'wame ju napu Onorúgame najki napurigá 'sile Esukristo, alueka 'la tabilé narémala gastigo rekó 'we cha nokágame ke. <sup>17</sup> 'Ya bajchá rawé napu'lige Arani tabilé e'wele Onorúgame, alé si a'kinana suwábaga ralámuli tabilé a'lá alawégame o'chérame ju 'lige jaré abé we'ká bamigá suwime ju 'lige jaré ta'mé we'ká bamigá, 'lige 'we 'la bijchígisáká Onorúgame Esukristo júlaligo

napurigá o'tomela suwábaga alué tabilé a'lala 'nátili, 'lige a'resa cha noká 'liko 'la moinámala 'pa rewagachi napu'lige suwisá.

<sup>18</sup> Pe bilé rió chojkila gite tabilé e'wagáriká 'ya chojkiná rawé napu Onorúgame nulale, a'lígési 'ma resítiri alawégame o'chérame ju ralámuli, 'lige pe bi'lepi rió 'sile suwábaga gatea napurigá tabilé resítiri alawégame nímalá ralámuli. <sup>19</sup> Yeka pe aniamé kérékuru pe tabilé e'wáligame Arani 'ya chojkiná rawé napu Onorúgame nulale, 'ma resítiri alawégame o'chérame ko ralámuli. Abiénachigo we'ká ralámuli tabilé resítiri alawélamalagó napugiti Esukristo 'la e'wéligame Onorúgame.

<sup>20</sup> Onorúgame 'yale Moisesi alué nulali napurigá machimela ralámuli tachiri chu'simía tabilé 'la ko 'lige tachiri chu'simía 'la ko. 'Lige napu'lige ralámuli 'ma machisá 'we cha nokao napu Onorúgame tabilé najki 'liko alué ralámuli abéchigo cha nokame ju, 'liko Onorúgame abé na'temame ju alué ralámuli. <sup>21</sup> 'We 'yasi chojkiná rawé 'we cha nokale ralámuli, jípesi abalarigá e'yena, alekeri suwime ju, 'lige Onorúgameka 'we 'la na'temaka gu'ira ralámuli jipe ejperégame napurigá e'wámala napurigá najki Onorúgame, napurigá 'la rewagachi simámala napu'lige suwisá. Wa'lula Esukristo 'ma gatele napurigá Onorúgame najki.

## 6

*Jena ruwimela Páulo ruwíligo Onorúgame 'yáligo ajali alué Kristo napu'lige me'lisuga, a'chigóriga 'ya a'wali ramué*

<sup>1</sup> ¿Chonokibóaché 'liko? ¿'We cha nokiboa napurigá Onorúgame abé na'temámala ramué? <sup>2</sup> ¿'Lacha bijí i'níluga járome níwaché, 'ma a'régame nírige alué tabilé a'lá 'nátili, 'lige 'lacha bijí na'táwaché alué tabilé a'lá 'nátili? <sup>3</sup> ¿Tabilé nélá 'emi? Suwábaga ramué napu 'la bijchígime niru Kristo Esusi mukúligo ramué gu'iriga, jípeko Onorúgame a'walíla a'waligame niru. 'Ma Onorúgame oyérame niru. Se'wináriga 'nátame niru. <sup>4</sup> Napurigá Onorúgame 'la 'yale ajali alué Kristo napu'lige alué Kristo me'lisuga, a'chigóriga 'la neji a'wali jipe napurigá ramué 'la umabawa a'rea alué tabilé a'lá 'nátili napugiti Kristo ku ajániligame, alekeri ramuéchigo napurigá ku ajánigame ralámuli niru napugiti 'ma 'la a'rérigame alué tabilé a'lá 'nátili napu 'nátaga e'yéname nírige.

<sup>5</sup> Ramué 'ma bijchígisáká Kristo alé gulusichi mukúligo, 'liko 'la ku ajánarigame niwa ramuéchigo napu'lige suwisuga napurigá ajánaliru alué Kristo. <sup>6</sup> Kristo mukule

\* 5:12 Alué Arani tase yati mukule napu'lige tabilé e'wisa Onorúgame. 'We a'kinana mukule. Tabilé go'sáká alué masana rakala napu tabilé go'núliga ajchárigame nile alué Arani, pecha mukumeli nílekó nibilé ramué pecha suwiboli nílekó.

bilena gulusichi ramué nila gastigo o'togá napurigá ramué 'ma tabilé ejperélawa napurigá ejperégame ju alué ralámuli napu tabilé umébame a'rea chibi noká. <sup>7</sup>Napu'lige Kristo alawala bajkísá bilé ralámulichi chojkime ju nulea alué ralámuli, 'lige alué ralámuli 'ma tabilé umériwa alué tabilé alá 'nátalite. <sup>8</sup>Alué Kristo alawala bajkísá ramuechi 'liko 'la gainawa e'wá napurigá najkí Onorúgame. <sup>9</sup>Ramué 'la machiaa alué Kristo ku ajánaligo 'lige tabilé siné ku mukumeo. <sup>10</sup>Alué Kristoka mukule ramué nila gastigo o'togá. Pe si'nepi mukule. 'Ma tabilé che siné mukumela. Alueka 'ma Onorúgame 'yuga ajtí. <sup>11</sup>'Emi 'we 'la e'wawa napu najkí Onorúgame, 'máchigo alá 'nátame kame 'emi Kristo Esusi na'tálila, 'lige alué Kristo Esusi alawala nejkúrimé ju napurigá tabilé na'tawa Remónisi na'tálila.

<sup>12</sup>'La listo mochiwa napurigá tabilé neyúrimala Remónisi na'tálila. <sup>13</sup>Tase a'rewa napurigá 'emi sekala cha nokimela, tase a'rewa napurigá 'emi chu'ala chátiri ra'íchali ra'íchámala. Iligá 'la eliwa 'lina napurigá Onorúgame nulámala 'emi alawálachi, 'lige 'la oyérawa Onorúgame. 'Émika napurigá suwígame kérturu napugiti chátiri bowechi e'yéname niligame. <sup>14</sup>Jípeko alué tabilé alá 'nátali 'ma tabilé umubámala 'emi nulea napugiti 'émika pecha regá 'nata mochígime: «Neka 'la rewagachi moinámla neka 'la sébali olame kame alué Moisesi nila nulalí.» Iligá 'émika 'la bijchigi 'la nejkúrimé ko Onorúgame.

*Jena ruwimela Páulo ruwílgo bilé rió napu nóchame ju bilé batroni 'yuga pe alué bí'lepi batrónicho e'weme ko*

<sup>15</sup>'Émika 'ma tabilé regá 'nátame nísaká: «Neka ta'mé 'we chéla rekó tabilé umebe ne sébali olá Moisesi nulalila», 'lige 'lacha alekeri cha nokogá e'yénamalawé 'emi. <sup>16</sup>'Émika 'la machíguru bilé rió napu nóchame ju bilé batroni 'yuga pe alué bí'lepi batroni e'weme ko. 'Emi 'we cha nokigá e'yéname nisa 'lige 'ma a'renalasa 'emi cha noká, siné kachi tabilé gainámala 'emi a'rea. 'Lige 'la Onorúgame e'weme nisa 'emi 'la semáriga ejperélamala. <sup>17</sup>'Émika 'we cha nokogá járome nile 'yabé raweka nobi jípeko 'wéchigo alá e'wágó 'emi napu beníriliro. 'Lige alekeri 'we ra'sálagá ajtí ne, 'lige wa'lú cheliera 'ya ne Onorúgame. <sup>18</sup>Jípeko 'ma 'la Onorúgame nila nóchalichi nóchame ju 'emi. 'Ma tabilé Remónisi nochálilachi. <sup>19</sup>Jipe ruimé ne 'la ma'chígime tabilé nóchali kame ra'íchalite napugiti 'émika tabilé 'cho námame kame ye ra'íchali. 'Émika Remónisi nochálilachi nóchame nile napu'lige tabilé 'cho oyeria Onorúgame, alekeri 'émika 'we cha nokame nile. 'Émika 'yuga okome nile

tabilé a'boi upila 'lige i'kirú chibi nokagá járome nile. Jípeko 'la Onorúgame nila nochálilachi nochámili júkuru 'emi.

<sup>20</sup>Napu'lige 'emi bijí tabilé 'cho oyérame ka Onorúgame, regá 'nátame nile 'emi: «Ramuéka pecha chélagó tabilé e'wiga Onorúgame napugiti ramueka pecha oyérame nírigime Onorúgame.» <sup>21</sup>¿Tachiri métukó 'lige 'emi alanokigá e'yénaga iligá pe chíjúnaga e'yena 'emi jipe alanokísá napugiti 'émika 'we gawélime niligame Onorúgame? <sup>22</sup>Jípeko 'máchigo tabilé nóchame kame 'emi Remónisi nochálilachi, jípeko 'ma 'la Onorúgame nila nochálilachi nóchame ju 'emi, 'lige alarigáká 'we 'la ju, napugiti Onorúgame nila nochálilachi nocháliaká 'la Onorúgame 'yuga mochímili kame 'emi napu'lige suwisá. <sup>23</sup>Alué ralámuli napu tabilé e'weme ju Onorúgame 'lige cha nokame, alueka tabilé Onorúgame oyérame nímala jena wijchimoba mochiga nibilé napu'lige suwisá, tabilé moinámla rewagachi. Onorúgameka 'la gatele napurigá ralámuli 'la Onorúgame oyéramala jena wijchimoba 'lige napurigá 'pa rewagachi moinámla ejperélimia napu'lige suwisá Wa'lula Kristo Esusi 'yuga.

## 7

*Jena ruwimela Páulo ruwílgo bilé mukí gunégame pe bí'lepi rió 'yuga bejtélímio*

<sup>1</sup>'Emi Onorúgame oyérame, 'émika 'we 'la machí tachiri gite osirúgime ko alué nulalí Moisesi nila, 'lige machí 'emi 'we 'la sébali oláwili ko alué nulalí bijí ajagá mochiga. <sup>2</sup>'Emi 'we 'la machí bilé mukí gunégame pe bí'lepi riocho 'yuga bejtélímili ko napu'lige bijí 'la ajagá ajtígachi alué rió napu júpá bo'né gunala. 'Lige alué rió alué mukí gunala 'ma mukusá, 'liko alué mukí 'la ikiarélamala uché bilé rió rewá. Alarigá aní alué nulalí Moisesi nila. <sup>3</sup>'Lige alué mukí se'nú rió rewisáká bijí gunégame ke, wa'lú gastigo rewimela. 'Lige alué rió alué mukí gunala 'ma mukusá 'liko alué mukí 'la ikiarélamala uché bilé rió rewá.

<sup>4</sup>Yeka aniamé kéré Kristo mukúligo, 'lige 'ma tabilé sébali oláwili ko napu aní alué Moisesi nila nulalí napurigá 'la moínawa rewagachi. Kristo mukule ramué o'tomea rewagachi. 'Lige ku ajánale, alekeri Kristo 'yuga newíkame káréliru, 'lige 'la umbawa sébali olá napu Onorúgame najkí. 'Liko ramué napurigá alué mukí gunámakame káréliru, 'lige Kristoka ju napurigá alué mukí gunala napu mukule. Napu'lige Kristo mukusá 'ma o'tole alué gastigo napu ramué naréputi nilige. 'Liko 'ma tabilé e'wérali olawa beniá alué Moisesi nila nulalí napurigá 'la rewagachi moínawa. <sup>5</sup>Napu'lige

'we cha nokogá ejperégichi ramué 'ya bájhá rawé ta'chó oyeria Esukristo, 'lige alué Moisesi nila nulalí machisuga ramué chu'simía 'we 'la ko 'lige chu'simía tabilé 'la ko a'ligési ramué oyéiriluru alué cha nokiamé 'lina, 'lige alué cha nokiamé oyéraga tabilé Onorúgame oyéiriluru. <sup>6</sup> Jípeko 'ma tabilé regá 'nátame niru: «Ramueka 'la rewagachi simawa napugiti 'la nígame nírigime Moisesi nila nulalí.» 'Ma pecha regá 'nátame nírukó. Iligá regá 'nátame niru napu'lige me'lisuga Kristo 'ma se'wináriga ikíligo. 'Lige jípeko Onorúgame Alawala gu'írame ju ramué napurigá 'la gainawa e'wá napu Onorúgame najkí.

*Jena ruwimela Páulo ruwíligo tabilé machime níligo chieri 'nátili tabilé a'lá ko*

<sup>7</sup> ¿Tabilé sirbe ju alué nulalí Moisesi nila? Abiénaguru, napugiti neka 'we 'la machiamé chu'simía 'la ko, pe alué nulalí leéraga. Neka pecha machimékó chu'simía a'lá ko 'lige chu'simía tabilé 'la ko tabilé machisáká ne alué nulalí. Tabilé machisáká ne regá anime osilí chujkugó alé nulalichi: «Tase we'ká e'karúgamea tábiri níga asináliwa. Onorúgame tase alarigá najkí», pecha machimé ko ne tabilé 'la ko alarigá na'tálila. <sup>8</sup> Machisá ne alué nulalí, alésí akiná chojkí ne e'karúgame tábiri najkiá, peka 'la kachi alarigá na'talia. Napu'lige bilé ralámuli tabilé 'cho machiá alué Moisesi nila nulalí, tabilé mayeme ju tabilé 'la ko napu'lige cha 'siá. <sup>9</sup> Napu'lige tabilé 'cho 'la nama ne alué Moisesi nila nulalí, tabilé machime ke ne tabilé 'la 'nátili ko e'karúgame tábiri najkiá, 'ma a'kinana napu'lige leérasa ne alué nulalí, machí ne chieri 'nátili tabilé a'lala ko, 'lige machí ne tabilé a'lá alawégame ko ne. <sup>10</sup> Onorúgameka nejile ye nulalí napurigá machíboa chu'simía tabilé a'lá ko, 'lige alésí 'la machí ne tabilé a'lá alawégame ko ne. <sup>11</sup> Remónisi 'yéaturu ne'chí. Napu'lige ne 'la námasa napu aní alué Moisesi nila nulalí tabilé 'la ko cha'simía, 'lige Remónisika aniéturu 'we a'lá ko cha'simía.

<sup>12</sup> Alué nulalí Moisesi nila 'we a'lá ju, Onorúgame nila kame. <sup>13</sup> Alué nulalí Moisesi nila 'we a'lá nísaká, 'liko ¿'lacha alué nulalí Moisesi nila nulá napurigá cha'símala ne? Tabilégurú. Alué Moisesi nila nulalí leéraga 'we 'la machí ne tabilé a'lá alawégame ko ne. 'Lige 'la machí ne chiena enárigá nimio tabilé 'la na'tásiga bijí ajagá mochúga.

<sup>14</sup> 'We 'la machiaa 'we 'la ko alué Moisesi nila nulalí, neka abiénachigo tabilé umébagó a'rea alué tabilé a'lá 'nátili. <sup>15</sup> Neka tabilé a'lá 'nátame ju rekó 'we a'lá na'tánilie ne. Neka tabilé nama chonigá ala'sime ko ne. <sup>16</sup> Napu'lige 'nata ne bilé 'nátili napu tabilé na'tánili ne, alarigá 'we 'la machí ne 'we 'la

ko alué nulalí Moisesi nila. <sup>17</sup> Alué tabilé a'lá 'nátili napu 'nata ne tabilé Onorúgame na'tálila ju, alué 'nátilika Remónisi na'tálila ju. <sup>18</sup> Neka 'we a'lá na'tánili, tabiléchigo gainárigó, alekeri napu 'nata ne tabilé 'la ju alué 'nátili. Alué 'nátili ju napu 'nata ralámuli, alué 'nátilika 'nátame ju ralámuli napusí Arani tabilé e'wale napurigá nulale Onorúgame. <sup>19</sup> Tabilé a'lá 'nátili 'nata ne rekó 'we a'lá na'tánalie ne. <sup>20</sup> Cha'sime ju ne rekó tabilé cha'sínilie ne. Neka 'we cha'sime ju napugiti pe Remónisi na'tálila 'nátame kame ne.

<sup>21</sup> 'We 'la machí ne senibí tabilé a'lá 'nátame ko ne rekó a'lá na'tánalie ne. <sup>22</sup> Neka 'we 'la nírá alué nulalí Onorúgame nila, <sup>23</sup> aba bilé 'nátili nerú ne alawálachi alué napu tabilé a're ne'chí napurigá na'támala ne napurigá ne na'tánili. 'Lige alué tabilé a'lá 'nátilika 'ma umero ne'chí.

<sup>24</sup> ¿Resí ikí ne! ¿Chieri 'la nejkúrimala napurigá ne 'we a'lá na'támala? <sup>25</sup> Pe alué Wa'lula Esukristocho 'la umubámala nejkura. Alekeri neka wa'lú cheliera 'ya Onorúgame suwábaga 'la gatéligime bo'né. Neka 'we a'lá néleme ju Onorúgame nobi tabiléchigo umébagó ne 'la sébali olá napurigá alué najkí.

## 8

*Jena ruwimela Páulo ruwíligo ku ajániwili ko 'la asisáká ramué alawálachi alué ajalí napu ku ajánale Esusi*

<sup>1</sup> Suwábaga napu Kristo Esusi oyérame ju tabilé narémala gastigo, alué napu tabilé ejperégame ju pe napurigá a'boi najkí, alué napu ejperégame ju napurigá najkí Onorúgame Alawala. <sup>2</sup> Onorúgame Alawala napu ajalí nejime ju 'ma bujé ne'chí alué tabilé a'lá 'nátili. <sup>3</sup> Ralámuli tabilé umévale a'rea tabilé a'lá 'nátili pe Moisesi nila nulalí leéraga. Alekeri Onorúgame júlale bo'né Inolá Esukristo napuyeri rió neraga napurigá tabilé umérowa Remónisi na'táilate. <sup>4</sup> Napurigá sébali olawa napu aní alué Moisesi nila nulalí, napurigá tabilé e'wawa alué tabilé a'lá 'nátili napu ramué a'boi na'talia, ramueka sébali oliame ju 'lina napu najkí Onorúgame Alawala 'ma 'la Onorúgame Alawala alawégame nírigime. 'Ma tabilé e'wílime niru alué tabilé a'lá 'nátili napu o'wisale napu'lige cha 'sile Arani.

<sup>5</sup> Alué ralámuli napu e'wame ju tabilé a'lá 'nátili, alueka tabilé e'wame ju napu nulame ju Onorúgame Alawala. Alué ralámuli napu e'wame ju Onorúgame Alawala, alueka tabilé e'wame ju chátiri 'nátili. <sup>6</sup> Pe a'boi na'tálila e'waliáká pe a'rílime kéré Onorúgame nila 'nátili. 'Lige 'la e'waliáká napu najkí Onorúgame Alawala 'la bi'lepi 'nátili 'nátame niwa 'la Onorúgame

na'tálilacho. <sup>7</sup> Alué 'we e'wime tabilé a'lá 'nátili, alueka Onorúgame saíla ju napugiti tabilé e'wame kame napu najkí Onorúgame. Aminami tabilé umébame ju sébali olá napu najkí Onorúgame rekó 'la sébali olánilie. <sup>8</sup> Alué napu epperégame ju tase 'la sébali olagá napu najkí Onorúgame, alué ralámulika tase 'la niraga etewa Onorúgamete, alueka epperégame kame napurigá a'boi najkí.

<sup>9</sup> 'Emi ralámuli tabilé e'wime ju napu najkí a'boi, iligá 'émika 'we 'la e'wame ju napu najkí Onorúgame Alawala napugiti 'émika 'la Onorúgame Alawala alawégame kame. Bilé ralámuli tabilé alawégame Kristo Alawala tabilé Kristo oyérame ju. <sup>10</sup> 'Émika Kristo Alawala alawégame ju, rekó suwigé 'emi cha 'sikiriká Arani 'la rewagachi moínámala 'emi napugiti Onorúgame oyérame kame 'emi. <sup>11</sup> Onorúgame Alawala ju napu ku 'yale ajalí alué Esusí napu'lige mukusá, alué alawá alawégame nísaká 'emi ku ajánamala 'emi napu'lige suwisá.

<sup>12</sup> Alekeri 'emi Onorúgame oyérame 'ma tabilé epperélawe pe napurigá najkí 'emi a'boi, iligá epperélawe napurigá Onorúgame najkí, <sup>13</sup> 'emi epperélasaká napurigá 'emi a'boi najkí, 'ma a'reme kérélamala 'emi Onorúgame oyeria. Onorúgame Alawala 'la gu'írisa 'emi napurigá 'emi 'ma tabilé cha nokínáliga járome nímala, 'liko 'we 'la oyéramala 'emi Onorúgame, <sup>14</sup> napugiti suwábaga ralámuli 'la e'wame kame napu najkí Onorúgame Alawala, alueka 'la Onorúgame 'kúchila kame. <sup>15</sup> Onorúgameka nejile bo'né alawala 'lige pecha nejilekó napurigá majawa, iligá 'la Onorúgame 'kúchila júkuru 'emi jípeko napugiti 'la Onorúgame Alawala alawégame kame 'emi. 'Ma 'la Onorúgame 'kúchila gainasa 'emi 'ma 'la ikiaré regá anea Onorúgame: «¡O'nó, ne O'nola!»\* <sup>16</sup> Onorúgame Alawala 'we 'la machiri ramué 'ma 'la Onorúgame 'kúchila nírgo. <sup>17</sup> 'La Onorúgame 'kúchila níriká 'la narépuwa napu Onorúgame nejímala a'chigóriga napurigá Kristo narémala. 'La anachásiká napurigá Kristo anáchale resí oliá, napu'lige ramué 'pa rewagachi moínásiga Onorúgame 'we a'lá niraga etémala ramué a'chigóriga napurigá niralía alué Kristo Onorúgamete.

<sup>18</sup> Rekó jípeko 'we resí nilia mochírige, 'pa rewagáchika asírige ganílga mochiwa. <sup>19</sup> Ye gawí 'lige suwábaga napu Onorúgame newale 'we resí nili 'lige abichilubi resí nilamala napusí 'ma machisá ralámuli jena wijchimoba epperégame 'la Onorúgame 'kúchila nírgo. <sup>20-21</sup> Onorúgame elale napurigá resí ikimela ye gawí 'lige suwábaga napu Onorúgame newale, Onorúgameka

abiénachigo 'la elámalogó napurigá ku 'la semáriga nímala jena gawichí 'lige suwábaga napu Onorúgame newale, abiena Onorúgame 'we 'la gu'írimala ramué. <sup>22</sup> 'We 'la machiáa senibí 'we resí nilio ye gawí 'lige suwábaga napu Onorúgame newale napurigá resí nílime ju bilé mukí napu'lige ochérimichi bilé u'tátiri. <sup>23</sup> 'Lige abiena ramuéchigo 'we resí nilia mochiru ramué napu alawégame niru Onorúgame Alawala. 'La alawégame niru Onorúgame Alawala nobi abiénachigo tabilé 'cho 'la 'nátame nírukó napurigá Onorúgame najkí. Buigá mochiru napurigá Onorúgame sébali olámala. <sup>24</sup> Esukristo 'ma o'tole ramué nila gastigo napurigá ramué 'la bi'wígame alawégame niwa 'lige buigá mochiru napurigá ku 'la semáriga nímala jena gawichí. Bilé ralámuli 'la etea napurigá ikimeli ju, 'liko alué ralámuli 'ma pecha buigá asimeli júkó. <sup>25</sup> Tabilé 'cho etewía ka napurigá ikimeli ju 'liko 'la builime ju napusí seba aleké rawé 'we 'la anáchaga rekó resí oliáe.

<sup>26</sup> A'chigóriga ju Onorúgame Alawala 'we 'la nejkúrima ju Onorúgame 'yuga ra'ichálichi napugiti tabilé ejobénigame nírigime Onorúgame 'yuga ra'íchaga. Onorúgame Alawálaka a'wágame tánime ju Onorúgame napurigá Onorúgame ramué gu'írimala. Alué alawaka pecha ra'ichalite tánime júkó Onorúgame, alueka nalame ju napu'lige najkiá napurigá Onorúgame ramué gu'írimala. <sup>27</sup> 'Lige Onorúgame 'we 'la eteme ju tachiri 'nátame ko ralámuli 'lige abiena 'la machí tachiri tánilio bo'né alawálate. Onorúgame Alawálaka tánime ju Onorúgame napurigá ralámuli gu'írimala, napurigá najkí bo'né Onorúgame.

*Jena ruwimela Páulo ruwílgo tabilé guwana rujsúpoli ko rekó resí ikiáe*

<sup>28</sup> 'We 'la machiáguru Onorúgame 'we 'la gu'írime ko alué ralámuli napu 'la nirame ju Onorúgame, ralámuli napu Onorúgame wanápale napurigá sébali olámala napu Onorúgame najkí. <sup>29</sup> Onorúgame 'ma 'la machigá asale 'yasi chieri 'la Onorúgame oyérame nimio, 'lige nimio napurigá alué bo'né Inolá Kristo. 'Lige alué Kristo nimio wa'lula ba'chirúgame neraga. <sup>30</sup> Alué ralámuli napu Onorúgame 'ma 'la machigá asale Onorúgame oyérame nimio, alué ralámuli wanápale, 'lige alué napu wanápale 'we 'la gu'írile napurigá sébali olame nímala napu Onorúgame najkí, 'lige 'we 'la niraga etele.

<sup>31</sup> ¿Churigá júkó 'liko? Onorúgame 'la ramué repuka asisáká, 'liko ¿chierite umériwawé ramué? ¡Ta'wésitegurú! <sup>32</sup> Onorúgameka pecha regá 'nátale ko: «Pe

\* 8:15 Yolí ra'ichalika «Abba Padre» anime chujkú osilichi.

me'libóleké ne Inolá wijchimoba julásaká ne.» Iligá Onorúgameka júlale bo'né Inolá napurigá mukumela bilena gulusichi ralámuli nila gastigo o'togá. 'Lige ¿'lacha ta nejímalawé suwábaga tábiri napu 'la ju? <sup>33</sup> Onorúgame 'ma 'la gu'íri le napurigá sébali olame nímla 'emi. ¿'Lacha animélawé ralámuli pe cha nokame ko 'emi? ¿Aka bo'né Onorúgame 'ma 'la ma'chígime aniché tabilé gastigo naremio alué napu gu'íriliru Onorúgamete napurigá 'la sébali olame nímla? <sup>34</sup> Pecha animélagó ralámuli wa'lú gastigo narépuli ko ramué napugiti Kristo kame napu mukule, 'lige alué kame napu ku ajánale, 'lige jípeko Onorúgame 'yuga ajtíkuru 'we tania Onorúgame napurigá ramué gu'írimala. <sup>35</sup> 'Liko ¿tachíríte umériwa ramué napurigá 'ma tabilé oyérame níwa ramué alué Kristo? Tabilé tábirigurú. Kóstoka abichilubi repúmala ramué. Rekó 'we resí níliga epperélsiga, 'lige rekó 'we resí anésiga ralámulite, 'lige rekó 'we e'lowika e'yénisiga 'mimi mejkami, 'lige rekó 'we ejélisiga ukibaga mejkami e'yénaga, 'lige rekó amulí me'lisuga ramué, ramueka pecha a'rewa oyeria Kristo napugiti bo'né Kristo abichilubi 'we 'la nejkúrimempá. 'Lige rekó 'ma suwisuge, abiena alué Kristo 'yuga mochiwa. <sup>36</sup> Regá anime osiruga chujkú Onorúgame nila osilichi:  
Mué oyérame kóriká ramué, ralámulika 'ma me'linali ramué  
napurigá bo'á napu ju me'liboli alarigá eté ramué.†

<sup>37</sup> Ramueka abiena tabilé guwana rujsúpua napugiti Kristo 'we na'temá ajtigame ramué 'lige 'we a'lá nejkura ajtigame. <sup>38</sup> Neka 'la machí tabilé tábirite umériwikó ramué napurigá 'ma tabilé oyérame níwa Kristo. Rekó suwisuge, Kristo abiena ramué 'yuga asimela. 'Lige nibilé santo ánjeli nibilé tabilé a'lá alawá neyúramala. Nibilé napu ekí jípe 'lige napu ikimela i'libeko tabilé neyúrimala. <sup>39</sup> Nibilé tábiri napu mochi 'pa rewagachi, 'lige nibilé tábiri napu nerú 'le go'nágana neyúrimala. Alarigá gatele Onorúgame alué Wa'lula Kristo Esusi júlaga napurigá mukumela ramué nila gastigo o'togá.

## 9

*Jena ruwimela Páulo ruwiligo Onorúgame wanápuligo alué ralámuli jurío napurigá Onorúgame oyérame nímla*

<sup>1</sup> Neka 'la bijchiá anibá, tabilé 'yégiga napugiti neka Kristo oyérame kame. Napu 'nata ne 'la Onorúgame Alawala na'tálila ju, alekeri 'la machí ne tabilé 'yégali ko napu ruwí ne, <sup>2</sup> 'we seweka ajtí ne 'lige 'we chálagá ajtí ne napugiti we'ká alué ralámuli

jurío tabilé Onorúgame oyeria mochígime napugiti ne abiena jurío kámechigó, alekeri 'we chálá ajtí ne. <sup>3</sup> Alué ralámuli jurío gastigáriwili ju. Neka a'rémikuru Kristo oyeria 'la bi'wimeli nísaká alué ralámuli alawala ne a'résaká Kristo oyeria. <sup>4</sup> Rekó Onorúgame 'we 'la gu'íri ge alué ralámuli jurío 'lige abijíchigo we'ká alué ralámuli tabilé oyérigó Onorúgame. Onorúgame wanápale napurigá 'la Onorúgame oyérame nímla alué ralámuli. Napu'lige simasa alé Ejipto mochiga Onorúgame o'tole alué ralámuli. 'Lige Onorúgame anele alué ralámuli 'we 'la gu'írímio, abiena 'yasa a'rele alué nulalí alué Moisesi. Onorúgame 'we 'la benírale alué ralámuli churigá tánilime ka iwérali Onorúgame. 'We 'la anele 'we 'la gu'írímio alué ralámuli 'lige 'la sébali gu'írile napurigá gu'írímiorílige. <sup>5</sup> Alué ralámulika alué Abraámi 'lige Akobo 'lige Isaki rijimela ju 'we a'kinana o'chérigame. Alué Kristo abiena jurío nílechigó, 'lige Onorúgame nulame ju bochígimi jena wijchimoba. 'We 'la képa senibí regá anisá suwábaga ralámuli: «'We 'la nejkúrima ju Onorúgame.»

<sup>6</sup> Neka pecha anigó tabilé sébali oláligo Onorúgame napurigá olámorílige, pecha suwábaga Israeli (Akobo) rijimela 'la Onorúgamete 'yárigame kame nóchali. <sup>7-8</sup> Onorúgameka tabilé 'yale nóchali alué Abraámi inolá napu Ismaeli anilime nile, pe alué Isákicho 'la 'yale 'lige bilé Isaki inolá Akobo anilime 'lige alué Akobo 'kúchila 'yáliku nóchali 'lige aminacho a'kinana o'chérísime. <sup>9</sup> Napu'lige tabilé 'cho ochérachi Isaki, Onorúgame regá anele alué Abraámi: «Napu'lige 'ma sebasa raweli uché nawámala ne a'lige mué upila Sara ranélamala bilé towí.» Alarigá anele rekó tabilé siné rojparame kachi alué Sara.

<sup>10</sup> Napu'lige ta'chó o'chérachi alué kuate, Onorúgame anele alué Rebeka Isaki upila: <sup>11-12</sup> «Alué ba'chirúgame tabilé nulémala alué bonila.» Alarigá anile Onorúgame napu'lige tabilé 'cho etea, napurigá 'la machimela ralámuli alué bo'né Onorúgame 'ma wanápuligo alué u'tabela pe alarigá najkíligame bo'né. <sup>13</sup> Regá anime chujkú Onorúgame nila osilichi: «Alué Akobo anilime towí 'we galegá etéturu ne 'lige Esaú anilime ka tabilé galegá etéturu ne.»

<sup>14</sup> ¿Churigá júpaché 'líkobá? ¿Onorúgame jaré tabilé galegá eté? <sup>15</sup> Aka Onorúgame regá anéleché alué Moisesi: «Neka 'we 'la galegá etémala alué napu ne bo'né najkí.» <sup>16</sup> 'Liko pecha chéréko rekó bilé ríó 'la sébali olame ke, Onorúgame apiépiri galegá eteme ju napu bo'né najkí. <sup>17</sup> Aka Onorúgame regá anéleché alué wa'lula rey alé Ejipto nulame: «Neka mué ajchá napurigá mué

nímala wa'lula nulame napurigá rálámuli machimela chiena wa'lú a'wali nígame ko ne, 'lige napurigá machimela suwábaga rálámuli jena wijchimoba ejperégame chieri ko ne.»\* <sup>18</sup> 'Liko Onorúgame 'we na'temá rálámuli napu alué bo'né najkí, 'lige tabilé e'wame newame ju apiépiri rálámuli napu tabilé e'wame newánili.

<sup>19</sup> ¿'Lacha anémalawé Onorúgame 'emi 'we i'níligame rálámuli ko? Peka 'wesi rálámuli abé wa'lula neraga 'nátame kachi me'tigá Onorúgame. Siné kachi bilé 'emi regá animela: «Alarigá nísaká, ¿'liko chonigá gastigari Onorúgame ne'chí? Neka 'la sébali olame ju napu Onorúgame najkí.» <sup>20</sup> ¿Chieri júpaché mueka napurigá alarigá anémala Onorúgame? Bilé sikolí wejcholite newárigime 'lacha regá anémalawé alué rálámuli sikolí newágame: «¿Chonigá alieti sikolí newápeché mué ne'chí?» <sup>21</sup> Alué rálámuli sikolí newame, newame ju napu chibiyeri newánili alué wejcholite. Wejcholí josa bilé rió oká sikolí newame ju abaleké wejcholite, 'lige uneme ju napurigá bo'né najkí, bilé 'we 'la uneme ju ba'wí ro'igá 'lige bilé uneme ju go'ame kógimia Onorúgame.

<sup>22</sup> Onorúgameka a'chigórige ju rálámuli 'yuga napurigá alué rálámuli sikolí newame. Jaré rálámuli 'la elime ju napurigá abichilubi 'we resi nokimela 'lige we'lisi anáchame ju 'lige tase yati ayome ju, 'ma a'kinana ayome ju 'lige 'we a'wágame gastigárima ju napurigá rálámuli 'la machimela Onorúgame wa'lú a'wali nígame ko. <sup>23</sup> Jaré tabilé gastigárima iligá 'we 'la gu'irile napurigá machimela rálámuli 'we na'temame ko Onorúgame suwábaga rálámuli. <sup>24</sup> 'Lige tabilé chélagá etele rekó jaré jurío rálámuli nílige napurigá ramué 'lige jaré tabilé jurío kachi. <sup>25</sup> Regá anime osale alué Osea anilime rió:

Alué rálámuli napu tabilé ne'chí oyérame ju 'la oilárimala ne alué rálámuli napurigá ne'chí oyérame nímala.

'Lige 'we na'temámala ne alué rálámuli napu 'yako tabilé na'temame ke ne.

<sup>26</sup> 'Lige alemi napu anéliru rálámuli:

«'Émika tabilé ne'chí oyérame ju», alanewa rálámuli:

«'Émika 'ma Onorúgame 'kúchila ju alué Onorúgame napu ajali nejime ju.»

<sup>27</sup> 'Lige aminami regá anime osale Isafási: «Rekó we'ká ke alué rálámuli jurío napurigá saté rejsioli napu mochime ju wa'lú bakochi suwé, nobi péchigo u'kabi rálámuli jurío nímala go'la rewagachi moínámili napu 'lige suwisá. <sup>28</sup> 'Ma pe'wemi Onorúgame sébali olámala napu sébali olámorilige.

Nawámala regá animea: 'Émika 'légana injiérnochi simámala, anémala alué 'we cha nokame rálámuli. 'Lige alué 'la Onorúgame oyérame rálámulika regá anémala: 'Émika 'la rewagachi simámala.» <sup>29</sup> Aka regá anime osáleché Isafási:

Onorúgame Bi'neli Wa'lula tabilé bujésaká ramué nila gastigo

pe u'kabi rálámuli israelita,

'liko a'chigórige suwiboli kékuru

napurigá alué rálámuli Soroma ejperégame

'lige Gomora ejperégame.†

*Jena ruwimela Páulo ruwíligo Onorúgame 'la bi'wígama alawégame newáligo alué rálámuli tabilé israelita*

<sup>30</sup> Ye ra'ichilika pe anime kéré: Onorúgame 'la bi'wígama alawégame newáligo alué rálámuli tabilé jurío. Alué rálámuli tabilé juríoka tabilé oyérame nile Onorúgame abirigá 'la oyérale Onorúgame. <sup>31-32</sup> 'Lige alué jurío rálámulika pe gawéliga etéliru Onorúgamete napugiti tabilé bijchíligame wa'lú a'wali nígame ko Onorúgame 'lige napugiti pe 'la sébali olagá alué nulalí Moisesi nila 'la bi'wígama alawégame gainánilime ko rekó tabilé bijchígie Onorúgame julamio alué Kristo rálámuli nila gastigo bujemia napurigá anilige Onorúgame 'we 'ya.‡ Alekeri pe napurigá pe rejte neraga ju alué Kristo, napu rálámuli torome ju e'yénaga. <sup>33</sup> Aka regá aniché Onorúgame nila osilí:

Bilé rejte ajchá ne alé Rusaleni anilichi (Sioni)

napurigá toroka bi'tibámala rálámuli,

'Lige alué rálámuli napu ekí tabilé gaweli alué rejte (Kristo)

tabilé chijúniga ejperélamala.§

## 10

<sup>1</sup> 'Emi Onorúgame oyérame napurigá ne, neka najkí 'lige 'we tani ne Onorúgame napurigá 'la bi'wígama alawégame nímala alué rálámuli jurío napurigá ne. <sup>2</sup> Neka 'we machí 'we nochánilio alué israelita rálámuli Onorúgame nila nóchali, tabiléchigo 'la sébali machime júkó 'lina napu Onorúgame najkí. <sup>3</sup> Alué rálámulika tabilé námale tachiri najkió Onorúgame napurigá rálámuli 'la 'nátame nímala napu Onorúgame najkí. 'Lige alué rálámulika mayele 'we 'la sébali olásaká alué nulalí Moisesi nila, 'liko 'la ganíliga asimeo Onorúgame.\* Onorúgameka tabiléchigo alarigá nulálekó. <sup>4</sup> Kristoka nawálekuru mukumea napurigá rálámuli tabilé aminabi e'wérali olámala sébali olá alué nulalí Moisesi nila rewagachi moínániliga. 'Lige alési akiná suwábaga rálámuli napu 'la bijchígime ju

\* 9:17 E'nesi Éxodo 9:16. † 9:29 E'nesi Génesis 19. ‡ 9:31-32 E'nesi Romanos 10:5. § 9:33 E'nesi Isafási 28:16.

\* 10:3 E'nesi Romanos 10:5.

Kristo nawáligo ralámuli alawala bi'wemia, alué ralámulika 'la rewagachi moinámala.

<sup>5</sup> Aka Moisesi regá anime osáleché: «Onorúgameka anime ju: Bilé rió 'la rewagachi moyéname nísaká pe 'la sébali olagá napu nulá Moisesi nila nulalí, 'liko pe 'la sébali olámili nímikuru napu nulá Moisesi nila nulalí, nobi tabiléchigo 'wesi umébame júkó 'la sébali olá.» <sup>6-7</sup> Bilé rió napu 'la oyérame ju Kristo, alué rioka 'la machi Kristo 'la sébali oláligo napurigá 'la rewagachi simawa napu'lige suwisuga. Alekeri gite nawale Kristo. Bo'né ku ajánale 'lige abé a'kinana 'ma rewagachi simile. 'Lige ramué napu 'la oyérame niru Kristo 'la rewagachi moináwachigó pe 'la Kristo oyériga. Pecha regá anibógó: «¿Chieri 'la nejkúrimalawé napurigá rewagachi moinawa? ¿Chieri nejmálawé alawá napu'lige suwisuga?» Kristo 'ma gatele. <sup>8</sup> Moisesi abiena regá anilechigó: «Émika 'we a'lá gepule alué rejcholi napu nulá 'we 'la bijchígilime ko napu aní Onorúgame.»<sup>†</sup> Alué rejcholi ju napu ramué beníruru 'emi. <sup>9</sup> 'Liko 'emi 'we 'la ruyésaká uché jaré ralámuli alué Esusi Wa'lula ko ramué nuleme, 'lige aminami 'emi 'la bijchígisa Onorúgame 'siligo ajalí 'ya alué Esusi napu'lige mukusá, 'liko 'emi 'la bi'wimela alawala a'lige yati 'la bijchígisa 'lige 'la rewagachi simámala 'emi napu'lige suwisá. <sup>10</sup> Napu'lige 'la bijchígisiga napu aní Onorúgame nila ra'íchali 'liko Onorúgame 'la ra'sálagá etémala ramué. Ramué 'la bijchígisiga Wa'lula ko Esusi ramué nuleme, 'lige ramué ra'ícháilite e'kali tánilime ju Onorúgame, 'lige 'la bi'wiami ju ramué alawala 'lige 'la rewagachi moinawa.

<sup>11</sup> Aka regá aniché Onorúgame nila osilichi: «Suwábaga napu 'la bijchígiga oyérame ju Onorúgame, tabilé siné chi-junámala.» <sup>12</sup> Onorúgameka 'we 'la gu'írame kame suwábaga ralámuli napu 'la tánime ju iwérali rekó jurío ke o tabilé jurío ke. Onorúgameka pecha chélegá eteme júkó. <sup>13</sup> Aka regá aniché Onorúgame nila osilichi: «Suwábaga ralámuli napu 'we a'lá bijchígiga tánime ju e'kali Onorúgame 'la rewagachi moinámala napu'lige suwisá, napugiti 'ma 'la bi'wérigame nímempá alawala bijí ajá mochiga.» <sup>14</sup> 'Lige ¿churigá 'la tánimalaché iwérali peka oyérame ke alué Kristo? 'Lige ¿churigá 'la oyéramalaché Onorúgame alué ralámuli, peka 'cho siné e'yénaché alemi Onorúgame nila ra'íchali benírame? <sup>15</sup> 'Lige ¿churigá 'la simámalaché alué ralámuli Onorúgame nila ra'íchali benírimia aminá

uché jarénami peka 'wesi i'tégichi napurigá julámala? Aka regá aniché Onorúgame nila osilichi: «'We 'la ga kame ju eteria alué ralámuli sébachi napu benírimili ju Onorúgame nila ra'íchali.»

<sup>16</sup> Tabiléchigo suwábaga 'la oyéralekó Onorúgame nila ra'íchali. Aka regá anileché alué Isaíasi 'we 'ya: «¿Chieri 'la bijchiá 'la oyéralekobá Onorúgame napu'lige ramué benírísiga Onorúgame nila ra'íchali alué ralámuli? Tabilé 'wésiguru.» <sup>17</sup> Napu'lige ralámuli ruwichi Onorúgame juláligo Kristo, 'lige ralámuli 'we 'la bijchígisa alué ra'íchali 'ma 'la Kristo oyérame ju.

<sup>18</sup> Aka rukirábá ne bilé ra'íchali: ¿Bijchiá julé tabilé sébaligo Onorúgame nila ra'íchali benírame ralámuli alemi napu mochí jaré ralámuli jurío? Pecha alarigá júkó. Aka Onorúgame nila ra'íchali regá aniché: 'Ma e'yénale ralámuli bochígimi alemi alué ralámuli epperélachi.

<sup>19</sup> Aka chéchigo rukirábá ne: ¿Tabilé 'cho siné e'yéniligarémá alué ralámuli alé Israeli anilichi Onorúgame nila ra'íchali benírame ralámuli? Aka 'ma 'la e'yéniliché. Alekeri 'la akele, tabiléchigo 'la bijchiá 'la oyéralekó. Aka Moisesi regá anime osáleché: 'We 'la gu'írimala ne (Onorúgame) alué ralámuli tabilé jurío, napu'lige etea alué ralámuli jurío 'we 'la gu'írichi ne alué ralámuli tabilé jurío 'we ayoa mochímala.

Neka na'áutamala 'emi ralámuli jurío alué ralámuli 'yuga napu tabilé nígame ju Onorúgame nila ra'íchali.<sup>‡</sup>

<sup>20</sup> Aka alué Isaíasi regá anime osáleché: Alé napu tabilé siné e'yéname nile benírísiga Onorúgame nila ra'íchali benírame, jípeko alé we'ká mochí Onorúgame oyérame. Alé napu tabilé 'wesi ralámuli oyérame nile Onorúgame

jípeko 'ma oyérame ju Onorúgame nila ra'íchali.

<sup>21</sup> 'Lige abiena osáleché Isaíasi: «Senibí rawé gu'írínilige Onorúgame alué ralámuli israelita 'we gawélime Onorúgame.»<sup>§</sup>

## 11

*Jena ruwimela Páulo ruwíligo Onorúgame wanápuligo alué ralámuli jurío napurigá nochámala Onorúgame nila nóchalichi*

<sup>1</sup> ¿Regáchala mayé 'emi Onorúgame 'ma tabilé gu'írío alué ralámuli israelita? Pecha alarigá júkó. Alué ralámuli israelítaka wanápuriru napurigá nochámala Onorúgame nila nóchali. Neka israelita júchigó. Neka

<sup>†</sup> 10:8 E'nesi Deuteronomio 30:12-14. <sup>‡</sup> 10:19 E'nesi Deuteronomio 32:21. <sup>§</sup> 10:21 Isaías 65:1-2. \* 11:1 'We 'ya ta'chó ochérachi alué Páulo, alué rió Akobo anilime makué oká rió 'kúchigame nile, bilé alué Benjamini anilime nile. Alué rió Akobo abé a'kinana 'ma wa'lú rió kachi alué Akobo chebilé rewá 'yáiruru Onorúgamete, Israeli anilime rewá 'yáiruru Onorúgamete. 'Lige alési akíná o'chérale alué ralámuli israelita.



Abraámi 'lige Benjamini\* rijimala ju alué napu 'we 'ya ejperele. <sup>2</sup> Onorúgameka 'ma 'la 'nata asale wanápamia napurigá nochámala Onorúgame nila nóchali alué ralámuli jurío 'we 'ya ta'chó o'chérachi alué ralámuli jurío. ¿Tacha machíché 'emi napu anile alué rió napu Elíasi anilime nile napu ruwime nile napu anele Onorúgame? Alueka Onorúgame 'yuga ra'íchale jurío ralámuli ayóniga. <sup>3</sup> Regá anele: «Mué Wa'lula Onorúgame, 'ma me'líliru alué ralámuli napu ruwime nile napu anele Onorúgame, 'lige 'ma gajúnale alé we'kaná mesa tegoli.† Pe necho rejpiáp ajagá, 'lige abiena me'linali ne'chí.» <sup>4</sup> Nobi Onorúgameka regáchigo anélékó: «Neka tabilé a'ré napurigá me'liboa alué gichao mili ralámuli jurío napu tabilé tánime ju iwérali alué tabilé Onorúgame alué Baáli anilime napu pe newárigime ju.» <sup>5</sup> Jípechigó 'we u'kabi ralámuli israelita mochí 'la Onorúgame oyérame, rekó we'ká israelita ralámuli mochige. 'Lige Onorúgame 'we na'temá alué ralámuli napurigá 'la Onorúgame oyéramala alué ralámuli. <sup>6</sup> Onorúgameka tabilé na'temale alué u'kabi ralámuli napu jipe 'la Onorúgame oyérame ju 'we 'la 'nátame kóriká, pe iligá na'temale bo'né.

<sup>7</sup> Alué ralámuli israelita 'we e'wérali olame nile 'la sébali olániliga alué Moisesi nila nulalí 'la bi'wígame alawégame gainániliga. Onorúgame 'la niraga etele alué u'kabi ralámuli israelita napu bo'né najkile. 'Lige uché jareka tabilé nirale 'lige tabilé námame newale tachiri najkió Onorúgame. <sup>8</sup> Aka regá aniché Onorúgame nila ra'íchali: «Onorúgame tabilé námame newale. 'Lige jipe abalarigá ju, tabilé námame ju.»† <sup>9</sup> 'Lige Rabíchigo abiena regá anime osale: Wa'lú gástico naresa 'la képá alué ralámuli napu wa'lú go'ame newame ju piesta newagá

<sup>10</sup> napurigá tabilé námame nímala napu eté napurigá 'we resi níluga e'yénamala senibí.Š

*Jena ruwimela Páulo ruwíligo abéchigo we'ká ralámuli tabilé jurío 'la bi'wimeo alawala 'la Onorúgame oyérame*

<sup>11</sup> Aka neka rukéguru 'emi: ¿Alué ralámuli jurío pala tabilé uché siné oyérame nímawé Onorúgame? Aka abiena ku 'láguru. Jípeko tabilé oyérame ju Onorúgame 'ma guwana rujsúligame nobi uchéchigo ku 'la oyérame nímalgó. Jipe etea alué ralámuli jurío 'we 'la oyerio Onorúgame alué ralámuli tabilé jurío 'lige 'we 'la gu'irilio Onorúgamete alué

ralámuli, abéchigo we'ká ralámuli jurío 'la oyéramala Onorúgame 'lige 'la bi'wimela alawala. <sup>12</sup> Napu'lige alué ralámuli jurío a'resa Onorúgame oyeria 'liko Onorúgame nila ra'íchali benírame uchéchigo bilénami simíbale benírímia uché jaré ralámuli napu tabilé jurío ju. 'Liko napu'lige uchéchigo siné oyérasa Onorúgame alué ralámuli jurío, 'liko asíruga we'ká ralámuli aminacho 'la machimela chiena 'la nejkúrima ko Onorúgame.

<sup>13</sup> Jípeko ra'íchámala ne 'emi 'yuga napu tabilé jurío ju, Onorúgame jula ne'chí napurigá beníramala ne 'emi Onorúgame nila ra'íchali, 'lige ne níriká alué nóchali 'we najtékame ju, 'lige 'we ganili ne aleké nóchali nóchaga. <sup>14</sup> Neka najki napurigá alué ralámuli jurío 'we ayoa mochímala 'emi etega 'we 'la oyerio napu ne beniri 'emi ralámuli tabilé jurío, 'lige a'rénimala cha noká. <sup>15</sup> Napu'lige alué ralámuli jurío a'resa Onorúgame oyeria, 'liko alué Onorúgame nila ra'íchali benírame uché jarénami simíbale napu ejperégame nile alué ralámuli tabilé jurío. 'Lige ¿chukimélawé jena wijchimoba napu'lige alué ralámuli jurío ku 'la oyérasa Onorúgame? Alué ralámuli jurío 'lige alué ralámuli tabilé jurío 'ma 'la bi'wimela alawala. <sup>16</sup> Alué Abraámi 'lige alué uché jaré 'we 'ya ejperégame ralámuli israelita Onorúgamete wanápurigame nile napurigá Onorúgame nila nóchali nochámala, abiena alué ralámuli israelita jipe ejperégame Onorúgamete wanápurigame ju napurigá Onorúgame nila nóchali nochámala.\*

<sup>17</sup> Bilé olibo galírale ilígame rijpunáliku pe'kabi atuala 'lige alé na'chucháliku alué olibo jami ilígame atuala. Ye ra'íchalika pe aniamé kéré alué ralámuli jurío ko napurigá alué olibo galírale ilígame olibo jino.† 'Lige 'emi ralámuli tabilé juríoka ju napurigá alué olibo jami jágame alué olibo pe koriente. <sup>18</sup> 'Lige 'emi ralámuli tabilé jurío tabilé gichiga etewa alué ralámuli jurío napu tabilé oyérame ju Onorúgame, napugiti 'émika kame napurigá alué olibo koriente atuala alé jino olíbóchi na'chuchárigame, 'lige alué ralámuli juríoka ju napurigá olibo jino atuala 'lige nawala.

<sup>19</sup> Siné kachí jaré 'emi animela: «Alué olibo jino atúalaka rijpunáliku pe'kabi alé na'chuchamia alué olibo koriente atuala jami ilígame na mejkaka a'párigame.» <sup>20</sup> 'La bijchiá ju napu animela 'emi, alué olibo jino atuala 'ma rijpunáliko napugiti 'ma a'rélgame Onorúgame oyeria.

† 11:3 E'nesi glosario «altar». ‡ 11:8 E'nesi Deuteronomio 29:4. Š 11:10 E'nesi Salmos 69:22-23. \* 11:16 Páuloka regá anime osale: Alué bajchá wajsérigame baní Onorúgame kógiwili nisa, 'lige abiena suwábaga alué uché jarela baní abiena Onorúgame nila nímalachigó. Rojá nawala Onorúgame nila nisa, 'liko abiénachigó alué rojá Onorúgame nila nímala 'ma suwábaga atuala 'yúriga. † 11:17 Alué olibo napu echilú masana alachilú ju. 'Lige alué oliboka rakeme ju aseituna anelime.

Tabiléchigo gunarume níwagó 'emi, iligá 'we majawa 'lína a'regá Onorúgame oyeria. <sup>21</sup> Aka Onorúgame tabilé e'kálige'é alué ralámuli jurío, ¿mayé 'emi Onorúgame 'la e'kamio 'emi a'résaká Onorúgame oyeria? Pecha e'kámaligó. <sup>22</sup> 'We 'la na'tásibá. Onorúgame 'we na'temame ju alué ralámuli 'la sébali olame napurigá Onorúgame najkí 'lige 'we a'wágame gastigo 'yame ju alué 'ma a'reme Onorúgame oyeria. 'Lige 'we na'temápua 'emi Onorúgamete tabilé a'résaká Onorúgame oyeria. 'Ma a'résaká 'emi Onorúgame oyeria 'ma tabilé na'temápua 'emi Onorúgamete. Alígeko 'ma rijpunárigame kárélamala 'emi alé jino olíbochi jágame atawá. <sup>23</sup> 'Lige alué ralámuli jurío 'ma uché ku 'la oyérasaká Onorúgame 'liko Onorúgameka uché ku 'la e'kámala alué ralámuli. <sup>24</sup> 'Émika ju napurigá alué olibo koriente atawala, alué napu na'chucháliru alé olibo jínochi. Aka Onorúgame 'la na'chúchalige'é alué olibo jínochi alué olibo koriente, 'lige ¿tacha 'la ku na'chuchámalawé Onorúgame alué Olibo jino atawala ku alé olibo jínochi napu rijpunáririge?

*Jena ruwimela Páulo ruwíligo aminacho abé we'ká ralámuli israelita oyérimio Onorúgame napu'lige 'ma oyérasa we'ká ralámuli tabilé israelita*

<sup>25</sup> 'Emi ralámuli tabilé israelita, ruimé ne bilé 'nátili napu 'emi tabilé machí napurigá 'nata ajtí Onorúgame, napurigá tabilé gunarume níkala 'emi. Ajaré ralámuli israelita 'ma a'rele Onorúgame oyeria nobi abiénachigo ku 'la oyéramalagó Onorúgame alué ralámuli. Alué ralámuli israelita tabilé oyérame níkala Onorúgame napusi 'ma 'la Onorúgame oyérasa suwábaga alué tabilé israelita ralámuli napu ekí Onorúgame najkí napurigá Onorúgame oyérame níkala. <sup>26-27</sup> A'lige si suwábaga alué ralámuli israelita 'ma bi'wígame alawélamala napurigá aní Onorúgame nila osilí. Alué osilika regá aní: Julámala ne Rusalénika ye rió napu 'we a'lá 'nátili 'yámala suwábaga alué ralámuli israelita.

Alarigá gatémala ne. †

<sup>28</sup> Alué ralámuli israelita 'ma a'rele Onorúgame oyeria, alekeri alué ra'íchali Onorúgame nila 'emi ralámuli tabilé israelita 'lína beníriliru. 'Lige Onorúgame abiena 'we 'la na'temá alué ralámuli jurío rekó 'ma a'regé Onorúgame oyeria. Onorúgameka 'máchigo 'la anéligame alué Abraámi 'we 'la gu'irimio alué ralámuli israelita <sup>29</sup> 'lige Onorúgameka senibí 'la sébali olame ju bilé tábiri 'la sébali olámorisá. <sup>30</sup> 'Émika tabilé oyérame nile Onorúgame nobi jipeko 'wéchigo na'temáligó 'emi Onorúgamete napugiti

ralámuli israelita a'rélige Onorúgame oyeria. <sup>31</sup> Alué ralámuli jurío a'rele Onorúgame oyeria napugiti gawélige gepúlígime napu'lige 'we 'la ruilía Onorúgame nila ra'íchali. 'Liko napu'lige uché siné 'la oyérasa Onorúgame alué ralámuli jurío Onorúgame 'we 'la na'temámala alué ralámuli etega 'we 'la na'temakio Onorúgamete 'emi ralámuli tabilé jurío. <sup>32</sup> Bo'né Onorúgame elale napurigá cha nokame níkala suwábaga ralámuli, alarigá elale bo'né Onorúgame 'we na'temamia suwábaga ralámuli tabilé e'wame.

<sup>33</sup> 'We a'lá 'nátame ju Onorúgame, ta'wesi anaga. 'Lige pecha 'wesi anámalagó Onorúgame. <sup>34</sup> «¿Chieri 'la machí napu 'nata Onorúgame? ¿Chieri 'la ruyémala rejcholi Onorúgame? <sup>35</sup> ¿Chieri ralámuli kógile bajchá Onorúgame napurigá 'la nejímalachigó Onorúgame?» <sup>36</sup> Onorúgame newálila júkuru suwábaga napu nerú jena wijchimoba 'lige rewagachi. 'Lige alekeri bo'né nila ju. Senibí 'we 'la oyérisiga Onorúgame 'la kápá 'la semáriga ra'íchaga Onorúgame olagá. Alarigá olásiga 'la kápá.

## 12

*Jena ruwimela Páulo ruwíligo sébali oliame ko napu Onorúgame*

<sup>1</sup> 'Emi Onorúgame oyérame napurigá ne, Onorúgame 'we na'temá 'emi. Alekeri tani ne napurigá 'emi 'la senibí 'la sébali olame níkala napu Onorúgame najkí. 'La alarigá oliame júkuru 'emi 'la Onorúgame oyérame níriká. <sup>2</sup> Tase alarigá ejperélawa napurigá ejperégame ju ralámuli jipe ejperégame napu tabilé Onorúgame oyérame ju. 'La lisen-sia 'yawa Onorúgame napurigá se'nú 'nátili nejímala. 'Lige alarigá 'la machimela 'emi alué 'nátili napu 'alala ju, alué 'nátili napu Onorúgame galeme ju.

<sup>3</sup> Neka 'we na'temaka etuíme ju Onorúgamete a'chigóriga napurigá chejaré 'lige Onorúgamete wanápurigame ju ne napurigá Onorúgame nila ra'íchali beníramala ne ralámuli, alekeri ye rejcholi ruyémala ne suwábaga 'emi: «Na'táwaká Onorúgame 'siligo 'nátali 'ya 'emi.» <sup>4</sup> Ramueka sekégame niru, ronégame niru, najkégame niru, 'lige buségame niru. Sekaka nóchame ju, 'lige ronoka simime ju, najkaka akeme ju, 'lige busika eteme ju. <sup>5</sup> A'chigóriga ju. We'ká niru ramué, 'lige a'pílipi ramué se'nú nóchali nígame niru, nobi suwábaga ramué pe abalué bi'lepi Kristo oyérame niru.

<sup>6</sup> Aka Onorúgame 'yalige'é a'pílipi ramué Onorúgame oyérame napurigá najkí bo'né Onorúgame. Onorúgame nejisaká napurigá ra'íchawa Onorúgame nila ra'íchali, eliwa

napurigá Onorúgame nejkúrimala napu'lige mué ra'íchachi rejcholi ruyea ralámuli. <sup>7</sup> Onorúgame nejisáká napurigá gu'íriwa uché jaré ralámuli, 'we a'lá gu'íriwa. Onorúgame nejisáká napurigá beníriwa uché jaré ralámuli, 'we a'lá beníriwa. <sup>8</sup> Onorúgame nejisáká napurigá oiláriwa uché jaré ralámuli, 'we a'lá oiláriwa. 'Emi gu'írisáká uché jaré ralámuli, tabilé chélagá gu'íriwa. Onorúgame nejisáká napurigá wa'lula niwa, 'we 'la sébali nochawa. Onorúgame nejisáká napurigá gu'íriwa ralámuli o'chérame 'lige nayúkame, 'we a'lá ganíliga gu'írilime júkuru.

*Jena ruwimela Páulo ruwíligo napurigá 'we a'lá nakúriga ejperéliwa*

<sup>9</sup> 'We a'lá niraga járowa a'bopi. Tase pe aniboa: «Neka 'we ganíliga eté mué», peka ganíliga eteme ke. Tabilé oiláriwa tabilé a'lá nátili, 'we 'la oilawa 'lina alué a'lala 'nátili. <sup>10</sup> Onorúgame oyérame niru alekeri 'la ganíliga e'yéniwa a'bopi.

<sup>11</sup> 'La Onorúgame oyériga beníriwa ralámuli napu'lige beniria Onorúgame nila ra'íchali.

<sup>12</sup> 'La ganíliga mochiwa buigá Onorúgame 'la sébali olame ko napu aní. 'La anachawa rekó resí kachi. 'Lige tabilé siné a'rewa Onorúgame 'yuga ra'ícha.

<sup>13</sup> 'La kógiwa chejaré ralámuli napu resí laa napu Onorúgame oyérame ju. 'La lisensia 'yawa napurigá mué bejtélachi okómala uché bilénaka jsime napu ju Onorúgame oyérame.

<sup>14</sup> Napu'lige uché bilé ralámuli chibi 'sisa, 'lige mué níriga tabilé che anewa alué ralámuli. Pe iligá regá anewa 'lina Onorúgame: «Mué Onorúgame, rekó chibi 'sié alué rió, abiena 'la gu'írowa.»

<sup>15</sup> Napu'lige 'we ra'sálagá sisá chejaré ralámuli alé 'emi ejperélachi, 'we ra'sálawachigó. Napu'lige 'we seweka jsisá alué ralámuli 'emi ejperélachi 'la iwérali 'yawa.

<sup>16</sup> 'La ganíliga ejperélawa 'emi uché jaré ralámuli 'yuga. Tase gunarume niwa, 'la niraga etewa ralámuli napu tabilé nígame ju, alué 'we pobre. Tabilé na'tawa abé ejobénigame ko 'emi me'tigá uché jaré.

<sup>17</sup> Cha 'sisa bilé ralámuli tabilé che 'sípua mué níriga. 'La a'ká ralámuli niwa napurigá etémala che jaré ralámuli, 'lige napurigá 'la regá animela 'emi olagá: «Alueka 'la Onorúgame oyérame ju.» <sup>18</sup> 'La niraga etewa suwábaga ralámuli napurigá tabilé ayómala 'emi 'yuga. <sup>19</sup> 'Emi napu ne 'we na'temá, napu'lige chibi 'sisa bilé ralámuli, mueka tase che olawa, iligá a'rewa napurigá Onorúgame 'símala gastigaria. Onorúgame nila osilichi regá aní: «Ne 'símala gatea, ne 'símala gastigaria alué cha nokame ralámuli.»\* Alarigá anile bo'né Onorúgame.

<sup>20</sup> 'Lige regá aníchigó Onorúgame nila ra'íchali: «'We resí anilime nisa mué bilé ralámulite, 'lige bilé rawé 'we e'lowika sebasa mué bejtélachi go'ame tasia, 'la kógiwa go'ame, 'lige balámaka sabasa ba'wí tasia, 'la 'yawa ba'wí. Tase regá na'tawa mué níriga: 'Lacha 'yáwawé go'ame ye ralámuli 'we resí aneme ne'chí. Alarigá 'we chijunámala alué ralámuli.»† <sup>21</sup> Ayori nisa go'ame táachi alué ralámuli iligá 'we ra'sálagá 'yawa 'lina go'ame alué ralámuli, tase ayoga.

## 13

<sup>1</sup> Suwábaga ralámuli e'wámili júkuru napu nulá e'wélala napu mochiárigime ju bilena we'ká riógachi, Onorúgame elile alué ralámuli napurigá e'wélala nímalá.

<sup>2</sup> 'Lige apiépiri napu tabilé e'wame ju napu nulá alué e'wélala pe Onorúgame gawélime kérélamala. 'Lige apiépiri napu tabilé e'wame ju gastigáriwa alué e'wélate.

<sup>3</sup> Alué e'wélalaka pecha mochiárigime júkó napurigá majaga ejperélimala alué 'la sébali olame ralámuli napu nulá e'wélala, alueka mochiárigime júkuru napurigá majámala alué cha nokogá e'yéname ralámuli. 'Emi tabilé majaga mochínilisáká alué e'wélala, 'liko tabilé che nokogá e'yéniwa. Tabilé cha nokogá járowa, tase i'níliga, alarigá 'la regá animela alué e'wélala: «Ye ralámulika 'la tabilé cha nokogá járome ju, tabilé i'níliga»,

<sup>4</sup> napugiti alué e'wélalaka 'yárigame kame nóchali Onorúgamete napurigá nulémala ralámuli bilena we'ká riógachi. 'We cha 'sika ilírome nísáká mué, 'we iníliga, 'liko senibí majaga bejtélamala mué alué e'wélala. Alué e'wélalaka lisensia nígame ju napurigá gastigárimala ralámuli, Onorúgame 'yale lisensia alué e'wélala napurigá gastigárimala ralámuli chibi nokame. <sup>5</sup> 'We 'la sébali olawa pe bo'né 'nátaga napu najkí bilé wa'lula napugiti alarigá kame, pecha lawa: «'La sébali olásiká tabilé gastigáriwa ramué.» 'Lige aminami tase pe alarigá mayewa, iligá pe 'la bo'né 'nátaga sébali olawa napugiti 'émika 'we 'la machiame alarigá najkió Onorúgame. <sup>6</sup> 'Lige aminami 'la najtétilime júkuru enomí napu senibí bamí najtétilime ju (impuesto), alué e'wélala i'lime kame napugiti alué e'wélalaka Onorúgame gu'íriga nóchame kame.

<sup>7</sup> 'La najtétilime júkuru wikame níriká alué enomí napu najtétilime ju senibí bamí e'wélala i'lime. 'La niraga etewa suwábaga alué e'wélala, tase gawéliga. <sup>8</sup> Bilé ralámuli enomí tanesa mué, yati najtétawa, 'lige 'la niraga etewa uché jaré ralámuli, 'lige 'la na'temaka. Alué napu 'la niraga eteme ju uché jaré ralámuli, alueka 'la sébali olá

\* 12:19 Deuteronomio 32:35. † 12:20 E'nesi Proverbios 25:21-22.

alué nulalí Moisesi nila. <sup>9</sup> Alué nulalí Moisesi nila regá aní: «Tabilé se'nú mukí 'yuga gojchiboa napu tabilé mué 'yula ju. Tabilé nejkowa ralámuli 'yuga. Tabilé chigowa. Tase we'ká e'karúgame niga asináliwa. Onorúgame tabilé alarigá najkí.» 'Lige aminami regá anílechigó Moisesi: «'We alá na'temaka etewa uché jaré ralámuli napurigá mué bo'nepi.» <sup>10</sup> Bilé ralámuli 'la na'temaka eteme uché jaré ralámuli napurigá bo'nepi, alueka tabilé siné gawélíga etémala nibilé siné chibi olámala uché jaré ralámuli. Alué 'la na'temaka eteme ka uché jaré ralámuli, alueka 'la sébali olame kárékuru alué nulalí Moisesi nila.

<sup>11</sup> 'La ganlíga etewa uché jaré ralámuli, napugiti aminacho u'kabi rawé rokárékáme napurigá nawámala Wa'lula Esukristo ramué o'tomea. Aminacho u'kabi rawé rokáré napurigá nawámala Wa'lula Esukristo, tase napurigá abé 'ya napu pe kulí chojkiálíchi Esukristo oyeria. <sup>12</sup> 'Ma amulí seba rawelí napurigá nawámala Wa'lula Esukristo. 'Ma a'rewa alué tabilé alá 'nátíli, tabilé alá na'tálíka tabilé alá alawégame niwa. 'La sébali oliáká napu najkí Onorúgame 'la bi'wígame alawégame niwa. <sup>13</sup> 'La semáriga 'nátaga e'yénawa, tabilé chibi nokogá, tase bajiga e'yénawa, nibilé okoka e'yénawa e'sena umugí napu tabilé 'emi a'boi 'yula ju, tabilé nakoga e'yénawa, nibilé enowélame niwa, 'lige nibilé na'áuka ejperélawa. <sup>14</sup> Iligá 'we táníwa Wa'lula Esukristo napurigá nejkúrimala, 'la nejkúrisaká 'ma tabilé chátiri 'nátaga einámala mué. 'Lige tase ejperélawa pe napurigá 'emi a'boi najkí.

## 14

*Jena ruwimela Páulo ruwílígo tabilé gawélíime ko ralámuli napu ta'mé 'la námame ju napu nulá Onorúgame*

<sup>1</sup> 'La niraga etewa tase gawélíga alué ralámuli napu ta'mé 'la námame ju napu nulá Onorúgame. Tabilé 'me 'la bijhígasa jaré tábiri 'nátíli alué ralámuli, tabilé che anewa. <sup>2</sup> Jaré ralámuli 'nátame ju tabilé 'la ko go'aa ajaré go'ame. Alué ralámulíka alarigá 'nátame ju napugiti alueka tabilé 'cho 'me 'la námame kame napu nulá Onorúgame. 'Lige jaréchigo ralámuli tabilé chéláme ju napuyépiri go'ame go'gá, napu ekí go'ame nerú. <sup>3</sup> Alué napu 'la go'yame ju e'karúgamea go'ame tabilé gawélímili ju alué uché jaré napu tabilé go'yame ju ajaré go'ame. 'Lige a'chigóriga, alué napu tabilé go'yame ju ajaré go'ame tabilé gawélímili ju alué napu go'yame ju napuyépiri go'ame. Onorúgameka suwábaga 'la niraga eté. <sup>4</sup> Pecha aníame júkó bilé ralámuli nóchame tabilé 'la nóchachi tabilé alué ríó batróníla

níriká: «'La abé najsinákuliti ríó, tabilé benéganti nóchaga.» Alieti nísaká alué nóchame, pe bo'né batróníla machíleké. Bo'né Onorúgame 'la animela pala 'la nóchame ko o pala tabilé 'la nóchame ka alué ralámuli. 'Lige bo'né Onorúgame 'we alá gu'fírimala napurigá 'la semáriga nochámala alué nóchame.

<sup>5</sup> Aka regá júturuchigó jaré ralámuli, 'nátame ju bilé rawé abé najtékame ko me'tígá chejaré rawé. 'Lige jaréchigo 'nátame ju suwábaga rawé pe abisibi najtékame ko. A'pílipi ralámuli regá na'támili ju: «'We 'la júpaché napu 'nata ne.» <sup>6</sup> Jaré ralámuli anime ju abé najtékame ko sawalachi rawé, 'lige jaré anime ju abé najtékame ko romíkíchi rawé. Alué okaná chojkégame ralámuli alarigá 'nátame ju nobi abiénachigo 'la Onorúgame oyérame kéréko. 'Lige aminami alué napu go'yame ju apiépiri go'ame 'we 'la nawesasa go'yame ju 'la nejígorikábá go'ame Onorúgame. 'Lige alué napu tabilé go'yame ju jaré go'ame 'we 'la nawesasa go'yame júchigó go'ame 'la nejígorikábá go'ame Onorúgame, nobi abiénachigo 'la Onorúgame oyérame kéréko napugiti 'la nawesasa go'yame kame go'ame.

<sup>7-8</sup> Onorúgame ju ramué nuleme napu 'lige bijí ajagá mochírigíchi 'lige alué nuleme júchigó napu 'lige suwisuga. 'Liko 'we alá e'wawa napu Onorúgame najkí. Bijí ajagá mochíriká Onorúgame 'kúchíla níru 'lige suwisugáká abiena Onorúgame 'kúchíla níru. <sup>9</sup> Alekeri mukule Kristo 'lige ku ajánale ralámuli ajágame nuleme nímia 'lige alué suwígame ralámulíchigó.

<sup>10</sup> 'Liko ¿chonígá gawélíga eteme ju mué alué uché jaré ralámuli Onorúgame oyérame? Onorúgame bo'né animela: «'Émika 'la sébali olálepá napu ne najkié.» 'Lige bo'né Onorúgame animela: «'Émika tabilé sébali olálepá napu ne najkié.» <sup>11</sup> Regá aní Onorúgame nila osilíchi:

Neka 'la bijchíá aní:

«Suwábaga ralámuli chojkóbaga jábamala napu ne ajtí»,

'lige suwábaga animela:

«Mueka Wa'lula Onorúgame ju, 'we alá nejkúrime.»

<sup>12</sup> A'pílipi ramué ruyéwili júkuru Onorúgame napu ra'ícharu napu 'lige bijí mochíga jena wijchimoba 'lige napu chíbi nokirú ramué.

*Jena ruwimela Páulo ruwílígo tabilé che aníame ko 'emi a'bopi napurigá tabilé guwana rujsúmala uché jaré Onorúgame oyeria*

<sup>13</sup> Alekeri tabilé che aníboa 'emi a'bopi, a'bopi gawélesa ka 'emi líko guwana rujsúmala 'emi Onorúgame oyeria 'emi iligá 'we 'la nakúriga nokísiwa. <sup>14</sup> Jaré ralámuli

mayeme ju bilé ralámuli go'sá go'ame napu tabilé go'ame kóri, alueka mayeme ju Onorúgame gastigárimio go'sáká. Nobí Wa'lula Esúsika w'échigo 'la lisensia nejjó napuriga go'poa napuyépiri go'ame. 'Lige bilé rió 'nátame nisa regá: «Tabilé 'la ju alué go'ame go'aa, Onorúgame gastigárimala go'súká alué go'ame», 'liko tabilé go'meli ju alué go'ame. <sup>15</sup> Mué go'sáká go'ame uché jaré Onorúgame oyérame etériga alué go'ame napu tabilé go'yame ju alué ralámuli, 'liko tabilé nirame kárelamala mué alué ralámuli. Tase 'la ju alarigá, mué go'sáká go'ame napu tabilé go'yame ju uché jaré ralámuli, 'lige etesa aleké go'ame go'yachi mué, 'liko alué ralámuli 'ma tabilé oyéramala Onorúgame. Kristo mukule alué ralámuli gu'iriga. <sup>16</sup> Tase etériga go'poa aleké go'ame alué uché jaré ralámuli napurigá tabilé lámala: «Ye rioka go'yame ju napu tabilé nejjí lisensia Onorúgame napurigá go'poa.» <sup>17</sup> Onorúgame níriká pecha chéréko napuyépiri go'ame go'vae, 'lige bajilia. Onorúgameka pe iligá najki napurigá 'la sébali olawa napu bo'né najki, 'lige najki napurigá tabilé i'kurúgame chátiri tábiri 'nátaga ejperélawa 'lige napurigá 'la ganlíga ejperélawa. Onorúgame Alawala 'sime ju nejkuria napurigá tabilé i'kurúgame chátiri tábiri na'tawa 'lige napurigá 'la ganlíga ejperélawa. <sup>18</sup> Kristo nila nóchali nochalia ka, Onorúgame 'we ra'sálagá asimela, 'lige ralámuli 'we a'lá niraga etémala ramué.

<sup>19</sup> Alekeri 'la ganlíga ejperélawa 'emi, 'lige oiláriwa 'emi a'bopi napurigá aminabi 'we a'lá oyéramala Onorúgame nila ra'íchali. <sup>20</sup> Suwábaga go'ame 'we a'lá ju go'á. Iligá etériga go'suga alué go'ame napu tabilé go'yame ju jaré ralámuli, alué ralámuli ayómala, 'ma guwana rujsúmala Onorúgame oyeria. <sup>21</sup> Iligá tabilé go'poa aleké go'ame 'lige tabilé bajiwa alué i'wili ba'wila rekútume alué uché jaré ralámuli Onorúgame oyérame etériga, napugiti etesaká alué uché jaré ralámuli Onorúgame oyérame 'liko alué ralámuli 'ma pe abisi a'rémala Onorúgame oyeria. <sup>22</sup> Mueka 'la machigá bejtélawa tabilé sulio Onorúgame apiépiri go'ame go'yachi 'lige i'wili ba'wila bajilichi. 'La ganlíga ejperégame ju alué napu lame ju 'we a'lá ko apiépiri go'ame go'á 'lige 'we 'la ko bajilia alué i'wili ba'wila. 'La ganlíga ejperégame júchigó alué napu regá 'nátame ju: «Neka jaré go'ame tabilé go'yame ju.» <sup>23</sup> Bilé rió lasa: «¿Pala ayómalawé Onorúgame ye go'ame go'sá ne o tabilé ayómerémá?» 'lige abirigá go'sá, alueka pe bo'nepi tabilé a'lá alawégame gayena, alueka majaga go'yáame bilé tábiri go'ame Onorúgame ayora mayega.

## 15

*Jena ruwimela Páulo ruwíligo 'we 'la gu'irilime ko alué uché jaré napu tabilé 'cho 'la námame ju Onorúgame nila ra'íchali*

<sup>1</sup> Ramué napu 'we a'lá machiaa tachiri najkió Onorúgame tase pe a'bocho 'la ganlíga mochiwa. Iligá 'la gu'iriwa 'lina alué napu ta'chó 'la námame ju Onorúgame nila ra'íchali napurigá aminabi abé a'lá oyéramala Onorúgame napurigá abé a'lá bijchígimala napu aní Onorúgame. <sup>2</sup> O'maka 'we a'lá gu'iritékuru alué napu ta'chó 'la námame ju Onorúgame nila ra'íchali. Alarigá abé a'lá oyéramala Onorúgame. <sup>3</sup> Kristo senibí sébali olale napu Onorúgame nulele, tase napurigá bo'né najkile. Aka regá aniché Onorúgame nila osilichi: «Mué Onorúgame, neka 'we nirá mué, alekeri ralámuli chibi anechi mué, pe ne'chí chibi aneme kéré.»\* <sup>4</sup> Suwábaga alué osilí napu osiruga chujkú alé Onorúgame nila osilichi, alueka pe ramué benírame kéré napu najki Onorúgame. Napu aní aleké osilichi 'la oilárimé ju ramué napurigá tabilé guwana rujsúpua 'lige napurigá 'la machigá mochiwa 'la sébali olamio Onorúgame napu aní. Alekeri 'la machirú Onorúgame 'la sébali olamio napu aní. <sup>5</sup> Onorúgame 'we 'la nejkúrame ju napurigá 'la anachawa rekó resi anilíe 'lige nejkúrame ju napurigá 'la tabilé seweka mochiwa, alué tani ne napurigá 'la gu'irimala 'emi napurigá 'we a'lá niraga járomala 'emi a'bopi napurigá 'sile Kristo Esusi. <sup>6</sup> Alarigá suwábaga napuíka 'emi 'we a'lá ra'ichámala Onorúgame olagá, alué Onorúgame napu alué Wa'lula Esukristo O'nola ju.

<sup>7</sup> 'Liko alarigá 'we a'lá niraga járowa 'emi a'bopi napurigá nirale Kristo 'emi. 'Lige alarigá 'we a'lá niraga ra'ichámala ralámuli Onorúgame olagá. <sup>8</sup> Kristo nawálekuru ralámuli jurío gu'irimia napurigá etémala ralámuli Onorúgame 'we a'lá sébali olame ko napu sébali olamorlíge. <sup>9</sup> Abiena nawale napurigá ralámuli tabilé jurío animela 'we a'lá nejkúrame ko Onorúgame. Aka regá aniché Rabí Onorúgame nila osilichi:

Bochígimi napu ejperé alué ralámuli tabilé jurío  
alemi eyéniga ra'ichámala ne 'we a'lá ko mué Onorúgame

'lige wikarámala ne mué nila wiká.†

<sup>10</sup> 'Lige abiena regá aní Onorúgame nila osilichi:

'We ra'sálagá mochiwa 'emi ralámuli tabilé jurío

napu 'la Onorúgame oyérame ju.‡

<sup>11</sup> 'Lige abiena regá aní Onorúgame nila osilichi:

\* 15:3 E'nesi Salmos 69:9. † 15:9 E'nesi Salmos 18:49.

‡ 15:10 E'nesi Deuteronomio 32:43.

Regá aniboa suwábaga 'emi ralámuli tabilé jurío

'lige abiena 'emi ralámuli jurío:

«Onorúgame 'la semáriga nejkúrame júpá.» §

<sup>12</sup> 'Lige abiena regá anime osale alué Isaíasi 'we 'ya:

Ochéramala bilé rió 'ma we 'ká bamí nujubá 'ma tabilé i'tégichi alué Esé ramué rijimala 'we 'ya ajtúgame.\*

Alueka wa'lula nímalala ralámuli tabilé jurío nuleme.

'Lige suwábaga alué ralámuli tabilé jurío

'we a'lá bijhígiga mochímala 'we a'lá ne-  
jkúrimio

alué rió 'we a'kinana ochérigame (Isaíasika pe alué Esukristo olagá anime ke anile). †

<sup>13</sup> Onorúgame napu nejime ju iwérali 'we ra'sálárisa 'la kápá 'emi napurigá 'la ganíliga mochímala 'emi napugiti 'émika 'we a'lá bijhígiga kame napu aní Onorúgame. 'Lige aminabi tani ne Onorúgame napurigá gu'irimala 'emi bo'né alawálate napurigá aminabi bijhígiga nímalala 'emi 'la sébali olame ko Onorúgame bilé tábiri 'la sébali olámirisá.

<sup>14</sup> 'Emi Onorúgame oyérame napurigá ne, neka 'we a'lá machigá ajtí 'we na'temaka eteme ko 'emi uché jaré ralámuli. 'Lige 'we machigá ajtí ne 'we ejpénigime ko 'emi beníriga a'bopi Onorúgame nila ra'íchali.

<sup>15</sup> Abiena bilé rejcholi ruyé ne 'emi jena ye osilichi napurigá tabilé we'kuámala 'emi. Neka 'la ma'chígime ruyé 'emi napugiti Onorúgame 'ma 'la alarigá 'nata asáligame, <sup>16</sup> napurigá beníramala ne alué ralámuli tabilé jurío alué ra'íchali napu ju Onorúgame nila. 'Lige ralámuli alué ra'íchali akigá 'we a'lá oyéramala Onorúgame 'lige Onorúgame 'we 'la níramala. Onorúgame Alawala 'sile gatea napurigá 'we 'la nírawa Onorúgamete.

<sup>17</sup> Neka 'we ra'sálagá ajtí napugiti Kristo Esusi 'we 'la gu'irimpá ne'chí napurigá beníramala ne alué ralámuli Onorúgame nila ra'íchali. <sup>18</sup> Neka tase se'wináriga ruwimela, neka pe ruwimela Onorúgame bo'né najkíligo napurigá beníramala ne Onorúgame nila ra'íchali alué ralámuli tabilé jurío napurigá 'la oyéramala Onorúgame, 'lige bo'né Onorúgame 'smíguru napurigá suwábaga 'la semáriga ma'chínamala <sup>19</sup> napu'lige sa'wachi ne ralámuli 'we nalúkame (milagro) 'lige napu'lige ra'íchachi ne Onorúgame nila ra'íchali. 'Lige 'ma bochígimi beníruturu ne Onorúgame nila ra'íchali alé we'ká riógachi si Rusaleni anilichi wamí wa'lú gawichí Iliria anilichi si. <sup>20</sup> Neka tabilé siné beníruturu Onorúgame nila ra'íchali alemi napu 'ma e'yénale uché jaré ralámuli Onorúgame nila

ra'íchali beníriga ralámuli, iligá neka beniri 'lina ralámuli Onorúgame nila ra'íchali 'we a'lá 'nátaga alemi napu tabilé siné 'cho akirume nílige Onorúgame nila ra'íchali nibilé alué ra'íchali napu ruwime ju churigá ka Kristo. <sup>21</sup> Neka sébali oláturu napurigá aní alué osilí 'ya nerúgame ta'chó ochérachi Esusi:

Ralámuli napu tabilé siné akeme nile Onorúgame nila ra'íchali

'we 'la námamala churigá ka Kristo. ‡

*Jena ruwimela Páulo ruwíligo alué bo'né Páulo 'we siminalio Roma*

<sup>22</sup> Tabilé ikiri ne alemi Roma anilichi simiá 'emi e'nemia, rekó senibí siminalia ajtigé ne alemi. <sup>23</sup> Jípeko 'la ikírimarékó ne simiá alemi 'emi 'yuga asimea napu 'emi ejperé. 'Ma we'ká bamí júpá siminalia ne alemi napu 'emi ejperé. <sup>24</sup> Alé Roma napu 'emi ejperé simiromolá ne napu'lige simiá enagá España anilichi. Oká mechá asimé ne alé Roma, bakiá mechá kómá. Bajchá Rusaleni simiromolá ne. Napu'lige alé Roma yénaga simichi ne aminá España anilichi, najkí ne napurigá jaré 'emi ne'chí gu'irimala pabé paberia 'lige aminami najkí ne napurigá 'yúriwa ne España anilichi si. <sup>25</sup> Jípe yátiká alé Rusaleni anilichi simé olá ne enomí o'tomia alué ralámuli Onorúgame oyérame alé Rusaleni ejperégame. 'Lige alé Rusaleni yéniga Roma simé ne. <sup>26</sup> Jena Maseronia 'lige Akaya (Gresia) anilichi ejperégame ralámuli Onorúgame oyérame a'boi 'nátaga napabule enomí napurigá o'towa Onorúgame oyérame ralámuli Rusaleni ejperégame 'we pobre. <sup>27</sup> A'boi 'nátaga napabule enomí napugiti alué ralámuli jurío nokáligame beniria Onorúgame nila ra'íchali alué ralámuli tabilé jurío, alekeri gu'iriguru, enomí napabúlekuru napurigá o'towa alué ralámuli jurío. <sup>28</sup> Napu'lige 'ma 'yasa ne alué enomí alué ralámuli alé yéniga simé ne alé España anilichi, bajchá alé Roma sebámala ne 'emi 'yuga asimea. <sup>29</sup> 'We machí ne napu'lige sebasa ne alé napu 'emi ejperé, 'we 'la gu'irimio Kristo 'emi napurigá 'la námamala 'emi napu ne 'emi beniri.

<sup>30</sup> 'Emi Onorúgame oyérame napurigá ne, neka 'we tani Onorúgame napurigá repúmala ne'chí napurigá tabilé che ikiméla ne, 'lige najkí ne napurigá 'emi 'we tánímalachigó Onorúgame a'chigóriga napurigá ne, napurigá repúmala Onorúgame ne'chí, <sup>31</sup> napurigá tabilé che olámala ne'chí alué ralámuli tabilé oyérame Kristo napu mochí alé Rusaleni, 'lige napurigá 'la semáriga narémala alué enomí Onorúgame oyérame alé Rusaleni ejperégame tabilé

§ 15:11 E'nesi Salmos 117:1.

\* 15:12 Esé (Isaí) wa'lula rey Rabí o'nola nile.

† 15:12 E'nesi Isaías 11:10.

‡ 15:21 E'nesi Isaías 52:15.

nígame, <sup>32</sup> Onorúgame elasa 'la kápá 'we a'lá sebasa ne 'we 'la ra'sálagá napu'lige 'emi etea ne alé napu ejperé 'emi, 'lige Onorúgame nejkúrisa 'la kápá napurigá resíbamala ne alé 'emi ejperélachi. <sup>33</sup> Alué Wa'lula Onorúgame 'la aminabi 'emi repuka asisá 'la kápá, Onorúgame napu nejkúrima ju napurigá tase e'karúgame chibiyeti 'nátaga járowa.

## 16

*Jena ruwimela Páulo 'we náwiligo reporali suwábaga ralámuli napu Onorúgame oyérame ju*

<sup>1</sup> Neka ruwíbá churigá ka alué mukí Pebe anilime. Alué mukíka 'we 'la oyérame ju Onorúgame 'lige 'we nejkúrima ju napu'lige napukíchi alé Sinkrea anilíchi. <sup>2</sup> 'La níraga etewa napugiti Wa'lula Onorúgame oyérame kame, napurigá nírálime ju apíepiri alué Onorúgame oyérame. 'La gu'íríwa napugiti alué mukíka 'la gu'íríligame we'ká ralámuli 'lige ne'chítiri abiena 'la gu'íríturu.

<sup>3</sup> 'We repóriwa alué mukí Prísila anilime 'lige alué Prísila gunala Akíla anilime ríó. Alué okánika nóchame kéturu ne 'yuga Kristo Esusi nila nóchalíchi. <sup>4</sup> Alué ralámuli síné amulí suwíturu ne'chí gu'íríga. Alekeri 'we ra'sálagá ajtí ne 'lige abiena 'we ra'sálagá mochíchigó suwábaga alué ralámuli Onorúgame oyérame napu tabilé jurío ju. <sup>5</sup> Abiena 'we 'la repóriwa alué ralámuli Onorúgame oyérame napu napuíme ju Onorúgame nila ra'íchali benímea alé Prísila 'lige Akíla ejperélachi. 'We repóriwa alué ríó Epeneto anilime, 'we machíme ju ne alué ríó. Alué ríó júturu napu bajchá oyérale Kristo alé Asia anilíchi. <sup>6</sup> 'We repóriwa María, alué napu senibí 'yasi 'we gu'írí 'emi. <sup>7</sup> 'We repóriwachigó alué Antróniko 'lige alué Junási napu jurío júchigó napurigá ne, 'lige napuíka mochírige ramué galírale mo'áriga. Esukristo 'yale nóchali alué oká ríó napu 'we 'la machirume ju we'ká ralámulite. 'Lige alué oká ríó bajchá oyérale Onorúgame ne'chí me'tigá.

<sup>8</sup> 'We repóriwachigó alué Ampliato anilime ríó, alué ríó 'we machíme ju ne, 'lige 'we 'la oyérame ju Onorúgame. <sup>9</sup> 'We repóriwachigó alué Urbano anilime ríó, alué napu júchigó Kristo nila nóchalíchi nóchame, 'lige abiena 'we repóriwa alué Etakísi anilime ríó, alué ríó napu 'we 'la nírá ne. <sup>10</sup> 'We repóriwachigó alué ríó Apélesi anilime. Alué rioka we'sá 'we resí ikígama ju pe Kristo oyériga. 'Lige abiena 'we repóriwa suwábaga alué ralámuli Aristóbulo anilime ríó galílachi ejperégame. <sup>11</sup> Abiena repóriwachigó alué ríó Erorioni anilime, alué ríó abiena jurío ju napurigá ne, 'lige alué ralámuli Narsiso anilime ríó galílachi ejperégame napu 'we 'la oyérame ju Onorúgame. <sup>12</sup> 'We

repóriwachigó alué Tripena anilime mukí 'lige Triposa anilime mukí napu nóchame ju Wa'lula Onorúgame nila nóchalíchi. 'We repóriwachigó alué Pérsire, 'we machíme ju ne alué mukí, 'lige 'we nochá alué mukí Onorúgame nila nóchalíchi. <sup>13</sup> 'We repóriwachigó alué Rupo anilime ríó, napu Onorúgame 'yale nóchali 'we 'la semáriga, 'lige alué eyélachigó napu 'we na'temá ne'chí napurigá bo'né ranala neraga. <sup>14</sup> 'We repóriwachigó alué maligi ríó, alué Asínkrito anilime, 'lige Plegonte, 'lige Érmesi, 'lige Patróbasi, 'lige Érmasi, 'lige suwábaga alué ralámuli Onorúgame oyérame napu napuíme ju Onorúgame nila ra'íchali benímea aléké maligi ríó galílachi. <sup>15</sup> 'We repóriwachigó alué maligi ralámuli, Pilólogo anilime ríó, 'lige alué Julia anilime mukí, 'lige alué Nereo anilime ríó, 'lige alué waila, 'lige alué Olímpasi anilime ríó, 'lige suwábaga alué ralámuli napu napuíme ju Onorúgame nila ra'íchali benímea alué maligi ralámuli galílachi.

<sup>16</sup> 'La ganíliga reporawa a'bopi 'la chu'migá banachí napurigá reporame niru ramué. Ralámuli napu ne 'yuga mochí napu Onorúgame oyérame ju napu we'kanami ejperégame ju abiena náolachigó reporali.

<sup>17</sup> Suwábaga 'emi Onorúgame oyérame 'la 'nátaga, tase 'yuga e'yénawa alué ralámuli na'áwali o'wínome 'yuga. Alué ralámulika pe gawéliga nokame kéré alué semátiri 'nátíli napu ne beniri 'emi. Tase 'yuga e'yénawa alué ralámuli <sup>18</sup> napugiti alué ralámulika pecha alué Wa'lula Esukristo nila nóchalíchi nóchame kame. Alué ralámulika 'la semáriga ra'íchame ju péchigo 'yégalí ra'íchalite ra'íchame kéréko ralámuli 'yuga. <sup>19</sup> Suwábaga ralámuli 'we 'la machí 'we 'la e'wame ko 'emi napu najkí Onorúgame, alekeri 'we ra'sálagá ajtí ne. Alekeri najkí ne napurigá 'emi 'we 'la 'nátame nímala, najkí ne napurigá 'la e'wámala 'emi napurigá 'la bijchía 'la Onorúgame najkí. <sup>20</sup> Alarigá Onorúgame napu 'la bi'lepi bi'wígama 'nátíli nejime ju, 'ma umérimala alué Satanasi 'lige alésíko 'emi tabilé umériwa alué Satanásite. Alué Wa'lula Esukristo 'la semáriga gu'írasa 'la kápá 'emi.

<sup>21</sup> Alué Timoteo napu ne 'yuga nóchame ju abiena náwala reporali. Abiena náwalachigó reporali Lusio 'lige Jasoni 'lige Sosípatro anilime ríó. Ye ralámuli jurío ju napurigá ne.

<sup>22</sup> Ne Tersio, neka abiena Onorúgame oyérame júchigó, 'lige neka ye osilí osá napu Páulo nulá osíniliga, ne abienachigó náola reporali. Abisíbi osísimala ne napu nulá Páulo osíniliga.

<sup>23</sup> Abiena náola reporali Gayo anilime ríó. Ne Páulo alé Gayo galílachi gojchime ju ne, 'lige abiena alé napuíme ju ralámuli

benimea Onorúgame nila ra'íchali rejcholi. Abiena náola reporali Erasto, enomí gate me napu nerú jena Korinto anilichi alué enomí napu gobierno nila ju. Abiena alué Kuártosi anilime rió napu abiena Onorúgame oyérame ju abiena náola reporali.

<sup>24</sup> Alué Wa'lula Nulame Esukristo 'we 'la gu'írasa 'la kápá 'emi. Alarigá ju.

*Jena ruwimela Páulo ruwíligo 'we 'la semáriga ra'ichálime ko Onorúgame olagá*

<sup>25</sup> ¡'We 'la semáriga ra'ichawa Onorúgame olagá! Onorúgameka 'la gu'írimala 'emi napurigá 'emi 'la bi'lepi 'nátili 'nátaga e'yénamala pe alué bi'lepi 'náticho napu Esukristo nejí. Alarigá ruyéturu ne 'emi napu lige 'emi ruyea ne alué 'we a'lá ra'íchali Onorúgame nila. 'Lige aminami 'we 'la ruyéturu ne tachiri gite nawáligo Esukristo. Onorúgame 'ma 'la alarigá 'nata asale 'ya bajchá napu lige ta'chó newá ye gawí, pe iligá ralámuli tabilé 'wesi machigá mochile tachiri gite nawáligo Esukristo. <sup>26</sup> Nobi jípeko 'máchigo 'la machiágó tachiri gite nawáligo Esukristo napugiti 'ma nerúgame alué osilí napu osale alué ralámuli napu ruwime nile napu anele Onorúgame. Aminami Onorúgame napu senibí asimeli ju alarigá nulale napurigá suwábaga ralámuli 'we 'la oyéramala Onorúgame 'lige napurigá e'wámala napu najkí Wa'lula Onorúgame.

<sup>27</sup> Onorúgame napu bi'neli neyúriga machime ju suwábaga tábiri, 'la nirawa Onorúgame. 'La semáriga ra'ichawa Onorúgame olagá. 'La cheliera 'yawa Onorúgame 'la machiame chu'siligo Esukristo.

Pe ekí kápá. Cheliérabá.



## Ye Ju Alué Apeli Napu Bajchá Osele Páulo Alué Ralámuli Napu Korinto Ejperégame Nílige

*Kuira 'emi ralámuli Korinto ejperégame napu eki Onorúgame oyérame ju.*

<sup>1</sup> Kristo Esusi júlae ne'chí napurigá ne nochámala aleké nila nóchali.\* Ye rió Sóstene Esukristo oyérame ju napurigá ramué, 'lige alué 'smi ne'chí gu'iria osá ye apeli. <sup>2</sup> Neka 'emi ralámuli oséguru napu Kristo Esúsíte wanápurigame ju alé wa'lú Korinto anilichí napuíme. 'Lige abiena wanápule uché jaré ralámuli bochígimi gawichí ejperégame napurigá 'we 'la sébali olame ralámuli nímla napurigá najkí Onorúgame. Suwábaga alué ralámuli 'lige suwábaga ramué 'we tánime niru a'walí alué Wa'lula Esukristo napu ramué nuleme ju. <sup>3</sup> 'We 'la gu'irasa 'la kápá O'nó Onorúgame 'lige Wa'lula Esukristo napurigá tabilé we'ká 'nata mochímala 'emi.†

*Jena ruwimela Páulo wa'lú cheliera 'yáligo Onorúgame*

<sup>4</sup> Neka nabí cheliera 'yame ju Onorúgame 'emi gu'irigiriká. Onorúgameka 'we galegá etele 'emi 'lige alekeri júlae Kristo Esusi napurigá 'emi gu'irimala. <sup>5</sup> Onorúgame 'we 'la nejkúriale Kristo Esusi júliga. Kristo Esusi a'walí 'yale napurigá 'we 'la námamala 'emi aleké nila ra'ichali 'lige alarigá 'we 'la námaka ruyémala 'emi uché jaré ralámuli <sup>6</sup> napugiti 'émika 'we 'la bijchígilime Kristo nila ra'ichali, alué napu ramué beníruru. <sup>7</sup> Napu 'lige 'emi buigá mochígichi napu 'lige ku nawachi Wa'lula Esukristo tabilé rokárelamala napu Onorúgame Alawala nejime ju. <sup>8</sup> Onorúgame 'we 'la gu'irimala bo'né alawálate napurigá tabilé guwana rujsúmala 'emi 'lige napurigá tabilé 'wesi chojkila neraga ra'ichámala 'emi olagá napu 'lige ku nawachi Wa'lula Esukristo gustisia olamia suwábaga ralámuli. <sup>9</sup> Onorúgameka nabí sébali olame ju napu sébali olámorí. Alueka repáturu napurigá ramué bi'lepi 'nátali 'nátame niwa pe Onorúgame Inolá na'tálila Esukristo anilime, alué napu wa'lula ju ramué nuleme.

*Jena ruwimela jaré ralámuli tabilé bi'lepi 'nátali 'nátaga mochíligo Esukristo 'yuga*

<sup>10</sup> 'Emi oyérame napurigá ne, neka Wa'lula Esukristote nulérigime ju, alekeri neka 'we a'wágame anéguru 'emi napurigá 'la bi'lepi 'nátali 'nátaga mochímala 'emi tabilé nakoga 'emi a'bopi, iligá 'we 'la ganíliga

ejperélawá bi'lepi 'nátali 'nátaga. <sup>11</sup> Ralámuli alé Kloe galílachi ejperégame ruwíguru 'emi 'we na'áuka ejperego 'emi a'bopi. <sup>12</sup> Regá aniéturu alué ralámuli, jaré 'emi regá anime karao: «Neka Páulo oyéraguru», 'lige uché jaré regá anime kará: «Neka Apolo oyéraguru.» 'Lige uché jaré regá anime kará: «Neka Sepasi (Pegro) oyéraguru.» 'Lige uché jaré regá anime kará: «Neka pe Kristo oyéraguru.» Suwábaga 'emi asíriga riólame kará. <sup>13</sup> Pe bi'lepi ju Wa'lula, napu ju Kristo. Ne Páulo pecha gulusichi uichigá me'lirúgame júkó 'emi alawala bi'wemia. 'Émika pecha rewarárigame júkó napurigá ne'chí oyéramala. <sup>14</sup> Asíriga 'la nile ne tabilé rewarárigaká we'ká 'emi, aka ne pe okabi rió rewirá 'sié alemi, alué napu Kristo anilime ju 'lige uché bilé napu Gayo anilime ju. <sup>15</sup> Tabilé 'wesi che animeli júkuru rewaráligo ne napurigá ne'chí oyérame nímla. <sup>16</sup> Abiena bijí nelá nili ne rewará alué Estépana galílachi ejperégame ralámuli. Tabilé machié nili ne pala rewiráliga ne aminá chejaré ralámuli, tabilé chérikáwé. <sup>17</sup> Kristoka tabilé júlae ne'chí napurigá ne rewaraga einámala, iligá alueka júlakuru ne'chí napurigá ne ralámuli ruyémala alué a'lala ra'ichali Onorúgame nila. Alueka tabilé nuláguru napurigá 'we 'la semati ra'ichalite ra'ichámala ne. Neka tabilé napuyépiri a'walite ruyeme ju ralámuli, neka Onorúgame nejlála a'walite ruyame júkuru napurigá ralámuli 'we a'lá narémala alué nejkúrali alué Wa'lula Esukristo nejlála napu 'lige mukíá.

*Jena ruwimela churigá nejkúrame ko Onorúgame a'walila*

<sup>18</sup> Alué ralámuli napu cha nokagá e'yéname ju, alueka regá anime ju: «Alué ra'ichali napu ruyame ju churigá mukúligo Kristo tabilé nejkúriame ju napurigá ralámuli alawala bi'wémala. Ramué napu 'ma 'la bi'wígame alawégame niru, 'we 'la machiáa alué ra'ichali Onorúgame a'walila ko.» <sup>19</sup> Aka regá aniché Onorúgame nila ra'ichali 'we 'ya osirúgime:

Neka tabilé machime newámala alué napu 'we machime ju.

Neka tabilé 'la 'nátame newámala alué napu 'we 'la benégame ju.

<sup>20</sup> Alué rió 'we machime ka pecha neyúrimili júkó Onorúgame 'yuga. Onorúgameka pe tabilé 'la 'nátame neraga etémala alué rió 'we machime, Onorúgameka cha benégame kame me'tigá alué rió. <sup>21</sup> Ralámulika pe aminabi benigá 'la machirá mayéleké churigá ko Onorúgame. Tabiléchigo alarigá júkó. Onorúgameka gatele napurigá tabilé alarigá machiboa.

\* 1:1 E'nesi glosario «apóstol». † 1:3 E'nesi glosario «la gracia que da Dios».

Iligá Onorúgameka 'la a'kabámana jáwame ju ralámuli napu 'we 'la bijchígime ju alué ra'íchali napu ramué beníriga e'yéniru, rekó jaré mayé tabilé nejkúrime ko ye ra'íchali.

<sup>22</sup> Alué ralámuli juríoka ta etéaká ramué sa'wálichí bilé ralámuli sujírígame, pe tabilé bijchígimili alué ra'íchali napu ramué beníriga e'yéniriru. 'Lige alué ralámuli griego ra'íchame ka gepúnilime ju alué ra'íchali napu ra'íchame ju alué ralámuli napu 'we machime ju. <sup>23</sup> Ramueka pe iligá beníriga e'yéniru churigá me'lírigo Kristo gulusichi ujchugá. Alué juríoka tabilé bijchígime ju alué ra'íchali, pe cha anime korime ju. 'Lige alué ralámuli tabilé jurío pe 'yégalí neraga akeme ju alué ra'íchali. <sup>24</sup> Nobí alué ralámuli Onorúgamete wanápurigame napurigá oyéramala, alué ralámuli rekó jurío ke o rekó griego ke 'we 'la machime ju Onorúgame júlaligo Kristo wa'lú a'waliga. Alarigá 'nátale Onorúgame napurigá Kristo ralámuli gu'frame nímala. <sup>25</sup> Rekó ramueka tabilé námalia napu 'smi Onorúgame, nobi 'wéchigo najtékame júkó napu 'smi Onorúgame. Rekó Onorúgameka tabilé a'wáganti káreké nobi 'wéchigo a'wágame júkó me'tigá suwábaga ralámuli.

<sup>26</sup> 'Emi Onorúgame oyérame 'la néláwa churigá niliga 'emi napu'lige Onorúgame wanápachi. Ralámuli níriká, asíriga u'kabi nílikuru 'emi 'la ejobénigame. Pe u'kabi kéturu 'emi abé e'wélala. Pe u'kabi ralámuli kéturu 'emi riko o'nógame. <sup>27</sup> Napurigá chijunámala alué 'we machime, Onorúgameka wanápale alué ralámuli napu tabilé 'nátame káré ralámuli níriká. 'Lige napurigá chijunámala alué ralámuli 'we a'wágame, Onorúgameka wanápale alué ralámuli napu tabilé a'wágame káré ralámuli níriká. <sup>28</sup> Onorúgameka alué ta'mé najtékame ralámuli wanápale, 'lige aminami wanápale Onorúgame alué ralámuli napu tabilé galilime ju uché jaré ralámulite. 'Lige bo'né Alawala 'yale napurigá 'we a'lá 'nátame ralámuli nímala. Alarigáriga 'sime ju Onorúgame napurigá machimela ralámuli tabilé a'lá ko alué tabilé Onorúgame oyérame ralámuli na'tálila. <sup>29</sup> 'Liko ta'wesi ralámuli i'télamala regá aneme Onorúgame: «Ne bo'né 'we a'lá semáriga nocha ne bo'né a'walílate.» Pe Onorúgame a'walílateká 'la gainámili júkuru bilé rió 'we a'lá nocha. <sup>30</sup> Nobí Onorúgame 'sile napurigá ramué 'we 'la oyérame niwa Kristo Esusi 'lige pe Kristo Esusi oyériga 'we 'la ejobénigame ju 'emi. 'Lige aleké oyériga 'we 'la sébali olámala 'emi. 'Lige aleké oyériga wanápaga mochi 'emi. 'Lige aminami aleké oyériga 'emi a'kabámana mochi. <sup>31</sup> Alekeri regá anime osáliku 'we 'ya: «Bilé rió 'we a'lá semáriga

ra'ichámili júkuru Wa'lula Onorúgame olagá, tase bo'nepi neraga.»

## 2

*Jena ruwimela churigá ko Esukristo alué napu gulusichi chujkagá mukule*

<sup>1</sup> 'Emi Kristo oyérame napurigá ne, napu'lige ne pe kulí siné seba alé 'emi eperélachi, neka tabilé we'ká ra'íchali ra'íchame kéturu alué 'we semátiri ra'íchali 'we riólíga. Neka pe iligá ruwíturu alarigá nocha ajtígo Onorúgame. <sup>2</sup> Neka pe 'nátaturu ra'ichálime churigá ko Esukristo alué napu 'ma 'pa rewagachi ajtí, 'lige abiena 'nata ne ra'ichálime chonigá mukúlíga Esukristo gulusichi chujkagá. <sup>3</sup> Napu'lige ne 'mi alemi sebase 'we a'lala ra'íchali ruyemia, 'we 'awília ajtíge ne majá. <sup>4</sup> 'Lige neka tabilé ra'icha 'we semáriga napurigá 'emi 'we 'la e'wámala. Iligá Onorúgame Alawala 'sile napurigá e'wámala 'emi. <sup>5</sup> Alarigaka 'la tabilé oyérimili nílekuru 'emi pe ralámuli nila ra'íchali iligá Onorúgame nila ra'íchali oyérimili nílekuru 'emi, aluéchigo 'sílígame a'walí 'yaa 'emi, tase ralámuli.

*Jena ruwimela Onorúgame Alawala 'we a'lá machirio ramué chieri ko bo'né*

<sup>6</sup> Suwábaga ramué napu benírame niru, napu'lige ramué ra'icha alué ralámuli 'yuga napu 'ma abé a'lá námame ju Onorúgame nila ra'íchali, 'liko 'la ra'icharu semati ra'ichálite alué ralámuli 'yuga, nobi tabiléchigo ra'ichárikó napu benírame ju alué e'wélala 'lige chejaré ralámuli jena wijchimoba eperégame, napugiti alueka pe bilé rawé 'ma tabilé e'wélala nímpé. <sup>7</sup> Ramueka ruyá napu Onorúgame tabilé ruwile 'we 'ya, pe kulí jipe 'la ruwí napu 'nata asale Onorúgame 'we 'yasi napu'lige ta'chó newá 'ye gawí. Alarigá 'sile napurigá ramué 'la námapua tachiri najkió Onorúgame, 'lige aminami napurigá 'la narépa napu Onorúgame nejmili ju. <sup>8</sup> Napu ramué ruyá tabilé 'wesi e'wélala jena wijchimoba mochígame námale. 'La námasaká pecha me'libókó alué Wa'lula Esukristo napu ju Onorúgame Inolá napu 'we semá 'sime ju. <sup>9</sup> Alarigá ju napurigá osálikige Onorúgame ra'ichálila 'ya. Regá anime:

Onorúgameka 'ma 'la gatega ajtí 'we semati raweli

napu 'yámili ju alué ralámuli napu 'we 'la niraga eteme ju alué

nobi ta'wesi ralámuli etégó nibilé akégó nibilé 'nata chieti ko.\*

<sup>10</sup> Onorúgame Alawala 'we nejkura beniria alarigá nimio ye suwábaga. Onorúgame

\* 2:9 E'nesi Isaías 64:4 'lige Jeremíasi 3:16.

Alawálaka suwábaga machiri ramué. Abiena ruwí napu Onorúgame 'nata ajtigó.

<sup>11</sup> Bilé rió tabilé machimela alieti 'nata ajtigó chebilé rió, pe alué rió bo'neka 'la machimela alieti 'nata ajtigó bo'né o bo'né alawala abiena 'la machimela alieti 'nata ajtigó alué rió. Alarigá júkuru Onorúgame 'yuga. Bilé rió pecha machimeli júkó alieti 'nata ajtigó Onorúgame, pe Onorúgame Alawálaka 'la námamala alieti 'nata ajtigó. <sup>12</sup> 'Liko alué Alawá napu Onorúgame nejlige pe tabilé ralámuli alawala nile. Onorúgame nejile bo'né Alawala napurigá 'we a'lá námapua suwábaga alué napu Onorúgame nejí. <sup>13</sup> Napu'lige ramué ruyá napu 'sile Onorúgame ramué gu'íriga, tabilé ra'ichalia napu ramué a'boi na'talia, iligá ramueka ra'ichalia napu Onorúgame Alawala benírale ramué.

<sup>14</sup> Bilé rió napu tabilé alawégame ju Onorúgame Alawala, alueka tabilé 'la niraga akeme ju napu benírame ju Onorúgame Alawala, pe tabilé najtékame niraga akeme ju 'lige alekeri tabilé námaka akeme ju napu aní alué ra'ichali napugiti pecha alawégame kame Onorúgame Alawala. <sup>15</sup> Bilé rió 'la Onorúgame Alawala alawégame nísaká 'la animela pala 'la ko bilé nóchali o tabilé 'la ko ma. Nobi bilé rió tabilé alawégame Onorúgame Alawala, tabilé námamala 'la nóchame ko o tabilé 'la nóchame ko alué rió Onorúgame Alawala alawégame. <sup>16</sup> Aka regá aniché Onorúgame nila ra'ichali 'we 'ya osirúgime: «Tabilé 'wesi rió it'é machime alieti 'nata ajtigó Onorúgame. 'Lige aminami tabilé 'wesi rió it'é napurigá Onorúgame benírimala.»<sup>†</sup> Nobi ramueka Onorúgame Alawala alawégame nirukó 'lige alekeri na'tálime niru napurigá Kristo.

### 3

*Jena ruwimela churigá nochámili ko alué napu nóchame ju Onorúgame nila nochálichi*

<sup>1</sup> 'Emi Onorúgame oyérame napurigá ne, napu'lige ne alemi ajtigá 'emi 'yuga, neka tabilé beniri 'emi 'we machime neraga Kristo nila ra'ichali, iligá neka beniri 'emi napurigá ralámuli 'we pee machime neraga churigá ko Kristo. <sup>2</sup> Neka benírituru alué téтали tabilé nóchali kame námala, napugiti 'émika u'kuchí kéturu bíjí chí'ime napu tabilé 'cho go'yame ju go'ame. <sup>3</sup> 'Émika bíjí 'nátame kame napurigá alué ralámuli tabilé 'cho oyérame Kristo nila ra'ichali, napugiti 'émika pe korua mochime kame uché jaré nila 'lige aminami enuela 'lige na'awa mochime kame 'emi a'bopi. <sup>4</sup> 'Lige jaré 'emi regá anime ju: «Neka Páulo oyérame ju», 'lige uché jaré regá anime ju: «Neka Apolo oyérame ju», 'émika a'chigóriga nokame ju napurigá alué

ralámuli tabilé Kristo oyérame. ¿Tabilé machí 'emi alarigá nokame ko alué ralámuli cha nokame?

<sup>5</sup> ¿Chieri ju ne 'lige chieri ju Apolo? Ramueka pe Onorúgame nulérigime niru napurigá 'emi benírama napurigá 'emi 'la oyéramala Kristo. 'Lige a'pílipi ramué benírituru napurigá nulá Onorúgame. <sup>6</sup> Neka benírituru 'émi alué 'we a'lala ra'ichali Esukristo nila, 'lige Apólaka aminabi benírale Esukristo nila ra'ichali, nobi pe Onorúgame 'sile a'wali 'yaa napurigá 'emi 'la oyéramala Esukristo. <sup>7</sup> Tabilé chéréko chieri bajchá benírame ko alué a'lala ra'ichali 'lige aminami tabilé chéréko chieri benírame ko nujubá, pe Onorúgame 'cho ju a'wali nejime napurigá aminabi oyérawa Onorúgame. <sup>8</sup> A'pílipi alué napu benírame ju bi'lepi 'nátali 'nátame ju, 'lige Onorúgameka semati raweli 'yámala a'pílipi alué benírame 'we 'la benírasaká. <sup>9</sup> Apolo 'lige ne pe abaleké nóchali nóchame niru Onorúgame nila nóchali. 'Émika ju napurigá bile wasá ri'ligó echerúgime, 'lige Onorúgame 'sile alué wasá echá, 'émika ju napurigá walú galí re'pá iligame napu Onorúgame 'sile newá. <sup>10</sup> Onorúgame 'we nejkura napurigá ne benírimala ralámuli alué tabilé 'me machime alarigá ko Onorúgame. A'kinana uché jaré ralámuli aminabi benírimili ju. 'Lige a'pílipi alué ralámuli 'we 'la benírimili júkuru. <sup>11</sup> Tabilé 'wesi ralámuli benírimili júkuru se'wináriga alué ra'ichali Esukristo nila ra'ichali, napu benírituru ramué bajchá. <sup>12</sup> Alué ralámuli napu benírimili ju a'kinana 'we a'lá benírame nísaká o tabilé 'la benírame nísaká <sup>13</sup> 'we 'la machiboa napu'lige raweli sébachi napu'lige Esukristo nawámili ju gastigárimia ralámuli napu cha nokame ju. Alué ralámuli napu tabilé cha nokame ju, alueka ju napurigá alué rejté napu tabilé che ikime ju rekó e'kósilia. <sup>14</sup> 'We 'la benírisaká alué ralámuli, 'liko Esukristo 'we 'la semati raweli 'yámala. <sup>15</sup> 'Lige bilé ralámuli tabilé 'la benírisaká 'liko Esukristo tabilé niraga etémala napu benírale alué ralámuli, nobi Esukristoka 'la bi'wígame alawégame niraga etémalagó alué ralámuli.

<sup>16</sup> ¿'Émika tabilé machí 'emi Onorúgame 'kúchila ko? ¿'Émika tabilé machí Onorúgame Alawala pachágana bejtégame ko 'emi alawálachi? <sup>17</sup> 'Émika ju napurigá Onorúgame galila neraga, 'lige apiépiri gajunasa Onorúgame galila, Onorúgame abiena gajunámili ju alué ralámuli Onorúgame galila gajúname. Onorúgame galila 'we najtékame ju 'lige 'émika Onorúgame galila ju.

<sup>18</sup> Tase na'tawa 'we ejobénigame ko 'emi a'boi. Bo'nepi na'tásiká 'we benégame ko alué 'nátali 'nátaga napu benírame ju

<sup>†</sup> 2:16 E'nesi Isaías 40:13 'lige Romanos 11:34.

ralámuli tabilé Onorúgame oyérame, iligá a'rewa alieti 'nata. 'Lige rekó ralámulika «tonto» anechi 'emi olagá, tabilé chéréko. Iligá beniboa Onorúgame nila ra'ichali. <sup>19</sup> Onorúgame níriká tabilé 'la ju napu benírame ju alué ralámuli tabilé Onorúgame oyérame. Aka regá aniché Onorúgame nila ra'ichali 'we 'ya osirúgime: «Onorúgameka 'ma 'la gatega ajtí napurigá alué ralámuli tabilé siné sébali olámala rekó 'we 'la sébali olánilie.»\* <sup>20</sup> Aka abiena regá aniché: «Wa'lula Onorúgame 'we a'lá machí tabilé a'lá ko napu 'nátame ju alué ralámuli napu tabilé Onorúgame oyérame ju.»† <sup>21</sup> Alekeri 'emi tabilé riólamilí júkuru aleké ralámuli oyérame kóriká napu tabilé Onorúgame oyérame ju. Onorúgame suwábaga tábiri newale 'emi gu'iriga. <sup>22</sup> Páulo, 'lige Apolo 'lige Sepasi (Pegro), 'lige suwábaga e'wélala 'emi gu'irame júkuru. 'Lige aminami Onorúgameka gatele napurigá ajagá mochímala ralámuli, 'emi gu'iriga 'sile, 'lige aminami gatele napurigá suwímela ralámuli, pe 'emi gu'iriga 'sile. Napu 'sile Onorúgame 'we 'ya pe 'emi gu'iriga 'sile. 'Lige napu 'símili ju Onorúgame abé ilibékomi abiena pe 'emi gu'iriga 'símala. <sup>23</sup> 'Lige 'émika Kristote nulalime júkuru 'lige Kristoka Onorúgamete nulelime júkuru.

#### 4

*Jena ruwímela tachiri nóchali nígame níligo alué ralámuli Esukristo nochálilachi nóchame*

<sup>1</sup> Neka najkíguru napurigá 'emi etémala ramué pe nóchame neraga Kristo 'yuga. Alué 'smi ramué jula napurigá ramué beníriwa napu Onorúgame tabilé ruwile 'we 'ya. <sup>2</sup> Bilé ralámuli napu nóchali 'yárigame ju, alueka 'we 'la nochámili júkuru napurigá ralámuli 'la niraga etémala. <sup>3</sup> Neka tabilé chéla rekó 'emi 'lige e'wélala nulame machinálíe chiena 'la nóchame ko ne o tabilé a'lá. Neka pecha 'nátame júkó bo'nepi chiena 'la nóchame ko ne o tabilé a'lá. <sup>4</sup> Neka tabilé machiá nili cha 'sílígo ne, rekó tabilé machié ne, pecha animélagó ne tabilé chokíla ko ne. Pe Onorúgame 'la machí ne na'tálila, pe alué bo'né gastigáromala ne'chí cha 'sílkame nísaká ne. <sup>5</sup> Alekeri, tabilé 'wesi e'chewawa 'emi ta'chó nawachi Wa'lula Esukristo. Alué Wa'lula nawasa, a'lige gustisia olámala ralámuli 'yuga, 'lige alué 'we a'lá machímela 'we a'lá ko o tabilé la ko napu nokale. 'Lige 'la machímela napu 'nata a'pílipi ralámuli. A'lige Onorúgame 'yámala semati raweli a'pili ralámuli napu 'la sébali olale.

<sup>6</sup> 'Emi Onorúgame oyérame napurigá ramué, neka ruwíguru napurigá 'emi 'la machímela ramué etega ne 'lige Apolo 'we a'lá sébali olame nírigo, aka regá aniché

Onorúgame nila ra'ichali 'ya osirúgime napu regá aní: «Tase se'unáriga ra'ichawa napu aní Onorúgame nila ra'ichali.» Alarigá nokisáká 'emi, tase riólaga e'yénawa regá anigá: «'Nee alué rioka chiena 'la beníranti ju Onorúgame nila ra'ichali. 'Nee alué chebilé rioka, tabilé 'la beníranti ju Onorúgame nila ra'ichali.» <sup>7</sup> Aka Onorúgame 'sileché se'unátiri 'nátali 'ya a'pílipi 'emi, alekeri 'emi tase na'támili júkuru abé jebénigame ko 'emi beníraga Onorúgame nila ra'ichali me'tigá uché jaré. Suwábaga 'nátali napu 'nátame ju 'emi pe Onorúgame 'sile aleké 'nátali 'yaa, 'liko chonigá 'emi 'we riólame júpaché 'la 'emi a'boi na'tállilate 'nátame kóriká.

<sup>8</sup> Jipe 'émika nígame ju suwábaga napu najki 'emi, 'lige a'chigóriga nokame ju 'emi napurigá nokame ju alué e'wélala rey, 'la tabilé resí lanti ka noká 'emi ramué nila. ¡'La bijchiá e'wélala rey nisa 'emi, ramuéchigó e'wélala níwili júkurchigó 'emi 'yuga nulame! <sup>9</sup> Ramué napu eki nóchali nígame níru napu Esukristo nejí, Onorúgame nujubá jáwale ramué napurigá jaré rió galírale mo'árigame napu meliboli ju. Níru napurigá ralámuli getúmala ramué 'lige ajchékala, 'lige aminami alué santo ánjelitiri. <sup>10</sup> 'Émika 'we machime koláleké a'bopi 'lige ramueka pe tabilé 'la 'nátanti neraga etélime ju. 'Émika Onorúgame a'walila nígame kolae 'lige 'émika eteme ju ramué tabilé nígame níraga alué a'walí. 'Émika 'we 'la kolae napu 'lige ralámuli 'we 'la níraga etechi 'emi 'lige ramueka tabilé. Nobi alarigá na'tálíka tabilé 'la ju. <sup>11</sup> Senibí 'we e'lúime níru ramué 'lige aminami asíriga balámilime níru ramué. 'Lige asíriga o'chérame o'páchaga e'yéname níru ramué. 'Lige ralámulika asíriga resí olame ju ramué. 'Lige aminami tabilé galégame níru ramué, pe ichúrimi e'yéname níru ramué. <sup>12</sup> 'Lige aminami asíriga resibálime níru ramué a'wágame nóchiga go'ame meka. Napu 'lige ralámuli 'we cha anichi ramué olagá, ramueka regá anélime ju: «Onorúgame 'la gu'irasa 'la képa.» Napu 'lige 'we resí ikiachi ramué, asíriga 'la anachálime níru ramué, tabilé resí anigá. <sup>13</sup> Napu 'lige alué ralámuli cha anichi ramué olagá, ramueka tabilé ayoga ra'ichálime ju alué ralámuli 'yuga. 'Lige ralámulika eteme ju ramué napurigá tabilé najtégame neraga. Napurigá repuga neraga etélime ju ramué.

<sup>14</sup> Neka pecha oségó ye ra'ichali napurigá 'emi chíjunámala. Neka oséguru bilé rejcholi ruigá napurigá ne bo'né 'kúchila neraga napugiti neka 'we galeme 'emi. <sup>15</sup> Rekó we'ká nokae 'emi benírira, nobi ne 'síe bajchá beníría 'emi, 'lige alekeri 'emi napurigá ne 'kúchila neraga ju. <sup>16</sup> Alekeri neka

\* 3:19 E'nesi Job 5:13. † 3:20 E'nesi Salmos 94:11.

nuláguru napurigá a'chigóriga nokimela 'emi napurigá 'smi ne.

<sup>17</sup> Alekeri jula ne Timoteo alemi, alué napu ne 'we galegá eté napurigá ne inolá neraga, 'lige napu 'we alá sébili olame ju napurigá najkí Onorúgame. 'Lige 'we alá nirá ne. Timotéoka 'we alá animela napu ne benírame ju napu ju Kristo Esusi ra'ichálila. Alué ju napu ne benírame ju bochígimi alé napu napuíme ju ralámuli Onorúgame oyérame. <sup>18</sup> Jaré 'emi regá aníá mochí: «'Ma tabilé siné nawámala Páulo jeka.» Alekeri 'we riola mochí 'emi. <sup>19</sup> Neka pe yati neraga simela Onorúgame 'la elisaká ne'chí, 'lige kulí 'we alá machimé ne ta'lá Onorúgame a'walila nígame ko alué ralámuli alanime. <sup>20</sup> Bilé ralámuli 'la Onorúgamete nulelime nisaká, 'we 'la machirume ju napu 'sime ju. Jaré ralámuli Onorúgamete nulelime korime ju, nobi tabiléchigo 'la sébali olame júkó napu najkí Onorúgame. <sup>21</sup> ¿Churigá najkí 'emi napurigá ne simela 'emi kólimia? ¿Bilé gusi o'ká 'emi wejpisomia, o 'wéchala 'la ganíliga?

## 5

*Jena ruwimela Onorúgame oyérame ka tabilé cha nokimélikó*

<sup>1</sup> Jaré ralámuli aní bilé 'emi 'we cha 'siáráo me'tigá bilé ralámuli tabilé Onorúgame oyérame. Aní bilé alué Onorúgame oyérame bejtego bilé mukí 'yuga napu o'nola 'yula ju. <sup>2</sup> 'Lige 'we ganíliga mochígara 'emi abisibi 'we riola. Iligá 'we chijunátékuru 'lige seweka mochítékuru. Alué rió alá'sime 'ma tabilé elítékuru napurigá bajkimela alé napu beníame ju Onorúgame nila ra'ichali. <sup>3</sup> Rekó ne tabilé ajtigé napu 'emi mochí, nobi ne alawálaka alé ajtí napu 'emi mochí, 'la alé ajtiganti káré ne. 'Lige neka aníguru alué rió olagá chojkila ko. <sup>4</sup> Napu'lige 'emi napuísa Onorúgame nila ra'ichali beníame, ne alawálaka alé ajtíchigó 'lige aminami alé ajtíchigó Wa'lula Esusi A'walila. Neka Esúsíte nulérigime ju, <sup>5</sup> 'lige neka alekeri nuláguru 'ma tabilé eliwaká napurigá bajkimela alué rió alé napu 'emi napuíme ju napurigá Satanasi abichibi olámala alué rió napurigá bo'né najkí 'lige alarigá alué rió ko guwana na'támala. 'Lige alarigá bo'né alawala tabilé gastigáriwa napu'lige ku nawachi Wa'lula Esusi.

<sup>6</sup> Tabilé riólimili ju 'emi tabilé che nokame kórigá, aka 'ma 'la machíché 'emi regá anime ra'ichali: «Bilé ralámuli cha 'sime pe arigá a'résiga tabilé gastigáriga, 'ma uché jaré ralámuli a'chigóriga nokimela.»\*

<sup>7</sup> 'Ma tabilé elíwa napurigá alué rió bajkimela alé napu 'emi napuíme ju, napurigá uché jaré tabilé a'chigóriga nokimela. Aka

'émika 'ma 'la bi'wígame alawégame júpaché napugiti Krístoka me'líriligame bilena gulusichi ujchagá ramué gu'iriga.† <sup>8</sup> Alekeri 'ma a'rewa chibi noká iligá aminacho 'we 'la oyérawa Kristo, 'ma a'rewa alué náтали chibi nokianti na'tálime. Iligá 'we 'la bijchí ra'ichawa, tabilé chibi nokiboa 'lige amí-nami tabilé na'tawa chibi olianti uché jaré ralámuli.

<sup>9</sup> Neka uché bilena apélichí ruyéturu napurigá 'emi tabilé napuíka e'yénamala alué ralámuli 'yuga napu pe uché jaré umugí 'yuga okoka e'yéname ju napu tabilé a'boi 'yula ju. <sup>10</sup> Neka tabilé anime ke aní napurigá 'emi tabilé napuíkala alué ralámuli 'yuga napu tabilé Onorúgame oyérame ju napu pe we'ká umugí 'yuga okoka e'yéname ju 'lige koruka e'yéname e'karúgame tábiri tabilé a'boi nila, 'lige alué napu chigoga e'yéname ju, 'lige alué napu pe e'karúgame tábiri oyérame ju napu tabilé Onorúgame ju. Aka jena gawichí ejperéliká abirigáchigo ejperélawagó alué ralámuli 'yuga napu cha nokame ju. <sup>11</sup> Neka pe regá anigá anié 'emi tabilé napuímio alué ralámuli 'yuga napu anime ju: «Neka 'la Onorúgame oyérame ju.» 'Lige pe tabilé e'wame nisa napu Onorúgame nulá 'lige pe e'tégili e'yéname nisa, chibi nokigá e'yéname. Tabilé go'meli ju 'emi alué tabilé e'wame ralámuli 'yuga.

<sup>12</sup> Neka tabilé lisensia nígame ju napurigá gustisia olámala alué ralámuli 'yuga napu tabilé Onorúgame oyérame ju. Alueka Onorúgame 'símili júkuru gastigaria, <sup>13</sup> nobi 'émika 'la lisensia nígame ju napurigá gastigárimala bilé rió Onorúgame oyérame cha 'sisa. Alekeri 'émika 'ma tabilé elímlili júkuru napurigá alué cha'sime bajkimela napu 'emi napuíme ju Onorúgame nila ra'ichali beníame.‡

## 6

*Jena ruwimela na'úsaká jaré ralámuli Onorúgame oyérame a'bopi gatémili ko*

<sup>1</sup> Napu'lige jaré 'emi na'áwame nisa uché bilé oyérame 'yuga, 'liko ¿chonigá 'émika nejkúrili tánime júkó alué e'wélala napu tabilé Onorúgame oyérame ju napurigá gatémala alué na'áwali? Iligá tániwakuru nejkúrili bilé Onorúgame oyérame napurigá gatémala alué na'áwali. <sup>2</sup> ¿Tabilé machí 'emi abiena gatélime ko ramué suwábaga ralámuli jena wijchimoba ejperégame? Aka 'emi nokimela júpaché ra'ichali gatea ralámuli jena ejperégame 'yuga. 'Liko ¿chonigá tabilé gateme júpaché 'emi alué na'áwali? <sup>3</sup> ¿Tabilé machí 'emi gatémili ko alué santo ánjeli 'yuga ramué napu Onorúgame oyérame níru? ¿Aka alekeri abéchigo 'la gatéwili

\* 5:6 Páulo anile: «Pe'tá kawali ro'ésiga arina, bochígimi párisichi na'lome kárigó.»

† 5:7 E'nisi glosario «Pásuca.»

‡ 5:13 E'nisi Deuteronomio 17:7 'lige 22:21.

júkó ye jena gawichí nerúgame na'áwili!  
<sup>4</sup> Liko ¿chonigá 'émika gateme júkó alué na'áwili alué e'wélala mochígichi napu tabilé Onorúgame oyérame ju? <sup>5</sup> Neka yeti ruwíguru napurigá 'emi 'la chijunámala. Aka mochiché jaré Onorúgame oyérame 'we ejebénigame napurigá gatémala na'áwili nerúlasaká. <sup>6</sup> Lige 'emi na'áwasaká, ¿chonigá simúbame júpaché alé napu mochí e'wélala nulame napu tabilé Onorúgame oyérame ju napurigá gatémala alué na'áwali?

<sup>7</sup> 'We enátiri ju nakolia 'emi a'bopi níriga. Pe a'kéwaguru chibi anichi 'emi olagá. 'Lige aminami pe etéwaguru 'emi nila chigochi. <sup>8</sup> Iligá 'émika 'we resí nokame ju, 'ma chigome ju 'emi alué uché jaré Kristo oyérame nila tábiri.

<sup>9</sup> ¿Tabilé machí 'emi alué cha nokame ralámuli tabilé simúbame ko alé napu ajtí nulá Onorúgame? 'Emi ralámuli, tase tonto niwa. Ralámuli alué tabilé a'boi 'yula umugí 'yuga o'kome 'lige alué Onorúgame neraga eteme alué e'karúgame tábiri napu tabilé Onorúgame ju, 'lige aminami alué rióchoká okome, <sup>10</sup> 'lige chigórigametiri, 'lige ralámuli alué napu 'we niga mochínilime ju we'ká tábiri, 'lige alué 'we bajime rekútame, 'lige alué chátiri ra'íchame uché jaré ralámuli olagá, 'lige alué 'yégaemetiri napu pe 'yéigga bujeme ju enomí uché jaré nila. Alué ralámulika tabilé siné simámala alé napu ajtí nulá Onorúgame. <sup>11</sup> Jaré 'emi a'chigóriga nokame nile napurigá cha nokame, nobi Onorúgame 'láchigo e'kálekó, 'lige wanápale napurigá aleké oyérame nímalá. Alué Wa'lula Esukristo a'walilá 'sile gatea, 'lige aminami Wa'lula O'nó Onorúgame Alawala si 'sile gatea.

#### *Jena ruwimela tabilé cha nokiamé ko*

<sup>12</sup> Jaré 'emi regá anime ju: «Onorúgameka 'la lisensia neji napurigá suwábaga nóchali newawa», nobi jaré nóchali tabilé 'la ju newalía. Neka alekeri tabilé nocha chátiri nóchali napugiti alieti nóchali pecha gainámaréko ne a'rea. <sup>13</sup> Lige abiena regá anime ju jaré ralámuli: «Go'ámeke ropachí asíbame ju, 'lige ropaka go'ame ajchilime ju.» 'La bijchiá ju, nobi Onorúgameka 'ma suwámio ye oká tábiri napu ju ropá 'lige go'ame. Onorúgameka pecha newalé ko ramué napurigá apiépiri umugí 'yuga okópua. Onorúgameka newálekuru ramué napurigá Onorúgame Alawala pachágana ramuechi asimela, napugiti ramueka Onorúgame nila niru. <sup>14</sup> Bilé rawé Onorúgame bo'né a'waliláte ajánamala ramué napurigá ramué ajagá mochiwa a'chigóriga napurigá ajánale Wa'lula Esukristo.

<sup>15</sup> 'Émika Onorúgame Alawala ajchágame júkuru, 'liko 'émika napurigá Esukristo alarigá júkuru alué napu 'pa rewagáchika

julárigame nílige Onorúgamete. Alarigá nísaká, 'liko 'emi níriga tabilé 'yuga o'kómili ju alué umugí napu we'ká rió 'yuga o'kome ju. ¡Alanokiáká tabilé 'la ju! <sup>16</sup> ¿Tabilé machí 'emi, 'emi 'yuga o'kósaká alué umugí we'ká rió 'yuga o'kome, 'ma pe bi'lepi sa'pá gainamio 'emi sa'pala 'yúriga 'lige alué umugí sa'pala 'yúriga? Pe a'chigóriga ju napurigá anélige Onorúgame alué Arani 'lige Eba 'we 'ya. Regá anele: «'Emi oká ralámuli pe bi'lepi ralámuli neraga nímalá.» <sup>17</sup> Bilé rió 'la oyérame nísaká Wa'lula Onorúgame 'la Onorúgame Alawala alawégame ju. Lige alekeri bilé ralámuli 'lige Onorúgame pe bi'lepi alawégame ju.

<sup>18</sup> Lige neka alekeri nuláguru: ¡Tabilé e'wiwa alué mukí we'ká rió 'yuga gojchime repachi! ¡Iligá yati simawa se'wí! Jaré chátiri nóchali tabilé resí olame ju bo'nepi. Napu'lige bilé rió 'yuga gojchisá bilé mukí we'ká rió 'yuga gojchime, asíriga resí ikime ju bo'nepi. <sup>19</sup> ¿'Émika tabilé machí 'emi ko Onorúgame Alawala re'obala, 'lige Onorúgame Alawala 'émichi bejtégame ko, alué alawá napu 'emi 'yáiriu? Aka Onorúgame ká'é ramué nuleme. <sup>20</sup> Onorúgame júlale bo'né Inolá napurigá mukumela 'emi gu'riga napurigá 'emi buyámala alé resítirichi. Alekeri 'we 'la nirawa Onorúgame 'lige aminami 'we 'la 'nátaga járowa 'emi a'bopi.

## 7

### *Jena ruwimela churigá ejperélimio alué ralámuli napu yúgame ju*

<sup>1</sup> Jiipeko ne nejémala alué napu 'emi ne'chí rukélige i'bé osilite ra'íchiga. ¿Ta'la ju napurigá bilé rió bi'neli bejtégame asimela tabilé mukí 'yuga? <sup>2</sup> Aka 'la júpaché nobi abéchigo 'la ju napurigá bilé rió reimela bilé mukí napurigá tabilé natámala bilé mukí 'yuga gojchianti. 'Lige aminami bilé mukí reimela rió napurigá tabilé natámala rió 'yuga gojchianti. O'maka machiáguru tabilé 'la ka jiipe jena wijchimoba. <sup>3</sup> Bilé rió upégame, alueka 'la ju napurigá 'yuga gojchimela bo'né upila. <sup>4</sup> Bilé mukí rió 'yúgame, alueka 'la e'wímili júkuru bo'né 'yula. Napu'lige rió 'yuga gojchinálisa alué mukí 'yuga, alué mukí 'la e'wímili júkuru bo'né gunala. A'chigóriga ju rió 'yuga. Napu'lige alué mukí 'yuga gojchinálisa alué rió bo'né 'yula, 'liko alué rió 'la e'wímili júkuru alué mukí bo'né 'yula. <sup>5</sup> 'Emi 'la nirásaká napurigá tabilé napuika okómala pe u'kabi rawé 'la ju, pe u'kabi rawé ra'ichánilisaká 'emi Onorúgame 'yuga. 'Lige a'kinana 'ma ra'ichasa Onorúgame 'yuga, ku napuika okómili ju napurigá tabilé chátiri 'nátili 'yámala Satanasi.

<sup>6</sup> Neka pe bilé rejcholi ruwíguru, tase bilé nulalí. <sup>7</sup> Neka abé 'la nirá nili napurigá 'emi mochímala napurigá ne, tabiléchigo o'maka alarigá nírukó. Nobi Onorúgameka se'unátiri 'nátali 'yame ju a'pílipi ralámuli.

<sup>8</sup> Alué 'oni mochígama abé 'la ju tabilé rewá, 'lige alué umugi gunámakame abé 'la ju tabilé uché rewá. <sup>9</sup> Alué napu tabilé anáchame ju tabilé mukí 'yuga gojchigá, abé la julke napurigá newímala napurigá tabilé na'támala mukí 'yuga gojchiantí.

<sup>10</sup> Neka ye nulalí 'yáguru alué ralámuli napu newíkame ju 'lige abiena alué napuika mochígama. Ye nulalika tabilé ne nila ju, pe Onorúgame nulalila ju: Mukika tabilé a'rémili júkuru bo'né gunala. <sup>11</sup> Siné kachi a'résaká, 'liko tabilé 'la ju napurigá uchéchigo siné rewimela se'nú rió, iligá abé 'la juleké tabilé rewá o abé alá juleké ma napurigá alué mukí chéchigo siné pe aba aleké rió 'yuga asimela napu 'yuga ajtílige. 'Lige tabilé 'la ju napurigá bilé rió a'rémala mukí bo'né 'yula.

<sup>12</sup> Alué uché jaré ralámuli Onorúgame oyérame, neka yeti rejcholi ruyéguru. Yeka tabilé Onorúgame nulalila ju, yeka pe ne nila rejcholi ju. Bilé rió Onorúgame oyérame 'yúgame nisa bilé mukí tabilé Onorúgame oyérame, alué mukí tabilé a'rénilisa alué rió, 'liko alué rió tabilé a'rémili júkuru alué mukí bo'né 'yula. <sup>13</sup> Bilé mukí Onorúgame oyérame bilé rió 'yúgame nisa tabilé Onorúgame oyérame 'lige alué rió tabilé a'rénilisaká alué mukí 'liko alué mukí tabilé a'rémili júkuru alué rió bo'né 'yula. <sup>14</sup> Onorúgameka 'la niraga eté alué rió napugiti alué mukí napu bo'né 'yula ju Onorúgame oyérame kame. 'Lige alué rió 'la oyérame nisa Onorúgame 'lige alué mukika tabilé, 'liko Onorúgameka 'la niraga eté alué mukí napugiti alué rió napu bo'né 'yula ju 'la Onorúgame oyérame kame. 'Liko Onorúgameka 'we 'la tebúmala alué ralámuli 'kúchila napugiti bilé alué o'nola 'la Onorúgame oyérame kame. <sup>15</sup> Bilé rió tabilé Onorúgame oyérame bilé mukí 'yúgame nisa Onorúgame oyérame, 'lige a'rénilisa alué rió alué mukí, 'liko a'rémili júkuru. Bilé mukí tabilé Onorúgame oyérame bilé rió 'yúgame nisa Onorúgame oyérame, 'lige a'rénilisa alué mukí alué rió, 'liko a'rémili júkuru. Onorúgameka tabilé najkí napurigá na'áwaká ejperélamala. <sup>16</sup> Abé 'la ju napurigá tabilé rojámala 'emi. Iligá 'emi Onorúgame oyérame gu'irimili júkuru 'emi a'boi 'yula 'la napurigá Onorúgame oyérame nímala.

<sup>17</sup> A'pílipi ralámuli a'chigóriga ejtebímili júkuru napurigá nilige napu'lige Onorúgame bayélige napurigá alué ralámuli Onorúgame oyérame nímala. Bi'neli asisáká, 'liko peba

bi'neli asimeli júkuru. 'Yúgame nísaká 'liko 'yuga asimeli júkuru. Alarigá nulé ne suwábaga ralámuli napu ekí Onorúgame oyérame ju. <sup>18</sup> Bilé ralámuli jurío nísaká, tabilé a'rémili júkuru napurigá nokame ju ralámuli jurío. 'Lige bilé ralámuli tabilé jurío nísaká, tabilé a'chigóriga 'símili júkuru napurigá nokame ju ralámuli jurío.\*

<sup>19</sup> Onorúgame níriká peba abisibi najtérame ju ralámuli rekó jurío ke o tabilé jurío ke, napugiti abéchigo najtérame kame 'we 'la sébali oliá napu Onorúgame nulá. <sup>20</sup> A'pílipi ralámuli a'chigóriga ejtebímili júkuru napurigá nilige napu'lige Onorúgame oyérame. <sup>21</sup> Jaré 'emi ralirúgame nísaká napurigá nochámala 'emi tabilé najtétiga, tabilé chélawa. 'Lige alué wa'lula napu 'emi nuleme ju regá anisá: «Émika 'ma tabilé nochámili ju napurigá ralirúgame neraga», 'liko alarigaka asíriga 'la ju. <sup>22</sup> Bilé ralámuli ralirúgame nísaká, 'lige 'we 'la oyérame nisa Onorúgame, Onorúgame 'yásaká 'we 'la 'nátali 'liko alué ralámuli 'ma tabilé ralirúgame niraga 'nátame nímala. 'Lige alué ralámuli napu tabilé ralirúgame ju, alueka na'támala napurigá ralirúgame neraga Onorúgame. <sup>23</sup> Onorúgame 'ma najtérame Kristo júliga jena wijchimoba napurigá mukumela ramué gu'iriga, alekeri Kristo 'smi ramué nulea. 'Ma tase ralámuli nokame ju ramué nulea, Kristo 'smi 'nátali 'ya ramué. <sup>24</sup> Alekeri 'emi Onorúgame oyérame napurigá ne, a'chigóriga ejtebímili júkuru 'emi napurigá nilige napu'lige Onorúgame oyeria.

<sup>25</sup> Jipeko rejcholi benírimala ne alué ralámuli napu tabilé 'cho 'yúgame ju. Ye rejchólíka pe ne nila ju, 'lige Onorúgame 'smi ne'chí gu'iria napurigá ne 'we 'la benigá benírimala ye rejcholi. Onorúgame 'we 'la na'temá ne'chí, alekeri gu'irame ju ne'chí. <sup>26</sup> Neka abé 'la nirá nili napurigá 'emi tabilé rewimela napugiti jipe pecha 'la ka jena wijchimoba, napugiti 'we resiriga kame jena wijchimoba. <sup>27</sup> Mué rió mukí 'yúgame nísaká, tabilé a'rewa. Tabilé 'yúgame nísaká mukí alarigá rejpiwa. <sup>28</sup> Bilé rió mukí rewisá, alá ju, 'lige bilé mukí rió rewisá abiena 'la ju. Nobi alué ralámuli 'yúgameka i'sínimi tabilé ganílíga mochímala. Neka tabilé najkiéke'é napurigá resí nílamala 'emi.

<sup>29</sup> 'Emi Onorúgame oyérame napurigá ramué, neka ye ruwíguru. Tabilé we'ká rawé rokaré we'ká e'karúgame tábiri simírímia asíriga enátiri, 'lige aminami gawítiri 'ma gajúmala. Bilé rió níriga mukí 'yúgame pecha mukicho 'nata asíame júkó, abé 'la ju Onorúgame nila 'nátali na'talia. <sup>30</sup> Alué ralámuli napu 'we seweka mochí, alueka 'we ganílíga mochímili júkuru, 'lige alué napu 'we ganílíga mochí, alueka 'we seweka

\* 7:18 E'nesi glosario «circuncisión».

mochímili júkuru. Alué napu 'we enomígame ju, alueka napurigá tabilé enomígame niraga mochímili júkuru. <sup>31</sup> Ralámuli napu 'we uneme ju we'ká e'karúgame napu nerú jena wijchímoba, tase 'me na'tawa alieti unélinti, iligá abé 'la ju e'walia napu nulu Onorúgame, napugiti 'ma pe u'kabi rawé rokáré kame napurigá suwibamia ye gawí.

<sup>32</sup> Neka najkié napurigá 'la ganíliga ejperélamala, tabilé we'ká 'nátaga. Bilé rió Onorúgame oyérame napu tabilé 'yúgame ju mukí, alueka pe Onorúgamecho na'tálila 'nata ajtime ju napurigá 'la ganíliga asimela alué rió 'yuga. <sup>33</sup> Nobi alué napu mukí 'yúgame ju, alueka we'ká 'nátame ju jena wijchímoba nerúgame tábiri napurigá bo'né 'yula ganíliga asimela. <sup>34</sup> Bilé rió mukí 'yúgameka asírige we'ká tábiri 'nátame ju. Bilé mukí Onorúgame oyérame tabilé 'yúgameka, alueka pe Onorúgame nocháilicho 'nátame ju 'la sébali olaga napu Onorúgame najki. Bilé mukí rió 'yúgameka abéchigo 'nátame ju tábiriti nochálime napurigá bo'né 'yula 'la ganíliga asimela.

<sup>35</sup> Neka ye ra'íchali ruwíguru nejkúriga, pecha ne'óchaga anígó neka. Neka najkigá aní napurigá 'emi abé 'la nochámala Onorúgame nila nocháililachi, tabilé chéré rekó 'yúgame ke o tabilé 'yúgame ke.

<sup>36</sup> Bilé rió mukí taga asisáká, 'lige okárage 'ma e'wele nisa, 'lige napuimilisa, 'liko abé 'la ju newía napurigá napuika mochímala, Onorúgameka tabilé gastigárima ju ralámuli newichi. <sup>37</sup> Bilé rió tabilé rewinálisaká bilé mukí, 'lige tabilé 'nátame nisa mukí 'yuga gojchiame a'lá ju rekó tabilé rewae. <sup>38</sup> A'lá ju rekó bilé rió mukí rewae nobi abéchigo a'lá júkó tabilé rewae.

<sup>39</sup> Bilé mukí rió 'yúgame, alué mukika aba alué rió 'yuga o'chérimili júkuru. Alué rió mukusáká 'liko alué mukí chebilé rió reimili júkuru. Iligá alué rió Onorúgame oyérame nímili júkuru. <sup>40</sup> Neka 'nátaguru abé 'la ganíliga asimeo alué mukí bi'neli asagá, tabilé uché rewisá. Neka mayé nili Onorúgame Alawala nejío ye 'nátali.

## 8

*Jena ruwimela tabilé che anilime ko alué ralámuli napu pe kulí 'la oyérame ju Onorúgame*

<sup>1</sup> Jipeco ne nejémala alué uché bilé ra'íchali napu 'emi rukenié, talá 'la ko go'aa alué go'ame napu mono kógrime ju napu tabilé Onorúgame ju o tabilé 'la kómá. Suwábaga ramué 'la benégame niru pee ko, nobi napu'lige benisuga we'ká tábiri 'we riólaga e'yénilime niru ramué. Iligá 'la niraga etélime júkuru ralámuli tabilé riólaga, alanokiáká abé 'la ju. <sup>2</sup> Bilé rió 'we benégame neraga 'nátame ka, pe tabilé benégame ju. <sup>3</sup> Onorúgameka 'we 'la machí chieri

ralámuli 'we niraga eteme ko Onorúgame, 'lige Onorúgameka 'we galegá eteme ju alué ralámuli.

<sup>4</sup> 'Liko ¿chonokiboa? ¿Go'poa alué go'ame napu kógrime ju alué mono? 'We 'la machiáguru ramué alué mono pe tabilé Onorúgame ko, 'lige pe bi'lepi ko Onorúgame. <sup>5</sup> Jaré ralámuli 'we tánime ju nejkúrali alué e'karúgame tábiri napu nerú 'pa rewagachi 'lige jena wijchímoba, <sup>6</sup> nobi ramueka machiágó pe bi'lepi ko Onorúgame napu ju ramué O'nola. Alué 'sile suwábaga tábiri newá. 'Lige ramueka aleké oyérame niru. 'Lige aminami pe bi'lepi ju Wa'lula napu ju Esukristo. Onorúgameka nulele Esukristo napurigá newámala ye gawí 'lige rewagá, 'lige Esukristo 'sime ju a'wali nejia napurigá ejperega mochiwa ramué.

<sup>7</sup> Nobi jaré ralámuli Onorúgame oyérame tabilé 'la machime ju yeti tábiri. Alueka 'nátame ju alué mono ajágame ko, 'lige bijchígime ju alué go'ame kógrime ko alué 'la bijchiá Onorúgame, nobi alué ralámuli alué go'ame go'sáká, we'ká 'nátame ju mayega 'we cha nokáligo alué go'ame go'sá. <sup>8</sup> Nobi Onorúgame níriká tabilé chéré rekó go'ae o tabilé go'ae alué go'ame. Rekó go'suga alué go'ame, pecha abé 'la na'táwili júkó Onorúgame 'yuga o tabilé go'suga ma. <sup>9</sup> Nobi suwábaga 'emi 'la 'nátaga go'poa suwábaga alué go'ame napu go'yame ju 'emi napurigá alué uché jaré ralámuli napu kulí 'la oyérame ju Onorúgame tabilé chélámala. <sup>10</sup> Jaré alué ralámuli etesa 'emi go'ame go'yá mochígichi alué mono kógrime, 'liko alué ralámuli na'támala 'we a'lá ko go'ame go'aa mono kógrime 'lige aminami mayémala ajágame ko alué mono. <sup>11</sup> 'Liko alué napu pe kulí 'la oyérame ju Onorúgame 'we 'la kólámala alué mono oyérimia, 'lige 'ma a'rémala Kristo oyeria, alué napu mukule alué ralámuli gu'iriga. <sup>12</sup> Pe mué chojkila nímala alieti 'nátachi alué ralámuli napu pe kulí 'la oyérame ju Onorúgame. Kristoka tabilé galeme ju alanokiachi ramué. <sup>13</sup> Neka alekeri tabilé siné go'mela alué go'ame napu kógrime ju alué mono napugiti ne go'sáká alué go'ame, pe guwana na'támala alué ralámuli napu pe kulí 'la oyérame ju Onorúgame.

## 9

*Jena ruwimela tachiri nochámili ko bilé Esukristo nocháililachi nóchame*

<sup>1</sup> Neka Esukristote nulérigime ju. Neka etégingpá Esusi ramué nuleme. 'Émika chojkile Onorúgame oyeria napu'lige 'la bijchígile 'emi napu ne benírie. <sup>2</sup> Rekó jaré ralámuli 'natie ne tabilé Esukristote nulérigime ko, nobi 'émika 'wéchigo 'la bijchígilikó napugiti



'émika Onorúgame oyérame kame, lige alekeri 'we 'la ma'chiná néré 'la Esukrístote nulelime ko ne.

<sup>3</sup> Neka regá anéguru alué ralámuli napu 'we cha anime ju ne'chí olagá: <sup>4</sup> ¿Tacha 'la ikiaré napurigá Bernabé 'lige ne go'ame taa? <sup>5</sup> Lige aminami, ¿tacha 'la ikiaré napurigá ramué 'la rewiboa umugí 'la Onorúgame oyérame napurigá ramué si e'yénamala a'chigóriga napurigá 'sime ju alué Pegro 'lige alué uché jaré Esukrístote nulelime, 'lige a'chigóriga napurigá nokame ju suwábaga alué Wa'lula Esusi bonila? <sup>6</sup> ¿Pecha ramuecho nocháwili júkó Bernabé 'lige ne go'ame meka? <sup>7</sup> ¿Chieri sontalo nóchame ju bo'nepi najtétiga go'ame? Bilé ralámuli echisá i'wili, ¿tacha go'yame ju alué i'wili rakala? 'Lige bilé ralámuli napu tebume ju bo'né bukula chibá, ¿tacha bajime ju rechí chibá sunasa? <sup>8</sup> Yeka tabilé ne nila 'nátili ju. Alarigá aní Moisesi nila nulalí. <sup>9</sup> Aka regá anime osilí osálipeché Moisesi: «Tabilé bulewa roló chu'ala napu'lige nochalia ri'ligó olá, iligá 'la eliwá napurigá go'mela a'tabemi.» Onorúgameka tabilé regá ra'íchiga anile pecha rolocho na'temaka anile ko. <sup>10</sup> Onorúgameka pe ramué na'temaka anile. ¿Ta'lá bijchiá ju? Abiena napu'lige bilé rió asará, 'lige napu'lige bilé rió ri'ligó wejpichá, 'we a'lá machime ju a'kinana rawé go'meo. <sup>11</sup> Pe a'chigóriga niru ramué. Alué napu ramué beníruga e'yéniru, alueka ju napurigá ri'ligó echiamé. 'Liko tacha 'la ikiaré napurigá 'emi nejmála a'tabemi go'ame. <sup>12</sup> Uché jaré ralámuli 'la ikiaré go'ame narea, ramueka abéchigo 'la ikiaréliwa go'ame narea.

'Liko ramué abiena ikiaré napurigá narépuá alué tábiri. Ramueka tajsinéchigo tálime júkó bilé tábiri. Tabilé najkiá napurigá ralámuli na'támala ramué 'we meme nírigo, 'lige aminami tabilé najkiá napurigá na'támala ralámuli ramué pe Onorúgame ra'ichálila ruigá meme nírigo. Neka pe iligá najki napurigá ralámuli pe Kristo ra'ichálilachi na'támala. <sup>13</sup> Ralámuli alué napu nóchame ju wa'lú re'obachi pachá 'we go'yame ká'é ralámuli a'pálala go'ame alué Onorúgame kógilime. 'Lige abiena alué ralámuli napu nóchame ju alé wa'lú re'obachi ma'chige mesa repuka 'we go'yame ká'é go'ame napu ekí go'ame jáwame ju ralámuli Onorúgame kógimia. 'Emi 'we a'lá machíguru alué alarigá ko. <sup>14</sup> Aka abiena nuláché Onorúgame napurigá alué ralámuli napu benírame ju Onorúgame nila ra'íchali narémili ko go'ame ralámuli a'pálila alué napu gepume ju Onorúgame nila ra'íchali. <sup>15</sup> Neka pecha 'wesi tábiri táame júkó. Neka pecha oségó 'emi napurigá 'emi bilé tábiri nejmála. Neka mukusá nili

e'lowika tabilé tábiri tániga 'emi. Neka abé ganílame ju beníruga tabilé tábiri taga.

<sup>16</sup> Neka tabilé riólame ju napu'lige Onorúgame ra'ichálila ruyea ralámuli. Pe ne nochálila ju. Ne tabilé benírasaká ye ra'íchali 'liko Onorúgame ne'chí gastigárimala. <sup>17</sup> Ne bo'né na'tásaká ye ra'íchali benírímia ralámuli, 'liko 'we 'la nímili nílekuru napurigá ralámuli najtétamala ne'chí. Nobi pe Onorúgame 'sile ko nulá napurigá ne benírimala ye ra'íchali, 'liko ne pe 'la sébali oláguru napu nulá alué. <sup>18</sup> 'Liko ¿chonigá tabilé goblálome júpaché ne Onorúgame ra'ichálila beníruga? ¿Tachiri narémalaché ne? Neka 'we ganílame ju ralámuli beníruga. Neka tabilé najki napurigá ralámuli najtétamala ne'chí. Pe alarigá 'la ju.

<sup>19</sup> Rekó tabilé 'wesi nulé ne'chí, neka pe pioni neraga eyéname ju ralámuli gu'iriga. Alarigá gu'irame ju ne we'ká ralámuli napurigá 'la bijchígimala Kristo nila ra'íchali. <sup>20</sup> Napu'lige ne eyena alué jurío epperélachi, neka napurigá jurío neraga eyéname ju. Neka gu'iríniliga 'siame napurigá 'we 'la bijchígimala Kristo nila ra'íchali alué ralámuli. Alekeri 'we 'la sébali olame ju ne napu nulá Moisesi nila nulalí tabilé che anigá. <sup>21</sup> Napu'lige eyena ne alemi napu epperé alué ralámuli napu tabilé jurío ju, neka oyame ju napurigá alué ralámuli napu tabilé jurío ju, neka gu'iríniliga 'siame napurigá 'we 'la bijchígimala Kristo nila ra'íchali alué ralámuli. Nobi neka tabiléchigo a'reme júkó Onorúgame nila nulalí napugiti neka Krístote nulalime kame. <sup>22</sup> Napu'lige ne ajtigá alué ralámuli epperélachi napu pe kulí 'la oyérame ju Onorúgame, néchigó a'chigóriga oyame ju napurigá alué ralámuli napugiti neka pe gu'iríniliga 'siame alué ralámuli napurigá Kristo a'walí 'yámala alué ralámuli. 'Lige aminami neka 'we 'la 'nátaga eteme ju churigá 'nátame ko a'pilipi ralámuli. <sup>23</sup> Neka alarigá 'sime ju napugiti neka 'we ganíliga benírame kame Onorúgame nila ra'íchali, 'lige ne alarigá 'sisa 'la narémala ne semati raweli.

<sup>24</sup> Aka ne bilé tétili ruyémala 'emi napurigá 'emi 'we 'la námamala. Aka bilé roibí nerúgichi alé Gresia anilichí, aka we'ká ralámuli júmame júpaché roweka, nobi pe bi'lepi meme júpaché. Aka a'chigóriga júpaché Kristo oyéilia napurigá bilé roibí. 'Liko 'we júmpua 'la sébali olamia napu Onorúgame najki. <sup>25</sup> Napuyépiri rió napu rowémili ju, 'we a'lá 'nátame ju be'bé neraga ta'chó pasichi roibí. Alué rioka alarigá 'sime júkuru ménilia bilé gorona aurélite newárigime, alué tabilé we'ká rawé anáchame. Ramueka nochálime niru Onorúgame nochálilachi méniliga alué tábiri

napu senibí anáchame ju.\*<sup>26</sup> Napu'lige ne newá alué nóchali napu Kristo 'yaa ne'chí, neka tabilé nóchame ju napurigá bilé rió roweme alué napu tabilé 'nátame ju mélime.<sup>27</sup> Neka 'we 'la 'nátame ju alué napu ne beniri, 'lige 'we 'la sébali olame ju ne alué napu ne beniri. Neka tabilé najkiame napurigá Onorúgame animela tabilé naremio ne semati raweli pecha sébali oláligime ne napu ne nulá napurigá sébali olámala uché jaré ralámuli.

## 10

*Jena ruwimela 'we 'la e'w'lime ko alué 'we 'la bijchiá Onorúgame 'lige aminami 'we 'la ra'ichátime ko alué olagá*

<sup>1</sup> 'Emi Kristo oyérame napurigá ne, 'we 'la na'táwaká 'emi, alué 'emi rijimela 'we 'ya mochígame\* napu'lige júmasa alé Ejipto mochiga, nolí bajchabemi enale napu e'yénale alué ralámuli, 'lige suwábaga alué ralámuli simárale alé wa'lú ba'wí iligichi napu Ba'wí Sejtákame anilichi ju.<sup>2</sup> Alekeri 'we a'lá machirú alueka 'la Moisesi oyérame niligo, napugití alué Moisésika wa'lula niligame alué ralámuli nuleme.<sup>3</sup> Suwábaga alué ralámuli go'ale alué go'ame napu Onorúgame 'yale.<sup>4</sup> 'Lige abiena bajile alué ba'wí napu Onorúgame 'yale napu ma'chínale bilena wa'lú rejtechi. Alué rejteka pe Kristo nile napu alué ralámuli 'yuga oyame nilige.<sup>5</sup> Amulí suwábaga alué ralámuli tabilé e'wale napu nulale Onorúgame. Alekeri Onorúgameka tabilé ganiliga asale alué ralámuli 'yuga. Onorúgameka me'ale alué ralámuli alé jami tabilé ba'égichi.

<sup>6</sup> Suwábaga ye pe tétali ju ramué 'yuga napurigá ramué tabilé korúpua chibi nokiantí napurigá nokale alué ralámuli.<sup>7</sup> Alekeri 'emi tabilé tániwa nejkúruli alué mono napu ralámuli 'we 'la niraga etele napurigá Onorúgame neraga napurigá nokale alué ralámuli 'we 'ya mochígame. Aka Onorúgame nila ra'ichali regá aníché: «Ralámulika pe'wé go'yá mochile 'lige aminami bajía mochile 'lige aminami yawile alé o'wemi rawega jaga napu ilile alué besero 'órote newárigime.»†<sup>8</sup> 'Lige aminami tabilé 'yuga gojchiame júkuru bilé mukí tabilé bo'né 'yula. Alarigá nokale jaré alué ralámuli, alekeri suwile bilé liá aminá bakía milí ralámuli bilé rawé kachi.<sup>9</sup> Tabilé chibi nokiboa pe machináliga chiéniko gastigárimio Onorúgame. Jaré alué ralámuli alarigá nokale, alekeri Onorúgameka sinowí júlale napurigá alué ralámuli suwimela sinowite u'chúsiga.<sup>10</sup> Tabilé che aniboa

Onorúgame tabilé 'la sébali olame ko napu sébali olámorile. Jaré ralámuli alarigá nokale, 'lige alekeri Onorúgame júlale bilé santo ánjeli ralámuli me'ame. Alué 'sile alué ralámuli me'á.

<sup>11</sup> Napu ikile alué ralámuli 'ya ejperégame, alueka pe tétali nile ramué 'yuga. 'Lige alekeri osáliku alé apélichí napurigá ramué 'la machiboa napu jipe rawé ejperégame niru, napurigá machiboa alieti tábiri tabilé newati ko. 'Ma pe u'kabi bamí rokaré gawí suwibamia.<sup>12</sup> Alué napu 'nátame ju 'ma tabilé che nokimeo, i'we 'la 'nátaga tase guwana rujsúpua!<sup>13</sup> Aka suwábaga ralámuli i'sinimi cha nokinálime ká'é, nobi Onorúgameka 'wéchigo 'la gu'rame júkó napurigá tabilé cha nokimela. 'Lige alekeri 'we 'la bijchígilime ju Onorúgame 'we 'la ne-jkúrime ko.

<sup>14</sup> 'Emi napu ne 'we galegá eté, tase tániwa iwérali alué mono napu tabilé Onorúgame ju.<sup>15</sup> 'Emi ralámuli asíriga 'la 'nátame júkuru, alekeri 'we a'lá námaka gepuwa alué napu ne ruimeli ju machináliga pala bijchiá ko o tabilé.<sup>16</sup> Napu'lige bajjilia alué i'wilí ba'wila, bajchá cheliera i'lime júkuru Onorúgame nélegá Esusi mukúligo bilena gulusichi ramué nila gastigo o'togá, 'lige aminami go'ame júturu baní nélagá churigá mukúligo Esusi 'lige churigá ku ajánaligo. Yeka pe aniamé kéré ramuéchigó ku ajániwili ko.<sup>17</sup> Rekó asíriga we'ká nírige ramué, pe abaleké baní go'yame niru. Yeka ruyame kéré ramué pe bi'lepi 'nátali 'nátame nírigó napu 'nátame ju Kristo.

<sup>18</sup> Aka 'la na'táwabala alué ralámuli alé Israeli ejperégame, aka sa'pá go'yame júché Onorúgame kógilime alé mésachi ajchárigame. Alueka pe aniamé kéré alué ralámuli pe bi'lepi 'nátali 'nátame ko Onorúgame 'yuga.<sup>19</sup> ¿'La námilia 'emi napu ne ruwí jipe? Alué mono napu kógilime ju, ¿alawégame ju? 'Lige ¿'la bijchiá 'la Onorúgame ju? ¿'We najtégame ju alué go'ame napu kógilime ju alué mono? <sup>20</sup> Tabilé. Alué mónoka tabilé alawégame ju. Alué ralámuli napu kógime ju alué mono, pe remónisi u'kuchípala kógime kéré alué go'ame, tase Onorúgame. Neka tabilé najkí napurigá 'emi aleké u'kuchípala remónisi gompañerola nímalá.<sup>21</sup> 'Emika tabilé bajjilili júkuru alué i'wilí ba'wila napu bajjilime ju Esukristo nélagá 'emi bajime nísaká i'wilí ba'wila napu remónisi u'kuchípala kógilime ju. 'Lige aminami pecha go'meli júkó 'emi alué baní napu go'yame ju Esukristo nélagá 'emi go'yame nísaká alué baní napu remónisi u'kuchípala kógilime ju.

<sup>22</sup> ¿'Emika najkiá napurigá ayómala

\* 9:25 Ralámulika tabilé roweme ju bilé gorona méniliga. Alueka pe meme ju chiní, 'lige ba'nasoli. 'Lige aminami tabilé 'nátame ju churigá memia alué roibi. † 10:1 E'nesi glosario «ancestor». † 10:7 E'nesi Éxodo 32:6.

Onorúgame? Ramueka pecha a'wágame niru napurigá Onorúgame.

*Jena ruwimela 'we 'la gu'írlimi ko uché jaré ralámuli*

<sup>23</sup> Jaré 'emi regá anime ju: «Neka abichibi símala napu ne bo'né najkí.» Alá ju nobi jaré nóchali tabilé 'la júkó 'lige aminami tabilé nejkúrimé ju napurigá oyérawa Esukristo. <sup>24</sup> Iligá na'tawa uché jaré ralámuli gu'írlinti, tase pe bo'nepi gu'írlininti 'nata asiboa.

<sup>25</sup> Suwábaga go'ame go'poa 'emi napu ralinélime ju. Tase rukuboa tala 'la mono kógirime ko o tabilé. 'Lige alarigá 'la tabilé we'ká 'nata asimela alué go'ame go'sá. <sup>26</sup> Aka, «Onorúgame nila júpaché suwábaga ye gawí 'lige suwábaga tábiri napu nerú jena.»<sup>†</sup>

<sup>27</sup> Jaré ralámuli tabilé Onorúgame oyérame repárisa go'ame go'áachi, 'lige mué simisá go'ame go'mea alué ralámuli 'yuga, 'we a'lá júkuru go'aa go'ame napuyépiri go'ame. 'Lige aminami tabilé we'ká 'nátiga go'poa alué go'ame. <sup>28</sup> Bilé rió asisáká alé Onorúgame oyérame 'lige regá anésiga mué alué riote: «Ye sa'paka pe mono kógirime ju napu tabilé Onorúgame ju», 'liko mué níriga tase go'poa napurigá tabilé chélámala alué rió. <sup>29</sup> Mueka 'ma machíguru 'la ko napuyépiri go'ame go'aa, nobi iligá tabilé go'poa aleké go'ame napurigá tabilé chélámala alué rió napu pe kulí 'la oyérame ju Onorúgame.

¿Chonigá tabilé go'meli júpaché bilé go'ame pe bilé ralámuli na'tasa tabilé 'la ko? <sup>30</sup> Ne cheliera 'yásaká Onorúgame alué go'ame go'mea 'liko, ¿chonigá cha anilíbiché ne alué go'ame go'yachi? <sup>31</sup> Napuyépiri nóchali napu mué nóchame ju, go'ame go'gá 'lige aminami bajíga o uchéchigo bilé tábiriti nóchaga, Onorúgamecho 'nátiga nochálime júkuru 'lige go'yame júkuru 'lige bajílime júkuru napurigá ralámuli 'la nirámala Onorúgame. <sup>32</sup> Ramueka tabilé najkiá napurigá alué ralámuli jurío guwana rusúmala nibilé alué tabilé jurío, 'lige nibilé alué ralámuli napu Onorúgame oyérame ju. Alekeri 'la 'nátiga. <sup>33</sup> Neka najkí napurigá suwábaga ralámuli 'we ganíliga akimela ne benírachí Onorúgame nila ra'íchali. Neka tabilé beniri pe bo'nepi a'kabámana einániliga, neka pe uché jaré ralámuli gu'íriga 'smíguru napurigá 'la a'kabámana e'yénamala.

## 11

<sup>1</sup> A'chigóriga nokiboa napurigá 'sime ju ne. Neka a'chigóriga 'sime ju napurigá 'sime ju Kristo.

*Jena ruwimela bilé mukí Onorúgame 'yuga ra'ícha ilisá tabilé banito o'pólíga iligá tabilé 'la ko Onorúgame níriga*

<sup>2</sup> Neka 'we ganíliga ajtí 'emi 'yuga, 'emi 'wéchigo 'la nélegá mochígame ne'chí. 'Lige aminami 'we a'lá e'wame kame napu ne beniri 'emi. <sup>3</sup> Abiena najkí ne napurigá 'emi 'la námamala ye ra'íchali: Kristoka suwábaga ralámuli nuleme ju jena wijchimoba eperégame, 'lige bilé rioka nuleme ju bo'né 'yula mukí, 'lige Onorúgameka nuleme ju Kristo. <sup>4</sup> Bilé rió Onorúgame 'yuga ra'íchasa, o ruyá napu Onorúgame najkí tabilé go'yápaga iligá, 'liko alueka tabilé nirame kérélamala Wa'lula Kristo. <sup>5</sup> Bilé mukí Onorúgame 'yuga ra'ícha ilisá o ruyá napu Onorúgame najkí tabilé banito o'pólíga, 'liko alueka tabilé nirame kérélamala alué bo'né 'yula rió, pe a'chigóriga ju napurigá re'wániga ajchigá sijkarúgame gupala pe tabilé nirame kóriká bo'né 'yula. <sup>6</sup> Bilé mukí tabilé banito o'polánisa, 'liko sijkimeli ju gupala. 'La chijúnasaká gupá sijkigá, 'liko banito o'polámili ju.\* <sup>7</sup> Bilé rió pecha go'yáchiga ilimeli júkó pachá re'obachi, aka Onorúgameka wa'lula nulame neraga ajchálige'é rió napurigá nulame ju Onorúgame jena wijchimoba 'lige 'pa rewagachi, alekeri ramué 'we 'la nirálime niru Onorúgame, alekeri 'we 'la niráwili ju Onorúgame. Bilé mukika napurigá rió neraga newárigime ju, 'lige 'we 'la nirámili ju bo'né gunala. <sup>8</sup> Onorúgame tabilé bajchá newale mukí, iligá rió 'lina bajchá newale. Alué rió bujéliru bilé a'chigálila alué mukí newamia. <sup>9</sup> Nibilé alué rió newáleru napurigá gu'írame nímala alué mukí. Iligá alué mukí gu'írimili júkuru alué rió. <sup>10</sup> Alekeri alué mukí o'polámili ju bilé banito, alarigaka machiboa 'la nirame ko bo'né gunala 'lige abiena 'la nirame ko suwábaga alué santo ánjeli. <sup>11</sup> Ramué níriká napu Onorúgame oyérame niru, rioka resilá bilé mukí, 'lige mukika resilá bilé rió. <sup>12</sup> Bijchiá ju Onorúgame 'siligo mukí newá bilé a'chigálila bujesa alué rió napurigá alué rió si bejtega asimela. Abiena bijchiá ju suwábaga rió pe umugichi o'chérigame ko. Onorúgame 'sile suwábaga alarigá 'nata.

<sup>13</sup> 'We a'lá na'tawa 'emi a'bopi. ¿Ta'lá ko bilé mukí Onorúgame 'yuga ra'ícha tabilé banito o'pólíga iligá alé napu napuíme ju ralámuli Onorúgame oyérame? <sup>14</sup> Bilé rió i'weli gujpega einasa, tabilé 'la nímala. Tabilé sijkame nísaká gupala asíriga cháríkaréle. <sup>15</sup> Bilé mukí i'weli gupégame 'we a'lá ikíaréle. Aka Onorúgame 'nátale napurigá mukí i'weli gujpégame nímala.

<sup>†</sup> 10:26 E'nesi Salmos 24:1.

\* 11:6 Alé 'mi Korinto anilichi alarigá nokame nile ralámuli napu 'lige bilé mukí se'nú rió 'yuga gojchisá, 'liko re'wániga ajchigá sijkame nile gupá, alueka pe gastigáriga nokame nile alanoká.

16 Bilé rió tabilé nirásaká alarigá, 'liko ra'ichámili júkuru. Ramueka senibí beniriga e'yéname niru bilé mukí banito o'polámili ko napu'lige Onorúgame 'yuga ra'icha iligá o napu'lige ruyá iligá napu Onorúgame najkí. 'Lige aminami a'chigóriga benírame ju suwábaga alué uché jaré ralámuli napu benírame ju Onorúgame nila ra'ichali.

*Jena ruwimela jaré ralámuli tabilé 'la niraga go'yame ko alué go'ame napu go'yame ju Kristo nélagá*

17 Neka 'we osénilituru ye ra'ichali 'emi ne'óchaga. Jaré ruyá aníguru pe 'we bochi anime ko 'emi napu'lige napuísá. Pe tabilé niraga járome kará 'emi a'bopi. 18 Suwábaga ralámuli ruyá aní napu'lige 'emi napuísá tabilé ganiliga járome kará 'emi a'bopi, 'lige aminacho 'ma tabilé bi'lepi 'nátali 'nátame kará 'emi. Jaré ra'ichali bijchiá kérépukué. 19 Nobi suwábaga yeti ikimeli ju napurigá machiboa chieri ralámuli 'la bijchiá Kristo oyérame ko. 20 Napu'lige 'emi napuísá go'ame go'mea Kristo nélagá, tabilé niraga go'yame kará 'emi. 21 Aminami ruyá aní jaré 'emi napu'lige napuísá, jaré 'emi 'we sapuka go'yame kará alué go'ame napu 'emi a'pale pe tabilé buigá uché jaré ralámuli, 'lige jaré pe e'luíka ejtebime kará, 'lige jaré pe etégame kará bajiga. 22 ¿Tabilé galégame niru 'emi napurigá go'mela 'emi 'lige napurigá bajímala? ¿Chonigá tabilé nirame nírukó 'emi napu'lige napuísá alué ralámuli Onorúgame oyérame? 'Lige aminami, ¿chonigá gawéliga eteme níruko 'emi alué ralámuli napu tabilé nígame ju? ¿Choneme ne 'emi? Neka pecha animeli go 'we a'ká ralámuli ko 'emi.

*Jena ruwimela churigá nokiamé ko napu'lige go'yá go'ame napurigá nulálige Esusi*

23 Neka uchéchigo siné ruwimela napu benírale Wa'lula Esusi churigá go'ame ko alué go'ame napu go'yame ju Esusi nélagá. Aba'lige rukó napu'lige Jurasí nejile alué Esusi, 'lige Esúsika 'wile alué baní, 24 'lige 'ma cheliera 'yasa Onorúgame, nasípasi chí'wánale regá anigá: «Yeka ne sa'pala ju napu me'liboli ju 'emi gu'iriga. A'kinánami a'chigóriga nokiboa ne'chí nélagá.» 25 'Lige aminami pe'tá i'libeko 'wile bilé baso i'wilí ba'wila rekútame ro'agá 'lige regá anile: «Ye i'wilí ba'wílaka ne elalá ju. Yeka ruyame kéré ne mukumeli ko 'emi gu'iriga. A'kinana a'chigóriga nokiboa ne'chí nélagá.» 26 Napu ikisá go'yá 'emi ye baní 'lige napu ikisá bajía ye i'wilí ba'wila, 'émika ruká nokáguru Wa'lula Esusi mukúligo ramué gu'iriga. Abisibí alanokiboa napusí uchéchigo nawachi Esusi.

*Jena ruwimela bajchá ta'chó go'yá alué go'ame 'we 'la na'tálime ko tachiri cha nokáligo 'emi abé i'bé*

27 Alekeri bilé ralámuli 'we cha 'sime nisa alué baní go'sá 'lige alué i'wilí ba'wila bajisa, alueka tabilé nirame kérélamala Wa'lula Esusi mukúligo ramué gu'iriga. 28 Bijí ta'chó go'yá alué baní 'lige ta'chó bajía i'wilí ba'wila, 'we 'la na'támili júkuru 'emi tachiri cha nokáligo 'emi 'yabeko. 29 Bilé ralámuli tabilé nirame Wa'lula Esusi go'sá alué baní 'lige bajisa alué i'wilí ba'wila, 'liko alué ralámuli gastigáriwili ju Onorúgame. 30 Alekeri jaré 'emi 'we resíriga mochí nayua, 'lige jaré 'ma suwile. 31 'La 'we a'lá na'tásiká bajchá ta'chó go'yá alué baní 'lige ta'chó bajía i'wilí ba'wila 'liko Onorúgame pecha gastigárimili go. 32 Napu'lige Onorúgame gastigaria ramué, alueka gastigari ramué napurigá ramué ku guwana na'tawa 'lige aminami napurigá tabilé gastigáriwa ramué alué ralámuli 'yuga napu tabilé Onorúgame oyérame ju, napu'lige ku nawachi Wa'lula Esusi gastigárimia suwábaga ralámuli cha nokame.

33 Alekeri 'emi Kristo oyérame napurigá ne, napu'lige napuísiga go'ame go'mea, go'poa go'ame napu'lige suwábaga ralámuli napuísá. 34 Bilé ralámuli e'luísaká, abé 'la ju bo'né bejtélachi go'yá, napurigá tabilé gastigáriwa Onorúgame napu'lige go'ame go'yachi uché jaré ralámuli 'yuga.

Uché jaré ra'ichali napu 'emi ruké ne'chí, alueka ruimé ne alemi simisá ne 'emi kólimia.

## 12

*Jena ruwimela churigá nejkúrímili ko a'píli alué ralámuli napu 'yá'li ru nejkúrili Onorúgame Alawálate*

1 'Emi Onorúgame oyérame napurigá ne, neka najkí napurigá 'emi machimela churigá ko alué nejkúrili napu nejime ju Onorúgame Alawala.

2 Napu'lige 'emi tabilé 'cho oyérame ka Kristo, 'émika nejkúrili tanime nile alué mono napu tabilé ra'ichame ju. 3 Alekeri neka najkíguru napurigá 'emi 'we 'la námamala. Aka bilé ralámuli napu gu'irilime ju Onorúgame Alawálate, alueka pecha che anigá ra'ichámalagó Esusi olagá. Suwábaga alué ralámuli napu gu'irilime ju Onorúgame Alawálate, alueka 'we 'la machine ju Esusi ko Wa'lula.

4 Alué ralámuli napu Onorúgame oyérame ju se'unáriga gu'irilime ju napurigá gu'irame níkala uché jaré ralámuli, nobi suwábaga alué nejkúrili pe Onorúgame Alawala nila ju. 5 Ralámuli Onorúgame oyérame se'unáriga nakúrame ju a'bopi, nobi pe abaleké Wa'lula Esusi 'sime ju gu'iria. 6 Alué ralámuli napu gu'irilime ju Onorúgame Alawálate, a'pílipi

alué ralámuli se'unátiri 'nátali 'yalime ju, nobi pe abaleké Onorúgame 'sime ju gu'iria. <sup>7</sup> Onorúgame Alawala se'unáriga gu'irame ju a'pilipi ralámuli Onorúgame oyérame, napurigá alué ralámuli 'la gu'irame nímala uché jaré ralámuli Onorúgame oyérame. <sup>8</sup> Onorúgame Alawala gu'irame ju ralámuli napurigá jaré ralámuli 'we 'la benigá ruyeme nímala rejcholi uché jaré ralámuli 'lige napurigá jaré ralámuli 'we 'la benime nímala Onorúgame nila ra'ichali. Nobi pe Onorúgame Alawala 'sime júkó gu'iria. <sup>9</sup> Jaré ralámuli gu'irilime ju napurigá 'we 'la bijchígame nímala Onorúgame 'we 'la sébali olame ko. 'Lige jaré ralámuli gu'irilime ju napurigá 'we 'la sa'wame nímala nayume. <sup>10</sup> Jaré ralámuli gu'irilime ju Onorúgame Alawálate napurigá 'yome nímala alué tabilé ma'chílime ralámuli 'lige aminami napurigá ajáname nímala suwígame.\* 'Lige jaré ralámuli gu'irilime ju napurigá ra'ichame nímala napu Onorúgame najkí. 'Lige jaré ralámuli gu'irilime ju napurigá 'la machimela Onorúgame Alawala 'lige aminami 'la machimela alué tabilé a'lá alawá. 'Lige jaré ralámuli 'la gu'irilime ju napurigá ra'ichame nímala se'unáriga napu tabilé námame ju a'boi, 'lige jaré ralámuli gu'irilime ju napurigá 'la námamala napu 'lige ra'ichachi ralámuli se'unáriga ra'ichame. <sup>11</sup> Nobi péchigo Onorúgame Alawala 'sime ju suwábaga ye nejkúrali 'ya ralámuli, 'lige alué 'la machí churigá gu'irimio a'pilipi ralámuli.

<sup>12</sup> Aka ramueka sekégame niru, 'lige ronégame, 'lige mo'égame. <sup>13</sup> Aka Esukristo oyéramechigó 'we'kaná chojkégame ká'é. Jaré jurío ju 'lige jaré tabilé jurío ju. 'Lige jaré griego ra'ichame ju 'lige jaré se'unáriga ra'ichame ju. 'Lige jaré ralurúgame ju 'lige jaré tabilé, pe nóchame ju. Nobi suwábaga pe bi'lepi alawégame niru ko, pe Onorúgame Alawala. <sup>14</sup> Ramueka pecha mo'ochu niru ko. Abiena sekégame niru 'lige ronégame. Tabilé suwábaga ralámuli jurío ju 'lige aminami tabilé suwábaga ralámuli ralurúgame ju. <sup>15</sup> Aka mo'oka pecha 'nátame júkó abé najtékame ko me'tigá ronó. 'Lige aminami mo'oka tabilé anime ká'é: «Neka tabilé seká ju, alekeri tabilé najtékame ju ne, iligá abé 'la júleké ne'chí rejpunalia.» <sup>16</sup> Aka bilé najká pecha sulagoma júkó, nobi 'wéchigo najtékame júkó alué najká. <sup>17</sup> Tabilé najkégame níriká, pe buségamecho níriká, 'liko ¿churigá akibóché? Tabilé ajkégame níriká, 'liko ¿churigá júluwapaché?

<sup>18</sup> Aka Onorúgame newáligé'le ramué najkégame, buségame, ronégame, ajkabógame, chu'égame, mo'égame napurigá bo'né 'la nirale. <sup>19</sup> Tabilé ronégame nísiga ramué, nibilé sekégame nibilé mo'égame, ¿chieti

níwapué ramué? Buségame nísiga 'lige tabilé najkégame nísiga, o pe akégame nísiga 'lige tabilé ronégame nísiga, ¿chieti níwapué ramué? <sup>20</sup> Aka najkaka 'we najtékame júpaché 'lige busí 'lige ajkabó 'lige ronó. <sup>21</sup> Aka busika pecha abé najtékame júkó me'tigá seká. Aka mo'oka pecha abé najtékame júkó me'tigá ronó. Aka mo'oka peka regá anime ká'é: «Neka tabilé resilá alué ronó.» <sup>22</sup> Jarénami o'póluga e'yénilime niru. Ta'mé 'we najtékame karé nobi 'wéchigo najtékame kéréko. <sup>23</sup> Abéchigo 'la repúlime niru me'tigá alué uché jarénami. <sup>24</sup> Jarénami napu ju sekachimi, mo'chimi, tabiléchigo alarigá repúlime júkó, peka napurigá muyachí 'lige chojkóbachimi. Alarigá newale Onorúgame. <sup>25</sup> Alarigá nírukuru ramué Onorúgame oyérame. A'nagupi repúlime nírukuru ramué. Jaré tabilé e'wélala kérékuru, ta'mé najtékame karé. Abirigáchigo 'la repúligo. <sup>26</sup> Bilé Onorúgame oyérame 'we resí nilasa, ramuéchigó o'maka resí nilia mochiru. 'Lige 'we 'la semáriga ra'ichasa uché jaré ralámuli 'emi olagá, 'liko 'we 'la ganíliga mochiru ramuéchigó. <sup>27</sup> A'pilipi ralámuli Onorúgame oyérame 'we najtékame ju, 'lige Onorúgame 'yale alué 'nátali napurigá uché jaré ralámuli gu'iriga járomala. <sup>28</sup> Jaréchigo 'yárigame ju nejkúrali napurigá nulame nímala Esukristo nocháililachi. 'Lige jaréchigo 'yárigame ju nejkúrali napurigá 'we 'la ruyémala uché jaré ralámuli napu Onorúgame najkí jipe. 'Lige uché jareka benírimili júkuru Onorúgame nila ra'ichali. Jaréchigo 'yárigame ju nejkúrali napurigá 'yome nímala alué ralámuli tabilé ma'chilime 'lige napurigá ku ajánamala suwígame. Jaréchigo ralámuli alarigá 'yárigame ju nejkúrali napurigá nayúkame e'néniga járomala 'lige jaré ralámuli 'we resititirichigó 'lige tabilé nígame go'ame. Jaréchigo 'yárigame ju nejkúrali napurigá oilárimala uché jaré ralámuli napurigá nochámala. Jaréchigo 'yárigame ju nejkúrali napurigá ra'ichámala se'unátiri ra'ichali napu tabilé námame niru ramué. <sup>29</sup> ¿Suwábaga 'emi nulame niru Esukristo nocháililachi? Tabilé. ¿Suwábaga ruyame ju 'emi napu Onorúgame najkí? Tabilé. ¿Suwábaga 'emi benírame ju? Tabilé. ¿O'maka ajáname ju 'emi suwígame? Tabilé. <sup>30</sup> ¿O'maka 'emi 'yome niru? Tabilé. ¿Suwábaga 'emi 'la ra'ichame niru alué napu tabilé námutame ju? Tabilé. ¿Suwábaga 'emi 'la námame niru alué ralámuli ra'ichachi tabilé námutame ra'ichali? Tabilé. <sup>31</sup> Abirigáchigo 'la tániwagó Onorúgame alué 'nátali napu abé 'la gu'irame ju uché jaré ralámuli.

Neka jena beníramala pe u'kabi ra'ichali napu abéchigo najtékame ju.

\* 12:10 E'nesi glosario «milagro».

### 13

*Jena ruwimela 'we 'la niraga etélime ko uché jaré ralámuli*

<sup>1</sup> Rekó ne suwábaga e'karúgame ra'íchali ra'íchame ke ne napu ra'íchame ju ralámuli jena wijchimboba epperégame 'lige aminami napu ra'íchame ju santo ánjeli nobi neka tabilé galegá etégó uché jaré ralámuli, neka pe napurigá bilé gapiní napu tabilé 'la anime ju, alarigá ju ne. <sup>2</sup> 'Lige rekó ne 'we 'la machime ke tachiri chukumeli ko abé i'libékomi 'lige 'la námame nísaká ne napu Onorúgame 'nata ajtí, 'lige ne 'we 'la bijchígime nísaká Onorúgame 'we 'la sébali olame ko, 'liko ne 'la umubámili ke alué rabó se'wí elá pe 'nátage, ne tabilé galegá eteme nísaká uché jaré ralámuli, pe rioksi nímili ke 'liko. <sup>3</sup> 'Lige rekó ne suwábaga kogie alué ralámuli napu tabilé nígame ju, pe rioksi nímala ke tabilé galegá eteme nísaká ne alué ralámuli. Rekó ne me'lisuga Onorúgame nila ra'íchali ruyame kóriká, pe rioksi nímala ke, ne tabilé galegá eteme nísaká uché jaré ralámuli.

<sup>4</sup> Alué ralámuli napu 'la galegá eteme ju uché jaré ralámuli, alueka anáchame ju rekó chibi anilie, 'lige senibí gu'írame ju uché jaré ralámuli. Alueka tabilé enuélame ju 'lige aminami tabilé riólame ju. <sup>5</sup> Alueka tabilé che anigá ra'íchame ju uché jaré ralámuli olagá. Alueka 'we 'la kóniga go'yame ju napu nígame ju a'boi. 'Lige aminami tabilé ayome ju pe'tá se'winá anésiga uché bilé ralámulite. 'Lige aminami tabilé senibí 'nata ajtime ju napu chibi olálige 'yabeko. <sup>6</sup> Tabilé galegá eteme ju alué cha nokame ralámuli iligá 'we galegá eteme ju alué ralámuli napu 'we 'la ra'íchali ra'íchame ju tabilé 'yégalí. <sup>7</sup> Alué ralámuli napu galegá eteme ju uché jaré ralámuli, alueka tabilé guwana rujsame ju, 'lige senibí 'we 'la bijchígime ju 'la a'remio cha'sika eyena. Alueka 'la anáchame ju rekó chibi ikíe.

<sup>8</sup> Alué ralámuli napu galegá eteme ju uché jaré ralámuli, alueka senibí galegá etémili ju uché jaré ralámuli. Bilé rawé sebámala napu ta'wesi ralámuli ruwimela chukimeli ko abé i'libékomi 'lige aminami tabilé ra'íchámala ralámuli se'unátiri ra'íchali napu tabilé námutame ju, 'lige aminami 'ma pecha resilámalagó alué ralámulika, 'ma 'la machigá mochímempá Onorúgame na'tálila. <sup>9</sup> Jipe tabilé 'la machirú suwábaga napu Onorúgame najkí, 'lige aminami tabilé 'me ejobénigame niru Onorúgame nila ra'íchali beniria. <sup>10</sup> Napu'lige ramué námasisa suwábaga napu tabilé námame nírige ramué, 'ma tabilé resi lawa aminabi beniamé alué ra'íchali.

<sup>11</sup> Ne u'tá ka, u'tá neraga 'nátame kéturu ne. Wa'lú kaka, 'ma tabilé 'nata ne u'tá

neraga. <sup>12</sup> Jípeko ta'mé machiamé niru Onorúgame nobi 'la námasisá suwábaga napu tabilé námame niru, a'lige kulí 'la machiboa churigá ko Onorúgame, napurigá Onorúgame machime ju ramué.

<sup>13</sup> Bakiá 'nátali nerú napu tajsiné suwíbame ju. Bilé 'nátali ju ye: 'We 'la bijchígilime ko Onorúgame 'we 'la sébali olamio. 'Lige uché bilé 'nátali ka ye ju: Abisibi buigá mochílime ko napusi Onorúgame 'la sébali olá napu sébali olámorílige. 'Lige abé nujubá 'nátalika ye ju: galegá etélime ko uché jaré ralámuli. Nobi abéchigo najtégame júkó alué 'nátali galegá etélime ralámuli.

### 14

*Jena ruwimela chieri nekúrali ko abé najtégame napu nejile Onorúgame Alawala*

<sup>1</sup> 'We 'la nisa 'la kápá 'emi 'we 'la galegá etesa uché jaré ralámuli, 'lige aminami 'we 'la tánisa 'la kápá gu'írili Onorúgame Alawala napurigá gu'írimala napurigá ruyeme nímala 'emi uché jaré ralámuli napu Onorúgame najkí. <sup>2</sup> 'Emi gu'írísiká Onorúgame Alawálate napurigá 'emi ra'íchámala se'unátiri ra'íchali napu 'emi tabilé ra'íchame ju, pe Onorúgame 'yuga ra'íchame kérélamala 'emi, tase ralámuli 'yuga, napugiti alué ralámulika pecha námamempá napu 'emi ra'icha. 'Émika pe Onorúgame Alawálate ra'íchámala nobi alué napu 'emi ra'icha ta'wesi ralámuli machimela. <sup>3</sup> Alué napu ruyame ju napu Onorúgame najkí, alueka benírame ju napurigá uché jaré ralámuli aminabi benimela Onorúgame nila ra'íchali. 'Lige alarigá 'la oilárame ju 'emi alué ralámuli napurigá 'we 'la ganíliga mochímala. <sup>4</sup> Alué ralámuli napu ra'íchame ju se'unátiri ra'íchali, alueka pe bo'nepi gu'írame ju, nobi alué napu benírame ju Onorúgame nila ra'íchali, alueka benírame ju napurigá aminabi benimela ralámuli Onorúgame oyérame.

<sup>5</sup> 'We 'la nisa 'la kápá napurigá suwábaga 'emi ralámuli se'unáriga ra'íchame nímala napu tabilé námutame ju. Nobi neka abé 'la nirá nili napurigá 'emi beníramala napu Onorúgame najkí. Abé najtégame ju benírilia napu Onorúgame najkí, me'tagá ra'íchalia se'unáriga. Bilé rió se'unáriga ra'ichasáká Onorúgame nila ra'íchali, a'lige asísá bilé rió 'la námame alué se'unátiri ra'íchali, alué ruimeli júkuru a'chigóriga napu anile alué se'unáriga ra'íchame napurigá ralámuli Onorúgame oyérame aminacho 'la benimela. <sup>6</sup> 'Emi Onorúgame oyérame napurigá ne, ne simísá 'emi kólimia 'lige ne benírisa Onorúgame nila ra'íchali se'unáriga ra'íchaga napu 'emi tabilé námame ju, ¿churigá nejkúramalawé? Ne ruisáká 'la suériga napu Onorúgame beniri ne'chí, 'lige aminami

ruisá ne napu machí ne, 'lige ruisá ne napu Onorúgame najkí, 'lige ne benírisa bilé tétali 'liko ne 'la ma'chígime beníguru, 'liko 'la nejkúrime nímala alué ra'íchali.

<sup>7</sup> Alué rabisílime napu ju alué baká buchilime, 'lige alué rabeli, tabilé ma'chígime rabisime nísaká, 'liko chieri ralámuli 'la machimélawé tachiri wiká rabisília alué baká bujchigá 'lige alué rabeli. <sup>8</sup> 'Lige bilena nakó nerúgichi, tabilé 'la buchesaká alué trompeta anilime, pecha 'wesi machimélagó nakó nerumio. <sup>9</sup> A'chigóriga ikime ju 'emi 'yuga, 'emi tabilé 'la ra'íchásaká napurigá 'la námapura, çhurigá machibóaché napu anía mochí 'emi? 'Émika pe 'oni ra'íchame kárélamala. <sup>10</sup> Jena wijchimoba we'ká e'karúgame se'unáriga ra'íchame ralámuli mochí. Nobi mochíko jaré ralámuli 'we 'la námame alué ra'íchali napu ra'íchame ju alué ralámuli se'unáriga ra'íchame. <sup>11</sup> Bilé ralámuli se'unáriga ra'íchame ra'ichasa ne 'yuga, pecha námamalogó ne napu aní alué ralámuli. Alué ralámulika na'támala pe nawágame ko ne. 'Lige néchigó pe abalarigá na'támala pe nawágame ko alué ralámuli, napugiti alué ralámuli pecha námamalogó napu ne aní. <sup>12</sup> Alekeri 'emi napu 'we najkime ju alué nejkúrili napu nejime ju Onorúgame Alawala, tániwa 'emi Onorúgame napurigá nejímala alué nejkúrili napu gu'írilime ju we'ká ralámuli.

<sup>13</sup> Alué ralámuli napu se'wináriga ra'íchame ju, 'we tánimili júkuru nejkúrili Onorúgame napurigá Onorúgame gu'írimala napurigá 'la námamala, 'lige napurigá 'la benegá beníramala uché jaré ralámuli. <sup>14</sup> Ne ra'íchásaká Onorúgame 'yuga se'wináriga ra'íchaga pe ne alawala 'sime ju Onorúgame 'yuga ra'icha napugiti neka pecha námempá napu ne aní. <sup>15</sup> Alarigá nísaká, 'lige çchu'símalaché ne? Ra'íchámili ju ne Onorúgame 'yuga ne bo'né alawálate, abiena ra'íchámili ju ne Onorúgame 'yuga 'we 'la námátume ra'íchilite. 'Lige aminami wikarámili ju ne Onorúgame wikala, ne bo'né alawálate, 'lige abiena wikarámili ju ne 'we 'la námátume wiká. <sup>16</sup> Mué wikarásaká Onorúgame wikala 'lige cheliera 'yasa mué Onorúgame se'winátiri ra'íchilite, 'liko ralámuli çhurigá cheliera 'yámalawé Onorúgame mué 'yuga pecha námame kame napu mué aní? <sup>17</sup> Alué ra'íchali napu mué ra'icha ilí Onorúgame 'yuga, 'we 'la semati kéréko, nobi pecha 'wesi ralámuli námagó, 'lige alué ralámulika pecha aminabi beniméligó Onorúgame nila ra'íchali. <sup>18</sup> Neka wa'lú cheliera 'ya Onorúgame napugiti nejkúriligime napurigá ne ra'íchámala se'unátiri ra'íchali me'tigá suwábaga apiépiri 'emi. <sup>19</sup> Napu'lige napuísá Onorúgame

oyérame Onorúgame nila ra'íchali benimea, abé alá ju pe u'kabi ra'íchali ra'ichalia 'la námátume, tase ra'ichalia we'ká ra'íchali tabilé námátume.

<sup>20</sup> 'Emi Onorúgame oyérame napurigá ne, tabilé 'nátame niwa napurigá 'nátame ju u'kuchítiri. Abé 'la ju na'talia napurigá 'nátame ju e'wele o'chérame Onorúgame oyérame, tase chibi nokianti. <sup>21</sup> Aka 'we 'ya osirúgime ra'íchali Onorúgame nila ra'íchali regá aníché: «Neka julámala alé napu 'emi eperé alué ralámuli tabilé námátame ra'íchame. Nobi rekó alieri ra'ichie alué ralámuli, 'émika tabilé e'wímalago ne'chí.» <sup>22</sup> Bilé ralámuli ra'ichasa se'unátiri ra'íchali, ralámuli tabilé Onorúgame oyérame akísá ra'íchachi alué ralámuli, regá na'támala: 'Nee alué ralámulika 'la chieti ra'ichanti ju, nobi çtachiri chonigá aníwé? Machinali nili ne chonigá anía alué ralámuli. Nobi bilé ralámuli Onorúgame oyérameka pecha a'chigóriga na'támili go napurigá 'nátale alué ralámuli tabilé Onorúgame oyérame. Alueka iligá najkimela 'we 'la benírilime napu Onorúgame najkí. <sup>23</sup> Mueka çchulasi nili? Suwábaga ralámuli Onorúgame oyérame napuísá Onorúgame nila ra'íchali benimea, 'lige 'emi chojkiasa ra'icha se'wináriga napu tabilé ra'íchame ju 'emi, a'ligirikáchi bajkísá bilé rió tabilé Onorúgame nyérame alé napu 'emi mochí Onorúgame nila ra'íchali beniá, alueka lámala 'emi 'ma lo'íriligo. <sup>24</sup> Suwábaga 'emi 'we 'la benírame nisa napu Onorúgame najkí, 'liko alué rió 'we 'la námamala, 'lige na'támala, 'we cha'sime rió ko, <sup>25</sup> napu'lige gepuga iligá, a'lige chojkiamala ruyá suwábaga napu cha'sile alué rió, 'liko chojkóbaka iligá 'we 'la niraga ra'ichámala Onorúgame olagá regá anigá: Bijchiá ju Onorúgame ajtí jena napu mochí 'emi.

*Jena ruwimela napu'lige napuísiga Onorúgame nila ra'íchali benimea, 'we 'la sébali oliame ko*

<sup>26</sup> 'Emi Onorúgame oyérame napurigá ne, napu'lige 'emi napuísá Onorúgame nila ra'íchali benimea, jaré 'emi wikarámili júkuru Onorúgame wikala, 'lige jaré benírímili júkuru, 'lige jaré ruimeli júkuru napu Onorúgame anele napurigá ruyémala ralámuli, 'lige jaré ra'íchámili júkuru se'winátiri ra'íchali, 'lige jaré ruyame nímili júkuru napu aní alué ralámuli se'wináriga ra'íchame, nobi suwábaga 'emi gu'írimili júkuru napurigá ralámuli aminabi benimela 'lige aminabi oyéramala Onorúgame. <sup>27</sup> Jaré ralámuli ra'ichasa se'unátiri ra'íchali, tase o'maka ra'íchámili júkuru, bajchá chojkiamili júkuru bilé 'lige uchéchigo bilé, 'lige bilé ralámuli ruimeli júkuru napu anía ajuí alué ralámuli, <sup>28</sup> tabilé 'wesi mochísaká tabilé

námame alué se'winátiri ra'ichali alé napu 'emi mochí napuika Onorúgame nila ra'ichali benia, 'liko alué ralámuli tabilé ra'ichámili júkuru o tase e'wele ra'ichámili júkuru alué ralámuli Onorúgame 'yuga. <sup>29</sup> Lige aminami jaré ralámuli mochisa napu ruyame ju napu Onorúgame najkí, tase o'maka ra'ichámili júkuru, bajchá chojkiámili júkuru bilé, 'lige uchéchigo bilé. 'Lige jaré 'we 'la 'nátage gepúmili júkuru ta'la 'la bijchiá Onorúgame nila ra'ichali ko o tabilé. <sup>30</sup> Nobi Onorúgame benírasaká bilé 'nátali bilé ralámuli napu ajtí alé gepua, 'liko alué ralámuli napu ra'icha ilí a'rémili júkuru ra'icha napurigá ra'ichámala alué ralámuli napu 'yáliru 'nátali Onorúgamete. <sup>31</sup> A'liko 'la suwábaga ralámuli napu nareme ju Onorúgame nila ra'ichali 'la ra'ichámala, 'lige alué ralámuli napu gepua mochí 'la benimela 'lige aminabi oilárimala Onorúgame oyeria. <sup>32</sup> Alué ralámuli napu ruwime ju napu Onorúgame najkí, alueka 'we 'la na'támili júkuru chiéniko ra'ichamio 'lige chiéniko a'remio ra'icha, <sup>33</sup> napugiti Onorúgameka pecha galeme kame napurigá o'maka ra'ichámala, iligá Onorúgameka galeme ju napurigá bilé ra'ichámala 'lige uchéchigo bilé.

Napurigá nokiamé niru ramué napu Onorúgame oyérame niru, <sup>34</sup> umugika tabilé ra'ichámili ju alé napu napuime ju Onorúgame nila ra'ichali beniméa, napugiti pecha lisensia nígame kame napurigá ra'ichámala. Aka Moisesi regá anime osádeché 'we 'ya: «Umugika kilí gepuga mochiga benimeli júkuru.» <sup>35</sup> Bilé ra'ichali machinálisaká, rukémili júkuru bo'né 'yula napu 'lige ku sebase a'boi epperélachi. Pecha 'la ikiaré ko napurigá umugi ra'ichámala alé napu napuime ju Onorúgame nila ra'ichali beniméa.

<sup>36</sup> 'Émika pecha bajchá naréleko Onorúgame nila ra'ichali, 'lige aminami pecha 'émicho naréleko Onorúgame nila ra'ichali. <sup>37</sup> Bilé ralámuli regá 'nátame nísaká: «Neka 'la Onorúgame nila ra'ichali ruyame ju o neka 'la e'wime ju suwábaga napu nulá Onorúgame Alawala», alueka 'we 'la machimeli júkuru ye napu ne osé 'emi Onorúgame nulalila ko. <sup>38</sup> Tabilé machisáká, Onorúgamechigó tabilé machigá etémala alué ralámuli.

<sup>39</sup> 'Emi Onorúgame oyérame napurigá ne, 'we 'la oyéraga ra'icháwaká napu Onorúgame najkí, 'lige tase sulíwaká napurigá ra'ichámala se'unátiri ra'ichali napu tabilé námame ju bo'né. <sup>40</sup> 'Lige suwábaga 'la suériga benírimili júkuru 'la niraga.

## 15

*Jena ruwimela Páulo ruwíligo Kristo ku*

### *ajániligo*

<sup>1</sup> 'Emi Onorúgame oyérame napurigá ne, neka najkí napurigá 'emi nélámala alué 'we 'la ra'ichali napu ne beniri 'emi, 'lige jípesi abiena 'la bijchigi 'emi alué 'we a'lala ra'ichali. <sup>2</sup> 'Emi abisibi 'we 'la bijchígisaká alué a'lala ra'ichali, 'liko 'emi 'we 'la semati raweli rewimela. Nobi 'emi bijchime nísaká uché jaré ra'ichali napu tabilé bijchiá ju, 'liko tabilé semati raweli rewimela.

<sup>3</sup> Neka benírituru 'emi alué ra'ichali napu ne bení, alué ra'ichali 'we 'ya nerúgame napu ruwime ju Kristo mukúligo chátiri 'nátali otwígá ramué nila. <sup>4</sup> 'Lige rekáliku bilena ewachi napu gatéwili nile suwígame, 'lige bakiá rawé kachi ku ajániligo. Alarígá anilige Onorúgame nila ra'ichali 'we 'ya osirúgime alarígá ikimea. <sup>5</sup> 'Lige yati neraga ma'chiná ilibaligo alemi napu ilile Sepasi (Pegro) anilime rió, 'lige aminami abé i'libeko yati neraga ma'chiná ilibaligo alemi napu mochile suwábaga alué makué bilé rió napu nóchame nile Esukristo nocháililachi. <sup>6</sup> 'Lige abé a'kinana yati neraga ma'chiná ilibaligo alé napu mochile alué maligi sientio rasígame ralámuli Onorúgame oyérame, 'lige amulí suwábaga alué ralámuli bijí ajagá mochí. Jaré 'ma suwile. <sup>7</sup> 'Lige abé a'kinana yati neraga ma'chiná ilibale alé napu ajtíle Santiago, 'lige a'kinánami yati neraga ma'chiná ilibale alé napu mochile alué makué bilé rió napu Esusi 'yuga járome nile.

<sup>8</sup> 'Lige abé nujubami ka yati neraga ma'chiná ilibaturu alemi napu ne enegé, ne napu ju napurigá pe bilé towí napu ochérale tabilé 'cho 'la sébachi raweli. <sup>9</sup> 'Lige alekeri alué makué bilé rió napu Esukristo 'yale nóchali abé najtékame ju me'tigá ne'chí. 'Lige tabilé ikiaré napurigá ralámuli ne'chí olagá animela ne Esukristo nocháililachi nóchame ko, napugiti neka 'we resí olame kéturu alué ralámuli Onorúgame oyérame. 'Lige neka alekeri 'we chijúnaguru. <sup>10</sup> Nobi Onorúgameka 'we 'la na'temaka etéliko ne'chí 'lige alekeri neka 'we 'la nocha 'lige beniria ajtí ne me'tigá uché jaré napu Esukristo 'yuga járome nile nobi tabiléchigo ne bo'né a'walilate benirigo, pe Onorúgame a'walila 'smi ne'chí gu'iria. <sup>11</sup> Tabilé chéré rekó jaré abé rajpé benirie alué a'lala ra'ichali, nobi abéchigo najtékame júkó beníriila alué a'lala ra'ichali, 'lige alué ra'ichali ju napu 'emi oyérale.

*Jena ruwimela Páulo ruwíligo ramué abiena ku ajániwili ko*

<sup>12</sup> Ye ju alué a'lala ra'ichali napu ramué ruigá e'yéniru: Kristo ku ajániligo. 'Liko ¿chonigá aniché jaré 'emi suwígame tabilé ku ajaname ko? <sup>13</sup> Tabilé ku ajaname nísaká alué suwígame, 'liko Kristo tabilé



ku ajánaleréko, <sup>14</sup> 'lige tabilé ku ajánasaká alué Kristo, 'liko ye a'lala ra'íchali napu ramué beníruga e'yéniru pe tabilé sirbe júleké 'liko, 'lige pe rioksi julke rekó 'emi bijchigie Kristo nila ra'ícháli. <sup>15</sup> Bijchiá nísaká tabilé ku ajáname ko alué suwígame 'liko ramué pe 'yégiga ruigá e'yéniwaréko Onorúgame nila ra'íchali napugiti ramueka ruigá e'yéniru Onorúgame 'sílego ku ajania alué Kristo. <sup>16</sup> Bijchiá tabilé ku ajáname nísaká alué suwígame 'liko Kristo tabilé ku ajáneleréko, <sup>17</sup> 'liko Kristo tabilé ku ajánasaká 'liko tabilé najtékame ju rekó 'emi bijchigie Kristo nila ra'íchali, 'liko 'emi pe abiji chátiri 'nátame júleké. <sup>18</sup> 'Liko alué ralámuli napu Kristo oyérame nile 'we 'ya napu 'ma suwile, alueka napurigá e'wagágame neraga mochíliké. <sup>19</sup> Najtékame nisa Kristo oyérilia pe abiji ajagá mochiga 'lige 'ma tabilé najtékame nisa 'ma suwisúká, 'liko resía ramué.

<sup>20</sup> Nobi Kristoka ku ajánale tabilé siné mukumea uchéchigo siné 'lige abé a'kinánaka alué suwígame ku ajánamala. <sup>21</sup> Pe bilé rió (Arani) chojkila gite suwime ju ralámuli 'lige pe bilé rió gite (Kristo) ku ajánimili júkuru suwígame. <sup>22</sup> Napusi cha'sile alué Arani, suwábaga ramué 'ma chátiri alawégame gainaru 'lige alekeri suwiboli ju ramué. Nobi ramué Kristo oyérisiká, ku ajániwili ju ramué. <sup>23</sup> A'pilipi ralámuli ajánimili ju napu'lige seba raweli nobi bajchaka Kristo ku ajánale. 'Lige abé a'kinánami napu'lige Kristo uché ku nawasa, ajánamili ju suwábaga alué napu Kristo oyérame nile. <sup>24</sup> A'lige 'ma guwíchi nímala napurigá tané ikimela gawí, napu'lige Kristo umérasa suwábaga alué e'wélala nulame cha nokame 'lige alué u'kuchípala remónisi. 'Lige Kristo regá anémala alué O'nó Onorúgame: «Jena ajti suwábaga nóchali napu mué nulá.» <sup>25</sup> Kristoka nulámili júkuru hochígimi jena wijchimoba napusi 'ma umérisa suwábaga alué bo'né saila. <sup>26</sup> Napu'lige Kristo neyúrasa, 'ma tabilé siné suwimeli ju ralámuli. <sup>27</sup> Aka Onorúgame nila ra'íchali regá aníché: «Onorúgameka wa'lula nulame neraga ajchale alué Kristo napurigá nulame nímala suwábaga napu nerú jena wijchimoba 'lige 'pa rewagachi»,\* nobi Kristoka tabilé nulémala bo'né O'nola napugiti O'nólaka wa'lula neraga ajchálgame napurigá nulame nímala. <sup>28</sup> Napu'lige 'ma nulachi suwábaga alué Onorúgame Inolá, a'lige nuléwili ju Onorúgamete, 'lige alarigá Onorúgame nímala suwábaga nulame jena wijchimoba 'lige 'pa rewagachi.

<sup>29</sup> Alué suwígame tabilé ku ajánimili nísaká, 'liko ¿chonigá jaré ralámuli rewaramé

júpaché alué suwígame neraga? ¿Chonigá alanokame júpaché peka bijchígime ke ku ajánamio alué suwígame?

<sup>30</sup> Tabilé ajánamili nísaká alué suwígame, 'liko ¿chonigá a'kuepi amulí suwiyame nírupaché ramué? <sup>31</sup> Aka 'emi 'we 'la machíché ne i'sínimi amulí mukume ko. 'We bijchiá ju napu ne aní, abiena bijchiá ju napu'lige ne etea 'emi, 'we ganiliga eteme ju ne 'emi napugiti 'émika 'wéchigo 'la oyérame kame Wa'lula Kristo Esusi. <sup>32</sup> Tabilé ku ajáname nísaká alué suwígame, 'liko ¿chonigá tabilé majame nílepaché ne alué ralámuli 'yuga ra'ícha napu 'we jobátigame nile? Tabilé ajánamili nísaká suwígame 'liko abé 'la júleké ganiliga ejperelia pe go'ame go'gá 'lige bajiga napugiti pe be'limi 'ma suwiboli kame.

<sup>33</sup> Tase bijchígíwa napu aní alué ralámuli cha nokame. 'Emi e'wísaká napu aní alué ralámuli, 'émichigó a'chigóriga nímala napurigá alué ralámuli. <sup>34</sup> 'We 'la na'táwaká napu noká 'emi 'lige 'ma a'réwaká tabilé e'wía Onorúgame. Aka jaré 'emi chijunátékuru peka machime kame 'emi churigá ko Onorúgame.

#### *Jena ruwimela churigá ku ajánimio alué suwígame*

<sup>35</sup> Jaré ralámuli regá 'nátame kérépukué: «¿Churigá ajáname kéréle alué suwígame? ¿Chieti sa'pégame júpué?» <sup>36</sup> 'La chieti 'nátanti ju jaré ralámuli. Aka suwábaga napu echá 'emi 'ma bikame ju 'lige alésiko 'ma sawarame ju alué talí 'ma nawarasa. <sup>37</sup> Suwábaga napu echiamé ju pecha sawala echiamé júkó bajchá, iligá talí echiamé ju bajchá, 'lige alué talí echisuga bajchá nawarame ju 'lige kúchigo sawarame ju. <sup>38</sup> 'Lige bo'né Onorúgame se'unátiri talí newale a'pilipi talí, 'lige se'unátiri ya'wime ju napurigá bo'né Onorúgame najkile. <sup>39</sup> Aka ralámulika tabilé a'chigóyéri sa'pégame ká'é napurigá ajágame, 'lige alué chulugi se'unátiri sa'pégame ju 'lige ro'chíchigó se'unátiri sa'pégame ju. <sup>40</sup> Aka santo ánjelika 'pa rewagachi mochígame se'unátiri sa'pégame ká'é, 'lige ramué ralámuli jena wijchimoba ejperégame se'unátiri sa'pégame niru, 'lige ramué sa'pala 'lige alué santo ánjeli 'we semati ju. <sup>41</sup> Aka rayénali se'unátiri rapame júpaché tase napurigá alué mechá 'lige tase napurigá so'pilí.

<sup>42</sup> A'chigóriga niru ramué, ramué sa'pala mukumeli ju 'lige bikimeli ju. Se'winátiri sa'pégame niwa ramué napu'lige ku ajánisiga, napugiti 'ma pecha suwiboli kame. <sup>43</sup> Aka bilé ralámuli mukume ka'e, 'lige tólime ju, 'lige alué sa'paka pe bikame ju, nobi 'ma ku ajánasaká alué ralámuli,

\* 15:27 E'nesi Salmos 8:6.

alué ralámuli sa'pálaka 'we semati nímala 'lige 'la 'we a'wágame, 'lige 'ma tabilé siné mukumela. <sup>44</sup> Aka bilé ralámuli mukusáká, pe sa'pá mukume ju nobi ku ajánaka pe uché bilé sa'pega ajáname ju napu tabilé siné mukume ju.

<sup>45</sup> Aka Onorúgame nila ra'íchilika regá aniché Onorúgame 'silego bajchá ajtígame rió newá napu Arani anilime nilige, nobi uchéchigo bilé Arani nawálekó napu pe Kristo nile napu nejime ju a'walí napurigá ku ajániwa. <sup>46</sup> Aka bajchaka pe iligá sa'pégame niru napu mukume ju. 'Ma a'kinana napu'lige suwisuga, se'unátiri sa'pégame niwa napu tabilé mukume ju. <sup>47</sup> Aka bajchá newárigime rioka pe we'ete newárigime nile. Alué nujubá nawágame rioka pe rewagáchika nawale. <sup>48</sup> A'pili ralámuli a'chigóyéri sa'pégame ju napurigá alué rió Arani, napu we'ete newárigime nile, nobi alué ralámulika napu oyérame ju Kristo, alueka bilé rawé sa'pégame nímala napurigá alué Kristo napu'lige 'pa rewagachi simasa.

<sup>49</sup> Jípeko napurigá Arani alieri sa'pégame niru, nobi bilé rawé sa'pégame niwa napurigá sa'pégame ju Kristo napu rewagachi ajtí.

<sup>50</sup> 'Emi Kristo oyérame napurigá ne, neka ruwíguru bilé ralámuli pe iligá sa'pégame 'lige o'chégame, alueka tabilé sebámala alé napu ajtí Onorúgame. Ye ramué sa'pálaka pe bilé rawé mukume ju, tabilé senibí ajagá ajtígame ju. <sup>51</sup> Neka bilé ra'íchali ruwimela napu Onorúgame tabilé ruwile abé i'bé: Pecha suiboli júkó jaré, nobi suwábaga se'winátiri sa'pégame gaináwagó. <sup>52</sup> Pe anaga neraga napu'lige alué nujubá trompeta bucháchinichi, a'lige ajánamala alué ralámuli suwígame se'unátiri sa'pega, 'lige 'ma tabilé uché suimela. 'Lige ramué napu ajagá mochiru abiena se'unátiri sa'pégame gainawa. <sup>53</sup> Ramué sa'pala napu mukume ju se'unátiri gainámala, napu tabilé siné mukume ju. <sup>54</sup> Napu'lige suwábaga ye tábiri ikisá, 'ma 'la sébali ikimela napurigá aní 'we 'ya osirúgime osilí: «Bilé ralámuli Onorúgame oyérame tabilé mukugá rejipímili ju.» <sup>55</sup> «Ku ajánimili ju 'lige tabilé siné mukumeli ju.»† <sup>56</sup> Pe cha nokigá suwiwame ju. Aka Moisesi nila nulalí ruwíché alué cha nokame gastigáriwili ko. <sup>57</sup> ¡Wa'lú cheliera 'yawa Onorúgame napugiti alué kame napu 'we 'la nejkuri napurigá 'la umérowa alué Remónisi na'táilila 'la oyérisiká ramué alué Wa'lula Esukristo!

<sup>58</sup> Alekeri 'emi Onorúgame oyérame napurigá ne, tabilé guwana rujsuka nokísiwa, abisibi 'we 'la nóchaga nokísiwa Onorúgame nila nochálilachi. 'Emi 'we 'la machíguru

tabilé rioksi nochálime ko Wa'lula Esukristo 'yuga.

## 16

*Jena ruwimela churigá gu'irimili ko alué ralámuli Onorúgame oyérame*

<sup>1</sup> Neka jípe ruwimela churigá olámili ko 'emi napu enomí nejímili ju ralámuli Onorúgame oyérame i'lime Rusaleni epperégame. A'chigóriga nokiboa napurigá nuligé ne Onorúgame oyérame Galasia epperégame. <sup>2</sup> Bilé tarali métigame enomí, senibí romíkichi a'pili 'emi pe u'kabi enomí nejímili ju. Napu'lige ne sébachi alemi enomí nolamia, tabilé najkí ne napurigá 'emi e'yenamala enomí napabuga. <sup>3</sup> Napu'lige ne sebasa alemi, jaré ralámuli napu 'emi 'la nirá napurigá simámala Rusaleni, apeli o'ká julámala ne 'lige enomí alué napu 'emi napabule. <sup>4</sup> 'Emi 'la nirásaká napurigá ne si simela, siméréko ne alué ralámuli 'yuga.

*Jena ruwimela koche simírimio lale alué Páulo alé Korinto simiá*

<sup>5</sup> Neka sebámala 'emi kólimia bajchá kólisa alué ralámuli Maseronia anilíchi epperégame. <sup>6</sup> Siné kachi alé asiméréko ne 'emi epperélachi suwéniga romó, 'lige jaré 'emi ne si simámili júkuru alé uché bilena napu simeli ju ne. <sup>7</sup> Neka tase pe'wera asinali alé 'emi epperélachi, neka i'libesi asinali alé 'emi epperélachi Onorúgame 'la elásaká. Alekeri tabilé simí ne alemi jípe. Abé i'libeko simé ne alemi. <sup>8</sup> Alé Ebeso anilíchi asimela ne napusí 'ma sebasa alué piesta Pentekostesi\* anilime. <sup>9</sup> Rekó we'ká ralámuli alé epperégame tabilé ganiliga eté ne'chí nobi Onorúgameka 'láchigo nejígó raweli napurigá beníframala ne ralámuli Onorúgame nila ra'íchali.

<sup>10</sup> Alemi sebasa alué Timoteo, 'we 'la ganiliga etéwaká napurigá 'we 'la ganiliga asimela alé 'emi epperélachi. Alueka ralámuli beníframe ju Wa'lula Esukristo nila ra'íchali napurigá ne. <sup>11</sup> 'We 'la ganiliga etéwaká 'lige aminami gu'írowaká napurigá 'we ganiliga einámala jeka simiá ne'chí e'nemia napugiti neka 'lige uché jaré ralámuli Onorúgame oyérame 'we buigá mochiru.

<sup>12</sup> Jena ajtí alué Apolo napu Onorúgame oyérame júchigó napurigá ramué. Neka 'we anigéturu napurigá simela 'emi kólimia nobi tabiléchigo ikírítigo alemi simiá, nobi pe abé i'libékomi siméréko.

<sup>13</sup> 'We 'la 'nátaga mochiwaká tabilé a'regá Esukristo oyeria, tabilé guwana rujsúká, 'la iwega mochiwa 'lige tase majaga. <sup>14</sup> 'Lige suwábaga nóchali newá 'we 'la ganiliga newáwaká.

† 15:55 E'nesi Isaías 25:8 'lige Osea 13:14.

\* 16:8 E'nesi glosario «Fiesta de Pentecostés».

<sup>15</sup> Suwábaga 'emi napu Onorúgame oyérame ju napurigá ne, 'emi 'we 'la machíguru alué Estépana 'lige alué rijimala alué niligo bajchá oyérame alué a'lala ra'íchali alé Akaya anilichi, 'lige alué nokame ju uché jaré oyérame gu'iria. Neka 'emi nuléguru <sup>16</sup> napurigá 'emi 'we 'la e'wímala 'lige gu'irimala alué Estépana 'lige alué rijimala 'lige aminami uché jaré oyérame napurigá Estépana.

<sup>17</sup> Neka 'we ra'sálá jemi sébachi alué Estépana 'lige Portunato 'lige alué Akaiko. Alué nokáguru ne'chí gu'iria napugiti 'émika pecha gayénampá ne'chí gu'iria napugiti cha mejká mochígempá. <sup>18</sup> Neka asíriga ra'sálagá ajtí alué ralámuli 'yuga napugiti 'la oilárimpá ne'chí napugiti neka 'we seweka ajtigé, a'chigóriga napurigá oilárilige 'emi napu'lige 'yuga mochiga. Alekeri 'we 'la ganíliga etéwaká alué ralámuli.

<sup>19</sup> Ralámuli Onorúgame oyérame Asia ejperégame 'we náola rejpórali 'lige abiena Akila 'lige Prisila 'lige alué ralámuli napu napuíme ju alué Akila 'lige Prisila ejperélachi Onorúgame nila ra'íchali benimea, 'we náola rejpórali. <sup>20</sup> Suwábaga ralámuli Onorúgame oyérame jena ejperégame 'we náola rejpórali 'emi. 'We 'la ganíliga rejporáwaká 'emi a'bopi 'la banachí chu'migá napurigá nokame niru ramué.

<sup>21</sup> Ye nujubá uchúkame osilí, ne bo'né sekálate osé ne 'emi.

<sup>22</sup> Jaré ralámuli tabilé nirame nísaká Wa'lula Esukristo 'we a'lá nisa 'la kápá Onorúgame gastigaria alué ralámuli.

¡'We a'lá nisa 'la kápá uchéchigo nawá Wa'lula Esukristo!

<sup>23</sup> 'We a'lá kápá Wa'lula Esusi aminabi iwérali 'ya 'emi. <sup>24</sup> Neka 'we galegá eté suwábaga 'emi napugiti suwábaga 'emi Kristo Esusi oyérame kame.

Pe ekí kápá ye ra'íchali. Wa'lú cheliérabá.

## Ye Ju Alué Apeli Nujubá Osirúgime Napu Páulo Osele Alué Ralámuli Napu Korinto Ejperégame Nílige

*Kuira 'emi ralámuli Korinto ejperégame napu eki Onorúgame oyérame ju.*

<sup>1</sup> Ne Páulo osá ye osilí. Kristo Esusi wanápale ne'chí napurigá ne nulame nímala aleké nila nóchali. Ye rió Timoteo, Esukristo oyérame ju napurigá ramu'é, alueka jena ají ne 'yuga.

Osé ne 'emi ralámuli Esukristo oyérame napu napuíme ju alé bilena galírale Onorúgame nila ra'íchali benímea, 'lige alué Onorúgame e'kali tánimia, 'lige cheliera 'yamia Onorúgame, 'emi alé we'ká riógichi Korinto ejperégame ralámuli. 'Lige abiena osé ne 'emi ralámuli Onorúgame oyérame napu ejperégame ju alé we'kanami we'ká riógichi napu Akaya anilime gawí ju.\*

<sup>2</sup> 'La kékuru 'emi ralámuli Onorúgame ramu'é O'nola 'we alá nesérasa. 'Lige alué Wa'lula Esukristo 'we alá nesérosachigó, napurigá 'we alá ganíliga mochímala 'emi ralámuli a'bopi, tase we'ká 'nátaga pe bi'lepi.

*Jena ruwimela Onorúgame 'we 'la na'temame ko ramu'é*

<sup>3</sup> Wa'lula ju Onorúgame, alué napu Wa'lula Esukristo O'nola ju. 'Lige Onorúgame 'we 'la na'temame ju ramu'é napurigá bilé o'nó. 'Lige Onorúgame senibi nejkúrime ju napu'lige chibi ikisuga, bilé tábiri tabilé 'la nisa. <sup>4</sup> Esukristo 'we alá na'temame ju ramu'é, 'lige ramu'é alekeri gite 'we 'la na'temátékuru alué uché jaré ralámuli resí ikichi, napurigá na'temame ju Onorúgame ramu'é. <sup>5</sup> Ramu'é ralámuli 'we resí ikíachigó, napurigá ikile Esukristo 'ya. 'Lige ramu'é resí ikíachi, 'lige Esukristo gu'iri ramu'é. <sup>6</sup> Alarigá beniaa ramu'é napurigá ramu'é 'emi gu'iriwa, 'emi chibi ikisá. 'Lige Onorúgame 'we na'temame ju ramu'é, ramu'é abienachigó alarigá beníboa 'we na'temaka járowa 'emi. 'Lige alarigá 'emi 'we alá anachámala napu'lige 'emi resí ikíá. <sup>7</sup> Tabilé chérikáwé rekó 'emi 'we resí ikíé napurigá ramu'é, Onorúgame 'la semáriga gu'irimala 'emi. 'We 'la machíguru 'emi 'la anachamio.

<sup>8</sup> Ramueka rupóráeke'é bilé ra'íchali napurigá ikíliga ramu'é 'we resí ikíá alé wa'lú gawí bo'ígichi we'kaná we'ká riógichi alé Asia anilíchi. 'Lige ramu'é 'la najkiá napurigá 'emi 'la námaka akimela ye ra'íchali. Ramu'é ralámuli amulí suwirúkuru

alé Asia anilíchi e'yénaga. <sup>9</sup> 'Lige ramueka 'a me'liboli mayélike'é alé, 'lige ramueka 'a tabilé neyúsiwa mayélike'é alé Asia. 'Lige pe bo'né Onorúgame alarigá eláleke'é napurigá ramu'é alarigá na'tawa. 'Lige ramu'é alarigá 'la machírú Onorúgame 'we alá benégame ko nejkúriga. Ramu'é ta gu'irisiká Onorúgamete, tabilé chérigá neyúsiwake'é ramu'é. 'Lige tabilé chéréko rekó ramu'é me'liruge alé, alué Onorúgame 'la ku mochíamili ju ramu'é suwisáká. <sup>10</sup> Onorúgame 'we semáriga gu'irikuru ramu'é aliena resírikáchi mochígichi ramu'é. Jípeko tabilé chérikáwé rekó uchéchigo alakiruge ramu'é, napugiti Onorúgame 'we semáriga nejkúrimili kame uchéchigo siné. 'Lige napurigá aní ne 'la bijchiá ju. <sup>11</sup> 'Emi ralámuli tániwa Onorúgame napurigá tánilige 'emi ralámuli, 'lige 'emi 'we resí ikíachi. Napu'lige ramu'é 'we resí ikíchi, 'lige Onorúgame 'la nejímala alué a'walí uché rajpé. 'Lige Onorúgame 'la sébali olasa napurigá tánilige 'emi ralámuli, 'lige 'emi 'we alá sébali machímeli júkuru alué Onorúgame 'we alá sébali olame ko. 'Lige animela 'emi ralámuli: «Wa'lú cheliérabá mué Onorúgame, 'we semáriga nejkuri mué», animela 'emi.

*Jena ruwimela chonagá ta simíligo Páulo alé Korinto*

<sup>12</sup> Ramueka tabilé chijúnaga rupoa alué ra'íchili panápurimi e'yénaga. Alué ra'íchali napu ramu'é benírilie, suwábaga 'we alá ju. Aka ramu'é tasemi 'yégiliguru 'emi. 'La suwábaga ra'íchili 'we alá o'wé ra'íchame niru ramueka 'emi 'yuga. Onorúgame nejkúriga bilé a'walí. 'Lige 'la sébali oliame ju ramu'é napurigá aní 'lige napurigá na'talia ramu'é. 'Lige Onorúgame gu'iri ramu'é napurigá ramu'é 'we alá sébali olawa. Ramueka tabilé 'yégiga e'yenálime júkuru, tase napurigá alué ralámuli tabilé Onorúgame oyérame. <sup>13</sup> 'Lige ramueka osiáguru ye osilí, 'lige ye osilí suwábaga 'we alá bi'ígime ra'íchame ju, 'la ma'chígime ruwime júkuru ye ra'íchali napurigá 'la námaka akimela 'emi ye ra'íchili. <sup>14</sup> 'Lige 'emi 'we pee námame ju churigá níriga ramu'é, 'lige pe abé i'libeko abé we'ká ra'íchali námame nímala 'emi. 'Lige abé i'libeko napu'lige ku re'kínasa alué Wa'lula Esukristo jena wijchimoba, 'lige 'we ganíliga mochímala 'emi ramu'é 'yuga, alarigá napurigá ramu'é 'we ganíliga mochíwachigó 'emi 'yuga.

<sup>15</sup> 'Lige neka 'la machiéturu 'emi ralámuli uché rajpé beninalio churigá níriga ramu'é. 'Lige ne alekeri osá siminálituru alé Korinto. 'Lige ne osá simisáká alé, 'liko uché rajpé abé alá benimélike'é 'emi alué ra'íchali. <sup>16</sup> 'Lige ne alé Maseronia anilime gawí

\* 1:1 Alé Korinto pebalé bi'tenapi kéré alué Akaya anilíchi wa'lú gawí bo'ígichi, napurigá bilé «país» neraga ju alué Akaya.

we'kaná we'ká riógichi bo'ígichi simiá, alemi simíromala olae ne. 'Lige ne ku jeka enegá aleka simíromala olae ne. 'Lige alarigaka abé a'lá benimétigo 'emi Onorúgame nila ra'íchali. 'Lige ne alé Korinto sebasa, 'emi ralámuli ne'chí gu'írimili kéturu, pe'tá go'ame nejía napurigá sebámala ne alé alué wa'lú ejiro Jurea anilichi we'kaná we'ká riógichi. <sup>17</sup> 'Lige ne 'la alarigá simé olae napurigá anile ne alé osilichi. Neka tabilé alieri ju napurigá alué ralámuli tabilé Onorúgame oyérame. Alué ralámuli tabilé Onorúgame oyérame, i'sínimi 'we a'lá ra'íchame ju, nobi tabiléchigo sébali olame júkó. Ne alarigá 'la anisáká, neka 'la simela.

<sup>18</sup> 'Lige Onorúgameka 'la sébali olame júkuru napurigá aní. 'Lige ramuéchigó 'la sébali olame niru napurigá aniamé ju ramué. <sup>19</sup> 'Lige Esukristo Onorúgame Inolá 'we 'la sébali olame ju napurigá aní alué bo'né, 'lige ramueka alarigá rutúkuru ye ra'íchali, ne Páulo, Timoteo 'lige Silasi.

<sup>20</sup> 'Lige Onorúgame anile 'ya bajchá rawé julámorile bilé rió nejkúrime napurigá nejkúrimala. 'Lige Onorúgame 'we a'lá sébali olame napurigá anile bo'né. Júlale alué Kristo napurigá nejkúrimala. 'Lige ramueka alué Esukristo oyérame niru, alekeri jipe alué Esukristo nejímili júkuru bilé a'wali. 'Lige 'la sébali olawa ramué napurigá aní ramué. Alué ralámuli etesa ramué 'we a'lá sébali oliachi 'lige machimela alué ralámuli Onorúgame 'we a'lá gu'írió ramué. 'Lige alué ralámuli 'we a'lá ganíliga mochímala Onorúgame 'yuga. 'Lige animela alué ralámuli, «Wa'lula ju Onorúgame.» <sup>21</sup> 'Lige Onorúgame ju ramué gu'írame napurigá ramué 'we a'lá sébali oyérame niwa Kristo. Onorúgame nejkúru ye ra'íchali beniamé. <sup>22</sup> 'Lige Onorúgame nejkúru bo'né Alawala 'la a'wágame napurigá ramué ralámuli 'la machiboa 'la Onorúgame 'kúchila nírgo ramué. 'Lige ramué ralámuli alekeri gite 'la machiáguru Onorúgame bilé rawé nejímio bilé raweli 'we semátiri. 'Lige napurigá anile alué bo'né Onorúgame, 'la sébali olamio. Onorúgameka etea ajtíkuru. 'La machíguru 'la bijchiá aníá.

<sup>23</sup> Neka tabilé simírote'é alé Korinto napurigá anié ne napugiti neka machiamé pecha 'cho 'la sébali ka 'emi ralámuli napurigá 'la gepúmala 'emi alué rejcholi napu ne ruimeli nílige alé sebasa napu 'emi ralámuli mochí. 'Lige ye rejcholi napu ne ruimeli nile 'we a'wágame nímmili nile 'emi ralámuli nírga. 'Lige 'emi ralámuli alué ra'íchali akisá, 'lige seweka mochímili nile 'emi. <sup>24</sup> 'Lige neka tabilé a'wágame nulénili. 'Emi 'we a'lá 'nátame júpaché alué Esukristo 'yuga. 'Lige neka pe iligá najkí napurigá napuíka beniboa ye Onorúgame ra'íchálila napurigá 'la ganíliga mochímala 'emi, nobi

'emi ralámuli ta'chó 'me 'la sébali nile napurigá 'la benimela alué ra'íchali, alué napu ne ruimeli nile alé sébaga. Alekeri tabilé osá simiru ne alemi.

## 2

<sup>1</sup> 'Lige ne alé sebasáká, alué ra'íchali ruwisáká ne alé, 'lige 'emi ralámuli 'we seweka mochúbamili nímmilikuru alué ra'íchali akisá. Neka tabilé seweka mochíanili 'emi uchéchigo siné. <sup>2</sup> Neka tabilé sebánili alé 'emi tabilé a'résaká alué chátiri 'nátli. Neka najkí napurigá 'la ganíliga mochímala 'emi 'lige 'we a'lá 'nátaga bílepi 'nátli. Alarigá nokisáká 'emi, 'liko 'we ganíliga sebámala ne alemi.

<sup>3</sup> Ne bilé apeli nábolegéturu alé 'mi napurigá 'la gatewa alué ra'íchali 'emi a'bopi 'la ganíliga. Ne bo'né tabilé gaténili alé sébaga. Neka tabilé ra'ichánali chibiyeti ra'íchali. Neka 'la ganíliga sebánili alé. 'Lige ne 'we a'lá ganíliga asimela napu 'lige 'emi ralámuli 'we a'lá benigá mochígichi alué rejcholi. 'Lige 'emi ralámuli 'we ganíliga mochímalachigó alé. <sup>4</sup> 'Lige ne 'we seweka 'siéturu alué osilí osá, 'lige nalaka 'siéturu ne. 'Lige 'we galé ne 'emi, alekeri osé ne 'emi. Alué osilí, tabilé ne'ogí kéré.

*Jena ruwimela napurigá e'kaga noksíywa alué ralámuli rekó cha nokame ke*

<sup>5</sup> Alé ajtí bilé rió 'we inílime 'we resí olá 'emi ralámuli, pe bo'nepi gompaniérola ke wa'lú seweli 'ya 'emi. Ne abiénachigó 'we seweka ajtí alarigá mochígichi 'emi. 'Émika abéchigo resí nilia mochí alué rió chojk-ila gite, tabilé ganíliga mochíkuru 'emi nibilé nétiri ganíliga ajtíkuru. Neka tabiléchigo ne'ochániligó alué rió uché rajpé. <sup>6</sup> 'Émika 'máchigo gastigárilime siné. 'Ma 'la júkuru. <sup>7</sup> Jípeko 'emi e'kámala ke alué rió, ku amigo níraga etewa. Jípeko ku na'temápua alué rió napurigá tabilé a'rémala Onorúgame na'tálila 'nata. <sup>8</sup> Jipe ne taní napurigá simámala 'emi alué rió e'nemia, napurigá 'emi anémala alué rió 'ma ku 'la galeo 'emi alué rió. <sup>9</sup> Neka oséguru 'emi pala 'la e'wara 'emi, pala 'la e'kara 'emi alué rió. <sup>10</sup> 'Emi 'la e'kásaká alué rió 'liko ne abiénachigó 'la e'kámala alué rió. Neka abiena 'la 'nata ajtí napurigá suwábaga ku 'la ganlíga nokísimala 'emi ralámuli. Alué Krístoka 'wéchigo 'la e'negá ajtigame ne'chí, alekeri gaténili ne napu 'lige ralámuli e'kurú nokogá e'yénachi, siné kachi 'la gatémala ne. <sup>11</sup> Alarigá alué Remónisi tabilé chérigá neyúromala. 'La machirú alieri ko alué Remónisi. Alué 'sime júkuru Onorúgame ra'íchálila najsabua.

*Jena ruwimela Onorúgame nuebo ra'íchali nuláligo napurigá 'la sébali olámala alué ralámuli*

<sup>12</sup> Lige ne alé we'ká riógichi Tróasi anilichi sebase, ne 'la ruwíturu alué ra'íchali Kristo nila rejcholi. 'Lige Onorúgame 'we a'lá nejkúrale ne'chí beniria napurigá 'la semáriga ma'chínamala alué ra'íchali. <sup>13</sup> Lige ne bo'neko ta'mé 'we ganiliga rejpíkuru 'nalina, pecha ajtigá alué rió Tito anilime alué ne gompaniérola. 'Lige alekeri simíturu ne uchéchigo bilena alé Maseronia anilime gawí bo'ígichi, Tito 'yasia alemi.

<sup>14-15</sup> Rekó neka a'rigé alué ra'íchali beniria alé we'ká riógachi Tróasi anilichi, Onorúgameka abiénachigo 'la nejkúrigo rekó panápuri eyénachi ne. Ralámulika ye ra'íchali akigá, benime ju Onorúgame nila ra'íchali. Jaré ralámuli 'la benime ju ye ra'íchali, 'lige jaré ralámuli tabilé benime ju ye ra'íchali. Rekó ta benime ke, 'we 'la machí a'boika Kristo oyérame nírigo ramué. <sup>16</sup> Alué ralámulika tabilé Kristo oyérame ju, napu'lige aké ramué ra'íchálíchi, 'we a'lá machíguru re'lé simámili ko alé injierno anilíchi, nobi alué ralámulika tabiléchigo 'nátame júkó. 'Lige alué ralámuli Kristo oyérame, napu'lige aké ramué ra'íchálíchi, 'we 'la machíguru 'pa rewagachi simamio. Onorúgame a'walí nígame júkuru napurigá 'la semáriga ma'chínamala suwábaga ye. <sup>17</sup> Ramueka pecha beníriligo Onorúgame nila ra'íchali pe enomí koruka napurigá nokame ju uché jaré ralámuli, pe iligá 'i'kilí ruilíguru ralámuli napurigá 'la na'támala. Ramueka Onorúgamete nulérigime nírigime, 'lige Onorúgameka ramué e'negá ajtíkuru nabi rawé. 'Lige Kristo wa'lú a'walí nejíchigó.

### 3

<sup>1</sup> 'Lige siné kachi 'emi mayéleké ramué 'we gunarume nírigo, 'lige ramueka tabilé alieri niru. Ramueka pecha aniágó: «'We jebénigame niru ramué», tase alaniá ramueka. Ramueka tabilé resiláila napurigá bilé apeli newawa anigá 'we 'la ralámuli kóriká ramué. <sup>2</sup> Bilé rió machínalisaká churigá na'tálime ko ramué, 'liko a'boi 'emi e'néniga 'la machibóaguru alué rió 'ma 'la a'kabámana mochígame kame 'emi napugiti 'emi 'ma 'la sébali oláligime napu ramué benírilige. <sup>3</sup> Jipe 'emi ralámuli Onorúgame Alawala nígame júkuru alé sulachí, alekeri 'we a'lá oyérame ju 'emi Onorúgame. 'Lige alekeri 'la ma'chígime nérékuru ye 'nátili, napurigá ramué 'we a'lá sébali benírilige 'emi, napugiti 'emi ralámuli 'we a'lá oyérame kame Onorúgame. Onorúgame osale alué nulalí oká rejtechí napurigá Moisesi niga asimela, nobi 'émika nígame ju alué nulalí alé sulachí. 'Ma 'la na'tátékuru Onorúgame 'yuga 'lige 'we a'lá e'wiwa.

<sup>4</sup> Alué Kristo 'yákuru ramué bilé 'nátili napurigá ramué 'we a'lá machiboa 'la sébali olálikuru 'la semáriga benírilékuru

ramué 'emi. Onorúgame 'la e'negá ajtíkuru ramué, 'we 'la ganiliga ajtí ramué 'yuga. 'Lige alekeri ramué tabilé gunarume nírukuru. Ramué a'boi tabilé aniboa 'we a'lá ju. <sup>5</sup> Ramueka ruyá bilé 'nátili napurigá aní Onorúgame. Pecha aniboa ramueka: «Ramueka 'we ejobénigame niru beníriga», tase alaniboa ramueka. <sup>6</sup> Ralámuli 'la machíguru chiéniko cha nokáliga alué osilichi e'néniga, alué osilí napu Onorúgame 'yale alué Moisesi, nobi tabiléchigo a'walí nígame nílekó napurigá tabilé buyásimala alé tabilé 'la bowechi. Jípeko ye Onorúgame Alawálate a'walí nígame niru ramué. Jípeko alekeri 'we 'la beniria mochírukuru ramué ye ra'íchali.

<sup>7</sup> 'Lige bilé rawé alué rió Moisesi 'we rasórutume banega asáleke'é alé we'ká ralámuli mochígichi. Onorúgame bo'né alarigá ajcháleke'é rapame banega alué rió Moisesi napurigá alué ralámuli 'la machimela alué rió Moisesi Onorúgame 'yuga eyéname ko 'lige napurigá alué ralámuli 'la machimela alué Moisesi nulalila 'we najtékame ra'íchame níligo, bo'né Onorúgame nulalila níligime. 'Lige alué ralámuli israelita 'we rasóleke'é alué rió alarigá ajtígichi alé. 'Lige tabilé gayénaleke'é alué ralámuli o'wemi e'nena. We'lisi rasóleke'é alué ralámuli, rekó we'libeko ta'mé rapame banega ajtígichi kachi abiena rasóleke'é alué ralámuli. <sup>8</sup> 'Lige alué rejcholi napu benírale alué rió Moisesi 'we semati níleke'é kaka, nobi alué rejcholi napu jipe beniaa uché rajpé abé semati ju, me'tagá alué rió Moisesi rejchólila, napugiti jípeko Onorúgame Alawala nígame niru ramué ralámuli. <sup>9</sup> Chiena 'la nílige alué nulalí napu alué Moisesi beníriale alué ralámuli napurigá machimela chibi nokáliga, jípeko abé a'lá júkuru Onorúgame nejile bo'né Alawala napurigá 'la a'walí nígame niwa ramué ralámuli napurigá 'la sébali olawa napurigá nulá Onorúgame. <sup>10</sup> Ye 'nátili nueblo abé a'lá júkuru, tase napurigá alué 'ya nerúgame. <sup>11</sup> Ye 'nátili tabilé siné suwime nímalá. 'Lige alué 'ya nerúgame 'nátilika abiena 'la semati nílekuru. Abéchigo 'la semati júkuru ye 'nátili nueblo, abé a'lá sébali ju.

<sup>12</sup> 'Lige ramué ralámuli tabilé chijúnaga ruyá ye rejcholi napugiti alueka 'we a'lá kame, 'lige aminami tabilé siné suwibame júkuru ye rejchólíka. 'Lige alekeri tabilé chijúnaga ruyelia ramué ralámuli ye ra'íchali apiépiri ralámuli. <sup>13</sup> Ramueka tase napurigá alué rió Moisesi, tabilé alieri niru ramué. Alué rió Moisesi napu'lige rapame banega asísá, 'lige ku ta'mé rapame banega asagá, 'we chijúnale. 'Lige chijúnaga alué rió arigá pe'tá chinite o'póliga asibaleke'é banalá napurigá ta etémala alué ralámuli ta'mé rapame banega ajtígichi alué rió. Alué

rió Moisesi tabilé najkíleke'é napurigá alué ralámuli machimela 'ma suwábiliga alué a'walí napu nígame nílige alué rió Moisesi. <sup>14</sup> Lige alué ralámulika abirigáchigo machíleke alué rió Moisesi 'ma suwábiliga alué a'walí. Lige we'ká ralámuli jipe ejperégame alé Israeli, alueka 'we ra'íchame ju alué osilí napu nerú alé líbrochi, napurigá ra'íchale alué Moisesi 'we 'ya. Lige pe a'bopi 'la sébali olame korime ju alué ra'íchali, <sup>15</sup> nobi rekó we'sá akee alué ra'íchali, tabilé sébali olame júkuru. Pe Esukristo a'walílate 'la sébali olámili ju. <sup>16</sup> Lige bilé rió alué Esukristo oyérasa, 'lige alué Onorúgame Alawálaka gu'írimala napurigá alué rió 'we 'la semáriga machimela alué ko nuevo 'nátili 'we a'lala. <sup>17</sup> Alué Wa'lula Esukristo pe bi'lepi ju alué Onorúgame Alawala nejime ju, napurigá 'la na'tawa alué semati 'nátili. Napu'lige nígame niru ramué alué Onorúgame Alawala, 'liko 'la sébali e'wawa ramué Onorúgame 'yuga. Liko tabilé e'wiwa alué Remónisi. Lige alarigá 'la 'we semáriga beniboa alué Onorúgame nila rejcholi. <sup>18</sup> Lige ramué ralámuli 'we a'lá sébali benisá alué Onorúgame nila rejcholi, 'lige ramué ralámuli 'we semáriga ra'íchame niwa. Lige aminami 'we semáriga benírame niwa ramué ralámuli alué Onorúgame ra'íchálila. Alué ralámuli 'la etémala Onorúgame Alawala ramué gu'írichi napurigá e'wiwa Esukristo. Aminacho i'kilimi 'la na'táwaréko Esukristo na'tálila.

## 4

*Jena ruwimela ramué sa'pala ko napurigá bilé sekolí wejcholate newárigime*

<sup>1</sup> Alekeri tabilé guwana rujsinígó ramueka napugiti Onorúgame nejile ye bilé 'nátili napurigá beníriga nokísiwa uché jaré ralámuli. Ramueka 'we resítiri nírukuru, nobi Onorúgame arigáchigo nejíleko ye bilé 'nátili, aminabi neji iwérali. <sup>2</sup> Ramueka 'la beníriliguru alué Onorúgame nila ra'íchali napurigá aní. Ramueka pecha we'ká 'nátili 'nátaga ra'ícháligo, pe bi'lepi na'tálime ju Onorúgame nila na'tálilacho. Ramueka pecha enomí meka nokiágó alué Onorúgame ra'íchálila beníriga. Suwábaga ralámuli machíguru ramué 'we 'la bi'ígame benírlila. Onorúgameka 'la e'negá ajtíkuru ramué. <sup>3</sup> Ramueka beníriliguru churigá 'la buyásiwa alé tabilé 'la bowechi. Lige we'ká ralámuli tabilé bijchígiga aké alué ra'íchali rekó 'la námaka akee alué ra'íchali alanime ko. Lige ramueka tabilé chojkila niru, alué ralámuli 'ma e'wegágame ju. <sup>4</sup> Alué Remónisika napu nabí najsibua ajtí jena gawichí, 'we a'wágame cha'pigá ajtí alué ralámuli, alekeri tabilé siné námame ju churigá

ko Kristo ra'íchálila 'we semátiri. Pecha siné námame júkó tachiri gite nawáligo Onorúgame jena gawichí napurigá rió neraga. <sup>5</sup> Ramueka tabilé e'wélala koriá 'we najtégame, tase alaniá ramueka. Alué Esukristo ju 'la Wa'lula ka, ramueka pe iligá u'kuchípala ralámuli niru. Ramueka gu'írili 'emi napugiti ramueka oyérinili napurigá 'sile Esusi jena wijchimoba. <sup>6</sup> Napu'lige Onorúgame newale gawí, Onorúgame ra'íchálila alarigá aníguru, sineko chóniga ilíligo, 'liko Onorúgame nejíligo bilé ra'ósali. Lige ramueka chókame sulégame nírigekuru 'yako napurigá ilile gawí, nobi Esukristo bi'wéleko ramué sulala. Alué gite 'la machiáguru Onorúgame.

<sup>7</sup> Lige ramué a'boi 'nátagaká tabilé gainawa ramué 'la sébali olá napurigá nulá Onorúgame, pecha a'wágame alawégame níriga ramué 'ónika. Ramueka pe napurigá bilé sekolí, yati gajsime. Alarigá nírukuru ramué napurigá suwábaga ralámuli alarigá 'la machimela alué bo'né Onorúgame nejio alué a'walí napurigá ramué 'la gaináwala sébali olá napurigá nulá Onorúgame. <sup>8</sup> Alekeri ramué 'la neyúsilime júkuru rekó napuchibi ikiáe. Napu'lige chibi ikiáe, tabilé che ikisá 'emi, nobi ramueka tabilé siné guwana rujsunígó. <sup>9</sup> Ramueka 'we resí oliá wejpisoka amulí me'agá a'rele ramué, nobi Onorúgame tabiléchigo a'régó ramué. <sup>10</sup> Panápurimi resí níliga e'yéniliguru ramué napurigá resí níliga eyénale Esusi. Abirigáchigo 'la ku buyásirikó ramué. Alarigá júkuru 'la ma'chiná nérékuru 'la Esusi Alawala nígame nírukuru ramué. Alarigá machimela alué ralámuli alué a'walite buyásiligo alé tabilé 'la bowechi. <sup>11</sup> Ramué ralámuli ta'chó suwiyá, nobi i'sinimi amulí me'liágó ramué Esusi ra'íchálila beníriga e'yénilichi. Alarigá júkuru 'la ma'chiná nérékuru 'la Esusi a'walila nígame nírigo. <sup>12</sup> Ramueka 'we resí níliga e'yénakuru pe Onorúgame ra'íchálila beníriga e'yéniga, nobi 'émika 'wéchigo 'la semáriga benígó Onorúgame ra'íchálila 'lige abienachigó alué Onorúgame a'walila.

<sup>13</sup> Onorúgame nila ra'íchálila regá aníguru: «Onorúgameka 'la bijchíá nejékúrame júkuru rekó abichibi ikiáe, alekeri aminabi beníraliae ramué alué rejcholi Onorúgame ra'íchálila.»\* Lige ramué ralámuli 'we ganíliga mochíruchigó Onorúgame 'yuga, napugiti Onorúgameka 'we a'lá sébali olame kame napurigá aní bo'né. Lige alekeri tabilé chijúnaga ruyá ramué Onorúgame ra'íchálila panápurimi. <sup>14</sup> 'We 'la machírúguru napu'lige ramué suwisuga, Onorúgame ajánamilikó ramué napurigá ajánaliru alué Esusi, napurigá 'pa sebámili

\* 4:13 E'nesi Salmos 116:10.

ju 'emi 'yuga napu ajtí Onorúgame alé 'pa rewagachi. <sup>15</sup> Onorúgame gu'iri ne'chí napurigá anachámala ne napu'lige resi nilia ajtígichi ne napurigá gu'irimala ne 'emi. 'Lige we'ká ralámuli 'la niraga etémala Onorúgame, 'lige cheliera 'yámala 'la nejkúrima kóriká.

<sup>16</sup> Alekeri ramué ralámuli tabilé guwana rujsunía alué rejcholi beniria. Rekó ramué sa'pálaka 'we resi ikíé, ramué alawálaka aminabi 'la naré a'walí alué Onorúgame nejílala. <sup>17</sup> Jena 'we resi nilia mochiru ramué nobi ta'méchigo wa'lú kéréko, pe yati simíramalaké. Jipe jena 'we resi nilia mochiru ramué, 'lige alekeri Onorúgame 'we 'la ganíliga etémala ramué alé re'pá rewagachi. Tabilé chieri káwé rekó resi nilia mochíriga ramué jena, 'we ganíliga mochímili ju ramué alé re'pá rewagachi. <sup>18</sup> Alekeri tabilé we'ká 'nátaga mochílime júkuru jena gawichí, pe yati suwimela alué resi nílame iligá abé 'la na'tálime ju churigá nimia alé 'pa rewagachi napu senibí mochíbuli ju ramué.

## 5

*Jena ruwimela uchéchigo bilé nuebo sa'pá nígame níwilikó 'pa rewagachi*

<sup>1</sup> Ramué sa'pálaka pe napurigá bilé gali ju, nobi ramué alawálaka tabilé siné che ikime júkó. Ramué sa'pálaka pe mukume júkuru, 'lige re'pá rewagachi uché bilé sa'pá narépuá ramué, Onorúgame nejímili ju. Alué tabilé siné suwíbame sa'pá nímala. <sup>2</sup> Napu'lige bijí jena gawichí mochiru ramué 'we seweka eperégame niru, nobi 'láchigo machiágó pe bilé rawé simáwilikó alé re'pá napu Onorúgame nejímala uché bilé nuebo sa'pá. <sup>3</sup> Alué nuebo sa'paka napurigá bilé o'pacha nímala napurigá tabilé 'yeri mochímala ramué alawala. <sup>4</sup> Ramueka 'la sa'pega mochínili napu ju nuebo sa'pá napu tabile siné che ikimela. <sup>5</sup> Onorúgame nejíkuru bo'né alawala, alekeri 'la machiáguru ramué, abiénachigo alarigá nejímili ju sa'pá 'we a'lala napurigá ramué alawala alé re'pá rewagachi mochímala. Alekeri newálikuru ramué.

<sup>6</sup> 'Lige 'la machiáguru napu'lige bijí jena mochírigo ye sa'pega, tabilé Esukristo 'yuga mochírikuru ramué. <sup>7</sup> 'Lige ramué jena mochígaká peka siné etuwíguru alué Esukristo, nobi abirigáchigo 'we a'lá niráligo ramué alué Esukristo. Alueka nabí e'negá ajtí ramué rekó ramué tabilé etuwíé. 'Lige ramueka 'la machiame alué Esukristo 'la sébali olámio. Alarigá eperégame niru ramué ralámuli 'we 'la niraga alué Wa'lula Esukristo. <sup>8</sup> Ramueka tabilé majawía alué mukíame. Ramueka buyásinlike'é alé ramué sa'pálachi napurigá 'a simela

ramué alawala alé napu ajtí alué Wa'lula Esukristo. <sup>9</sup> Alekeri 'la sébali olánilime niru napurigá najkí alué Esukristo jena gawichí mochiga bijí ajagá mochiga 'lige abiena alé re'pá rewagachi mochiga. <sup>10</sup> Bilé rawé gatémala alué Kristo ramué 'yuga (gustisia olámala), alé rukimela pala 'la sébali oláliga ramué alué 'yuga o tabilé napu'lige jena mochíriga ajagá, 'lige gastigárimala tabilé sébali olásiga ka, nobi 'la sébali olásiga ka 'we a'lá semati raweli nejímala.

*Jena ruwimela Kristo mukúligo ramué gu'iriga*

<sup>11</sup> 'La machirúguru nerumia bilé gustisia, alekeri 'la niraga etewa alué Esukristo, 'lige alekeri 'we 'la ruyewa alué 'nátali uché jaré ralámuli. Onorúgame 'la sébali machíguru chonoká mochíriga ramué, 'lige najkíguru napurigá 'we a'lá machimela 'émichigó. <sup>12</sup> Ramueka tabilé gunaruga ra'ichalía, iligá najkiá 'nalina napurigá 'la námamala 'emi napurigá Onorúgame 'nátaga mochímala. 'Émika ramué gu'irimili júkuruchigó ruyea ralámuli napu 'nátame ju pe napu etee, tabilé 'nátame ju napu alé sulachí ajtí. Alueka pecha machígó ramué Onorúgame 'yuga 'nata mochírigo. <sup>13</sup> Jaré alué ralámuli lo'í aneme ju ramué olagá, nobi Onorúgameka 'la sébali machíguru. Ta chérikáwé rekó alué ralámuli 'la anié, ramueka 'emi ralámuli gu'iriga nokia'e 'lige beníriga bilé ra'ichali. <sup>14</sup> Kristo 'we na'temame ju ramué, alekeri beníriga e'yénilia ramué. 'La sébali machiáguru alué Kristo mukúliga ramué neraga, 'lige abiénachigó mukúleku ruwábaga ralámuli gu'iriga. Alekeri beníriga e'yéniliguru ramué. <sup>15</sup> Alué Esukristo mukúleku napurigá ramué ralámuli a'rewa alué chátiri 'nátali, napu 'nátame ju ramué ralámuli pe a'boi 'nátaga. 'Lige alué Esukristoka najkíame napurigá oyérawa ramué alué bo'né Esukristo napugiti napu'lige alué Esukristo mukule 'ya 'lige alué bo'né Onorúgame ku ajániligame. Alarigá 'sile Onorúgame ramué gu'iriga. <sup>16</sup> Jípeko napu'lige bilé ralámuli etuwía ramué, tabilé alarigá na'talia napurigá 'ya. Jípeko alarigá na'talia Kristo mukúliga alué ralámuli gu'iriga. 'Yako ramué ralámuli alué Kristo pe apiépiri rió neraga etuime ke. Alekeri tabilé nirálime ke ramué alué Kristo. Jípeko ramué tabilé alarigá 'nátame ralámuli niru, jípeko tase alarigá niru ramué. <sup>17</sup> Bilé rió 'la bi'lepi 'nátaga asisáká, pe bi'lepi Kristo 'nátaga, alué rioka 'la bi'ígame sulégame nímala. Alué chátiri 'nátali 'ma tabilé 'nátame ju, pe alué nuebo 'nátalicho.

<sup>18</sup> Alarigá 'nátale Onorúgame napurigá 'la gompaniérola neraga mochiwa alué bo'né Onorúgame. Onorúgame nulele



Kristo napurigá 'la gatémala napurigá 'la ganíliga mochiwa a'bopi 'la gompaniero niraga. 'Lige Kristo nejilekuru ye 'nátili napurigá aminabi ruyewa ralámuli napurigá 'la amigo niraga etewa Onorúgame. <sup>19</sup> Onorúgame bo'né 'la ruwíguru alué 'nátili ramué ralámuli napurigá 'la gompaniérola niwa Onorúgame 'yuga. Alekeri Onorúgame nulélekuru alué Kristo napurigá 'la gatémala. 'La bijchiá mukúligo ramué gu'iriga, 'liko Onorúgame tabilé chélegá eté ramué, 'lige julárukururu ramué napurigá ruyewa ye bilé 'nátili alué ralámuli. <sup>20</sup> Ramué ralámuli nígame nírukuru Kristo nila a'walí, 'lige napu'lige ramué ruwiyae alué rejcholi, 'lige alué ralámuli 'la machime ju alué rejcholi Onorúgame náoligo pe napurigá bo'né Onorúgame ra'ichálila niraga. Kristo nulele ramué napurigá 'emi ralámuli 'la a'rémala alué resítiri 'nátili napurigá 'la Onorúgame 'yuga na'támala. <sup>21</sup> Onorúgame nulale napurigá Kristo bujémala alué ramué gastígola. Kristo tabilé che'sime nile nobi abirigáchigo gastigárilirukó alué Kristo. Onorúgame bo'né alarigá elile napurigá mukumela alué Kristo ramué nila gastigo o'togá. Alekeri Onorúgame tabilé chéríkame neraga eté jipe ramué.

## 6

<sup>1</sup> Onorúgame 'we semáriga gu'iri 'emi ralámuli, alekeri 'la semáriga naregime ju napu Onorúgame nejí. Napu a'lige naregí alué semati 'nátili, tabilé ku guwana a'rewa, tabilé chebilé 'nátili cha'piboa. <sup>2</sup> Onorúgame anile 'we 'ya: 'Ma sébakuru raweli. Akéturu ne napu'lige tániru ne alué a'walí. Jípeko gu'irimala ne 'emi napurigá 'la sébali nímalá.

Ne Páulochigó aníguru 'ma sébakuru alué raweli. Jipe ju napu Onorúgame buyana ajtí ralámuli chátiri bowechi e'yéname.

*Jena ruwimela alué Páulo 'we resí iklígo*

<sup>3</sup> Ramueka tabilé najkiá napurigá bilé rió animela: «Neka tabilé nirá alué ra'ichali, pecha sébali olá alué bo'né Páulo.» Ta siné alakime kéturu. <sup>4</sup> 'La ma'chígime nérékuru Onorúgame 'nata mochírigo ramué. 'La anachálime júturu napu'lige resí ikiá 'emi, rekó tabilé a'rélime ke ramué napurigá a'minabi e'yénawa, <sup>5</sup> rekó wejpisokia, rekó galírale mo'alá, rekó we'ká ralámuli napuime ju ramué me'lináliga, rekó 'we a'wágame nocháralie, rekó tabilé gainalia rukó gojchiá, rekó tabilé itégichi go'ame. <sup>6</sup> Rekó napuchibi ikiae ramué tabilé chubiyeti na'táligo, 'la na'táligeru ramué napurigá 'nata Onorúgame, ramué 'we 'la

anachálime ju, 'we 'la gu'irime ju ramué alué uché jaré ralámuli. Alarigá niru ramué napugiti Onorúgame nejíligime bo'né alawala. Alué alawálate 'la niraga jaro alué ralámuli, tabilé chátiri 'nátaga. <sup>7</sup> Alué alawálate abiena aminabi beníriga e'yénawa alué 'la bijchiá ra'ichali. Onorúgame nejíguru ye a'walí napurigá beníriga e'yénawa alué Onorúgame nila ra'ichali, 'lige napurigá nemípua napu'lige lanichi: «Tabilé 'la ju alué Onorúgame ra'ichálila.» <sup>8</sup> I'sínimi 'we 'la niraga etuime ju ramué, i'sínimi tabilé 'la nirálime ju ramué. I'sínimi 'we a'lá niraga ra'ichame ju ramué olagá, i'sínimi tabilé niraga ra'ichame ju ramué olagá. I'sínimi 'yégame anilime ju ramué rekó 'la bijchiá ra'ichálichi. <sup>9</sup> I'sínimi tabilé machirume neraga etuime ju ramué rekó 'we a'lá machime ke. I'sínimi amulí suwiyáguru, abirigáchigo a'lá ajagá nokísiligó ramué. Rekó wejpisolia ramué, tabiléchigo suwiyágó. <sup>10</sup> 'Lige ramueka i'sínimi 'we seléime ju nobi 'wéchigo 'la ganíliga mochírikó, ramueka 'we a'lá machiáa ye rejcholi 'we a'lá nimio. 'Lige ramué tabilé nígame nírukuru, nobi Onorúgame nila ra'ichalika napu ramué benírilia uché jaré ralámuli, 'we najtékame ju. Rekó tabilé tábiri nígame nírige, Onorúgame júkuru Wa'lula O'nó, alué suwábaga nila júkuru.

<sup>11</sup> 'Lige ramueka 'we a'lá niralia 'emi ralámuli alé Koríntochi epperégame. Ramueka ra'icháligeru 'we a'ká gompaniero niraga. Ramueka 'we a'lá na'talia 'emi 'yuga, tabilé chátiri na'talia ramué. <sup>12</sup> 'Lige ramueka nabí 'we a'lá galilía 'emi, nobi 'émika tabilé 'la galeme júkuru ramué. <sup>13</sup> Neka táaguru napurigá 'emi o'nola niraga: 'We 'la nirawa ne'chí, neka 'we 'la niraga etéguru 'emi.

*Jena ruwimela Onorúgame ramué 'yuga ajtigá*

<sup>14</sup> Bilé rió 'we 'la 'nátame nísaká Onorúgame 'yuga, tabilé gompaniérola einámala alué rió napu tabilé 'la 'nátame ju Onorúgame 'yuga.\* Bilé rió bi'wígime alawégame nísaká, tabilé 'la bi'lepi na'támala alué rió chátiri alawégame 'yuga. <sup>15</sup> Alué Esukristo tabilé gompaniérola júkuru alué Remónisi. 'Lige 'emi ralámuli tabilé gompaniérola niwa bilé rió tabilé Esukristo oyérame. <sup>16</sup> Pecha 'la júkó alé Onorúgame galíachi bajkiá tániga enalia bilé mono newárigime napu tabilé Onorúgame ju. 'Lige Onorúgame Alawálaka jena ramué sulálachi bejtékuru. Ramué sa'pálaka Onorúgame bejtélachi ju. Alekeri tabilé 'la júkuru alué Remónisi na'tálila na'talia, tase napubuwa alué 'we a'lala 'nátili

\* 6:14 Páulo 'nata ajtí napu'lige asaraga eyénachi bilé rió napurigá 'la a'nari a'wáganti ju alué oisí.

si. Ramueka Onorúgame galila nírukuru, alekeri 'we 'la bi'wígame niwa. 'Yako regá anílekuru Onorúgame:

Ne alawala asimela bejtega 'emi ralámulichi. 'Lige 'emi ralámuli panápuri e'yénachi, alué alawaka aba alemi einámala 'emi 'yuga. Alué 'la ne'chí oyérame ralámuli, neka 'we a'lá galémala alué ralámuli. 'Lige alué ralámuli ne'chí oyérame, nabí ne'chí oyérimili júkuru.

<sup>17</sup> Abiena anile Onorúgame: Buyásiwa alué ralámuli pecha 'la 'nátame ka ne'chí 'yuga.

Tabilé oyérawa alué chátiri 'nátili.

Napu'lige 'la tabilé oyérasa chátiri 'nátili, 'liko ne 'we 'la galémala 'emi.

<sup>18</sup> Abiena anile Wa'lula Onorúgame napu abé a'wágame ju:

Ne níkala 'emi ralámuli o'nola, 'lige 'émika ne 'kúchila níмили júkuru.

## 7

<sup>1</sup> 'Emi ralámuli ne amígola, Onorúgame 'we 'la sébali olame júkuru napurigá aní bo'né. Alekeri a'rewa alué chátiri 'nátili. Alué chátiri 'nátili 'ma chókame newámala ramué alawala, alésiko 'ma nayúpa pecha 'la 'nátame níriga. Abé 'la júkuru 'la sébali olame ralámuli níriga 'la níriga etewa Onorúgame.

*Jena ruwimela Páulo 'we ganíliga asáligo alué ralámuli Korinto mochígame 'yuga*

<sup>2</sup> 'We 'la ganíliga etewa ramué, ramueka pecha siné benírigo chátiri 'nátili 'emi, nibilé alué uché jaré ralámuli. 'Lige aminami tabilé asemí 'wesi ralámuli bujelía enomí 'yéyiga. <sup>3</sup> Neka pecha che anégó chibieti 'emi. Ne 'ya aníéturu 'we galeme kéturu ne 'emi. Neka tabilé chéla rekó mukíe ne 'emi gu'írige. <sup>4</sup> Neka 'la machí 'emi 'we 'la sébali olame ka, alekeri 'we ganíliga ajtíkuru ne 'emi 'yuga. Neka 'we a'lá welagá ajtíkuru, 'lige 'we a'lá ra'salagá ajtíkuru ne, rekó chibi ikíe ne.

<sup>5</sup> Napu'lige sébalige ramué alé wa'lú gawí Maseroni anilichí, tabilé siné resíbulia ramué. 'Lige alué ralámuli alé ejperégame 'la iwégame cha aní ramué alé sebasá. 'Lige ramué 'la iwégame majawía alanilía alé alué ralámulite. 'Lige ramueka tabilé machiáeke'é alakiboa alé alué ralámuli alanichi. 'Lige ramueka 'we seweka mochiru alanilía alé. <sup>6</sup> 'Lige alué Onorúgame júlaleké'é alué rió Tito anilime alé napu ramué mochílige. Alarigá ju Onorúgame, 'we a'lá gu'írame ju ralámuli napu'lige seweka mochígichi. 'Lige alué rió Tito wa'lú nejkuri sebasá alé napu ramué mochírige. Alarigá Onorúgame 'la wa'lú oyérali 'yale ramué. <sup>7</sup> 'Lige alué rió Tito jena sébaga 'we a'lá ruwí alarigá oláriga 'emi ralámuli alé Korinto. 'Lige alué rió 'la 'we a'lá galegá etérigori alué

'emi ralámulite. 'Lige ramué alué ra'íchali akisá 'lige wa'lú ra'saláruke'é. 'Lige alué Tito ruyé ne'chí 'emi ralámuli alé ejperégame 'we eténilia ne'chí. 'Lige aminami ruwí 'emi ralámuli 'we seweka mochigo ne'chí sewétisa. 'Lige aminami ruwí alué ra'íchali, 'emi ralámuli 'we nejkúrínilia mochigo. 'Lige neka alué ra'íchali akisáká uché rajpé abé 'la ganíliga rejpike'é.

<sup>8</sup> 'Emi 'we seweka mochíbale napu'lige naresa 'emi alué apeli napu ne ne'óchaga os-ele, péchigo pe'wera seweka mochíliko 'emi. Neka sewéturu 'emi seweka mochígichi, péchigo pe'wera seweléko 'emi, <sup>9</sup> wéchigo 'la ma'china ko. 'Émika yati gatele 'emi a'bopi, alekeri 'we 'la ganíliga ajtíkuru ne. Alarigá najkíliko napurigá 'emi seweka mochímala. <sup>10</sup> Bilé ralámuli chibi 'sísaká 'lige 'we seweka asimela 'la machigá cha 'siligame napu Onorúgame tabilé galeme ju, 'liko alué ralámuli a'rémala alué chátiri 'nátili, ku 'la ganíliga asimela. Nobi bilé ralámuli chibi 'sísaká, 'lige tabilé siné 'nátame ju chibi 'siliga napu Onorúgame tabilé galeme ju, 'lige alué ralámuli tabilé siné a'rémala alué chátiri 'nátili. <sup>11</sup> Nobi 'émika Onorúgamete 'yáliku alué seweli, 'lige yati gatele, tabilé naréniliga alué gastigo. 'Émika 'we ayole alué rió 'yuga napu cha 'sile, 'liko 'emi gastigáriga alué rió. 'We majale 'emi ne ayora mayega. Najkile napurigá ne gu'írimala. 'Émika 'we a'lá 'nátale. 'Émika 'we 'la sébali olale. <sup>12</sup> Neka bilé apeli osigéturu nobi tabilé osé ne napurigá gastigárimala 'emi alué rió. 'lige neka tabilé osákuru napurigá gu'írimala alué ralámuli tabilé che'síkime, pe osá ne alué osilí machináliga pala 'la bijchiá e'wánokirá 'emi 'lige machináliga pala 'la bijchiá galea 'emi ne'chí. <sup>13</sup> Napurigá nokale 'emi, 'we 'la ganíliga mochiru.

Amináchigo 'we 'la ganíliga mochiru ramué napu'lige machisáká Tito 'we 'la ganílime nile 'emi 'yuga. 'Emi wa'lú gu'írile, alekeri tabilé we'ká 'nata asale. <sup>14</sup> Ne bo'né ruigétigó 'emi 'we a'lá ralámuli ko 'lige bo'né Tito 'la etélikuru 'la bijchiá ko. Alué suwábaga ra'íchali napu ruyélige alué Tito 'emi 'la bijchiá júkuru. Alué ra'íchali napu ramué ruyelie 'emi, abiénachigó bijchiá kéturuchigó. <sup>15</sup> Alué Tito abé a'lá ganíliga asale napu'lige etesa 'emi 'we a'lá sébali oláligo alué Onorúgame ra'íchálila napu benírile. 'We 'la níriga e'tele 'emi alué rió. <sup>16</sup> 'We a'lá ra'salá ne, 'émika 'we a'lá sébali olame kame napurigá nulá Onorúgame.

## 8

*Jena ruwimela napurigá gu'iriwa alué ralámuli tabilé nígame*

<sup>1</sup> 'Emi ralámuli Esukristo oyérame, jípeko uché bilé ra'íchali akimela 'emi. Ramueka

jípeko najkiá napurigá 'emi ralámuli 'we a'lá machimela alué ralámuli alé Maseronia ejperégame, Onorúgame 'we a'lá gu'írile alué ralámuli napu napuíme nile alé bilena alué rejcholi benimea. Alué ralámuli alé ichúrimi mochígame ju alé Maseronia anilime gawí bo'ígichi. <sup>2</sup> 'Lige alué ralámulika 'we resí ikime júkuru kaka. Aminami tabilé nígame gayéniguru alué ralámuli aliena resí oliá, 'lige tabilé tábiri nígame nílekuru alué ralámuli, nobi Onorúgame 'yuga 'nátaga 'we ra'sálagá ejperégame nile alué ralámuli. 'Lige rekó alué ralámulika tabilé nígame ke, we'ká enomí napubule alué ralámuli gu'írímia alué ralámuli tabilé nígame Rusaleni ejperégame, 'lige alé o'tiame níleke'é alué enomí. <sup>3</sup> Ne 'we a'lá etiá alué ralámuli we'ká enomí napubúligo, ne alekeri 'la sébali machíguru alué ralámuli 'la napubúligo alué enomí. 'Lige alué ralámuli napu nejile, amulí suwábaga nejíkuru alué napu nígame nílige. 'Lige ramueka tabilé asemí nulélíkuru napurigá napubúmala alué enomí. Pe a'boi 'la sébali 'nátaleke'é ralámuli gu'írímia uché jaré ralámuli tabilé nígame. <sup>4</sup> Alué ralámulika alanékuru ramué olagá:

—Pe rekó, ramueka gu'íriwaráeke'é alué ralámuli tabilé nígame alé Rusaleni ejperégame.

<sup>5</sup> 'Lige ramueka tabilé we'ká enomí napubura mayélike'é alué ralámuli. 'Lige alué ralámulika 'la we'ká sebáreleke'é alué enomí napubua. 'Lige pe kulí chojkíka alué ralámuli enomí napubua, bajchá Onorúgame tánele napurigá 'la gainámala alué ralámuli napubua enomí. 'Lige aminami aníleke'é alué ralámuli nokogá:

—Ramueka 'la semáriga gu'íriwa alué Páulo —anile.

<sup>6</sup> Ralámuli alé Maseronia ejperégame 'we a'lá sébali olale. 'Emi abiénachigó 'we 'la sébali olale. Titoka we'ká napubule enomí 'emi 'yuga napurigá alué ralámuli tabilé nígame gu'írímala alué Rusaleni ejperégame. Jípeko tánili'e ramué alué Tito napurigá gayénamala napabua alué enomí alé napu mochí 'emi. <sup>7</sup> 'Emi ralámuli 'we a'lá sébali olame júkuru. 'We a'lá sébali bijchígime júkuru 'emi ralámuli Onorúgame ra'íchálila. Aminami 'we a'lá semáriga ruwime júkuru 'emi ralámuli Onorúgame nila ra'íchali. 'Lige 'emi 'we a'lá machime júkuru churigá nejkúríme ko Onorúgame. 'Lige aminami 'we a'lá galeme júkuru ramué ralámuli. 'Lige 'emi ralámuli 'we a'lá sébali olámili júkuru alué enomí napubua napu chojkíle 'emi ralámuli 'ya.

<sup>8</sup> Neka tabilé umérage nulá napurigá napubua alué enomí alé Rusaleni

o'towame. Neka pe machinale pala 'la sébali olame ka 'emi ralámuli 'lige pala 'la na'temame ka 'emi alué uché jaré ralámuli 'yuga. <sup>9</sup> 'Lige 'emi ralámuli 'we a'lá machíguru 'we semáriga gu'írilekuru ramué 'ya alué Wa'lula Esukristo. Esukristoka alé rewagachi asagá 'we semati we'ká e'karúgame nígame nílekuru, 'lige alé 'pákana rewagáchika nawálekuru ramué ralámuli gu'írímia jena, 'lige alué Esukristoka jena wijchimoba asagá tabilé nígame nílekuru. Tabilé nígame gayénale ramué gu'íríniliga.

<sup>10</sup> Jena ruimé ne churigá gu'írímile ka alué ralámuli tabilé nígame. 'Emi 'ya bamí chojkílekuru alué enomí napubua. 'Lige 'we a'lá welagá napubule alué enomí. <sup>11</sup> 'Lige neka jípeko najkíguru napurigá 'emi ralámuli 'la gainámala napubua alué enomí. 'Émika 'we a'lá welagá napubua alué enomí napu chojkílige 'emi 'ya bajchá napubua alué enomí abirigá nokísiwa 'we a'lá welagá. <sup>12</sup> Nejiwa napu ikiri nejía 'emi, pe iligá 'la ganílga nejiwa, tabilé we'ká 'nátaga. Alarigá najkí Onorúgame.

<sup>13</sup> Ramueka tabilé najkiá napurigá suwábaga nejímala 'emi. 'Emi suwábaga nejisaká, 'ma tabilé niga ejtíbímala 'emi. <sup>14</sup> Ramueka najkiá napurigá 'la o'maka niga mochímala rekó pe a'tabé nígame ke. Siné kachi a'kinana tabilé nígame nisa 'emi, 'la nejkúrímalala alué ralámuli Rusaleni mochígame. Alarigaka 'la o'maka niga mochímala enomí. Alarigá 'la tabilé siné gurúlmalala go'ame. <sup>15</sup> Alué Onorúgame ra'íchálila napu 'ya osale Moisesi, aníguru: «Alué ralámuli napu we'ká napubule alué go'ame maná anilime, tabilé rasírale. Alué napu abé u'kabi napubule alué go'ame maná, 'la sébali sebárima nile.»\*

*Jena ruwimela Páulo júlaligo Tito alé Korinto*

<sup>16</sup> Neka cheliera 'ya Onorúgame abiena 'la 'yáligame Tito alué 'nátali napurigá gu'írímala 'emi, a'chigóriga napurigá Onorúgame 'yale ne'chí. <sup>17</sup> 'Lige napu'lige ne jula alué ríó Tito alé Korinto, napurigá gu'írímala 'emi ralámuli, alué ríó Títoka 'we yati e'wá napurigá nulé ne, napugiti alué ríó 'we galeme ju 'emi a'chigóriga napurigá ne 'we galeme ju 'emi.

<sup>18</sup> Bilé ríó jula ne Tito 'yuga. Alué ríó 'we semáriga ruyame ju Onorúgame nila ra'íchali. 'Lige alué ralámuli jena ejperégame napu napuíme ju Onorúgame nila rejcholi benimea, anile:

—Alué ríó 'la ju julalia —anile. <sup>19</sup> Alué ralámuli jena ejperégame alué Esukristo oyérame, alué ralámulika korule alué ríó napurigá alé Rusaleni simela ramué 'yuga.

\* 8:15 Páuloka aní siné kachi alué enomí tabilé kógisaká alué uché jaré ralámuli tabilé nígame, liko 'ma we'kámala alué enomí. E'nesi Éxodo 16:18.

'Lige ramueka o'tolia alué enomí alué ralámuli tabilé nígame 'yawa napurigá alué ralámuli 'la cheliera 'yámala alué Onorúgame, 'lige aminami napurigá alué ralámuli 'la machimela ramué ralámuli 'la semáriga gu'irilio. <sup>20</sup> 'Lige ramueka 'we a'lá sébali gateru alué ra'íchali napurigá pe nujubapi kachi tabilé 'wesi che animela alué enomí gite, 'lige aminami napurigá 'we a'lá sébali sebámala alué enomí alé Rusaleni. <sup>21</sup> 'Lige Onorúgame 'we a'lá sébali machíguru alarigá nochalio ramué. 'Lige ramueka najkiáguru napurigá alué ralámuli 'we a'lá machimélachigó churigá ka ye nejkúrali.

<sup>22</sup> 'Lige ramueka julawa uché bilé rió alué oká rió 'yuga. Alué rió 'we a'lá sébali olame ju napurigá najki Onorúgame. Ramueka we'sá eteme niru alué rió 'we a'lá sébali olachi. Alué rió 'we 'la 'nata napurigá 'emi 'we 'la sébali olamio alué enomí napubua. <sup>23</sup> Ne bo'né jula alué Tito, 'lige alué ralámuli Esukristo oyérame jena Maseronia jula alué uché jaré oká rió. Alué oká rió 'we 'la sébali olame ju napu nulá Kristo. <sup>24</sup> Pe rekó 'la niráwagó 'emi alué rió alemi e'yénachi. 'Lige ramué 'la we'sá ruyeru alué rió 'emi 'we a'ká ralámuli ko. 'Lige ramueka alekeri najkiá napurigá alué ra'íchali 'la bi-jchiá nímala. 'Lige a'kinana ku jeka sigá 'la ruimeli júkuru alué rió alarigá olárilige 'emi ralámulite alé. Ruyémili júkuru ralámuli jena ichúrimi mochígame, alué Esukristo oyérame ralámuli, 'we 'la niraga etéliru.

## 9

<sup>1</sup> Neka tabilé uché aminabi osénili ye osilí 'emi ralámuli napurigá napubúmala enomí 'emi. Pe ye osilite 'la sébali nímala napurigá 'la sébali olámala 'emi. <sup>2</sup> 'Lige neka 'we a'lá machí 'emi ralámuli 'we a'lá welagá mochigo napurigá gu'irimala 'emi uché jaré ralámuli. 'Lige neka jena mochígame ralámuli ruyé alué ra'íchali 'emi 'we a'lá sébali nejkúrínilia mochigo. 'Lige 'emi ralámuli napu'lige chojkile napubua alué enomí 'ya bamí, 'lige alué ralámuli jena Maseronia mochígame akisá, amulí suwábaga alué ralámuli chojkilechigó napubua enomí. <sup>3</sup> 'Lige ne jula alemi alué bakiá rió ne gompaniérola napurigá 'emi ralámuli 'we a'lá gatega mochímala alé sébachi alué bakiá rió. 'Lige jena mochígame ralámuli 'we a'lá ruyé 'emi 'we a'lá napubua mochigo alué enomí napu o'toboli ju alé Rusaleni. Neka tabilé 'yegánili. <sup>4</sup> 'Lige jaré ralámuli jena Maseronia eperégame si simámili júkuru ramué 'yuga. 'Lige 'emi ralámuli tabilé 'cho napubuga mochísaká alué enomí, 'liko ramué 'we chijunáwili júkuru. 'Lige 'emi ralámuli abienachigó

chijunámili júkuru. <sup>5</sup> 'Lige napurigá ta chijunámala 'emi napu'lige ramué sebasa alé napu 'emi mochí, 'lige alekeri jula ne ye bakiá rió alemi alué Esukristo oyérame, napurigá 'emi ralámuli 'we a'lá gatega mochímala alué napu eki o'toboli ju alé Rusaleni anilichi. 'Lige ramué ralámulika tabilé najkiá napurigá nejmála bilé ralámuli napugiti uché jaré ralámuli 'we a'wágame tánichi, pe nejmála napu eki 'la ikíroba nejja, 'lige 'la 'we a'lá ganiliga nejmála.

*Jena ruwimela churigá gu'irilime ko alué uché jaré ralámuli napu tabilé nígame ju*

<sup>6</sup> 'Lige 'emi ralámuli 'la námaka akiboa ye ra'íchali: Alué ralámuli pe u'kabi talí echágame ka, pe u'kabi 'wímala. Alué ralámuli we'ká echágame ka, alueka abé we'ká 'wímala. 'Emi ralámuli 'la we'ká ne-jisa alué alé Rusaleni o'towame, 'lige 'emi ralámuli we'ká narémala ku pe a'kinana kachi. <sup>7</sup> 'Lige bilé rió nejmánilisaká, 'lige alué rió sébali olámili júkuru, tabilé 'yegámili júkuru alué rió. 'Lige tabiléchigo e'wérlí júkó kaka, pe iligá 'la sébali oliame júké'e 'nalina. Onorúgame 'we 'la galéguru alué ralámuli napu 'we a'lá ganiliga nejmá ju, napu tabilé we'ká 'nátaga nejmá ju. <sup>8</sup> 'Lige Onorúgameka nejmámi júkuru napu eki tábiri resí laru, napugiti Onorúgameka nígame kame alué we'ká e'karúgame tábiri. 'Lige alekeri alué Onorúgame 'we semáriga nejmámi júkuru alué e'karúgame napu resí lalia ramué, 'lige 'emi ralámuli 'we semáriga nochámili júkuru alué Onorúgame nejmála a'walite. <sup>9</sup> Aka alarigá anime júpaché alué Onorúgame nila rejcholi: Alué rió 'we semáriga gu'irilekuru alué ralámuli tabilé nígame,

'lige abé we'ká 'yámala.

'Lige alekeri Onorúgame tabilé siné we'kawámala alué rió

'we 'la semáriga gu'iriligo alué ralámuli tabilé nígame.\*

<sup>10</sup> 'Lige alekeri tabilé chérékuru rekó bilé rió we'ká nejmá enomí alé Rusaleni o'towame, napugiti Onorúgame 'we a'lá aminabi 'yámili kame alué we'ká enomí alué rió napurigá alué rió 'la aminabi 'yámala uché jaré ralámuli. Alarigá ju napurigá bilé rió echame gu'iríniliga uché jaré ralámuli, Onorúgame abé we'ká 'yámili ju talí, 'lige abé we'ká rakémala alué echarúgame.

<sup>11</sup> Onorúgame 'we a'lá aminabi 'yámala 'emi ralámuli abé we'ká enomí 'lige aminabi a'walí napurigá 'emi 'la aminabi nokísimala alué we'ká ralámuli gu'iria. 'Lige suwábaga alué 'nátili 'we semáriga ma'chínamala. 'Lige alué ralámulika alé Rusaleni mochígame wa'lú cheliera 'yámala Onorúgame, napugiti semáriga gu'iriligime ramué ralámuli. <sup>12</sup> 'Lige ye enomí napu nejmá 'emi we'ká ralámuli,

\* 9:9 E'nesi Salmos 112:9.

we'ká ralámuli 'we semáriga narémala alué enomí. 'Lige abiénachigó we'ká ralámuli 'we 'la nirámala Onorúgame. <sup>13</sup> Alué ralámuli napu ye enomí narémili ju, cheliera 'yámili júkuru Onorúgame. Alué ralámuli alarigá 'la machimela 'emi 'we 'la e'weme ko Onorúgame napurigá nulá Kristo. 'Lige 'we 'la niraga etémala Onorúgame napugiti 'we 'la nejkúrigoriká 'emi 'la napubúligo alué enomí. <sup>14</sup> 'Lige alué ralámuli alarigá 'we a'lá cheliera 'yámala Onorúgame napugiti Onorúgame 'yáligame alué 'nátili 'emi ralámuli alué Korinto epperégame 'lige Onorúgame tánimala napurigá aminabi 'yámala alué a'walí 'emi. <sup>15</sup> Wa'lú cheliera 'yámala Onorúgame napugiti asíriga wa'lú gu'írili nábole 'emi ralámuli. Onorúgameka pecha gobólome júkó rekó wa'lú nejkurie. Ramueka tabilé nígame niru bilé ra'íchali 'la najteme cheliera 'yalime Onorúgame. Ramueka pecha siné sebárirugó alué 'nátili.

## 10

*Jena ruwimela Páulo nulame ko Esukristo nila nocháilachi*

<sup>1</sup> Kristo 'we a'lá kilí rió nile, Onorúgame a'walila nígame nile. Nabí 'la 'nátaga ajtime nile gu'írimia uché jaré ralámuli. 'Lige neka abiénachigó alarigá nínilí napurigá nile alué Kristo, alekeri ne 'la kilí eyénaguru. 'Lige alué uché jaré ralámuli anime ju ne 'we majalégame rió kará alué we'ká ralámuli 'yuga. 'Lige anime júkuru alué ralámuli, ne mejká asagáká 'we a'wágame nulame osilí osame kará tabilé majaga. 'Lige napu'lige ne a'bé asagáká, 'liko 'ikilí ajtime kará ne, pe majá ajtime kará ne. 'Lige alué ra'íchalika tabilé pe'tá bijchiá júkuru napurigá anime ju alué ralámuli. <sup>2</sup> 'We 'la 'nátaga mochiwa. Napu'lige simisá ne alemi 'emi e'nemia, tabilé cha nokiboa napurigá ne tabilé ne'ochámala 'emi. Tabilé alarigá na'tawa ne ne'óchame ko pe apiépiri rió neraga. Ne'óchame ju ne alué Onorúgame a'walílate. <sup>3</sup> Bijchiá júkuru ne apiépiri rió neraga ko, tabiléchigo ne'óchagó ne napurigá apiépiri rió niraga. <sup>4</sup> Napu'lige ne ne'ócha, tabiléchigo ralámuli a'walílate ne'ógó ne, pe Onorúgame a'walílate gite. Ramueka jena mochiúkuru nakoá Remónisi si pe Onorúgame a'walílate gite ka 'la neyúrowareké. <sup>5</sup> Ye a'walila gite 'la suwábaga umérome ju ne apiépiri tabilé 'la 'nátame rió 'yuga, alué napu sairúgame ju alué napu ramué benírilia Onorúgame nila ra'íchali. Ramueka tánilia Kristo napurigá bi'wémala a'pílipi ralámuli na'tálila napu chátiri ju 'lige napurigá 'la bi'lepi 'nátaga mochiámala. <sup>6</sup> 'Lige ramueka 'la 'nátaga mochiúkuru napurigá ne'ochawa ramué alué ralámuli tabilé sébali olame napu Onorúgame nulá.

'Emi 'we a'lá na'tásaká Onorúgame nila rejcholi, 'lige bilé rawé tabilé sébali olásaká, ramueka 'we 'la e'negá mochiwa 'emi.

<sup>7</sup> 'Lige 'emi ralámuli pe apiépiri rió neraga eteme ju ramué. 'Emi ralámuli 'la Kristo oyérame ka, 'la na'tawa ye: Aka ramué ralámuli Kristo oyérame nirupaché. <sup>8</sup> Alué Wa'lula Esukristo 'yáguru ne'chí a'walí napurigá gu'írimala ne 'emi. Alueka pecha nejígó a'walí napurigá ne 'emi resí olámala. Tabilé chijúniga ruwí ne. <sup>9</sup> 'Lige 'emi ralámuli tase mayewa ne osáo napurigá ne 'emi majárimala alué osilite, tase alarigá na'tawa 'emi. <sup>10</sup> Jaré ralámuli anime ju alué osilí 'we ená anigá osirúgime kará, alarigá osame kará ne, 'lige ne jena sebásaká, tabilé alarigá ra'íchame kará ne, pe tabilé benegá ra'íchame kará ne. <sup>11</sup> Jaré ralámuli alarigá anime ju, tabiléchigo bijchiá júkó. 'La sébali olame ju ne napurigá osá ne. Napurigá aní ne alé osilichi alarigá 'sime ju ne alé sebasa. Neka najki napurigá 'emi ralámuli 'we a'lá námaka mochiámala ye ra'íchali.

<sup>12</sup> Ramueka tabilé alieri niru tase napurigá alué ralámuli 'we gunaruga oyame ralámuli. Alué rió 'we gunaruga oyame ka, pe 'nátame ju napurigá bilé rió lo'í niraga. Alué rió alarigá lame ju: «Neka abé 'la júke'é me'tigá alué uché jaré ralámuli.» <sup>13</sup> Ramueka pe bi'lepi 'nátili 'nátame niru Onorúgame 'yuga. 'Lige bo'né Onorúgame 'we nejkútime júkuru napurigá ramué 'we a'lá machiboa pala 'la sébali oliao ramué. Onorúgame júlalekuru ramué alé Korinto napurigá 'emi beníríwa. Pe yecho ra'íchawa ramué. <sup>14</sup> Uché jaré ralámuli tabilé che animela 'emi a'boi beníríga Onorúgame nila ra'íchali. Napu'lige ramué sebaru alé napu 'emi ralámuli mochi, tabilé 'wesi ralámuli i'tigé alé napu beníame ju Onorúgame nila rejcholi. <sup>15</sup> 'La képa bilé rawé 'emi 'we 'la Onorúgame oyérasaká, 'lige 'emi 'we a'lá gu'írimala ramué napurigá simawa aminá uché bilena gawichi napu tabilé siné akeme ju alué ralámuli Onorúgame nila ra'íchali. Ramueka tabilé benírili Onorúgame nila ra'íchali alué ralámuli napu 'ma akeme ju Onorúgame nila ra'íchali. <sup>16</sup> 'Lige alarigá 'emi ralámuli 'we a'lá gu'írimala ramué ralámuli alé uché bilena simálíchi uché jaré ralámuli benírímia. Tabilé beníríwa ramué napu uché jaré 'ma beníriliu.

<sup>17-18</sup> 'Lige alué rió bo'nepi inósaká, 'lige alarigaka tabilé 'la ju. Bo'né Onorúgame ruisáká 'we a'lá sébali rió ko, 'liko 'la ju. Bilé rió ra'íchánalesaká uché jaré ralámuli 'yuga churigá nejkútime ko Onorúgame, a'lá ju. Ramué a'boika tabilé regá aniboa: «Ramueka 'we ejobénegame niru.» Iligá 'we a'lá gu'íríwa ra'íchali ruyea uché jaré ralámuli. Onorúgame a'walila gite benírilia ramué. Ramué 'oni tabilé gainawa bilé 'nátili 'nata.

## 11

*Jena ruwimela Páulo ra'ichaligo sairúgame nirağa alué ralámuli 'yuga napu tabilé a'lá benirime ju Onorúgame nila ra'ichali*

1 Pe rekó e'káwagó ne'chí ye ra'ichali ruwichi ne, ta'mé 'we alá kápá ye ra'ichali kaka napu ne ruimeli ju. Pe gunaruga ra'ichálime ju ye ra'ichali.\* Neka alarigá ra'ichámala napugiti 'emi alarigá ra'ichame kame, napurigá 'emi 'we alá 'nátaga gepúmala ye ra'ichali. 2 Lige ne bajchá ye ra'ichali ruwimela. Onorúgame nejile ye 'nátili napurigá ne 'la galémala 'emi. Napu'lige sebasa ramué alé napu ajti Kristo, neka 'emi 'yámolá alué Kristo 'la sébali 'la bi'wigame. Alarigá anéturu ne Esukristo 'ya bajchabé rawé. Napurigá 'yánili bilé o'nó bo'né malala alué re'mali napurigá newímala alué iwé si 'we 'la bi'wigame sulégame, alarigá 'yánili ne 'emi Esukristo. Tabilé najki ne napurigá uché bilé 'nátili beniboa. Abiénachigó najki ne napurigá bi'wigame alawégame niwa. 3 Lige 'emi ralámuli 'la machileké 'yégiliga alué Eba anilime muki 'ya, alué napu Arani 'yula nilige. Lige neka alekeri majá 'emi ralámuli, siné kachi a'chigóriga ikisábá 'emi ralámuli. Lige 'emi ralámuli bilé rawé ta'mé 'la 'nátaga mochisa, lige alué Remónisika nasibúmala 'emi ralámuli. Lige alué Remónisi 'ma se'nú 'nátili 'yámala 'emi ralámuli. Tabilé 'la bi'lepi na'támala 'emi Kristo 'yuga. 4 Lige 'emi ralámuli tabilé 'la 'nátaga mochinti júkuru. Pe apiépiri ralámuli ra'ichálila 'we yati bijchíginti júkuru 'emi. Lige bilé rió ruisá regá: «Kristoka tabilé alarigá ju, tase napurigá ruwime ju Páulo», anisá, lige 'emi ralámuli yati bijchígame júkuru. Lige bilé rió anisá uché bilé alawá nerúgará, lige 'émika ralámuli yati benínalime júkuru alué 'nátili. Pecha anime júkó 'emi ralámuli: «Tabilé 'la ju alué ra'ichali», tabilé anime ju 'emi. Lige bilé rió anisá alué Esukristo tabilé a'kabámana jáwame ju, 'émika yati bijchígame ju. 5 'Emi 'la akisáká alué ralámuli 'we riólame ko napurigá e'wélala, napu'lige ne ruwichi abiénachigó a'lá geputékuru. Ne abé 'la machí me'tigá alué ralámuli. 6 Neka ta'mé 'la ra'ichame júkuru alé we'ká riógachi, neka 'wéchigo 'la machime kéréko Onorúgame ra'ichálila, we'ká beniri ne 'emi. Lige 'emi ralámuli 'la machileké alarigá ko ne. Aka ne we'sá ruyéché 'emi ralámuli ye ra'ichali.

7 Lige ne peka siné rawé goblálome júkuru 'emi ralámuli alué ra'ichali beniriga. ¿O'wéchala resitiri ju tabilé goblálila? Neka tabilé benirime ju napurigá ne najtékame nimala. Neka pe najki napurigá 'emi 'we najtékame nimala. 8 Lige ne'chí 'we gu'iri

alué ralámuli Esukristo oyérame alé ichúrimi mochígame. Enomí 'we nejime ke alué ralámuli, lige neka nareme kéturu alué enomí alué ralámuli nejichi napurigá ne 'la aminabi einámala beniria alé Korinto asagá. 9 Lige ne alé 'emi ralámuli 'yuga asagá, enomí resí lame ke ne i'sínimi, lige neka tabiléchigo siné tániko 'emi ralámuli enomí, neka láchigo a'pílime kame alué enomí alué ralámuli alé Maseronia mochígame. Alué ralámuli alé Maseronia mochígame nokame ke alué enomí a'pá alé Korinto, lige alué enomí nareme ke ne. Ne bo'neka 'we alá 'nátame ke ne 'emi ralámuli 'yuga. Lige neka aba 'we inánili alué ra'ichali beniria, lige neka tabilé nejkumega benirie ne 'emi. 10 Neka 'la bijchiá aní ye ra'ichali. Aka alué Kristo 'la bijchiá ra'ichame nílekuru. Lige ne alieri rió júkuruchigó. Bi'lepi 'nátame ju ne alué Esukristo 'yuga. Neka tabilé siné narémala alué enomí alé wa'lú ejiro Akaya anilichi mochígame ralámuli nejíjala. 11 ¿Chonigá alarigá ra'icha ne? ¿Mayé 'emi ne tabilé galeo 'emi? Onorúgame 'la sébali machíguru 'we alá galeo ne 'emi.

12 Alué ralámuli tabilé 'la benirime ye ra'ichali, 'we gunaruga ra'ichame ju, lige alué ralámulika najki napurigá ramué narémala alué enomí napu nejí 'emi ralámuli napurigá nareme ju a'boi. Ramueka tabilé nakiáguru alarigá. Lige ramueka 'we a'ká rió níruke'é tase napurigá alué ralámuli. 13 Lige alué ralámuli ra'ichali benirame anime ju: «Kristo júlane ramué napurigá ramué nulame niwa aleké nila nóchali», anime ju alué ralámuli. Lige alué ralámulika tabilé pe'tá bijchiá anime júke'é alarigá alaniá, pe 'emi enomí bujéniliga anime ju alué ralámuli alaniá. 14 Lige alué Satanasi anilime 'we 'yégame júchigó. Anime ju alué Satanasi: «Ne ju alué santo ánjeli, alué Onorúgame gu'irame ju ne», anime ju alué Satanasi. Lige alué ralámuli alué Satanasi oyérame, ¿'lacha ta 'yégame ralámuli nimalachigó? 15 Lige ramueka 'la machiáa alanigá e'yéname ko alué ralámuli. Anime ju: «Ramueka 'we semáriga oyérame niru alué Onorúgame. Ramueka Onorúgame gompaniérula niru», anime ju alué ralámuli. Lige rekó alarigá ra'ichaga oyame ke alué ralámuli, abirigá alé injiérnochi simámala alué ralámuli suwisá, pecha 'la bi'igame alawégame ke aniáwé alué ralámuli. Lige alué bo'né alé Onorúgame alarigá olámili júkuru alué ralámuli, napugiti alué a'boi ralámuli alarigá nokálígame. Alekeri alué bowé mélekuru alué ralámuli.

*Jena ruwimela Páulo 'we resí ikílígo*

\* 11:1 Alué Páulo ra'ichámori napurigá bilé rió lo'i noli chu'achika ronobóchaga.

<sup>16</sup> Tabilé ganilime ju ne alarigá ra'icha. Ra'icha ne napurigá lo'í neraga, tabiléchigo lo'í júkó ne. 'Lige 'emi ralámuli 'we gepume júkuru ne'chí napu'lige napurigá bilé rió lo'í alarigá ra'íchachi ne. 'Lige ne alekeri alarigá ra'ichámala, napurigá 'emi ralámuli 'we a'lá gepúmala ye ra'íchali napu ne ruimeli ju. <sup>17</sup> 'Lige alué Wa'lula Esukristo tabilé siné ra'ichale napurigá bilé rió lo'í, neka ra'íchámali júkuru napurigá bilé rió lo'í napurigá 'emi 'we a'lá gepúmala ye ra'íchali, alarigá ra'ichálíchi 'we a'lá gepume kame 'emi ralámuli. <sup>18</sup> 'Lige alué tabilé Esukristo oyérame ralámuli, alarigá ra'ichame júkuru napurigá bilé rió lo'í neraga. 'Lige 'emi ralámuli 'we a'lá gepume júkuru alué ra'íchali. 'Lige alekeri alarigá ra'ichama olá ne. <sup>19</sup> 'Lige 'emi ralámuli 'we semati ra'íchali benió olá alué alieti ra'íchali akigá, 'lige 'we a'lá ejebénigame kólá 'emi. <sup>20</sup> 'Lige 'emi ralámuli pe apiépiri ralámuli 'we e'weme júkuru. 'Émika yati e'wame júkuru napu chúbiriga nulalíe. Rekó napurigá bilé ajágame alarigá nulalíe, yati e'wame júkuru 'emi. 'Lige 'emi ralámuli tabilé chéláme júkuru rekó re'wániga bujilíe alué napu nígame ju 'emi. 'Lige abiena 'we galeme júkuru 'emi alué rió rekó i'nílíime kachi. 'Lige aminami tabilé chéláme júkuru 'emi ralámuli napurigá bilé bulito alarigá nochárilie. 'Lige 'emi 'we a'lá nirame ju alué ralámuli napurigá e'wélala neraga rekó napuchibi nokame kachi. Rekó wejpisokie 'emi alué gujsite, 'émika abiena 'we 'la galeme júkuru alué ralámuli. <sup>21</sup> Neka pecha alarigá olame júkó 'emi. ¿'Émika najkí napurigá wejpisópua? ¿Najkiáchalá napurigá bujewa enomí? ¿Najkiáchalá napurigá 'we riólaga ra'íchawa? 'Lige 'emi ralámuli uché rajpé abé a'ká mayele ke alué ralámuli me'tagá ramué. Bilé lo'í niraga ra'icha ne, napurigá 'la na'tawa.

'Lige ne alarigá ra'ichámala napurigá bilé rió lo'í napurigá 'la machimea 'emi tabilé 'la 'nátame ko. <sup>22</sup> ¿Ebreo ralámuli ju alué 'yégame ralámuli? Néchigo ebreo ju. ¿Israelita ralámuli ju alué 'yégame ralámuli? Néchigo israelita ju, alué ralámuli napu Onorúgame rojánale napurigá Onorúgame oyérame níkala. ¿Abraámi rijímala ju alué 'yégame ralámuli? Néchigo Abraámi rijímala júchigó.† <sup>23</sup> ¿'La Kristo oyérame ju alué ralámuli? Neka abé rajpé 'la Kristo oyérame ju. Neka pe bilé rió lo'í neraga ra'ichame ju, alué ra'íchali a'láchigo 'la bijchiá kéréko. Neka abéchigo a'wágame nóchagó, 'lige abéchigo mejkami eyénagó alué Onorúgame ra'ichálila benírige. 'Lige neka abé we'sá galírale bajchilígó pe Onorúgame nila

ra'íchali benírige eyénachi ne. 'Lige aminami abé a'wágame wejpisókíame júkuru ne. 'Lige we'sá amulí mukíe ne. <sup>24</sup> 'Lige malígisa cha'pirúgame ju ne alué ralámuli alé Israeli mochígámete, alué ralámuli tabilé Esukristo oyérame. 'Lige napu ikisá cha'pisá, baisá makué miná gi makuesa wejpirú ne alué w'ichí si'pinárigámete. <sup>25</sup> Baisá wejperú ne alué gusite. Sinéchigo amulí me'líru ne rejete bajsibuga. Siné rawé napu ne asagá enale alué barko alé wa'lú ba'wichí, 'ma bokuí kiba, 'lige ne alé ba'wichí rejpi pe'tá alué rabileta cha'piga, bilé rukó 'lige bilé rawé. 'Lige sinéchigo abiénachigó 'ma bokuí kiba barko alé wa'lú ba'wichí enagá. 'Lige uchéchigo siné enegé ne alé bárkochi abiénachigó 'ma bokuí kiba alé wa'lú ba'wichí. <sup>26</sup> Neka ichúrimi eyéname ke, i'sínimi alé bakóchimi simírome ke ne, i'sínimi amulí si'líime ke ne. I'sínimi 'we majame ke ne alué chigórigame ralámuli napu'lige alemi bowésiga enárigichi. 'Lige i'sínimi alué ralámuli Israeli mochígámete me'linálíime kéturu ne'chí. 'Lige i'sínimi alué ralámuli tabilé Israeli mochígámete abiénachigó me'linálíime kéturu ne'chí. 'Lige ne alé we'ká riógichi ajtígichi, 'lige i'sínimi alué ralámuli 'we cha'pinálíime kéturu ne'chí. 'Lige alé jami eyénachi, 'we majame ke ne alué ajágame jobátigame. 'Lige napu'lige ne eyénachi alé bárkochi i'sínimi amulí chigólime ke ne. I'sínimi amulí me'liame ke ne alué ralámulite napu Onorúgame oyérame korí, tabiléchigo Onorúgame oyérame ke anile ko. <sup>27</sup> 'Lige neka nóchame kéturu 'la iwégámete tabilé resibika. Amulí tabilé anáchame kéturu ne i'sínimi. 'Lige i'sínimi 'la iwégámete gojchinálíga oyame kéturu ne. 'Lige aminami 'la iwégámete ejelime kéturu ne balámaka. I'sínimi tabilé go'gá 'sime kéturu ne nocha. 'Lige jarénami 'la iwégámete ukiwame kéturu ne, pecha i'tégámete ka alué gemá napurigá gemaboa.

<sup>28</sup> 'Lige neka 'we resí níliame kéturu. 'Lige aminabi uché rajpé we'ká 'nátaga ajtime ke ne alué ralámuli alué Esukristo oyérame ralámuli 'yuga, alué napu napuime ju alué Esukristo ra'ichálíla benímea. <sup>29</sup> 'Lige alué ralámuli Esukristo oyérame resí ikíchi, 'lige ne 'we cháláme júturu napurigá ne bo'né resí ikíme niraga. 'Lige alué ralámuli Esukristo oyérame chibi 'sisa, 'lige ne 'we chijúname ju napurigá ne bo'né chibi 'síkame niraga. <sup>30</sup> Neka pecha che anígó 'we 'la ralámuli ko ne 'lige 'we 'la anáchame. Neka 'we resitiri ju, tabilé a'walí nígame ju ne. Neka pe aníguru napurigá 'la machiboa Onorúgame bi'lepi 'we a'wágámete ju. Alué simíguru ne'chí gu'ría. <sup>31</sup> Onorúgame júkuru alué Wa'lula Esukristo O'nola, 'lige alué ralámuli

† 11:22 Abraámi bajchá o'wísigime nile alué ralámuli ebreo 'yuga.

Onorúgame oyérame nabí cheliera 'yámili ju Onorúgame. 'Lige ye ra'ichali napu ne ruwí, 'la bijchiá júkuru. Onorúgame 'la machíguru ne 'la bijchiá ra'icho. <sup>32</sup> Ne ruwimela churigá gu'iriliga Onorúgame ne'chí alé Ramasko anilichi we'ká riógachi napu tegótigame ju nologá 'we re'pá ilígame. Alué rió abé wa'lula Arétasi anilime rió alé Ramáskochi ajchale bilé rió selígame abé u'tabela. 'Lige alué rió selígame u'tabela we'ká sontalo júlale ne'chí cha'pínaliga. Bochígimi nologá mochí alé we'ká riógichi napurigá ta ma'chínamala ne. <sup>33</sup> 'Lige ne 'we majá 'yamía alué sontáloté, 'lige 'la na'temáturu ne alé we'ká riógichi ajtígichi, 'lige ma'chí pátú ne alé wa'lú go'lechi tegoli 'yétigichi. Alé re'pá alé u'tá ewágichi alégana ma'chí pátú ne alué wa'lú atabechi ajchagá o'wiga re'kiburu ne alé. 'Lige alarigá alué Onorúgame 'we alá semáriga gu'irikuru ne'chí, 'lige alarigá tabilé cha'pirú ne.

## 12

*Jena ruwimela Páulo ruwíligo napu Onorúgame etéraligo*

<sup>1</sup> 'Lige neka chijuna ruyá napu ikilige ne. 'Lige siné kachi pecha nejkúrimereko ye ra'ichali 'emi ralámuli níriga. 'Lige neka abirigá ruimeli júkuru iligá tabilé riólíga. Ruimé ne napu Onorúgame etérale ne'chí. <sup>2</sup> Neka machí bilé rió Kristo oyérame similiga alé rewagachi napu Onorúgame ajti, 'ya nile makué naó bamí. 'Lige pala 'la ajagá similiga alué rió o pe alué alawálacho similegeré Bo'né Onorúgameka alá sébali machíléké. Neka tabilé 'la machí. <sup>3-4</sup> 'Lige neka 'la machí alué 'la sébaligo alé napu ajti Onorúgame, alé napu 'we semárikáchi ju. Pe alué bo'né Onorúgameka 'la machíléké alarigá moyénaliga alué rió alé rewagachi. 'Lige alé rewagachi ruyéleru alué rió bilé ra'ichali. 'Lige Onorúgame tabilé lisensia 'yale napurigá ruwimela alué rió alué ra'ichali napu akele alé rewagachi. Ne kéturu alué rió napu simile alé 'pa rewagachi. <sup>5</sup> Uché bilé rió nísaká, 'lige neka 'la ra'ichámala ke napu ikile, nobi tabiléchigo uché bilé rió nílekó, pe ne kéturu. Alekeri tabilé uché rajpé ra'ichámala ne, neka tabilé gunarúgame nínili. Onorúgame 'sile ne'chí o'toa. Neka pecha a'wali nígame ka. <sup>6</sup> Ne ra'ichásaká napu ikile ne 'pa rewagachi, 'la bijchiá nímala ke. Rekó regá ra'iche, pecha lo'í kéréko ne. Tabiléchigo aminabi animélagó ne. Ralámuli pecha machígó churigá ikílíga ne alé re'pá rewagachi, pecha machígó ne 'yega aníá. Alekeri abé alá ju tabilé ra'ichalia.

<sup>7</sup> 'Lige aminami bo'né Onorúgame lisensia 'yale alué Satanasi napurigá nejkumémala ne'chí 'yuga. 'Lige ne rió alarigá 'la tabilé

gunarume nímala alué Satanasi nejkumesa. 'Lige ne tajché olásigaká alué Satanásite, 'lige 'we rasigá gunarume nímala ne, ne 'we semati etérumé kóriká Onorúgamete. Alekeri Onorúgame lisensia 'yale napurigá alué Satanasi se'winá olámala ne'chí napurigá tabilé gunarume nímala ne. <sup>8</sup> 'Lige ne baisá tani alué Wa'lula Esukristo napurigá bujémala alué napu ne'chí resí olale alué Satanasi, <sup>9</sup> 'lige ané ne'chí Esukristo: «Ne a'walila 'we 'la ju, aluete 'we 'la anachawa. 'We 'la ma'chígime nérékuru napu'lige ne gu'irichi alué bilé ralámuli 'we resítiri.» Alekeri 'we 'la ganílga ajti ne rekó ne chibi ikié, 'la sébali néré Kristo nejkúrime ko napurigá 'la anachawa. <sup>10</sup> 'Lige ne 'we alá ra'salagá ajti rekó 'we resí ikié ne, alué Esukristo uché rajpé abé alá semáriga gu'irame ju ne'chí. 'Lige ne i'sínimi 'we rasigá resí ikime ju, tabilé chérigá neyúsisa 'ínili. 'Lige i'sínimi alué ralámuli ne'chí me'linálime júkuru alué Esukristo ra'ichálila ruigá eyénachi ne. I'sínimi 'la iwégame resíriga oyame ju ne, tabilé chérigá neyúsisaká 'ínili. 'Lige neka tabilé bilé a'wali nígame júkuru napurigá neyúsimala ne alé. 'Lige neka abirigáchigo 'la neyúsime júkuru napurigá bilé rió wa'lú a'wali nígame níraga, 'lige pe Onorúgame a'walila gite 'la neyúsime júkuru ne.

*Jena ruwimela we'ká 'nata asáligo Páulo choniká mochigo alué Onorúgame oyérame ralámuli alé Korínto mochígame*

<sup>11</sup> Pe napurigá bilé rió lo'í níraga ra'icha ne, alarigá ra'ichame ju ne napurigá 'la akimela 'emi. 'Émika 'we 'la semáriga ra'ichame ju alué chátiri ralámuli 'yuga. 'La ra'ichátékuru ne'chí olagá rekó pe u'tabela ke ne, napugiti neka abé najtékame ra'ichame kame me'tigá alué ralámuli napu mayeme ju e'wélala ko Krístote julárigame. <sup>12</sup> Onorúgame 'yale ne'chí alué a'wali napurigá ralámuli sa'wámala ne napu'lige ne 'emi 'yuga ajtigé. Abiénachigo wa'lú a'wali 'yaru ne Onorúgamete napurigá 'la anachámala ne napu'lige 'we resí oliachi ne. Alarigá nejkúrile Onorúgame napurigá 'la machigá mochímala 'emi Krístote julárigame ko ne. <sup>13</sup> Neka tabilé naré alué enomí napu ne'chí 'yámorile 'emi. Neka pe naréturu alué uché jaré Onorúgame oyérame ralámuli nejlála. Tabilé 'la nísaká alué 'emi nila enomí naregía, 'liko e'káibogó ne. Neka tabilé chibi 'síliga mayé ne. 'Émika pe abisibi najtékame ju napurigá alué uché jaré ralámuli.

<sup>14</sup> 'Lige neka uchéchigo 'ma sébali gatega ajtikuru alemi simea ne napu 'emi ralámuli mochí. 'Ma baisá nímala ne alemi simiá. 'Lige ne alé uché sebasa, neka tabilé najkí napurigá 'emi ralámuli nejmála enomí, iligá



neka najki 'nalina napurigá 'emi ralámuli 'la bi'lepi 'nátaga mochímala alué Esukristo na'tálilacho. Alué enomika tabilé najki ne. 'Lige neka napurigá bilé 'kuchi o'nola alarigá ju. Bilé o'noka 'yame ju go'ame alué 'kuchi. 'Kuchi pecha nóchame ka napurigá 'yame go'ame o'nola. <sup>15</sup> Siné kachi resí lásiga ka 'emi, neka abalá nejímala suwábaga alué napu ekí ni ne. 'Lige neka we'ká rawé nochámala 'emi ralámuli gu'iriga siné kachi resí lásiga ka. Ta cheri káwé ne mukusaká 'emi gu'iriga. Neka abé galesa 'emi ralámuli, 'lige 'emi abé 'la galémili júkuru ne'chí, nobi ta'méchigo 'la alarigá galeme káréko 'emi ne'chí.

<sup>16</sup> Neka pecha nejkumégó alé, nobi jaréchigo anigó pe 'yégiga olá ne. Tabilé bijchiá ju. <sup>17</sup> Tasemi jula ne bujéniliga enomí. <sup>18</sup> Ne júleturu Tito uchéchigo bilé gompaniero 'yúriga napu 'emi 'la machime ju. ¿Pe 'yégile Tito 'emi 'yuga? Tabilé 'yégile. Alué Tito 'emi gu'irile napurigá ne. Tabilé tábiri bujélikó. Alué 'lige néchigó Onorúgame Alawala ajchágame niru sulachí. Bi'lepi 'nátame nírukuru. Ramué okaka Kristo oyérame nírukuru.

<sup>19</sup> 'Lige siné kachi 'emi mayéréko ramué pe alarigá ra'ichame ko pe napurigá 'emi 'we a'ká ralámuli. Ramueka Esukristo oyérame niru, 'lige Onorúgame 'we a'lá repúguru ramué napurigá ramué tabilé 'yega ra'ichawa. 'Lige ramué 'we a'lá galelía 'emi ralámuli. Ramueka benírilia 'emi napurigá 'we a'lá benimela Onorúgame nila ra'ichali, 'lige 'emi ralámuli 'la alarigá 'la a'wágame sulégame nímala. <sup>20</sup> We'ká 'nata ajti ne, 'lige ne alé Korinto sebasa, machimela ne pala 'la sébali oláliga 'emi Onorúgame 'yuga. 'Émika tabilé ganíliga etémala ne'chí napugiti neka 'emi gastigárimala ta sébali olásaká Onorúgame nila ra'ichali. Siné kachi napu'lige ne alé sebasa jaré 'emi 'we cha anía mochímala, 'lige jaréchigo 'we najkuelia mochímala uché jaré nóchame etega, jaré 'we yati na'áumala 'lige jaré ralámuli we'ká ka napúsa 'we bochí anía mochímala, pe uché jaré ne'ochia, 'we ganílime ju uché jaré ralámuli ne'ochaga pe tabilé akériga alué ralámuli, 'lige jaré 'we riólame ju, 'we jebénigame korime ju, 'lige we'ká ka napúsa a'bopi ra'ichame ju tabilé niraga uché jaré ralámuli. <sup>21</sup> Onorúgame bo'né 'la machírimala ne aliena i'nílime ko 'emi. 'Liko 'we chijúnaga rejjímala ne, 'lige nalámala ne alué we'ká ralámuli we'ká rawé 'we i'níliga e'yénachi alué we'ká ralámuli cha nokogá, 'lige tabilé ku a'kabámala 'nátame ju alué ralámuli. Tabilé a'reme ju we'ká umugi 'yuga okoa, 'lige tabilé siné táame nile bilé e'kali, pecha niramé níliga Onorúgame nulalila.

## 13

*Jena ruwimela Páulo uchéchigo siné juláligo napurigá 'la gatémala alué ralámuli 'yuga*

<sup>1</sup> Neka 'ma osá simíkuru alé 'emi ejperélachi, we'ká ralámuli etéguru 'emi 'we cha noká mochigo. Onorúgame ra'ichálila 'ya nerúgame ani pecha gastigárima júkó bilé rió ta i'télasaká oká restigo o bakia ma, <sup>2</sup> 'lige ne 'we a'lá machíguru 'emi ralámuli alarigá ko, we'ká ralámuli etiáguru 'emi 'we i'níliga e'yénachi, 'lige uché simigá ne alé, 'ma 'la gatémala ne 'emi 'yuga alué tabilé 'la 'nátili. Neka 'ya 'la aniéturu napurigá 'la gatega mochiwa. Jipeco uchéchigo siné nábola ne ye osilí. Napu'lige ne alé sebasa, 'we a'wágame gastigárimala ne 'emi napu 'we 'ya 'we cha nokogá e'yénilige 'emi. <sup>3</sup> 'Lige 'emi 'la machimela alué Kristo nuleo ne'chí. Gateme ne 'emi 'yuga napurigá Kristo niraga. Alueka pecha najsiname júkó gatega 'emi 'yuga. Abéchigo a'wágame gateme júkuru 'emi 'yuga. <sup>4</sup> Bijchiá júkuru alarigá a'réligo napu'lige gulusichi ujhagá me'líiru napurigá tabilé a'wágame niraga, nobi napu'lige 'ma ku ajánasa, 'liko 'la ma'chígime nérékuru wa'lú a'wali nígame níligo. Ramué abiénachigó tabilé a'wali nígame kárékuru, nobi ramueka wa'lú a'wali nígame niru ko sulachí Onorúgame nila a'walila, 'lige alué a'walila gite gu'iriliguru ramué 'emi.

<sup>5</sup> 'Lige 'emi ralámuli 'we 'la na'tawa pala 'la bijchiá Onorúgame oyérame ka 'emi. 'Lige 'émika aníguru 'la bijchiá Kristo Esusi oyérame ko. Pala 'la bijchiá ka, rukiboa 'emi a'bopi. 'Lige 'la bijchígime nísaká 'emi Onorúgame nila rejcholi, ¿tabilé machí 'emi ralámuli alé sulálachi ajtigó bejtega alué Kristo Esusi? Alarigá júkuru 'emi ralámuli 'la bi'lepi 'nátaga ejperégame nísaká alué Esukristo 'yuga. <sup>6</sup> 'Emi 'la bi'lepi 'nátaga mochísaká Esukristo 'yuga 'liko abiénachigó 'la machimela neka bi'lepi 'nátame ka Esukristo 'yuga. <sup>7</sup> 'Lige ramué ralámulika tániwa Onorúgame napurigá alué Onorúgame 'we a'lá semáriga gu'irimala 'emi, napurigá 'emi tabilé siné resiti na'támala. Neka tabilé chélá rekó tabilé niraga etuwé ne'chí. Neka iliga najki napurigá 'emi ralámuli 'we a'ká nímala Onorúgame 'yuga. Rekó 'émika mayé ramué tabilé sébali olame ko, abé 'la ju 'emi 'we a'ká ralámuli nímala. <sup>8</sup> Ramueka tabilé aniboa 'we a'lá nocharu ramué o tabilé 'la nocharu ramué, tase aniboa ramué. Ramueka 'we a'lá sébali o'wé e'inaru tabilé chériga 'yégiva Onorúgame. Ramueka 'we a'lá sébali bijchiga ruwa. <sup>9</sup> Napu'lige ne chibi 'sika einásaká, pe bo'né Onorúgame 'la ma'chí pame ju ne'chí, 'lige 'we 'la ganíliga ajti ne. 'Émika ye etega abé a'lá niraga etémala Onorúgame

'lige abé 'la narémala Onorúgame a'walila. Ramueka 'we tánilia Onorúgame napurigá 'emi 'we 'la sébali olame nímala. <sup>10</sup> Tabilé gastigárinili ne 'emi, a'bopi ku na'táwaguru. Alekeri osé ne 'emi, napurigá 'ma gatega mochiwa, ne ta'chó sébachi alé. Ta gatésaká 'emi 'liko gastigárimala ne 'emi Esukristo a'walila gite. Onorúgameka pecha nejí ko alué a'walí napurigá ne resí olámala 'emi. Alueka nejíkuru napurigá gu'írimala ne 'emi napurigá 'la sébali olame nímala 'emi.

<sup>11</sup> 'Emi ralámuli Esukristo oyérame, pe ikipi kápá ye ra'íchali, pe ikipi ra'íchali ruimé ne, 'we a'ká ralámuli nisa 'la kápá 'emi. 'La oilawa, 'lige 'la bi'lepi 'nátaga nokísiwa o'maka 'la nakúriga nokísiwa. Alarigá 'la kápá. Onorúgame júkuru 'we galeme ramué, 'lige nejime ju bilé iwérali napurigá tabilé we'ká 'nátaga mochiwa, tabilé chélagá, tabilé seweka, 'lige tabilé majaga. <sup>12</sup> 'Lige 'emi ralámuli 'we a'lá niraga repórimé niwa 'emi a'bopi. <sup>13</sup> Alué ralámuli alué Esukristo oyérame jena mochígame napu ne ajtí, alué suwábaga wa'lú reporalí nábola.

<sup>14</sup> 'Emi ralámuli 'we a'lá semáriga niraga naresa 'la kápá alué napu nejí Wa'lula Esukristo, alué napu 'pa rewagachi ajtí. 'We semáriga naresa 'la kápá 'emi ralámuli alué ganílili napu Onorúgame nejí. Abiénachigo 'we 'la 'nátaga e'yénawa Onorúgame Alawala 'yuga.

Pe ikí kápá ye ra'íchali. Wa'lú cheliérabá.

## Yeka Ju Alué Osilí Napu Osele Páulo Alué Ralámuli Galasia Mochígame

*Kuira 'emi ralámuli Galasia rewégachi ejperégame napu eki Onorúgame oyérame ju.*

<sup>1</sup> Ne Páulo osá ye osilí, ne napu ju Esukristote julárigame napurigá ne nulame níkala alekí nila nóchali.\* Tabilé 'wesi ralámuli ajchá ne'chí napurigá nulame níkala ne, pe Esukristo 'lige Onorúgame ajchá ne'chí napurigá nulame níkala ne napu Onorúgame najkí, Onorúgame napu walú a'wali nígame ju napu Esukristo ku ajánale napu'lige mukusá. <sup>2</sup> Ne, 'lige uché jaré napu júchigó Onorúgame oyérame napu ne 'yuga mochí jena, oselia 'emi ralámuli. <sup>3-4</sup> Onorúgame 'lige Wa'lula Esukristo abichilubi 'we 'la semáriga gu'írasa 'la képa 'emi napurigá abichilubi 'la Wa'lula Esukristo oyérame níkala 'emi, alué Wa'lula Esukristo napu mukule ramué nila gastigo nareka.† Alarigá narele gastigo ramué neraga napurigá apiépiri ramué ralámuli 'la bi'wígame alawégame niwa 'la bijhígisiká walú a'wali nígame ko Esukristo, napurigá najkí Onorúgame ramué O'nola.

<sup>5</sup> O'maka ralámuli 'la Onorúgame oyérasa 'la képa senibí rawé.

*Jena ruwimela alué Galasia mochígame ralámuli se'nú 'nátali beníligo*

<sup>6</sup> Tabilé nami ne chonigá aliena yati a'réligo 'emi Onorúgame oyeria, alué Onorúgame napu júlale Kristo‡ buinániliga 'emi chátiri bowechi. Jipe pe se'nú ra'íchili oyéraga jaro 'emi. <sup>7</sup> Tabilé it'é uché bilé ra'íchali, pe iligé mochí 'nalina uché jaré ralámuli napu najsibume ju alué a'lala ra'íchali Kristo nila. <sup>8</sup> Onorúgame walú gastigo 'yasa 'la ke ne'chí 'lige ne gompaniérola tabilé 'la Onorúgame nila ra'íchali beníriga e'yénisiká ramué. Rekó bilé santo ánjeli ke 'lige se'nú ra'íchili benírísia nawasa 'emi tabilé 'la Onorúgame nila, Onorúgame injiérnochi júlasa 'la képa. <sup>9</sup> Uchéchigo siné ruwimé ne: Bilé ralámuli pe se'wináriga beníriga einasa uché jaré ralámuli, pe 'yégiga, alueka injiérnochi júlasa 'la képa Onorúgamete.

<sup>10</sup> 'Emi 'la machíguru tase ra'íchaga eyenio ne napurigá 'la ganílga etewa ne ralámulite. Neka najkí 'nalina napurigá 'la ganílga etewa ne Onorúgamete. Ne ra'íchame nísaká pe napurigá ralámuli najkí, 'liko tabilé 'la Kristo oyériga benírimikuru ne alué rejcholi 'emi.

*Jena ruwimela churigá 'la nóchaligo Páulo Esukristo nocháililachi*

<sup>11</sup> 'Emi Onorúgame oyérame napurigá ne, neka 'we 'la ma'chígime ruwíbá tabilé pe apiépiri ralámuli nila ko suwábaga ra'íchali napu 'emi beniri ne. <sup>12</sup> Tabilé 'wesi ralámuli beniri ne'chí ye ra'íchali napu ne 'emi beniri, pe Esukristo beniri ne'chí ye ra'íchalika a'kinana ku ajánasa.§

<sup>13</sup> 'Ma akiáleké 'emi 'yabesi churigá 'sílgo ne. Napu'lige 'we 'la sébali olá Onorúgame oyérame kórigá 'we 'la bijhígime ke ne 'la rewagachi moínalime ko pe 'la sébali olagá napu nulale Moisesi 'we 'ya napurigá oyérame ju alué ralámuli jurío, aminami we'ká ralámuli me'á ne napu eki Esusi oyérame nile. <sup>14</sup> 'Ma umeri ne suwábaga ralámuli jurío 'lige 'we 'la nóchili 'yaru ne 'we najtékame alué ralámuli jurío níriga, rekó pe aba aliena re'malí ke alué ralámuli napurigá ne, pe aba lakí bamígame. 'Lige regá nulame ke ne: «'La sébali oyérawa Onorúgame 'la a'chigóriga napurigá nokame nile alué 'ya ejperégame ralámuli jurío, tase we'káwaga.» 'Lige aminami néchigó 'la sébali olame ke napu nulame ke ne bo'né. <sup>15-16</sup> Onorúgameka 'ma 'nata asale ne'chí wanápamia napu'lige ta'chó ochérachi ne, wanápamia asale ne'chí napurigá Esukristo ne'chí nulémala napurigá simela ne Onorúgame ra'ichálila benírimia alué ralámuli tabilé jurío. Napu'lige Esukristo ne'chí 'yuga ra'ichasa alé a'bemi amulí sébaga Ramasko\* anilichi, neka tabilé simí chejaré ralámuli rukemia churigá nochálime ko Esukristo nocháililachi. <sup>17</sup> 'Lige tabilé simí ne alé we'ká riógachi Rusaleni rewégachi ra'ichamia alué ralámuli 'yuga, alué ralámuli napu Esukristo nocháililachi nóchale 'ya, alué napu bijí ejperé jipe. Pe uché bilé gawí bo'ígichi simí ne Arabia rewégichi. 'Lige a'kinana ku Ramasko anilichi simí ne, napu we'ká riógachi ju.

\* **1:1** E'nesi glosario «apóstol». † **1:3-4** Gastigóká ju napu naréputi ju napu'lige suwisuga 'we cha nokame níriká jena wíjchimoba mochiga 'lige aminami tabilé e'wásiga napu najkí Onorúgame. 'Lige apiépiri ralámuli rekó tabilé chibi 'sime ke abiena resitiri alawégame kéré tabilé 'la oyérame nísaká Onorúgame. ‡ **1:6** Páuloka naó rewá uneme nile Esukristo rewá, i'sínimi Kristo anime nile, 'lige i'sínimi Kristo Esusi anime nile, 'lige i'sínimi Esukristo anime nile, 'lige i'sínimi Esusi anime nile. E'nesi glosario «Kristo» 'lige «Jesús». § **1:12** Mayelia beníríligo alué Páulo alué Esúsita alué 'we a'lala ra'íchali maligi bamí a'kinana alué Esusi ajánasa. \* **1:15-16** Páuloka 'yamia enale Esusi oyérame ralámuli galírale mo'amia 'lige bijí tabilé 'cho sébachi alué Páulo alé Ramasko anilichi 'we chárigá ra'ósiga ilibale alemi napu enale alué Páulo, 'we chárigá rasole alué Páulo. 'Lige a'ligerikáchi alué Esusi alué Páulo owile napurigá alué Esusi oyérame níkala alué Páulo.

<sup>18</sup> 'Lige a'kinana Esukristo oyérasa bakiá bamí kachi, 'lige simí ne Rusaleni anilichi Pegro (Sepasi) machimea 'lige 'yuga ra'ichamia, alué napu nile Esusi 'yuga nóchame 'ya napu'lige jena ajtígichi Esusi. Makué maligi rawé ajti ne alé Pegro bejtélachi. <sup>19</sup> Tabilé 'wesi etiá ne alué uché jaré napu Esusi 'yuga nóchame nile, pe alué Pégrocho 'la etiá ne. Abiena etéturu néchigó Santiago,† nobi alueka tabiléchigo nóchame nílekó alué Esusi nocháililachi, alué napu Esusi nasípasi bonila ju. <sup>20</sup> Onorúgame etea ajti ne'chí ne osá chujkúgichi. Tabilé 'yégali ju ye ra'ichali napu ne osá.

<sup>21</sup> 'Lige a'kinana alé Rusaleni yéniga simí ne alé Siria rewégame gawí bo'ígichi, 'lige kúchigo Silisia rewégame gawí bo'ígichi. <sup>22</sup> 'Lige alué ralámuli napu ekí Esukristo oyégame ju Jurea anilichi mochígame tabilé 'cho siné eteme ke ne'chí, <sup>23</sup> alué ralámulika pe anigá e'yénale a'bopi ne'chí olagá: «Alué Páulo 'yako ramué ralámuli me'linálime karae, ramué napu Onorúgame oyégame niru napu jena Jurea mochiru, 'lige jípeko machiaa 'ma 'la oyériligo alué ra'ichali 'nátili napu ramué Onorúgame oyégame benía mochiru we'kanami re'obachi.» <sup>24</sup> Alésíko alué ralámuli Jurea mochígame regá aní: «'We a'lá ju Onorúgame, 'we 'la 'nátili 'yale alué Páulo.»

## 2

*Jena ruwimela uché jaré napu nóchame ju Esukristo nocháililachi 'we 'la etéligo Páulo*

<sup>1</sup> A'kinana ku Rusaleni simí ne alé Silisia yéniga, Bernabé 'yuri ne 'lige Títochigó, alésíko 'ma makué naó bamí kéturu napu'lige Esukristo ne 'yuga ra'ichasa alé Ramasko a'bemi. <sup>2</sup> Onorúgame jula ne'chí remugíchi napurigá alé Rusaleni simela ne. 'Lige 'ma alé Rusaleni sebasa ne, neka ra'ichaturu alué Pegro 'yuga, 'lige alué Juani, 'lige Santiago waná 'yériga mochiga napu nile e'wélala alé re'obachi nulame 'lige ruyéturu ne napurigá machimela alué ralámuli tabilé jurío benírige eyenio ne chiena 'la semáriga nejkura ajtígó Onorúgame. 'Lige 'we 'la machígime ruyé ne alué e'wélala alé re'obachi nulame napurigá 'la kilí mochímala benírira ralámuli bi'lepi 'nátili, napurigá tabilé rioksi nímala napu beniri ne alué ralámuli tabilé jurío. <sup>3</sup> 'Lige rekó tabilé jurío kachi alué Tito, alué e'wélala nulame tabilé nulale napurigá sikíreka pápua alué Tito pe'tá isílala wi'chila,\* <sup>4</sup> rekó jaré ralámuli mo'igé alé pachami 'we semá anime anemia

alué e'wélala nulame napurigá nulémala sikiréniliga alué Tito isílala pe'tá wi'chila. Alué ralámulika pe e'wérali nulamia mo'ile alemi napurigá ku uchéchigo oyérawa ramué alué Onorúgame napurigá oyégame ju alué ralámuli jurío, alué ralámuli juríoka tabilé we'káwaga nokísime ju sikirélime pe'tá isílala wi'chila u'kuchítiri ejtemali pe kulí o'chérísime napurigá nokame nile alué abé 'yabé epperégame ralámuli. Alué e'wélala nulame níriká 'la sébali oyériga enale Esukristo alué Tito rekó tabilé sikirétigame ke alué Tito pe'tá isílala wi'chila. <sup>5</sup> 'Lige ramueka tabilé e'wiru alué chátiri 'nátame ralámuli napurigá 'emi ralámuli abichilubi 'we a'lá oyéraga nokísimala Onorúgame napurigá oyera mochí 'emi jípe alué Onorúgame.

<sup>6-7</sup> 'Lige alué e'wélala alé re'obachi nulame napu Esusi 'yuga e'yéname nile 'we ra'ichaturu ne'chí 'yúgachigó, 'lige suwábaga napu ruyé ne'chí neka 'ma machime ke. 'Lige tabilé se'winárikárele alué níriga napu benírige eyénale ne alué ralámuli tabilé jurío. Alueka 'we 'la nírárturu 'nalina, alueka yati machile 'la Onorúgamete nulérigime ko ne alué Onorúgame ra'ichálila beníríniliga alué ralámuli tabilé jurío, a'chigóriga napurigá nuléliru alué Pegro Onorúgame ra'ichálila beníríniliga alué ralámuli jurío. Tabilé chéré rekó e'wélala ke alé re'obachi nulame, Onorúgameka najkí 'nalina napurigá ralámuli 'we 'la bi'wígame alawégame nímala 'nalina. <sup>8</sup> Alué Esukristo napu nóchali 'yale Pegro napurigá nulame nímala 'lige benírime nímala alué ralámuli jurío, pe abaleké Esukristo 'smi ne'chí nóchali 'ya napurigá nulame nímala ne 'lige benírime nímala ne alué ralámuli tabilé jurío.

<sup>9</sup> Alekeri alué Santiago 'lige Pegro (Sepasi)† 'lige Juani napu nile abé e'wélala, napu nile alé re'obachi nulame, 'la nírale 'lige regá aníturu: «Ye oká rió Páulo 'lige Bernabé 'la bijchiá 'la Onorúgamete mochiárigime ju napurigá benírimala Onorúgame ra'ichálila alué ralámuli tabilé jurío.» 'Lige aminami regá aníturu: «'La 'emi gompaniérola níwa ramué Onorúgame nocháililachi. 'Émika simámala benírímia alué Onorúgame nila ra'ichali alué tabilé ralámuli jurío, 'lige ramueka aba jena ejtebiwa alué Onorúgame nila ra'ichali benírira ralámuli napu ju jurío.» <sup>10</sup> 'Lige aneru ramué okánika napurigá senibí 'la nélegá nokísiwa suwábaga ralámuli tabilé nígame. Neka senibí 'la gu'rame ju alué ralámuli tabilé nígame, 'yasi jípe abiénachigó.

† **1:19** Alué Santiago oká rewégame nile, Akobo anilime nílechigó. 'Lige tabilé 'yáloru bílé nóchali (apóstol) Esúsíte napu'lige Esusi bijí jena wijchimoba ajtígichi. Abé a'kinana napu'lige mukusá Esusi, wa'lula gayénale alé Rusaleni alué Esusi 'yuga e'yéname benírime. \* **2:3** E'nesi glosario «circuncisión».

† **2:9** Pégroka oká rewégame nile, Sepasi anilime nílechigó.

*Jena ruwimela Páulo ne'óchaligo alué Pegro*

<sup>11</sup> 'Ma we'kabé bamí kachi a'kinana napu'lige alué Pegro alé Antiokía anilichi nawasa napu ne ajtígichi, 'we a'wágame ne'ocha ne alué Pegro suwábaga ralámuli akériga. <sup>12</sup> Alué Pégroka 'we 'la go'yame ke alué ralámuli tabilé jurío 'yuga, 'lige a'kinana napu'lige jisá jaré ralámuli Santiago gompaniérola, a'ligesí i'kilimi alué Pegro 'ma tabilé 'yuga go'áturu alué ralámuli tabilé jurío 'yuga napugiti majáligime alué Santiago gompaniérola, 'lige i'kilimi 'ma a'réturu 'yuga go'yá ne'ochara mayega. <sup>13</sup> 'Lige uché jaré jurío Antiokía epperégame abichigó i'kilimi 'ma a'réturuchigó alué ralámuli tabilé jurío 'yuga go'yá. 'Lige alué Bernabé ne gompaniérola abichigó 'ma a'réturuchigó i'kilimi alué tabilé jurío 'yuga go'yá. <sup>14</sup> Alekeri 'ma ne'ocha ne alué Pegro suwábaga ralámuli etériga regá anegá: «Aka mueka 'ma a'regéché alué ralámuli jurío nila 'nátili rekó jurío ke mué, 'lige ¿chonigá ala'simíché mueka? Chijuna 'smíguru mué alué tabilé jurío ralámuli 'yuga go'yá. 'Liko mueka tabilé 'cho a'régame kéré alué ralámuli jurío nila 'nátili. 'Lige alué ralámuli tabilé jurío alieti etega lámala 'we 'la ko alué ralámuli jurío nila 'nátili peka 'la kachi.»

*Jena ruwimela Páulo ruwíligo suwábaga ralámuli rekó tabilé jurío ke abiena 'la moinámli ko 'pa rewagachi 'la bijchigasaká Esukristo nila ra'ichali*

<sup>15</sup> Ramueka ralámuli jurío nírukuru, tase tabilé ralámuli jurío alué ralámuli napu tabilé machí churigá ka Onorúgame oyéralia. Ramueka 'la machime nírukuru churigá oyérilime ka Onorúgame. <sup>16</sup> 'Lige ramueka 'we 'la machime nírukuru bilé ralámuli 'la bi'wime ko alawala 'la bijchígame nisaká wa'lú a'walí nígame ko Esukristo. 'We 'la machime nírukuru tabilé bi'wígame alawega mochime ko ralámuli rekó 'we e'wérali olame ke napu nulale Moisesi 'we 'ya tabilé bijchígame nisaká nawáligo Esukristo ramué nila gastigo o'tomea napu ramué naréputi nilige.

<sup>17</sup> 'We 'la oyérlia Kristo 'lige uchéchigo oyérlia ramué alué Onorúgame pe napurigá oyérame ju alué ralámuli jurío, 'we 'la sébali olagá napurigá nokame ju alué a'boi ralámuli jurío, alarigá ka tabilé 'la ju. <sup>18</sup> Alué Kristo ju napu nejí alué 'nátili napurigá uché ku oyérawa Onorúgame pe napurigá alué ralámuli jurío oyérame ju? Alué Kristoka tabilé alieri 'nátili nejí, napugiti tabilé 'la kame ku uché cha'piá alué 'nátili tabilé a'lala 'ma 'la a'rérigame. Napu'lige ku cha'pisá ne alué chátiri 'nátili 'ma ku chátiri alawégame gainámala ne bo'né. <sup>19</sup> Neka 'ma

a'ré alué ralámuli jurío nila 'nátili, neka 'we 'la sébali oyeri 'nalina Onorúgame, tase pe napurigá 'nátame ju ralámuli jurío. <sup>20</sup> Ne bo'neka tabilé ni a'walí. Neka pe Kristo nejíjala a'walite bejtékuru. Onorúgame júlale alué Kristo alawá o'tóriga napurigá ne'chí 'yámala. 'Lige 'we 'la nejkúrume ju alué Kristo napu 'we gallilime ju Onorúgamete. Jípeko alué Kristo Alawala ne sa'pálachi pachágana ajtí. 'We 'la galé alué Kristo ne'chí. Ne wa'lú gastigo narémili ke, alué Kristo 'nalina narele ne'chí niraga. Alarigá mukule alué Kristo ne nila gastigo nareka. Alekeri mukule alué Kristo. <sup>21</sup> Neka tabilé gaweli Onorúgame nejkúrachi. 'La moináwili níriká 'pa rewagachi pe 'la sébali olagá napurigá nokame ju alué ralámuli jurío, 'liko ¿tchhiri gite mukumeli nímiche Kristo?

### 3

*Jena ruwimela Páulo ruwíligo Onorúgame Alawala 'we 'la semáriga gu'frame ko ralámuli*

<sup>1</sup> 'Emi ralámuli Galasia mochígame, 'la tachíriri. ¿Chieri 'smíkó 'emi 'yéigiga? Ne chiena 'la aniéturu alé gulusichi ujchagá mukúligo alué Esukristo alué napu ku 'pa rewagachi simile. <sup>2</sup> Aka nejiásibá bilé ra'ichali. ¿Naretu 'emi alué Onorúgame Alawala pe 'la sébali olagá napu Moisesi nulale o péchala 'we 'la bijchígiga wa'lú a'walí nígame ko Onorúgame? Napu'lige 'we 'la sébali oyérisiga alué ra'ichili napu Esukristo ruwile, a'liko 'la narékime ju Onorúgame Alawala. <sup>3</sup> Aka 'émika 'ma 'we 'la oyéraché Onorúgame Alawala, ¿'lige ku a'réwarábá Onorúgame Alawala oyeria 'lige uchéchigo oyériwará alué Onorúgame pe napurigá oyérame ju alué ralámuli jurío? 'La tabilé 'nátanti júké' é 'emi. <sup>4</sup> ¿Pe rioksi oyérale 'emi alué Onorúgame? <sup>5</sup> Napu'lige Onorúgame 'emi 'yachi bo'né alawala 'lige sa'wachi we'ká 'emi ralámuli tabilé jurío tabilé ma'chílime, 'émika láleké: «Ramueka 'we 'la sébali olame niru. 'We 'la sébali oyérame niru Onorúgame 'la napurigá nulale Moisesi.» Aminami láleké: «'We newásiga piesta 'la 'we nejkúrimala Onorúgame», láleké 'emi ralámuli. Tabiléchigo alarigá júkó. Onorúgameka nejjime ju bo'né alawala 'lige 'we 'la nejkúrime ju napu'lige 'emi 'we 'la bijchígiga gepuchi alué ra'ichali napu ruyme ju ne 'emi.

<sup>6</sup> Abraámi 'we 'la bijchígale 'we 'ya napu Onorúgame anele 'yamio ralámuli bo'né alawala a'kinánami we'ká bamí. Alésiko Onorúgame 'we 'la sébali río neraga etele alué Abraámi. <sup>7</sup> 'We 'la machiboa 'emi suwábaga napu ekí 'la bijchígime ju napu anile Onorúgame, alueka 'la sébali oyérame nimio Onorúgame napurigá Abraámi. <sup>8</sup> Onorúgameka regá anele alué Abraámi 'we

'ya: «'We 'la sébali ralámuli neraga etémala ne suwábaga ralámuli tabilé jurío napu eki 'la bijchigi napu aní ne, 'lige aminami ne bo'né alawala 'yámala ne alué ralámuli.»\* <sup>9</sup> Alekeri gite suwábaga ralámuli 'we 'la na'temaka etelia Onorúgamete a'lá bijchígime napu aní Onorúgame a'chigóriga napurigá na'temale Onorúgame alué Abraámi napu 'we 'la bijchígile napu anile Onorúgame.

<sup>10</sup> Osilí 'ya nerúgame regá aní: «We'ká ralámuli mayeme ju 'la rewagachi moinalime ko pe 'la sébali olagá alué napu Moisesi osale, tabiléchigo 'wesi 'la rewagachi moyéname júkó pe 'la e'wérali olagá. Alué alarigá nokame ka pe Riáblote cha'piruga mochígime kéré.»† <sup>11</sup> Alué ralámuli 'we 'la sébali olame, alueka ju napu 'we 'la bijchígime ju napu aní Onorúgame 'lige napu 'la e'wame ju. <sup>12-13</sup> 'We e'wérali oliá sébali olagá napu nulale Moisesi mayega rewagachi moinalime ko 'la sébali olásiká, pe se'wináriga kéré alué 'nátili, abé 'la ju 'nalina bijchígisiga Esusi nawáligo mukumea bilena gulusichi ramué neraga alué gastigo nareka napu ramué narépuli ke, alarigá na'tásiká 'la rewagachi moinawa. Onorúgame ra'ichálila regá aní: «Alué 'we chátiri rioka bilena gulusichi uchugá me'liame ju.»‡ <sup>14</sup> Mukule Kristo Esusi napurigá suwábaga alué tabilé ralámuli jurío 'la narémala alué Onorúgame Alawala, alué napu 'la bijchígime ju napu aní Onorúgame 'lige abiena suwábaga ralámuli napu 'la bijchígime ju napurigá anele Onorúgame alué Abraámi.

*Jena ruwimela Onorúgame 'we 'la sébali olame ko napu sébali olámiorile*

<sup>15</sup> 'Emi Onorúgame oyérame napurigá ne, apiépiri ralámuli bilé osilí newasa 'la sébali olámiriká bilé nóchali 'ma tabilé guwana wijchimeli júkuru, 'ma pecha che ikimeli júkó rekó 'ma tabilé sébali olánilie. <sup>16</sup> Onorúgameka anele alué Abraámi 'we 'ya: «Neka julámala bilé mué rijimala napu ajchágame nímala ne Alawala napu ochéramala nujubami we'ká bamí a'kinana napurigá 'emi 'la alawégame nímalachigó ne Alawala.» Alué Abraámi rijimala Kristo nile, alué napu ramué nila gastigo narele. Alué Kristo 'yame ju bo'né alawala suwábaga ralámuli napu 'la oyérame ju Onorúgame. <sup>17</sup> Neka pe ruigá aní 'émika 'we 'la sébali olagá ejperégame ko alué nulalí rejcholi napu a'rele Moisesi 'we 'ya naó sientio bamí na baisá makué abé a'kinana alué Abraámi mukusá. Moisesi níriká

tabilé chéréle napu Onorúgame anele alué Abraámi. <sup>18</sup> 'La moinalime nisaká rewagachi pe 'la sébali olagá napu nulá Moisesi 'liko tabilé che anémepeché Onorúgame alué Abraámi alué Kristo julamio. Abraámika pe 'la bijchígile napu anile Onorúgame.

<sup>19</sup> 'Lige 'tchitiri gite osale Moisesi alué nulalí rejcholi napu 'ya osale? Alué nulalí rejcholi osisá simile Moisesi napurigá machimela ralámuli 'we chátiri alawégame ko rekó tabilé cha nokame ke jaré, 'lige 'we rokáreligo bilé alué ralámuli buyáname chátiri bowechi. Jipe 'ma sébapá 'lige alué ralámuli buyáname alé chátiri bowechi napu nawale alué Onorúgame Alawala a'remia. Aminami Onorúgame júlale jaré santo ánjeli napurigá nulémala osíniliga alué Moisesi alué nulalí rejcholi. 'Lige Moisésika osale napurigá ralámuli machigá nokísimala tachiri najkiá Onorúgame. <sup>20</sup> Napu'lige Onorúgame alué Abraámi ruyea we'ká bamí kachi a'kinana nawamio bilé alué Abraámi rijimala,§ a'lige alué Onorúgame bo'né ra'ichale alué Abraámi 'yuga. 'Lige jipe, alué ralámuli napu 'la oyérame ju Onorúgame, alueka 'la ajchágame ju Onorúgame Alawala. 'Lige alué Onorúgame Alawala gite 'we 'la semáriga ejperégame ju alué ralámuli.

<sup>21</sup> 'Lige alué nulalí rejcholi napu 'yaliru Moisesi Onorúgamete aní, 'tabilé 'la ko napu anele Onorúgame alué Abraámi? Tabilé. 'La rewagachi moinalime nisaká pe 'la sébali olagá alué osilí nulalí rejcholi napu osale Moisesi 'we 'ya, 'liko 'ma 'la rewagachi moináwukuru pe 'la sébali olagá napu osale Moisesi. <sup>22</sup> Onorúgame ra'ichálila aní suwábaga ralámuli 'we cha'piruga mochigo Remónisite, 'lige alué nulalí rejcholi napu a'rele alué Moisesi aní tabilé 'la bi'wígime alawégame níriga ramué ralámuli. 'Lige suwábaga ralámuli napu 'la oyérame ju Esukristo, alueka 'la buyamio alé chátiri bowechi 'lige 'la naremio alué Onorúgame Alawala.

*Jena ruwimela 'we 'la bijchígime níriká Kristo nila ra'ichali 'liko 'la narépuli ko napu nejímorige Onorúgame*

<sup>23</sup> Napu'lige tabilé 'cho nawachi alué ralámuli buyáname chátiri bowechi e'yéname, alué we'ká balé jurío 'we 'la ruwí rejcholi napurigá tabilé guwana rujsúpua Onorúgame oyeria napusi seba alué Esusi. <sup>24</sup> Alué nulalí osilí rejchólika na'tárima nile ramué napurigá 'we a'lá 'nata mochíwa siné rawé nawámili níligo alué napu buyánale ralámuli alé chátiri bowechi, 'lige Onorúgame 'we 'la ganlíga etemio suwábaga

\* 3:8 E'nesi Génesis 12:3. † 3:10 Yoli ra'ichaga «están bajo una maldición». (E'nesi Deuteronomio 27:26.) ‡ 3:12-13

Esúsika tabilé chátiri rió nile jena wijchimoba eyena, tabilé resi 'sika eyéname nile. Napu'lige mukíá 'ma chátiri alawégame gayénale gastigo nareka napu ramué narépuli ke napu'lige suwisuga. § 3:20 E'nesi glosario «ancestor».

alué napu 'la bijchigi 'la Onorúgame júlaligo alué chátiri bowechi e'yéname ralámuli buyáname. <sup>25</sup> 'Lige 'ma sébale alué ralámuli buyáname alé chátiri bowechi e'yéname. 'Ma tabilé najkiá napurigá animela alué Moisesi osilila nulalí rejcholi Kristo nawamio napugiti 'ma nawáligime alué Kristo.

<sup>26</sup> 'Emi 'ma 'la Onorúgame 'kúchila ju napugiti 'we 'la bijchigime 'emi napu aní alué Kristo Esusi ra'ichálila <sup>27</sup> napugiti 'ma ajchágame kame 'emi alué Kristo Alawala. <sup>28</sup> 'Ma tabilé chéré rekó ralámuli jurío ke, tabilé chéré rekó se'nú ralámuli ke, tabilé chéré rekó pioní ke, tabilé chéré rekó tabilé pioní ke, tabilé chéré rekó rió ke, tabilé chéré rekó mukí ke. Suwábaga pe aba alué bi'lepi 'nátili 'nátame niru pe Kristo oyérilime. <sup>29</sup> 'Lige 'emi 'ma 'la Kristo oyérame ka 'ma 'la Abraámi rijimála ju 'lige 'ma 'la narele 'emi Onorúgame Alawala napu Onorúgame 'yámorilige alué Abraámi rijimála nujubami o'chérigame.

#### 4

<sup>1</sup> Abichigó ruimé ne ye ra'íchili: Bilé rió 'ma inógame mukusá 'lige nígame nisa we'ká e'karúgame tábiri, we'lé nígame nisa gawí, we'ká bujkégame nisa akasí, 'lige alué inolá nachuámili nisa suwábaga napu nígame nile alué o'nola, tabilé 'cho wa'lú ocheria alué u'tá towí, tabilé 'cho nachuámala alué towí napu nígame nile alué o'nola. Pe abisibi najtékame níkala alué towí napurigá alué rió pioní napu pe nóchame ju. Alué piónika tabilé nachume 'ínili napu nígame nile alué tabilé o'nola napu ju pe batrónila. <sup>2</sup> Napu'lige alué mukúgame inolá bijí 'we u'tá towí ka repugime ju jaré ralámulite, 'lige tabilé 'cho nareme ju alué o'nola nila, alué towika narémala napusi 'ma wa'lú re'malí ka. <sup>3</sup> Achigórige nírige ramué napu'lige ta'chó sébachí Esukristo, napurigá u'kuchí ejtemali nírige. Ramueka 'we 'la nirálime nírige alué 'nátili pe napurigá 'nátame ju alué ralámuli tabilé 'la sébali oyérame Onorúgame. <sup>4</sup> 'Lige sébale raweli, 'lige Onorúgame júale bo'né Inolá Esusi napu ochérale bilé mukichí 'we 'la sébali olame napu nulale Moisesi 'we 'ya. <sup>5</sup> Alué Esúsika nawale bujemia alué ramué nila 'nátili, ramué napu jurío niru, napurigá 'la Onorúgame 'kúchila níwa.

<sup>6</sup> 'Émika 'ma 'la Onorúgame 'kúchila ju, 'lige jípeko regá aní Onorúgame Alawala ramué 'nátalichi: «O'nó», \* regá ané alué alawá alué Onorúgame. <sup>7</sup> 'Lige 'émi 'ma tabilé bijchigime ju 'la rewagachi moinálime ko pe 'la sébali olagá napu nulale Moisesi 'we 'ya, iligá 'émika 'ma 'la Onorúgame 'kúchila ju napugiti

'ma a'rélige 'nata napurigá 'nátame nílige 'ya, 'lige jípeko 'ma 'la narémala 'emi napu nejime ju Onorúgame.

*Jena ruwimela Páulo 'we seweka ajtigó machináliga chonoká mochigo alué oyérame*

<sup>8</sup> Napu'lige tabilé 'cho 'la machiáa 'emi Onorúgame, 'émika 'we 'la oyérame nile e'karúgame 'nátili tabilé Onorúgame nila 'nátili. <sup>9</sup> 'Yabeko tabilé machime nile 'emi alarigá ko Onorúgame, 'lige jípe 'ma 'la machié 'emi alarigá ko Onorúgame, 'lige çchonigá uchéhigo ku alué 'nátili oyéniliché 'emi, alué 'nátili chátiri tabilé najtékame Onorúgame níriga napu oyérame nile 'emi 'yabé ta'chó machiáa alarigá ko Onorúgame?

<sup>10</sup> 'Émika a'kué newame ju yawiyame napurigá nokame ju alué ralámuli jurío napu 'we 'la sébali olame ju alué Moisesi nila nulalí rejcholi mayega 'la rewagachi moinálime 'emi aleké yawiyame newagá.

<sup>11</sup> Neka chálagá ajti napugiti 'emi ta'mé 'la e'wá nokame. 'Lige aminami pe rioksi nímikónkuru suwábaga napu beniri ne 'emi.

<sup>12</sup> 'Emi ralámuli Onorúgame oyérame napurigá ne, pe rekó 'la napurigá ne níwa. Neka 'ma a'réturu alué nulalí nóchali rejcholi napu nulame ju alué ralámuli jurío. Tabilé oyérama 'emi alué 'nátili.

'Émika tabilé siné se'wináriga etiáturu ne'chí. <sup>13</sup> Neka nayúnaturu alé 'emi ejperélachi, 'lige nayupasa we'libesi bejterá ne alé 'emi 'yuga, 'lige alé asagá ta'wé ikiria simiá chebilénami arigá chojki ne beniria 'emi Onorúgame ra'ichálila. <sup>14</sup> 'Lige alemi ajtigíchi ne 'emi beniria 'we nayua tabilé gichíturu 'emi ne'chí rekó 'we chátiri nawili nayuchi ne. Aminami 'we 'la ra'salagá etiáturu 'emi ne'chí 'la napurigá bilé santo ánjeli 'pa rewagáchika julárigame Onorúgamete. 'We 'la ra'salagá etiáturu 'emi ne'chí 'la napurigá Kristo Esusi neraga. <sup>15</sup> 'Lige jípeko, çchonigá 'ma tabilé ra'salagá mochíripeché 'emi? Neka 'we 'la ruwibá, 'emi noli 'we e'wérali olámituru napurigá ku 'la sa'wimela ne. 'Lige busila nayume nísaká ne noli 'ma 'yámikuru 'emi ne'chí 'emi busila napurigá ku 'la ma'chílmalala ne. <sup>16</sup> 'Lige çsairúgame neraga etéwarabá 'emi ne'chí pe 'la bijchiga aníchi ne 'ma ku guwana rujsuo 'emi Onorúgame oyeria?

<sup>17</sup> Alué jaré ralámuli jurío napu 'ma 'la oyérame ju Esukristo napu alemi Galasia sébale 'we ra'sá aníá mochí, nobi péchigo resítiri 'nátili 'yániliga nokágó 'emi. Alué ralámulika pe najkigá noká napurigá 'ma a'rémala 'emi alué ra'íchali napu 'emi beniri ne. Aminami alué ralámulika najkigá noká napurigá alué ralámuli gompaniérola

\* 4:6 Alué Páuloka «Abba» anime osale. «Abba» aniáká o'nó aniamé kéréle, 'lige alué ralámuli juríoka alarigá anime nile napu'lige 'we ra'salagá etea o'nola, napurigá anime ju nu'chugega bilé u'tá towí tabilé o'nola etega.

nímala 'emi. <sup>18</sup> Tabilé chéríkawé rekó 'we 'la gompaniérola gayénige 'emi apiépiri ralámuli nobi 'wéchigo 'la 'nátaga mochíwagó 'nalina, 'we 'la machiboa chonokinálige nokao. <sup>19</sup> 'Émika napurigá ne 'kúchila ju, 'we chalagá ajtí ne napugiti 'emi 'ma ku tabilé 'la bijhígempá napu ne ruyé 'emi, 'lige 'we chálagá asimela ne† napusi 'ma 'la bijhígisa 'emi napu aní Kristo ra'ichálila. <sup>20</sup> Abé a'lá ke alé asísá ne 'emi 'yuga jipe kulipi, alé 'emi 'yuga asísáká ne 'la i'kílí suériga ruwimékuru ne 'la námátame. Mejká asirú ka 'we nóchili júké'é osilite ra'ichalia.

*Jena ruwimela Páulo ruwílige ramué ntrigo napurigá 'la Sara 'kúchila neraga*

<sup>21</sup> 'Emi ralámuli napu 'we 'la oyérinili napu osale Moisesi† 'we 'ya, †tabilé machí 'emi napu aní alué osilí? <sup>22</sup> Alé osilichi ruwí oká ejtemali o'chériligo Abraámi 'kúchila. Bilé 'la bo'né upila ranala, 'lige uché bileka pe alé Abraámi galílachi§ nóchame mukí ranala, alué napu tabilé meka nóchame nile enomí, alué napu nile alué 'la Abraámi upila gu'írame. <sup>23</sup> Alué mukí alé Abraámi galílachi nóchame tabilé meka enomí, alué napu Agari anilime nile, alué mukí ranálaka pe iligá ochérale, 'lige alué 'la Abraámi upila mukí, alué ranálaka ochérale 'la napurigá anélege Onorúgame alué Abraámi.\* Alué 'la Abraámi upílaka Sara anilime nile. <sup>24</sup> Ye oká umugika oká tábiri ruwime kéré. Agárika ruwime kéré alé Sinaí rewégachi rabó† Onorúgame alué Moisesi 'yálige nulalí rejcholi. 'Yale napurigá ralámuli israelita 'la machimela 'we resitiri alawégame niligo alué ralámuli israelita napu 'ya ejperele, tabilé siné 'la námaligo napu ruwime nile alué nulalí, 'lige tabilé siné rawé bijhígime nile nawámili niligo bilé alué napu bujémili nile alué ralámuli alué chátiri 'nátili, 'lige alué ralámuli israelítaka tabilé buwea mochile alué napu nawámili nile alué gastigo bujemia alué ralámuli israelita 'ya ejperégame. Alué ralámuli israelítaka 'we e'wérali olame nile 'la rewagachi moinalime mayega pe 'la

sébali olagá napu nulale Moisesi. <sup>25</sup> Alué Sinaí anilime raboka alé Arabia rewégame gawí bo'ígichi ilí. Árabe ra'ichaga ka Agari anilime nile alué rabó Sinaí. Alé Sinaí osale Moisesi alué osilí nulalí rejcholi. 'Lige jipe alé Rusaleni we'ká balé mochí napu nulame ju napurigá sébali olawa alué nulalí rejcholi. Regá nile ye nóchali napugiti alué Rusaleni ejperégame ralámuli pe 'we e'wérali olagá ejperégame nílgame alué nulalí rejcholi napu osale Moisesi mayega 'la sébali olao 'lige mayega 'la rewagachi moinalime alanokigá. <sup>26</sup> Ramueka tabilé alarigá 'nátame niru, ramueka 'nátame niru pe 'la sébali bijhígisiga napu anile Onorúgame 'la rewagachi moinalime ko.† <sup>27</sup> Onorúgame 'we 'la na'tárilé alué Isaiasi napurigá osimela ye ra'ichali regá anime: Mué mukí 'we ganíliga asiboa, mué napu tabilé siné ranégame ju. Noli sinápua ganíliga, mué napu tabilé machí aliena ená kame ko napu 'lige bilé u'tátiri ochéachi. Alué mukí napu tabilé siné ranégame nile, alueka we'ká ranégame nímala me'tigá alué napu 'la yati ranele.§

<sup>28</sup> 'Emi ralámuli Onorúgame oyérame napurigá ne, 'émika 'we 'la bijhígime ju napu aní Onorúgame ra'ichálila a'chigóriga napurigá bijhígile alué Abraámi napu 'lige Onorúgame anísá bilé u'tátiri ranélimio alué Sara alué Abraámi inolá. 'La bijhíá ochérale bilé u'tátiri towí 'lige Isaki anilime rewá ujchéliuru. <sup>29</sup> Alué re'malí Agari ranala napu pe iligá ochérale 'we gawélime nile alué u'tátiri alué Sara ranala, alué napu ochérale 'la napurigá anile Onorúgame.\* A'chigóriga ju jipe, alué tabilé 'la Onorúgame oyérame 'we gawélige eté ramué. <sup>30</sup> Alué osilí Onorúgame ra'ichálila regá aní: «'Ma mabuwa 'mi mejká alué mukí napu pe nóchame ju mué bejtélachi, 'ma ranala 'yúriga mabuwa, alué napu mué upila gu'írame ju, napugiti pecha narémili kame alué napu mué a'rémili ju napu 'lige mué 'ma mukusá.»† <sup>31</sup> Onorúgame oyérame tabilé oyérame niru jena gawichí nerúgame

† **4:19** Yolí ra'ichagaká «tengo dolores de parto» anime chujkú alé apélichí. † **4:21** Moisésika osale maligi libro—Génesi, Éksoro, Lebítiko, Número, 'lige Reuteronomio. Aleké maligi líbrochi napu osale alué Moisesi jarénami ruwime ju churigá nílga 'we 'ya jena wijchimoba, 'lige jarénami alé osilichi ruwíchigo tachiri najkiá Onorúgame. 'Lige jarénami aleké osilichi ruwíchigo chonokálige alué ralámuli israelita alé bilénami 'we wakígichi e'yéniga napu 'lige Canani rewégame gawí bo'ígichi simiba 'yéniga. § **4:22** Abraámi galila bo'síkí gemate newárigime nile 'lige suwábaga alué Abraámi gompaniérola alarigá galégame nile. Napu 'lige alué Abraámi bejtégichi jaré pe ichúrimi mochime nile chibá 'lige bo'á nesea, 'we bukégame nile chibá 'lige bo'á. \* **4:23** E'nesi Génesis 16:1 'lige 17:15. † **4:24** Alué ralámulika 'la sébali olá mayele suwábaga napu nulá alué Moisesi nila nulalí rejcholi nobi tabiléchigo siné 'la sébali olame kéréleko rekó 'we sébali olánilie. † **4:26** Yolí ra'ichaga ka regá anime chujkú: «Alé 'pa rewagachi nerú bilé Rusaleni 'lige ramueka alué Rusaleni 'kúchila niru.»

§ **4:27** E'nesi napu ju Isaiás 54:1. Alué mukí tabilé ranégame ko rekó 'la gunégame ke, alueka Sara nile. Alué mukí napu 'la yati ranele, alueka Agari nile. \* **4:29** Alué Agari ranálaka siné kachi muké usani bamígame mayelia napu 'lige gawélige etea alué Sara ranala, 'lige alué Sara ranala pe okabi bamígame mayelia napu 'lige gawélige etelia alué Agari ranálate. † **4:30** E'nesi Génesis 21:10.



'nátili. Ramueka oyérame niru napurigá aní Onorúgame. 'Lige e'wame niru napurigá nulá Onorúgame.

## 5

*Jena ruwimela Paulo ruwíligo abisibi 'we 'la oyéraga nokísilime ko Kristo*

<sup>1</sup> 'We 'la 'nátaga nokísiwa o'maka. Aka Kristo 'ma o'tóché alué gastigo napu ramué narépuliké. Tase uché ku oyériwa alué 'nátili napu nígame ju alué ralámuli jurío, alueka 'we 'la sébali olame ju napu aní alué osilí napu Moisesi osale.

<sup>2</sup> Neka 'we 'la ma'chígime ruwíbá, 'emi oyérasaká alué 'nátili 'la rewagachi moinalmio ralámuli 'la sikirétigame nísaká pe'tá isílala wi'chila u'kuchí ejtemali, liko Onorúgame níriká pecha 'la bi'wígime alawégame kérélamalagó rekó anié 'emi: «Ramueka 'ma 'la Kristo oyérame nírupá.»  
<sup>3</sup> Neka 'la ruwíbá, apiépiri ralámuli 'la bijchígime 'la rewagachi moyéname ko bilé ralámuli 'la sikirétigame nísaká pe'tá isílala wi'chila, liko alué ralámuli 'ma pecha gainámalagó ku a'rea alaké 'nátili rekó ku 'la a'rénilie. <sup>4</sup> 'Emi 'we 'la sébali olagá ejperégame nisa 'la bi'wígime alawégame gainamio mayega 'la sébali olagá suwábaga napu aní alué osilí nulalí rejcholi napu Moisesi a'rele, pe chajkena 'nátame kérélamala 'emi, alésiko 'ma tabilé narémala 'emi napu nejí Onorúgame. <sup>5</sup> 'Lige ramueka 'ma 'la machigá mochiru tabilé naréputi nírgo gastigo, napugiti ramueka 'ma narékame nírgime Onorúgame Alawala pe 'we 'la bijchígiga 'la sébali olamio Onorúgame napurigá anile. <sup>6</sup> Kristo Esusi níriká tabilé chérikáwé rekó tabilé sikirétigame nírgo pe'tá isílala wi'chila napurigá aní alé osilichi napu a'rele Moisesi. Kristo Esúsika pe najkí 'nalina napurigá 'we 'la Onorúgame oyéraga ejperélawa, 'we 'la niraga uché jaré ralámuli 'la bijchígiga napu aní Onorúgame ra'ichálila.

<sup>7</sup> 'Émika 'ma 'we 'la bijchígime kéturu napu aní Onorúgame ra'ichálila. 'Lige z'chieri 'smúbaché se'winátiri 'nátili 'ya 'emi napurigá 'emi a'rémala 'la Onorúgame oyeria? <sup>8</sup> Ye 'nátlika tabilé Onorúgame nejíjala ju, alué Onorúgame napu 'emi 'yale 'nátili napurigá 'emi 'la Onorúgame oyéramala.\* <sup>9</sup> Pe utá ajchésiga leharura ri'ligó rusichi 'la bochgími nabame ju alué párisi. Pe a'chígóriga ju napu'lige bilé ralámuli 'we 'la 'nátaga eyene, 'lige pe'tá se'winárigariga na'tasa, 'ma cha ikime ju suwábaga alué a'lala 'nátili. <sup>10</sup> Neka tabilé mayé se'wináriga na'tamio 'emi. Neka mayé

Onorúgame gite 'we 'la semáriga na'tamio 'emi. Nobi Onorúgameka 'wéchigo a'wágame gastigárialagó apiépiri ralámuli napu se'nú 'nátili beníriga eyena 'emi.

<sup>11</sup> 'Emi Onorúgame oyérame napurigá ne, ne biji 'we nuligá enásaká napurigá 'la sikirétigame niwa pe'tá isílala wi'chila, 'liko alué ralámuli jurío 'ma tabilé ayómikuru rekó ruyechi ne bilena gulusichi mukúligo Esusi. <sup>12</sup> Alué napu ekí nulagá e'yena napurigá sikirétigame nímala 'emi pe'tá isílala wi'chila, abé 'la kepa a'bopi ga'libusa. <sup>13</sup> 'Emi Onorúgame oyérame napurigá ne, Onorúgame 'we semátiri 'nátili 'yale 'emi, alekeri tase chátiri 'nátili 'nátaga e'yénawa. Iligá 'we 'la galewa uché jaré ralámuli, 'la niraga etewa, 'la gu'íriwa, tabilé che anewa, o'maka 'la nakúriga nochawa a'bopi. <sup>14</sup> Suwábaga alué nulalí rejcholi napu a'rele Moisesi regá anime kéré: «'We 'la ganíliga etewa uché jaré ralámuli napurigá na'temá mué bo'nepi.» <sup>15</sup> 'Emi 'we na'áuka ra'ichame nisa a'bopi, 'ma tabilé bi'lepi 'nátaga e'yénamala 'emi o'maka, 'ma tabilé Onorúgame nila 'nátili 'nátaga e'yénamala 'emi.

*Jena ruwimela Paulo ruwíligo 'we 'la e'wálime ko napu nulá Onorúgame Alawala*

<sup>16</sup> 'We 'la e'wiwa napu nulá Onorúgame Alawala, alarigaka 'la tase e'wímala 'emi alué chátiri 'nátili napu 'nata 'emi.† <sup>17</sup> Alué 'nátili napu pe 'emi 'nátame ju, alueka tabilé a'chígóriga ju napurigá alué 'nátili napu 'la Onorúgame Alawala nejí, alué 'emi na'tálikaká pe najsibume ju alué 'nátili napu Onorúgame Alawala ju, pe nejkumeme ju rekó 'la na'tánilichi kachi 'emi. <sup>18</sup> 'Emi 'ma 'la oyérame nísaká alué 'nátali napu nejí Onorúgame Alawala 'liko 'emi 'ma tabilé e'wémili júkuru alué 'nátali napu pe 'emi a'boi nígame ju. <sup>19</sup> 'We 'la ma'chígime nérekame ju napu'lige bilé ralámuli tabilé 'la e'wachí napu nulá Onorúgame. Napu'lige ralámuli Onorúgame oyérame 'ma a'resa Onorúgame oyeria, yati se'winá nokame ju, pe apiépiri umugí 'yuga okome ju tase 'la a'boi upila, jaré rióchoká napuka okome ju, tabilé anáchame ju tabilé se'winá nokogá, <sup>20</sup> 'we tánime ju iwérali apiépiri tábiri tabilé Onorúgame, 'lige 'we galéme ju sujkmuga beniame, 'lige 'we gichiga eteme ju uché jaré ralámuli, 'lige tabilé siné gu'írame ju uché jaré ralámuli, pe chibiyeti anía mochime ju, 'lige 'we na'áuka ejperégame ju, tabilé chéláme ju la'sika uché jaré ralámuli ejperélachi, tabilé ganíliga, we'kaná chojkégame rojáname ju ralámuli napurigá

\* 5:8 Onorúgameka 'yale 'nátili napu'lige pe kulí siné oyérichi ralámuli, jipe biji nejía ajtí 'nátili napurigá abichilubi 'we 'la oyéramala apiépiri ralámuli alué Onorúgame. † 5:16 Estúsika napu'lige ta'chó mukía anile julamio bo'ne alawala napu'lige mukusá, napurigá alué alawala 'la nejkúrimala 'la semáriga na'taria ramué. E'nesi Hechos 1:4.

pe na'áuka mochímala, 'lige tabilé 'la a'chigóriga 'nátame ju o'maka, <sup>21</sup>pe chibiyeti 'nata mochime ju, tabilé anáchame ju tabilé bajiga, pe ichúrimi e'yéname ju napurigá nokame ju etjemali re'egochi. Jipe ruimé ne napurigá anié ne 'ya bajhabé rawé: Suwábaga ralámuli napu ekí alarigá 'nátame tabilé 'la suériga etéwili ju Onorúgamete.

<sup>22</sup> Napu'lige bilé ralámuli Onorúgame oyérasa, 'lige 'we 'la e'wisa Onorúgame Alawala† tabilé chátiri 'nátame ju, 'lige 'we 'la niraga eteme ju uché jaré ralámuli. Alueka 'we ganílime ju 'lige tabilé e'karúgame chátiri 'nátame ju. Tabilé ayome ju, 'we 'la ra'sá olame ju uché jaré ralámuli 'yuga. 'We 'la sébali olame ju suwábaga napu aní. <sup>23</sup>'We 'la na'temaka eteme ju suwábaga ralámuli. 'We 'la anáchame ju tabilé che'sika. Alué Moisésika tabilé anime ujchale: «Tabilé 'la júpá napurigá ralámuli 'we 'la ganíliga epperélamala o'maka.» <sup>24</sup> Ramué napu 'ma 'la oyérilime niru Kristo Esusi 'ma tabilé chibi nokigá e'yéname niru rekó chátiri 'nátaga ikisuga, napu'lige 'nátaga ikisuga apiépiri umugí 'yuga gojchiamé 'lige we'ká e'karúgame niga mochínilime pe tabilé nélegá Onorúgame. <sup>25</sup> Ramueka 'ma Onorúgame oyérame nírukuru 'lige 'ma 'la Onorúgame Alawala ajchágame nírukuru, 'liko abichilubi 'we 'la sébali olagá nokásiwa o'maka napurigá najkí Onorúgame Alawala. <sup>26</sup> Tabilé riólame niwa, tase che anewa ralámuli najkigá pe napurigá na'áuka epperélamala, napurigá najkuelia mochímala mué chojkila gíte.

## 6

*Jena ruwimela Páulo ruwíligo 'we 'la nakúrilime ko o'maka*

<sup>1</sup> 'Emi ralámuli Onorúgame oyérame napurigá ne, bilé 'emi se'winá 'sisa 'la machié chátiri ko alué nóchali, 'lige 'emi napu 'la Onorúgame Alawala ajchágame ju, 'we 'la rejcholi ruyewa alué se'winá 'síkame 'la tabilé a'wágame ra'ichaga 'lige 'we 'la 'nátaga napurigá tabilé oyéramala 'émichigó aleké chátiri nóchali. <sup>2</sup> 'We 'la nakúriga nokásiwa o'maka 'emi rejcholi nejiga a'nagupi, 'la rejcholi 'yásaká 'emi apiépiri alué ralámuli napu se'winá noká, 'liko 'la e'wame kérélamala 'emi napu najkí Kristo.

<sup>3</sup> Bilé ralámuli pe ne'óchaga eyéname uché jaré ralámuli, mayega bo'neka 'la tabilé siné se'winá 'sika eyéname ko, 'liko alué ralámuli bo'nepi abéchigo se'wináriga nímala. 'Lige aminami alué ralámuli lagá einasa: «Neka 'la tabilé siné se'winá 'sika eyéname ju, tase napurigá alué uché jaré ralámuli napu se'winá nokagá e'yena», alarigá 'nátame

ka abéchigo se'wináriga nímala bo'nepi. <sup>4</sup> 'Liko a'pílipi 'emi 'we 'la 'nátaga epperélawá, a'lígeko 'la machimela 'emi pala 'la bijchiá 'la Onorúgame nélegá epperégame ko 'emi, aminami 'la machimela 'emi tabilé na'tátikó abé alá'aká ralámuli ko 'emi. <sup>5</sup> 'A'pílipi ralámuli 'we 'la ruyémili ju Onorúgame tachiri nóchali nóchaga eyéneo bo'nepi, 'lige tachiri 'nátali 'nátaga eyéneo.

<sup>6</sup> 'Lige alué ralámuli napu rejcholi 'yáriru 'we 'la ganíliga etémili ju alué napu rejcholi nejile.

<sup>7</sup> Tase chibi nokogá e'yénawa mayega Onorúgame tabilé etéa ajtigó chibi nokagá e'yénachi 'emi, alalásaká 'emi 'liko pe a'bopi resí ikí 'emi. <sup>8</sup> Bilé ralámuli yati se'winá 'sínalísaká yati se'winá 'sime ju, alueka resitiri raweli narémala jena wijchimoba pe bo'né cha'sika. Bilé rió 'we 'la e'wime Onorúgame Alawala, alueka 'we 'la semátiri raweli narémala jena wijchimoba 'lige 'pa rewagachi simisá 'la ganíliga narémala. <sup>9</sup> Tabilé siné najsinawa beniria ralámuli Onorúgame nila ra'ichali, 'lige 'la rejcholi ruyea alué ralámuli se'winá nokame, 'lige ralámuli gu'iria, suwábaga nóchali napu 'we 'la galé Onorúgame. Siné rawé 'la ma'chí nérélamala 'we 'la sébali oláligo 'emi 'we 'la sébali olásaká 'emi 'la tabilé guwana rújsúká. <sup>10</sup> 'Liko bijí 'la mochíriga jena gu'iriwa ralámuli alué Onorúgame oyérame. 'Lige abiená gu'iriwa alué tabilé Onorúgame oyérame, suwábaga 'la ganíliga gu'iriwa.

<sup>11</sup> Jena 'ma guwichí chuikúgame osilí ne bo'né osé 'emi, 'la etémala e'wele osilí osáligo ne. <sup>12</sup> Jaré ralámuli jurío jsile alemi Galasia napu 'emi mochí, alué ralámulika 'ma 'la oyérame ju Esukristo nobi abiénachigo nulame júkó napurigá 'emi sikirétigame nímala pe'tá isílala wi'chila, alueka pe alanokame ju napurigá tabilé cha anewa alué uché jaré ralámuli juríote napu tabilé 'cho oyérame ju Esukristo. <sup>13</sup> 'Lige alué napu nulame ju napurigá sikirétigame niwa pe'tá isílala wi'chila guwala tabilé 'la sébali olame kéré a'boi suwábaga napu aní alué nulalí rejcholi napu a'rele alué Moisesi. Alué alarigá nulame ka pe najkigá noká napurigá 'we 'la niraga etewa, napurigá etémala 'emi 'we jebénigame ko rejcholi nejiga napurigá 'la niraga etewa uché jaré ralámulite. <sup>14</sup> Ne níriká tabilé chéré rekó tabilé 'we 'la niraga etelie ralámulite. Neka najkí 'nalina napurigá Onorúgame gu'irimala ne'chí 'la bi'lepi 'nátali 'nátaga napurigá beníramala ne 'emi 'la rewagachi moinalíme ko 'we 'la bijchígíliká gastigo o'togá mukúligo Wa'lula Esukristo bilena gulusichi alué gastigo napu narépuli ke ramué. 'Lige neka 'ma a're alué se'winátrí

† 5:22 Yeka aníame kéré 'la Onorúgamete Alawala e'wame ko apiépiri ralámuli napu'lige 'ma naresa Onorúgame Alawala.

'nátili napu 'nátame ju alué ralámuli napu mayeme ju 'la rewagachi moinamio 'la sébali olagá napu aní alué osilí napu os-ale Moisesi 'lige alué ralámuli 'ma tabilé aminabi 'yáchigó ne'chí se'winátiri 'nátili.  
<sup>15</sup> 'Ma 'la Esukristo oyérame níriká tabilé chéré rekó sikirétigame nírige pe'tá isílala wi'chila guwala 'lige aminami rekó tabilé sikirétigame nírige alé, Onorúgame níriká pe 'la Onorúgame Alawala narétigime nísiga 'lige 'la bi'wigame alawégame nísiga 'la ju.  
<sup>16</sup> 'We 'la ganíliga mochiwa 'emi ralámuli napu 'we 'la bijchígime ju napu ne ruwí. Onorúgame abichilubi 'we 'la na'temasa 'la kápá 'emi suwábaga 'la Onorúgame oyérame.

<sup>17</sup> Tabilé 'wesi ralámuli che olasa 'la kápá ne'chí, napugiti neka Esukristo nochálilachi nóchame kame, 'lige 'we be'lágame ju ne wejpisósiga napu'lige ralámuli ne'chí me'linálíchi Esusi nila ra'íchali benírime kóriká. Tabilé 'wesi laa mochímili ju: Alué Páuloka 'lacha nígame júché lisensia napurigá osimela ye osilí.

<sup>18</sup> 'Emi Onorúgame oyérame napurigá ne, alué Wa'lula Esukristo napu ramué nuleme ju, 'we 'la gu'írisa 'la kápá 'emi.

Pe ekí kápá ye ra'íchali. Wa'lú cheliérabá.

## **Ye Ju Alué Apeli Napu Pablo Osele Alué Ralámuli napu Ebeso Ejperégame Nílige**

*Kuira 'emi ralámuli suwábaga Ebeso ejperégame napu eki Onorúgame oyérame ju.*

<sup>1</sup> Ne Páulo osé ne suwábaga ralámuli Onorúgame oyérame alé Ebeso rewégichi ejperégame, alé Ebeso we'ká riógichi, alué napu 'la bijchígime ju Kristo Esusi ra'ichálila. Neka julárigame ju Kristo Esúsíte napurigá ne nulame nímla aleké nila nóchali. <sup>2</sup> Neka najkíábá napurigá Onorúgame ramué o'nola 'lige Esukristo napu ramué nuleme ju 'we 'la semáriga ganiliga etesa 'la képá suwábaga 'emi ralámuli, 'lige napurigá 'la ganiliga ejperélamala 'emi.

*Jena ruwimela Páulo ruwíligo wa'lú cheliera i'lime ko Onorúgame*

<sup>3</sup> Onorúgameka 'we a'lá nejkúrime ju, alué napu ju Esukristo O'nola, 'lige nejile bo'né alawala ramué gu'iriga. Alarigá gatele Onorúgame napu'lige julasa Kristo jena gawichí. 'Lige alekeri wa'lú cheliera i'lime júkuru Onorúgame. <sup>4</sup> Bajchabé ta'chó newá gawí, bo'né Onorúgame 'nátalige ramué wanápamia napurigá tabilé chátiri alawégame niwa ramué napurigá 'la bi'lepi 'nátili 'nátame niwa ramué alué 'yuga. Onorúgame 'ma 'la 'nátalige <sup>5</sup> napurigá bo'né 'kúchila niraga niwa ramué. Alueka Esukristo júlale napurigá alué 'símala gatea napurigá najkí bo'né Onorúgame. <sup>6</sup> Alekeri 'we 'la semáriga ra'ichalia Onorúgame olagá, 'we 'la nejkuro ajtigórikábá ramué na'temaka. Onorúgameka Kristo júlale, alué napu bo'né 'we galegá eté. <sup>7</sup> Onorúgameka 'we galé ramué, 'lige ramué buyánale alé resítiri bowechi bo'né Inolá júlga napurigá me'liboa, 'lige alué Onorúgame Inolá mukule bilena gulusichi chujkugá ramué alawala bi'wigá, 'lige 'ma e'kale ramué. Onorúgameka 'we 'la nejkúrime ju. <sup>8</sup> Alueka 'we 'la machiri ramué 'we 'la galeo ramué, 'we 'la ma'chígime nérékuru napugiti nejime 'we 'la 'nátili napurigá 'la rejchirúgame niwa. <sup>9</sup> Onorúgameka 'we 'la machírile ramué napu sineko tabilé machime nírige. Alueka bo'né 'we a'lá sébili olagá machiri ramué chieri ko alué Kristo. <sup>10</sup> Onorúgameka 'we 'la sébali olámala napu 'nátalige 'we 'ya. Napu'lige sebasa raweli, Onorúgameka Kristo ajchámala napurigá nulame nímla, a'lige Kristo bi'neli neyúriga Wa'lula Nulame nímla jena wijchímoba 'lige 'pa rewagachi.

<sup>11</sup> Onorúgameka 'we 'la wanápalige ramué napurigá ramué nochawa alué Onorúgame nila nóchali. Onorúgameka 'ma alarigá 'nátalige 'la sébali olame ju Onorúgame apiépiri nóchali napu sébali olánili. <sup>12</sup> Alarigá gatele bo'né Onorúgame napurigá 'la ma'chígime nélélamala 'la semáriga nejkúrime ko Onorúgame, 'la ma'chígime nélélamala napugiti ramué 'we 'la semáriga ra'icha mochimempá Onorúgame olagá, alekeri gite mochiárigime niru ramué, ramué nírigime napu bajchá bijchíguru Kristo nila ra'ichali. <sup>13</sup> 'Émika 'we 'la gepule alué a'lala ra'ichali napu 'we 'la bijchiá ju alué ra'ichali, 'lige Kristo gite 'la Onorúgame oyérame ju 'emi, 'lige Onorúgame Alawala alawégame ju 'emi, alué alawá napu Onorúgame nejmórire. <sup>14</sup> Ramué napu 'la alawégame niru Onorúgame Alawala 'we 'la machiaa 'la narépuli ko napu Onorúgame nejmórire bilé rawé napu'lige 'ma 'la buinasa suwábaga bo'né 'kúchila alé resítiri bowé w'ígichi, napurigá 'we 'la semáriga ra'icha mochimála Onorúgame 'kúchila Onorúgame olagá.

*Jena ruwimela Páulo tániligo Onorúgame napurigá 'we 'la 'nátili yámala alué napu 'la Onorúgame oyérame ju*

<sup>15</sup> Neka alekeri yeti akegá 'we 'la machí 'emi 'we 'la bijchígime ko Esusi ko wa'lula nulame 'lige 'emi 'we galeo suwábaga napu Onorúgame oyérame ju. <sup>16</sup> Neka alekeri napu'lige Onorúgame 'yuga ra'icha wa'lú cheliera 'yame ju ne, Onorúgame 'we 'la gu'irame kame 'emi. <sup>17</sup> Neka 'we tani Onorúgame Wa'lula Esukristo O'nola napurigá gu'irimala 'emi, 'lige napurigá 'we ejebénigame nímla, napurigá abé 'la machimela 'emi churigá ka Onorúgame. <sup>18</sup> Neka 'we tani Onorúgame napurigá 'la gu'irimala 'nata tachiri gite wanápuligo alué ralámuli Onorúgame oyérame, 'lige napurigá machimela ralámuli chiena 'la semáriga ka alué nejkúrali napu 'ya Onorúgame suwábaga ralámuli aleké oyérame. <sup>19</sup> Neka 'we tani Onorúgame napurigá machírimala 'emi chiena a'wágame ko Onorúgame Alawala napu 'ya ralámuli napu 'la e'wame ju napu nulá Onorúgame. <sup>20</sup> Alué a'walí napu 'ya ralámuli alé Onorúgame pe aba alué a'walí ju napu 'yalige Esukristo napu'lige me'lisuga, napu'lige ku ajánasa alué Kristo, 'lige asíbale alé wajtoná napu ajtí Onorúgame alé 'pa rewagachi. <sup>21</sup> 'Lige 'yale nóchali napurigá bi'neli neyúriga Wa'lula Nulame nímla me'tigá suwábaga ralámuli 'lige suwábaga alué santo ánjeli napu we'ká nóchali nígame ju, <sup>22</sup> 'lige napurigá senibí nulame nímla suwábaga ralámuli Onorúgame oyérame. <sup>23</sup> Ramueka 'la sébali olame niru napu najkí Kristo, alueka kame Wa'lula Nulame

'lige ramueka napurigá pioni neraga niru. Kristoka 'we 'la sébali olale napurigá nulale Onorúgame, 'lige ramueka 'we 'la sébali olame niru napurigá nulá Kristo. Ramueka suwábaga nígame niru napu Kristo nígame ju, 'lige Kristoka suwábaga nígame ju napu Onorúgame nígame ju.

## 2

*Jena ruwimela Páulo ruwíligo Onorúgame ko napu nejime ju a'wali*

<sup>1</sup> Abé 'yako, 'émika napurigá suwígame neraga nile tabilé a'lá alawégame nile cha cha nokame nígame 'emi. <sup>2</sup> 'Émika pe Remónisi (Riablo) oyérame nile napurigá nokame nile uché jaré ralámuli Remónisi oyérame, 'lige aminami 'we 'la e'weme nile 'emi alué alawá napu pe 'pami ekárale e'yéname ju, alué alawá napu 'we aneme ju alué ralámuli napurigá tabilé oyéramala Onorúgame. <sup>3</sup> Alarigá nírige ramuéchigó tabilé e'wame nírige napu nulá Onorúgame, pe ramué a'boi cha nokagá. Cha nokame nírige ramué napu chibiyeri nokináliru, pe ramué a'boi na'tálila oyériga. Alekeri gite walú gastigo narépuli ju ramué, napurigá alué uché jaré ralámuli 'we e'níliga e'yéname. <sup>4</sup> 'Lige rekó Onorúgame etee ramué alanokiachi Onorúgame yati 'la nejkúriale. Onorúgame 'we 'la galele ramué. <sup>5</sup> 'Lige uché bilé alawá nejile Onorúgame napurigá ku 'la ajágame neraga mochiwa ramué a'chigóriga napurigá ku ajánale alué Kristo. Ramueka napurigá suwígame nírige cha cha nokame nígame ramué, 'we e'nílime. 'Émika 'ma 'la buinárigame ju alé chátiri bowechi alué Onorúgamete napugiti 'we galeme ramué. <sup>6</sup> Uché bilé alawá nejile Onorúgame a'chigóriga napurigá 'yale Kristo 'lige a'wali nejile napurigá ramué nulame niwa Kristo nila nochálíchi. <sup>7</sup> Alarigá nejkúriale Onorúgame najkigá napurigá a'kinana machimela suwábaga ralámuli Onorúgame 'we 'la gu'íria ajtigó Onorúgameka 'we galé ramué, alekeri júlale Kristo Esusi jena wijchimoba. <sup>8</sup> Onorúgame a'walálate 'we 'la buyale 'emi alé chátiri bowechi napugiti 'we 'la bijchígíligame 'emi 'we 'la nejkúriale ko Onorúgame. Tase 'emi a'boi gayéname buyá alé chátiri bowechi, pe Onorúgame 'sile 'emi buyana. <sup>9</sup> Pecha 'emi a'boi nochálíla gite buyale ko 'emi alé chátiri bowechi, alekeri tabilé 'wesi riólame niwa 'emi. <sup>10</sup> Onorúgame 'sile ramué 'ya 'we a'lá semátiri 'nátíli, 'lige mukúkuru Kristo Esusi napurigá ramué 'la semáriga ejperélawá 'lige uché jaré ralámuli gu'íriga jena wijchimoba ejperégame, napurigá najkile Onorúgame 'we 'ya.

*Jena ruwimela Páulo ruwíligo bi'lepi alawá alawégame nírigo Kristo Esusi nila*

<sup>11</sup> Alekeri 'emi napu tabilé jurío ju 'we 'la na'tawa 'we 'yako tabilé nareme níligo 'emi alué Esukristo nejkúrala. 'Lige alué ralámuli jurío napu sikirétigame nile pe'tá isílala wi'chíla, alueka anime nile 'emi olagá: «'Émika tabilé sikirétigame ju pe'tá isílala wi'chíla, 'lige alekeri tabilé gu'íríliia 'emi Onorúgamete.» <sup>12</sup> 'We 'la na'tawa, tabilé ejperégame níligo 'emi alé Israeli anílichí gawichí. 'Émika tabilé nareme nile a'wali napu Kristo nejí jipe. 'Émika tabilé Onorúgame oyéraga ejperégame nile. Tabilé nareme nile semati tábiri napu Onorúgame 'yámoríligo bo'né oyérame. <sup>13</sup> 'Emi napu tabilé Kristo Esusi oyéraga ejperégame nílige 'we 'yako, jípeko 'la Kristo Esusi oyérame ju 'emi napugiti Kristo mukúligame 'emi alawala bi'wígá. <sup>14</sup> Kristo 'sile gatea napurigá 'la ganíliga ejperélawá. Jípeko pe bi'lepi 'nátíli 'nátaga ejperégame niru rekó jurío ralámuli nírige jaré 'lige rekó tabilé ralámuli jurío nírige jaré. 'Ma tabilé na'áuka ejperélu. <sup>15</sup> Napu'lige Kristo mukusá, gatele napurigá bi'lepi nulalí nerúlámala tase we'ká. Alué juríoka nulale napurigá okaná chojkégame neraga nímla 'emi 'lige jurío ralámuli, nobi jípeko pe bi'lepi chojkégame júkó 'emi 'lige alué jurío ralámuli. Alekeri 'la bi'lepi nulalí a'rele napurigá tase na'áuka ejperélamala. <sup>16</sup> Kristo gatele suwábaga alé bilena gulusichí mukugá, napurigá 'ma tase aminabi nakómala a'naguka saega okaná chojkégame ralámuli, 'lige napurigá pe Onorúgamecho oyérame nímla.

<sup>17</sup> Kristoka nawale benírímia ralámuli Onorúgame nila ra'íchali napurigá tabilé na'áwali nerúlámala 'lige napurigá 'la gepúmala 'emi napu tabilé machime ju Onorúgame nila ra'íchali, 'lige aminami napurigá gepúmala alué napu abé 'la machime ju Onorúgame nila ra'íchali. <sup>18</sup> Jípeko suwábaga ramué napu niru jurío 'lige tabilé jurío 'la gainaru Onorúgame 'yuga ra'icha napugiti Kristo mukúligame ramué gu'íriga, 'lige alekeri Kristo Alawala ramué gu'íríguru napurigá 'la gainawa Onorúgame 'yuga ra'icha. <sup>19</sup> Alekeri, Onorúgame tabilé mejkaka sígame neraga eté 'emi. 'Émika 'ma 'la Onorúgame oyérame kame. 'Émika 'ma 'la Onorúgame 'kúchíla ju 'lige a'chigóyena semáriga naré 'emi napu Onorúgame nila ju. <sup>20</sup> Suwábaga 'emi napu Onorúgame oyérame ju napurigá galí ju 'emi 'we 'la newárigime. Alué ralámuli napu Esusi 'yale nóchali 'lige alué ralámuli napu ruwime nílige napu anele Onorúgame 'we 'ya, alueka ju napurigá alué bilé tegolí napu galí newáwili ju. 'Lige Kristo Esúsika ju alué rejté abé najtégame napu ajchílime ju bilena chijtochi. <sup>21</sup> Alueka

aminacho we'ká ralámuli wanápame ju napurigá alué ralámuli nímala napurigá Wa'lula Esukristo galila. <sup>22</sup> Alarigá ju 'emi napu'lige o'maka bi'lepi 'nátaga ejperega pe Esukristocho 'yuga 'nátaga, a lige o'maka bi'lepi chojkégame ralámuli ju 'emi, 'liko Onorúgame Alawala 'émichi bejtégame ju.

### 3

*Jena ruwimela Páulo benírigo Onorúgame nila ra'ichali alué ralámuli tabilé jurío*

<sup>1</sup> Neka Kristo Esusi ra'ichálila benírime ju 'emi ralámuli tabilé jurío 'we a'lá gu'iriga 'emi, alekeri jena ajtí ne galírale bajcháriga. <sup>2</sup> 'Emi 'ma 'la machíleké Onorúgame nóchali 'yáligo ne'chí napurigá 'emi benírimala ne, Onorúgameka 'wéchigo na'temame 'emi. <sup>3</sup> Onorúgameka 'we 'la 'nata asale 'ma abé bajchabé 'lige jípeko 'ma 'la machiri ne'chí alué napu tabilé 'wesi ralámuli machime nile, napurigá ruyá anié ne alé pe u'kabi osilichi guwánaka ye osilichi. <sup>4</sup> Napu'lige ra'ichisa 'emi ye osilí, a'lige machimela 'emi tachiri 'nata asáligo Kristo, alué 'nátili napu tabilé 'wesi ralámuli machile abé 'ya, <sup>5</sup> alué 'nátili napu machírile Onorúgame Alawala alué makué oká rió Esusi nochálila nóchame 'lige alué napu ruwime ju napu ané Onorúgame. Onorúgameka tabilé machírile alué 'we 'ya ejperégame ralámuli. <sup>6</sup> Regá ju alué 'nátili napu tabilé machiame níriga ramué: napu'lige alué Kristo benírale alué ra'ichali napu ruwime nile a'chigó aliena 'la semáriga gu'iriwili níligo Onorúgamete alué ralámuli jurío 'lige ralámuli tabilé jurío napugiti 'ma 'la bi'lénapi chojkégame kame 'lige 'la bi'lénapi simámili ju rekó jaré jurío ke 'lige rekó jaré tabilé jurío ke, 'ma alarigá gatéligime napurigá aníligo 'ya Kristo Esusi.

<sup>7</sup> Onorúgame 'la 'yáligé'é nóchali ne'chí napurigá 'emi benírimala ne ye ra'ichali Esukristo nila. Onorúgameka 'we na'temá ne'chí 'lige alekeri gu'iri ne'chí bo'né a'walílate. <sup>8</sup> Neka ju napurigá alué Onorúgame oyérame abé u'tala pe kulí chojkime benía Onorúgameka abirigáchigo 'yáleko nóchali ne'chí napurigá benírimala ne Onorúgame nila ra'ichali alué ralámuli tabilé jurío, napurigá machimela chiena 'la nejkúrime ko Kristo. <sup>9</sup> Lige Onorúgame napu suwábaga tábiri newale nulé ne'chí napurigá 'la ma'chígime machírimala ralámuli churigá 'nata asáligo Onorúgame. <sup>10</sup> Onorúgameka najkí napurigá alué santo ánjeli ramué etega 'la námamala churigá ko Onorúgame 'lige chiena 'la benégame ko 'nátaga Onorúgame. <sup>11</sup> Ye ju napu 'nata asáligo Onorúgame 'we 'yasi, 'lige 'ma 'la sébali ikile napu 'nata asale bo'né Kristo Esusi júliga napu ramué nuleme ju. <sup>12</sup> Kristo mukule ramué neraga, 'lige 'we 'la bijchígime niru ramué Kristo

ra'ichálila, 'lige alekeri 'we 'la ganíliga ra'ichalia Onorúgame 'yuga. <sup>13</sup> Alekeri tabilé sewépu'a 'emi rekó 'emi gu'iriga resí ikíe ne napugiti alarigá etega 'emi abéchigo 'la e'wame nímime napu najkí Onorúgame.

*Jena ruwimela Páulo ruwíligo Kristo 'we na'temao suwábaga ralámuli*

<sup>14</sup> Alekeri neka chojkóbaka iligá ra'icha O'nó Onorúgame 'yuga. <sup>15</sup> Onorúgame ju napu suwábaga ralámuli newale 'lige suwábaga santo ánjeli. <sup>16</sup> Alekeri 'we tani ne Onorúgame, napurigá bo'né alawálate 'yawa a'walí 'emi napurigá 'la a'wágame alawégame nímala 'emi, <sup>17</sup> 'lige napurigá Kristo 'emi alawálachi bejtélamala 'lige napurigá 'emi 'we 'la bijchígime nímala Kristo ra'ichálila. Alekeri 'we tani ne Onorúgame napurigá aminabi 'yámala iwérali 'emi. Alarigá 'la 'emi bi'lepi 'nátili 'nata, 'lige 'we 'la galegá eté 'emi uché jaré ralámuli. <sup>18</sup> Abiena tani ne Onorúgame napurigá 'emi 'lige suwábaga uché jaré Kristo oyérame 'la námamala chiena 'la nejkúrime ko Kristo. Ramueka pecha na'táliko aliena 'la semáriga nejkúrime ko Kristo. <sup>19</sup> Neka 'we tani Onorúgame napurigá 'emi 'la machimela chiena a'lá na'temao Onorúgame 'emi, rekó tabilé siné námalie churigá ko Onorúgame. Najkí ne napurigá tabilé tábiri rokárélamala napu Onorúgame nejmíli ju.

<sup>20</sup> 'We 'la ra'ichasa 'la képa Onorúgame olagá. 'Lige Onorúgame abé walú nejkúromala tase napurigá ramué tánilia o na'talia. Ramueka 'we 'la 'nátame niru napugiti Onorúgame 'ma 'la nejliligime bo'né Alawala. <sup>21</sup> Suwábaga napu ekí Kristo Esusi oyérame niru, senibí 'we 'la ra'icháwili ju Onorúgame olagá jena wijchimoba 'lige rewagachi. Alarigá nisa 'la képa.

### 4

*Jena ruwimela Páulo ruwíligo churigá ko Onorúgame oyérialia*

<sup>1</sup> Neka jena galírale bajcháriga ajtí Wa'lula Esukristo oyérame kóriká. Alekeri nulá ne napurigá 'la sébali olame nímala 'emi napu wanápurigame ju Onorúgamete. <sup>2</sup> Tase gunarume niwa, tabilé siné ayoga e'yénawa uché jaré ralámuli 'yuga, 'we 'la kilí ruyewa rekó ralámuli tabilé 'la námachi. 'La ganíliga járowa 'emi a'bopi. <sup>3</sup> Onorúgame Alawala bi'lepi 'nátili nejime ju 'lige 'la sébali olawa napu nulá alué alawá. <sup>4</sup> Onorúgame Alawálake pe bi'lepi ju, 'lige suwábaga napu Onorúgame oyérame ju bi'lepi 'nátili na'támili ju, aka Onorúgame wanápulige 'emi semati nejkúrili 'yamia. <sup>5</sup> Pe bi'lepi ju Wa'lula napu ramué nuleme ju, 'lige pe bi'lepi ju alué 'we a'lá 'nátili, tabilé it'é uché bilé, 'lige pe si'nepi ju rewarálime ba'wichí bokobuga

Onorúgame oyérimia, <sup>6</sup> 'lige pe bi'lepi ju Onorúgame napu suwábaga ramué o'nola ju, 'lige alué ju napu suwábaga e'nagá ajtime ju 'lige repuka, 'lige pe bi'lepi ju O'nó Onorúgame napu bochígimi ajti.

<sup>7</sup> Apilipi ramué nóchali 'yárigame niru Kristote napurigá gu'íriwa uché jaré ralámuli. <sup>8</sup> Alekeri ye ra'íchali Onorúgame nila regá aní:

Alué napu simile 'pa rewagachi, 'ma o'tole alué Remónisite cha'piruga mochígame,

'lige nóchali 'yale bo'né Onorúgame oyérame jena epperégame.

<sup>9</sup> ¿Choniamé mayé 'emi alué ra'íchali regá anime «simile 'pa rewagachi»? Alué ra'íchalika regá aniamé kérékuru, 'pákana rewagáchika re'kínagame níligo. <sup>10</sup> Liko alué napu re'kínale 'pákana rewagáchikana pe aba alué ju napu simile 'pa rewagachi bochígimi nulame nimia. <sup>11</sup> 'Lige alué bo'né rewigáchika re'kínagame nóchali 'yale a'pili ralámuli, napurigá jaré nulame nímala Esukristo nocháililachi, 'lige jaré napurigá nareme nímala Onorúgame ra'íchálila, 'lige jaré napurigá benírame nímala ralámuli napu tabilé oyérame ju Onorúgame, 'lige jaré napurigá alé re'obachi nóchame nímala ralámuli gu'iriga Onorúgame oyérame 'lige beníriga. <sup>12</sup> Alué rewagáchika re'kínagame alieri nóchali 'yale alué oyérame ralámuli napurigá aminabi námamala Onorúgame nila ra'íchali 'lige napurigá gu'írimala alué uché jaré ralámuli Onorúgame oyérame, <sup>13</sup> napusi suwábaga ramué 'la oyérisiká Onorúgame 'lige 'la benisuga churigá ko Onorúgame Inolá, a'lige si na'tawa bi'lepi 'nátili pe Kristo na'táililacho. <sup>14</sup> Napu'lige 'ma benisuga churigá ko Onorúgame Inolá, a'lige 'ma tabilé niwa napurigá u'kuchí napu yati se'nú rejcholi cha'pime ju 'lige napu pe chibi ikime ju pe se'nú rejcholi cha'pisá, pe e'karúgame rejcholi oyérasa, alué ralámuli 'yégame nila ra'íchali napu 'we jebénigame ju 'yéigaga uché jaré ralámuli. <sup>15</sup> Iligá ramueka 'we 'la bijchiá ra'íchawa 'we 'la niraga ralámuli. 'Lige alarigá aminacho 'we 'la e'wiwa napu nulá Kristo napu ramué nuleme ju. <sup>16</sup> 'Lige alué ju napu gu'iri a'pilipi ramué napurigá nochawa ramué napurigá nulá Onorúgame. 'Lige nejkuri napurigá gu'íriwa uché jaré ralámuli napurigá 'la bi'lepi 'nátili 'nátame nímala. Napu'lige o'maka 'la bi'lepi 'nátili 'nátaga epperélisiká 'we 'la niraga uché jaré ralámuli 'lige 'we 'la nóchiga alué nóchali napu Onorúgame neji 'liko 'la semáriga ma'chínime ju bilé nóchali.

*Jena ruwimela Páulo ruwiligo 'ma tabilé epperéliwili ko napurigá ralámuli tabilé oyérame Esukristo*

<sup>17</sup> Neka rejcholi neji napu nulá Wa'lula Esukristo, neka najkí napurigá 'ma tase aminabi epperélamala 'emi napurigá alué ralámuli napu tabilé oyérame ju Onorúgame, alué napu epperégame ju pe napurigá a'boi 'nata, <sup>18</sup> 'lige alué ralámulika napurigá chónigichi epperégame ju. Alué ralámulika tabilé Onorúgame oyériga epperégame ju, pe se'nú 'nátili 'nátaga epperégame ju tase alué 'nátili Onorúgame nejíjala, alueka pecha bijchígime kame 'la ruilía napu najkí Onorúgame cha se'nú 'nátili oyérame kame. <sup>19</sup> 'Ma tabilé 'la 'nata alué ralámuli, chibi noká napu nokanali a'boi. Alueka tabilé chenili rekó alanokae pe aminami chibi nokogá e'yénime ju.

<sup>20</sup> 'Émika tabiléchigo alarigá nokimea oyérale ko Kristo. <sup>21</sup> 'Émika 'we 'la 'nátaga gepule chieri ko Esusi 'lige 'we 'la benile 'emi tachiri chu'simio nawáligo Esusi. <sup>22</sup> 'Émika beníriliru napurigá a'rémala 'emi alué 'nátili napu 'emi 'nátame nílige 'ya, alué 'nátili pe chátiri bowechi o'tome ju 'emi. <sup>23</sup> Beníriliru 'emi napurigá Kristo nila 'nátili na'támala 'emi napurigá nuebo neraga nímala 'emi. <sup>24</sup> 'Lige abiena beníriliru 'emi napurigá 'la sébali olame nímala 'emi napurigá najkí Onorúgame, tase napurigá najkí uché jaré ralámuli.

<sup>25</sup> Alekeri tase 'yégame niwa, iligá 'la bi-jchígili ra'íchali ra'íchawa 'emi a'bopi, napugiti suwábaga Kristo oyérame nírigime.

<sup>26</sup> Napu'lige ayósiga tase chibi 'sípua 'lige aminami tase rukuchégame ayowa. <sup>27</sup> Tase e'wawa Remónisi napurigá e'karúgamea 'nátili nejímala.

<sup>28</sup> Alué napu chigome ju 'ma a'rémili ju chigoa, abé alá ju nochalia 'nalina napurigá 'la mépua napu najkí 'emi. Alarigá nóchaga 'la umubámala gu'íria 'emi uché jaré ralámuli napu tabilé nígame ju.

<sup>29</sup> Tase chátiri ra'íchali ra'íchawa, 'we alá semátiri rejcholi beníriwa 'nalina alué ralámuli. <sup>30</sup> Tase sewétiwa Onorúgame Alawala. Onorúgameka bo'né Alawala 'yale 'emi. 'Ma Onorúgame Alawala alawégame nísaká 'emi 'liko Onorúgame 'kúchila júkuru 'emi, 'lige Onorúgameka tebúmala 'emi napusi ku nawachi Kristo 'emi o'tomea 'pa rewagachi.

<sup>31</sup> Tabilé e'karúgame 'nátili 'nata asiboa. 'Ma a'rewa ayoa. 'Ma tase oparúgame niwa. 'Ma tase ayónime niwa ralámuli, 'ma a'rewa alué 'nátili. <sup>32</sup> 'La a'ká ralámuli niwa, 'la nakúruga epperégame niwa 'emi a'boi 'lige 'la e'kawa 'emi a'bopi cha nokágame níriká, a'chigóriga napurigá Onorúgame e'kale 'emi Kristo júlaga napurigá 'la gu'írimala 'emi.

## 5

*Jena ruwimela Páulo ruwíligo churigá ejperélimili ko Onorúgame oyérame ralámuli*

<sup>1</sup> 'Emi napu Onorúgame 'kúchila ju, napu Onorúgame 'we galegá eté, 'la a'chigóriga 'nátame niwa napurigá Onorúgame. <sup>2</sup> 'La ganílga e'yénawa 'la na'temaka a'bopi, napurigá alué Kristo 'la na'temala ramué, 'lige bilena gulusichi mukule ramué gu'iriga. Esukristoka nile napurigá bilé ajágame Onorúgame kógilime, alarigá nile napu'lige gulusichi mukúá. Onorúgameka 'la niralé alarigá ikichi Esusi.

<sup>3</sup> 'Emi napu Onorúgame oyérame ju, 'émika 'we alá sébali olámili ju. Tabilé natámili ju 'emi e'sena umugí 'yuga okólime napu tabilé a'boi 'yula ju 'lige tabilé ra'ichámili ju 'emi alué chibi nokiamé nibilé korúmili ju 'emi e'karúgamea tábiri. <sup>4</sup> Tabilé ra'ichawa se'nú chátiri tábiri ruwime ra'ichali, alué ra'ichali napu pe alué tonto ralámuli ra'ichame ju, iligá regá aníá mochiwa: «Onorúgame 'we 'la nejkúrame ju 'lige bi'neli neyúriga Wa'lula ju ramué nuleme.» <sup>5</sup> 'Emi 'we alá machí alué napu we'ká umugí 'yuga okome ju tase a'boi 'yula, 'lige alué cha nokame, 'lige 'we korume e'karúgame tábiri, 'la machí 'emi 'we chátiri ko alarigá nokíá. Alarigá nokiáká tabilé niralíme ju Onorúgame. 'Lige alekeri tabilé nuléwili ju 'emi Onorúgamete nibilé Kristote. <sup>6</sup> Tabilé a'rewa napurigá bilé ralámuli se'winátiri ra'ichali ruwimela, pe 'yégalí. Napu'lige alué 'yégalí ra'ichali oyérisiga, a'lige nejime ju Onorúgame gastigo napugiti 'ma tase e'wame nímime alué ralámuli napu Onorúgame najkí. <sup>7</sup> Alígeko tabilé oyérawa alué 'nátili napu 'we chátiri ju.

<sup>8</sup> 'Yako 'emi 'la oyérame nile alué 'yégalí ra'ichali, 'lige jípeko 'la bi'lígime bowé najátaga ejperégame ju 'emi, 'máchigo 'la gu'iriligime 'emi alué Wa'lula Esukristote. 'La suériga ejperélawa, napurigá oyérame niru alué tabilé 'yégalí. <sup>9</sup> 'La suériga ejperégame níriká, 'liko uché jaré ralámuli a'chigó nokimélachigó, 'we 'la suériga ejperélamala napurigá najkí Onorúgame, tabilé oyériga ejperélamala alué 'yégalí ra'ichali. <sup>10</sup> Aminacho 'la beniboa tachiri galeme ko Onorúgame. <sup>11</sup> Tabilé gompaniérola niwa alué i'nílga e'yéname ralámuli alué napu pe 'yégalí benírame ju napugiti pe chónala neraga kame alueka, iligá 'émika 'we 'la ruyewa tabilé 'la ko alanokiá. <sup>12</sup> 'We chijunárume ju ruwá 'we i'nílga e'yéneo ralámuli a'minami chíbika. <sup>13</sup> Napu'lige bilé ralámuli 'we 'la benisá Onorúgame nila ra'ichali machime ju chieri ra'ichali tabilé 'la ko 'lige chieri ra'ichali 'la

ko napu ralámuli benírame ju. <sup>14</sup> Onorúgame nila ra'ichalika ju napurigá bilé rajilí napu rajilime ju chóniga ilígichi. Alekeri bilé ra'ichali abé 'ya osirúgime, regá anime ju:

'Ma busá, mué napu gojchigá bo'ílige, 'ma asísiwa mué napu bo'í alé napu bi'tí suwígame\*

'lige Kristo 'we 'la gu'irimala mué.

<sup>15</sup> Aliko 'we 'la 'nátaga e'yénawa, tase ejperéliwa napurigá ejperégame ju alué ralámuli napu tabilé e'wame ju Onorúgame nila ra'ichali, iligá ejperéliwa napurigá ejperégame ju alué ralámuli napu 'we alá e'wame ju Onorúgame nila ra'ichali. <sup>16</sup> Senibí 'nátaga mochiwa uché jaré gu'irilime napugiti we'ká ralámuli mochigimempá 'we cha nokame. <sup>17</sup> Tabilé tonto niwa. 'We 'la na'tawa suwábaga. 'La machigá mochiwa suwábaga napu najkí Wa'lula Esukristo. <sup>18</sup> Tase rekuka bajjiwa napugiti 'lige rekusa pe chibi nokame ju 'emi. Abé alá ju Onorúgame Alawala 'emi nulea. <sup>19</sup> Napu'lige napaisa Onorúgame nila ra'ichali benimeka, 'la wikarawa Onorúgame wikala napu wikarálige Rabí. 'Lige aminami wikarawa napurigá wikarame ju alué uché jaré Esukristo oyérame ruigá Onorúgame 'we 'la nejkúrame ko. 'Lige aminami wikarawa Onorúgame Alawala nejisa 'nátili napurigá wikarawa. <sup>20</sup> Senibí walú cheliera 'yawa O'nó Onorúgame napugiti 'émika nulélime kame Wa'lula Esukristote.

*Jena ruwimela Páulo ruwíligo churigá ejperélimili ko Onorúgame oyérame*

<sup>21</sup> 'Emi napu 'la nirame ju Kristo, a'chigóriga nirawa 'emi a'bopi.

<sup>22</sup> Alué umugí napu 'yúgame ju rió, 'la e'wame nímala alué rió nulachi, napurigá e'wame ju Wa'lula Esukristo nulachi. <sup>23</sup> Kristoka suwábaga bo'né oyérame nuleme ju 'lige alué 'sime ju a'kabá jawa ralámuli, 'lige Kristoka 'la lisensia 'yale rió napurigá nulame nímala bo'né bejtélachi. <sup>24</sup> Ralámuli Kristo oyérame 'we 'la sébali olame ju suwábaga napu Kristo najkí. A'chigóriga ju bilé mukí napu rió 'yúgame ju, 'we 'la e'wámili ju alué rió nulachi.

<sup>25</sup> Suwábaga 'emi napu mukí 'yúgame ju, 'we 'la galewa 'emi alué mukí bo'né 'yula, a'chigóriga napurigá Kristo 'we 'la na'temala 'emi. Alueka mukúlekuru 'emi gu'iriga. <sup>26</sup> Alarigá mukule ramué 'la alekecho oyérame niwa. Ramué alawala bi'wélíkuru napu'lige ramué oyérisiga Onorúgame nila ra'ichali. <sup>27</sup> Kristoka mukúlekuru ralámuli alawala bi'wigá napurigá 'we 'la sébali olame nímala, tabilé chátiri 'nátame. Wanápale napurigá pe alekecho oyérame nímala. <sup>28</sup> Napurigá

\* 5:14 Ye ra'ichalika pe anime kéré: «Tabilé 'yuga einawa mué napu tabilé oyérame ju Onorúgame.»



bilé rió 'we galeme ju bo'né, alarigá galémili júkuruchigó alué bo'né upila. Bilé rió napu 'we galeme ju bo'né upila, abiena 'we galeme ju bo'nepi. <sup>29</sup> Tabilé 'wesi rió gichime ju bo'nepi, 'we 'la repume ju 'nalina go'ame igá. Kristoka abiena 'la suériga repume ju ramué <sup>30</sup> napugiti ramueka Kristo oyérame nírigime. <sup>31</sup> Aka regá aniché Onorúgame nila ra'ichali 'we 'ya osirúgime: «Bilé rió napu newime ju bilé muki 'yuga, o'nola a'rémili ju napurigá napaíka mochímala pe okaka, 'lige bi'lepi 'nátali na'támili ju.»<sup>†</sup> <sup>32</sup> Onorúgame abé 'yako tabilé benírale ramué tachiri ruwime ko ye ra'ichali, alekeri 'we nóchali kame ju beniaa ye ra'ichali nobi wéchigo 'we 'la bijchiá júkó. Ye ra'ichalika 'we 'la ruyame ju churigá ka Kristo 'lige alué oyérame. <sup>33</sup> 'Lige abiena ruwime ju bilé rió 'we 'la repúmili ko bo'né 'yula 'lige 'la galegá napurigá bo'né. 'Lige alué mukika 'we 'la nírámili júkuru bo'né 'yula.

## 6

*Jena ruwimela Páulo ruwíligo churigá ejperélimio ralámuli a'boi ejperélaichi alué Onorúgame oyérame*

<sup>1</sup> 'Emi 'kuchi 'we 'la e'wawa napu'lige 'emi o'nola nulachi. Alarigá ju napu'lige Wa'lula Esukristo nulachi. <sup>2-3</sup> Napu'lige Onorúgame 'yale Moisesi alué makué nulalí, alué bilé nulalí nulá 'we 'la nírálime ko ramué o'nola, 'lige ruwí alarigá olásiká 'we 'la ganílga ejperérawili ko we'ká bamí. Uché jaré nulalí, tabilé ruwime ju chukiboli ko 'la sébali olásiká, nobi yeka wéchigo 'la ruwime júkó.

<sup>4</sup> 'Lige 'emi napu 'kúchigame ju, tase iwégame ne'ochawa 'emi 'kúchila, pecha 'la nímawé alarigáká, abé 'la ju gu'írilia 'lige rejcholi i'lia, 'lige benírilia napurigá najkí Wa'lula Esukristo.

<sup>5</sup> 'Emi ralámuli napu ralurúgame ju napurigá nochámala tabilé meka, 'we 'la e'wiwa alué rió nóchali nígame, 'la niraga etewa alué nóchali nígame napurigá Kristo. <sup>6</sup> Tase pe napu'lige etelia 'emi, tase pe a'ligecho 'la sébali olame niwa pe napurigá 'la suériga ra'ichámala 'emi olagá. Iligá 'we 'la sébali olame niwa senibí napurigá Kristote ralurúgame neraga, 'we 'la Onorúgame oyériga. <sup>7</sup> 'La ganilga newawa bilé nóchali napurigá nochálime ju Wa'lula Esukristo nochálila. <sup>8</sup> 'Emi 'we 'la machí 'we 'la gu'irimio Onorúgame 'emi 'we 'la sébali olame nísaká rekó pe ralurúgame ke 'emi o tabilé ralurúgame ke.

<sup>9</sup> Alué nóchali nígame 'we 'la suériga repúmili júkuru 'emi nóchame napu ekí 'emi ralale nochárimia, tase ayóniga. 'We 'la nélegá nokísiwa 'emi Onorúgame ko wa'lula

nuleme 'lige aminami alué ralurúgame ralámuli nuleme, alué napu ju Onorúgame 'pa rewagachi ajtíggame, 'lige Onorúgameka tabilé chélegá eteme ju rekó jaré ralurúgame kachi o rekó jaré wa'lula nóchali nígame kachi.

*Jena ruwimela Páulo ruwíligo chu'símili ko bilé ralámuli Onorúgame oyérame napurigá tabilé uméramala Remónisi na'tálila*

<sup>10</sup> 'Lige jípeko uché pe u'kabi rejcholi ruyeme ne 'emi napurigá 'la suériga nokísiwa jena gawichí. 'La a'wagá mochiwa, 'la narépua alué nejkúrali napu nejí Wa'lula Esukristo. <sup>11</sup> 'We 'la tániga nokísiwa iwérali Onorúgame, napurigá tabilé neyúrimala Remónisi na'tálila. <sup>12</sup> Pecha ralámuli sayega mochirú, 'lige Remónisi gompaniérola napu tabilé etérume ju, napu 'ma nulea mochí we'ká ralámuli jena wijchimoba. <sup>13</sup> Alekeri 'la tániga nokísiwa iwérali alué Onorúgame, napurigá tabilé neyúrimala Remónisi na'tálila. Alarigaka 'la anachámala 'emi napu'lige sebasa resiti raweli, napugiti 'ma 'la iwega mochímime 'emi. <sup>14</sup> 'Liko 'la iwega mochiwa, 'la bi'lepi 'nátali 'nátaga. Napu aní Onorúgame 'la bijchiá ju, 'lige Onorúgameka 'la sébali olame ju bilé tábiri 'la sébali olame orisá. <sup>15</sup> Senibí 'la 'nátaga mochiwa Onorúgame nila ra'ichali benírímia ralámuli napurigá tabilé we'ká 'nátaga mochímala. <sup>16</sup> 'Emi 'we 'la bijchígisaká napu aní Onorúgame 'lige 'la sébali olásaká 'emi napurigá najkí Onorúgame 'liko 'la tabilé umériwa 'emi Remónisi na'táililate. <sup>17</sup> Onorúgame 'ma bi'wésaká 'emi alawala 'lige 'emi 'we 'la námame nisa Onorúgame nila ra'ichali 'liko 'emi 'la umérimala Remónisi na'tálila. <sup>18</sup> Tabilé a'rewa Onorúgame 'yuga ra'icha 'lige iwérali tania, Onorúgame senibí tániwa nejkúrali, Onorúgame Alawala 'we 'la nejkúrimala. 'We 'la 'nátaga mochiwa, tabilé guwana rujsuka, 'lige 'we tániwa Onorúgame napurigá gu'irimala suwábaga napu Onorúgame oyérame ju. <sup>19</sup> Tániwachigó Onorúgame napurigá ne'chí gu'irimala napurigá 'la tabilé majaga benírimala ne Onorúgame nila ra'ichali, alué ra'ichali napu tabilé 'cho 'la námame ju ralámuli. <sup>20</sup> Onorúgame 'ya ne'chí ye nóchali napurigá ralámuli benírime ne Onorúgame nila ra'ichali, alekeri galírale bajcháriga ajtí ne jipe. 'We tániwa Onorúgame napurigá tabilé majaga ra'ichámala ne, 'lige aminami napurigá 'la benagá ra'ichámala ne.

<sup>21</sup> Neka najkí napurigá 'emi 'we 'la machimela chieti ajtígó 'lige chu'siá ajtígó ne, alekeri jula ne alemi Tíkiko anilime rió,

<sup>†</sup> 5:31 E'nesi Génesis 2:24.

napu 'we 'la oyérame ju Wa'lula Esukristo napurigá ne. <sup>22</sup> Neka tabilé najkí napurigá seweka mochímala 'emi. Neka najkí 'lina napurigá 'emi abichilubi 'we iwériga nokísimala Onorúgame oyeria.

<sup>23</sup> Suwábaga 'emi napu Onorúgame oyérame ju napurigá ne, 'we 'la gu'írasa 'la kápá O'nó Onorúgame 'lige Wa'lula Esukristo napurigá tabilé e'karúgamea 'nata mochímala 'emi. 'La ganíliga etesa 'la kápá Onorúgame 'lige Esukristo napugiti 'émika 'ma 'la bijchígame kame Onorúgame nila ra'íchali. <sup>24</sup> Onorúgame 'we 'la gu'írasa 'la kápá suwábaga 'emi napu senibí 'we 'la niraga eteme ju Wa'lula Esukristo.

Pe ekí júpá ye ra'íchali. Wa'lú cheliérabá.

## Ye Ju Alué Apeli Napu Osele Páulo Alué Ralámuli Napu Bilipo Ejperégame Nílige

*Kuira suwábaga 'emi ralámuli Bilipo ejperégame napu eki Onorúgame oyérame ju.*

<sup>1</sup> Ne Páulo osá ye osilí. Timoteo jena ajtíchigó. Ramueka pe nóchame niru napu nulá Kristo Esusi.\* Neka osé ye osilí suwábaga 'emi alé Bilipo rewégachi ejperégame alé napu ju bilena we'ká riógichi suwábaga 'emi ralámuli napu 'la Kristo Esusi oyérame ju. Jaré 'emi e'wélala ju Esusi oyérame nuleme 'lige jaré 'emi pe nejkúríme ju bilé nejkúríme rokárélasaká.† <sup>2</sup> Onorúgame 'we a'lá semáriga gu'írisa 'la kápá 'emi.

*Jena ruwimela Páulo tánligo Onorúgame napurigá 'la semáriga gu'írimala suwábaga 'la Onorúgame oyérame*

<sup>3</sup> Napu'lige néléa ne 'emi, wa'lú cheliera 'yame ju ne Onorúgame. <sup>4</sup> 'We a'lá ganíliga tánime ju ne napurigá 'la semáriga gu'írimala suwábaga 'emi, <sup>5</sup> napugiti 'émika 'la benírame kámechigó ralámuli alué Onorúgame nila ra'íchali, napurigá ne napuika chojkiárituru nocha napu nulá Onorúgame. Jípesí tabilé 'cho guwana rulsú 'emi. <sup>6</sup> 'We 'la machigá ajtí ne abichilubi 'yamio iwérali Onorúgame 'emi napusí uché ku nawá Kristo Esusi. <sup>7</sup> Neka 'we 'la semáriga na'temá 'lige nélé ne 'emi napugiti 'émika nóchame kame napu nulá Wa'lula Onorúgame, pe aba alué Onorúgame napu 'yuga nóchame ju ne. 'Émika abichilubi 'we a'lá iwériga nokisi rekó ne jena ajtígichi galírale bajcháriga, 'lige 'emi 'la a'chigóriga 'la bi'lepi 'nátali 'nátame ju ne 'yuga napu'lige ne alué e'wélala 'yuga ra'íchachi alé napu nóchame ju alué e'wélala napu'lige ne ruyechi Onorúgame 'we a'lá semáriga nejkúríme ko. <sup>8</sup> 'Lige Onorúgame 'we a'lá machigá ajtí aliena 'la semáriga na'temao ne 'lige 'we néléo ne suwábaga 'emi, pe Kristo Esusi neji 'nátali napurigá aliena na'temámalá ne 'emi. <sup>9</sup> Neka Onorúgame 'yuga ra'íchaga 'we 'la tánime ju napurigá 'emi gu'írimala napurigá abichilubi abé na'temaka nokísimala 'emi a'bopi o'maka 'lige aminabi benigá 'we 'la bi'wígame Onorúgame nila ra'íchali tachiri najkió Onorúgame, <sup>10</sup> napurigá senibí 'la machigá gepúmala 'emi chieri ra'íchali ka 'la najteme Onorúgame nila ra'íchali, napurigá tabilé chérikáme nímala 'emi napu'lige uchéchigo nawachi Kristo. <sup>11</sup> Alarigá alué

Esukristo 'we 'la gu'írimala 'emi napurigá 'la senibí 'la nélélamala 'la Onorúgame nocháililachi nóchame ko 'emi 'la bi'lepi 'nátaga.

*Jena ruwimela Páulo ruwíligo senibí e'wime ko napu najki Kristo*

<sup>12</sup> Suwábaga 'emi Onorúgame oyérame a'chigóriga napurigá ne, neka najki napurigá machimela 'emi, jipe a'kinana galírale bajchásiga ne abéchigo 'we elao ne ralámuli beniria tachiri gite nawáligo Kristo. <sup>13</sup> Arigá jípesíko 'ma suwábaga sontalo jena nóchame 'lige suwábaga ralámuli jena Roma ejperégame machí bajcháriga ajtigó ne jena galírale pe Kristo oyérame kóriká. <sup>14</sup> 'Lige we'ká, amulí suwábaga alué Onorúgame oyérame, ne'chí etega jena ajtígichi ne galírale bajcháriga, abéchigo tabilé majaga beniri jípeko alué Onorúgame nila ra'íchali jena pachá galírale 'lige ma'chí.

<sup>15</sup> Jaré pe ne'chí gichime kéré nobi 'wéchigo semáriga benírame júkó ralámuli Kristo nila ra'íchali rejcholi, abiena 'láchigo jaré júkó abé 'la bijchiá 'la oyérame Kristo, 'la o'wé 'nátame, <sup>16</sup> napu 'la na'temaka noká ne'chí, ne jena ajtígórikábá galírale bajcháriga. 'Lige jaré pe 'we riólaga nokame ju a'bopi pe napurigá sewémala ne jena galírale bajcháriga asagá. <sup>17</sup> Aba alué uché jarélaka 'we 'la na'temaka noká ne'chí, alueka machiame pe Onorúgame bo'né alarigá rekíligo ne'chí napurigá ne jena a'pawa, napurigá jena nemímala ne, ruigá 'we a'lá ko Onorúgame nila ra'íchali. <sup>18</sup> Tabiléchigo chéréko rekó jaré ralámuli jena Roma ejperégame ra'íchie tabilé nélegá Onorúgame, neka abirigáchigo 'la ra'salagó napugiti alué ralámuli abiena 'la Kristo ra'íchalála benírame ju uché jaré ralámuli.‡

<sup>19</sup> Neka 'la machí 'la ma'chínimio ne jena galírale Esukristo a'walila gite, napugiti 'emi 'we 'la tánime wa'lú nejkúrali Onorúgame. <sup>20</sup> Neka tabilé chijúniga rejpínili pe bo'né tabilé 'la e'wiga Onorúgame, neka najki 'nalina napurigá 'la ma'chigime nélélamala jipe 'lige senibí Kristo 'we 'la gu'irio ne'chí rekó 'ma me'liáe ne ralámulite. <sup>21</sup> Neka bijí jena asagá ajagá 'la Kristo oyériga bejtégame ju ne, napu'lige ne mukusáká 'ma rewagachi moínámala ne Kristo 'yuga asimea, alarigá ka abé 'la nímala. <sup>22</sup> 'Lige ne bijí jena ajagá asagá aminacho beniria asimela ne Kristo nila ra'íchali, alekeri tabilé machí ne churigá abé alá ka, yati mukusuga o abé we'lisi asisuga. <sup>23</sup> Tabilé machí ne tachiri churigá abé 'la ka. I'sínimio abé 'la nerá ne mukiamé, napugiti 'ma mukusáká ne 'liko 'ma 'la Kristo 'yuga asimé ne. <sup>24</sup> 'Lige

\* 1:1 E'nesi glosario «Cristo» 'lige «jesús».

† 1:1 E'nesi glosario «diácono».

‡ 1:18 Alarigá anile Páulo napugiti jaré alé Roma ejperégame 'we 'la semáriga ra'íchame níligame nobi tabiléchigo alá bi'wígame alawégame nilekó.

'emi níriká abé 'la ju ajagá ajtigó ne napurigá abé 'la aminabi benirimempá ne 'emi Kristo nila ra'íchali. <sup>25</sup> 'We 'la machí ne bijí we'lisi asimeo ne ajagá 'emi 'yuga 'emi gu'iria rejcholi ruyea napurigá aminabi 'la bijchígimala 'emi 'la wa'lú a'walí nígame ko Esukristo. <sup>26</sup> Alarigá asíruga 'la ra'sálámala 'emi napu'lige ne ku 'emi 'yuga ajtigichi 'lige abéchigo 'la bijchígimala 'emi 'la semáriga gu'íriligo Kristo Esusi ne'chí, 'lige alarigá Kristo Esusi 'we a'lá gu'írimala 'emi.

<sup>27</sup> 'Lige jípeko 'émika 'we a'ká ralámuli niwa, napurigá ne 'we 'la machigá asimempá 'la bi'lepi 'nátali 'nátaga mochigo 'emi o'maka, 'la napurigá najkí Kristo. 'We a'lá beniria mochiwa Kristo ar'élela ra'íchali suwábaga ralámuli, <sup>28</sup> 'la tabilé majaga alué ralámuli 'emi saíla alué napu tabilé galeme ju Onorúgame nila ra'íchali. Tabilé majaga benirasaká 'emi, yeka pe ruyame nímala alué ralámuli pe alanokigá a'bopi 'ma na'ichí 'lúpili ko napu'lige suwisá 'lige 'émika 'la rewigachi moínámili ko suwisá. <sup>29</sup> Onorúgameka rekí 'emi napurigá 'la Kristo oyérame nímala. Rekó 'emi 'ma 'la Onorúgame oyérame ke abiena resí ikimela 'emi. Onorúgame rekí napurigá resí ikimela 'emi Kristo oyériga. <sup>30</sup> 'Emi 'la etéturu alé Bilipo resí olárigo ne Onorúgame nila ra'íchali ruwichi ne, 'lige jípe abiena 'la machíguru 'emi abisibi resí ikió ne jena, 'emi 'we resí oliáchigo alé Bilipo.

## 2

*Jena ruwimela Páulo ruwíligo Kristo 'we na'temao suwábaga ralámuli Onorúgame oyérame*

<sup>1</sup> 'Émika 'we 'la 'yalá iwérali Kristote, 'lige 'emi 'la machíguru Kristo 'we 'la na'temao 'emi, 'lige Kristo Alawala 'emi sa'pálachi ajtí. <sup>2</sup> 'We 'la ra'sáláriwa ne'chí 'la ganíliga ejperega 'la bi'lepi 'nátaga pe Onorúgamecho 'la nélegá, 'la na'temaka 'emi a'bopi. <sup>3</sup> Tabilé gunuruwa, tabilé e'wélala níniliwa 'emi, abé najtékame neraga etewa 'nalina uché jaré ralámuli. Tase abé najtékame koripoa 'emi a'bopi. <sup>4</sup> Tabilé bi'neli nochánilime niwa bo'nepi 'nátaga, 'la gu'íriwa uché jaré ralámuli.

<sup>5</sup> 'Émichigó 'la semáriga 'nátame niwa napurigá 'nátame nile Kristo Esusi. <sup>6</sup> Kristo Esúsika rekó Onorúgame ke tabilé siné ruigá eyénale Onorúgame niligo, alueka pe napurigá bilé rió neraga eyéname nile. <sup>7</sup> Kristo Esúsika jena wijchímoba ochérale, 'lige nóchale 'we 'la sébali e'wiga Onorúgame. <sup>8</sup> 'Lige jena wijchímoba ochérisa me'líliu gulusichi ujchugá. Alué Kristo Esúsika pe aba alarigá mukumea nawale, Onorúgame alarigá nuléligime. <sup>9</sup> Alekeri Onorúgameka 'we najtékame

newale 'pa rewagachi sebasa me'tagá apiépiri ralámuli, 'we najtékame newale alué Esusi rewalá, <sup>10</sup> napurigá alué rewalá akigá animela 'we najtékame ko Esusi me'tagá alué suwábaga ralámuli jena wijchímoba ejperégame, alué ajagá mochígame 'lige alué ko suwígame ralámuli, 'lige me'tagá alué we'ká remónisi re'lé mochígame, 'lige aminami me'tagá alué santo ánjeli 'pa rewagachi mochígame, <sup>11</sup> napurigá suwábaga akigá animela Esukristo Wa'lula Nulame ko. 'Lige aminami animela 'we 'la nirawa wa'lú a'walí nígame ko Onorúgame.

*Jena ruwimela Páulo ruwíligo Onorúgame najkió 'we 'la e'wálime ko napu nulá bo'né*

<sup>12</sup> 'Emi ne gompaniérola napu 'we na'temá ne 'emi, napu'lige ne 'emi 'yuga ajtígachi, 'we a'lá e'weme ke 'emi ne'chí. Abéchigo 'la e'wawa jípe ne 'we mejká ajtígichi. Neka 'we najkíba napurigá 'emi abichilubi alarigá ejperélamala napurigá ejperé 'emi 'we 'la nélegá Onorúgame. <sup>13</sup> Pe Onorúgame rekí napurigá 'emi 'we 'la oyéramala Onorúgame 'we 'la niraga 'lige napurigá 'la sébali olámala 'emi alué Onorúgame nila ra'íchali ruyea ralámuli.

<sup>14</sup> Suwábaga 'emi Onorúgame oyérame, nochawa alué nóchali napu nulá Onorúgame tabilé che anigá napu'lige nulachi Onorúgame, tabilé gawéliga uché jaré ralámuli, <sup>15</sup> napurigá tabilé 'wesi ralámuli che animela 'emi olagá 'la tabilé gawéliga e'yénasaká, napurigá nímala 'emi Onorúgame 'kúchila 'we a'lá 'nátame napu'lige e'yena 'emi alemi alué 'we i'nílame ralámuli mochígichi beníruga ra'íchali napu néji Onorúgame, alué ra'íchali napu wa'lú iwérali 'yame ju ralámuli. <sup>16</sup> Alarigá nokisaká 'emi liko 'we ra'sálámala ne napu'lige uché nawachi alué Kristo, napu'lige machisá ne tabilé rioksi ko suwábaga napu beniria ajtí ne 'emi. <sup>17</sup> Tabilé chéré rekó ne 'we resí ikié 'lige rekó me'liboli ke ne 'emi gu'íriga napurigá 'emi 'la a'ká ralámuli nímala 'la napurigá Onorúgame najkí 'lige 'la oyérame Onorúgame. Tabilé chéré rekó 'we resí ikié ne, neka 'we ra'sálagá ajtí. <sup>18</sup> Neka najkíguru napurigá 'emi 'la ganíliga mochímalachigó ne lakichi.

*Jena ruwimela Páulo ruwíligo julamio alemi Bilipo alué Timoteo 'lige Epaprolito*

<sup>19</sup> Alué Wa'lula Esusi elasa, julánili ne Timoteo alé napu 'emi mochí napurigá ku nawagá ruwimela chieti mochigo 'emi, 'we 'la ganíliga asimé ne 'lige machisá 'we 'la mochigo 'emi. <sup>20</sup> Jena tabilé 'wesi rió i'té napurigá Timoteo aliéna galeme 'emi machínálime chieti mochigo 'emi. Timoteo 'we galé 'emi napurigá ne. <sup>21</sup> Ralámulika pe 'nátame ju napurigá nóchame ju a'boi, tase napurigá najkí Kristo Esusi. <sup>22</sup> 'Emi 'la

machíguru 'we 'la gu'irio ne'chí alué Timoteo Onorúgame ra'íchálila ben'richi ne 'emi. Alueka nejkuri napurigá bilé towí bo'né o'nola gu'írime. <sup>23</sup> Napu'lige machisá ne alolabo ne jena, 'we yati julámala ne Timoteo alemi. <sup>24</sup> Onorúgame elásaká napurigá 'la ma'chínamala ne jena, ne bo'né simela alé 'mi napu 'emi mochí.

<sup>25</sup> Neka 'we 'la nirá ye rió Epaprolito rewégame julamia alemi napu 'emi mochí, ye rió napu Onorúgame oyérame ju napurigá ne, napu ne gompaniérola ju nóchalichi napu 'we iligéchigo nemía ruyá 'we a'lá ko Onorúgame nila ra'íchali napu'lige bajchásiga ne jena galírale, napu 'emi júlale napurigá gu'írimala ne'chí bilé tabiri rokárélasa. <sup>26</sup> Ye rioka 'we néléa ajtí 'emi 'lige we'ká 'nata ajtíge napu'lige 'emi 'we 'nata mochígichi chieti ajtígo napu'lige nayuchi ye rió Epaprolito. <sup>27</sup> Alarigá ju. Ye rió 'we nayue jena, amulí mukugé, Onorúgameka 'wéchigo 'la na'temale ko 'lige 'we 'la gu'irile napurigá tabilé mukumela, ne'chí 'we na'temálechigó Onorúgame 'lige tabilé a'rele napurigá mukumela alué Epaprolito napurigá ne tabilé aminabi sewémala. <sup>28</sup> Alekeri neka abéchigo 'we lagá julánili ye rió napurigá 'emi 'we ra'sálámala etea ye rió 'lige aminami napurigá ne 'ma tabilé seweka asimela napu'lige 'emi ku 'we 'la ra'sálagá mochígichi. <sup>29</sup> 'We 'la galegá etewa 'emi ye rió, ye rioka 'we 'la Onorúgame oyérame kame. A'chigóriga aliena na'temaka etéwachigó apiépiri ralámuli alarigá nóchame napurigá ye rió. <sup>30</sup> Ye rioka Kristo nochálalachi nóchaga amulí mukú 'we a'wágame nayue jena nawasa ne'chí gu'írimala napugiti 'émika tabilé gayénaligime jeka jsiá ne'chí gu'írimala napugiti cha mejká kame.

### 3

*Jena ruwimela Páulo ruwíligo abé najtékame ko beniaa Kristo nila ra'íchali*

<sup>1</sup> Jípekobá, 'emi napu Onorúgame oyérame ju napurigá ne, 'we ra'sáláwa. Neka uché bilé ra'íchali osé 'emi, tabilé resibá ne 'emi osegá aba pe alué ra'íchali napugiti wa'lú nejkúrali kame ye ra'íchali 'emi níriga.

<sup>2</sup> Tabilé bijchígawa alué ra'íchili 'yégali napu ruwí alué ralámuli tabilé 'la 'nátame. Alué napu nulame ju sikiréniliga pe'tá isilala wi'chila,\* napu anime ju: «Alarigá nok-isáká 'emi a'boi 'la rewagachi moínámala 'emi napu'lige suwisá.» Alarigá anime ju alué 'yégame ralámuli. <sup>3</sup> Pe ramueka 'la bijchiá 'la moínawa rewagachi, ramué napu 'la Onorúgame tánilime niru iwérali

Onorúgame alawala gite, 'lige tabilé anime niru ramué a'boi gite 'we 'la gainárame níriga Kristo Esusi oyeria. 'We ra'sálagá mochiru, machiáame jípeko 'la Kristo Esusi oyérame níriga. <sup>4</sup> 'We e'karúriga nokame ke ralámuli Onorúgame oyeria nobi neka abéchigo e'karú 'sime kékó me'tagá alué ralámuli. <sup>5</sup> Ne abiena sikirétigame júchigó pe'tá isilala wi'chila pe kulí osánó rawé ajtígachi ne ochérasa napurigá nulale Moisesi apélichí osagá, 'lige israelita ju ne, 'lige ne o'nola israelita ke, 'lige ebreo ra'íchame ju ne napu ra'íchame ju suwábaga israelita, 'lige bariseo† ke ne, 'lige alué Benjamini rijimala ju ne, alué Benjamini napu 'we 'ya bejtele ta'chó ochérachi ne. <sup>6</sup> Neka 'we me'linálime ke alué Esusi oyérame, mayega alarigá najkió Onorúgame. 'Lige tabilé 'wesi ralámuli se'winá aneme ke ne'chí napugiti neka 'we 'la senibí sébali olagánturu napu nulale Moisesi apélichí osagá. Tabiléchigo a'lá bi'wígame alawégame niliko ne napusi 'ma 'la Esukristo oyeria, a'lige kulí 'la bi'wígame gayena ne alawala. <sup>7-8</sup> Neka Kristo oyériga 'ma a're suwábaga napu benigé ne regá anigá: «Pe tabilé 'la 'nátame nile ne.» 'Lige regá anigá a're ne suwábaga alué 'nátili: «'We a'lá machisúgaka‡ Kristo Esusi 'nalina abé 'la ju me'tigá alué 'nátili napu 'nátame nile ne.» Suwábaga alué 'nátili napu ne 'nátame ke pe napurigá repuga nile 'mi mejkami pasime. <sup>9</sup> Neka a'lá semáriga 'nata pe bi'lepi 'nátili na'tániliga pe Kristo nélélimecho. 'Lige neka tabilé najki napurigá ralámuli animela 'we 'la rió ko ne pe 'we 'la sébali olagá bejtégiriká pe napu nulá alué nulalí nóchali napu Onorúgame nejile napu nulá napurigá tabilé chigowa 'lige napurigá tabilé me'líboa. Neka 'we 'la najki 'nalina napurigá 'la galegá etewa ne Onorúgamete 'la bijchígame ju ne wa'lú a'walí nígame ko Kristo. <sup>10</sup> Neka najki napurigá alué Kristo Alawala pachágana ne sa'pálachi asagá abé a'lá nejkúrimala.§ Neka najkíchigó alué a'walí napu Onorúgame 'yale alué Kristo napurigá ku 'la ajánamala, 'lige abiénachigó 'we a'lá na'tánili ne napurigá 'nátale Kristo, <sup>11</sup> napurigá Onorúgame 'la ku 'la ajánirimala ne'chí napu'lige ne mukusá napurigá rewagachi simela ne.

*Jena ruwimela Páulo ruwíligo aminabi oyérilime ko Onorúgame tase guwana rujsuka*

<sup>12</sup> Ta'chó 'me 'la sébali olame ju ne napurigá najki Onorúgame. Tabilé 'cho suwábaga machí ne. Neka 'la bijchiá uché rajpé abé 'la 'nátaga bejténili napurigá najkile Kristo Esusi napu'lige pe kulí ma'chí

\* 3:2 E'nesi glosario «circuncisión». † 3:5 E'nesi glosario «fariseo». ‡ 3:7-8 Alué ra'íchali «machisuga» aníá Páulo pe anime ke anile 'we a'lá ko Esusi oyérilía 'nalina o a'rilíla ma alué chátiri 'nátili. § 3:10 Yolí ra'íchaga regá anime chukú: Lo que quiero es conocer a Cristo.

pa ne'chí alué chátiri bowechi.\* <sup>13</sup> 'Emi ralámuli Onorúgame oyérame napurigá ne, neka tabilé 'cho sébali olá napurigá Onorúgame najkí. Neka láchigo oyéragó Onorúgame. Tabilé ku guwana wijchí ne. <sup>14</sup> Neka 'we 'la e'wérali olá naremia napu Kristo Esusi nejmili ju 'pa rewagachi. Onorúgame gite 'la alarigá 'nata ne.

<sup>15</sup> Suwábaga ramué 'we 'la oyérame nísaká 'la alarigá na'táwikuru ramué, 'lige 'emi rekó tabilé umebe alarigá 'nata abiena 'la ne-jkúrimala Onorúgame napurigá 'la semátiri 'nátili na'támala 'emi. <sup>16</sup> 'Liko, 'emi 'we 'la machime ju Onorúgame nila ra'íchali rejcholi, 'we a'lá sébali olagá ejperélawa napu ekí námame ju 'emi tabilé se'winá nokigá.

<sup>17</sup> 'Emi ralámuli Onorúgame oyérame napurigá ne, ejperélawa napurigá bejté ne, 'we 'la 'nátaga mochiwa churigá ejperego alué ralámuli napu eté 'emi benírílichiramué ne Páulo Timoteo si alué semati rejcholi. <sup>18</sup> 'We'sá ruwíguru ne 'lige we'ká ralámuli tabilé bijchígiguru ramué ralámuli gu'iriga mukúligo alué Kristo alé gulusichí chujkugá. 'We seweka ajtí ne 'lige alué ralámuli alarigá 'nátachi. <sup>19</sup> Alué ralámulika o'wékana simámala, tabilé e'weme Onorúgame. Pe nóchame ju pe napurigá najkí a'boi. Pe bajílimecho 'nátame ju, 'lige pe go'ámecho. 'We gunarúgame ju alué ralámuli. Chijunati kékuru. Alué ralámulika tabilé néléme ju Onorúgame. <sup>20</sup> Ramueka tabilé alarigá niru, 'lige 'la machiaa 'ma 'la rewagachi moináwili ko. Buigá mochiru ramué alué a'wali nígame Esukristo napurigá nolínamala ramué o'tomea 'pa rewagachi. <sup>21</sup> Se'wináriga newámala ramué sa'pala, alésiko niwa napurigá bo'né Esukristo, a'chigóriga aliena wa'lú a'walí nígame niwa ramué 'pa rewagachi. Biji jena wijchimoba mochigaká, 'we resítiri sa'pega ejperégame niru, napu'lige rewagachi moinásiká se'winátiri sa'pégame niwa tabilé resítiri.

#### 4

*Jena ruwimela Páulo ruwíligo nabí ra'sálátime ko napugiti Esukristo 'la semáriga nejkúrime kame*

<sup>1</sup> 'Emi ralámuli Onorúgame oyérame napurigá ne, 'we eté'nali ne 'emi. Onorúgame nejile napurigá 'we ganílimala ne 'emi etega 'we a'lá oyerio 'emi Onorúgame nila ra'íchali. Neka najkí napurigá 'la nabí alarigá ejperélamala 'emi napurigá najkí Onorúgame.

\* **3:12** Napu'lige alué Páulo enágichi Ramasko simíá a'mulipi ra'íchale Esusi Páulo 'yuga regá anegá: «¿Chonigá sairúgame niraga ajtípacché mueka ne'chí 'yuga?» 'Lige Páuloka anele: «Mueka ¿chieri júpaché?» 'Lige Esúsika anele: «Neka Esusi ju.» 'Lige pe u'kabi rawé tabilé ma'chíhile alué Páulo napusi ku sa'wásiga Esúsité. A'kinana 'we 'la oyérale Onorúgame alué Páulo. E'nesi Hechos 9:3-6. \* **4:9** Páulo siné kachi pe regá ruwime ke anile: 'We 'la niraga etewa alué a'ká ralámuli, iligá 'we 'la 'nátaga etewa pala 'la 'we nocha napurigá etele napurigá ne nóchachi 'lige napu akele napu ne benírale. Alarigá tabilé oyéramala 'emi uché bilé 'nátili.

<sup>2</sup> 'Emi oká umugí Eboria 'lige Síntike napu Bilipo ejperégame ju 'la Onorúgame oyérame, 'la ganíliga ejperélawa, okaka 'la a'chigóriga 'la bi'lepi 'nátili 'nátaga churigá oyéritiká Onorúgame. <sup>3</sup> Mué rió Sísigo rewégame, 'we 'la gompaniero Onorúgame nochá'ilachi, pe rekó gu'iri alué oká umugí 'we 'la semátiri na'tálichí, alué umugika okánika ne'chí gu'iri 'yabé rawé Onorúgame nila ra'íchali rejcholi beníríchi ne alé Bilipo ejperégame ralámuli, aminami alué umugika alué Kilimente si nocha 'yabé rawé, abiena uché jaré ralámuli si napu jipe 'ma uchú suwábaga alué ralámuli rewalá alé líbrochi napu niga ajtí Onorúgame, suwábaga alué ralámuli napu 'la rewagachi moináwili suwisá.

<sup>4</sup> 'La nabí ra'sáláwa napugiti 'la semáriga nejkúrime Esukristo alué ramué nuleme. Uchéchigo siné ané ne 'emi: '¡We ra'sáláwa! <sup>5</sup> 'La ganíliga ejperéliwa napurigá 'la suwábaga ralámuli etémala 'we a'lá a'ká ralámuli ko 'emi. 'La ganíliga ejperéliwa o'maka, alué Esukristo napu ramué nuleme ju 'we 'la e'negá ajtí 'we a'lá ganíliga ejperego 'emi, 'lige 'ma pe'wé nolínamala Esukristo rewagáchika.

<sup>6</sup> Tabilé 'wesi tábiri we'ká na'tawa. Iligá Onorúgame 'yuga ra'íchawa 'lige nejkúrili tániwa, 'lige wa'lú cheliera 'yawa Onorúgame. <sup>7</sup> 'Lige alarigá nokisáká 'emi, Onorúgame 'yámala iwérali napurigá tabilé we'ká tábiri na'támala 'emi, napurigá tabilé bajkimela 'emi na'tá'ilachi chátiri 'nátili, alésiko 'la ganíliga mochímala 'emi. Esukristo ju a'wali nejime napurigá tabilé chátiri na'tawa, pe Onorúgame bo'né alarigá elá. Onorúgameka 'la semáriga nejkúrime ju napu tabilé 'wesi ralámuli machí chiena wa'lú nejkúrime ka Onorúgame.

*Jena ruwimela Páulo ruwíligo 'we 'la 'nátaga na'tálime ko 'lige 'we 'la ganíliga eté'lime ko suwábaga ralámuli*

<sup>8</sup> Uché pe u'kabi ra'íchali ruimé ne. 'We 'la 'nátaga etewa alué 'we a'lá ralámuli napu tabilé 'yé'gali ra'íchame ju, alué napu 'la niraga eté'lime ju uché jaré ralámulite, alué napu tabilé cha nokame ju, napu 'la bi'lepi 'nátili 'nátame ju, alué napu 'la ganíliga eteme ju uché jaré ralámuli, alué napu ruyame ju 'we a'lá ralámuli ko. 'La ganíliga etewa suwábaga alué ralámuli.

<sup>9</sup> 'La alarigá 'nátame niwa napurigá beniri ne 'emi. 'La a'chigóriga nochawa napurigá etele 'emi ne nóchachi, 'lige Onorúgame

napu nejime ju semati raweli 'la 'emi 'yuga asimela.\*

*Jena ruwimela alué ralámuli Bilipo ejperégame 'we 'la gu'íriligo alué Páulo*

<sup>10</sup> Alué Esukristo re'pá ajtíggame suwábaga ramué nuleme, wa'lú ganílili 'yame ju ne'chí napugiti 'émika uchéchigo 'nátaligame ne'chí gu'írínilia. 'Émika 'la bijchiá 'la gu'írínilia mochile ne'chí, pe iligá buigá mochile 'emi chiéniko uché 'la niliga ne'chí gu'írilia. <sup>11</sup> Neka tabilé resí lagá aní napurigá 'emi ne'chí gu'írimala, neka 'ma bení ra'sálagá bejtega, alekeri tabilé tábiri resílagá aní ne. <sup>12</sup> Neka 'we 'la bení 'we 'la ra'sálagá bejtega rekó tabilé nige e'karúgame tábiri 'lige go'ame i'sínimi, rekó e'lowika bejtege ta i'tígóriká go'ame i'sínimi. Neka 'ma 'la bení alarigá bejtega napurigá pe abisibi ganíliga bejtélamala ne rekó nige go'ame 'lige rekó ta nige go'ame. <sup>13</sup> Neka 'we a'lá bené pe abisibi ra'sálagá bejtega pe Kristo gite. <sup>14</sup> 'Émika abirigáchigo 'we 'la 'nátaga mochile ko ne'chí gu'íría napu'lige ne 'we resí nilia ajtígichi.

<sup>15</sup> 'Emi ralámuli Bilipo ejperégame† napu'lige ne pe kulí chojkía beníría Onorúgame nila ra'íchali rejcholi we'kaná ichúrimi alé Maseronia eyéniga, pe 'émicho Bilipo ejperégame 'we 'la gu'írí ne'chí enomí 'ya, o'maka nakúriga nejí. Abiena ejperé we'ká chojkégame ralámuli Onorúgame oyérame nobi alueka tabiléchigo gu'írí go ne'chí. <sup>16</sup> Napu'lige ne bijí alé Tesalónika ajtígichi 'we 'la gu'írí 'emi ne'chí osá náorale enomí 'emi o'maka nakúriga. <sup>17</sup> Neka tabilé pe 'we 'yalime najkigá aní enomí, neka pe najkí 'nalina napurigá Onorúgame 'we 'la semati raweli 'yámala 'emi. <sup>18</sup> 'Lige neka jipe 'we 'la níkuru enomí, alué enomí napu 'emi alué rió Epaprolito o'tóriga júlale, bijí 'la mochiga ajtíkuru ne. A'chigóriga ra'sálá ne alué enomí 'yáachi 'emi ne'chí, a'chigóriga napurigá ra'sáláme ju Onorúgame semá nokachi 'emi. <sup>19</sup> Onorúgame, napu oyérame ju ne, wa'lú nejkúrule Kristo Esusi júlaga jena wijchimoba. Alekeri jípeko tabilé tábiri rokárélamala napugiti 'émika 'la oyérame Onorúgame 'lige napugiti 'émika 'la gu'írame ne'chí. <sup>20</sup> 'La nabí regá anewa Onorúgame ramué O'nola: «Wa'lú a'walí nígame ju mué O'nó.» Alarigá kame.

<sup>21</sup> 'We 'la repori ne 'emi ralámuli Kristo Esusi oyérame. 'Lige Onorúgame oyérame ralámuli napurigá ne jena mochígame ne 'yuga abiena alué 'we náolachigó reporali.

<sup>22</sup> Abiena suwábaga alué 'we 'la sébali oyérame Onorúgame jena Roma anilichi ejperégame abiena 'we 'la náolachigó reporali, alé alué wa'lula selígame rey

bejtélachi nóchame, alueka 'we náolachigó reporali.

<sup>23</sup> Alué Wa'lula Esukristo 'we semáriga gu'írisa 'la kékuru 'emi ralámuli.

Pe ekí kápá. Cheliérabá.

† 4:15 Alué ralámuli Bilipo ejperégame filipense anelime nile yolí ra'íchaga.

## Ye Ju Alué Apeli Napu Osele Páulo Alué Ralámuli Napu Kolosa Ejperégame Nílige

*Kuira suwábaga 'emi ralámuli Onorúgame oyérame Kolosa ejperégame.*

<sup>1</sup> Ne Páulo 'lige Timoteo náulia ye apeli 'emi ralámuli Kolosa ejperégame, 'emi ralámuli napu Onorúgamete wanápurigame ju, 'lige napu 'la bijchígime ju Kristo Esusi ra'ichálila. Neka Kristo Esúsite wanápurigame ju napurigá nulame nímala ne 'lige benírame ne suwábaga ralámuli Onorúgame nila ra'ichali. Alarigá najkile Onorúgame. Timotéoka Onorúgame oyérame júchigó napurigá ne. <sup>2</sup> 'Émika Kristote wanápurigame ju, 'lige 'émika asírige a'lá oyérame ju alué. Neka 'we najki napurigá 'emi 'we semáriga narémala nejkúrali O'nó Onorúgame nejilala, 'lige aminami najki ne napurigá 'emi tabilé we'ká e'karúgame 'nátame nímala.

<sup>3</sup> Senibí napu'lige ra'ichalia Onorúgame 'yuga, ramueka cheliera i'lime niru Onorúgame wa'lú gu'írigorikábá 'emi, Onorúgame napu ju Wa'lula Esukristo O'nola. <sup>4</sup> Uché jaré ralámuli ruwí 'emi 'we 'la bijchígime ko 'we 'la nejkútime ko Kristo Esusi, 'lige ruwíchigó 'we 'la galegá eteme ko 'emi suwábaga alué napu wanápurigame ju Onorúgamete. Alekeri cheliera i'lí Onorúgame. <sup>5</sup> 'Émika 'we 'la bijchígime ju 'lige 'la ganíliga eteme ju 'emi alué oyérame napugiti machiame 'emi Onorúgame 'we semátiri raweli nígame ko 'pa rewagachi 'emi i'lime. 'Émika 'ma 'la gepule alué 'la bijchiá ra'ichali. <sup>6</sup> Alué ra'ichali Onorúgame ra'ichálila napu akele 'emi, jipe 'ma 'la gepú we'ká ralámuli jena wijchimoba ejperégame, 'lige we'ká ralámuli 'ma 'la semáriga 'nátame ju a'chigóriga napurigá 'nátame ju 'emi napusi gepule Onorúgame 'we 'la gu'írame ko ralámuli. <sup>7</sup> Alué rió Epáprasi anilime 'sile ye ra'ichali beniria 'emi. Alué rioka Kristo nila ra'ichali benírame ju napurigá ramué. Ramueka 'we galegá eteru alué rió, 'lige ramué nuleru napurigá simela 'emi benírimia. <sup>8</sup> Alué rioka 'we 'la ruwí 'emi 'we 'la gu'írilio Onorúgame Alawálate napurigá 'emi 'la na'temaka etémala uché jaré ralámuli.

<sup>9</sup> Alekeri ramueka 'we ra'ichalia Onorúgame 'yuga tániga napurigá uché rajpé gu'írimala 'emi 'lige napurigá Onorúgame Alawala abiena gu'írimala 'emi napurigá machimela tachiri najkió Onorúgame. <sup>10</sup> 'Lige abiena 'we tánilia Onorúgame

napurigá gu'íriwa 'emi napurigá 'la semáriga ejperélamala 'emi 'la napurigá Wa'lula Esukristo oyérame neraga, napurigá Onorúgame 'we ganíliga asimela 'emi 'yuga, sébali olagá suwábaga napu nulá Onorúgame. Alarigá abé 'la námamala 'emi churigá ko Onorúgame. <sup>11</sup> Ramueka 'we tánilia Onorúgame napurigá abé wa'lú a'wali 'yawa 'emi Onorúgamete. Alueka 'la nígame ju a'wali napurigá 'la anachámala 'emi napu'lige resí ikia 'lige napurigá 'we 'la ganíliga <sup>12</sup> cheliera 'yámala O'nó Onorúgame wa'lú nejkúrigoriká, alué Onorúgame napu 'ma 'la wanápale 'emi napurigá 'emi narémala semati raweli napu Onorúgame nejimorlíge. <sup>13</sup> Onorúgame ramué O'nola 'sile alué chátiri 'nátili bujea ramué, napurigá ramué 'ma tabilé chátiri 'nátili 'nátame niwa. 'Lige bo'né alawala nejíturu napurigá ramué mochiwa napu nulame ju Onorúgame Inolá Esukristo. <sup>14</sup> Alué Onorúgame Inolá 'sime ju chátiri bowechi buyana ramué napu'lige mukusá, 'lige e'kame ju 'we cha nokisuga ramué.

*Jena ruwimela Páulo ruwíligo 'we 'la ganíliga ejperéligo napugiti Esukristo 'ma mukúligame bilena gulusichi chujkuga*

<sup>15</sup> O'nó Onorúgameka tabilé etérume ju, nobi alué Inolaka 'láchigo etérúkó napu Esukristo anilime ju. Ye Esukristo pe abalieri júchigó napurigá Onorúgame. Alueka 'we 'yasi ajtigame ju tabilé 'cho nerúgichi ye gawí. <sup>16</sup> Alué 'sile newá suwábaga napu ekí nerú jena wijchimoba 'lige napu eki nerú 'pa rewagachi, suwábaga napu ekí eteru jena 'lige napu ekí tabilé eteru, 'lige alué santo ánjeli napu we'ká nóchali nóchame ju, 'lige alué we'ká alawá napu tabilé etérume ju. Pe alué Onorúgame Inolá 'sile suwábaga newá napu ekí bo'né najkile. <sup>17</sup> Kristoka asírige 'yasi bejtégame nile ta'chó nerúgichi ye gawí 'lige rewagátiri, alué júkuru suwábaga gateme napurigá 'la semáriga nímala jena wijchimoba. <sup>18</sup> Aminami Kristo júkuru Wa'lula alué oyérame nuleme 'lige alué júkuru bajchá ajánigame 'pa rewagachi simea. Alarigá 'sile bi'neli wa'lula nulame nimia. <sup>19</sup> Onorúgameka asírige ra'salagá asale Esukristo 'yuga. Esukristo suwábaga nígame ju napu ekí niga ajtí Onorúgame jipe, alueka Onorúgame ju. <sup>20</sup> Onorúgameka alué Esukristo júlale napurigá ku 'la ganíliga ejperélamala suwábaga ralámuli jena gawichí ejperégame. Alarigá 'sile Onorúgame napurigá jena gawichí mukugá Esukristo bilena gulusichi 'la ganíliga ejperélamala ralámuli.

<sup>21</sup> 'Émika tabilé Onorúgame 'yuga 'nátame nile 'yako, pe Onorúgame saíla neraga mochile 'emi, pe asírige chátiri tábiri



nóchaga. <sup>22</sup> Onorúgameka suwábaga gatele Kristo júliga jena wijchimoba, nawálekuru napuyeri rió neraga 'lige 'ma me'líli ru rálámulite bilena gulusichi ujjhagá. Pe alarigá gatele Onorúgame napurigá 'emi alawala 'ma bi'wérigame níkala 'lige tabilé chojkila níkala. <sup>23</sup> Alarigá níkala 'emi 'la aminabi e'wásaká Onorúgame ra'ichálila, 'lige tabilé guwana rujsusa alué ra'ichali benía. 'Émika 'we 'la machí aliena 'la nimio aminabi oyérlia 'we semati ra'ichali Onorúgame nila. 'Émika 'ma aké ye ra'ichali. Ye ra'ichalika bochígimi ruirúgame ju rálámulite Onorúgame oyérame napu echilú ju jena wijchimoba. Neka Onorúgame nulérigime ju napurigá ne benírimala ye ra'ichali napurigá 'la námaka akimémpá suwábaga rálámuli ye Onorúgame nila ra'ichali.

*Jena ruwimela Páulo ruwíligo suwábaga rálámuli Onorúgame oyérame gu'irame ko*

<sup>24</sup> Neka asíriga ejelia ajtí jena jipe 'emi gu'iria, 'lige asíriga ra'sálagá ajtí ne. Tabilé seweka ajtí ne rekó 'we ejelie. Néchigó a'chigóriga resí ikí napuyena resí ikile Esukristo jena wijchimoba. Alueka resí ikílekuru alué oyérame rálámuli gu'iriga. Néchigó aliena resí ikia ajtí alué Onorúgame oyérame gu'iriga. <sup>25</sup> Onorúgameka nulele ne'chí napurigá ne 'emi gu'irimala Onorúgame ra'ichálila beníriga, napurigá 'la ma'chígime námamala suwábaga 'emi. <sup>26</sup> Alué ra'ichali napu rálámuli tabilé machime nile 'ya, jípeko Onorúgame beniri alué rálámuli napu bo'né wanápale Onorúgame oyérame rálámuli. <sup>27</sup> Onorúgameka najkí napurigá námamala alué rálámuli tabilé jurío, alué 'we a'lá semátiri ra'ichali napu tabilé námale 'ya mochígame rálámuli, 'lige alué 'we semátiri ra'ichalika pe Kristo ju napu 'ma ajtí 'emi alawálachi, 'emi napu Onorúgame oyérame ju. Alekeri 'we a'lá machigá mochí 'emi Esukristo nejimio Onorúgame a'walila.

<sup>28</sup> Ramueka ichúrimi e'yéniga 'we 'la ruyá chieri ko Kristo. Ramueka rejcholi ruilíguru rálámuli, 'lige gu'irilia napurigá 'we a'lá námaka ejtebímala. 'lige napurigá 'la sebámala a'pilipi Kristo ajtígichi sébali olagá. <sup>29</sup> Neka 'we iwériga nocha 'lige aminami asíriga a'lá benírame ju ne napurigá rálámuli 'la sebámala alé napu ajtí Kristo. Neka Kristo a'walílate nocha 'lige beniri ne.

## 2

<sup>1</sup> Neka najkí napurigá 'emi 'la machimela 'we a'wágame nochio ne 'lige aminami 'emi beníriga 'lige aminami Laorisea anilichi we'ká riógichi epperégame 'lige aminami suwábaga napu tabilé 'cho machime ju ne'chí. <sup>2</sup> Neka suwábaga alué rálámuli gu'iri napurigá oiláriga mochímala 'lige

'la ra'sálagá mochímala alué rálámuli napurigá tabilé we'ká 'nata mochímala, napurigá 'la bi'lepi 'nátili 'nata mochímala 'lige 'la a'bopi galegá, 'lige napurigá 'la námamala churigá ko Kristo. 'We 'yako rálámuli tabilé 'la námale churigá níligo alué Kristo. <sup>3</sup> Suwábaga napu tabilé 'la námame ju rálámuli churigá ko Onorúgame, pe Esukristo oyériga 'la machiboa churigá ko Onorúgame. <sup>4</sup> Neka ye ruwíguru napurigá tabilé 'wesi rálámuli 'yégaga ra'ichámala 'emi 'yuga, ruigá churigá ko Onorúgame. Pe alarigá 'nátame ju a'boi, 'we semáriga ra'ichame ju nobi tabiléchigo bijchiá júkó. <sup>5</sup> Neka pecha 'emi 'yuga ajtí ko, nobi 'wéchigo nélégó ne 'emi, 'lige 'we ganúliga ajtí ne 'we a'lá ejpéniga nóchame kame 'emi, 'lige aminami 'we 'la bijchigia mochígame 'emi Kristo ra'ichálilachi.

*Jena ruwimela Páulo ruwíligo napu'lige oyérlia Kristo pe bi'lepi 'nátili na'táwili ko*

<sup>6</sup> 'Émika 'we a'lá e'wegá nokísimili júkuru Kristo Esusi napurigá o'winilige 'emi 'ya napu'lige chojkia Kristo Esusi oyeria. <sup>7</sup> Pe bi'lepi 'nátili na'támili júkuru 'emi pe alué Esukristo na'tálilacho, 'la oyérimili júkuru 'emi alué 'nátili aminabi senibi rawé 'la napurigá benile 'emi 'ya, 'la senibi cheliera anega Onorúgame.

<sup>8</sup> 'We a'lá 'nátiga e'yéniwa alué 'yégali nawésali ruyame 'yuga. 'We 'la 'nátaga, alueka pe 'emi 'yegániliga e'yena pe alué 'yégali ra'ichalite. Alueka tabilé ruwime ju Kristo e'wélime, alueka pe 'nátame ju napurigá 'nátame ju rálámuli napu tabilé Kristo oyérame ju.

<sup>9</sup> Kristoka a'chigóyéri ju napurigá Onorúgame. Onorúgame a'walila nígame ju 'lige pe bi'lepi 'nátili 'nátame ju pe Onorúgame 'yuga. <sup>10</sup> 'Lige 'émika ye a'walí nígame ju 'lige aminami Kristo Alawala napugiti 'émika aleké oyérame kame. Alué kame Wa'lula bi'neli neyúriga, umérale suwábaga alué e'wélala napu Remónisi gompaniérola ju. <sup>11</sup> Napu'lige 'emi 'ma tabilé e'wesa alué chátiri 'nátili, 'we 'la néléramala Kristo 'emi nuleo. Jaré rálámuli Onorúgame oyérame korime ju napugiti sikirétigame kame pe'tá isilala wi'chila, nobi tabiléchigo a'reme júkó chátiri 'nátili. Kristo 'sime ju chátiri 'nátili bujea. <sup>12</sup> Napu'lige 'emi 'ma rewarásiga bilena ba'wíchi, alueka pe anime kéré Kristo mukúligo 'lige ku ajániligo ramué alawala bi'wigá. 'Émika 'we 'la bijchígime ju Onorúgame wa'lú a'walí nígame ko napurigá 'yámala a'walí bilé mukúgame. <sup>13</sup> Abé 'yabeko 'emi alawala napurigá suwígime nile napugiti 'émika cha chátiri alawégime níligame. Nobi jípeko Onorúgame 'máchigo 'la 'yáleko bo'né alawala 'emi a'chigóriga napurigá 'yale

Kristo. Onorúgameka 'ma bujele alué chátiri 'nátali napu 'nátame níriga suwábaga ramué. <sup>14</sup> Tabilé gainaru sébali olá Moisesi nila nulalí, nobi Onorúgameka gatélekó Kristo júliga napurigá mukumela bilena gulusichi. <sup>15</sup> 'Ma neyúriłe Onorúgame napu'lige uchéchigo siné 'yasa ajalí alué Kristo napurigá ku ajagá asimela. Onorúgame 'ma bujele a'walila suwábaga e'wélala napu ekí Remónisi gompaniérola nile. 'We chijúniga mochi Remónisi gompaniérola 'ma me'tiruga mochi gempá. Onorúgameka buluruga o'toginti káré alué Remónisi gompaniérola napurigá suwábaga ralámuli etémala.

*Jena ruwimela Páulo ruwligo 'we 'la oyérilime ko Onorúgame napu 'pa rewagachi ajti*

<sup>16</sup> 'Ma neyúriga ajti Onorúgame, alekeri 'ma tabilé 'wesi se'winá animeli júkuru tachiri go'ame go'yatiká, pecha animeli júkó: ye go'ámeke tabilé go'yame júché aleké rawé, 'lige tabilé bajilime júché alué pee rekútume aleké rawé. Jaré ralámuli tabilé 'la korime ju jaré go'ame go'á. 'Lige jaré nabí 'la sébali oliame korime ju apiépiri piesta, 'lige jaréchigo nabí mechá oliame korime ju piesta napu'lige mechá u'tá enágichi, 'lige jaréchigo anime ju nabí tarali 'la sébali oliame ko 'la neraga resíbilichi rawé. <sup>17</sup> Suwábaga alueka pe ruwime kéré churigá nímulí niligo a'kinana rawé, pe ruyame ju churigá nawale Kristo jena wijchimoba 'lige churigá ku nawamio jena wijchimoba. Abé 'la ju Kristo 'emi nulea. <sup>18</sup> Mochí jaré ralámuli napu asíruga 'la nerame korime ju alué santo ánjele 'lige napu 'we alá a'ká ralámuli neraga e'yéname ju, 'lige napu 'we eteme korime ju e'karúgame tábiri remugichi, tase a'réwaká napurigá 'yégalí ra'ichámala 'emi 'yuga, alueka pecha 'la Onorúgame oyérame kame. Alué ralámulika pe a'boi nila 'nátali bijchígime ju. <sup>19</sup> Suwábaga alué ralámuli tabilé oyérame ju Kristo, alué Kristo napu nuleme ju suwábaga oyérame, 'lige napu aminacho a'walí 'yame ju alué oyérame. Krístoka suwábaga tábiri 'yame ju napu resilá alué oyérame. Onorúgameka 'ma 'la 'nátalige churigá 'yamio bi'lepi 'nátali.

<sup>20</sup> 'Émika 'yako 'nátame nile napurigá uché jaré ralámuli, nobi jípeko 'máchigo 'la bi'lepi 'nátali 'nátame júkó 'emi pe Krístocho 'yuga napu mukule 'emi gu'iriga. 'Émika 'ma pecha a'chígoriga nokimeli júkó napurigá nokame nilige 'emi 'ya. ¿'Ligebiché chonigá oyérilíaché ye nulalí napurigá oyérame nílige 'emi 'ya, alué nulalí napu anime ju: <sup>21</sup> «¿Tabilé cha'piboa alué tábiri, tabilé go'poa alué go'ame?» <sup>22</sup> Alué rejchólíka pe ralámuli rejchólíla ju, alué rejchólíka pe a'kinánami 'ma tabilé najtégame ju. <sup>23</sup> Alué ra'ichali 'we

'la Onorúgame ra'ichálíla kárékuru. We'ká ralámuli 'we 'la oyérame ju ye ra'ichali. Ramueka alekeri 'we 'la niralía napugiti ruyame kame churigá 'la tabilé nasínakuli niwa, 'lige churigá tabilé riólame niwa, 'lige churigá 'la 'nátaga e'yénawa ramué. Nobí alué nulalíka tabilé bi'weme ju ramué na'tálíla.

### 3

<sup>1</sup> 'Émika 'ma alawégame ju Kristo Alawala, 'la semáriga oyérimilí júkuru 'emi alué rewagachi nerúgame 'nátali napu ajti Kristo alé wajtoná napu ajti Onorúgame. <sup>2</sup> Pe Onorúgame na'tálilacho 'nátaga nokísimilí júkuru 'emi, tase alué chátiri ralámuli na'tálíla, alué napu jena wijchimoba mochi. <sup>3</sup> Napu'lige Kristo me'líli ru gulusichi ujchagá, 'émichigó napurigá suwígame nílechigó, nobi jípeko 'ma ku ajágame neraga mochi 'emi, 'máchigo alawégame kame 'emi Kristo Alawala, 'lige Krístoka Onorúgame Alawala alawégame ju. <sup>4</sup> Kristo júkuru a'walí nejime napurigá 'we alá na'tawa. Napu'lige Onorúgame uchéchigo siné júlusa alué Kristo napurigá ralámuli 'la etémala, 'lige 'emi abiena etéwachigó ralámulite aleké 'yuga napugiti 'émika alawégame kame Onorúgame nila.

*Jena ruwimela Páulo ruwligo churigá 'nátame niligo bilé rió tabilé 'cho oyérame ka Onorúgame 'lige churigá 'nátame ko jípe Onorúgame oyérame ka*

<sup>5</sup> Alekeri 'ma a'rewa alué chátiri 'nátali napu 'nátame ju ralámuli jena wijchimoba ejeperégame. Tase 'yuga okópua e'sena umugí tabilé 'emi a'boi 'yula. Rió níriga tase rewíboa bilé rió. Tase pe umugicho 'nata mochiwa. Tase na'tawa chátiri nochálime. 'Lige tase we'ká e'karúgame najkíboa. 'We najkiáká e'karúgame tábiri 'liko pe abé nerálime kárémala alué e'karúgame tábiri peka najkigá Onorúgame. <sup>6</sup> Alué chátiri 'nátali na'talia pe gastigo rewiame ju, alekeri Onorúgame ayome ju 'lige 'oni a'reme ju. <sup>7</sup> Abé 'ya 'emi 'we chátiri 'nátame nile 'lige 'we cha nokame nile 'emi. <sup>8</sup> Nobí jípeko 'ma a'rewa suwábaga alieti 'nátali. Tase ayowa, tabilé na'tawa chíbi olianti uché jaré, tabilé chíbi anigá ra'ichawa Onorúgame olagá nibilé uché jaré ralámulitiri olagá. <sup>9</sup> Tase 'yéliga ra'ichawa 'emi a'bopi, 'émika 'ma tabilé oyérame kame alué 'ya nerúgame 'nátali napu'lige tabilé 'cho oyeria Onorúgame. <sup>10</sup> 'Émika 'ma alawégame júkuru Onorúgame Alawala. 'Lige 'émika aminacho oyérame júkuru Onorúgame, alué napu bajchá bejtégame rió newale. <sup>11</sup> 'Liko pecha chéréko rekó jaré griego ke, rekó jaré ralámuli jurío ke. Tabilé chéré rekó jaré sikirégame ke pe'tá isílala

guwala Onorúgame oyérame kórigá, o rekó tabilé sikirétigame ke. Tabilé chéré rekó jaré mejkaka sígame ke. 'Lige tabilé chéré rekó 'we machime ke o tabilé machime ke. 'Lige tabilé chéré jaré ralurúgame ke tabilé najtétaga nochárilime, lige tabilé chéré rekó jaré tabilé ralurúgame ke. Nobi abéchigo najtékame júkó Kristo Alawala napu suwábaga Onorúgame oyérame ralámulichi ajtí.

<sup>12</sup> Onorúgame wanápule 'emi napurigá pe alekecho oyérame nímala. Onorúgameka 'we galegá eté 'emi. Alekeri 'we 'la sébali olagá ejperélawa. 'Lige 'we 'la na'temápuá uché jaré ralámuli, 'la 'we 'la rejchiruga mochiwa gu'irimia uché jaré ralámuli tase riólaga, 'la 'we 'la anáchaga e'yénawa rekó resí ikié 'emi. <sup>13</sup> 'La 'we 'la na'temaka e'yénawa 'emi a'bopi, 'la e'kawa 'emi a'bopi na'áuka e'yéname nísaká. Napurigá Wa'lula Esukristo e'kale 'emi, a'chigóriga e'kawa 'emichigó. <sup>14</sup> Alarigaka 'we najtékame júkuru 'we 'la na'temaka járilia 'emi a'bopi, 'lige alarigaka 'la bi'lepi 'nátili na'tawa. <sup>15</sup> Neka najkí napurigá Kristo Alawala 'emi gu'irimala 'la semáriga 'nata. Onorúgameka 'emi wanápalekuru napurigá 'la bi'lepi 'nátili 'nátaga nokísamala. 'Lige 'la cheliera i'lime júkuru Onorúgame wa'lú nejkúrigrókábá.

<sup>16</sup> Neka najkíábá napurigá tabilé siné we'kuawa alué semátiri ra'íchali napu benírale Kristo. Napu'lige beniria uché jaré 'we 'la beniriwa, 'lige wikarawa Onorúgame nila wiká wa'lú cheliera i'gá Onorúgame 'we 'la nejkúríme kóriká. <sup>17</sup> Suwábaga napu ekí nóchali nocha 'emi 'lige napu beniri 'emi, 'lige napu ra'ícha 'emi, 'we 'la oyériga nokiboa Wa'lula Esusi, wa'lú cheliera i'gá O'nó Onorúgame Esusi júliga kórikábá.

*Jena ruwimela Páulo ruwíligo churigá ejperélímili ko ralámuli napu Esukristo oyérame ju*

<sup>18</sup> 'Emi umugí rió 'yúgame, 'la nirawa 'emi a'boi 'yula rió, alarigáchigo kame 'ma 'la Wa'lula Esukristo oyérame níríká. <sup>19</sup> Suwábaga 'emi rió umugí 'yúgame 'la galegá etewa a'boi 'yula umugí 'lige aminami tabilé chibi anigá.

<sup>20</sup> 'Emi napu 'kuchi ju, 'we alá e'wélime júkuru 'emi eyela 'lige 'emi o'nólachigó suwábaga tábiri nulachi. Alarigá nokiáká 'we ganílime júkuru Wa'lula Esukristo. <sup>21</sup> 'Emi rió 'lige umugí napu ekí 'kúchigame ju, tase ená anigá nulewa 'emi a'boi 'kúchila napurigá 'la tase sewémala.

<sup>22</sup> 'Emi napu ralurúgame ju, 'we 'la e'wiwa alué wa'lula 'emi nuleme. 'La e'wiwa napu'lige e'negá ilígichi alué wa'lula napu'lige tabilé e'negá ilígichi abiena 'la e'wíwachigó, jaré pe napu'lige e'negá jágichi alué e'wélala, pe a'lígecho 'la e'wame ju.

'La ganíliga e'wawa 'la niraga Wa'lula Esukristo. <sup>23</sup> Napu ekí nóchali nochalia asíriga 'la nochawa 'la ganíliga, 'la napurigá Esukristo nulágame neraga nochawa, tase pe bilé rió nulágame neraga. <sup>24</sup> 'Émika 'la machí alarigá nocháliko 'la semati raweli naremio 'emi abé i'libeko napu Wa'lula Esukristo nejímili ju. 'Émika aleké oyérame kame. <sup>25</sup> Bilé ralámuli cha 'sime, alueka gastigáriwili júkuru Onorúgamete. Onorúgameka gastigárigame ju suwábaga napu cha nokame ju, tabilé chéré rekó 'we nígame ke o tabilé nígame ke.

#### 4

<sup>1</sup> 'Emi e'wélala napu nóchame nuleme ju, 'la 'yawa go'ame 'lige napu ekí tábiri resí la alué ralámuli napu 'emi ralale nochárimia. 'We 'la machíguru 'emi bilé Wa'lula Nuleme ko 'emi napu re'pá rewagachi ajtí.

<sup>2</sup> Senibí 'la 'nátiga ra'íchawa Onorúgame 'yuga 'lige 'la cheliera 'yawa Onorúgame. <sup>3</sup> 'La tániwa Onorúgame napurigá tabilé 'wesi nejkumémala ramué benírilichi churigá ko Kristo napu ralámuli tabilé machime nílige abé i'bé. Neka pe alué ra'íchali ruigáriká galírale bajcháriga ajtí ne jena. <sup>4</sup> 'La tániwa Onorúgame napurigá ne 'la gainámempá ye ra'íchali beniria.

<sup>5</sup> 'We alá 'nátaga e'yénawa alué ralámuli 'yuga, alué napu tabilé Kristo oyérame ju. 'We 'la ruilime júkuru napu ikisá rukechi ralámuli churigá ko Kristo. <sup>6</sup> 'La semáriga ra'íchálime júkuru alué ralámuli 'yuga, 'we 'la ga kanti tase napurigá bilé rió ayóganti neraga, 'lige aminami 'la benigá nejélime júkuru bilé ra'íchali rukechi.

<sup>7</sup> Alué Tikiko napu Onorúgame oyérame júchigó napurigá ramué, napu 'we nejkúríme ju beniria Wa'lula Esukristo ra'íchálila. Alué 'la ruwimela alakió ne jena asagá. <sup>8</sup> Alekeri alemi jula ne alué Tikiko anilime rió napurigá ruwimela alakiá mochigo ramué jena napu mochiru ramué 'lige napurigá alué 'la 'yámala iwérali napurigá abisibi 'la oyériga nokísamala Kristo. <sup>9</sup> Uché bilé rió simélachigó Tikiko 'yuga alué Onésimo rewégame napu abiena Onorúgame oyérame júchigó napurigá ramué napu 'we galegá etuime ju ramué. Alueka abiena alé Kolosa bejtégame ju. Alué okaka nokimeli júkuru 'emi ruyea napu ikiá mochiru ramué jena.

<sup>10</sup> Aristarko anilime rió jena ajtíchigó galírale bajcháriga ne 'yuga, 'we náola reporali, 'lige Marko abiénachigó náola reporali, alué napu Bernabé rijímala ju. Neka 'ma náolaturu bilé apeli ruwime chieri ko Marko anilime. Alué rió sebasa alemi 'la ganíliga etewa, 'lige 'la ganíliga repóriwa. <sup>11</sup> Uché bile rió napu Esusi

anilime ju napu Justo anilime ju abiena náwala reporálichigó. Alué bakiá ralámuli jurío ju, 'lige ne 'yuga benírame ju ralámuli Onorúgame nila ra'íchali, 'lige neka 'we ganíliga ajtíkuru 'we 'la nejkura mochígime alué ralámuli. <sup>12</sup> 'Lige Epáprasi abiena 'we náola reporali, napu senibí 'la e'wame ju napu Kristo Esusi nulá, napu aba alé we'ká riógichi bejtégame júchigó napu 'emi ejperégame ju. Alué Epáprasi 'we tania ajtime ju Onorúgame napurigá 'emi 'la sebámala 'la sébali ralámuli gayenia 'lige napurigá 'la sébali olame nímala 'emi 'we 'la 'nátame napurigá Onorúgame najkí. <sup>13</sup> Ne bo'né 'la machí alué rió Epáprasi 'we 'nata ajtigó choniká mochigo 'emi 'lige choniká mochigo alué ralámuli Laorisea ejperégame, 'lige abiena 'nata ajtí choniká mochigo alué ralámuli Erápolosi ejperégame. <sup>14</sup> Alué 'yóome, Lukasi anilime rió 'we náola reporali, alué rió napu ramué 'we galegá etelia. 'Lige alué rió Remasi anilime abiena 'we náola reporali.

<sup>15</sup> 'We repóriwa alué ralámuli Onorúgame oyérame napu eperé Laorisea rewégichi. 'Lige abiena repóriwa alué Nimpa anilime mukí 'lige alué ralámuli napu napuíme ju Onorúgame ra'íchálila benímea alé galírale Nimpa bejtélachi. <sup>16</sup> 'Lige 'ma etesa 'emi chonime ka ye apeli 'mi Laorisea anilichí we'ká riógichi náola napurigá alé mochígime ralámuli e'némempá chonime ka ye apeli, 'lige alué Laorisea anilichí mochígime abiena náomala uché bilé apeli napu ne os-egé alé napu 'emi mochí napurigá 'emi e'némala alué apeli chonime ka. <sup>17</sup> 'We 'la ruyewa alué Arkipo ye ra'íchali napu ruwí ne, regá anewa: «'We 'la sébali olawa nóchali alué napu Wa'lula Esukristote 'yaru mué napurigá sébali olámala mué.»

<sup>18</sup> Ne Páulo náola ne reporali napu osá ne ne bo'né sekálate, ne bo'né osilila ju ye: «'La néléwa ne'chí jena galírale bajcháriga ajtígichi ne. 'We 'la nisa 'la kápá Onorúgame 'we semáriga gu'iria 'emi.»

Pe ekí júpá ye ra'íchali. Wa'lú cheliérabá.

## Ye Ju Alué Apeli Napu Bajchá Osele Páulo Alué Ralámuli Napu Tesalónika Ejperégame Nílige

*Kuira suwábaga 'emi ralámuli Tesalónika ejperégame napu ekí Onorúgame oyérame ju.*

<sup>1</sup> Ne Páulo, 'lige Silasi, 'lige Timoteo, osiáguru jena apélichí 'emi náolimí, 'emi napu ekí Onorúgame oyérame ju, napu Tesalónika anilichí we'ká riógachi napuíme ju. 'Émika pe bílepi 'nátili 'nátame ju pe O'nó Onorúgamecho na'tálila 'lige Wa'lula Esukristo na'tálila, alué napu 'pa rewagachí ajtí Onorúgame 'yuga. Neka najkíguru napurigá 'we gu'íriwa 'emi Onorúgamete napurigá 'la sébali olame ralámuli nímempá 'emi napurigá tabilé we'ká 'nátaga mochímala.

*Jena ruwimela Páulo ruwíligo alué Tesalónika ejperégame 'we a'lá oyérame níligo Onorúgame*

<sup>2</sup> Nabí wa'lú cheliera i'lime ju Onorúgame napu nokame ju 'emi. <sup>3</sup> Nabí napu'lige ra'íchalía ramué O'nó Onorúgame 'yuga anilime ju 'emi 'we a'lá nóchame ko. 'Émika 'we a'lá bijchígame ju Onorúgame a'walí nejime ko, alekeri 'we a'lá semáriga ma'china 'emi nochálila. 'Émika asíriga 'la galeme júkuru ralámuli, alekeri asíriga a'wágame nóchame ju 'emi alué ralámuli gu'íniniliga. 'Émika asíriga 'la anáchame ju 'we a'lá machiame 'emi alué Wa'lula Esukristo asíriga 'la sébali olamio napurigá anilige bo'né. Alekeri 'emi tabilé guwana rujsú. <sup>4</sup> 'Emi Onorúgame oyérame napurigá ramué, asíriga galilía 'emi Onorúgamete. 'La machiáa ramué Onorúgame wanápiligo napurigá 'emi Onorúgame oyérame níjala. <sup>5</sup> Napu 'emi ruilíe ramué alué a'ká ra'íchali Onorúgame ra'íchálila, Onorúgame Alawala 'smi 'la a'wágame nejkuria, napurigá ramué 'emi ruuyewa ye ra'íchali, 'lige 'émika asíriga 'la inámaturu ye ra'íchali. 'Emi 'la machí churigá níligo ramué 'emi 'yuga. Pe bílepi kéturu ramué na'tálila pe 'emi gu'írilimecho.

<sup>6</sup> 'Lige 'émika napurigá ramué a'chigóriga nokáturu, aminami napurigá alué Wa'lula Esusi. 'Émika asíriga ganíluga gepúuru napu'lige ramué Onorúgame ra'íchálila ruilía 'emi. 'Émika asíriga resí nilia mochílekuru abiénachigó 'we ra'sálagá gepúlekuru 'emi alué ra'íchali Onorúgame nila. Onorúgame Alawala gu'íriile napurigá 'we ganíluga mochímala 'emi. <sup>7</sup> Suwábaga napu ekí Onorúgame oyérame ju napu

Maseronia anilichí ejperégame ju 'lige napu Akaya anilichí ejperégame ju 'emi akega napu aní uché jaré ralámuli, a'chigóriga nokinali alué napurigá nokame ju 'emi. <sup>8</sup> Alué ralámuli napu gepule alué Wa'lula Esusi nila ra'íchali napu 'emi ruwile, 'ma ruyea mochí ichúrimi ejperégame ralámuli. Alekeri we'ká ralámuli 'ma machí 'emi 'we a'lá oyérame ko Onorúgame. 'Lige alekeri pecha ruwiboa ramué churigá ko 'emi. <sup>9</sup> Alueka 'we a'lá machí 'emi kóliga e'yénilio ramué, 'lige 'we a'lá ra'ícha 'emi olagá, 'emi 'we a'lá semáriga etéligo ramué. 'Lige aníchigó 'ma a'réligo 'emi oyeria alué tábiri napu pe newárigime ju igute o rejete kómá, Onorúgame 'lina oyériniliga alué Onorúgame napu nabí ajagá ajtime ju 'lige napu 'la bijchíá Onorúgame ju. <sup>10</sup> Abiena ra'ícha ralámuli 'emi 'we buigá mochigo napurigá uché sebámala Onorúgame Inolá 'pa rewagáchika, alué napu uché ku ajánale siné mukusá, alué Onorúgame Inolá Esusi anilime. Alué júkuru gastígochi buyáname ramué, alué gastigo napu abé i'libeko nerúlímili ju.

## 2

*Jena ruwimela Páulo beníriligo alué ralámuli Tesalónika ejperégame*

<sup>1</sup> 'Emi Onorúgame oyérame, 'emi a'bopi 'we a'lá machíguru tabilé rioksi níligo ye nóchali, nóchale 'emi beníruga Onorúgame nila ra'íchali. <sup>2</sup> Bajchabé ta'chó seba napu 'emi mochílige, Bilipo anilichí we'ká riógachi e'yénilituru 'emi 'we a'lá machíguru aliena tabilé 'la galéilirigo ramué alé mochígume ralámulite 'lige asíriga resí olaru ramué.\* Napu'lige sebalia napu 'emi mochí abiena 'we resí olaru ramué, nobi Onorúgame 'wéchigo nejkúrikó napurigá ramué tabilé majawa Onorúgame nila ra'íchali beníruga 'emi. <sup>3</sup> Ramué nila ra'íchalika pecha 'yégalí júkó, 'lige 'nátaliti asíriga 'la bí'wígume ju. Ramueka pecha 'yéliga beníriligo 'emi. <sup>4</sup> Ramueka ra'íchálíguru Onorúgame nejígempá alué nóchali 'emi benírilime alué a'lala ra'íchali. Pecha najkigá ra'ícháligo napurigá ralámuli 'we a'lá niraga etémala ramué, ramueka pe najkiá'é napurigá 'la nirawa ramué Onorúgamete. Onorúgame 'la machí chieti ka ramué na'tálila pala 'we a'lá 'nátili ka o tabilé 'la ka alué 'nátili. <sup>5</sup> 'Emi 'we a'lá machíguru ramué tajsiné ra'íchame níriga 'we semáriga napurigá 'emi 'we a'lá niraga etémala ramué, 'lige tajsiné ra'íchame níriga 'we semáriga pe bílé tábiri bujéniliga 'emi. Onorúgameka 'we a'lá machí tajsiné larigá níriga. <sup>6</sup> Ramueka pecha lonoká mochírúko napurigá 'emi 'lige uché jaré ralámuli 'we a'lá niraga etémala ramué

\* 2:2 E'nesi Hechos 16:19-40.

napurigá e'wélala niraga. <sup>7</sup> Alué Kristo† alué 'smi ye nóchali ne'já napurigá nuebo nóchali o'winawa. Alekeri nóchali nígame niru napurigá a'wágame nulawa, nobi tabiléchigo siné alarigá nokirúkó. Ramueka napurigá bilé eyela napu repume ju bo'né 'kúchila, alarigá nokirú. <sup>8</sup> Ramueka 'we galilía 'emi, alekeri asrígá 'la ganlíga beníruru ramué 'emi Onorúgame nila ra'íchali. 'Lige aminami 'ma 'la 'nátaga mochírigé ramué napurigá gu'írowa 'emi rekó suwiyae 'emi gu'íriga. <sup>9</sup> 'Emi ralámuli napu ekí Onorúgame oyérame ju napurigá ramué, 'emi asrígá 'la néláguru asrígá a'wágame nóchaligo ramué nabí rawé go'ame 'mea, be'á o'inasa 'lige we'liko rukó a'rilituru. Ramueka tabilé najkirú napurigá 'emi go'ame kónimala. Tabilé najkiáguru napurigá 'emi resí lámala go'ame. Alarigá nokiáturu napu'lige 'emi ruilíe Onorúgame nila ra'íchali.

<sup>10</sup> 'Emi napu 'we a'lá bijchígáme ju napu aní Onorúgame, 'we a'lá etele 'emi semáriga nóchiligo ramué 'emi epperélichí. 'Lige Onorúgame abiena etele. Bi'lepi 'nátali 'nátame nírigé ramué Onorúgame 'yuga. 'Lige 'la sébali olaru napurigá najkí Onorúgame. Tabilé che nokirú ramué napurigá tabilé che animela ralámuli cha nokirugo ramué. <sup>11</sup> 'Emi 'la machí churigá nokirú ramué napurigá 'emi 'la o'wé jábamala. Ramueka asrígá na'tamatu 'emi a'pílipi neraga napurigá bilé o'nó bo'né 'kúchila 'yuga, alarigá na'tamatu ramué 'emi. <sup>12</sup> Ramueka iwé'erali 'yáruturu 'emi. 'Emi 'yuga mochíruturu ramué napu'lige 'emi 'we resí nilia mochígichi, 'lige nejcholi 'yáruturu 'emi napurigá nabí 'la sébali olámala napurigá najkí Onorúgame. Onorúgame júkuru bayeme napurigá lisensia nejímala 'emi napurigá Onorúgame nulámala 'emi alawálachi. Alarigá nokiáká 'we semátiri ju.

<sup>13</sup> Napu'lige 'emi 'la bijchígile ye ra'íchili napu ruilíe ramué, 'émika 'la napurigá Onorúgame nila ra'íchali alarigá bijchígile, tase napurigá ramué ra'íchálila neraga. Ye Onorúgame nila ra'íchalika 'we gu'iri 'emi, 'emi napu ekí Onorúgame oyérame ju. Alekeri wa'lú cheliera i'lí Onorúgame. <sup>14</sup> 'Emi Onorúgame oyérame, alarigá ikile napurigá ikile alué ralámuli Kristo Esusi oyérame napu napuíme nilige Onorúgame ra'íchálila benimea alé Jurea mochígáme. 'We resí oláiru alué ralámuli juríote. Alarigá resí ikile 'emi alé napu 'emi mochí. <sup>15</sup> Jaré ralámuli jurío nokálekuru me'á alué Wa'lula Esusi 'lige abiena me'líliuru alué napu ruwime nile napu anele Onorúgame, 'lige ramuétiri 'ma mabúruturu jaré ralámuli juríote. Alueka tabilé nóchame ju napurigá

Onorúgame najkí. Alueka suwábaga ralámuli sairúgame neraga mochí. <sup>16</sup> 'We cha anime ju ramué olagá napurigá ramué tabilé gainawa ra'icha alué a'ká ra'íchali alué ralámuli tabilé jurío. Tabilé elá napurigá Onorúgame alué ralámuli buinámala alé resítirichi. Ye ralámulika cha nokigá e'yéniga pe se'winátiri 'nátali 'nátaga e'yena. 'Lige Onorúgameka ayoga ajtí alué ralámuli 'yuga, Onorúgame 'ma tabilé gu'írimala alué ralámuli.

*Jena ruwimela Páulo 'we siminalio Tesalónika anilichi uchéchigo siné*

<sup>17</sup> 'Emi ralámuli Onorúgame oyérame napurigá ramué, rekó alué cha nokame ralámuli 'ma mabuge ramué alé napu mochí 'emi, ramueka 'we néléa mochíru 'emi. Asrígá eténili ramué 'emi. I'sínimi amulí simálituru 'emi e'newa. <sup>18</sup> Asrígá simánilituru ramué 'emi kólimia, nobi alué Satanásika jábale napurigá tabilé simawa ramué alemi. Ne Páulo asrígá we'sá siminalia ajtigéturu alemi. <sup>19</sup> Napu'lige uchéchigo siné nawasa alué Wa'lula Esukristo, 'lige rukesa chonikirú ramué, neka 'we a'lá ra'íchámala churigá ko 'emi ralámuli. Tabilé chijunámala ne. Asrígá ra'sálámala ne alieti ra'icha. <sup>20</sup> 'La bijchiá ju, ramueka 'we ra'sálagá mochíru 'emi 'yuga.

### 3

<sup>1</sup> Napu'lige ramué 'we eténilie 'emi, tabilé gainali ramué simibia 'emi e'nemia. Alekeri na'taru ramué jena Aténachi ejtíbilime pe u'kabi rawé ne 'lige Silasi. <sup>2</sup> Mayeru abé 'la níligo Timoteo julalia alemi, 'lige ramueka Atena anilichi ejtebiru. Alué Timotéoka Onorúgame oyérame ju, 'lige Onorúgame 'yuga nóchame ju napurigá ramué, ruigá churigá níligo alué Kristo. Jularu ramué napurigá oilárimala 'emi napurigá 'we a'lá na'támala 'emi Onorúgame 'yuga, <sup>3</sup> napurigá alué nejkúralite 'la anachámempá 'emi napu'lige resí ikíá. 'Emi 'we a'lá machí Onorúgame elame ju napurigá resí ikiboa ramué. <sup>4</sup> Napu'lige ramué 'emi si mochíga, ruiríturu 'we resí ikiboli níligo ramué bilé rawé, 'lige larigá ikikuru. 'Emi asrígá 'la machí alieti. <sup>5</sup> Neka 'we machiéturu alué ralámuli tabilé 'la nocha mochigo 'emi 'yuga. Napu'lige ne 'ma tabilé anacha, machináliga pala 'la Onorúgame 'yuga 'nata 'emi, Timoteo júlaturu ne napurigá ruwimela. Neka we'ká 'nata ajtigé alué 'yégame Remónisi anilime 'ma 'yégalí ruyéligo 'emi, 'lige siné kachi 'emi 'ma tabilé oyérame kéré ko alué ra'íchali napu ramué beníruru.

<sup>6</sup> Timotéoka 'ma ku sébaturu 'emi mochígichi einasa, 'lige aní 'we a'lá nirá

† 2:7 Napu'lige Páulo aniá Esusi, Kristo, Esukristo, 'lige Kristo Esusi, pe bi'lepi ralámuli ju. E'nesi glosario «Kristo» 'lige «Jesús».

mochigo 'emi Onorúgame, 'lige aminami 'we ganilia 'emi a'bopi. Abiena aníchigó 'emi 'we ra'sálá mochigo napu'lige ramué nélá semá nokame níligo ramué. 'Lige abiena ruwí 'emi 'we eténilio ramué, a'chigóriga napurigá ramué 'we eténili 'emi. <sup>7</sup> 'Emi Onorúgame oyérame, ramueka asíriga resí ikiá mochírururu, asíriga cha noká ralámuli ramué 'yuga. Napu'lige nélália ramué 'we a'lá Onorúgame 'yuga 'nata mochigo 'emi, rekó cha ikié 'emi, 'liko ku ra'sálárima ju ramué 'ma tabilé seweka mochiru. <sup>8</sup> 'Émika asíriga 'la semáriga oyera mochíkuru alué Wa'lula Esukristo, alekeri ramueka 'we ra'sálagá mochiru. <sup>9</sup> Napu'lige Onorúgame 'yuga ra'ichalia 'we ra'sáláru ramué ra'ichaga alieti tábiri nóchame ko 'emi. Walú chelierra 'yawa Onorúgame 'we a'lá gu'írilimpá 'emi. <sup>10</sup> Napu'lige ra'ichalia Onorúgame 'yuga rawé 'lige rukomi, asíriga tánilia napurigá 'la nejmála bilé rawé napurigá ramué 'emi e'newa. Ramueka 'we gu'írinili 'emi napurigá aminá abé benimela Onorúgame nila ra'ichali.

<sup>11</sup> Ramueka najkiáguru napurigá ramué O'nola Onorúgame 'lige alué Wa'lula Esusi si 'we nejkúrimála napurigá ramué 'la sebawa napu 'emi mochí. <sup>12</sup> Abiena najkiá napurigá alué Wa'lula Esusi 'la nejkúrimála napurigá 'la ganíliga járomala 'emi a'boi 'lige 'we a'lá nirálíchi uché jaré ralámuli, napurigá nirálime ju ramué 'emi. <sup>13</sup> Ramueka najkiáguru napurigá walú 'yámala a'wali pachágana suláchí napurigá tabilé chátiri na'támala 'emi, 'lige napurigá 'la sébali olame ralámuli nímala 'emi Onorúgame 'yuga napu'lige mochiga 'emi Wa'lula Esusi 'yuga napu ajtí Onorúgame ramué O'nola.

## 4

*Jena ruwimela Páulo ruwíligo churigá olálime ko napurigá najkí Onorúgame*

<sup>1</sup> Jípeko pe u'kabi ra'ichali ruimé ne. 'Emi ralámuli Onorúgame oyérame napurigá ramué, ramueka 'we a'lá beníríturu 'emi alué a'ká ra'ichali churigá e'wélime ko Onorúgame. 'Lige 'émika 'la sébali oláguru. Jípeko najkiáguru ramué napurigá 'emi abichilubi 'we a'lá e'wámala napurigá najkí Onorúgame, napurigá 'la ra'sálámala Onorúgame. Wa'lula Esusi a'walílate 'la sébali olámili ju 'emi. <sup>2</sup> 'Émika 'la machigá mochí alué a'ká ra'ichali napu ramué benírilige. Alué Wa'lula Esusi nejíтуру yu nóchali napurigá 'emi beníriwa.

<sup>3</sup> Ne 'la ruwimela alieti najkió Onorúgame. Onorúgameka najkíguru napurigá 'emi 'la sébali ralámuli gainámala bi'lepi 'nátili 'nátame pe Onorúgamecho, 'lige aminami napurigá tabilé okómala 'emi uché jaré umugi 'yuga alué napu tabilé 'emi a'boi

'yula ju. <sup>4</sup> 'Lige aminami a'pílipi 'emi 'we a'lá niraga etémili ju 'emi a'boi 'yula napurigá ralámuli napu 'we a'lá 'nátame ju Onorúgame 'yuga. <sup>5</sup> Tase niwa napurigá alué ralámuli tabilé machime Onorúgame alué napu tabilé 'la 'nátame ju. Alué ralámulika pe napuchíbiriga nokinali a'boi alarigá nokame ju, pe apiépiri umugi 'yuga okome ju. <sup>6</sup> 'La 'nátaga mochiwa tase che olawa uché jaré ralámuli. Se'nú mukí 'yuga gojchiáká uché bilé rió 'yula, 'liko 'we cha oliame ju alué mukí 'yula. Pecha 'yégalime júkó uché bilé rió. Onorúgame gastigárimála ralámuli alanokame. 'Ma ruitúтуру ye ra'ichali, 'ma anéruturu suwábaga ralámuli napurigá tabilé cha nokimela. <sup>7</sup> Onorúgame tabilé repá napurigá chátiri 'nátili 'nátame niwa, Onorúgameka najkí napurigá 'we a'lá bi'wígame 'nátili 'nátame niwa 'lige aminami asíriga 'la sébali 'nátame ralámuli niwa. <sup>8</sup> Ye ra'ichalika pecha pe bilé rió nila júkó, ye ra'ichalika Onorúgame nila júkuru. Bilé rió tabilé nirásaká ye ra'ichali, alueka tabilé 'la nirame kérélamala Onorúgame, alué napu nejime ju bo'né alawala.

<sup>9</sup> Onorúgame 'yale iwérali 'emi napurigá 'we ganíliga járomala 'emi a'boi niraga. Alekeri ramueka pecha aminabi nejíwili júkó rejcholi. <sup>10</sup> 'Emi 'we a'lá galéguru suwábaga alué ralámuli Onorúgame oyérame alé Maseronia anilíchi mochígame. Ramueka najkiá napurigá 'emi abisibi 'we a'lá nirame nímala alué uché jaré ralámuli.

<sup>11</sup> 'We a'lá na'tawa napurigá 'we a'lá ganíliga eppereramala 'emi, tabilé uchútamala 'emi uché jaré ralámuli nila nochálilachi. Sekate nochawa napurigá nulálige ramué 'ya, <sup>12</sup> napurigá 'we a'lá niraga etéwampá 'emi alué tabilé Onorúgame oyérame ralámulite, 'lige napurigá tabilé tábiri resí lámala 'emi. Alarigá ka tabilé taga e'yénamala 'emi go'ame.

*Jena ruwimela Páulo ruwíligo uché ku nawamio alué Wa'lula Esukristo*

<sup>13</sup> 'Emi Onorúgame oyérame napurigá ramué, ramueka najkiá napurigá 'la námamala 'emi chukime ko bilé ralámuli mukusá. Tabilé najkiá napurigá seweka mochímala 'emi napurigá mochime ju ralámuli alué tabilé Onorúgame oyérame. Alueka tabilé moinámlili ju 'pa rewagachi napu'lige suwisá. <sup>14</sup> Ramueka 'la bijchígiliguru alué Esusi mukúligo, 'lige ku ajánaligo. Alekeri 'la bijchígilia Onorúgame o'tomeo Esusi 'lige bo'né oyérame napu 'ma suwile alé napu ajtí Onorúgame.

<sup>15</sup> Ramueka ruwiyá napurigá anílige Wa'lula Esusi, alué ra'ichali ruyéroturu ramué Esukristo oyérame napu ekí ajagá mochí napu'lige Esusi nawasa, ramué tabilé bajchá i'nawa 'pa rewagachi simiba.

16 Napu'lige alué Wa'lula Esusi jékana wijchimoba re'kinia, e'wele ra'íchaga nulámala, 'lige alué wa'lula santo ánjeli abiena e'wele ra'íchámala. 'Lige abiena e'wele rabisímala Onorúgame nila rabisíkime alué buchigá rabisíkime («trompeta» anilime), 'lige alué oyérame napu abé i'bé suwílige ajánamili ju. 17 'Lige napu ekí ajagá mochi, abiena o'tiboli ju alué suwígama 'yúriga 'pa rewagachi, 'lige suwábaga ramué nolirale jimempuá najtepamia alué Wa'lula Esukristo nabí alué wa'lula 'yuga ejperélimia. 18 Alekeri 'we a'lá oiláriwa 'emi a'bopi ye ra'íchali ra'íchaga.

## 5

*Jena ruwimela Páulo ruwíligo listo mochílime ko napu'lige ku nawachi Esusi*

1 'Emi Onorúgame oyérame napurigá ramué, pecha osiboli júkó chíéniko seabamio ye raweli, nibilé osiboa ramué tachiri tábiri simírímio bajchá, 'emi 'ma machiame. 2 'Emi 'ma machí alué Wa'lula Esusi uché nawamio napu'lige ralámuli 'ma tabilé buwechi aliéniko seabamio. Napurigá bilé chigórigame rukó sébame tábiri chigomia, tabilé machirume ju aliéniko seabamio, 'lige tabilé machiáa chíéniko nawamio Esusi. 3 Napu'lige ralámuli aníá mochígichi: «Suwábaga asíriga 'la ju, tabilé che ikimeli ju», 'lige yati neraga asíriga ená ikimela. A'chigóriga ikimela napurigá ikime ju bilé mukí u'tátiri ranélimili nisa, yati neraga o'kome ju rojpachí. Ralámulichigó 'we resi ikimeli ju.

4 Nobi 'emi Onorúgame oyérame 'wéchigo 'la machigá mochíko bilé rawé Esukristo uchéchigo nawamio 'lige 'we 'la rejchiruga mochímili júkuru 'emi. 5 Suwábaga 'emi Onorúgame 'kúchila júkuru, 'we a'lá gu'íriliguru suwábaga 'emi O'nó Onorúgamete napurigá 'la námamala 'emi ená ikimeo bilé rawé jena wijchimoba. Ramueka pecha Remónisi 'kúchila nírukó. 6 Alekeri tase na'tawa ramué napurigá Remónisi 'kúchila neraga, Remónisi 'kúchilaka tabilé machí ená ikimeo bilé rawé. Alueka napurigá okoka bi'tígama, alarigá mochi. 'La e'negá mochiwa, 'lige aminami asíriga 'la 'nátaga. 7 Ralámuli tabilé Onorúgame 'yuga 'nátame ka pe napurigá okókame alarigá mochi o napurigá tégili kómá. 8 Ramué napu 'la Onorúgame 'yuga 'nátame niru, 'we a'lá 'nátaga mochiwa, 'lige 'la machigá mochiwa Onorúgame 'la nejkúrime ko, 'lige 'we a'lá galewa uché jaré ralámuli. 'We a'lá machiáiguru Onorúgame 'simio alué resítirichi buyana ramué 'lige aminabi nabí 'la repúmala. 9 Onorúgameka pecha gastigárimia bayele ko ramué. Alueka bayélekuru ramué alé resítirichi buinamia. Júlale alué Wa'lula Esukristo napurigá

ramué 'la buyawa alé resítirichi. 10 Alueka ramué gu'íriga mukúlekuru. Alekeri tabilé chéré rekó ajagá mochi'rige o suwisuga, alué 'yuga mochiwili ju nabí 'pa rewagachi. 11 'Liko 'la oiláriwa a'nagupi nakúriga rejcholi nejiga. 'Émika 'ma alarigá noká mochíkuru.

*Jena ruwimela Páulo 'we a'lá rejcholi 'yaligo alué Onorúgame oyérame*

12 Jípeko 'emi Onorúgame oyérame ju napurigá ramué, 'we najkiá napurigá 'la nirawa 'emi alué ralámuli napu 'emi gu'íriga nóchame ju. Alué Wa'lula Esukristo 'sile ye nóchili 'yaa alué ralámuli napurigá rejcholi 'yámala 'emi. 13 Asíriga 'la galegá etélime júkuru 'lige 'la niraga alué e'wélala, 'lige 'we a'lá ganiliga ejperélawá suwábaga ka.

14 Ramueka 'emi Onorúgame oyérame 'we anilíguru napurigá rejcholi ruyémala 'emi alué ralámuli nasinákuli napurigá alué ralámuli 'la nochámala. 'We oiláriwa alué ralámuli napu 'we kilí ralámuli ju. 'La gu'íriwa ralámuli alué napu tabilé 'cho 'la námame ju napu nulá Onorúgame, 'lige tase ayoga nulewa.

15 Bilé ralámuli 'we cha 'sisa 'emi 'yuga, 'lige 'emi níriká tase che olawa alué ralámuli. 'We a'lá nakúriwa 'emi a'bopi, 'lige uché jaré ralámuli abiena 'la gu'írimili júkuruchigó.

16 Nabí 'la ra'sálagá mochílime júkuru. 17 Nabí na'tawa Onorúgame 'yuga. 18 'La cheliera 'yawa Onorúgame suwábaga nejime koriká, tabilé chéré rekó 'we nóchali kame ke i'sínimi alué napu Onorúgame nejí. Alarigá najkí Onorúgame, 'emi Kristo Esusi oyérame kame.

19 Tabilé che aniboa napurigá sewémala Onorúgame Alawala. 20 Tase gawéliga ra'íchawa alué Onorúgame ra'íchálila nareme ralámuli olagá. 21 Iligá abé 'la ju 'we a'lá na'talia napu ruwí alué ralámuli, 'la machibómpá pala bijchiá ko o tabilé bijchiá kómá. 'We a'lá beniboa 'la a'ká ra'íchali napu tabilé 'yégali ju. 22 Tase gepuwa alué chátiri ra'íchali, 'lige tabilé e'wawa.

23 Onorúgame ju ralámuli gu'írame napurigá tabilé we'ká e'karúginti 'nata mochímala ralámuli. Gu'írilime ju napurigá 'we a'lá sébili ralámuli nímalá. Neka najkíguru napurigá Onorúgame 'emi gu'írimala napurigá 'emi 'la sébali olámala napu Onorúgame najkí, napurigá 'la sébali olame ralámuli gainámala 'emi. Najkí ne napurigá alué 'emi alawala 'lige 'nátali 'la bi'wigame nímalá napu'lige uché sébachi alué Wa'lula Esukristo anilime. 24 Alué napu 'emi bayele Onorúgame ju, suwábaga 'la sébali olame júkuru, suwábaga 'la sébali olame kame napu aní.



<sup>25</sup> 'Emi Onorúgame oyérame napurigá ramué, 'la tániwa Onorúgame napurigá 'la gu'írimala Onorúgame ramué.

<sup>26</sup> 'We 'la repóriwa ka suwábaga Onorúgame oyérame.

<sup>27</sup> Neka nuláguru napurigá ra'ichámala (leéramala) 'emi ye osilí suwábaga ralámuli napu ekí Onorúgame oyérame ju. Alarigá najkí alué Wa'lula Esusi.

<sup>28</sup> Najkí ne napurigá gu'írua 'emi alué Wa'lula Esukristote. Alarigá ju.

Pe ikí kápá ye ra'ichali. Wa'lú cheliérabá.

## Ye Ju Alué Apeli Napu Nujubá Osele Páulo Alué Ralámuli Napu Tesalónika Ejperégame Nílige

*Kuira suwábaga 'emi ralámuli Tesalónika ejperégame napu eki Onorúgame oyérame ju.*

<sup>1</sup> Ne Páulo náoli ye ra'íchali, Silasi 'lige Timoteo jena mochi ne 'yuga. Náoli ne 'emi ralámuli napu Tesalónika anilichi we'ká ríogachi napuime ju Onorúgame ra'ichálila benimea, 'emi ralámuli napu 'we 'la oyérame ju Onorúgame ramué O'nola 'lige Wa'lula Esukristo. <sup>2</sup> 'We najkiá napurigá O'nó Onorúgame 'lige Wa'lula Esukristo 'we 'la semáriga gu'írimala 'emi napurigá 'la bi'lepi 'nata mochímala.

*Jena ruwimela Páulo ruwíligo 'we anáchame níligo alué ralámuli rekó chíbi oliae cha nokame ralámulite*

<sup>3</sup> 'Emi Onorúgame oyérame napurigá ramué, ramueka senibi rawé cheliera 'yalía Onorúgame. Onorúgame 'we 'la gu'írame ju 'emi, alekeri cheliera 'yalía. Ye gu'írilite 'emi aminacho 'la oyérame ju Onorúgame, 'lige aminacho asíriga 'la ganili 'emi a'bopi. <sup>4</sup> Alekeri 'we ruyame ju churigá ka 'emi napu'lige ra'ichalia bilénami re'obachi 'we ganíliga. 'We ruyame ju 'we 'la anachio 'emi rekó 'we najátalia 'emi alué cha nokame ralámulite, 'lige 'we 'la anachio 'emi napu'lige 'we ená oliae 'emi alué cha nokame ralámulite. 'Émika tajsiné a'reme ju e'wá Onorúgame ra'ichálila. <sup>5</sup> Alarigá 'we 'la ma'chígime néré 'we 'la semáriga gu'írilio 'emi Onorúgamete, 'lige Onorúgame 'we a'lá gatéligo napurigá 'emi 'we a'lá sébali e'wímala. Alekeri 'we a'lá ju Onorúgame a'rea napurigá resí nílimala 'emi.

<sup>6</sup> Aminami aka 'we 'la júpaché gastigaria Onorúgame alué ralámuli napu 'we cha nokame ju 'emi 'yuga. <sup>7</sup> 'Lige 'we 'la júkuru a'kinana 'la gu'írisa Onorúgame suwábaga 'emi napu 'we resí nilia mochi jípe napurigá 'ma 'la tabilé resí nílamala. A'chígoriga gu'írisa 'la kékuruchigó ramué. Alarigá nejkúrimala Onorúgame i'libeko napu'lige uché nawá Esukristo we'ká santo ánjeli 'yuga 'pa rewagáchika napurigá 'ma 'la resibopua ramué. Nawámala Esukristo 'pa rewagáchika na'írale. <sup>8</sup> Ralámuli gastigárimia nawámala alué tabilé Onorúgame oyérame, 'lige tabilé e'wame alué ra'íchali napu ruyame ju chieri ko alué Wa'lula Esusi. <sup>9</sup> Alué ralámuli gastigáriwili ju alué gastígote napu tabilé suwíbame nímalala, 'lige 'ma 'lúpua alué ralámuli 'mi mejká napu tabilé pe'tá nérélamala Onorúgame alemi nibilé

Onorúgame a'walila. <sup>10</sup> Alarigá ikimela napu'lige alué Wa'lula Esukristo seba napurigá 'we 'la ganíliga etewa alué ralámulite napu oyérame ju Esukristo. 'Émika 'ma 'la oyérame ju alué ra'íchali napu ruyérigé 'emi. Alekeri 'émika napu'ka mochímili júkuru uché jaré oyérame 'yuga a'lige rawé napu'lige sébachi Esukristo.

<sup>11</sup> Alekeri ramué 'we tánilia Onorúgame napurigá Onorúgame a'walí 'yámala 'emi napurigá 'we a'lá sébali olámala napu najki 'emi. Onorúgame 'sime ju ye 'nátali 'ya, 'lige 'la sébali olagá ye, Onorúgame 'we a'lá ganíliga etémala 'emi. <sup>12</sup> Alarigá tánili ramué Onorúgame napurigá 'emi nímalala napurigá alué Wa'lula Esusi 'lige napurigá ralámuli 'we a'lá níramala Esusi, 'lige alué Esusi 'we a'lá níramala 'emi. Alarigá ikimela Onorúgame 'lige Wa'lula Esusi asíriga 'la sébali olámili ju 'emi 'yuga.

## 2

*Jena ruwimela Páulo ruwíligo churigá ko alué cha 'sime ríó*

<sup>1</sup> Jena ruimé ne churigá nimio napu'lige uché nawachi Wa'lula Esukristo 'pa rewagáchika, 'lige aminami churigá napu'pili ko ramué alé alué Esukristo 'yuga. <sup>2</sup> Ramueka 'we tánalia 'emi napurigá tabilé guwana rujsúmala 'emi we'ká tábiri 'nátaga. 'We a'lá na'tawa bilé ralámuli anichi Onorúgame ra'íchali 'yáligo. 'Lige 'we a'lá na'tawa bilé ralámuli anichi ramué júligo bilé ra'íchali osiruga anigá 'ma ku sébiligo alué Wa'lula Esukristo jena wijchímoba. Tabilé majawa, nibilé bijchígíwa. Siné kachi bilénami osilichi ma'chínamala alanime ra'íchali. <sup>3</sup> Tabilé bijchígíwa, bajchá 'we a'lá rukiboa. Tabilé 'cho sébachi alaké rawé napu'lige nawámachi Wa'lula Esukristo, we'ká ralámuli saírámala Onorúgame, a'lige ma'chínamala alué ríó napu 'yégame ju, alué ríó napu juláwili ju injiérnochika Onorúgamete. <sup>4</sup> Alué rioka Onorúgame saíla ju, 'lige alueka tabilé níramala napu ralámuli nírame ju. 'Ma re'obachi pachá alé mesa ilígichi nawámili ju 'lige aleka iligá Onorúgame korimela.

<sup>5</sup> ¿Tacha nelá 'emi ne ye tábiri ruwichi ne 'emi si eyénaga? <sup>6</sup> 'Lige 'emi 'we 'la machí chonigá tabilé 'cho ma'chínimio alué ríó chátiri 'yégame napusi 'ma sebasa raweli a'lige kulí ma'chínamala alué ríó. <sup>7</sup> Alué ríó chátiri 'yégame 'ma 'we 'la sébali 'nata ají churigá resí olamio ralámuli, pe rokáré napurigá 'mi chajkénami elawa alué napu ilí alemi ra'ama. <sup>8</sup> 'Alige ma'chínamala alué ríó napu ju 'we chátiri 'we 'yégame, alué Onorúgame saíla. 'Lige alué Wa'lula Esusi 'ma rekábamala alué 'yégame ríó pe buchigá. Pe Esusi etega ra'ósiga ilígichi mukumela

alué rió 'yégame. <sup>9</sup> Alué rioka sebámala 'we a'wágame napugiti Satanasi gu'ira asimémpá alué rió a'walí 'ya. 'We a'wágame nímala alué rió napu'lige seba jena. Asírige wa'lú nílamala a'walí, e'karúgame nóchali nochámla napu ta'wesi ralámuli gainásaré. <sup>10</sup> Alué rió 'we inílame 'we 'la benélimala 'yégiga alué ralámuli napu tabilé bijchígile Onorúgame nílala ra'íchali, alué napu tabilé nírame nile alué 'we 'la bijchiá ra'íchali napurigá 'la buyásimili nílige alé resítirichi. Alué ralámulika 'légana injiérnochi simámala. <sup>11-12</sup> Alekeri Onorúgame elí alué ralámuli napurigá bijchígamala alué 'yégali ra'íchali alué Remónisi ra'íchálila, napurigá alué ralámuli 'légana injiérnochi simámala napu eki tabilé 'la oyérale alué ra'íchali Onorúgame nílala ra'íchali, alué ralámuli napu pe 'we ganílime ju alué chátiri tábiri nóchaga, tase 'la Onorúgame nílala nóchali. Alueka tabilé machí resí nokigá jario.

*Jena ruwimela Páulo ruwliigo Onorúgame repáliigo napurigá 'la buyásawa alé resítirichi*

<sup>13</sup> 'Emi Onorúgame oyérame napurigá ramué, Onorúgame 'we galé 'emi, alueka 'we 'yasi 'nátaligame napurigá 'emi buyámala alé resítiri bowechi. 'Lige Onorúgame Alawala wanápale 'emi, 'lige 'émika 'we a'lá bijchígale alué bijchígili ra'íchali. Alekeri wa'lú cheliera 'yáwili ju Onorúgame. <sup>14</sup> Onorúgameka bo'né nílala ra'íchalite bayele 'emi, alué ra'íchali napu ramué 'emi benírilia, napurigá narémala 'emi alué Wa'lula Esukristo a'walila.

<sup>15</sup> 'Liko 'emi Onorúgame oyérame, tase guwana rujsúpua, 'lige tabilé 'we 'kuawa alué ra'íchali napu ramué 'emi beníriru napuíka mochiga 'lige i'sinimi apélichí osagá. <sup>16</sup> Alué Wa'lula Esukristo 'lige Onorúgame ramué O'nola 'we a'lá sébali olame ju. 'We galele ramué 'lige tabilé siné a'reme ju ramué oilaria. Alekeri 'la machiaa ramué buyawa alué tabilé a'lá bowechi. <sup>17</sup> Alekeri tani ne Onorúgame 'lige Esukristo napurigá wa'lú a'walí 'yámala 'emi napurigá 'we a'lá sébali ma'chinamala suwábaga napu noká 'emi 'lige napu ra'icha 'emi.

### 3

*Jena ruwimela Páulo najkió napurigá Esukristo ra'íchálila sebámala bochígimi*

<sup>1</sup> Pe u'kabi ra'íchali ruimé ne. 'Emi Onorúgame oyérame napurigá ramué, jípeko najki ne napurigá 'emi Onorúgame tánamala napurigá ramué gu'írimala, napurigá alué Wa'lula Esukristo ra'íchálila 'la yati sebámala bochígimi, 'lige napurigá 'la oyéramala ralámuli alué ra'íchali 'we 'la ganílige, a'chigóriga napurigá oyérale 'emi. <sup>2</sup> 'We 'la tániwa Onorúgame napurigá tabilé a'rémala napurigá resí olawa ramué alué

cha nokame ralámulite. Pecha suwábaga ralámuli bijchígime kame Onorúgame nílala ra'íchali napu ramué ruyá. <sup>3</sup> Alué Wa'lula Esukristoka 'we a'lá sébali olame ju napu anime ju, 'wéchigo 'la bi'lepi 'nátili 'nátame kame, 'lige alueka 'we a'lá nejkúrimala napurigá 'la bi'lepi 'nátili 'nátaga járomala 'emi, 'lige 'we 'la nejkúrimala napurigá tabilé cha olawa 'emi alué cha nokame ralámulite. <sup>4</sup> 'Lige 'we a'lá machiaa ramué 'emi abichilubi 'la sébali olamio napu ramué nulála. Wa'lula Esukristo nejí alué 'nátili. <sup>5</sup> Neka najkié napurigá alué Wa'lula Esukristo nejkúrimala na'tálichí napurigá 'emi 'we 'la galémala ralámuli, a'chigóriga napurigá galeme ju Onorúgame suwábaga ralámuli, 'lige napurigá anachámala napurigá anáchale Kristo.

*Jena ruwimela Páulo churigá nocháwilikó*

<sup>6</sup> 'Emi oyérame napurigá ramué, alué Wa'lula Esukristo nóchali 'ya ramué napurigá ramué 'emi tebúpua, alekeri nulelia ramué 'emi napurigá tabilé napuíka e'yenamala alué oyérame 'yuga napu 'we najsínákuli ju, napu tabilé sébali olame ju alué rejcholi napu ramué beníriru 'emi. <sup>7</sup> 'Emi a'boi 'we 'la machí churigá epperélitiká 'emi nírige napurigá 'la a'chigóriga epperélamala napurigá ramué. Ramueka tabilé najsínákuli neraga mochírigeturu napu'lige 'emi si mochiga, <sup>8</sup> 'lige tajsiné naretu alué go'ame napu 'emi 'yánili ramué. Ramueka rukuchégame nocháruturu 'lige abiena rukomi go'ame meka napurigá tabilé se'winá lámala 'emi. <sup>9</sup> Ramueka 'emi benírige e'yénilituru, 'lige 'la nílige napurigá 'emi go'ame kónimala, nobi ramueka najkirú napurigá 'emi benimela nóchaga ramué etega. <sup>10</sup> Napu'lige 'emi 'yuga mochiga ramué ye rejcholi beníririteturu: Bilé rió tabilé nochásaká tabilé go'meli júkuru. <sup>11</sup> Ramueka akirú tabilé nocha mochigo jaré 'emi, pe nejkumega e'yéname kará. <sup>12</sup> Alué Wa'lula Esukristo nóchali 'yale ramué napurigá 'emi repúpua, alekeri nulelia ramué alué ralámuli najsínákuli napurigá nochámala napurigá mémala go'ame.

<sup>13</sup> 'Emi Onorúgame oyérame napurigá ramué, tabilé a'chigóriga niwa napurigá alué ralámuli najsínákuli, tase najsinawa 'la nóchali nóchaga. <sup>14</sup> Jaré ralámuli oyérame tabilé e'wásaká napu aní ye apeli napu ramué osirú. 'We 'la na'táwaká churigá ka alué rió, 'lige tase gompaniérola niwa alué rió napurigá alué rió 'la chijunámala. <sup>15</sup> Tabiléchigo saila neraga etéwagó alué rió, 'we 'la ruyewa 'lina rejcholi napurigá Onorúgame oyérame neraga.

<sup>16</sup> Najki ne napurigá alué Wa'lula Esukristo 'we 'la gu'írimala 'emi senibí

napurigá tabilé we'ká 'nátılı na'támala 'emi  
'lige napurigá 'la ganíliga ejperélamala 'emi.

<sup>17</sup> Ne Páulo reparánili ne bo'né sekálate  
osigá ye jena nujubá enágame osilí. Nabí  
alarigá osame ju ne napu'lige náolia bilé  
ra'íchali.\* <sup>18</sup> Neka najkíguru napurigá alué  
Wa'lula Esukristote gu'iriwa 'emi senibí.  
Alarigá ju.

Pe ikí kápá ye ra'íchali. Wa'lú cheliérabá.

---

\* **3:17** Uché bilé rió osale ye osilí napu Páulo anele. Pe jénacho osale bo'né sekálate.

## Ye Ju Alué Apeli Napu Bajchá Osele Páulo Alué Timoteo

*Kuira mué Timoteo.*

<sup>1</sup> Ne Páulo ye apeli osá ne. Neka nulérigime ju Onorúgame 'lige Kristo Esúsitate napurigá nulame nímala ne 'lige benírame ralámuli alué Kristo Esusi nila ra'íchali. Onorúgame ju ramué alawala bi'weme, 'lige bijchígiga Kristo Esusi ra'íchálila, 'liko 'we semati raweli rewiboa ramué. <sup>2</sup> Neka mué Timoteo oséguru. Mueka napurigá ne inolá neraga ju, napugiti mueka 'we 'la e'wámpa napu ne nulegé. Neka alekeri 'we 'la tania napurigá 'we 'la gu'íriwa Onorúgame ramué O'nola 'lige Wa'lula Kristo Esúsitate napu ramué nuleme ju, 'lige aminami napurigá 'we 'la na'temápuá mué. 'lige aminami napurigá 'la senibí Onorúgamecho 'yuga' nata asimela mué, tabilé we'ká e'karúginti.

*Jena ruwimela Páulo ruwíligo 'we 'la 'nátaga mochiwílikó napugiti cha we'ká mochi'gempá ralámuli yégali benírame*

<sup>3</sup> Napu'lige ne ta'chó simiá alé Maseronia anílichí, neka 'we anéturu mué napurigá mué rejímala alé Ebeso anílichí napurigá nulémala mué alué ralámuli napu pe 'yégali benírame ju napurigá tabilé aminabi alanoká mochímala. Jípeko uché siné aní ne napurigá mué rejímala alé. <sup>4</sup> 'We anewa tabilé 'la ko aminabi beniaa alué 'yégali ra'íchali 'we 'ya nerúgame napu ruwime ju churigá epperégame níligo 'we 'ya epperégame ralámuli. Alué ralámuli napu gepume ju alué ra'íchali 'yégali pe tabilé siné 'la bi'lepi 'nátali 'nátame ju, 'lige alésíko pe na'áwali o'wíname ju a'bopi, 'lige alekeri tabilé machime ju tachiri najkió Onorúgame. 'We 'la bijchígime nírika Onorúgame nila ra'íchali 'liko 'we 'la machiboa tachiri najkió Onorúgame.

<sup>5</sup> 'Lige neka najkíguru napurigá mué benírimala napurigá 'la niraga járowa a'bópika. 'Lige 'la bi'wígime alawégame nísaká, tabilé chátiri 'nátame 'lige 'we 'la bijchígime nísaká Onorúgame 'la sébali olamio napu anile, 'liko 'we 'la ganlíga járowa a'bópika. <sup>6</sup> Jaré ralámuli benírame 'ma tabilé oyérame ju ye ra'íchali, pe tabilé 'la ra'íchali ra'íchaga na'áwame ju. <sup>7</sup> Alueka benírame gainánilime ju Moisesi nila nulalí, nobi tabilé námame júko alué nulalí, 'lige pe tabilé machigá 'we 'la benírame kolae a'boi.

<sup>8</sup> Suwábaga 'we 'la machiaa 'we 'la ko alué nulalí, 'we a'lá sébali olásiká napurigá najkí Onorúgame. <sup>9</sup> Abiena machiaa Onorúgame tabilé 'yáligo Moisesi alué nulalí napurigá

gastigáriwa 'la a'ká ralámuli, iligá 'yale alué nulalí napurigá gastigáriwa ralámuli napu cha nokame ju, alué ralámuli napu tabilé e'wame ju, 'lige alué napu tabilé nirame ju Onorúgame, 'lige aminami alué napu me'gá e'yéname ju a'boi o'nola 'lige alué e'yela 'lige aminami uché jaré ralámuli, <sup>10</sup> 'lige aminami alué ralámuli napu uché jaré umugí 'yuga okoka e'yéname ju napu tabilé a'boi 'yula ju, 'lige aminami alué umugí napu uché jaré rió 'yuga okoka e'yéname ju napu tabilé a'boi 'yula ju, 'lige aminami alué ralámuli napu pe riocho ka okome ju, 'lige aminami alué umugí napu pe umugicho ka okome ju, 'lige aminami alué ralámuli napu ralinega e'yéname ju ralámuli napu tabilé najtétiga nochárilime ju, 'lige aminami alué ralámuli napu 'yégali ra'íchali ra'íchiga e'yéname ju, 'lige aminami alué napu 'we 'la bijchiá ruwime korime ju. Onorúgameka nulale ye nulalí napurigá suwábaga ralámuli napu chibi nokame ju machimela tachiri najkió Onorúgame. <sup>11</sup> 'We 'la ju alué nulalí napu Onorúgame nulá napurigá benírimala ne ralámuli.

*Jena ruwimela Páulo wa'lú cheliera 'yáligo Kristo Esusi*

<sup>12</sup> Neka cheliera 'yáguru Wa'lula Kristo Esusi ramué nuleme, napugiti alueka 'we 'la niraga etémpa ne'chí, 'lige alué 'sime ju a'walí nejía napurigá ne 'la sébali olame nímala napurigá najkí alué. <sup>13</sup> Neka abé 'yako asírige chálaga ra'íchame ke ne Kristo Esusi olagá, 'lige 'we najátame ke ne Kristo Esusi oyérame ralámuli cha olamia.\* Nobi Onorúgameka 'we na'temaka etéléko ne'chí, 'lige e'kale ne'chí, neka pecha 'cho bijchígime kéturu Kristo Esusi nila ra'íchali, alekeri neka pecha machiéko ala'siá. <sup>14</sup> Nobi Wa'lula Esukristoka 'wéchigo 'la niraga etéléko ne'chí rekó ne 'we cha 'sime rió kachi. A'walí nejí napurigá ne 'we 'la bijchígimala napu anílige Kristo Esusi 'lige aminami napurigá ne 'we 'la niraga etémala uché jaré ralámuli.

<sup>15</sup> Napu ne ruwimela 'we 'la bijchiá ju, 'we 'la 'nátaga gepúwaká 'emi ye ra'íchali. Kristo Esusi nawale jena wijchimoba, cha nokame ralámuli alawala bi'wemia. 'Lige neka abéchigo cha 'sime ke me'tigá suwábaga alué ralámuli cha nokame. <sup>16</sup> Nobi Onorúgameka 'wéchigo 'la na'temálekó ne'chí. 'Lige alarigá machírile ralámuli chiena 'la buwéligo Esukristo napurigá ne ku guwana na'támala. Napu'lige alué ralámuli etesa chiena 'la gu'íriligo Onorúgame ne'chí rekó ne 'we cha 'sime rió kachi, 'liko 'we 'la bijchígimala Kristo Esusi nila ra'íchálila 'lige 'la simámala 'pa rewagachi napu'lige suwisá Onorúgame 'yuga mochimia senibí. <sup>17</sup> 'We

\* 1:13 E'nesi Hechos 8:3.

'la kępá suwábaga ralámuli 'we 'la semáriga ra'ichasa Wa'lula Onorúgame olagá napu senibí nulame ju 'lige napu tajsiné mukume ju, 'lige napu tabilé etérume ju. Senibí 'we 'la ra'ichasa 'la kępá ralámuli alué olagá, alarigá nisa 'la kępá.

<sup>18</sup> Mué Timoteo, napu ju napurigá ne inolá, neka ye rejcholi nejíguru, napurigá anilige mué olagá alué abé i'bé mochúgame ralámuli napu ruwime nilige napu Onorúgame anélige.† Mué 'we 'la sébali olásaká ye rejcholi, 'liko mué 'we 'la benégame nímala ra'icha me'tigá alué cha nokame ralámuli napu tabilé oyérame ju Wa'lula Esukristo. <sup>19</sup> Tabilé siné a'rewa Kristo oyeria, iligá 'we 'la na'tawa. Jaré ralámuli 'ma a'rele Onorúgame nila ra'ichali oyeria pe tabilé 'la nátaga. 'Lige 'ma tabilé bijchígime ju Onorúgame nila ra'ichali. <sup>20</sup> Oká ye ralámuli napu 'ma tabilé e'wame ju Onorúgame nila ra'ichali, bilé alué Imeneo anilime ju 'lige uché bileka Alejantro anilime ju. Neka 'ma tabilé a're napurigá napuika e'yenamala Onorúgame oyérame 'yuga. Satanásika asíruga resi olámala 'lige alarigá machimela tabilé 'la ko sairuga ra'ichalia Onorúgame olagá.‡

## 2

*Jena ruwimela Páulo ruwíligo churigá ra'ichámili ko ralámuli Onorúgame 'yuga*

<sup>1</sup> Napu ne ruimeli ju 'we najtérame ju. Neka najkí napurigá suwábaga Onorúgame oyérame tánimala Onorúgame napurigá gu'irimala suwábaga ralámuli, abiena najkí ne napurigá tánimala Onorúgame napurigá na'temaka etémala suwábaga ralámuli. 'Lige najkí ne napurigá wa'lú cheliera 'yámala Onorúgame wa'lú nejkúrame kóriká. <sup>2</sup> Neka abiena najkí napurigá 'emi tánimala Onorúgame napurigá 'we 'la gu'irimala suwábaga e'wélala nulame, 'lige aminami uché jaré u'kuchípala e'wélala napurigá 'la ganílga ejperéliwa suwábaga pe Onorúgamecho oyériga tabilé na'áwaka. <sup>3</sup> Onorúgame napu ramué alawala bi'weme ju, 'we 'la ganílga ajtí napu'lige ramué nejkúrili tánilichi 'lige aminami napu'lige cheliera i'lichí. <sup>4</sup> Onorúgameka najkí napurigá suwábaga ralámuli bi'wígame alawégame nímala, 'lige aminami najkí napurigá suwábaga ralámuli námamala churigá ko alué 'la bijchiá ra'ichali, <sup>5</sup> napugiti pe bi'lepi kame Onorúgame, 'lige aminami pe bi'lepi kame alué rió napu 'la umérame ju ralámuli alawala bi'wea napurigá 'la simámala alé napu ajtí Onorúgame, alueka pe Kristo Esusi ju napu nawale jena

napurigá rió neraga. <sup>6</sup> Kristo Esusi mukule suwábaga ralámuli nila gastigo bujega, alué napu 'la bijchígime nile alué nila ra'ichali, alarigá anile Onorúgame alakimeo a'lige rawé. <sup>7</sup> Kristo 'smi nóchali 'ya ne'chí napurigá nulame nímala ne 'lige benírame nímala ne ye 'we 'la ra'ichali alué ralámuli napu tabilé jurío ju. Napu ne aní 'la bijchiá ju, tabilé 'yégali ju.

<sup>8</sup> Neka najkí napurigá suwábaga ralámuli Onorúgame oyérame panápurimi ejperégame Onorúgame 'yuga ra'ichámala 'la kilí jaga, tabilé ayoga nibilé chibi anigá. <sup>9</sup> Abiena najkí ne napu'lige ralámuli napu'ichi Onorúgame 'yuga ra'ichamia 'lige aminami benimeea Onorúgame nila ra'ichali, tabilé najkí ne napurigá umugí 'we umugiliga e'yenamala 'we najteme chinite newárigime si'púchiga, 'lige tabilé najkí ne napurigá e'karúgame tabiri 'we najteme uchúchamala gupálachi, 'lige tabilé najkí ne napurigá e'karúgame 'we najteme uchúchiga e'yenamala napu alué 'órote newárigime ju, 'lige alué napu semati rejete newárigime ju. Iligá na'tálime júkuru Onorúgame nila ra'ichali tase alieti tábiri unélinti. <sup>10</sup> Neka iligá najkí napurigá ralámuli regá animela 'emi etega: «Nee chiena 'la nóchanti ju alué umugí, 'lige aminami chiena 'la niranti ju Onorúgame.»

<sup>11</sup> Aminami najkí ne napurigá 'emi umugí 'we 'la niraga gepúmala napu'lige uché jaré benírachi Onorúgame nila ra'ichali. <sup>12</sup> Neka tabilé elá napurigá umugí nokimeea beniria Onorúgame nila ra'ichali napu'lige napu'isa ralámuli Onorúgame nila ra'ichali benimeea, 'lige aminami tabilé najkí ne napurigá umugí nulémala a'boi 'yula, rió 'yúgame nísaká, 'lige uché jaré rió. Neka najkí napurigá i'kilí mochímala tabilé che anigá. <sup>13</sup> Alarigá nulá ne napugiti Onorúgame bajchá newáligime alué Arani, 'lige Ébaka pe nujubapi newárigime kame. <sup>14</sup> 'Lige Remónisika pecha 'yégiliko alué Arani, eligá alué mukí 'lina 'yégiliru, 'lige alué Eba 'ma 'yégilisiká, 'ma chátiri alawégame gayénale. <sup>15</sup> Onorúgameka gastigárigile umugí napurigá 'we o'kómala u'tátiri ochérimichi nobi 'wéchigo ku 'la bi'wígame alawégame gainámalo alué umugí 'we 'la bijchígime nísaká Esukristo nila ra'ichálila, 'lige aminami 'we 'la galegá eteme nísaká uché jaré ralámuli.\*

## 3

*Jena ruwimela Páulo ruwíligo churigá nóchamili ko alué e'wélala Onorúgame oyérame*

<sup>1</sup> 'We 'la bijchiá ju napu ne ruwimela jipe.

† 1:18 E'nesi I Timoteo 4:14. ‡ 1:20 E'nesi I Corintios 5:3-5. \* 2:15 Jaré líbrochi regá anime ju: «Pero se salvará engendrando hijos, si permaneciere en fe, amor y santificación, con modestia.»

Bilé rió wa'lula nínílisaká uché jaré Onorúgame oyérame nuleme, 'we 'la ju alué 'nátali. <sup>2</sup> Bilé rió napu nuleme nímili ju uché jaré oyérame, 'we 'la rió nímili ju. Bi'lepi mukí 'yúlimili ju, 'lige aminami 'we 'la na'támili ju, 'lige 'we 'la niraga etéwili ju ralámulite, 'lige aminami 'we 'la ganíliga etélime ju alué ralámuli napu sébame ju alué rió nulame bejtélachi. 'Lige aminami 'we 'la benírímili júkuru Onorúgame nila ra'íchali. <sup>3</sup> Tabilé rekuka bajímili júkuru, 'lige aminami tabilé nejkome nímili júkuru, iligá 'we 'la rió nímili júkuru, 'la i'kili nímili júkuru, tabilé pe kulí 'la oyérame korume. <sup>4</sup> Alué rioka 'we 'la repúmili júkuru bo'né 'yula, 'lige aminami bo'né 'kúchila, 'lige alué 'kúchilaka 'we 'la e'wímili júkuru 'we 'la niraga. <sup>5</sup> Alué rió tabilé 'la repume nísaká bo'né 'yula 'lige bo'né 'kúchila, 'liko çchurigá 'la umbámalawé repua suwábaga ralámuli Onorúgame oyérame? <sup>6</sup> Alué rió napu nulámili ju tabilé pe kulí 'la oyérame nímili ju Onorúgame. Alarigá nísaká alué rió, siné kachi pe asíriga riólimala 'lige regá na'támala bo'né: «Neka asíriga 'la semá 'sime rió ju, me'tagá uché jaré ralámuli. Alekeri ye nóchili 'yaru ne.» Alarigá 'nátame nísaká alué rió 'liko Onorúgame 'ma ku bujémala alué nóchali napu nígame ju alué rió, napurigá Onorúgame bujele alué nóchali alué riablo. <sup>7</sup> 'Lige aminami alué rió napu nulame nínili 'we 'la niraga etélime nímili júkuru ralámulite napu tabilé Onorúgame oyérame ju. Tabilé nirálime nísaká alué rió 'liko pe na'áwili o'wímala, 'liko alué rió pe asíriga resí ikimela Remónisi trámpalachi wijchigá.

*Jena ruwimela Páulo ruwíligo churigá nimio alué ralámuli e'wélala nulame gu'írame*

<sup>8</sup> Alué ralámuli napu gu'írínilime ju alué e'wélala nulame, a'chigóriga nímili júkuru napurigá alué nulame, 'lige 'we 'la niraga etélime nímili júkuruchigó uché jaré ralámulite, 'lige aminami tabilé 'yégalí ra'íchámili júkuru, 'lige aminami tabilé rekuka bajímili júkuru, 'lige aminami tabilé na'támili júkuru we'ká mélime enomí. <sup>9</sup> 'Lige aminami asíriga 'la bijchígimili júkuru alué a'lala ra'íchali Onorúgame nila. 'Lige aminami tabilé na'támili júkuru chátiri 'nátali. <sup>10</sup> Tabilé 'cho chojkía nocha ye nóchali alué rió, alué e'wélalaka 'we 'la na'támili júkuru talá gu'írame ko ralámuli. 'We a'lá gu'írame nísaká alué rió nochánilime, 'liko 'la nochámili júkuru e'wélala gu'íriga. <sup>11</sup> Alué umugí napu 'yula ju alué gu'íriga nóchame e'wélala abiena 'we 'la niraga etélime nímili júkuru uché jaré ralámulite. Tabilé chibi anigá ra'íchámili júkuru uché jaré ralámuli olagá, 'lige aminami tabilé 'me bajímili júkuru alué rekútame. 'Lige aminami 'la kilí ralámuli nímili júkuru. 'Lige aminami

asíriga 'la sébali olámili júkuru napu aní a'boi. <sup>12</sup> 'Lige aminami bilé rió napu nóchame ju gu'íriga alué e'wélala nulame, alueka pe bi'lepi mukí 'yúgame nímili júkuru 'lige asíriga 'la tebúmili júkuru bo'né 'kúchila 'lige bo'né 'yula. <sup>13</sup> Alué rió napu gu'írímili ju alué e'wélala nulame, 'we 'la nóchame nísaká, 'liko ralámuli 'we 'la niraga etémala alué rió, 'lige alué rió 'we a'lá bijchígamala Kristo Esusi ra'íchálila.

*Jena ruwimela Páulo ruwíligo Onorúgame nawáligo napurigá rió neraga*

<sup>14</sup> Neka pe 'wemi simé olá mué kólimia. Neka abirigáçhigo oségó mué ye ra'íchali. <sup>15</sup> Siné kachi ta'wé sebasa ne alé 'mi, nobi mueka 'láçhigo 'la námamagaló ye ra'íchali churigáriga nokimeli ko suwábaga napu Onorúgame oyérame ju. Ramueka Onorúgame 'kúchila niru alué napu senibí ajagá ajti, 'lige ramué benirame niru bijchiá 'la Onorúgame nila ra'íchali. <sup>16</sup> 'We najtékame ju ye nulali nobi péçhigo u'kabi ralámuli 'la námame júkó ye nulali. Ye nulalika regá anime ju:

Kristo nawale jena wijchimoba napurigá rió neraga,

Onorúgame Alawala ruwile 'we 'la ko napu 'sile Kristo,

'lige alué santo ánjeli 'we 'la etele napu sile alué.

Alué nila ra'íchilika suwábaga ralámuli tabilé jurio ruyéliru,

'lige we'ká ralámuli 'we 'la bijchígale alué nila ra'íchali,

'lige 'ma o'tóliro 'pa rewagachi napurigá Onorúgame 'yuga asimea.

## 4

*Jena ruwimela Páulo ruwíligo 'we 'la 'nátaga mochímilikó napugiti cha we'ká mochímempá ralámuli 'yégalí ra'íchali benírame*

<sup>1</sup> Onorúgame Alawala 'we 'la ruwí jaré ralámuli 'ma a'remio Onorúgame nila ra'íchali oyeria, 'lige pe oyérimio uché jaré nulali remónisi u'kuchípala nulalila. Alarigá ikimela abé a'kinana amulí sébachi uchéçhigo siné Wa'lula Esukristo. <sup>2</sup> 'We 'la e'wímala alué ralámuli napu pe 'yégalí ra'íchame ju, alué ralámuli napu tabilé chijúnáme ju chibi nokisá. <sup>3</sup> Alué ralámulika tabilé elame ju napurigá bilé rió newímala bilé mukí 'yuga 'lige aminami tabilé elime ju napurigá go'mela jaré go'ame, alué go'ame napu Onorúgame newale napurigá go'mela suwábaga alué ralámuli Kristo oyérame napu 'la machime ju alué 'la bijchiá ra'íchali. <sup>4</sup> Suwábaga napu ekí Onorúgame newale asíriga 'la júkuru. 'Lige alekeri go'poli júkuru suwábaga go'ame napu ekí nerú jena wijchimoba, pe iligá 'we 'la cheliera 'yasa Onorúgame. <sup>5</sup> Alekeri asíriga 'la ju

suwábaga go'ame go'aa napugiti alarigá ruyame alué Onorúgame nila ra'íchali, 'lige napugiti ramueka 'ma cheliera 'yárigame Onorúgame go'ame nejígoriká.

*Jena ruwimela Páulo 'we 'la ruyéligo alué Timoteo chu'similikó*

<sup>6</sup> Mué 'we 'la benírisaká ye ra'íchali alué Onorúgame oyérame ralámuli, 'liko mué 'we 'la benírame nímala Kristo Esusi nila ra'íchali. 'Liko mué aminabi benimeli júkuru alué ra'íchali napu mué 'we 'la oyérame. Aminabi benisáká mué, tabilé guwana wijchimela mué. <sup>7</sup> Tabilé 'nátaga gepuwa aleké ra'íchali napu ruyeme ju alué ralámuli tabilé Onorúgame oyérame, iligá aminabi beniboa Onorúgame nila ra'íchali. <sup>8</sup> Bilé ralámuli 'we ra'chiwénilime nisa senibi ra'chueka\* oyame ju. A'chigóriga ju Onorúgame nila ra'íchali beniaa. Bilé ralámuli 'we a'lá oyérinilime nisa Onorúgame, aminabi benimeli júkuru Onorúgame nila ra'íchali 'lige 'we 'la e'wagá. 'Lige alarigaka asírige 'la nejkúrimala Onorúgame jena wijchimoba 'lige 'pa rewagachi. <sup>9</sup> Ye ra'íchali napu ne osá 'we 'la bijchiá ju, 'lige alekeri 'we 'la bijchígilime júkuru. <sup>10</sup> Ramueka alekeri senibi benírame niru ralámuli 'la ganíliga. 'Lige ramueka 'la bijchígilia Onorúgame ajágame ko, alué napu a'walí nígame ju napu a'kabámana ajuámala suwábaga ralámuli. Nobi a'kabámana jáwame júkó alué pe ralámulicho napu 'we 'la oyérame ju Onorúgame.

<sup>11</sup> Ye ra'íchali benírímili júkuru mué uché jaré ralámuli. 'Lige aminami nulémili júkuru mué napurigá 'we 'la e'wámala. <sup>12</sup> Tabilé chéré rekó ralámuli regá anichi mué olagá: «Alueka pe 'we re'mali ju, ¿'lacha benélamalawé ralámuli benírige?» 'Lige alarigá anichi ralámuli, mueka 'we 'la beníriwa 'la semáriga ra'íchiga 'la benigá 'lige aminami 'we 'la nirawa suwábaga ralámuli, 'lige tabilé a'rewa bijchígia Kristo nila ra'íchali, 'lige tabilé che 'sika einawa. <sup>13</sup> Napusi ne seba alé 'mi, mueka abisibi 'we iliboa Onorúgame nila ra'íchali ra'icha 'lige aminami beniria, 'lige aminami oiláriga Onorúgame oyérame ralámuli. <sup>14</sup> Abé 'ya, alué e'wélala Onorúgame oyérame a'boi sekálate nochale mué mo'ólachi regá anigá: «Benírame nímala mué Onorúgame nila ra'íchali.» Onorúgame Alawala gu'irile alué e'wélala, alekeri tabilé a'rewa ralámuli beniria.

<sup>15</sup> 'We 'la 'nátaga beníriwa suwábaga napu mué beniri, napurigá suwábaga ralámuli 'la etémala chiena 'la benegá benírime ko mué me'tigá abé i'bé. <sup>16</sup> Mué Timoteo, 'we 'la 'nátaga ilíriwa, 'lige 'la 'nátaga beníriwa uché

jaré, 'la alarigá 'sísaká mué, 'liko Onorúgame tabilé cha animela napu'lige uchéchigo ku nawá gatemia (gustisia olamia) suwábaga ralámuli 'yuga, 'lige aminami alué ralámuli napu gepume ju napu mué beniri, aluéchigó tabilé che anéwali ju.

## 5

*Jena ruwimela Páulo ruwílgo churigá gu'irilime ko uché jaré ralámuli Onorúgame oyérame*

<sup>1</sup> Tase ne'ochawa bilé rió o'chérame, eligá oiláriwa napurigá mué o'nola neraga. 'Lige ejtemálika 'we 'la niraga etewa napurigá mué bonila neraga. <sup>2</sup> Abiena 'we 'la oiláriwa alué o'chérame umugí napurigá mué e'yela neraga, 'lige alué i'wé 'we 'la niraga etewa napurigá mué waíla neraga.

<sup>3</sup> 'We 'la gu'iriwa alué gunámakame umugí napu tabilé rijimégame ju napurigá gu'irimala. <sup>4</sup> Bilé mukí gunámakame 'la 'kúchigame nísaká 'lige 'la mochisa u'súlaturi 'lige a'kálaturi, 'liko alué nokímeli júkuru gu'iria suwábaga napu resí 'la alué mukí, a'chigóriga gu'irímili júkuru napurigá gu'irile alué mukí abé i'bé. Alarigá nokiáká, Onorúgameka asírige 'la galé napugiti alarigá najkiame napurigá alarigá nojkiboa ramué.

<sup>5</sup> Alué gunámakame tabilé rijimégame nísaká napurigá gu'iriwa, 'lige alué gunámakame 'we 'la bijchígame nisa Onorúgame nila ra'íchali 'lige alué mukí rawemi 'lige rukomi ra'íchame ju Onorúgame 'yuga gu'irili tániga. <sup>6</sup> Bilé mukí gunámakame pe piesta nerúgichi inálime 'nátame nisa, 'lige abichibi 'síká oyame nisa napurigá bo'né najkí, 'liko alué mukí tabilé oyérame ju Onorúgame, 'lige aminami tabilé alawégame ju Onorúgame Alawala. <sup>7</sup> Alekeri 'we nulewa suwábaga ralámuli napurigá 'la sébali olámala napu ne aní, napurigá tabilé 'wesí ralámuli cha animela 'emi olagá. <sup>8</sup> Alué napu tabilé gu'irame ju a'boi rijimála o a'boi e'yela, o'nola kómá, alueka tabilé 'la sébali olame ju napurigá nulá Onorúgame, alué ralámulika abéchigo enátiri ju me'tigá alué ralámuli tabilé oyérame Onorúgame.

<sup>9</sup> Napurigá ujchawa bilé mukí gunámakame rewalá bilena apélichí napurigá gu'iriwa, 'ma 'we o'chérame nímili júkuru usánisa makué bamíggame o abé we'ká kómá, alué napu pe bi'lepi rió 'yúgame nílige. <sup>10</sup> 'Lige 'we machirume nímili júkuru napu 'sile alué mukí. 'We 'la nesérome bo'né 'kúchila, 'we 'la 'yame go'ame bo'né bejtélachi sébame ralámuli, 'lige 'we 'la gu'irame Onorúgame oyérame ralámuli.\* 'Lige aminami 'we 'la gu'irame nile alué napu 'we resí nilia mochí. Alé apélichika

\* 4:8 Alué ralámuli israelita tabilé re'eme nile ra'chueka. Páuloa regá anile yolí ra'íchaga «ejercicio físico».

\* 5:10



ujchúmili júkuru alué umugí gunámakame rewalá napu 'we 'la sébali olale napu najkí Onorúgame.

<sup>11</sup> Tabilé ujchawa alé apélichí alué umugí gunámakame rewalá 'we u'kabi bamígágame napugítí alueka pe uchéchigo siné newínimála, 'lige pe 'ma a'rémála gu'íría Onorúgame oyérame ralámuli. <sup>12</sup> Lige rekó regá anísá alué mukí: «Neka tabilé siné newímála.» Lige kúchiga newisa alanísá, 'liko chojkíla nímála pe bo'né tabilé sébali olagáriká. <sup>13</sup> Siné kachí pe asíríga najsiname ganámála alué mukí, 'lige pe ichúrimi riógíchi einámála, e'karúgame ra'íchali ra'íchiga einámála, napu tabilé machime ju bo'né. <sup>14</sup> Neka alekeri rejcholi nejíguru napurigá alué i'wé gunámakame uchéchigo siné newímála, 'lige kúchiga mochímála, 'lige 'we 'la repúpua a'boi kúchíla. 'La alarígá olásaká 'emi, 'liko tabilé che animela 'emi olagá alué ralámuli tabilé Onorúgame oyérame. <sup>15</sup> Jaré i'wé gunámakame 'ma a'rele Kristo oyeria, jípeko pe Satanasi 'lina oyérame ju.

<sup>16</sup> Bilé mukí Esukristo oyérame rijimégágame nisa bilé mukí gunámakame, alué mukí 'we 'la gu'írímili júkuru. 'Lige uché jaré Onorúgame oyérameka gu'írímili júkuru uché jaré gunámakame napu tabilé rijimégágame ju napurigá gu'írímála.

<sup>17</sup> Alué e'wélála Onorúgame oyérame napu 'we 'la nóchame ju, alueka 'we 'la niraga etéwili júkuru, abéchigo rajpé niraga etéwili júkuru alué e'wélála napu beníríga e'yéname ju alué a'lála ra'íchali. <sup>18</sup> Aka regá aníché Onorúgame nila ra'íchali 'we 'ya osirúgime: «Tase bulewa roló chu'ala napu'lige nocharia ri'ligó olá, iligá 'la eliwa napurigá go'mela a'tabemi.» Lige Esusi abiena regá anile: «Alué nóchameka najtétílime kame.»†

<sup>19</sup> Bilé ralámuli saega ra'ichasa bilé wa'lula olagá napu nuleme ju uché jaré Onorúgame oyérame, tabilé e'wiwa tabilé i'télasaká oká testigo o bakiá kómá.

<sup>20</sup> Bilé wa'lula napu nuleme ju uché jaré Onorúgame oyérame chibi 'sika einasa 'lige tabilé a'resa chibi 'siá, 'liko ne'ochawa we'ká ralámuli mochígíchi napu Onorúgame oyérame ju, napurigá uché jaré nóchame 'la majámála cha noká.

<sup>21</sup> Onorúgame 'lige Kristo Esusi 'lige suwábaga santo ánjeli napu Onorúgame wanápale, suwábaga alué 'we 'la e'nagá mochí. Neka alekeri nulágu napurigá 'la sébili olawa suwábaga napu ne nulá. Tase jaré abé 'la niraga etewa, suwábaga 'la niraga etewa. <sup>22</sup> Nóchali 'yaa bilé rió napurigá nochámála Onorúgame nila nochálichí, 'we 'la na'tawa bajchá, napugítí alué rió chibi 'sisa, muéchigó abiena

chojkíla nímili júkuru ala'sichi alué rió. 'We a'lá 'nátaga.

<sup>23</sup> Mué Timoteo napu 'we senibí nayume ju rojpachí, tase bajíwaká pe ba'wicho, abiena bajíwaká pe'tá i'wili ba'wila rekútame.

<sup>24</sup> I'sínimi 'we 'la machirumé ju cha 'sisa bilé ralámuli ta'chó o'tiachi galírale bajchamia. Nobi i'sínimi tabilé machirume ju cha 'sisa bilé ralámuli, 'ma a'kinánami machirume ju cha 'síligo. <sup>25</sup> A'chigóriga ju ralámuli 'yuga napu 'we a'lá gu'írígame ju uché jaré ralámuli. Jaré alué ralámuli 'we a'lá gu'írígame uché jaré ralámuli 'lige tabilé 'wesi ralámuli machime ju, nobi a'kinánami machibógó.

## 6

<sup>1</sup> Onorúgame oyérame napu ralurúgame ju tabilé najtétígame nochárilime, 'we 'la nirawa alué napu 'emi nuleme ju, napurigá tabilé 'wesi che animela Onorúgame olagá nibilé napu ramué benírame niru. <sup>2</sup> Jaré alué napu 'emi nuleme ju Onorúgame oyérame nisa, alué rió napu nochárilime ju tabilé najtétígame abéchigo 'la nirámili ju napugítí alué nuleme Onorúgame oyérame kame napurigá alué napu tabilé najtétígame nócharilime ju, napugítí okánika Onorúgame oyérame kame.

*Jena ruwimela Páulo ruwílígo Onorúgame oyérame níríká napurigá 'we nígame nírgo*

Ye rejcholi beníríwaká mué Timoteo 'lige aminami oiláriwa ralámuli napurigá e'wámála. <sup>3</sup> Jaré ralámuli benírame ju 'yégali ra'íchali, tase napurigá benírílige Wa'lula Esukristo. Napu benírílige Wa'lula Esukristo, alueka najkírime ju napurigá ramué ejerélawa napurigá Onorúgame najkí. <sup>4</sup> Alueka pe 'we riólame ju 'lige 'we ejobénigame kolae a'boi kaka peka ejobénigame ke, 'we jame ju ra'icha tachiri chonime ko jaré ra'íchali. Pe alieti ra'íchiga na'áwili o'wínime ju, pe chibi anigá járome ju ralámuli olagá, 'lige 'we chátiri 'nátame ju, <sup>5</sup> pe 'we nakome ju uché jaré ralámuli saega napu abiena pe chibiyeti 'nátaga e'yéname ju, 'lige pe alanokigá tabilé machime ju alué 'la bijchiá ra'íchali, 'lige mayeme ju Onorúgame oyérasaká 'la we'ká memio enomí. <sup>6</sup> Bijchiá ju Onorúgame oyérame níríká napurigá 'we i'nígame niru napu'lige 'we 'la ganiliga mochísiga napu níga mochiru. <sup>7</sup> Napu'lige ocheria tabilé tábiri níga ochériru, napu'lige suwisuga pecha tábiri o'tobógó. <sup>8</sup> 'La nígame níríká go'ame 'lige o'pacha 'la ganiliga mochíwa. <sup>9</sup> Alué ralámuli napu 'we 'nátame ju aminabi méliame enomí, alué ralámulika rujsume ju Remónisi trámpalachi, napugítí Remónisi chátiri 'nátali 'yame kame napurigá we'ká e'karúginti korúmála napu pe suwíbame

† 5:18 E'nesi Deuteronomio 25:4 'lige San Lucas 10:7.

ju, 'lige pe ala'síká asíriga resí nílime ju. <sup>10</sup> Napu'lige bilé ralámuli 'we nígame gainánilisa, a'lige chojkime ju e'karúganti chátiri 'nátali 'nata, 'lige 'ma tabilé e'wame ju Onorúgame nila rejcholi, 'lige pe la'sika 'we resí nilia ajtí.

*Jena ruwimela Páulo 'we a'lá rejcholi ruyéligo alué Timoteo*

<sup>11</sup> Mué Timoteo napu Onorúgamete nulérigime ju, tase na'tawa we'ká mélime enomí, iligá na'tawa 'we 'la e'wílame tachíri najkió Onorúgame, 'lige 'we 'la oyérilime Esukristo. 'We 'la niraga etewa suwábaga ralámuli Onorúgame oyérame. Napu'lige 'we resí kachi, 'la anachawa, 'lige 'la galegá etewa uché jaré ralámuli. <sup>12</sup> Abichilubi 'we 'la oyérame niwa Esukristo tabilé guwana wijchigá napugiti Onorúgame wanáparigame napurigá senibí bejtéramala Onorúgame 'yuga. Onorúgame wanápale mué alé we'ká ralámuli mochígichi gepuga napu'lige mué regá anichi: «Neka 'we 'la bijchígime ju Onorúgame 'we 'la nejkúrimio.» <sup>13</sup> Onorúgame napu suwábaga tábiri newale, 'we 'la e'negá ajtí, 'lige aminami Kristo Esusi, alué napu 'we 'la ra'íchale alé wa'lula Ponsio Pilato ajtígichi, aluéchigo 'we 'la e'negá ajtí. Neka alekeri nuláguru: <sup>14</sup> 'We 'la sébili olawa suwábaga nulalí napu ne nulá, napurigá ta'wesi ralámuli cha animela mué olagá. 'We 'la sébali olawa napusi nawachi Wa'lula Esukristo, <sup>15</sup> alué napu nawámili ju napu'lige najkísá Onorúgame napurigá nawámala, napugiti Onorúgame kame bi'neli Wa'lula Nulame bochígimi jena. Onorúgame ju abé rajpé a'wágame me'tigá suwábaga e'wélala. 'Lige ralámulika 'we 'la ra'íchame ju alué olagá. <sup>16</sup> Alué ju napu senibí bejtégame ju, 'lige bejtégame ju alé bilena napu 'we rapá ilí napu ralámuli tabilé abé e'yénasarikaré. Ta'wesi ralámuli eteme ju Onorúgame. Suwábaga ralámuli 'la niraga ra'ichasa 'la kápá alué olagá. Senibí 'la nulasa 'la kápá Onorúgame. Alarigá ju.

<sup>17</sup> 'We 'la ruyéwaká alué ralámuli napu 'we i'nígame ju napu jena wijchimoba ejperégame ju napurigá tabilé riólame nímala, aminami napurigá tabilé na'támala tabilé siné suwíbame ko enomí, napugiti enomika pe anaga suwíbame kame. Iligá 'we 'la ruyewa abé a'lá ko Onorúgame oyénilia, napugiti alueka asíriga 'la na'temame kame ramué 'lige nejime ju suwábaga napu resíláru ramué. <sup>18</sup> Aminami 'we 'la ruyéwaká napurigá machigá mochímala gu'írilime ko uché jaré ralámuli. <sup>19</sup> Alarigá olásaká 'emi 'liko Onorúgame 'we 'la ganíliga asimela 'emi 'yuga, 'lige alekeri Onorúgame 'we 'la semati raweli 'yámala jena wijchimoba 'lige 'pa rewagachi.

<sup>20</sup> Mué Timoteo napu 'we a'lá sébali olame ju napu nulá Onorúgame, tase gepúwaká alué ra'íchali napu ra'íchame ju alué ralámuli napu tabilé oyérame ju Kristo nila ra'íchali, nibilé gepúwaká 'we chibi anichi alué ra'íchali olagá napu ramué benírame niru. Alué ralámulika 'we 'la machime kóri chieri ra'íchali 'la bijchiá ko, nobi tabiléchigo machime júkó. <sup>21</sup> Jaré alué ralámuli 'ma a'rele Onorúgame oyeria pe alieti ra'íchali akigá.

Neka 'we tani Onorúgame napurigá 'we 'la gu'íralama mué 'lige uché jaré ralámuli. Alarigá nisa 'we 'la kápá.

Pe ikí kápá ye ra'íchali. Wa'lú cheliérabá.

## Ye Ju Alué Apeli Napu Nujubá Osele Páulo Alué Timoteo

*Kuira mué Timoteo.*

<sup>1</sup> Ne Páulo osá ye osilí. Alué Kristo Esusi napu 'pa rewagáchika julárigame nílige Onorúgamete nejíturu bilé nóchali. Alarigá lale bo'né Onorúgame. Onorúgame anile: «La oyérisiká Kristo Esusi 'liko semati raweli rewimela 'emi.» Onorúgameka tabilé siné 'yégame ju. Nabí bijchiá ruwime ju. <sup>2</sup> Neka mué Timoteo oséguru. Neka asírige na'temaka eteme ju mué napurigá ne bo'né inolá neraga. Onorúgame júkuru ramué O'nola, 'lige Esukristo júkuru ramué nuleme. 'We semáriga nejkúrasa 'la kápá Onorúgame, 'lige Esukristo semati bamúbali nejisa 'la kápá. Alueka 'we na'temame ju ramué. Semáriga nijkúrasa 'la kápá Onorúgame napurigá tabilé we'ká na'tawa ramué, bi'lepi 'nátali 'nátaga Onorúgame na'tálichacho.

*Jena ruwimela Páulo 'we tániligo Onorúgame napurigá 'la semáriga gu'irimala Timoteo*

<sup>3</sup> Rawé 'lige rukomi ra'íchame júturu ne Onorúgame 'yuga, cheliera igá wa'lú gu'iriló mué aluete. Neka israelita ju. Neka Onorúgame nochálichachi nóchame júkuru, napurigá nokale alué ralámuli israelita 'ya mochígame. Neka 'la bi'wígame 'nátame ju, ne na'tálichaká asírige 'la bi'wígame júkuru. <sup>4</sup> Neka 'we ganiliga ajtigéturu mué bejtélachi, 'lige neka 'we 'la nélá, 'ma simichi ne, 'ma nalagáturu mué. Alekeri mué 'yuga ra'ichánili ne Onorúgame ra'ichálila uchéchigo siné, napurigá 'we ganiliga ra'ichawa ramué okaka. <sup>5</sup> Neka 'we nélá, mué 'la bijchígime ke Onorúgame ra'ichálila, a'chigórige bijchígime kéturu mué u'sula napu Lóira anilime nílige, 'lige mué eyélatiri napu Unisia anilime nílige.

<sup>6</sup> Alekeri neka najkíguru napurigá aminabi sísimala mué Onorúgame ra'ichálila benírísia Onorúgamete 'yáliru mué alué nóchali napu'lige ne sekálate nochá mué. <sup>7</sup> Onorúgameka pecha majáreme 'nátali nejiléko. Alueka wa'lú a'walí 'yale ramué napurigá 'la niraga etewa chejaré ralámuli, 'la na'temaka suwábaga, 'lige napurigá ta guwana rujsúpua ramué, 'la bi'lepi 'nátaga járillime júkuru tabilé i'kirú nokogá. <sup>8</sup> Alekeri tabilé chijunawa ralámuli ra'ichali ruyea 'we 'la ko alué wa'lula Onorúgame ramué nuleme. Tabilé chijunawa ruigá ne galírale bajchárige ajtigó. Neka galírale bajchárige

ajtíkuru Esukristo ra'ichálila benírige. Neka asírige resí nilia ajtíkuru ye ra'ichali benírige ralámuli. Muéchigo abiena resí ikimeli júkuru napurigá ne. Onorúgame nejí a'walí napurigá anachawa. <sup>9</sup> Alué 'sílekuru ramué a'kabámana jawa, alué 'sílekuru nóchali 'ya ramué napurigá Onorúgame nila nochálichachi nochawa. Ramueka tabilé benégame niru Onorúgame nochálichachi nóchaga. Onorúgameka abirigáchigo benírile ko ramué na'temaka. Napu'lige Onorúgame ta'chó newá ye gawí, 'we 'la 'nátales bo'né churigá gu'irimó, 'nata asale Kristo Esusi julamia. <sup>10</sup> 'Ma sébalekuru Esukristo ramué a'kabámana jawamia. 'La machírú Onorúgame 'we 'la nejkúrimo ko. Onorúgameka Remónisi uméralekuru, 'ma 'la mochítékuru napurigá Onorúgame najkí, 'lige aminami napurigá nabí Onorúgame si mochiwa 'pa rewagachi.

<sup>11</sup> Onorúgamete 'yárukuru ne ye bilé nóchali napurigá gatewa Onorúgame 'yuga sairúgame neraga mochígame. 'Lige abiena nulélekuru ne'chí napurigá nulame nímala ne 'lige abiena benírame nímala ne Onorúgame ra'ichálila alué ralámuli tabilé jurío.\* <sup>12</sup> Neka 'láchigo sébali olame kame alué nóchali nulésiga, alekeri 'we resí nilia ajtí ne. Abirigáchigo tabilé chijúnago ne rekó galírale bajchárige ajtigé. Neka asírige 'la machí alué Esukristo, alué napu ne oyérame ju. 'We 'la bijchiga ajtí ne, alueka wa'lú a'walí 'yáturu ne'chí napurigá a'wágame nocha asimela ne ye Onorúgame ra'ichálila benírila ralámuli, napusi ku bo'né nawá jena wijchimoba.

<sup>13</sup> Tabilé a'réwaguru beniria napu ne beniri mué. 'We 'la e'wewa Kristo Esusi, 'lige 'we 'la galewa. Alarigá 'we 'la benírimala mué. <sup>14</sup> 'We 'la repúpua alué nóchali Onorúgame nila. Onorúgame Alawálaka ramué si bejtégame júkuru, 'lige nejkúrame júkuru repúkichi alué Onorúgame nejílala nóchali.

<sup>15</sup> Mué 'ma machíguru, suwábaga ne gompaniérola alé Asia anilime wa'lú gawí we'kaná riógachi mochígame ralámuli 'ma bi'neli a'rigó ne'chí. Alueka tabilé anáchale, bilé Pigelo anilime kéturu, 'lige bilé Ermójeni. <sup>16</sup> 'Lige uchéchigo bilé kéturu alueka 'la anáchigeturu, alueka Onesipora anilime kéturu. Alueka asírige we'sá nejkúrituru. Alueka tabilé chijúnname kéturu jena nawá ne galírale bajchárige ajtígichi. Onorúgame na'temasa 'la kékuru alué ríó 'lige 'kúchila 'yúriga. <sup>17</sup> Alueka nawálekuru jena wa'lú we'ká riógichi Roma anilichi ne'chí e'nemia. We'lí 'sile ne'chí 'ya. 'We nóchali olagá rewá ne'chí. Abirigáchigo 'la rewale ko ne'chí jena asirúgichi galírale

\* 1:11 Alué ralámuli jurío aniáká, pe ralámuli israelita aniname kéré.

bajcháriga. <sup>18</sup> 'La kékuru Onorúgame 'we 'la na'temasa alué rió napu'lige raweli sébachi gustisia olachi Onorúgame. Mué 'we 'la machíguru ye rió Onesipora 'la gu'irigo ne'chí alé 'we 'ká riógichi Ebeso anilichí.

## 2

*Jena ruwimela Páulo ruw'ligo 'la anachálime ko rekó 'we res'riga etuwíe*

<sup>1</sup> Mué Timoteo, napurigá ne inolá neraga ju mué, Esukristo a'walílate nocháwaká napurigá 'la sébali olámala mué alué Onorúgame nejílala nóchali. <sup>2</sup> Mueka as'iriga 'la benile rejcholi napu ne ruwí 'we'ká ralámuli akériga. Mueka 'we 'la ruyéwaká uché jaré ralámuli napu eki Onorúgame oyérame ju. Alueka amináchigo uché jaré ralámuli benírimili júkuru.

<sup>3</sup> 'La anachawa napu'lige resí nílilie napurigá Kristo Esusi sontáloa. <sup>4</sup> Bilé 'we 'la sontáloka pecha chebilena chujkírame júkó, pe iligá sébali oliáme 'nátame ju nóchali napu alué gapitani 'yálige napurigá sontálo nímala. Alué sontáloka najkíguru napurigá 'we ganíliga asimela alué gapitani alué bo'né sontalo 'yuga. Alarigá ju ramué Esukristo oyérame pe bi'lepi na'tálime júkuru napurigá nulá bo'né Esukristo. <sup>5</sup> Bilé rió 'we roweme nisa, 'la sébali olámili júkuru napurigá ju bilé re'gí. Tabilé sébali olásaká, 'liko tabilé mémala. <sup>6</sup> Abiénachigo alué echame, bajchá go'meli júkuru alué go'ame rakégame. <sup>7</sup> 'We 'la ná'tawa napurigá aní ne. Onorúgame 'la nejkúrimala napurigá 'la námepua suwábaga ye ra'íchali.

<sup>8</sup> 'We 'la na'tawa ye. Esukrístoka uchéchigo siné narélekuru alawá siné mukusá, 'ma ku ajagá ajtí. Lige Esukristo alué wa'lula nulame Rabí rijimala nile 'we 'ya ajtígame.\* Ye ra'íchali júkuru napu ne ruwí, <sup>9</sup> alekeri 'we resí nília ajtí ne. Karénate buluruga ajtí ne napurigá bilé rió ralámuli me'gá lílrome, nobi rekó neka buluruga ajtíge, Onorúgame ra'íchálilaka tabiléchigo buluruga ajtikó. <sup>10</sup> Neka 'la anáchame júkuru rekó 'we resí oliáe uché jaré ralámuli gu'iriga, alué ralámuli napu Onorúgame bayélige, napurigá 'la a'kabámana e'yénigime nímala 'la Onorúgame oyériga. Kristo Esusi 'sime ju buyana a'kabámana jawa. Alué ralámulika as'iriga 'la semáriga mochímala senibí 'pa rewagachi Onorúgame 'yuga.

<sup>11</sup> Alué napu jipe ruwimela ne, 'we 'la bi-jchiá ju:

'La bijchígisiká Esukristo mukúligo napurigá a'kabámana jawániliga 'lige tabilé chátiri bowechi mochisa, 'liko ramué abiénachigo Esukristo 'yuga mochiwa.

<sup>12</sup> Napu eki 'la anáchame ju, 'la nochámala Esukristo 'yuga. Tabilé machiórisúga chieríko Esukristo, 'liko Esukristo tabilé machió orimela 'liko ramué.

<sup>13</sup> Ramué tabilé oyérisiká Esukristo ra'íchálila, alueka abirigá sébali olámili júkuru napurigá anílige bo'né.

Alueka abirigá sébali olame ju, alueka Onorúgame kame, pecha 'yégime júkó.

<sup>14</sup> 'We a'kué ruyewa napurigá 'la 'nátaga mochímala ye ra'íchali alué ralámuli. Ruyewa pecha 'la júkó na'áuka mochilia a'bopi, ruyewa Onorúgame as'iriga 'la e'negá ajtígó. Alarigá ra'íchalia, pecha 'la júkó. Pe najsibume ju alué 'we 'la gepume ralámuli. <sup>15</sup> Napusí gainaru si nochawa alué nóchali napu mué ni napurigá Onorúgame 'la 'we nóchame neraga etémala 'la sébali olame, 'liko 'la tabilé chijunámala mué. 'We 'la gepuwa alué 'we 'la bijchiá ra'íchali, 'lige aminami 'we 'la e'wawa. <sup>16</sup> Pecha 'la júkó tabilé neraga ra'íchalia Onorúgame. Ralámuli tabilé Onorúgame 'nátaga ra'íchame ka, aminacho we'ká ra'íchámala sairúgame neraga Onorúgame 'yuga. <sup>17</sup> Ralámulika yati oyéramala alué cha nokame ralámuli ra'íchálila. Alué oká rió 'we cha nokame, bilé Jimeneo anilime ju, 'lige uché bilé Bileto anilime ju, <sup>18</sup> alué noká Onorúgame ra'íchálila najsibua. Alué oká rió anile: «'Ma simíraráe raweli napu'lige uchéchigo siné ajánamaráe suwígame.» Pe ralámuli najsibuga aní alué 'la Onorúgame oyérame. <sup>19</sup> Tabilé chéré rekó alué cha nokame ralámuli lanié, pe Onorúgame ra'íchálila tabilé we'kásaká 'la júkuru. Onorúgameka pecha we'kuámili júkó alué oyérame. 'La machiáguru alarigá ko napugiti Onorúgame ra'íchálila regáchigo aniname: «Alué Wa'lula Onorúgame 'we 'la machí bo'né 'kúchila ralámuli.» Abiena regá aní: «Ralámuli 'la bijchiá oyérame ko Wa'lula Onorúgame, 'la nígame ju a'walí napurigá a'rémala cha noká.»

<sup>20</sup> Bilé wa'lú galí ilígichi we'ká e'karúgame newárigime ju 'órote 'lige plátate, 'lige aminami igútiri e'karúgame newárigime ju 'lige wejcholitiri. Jaré go'ame ajchilime ju 'lige jaré pe repuga ajchálime ju. <sup>21</sup> Bilé rió a'résaká alué resítiri raweli, 'liko alué rió as'iriga a'lá nímala, as'iriga rejchirúgame suwábaga nóchali nóchaga napu Onorúgame 'ya. As'iriga 'la rió nímala, 'la Onorúgame oyérasaká, 'liko napurigá bilé bilato 'órote newárigime nímala, tase napurigá bilé sikolí repuga ajchala.

\* 2:8 Alué ralámuli israelita anime nile: «Alué a'kabámana jáwame ralámuli, alueka Rabí rijimala nímala a'kinana o'chérigame», arigá anile.

<sup>22</sup> 'Ma a'rewa alué chátiri 'nátali napu mué 'nátame nile re'mali ka. 'We 'la niraga etewa ralámuli. 'We 'la sébali rió nínilisiká, asíriga 'la sébali olawa napurigá aní Onorúgame nila ra'ichali. Asíriga 'la galegá etélime júkuru ralámuli, asíriga 'la niraga aminami. Alarigá nírukuru 'la bi'ígame sulégame níriká. <sup>23</sup> Tabilé gepuwa uché jaré ralámuli na'áuka ra'icha jágichi, pecha 'la júkó alué ra'ichali. Alué ralámulika pe tabilé Onorúgame 'nátiga ra'ichame ju. Pecha ra'ichálime júkó alué ralámuli 'yuga. Rekó rukechi pecha nejélime júkó. Mué alué ralámuli 'yuga ra'ichásaká, pe na'áwili o'wímala. <sup>24</sup> Mueka Wa'lula Onorúgame 'yuga nóchame júkuru, alekeri tabilé nejkómili júkuru mué uché jaré ralámuli 'yuga. Eligá abé 'la ju gompaniérola niraga etelia uché jaré ralámuli. Asíriga 'la 'nátaga asiame júkuru napu'lige alué ralámuli Onorúgame ra'ichálila ruyea. Tabilé chélegá etélime júkuru alué ralámuli. Tabilé chéré rekó alué ralámuli cha nokame ke, napurigá 'la machimela Onorúgame nila ra'ichali. <sup>25</sup> Asíriga 'la rejcholi i'ílime júkuru alué ralámuli napu sairúgame neraga mochí, tabilé riólame rió neraga 'yawa rejcholi. Siné kachi 'la gu'írimala Onorúgame alué ralámuli napurigá 'la bijchígimala alué 'la bijchiá ra'ichali. <sup>26</sup> Alarigáká 'we 'la na'támili júkuru, 'lige 'ma a'rémili júkuru alué Remónisi na'tálila. Jípeko Remónisi asíriga cha'pigá ajtí alué ralámuli, 'lige alué ralámuli e'wame ju napu Remónisi najkí.

### 3

*Jena ruwimela Páulo ruwúligo pe'wemi se-bamio resítiri raweli*

<sup>1</sup> 'We 'la gepuwa ye ra'ichali: Napu'lige amulí suwíbachi gawí, 'we resítiri bamí nímala, asíriga chárigá nímala. <sup>2</sup> Ralámuli pe a'bopi na'temaka járomala. Pe we'ká e'karúginti korúmala. 'Lige aminami asíriga riólaga ra'ichámala, asíriga a'ká ralámuli kolámala a'boi me'tigá uché jaré ralámuli. Aminami asíriga chátiri ra'ichámala uché jaré ralámuli olagá. Tabilé e'wámala napu aní o'nola 'lige eyela. 'Lige aminami tabilé cheliera nejímala rekó 'la gu'írasa alué ralámuli. Tabilé nirámala Onorúgame. <sup>3</sup> Tabilé galémala uché jaré ralámuli. Tabilé e'kámala uché jaré ralámuli. 'Lige sairúgame neraga ra'ichámala uché jaré ralámuli olagá, cha olániliga. Cha nokimela napu'lige cha nokinálisa tabilé niraga uché jaré ralámuli. Napurigá ajágame jamí oyame alieri nímala, asíriga ayoga etémala suwábaga 'la semátiri. <sup>4</sup> 'Lige aminami uché jaré ralámuli 'yégimala. 'Lige tabilé 'nátame nímala, pe napuchibi

nokogá járome nímala. 'Ma sébali ejobénigame mayémala a'boi, 'ma tabilé 'wesi tábiri resiláame neraga na'támala. Abé 'la korimela chibi nokogá e'yénilia me'tigá Onorúgame 'yuga na'talia. <sup>5</sup> 'Lige asíriga 'la Onorúgame oyérame korime nímala nobi tabiléchigo 'nátame kéréko, tabilé tánime Onorúgame napurigá 'la 'nátaga e'yénamala. Mué Timoteo, tase gompaniero gainawa alué chátiri ralámuli 'yuga, pecha bijchígame ka Onorúgame nila ra'ichali.

<sup>6</sup> Alué ralámulika 'we semátiri ra'ichame ju napurigá 'la bayérowa alé alué umugí ejperélachi napu mochí alué tabilé 'la 'nátame umugí. Alué umugika 'we resítiri alawégame ju, 'we chátiri 'nátame ju, 'we koruka eteme we'ká rió. Alekeri alué cha'sime rió tabilé nóchali olámala alué umugí gompaniérola gayena. <sup>7</sup> Ye umugika we'ká nóchali beninálíguru nobi tabilé siné e'wame júkó napu aní Onorúgame nila ra'ichali. <sup>8</sup> Alué rioka tabilé niramé ju alué 'la a'ká ra'ichali. A'chigóriga ju alué rió napurigá nílige alué oká rió sujkurúgame 'ya mochígame, alué napu sairúgame neraga mochílige Moisesi 'yuga. Alué ralámuli bilé Janesi anilime nile, 'lige bilé Jabresi anilime nile. <sup>9</sup> Alué ralámuli cha nokame ka tabilé we'ká gompaniérotamala. Suwábaga ralámuli machimela alué ralámuli tabilé 'la 'nátame ko, a'chigóriga napurigá alué oká rió Ejipto mochígame.

<sup>10</sup> Mueka asíriga 'la machíguru alieti benírame ko ne, 'lige chu'sime ko ne, 'lige tachiri gite beniri ne. Mué 'la machilke ne 'we 'la oyérame ko Onorúgame. Abiena machí mué ne tabilé 'me ayome ko ralámuli 'yuga. 'Lige 'we galeme ko ne ralámuli. 'Lige aminami abiena machí mué ne 'we anáchame ko rekó rasiriga etuíme ke. <sup>11</sup> Asíriga najátilime kéturu ne alué chátiri ralámulite, 'lige alekeri asíriga resi nilia ajtíkuru ne. Mué 'we 'la machilke alarigá etélirigo ne alé Antiokia anilichi we'ká riógichi, 'lige alé Ikonio anilichi we'ká riógichi, 'lige alé Listrasi anilichi we'ká riógichi. Ye lakiná we'ká riógichi asíriga anacha ne resi nílga eyéniga, 'lige wa'lula Onorúgame 'we gu'iri ne'chí napurigá ne 'la ma'chínamala resi nílga eyénachi. <sup>12</sup> 'La bijchiá ju, suwábaga napu ekí 'la Esukristo oyériga ejperénilime ka asíriga najátawili ju alué chátiri ralámulite. <sup>13</sup> Alué chátiri 'yégame ralámulika aminacho we'ká e'karúgame chátiri nochámala. 'Ma 'yégamala, pe a'bopi 'yegámala alué ralámuli.

<sup>14</sup> Nobí mué Timotéoka, tabiléchigo a'réwagó Onorúgame ra'ichálila napu

\* **3:8** Siné kachi alué oká rió sujkurúgame karáeturu alé Ejipto mochígame 'we 'ya rawé, alué napu Moisesi saega mochílige. Jaré ralámuli aní pe 'geriyero' aniame ko Janesi aniáká. 'Lige jaré ralámuli aní pe 'sairúgame niraga' aniame ko Jambresi aniáká.

mué benílige. Mueka 'ma machíguru 'la bijchiá ko alué ra'íchali. Mueka asírige 'la machíguru ralámuli alué napu nokale mué beníría. <sup>15</sup> Mueka asírige u'tá ka benílekuru Onorúgame ra'ichálila. Ye ra'íchalika 'we nejkúrimala machiachi cherigá ma'chínawa alé resiti bowechi. Alué ra'íchali ruwime ju alué Esukristo napu Onorúgamete julárigame nílige 'pa rewagáchika, alué buinámala ramué alé resítirichi. Alué oyérimé júkuru. <sup>16</sup> Suwábaga ye ra'íchali, Onorúgame 'sílekuru náwala napurigá ralámuli beníriwa. 'We 'la ju napurigá rejcholi ruyewa ralámuli napu'lige tabilé a'lá 'nátacha, napurigá ku 'la na'támala. 'Lige aminami gu'íriwa machiachi 'we 'la ko 'la tabilé cha nokame nírigichi. <sup>17</sup> Ye ra'íchalika regá júkuru napurigá bilé rió Onorúgame oyérame 'we 'la 'nátaga asimela 'la sébali olagá, napurigá 'la Onorúgame oyériga asimela.

#### 4

*Jena ruwimela Páulo ruwíligo nabí 'we 'la 'nata mochílime ko beníría Onorúgame ra'ichálila*

<sup>1</sup> Onorúgame 'wéchigo 'la e'negá ajtigame 'lige Esukristo abechigó. Alué 'símala ralámuli gustisia olá alué napu ajagá mochí jipe 'lige alué napu 'ma suwile. 'Lige Esukristo ku jena nawámala, 'lige Wa'lula nímala alué Esukristo jena suwábaga ralámuli nuleme. <sup>2</sup> Alekeri 'we 'la anigá ajchámala ne mué napurigá 'we 'la ruyémala mué alué ralámuli Onorúgame ra'ichálila oyérame. 'La ruyéwaká alué ralámuli rekó sairúgame neraga mochige alué ra'íchali Onorúgame ra'ichálila. Ruyéwaká napu'lige ruyénili mué 'lige napu'lige tabilé ruyénili mué. 'La ruilime júkuru rejcholi alué ralámuli napurigá ku 'la na'támala. 'Lige aminami 'la ruyewa nawésali napurigá 'la oilárimala ye ra'íchali. 'La beníriwa, tase guwana rujsúpua aminabi jawa beníría ye ra'íchali napu'lige alué ralámuli tabilé námachi ye ra'íchali. <sup>3</sup> Abé 'lilibeko we'ká ralámuli tabilé gepúmala ye ra'íchali, ye ra'íchali napu 'we nejkúrime ju napurigá 'la sébali ralámuli niwa. 'Lige ralámulika asírige we'ká benírime napubúmala, 'lige alué we'ká benírime 'we 'la korimela napurigá nochámala ralámuli napuchíbiriga nokinali a'boi, tabilé chérigá korimela rekó cha nokame ke. Ye chátiri ra'íchali gepúnili alué cha nokame ralámuli. <sup>4</sup> Ma pecha gepúniligó alué 'la bijchiá ra'íchali. Pe eligá alué tabilé 'la 'nátalicho 'nátiga nokísimala. <sup>5</sup> Nobí mué Timotéoka, 'wéchigo 'la na'tawagó suwábaga

napu ekí 'la a'ká 'nátalicho, 'la anachawa alué resi nílilime, 'we 'la anewa alué ralámuli tabilé Onorúgame oyérame. 'La semáriga sébali oláwaguru suwábaga napu Onorúgame benírale mué.

<sup>6</sup> Alué napu ne nocha ajtí jipe Onorúgame nochálila, alueka pe jípecho nímala.\* 'Ma sébali ajtí ne Onorúgame 'yuga bejtélímia 'pa rewagachi. 'Ma amulí seba raweli napu'lige mukumeli ju ne. <sup>7</sup> Neka 'ma 'la nóchakuru napu ne nulérigé. 'Ma 'la sébali olaka ne, tabilé guwana wijchigá.† <sup>8</sup> Jípeko alué métigame buwémala ke ne alué semati gorona anilime, napu semati raweli aníame ju napu Onorúgame 'yame ju alué 'la nóchame ralámuli. Onorúgame júkuru bi'neli neyúriga Wa'lula. Alué júkuru asírige 'la sébali gastigárimé ralámuli, alueka asírige 'la semátiri nejmála a'kinana napu'lige raweli seba. Pecha necho júkó alué meme, suwábaga ralámuli narémili júkuru napu ekí 'we najkíme napurigá Onorúgame jena wijchimoba nawámala, alué napu 'we néléme ju Onorúgame (Esukristo).

<sup>9</sup> 'We jigasa 'la képa napurigá yati sebawa jena napu ajtí ne. <sup>10</sup> Alué Rémasi anilime rió 'we galele alué tabilé Onorúgame 'yuga 'nátame ralámuli. Alekeri 'ma a'rele ne'chí, 'lige 'ma simile alé wa'lú we'ká riógichi Tesalónika anilichi. Alué rió Kresente anilime 'we 'la rió ju, eligá pe simile alé wa'lú gawí bo'ígichi we'kaná riógachi Galasia anilichi. 'Lige Títoka 'ma simílechigo wa'lú gawí bo'ígichi we'kaná riógachi Ralmasia anilichi. <sup>11</sup> Pe Lukasi 'la jena ajtíkuru ne'chí 'yuga. Marko 'yáwagó, 'lige yati 'yuga nawáwaká. Alueka 'la nejkúrime kéture ye nóchali, 'lige uché'chigo nejkúrimala jena. <sup>12</sup> Bilé rió júlaturu ne alé Ebeso anilichi we'ká riógachi, Tíchi anilime rió. <sup>13</sup> Napu'lige mué Timoteo ku jeka nawá, gemá a'páwaká. Alé Tróasi anilichi we'ká riógichi a'rigéturu ne Karpo anilime rió bejtélachi. 'Lige abiena a'páwaká alué baká we'lí gapilame osirúgime kabítigame, 'lige alué osilí wí'chíparachi osirúgime kabítigame. Ye wí'chípara kabítigame abé rajpé resi la ne.‡

<sup>14</sup> Alué Alejantro napu jiero me'choga nóchame ju, asírige resi olá ne'chí. Onorúgameka 'we 'la machí tabilé sébali oláligo. Onorúgame gastigárimala pecha sébali oláligo. <sup>15</sup> 'La 'we 'nátiga asíboa mué, asírige cha'sime ju alué rió. Alueka cha sairuga neraga ra'íchame nílige alué ra'íchali napu ramué benírila.

\* 4:6 Yólí ra'íchaga aní: «Seré ofrecido en sacrificio.» † 4:7 Yólí ra'íchaga aní: «He peleado la buena batalla, he llegado al término de la carrera, he mantenido la fe.» ‡ 4:13 Siné kachi alué osirúgime kabítigame wa'lú ra'íchame ra'íchali gatélime nile, siné kachi alué Onorúgame ra'ichálila 'ya nerúgame ra'íchame nile, uché jaré ra'íchali abiena.

<sup>16</sup> Napu'lige ne o'torú gustisia olamia pe kulí siné, tabilé 'wesi mochígeturu ne gompaniérola, suwábaga asíriga majawá ne'chí 'yuga simíbiga. Neka abirigá 'la niraga etiá alué ralámuli napu a'rele ne'chí, 'lige abiena najkí ne napurigá Onorúgame 'we 'la niraga etémala alué ralámuli. <sup>17</sup> Pe Onorúgamecho rejpí ne'chí 'yuga 'lige a'walí 'ya ne'chí napurigá Onorúgame ra'íchálila beníriwa napurigá gepúmala alué ralámuli napu tabilé jurío ju. Alué Remónisi 'ma amulí cha'piéturu ne'chí,<sup>§</sup> nobi Onorúgameka 'wéchigo nejkúrikó napurigá ne 'la ku ma'chínamala alé resítirichi. <sup>18</sup> Alué Wa'lula Onorúgame 'símala ma'chí pa ne'chí suwábaga resítiri bowechi, 'lige Onorúgame 'pa rewagachi o'tomela ne'chí, alé napu nulame ju bo'né Onorúgame. Asíriga 'la ju Onorúgame 'la niraga etelia ralámuli níriga. Alarigá ju.

<sup>19</sup> 'We repori ne alué Prisila anilime mukí 'lige aminami alué rió Akila abiena náwala ne reporali. 'Lige alué Onesípóra 'yula 'lige 'kúchila abiénachigó repori ne. <sup>20</sup> Alué rió Erasto alé Korinto anilichi we'ká riógichi rejpíle. 'Lige alué Trópimo anilime Mileto anilichi we'ká riógichi a'réturu ne 'we nayume. <sup>21</sup> Mué Timoteo, 'we jigaga napurigá sebawa jena ta'chó romó kachi. 'We náola reporali ye ralámuli Eúbulo, 'lige Purente abiena, 'lige Lino abiena, 'lige alué rió Kláurio abiena, we'ká aminá uché jaré napu ekí Onorúgame oyérame ju.

<sup>22</sup> Semáriga gu'írisa 'la kápá Wa'lula Esukristo napurigá 'la a'wágame sulégame nímala mué. Abiénachigó gu'írisa 'la kápá Onorúgame suwábaga alué ralámuli napu ekí mochí alé mué 'yuga.

Pe ekí kápá ye ra'íchali. Wa'lú cheliérabá.

<sup>§</sup> 4:17 Yolí ra'íchaga, «me sacó de la boca del león».

## Ye Ju Alué Apeli Napu Páulo Osele Alué Tito

*Kuira mué Tito.*

<sup>1</sup> Ne Páulo osá ye apeli. Neka Onorúgame 'yuga nóchame kame. Esukristo 'yáuru ne'chí nóchali napurigá ralámuli nuleme nímala ne 'lige benírame. Onorúgameka 'we 'ya bo'né wanápuligame jaré ralámuli napurigá oyéramala Onorúgame. Abiena beniri ne alué bijchiá Onorúgame nila ra'íchali napurigá 'la semáriga epperélamala napurigá najkí Onorúgame. <sup>2</sup> Alarigá beniri ne, ne 'we 'la machí napu'lige Onorúgame bayechi ramué napurigá oyérimala, napurigá 'la senibi rawé Onorúgame 'yuga mochiwa napu'lige suwisuga. Ta'chó newá ye gawí, alarigá 'nátalekuru Onorúgame rewagachi mochíga asináile ramué alué 'yuga. Onorúgameka tabilé siné 'yégame júkuru. <sup>3</sup> Napu'lige raweli sebasa napurigá ralámuli námamala alué ra'íchali, Onorúgamete nulérituru ne'chí napurigá benírimala ne alué ra'íchali. Onorúgameka buyáname júkuru ramué resítiri raweli o'kame nírigichi 'lige a'kabámana jáwame júkuru ramué. <sup>4</sup> Osé ne ye apeli mué Tito. Mueka 'we 'la bijchígituru alué ra'íchali napu ne ruyé mué. Ne 'lige mué bi'lepi 'nátli 'nátame niru. Alekeri 'la narémala mueka semati raweli napu Onorúgame nejímala, tabilé we'ká 'nata asiboa mué. Onorúgame ju ramué O'nola 'lige Kristo Esusi a'kabámana jáwame júkuru ramué. Alué júkuru alué semati raweli nejime jena wijchimoba.

*Jena ruwimela Páulo nuléligo Tito napurigá alué Tito mochiámala alué e'wélala*

<sup>5</sup> Neka a'réturu mué alé Kreta anilichi, napu walú gawí ilí walú ba'wichí nasipa,\* napurigá 'la gu'irimala ralámuli Onorúgame oyérame. Neka nuligéturu napurigá mochiámala jaré e'wélala nulame a'pílipi we'ká riógichi napu mochí ralámuli Onorúgame oyérame. <sup>6</sup> Bilé rió wa'lula 'la bi'igame alawégame nímili júkuru tabilé che'sika eyéname, pe bi'lepi mukí 'yúgame nímili júkuru tabilé we'ká, 'lige 'kúchila yábechigó 'la Onorúgame oyérame nímili júkuru, alueka ta'wesi ralámuli chélagá etémala pecha cha nokogá járome ka, 'we 'la bi'igame alawégame ralámuli nímili júkuru. <sup>7</sup> Bilé rió Onorúgamete 'yárigame nóchali, 'la kilí rió nímili júkuru, tabilé oparúgame, pee bajime, tabilé nejkome, pecha mélime ka la'sika enalía, pecha 'la júkó la'simía. Pecha nulá Onorúgame la'simime. <sup>8</sup> Onorúgameka nuláuru napurigá 'la gu'iriwa ralámuli

galírale jsichi napurigá eliwa napurigá alé che'lebámala, ala'simía ka 'we 'la júkuru. 'La kilí 'nátame rió niraga 'we 'la juchigó 'la sébali olame rió níriga, 'la niraga etelia uché jaré ralámuli Onorúgame oyérame. <sup>9</sup> Bilé rió wa'lula 'we 'la sébali olame júkuru alué 'la bijchiá 'la ra'íchali napu benile, 'la uché jaré benírimili júkuru alué a'lala ra'íchali, 'lige abiena ku gu'linámili ju alué se'nú bowé o'kame.

<sup>10</sup> We'ká mochíguru alué tabilé e'wame, pe ra'icha mochime júkuru pe nejkumega. Jaré ralámuli 'we nulame ju napurigá si'kirémala pe'tá isila wi'chila guwala, regá mayega: «Alarigá ka 'la Onorúgame oyérame niwa ramué.» <sup>11</sup> Alué ralámuli 'we nejkumeme ju. Alué ralámulika sulílime júkuru napurigá ta nejkumea mochímala. Pe enomí koruka anime ju alué ralámuli, pe ralámuli najsi-buga anime ju alué ralámuli 'ma o'nola 'ma 'kúchila 'yúriga, 'ma suwábaga rijimátiriri, alué najsi-buga anime ju.

<sup>12</sup> Bilé rió Kreta ajtígume napu ruwime ju napu anele Onorúgame, aníguru: «Ralámuli Kreta mochígume 'we 'yégame ju, 'lige 'we jobátigame ju, 'lige 'we go'yechi ju.» <sup>13</sup> Alué rioka 'la bijchiá anile. Alekeri 'we a'wágame anewa aleké ralámuli Onorúgame oyérame napurigá 'la o'wé inámala Onorúgame oyérisia, <sup>14</sup> 'lige napurigá tabilé e'wémala alué 'yégalí ra'íchaga e'yéname ralámuli jurío.

<sup>15</sup> Ralámuli 'la bi'igame alawégame Onorúgame gite 'nátame ju suwábaga 'la suériga. Ralámuli tabilé bi'igame alawégame, alueka 'we resítiri 'nátame ju. Tabilé siné 'la 'nátame ju. Tabilé siné che nokame kólálíke a'boika. Alueka tabilé ne níligo a'boika alanokae e'yene. <sup>16</sup> A'boika 'we 'la oyérame korime ju Onorúgame, 'láchigo ma'chígime néréko tabilé nirame ko. 'We cha nokame júkuru napu tabilé galé Onorúgame, 'we i'nílame ju 'lige tabilé nirame ju. Alueka tajsiné a'ká ralámuli nímala.

## 2

*Jena ruwimela Páulo nuléligo alué Tito napurigá 'we 'la rejcholi benírimala ralámuli*

<sup>1</sup> Mué Tito, 'la Onorúgame oyériga beníriwa alué ralámuli. <sup>2</sup> Beníriwa alué o'chérame rió napurigá 'la kilí ralámuli nímala, 'lige 'la napurigá 'la nirálime nímala suwábaga ralámulí, 'lige napurigá 'la sébali ralámuli nímala, 'la sébali olame 'lige 'la bijchígume, 'la na'temame, 'lige tabilé chéláme rekó 'we chibi anilía. <sup>3</sup> Abiena a'chigóriga alué o'chibérigame umugi, 'we 'la beníriwa napurigá abichilubi 'la 'we 'la oyéramala Onorúgame, napurigá tabilé ne'ochámala ralámuli, 'lige napurigá tabilé rekuka bajímala. <sup>4</sup> 'We 'la rejcholi ruyewa alué

\* 1:5 Yolí ra'íchagaká «isla» anilime ju.



umugí o'chibérigame napurigá ruyémala rejcholi alué pe kulí newíkame napurigá 'la níraga etémala a'boi 'yula lige a'boi 'kúchila, <sup>5</sup> napurigá 'la sébali olame umugí nímala, tabilé ichúrimi eyéname, 'la repume bo'né bejtélachi 'lige napurigá 'la gu'írame nímala uché jaré ralámuli, 'lige 'la napurigá 'la e'wémala a'boi 'yula. Alarigá ka ta'wesi gawélimala Onorúgame nila ra'íchali.

<sup>6</sup> Abiénachigó ra'íchwaguru mué Tito alué ejtemali napurigá 'la a'wágame alawégame nímala, 'la sébali olame ejtemali. <sup>7</sup> Mué bo'né Tito 'we 'la sébali olame niwa napurigá 'la níraga etewa mué alué ejtemáite. Napu'lige beniria 'la kilí ruyéwaguru 'la na'temaka, tabilé 'yéigga, <sup>8</sup> alarigaka ta'wesi nemímala, alarigaka 'la chijúniga na'támala'é. 'Liko 'la tabilé gawélimala ramué.

<sup>9</sup> 'We 'la ruyéwaguru alué tabilé najtétiga nochárilime\* napurigá 'la e'wámala nulalía batrónite, napurigá 'la a'ká ralámuli nímala, tabilé nejeme nulilía, <sup>10</sup> 'la yati e'wame napurigá tabilé chigoga e'yénamala, napurigá 'we 'la nírame nímala. Alué nóchame etega alué uché jaré ralámuli animela 'la suétiri ko alué ra'íchali Onorúgame nila, alué Onorúgame ramué a'kabámána jáwame.

<sup>11</sup> 'Ma sébakurubá Onorúgame a'walila ramué a'kabámána jawamía. Suwábaga ralámuli machíguru 'ma sébago. <sup>12</sup> Ye a'walika ramué benírame júkuru napurigá tabilé oyérawa chátiri bowé 'lige aminami tabilé tábiri oyériwa uché jaré ralámuli tabilé 'la 'nátame. Abé 'la júkuru 'we 'la 'nátaga mochíruga napurigá najkí Onorúgame jena wijchimoba. <sup>13</sup> Alarigá na'táwaliké ta'chó ku nawachi Esukristo, alué napu júpá ramué O'nola napu ramué 'la a'kabámána jáwame ju. <sup>14</sup> Alué bo'nepi mukule ramué na'temaka, ramué bo'nepi a'kabámána jawániliga 'lige bi'éniliga ramué alawala napurigá 'la Onorúgame 'kúchila niwa ramué 'we rejchirúgame napurigá 'la nochawa ramué napu bo'né Esukristo nulá.

<sup>15</sup> Suwábaga ye ra'íchali beníriwa uché jaré ralámuli, oiláriwa alué ralámuli Onorúgame oyérilichi 'lige tabilé 'la sébali oláká ne'óchiga ruyewa. Tabilé chéláwa rekó jaré chibi anié, rekó gawéliga e'yene, abichilubi 'we iwériwa Onorúgame nila ra'íchali beniria ralámuli.

### 3

*Jena ruwimela Páulo ruwíligo churigá nokimeli ko ralámuli Onorúgame oyérame*

<sup>1</sup> Mué Tito, uché ruyéwaguru alué Onorúgame oyérame napurigá 'la e'wímala alué gobierno napurigá nulá, 'lige napurigá nulá e'sélikame, 'we 'la ruyewa napurigá 'la bi'lepi 'nátili 'nátaga e'yénamala, napurigá 'we 'la rejchirúgame nímala 'we 'la nóchali

nígame nímala. <sup>2</sup> 'Lige anéwaguru napurigá tabilé che anigá járomala chejaré ralámuli olagá, napurigá 'la kilí ralámuli nímala, 'la gu'íriwa uché jaré ralámuli tabilé che anigá, ta'mé 'we riólga ilírowa tabilé gawéliga uché jaré ralámuli.

<sup>3</sup> Napu'lige ramué tabilé 'cho oyeria Onorúgame, tabilé inámame nile Onorúgame nila ra'íchali, tabilé e'weme Onorúgame. Pe chibi nokogá e'yéname níriga, tabilé 'la 'nátaga. 'We resítiri raweli oyérame níriga ramué 'yako. 'We cha nókame níriga ramué, nasuliga e'yéname níriga bilé nóchali, bujéniliga uché bilé rió nila nóchali. Aminami tabilé eténilime níriga ralámuli. <sup>4</sup> Onorúgameka 'we galele ramué, alekeri buinálirukuru ramué resiti bowé o'kame nírigichi. <sup>5</sup> Alarigá 'silekuru napugiti 'we na'temáligame ramué. Ramueka 'we resí nokogá e'yéname nírigime, Onorúgameka abirigáchigo 'la e'kálekó. Onorúgameka 'ma bujélekuru alué chátiri 'nátili. 'Ma 'la e'kale ramué. Onorúgame Alawala 'sílíkuru ramué alawala bi'wea. <sup>6</sup> Onorúgameka Esukristo júlale napurigá nejímala ye Onorúgame Alawala. Alué ramué alawala bi'wele resítiri alawégame nírigichi. Alarigaka tabilé chojkila nírukuru ramué napurigá Onorúgame ramué gastigárimala uché siné rawé, <sup>7</sup> 'liko 'la nabí Onorúgame 'yuga mochíwaleké. Alarigá buwea mochiru.

<sup>8</sup> Ye ra'íchalika 'we bijchiá ju. Najkí ne napurigá mué Tito 'we e'wérili benírimala ye ra'íchali alué ralámuli Onorúgame oyérame napurigá alué ralámuli 'la sébali olame nímala napurigá Onorúgame nulá. Ye ra'íchali 'we 'la júkuru, 'lige ye ra'íchali akigá ralámuli ku 'la na'támala. <sup>9</sup> Tabilé chujkíríwa alemi alué ralámuli 'yuga napu'lige alué ralámuli bochí anichi 'we machime kóriká chieri níliga alué ralámuli 'ya ejperégame, 'lige aminami tabilé chujkíríwa alemi alué ralámuli 'yuga napu'lige alué ralámuli bochí anichi 'we machime kóriká alué Moisesi nulalila. Pe a'bopi na'áuka mochime ju. Alarigaka tabilé 'la ju, pe a'bopi na'áuka mochíruga.

<sup>10</sup> Bilé rió Onorúgame oyérame 'ma ne'ochasa uché jaré ralámuli Onorúgame oyérame peka che nokachi, 'liko alué rió 'yuga ra'íchwaguru siné, osá kómá, 'lige tabilé e'wásaká 'liko 'ma se'wí juláwaguru. <sup>11</sup> Alué rioka 'ma se'nú 'nátili cha'pígame nímime, 'la ma'chígame nélélamala alué rió resitiri 'nátili 'nátame ko.

*Jena ruwimela Páulo 'we 'la anéligo chu'símili ko alué Tito*

<sup>12</sup> Ne julámala alé 'mi alué rió Artémasi o Tíkiko. Napu'lige 'ma sebasa alé Gresia 'liko yati simibóaguru mué alé Nikópoli anilichi

\* 2:9 E'nesi glosario «esclavo».

napu ne asimela romó. <sup>13</sup> Abiénachigó gu'iriwaguru abe alué oká rió napu alemi mo'iba, Senasi anilime rió ju bilé napu ra'íchali gateme ju, 'lige uché bilé rió Apolo anilime ju.\* <sup>14</sup> 'We 'la júkuru alué Onorúgame oyérame ralámuli benisá uché jaré ralámuli gu'iriga. 'Lige abiena 'we 'la júkuruchigó benisá alué inígame ralámuli gu'iriga.

<sup>15</sup> Suwábaga napu ekí júpá ne Páulo gompaniérola reporali nábilía mué. Abiénachigó reporali nábilía alué ralámuli Onorúgame oyérame ramué amígola napu mochí alé napu ajtí mué. Semáriga gu'írísá 'la kékuru 'emi Onorúgamete suwábaga 'emi.

Pe ekí kápá ye ra'íchali. Wa'lú cheliérabá.

---

\* **3:13** Jaré ralámuli mayé 'ma sébaligo alué oká rió napu ajtile Tito, abiena mayé o'tóligo ye apeli.

## Ye Ju Alué Apeli Napu Osele Páulo Alué Bilimoni

Kuira mué Bilimoni.

<sup>1</sup> Ne Páulo 'we repori mué. Neka jipe jena ajti galírale bajcháriga. Galírale bajcharu ne alué Kristo Esusi ra'ichálila beníriga eyénachi. Ye rió 'we oyérame ju alué Kristo Esusi napurigá mué 'lige napurigá ne. Ramueka 'we ganiliga etuwía mué, mué abiena alué nóchali nóchame kame napu nejile Onorúgame. <sup>2</sup> Abiena 'we repori ne alué mukí Apia anilime, alué Esukristo oyérame napurigá ramué. Abiena repori ne alué rió Arkipo anilime. Alué rió Arkipo nejhuri alué Onorúgame nila ra'ichali beniria napurigá ramué. 'Lige abiena 'we repori ne alué ralámuli napu jsime ju alé napu mué Bilimoni bejté alué Onorúgame nila ra'ichali benimeaa. <sup>3</sup> Onorúgame ramué O'nola 'la gu'írisa 'la kápá 'emi, 'lige abiénachigó alué Wa'lula Esukristo, napurigá 'la bi'lepi 'nátaga mochámala 'emi Onorúgamecho, tabilé 'we'ká 'nátaga.

*Jena ruwimela Páulo ruwilingo 'we ra'sálagá ajtíligo napugiti Bilimoni 'we galeme ko ralámuli Esukristo oyérame*

<sup>4</sup> Neka we'sá cheliera 'yame júturu Onorúgame, Onorúgame 'we 'la gu'irimpá mué. Neka akéturu 'we 'la oyérame ko mué alué Wa'lula Esusi ra'ichálila, 'lige 'we 'la galeme ko mué Esusi, 'lige 'we 'la na'temame ko mué Esukristo oyérame. Alekeri cheliera 'ya ne Onorúgame. <sup>5</sup> Jaré ralámuli aní mué 'we alá bijchígime ko alué Esukristo ra'ichálila. Abiénachigó aní mué 'we 'la ganiliga eteme ko suwábaga ralámuli napu Onorúgame oyérame ju. <sup>6</sup> Neka tánime ju Onorúgame napurigá a'wali 'yámala mué napurigá 'la e'wémala mué Onorúgame nila ra'ichali. Alarigá ka aminacho 'la námamala mué chiena 'la ka Kristo oyénilia. <sup>7</sup> 'Lige ne jipe 'we ra'sálagá ajti, napugiti mué 'we 'la galeme kame alú ralámuli Esukristo oyérame, mué 'we semáriga ollárimé kame alué ralámuli Esukristo oyénilichi. Alekeri 'we ra'sálagá ajti ne.

*Jena ruwimela Páulo najkió napurigá Bilimoni na'temaka etémala alué Onésimo*

<sup>8</sup> Ne 'we alá machíguru mué 'we alá rió ko, alekeri ruwimela ne bilé ra'ichali. Ne nígame júkuru bilé nóchali napurigá nulémala ralámuli, alué nóchali napu alué Kristo 'yale ne'chí, <sup>9</sup> neka tabiléchigo nuléniligó mué. Neka pe najki napurigá mué 'we 'la na'temámala alué ralámuli. Ne Páulo ya'má o'chéráme kame, alekeri 'la niraga etewa ne. Jena galírale bajcháriga ajti ne jipe, pe alué

Esukristo ra'ichálila ruwime kóriká. <sup>10</sup> Najki ne napurigá 'la na'temámala mué Onésimo. Jipe alué rió Onésimo napurigá ne bo'né inolá neraga alarigá ju, napugiti 'we alá semáriga bijchígime alué O'nó Onorúgame nila ra'ichali. Ne ruigéturu alué ra'ichali galírale bajcháriga asaga.

<sup>11</sup> Alué rió nóchale alé mué bejtélachi 'ma we'ká rawé. 'Lige ta'mé wa'lú nejkúriile kaka, pecha Onorúgame oyérame nílga. Jípeko uché rajpé abé wa'lú nejkúrimala alué rió mué 'yuga 'lige akiná abiénachigó. <sup>12</sup> 'Lige ne jipe jula alué rió Onésimo alé napu mué ajti. Jipe 'we 'la niraga etewa alué rió napurigá ne neraga. <sup>13</sup> Neka machí mué 'we alá gu'irimo ne'chí, alekeri amulí ta'mé jula ne alué rió Onésimo, alué rió jena wa'lú nejkúrimé nímiligó. <sup>14</sup> Tabilé nulénili ne mué. Bo'né 'nátaga gu'iriwagó ne'chí. <sup>15</sup> 'La nílke'é 'másasa. Jípeko 'ma ku seba mué bejtélachi, jípeko 'la Onorúgame oyérame júkuru tase napurigá i'bé. <sup>16</sup> Ne 'we alá galé alué rió Onésimo. Mueka jípeko abéchigo rasigá galé alué rió, mué 'yuga nóchame kame, 'lige Esukristo oyérame kame.

<sup>17</sup> Mué Bilimoni ne kompaniérola ju, alekeri jipe 'we alá niraga etewa alué rió Onésimo napurigá ne. <sup>18</sup> Alué Onésimo cha 'sile i'bé. Onésimo wikasáká enomí, liko ne Páulo najtémala alué enomí mué Bilimoni. <sup>19</sup> Ne bo'né osá ye ra'ichali. Neka 'la bijchiá aní 'la najtémia napu wiká alué Onésimo. 'We 'la niraga etewa ne'chí. Neka 'la semáriga nejkúrituru napu 'lige mué resiríká eyénachi. <sup>20</sup> Ne Páulo 'lige mué Bilimoni, ramueka okánika niru alué Esukristo oyérame, alekeri oilawa napu ne najki. Oiláriwa ne'chí Kristo oyéachi.

<sup>21</sup> Neka 'la machí 'la sébali olámala ko mué, 'lige uché rajpé abé alá semáriga olámala mué 'lige, alekeri osé ne mué.

<sup>22</sup> Abiena 'ma 'la gatewa alé mué bejtélachi napu ne gojchímela alé sebasaa, ne 'la sebásakabá alé mué bejtélachi. Mué 'we alá tániwa Onorúgame napurigá 'la alarigá nímala.

<sup>23</sup> Ye rió Epáprasi jena ajti ne 'yuga galírale bajchárigachigó, alué Esukristo ra'ichálila benírime kóriká ralámuli. 'Lige alué ye rió Epáprasi 'we reporalí náolachigó. <sup>24</sup> Alué Marko, 'lige Aristarko, 'lige Rémasi, 'lige alué Lukasi 'we reporalí náolachigó. Suwábaga ye ralámuli abiénachigó nóchame ju napurigá ne, alué Esukristo ra'ichálila ruyá.

<sup>25</sup> Semáriga gu'írisa 'la kápá alué Wa'lula Esukristo 'emi ralámuli napu ekí alé ejperégame ju.

Pe ekí kápá ye ra'ichali. Wa'lú cheliérabá.

## Ye Ju Alué Apeli Napu Oséliru Alué Esukristo Oyérame Napu Ebreo Ra'íchame Nílige

*Jena ruwimela Esukristo 'we najtékame ko me'tigá alué santo ánjeli*

*Kuira suwábaga 'emi ralámuli.*

<sup>1</sup> 'We 'ya we'ká bamí alué ralámuli napu ruwime nile napu anele Onorúgame we'sá ruyele ramué rijimála\* napu anele Onorúgame.† <sup>2</sup> 'Lige a'kinana Onorúgame bo'né Inolá júlale napurigá ralámuli benírimala uché bilé nuebo ra'íchali. 'We 'ya, tabilé 'cho sébachi Onorúgame Inolá jena wijchimoba ta'chó l'tégichi gawí, Onorúgame nulele bo'né Inolá napurigá newámala gawí 'lige rewagátiri pe bo'né 'nátaga. 'Liko 'ma suwábaga bo'né nila ju, napu ekí nerú jena wijchimoba 'lige 'pa rewagachi. <sup>3</sup> Onorúgame Inolaka wa'lú a'walí nígame ju Onorúgame a'walila, 'lige a'chigóriga napurigá Onorúgame alarigá nulame ju. Alué a'walila gite nabí repuka ajtí suwábaga tábiri. Napu 'lige jena wijchimoba sebase, alueka mukúlekuru napurigá ralámuli 'ma a'rémala chátiri 'nátali. 'Lige napu 'lige 'ma sébali olasa, 'ma ku 'pa rewagachi simile Wa'lula Onorúgame si asimea wajtoná napu ajtí Onorúgame napurigá nulámala.

<sup>4</sup> 'La nérékuru Onorúgame Inolá abé najtékame ko me'tigá alué santo ánjeli. Onorúgame Inolaka abé najtékame nóchali nígame ju. <sup>5</sup> Onorúgameka tabilé siné che anele bilé santo ánjeli regá: Mué ne Inolá júkuru.

Jípeko ne mué O'nola júkuru.

Ye ra'íchali anele Onorúgame bo'né Inolá. Abiena regá anele Onorúgame:

Neka ju alué O'nola,

'lige alué ne Inolá ju.‡

Onorúgameka tabilé siné alarigá anele bilé santo ánjeli.

<sup>6</sup> Abiena napu 'lige Onorúgame júlale bo'né Inolá jena gawichí, regá anile:

Neka najkíguru napurigá suwábaga alué santo ánjeli

'la niraga etémala ne Inolá, 'lige napurigá animela:

«Wa'lú a'walí nígame ju 'lige 'we najtékame ju.»

<sup>7</sup> Aminami Onorúgame regá anile alué santo ánjeli olagá:

Napurigá bilé eká 'lige na'í alarigá ju alué santo ánjeli,

alueka Onorúgame gu'írame ju.

<sup>8</sup> Aminami Onorúgame regá anile bo'né Inolá olagá:

Mué Onorúgame ne Inolá, mueka senibí nulámili júkuru.

'We a'lá semáriga nulámili júkuru 'we a'lá sébali.

Tabilé siné suwibámala alué nulalí.

<sup>9</sup> Mueka nabí 'la 'nátaga lírome júkuru

napurigá ralámuli

'we a'lá semáriga na'támala Onorúgame 'yuga,

'lige mueka ayónime júkuru alué ralámuli

alué tabilé Onorúgame oyérame 'yuga,

alekeri ne Onorúgame mué O'nola

'we a'lá nóchali 'ya ne mué

asíriga najtékame me'tigá alué mué gompaniérola.

Mueka asíriga ra'salagá asimela alué nóchali niga.§

<sup>10</sup> Onorúgame abiena regá anele bo'né Inolá:

'We 'yasi mué júkuru nulame,

mué 'sílekuru gawí newá 'lige rewagátiri pe bo'né 'nátaga.

<sup>11</sup> 'Lige abé i'libeko tabilé i'télamala ye gawí nibilé rewagátiri,

'ma suwibámala suwábaga, mueka abisibi asimela.

Alué gawika pe o'chéraga suwibámili júkuru

'lige alué rewagátiri a'chigóriga,

napurigá o'pacha iwime ju o'chéraga

alarigá i'kimela.

<sup>12</sup> Mueka pe ro'minámala ye gawí 'lige rewagá abienachigó,

pe alarigá olámala mué,

napurigá nokame ju ralámuli

napu 'lige 'ma tabilé gemanálasaká alué gemate,

a'maná ajchame kárigó ro'míniga.

Mueka se'wí ajchámala napurigá nokame ju ralámuli.

O'pacha bujisá se'nú o'pachátima ju

a'maná ajchame kárigó,

alarigá olámala mué ye gawí 'lige rewagá.

Mueka peba alarigá rejpímili júkuru

'lige senibí bejttega asimeli júkuru mué.

Alarigá anele Onorúgame bo'né Inolá.\*

<sup>13</sup> Onorúgameka tajsiné che anele bilé santo ánjeli ye ra'íchali:

Jena asibóká ne'chí 'yuga wajtoná napu ne ajtí

napurigá wa'lula neraga napasí ne ro'aba mué saíla.†

<sup>14</sup> Alué santo ánjelika pe napurigá bilé alawá niraga ju 'mimi júlálime ju ralámuli

\* **1:1** E'nesi glosario «ancestor». † **1:1** Yolí ra'íchaga «profeta» anilime nile alué ralámuli. ‡ **1:5** E'nesi Salmos 2:7.

§ **1:9** Yolí ra'íchaga ka «untado con el aciete de alegría». E'nesi Salmos 45:6-7. \* **1:12** E'nesi Salmos 102:25-27.

† **1:13** E'nesi Salmos 110:1.

gu'iriniliga, alué ralámuli napu Onorúgame buinámala alé resitiri bowechi.

## 2

*Jena ruwimela 'we a'lá 'nátaga akiame ko Esusi ra'ichálila*

<sup>1</sup> 'Liko alué Onorúgame Inolá abé najtékame nóchali nígame ju me'tigá alué santo ánjeli, 'liko 'we a'lá beniamé júkuru napu benirú napurigá tabilé siné a'ewa benia, napurigá tabilé we'kuawa i'kilimi, aminabi benisiwa. <sup>2</sup> Jaré ralámuli 'la e'wálekuru alué nulalí napu Onorúgame júlale o'tóriga alué santo ánjeli napurigá 'yámala alué Moisesi, 'lige jaré ralámuli sairúgame neraga mochílekuru, alueka wa'lú gastigo narele. Alué Esukristo nulalila abé a'wágame ju 'lige abé najtékame. <sup>3</sup> Tabilé e'wásigaká alué nulalí Esukristo nulalila, 'liko ramué abéchigo wa'lú gastigo narépua. Alué ralámuli napu akele Esusi ra'íchachi, alueka ramué ruyele. <sup>4</sup> Onorúgameka asíriga i'kirú 'sile napu ta'wesi rió gayéname ju la'siá, pe machíriniliga 'sile ye rejcholi 'we a'lá ko. 'Lige Onorúgame abiena júlale bo'né alawala napurigá ralámuli gu'írimala napurigá alué ralámuli 'we 'la sébali olámala napurigá bo'né Onorúgame najki.

<sup>5</sup> Onorúgameka tabilé júlale alué santo ánjeli jena wijchimoba napurigá jena nulame nímalá. Iligá júlale bo'né Inolá. <sup>6</sup> Regá aníme osádiru 'we 'ya:

Sineko napurigá bilé rió neraga newale alué bo'né Inolá,

'lige ramueka ta'mé a'wágame niru peka napurigá alué santo ánjeli.

<sup>7</sup> Pe u'kabi bamí e'yénale jena wijchimoba, ta'mé a'wágame nile, peka napurigá alué santo ánjeli.

A'kinana Onorúgame wa'lú a'walí 'yale bo'né Inolá

'we 'la niraga,

<sup>8</sup> 'lige ajchale Wa'lula neraga

napurigá bochígimi nulámala jena wijchimoba.

Jípeko tabilé nulanti káréke'é alué rió jena wijchimoba napurigá Onorúgame najkílege, <sup>9</sup> uché siné ku suwábaga se'wináriga nímalá. Napu'lige jena wijchimoba eyena ta'mé a'walí nígame nile peka napurigá alué santo ánjeli. Nobi jípeko bi'neli neyúriga wa'lú a'walí nígame júkó napugiti mukúligame 'lige ku ajániligame uchéchigo siné ramué gu'írimia. Onorúgame 'yale alué a'walí bo'né 'nátaga.

<sup>10</sup> Onorúgameka najki napurigá we'ká rió 'we a'lá sébali olame nímalá napurigá bo'né, alekeri a'rele napurigá Esukristo 'we resí ikimela, napurigá 'la sébali olame nímalá. Alué Esukristo 'we a'lá benile churigá nírgo ramué, 'lige alarigá 'la gainámala ramué gu'iria, 'lige ramué 'we a'lá gainawa oyeria

napu bo'né Esukristo nulá. Alueka bajchá 'we 'la sébali olálekuru, alekeri jípeko ramué gu'iria ajtúkuru. <sup>11</sup> Esukrístoka gatélekuru napurigá ralámuli a'lá sébali olámala napurigá Onorúgame najki. Alué ralámuli napu nocháni napurigá Onorúgame najki, alueka 'ma bi'lepi o'nógame nímalá, alueka Onorúgame 'kúchila nímalá. Alekeri Esusi tabilé chijúnáme ju ra'íchaga alué oyérame 'yuga napurigá bo'né bonila niraga 'lige napurigá bo'né wailatiri. <sup>12</sup> Esúsika regá anile: Ne ruyémala ne bonila 'lige ne wailatiri churigá ko Onorúgame, napu'lige napúsiga Onorúgame nila ra'ichali benimeá,

neka 'la wikarámala Onorúgame.

<sup>13</sup> Abiena anile:

Neka Onorúgame lisensia 'yámala napurigá ne'chí nulémala.

'Lige abiena anile:

Onorúgameka jaré ralámuli 'yáturu ne'chí napurigá repúmala ne alué ralámuli.

'Lige jípe alué ralámuli jena mochíkuru ne 'yuga.

<sup>14</sup> Onorúgame 'kúchilaka 'we resí nílime júkuru, alekeri Esukrístoka ralámuli gayénalekuru resí ikináliga alué ralámuli 'yuga. Napu'lige mukusá Esukristo 'lige ku ajánasa, 'ma umérale Remónisi. Remónisi 'ma tabilé nígame nile a'walí napurigá ralámuli me'limela. <sup>15</sup> Napu'lige Esukristo 'ma ku ajánasa, ralámulika 'ma tabilé majale suwiyá. 'Ma machile Esukristo 'ma umériligo alué Remónisi. <sup>16</sup> Esukrístoka pecha alarigá gu'írame júkó alué we'ká santo ánjeli, Esukrístoka ralámuli gu'írame júkuru alué napu 'we a'lá ganílga mochime ju Onorúgame 'yuga napurigá nílige Abraámi napu nílige ramué rijimela, alué Abraámi napu asíriga 'ya bejtégame nile.

<sup>17</sup> Esukrístoka a'chigóriga 'símili nílekuru napurigá ralámuli, napurigá Esukristo 'la námamala chiéna resí nilia mochiga alué ralámuli, 'lige napurigá 'la na'temámala aminami alué ralámuli napurigá balé wa'lula neraga. Alarigá 'we a'lá gayénale sébali olá alué nóchali Onorúgame tánilime napurigá Onorúgame 'la gu'írimala ralámuli. Alarigá bujélekuru chátiri 'nátili. Alué chátiri 'nátili tabilé a'reme ju ralámuli napurigá alué ralámuli simámala Onorúgame ajtígichi. <sup>18</sup> Esukrístoka 'we resí ikile napurigá ramué. Remónisi 'we nawime nile chátiri 'nátili 'yániliga alué Esukristo, pe iligá alueka tabilé siné umubáluru chátiri 'nátili na'taria, alueka bi'neli neyúralekuru. Alekeri Esukristo 'la gu'írame ju ramué.

## 3

*Jena ruwimela Esukristo abé najtékame ko me'tigá Moisesi*

<sup>1</sup> 'Emi ralámuli Onorúgame oyérame napurigá ne, napu 'we alá sébali olame ralámuli ju napurigá nulá Onorúgame, Onorúgame júlale Esusi napurigá ramué nuleme nímalá. Abiénachigó júkuru wa'lula balé neraga Onorúgame tánime ramué na'temaka. Alekeri 'we 'la na'tawa 'emi Esusi 'yuga alué napu benírimé ju ramué. <sup>2</sup> Esúsika nabí 'la sébali e'wale napurigá nulele Onorúgame. Alarigá nile napurigá Moisesi, Moisesi 'we alá e'wale napurigá nulele Onorúgame napurigá repúmala ralámuli Onorúgame oyérame. <sup>3</sup> Ramueka pe napurigá bilé galí nírukuru. Esusi newame júkuru alué galí. Alué galika ramué nírukuru. Alué bo'né bayékuru ramué napurigá 'la sébali olawa napurigá bo'né najkí. Moisesi pe nóchame nile. Esusi júkuru 'la bijchiá nulame. Alekeri 'la nirálime júkuru me'tigá Moisesi. <sup>4</sup> Bilé rió bilé galí newame júkuru, nobi Onorúgameka 'sile suwábaga newá. <sup>5</sup> Moisésika 'la sébali olale ralámuli repua napurigá bilé nóchame niraga. Alueka anele ralámuli napu Onorúgame anele churigá níмили nílige nujubá rawé. <sup>6</sup> Nobi Kristoka napurigá inolá niraga, 'we alá sébali nulame ju alé Onorúgame galílachi napu ramué niru alué galí. Ramueka Onorúgame oyérame niru tabilé guwana rusuka tabilé majaga, 'we alá na'tásaká ramué Onorúgame 'yuga mochiwa senibí. Alarigá ruilí ralámuli, tabilé chijúniga.

<sup>7</sup> Alekeri 'emi 'la alarigá e'wawa napurigá nulá Onorúgame Alawala. 'Ya we'ká bamí Onorúgame Alawala bilé rió gu'íriale napurigá osimela, regá anime:

Napu'lige 'emi akisá Onorúgame ra'íchachi, <sup>8</sup> 'la 'we alá e'wélime júkuru, tase alarigá niwa napurigá nílige 'ya epperégame 'emi rijimála napu'lige panápurí e'yéname nílige tabilé riógichimi,

alueka pecha e'wéleko Onorúgame, 'we chátiri 'nátame nílekuru, tabilé chéláme nílikuru Onorúgame 'yuga na'tálime.

<sup>9</sup> Alueka tajsiné ganíliga mochime nile Onorúgame 'yuga.

Onorúgameka oká liá bamí gu'íriale nobi alué ralámulika abirigáchigo sairúgame neraga mochíleko

Onorúgame 'yuga.

Onorúgameka 'we we'lí anáchale.

<sup>10</sup> Onorúgameka 'we ayoga asale alué ralámuli 'yuga,

'lige anele: «Alueka tabilé siné e'wáguru ne nulalila

'lige aminami tabilé siné námamala alarigá ko ne.

Alué ralámulika nabí se'nú bowé cha'pime ju 'we resítiri.»

<sup>11</sup> Alekeri Onorúgameka 'we ayoga a'wágame anéguru regá:

Alué ralámuli tajsiné narémala ne a'walila napurigá 'la ganíliga mochímala.

Pe a'bopi a'walílate na'támala.

<sup>12</sup> 'Emi 'la Onorúgame oyérame, 'we alá 'nata mochiwa, tabilé na'tawa Remónisi na'tálila, 'lige aminami tabilé sairúgame niwa Onorúgame 'yuga napu tabilé siné mukume ju. <sup>13</sup> Iligá abé 'la ju a'bopi beniá bilé rejcholi nabi rawé. Alarigá olawa bijí 'la gainalia. Alarigá nokísiwa 'nalina napurigá tabilé e'wewa Remónisi na'tálila, alueka cha 'yégame kame. <sup>14</sup> 'La aminabi oyégame nokisili ka alué ra'íchali napu benírilige Esukristo, 'liko 'we ganíliga mochiwa epperega pe alué Esukristocho 'yuga nátaga.

<sup>15</sup> Pe a'chigóriga ju napurigá osirúgame nile 'ya napu regá anile:

Napu'lige gepulia Onorúgame ra'íchálila tase alarigá nokiboa napurigá nokálige 'ya epperégame ralámuli jami e'yéniga tabilé ralámuli riógachi, 'we wakígachi.

Alueka Onorúgame saíla gayénale.

<sup>16</sup> 'Emi 'la machíguru chieri níligo alué 'ya epperégame, alué ralámuli israelita napu Moisesi buyánilige 'ya alé wa'lú gawí bo'ígichi Ejipto anilichí. <sup>17</sup> Onorúgameka 'we ayoga asale alué ralámuli 'yuga oká liá bamí. Alué ralámuli 'we cha nokale 'lige alé suwile alé 'we wakígachi napu tabilé 'wesi riógame nile. <sup>18</sup> 'Emi 'we alá néláleke 'we a'wágame anéligo Onorúgame alué ralámuli, alué ralámuli napu sairúgame neraga mochile Onorúgame 'yuga. 'Lige anile: «'Émika tajsiné nímalala ne a'walila napurigá 'la ganíliga epperélamala. Tabilé siné resibimála jena wijchímoba 'lige tabilé siné moinámalá rewagachi.» <sup>19</sup> Alueka pecha siné e'wáliga napurigá anile Onorúgame, alekeri 'la machirú tajsiné naréliga a'walí napurigá 'la ganíliga epperélamala. Pecha siné bijchígilime napu anile Onorúgame.

#### 4

*Jena ruwimela Esukristo a'walila gite e'yéniwilikó*

<sup>1</sup> Onorúgame 'la anele alué 'ya epperégame ralámuli a'walí naremio alué bo'né a'walila, jipe pe aba alué júkuru. Alekeri 'we alá 'nata mochiwa napurigá ye a'walite epperega mochímala 'emi. A'boi a'walílate mochíriká pecha 'la ganíliga mochíwagó. <sup>2</sup> Onorúgame nila ra'íchali jipe nerúgame napu ruyele ramué, 'we alá ruwí churigá ka ye a'walí, a'chigóriga napurigá ruyele Moisesi alué ralámuli napu alué 'yuga e'yénilige. Alué ralámulika 'we alá gepúlekuru nobi tabiléchigo e'wálekó. 'Liko alué ra'íchalika

tabilé nejkúrime nile. <sup>3</sup> Ramué 'la nareme ka alué Onorúgame a'walila 'lige aminami 'la e'wame, 'ma tabilé ejperéirukuru ramué a'boi a'walílate, pe iligá Onorúgame a'walílate ejperégame niru. Onorúgameka anele ralámuli napu ekí tabilé bijchígame nile:

Neka 'la anéguru a'wágame ayóniga alué ralámuli tabilé bijchígame, tajsiné naremio ne a'walila napurigá 'la ganíliga ejperélamala.

Onorúgameka asrígá 'la 'yáligituru a'walí alué ralámuli 'we 'ya ejperégame napu'lige napusi newale alué 'ya bajchá bejtégame rió. <sup>4-5</sup> 'We 'ya osirúgime regá anime:

Napu'lige Onorúgame gawí newasa usani rawé kachi, 'lige melénala resíbele.

'Lige Onorúgame anele alué rió 'ma tabilé nochamio bo'né a'walílate, pe Onorúgame gu'írímoríle alué nóchali nochálichí.

Ralámuli napu ekí tabilé bijchígame ju Onorúgame 'la gu'írímio, alué ralámulika tabilé siné narémala Onorúgame a'walila, tabilé siné resíbime ju Onorúgame 'yuga 'nata.

<sup>6</sup> Jaré ralámuli abé i'libeko bijchígimála 'lige aminami 'la narémala ye a'walí. Ralámuli 'we 'ya mochígame, pecha e'wálekó alué ra'íchali, tabilé narele a'walí. <sup>7</sup> Napurigá anílige Onorúgame 'ya jipe abiena najtígí. Onorúgame bajchá anele Moisesi 'lige 'we 'ká bamí a'kinana Onorúgame anele alué Moisesi rijimála Rabí anilime:

Jipe napu'lige akiá ne ra'icháilila 'la 'nátaga akíboa,

tase sairúgame neraga mochiwa napu'lige ne bilé ra'íchali ruwichi.

<sup>8</sup> Napu'lige sébilige alué ralámuli israelita alé gawichí Kanani anilichí napu Onorúgame 'yámorílige napurigá ejperélamala, alué wa'lula nulame napu Josué anilime nile, alueka tabilé 'ya a'walí napurigá 'we a'lá ejperélamala. 'La ma'chiná nérékuru tabilé 'yáligo a'walí Onorúgame, anile nujubá rawé 'yámoríle, a'ligé kulí narémili nile a'walí alué ralámuli. Tabilé narélekuru ye a'walí alé Kanánichí seba. Napu'lige 'la Onorúgame 'la e'wésigaká 'liko 'la narépuá alué a'walí. <sup>9</sup> Ralámuli napu ekí 'la bijchígime ju napurigá aní Onorúgame nila ra'íchali, alué ralámulika 'la narémili júkuru ye a'walí. Yeka pe aniname ju pe iligá 'we 'la ganíliga ejperélimio jena wijchimoba rekó 'we resí nilílie, 'lige aminami 'pa rewagachi a'chigórigachigó. <sup>10</sup> Ralámuli napu ekí Onorúgame a'walílate nóchame ju 'ma pecha a'boi a'walílate nóchame júkó, alueka Onorúgame a'walílate nocha mochíkuru. Napu'lige Onorúgame resíbale gawí newasa,

alueka pe tétali nile, ramuéchigó abiena resíbilime niru 'la narésiká Onorúgame Alawala. Resíbili aniaká, alueka pecha aniname kéréko kilí asagá resíbilime. Pe iligá aniname ju nóchame níligo Onorúgame a'walila gite. Alué a'walí gite tabilé 'we 'ká 'nátaga mochílime júkuru. Alarigá júkuru resíbili aniaká. <sup>11</sup> 'Liko pe iligá 'we a'lá na'tálime júkuru napurigá 'we a'lá e'wawa napu Onorúgame nulálige, tase sairúgame neraga e'yéniwa, tase napurigá alué ralámuli napu Moisesi 'yuga e'yénilige.

<sup>12</sup> 'La 'we a'lá na'tálime júkuru napurigá aní Onorúgame 'lige aminami 'la e'wálime júkuru. Onorúgame ra'icháilika 'we a'lá nejkúrime ju machiachi alieti 'nata mochírigo ramué, 'we a'lá 'nata mochírigo o tabilé a'lá 'nata mochírigo ramué. 'Lige abiena nejkúrime ju napurigá machiboa pala 'la ka alué ra'íchali o tabilé 'la kómá, 'lige aminami pala 'la tabilé che 'sika eyéname ko bilé rió o 'we cha 'sika eyéname ko. Onorúgame ra'icháilila ka napurigá bilé macheta 'we olame, alarigá ju, alueka 'ma rijpúname ju re'lémisi 'ma o'chílatiri e'nemia tachiri ajtigá re'lé alé o'chílachi. <sup>13</sup> Pecha 'wesi tábiri i'teko napurigá tabilé machimela Onorúgame jena wijchimoba nibilé 'pa rewagáchimi, Onorúgameka suwábaga machime ju bochígimi sa'pachí napu ekí ralámuli sa'pálachi ju. Bilé rawé Onorúgame gatémala a'pílipi ralámuli 'yuga. Bo'neka 'la machiame pala 'la sébali oláliga jena wijchimoba mochíga, pala 'la 'nátaliga o tabilé 'la 'nátaliga.

#### *Jena ruwimela Esukristo wa'lula balé ko*

<sup>14</sup> Onorúgameka suwábaga machíguru alarigá nírigo ramué, alekeri a'rílime júkuru napurigá nejkúrimala Onorúgame. Esusi Onorúgame Inolá ju, 'lige wa'lula balé niraga ju ramué 'yuga. Alué 'smi ramué gu'iria, alueka simile 'pa rewagachi Onorúgame tánimia napurigá ramué gu'iria asimela. 'La na'tálime júkuru, Esukristo 'la sébali olamio napurigá anílige. <sup>15</sup> Alueka asrígá 'la námame ju chonigá tabilé 'la sébali oliame ko ramué. Napu'lige jena wijchimoba eyénilige Esusi, Remónisika 'we neyúriniliga 'sile napurigá tabilé gainámala Esusi alué semati nóchali nocha, alekeri 'we a'lá machí Esusi alarigá nírigo ramué, pe iligá alueka tabilé siné che 'sile, napu'lige sébachi alué chátiri 'nátili Remónisi na'tálila, Esúsika abirigá 'la neyúrale. <sup>16</sup> Alekeri Onorúgame tániwa napurigá bi'wémala ramué nila 'nátili napurigá 'la gainawa nejkúrimitania Onorúgame tabilé majaga, 'liko Onorúgameka 'we na'temámala ramué. 'Lige Onorúgameka ramué gu'írimala napu'lige ramué 'we resí lálíchi.

## 5

<sup>1</sup> Ramué 'la benisúká napurigá nile alué israelita balela, 'liko 'la machibóliké napurigá nílige alué Esukristo. Alué baleka pe tétali nile ramué 'yuga napurigá ramué 'la beniboa 'lige námupua alarigá 'sligo Esukristo. Alué ralámuli israelítaka 'yale nóchali jaré alué a'boi ralámuli israelita napurigá balé neraga mochímala. Alué baleka Onorúgame tánime nile napurigá Onorúgame 'la gu'írimala alué ralámuli. Alueka Onorúgame kógime nile go'ame alué uché jaré ralámuli a'pálila. 'Lige abiena Onorúgame kógime nile alué ajágame sa'pala napurigá 'la bi'ígame sulégame nímala alué ralámuli. <sup>2</sup> Alué balé pe ralámuli nile 'lige abienachigó pe i'nílige járome nile, pe apiépiri ralámuli nílige. Alekeri 'we 'la machime nile churigá nokame ko ralámuli, 'lige alekeri 'we na'tamame nile. <sup>3</sup> Alekeri bilé balé bilé ajágame me'ame nilekuru Onorúgame kógimia alué gastigo najtétimia alué bo'né balé cha 'síkiriká. Alarigá 'sile ralámuli ku bi'wigá napu'lige cha nokisá, 'lige bo'né abienachigó alarigá 'sime nile bi'winálige bo'né cha'sisa.

<sup>4</sup> Onorúgame bo'né 'símili júkuru ye nóchali 'yaa bilé rió napurigá alué rió balé neraga nochámala. Bilé rió bi'nélíka pecha gainámili júkó ye nóchali nocha. Alarigá kéturu bajchá ajtíggame balé Aroni anilime. Onorúgame 'sile alué rió wanapia nóchali 'yamia 'we 'ya asírige we'ká bamí. <sup>5</sup> Pe a'chigóriga júkuru Kristo 'yuga, Onorúgame 'yale nóchali Kristo napurigá gu'írimala ramué a'chigóriga napurigá wa'lula balé. Alué bo'neka pecha bo'né 'nátaga nóchago. Onorúgame 'sile regá anea:

Mué júkuru ne Inolá,  
jípeko ye nóchali 'yámala ne mué  
napurigá nochámala mué ye nóchali 'we na-  
jtékame.

<sup>6</sup> Onorúgame abiena regá anele:  
Mué nochálilaká senibí nerúmili júkuru  
napurigá alué balé napu Melkísare anilime  
nile

'we 'ya ajtíggame.\*

<sup>7</sup> Napu'lige jena wijchimoba asagá alué Esusi, naláeturu 'lige aminami e'wele sináturu Onorúgame tániga tabilé mukunálige. 'Lige Onorúgame 'wéchigo 'la 'nátaga asame nílíko, Esusi nabí 'la e'wame nílíggame.

<sup>8</sup> Pe Onorúgame Inolá nilekuru kaka nobi abirigáchigo resí ikimeli nilekó 'lige e'wámili nilekuru suwábaga napurigá nulele Onorúgame. <sup>9</sup> Esúsika suwábaga e'wale napu ekí Onorúgame nulálige, 'lige ralámulika 'la machile Onorúgame 'yálige nóchali napurigá balé nímala 'lige aminami napurigá ralámuli

gu'írame nímala. Suwábaga ralámuli napu ekí 'la e'wele Esukristo 'ma sebámili nilekuru 'pa rewagachi napurigá Onorúgame 'yuga mochímala nabí. <sup>10</sup> Onorúgameka 'yale nóchali alué Esusi napurigá wa'lula balé nímala napurigá Melkísare anilime balé.

*Jena ruwimela 'la 'nátaga mochílime ko napurigá tabilé guwana rujsúpua*

<sup>11</sup> Asírige we'ká nerúkuru napurigá beníriwa ramué 'emi, pe iligá 'emi 'we 'i'kilí benime ju, tabilé yati benime ju 'emi ye ra'íchali, alekeri tabilé gayena ne rekó we'ká benírimia olae. <sup>12</sup> 'Émika 'ma ejobénigame niti kékuru Onorúgame ra'ichálila beníriga ralámuli, nobi tabiléchigo 'cho 'la benígó 'emi. 'Émika bijí rokárékuru napurigá benimela bajchá enágame rejcholi Onorúgame nila. Pecha alarigá niti kékó. Aminabi oyérilime júkuru, uché rajpé aminabi beniamé júkuru. 'Émika pe napurigá bilé u'tá alarigá júkuru, bijí chí'ime niraga, tabilé 'cho go'yame sa'pá. <sup>13</sup> Tabilé 'cho námame bijí alué 'la bijchiá ra'íchali, alué ra'íchali napu 'la gu'írame ju ralámuli napurigá alué ralámuli sébali na'támala Esukristo 'yuga. <sup>14</sup> Alué 'la nabí oyérame ka 'lige e'wame, alueka 'la gainámili júkuru namia ye chieri 'we a'lá ka 'lige chieri tabilé a'lá ka.

## 6

<sup>1</sup> Asírige 'la júkuru napurigá 'la sébali olame ralámuli gainawa, alekeri tabilé 'la ju we'ká na'talia alué rejcholi napu bajchá beniruge churigá nimio Kristo. Iligá abé 'la ju na'talia napurigá 'la sébali olame rió niwa. Alué bajchá enágame rejchólíka pe júkuru churigá gatétiká Onorúgame 'yuga napu'lige chíbi nokisuga (napurigá tánime ju e'kali bilé towí bo'né o'nola), 'lige aminami napurigá ku a'lá Onorúgame oyériwa. <sup>2</sup> Tabilé we'ká na'tawa churigá rewarátiká, o churigá 'yóatiká, o churigá ku ajánamala bilé ralámuli mukusá. 'Lige tabilé we'ká na'tawa churigá ka alé injiérnochi. <sup>3</sup> 'We a'lá na'tásiga 'la nímala ke napurigá 'la sébali olame ralámuli niwa. Alarigá na'tawa, 'la elásaká Onorúgame.

<sup>4</sup> Ralámuli 'la gepúsaká alué 'la bijchiá ra'íchali Esukristo ra'ichálila, 'lige naresa alué 'we semátiri napu nejime ju Onorúgame Alawala alué oyérame 'yuga, <sup>5</sup> 'lige 'la námasa aliena 'la semati ka Onorúgame ra'ichálila, 'lige aminami Onorúgame 'la gu'írísá bilé rió, <sup>6</sup> 'lige ku guwana wijchísá alué ralámuli, 'liko alueka tajsiné tánimala e'kali Onorúgame. 'Liko alueka nabí sairúgame neraga einámala alué Onorúgame

\* 5:6 Tabilé machirú churigá 'la balé gayénilige ye rió Melkísare anilime, 'lige tabilé machirú chukílige alué rió. Yeka pe tétali ju napurigá ralámuli 'la benimela alué Esukristo nochálila ka tajsiné suwibamio. E'nesí Salmos 110:4.



Inolá 'yuga. Alué ralámulika pe a'chigóriga ju napurigá alué ralámuli napu Onorúgame Inolá me'álige gulusichi ujchagá, 'lige asíriga chátiri ra'íchale ralámuli alué olagá. Uchéhigo siné alarigá nímala mué chojkila gite, ralámuli 'we cha animela gawelia alué Esukristo olagá. <sup>7</sup> Ralámuli 'la e'wásaká alué rewagáchika nawágame 'yuga, 'lige 'la naresa alué nejkúruli napu nejime ju Onorúgame, 'liko 'la e'wámala napurigá najkí Onorúgame. Alué ralámulika pe napurigá bilena asarachi alarigá ju napu 'we 'la u'kume ju, 'we 'la semáriga ilime kárigó echerúgame. <sup>8</sup> Ralámuli napu ekí tabilé e'wame ju napu Onorúgame najkí tabilé a'ká ralámuli ju, siné kachi Onorúgameka 'ma ma'chige buinámala. Alué ralámuli ju napurigá bilena asarachi tajsiné rakeme rekó echiae, pe wejchacho buyame ju alé, 'lige 'ma e'kósilime ju. Alarigá ju alué ralámuli. Alarigá ju ye tétali.

*Jena ruwimela Onorúgame 'la sébali olame ko*

<sup>9</sup> Ye ra'íchalika 'we a'wágame ju, nobi 'émika 'wéhigo machirume júkó, alekeri ramueka 'we galilía 'emi, 'we a'lá bijchiá ju 'emi 'la narémala alué 'we 'la semátiri nejkúruli napu Onorúgame 'yámili ju alué ralámuli napu ma'chí buyánale alé chátiri bowechi. <sup>10</sup> Onorúgameka 'we a'lá sébali olame ju. Alueka tajsiné we'kuámala alué 'we semátiri 'nátili napu 'emi 'we a'lá sébali olame ju. 'Lige abiena tabilé we'kuámala napu'lige 'emi uché jaré ralámuli gu'írichi. Napu'lige 'emi gu'írichi uché jaré ralámuli, 'la machiáguru 'emi 'we galeo Onorúgame. <sup>11</sup> Najkiá'é napurigá 'emi aminabi nokísimala ralámuli gu'iria, 'lige abienachigó benigá nokísiwa napurigá Onorúgame gu'írame ju alué bo'né oyérame. 'La benigá nokísiwa napusi suwirú. Alarigá 'la bijchiá sebámala 'emi napu ajtí Onorúgame. <sup>12</sup> Tase najsínakuli niwa, aminabi asíriga 'la benieme júkuru. A'chigóriga nokiboa 'emi napurigá alué ralámuli napu 'we semáriga benia móchi napu anílige Onorúgame 'ya. Alueka 'we a'lá bijchigame ju 'we a'lá sébali olamio Onorúgame, alekeri 'we a'lá i'kililí buwé alué ralámuli napurigá Onorúgame 'we a'lá sébali olamiorlíge.

<sup>13</sup> Napu'lige Onorúgame anélige Abraámi gu'irimiorlíge alué bo'né rijimala napu a'kinana mochigame nílege (napu Esusi nílige), alué bo'né anile 'la sébali olámorile nabí napurigá anílige. Pecha it'é ko uché bilé Onorúgame napurigá tániwa bilé nejkúruli. <sup>14</sup> 'Lige Onorúgame anele alué Abraámi: «'We 'la bijchiá ju ne 'la nejimio

napu mué resi la, 'lige aminami mué upila ranélamala bilé towí napurigá alué we'ká 'kúchigame nímala mué rijimala.»\* <sup>15</sup> 'Lige Abraámika we'ká bamí buwele. Alueka 'we a'lá machile 'la bijchiá nimio, Onorúgame 'we 'la sébali olamio napurigá anílige, 'liko 'la bijchiá sébali olale Onorúgame napu anílige. <sup>16</sup> Napu'lige bilé rió 'la sébali olámorisá, tánime ju Onorúgame napurigá 'we e'negá asimela pala 'la sébali olara, alarigá gateme ju 'láchigo machieme Onorúgame 'la e'negá ajtigó. <sup>17</sup> Napu'lige Onorúgame olámorisá bilé nóchali 'lige ralámulika 'la machime ju Onorúgame 'la sébali olámorisá, pecha 'wesi i'tega Onorúgame anágame, 'lige bo'né Onorúgame 'la e'negá asimela. <sup>18</sup> Onorúgameka pecha guwana wijchime júkó napu anílige, pecha siné se'wináriga 'sime júkó, Onorúgameka aba alarigá ajtime júkuru, 'lige asíriga 'la ju nabí. Napu'lige Onorúgame gatele bilé ra'íchali ralámuli 'yuga, 'la na'tárite churigá níliga bo'né Onorúgame. Alarigá anile napurigá ramué tabilé guwana rujsúpua, ramueka 'yamíguru alué 'we semátiri 'nátili napurigá 'la ganíliga ejperélawa Onorúgame 'yuga nátaga. <sup>19</sup> 'La mochínalisiká Onorúgame 'yuga, pecha ku guwana rujsúpuagó. Aminabi 'la o'wé e'náboliké napu Onorúgame ajtí. Tabilé e'yéniwa panápurimi napurigá bilé bulito tabilé chérigame. Alé wa'lú re'obachi, Esusi 'ma bajkile alé napuchami napu chujkule alué chiní alé napu ajtí Onorúgame. Alarigá 'sile ramué gu'íriga. <sup>20</sup> Alué Esukristo ju alué wa'lula balé napu gu'írame ju ramué napurigá alué balé Melkísare anilime. Nabí alarigá nímala.

## 7

*Jena ruwimela Esusi níligo napurigá alué balé Melkísare*

<sup>1</sup> Ye rió Melkísare anilime wa'lula rey nile alé we'ká riógachi Salemi anilichí, Onorúgame 'yale nóchali napurigá balé nímala alué rió, Onorúgame re'pá ajtigame napu suwábaga nulame ju. Ye rioka simile Abraámi najtepamia napu'lige alué Abraámi 'ma kuka enágichi neyúrasa nejkoga alué uché jarela rey 'yuga 'lige sontálotiri. 'Lige alué Melkísare anilime balé 'we tánale Onorúgame napurigá Onorúgame wa'lú a'walí 'yámala alué Abraámi. <sup>2</sup> Liko alué Abraámika 'yale alué Melkísare we'ká e'karúgame napu nejkoga mele alué Abraámi.\* Melkísare aniáká pe anieme ju «'we 'la semáriga nulame ju alué wa'lula.» Alué wa'lula rey napu alé Salemi bejtégame nílige aniáká pe anieme ju «napusi nula alué rió alé si 'we 'la ganíliga mochí ralámuli,

\* 6:14 E'nesi Génesis 22:17.

\* 7:2 Abraámi makué peso mésaka, bilé peso 'yale Melkísare.

tabilé chélagá.»<sup>3</sup> Tabilé machirú chieri níligo alué Melkísare o'nola, 'lige tabilé mochrú chieri níluga alué eyela, 'lige aminami tabilé machirú koche ochérigame níligo, nibilé machirú a'lige mukúligo tabilé mukúleger ma. Alué Melkísare nile napurigá Onorúgame Inolá, alueka senibí balé nímili nilekuru. Alarigá nile ye tétali.

<sup>4</sup> Alué 'ya bejtégame rió Abraámi ebreo ra'íchame nile. 'Ya bajchako ta'chó ochérachi Abraámi tabilé mochígame nile ralámuli ebreo ra'íchame. Alekeri 'we najtékame nile alué Abraámi, 'lige napu'lige Abraámi 'yale we'ká e'karúgame Melkísare, yeka pe aniamé ju Melkísare abé wa'lula níligo me'tigá alué Abraámi. <sup>5</sup> 'Lige abiena abé wa'lula nile alué we'ká balé nuleme alué napu Lebí rijimala nílige. Alué Lebí pe Abraámi rijimala nile napu a'kinana bejtégame nile. Alué we'ká balé abiena narele pe tabé napu alué uché jaré ralámuli israelita nóchiga mélige. Alarigá nuleme Moisesi alué ralámuli. <sup>6</sup> Ye Melkísare tabilé rijimala nile alué Lebí napurigá balé nímala, tabilé alarigá nóchale napurigá alué balé Lebí rijimala. 'Lige Abraámika abirigá pe u'tá 'yale alué méligame nejkoga, alueka 'wéchigo 'la machíligame wa'lula nílige. 'Lige Melkísare 'sile Onorúgame tania napurigá a'walí 'yámala Abraámi. Abraámika tabilé tánale Onorúgame napurigá Onorúgame a'walí 'yámala Melkísare. Yeka anime ju alué Melkísare abé wa'lula níligo me'tigá alué Abraámi. <sup>7</sup> Alué napu tani napurigá Onorúgame 'yámala a'walí uché bilela, alueka abé wa'lula ju, 'lige uché bilela ka u'tabela ju. Suwábaga machiáguru ye. <sup>8</sup> Alué balé napu Lebí rijimala nílige 'la nóchale 'lige a'kinana suwile, nobi alué Onorúgame nila ra'íchalika tabiléchigo siné che anígó mukúligo alué Melkísare. 'Liko alué Melkísare pe tétali nile churigá sebamio bilé rió a'kinana we'ká bamí kachi napurigá senibí asimela. <sup>9-10</sup> Ye rió Lebí anilime we'ká bamí asale a'kinana alué Abraámi mukusá, Abraámi rijimala nile alué Lebí. Tabilé 'cho ochérale alué Lebí napu'lige Abraámi 'yuga ra'íchale Melkísare 'yuga. Abraámika pe u'tá 'yale alué Melkísare, alueka 'yálime káréleku alué Lebí alué Melkísare, rekó ta'chó ochérachi kachi alué Lebí, napugiti alueka rijimala nímala alué Abraámi. Pe aniamé ju Melkísare abé wa'lula níligo me'tigá alué Lebí.

<sup>11</sup> Alué balé Lebí rijimala 'la a'walí níggame nísaká ralámuli gu'irilime napurigá alué ralámuli 'la sébali olame nímala, 'liko pecha uché bilé balé asimé ko napurigá Melkísare ralámuli gu'iria. <sup>12</sup> Najkísúká uché bilé

se'winátiri balé 'liko uchéchigo bilé se'nú nulali nuebo nerúlamala. <sup>13</sup> Alué nuebo baleka tabilé Lebí rijimala nímili nile, alueka pe Jurá rijimala nímili nile.† Alué Jurá rijimala tabilé siné nóchale balé niraga alé u'tá re'obachi wi'chite newarígime napu «tabernákulo» anilime nile. <sup>14</sup> Alué Wa'lula Esukristo Jurá rijimala nile. Moisesi tabilé siné che anile balé nimio alué Jurá rijimala, alekeri 'la machirú nuebo ko suwábaga ye ra'íchali.

<sup>15</sup> Alué napu 'sika eyénale alué Melkísare, Esusi abiénachigó alarigá nile, tase napurigá alué balé Lebí rijimala. <sup>16</sup> 'Liko alué Esusi tabilé balé nile pe Lebí rijimala kóriá, pecha Lebí rijimala níligo, alueka balé nilekuru napugiti 'wéchigo a'wággame nílige, tabilé 'wesi umérale. 'Lige tabilé siné cha'sile. <sup>17</sup> Aka regá anime osálige' é alué Rabi 'we 'ya: Mueka balé ju senibí a'chigóriga napurigá Melkísare.‡

<sup>18</sup> Alué nulali napu balé niga mochílige alué Lebí rijimala, alueka ta'mé wa'lú a'wali níggame nile. <sup>19</sup> Alué nulali Moisesi nila tabilé 'me nejkúrale napurigá 'la sébali olame nímala alué ralámuli. Onorúgame gu'irile alué ralámuli chéchigo siné se'wináriga Esusi júliga, abé 'la gu'irile napurigá 'la sébali olame ralámuli nímala napurigá 'la Onorúgame 'yuga mochímala.

<sup>20</sup> Napu'lige gatele alué 'nátali chebilé nuebo, suwábaga Onorúgame a'walílate gatele. Onorúgameka anile nabí e'negá asiméoríle 'lige repuka. Onorúgame 'we a'lá anele ralámuli 'we a'lá sébali olámiorile napurigá anilige kulí siné. Onorúgameka tabilé che anele napu'lige balé gayénichi alué Lebí rijimala. <sup>21</sup> Onorúgameka anile bo'né 'we 'la nochámili ko alué nuebo balé nochámili napu Esukristo anilime ju. Onorúgame anile:

Neka 'we 'la sébali olámoriéturu,

'liko abirigá sébali olámala ne.

Mué ne Inolá, mueka napurigá balé ju,

alarigá nejkuria asimela mué senibí. §

<sup>22</sup> 'We a'lá machiáguru ye etega alarigá 'síligo Esusi. 'Liko 'la machiáa ye 'nátali nuebo kulí ma'chínigame 'we a'lá ko me'tigá alué abé 'ya nerúgame. <sup>23</sup> Alué 'ya nerúgame 'nátali nerúgichi we'ká balé mochile jena, aba alarigá nímili nilekuru, napu'lige bilé mukusá uchéchigo bilé balé asíbame nímala. <sup>24</sup> Esúsika nabí bejtégame ju, alekeri tabilé uché bilé balé asíbalekuru. Alué bo'né nila nóchali balé neraga nochálime tajsine suwíbame ju. Alué Esusi senibí bejtégame nímala. <sup>25</sup> 'Liko nabí asimela buyana alué resítiri alawégame ralámuli alé resítiri bowechi napu'lige táachi ralámuli. 'Liko Esukristoka nabí tániguru

† 7:13 Alué Jurá tase alué Jurá ju napu Esusi nejile. Alué Jurá 'we 'ya bejtégame nile. ‡ 7:17 E'nesi Salmos 110:4.

§ 7:21 E'nesi Salmos 110:4.

Onorúgame napurigá ramué gu'írimala, napurigá 'la sébali ralámuli niwa ramué.

<sup>26</sup> Yeti balé resí láléturu ramué. Alueka 'we 'la sébali olame ju. Tabilé chátiri nóchame ju, 'lige aminami tabilé chátiri 'nátame ju. Alueka nabí Onorúgame 'yuga ajtime ju. <sup>27</sup> Uché jaré baleka nabí rawé me'limeli nilekuru ajágame resí nokigá járame kóriká a'boi ralámuli, 'lige aminami uché jaré ralámuli. Esukristoka tabilé alarigá nóchale. Alué bo'né mukúlekuru napugiti 'wéchigo resí nokigá járame nílgame ralámuli. Alueka tajsiné mukumeli júkuru uchéchigo siné, Esukristoka nibilé me'limeli júkuru bilé ajágame. <sup>28</sup> Alué 'ya mochígame baleka napu Moisesi ajtilige pe iligá ralámuli nilekuru pe napuyépiri neraga 'we resítiri, tabilé wa'lú a'walí nígame, 'lige nujubá anile Onorúgame bo'né ajchámorile bo'né Inolá napurigá wa'lula balé nímala. Onorúgame 'we a'lá gu'írile napurigá 'la sébali olame nímala, napurigá 'la gainámala senibí alué nóchali newá, alué napu 'we resí lalía ramué.

## 8

*Jena ruwimela Esusi aniligo abé 'la sébali olamio alué ya nerúgame ra'íchali*

<sup>1</sup> Alué napu ne ruinali, ye júkuru: Alué ye wa'lula balé napu jipe ajti asíruga 'la balé ju, alueka nabí si ajtime júkuru Wa'lula Onorúgame 'yuga nulá wajtoná napu ajti Onorúgame. <sup>2</sup> Alueka tabilé alarigá ju napurigá jemi mochígame balé, aminami tabilé ralámuli newalila re'obachi nóchame ju, alueka Onorúgame 'yuga nóchame ju nabí 'pa rewagachi. <sup>3</sup> Jena wijchimoba mochígame balé we'ká e'karúgame kógile Onorúgame. Esúsika tabilé we'ká e'karúgame kógile Onorúgame, iligá pe bo'nepi mukule Onorúgame kógimia. <sup>4</sup> Jipe jemi einásaká alué Esukristo, pecha nochámikó alué nóchali napu nóchame ju alué balé jena jipe. 'Ma we'ká balé ju napu kógime ju bilé ajágame mukúgame bi'weme kórigá chátiri 'nátili napurigá nulame ju alué nulalí Moisesi nila. <sup>5</sup> Alué u'tá re'obá wi'chite newárigime napu tabernákulo anilime nile napu nóchame nile alué balé, alueka pe tétali ju churikáreko alé 'pa rewagachi napu Onorúgame ajti. Alekeri napu'lige Moisesi re'obá newale wi'chite, Onorúgame anele: «'La 'we a'lá 'nátiga newawa alué nóchali re'obá newá, 'la alarigá newawa napurigá ne mué benírige napu'lige napuíka mochírige alé wa'lú rabó.» <sup>6</sup> Alué Esusi nochálila ka asíruga a'lala ju me'tigá alué balé nochálila jena wijchimoba mochígame. 'Lige alué ra'íchali napu Esusi gatélige abé 'la ju me'tigá Moisesi gatélala. Onorúgameka anile Esusi abé 'la semáriga gu'írímio ralámuli.

<sup>7</sup> Tabilé rokárélasaká alué ra'íchali gatélime Moisesi nila, 'liko 'we 'la sébali nitékuru napu nokame ju balé. <sup>8</sup> Onorúgameka anile tabilé sébali nílgame alué gatélime. Rekó ralámulika 'we semáriga noche alé re'obachi, Onorúgameka etele alué ralámuli tabilé 'la sébali olachi, alekeri Onorúgame anele ralámuli:

Uché bilé ra'íchali gatémala ne suwábaga alué ralámuli Israeli ejperégame 'yuga

'lige Jurá ejperégame 'yuga.

<sup>9</sup> Ye ra'íchali tabilé alarigá nímala napurigá 'ya

napu'lige buyánilige ne alué ralámuli

alé wa'lú gawí bo'ígichi Ejipto anilíchi.

Neka napurigá bilé rió sekachí cha'pigá enágame bo'né inolá,

alarigá simituru ne alué ralámuli israelita 'yuga.

'Lige alueka tabilé e'wáturu ne ra'íchali ruwichi,

alekeri a'réturu ne.

<sup>10</sup> Alué ra'íchali napu ne gatémolálige ralámuli israelita 'yuga

alarigá nímala:

Pachágana asimé ne a'pílipi ralámulichi

'lige gu'írimala ne oyérilíchi napurigá ne nulá.

'Liko ne 'yuga mochímala alué ralámuli,

'lige alueka ne 'kúchila nímala

'lige pe ne'chí si na'támala.

<sup>11</sup> 'Liko alué ralámuli 'ma tabilé ruyémili ju uché jaré ralámuli

chieri ko ne,

suwábaga alué napu ekí narékame ju ne nila 'nátili

'la machimela ne'chí,

tabilé chéré rekó e'wélala ke 'lige rekó pe nóchame ke.

<sup>12</sup> Neka 'la e'kámala ke cha nokogá járome.

'Ma e'kásaká,

'ma tabilé nélémala ne alué chátiri 'nátili alué ralámuli nila,

neka 'ma 'la e'kágempá.

<sup>13</sup> Napu'lige Onorúgame nuebo korichi ye ra'íchali, pe ruwime ju alué 'ya nerúgame ra'íchali 'ma o'chérame ko. Alué 'ya nerúgame ka 'ma 'la sébali oláguru napurigá Onorúgame najki.

## 9

*Jena ruwimela alué re'obá wi'chite newárigime pe tétali nílgame churigá 'la sebawa ramué napu Onorúgame ajti*

<sup>1</sup> Ruimé ne churigá nílgame alué Moisesi nila ra'íchali gatélime. Ye ra'íchali ka ruyame nile churigá nílgame alué re'obá wi'chite newárigime napu newale alué ralámuli 'lige churigá tániwa e'kali Onorúgame alé re'obachi. <sup>2</sup> Alué re'obaka 'yérigame koriá

pe bilé chiní chujkúgame nile alé yochi, 'lige abé pachaka uchéchigo bilé chiní chujkúgame nile napurigá okaná nímala alé pachá. 'Lige pe u'kabi tábiri nerúgame nile alé pachami, alé yochi na'pachá alémika bilé kantelabro anilime ilile. 'Lige bilé mesa ilile baní mochíala, alué banika Onorúgame kógilime nile. Alé nóchale alué we'ká balé.<sup>3</sup> Alé abé 'na pacháká abé najtékame nile, aléká Onorúgame nawame nile. <sup>4</sup> 'Lige aléká bilé mesa ilile 'órote newárigime napu o'kuí molélachi nile. 'Lige aminami bo'ile bilé gajoni 'oro ujhérigame. Napu'lige Onorúgame 'yale nulalí, nulele napurigá newámala ye gajoni. 'Lige alé pachágana bilé sikolí ilile 'órote newárigime, 'lige alué sikolí pe u'tá go'ame ajchágame nile Onorúgame nejílala napu'lige e'yénilige alué ralámuli israelita alé 'mi wakígachi tabilé 'wesi riógachi. (Maná anilime nile alué go'ame.) 'Lige abiena bo'ile bilé gujsí resola Aroni nila, alué Aroni napu Moisesi ba'chila nile. Napu'lige alué Aroni ye resola o'ká ilígichi, Onorúgameka 'nátale napurigá ye resola yati 'yámala. Alué gujsika pe wakígame nile sineko, abirígáchigo 'la yáleko. (Yeka pe tétali nile Onorúgameka alué Aroni wanápale napurigá balé neraga nímala.) Abiena mochile oká rejté i'chibérigime i'pichí nerúgame napu Onorúgame osálige nulalí. <sup>5</sup> 'Lige oká napuyeri santo ánjeli chojkóbisiga mochile alé amoba gajónichi, alué napu Kerubini anilime nile. 'Lige alué gajónika 'ma na'pólide alué santo ánjeli a'nalate. Alueka pe ruwime nile alé ajtigó Onorúgame. Alé nabí bamigá ba'chímame nile elá alué wa'lula balé napurigá Onorúgame e'kámala ralámuli. Jípeko 'ma tabilé we'ká ra'ichámala ne churigá ka alué re'obá wi'chite newárigime.

<sup>6</sup> Napu'lige kulí siné newáleru ye re'obá, baleka nabí rawé mo'ime nile alé pachá nochamia, alé napu tabilé asale Onorúgame. <sup>7</sup> 'Lige alé abé na'pachá napu asale Onorúgame, aleka pe bilé wa'lula balecho bajkime nile. 'Lige bilé bamí pe si'nepi bajkime nile alué balé. Napu'lige alé bajkiá, elá o'tome nile bilé ajágame elalá, Onorúgame kógimia. Alueka elá kógile napurigá 'la e'kámala Onorúgame alué wa'lula balé resítiri sulégame bi'wináliga. 'Lige abiénachigó kógile elá Onorúgame alué we'ká ralámuli bi'wigá napu'lige alué ralámuli tabilé machile cha nokáligo a'boi.\* <sup>8</sup> 'Lige alarigá alué Onorúgame Alawala ruwime nile tabilé 'cho 'la néléligo churigá 'la sebawa napu ajti Onorúgame. (Moisesi nulalila gite, tabilé sébale ralámuli napu Onorúgame ajtíle. Napu'lige bijí ilígichi

alué re'obá wi'chite newárigime, ralámuli tabilé mo'ime nile alé pachami napu asale Onorúgame napu'lige Esusi sebasa 'lige gatele.) <sup>9</sup> Yeka pe bilé tétali nile rekó go'ame kógile Onorúgame, tabilé bi'weme nile alué chátiri 'nátíli. <sup>10</sup> Alué 'yasi nerúgame ra'ichalika, alueka pe go'ame ra'ichame nile 'lige alué bajílime 'yúriga 'lige alué rewarálime ba'wichí bochígimi bokuíka. Tabiléchigo bi'ime níliko bo'né alawala rekó go'ame kógile Onorúgame rekó ba'wichí bokuíka rewarage. 'We najtékame nile napusi sébale alué nuebo 'nátíli. Alué nuebo 'nátílika, alueka ra'ichame nile churigá bi'wétiká alawala, 'lige aminami churigá 'la na'tátiká alué 'we a'lá 'nátíli napurigá a'rewa alué chátiri 'nátíli.

<sup>11</sup> 'Ma sébakuru alué Kristo, jípeko wa'lula balé júkuru semáriga nejkúrimo. Alueka tabilé bajkimeli nile alé re'obachi alué re'obá ralámuli newálila. Alueka bajkilekuru ramuechi. Napu simile alué, tabilé jena wijchimoba ju napu ajti Onorúgame. Alé napu bajkile abé najtékame ju, me'tigá alué re'obá wi'chite newárigime. <sup>12</sup> Alueka pecha me'áleko chibá nibilé besero 'pa Onorúgame ajtigíchi sebamia. Alueka bo'né mukúlekuru ralámuli gu'iriga. 'Lige jípeko tajsiné mukumeli júkuru. Jípe ralámuli 'la bijhígisaká napurigá 'silige alué Kristo, 'liko alué ralámuli 'ma a'rémili júkuru Remónisi na'tálila. Tabilé siné Remónisi 'kúchila nímala uchéchigo siné. <sup>13</sup> Alué 'ya nerúgame 'nátíli bilé rió bilé tábiriti chébase bilé ajágame mukúgame o bilé ralámuli mukúgametiri, alueka pe asiriga tabilé 'la nile, 'we resítiri alawégame nílipe, 'lige tabilé elíliro re'obachi bajkichi. Napu'lige alué balé bachímase elá uchéchigo siné a'lige kulí bajkime nile alué rió. Alué baleka roló elalá bachímame nile 'lige abiénachigó chibá elalate bachímame nile, 'lige aminami besero e'kósirigame najpisólate, alueka ba'wite ba'rárigame nile, 'lige† abiena bachímame nile. Yeka pe bi'wélime nile napurigá a'lá mo'imela alé pachá re'obachi. Tabilé nile napurigá 'la bi'wewa 'nátíli. <sup>14</sup> 'La nejkúrimo nísaká alué ajágame me'liá, jípeko abéchigo 'la nejkúrimala alué Kristo mukúligame gulusichi chujkugá. ¡Bo'nepi 'yale Onorúgame bi'wéniliga ramué na'tálila resítiri 'nátíli napurigá ta cha'piboa resítiri bowé, napurigá oyérawa alué 'la bijchiá Onorúgame! Alué Onorúgame Alawala, alué napu tasiné mukume ju, alueka gu'irile alué Kristo napurigá bi'wémala ramué alawala.

<sup>15</sup> Alué Kristo ju gateme napurigá Onorúgame gu'irimala alué ralámuli napu bo'né wanápale napurigá 'pa rewagachi

\* 9:7 Alué go'ame napu kogi Onorúgame tabilé nile napurigá go'mela Onorúgame, Onorúgameka tabilé go'yame ju. Pe bi'weme nile chátiri 'nátíli. † 9:13 E'nesi Números 19:9.

mochímala senibí napurigá anílige 'ya bo'né Onorúgame. Napu'lige mukule alué 'pa rewigáchika nawágame, 'we 'la gatesa a'rele napurigá alué ralámuli 'la buyásimala alé chátiri bowechi cha nokáligame napu'lige bijí nerúgichi alué 'ya nerúgame ra'íchali napu Moisesi a'rélige. <sup>16</sup> Ralámulika suwimeli júkuru napurigá narémala alué 'kúchila alué tábiri napu a'rele alué newúkúgame. Napu'lige ramué suwisá alué ramué 'kúchila nachuámili ju ramué nila e'karúgame. Ramueka bajchá suwiboli júkuru. <sup>17</sup> Alué apeli newárigime napu ruwime ju tachiri nachuwámili ju alué 'kúchila tabilé najtékame ju tabilé 'cho mukuchi alué o'nola 'lige eyela napu jsilige newá, 'ma mukusá ko 'liko 'la najtékame ju alué apeli newárigime. <sup>18</sup> Pe a'chigóriga ju ye napu'lige kulí siné me'lílirige ajágame Onorúgame 'yamia. <sup>19</sup> Napu'lige Moisesi 'ma ruisá chieti níliga alué nulalí napu Onorúgame nejilige, jaré rojá sawala 'wile isopi anilime rewégame nile alué rojá, 'lige pe u'tá bo'siki 'yúriga, 'lige sejtákame nile alué bo'siki, 'lige besero elalá ujchele 'lige chibá elaláteri ba'wí na'loga, 'lige alé napu osirúgime nílige alué nulalí 'lige ralámuli abiena bachímale. <sup>20</sup> 'Lige anile la'sika: «Ye elaka pe ruyame ju Onorúgame gatéligo bilé ra'íchali nuebo ralámuli 'yuga, 'lige 'émika e'wímili júkuru.» <sup>21</sup> 'Lige bachímale alé re'obá wi'chite newárigime 'lige aminami suwábaga e'karúgame napu ekí nerúlige alé pachá. <sup>22</sup> Napurigá gateme nílige alué Moisesi suwábaga ralámuli chibi nokágame elate bachímalime nile napurigá 'la ku bi'wimela. Tabilé me'lisáká bilé ajágame 'liko alué ralámuli pecha buyásimili nílekó alé resítirichi bowechi. Amulí suwábaga bi'wimeli nile elate. (Alarigá nile ye rejcholi 'we 'ya nerúgame, yeka pe tétali nile alué Esukristo mukumeli níligo napurigá ralámuli 'ma tabilé resítiri sulégame nímalá.)

<sup>23</sup> Alué ajágame ka me'liame nile re'obá bi'wéniliga 'lige napu ekí nerule alé pachá re'obachi. Alueka pe tétali nile churigá ko alé 'pa rewagachi. Napurigá bi'wíggame alawéggame gainámala ralámuli napurigá 'pa rewagachi mo'inámala, alekeri me'liboli nile alué Kristo. Alué Wa'lula Esukristo mukusáká abé rajpé 'la nile me'tigá alué bilé ajágame me'liá. <sup>24</sup> Kristo pecha bajkile ko ralámuli newalila re'obachi ralámuli gu'irimia, alueka si'né simflekuru napu ajtí Onorúgame pe ramué gu'iriniliga. Alué re'obaka pe tétali nile. <sup>25</sup> Krístoka pecha bajkime níliko alé rewagachi nabí bamí Onorúgame tánimia napurigá Onorúgame bi'wémala ralámuli alawala, napurigá 'sime nílige alué wa'lula balé napu'lige bajkime nílige alé re'obachi abé na'pachá uché bilena elá 'yamia Onorúgame napu tabilé

bo'né elalá nile, alé napu abé najtékame nílige napugiti Onorúgameka alé asame níligame. <sup>26</sup> Esukrístoka pecha me'áleko bilé ajágame Onorúgame go'ame kógimia iligá bo'né 'lina mukúlekuru. Alueka tabilé nabí bamí mukumeli nile napu'lige Onorúgame gawí newale 'lige jipe si, alueka pe si'nepi mukúlekuru ralámuli alawala bi'wega napurigá tabilé e'yénamala chátiri bowechi alué ralámuli. Pe si'nepi mukúlekuru alué Esukrístoka, alekeri 'ma sébali nile napurigá ralámuli tasiné rawé resítiri alawéggame nímalá. <sup>27</sup> Bilé ralámulika pe si'nepi mukume júkuru, 'lige a'kinana Onorúgame 'ma gastigárimala, ta bi'wíggame alawéggame nísaká alué ralámuli. <sup>28</sup> Esukristochigó pe si'nepi me'líliru ralámuli a'kabámána jáwaga. Alueka ku nawámili júkuru jena wijchimoba nobi tabiléchigo alawá bi'wémili júkó, pe iligá nawámili ju ralámuli o'tomea 'pa rewagachi, alué ralámuli napu 'we buwea mochí.

## 10

*Jena ruwimela Esusi mukúligo si'nepi ramué alawala bi'wígá*

<sup>1</sup> Alué Moisesi nulalílaka pe tétali nile churigáriga nimio a'kinana rawé. Alué nulalika tabilé nígame nile a'walí napurigá ralámuli gu'irimala napurigá alué ralámuli 'la oyéramala, alueka pe iligá tétali nile. Alueka pecha nejkúrimili júkó napurigá ralámuli 'la sébali olámala, rekó alué wa'lula balé me'ae alué ajágame Onorúgame kógimia nabí bamí. <sup>2</sup> Bilé ajágame me'liáká 'la bi'weme nísaká alawala 'liko, ¿chonigá we'sá me'liábiché ajágame Onorúgame kógimia? Ralámulika asírige me'ame júkuru ajágame, abirigáchigo tabilé a'kabámána mochime júkó, pecha 'la nóchame kame noká. Pecha bi'wilekó sulachí. Tabilé bi'wíggame gayénale a'boi na'talia. <sup>3</sup> Alué ajágame me'liáká nabí bamí pe na'tálime nile napurigá 'la machiboa 'we cha nokame ko ralámuli. <sup>4</sup> Chibá me'liáká 'lige rolótiri tabilé bi'imela resítiri 'nátili napu ralámuli 'nata mochí.

<sup>5</sup> Alekeri napu'lige Kristo jena wijchimoba ajtígichi, anele Onorúgame:

Mueka tabilé najkiéturu napurigá go'ame kógiwa ralámulite.

Mueka ne'chí júlale jeka wijchimoba napuyeri ralámuli neraga

napurigá jena me'liboa ne

napurigá kógime nímalá ne bo'nepi.

<sup>6</sup> Mueka tabilé najkí

napurigá ralámuli kónimála alué ajágame e'kósirigame,

nibilé alué go'ame najkíguru mué alué ralámuli nejilála.

Alué ralámuli mayele go'ame kógisa 'la ku bi'rá mayele.

<sup>7</sup> Alekeri ne aniéturu: «Mué Onorúgame, jena ajtíkuru ne napurigá me'liboa ne napurigá bi'wémala chátiri 'nátili. Neka nawáturu 'we a'lá sébali olamia napurigá najki mué. Asiriga 'ya osirúgime nile alarigá ikimeli niligo ne. Mué Onorúgame, neka nawákuru 'la sébali olamia napurigá mué najki.»

<sup>8</sup> 'We a'lá na'táwabala choníliga Esukristo napu'lige ra'ichale, anile: «Mué Onorúgame tabilé galeme júkuru mué napurigá 'yawa go'ame ajágame sa'pala nibilé uché bilé go'ámetiri. Nibilé ganíliga ajtime ju mué napu'lige alué ajágame e'kósilichi mué 'yamia, 'lige aminami tabilé ganílime ju mué napurigá go'ame kógiwa napurigá tabilé resítiri sulégame niwa. Tabilé ganíliga ajtime ju mué ye go'ame etea. Alué nulalí alarigá anime nile ralámuli go'ame nejímio, nobi mueka tabiléchigo nareme júkó.»

<sup>9</sup> 'Lige Esukristoka amináchigo anile: «Jena nawákuru ne 'la sébali olamia napurigá mué najki.» Yeka aniamé ju alué Esusi nulalila abé najtékame ko me'tagá alué Moisesi nulalila. <sup>10</sup> Alué Esusi 'sile napurigá najkile Onorúgame, alekeri ramueka 'la nilirukuru bilé a'walí napurigá 'la sébali olawa napurigá nulá Onorúgame. Esusi siné mukule 'lige 'ma tabilé siné uché mukumela.

<sup>11</sup> Baleka nabí rawé mochime júkuru re'obachi nocha, 'lige aminami nabí rawé 'yame júkuru go'ame Onorúgame, pe aba alué go'ame 'yame ju. Ye go'ámeka pecha nejúkrame júkó ralámuli 'yuga napurigá 'la bi'wémala alawá. <sup>12</sup> Esukristoka pe bo'né sa'pala nejílekuru napurigá tabilé resiti sulégame nímala ralámuli, 'lige alé ajti jipe Onorúgame 'yuga wajtoná napu ajti Onorúgame. <sup>13</sup> Jípeko pe buigá ajti Esukristo alué saíla napu chojkóbiga ajui 'ma umérisiga alué Esukristote. <sup>14</sup> Esusi pe si'nepi mukule napurigá 'la sébali olame nímala alué ralámuli napu Onorúgame wanápale. <sup>15</sup> Alué Onorúgame Alawala gu'irile alué rió Jeremíasi anilime napu ruwime nlige napu Onorúgame anele 'we 'ya. Regá anile:

<sup>16</sup> Ralámuli tabilé sébali olale alué 'ya nerúgame ra'ichali napu Moisesi benírilige.

Alekeri uché bilé ra'ichali benírimorile Onorúgame.

Ralámuli asiriga 'la námala napu najki Onorúgame,

alué bo'né alawala 'yámala alué ralámuli napurigá 'la na'támala.

<sup>17</sup> Liko anile:

'Ma tabilé na'támala ne napu chibi nokáliga,

'ma e'kárigime kame.

<sup>18</sup> Onorúgame 'la e'kásaká alué ralámuli cha nokogá járome, 'liko 'ma tabilé siné uché me'limela bilé ajágame Onorúgame kógimia bi'wináliga, 'ma pecha rokáréko alueka, 'ma mukúligame bo'né Esukristo.

*Jena ruwimela napurigá abé 'la 'nátaga nokísiwa Onorúgame 'yuga*

<sup>19</sup> 'Emi ralámuli Onorúgame 'kúchila napurigá ne, 'ma 'la bi'wígame niru ramué, alekeri tabilé majaga nawiwa Onorúgame. Esukristo mukúlekuru nejúkuga napurigá tabilé majaga nawiwa Onorúgame. <sup>20</sup> Alué u'tá re'obá wi'chite newárigime pe tétali nile churigá 'la sebawa napu ajti Onorúgame. Alué wa'lula balé alemi simírole napu chiní chujkule sebamia napu ajtile Onorúgame. Esusi napurigá alué wa'lú chiní alarigá ju. Napu'lige mukule, pe napurigá alué chiní i'púrigame alarigá ju. <sup>21</sup> Esukristo ju wa'lula balé ramué nuleme 'lige napu repume ju Onorúgame 'kúchila. <sup>22</sup> Onorúgameka 'ma bi'wélikuru ramué alawala 'lige 'nátilitiri, alekeri 'la gainawa alué 'yuga ra'icha, 'ma tabilé majaga e'yénawa 'nátaga ramué tabilé a'lá sébali oláligo Onorúgame 'yuga. O'wemi jawa napu Onorúgame ajti, tabilé majaga 'nátaga Onorúgame gastigárimio ramué. <sup>23</sup> Onorúgame 'we a'lá aníligame napurigá 'la sebawa napu ajti bo'né. Onorúgameka 'la sébali olame júkuru napurigá anílige. Alekeri 'la oyéitékuru ye 'nátili, tabilé a'rélime júkuru ye 'nátili. <sup>24</sup> 'La 'we a'lá na'tálime júkuru churigá 'la oiláriwa alué uché jaré ralámuli napurigá 'la sébali olámala 'lige napurigá 'la niraga etémala uché jaré ralámuli 'lige 'la gu'iriga 'la na'temaka. <sup>25</sup> 'La o'maka napuíka ra'ichawa napurigá beniboa. Jaré ralámuli 'ma tabilé napuíme ju Onorúgame nila ra'ichali benimea. Asiriga enátiri raweli sebámala, alekeri we'kaka napuíkime júkuru napurigá oyériwa Onorúgame nila ra'ichali.

<sup>26</sup> 'La machirúguru Esukristo mukúligo ramué alawala bi'wígá, nobi aminabi chibi noká mochísiga ka 'la machigá tabilé 'la ko, 'liko pecha si'né bi'wígame alawégame níwagó. <sup>27</sup> Alarigá nokísasaká 'emi, 'we majaga e'yénawa 'la machigá Onorúgame nulámala napurigá 'emi e'kósiwa na'ichí. Alarigá suwibámala alué Onorúgame saíla. <sup>28</sup> Bilé rió tabilé e'wásaká alué nulalí Moisesi nulalila, 'lige oká bakíá ralámuli etesa tabilé e'wáliga, 'liko alué rió 'ma me'liame nile, tabilé 'wesi na'temame nile alué rió. <sup>29</sup> Alarigá 'sísaká bilé rió, tabilé a'lá e'wásaká bilé nulalí Moisesi nulalila, abéchigo enáriga nímala bilé rió sairúgame neraga gainásaká Onorúgame Inolá 'yuga, alué napu Esukristo anilime ju. Bilé rió alué napu sairúgame neraga ajti Onorúgame Inolá 'yuga anime ju: «Tabilé 'la ju rekó mukugé Esusi.»

## 11

Ye rioka pe najsabua ajtíkuru napu Onorúgame gatélige alué rió gu'íriga. Alueka pe gawélikekuru Onorúgame Alawala napu Onorúgame júlalige napurigá gu'írimala alué rió. <sup>30</sup> 'We a'lá machirúguru alarigá ko Onorúgame alué napu anile: «Neka 'la ikiárékuru gastigaría alué ralámuli i'níliga járome. Rekó bilé rió Onorúgame ranala ke, abirigáchigo gastigárimalagó ta sébali olásaká ne'chí 'yuga.» <sup>31</sup> Onorúgameka ajagá ajtí, alué tabilé 'la 'nátame ralámuli 'we majáati kárékuru alué gastigo napu nejímili ju Onorúgame. Onorúgame ju napurigá bilé na'í napu e'kósime ju repuga.

<sup>32</sup> 'We a'lá 'nátale napu'lige 'emi kuli sinemi oyérilige Esukristo. 'Émika asíriga resi nílikekuru, abirigáchigo 'la anáchalekó 'emi. <sup>33</sup> I'sínimi alué cha nokame ralámuli tabilé 'la ra'íchale 'emi olagá, 'we chibi anele. 'Lige i'sínimi wejpisóloru 'emi. I'sínimi napu'lige uché jaré oyérame cha oliachi, 'émika tabilé majálekuru alé jaga alué Onorúgame oyérame 'yuga. <sup>34</sup> 'Émika uché jaré Onorúgame oyérame gu'írilekuru, alué napu galírale mo'áriga mochílige. Napu'lige alué cha nokame ralámuli suwábaga tábiri nejpósisa 'emi nila, 'émika abisibi ganíliga mochílekuru. 'Emi 'we a'lá machile Onorúgame 'we a'lá semátiri raweli nejime a'kinana rawé. Alué napu Onorúgame nejime ju tabilé siné suwime ju. Alekeri 'we ganíliga rejpíle. <sup>35</sup> Alekeri pecha majálime júkó. 'Emi 'we 'la bijchígisiká Onorúgame 'we 'la nejkúrime ko, liko asíriga 'la semátiri raweli narémala 'emi. <sup>36</sup> 'We 'la anachálime júkuru. 'La oyérilime júkuru alué a'lala 'nátili. Pecha oyérilime júkó uché bilé 'nátili tabilé a'lá. Napu'lige 'la sébali olásiká napu Onorúgame nulá, Onorúgameka abiena 'la nejímala napu nejimorílige. <sup>37</sup> 'Ma pe'wé nawámala Esukristo jena wijchimoba, tabilé we'liko. Alarigá anile alué rió 'ya bejtégame napu ruwime nílige napu Onorúgame anele. Abiena regá anile:

Alué 'la sébali olásaká,

alué 'la bijchígisaká napu aní Onorúgame.

Alué rió napu 'la nirálime ju Onorúgamete,

alué rió ju napu a'lá oyérame ju Onorúgame nila ra'íchali.

<sup>38</sup> Bilé rió oyérasa Onorúgame 'lige a'resa Onorúgame oyería,

Onorúgame tabilé ganíliga asimela alué rió 'yuga.

<sup>39</sup> Ramueka tabiléchigo guwana rujsúlime júkó, ramueka tabilé gastigo narépu ju. Ramueka 'we bijchígime niru Onorúgame 'la nejkúrime, alekeri bilé rawé ramué alawala 'pa rewagachi Onorúgame 'yuga mochímala.

*Jena ruwimela churigá níligo alué ralámuli napu bijchígilige napurigá anélige Onorúgame*

<sup>1</sup> 'La bijchígisiká napu aní Onorúgame, 'lige 'la sébali olásiká napu nulá Onorúgame, 'la machirúguru Onorúgame 'la sébali olamio napu anílige. Alarigá 'la machiboa bi'lepi Onorúgame ajtigó, rekó tabilé etelie. <sup>2</sup> Alué e'wélala 'ya mochúgame regá 'nátale 'lige Onorúgameka asíriga ganíliga etele alué e'wélala.

<sup>3</sup> 'We 'la bijchígime niru ramué Onorúgame newáligo gawí pe bo'né 'nátaga. Tabilé tábiri i'tele, 'lige yati neraga gayénale gawí.

<sup>4</sup> Asíriga we'ká ralámuli Onorúgame oyérame mochílige napu'lige Esukristo tabilé 'cho nawachi jena wijchimoba, alueka 'we a'lá bijchígale Onorúgame a'lá sébali olamio napurigá anílige, 'lige nawámiorilige gatemia suwábaga 'nátili a'kinana rawé. Alué Arani 'lige Eba ranala napu Abeli anilime nílige, alarigá 'nátale, alekeri alué Abeli me'álige bilé ajágame Onorúgame kógimia. 'Lige alué Abeli bonila napu Kaíni anilime nile, abiena kógilige go'ame Onorúgame. Nobi Onorúgameka 'we a'lá semáriga etele napu 'yálige alué Abeli napugiti Abélica 'la bijchígilime napu anílige Onorúgame nobi tabilé 'la etele napu 'yálige alué Kaíni. Kaínika tabilé bijchígime nílige napu anílige Onorúgame. Rekó Abélica 'ma mukugé 'we 'ya we'ká bamí, alué ralámuli jipe mochúgame abiena laniá napu 'silige Abeli ta'chó mukía.

<sup>5</sup> Uché bilé rió 'we 'ya bejtégame napu Enoko anilime nílige, 'we a'lá nirame nile Onorúgame. 'Lige Onorúgameka 'ma o'tole alué rió ajágame wamí 'pa rewagachi, alué rioka tajsiné mukule. 'Lige ralámulika 'we 'yáale nobi tabiléchigo rewáleko, 'máchigo o'tóligime Onorúgame 'pa rewagachi. Napu'lige Enoko bijí jena gawichí ajtígachi, Onorúgameka 'we galegá etele alué Enoko. <sup>6</sup> Onorúgameka tabilé ganíliga ajtime ju alué ralámuli 'yuga napu tabilé bijchígime ju napu anílige Onorúgame. Alué ralámuli napu 'la Onorúgame oyérinilime ju, alueka bijchígimili júkuru Onorúgame ajágame ko, 'lige alarigá bijchígíwa, Onorúgame 'la semati raweli 'yámili ju alué napu 'we a'lá bijchígime ju alué ko wa'lula.

<sup>7</sup> Uché bilé rió 'we 'ya bejtégamechigó 'we 'la bijchígale Onorúgame ajágame ko 'lige 'we 'la sébali olame ko napurigá anílige Onorúgame, alué rioka Noé anilime nile. Onorúgameka 'we a'lá anele 'we enátiri tábiri simírímio, 'lige abiena ruyele o'pólimio ba'wite bochígimi ye gawí. 'Lige alué Noeka asíriga 'la nirame nile Onorúgame, alekeri Noé bilé barko newale napurigá

tabilé suwimela alué bo'né upila 'lige bo'né u'kúchila, 'lige bo'né mo'líala. 'Lige uché jaré ralámulika 'ma suwile. Alekeri 'la machiáguru alué ralámuli tabilé bijchígime níligo napu anele Onorúgame. Alué Noeka asrígá 'la bijchígale napurigá anéligo Onorúgame, alekeri 'we semátiri raweli narele. Ramueka abiénachigó 'la narépili jukuru 'la e'wésiga napu aní Onorúgame.

<sup>8</sup> Uché bilé rió napu 'we alá bijchígale Onorúgame ajágame ko, 'lige 'we 'la sébali olame ko napurigá aníligo, alué rioka Abraámi anilime nile. Onorúgameka bayérole 'mi mejká napu níligo alé 'mi Kanani anilichi. 'We we'lé nile, we'ká riógachi. Abraámika similé 'yáamia rekó tabilé 'la machime ke koche simea. Onorúgame 'yámorele alué wa'lú we'é alué rió, napurigá alué rió 'la bo'né niga asimela. <sup>9</sup> Liko napu'lige sebasa alé we'é bo'ígichi, we'ká bamí asale nobi tabiléchigo siné bo'né gawila nílekó. Pe iligá ichúrimi oyame nile 'lige napu bejtébaga ajtime nile, aleka gemate newárigime galégame nile, pe jamí eyéname nile alué rió. Onorúgame abiena alué abraámi inolá napu Isaki anilime níligo, abiénachigó narémili nile alué gawí. A'chigóriga anele Isaki inolá napu Akobo anilime nile. <sup>10</sup> Abraámi alarigá bejtégame nile, 'láchigo machíligame Onorúgame 'we alá semáriga 'yamio nujubá rawé. Abiénachigó 'la machile Onorúgame 'yamio 'we semáriga 'pa rewagachi napu Onorúgame 'we alá semáriga gatega ajti. Alekeri tabilé chélagá eyénale panápurimi.

<sup>11</sup> Abiena alué abraámi 'we bijchígale napu'lige Onorúgame anele bilé ranégame nimio alué bo'né upila Sara. Okánika 'ma 'we o'chérame nile, 'lige alué Sara tabilé siné ranégame nile 'yako, abirigáchigo 'la niramé nílekó napurigá anele Onorúgame. <sup>12</sup> Ta chéréko rekó 'we o'chérame ke alué abraámi, abirigáchigo 'la inógame nílekó. 'Lige alué abraámi inolaka we'ká 'kúchigame nile. 'Lige alué inolá 'kúchila abéchigo, we'ká 'kúchigame nile napurigá we'ká so'píli. 'Lige napurigá saté gomichi nerúgame, napu tabilé gainárimo ju tetia.

<sup>13</sup> Napu'lige suwile suwábaga ye ralámuli 'ya mochígama, ta'chó narékame nile napu aníligo Onorúgame 'ya. 'Lige 'we alá machile 'we alá semati raweli naremio napu'lige suwisá a'kinana. Alekeri 'we ganíliga mochile buigá jena wijchímoba ta'chó suwiyá. Aníá mochile: «Ramueka pe sígame niru, pe simárimo niru jena gawichí.» <sup>14</sup> Ralámuli alarigá ra'íchame ka pe 'yégiga anime ju bilena napu abé alá ju bejteralia. <sup>15</sup> Tabilé gawí olagá aní napu 'ya nígame níligo. Gawí olagá anisáká napu 'ya nígame níligo, 'liko ku simatéligipaché a'boi gawílachí. <sup>16</sup> Nobí tabiléchigo gawí

olagá aníleko, pe 'pa rewagachi mochílime olagá anile Onorúgame 'yuga, 'we 'la karao 'pa rewagachi. Alekeri Onorúgame tabilé chijúnale napu'lige alué ralámuli Onorúgame oyérame korichí. Onorúgameka 'we najkí napurigá alué ralámuli Onorúgame 'yuga mochímala. Onorúgameka 'we alá newale bilena napu mochímili ju alué ralámuli.

<sup>17</sup> Napu'lige Onorúgame nulele Abraámi me'línliga bo'né inolá Isaki anilime napurigá Onorúgame kógimia, alarigá sime oláligo Abraámi rekó pe aluecho kachi bo'né inolá. <sup>18</sup> Onorúgameka anéligo alué abraámi alué bo'né inolá Isaki we'ká 'kúchigame níligo níligo, 'lige alué Isaki 'kúchila abiena we'ká 'kúchigame níligo níligo. <sup>19</sup> 'Lige abraámi 'we 'la machile Onorúgame 'we 'la sébali olame ko napurigá aníligo. 'Lige Onorúgame nulele alué abraámi napurigá bo'né inolá me'limela, napurigá bilé bo'á alarigá me'liboli nile alué Isaki Onorúgame kógimia. 'Lige abraámi 'we 'la 'nátale alué Isaki me'lisúká, uchéchigo siné 'yamio alawá napurigá ajagá asimela uchéchigo siné. Alekeri abraámi 'we 'la e'wámili nile napurigá nulele Onorúgame, me'limeli nílekuru, 'lige Onorúgameka anele, «Tabilé me'liboa mué inolá Isaki», anele Onorúgame, iligá bilé bo'á 'yale napurigá me'limela. Yeka pe tétali neraga nile a'kinana bo'né Onorúgame inolá me'liboli níligo ramué gu'íriga, 'lige ku 'yamio alawá napurigá ajagá asimela. 'Lige alarigá 'sile.

<sup>20</sup> A'kinana napu'lige alué Isaki 'ma o'chérame ka, abiena 'we 'la bijchígime nile Onorúgame 'we alá sébali olamio napurigá aníligo. Alué bo'neka tabilé etele napu Onorúgame newámili níligo. Alueka tánale Onorúgame napurigá gu'írimala Onorúgame alué Isaki inolá okáraga napu Akobo anilime nile bilé 'lige bilé Esaú anilime nile. <sup>21</sup> Liko alué Akobo a'chigóriga 'sile napu'lige amulí mukíá, Onorúgame tánale napurigá gu'írimala alué ochila alué Akobo inolá 'kúchila napu José anilime nile, napurigá 'la oyéramala ye 'nátali 'we 'la sébali olamio napu aní Onorúgame. Napu'lige ye tania ilígichi, bilé gujsí resólaga chujkule rojpóchiga Onorúgame tania ilígichi. «Onorúgame asrígá 'la ju», anile. <sup>22</sup> José abiena 'we 'la bijchígime nile Onorúgame 'la sébali olame ko napurigá aní. Napu'lige amulí mukíá alué José, anile a'kinana Onorúgame buinamio alué ralámuli ísraelita alé Ejipto mochígichi, 'lige anile: «Napu'lige 'ma simiba jena mochiga, 'ma o'ká simáwaká ne o'chilá», anile alué José.»

<sup>23</sup> Asrígá a'kinana we'ká bamí kachi alué Moisesi o'nola 'lige eyela nasole alué Moisesi bakiá mechá napu'lige pe kulí ochérisa. Alué wa'lula Ejipto ajtígama nulale napurigá me'liboa suwábaga u'kuchí rió alué napu



ekí israelita nile, 'lige alué Moisesi o'nola 'lige alué eyela tabilé majale. Alueka regá 'nátales: «'We semátiri ju ye u'tátiri, siné kachi abe bilé rawé walú ochérisa ye towí walú nejkúrimeréko.»<sup>24</sup> Alué walula Ejipto ajtgame malala rewale alué Moisesi 'lige bujkurule. Napu'lige alué Moisesi walú ochérasa, tabilé narénile alué napu nachuámili nile alué mukí ranala kóriká. Alueka Onorúgame ma'chí buinamia mayele alué ralámuli israelita alé Ejipto mochígichi.<sup>25</sup> Alué ralámuli ejpsio 'we resí olale alué ralámuli Onorúgame oyérame, alué israelita, 'lige alué Moisesi 'nátele 'we alá ko napurigá resí nílmalala bo'né alué uché jaré ralámuli israelita 'yuga. Alueka tabilé asináile alué ralámuli ejpsio 'yuga napu tabilé gurule go'ame, 'we resítiri nile alué ralámuli. Bo'neka 'la machíligame tabilé we'lisi ganíliga mochímili nílgo alué ralámuli ejpsio.<sup>26</sup> Alueka narénilia asale napu Onorúgame 'yámorlige alué ralámuli israelita. Moisesi alá machile Onorúgame julamio bilé rió napu ku buinamio alé tabilé 'la bowechi napu Kristo anilime nile. Alekeri Moisesi tabilé asináile alé Ejiptochi rekó we'ká 'yáwili nílge enomí alé asisáká.<sup>27</sup> Tabilé majale alué walula rey alé Ejipto nulame rekó ayoge napu'lige 'másale alé Ejiptochi. Alá machile alué Moisesi Onorúgame alé eyénaligo gu'iriga, nobi tabiléchigo etélekó.

<sup>28</sup> Napu'lige Moisesi ku nawasa alé Ejipto abé a'kinana we'ká bamí, Onorúgame anile bo'né julámorile me'limea alué bajchá ochérigame rió alé a'pílipi galichi, tabilé elá chujkúgame nísaká alé yochi. Alueka 'la bijhígale napu anile Onorúgame 'lige nulele alué ralámuli israelita napurigá ujchémala alué elá alé yochi napurigá tabilé me'liboa alué bajchá o'chérigame rió israelita.<sup>29</sup> 'Liko alué ralámuli israelita júmasile alé Ejipto mochiga, 'liko Onorúgameka wanápale alué walú ba'wí napu Ba'wí Sejtákame anilime ju napurigá 'la wakígachi simáromala alué ralámuli. Alueka 'we alá bijhígale napu anele Onorúgame, tabilé a'rémorile napurigá suwimela. Napu'lige alué we'ká ejpsio sontalo sébalechigó abalemi simáromia, 'ma e'yénachi nasípami, Onorúgame yati ku bochibale alué ba'wí, 'lige suwábaga alué sontalo ejpsio 'ma si'lile.

<sup>30</sup> Abé a'kinana naosa makué bamí kachi alué ralámuli israelita we'sá nolérale alé suweke we'ká riógichi napu re'pá ilgame tegótigame nile napu Jerikó anílichí nile. 'We 'la bijhígale Onorúgame 'la gu'irimio napurigá neyúrimala alué sairúgame 'yuga napu alé pachá mochile, 'ma gichao rawé sébachi 'ma gajule alué tegoli, 'liko alué ralámuli israelita me'ale we'ká alué ralámuli

amulí suwábaga.<sup>31</sup> Alé pachá asale bilé mukí napu Rajabi anilime nile napu we'ká rió 'yuga gojchime nile. Alueka tabilé me'líliro, alueka gu'iriligime alué oká rió israelita napu'lige alemi e'yénilige e'néniga. Alué mukika 'we 'la bijhígale Onorúgame 'la gu'iria asáligo alué ralámuli israelita, alekeri alué mukí 'la gu'irile alué oká rió.

<sup>32</sup> Neka 'ma 'la ruwíturu napurigá 'emi 'we alá bijhígimale Onorúgameka 'la sébali oláame napu aní. Tabilé ikiru ne ruyá churigá nokáliga alué uché jaré ramué rijimale 'ya mochígame, napu nile Gereoni, 'lige Baraki, 'lige Sansoni, 'lige Jeptesi, 'lige Rabí, 'lige Samuéli, 'lige alué 'ya mochígame napu ruwime nile napu anele Onorúgame.<sup>33</sup> Alueka 'we alá bijhígale Onorúgame 'we alá sébali olamio napurigá anilige, 'lige alekeri 'we alá e'wele Onorúgame. Alekeri 'la neyúrale jaré alué ralámuli nakoga alué chejarela ralámuli e'wélala rey 'yuga 'lige alué we'ká sontálola 'yuga. 'Lige aminami jaré e'sélikame nile, 'we 'la 'nátele Onorúgame 'yuga. Jaré alué ralámuli 'la narele napu Onorúgame nejímorlige. Jaré neyúsale napu'lige amulí me'liá mawiyate. Onorúgame na'ómale chu'ala alué mawiyá.<sup>34</sup> Jaré tabilé rajale napu'lige alué ralámuli e'kósilichi walú na'ichí. Jaré amulí me'líliro machétate. Jaré tabilé nígame a'walí 'la narele a'walí Onorúgame a'walila napurigá 'la neyúromala we'ká sairúgame 'yuga nakoga, 'lige 'ma mabule alué ralámuli.<sup>35</sup> Abiena jaré umugí alué Onorúgame ra'ichálila bijhígime, alué umugí 'kúchila suisá, Onorúgameka uchéchigo siné 'yale alawá napurigá ku ajagá mochímala.

Jaré rekó 'la e'weme ke Onorúgame, 'we ejelile 'lige jaré 'ma suwile. Alué ralámuli tabilé alá, alueka anele alué ralámuli Onorúgame oyérame napu cha'piruga mochile: «'Emi chibi anésaká Onorúgame 'liko 'la su'panawa ramué 'emi.» Nobi alué ralámulika tabilé siné chibi anele Onorúgame. Alueka 'we alá machile Onorúgame 'we alá semátiri nejimio 'pa rewagachi a'kinana napu'lige suwisá. Alekeri tabilé guwana rujsule.<sup>36</sup> 'Lige jaré Onorúgame oyérame 'we gawéliru 'lige wejpisóliro, jaré 'ma buléliru karénate alé pachá galírale mo'asa.<sup>37</sup> Jaré rejete bajsibuga me'líliro, 'lige jaré serúchote rejpunálero 'lige jaré i'weli rejpigate e'jchega me'líliro. Pe ichúrими e'yéname nile bo'á wi'chila o'páchiga 'lige chibá wi'chilatiri. Jaré ta'mé nígame nile go'ame. Asíriga we'ká e'karúgame resí ikile tabilé na'timáliro alué cha nokame ralámulite.<sup>38</sup> Alué ralámuli tabilé nirame Onorúgame, alueka tabilé nirale Onorúgame oyérame ralámuli. Anile alué cha nokame ralámuli: «Abé 'la júkó ye ralámuli suwisá», nobi Onorúgameka 'we 'la

nirale alué bo'né oyérame. Alué Onorúgame oyérame ka pe panápuri mochime nilekuru tabilé ba'wégachi 'lige aminami tabilé 'wesi ralámuli epperégichi. 'Lige resoachim epperégame nile 'lige aminami re'lemi we'éraleimi epperégame nile. <sup>39</sup> Alueka 'we 'la e'wale napurigá anílige Onorúgame, tabiléchigo naréleko jena wijchimoba napu anile Onorúgame. <sup>40</sup> Ramué jipe jena epperégame abé 'la námame niru napu nocha ají Onorúgame. Ramueka 'ma eteru churigá gu'íriligo Onorúgame ralámuli, pe bo'né Inolá jékana júlake napurigá gu'írimala. Alué ralámuli 'ya mochígame pe buigá mochile napurigá sebámala alué Onorúgame Inolá. Tabilé etele, 'ma suwiligame. Jípeko 'ma sébakuru, alekeri jípeko alué ralámuli 'lige ramué napuika 'la gaináwaleké sébali olame ralámuli gayenia.

## 12

*Jena ruwimela napurigá 'la anachawa napurigá Onorúgame 'kúchila niwa Onorúgame a'walíla gite*

<sup>1</sup> 'Liko we'ká ralámuli mochile napu 'ya 'we a'lá bijchígame nile napu anéligo Onorúgame 'lige 'we a'lá e'wile Onorúgame. Alekeri 'la sébali olawa napurigá alué ralámuli 'ya mochígame. A'rewa alué chátiri 'nátíli napu 'we nejkumeme ju napurigá 'la o'wé e'yénawa Onorúgame oyérisia, napurigá gatele Onorúgame 'we 'ya. <sup>2</sup> A'rewa alué chátiri 'nátíli 'lige 'we a'lá na'tawa churigá bejtéligo Esusi jena gawichí, alué nilekuru napu ramué benírale churigá epperélitiká Onorúgame 'yuga 'nátaga, alué júkuru nejkúrimo napurigá ramué 'la sébali olame ralámuli niwa. 'La anáchame nile alué Esusi napu 'lige gulusichi ujchagá me'liá. Bo'neka tabilé chijúnale rekó alé gulusichi ujchagá me'liá, 'láchigo machíligame a'kinana rawé nerúlimia bilé ganíli. Jípeko ajtíkuru wajtoná napu ají Onorúgame.

<sup>3</sup> 'We 'la semáriga na'táwaká churigá a'lá anáchame nílga Esusi napu 'lige alué cha nokame ralámulite resí oliá. Alarigá 'nátaga 'we a'lá anachámala 'émichigó. <sup>4</sup> 'Émika ta'chó resí nílgu napurigá uché jaré ralámuli Onorúgame oyérame napu 'we resí nílga suwile. <sup>5</sup> 'Ma tabilé néléru alué rejcholi napu Onorúgame 'yáligo alué Onorúgame oyérame. Napurigá bilé o'nó 'kúchila ruyeme ju, alarigá nile. Regá anile:

'Emi oyérame ne 'kúchila.

Tabilé resí anía mochiwa napu 'lige ne ruwichi,

'we a'lá na'tawa 'nalina.

Tabilé sewékime júkuru napu 'lige ne gastigárichi.

<sup>6</sup> Neka 'we 'la ruyéguru alué ríó napu 'we galé ne,

'lige gastigari ne alué napu ne 'kúchila ju, napurigá bilé o'nó.

<sup>7</sup> Alekeri 'la anachálime júkuru rekó 'we ená ke napurigá 'la sébali na'tawa Onorúgame 'yuga. Onorúgameka napurigá bilé bo'né inolá alarigá etiáguru 'emi. Bilé ríó 'kúchigame 'we 'la ruyeme ju bo'né 'kúchila napurigá 'la benimela 'lige 'la sébali olámala. Ta e'wásaká abiena gastigárimo ju.

<sup>8</sup> Suwábaga napu ekí Onorúgame 'kúchila ju Onorúgame 'la ruyeme júkuru. Ta e'wásiká abiena gastigárimo ju. Onorúgame tabilé 'la ruyésaká, 'liko 'emi tabilé Onorúgame 'kúchila ju. <sup>9</sup> Suwábaga napu ekí ramué o'nola ju jena wijchimoba epperégame, alarigá ruyeme júkuru 'lige ruwichi. 'Liko abéchigo rajpé 'la nírálime júkuru alué Wa'lula O'nó Onorúgame napu repume ju ramué alawala. Alarigá 'la semati raweli nígame niwa ramué. <sup>10</sup> Alué ramué o'nólaka pe u'kabi bamí ruyeme ju ramué, 'lige ruyeme ju napu bo'né 'nata, 'lige asírigo a'lá ju alué 'nátíli, iligá i'sínimi ta'mé 'la ma'chínime ju. Nobi Onorúgameka 'we a'lá benírime júkuru ramué. Alueka suwábaga machíguru napurigá a'lá sébali ralámuli niwa ramué napurigá bo'né Onorúgame. I'sínimi tabilé gepúnilime júkuru bilé ra'íchali rekó 'we a'lá ra'íchali kachi. <sup>11</sup> 'Lige apiépiri gastigo pecha ga kame júkó, nobi 'wéchigo 'la nejkúrimo júkó napurigá 'la sébali na'tawa uché siné rawé, siné kachi 'la benisúká.

*Jena ruwimela 'la 'nátaga mochílime ko napurigá 'la narépuo napu Onorúgame nejime ju*

<sup>12</sup> Alekeri 'la bijchígiwa napu aní Onorúgame. <sup>13</sup> 'Yáawa alué bowé 'la o'wé enágame. 'La suwábaga asírigo 'la gatewa alué 'nátíli napu ekí tabilé 'la ju, napurigá tabilé guwana rujsúmala alué ralámuli tabilé a'wágame alawégame napurigá 'la bi'lepi bowé najátamala.

<sup>14</sup> 'La niraga mochiwa o'maka uché jaré. 'La sébali olame ralámuli niwa 'la Onorúgame 'yuga 'nátame. Alué tabilé 'la 'nátame ka, tabilé siné etémala alué Wa'lula Esukristo.

<sup>15</sup> 'We 'la 'nátiga narépuaká alué nejkúrali napu Onorúgame nejmíli ju napurigá ramué 'we semáriga mochiwa. Jaré ralámuli tabilé narésaká ye nejkúrali, alueka napurigá ayome niraga mochímala, 'lige ralámuli ayome 'ma tabilé 'la na'támala, chátiri 'nátíli oyéramala 'lige 'ma we'ká ralámuli najs-abúmala. <sup>16</sup> Tase na'tawa we'ká umugí 'yuga gojchiame, tase pe go'ámecho na'tawa napurigá 'sílge alué ríó Esaú. Alueka pe go'ámecho 'nátelékuru, 'lige suwábaga napu ekí narémili nílge napu 'lige o'nola mukusá, suwábaga alué nakulíle go'ame gite. <sup>17</sup> 'Emi 'la machí, a'kinana narénilituru, 'lige o'nola

tabilé a'rele. Rekó nalae nobi tabiléchigo gayénalekó narea.

<sup>18</sup> Jípeko nuebo 'nátili nílerukuru. Alué o'chéráme 'nátlika napu Onorúgame newálige 'we 'ya, 'we majárime nile. Alué gawí napu Onorúgame ajtíle rajá ilile. Asírige chóniga ilile, 'lige asírige chókame nolega ilile 'lige aminami abiena ne'wile. <sup>19</sup> 'Lige bilé trompeta buchele, (alué ajágame a'wala newárigime napurigá trompeta bujchélime) 'lige asírige e'wele anile, 'lige Onorúgame alé wa'lú gawí ilígichi anile siná. 'Lige ralámuli asírige majale. «¡Tase ra'ichawa!», anele alué ralámuli Onorúgame olagá. <sup>20</sup> Tabilé anáchale alué Onorúgame ra'ichálila akea. Regá anile Onorúgame: «Bilé ralámuli o bilé ajágame re'késaká ye wa'lú gawí re'pá iligame, 'ma yati me'liboli júkuru rejete bajsibuga.» <sup>21</sup> Alué napu eki etégame ka asírige majale. Moisesi anile: «'Ma 'áwali ne majaga.»

<sup>22</sup> Nobí 'émika tabilé a'bemi jámili nílikuru napu alué gawí re'pá iligame ilí napu alué ralámuli 'we majame nile. 'Émika 'ma alé jábalekuru uché bilena gawichí napu Sioni anilime ju, 'lige Sioni abiena Rusaleni anilime ju napu 'pa rewagachi ju, napu bejtégame ju Onorúgame napu ajagá ajtí. Alé asírige we'ká mili santo ánjeli mochí, alueka asírige ganiliga mochí alé. <sup>23</sup> Alé mochí alué ralámuli napu Esukristo oyérame nligé, napu Onorúgame osale alé líbrochi alué ralámuli rewalá napu alé 'pa rewagachi mochímili nligé. Alué Onorúgame Wa'lula Nulame ju. Alueka sébali machime ju chieri 'la ka 'lige chieri tabilé 'la ka. Alé 'pa rewagachi mochíchigo alué a'lala ralámuli alawala, alué ralámuli napu 'ya mochígame nligé napu buigá mochile napurigá sebámala alué Esusi jena wijchimoba napurigá 'la sébali nímala. <sup>24</sup> 'Lige Esusi abiena ajtí alé, alué napu Onorúgame tania ajtí ramué gite napurigá ramué 'la oyérawa alué ra'ichali napu gatélige Esusi napu'lige mukule. Bo'né elalate bi'wélekeru ramué alawala. Napu'lige me'líirige Esusi we'ká ralámuli gu'íri, najtétiga alué ralámuli nila gastigo, tase napurigá napu'lige Abeli me'líirilige. Abeli bajchá me'líiru jena wijchimoba. Napu'lige mukule tabilé 'wesi ralámuli gu'íri.

<sup>25</sup> 'We a'lá 'nátaga 'emi ralámuli. Tase gawéliwa alué Esusi ra'ichálila. Alué ralámuli 'ya mochígame gastigo narele napu'lige tabilé e'wale napu Moisesi nulachi, 'liko ramueka abé wa'lú gastigo narépu tabilé e'wásiká napu jula Esukristo 'pa rewagáchika. <sup>26</sup> Napu'lige Onorúgame ra'ichale alé wa'lú rabó Sinaí anilichi, 'ma gawí nokáturu. Jipe Onorúgame

aní: «Pe che si'nepi nokémala ne jena wijchimoba, 'lige abiena rewagáchichigó.»\*

<sup>27</sup> Napu'lige yeti anisá, pe aniamé ju pe suwábaga suwábaniliga aní napu eki eteru jena wijchimoba 'lige rayénali 'lige mechá 'lige so'pilí abechigó. Pe alué tajsiné suwíbamecho e'karúgame rejípimala, alué napu tabilé etérume ju, napurigá alawá. <sup>28</sup> 'Lige napu'lige suwisuga, 'mi bilena sebawa napu Onorúgame ajtí, napu suwábaga nulame ju Onorúgame, alé napu tajsiné suwíbame ju, alekeri 'la narékime júkuru nejkúrali napu Onorúgame nejia ajtí jipe. 'La 'we 'la niraga etélime júkuru Onorúgame. Wa'lú cheliera 'yawa napu nejí Onorúgame. <sup>29</sup> Onorúgameka 'la sébali olame júkuru, alekeri 'ma suwábaga e'kósilime júkuru alué napu eki tabilé 'la sébali ju.

## 13

*Jena ruwimela Onorúgame 'we ganiliga ajtime ko napu'lige bilé ralámuli 'we a'lá oyéachi Onorúgame*

<sup>1</sup> Jípeko uché pe u'kabi osimé ne. 'We 'la niraga járilime júkuru a'bopi napurigá rijimala neraga. <sup>2</sup> 'La kógilime júkuru ralámuli tabilé machirume napu'lige mué bejtélachi sebasa, ('lige 'la elílime júkuru napurigá alé che'lebámala). Siné kachi pe santo ánjeli nímala alué ralámuli, pecha machibówé.

<sup>3</sup> 'La nélélime júkuru alué Onorúgame oyérame ralámuli napu galírale mo'áriga mochí. 'We 'la na'temápua 'emi alué galírale mo'árigame mochígame. Abiena 'we a'lá na'temápua 'emi alué ralámuli napu resí olárigime ju cha nokame ralámulite. 'We a'lá nélélime júkurchigó alué ralámuli napu resí nilia mochí, siné kachi bilé rawé abiénachigó resí nilia mochíwalek ramué.

<sup>4</sup> Newikame nisaká bilé rió bilé mukí si 'la nirálime júkuru. Bilé mukí níriká tase 'yuga gojchiboa tabilé bo'né 'yula nisaká. 'Lige rió nírigaká, tabilé 'yuga gojchiboa uché bilé mukí. Onorúgameka gastigárimala alué ralámuli alanokisaká. 'Lige jaréchigo rióchoká newime ju, 'lige umugí abiénachigó alanokame ju, umugíchoká newime ju, Onorúgame gastigárimala alué ralámuli.

<sup>5</sup> Tabilé na'tawa we'ká mélime enomí. Pe 'we ganiliga mochiwa napu eki nígame niru. Onorúgameka regá anile: «Neka tajsiné 'oni a'rémala 'emi. Neka nabí gu'irimili júkuru 'emi.» <sup>6</sup> Alekeri ramué ralámuli tabilé we'ká 'nátaga aniboli júkuru:

Wa'lula Onorúgame 'smi ne'chí gu'iria.

Tabilé siné majame ju neka.

Alué cha nokame ralámuli tabilé gainámala ne'chí umeria.

<sup>7</sup> 'La néléwa alué ralámuli napu 'emi benírilige Onorúgame ra'ichálila 'ya. 'La 'we

\* 12:26 E'nesi Hageo 2:6.

a'lá na'tawa churigá nokame ka alué. 'La e'wawa 'émichigó napurigá alué ralámuli.

<sup>8</sup> Esukristoka nabí 'la 'nátame júkuru 'lige nabí 'la nejkúrimé júkuru napurigá nejkúrilige 'ya. 'Lige aminami uché siné aba'lá alarigá nejkúrimili júkuru. <sup>9</sup> Alekeri 'we 'la 'nátaga mochiwa, tase oyériwa uché bilé 'nátili alué napu tase alarigá ju napurigá benírilige Esukristo. Jaré ralámuli anime ju: «Onorúgame kógilime go'ame go'suga piéstachi 'we 'la na'tálime kará Onorúgame 'yuga.» Go'ame pecha nejkúrimé júkó, Onorúgame júkuru a'wali nejime ka napurigá 'la semáriga na'tawa.

<sup>10</sup> Alué 'ya mochígame balé me'ame nile ajágame Onorúgame kógimia alé mésachi jíérote newárigime (altar) 'lige pe'tá go'ale, 'lige alué go'ámete bejtégame nile. Esukristo 'yale bo'né, alarigá Esukristo (Onorúgame) mukule ramué gite. 'Lige alué a'walilate mochírukuru jipe. Alué balé 'ya mochígame, tabilé alué a'wali nígame nile. <sup>11</sup> 'We 'yako alué wa'lula baleka pachami bajkime nile alué ajágame elalá o'ká alé re'obachi wi'chite newárigime. Alé abé 'na pachaka napu ajtíle Onorúgame 'liko elá bachímale napurigá 'la bi'mela alé pachage napurigá bi'mela suwábaga alué ralámuli chátiri 'nátame. Alué ajágame mukúgame sa'pálaka tabilé o'tiame nile alé pachami re'obachi, sa'pálaka mejká o'tiame nile 'mi suwemi riógachi e'kósimia napugiti alué sa'paka 'we resítiri níligame. <sup>12</sup> Esukristochigó alé 'mi we'ká riógachi suwé 'we resí nilile 'lige mukule. 'Lige bo'né elalaka bi'wele bo'né oyérame. <sup>13</sup> 'Liko tabilé chijunálime júkuru napu'lige Esukristo oyérialia rekó me'lílirige alé ma'chí napurigá 'we iníflame ralámuli neraga, <sup>14</sup> napugiti tabilé 'yalime ju semati raweli jena gawichí, 'yalime ju ramué 'we a'lá semátiri raweli 'pa rewagachi. 'La machiáguru 'we a'lá semátiri raweli narépili ko ramué 'pa rewagachi. <sup>15</sup> Jípeko Esukristo ajtíkuru Onorúgame tania ramué neraga, 'liko a'kué aniboa: «'We a'lá ju Onorúgame.» Onorúgame júlale Esukristo napurigá mukumela ramué gu'íriga, alekeri 'we 'la ganíliga mochiru ramué Onorúgame 'yuga, 'lige alekeri tabilé chijunaru ramué Esukristo oyeria.

Alarigá najkí Esukristo, tabilé najkí napurigá me'liboa ajágame Onorúgame kogia. Alueka najkíguru napurigá 'we 'la semáriga ra'ichawa Onorúgame olagá. <sup>16</sup> 'Lige abiena tabilé we'kuawa alué 'we a'lala 'nátili, 'la kónime niwa a'bopi, alarigaka 'la 'we ganíliga ajtime ju Onorúgame, tase napurigá go'ame kógilia.

<sup>17</sup> 'La 'we a'lá nirawa alué e'wélala. Onorúgame 'yame ju nóchali tebúkime 'emi. Tabilé 'la sébali olásaká, Onorúgame gastígárimala. 'La e'wawa nulachi napurigá

alué e'wélala 'la ganíliga mochímala alué nóchali 'yuga, tabilé seweka. Alué e'wélala pecha gainámili júkó gu'iria, 'emi tabilé e'wésaká alué e'wélala.

<sup>18</sup> 'We táníwa Onorúgame napurigá 'la aminabi gu'írimala ramué. 'We a'lá machiáa ramué na'tálila 'we a'lá bi'wígame ko. Tabilé ojchogila niru. Nabí a'lá sébali oliá ramué suwábaga 'yuga. <sup>19</sup> Neka najkíguru napurigá Onorúgame tánimala 'emi napurigá Onorúgame 'la gu'írimala ne'chí, napurigá ne 'la yati ro'ímala 'emi e'nemia.

<sup>20</sup> Onorúgame nejkúrisa 'la kápá napurigá ramué 'la bi'lepi 'nátaga mochiwa pe aluecho 'yuga. Alueka uchéchigo siné 'yálerukuru alawá alué Wa'lula Esusi, Onorúgame oyérame tebume. Esukristo mukule ramué gu'íriga. Alué nejkúrilili tabilé siné suwimeli ju. Alarigá gatele Onorúgame napurigá 'la a'kabámana e'yénawa. <sup>21</sup> 'We a'lá nejkúrisa 'la kápá Onorúgame napurigá 'la sébali ralámuli niwa napurigá 'la sébali olawa napurigá najkí bo'né Onorúgame. Onorúgame júlale Esukristo napurigá gu'írimala ramué. 'We a'lá semáriga ra'ichawa senibi churigá ka Esukristo. Alarigá nisa 'la kápá.

<sup>22</sup> 'Emi Esukristo oyérame napurigá ne, najkí ne napurigá 'emi 'we 'la ganíliga gepúmala ye pe u'kabi rejcholi. <sup>23</sup> Najkí ne napurigá machimela 'emi alué Timoteo napu Onorúgame oyérame ju napurigá ramué, alueka 'ma ma'chínale alé galírale napu bajcháriga asálige. 'We yati sebásaká alué Timoteo, alué si simé ne 'emi e'nemia.

<sup>24</sup> 'We reporali náoli ne alué e'wélala 'lige alué uché e'je Onorúgame oyérame napu alé a'bemi ejperégame ju. Ralámuli jena mochígame Italia ejperégame 'we náoli reporali 'emi.

<sup>25</sup> Onorúgame 'we a'lá gu'írisa 'la kápá 'emi. Pe ekí kápá. Cheliérabá.

## Ye Ju Alué Apeli Napu Santiago Osale

*Kuira suwábaga 'emi Onorúgame oyérame.*

<sup>1</sup> Ne Santiago osá ye apélichí. Neka Onorúgame nochálila nóchame ju 'lige aminami ramué nuleme Esukristo\* 'yuga. Alueka ne'chí nuleme ju. Alué makué okaná chojkégame ralámuli israelita osé ne napu mejká mochí ra'laga, tabilé jena Rusaleni.

*Jena ruwimela Santiago ruwlligo churigá na'tálime ko napu'lige resí ikía*

<sup>2</sup> 'Emi Onorúgame oyérame napurigá ne, napu'lige ená ikía 'emi 'la 'we ra'sálagá mochílime júkuru. <sup>3</sup> 'Émika 'we 'la machíguru, napu'lige 'emi 'we 'la nirá mochígachi Onorúgame 'lige yati neraga ená ikisá 'emi, alueka júkuru napurigá 'emi abé a'lá na'támala 'lige tabilé guwana rujsúlime ko rekó ená ikiae. <sup>4</sup> 'La anachálime júkuru 'emi niríga napurigá 'la gainawa 'la semáriga 'nátame gayena. Alarigaka 'la tabilé siné guwana rujsúmala 'emi napu'lige resí ikía.

<sup>5</sup> Tabilé benégame nísaká rejcholi ne-jiga bilé 'emi gompaniérola, Onorúgame tánilimili júkuru napurigá Onorúgame 'we 'la benégame newámala rejcholi beníriga alué rió, Onorúgameka suwábaga asíriga 'la ganílga gu'irame júkuru, tabilé ená anigá. Napu'lige mué Onorúgame tánisa napurigá nejkúramala Onorúgameka asíriga yati nejkúrame júkuru. <sup>6-7</sup> Pe iligá 'we 'la niraga tánimala mué, tabilé mayega tabilé nejkúromio, napugiti alué mayeme ka tabilé 'la nejkúromio Onorúgame, alueka napurigá ba'wí a'nagumi o'towame 'mi wa'lú ba'wí ilígichi, alarigá ju. Alueka pecha 'yáwili júkó <sup>8</sup> Onorúgame alué Onorúgame nila. Alué ralámuli bilé rawé bilé nóchali nochálime 'nátame 'lige uché melénala uché bilé nóchali nochálime 'nátame, alué ralámulika tabilé siné 'la sébali 'nátame ju.

<sup>9</sup> Bilé ralámuli Onorúgame oyérame tabilé nígame, Onorúgame niríká 'we najtégame ju, alueka asíriga 'la ra'sálámili júkuru napugiti Onorúgame oyérame kame. <sup>10</sup> Bilé ralámuli Onorúgame oyérame 'we enomígame nisa, aluéchigó abiena 'we 'la ganílga asimeli júkuru napugiti Onorúgame oyérame kame, alueka pecha ra'íchámili júkó 'we enomígame ko. Alué enomika pecha anáchame kame, alué 'we nígame ka pe napurigá gajsalá sewalá alarigá ju.

<sup>11</sup> Rayénali chíbame ju bilé sewachi 'lige rajtágame eká 'lige 'ma wakiame ju alué sewá 'lige wijchime ju alué sewá, 'liko 'ma tabilé semátiri ju alué sewá. Alarigá ikime ju alué 'we nígame. Pe abiéniko neraga tabilé niga asibámala napu ni.

<sup>12</sup> 'We ra'sálagá ajtíame ju bilé rió napu 'la anáchame ju rekó resí ikíe. Napu'lige 'la anachásaká bilé ralámuli Onorúgame 'la gu'írimala napurigá 'la ra'sálagá bejtélamala alué rió.† Onorúgameka asíriga 'la 'yámoríle semati raweli suwábaga ralámuli napu ekí 'la oyeri Onorúgame.

<sup>13</sup> Napu'lige nochánilia chátiri nóchali pecha regá aníame júkó: «Onorúgame 'smi ne'chí tabilé 'la nocharia.» Tabilé alarigá ju. Onorúgameka tabilé chátiri nochánilia ajtí, nibilé siné 'yame ju Onorúgameka 'nátili napurigá bilé ralámuli chátiri na'támala. <sup>14</sup> Chátiri 'nátili nerú, alué napu buyame ju napu'lige tabilé Onorúgame 'yuga 'nata mochírighi. 'We 'la semátiri kárélamala alué 'nátili, nobi oyérisiká alué 'nátili se'wináchigo nokináliwagó ramué. <sup>15</sup> Napu'lige ye chátiri 'nátili oyérisiga a'lígeko 'ma se'wináriga 'sika ilírome niwa. Napu'lige asíriga iwégame cha'pigá mochírighi ye chátiri 'nátili 'liko 'ma tabilé gainawa ramué Onorúgame oyeria, 'liko 'ma Onorúgame saíla niwa.

*Jena ruwimela 'la oyérilime ko Onorúgame ra'íchálila*

<sup>16</sup> 'Emi Onorúgame oyérame napurigá ne, neka 'we galé 'emi. 'We 'la na'tawa, tase se'winá nokiboa mayega tabilé machimeo Onorúgame se'winá nokachi 'emi. <sup>17</sup> Suwábaga 'nátili 'we a'lala, pe Onorúgame nejí, aminami alué Onorúgameka pecha siné se'wináriga 'nátame júkó.† <sup>18</sup> Onorúgameka 'la bi'wéleku ramué alawala bo'né nila ra'íchali gite, napurigá Onorúgame 'kúchila niwa napurigá bajchá o'chérigame 'kuchi. Alarigá najkile bo'né.

<sup>19</sup> 'Emi Onorúgame oyérame napurigá ne, neka 'we galé 'emi. Apílipi ralámuli asíriga 'la 'nátame nímili júkuru napurigá gepúmala bilé ra'íchali, pecha tabilé 'nátiga ra'íchámili júkó, aminami tabilé oparúgame nímili júkuru. <sup>20</sup> Bilé rió opurúgameka tabilé gayéname ju bilé nóchali newá napu Onorúgame najkí. <sup>21</sup> 'Liko asíriga 'la nirálime júkuru Onorúgame 'lige aminami 'ma se'wí pákime júkuru alué chátiri 'nátili, 'lige aminami 'la narékime júkuru alué 'la bijchía ra'íchali napu Onorúgame nejlle. Ye ra'íchalite Onorúgameka bi'weme júkuru ramué alawala.

\* **1:1** 'Enesi glosario «Cristo» 'lige «Jesús». † **1:12** Santiágoa ye ra'íchali osale griego ra'íchaga regá anime «corona de la vida». ‡ **1:17** Santiágoa ye ra'íchali osale griego ra'íchaga regá anime «Padre de las luces» napu aníame kéré Onorúgameka 'we 'la etea ajtigó suwábaga tábiri chonoká mochigo a'pílipi ralámuli, 'lige 'we 'la machigá ajtigó suwábaga 'nátili napu ekí 'nata mochí a'pílipi ralámuli.

<sup>22</sup> We'ká ralámuli pe eligá gepume ju Onorúgame nila ra'íchali 'lige tabilé e'wame ju napurigá aní Onorúgame ra'íchálila. 'La e'wilime júkuru. Ralámuli tabilé e'wámeka Onorúgame nila ra'íchali, alueka resí ikí bo'nepi chojkila gite. <sup>23-24</sup> Onorúgame ra'íchálilaka machirime ju aliena chátiri nóchame ko alué ralámuli, 'lige alué ralámulika pe abiéniko tabilé néláme ju napu anílige Onorúgame, alésíko 'ma tabilé sébali olame ju napurigá aní Onorúgame ra'íchálila. <sup>25</sup> Ye ra'íchalika 'we 'la sébali ju, tabilé 'yégalí. Bilé rió napu gepume ye ra'íchali, aminabi 'la oyérame, tapsiné we'kávame, 'lige 'la sébali olame napurigá aní ye ra'íchali, 'liko alué rioka asíríga 'la ra'sálagá nochámala apiépiri nóchali napu ekiana nocha.

<sup>26</sup> Bilé rió mayeme nisa bo'né 'la bi-jchiá Onorúgame oyérame ko 'lige tabilé 'la na'tasa napu'lige ra'icha bilé ra'íchali,\* 'liko alué rioka pe bo'né najsuíka 'smi peka 'la bijchiá Onorúgame oyérame ke. <sup>27</sup> 'La Onorúgame oyérame níriká 'la kógilime ju tábiri napu resí la mochí u'kuchítiri tabilé e'yégame 'lige umugí gunámakame tabilé niga mochisa bilé tábiri napurigá go'ame 'lige 'we chálagá mochisa, 'lige tabilé chátiri 'nátíli na'tálime júkuru napurigá 'nátame ju alué Riablo (Remónisi) oyérame ralámuli. Onorúgameka 'we semátiri korí ye nóchali, tabilé chátiri korí.

## 2

*Jena ruwimela 'we 'la niraga etélime ko suwábaga ralámuli*

<sup>1</sup> 'Emi Onorúgame oyérame napurigá ne, alué Wa'lula Esukristo Onorúgame 'yuga ajtí, 'la oyérasa nilisaká Onorúgame, pecha abé nerálime júkó jaré ralámuli me'tigá uché jaré, suwábaga re'wániga na'temápua. <sup>2</sup> Bilé rió bajkisá re'obachi 'we 'la o'páchigime 'lige 'we najteme u'tá chijítulame anío u'chágame makúsachi 'órote newárigime 'we semati 'lige bajkisá bilé rió tabilé nígame, asíríga chí'wágame o'páchigime, <sup>3</sup> 'lige 'emi etesa alué rió 'we semátiri o'páchigime ko, 'lige anesa 'emi: «Jena asiboa 'we a'lá mutélachi», 'lige anesa 'emi alué rió tabilé nígame: «Alé 'na guwánaka ilibógó», o regá anesa ma: «Jena wijchí asiboa», <sup>4</sup> alésíko 'ma se'winá noká 'emi. Asíríga resí olá 'emi alué ralámuli. Asíríga galegá eté 'emi bilé 'lige uché bilélaka tabilé galegá etiá 'emi.

<sup>5</sup> 'Emi Onorúgame oyérame napurigá ne napu ne 'we najkí, 'we 'la gepuwa ye. Onorúgameka suwábaga ralámuli tabilé nígame wanápale jena wijchimoba

mochígame napurigá alué ralámuli tabilé nígame 'la semáriga oyéramala Onorúgame. Alué tabilé nígame narémili júkuru alué semátiri 'nátíli napu Onorúgame nejímili ju. <sup>6</sup> 'Emika tabilé na'temale ralámuli tabilé nígame. ¿Tabilé alué rió 'we nígame noká resí olá alué ralámuli tabilé nígame 'lige bilénami e'wélala mochígichi o'toa wejpisomia rejcholi 'yamia? <sup>7</sup> ¿Tabilé alué ralámuli 'we nígame noká gawelia alué ra'íchali napu Onorúgamete 'yáliku 'emi?

<sup>8</sup> 'Emi 'la sébali olásaká, 'la sébali napurigá aní Onorúgame ra'íchálila, regá anime: «'La 'we 'la ganílega etewa alué a'bemi epperégame 'lige mejká epperégame ralámuli napurigá na'temame ju mué bo'nepi», 'liko asíríga 'la semá nokimela 'emi. <sup>9</sup> 'Emi abé na'temásaká pe jaré ralámuli me'tigá uché jaré, 'liko 'we resí noká 'emi. Alésíko 'we chátiri alawégame gayena 'emi. <sup>10</sup> Bilé rió amulí suwábaga sébali olasa Onorúgame nulalila 'lige pe'tá se'wináriga nochasa, 'liko abirigá resiti raweli narémala alué rió. <sup>11</sup> Onorúgame napu regá anile: «Tase we'ká umugí 'yuga okópua», pe aba alué Onorúgame anile regá anía: «Tase me'liboa uché jaré ralámuli.» Tabilé we'ká umugí 'yuga okópua aminami tabilé we'ká rió 'yuga okópua umugí níriká, 'lige me'lisuga bilé ralámuli 'liko 'ma abirigá tabilé 'la bi'ígime alawégame niwa. <sup>12</sup> 'Emika ra'íchámili júkuru 'lige nochámili júkuru napurigá alué ralámuli napu 'we 'la sébali olámili ju napu Onorúgame nulá. Alueka nuláguru bilé 'nátíli napu buyáname ju ramué alé chátiri bowechi. <sup>13</sup> Apiépiri ralámuli tabilé galegá eteme uché jaré ralámuli, alueka resiti raweli 'yama Onorúgame tabilé na'temaka. 'La nirásaká 'emi ralámuli 'liko 'la tabilé chátiri nóchigame neraga gu'írowa 'emi Onorúgamete.

*Jena ruwimela 'we 'la sébali oliame ko napu ra'ichalia bo'né*

<sup>14</sup> 'Emi Onorúgame oyérame napurigá ne, ¿chiena 'la ju Onorúgame oyérame koría 'lige tabilé sébali olame níriga? Rekó alarigá na'talie tabilé sebawa alé 'pa rewagachi. <sup>15</sup> Bilé ralámuli Onorúgame oyérame sebasa 'emi epperélachi, 'lige 'we resitiri o'páchigime nisa, 'lige tabilé nutugégeme nisa, <sup>16</sup> 'lige 'emi regá anesa: «'We iwega enawa boichimi, tase ukiwiga 'lige aminami tase e'luíka», ¿'lacha 'la nimalawé alarigá anilía bilé ralámuli peka 'la kógilie go'ame alué 'we resitiri o'páchigime tabilé nutugégeme napurigá go'mela boichimi? <sup>17</sup> Onorúgame oyérame korisuga, 'lige tabilé gu'írame níriga

§ 1:23-24 Santiágoka anime osale jaré ralámuli ko pe napurigá alué ralámuli napu espéjochi e'néname ju pala chinaga eyena mo'ola 'lige pe yati tabilé néláme ko chinaga eyenio mo'ola.

\* 1:26 Yolí ra'íchiga ka anime chujkú ye osili napu Santiago osale 'we 'ya napu regá aní «no freno su lengua».

ralámuli, liko pe laniboa peka Onorúgame oyérame níriga.

<sup>18</sup> Siné kachi bilé 'emi animéremá: «Mueka 'we 'la oyérame kori Onorúgame, neka pe 'we 'la nóchame ju Onorúgame nochálila.» Lige neka aní: «Mué tabilé 'la sébali olasa nóchali napu nulame ju Onorúgame, tabilé machí pala 'la Onorúgame oyérame ko mué. Neka 'we 'la sébali olame ju nóchali napu nulá Onorúgame, alekeri mué níriga 'la ma'chígime nérékuru 'la semáriga oyérame ko ne Onorúgame.» <sup>19</sup> Mueka 'we 'la bijchígime ju pe bi'lepi ko Onorúgame 'pa rewagachi ajtígime. 'We a'lá ju alarigá na'talia. Nobi Remónisika abienachigo alarigá 'nátame júkó, lige noli 'áwilia mochime ju majaga. <sup>20</sup> Mueka 'we riólame júkuru. ¿Tacha machináligo mué tabilé 'la ko pe 'nátaga ilírome níriga tabilé 'la sébali olagá? <sup>21</sup> Onorúgameka etele Abraámi ramué rijimála 'we 'ya ajtígime\* napurigá 'we a'lá rió napugiti Abraámika 'we 'la sébali e'wáligame napu Onorúgame nulele. Abraámika amulí me'ale e'kósiga bo'né inolá Isaki rewégame Onorúgame kógimia 'la sébali e'wagá napu nulele Onorúgame, alé napu ajágame sa'pala e'kósilime nile Onorúgame kogia. Onorúgameka alarigá nulele alué Abraámi machináliga pala 'la e'wara alué Abraámi, 'lige Abraámika 'la e'wale, 'lige Onorúgameka tabilé elile napurigá me'limela bo'né inolá. Alésíko Onorúgameka pe bilé bo'á 'yale napurigá Onorúgame kógimála.† <sup>22</sup> 'We 'la ma'chígime nélé alué Abraámi 'we 'la nírame níriga Onorúgame, aminami 'we 'la sébali olame níligo napurigá anílige Onorúgame. Napu lige e'wasa napu nulélige Onorúgame, liko abéchigo 'la bijchígale wa'lú a'wali nígame ko Onorúgame. <sup>23</sup> Asíriga 'la sébali olale napurigá aní Onorúgame ra'ichálila napu regá aní: «Abraámika 'we 'la oyérame nile Onorúgame 'lige Onorúgameka asíriga 'la sébali rió neraga etele.» Alekeri Onorúgame oyérame anéliru alué rió.‡

<sup>24</sup> 'Liko ma'chígime nérékuru bilé rió 'la Onorúgame oyérameka 'la sébali olámili ko napu 'nata, 'lige tase pe 'nátacho asimeli ko tabilé sébali olagá napu 'nata. 'La sébali olásaká, 'la sébali rió níraga etémala Onorúgame.

<sup>25</sup> 'We 'la na'tawa napurigá alué mukí napu Rajabi anilime nílige napu asíriga 'ya ajtígime nílige. Alué mukika asíriga we'ká rió 'yuga gojchime nile, 'lige Onorúgameka 'la ku e'kale napugiti alué mukika alué oká rió israelita gu'íriligime napurigá júmasimála alé we'ká riógachi mochiga Jerikó anilichi. Alué ralámuli alé mochígime

'ma me'linálichi alué oká rió.§ <sup>26</sup> Bilé rió sa'pálachi tabilé i'télasa alawá, liko pe mukúgame nímalá alué rió. 'Lige alué rió abiena Onorúgame oyérame kórisá 'lige tabilé siné sébali olame nisa alué rió napu najkí Onorúgame, liko pe 'nata ajtí alué rió 'we 'la sébali oliame nobi tabiléchigo 'la sébali olagó. 'Liko pe napurigá bilé mukúgame pe alarigá nímalá, pe chátiri alawégame, pe jami chonárale eyéname.

### 3

*Jena ruwimela tabilé na'loga ra'ichálime ka bilé ra'ichali a'lala uché bilé ra'ichali chátiri 'yúriga*

<sup>1</sup> 'Emi ralámuli Onorúgame oyérame napurigá ne, 'we 'la na'tawa bajchá ta'chó nochalia rejcholi ruigá einalia ralámuli. Suwábaga napu ekí beníriame ju, alueka 'we a'lá nochámili júkuru Onorúgame nochálila. Onorúgameka a'wágame gastigáromála me'tigá uché jaré tabilé rejcholi nejime se'winá 'sisaká alué rejcholi nejime. <sup>2</sup> Asíriga we'sá pe chibi anigá inárumé júkuru. Bilé rió 'la sébali olame nisa napu nulá bo'né 'lige tabilé se'wináriga ra'ichame nisa, liko alué rió 'la sébali rió nímalá tabilé se'wináriga 'nátaga eyéname, napugiti alué 'nátíluka kame napurigá alué «freno» bilé gawé ujchalime chu'álachi. 'La na'táluka 'la Onorúgame 'yuga inálime kéré. <sup>3</sup> Bilé «frénote» bilé gawé 'la e'wame ju, 'la a'kabá simime ju. Yeka aníame júkuru: 'La repúlime ko bo'né chu'ala napurigá 'la o'wé ra'icháwempá, nobi tabiléchigo gainárumé júkó ramué 'la a'boi chu'ala ne'ochalia nibilé «freno» ujchalía napurigá 'we ra'ichawa nobi 'la na'tálíká 'la napurigá «freno» ujchalía bo'né chu'ala, alarigá ju. 'Wéchigo 'la ra'ichame kame 'la na'tálíká. <sup>4</sup> Pe a'chigóriga ju barko ba'wichí e'yéname, asíriga wa'lú nisa bilé barko asíriga a'wágame chíbame ju eká, nobi bilé rioka 'láchigo a'nagumi gu'lichame júkó alué barko pe bilé igú chijpérigame, napurigá 'la o'wé simela alué barko.

<sup>5</sup> Pe a'chigóriga ju ramué chu'álachigó,\* asíriga utá ju nobi asíriga we'káchigo chátiri ra'ichali ra'ichame kéréko 'lige tabilé 'la na'táluka asíriga riólaga ra'ichárumé ju 'lige alésíko pe na'áwali gayéname ju alué ra'ichali. 'Liko alué ra'ichali napu ra'ichame níru ayósiga, napurigá bilé na'í alarigá ju, bilé na'í rojasárale wijchisá suwábaga rojasá rajínime ju asíriga we'lé. <sup>6</sup> Ramué chu'ala pe napurigá bilé na'í alarigá ju, asíriga enátiri ra'ichali buyame ju ramué chu'álachi, alarigá ra'ichásiká ramué napurigá bikágame sa'pégame níwa ramué.

\* 2:21 E'nesi glosario «ancestor». † 2:21 E'nesi Génesis 22:1-14. ‡ 2:23 E'nesi Génesis 15:6. § 2:25 E'nesi Josué 2:1-21. \* 3:5 Santiágoka tabilé chu'ala olagá anime ke anile, alueka pe inalá olagá anile.

Remónisi nuláguru ye suwábaga. <sup>7</sup> Apiépiri ralámuli 'la umébame ju tabilé majalégame newá suwábaga napu ekí ajágame jami oyame ju, ajágame 'we jobátigame 'lige ajágame ba'wichí ejperégame. <sup>8</sup> Nobi tabiléchigo 'wesi umébago 'la o'wé ra'íchame newá a'bopi ralámuli chu'ala. Alué chátiri ra'íchame chu'á asrīga chátiri ju napu tabilé 'wesi ralámuli umébame ju 'la o'wé ra'íchame newá, alué ra'íchali aleké chu'achi buyame napurigá nayulí alarigá ju, bilé ralámuli nayupasa alué nayulite uchéchigo jaré ralámuli chujkeme ju. A'liko bilé ralámuli chátiri ra'íchali ra'íchasa, uché jaré ralámuli chátiri ra'íchali ra'íchame júchigó. <sup>9</sup> Abaleké chu'ate i'sínimi regá aniname ju: «Onorúgameka 'we 'la nejkúrame ju.» 'Lige i'sínimi pe gawéliga ra'íchálime ju uché jaré ralámuli olagá rekó 'la Onorúgame 'kúchila kachi. Tabilé 'wesi ralámuli gawéliga ra'íchátékuru. <sup>10</sup> Pe abaleké chu'achi ma'chínime ju 'we 'la semátiri ra'íchali 'lige alué chátiri ra'íchali abiena. 'Emi Onorúgame oyérame napurigá ne, tabilé alarigá nisa 'la ju. <sup>11</sup> 'We 'la na'tawa, ba'wí bajílime 'lige chátiri ba'wí tabilé bajilime tabilé bi'lénapi bajisóchika ma'chínigame ju.

*Jena ruwimela napurigá 'we 'la námapua Onorúgame na'tálila 'lige riablo na'tálichigó*

<sup>12</sup> 'Emi Onorúgame oyérame napurigá ne, bilé chunachi tabilé masana rakala rakeme ju, 'lige bilé i'wílí bantálíchi tabilé chuná rakala rakeme ju, nibilé bilena 'we a'lá bajíchi oná na'lógame ba'wí ma'chínamala.† <sup>13</sup> Bilé 'emi rejcholi beníríame nisa, asrīga 'la semátiri ralámuli júkuru alué nóchali nígame 'lige tabilé gawélimili júkuru alué rió uché jaré ralámuli olagá. Alué rioka 'la sébali olámili júkuru napurigá beniría alué bo'né. <sup>14</sup> 'Emi 'we najkuélime nisa 'lige pe a'bopi koruka nokisá, pe enomí méniliga, 'liko tabilé ra'sálá mochiwa 'we jebénigame kóriká rejcholi beníríga alarigá na'tálíka, pe tabilé 'la semáriga 'nátaga benírimala 'emi. <sup>15-16</sup> Bilé rejcholi benírílika tase napurigá 'la nulá Onorúgame, alué rejchólíka pecha Onorúgame nila júkó. Alué rejchólíka pe alué uché jaré ralámuli cha nokame alué nila ju, alué ra'íchálíka pe Remónisi nila ju, napu'lige 'we najkuelia mochígichi ralámuli, pe na'áwali nerúgame kame alemi. <sup>17</sup> Bilé ralámuli 'we 'la benégame Onorúgame rejchólíla beníríga Onorúgame gite, alué ralámulíka asrīga 'la sébali ju, 'lige asrīga 'la gu'írome ju ralámuli napurigá 'la sébali nímala tabilé we'ká 'nátame, tabilé a'wágame nulame ju, alueka 'we rejchírúgame ju bilé ra'íchali gepúlíchi uché jaré ralámuli ra'íchachi, 'la nejkúrome

ju gatélíchi napu'lige tabilé o'wé enágichi bilé nóchali, 'la nejkúrome ju napu'lige bilé ralámuli nejkúrálí táachi, 'la semátiri nóchali nóchame ju, 'la tabilé na'temame ju abé pe jaré ralámuli me'tigá uché jaré 'lige 'la tabilé se'wináriga 'nátame ju napu aní. <sup>18</sup> Ralámuli 'we 'la sébali, alué napu gu'írome ju alué uché jaré ralámuli, alueka asrīga 'la semátiri raweli narémala. Suwábaga 'we 'la nóchali 'we a'lá buyame ju napu'lige 'we 'la semáriga 'nátaga e'yénachi ralámuli.

## 4

<sup>1</sup> ¿Koché o'wime ju nakolí? 'Lige ¿Koché o'wime ju na'áwili? Ma'chínime júkuru napu'lige bilé ralámuli tabilé 'la 'nata ajtígichi. <sup>2</sup> 'Émika asrīga najkiá mochime ju napu tabilé 'emi nila ju, 'lige me'ame ju 'emi uché jaré ralámuli neyúruga mochíniliga nobi tabiléchigo siné sebárame júkó napu najkí 'emi a'boi, pecha ra'íchame kame tániga 'emi Onorúgame. <sup>3</sup> Napu'lige tani 'emi Onorúgame, tabilé nareme ju 'emi napugiti pecha 'la suériga tánime kame 'emi. 'Émika pe tánime júkuru napurigá 'nata 'emi a'boi. Tabilé oyériga tánime ju 'emi Onorúgame. <sup>4</sup> 'Émika Onorúgame oyérame korí nobi péchigo Remónisi na'tálíla 'nátame júkó 'emi. Tabilé machí 'emi, Onorúgame saíla neraga e'yenia napu'lige chátiri 'nátili 'nátaga e'yénachi 'emi napurigá 'nátame ju alué tabilé a'lá 'nátame ralámuli. <sup>5</sup> ¿Mueka 'nata tabilé bijchiá ko Onorúgame ra'íchálíla alué ra'íchali napu aní 'we neyúruga asinalio Onorúgame Alawala napu Onorúgame nejile? Tabilé najkió napurigá uché bilé 'nátili oyérawa. <sup>6</sup> 'Lige Onorúgameka 'we 'la nejkúruga ajtí cherajpé nejime júkuru nejkúrálí aminami 'we ganílíga. Aminami regá aní Onorúgame ra'íchálíla: «Onorúgameka 'we gichí alué 'we riólame ralámuli. 'We 'la gu'írome ju alué 'we i'kilí ralámuli.»\*

<sup>7</sup> Alekeri 'la e'wílíme júkuru Onorúgame. 'La Remónisi saíla neraga na'tálíme júkuru, a'liko alué Remónisi 'ma 'másamala. <sup>8</sup> 'We 'la níruga oyérowa Onorúgame, 'liko Onorúgameka 'we 'la repúmala 'emi. 'Emi resítiri 'nátame nisa 'ma se'wí pápua alué chátiri 'nátili. 'Emi Onorúgame oyérame aminami 'we korume e'karúgame tábiri jena wijchimoba nerúgame, 'la bi'lepi 'nátili 'nátame niwa 'nalina, pe Onorúgamecho 'la oyériga. <sup>9</sup> 'We seweka mochílíme júkuru Remónisi na'tálíla oyérame níriká, 'lige aminami nalápua, tase achiá mochiwa, tase ra'salagá mochiwa. <sup>10</sup> 'Mí pápua alué chátiri 'nátili napu'lige ra'íchalia Onorúgame 'yuga,

† 3:12 Ye ra'íchálíka ruwime kéré tabilé 'la ko 'we semátiri ra'íchali ra'íchalia 'lige pe a'kinana ra'íchalia chátiri ra'íchali.

\* 4:6 E'nesi Proverbios 3:34.



a'liko Onorúgamete 'yawa 'emi alué iwérali 'we 'la sébali rió kóriká 'lige 'we 'la nirame.

*Jena ruwimela 'la sébali rejcholi 'yalime ko uché jaré ralámuli napu'lige se'winá nokachi*

<sup>11</sup> 'Emi Onorúgame oyérame napurigá ne, tase najkuéliga ra'ichawa 'emi a'bopi. Aminami tase ne'óchiga einawa ralámuli tabilé chérikáme níriká alué ralámuli 'yuga. 'Lige ne'óchiga e'yéname nísaká 'emi pe apiépiri ralámuli peka chérikáme ke 'emi si, 'liko pe gawélinti kárélamala 'emi alué nulali napu Onorúgame nejlle. Alésíko 'ma tabilé sébali olame kérélamala 'emi napu nulá Onorúgame, alésíko pe napurigá bilé wa'lula ra'ichali gateme kérélamala 'emi. <sup>12</sup> Pe bi'lepi ju napu newale alué nulali, 'lige pe alué bi'lepi ju napu animela pala 'la gastigo narémili ko bilé ralámuli. Pe Onorúgamecho júkuru napu umébame ju ralámuli ma'chí pa gastigo bo'ígichi rewagachi julamia, 'lige pe aluecho ju napu júlame ju injierno. †Chieri júkó 'emi napurigá pe ne'óchiga e'yénamala apiépiri ralámuli peka chérikáme kachi napurigá alanokigá e'yénamala 'emi?

<sup>13</sup> 'We 'la na'tawa, jaré 'emi anime ju: «jipe o be'lí kómá simawa alé we'ká riógachi bilé bamí mochiwa ramué alé, 'lige nocha mochiwa ramué alé, 'lige ralineá suwábaga e'karúgame tábiri napu muruka simawa ramué alemi, 'lige asrīga we'ká mépua enomí 'lige e'karúginti tábiri.»

<sup>14</sup> 'Émika pecha machígó alakimeo be'limi. Siné kachi bajchabé suwibóréma. Pe napurigá bilé molí nírukuru ramueka, bilé molí pe'wera 'la ma'chí ename ju, pe abiéníko tabilé ne ikime ju. <sup>15</sup> Abé 'la ju aniá: «Onorúgame 'la nejsáká raweli 'la nochawa napu nochánili ramué.» <sup>16</sup> Nobi 'émika 'wéchigo riólame júkó senibí 'we 'la gainamio mayeme ju bilé nóchali napu nocha 'emi. Tabilé 'la ju alarigá na'talia, wa'lú gastigo rewiame ju ala'simía. <sup>17</sup> Bilé rió 'la machime nisa churigá nulao Onorúgame 'lige tabilé 'la nochasa, alueka wa'lú gastigo rewá ajtíkuru.

## 5

<sup>1</sup> 'We 'la na'tawa 'emi ralámuli 'we nígame níriga, 'la nalápua 'lige aminami sinápua chálagá napugiti 'we resí ikimeli kame 'emi. <sup>2</sup> We'ká e'karúgame napu 'emi niga mochí jipe tabilé 'la ju. 'Lige 'emi o'páchila 'ma chí'wale, tabilé 'la ju, 'ma e'wasole. <sup>3</sup> Alué 'oro 'lige alué plata 'emi nila 'ma bemorósigame ju\* 'lige aba pe alué 'oro 'lige plata gite 'we ená ikimela 'emi. 'Emi 'we nígame gayénale pe kulí jipe 'ma guwichimi,

'ma pe'wemi 'ma tané ikimela suwábaga ye gawí. <sup>4</sup> 'La néláwa tabilé najtétligo 'emi alué ralámuli nochárisa go'ame 'wíriga. Alué ralámuli 'wígameka nalá mochíkuru jipe mué la'síkiriká, 'lige Onorúgame 'ma akele, alué napu santo ánjeli sontalo nuleme ju. <sup>5</sup> 'Émika asrīga we'ká tábiri nígame júkuru jena wijchimoba, pecha resí níliga mochiko 'emi. 'Émika pe bajiga e'yéname júkuru echúromi, 'émika asrīga wa'lú gastigo napabúguru, alekeri gastigáriwili júkuru 'emi Onorúgamete. <sup>6</sup> 'Emi ralámulika tabilé nígame galírale mo'álekuru alésíko 'ma me'álekuru 'emi alué 'we 'la nóchame ralámuli, 'lige alueka tabilé nemile rekó me'liae.

*Jena ruwimela 'we 'la nátaga inálime ko tabilé ayoga*

<sup>7</sup> Alekeri 'emi Onorúgame oyérame 'we 'la anachámili júkuru 'emi napusí alué Wa'lula Onorúgame (Esusi) ku seba. 'La 'we 'la na'tawa churigá nokame ka we'echi echame. Tabilé jigame ju napu'lige pe kulí siné seba u'kí 'lige a'kinánami napu'lige raké, 'la i'kilí e'yéname ju tabilé jigaga. <sup>8</sup> 'Emi 'la i'kilí buwémili júkuru, 'la bi'lepi 'nátaga rejplíime júkuru pe Onorúgamecho 'nátaga 'we 'la nélagá. Tabilé we'ká rawé rokáré napurigá sebámala alué Onorúgame. <sup>9</sup> 'Emi Onorúgame oyérame, tase najkuéliga ra'ichawa 'emi a'boi ralámuli. 'Emi alarigá nokisáká, Onorúgameka 'emi gastigárimala. 'We 'la 'nátaga, alué napu gustisia olámili ju 'ma buigá ajtí o'inamia gustisia olá. <sup>10</sup> 'Emi Onorúgame oyérame, 'we 'la na'tawa churigá níligo alué 'ya mochígame ralámuli napu ruwime nile napu anele Onorúgame. 'We 'la ma'chígame nérékuru 'we 'la anáchaga mochíligo tabilé resí anigá rekó resi oliáe. <sup>11</sup> 'We 'la na'tawa, alué 'la anáchameka asrīga 'la ra'sálagá mochime kámpué. 'Emi 'la machí churigá anáchiligo alué 'ya bejtégame rió napu Jobi anilime níligo napu 'we 'la anáchale rekó resi ikíe. 'Emi 'we 'la machí 'we semati raweli 'yáligo Onorúgame napu'lige alué rió anachasa. Onorúgameka asrīga na'temame ju suwábaga ralámuli jena wijchimoba mochígame.†

*Jena ruwimela 'la ra'ichálime ko Onorúgame yuga*

<sup>12</sup> 'Emi Onorúgame oyérame napurigá ne, napu'lige 'emi 'la sébali olánilisa bilé nóchali tase regá aníboa: «Alué rewagá 'la gu'írisa 'la kékuru ne'chí», regá ma: «Ye gawí ne'chí 'la gu'írisa, 'la kápá», napurigá nokame ju ralámuli jurío. Pe regá aníboa 'nalina: «Neka 'la bijchiá 'la sébali olámala», 'lige 'la sébali oliame júkuru. Pe echilú aniame júkuru, tase re'pá ajchigá ra'ichawa.

\* 5:3 Alué 'oro 'lige alué plata napu nerúgame nile 'we 'ya, napu'lige Santiago osale ye osilí, bemorósame nile.

† 5:11

E'nesi alué libro napu Job anilime ju alé Antiguo Testaméntochi.

<sup>13</sup> 'Emi níríga cha ikisuga yati ra'ichálime júkuru Onorúgame 'yuga iwérali tániga. 'Lige 'we ra'sálagá mochíríká 'liko wíkará mochiwa Onorúgame nila wíká. <sup>14</sup> Bilé ralámuli tabilé nílísaká a'walí bilé rawé 'we nayua bo'ísá 'lige tabilé gainasa 'la 'nata, yati bayémili júkuru alué e'wélala Onorúgame oyérame nuleme napurigá nawámala, 'lige napurigá ra'ichámempá Onorúgame iwérali tániga, olibo rakala wi'íla ujchegá mo'ólachi alué nayume napurigá Onorúgame 'la 'yámempá iwérali. <sup>15</sup> 'Lige alué e'wélala jurío ralámuli nuleme 'la 'we 'la oyériga 'lige 'la bijhígiga tánisa Onorúgame, 'la yati nejkúrome ko Onorúgame, a'liko 'la yati sa'wimela alué nayume. 'Lige alué nayume resí 'sika ilírome nisa napu'lige 'we 'la oyériga tánisa, Onorúgameka 'la e'kámala. <sup>16</sup> 'La ruwame júkuru 'emi a'boi napu'lige se'winá nokísá. 'Lige 'la tánilime júkuru Onorúgame napurigá 'la e'kámala mué gompaniérola napu'lige alué mué gompaniérola se'winá 'sisa, napurigá 'la sa'wimela 'lige napurigá 'la Onorúgame 'yuga na'támala. Bilé rió 'we 'la rió nisa 'la Onorúgame oyérame, napu'lige tánisa Onorúgame iwélali napurigá 'la e'kámala se'winá 'síkame rió, 'liko Onorúgame 'we 'la e'weme júkuru. <sup>17</sup> Alué rió 'ya bejtégame napu Elíasi anilime nilige, alué rioka pe napurigá ramué nile. 'Lige alueka Onorúgame tánile napurigá tabilé u'kumela, 'lige tabilé u'kule jena Israeli bakiá bamí miná nasipa. <sup>18</sup> 'Lige a'kinana tánile uchéhigo siné Onorúgame napurigá u'kumela a'lige 'la u'kule, 'lige asíríga 'la rakele go'ame.†

<sup>19-20</sup> 'Emi Onorúgame oyérame napurigá ne, alué rió napu 'la rejcholi ruyeme ju alué 'we chátiri 'nátame rió napu pe chátiri bowechi eyena, alué rió rejcholi ruyame ka 'la ma'chí pame ju alué chátiri 'nátali. Alué rió napu 'we resítiri 'nátaga eyénilige 'ma tabilé resítiri 'nátaga einámala, 'ma tabilé chátiri bowechi.

Pe ikí kápá ye ra'íchali. Wa'lú cheliérabá.

† 5:18 E'nesi 1 Reyes 17-20.

## Ye Ju Alué Apeli Bajchá Osirúgime Napu Osale Pegro

*Kuira suwábaga 'emi ralámuli Onorúgame oyérame.*

<sup>1</sup> Ne Pegro Esukristote 'yárigame ju nóchali napurigá nulame nímalá ne 'lige napurigá einámala ne ichúrimi ralámuli beníruga Onorúgame nila ra'ichali. Reporali náwala ne suwábaga 'emi napu mochí jipe ichúrimi se'wí napu tase 'la 'emi a'boi epperélachi ju. Jaré 'emi mochíkuru jipe alé Ponto anilichi, 'lige jaréchigo Galasia anilichi, 'lige jaréchigo Kaparosia anilichi, 'lige jaréchigo Asia anilichi, 'lige jaréchigo Bitinia anilichi.

<sup>2</sup> Suwábaga 'emi oséguru ne napu Onorúgame 'ma 'la 'nata asálige bajchabéchigo 'emi wanápamia napurigá 'la e'wame nímalá 'emi napu Onorúgame najkí. Onorúgame bo'né Alawálate bi'wele 'emi alawala napurigá 'la e'wímala 'emi alué Onorúgame. 'Émika 'ma 'la bi'wígime alawégame ju napugiti Esukristo 'ma mukúligame bilena gulusíchi 'emi nila gastigo o'togá. Onorúgame 'la na'temasa 'la képa 'emi napurigá 'emi 'we 'la ganíliga epperélamala.

*Jena ruwimela Pegro ruwíligo 'la narépulikó napu Onorúgame nejímorilige*

<sup>3</sup> Senibí 'we a'lá aniboa 'we a'lá nejkúrame ko Onorúgame alué Esukristo O'nola napu ju ramué nuleme. Napu'lige Esukristo ajánasa alésí akiná 'we a'lá semáriga epperéliru ramué napugiti Onorúgame 'we a'lá na'temáligame ramué, 'lige 'we a'lá machigá mochiru 'ma 'la bi'wígime alawégame nírgo.

<sup>4</sup> Abiena 'we a'lá machigá mochiru 'we a'lá nejímio Onorúgame napu nejímorilige napu'lige moínásiga rewagachi. 'We a'lá semáriga ju, pecha se'winá ikimélagó.

<sup>5</sup> 'Émika 'we 'la bijchigi napu aní Onorúgame, alekeri Onorúgame 'we a'lá repú 'emi bo'né a'walílate napurigá 'la narémala 'emi napu Onorúgame nejílala ju napu'lige 'ma sebasa raweli napu'lige narépuli ju napu nejímorilige.

<sup>6</sup> Alekeri 'we a'lá ra'sáligá mochí 'emi, rekó i'sínimi 'we resí ikié 'emi alemi napu 'emi mochí.

<sup>7</sup> 'Émika 'we resí ikíguru napurigá 'la machimela 'emi pala 'la bijchiá 'la bijchúgame ka 'emi napu aní Onorúgame. 'Émika 'we 'la bijchigi napu aní Onorúgame. 'We a'lá ju alué 'nátili me'tigá alué 'oro. Alué 'óroka na'ichí wajsélime ju bilena sikolichi napurigá 'la bi'wígime ma'chínamala alué 'oro. A'chigóruga júkuru 'emi na'táila, Onorúgameka elame júkuru napurigá resí ikimela 'emi, 'lige 'emi tabilé

a'résaká Onorúgame oyeria rekó 'we resí ikié 'emi 'liko 'la bi'wimela 'emi a'boi alawala. Alarigá Esukristo 'we a'lá semáriga ra'ichámala 'emi olagá napu'lige uché ku nawasa jena wijchimoba.

<sup>8</sup> 'Émika 'we 'la nirame ju alué Esukristo rekó 'emi tabilé siné eteme képa, 'lige jipe 'we a'lá bijchígiga napu aní Onorúgame 'we a'lá ra'sálá 'emi, 'lige tabilé gayena 'emi ruyá chiena ra'sálá mochigo 'emi, pecha i'tigá ra'ichali alarigá aniá, <sup>9</sup> napugiti 'émika aminabi 'we a'lá námame churigá ka napu'lige 'we 'la bijchígila napu aní Onorúgame. Aminami 'we 'la bijchígiga 'emi 'we a'lá bi'wimela 'emi alawala.

<sup>10</sup> Suwábaga napu ruwime nile napu anele Onorúgame 'we a'lá machile churigá 'la bi'wime ko ralámuli alawala 'lige 'we a'lá ra'ichaturu tachiri 'yamio Onorúgame 'emi. <sup>11</sup> Kristo Alawálaka 'we a'lá machírile alué ralámuli napu ruwime nile napu anele Onorúgame chiena resí ikimeo Kristo 'lige chiena a'lá semati raweli naremio kúchigo alué Kristo abé a'kinana 'lige alué Onorúgame nila ra'ichali nareme ka 'we e'wérali olale machináluga chiéniko ikimeo suwábaga alarigá. <sup>12</sup> 'Lige Onorúgameka 'we 'la machírile tabilé pe a'boi niga ejtebimio alué ra'ichali alué Onorúgamete nulalime napurigá benírimala ralámuli. Onorúgameka machírilekuru alué bo'né nuleme ralámuli, alué nujubá epperélimili ralámuli benimeo alué ra'ichali, alué ralámuli napu narémili nile semati raweli. Alué júkuru ra'ichali napu beníriliru 'emi Onorúgame Alawala a'walílate, alué Alawá napu 'pa rewagáchika julárigame ju. Alué santo ánjeli rewagachi mochúgame 'we machinálilechigó chiéniko ikimeo suwábaga alarigá.

*Jena ruwimela Pegro ruwíligo epperélimilikó napurigá Onorúgame najkí*

<sup>13</sup> Alekeri 'we 'la 'nátaga mochiwa, 'we a'lá machigá tachiri chonoká mochigo 'emi a'boi napurigá 'la gainámala bilé nóchali. 'We a'lá machigá mochiwa 'we a'lá nejkúrimio Onorúgame napu'lige Esukristo uché ku nawasa. <sup>14</sup> 'La ganíliga epperélawa, 'la napurigá alué 'kuchi 'we a'lá e'wame. Tase epperélawa napurigá epperégame nile 'emi 'ya napu'lige ta'chó oyeria Onorúgame, tase cha nokiboa chibi nokinálisiga. <sup>15</sup> Iligá jipeko 'la ganíliga epperélawa 'la napurigá Onorúgame najkí napugiti Onorúgame napu 'emi wanápale, pecha chátiri 'nátame kame. <sup>16</sup> Aka Onorúgame nila ra'ichali regá aniché: «'La ganíliga epperélawa 'la napurigá ne najkí, neka 'la bi'wígime alawégame kame.»

<sup>17</sup> Onorúgame napu 'la sébali gastigárimo ju ralámuli tase regá anigá: «Yeka tabilé gastigárimala ne rekó resí 'síkame ke.» j'Emi «O'nó» aneme nísaká Onorúgame,

'liko 'emi 'la nírámili ju senibí rawé Onorúgame napu'lige bijí jena gawichí mochíga, <sup>18</sup> napugiti Onorúgame 'we 'la machírilligame 'emi tabilé 'la ko alué 'nátili napu beníriliro 'emi alué 'ya mochígame 'emi umúllate rekó alué 'emi umúllala 'we 'alá kolae alué 'boi na'tálila. 'Lige 'emi 'boi 'la machí tase pe tabiri tábirite najtétligo Onorúgame napurigá 'emi 'we 'alá 'nátame nímala, alueka pecha 'órote najtétilekó, <sup>19</sup> iligá Onorúgameka alué Kristo elalate najtétile, napugiti napu'lige me'lisuga alué Kristo bilena gulusichi ujchagá, alueka niligame napurigá bilé bo'á me'liame Onorúgame kógilime. Alarigá nilekuru alué Kristo. <sup>20</sup> Suwábaga ye tábiri napu ruwí ne, Onorúgameka 'ma 'la 'nata asale bajchibéchigo ta'chó newá gawí, iligá pe 'ma guwichí nawale Kristo jena wijchimoba 'we kulí. Bo'né Onorúgame alarigá 'nata asale tachiri 'la ko 'emi níríga. <sup>21</sup> 'Émika 'we 'la oyérame júkuru Onorúgame napugiti Kristo nawáligame bilena gulusichi mukumea 'emi nila gastigo o'togá 'lige aminami 'we 'la machiame 'emi Onorúgame ajalí 'yáligo alué Kristo 'lige wa'lula neraga ajcháligo alé 'pa rewagachi, alekeri 'emi 'la bijchigi napu aní Onorúgame.

<sup>22</sup> 'Émika 'we 'la bi'wígame alawégame gayénale napugiti 'emi 'we 'la e'wáligame alué Onorúgame nila ra'íchali napu tabilé 'yégalí ruwime ju. Onorúgame Alawala 'we 'la gu'írile 'emi napurigá 'la e'wímala 'emi Onorúgame. 'Liko 'la ganíliga járowa o'maka 'emi. <sup>23</sup> 'Émika napurigá uché o'chérigame alarigá júkuru, nobi tabiléchigo 'emi 'boi e'yela rojpalachigó, 'emi e'yélaka 'ma suwime ju siné rawé, 'émika napurigá uché siné o'chérigame alarigá júkuru napugiti 'émika 'la bijchígiligame Onorúgame nila ra'íchali, 'lige alué ra'íchalika senibí nerúlamala. <sup>24</sup> Aka regá aniché Onorúgame nila osilichi: Suwábaga ralámuli napurigá gajsalá alarigá ju.

Alué gajsalá jami jágame 'we 'la semati se-wame ju

nobi máchigo wakíbame júkó alué gajsalá 'lige 'ma rujsume ju alué sewalá.

<sup>25</sup> Alué Onorúgame nila ra'íchalika tabilé siné che ikime ju.

Alué ra'íchali júkuru napu beníriliro 'emi.

## 2

<sup>1</sup> 'Liko 'emi níríga 'ma tase cha noki-bo, tase 'yégame niwa, tase ne'ochawa ralámuli 'we cha nokame níriká, tase ne-jkemewa napu'lige bilé ralámuli 'we 'la nóchachi, 'lige tase rupoa uché bilénami bilé 'yégalí pe bilé na'áwali o'inániliga. <sup>2</sup> Napurigá u'kuchí 'kuchi pe kulí o'chérigame 'boi

e'yela chi'wala 'yaame júturu chi'nálíchi, 'emi a'chigóriga 'yáawachigó alué a'lala 'nátili. 'We 'la 'yaasaká 'emi alué a'lala 'nátili 'liko aminacho Onorúgame oyérame nímala 'emi 'lige 'la bi'wígame alawégame nímala 'emi. <sup>3</sup> 'Émika 'wéchigo 'la machiame chiéna 'la semáriga nejkuríme ko Onorúgame.

*Jena ruwimela Pegro ruwíligo Krístoka ko napurigá alué rejte napu ralámuli gawéliga etele*

<sup>4</sup> 'Liko aminacho abé alá oyériwa alué Esukristo napu ju napurigá bilé rejte napu ralámuli gawéliga etele napu'lige alué wa'lú re'obá newá, nobi alué rejteka abéchigo najtégame júkó, napu Onorúgame tabilé gawélele.\* <sup>5</sup> 'Yako alé re'obachi bejtégame nile Onorúgame Alawala. Jípeko ramué alawálachi pachágana ajtí, 'liko ramué niru napurigá bilé re'obá wa'lú. Ramueka niru napurigá bilé rejte alué wa'lú re'obá newárigime. Abiena nirú ramuéchigó napurigá e'wélala balé napu nóchame ju Onorúgame nila nóchalíchi. 'Liko 'we 'la eliwa napurigá Onorúgame nulémala 'emi. Bo'né Esukristo 'we 'la gu'iri napurigá 'emi 'la e'wame nímala napu aní Onorúgame. 'Lige 'émichigó a'chigóriga ju napurigá alué rejte, 'lige Onorúgame 'emi nulémala napurigá 'emi benírimala ralámuli napurigá 'la Onorúgame oyérame nímala aminacho we'ká ralámuli. <sup>6</sup> Aka regá aniché Onorúgame nila osilichi:

'We 'la e'nésibá,

ye rejte ajchámala ne jena Sioni anilíchi we'ká riógíchi,

ye rejteka abé a'lala júkuru me'tigá suwábaga che jarela,

'lige suwábaga ralámuli napu ekí 'la nirame ju alué rejte,

tabilé siné chíjúniga e'yénamala.

<sup>7</sup> 'Lige 'emi níriká napu 'we 'la bijchígame ju napu aní Onorúgame nila ra'íchali, 'we najtégame ju alué rejte, 'lige 'la tase gawéliga eté 'emi alué rejte 'we a'lala. 'Lige 'ma sebárilékuru raweli alué ralámuli napu tabilé 'la nirame nile napu aní Onorúgame. Alé Onorúgame nila osilíchi regá aní:

Alué rejte napu ralámuli nóchame pe gawéliga etele,

abé a'lala rejte ju jipe, abé alá asíbagame.

<sup>8</sup> Abiena regá aníchigó Onorúgame nila osilíchi:

Bilé rejte napu torómala ralámuli,

rejte napu ralámuli ro'ábamala.

Alué ralámuli 'ma toroka e'yena napu'lige tabilé e'wá napu aní Onorúgame nila osilí.

Alarigá gastigari Onorúgame alué ralámuli.

*Jena ruwimela 'ma 'la Onorúgamete wanáparigame níriga*

\* 2:4 Napu'lige Pegro rejte anía pe Esukristo olagá aní.

<sup>9</sup> Émika wanáparigame ju Onorúgamete napurigá Onorúgame nocháililachi nochámala 'emi. 'Emi ralámuli ju napu Onorúgame wanápale. 'Emi ralámuli 'la Onorúgame oyérame ju. 'Émika nokimela suwábaga ralámuli beniría chiena 'la semáriga nejkúrume ko Onorúgame, napugiti 'émika Onorúgamete buinárigame kame alé 'we resírikáchi napurigá 'la a'kabámána e'yénamala 'emi. <sup>10</sup> 'Yabeko 'emi tabilé wanáparigame nile Onorúgamete. 'Jípeko 'la wanáparigame júkuru 'emi Onorúgamete. 'Yabeko tabilé na'temaka etélime nile 'emi Onorúgamete, jípeko 'la na'temaka etélime ju 'emi Onorúgamete.

*Jena ruwimela napurigá 'la tabilé cha nokogá ejperéliwa napurigá tabilé che animela ralámuli*

<sup>11</sup> 'Emi Onorúgame oyérame, neka 'we galé 'emi, neka ra'íchaguru 'emi napurigá pe sígame neraga jemi wijchimoba. Neka najkíguru napurigá tabilé se'winá nokimela 'emi rekó se'winá nokinali nílisa 'emi. Onorúgame Alawálaka ku ro'ina ajti bilé ralámuli se'winá 'sínilichi. <sup>12</sup> 'We a'lá 'nátaga e'yénawa 'emi alé 'mi napu ejperé alué tabilé Onorúgame oyérame ralámuli. Rekó jipe 'we aníá mochige alué ralámuli 'we cha nokame ralámuli ko 'emi, 'lige etega alué ralámuli tabilé cha nokame ralámuli ko 'emi, arigá i'kilimi 'we a'lá semáriga ra'íchámala Onorúgame olagá, 'lige animela 'we 'la nejkúrime ko Onorúgame napu'lige Onorúgame nawachi gustisia olamía jena wijchimoba.

<sup>13</sup> 'We 'la e'wiwa 'emi napu'lige nulachi alué e'wélala napu Onorúgame mochile jena wijchimoba, 'we 'la e'wawa alué abé wa'lula selígame. (Yolí ra'íchagaká «emperador» anime chujkú alé Onorúgame nila osilíchi.) <sup>14</sup> 'Lige 'we 'la e'wawa napu'lige nulachi alué e'sélikame napu mochiárigime ju alué abé wa'lula selígame, napurigá gastigárimala alué 'we cha nokame ralámuli, 'lige napurigá 'la gu'írimala suwábaga napu ekí 'la a'ká ralámuli ju. <sup>15</sup> Aka Onorúgame najkíché napurigá 'la tabilé cha nokame ralámuli nímala 'emi 'la e'wame napurigá tabilé chibi animela 'emi olagá alué ralámuli tabilé machime tachiri najkió Onorúgame 'lige 'we gawélime Onorúgame.

<sup>16</sup> 'Émika lisenisia nígame ju napurigá e'yénamala Onorúgame nila ra'íchali beniríga ralámuli, nobi tabiléchigo regá anigágó: «Ramueka pecha ne'ocháwagó rekó chibi nokíá napugiti ramueka 'la lisenisia nígame nrigime napurigá íchúrimi e'yéniwa.» 'Émika benírímili júkuru 'la napurigá 'la Onorúgame nila nóchalíchi nóchame. <sup>17</sup> 'We a'lá niraga etewa suwábaga ralámuli. 'We a'lá niraga etewa alué ralámuli Esukristo oyérame. 'We

'la oyériwa Onorúgame. Aminami 'we 'la nirawa alué abé wa'lula selígame.

*Jena ruwimela Pegro ruwíligo Esusi tabilé chélaígó rekó resi olíae*

<sup>18</sup> 'Emi ralámuli napu nochárilime ju bilena galírale tabilé najtétiga 'we 'la niraga e'wime niwa alué 'emi a'boi batrónila. Tase pe alué batroni tabilé che anime 'we a'lá e'wime niwa, abiena alué 'we cha anime batroni 'we a'lá e'wiwachigó. <sup>19</sup> 'We a'lá júkuru anachalia rekó resi olíae 'emi peka resi nokágame ke 'emi, 'émika pe Onorúgame oyériga 'la anáchame kame. <sup>20</sup> 'Emi níriga pecha najtékame júkó anachalia napu'lige gastigárilía pe cha nokágame nísaká 'emi, pe rioksi anachálinti kárélamala. 'Emi 'we resi olíae peka resi nokágame ke 'emi, 'liko 'we 'la gu'íriwa 'emi Onorúgamete, 'liko pecha chérelamalagó rekó resi olíae 'emi.

<sup>21</sup> 'Émika Onorúgamete wanápurigame júkuru napurigá resi oláwachigó 'emi. Napurigá anáchale Esukristo jena wijchimoba 'emi alawala bi'wea, 'émichigó 'la anachawa resi olíae. <sup>22</sup> Alué Esukristoka pecha síné iníliga ilírome níleko 'lige aminami pecha 'yégalí ra'íchali ra'íchalekó. <sup>23</sup> Napu'lige Esusi jechalia 'lige chibi aníla, alueka pecha chibi anigá nejelekó. Esúsika iligá 'we 'la Onorúgame 'yuga ra'íchame nile napurigá Onorúgame o'tomela alué Esusi alawala, Onorúgame napu 'we 'la sébali gastigárima ju ralámuli. <sup>24</sup> Alué bo'né o'tólekuru ramué nila chátiri 'nátíli napu'lige me'lisuga bilena gulusíchi ujchagá, alarigá mukúlekuru napurigá ramué 'ma a'rewa cha noká. Kristoka resi oláloru napurigá 'emi alawala 'la bi'wígame nímala. <sup>25</sup> 'Yako 'emi napurigá bo'á e'wegágame alarigá e'yéname kéturu. Jípeko 'ma jsílikuru 'emi napu ajti Kristo napu ju napurigá bo'á neseme napu 'émi repume ju.

### 3

*Jena ruwimela Pegro ruwíligo churigá ejperélimili ko alué ralámuli newíkame*

<sup>1</sup> 'Emi umugí 'we 'la e'wímili júkuru rió 'emi a'boi 'yula napurigá alué rió 'we 'la etémala 'we 'la a'ká ko 'emi umugí 'la sébali olame napu nulá 'emi a'boi 'yula. 'Liko jaré 'emi 'yula tabilé oyérame nísaká Onorúgame 'la bijchígimala napu aní Onorúgame pe 'emi umugí etega 'we a'lá a'ká umugí ko 'emi 'la e'wime 'emi a'boi 'yula, <sup>2</sup> 'lige 'we 'la machimela 'we 'la e'wime umugí ko 'emi 'lige 'we 'la Onorúgame oyérame. <sup>3</sup> Umugí, tase umugígame niwa rekó 'we a'ká si'púchigame níriga 'lige 'we najteme, 'lige 'we najteme e'karúgame tábiri uchúchiga 'emi gupálachi, 'lige we'lá 'órote newárigime, 'lige goloka 'we najteme. <sup>4</sup> Onorúgame níriká pecha najtékame júkó suwábaga alué

tábiri 'we najteme. Abé alá ju 'lina 'we a'lá mukí níruga 'we alá 'nátame 'we 'la bi'wígame alawégame, alué alawaka pecha che ikimélagó. Suwábaga tábiri napu tabilé alawá ju, alueka suwíbame ju. Alarigaka 'we najtékame júkuru 'emi Onorúgame níruga. <sup>5</sup> Alarigá nile alué umugí 'ya mochígame Onorúgame oyérame 'lige napu'lige nulachi 'la e'wime nile rió a'boi 'yula. <sup>6</sup> Alarigá nile alué Sara 'we 'ya bejtégame, 'we 'la e'wime nile alué bo'né 'yula Abraámi rewégame. Regá aneme nile alué Sara alué Abraámi: «Muérigo wa'lula nulame.» 'Emi napurigá alué Sara 'kúchila kárékuru 'we 'la e'wime nísaká a'boi 'yula tabilé majaga.

<sup>7</sup> 'Emi rió umugí 'yúgame a'chigóruga níwachigó 'emi a'boi 'yula umugí 'yuga, 'we 'la na'temápua, 'we 'la nirawa umugí, alueka pecha 'me a'wágame kame. Alué 'emi 'yula umugika abiena 'la Onorúgame oyérame kame, 'lige narémili ju napu nejmili ju Onorúgame rewagachi. 'We 'la repúpua 'emi 'yula umugí napurigá 'we 'la najtékame nímala napu'lige 'emi Onorúgame 'yuga ra'íchachi iwérali taga.

*Jena ruwimela Pegro ruwíligo 'we 'la anachálime ko rekó chibi aníle*

<sup>8</sup> O'maka 'we 'la bi'lepi 'nátaga mochiwa, 'we 'la ganíliga, 'we 'la na'temaka a'bopi, 'lige 'we 'la nakúriga. <sup>9</sup> Napu'lige jaré ralámuli 'we cha nokachi, 'émika tase che olawa alué ralámuli cha nokame. Napu'lige jaré ralámuli 'we cha anichi 'émika tabilé che anewa, iligá 'émika 'we tániwa Onorúgame napurigá gu'írimala alué ralámuli cha anime napurigá 'la semátiri 'nátili 'yámala napugiti alarigá najkiame Onorúgame 'lige alarigá nokisáká 'emi Onorúgame semati raweli 'yámala. <sup>10</sup> Regá aníché Onorúgame nila ra'íchali:

Bilé ralámuli 'we ganíliga bejtélenilisa bo'nepi 'we 'la tabilé che anigá ra'íchámili júkuru uché jaré ralámuli olagá, tase 'yégalí ra'íchaga.

<sup>11</sup> 'We 'la gu'íriwa uché jaré ralámuli.

Tase chibi nokogá e'yénawa.

Senibí 'we 'la niraga epperélimili júkuru 'emi uché jaré ralámuli, tase chibi anigá.

<sup>12</sup> Onorúgameka 'we a'lá repuka ajtígama alué a'ká ralámuli tase i'nílime 'lige 'we 'la gepume ju napu'lige táachi iwérali,

nobi Onorúgameka 'wéchigo ayoga ajtíko alué i'nílime ralámuli 'yuga.

<sup>13</sup> ¿Chiérite cha oláwawé 'emi 'la senibí 'la a'ká ralámuli nísaká 'emi, tase i'nílime? Tabilé 'wésiguru. <sup>14</sup> Napu'lige 'emi 'we resí oliae Onorúgame oyérame kóriká, 'we

ra'salagá mochiwa. Tase 'wesi ralámuli majawa, nibilé tábiri majawa, <sup>15</sup> iligá 'we 'la nirawa Kristo napu ramué nuleme ju. Senibí 'we 'la rejchiruga mochiwa, 'la benigá nejiawa napu'lige ralámuli rukechi chonigá 'emi 'we 'la oyérame ko Esukristo. <sup>16</sup> 'We 'la i'kilí nejiawa tase ayógama ra'íchaga, 'la niraga. Tase chibi anigá ra'íchiwa napurigá chijúniga ejtebímala 'emi alué napu gawelia mochime ju 'emi olagá, 'emi napu Kristo oyérame ju. Alueka chijúniga ejtebímala etega 'we 'la ra'íchame ko 'emi. <sup>17</sup> Abé alá ju 'we a'lá nochalia rekó resí ikié 'emi, bo'né Onorúgame alarigá najkisáká napurigá resí ikimela 'emi.

<sup>18</sup> Esukristo abiena resí ikile, 'lige pe si'nepi resí ikile bi'wígá ramué alawala. Esukristoka rekó tabilé che 'síkame ke abirigá me'líliuru, alué cha nokame ralámuli neraga. Alueka mukúlekuuru napurigá ramué 'la Onorúgame oyériwa. Rekó me'liruge, Onorúgame ku ajánirile. <sup>19</sup> 'Lige ku ajánasa Esukristo, simile regá anemia alué alawá galírale mo'áriga mochígama Riáblote cha'piruga: «'We 'la ju resí ikié 'emi, pecha 'la níráligime 'emi ne'chí.» <sup>20</sup> Alué ralámuli napu tabilé e'wálige 'ya napu'lige alué Noé bijí bejtégichi jena wijchimoba, 'ya a'lige Onorúgame 'we 'la buwélekuuru alué alawá napurigá 'la Onorúgame oyéramala napu'lige Noé newachi alué barko nobi tabiléchigo e'wálekó. Pe osánópi 'la mo'ile alé bárkochi. 'Lige a'kinana wa'lú u'kusá, tabilé suwile si'líka. <sup>21</sup> Alué ba'wika pe ruwime kéré alué ba'wí napu rewarálime niru. Napu'lige rewaralia ramué ba'wichí nasipa jaga pecha júko napurigá bi'wiboa chi'choli, alueka júkuru napurigá uché jaré ralámuli etémala 'la Onorúgame oyérame nírgo, 'lige 'ma bujérgime nírgo alué chátiri 'nátili napugiti Esukristo 'ma 'la ku ajánaligame, <sup>22</sup> 'lige jipe 'pa rewagachi ajtí Onorúgame 'yuga alé wajtoná napu Onorúgame ajtí, 'lige jípeko alué ju nuleme suwábaga santo ánjeli rewagachi mochígama 'lige suwábaga alué e'wélala nuleme napu nulame ju rewagachi.

## 4

*Jena ruwimela Pegro ruwíligo a'pílipi 'emi 'yárigame ko nóchali napurigá 'la sébali olámala ralámuli gu'íria*

<sup>1</sup> Kristo 'we resí ikile napu'lige me'liae, alekeri ramué pecha chélatéko rekó resí ikia, napugiti alué resí ikime ka, pe alué chátiri 'nátili a'regá resí ikime kame <sup>2</sup> 'we 'la semárga bejtélimia bijí jena wijchimoba asagá napurigá Onorúgame najkí, tase napurigá najkiá ramué a'boi. <sup>3</sup> 'Émika 'we 'yako pe napurigá ralámuli tabilé Onorúgame oyérame alarigá epperégama nilekuuru 'emi chibi nokame, najkigá

e'yéname nilekuru 'emi peka a'boi nila ke, 'lige aminami we'ká umugi 'yuga okome nile 'emi, 'we rasigá bajime nilekuru 'emi rekútime, 'we newame nilekuru 'emi piesta 'we 'la oyériga alué e'karúgame tábiri napu 'emi a'boi ralámuli newame nile iwérali tánimia napurigá Onorúgame niraga peka 'la Onorúgame kachi. <sup>4</sup> 'Lige jípeko alué ralámuli napu tabilé oyérame ju Onorúgame 'we gawélime ju 'emi olagá, 'émika 'máchigo tabilé 'yuga e'yéname kame alué ralámuli cha nokame. <sup>5</sup> Alueka ruyémili júkuru Onorúgame suwábaga napu ekí tábiri resí nokale alué a'boi, alué Onorúgame napu 'ma 'la 'nátaga ajtí gatemia ralámuli suwígame 'lige ajágame 'yuga. <sup>6</sup> Onorúgame nila ra'ichalika 'ma 'la ruyérigame nílgame alué ralámuli bijí ajagá mochígichi 'lige alekeri suwábaga ralámuli machí 'we resí nokáligo. Bilé rawé gastigáriwili ju alué ralámuli alawala.

<sup>7</sup> Tabilé we'ká rawé rokáré ye gawí suwibamia alekeri 'we 'la 'nátaga mochiwa Onorúgame 'yuga ra'icha 'lige iwérali tania. <sup>8</sup> 'Lige 'la 'we 'la ganíliga ejperéliwa 'emi a'bopi 'la galegá, napugiti regá kame: Bilé ralámuli napu 'la galegá eteme ju uché jaré ralámuli, alueka 'la gainámala e'ká napu'lige resí 'sichi uché bilé ralámuli. <sup>9</sup> 'La eliwa napurigá 'emi ejperélachi okómala 'lige 'la 'yawa go'ame najkisáká, tase ayoga bo'nepi. <sup>10</sup> Apílipi 'emi 'yárigame júkuru nóchali napurigá 'emi sébali olámala ralámuli gu'iria, alekeri 'la alarigá gu'iriwa. <sup>11</sup> Alué napu Onorúgame nila ra'ichálila benírame ju ralámuli 'we 'la ra'sálagá benírimili júkuru ralámuli alué ra'ichali 'la napurigá aní alué ra'ichali tase se'wináriga. Bilé ralámuli napu uché jaré ralámuli gu'irame ju, alueka 'we 'la bijchiá 'la gu'irimili júkuru 'la alué a'walite napu Onorúgame nejí. 'Lige ralámuli etea 'we 'la ra'sálagá benírame ko, animela: «Onorúgameka 'we 'la nejkútime ju.» Pe Esukristo Alawala 'we 'la oilárimala napurigá alarigá animela alué rió. Alarigá nisa 'la kápá senibí.

*Jena ruwimela Pegro ruwíligo 'we ra'sádlime ko napu'lige resí ikíá*

<sup>12</sup> 'Emi napu ju Onorúgame oyérame napurigá ne, napu'lige 'we resí ikíá 'emi tase lawa: «¿Chonigá alakiche ne?» Napu'lige resí ikíá 'emi, alueka nímala pala 'la bijchiá 'la bijchígime ka 'emi napu aní Onorúgame. <sup>13</sup> Iligá 'we 'la ra'sáláwa resí ikíá napurigá resí ikile alué Kristo, alarigaka 'emi 'la ra'sálámalachigó napu'lige uché ku nawachi Kristo wa'lú a'walí niga. <sup>14</sup> 'We ganíliga mochí 'emi rekó 'we resí anilime ke ralámulite pe Onorúgame oyérame kóriká

napugiti Onorúgame Alawala senibí 'la 'emi 'yuga ajtigame. <sup>15</sup> 'Emi resí nilia mochígime, tase resí nokogáriká resí nilia mochiwa, tase resí nilia mochiwa pe ralámuli me'agáriká o pe chigóriká o pe panápuri resí 'sika ilírigoriká. <sup>16</sup> 'We resí anilía 'emi Onorúgame oyérame kóriká tabilé chijunawa, iligá 'we ra'sálagá mochiwa napugiti 'ma 'la Onorúgame oyérame kame 'emi.

<sup>17</sup> Jipe 'ma seba raweli napu'lige Onorúgame 'we a'wágame gastigárimili nile siné rawé suwábaga ralámuli jena wijchimo, 'lige 'we a'wágame gastigáriliguru ramué Onorúgamete rekó 'la Onorúgame oyérame nírige, 'lige abéchigo resí ikimela alué ralámuli tabilé Onorúgame oyérame. <sup>18</sup> 'We nóchali olagá sebásiga 'pa rewagachi ramué ralámuli rekó 'la Onorúgame oyérame nírige, ¿'liko chukimélaché alué napu tabilé Onorúgame oyérame ju rekó 'la rewagachi moínánilie? <sup>19</sup> Alekeri 'emi napu Onorúgame oyérame ju, tase guwana rujsúpua rekó resí nílga ejperégame ke, Onorúgame bo'né alarigá elá, abichilubi 'we 'la a'ká ralámuli niwa, 'lige 'la eliwa Onorúgame napurigá 'emi repúmala, alué Onorúgame napu 'emi newale napu senibí 'la sébali olame ju bilé nóchali olá.

## 5

*Jena ruwimela Pegro bilé ruwíligo bilé nawésali benírligo alué ralámuli Onorúgame oyérame*

<sup>1</sup> Bilé rejcholi ruyémala ne alué e'wélala napu nulame ju re'obachi. Neka abiena wa'lula júchigó nulame re'obachi, 'lige neka etuáturu resí ikichi Kristo. 'lilibeko etewa chiena a'wágame ka Kristo napu'lige uché ku nawachi 'pa rewagáchika. <sup>2</sup> 'We 'la tebúpua alué ralámuli Onorúgame oyérame napu Onorúgame 'we 'la repúniliga a'rele, napurigá repume ju ralámuli alué bo'á a'boi bujkula. 'We 'la ganíliga repúpua 'la napurigá Onorúgame najkí, tase repúpua enomí koruka, <sup>3</sup> tase a'wágame nulewa, tase niwa napurigá bilé batroni 'we ayoga nulame. Iligá 'we 'la repúpua a'nalina napurigá lámala alué ralámuli: «Alué rioka 'we 'la Onorúgame oyérame ju.» <sup>4</sup> Alarigá 'we 'la nímala. Napu'lige nawasa alué wa'lula 'emi e'wélala repume, a'lige 'emi narémala bilé gorona\* napu tabilé che ikime ju, napu 'la nabí niga mochímala 'emi.

<sup>5</sup> 'Emi ejtemali a'chigóriga níwachigó, 'we 'la nirawa alué e'wélala re'obachi nulame, o'maka 'emi ejtemali 'we 'la nirawa 'emi a'bopi, aka regá aníché alué osilí Onorúgame nila:

\* **5:4** 'We 'yako alé Gresia anilichi bilé rió mesa roweka (carrera) bilé gorona mo'kótilime nile. Alué gorónaka sewate newárigime nile.

Onorúgameka tabilé galeme ju alué gunarume ralámuli,  
iligá 'we la galegá eteme ju alué tabilé gunarume.

<sup>6</sup> 'We 'la i'kilí rió niwa, tase riólame, 'la e'wagá napu nulá Onorúgame napurigá alué Onorúgame 'we 'la najtékame newámala mué.

<sup>7</sup> 'We seweti nísaká Onorúgame ruyéwaguru. Onorúgameka 'wéchigo na'temame 'emi, e'wéwagurú napurigá nejkúrimala.

<sup>8</sup> 'La 'nátaga mochiwa, alué Remónisi napu ju ramué saíla, alueka pe ralámuli ro'ábiniliga eyena, e'néniga eyena chieri 'la ka rekabalia, alueka eyena napurigá bilé mawiyá 'we opurúgime. <sup>9</sup> 'We 'la anachawa rekó 'we ená 'sichi Remónisi, 'we 'la oyériga Onorúgame, 'we 'la bijchígiga napu aní Onorúgame, 'we 'la machigá 'emi 'we ejelía mochígochigó uché bilénami jena wijchimoba uché jaré napu júpáchigó Kristo oyérame napurigá 'emi. <sup>10</sup> 'Lige 'ma resí ikisá 'emi pe u'kabi rawé, Onorúgame 'we 'la semáriga 'nátame newámala 'emi 'la bi'lepi 'nátili 'nátame 'lige 'la a'wágame sulégame, tase umérilime Riáblote. Alarigá gu'írimala Onorúgame 'emi, alué Onorúgame napu 'we na'temá ramué napu najki napurigá 'la rewagachi simawa ramué napu'lige suwisuga Esukristo 'yuga mochiwa.

<sup>11</sup> Onorúgame wa'lú a'walí nígame ju. Alarigá ju.

<sup>12</sup> Pe u'kabi osilí náola ne, Silbano osá ye osilí napu 'emi náola ne, ye rió Silbano napu 'we 'la oyérame ju Onorúgame. Neka 'we 'la niraga eté ye rió Silbano. Neka osilí náola 'emi napurigá tabilé guwana rújsúmala 'emi. Tabilé siné a'rewa Onorúgame oyeria. Pecha na'táwagó tabilé nejkúrimio Onorúgame.

<sup>13</sup> Ralámuli napu ekí Onorúgame oyérame ju, napu jena Babilonia† ejperé, reporali náwalia 'emi. Alué ralámulika Onorúgame wanápale napurigá Onorúgame oyérame nímalá napurigá 'emi, 'lige Marko napu ju napurigá ne inolá abiena náwaliachigó reporali. <sup>14</sup> 'We a'lá reporaga járowa 'emi a'bopi níriga, 'we 'la ganíliga tase seweka suwábaga 'emi napu Kristo oyérame ju.

Pe ikí kápá ye ra'ichali. Wa'lú cheliérabá.

† 5:13 Mayelia siné kachi pe Roma olagá anligo napu'lige Babilonia anía.



## Ye Ju Njubá Osirúgime Apeli Napu Pegro Nulale Osíniliga

*Kuira suwábaga 'emi ralámuli Onorúgame oyérame Asia ejperégame.*

<sup>1</sup> Ne Simoni Pegro Esukristote nulérigime ju ne napurigá nulame nímala ne Onorúgame nila nocháililachi. Alekeri náule ne ye apeli 'we 'la ruigá ye ra'íchali rejcholi 'emi napu 'we 'la bijhígime ju Onorúgame nila ra'íchali a'chigóriga napurigá ramué. 'Émika 'we 'la bijhígime ju napugiti Esukristoka 'we 'la sébali oláligime, alué napu ramué alawala bi'wele. Alueka pe Onorúgame ju. <sup>2</sup> 'We 'la nisa 'la kápá Onorúgame 'we 'la gu'írasa napurigá aminabi 'we 'la machiboa churigá ko Onorúgame 'lige Esusi napu ramué nuleme ju. 'Lige alarigaka 'we 'la 'nátili na'támala 'emi.

*Jena ruwimela Pegro ruwíligo churigá 'la sébali olámili ko suwábaga ralámuli napu 'la Onorúgame oyérame ju*

<sup>3</sup> Abé 'la machisúká churigá ko Esusi, 'liko abé 'la námupua churigá ko Onorúgame a'walila, 'lige 'la umubawa 'la sébali olá napurigá najkí alué. Ramué wanápale napurigá ramué 'la narépua alué semátiri tábiri napu nejime ju alué. <sup>4</sup> Onorúgameka bo'né a'walilate 'la sébali olámala napu 'la sébali olámorilige. Aní 'we 'la sébali olásiká napu nulá alué, 'liko 'we 'la na'táwará Onorúgame nila 'nátali 'lige 'ma tabilé oyérawará alué chátiri 'nátali napu nerú jena wijchimoba. <sup>5</sup> Alekeri neka ye rejcholi ruyé 'emi napurigá abé 'la oyérame nímala Onorúgame: Alekeri 'we 'la niraga etewa ralámuli, 'lige aminacho 'la beniboa churigá ko Onorúgame, <sup>6</sup> 'lige aminami tase a'rewa napurigá neyúramala alué chátiri 'nátali. 'We 'la anachawa rekó resí ikíé 'emi, tase guwana rujsuka, 'we 'la oyériga mochiwa Onorúgame. <sup>7</sup> 'We 'la niraga etewa uché jaré ralámuli Kristo oyérame napurigá 'emi a'boi rijimjala neraga. Suwábaga ralámuli 'la niraga etewa.

<sup>8</sup> 'Emi aminacho 'la sébali olame nísaká ye rejcholi 'liko 'we 'la ganíliga ejperéramala 'emi. Napu 'emi bení churigá ko Wa'lula Esukristo, 'la gu'írimala napurigá 'emi 'la ganíliga ejperélamala. <sup>9</sup> 'Emi tabilé sébali olásaká ye rejcholi, 'liko 'émika tabilé néráme ju Kristo 'ma bi'wílgo 'emi alawala. 'Émika tabilé ma'chílime neraga mochí. <sup>10</sup> 'Liko 'emi napu Onorúgamete wanápurigame ju napurigá alué oyérame nímala, aminabi 'we 'la sébali olawa napu nulame ju

Onorúgame. 'Lige alarigaka tabilé siné guwana rujsúmala 'emi. <sup>11</sup> 'Lige alué Wa'lula Esukristo napu ramué nuleme ju, 'lige napu ramué alawala bi'weme ju, 'we 'la ganíliga rejpórimala napu 'lige sebasa 'emi alé napu ajtí senibí nulá alué.

<sup>12</sup> Alekeri a'kuepi néláramala ne 'emi 'we 'la sébali oliame ko napu Onorúgame nulá, rekó 'emi 'we 'la machiépa 'we 'la oyérilime ko Onorúgame 'lige aminami rekó tabilé guwana rujsue 'emi Onorúgame oyeria. <sup>13</sup> Neka 'we ilimela 'we 'la rejcholi ruyea 'emi jipe biji ajagá asagá ne, napurigá 'la machigá nokísamala 'emi tabilé siné a'rilime ko Onorúgame oyeria. <sup>14</sup> Alué Wa'lula Esukristo 'we 'la ma'chígime ruwí 'ma pe 'wemi mukumeo ne, alekeri rejcholi nejí ne. <sup>15</sup> Neka 'we ma'chígime benírimala 'emi ye ra'íchali rejcholi napurigá 'emi 'la nélékala ye ra'íchali nujubami napu 'lige 'ma mukusá ne.

*Jena ruwimela Pegro etéligo Wa'lula Esusi napu 'lige Onorúgame 'yuga ra'íchachi*

<sup>16</sup> Ra'íchali napu ruyeru 'emi larigá ko Esukristo a'walila 'lige chiena wa'lú a'waliga nawamio Esukristo napu 'lige uché ku nawá jena wijchimoba, alué ra'íchalika tabilé 'yégalí kéturu, napugiti ramueka etérigame asíriga 'la semáriga líliligo alé rabó semáriga ra'ósiga, napu nílige Onorúgame a'walila, <sup>17</sup> 'lige aminami ramueka akea járigeturu napu 'lige Onorúgame 'we 'la niraga regá anechi Esusi: «Yeka ne Inolá ju alué napu ne 'we galé. Neka 'we ra'sálagá ajtí ye ne Inolá 'yuga.»\* <sup>18</sup> Ramueka a'boi akea járigeturu alanechi Onorúgame alué Esusi alé rabó napu Onorúgame níriká 'we najtékame nílige, ramueka Esusi 'yuga mochírigeturu.

<sup>19</sup> Alekeri 'we 'la bijhígilia ramueka 'la bijchiá ko napu ruwile alué ralámuli 'ya mochígime napu ruwime níle napu anele Onorúgame. Alueka aniéturu Onorúgame julamio bilé nejkúrime. Alekeri 'we 'la gepuwa alué ra'íchali 'ya nerúgame, alué ra'íchlilika 'we 'la ruwime ju churigá ejperélitiká napusi ku nawachi Kristo. <sup>20</sup> 'We 'la machiboa 'emi alué ra'íchali napu narele alué ralámuli tabilé pe a'boi na'táila níligo. <sup>21</sup> Alué ralámuli napu ruwime níle napu anele Onorúgame tabilé ruwile pe a'boi 'nátaga napu anele Onorúgame, Onorúgame Alawala 'sile gu'íria napurigá 'la semáriga ruwimela.

## 2

*Jena ruwimela Pegro ruwíligo chukimeo alué ralámuli napu tabilé 'la rejcholi benírame ju*

\* 1:17 'E'nisi San Mateo 3:17.

<sup>1</sup> Nobi alé Israeli anilichi we'ká ralámuli mochile regá anime: «Neka ruwime ju napu ané Onorúgame ne'chí.» Pe lanime nile peka bijchiá kachi. A'chigóriga nímala alé napu 'emi mochí, we'ká mochímala alieti anime ralámuli. Alueka ruwimela tabilé 'la bijchiá ra'íchali. 'Lige aminami ruwimela Esukristo tabilé wa'lula ko, nobi Onorúgameka pe yati neraga me'limela alieti anime ralámuli. <sup>2</sup> We'ká ralámuli oyéramala alué ralámuli ra'íchálila, 'lige a'chigóriga nokimela napurigá nokame ju alué ralámuli 'we cha nokame. Etega alarigá nokame ko alué ralámuli, uché jaré ralámuli 'we cha nokame ralámuli korimela Onorúgame oyérame ralámuli olagá. <sup>3</sup> Alué ralámulika pe 'we ménilia mochímala enomí, 'lige pe 'yégalí beníraga 'ma nejpomela enomí 'emi nila enomí. Onorúgameka asíruga i'besi 'la e'nagá ajtí gastigárinilika alué ralámuli napugiti Onorúgameka pecha siné gojchime kame, 'ma na'íchí lúmalá.

<sup>4</sup> Onorúgameka tabilé e'kale alué santo ánjeli napu'lige cha nokisá, iligá wa'lú gastigo 'yale, injiérnochi 'luka 'we chóniga ilígichi 'we re'lé, 'lige alé mochí karéate buluruga, alé mochímala napusí seba raweli napu'lige Onorúgame gastigárimichi suwábaga alué cha nokágame santo ánjeli. <sup>5</sup> Aminami Onorúgame tabilé e'kale alué ralámuli napu cha nokogá ejperégame nile 'ya napu'lige ajtígichi jena wijchimoba alué Noé anilime rió, Onorúgameka elegá wa'lú u'kirile alué ralámuli me'limea, pe alué Noé anilime riocho 'we 'la repule napugiti Noeka 'la tabilé 'yégalí ra'íchame nílgame, iligá 'we 'la rejcholi ruyeme nile napurigá 'la semáriga ejperélamala. Onorúgameka tabilé me'ale uché jaré gichao ralámuli napu Noé rijimála nílgame. <sup>6</sup> Onorúgameka abiena gastigárigale alué ralámuli Soroma ejperégame 'lige Gomora ejperégame, 'ma me'ale na'ite 'lige 'ma najpisó gayénale suwábaga ralámuli alé okaná we'ká riógichi ejperégame, 'ma galítiri 'yúriga 'ma najpisó gayénale. Onorúgameka alarigá gastigárigale alé okaná we'ká riógichi ejperégame ralámuli napurigá 'la na'támala alué cha nokame ralámuli chujkimeli ko a'kinánami alué cha nokame ralámuli. <sup>7</sup> Nobi tabiléchigo me'ale ko bilé rió Loti anilime, alué rioka 'we a'lá rió nílgame napu 'we seweka asale etea e'karúriga nokachi alué ralámuli alé okaná we'ká riógichi ejperégame. <sup>8</sup> Alué rió Loti anilimeka nabí 'we eteme nile napuchíbiriga nokachi alé ejperégame ralámuli 'lige 'we resí nílgame nile alieti etega. <sup>9</sup> Onorúgameka asíruga 'la machí alarigá gu'irimio alué ralámuli 'la Onorúgame oyérame napu resí nilia mochí napu'lige etea 'we cha nokachi uché jaré ralámuli. 'Lige asíruga 'la machí Onorúgame churigá gastigárimio

ralámuli cha nokame napu'lige seba raweli Onorúgame gastigárimála suwábaga ralámuli cha nokame.

<sup>10</sup> Onorúgameka abé rajpé gastigárimála alué ralámuli napu tabilé e'weme ju Onorúgame, 'lige alué napu chibi nokogá ejperégame ju napu chibi nokinali a'boi. Alué benírame napu 'yégalí benírame ju asíruga riólame ju, 'lige tabilé majame ju chibiyeti anega alué santo ánjeli. <sup>11</sup> Alué santo ánjelika abéchigo a'wágame júkó me'tigá alué benírame, 'lige napu'lige Onorúgame 'yuga ra'icha jágichi, tabilé chibi aneme ju alué benírame napu 'yégalí benírame ju. Alueka buigá mochime ju napurigá Onorúgame 'símala gastigaria.

<sup>12</sup> Alué 'yégalí benírameka napurigá ajágame jami oyame, alarigá ju, napu pe cha'pisá me'liame ju. Sairúgame ra'íchame ju napu a'boi tabilé námame ju. <sup>13</sup> 'We resí ikimela alué 'yégalí benírame napugiti cha resí oláligime uché jaré. Asíruga ganílime ju chibi nokogá e'yénaga rawemi. Tabilé buweme ju napusí chonasa. Asíruga chijunárigame ju napu nokogá e'yena alué 'emi si e'yénaga.

<sup>14</sup> Alué 'yégalí benírameka napu 'emi si e'yena pe umugí e'néniga e'yéname ju pe 'yuga okóniliga. Alueka tabilé a'reme ju cha noká. Alué benírameka asíruga 'yégalí ra'íchame ju alué ralámuli 'yuga napu tabilé 'cho 'la bijchígime ju churigá ko Kristo. Alueka asíruga ejpénigime ju churigá bujemio uché jaré ralámuli nila. Nobi Onorúgameka gastigárimálagó alué 'yégalí benírame. <sup>15</sup> Alué 'yégalí benírameka napurigá e'wagágame neraga e'yena napugiti 'ma a'rélgame Onorúgame e'wea. Alueka pe Balaámi na'tálima 'lina oyérale napu Beori inolá nílgame, alué 'we 'ya bejtégame. Alué Balaámika we'ká enomí meme nílgame pe 'yégalí ra'íchali beníraga. <sup>16</sup> Onorúgameka a'walí 'yale bilé bulito napurigá ra'íchámala napurigá ra'íchame ju ralámuli. 'Lige ra'íchale alué bulito Balaámi ne'óchaga. 'Liko Balaámika abisibi a'rele 'yégalí ra'íchali beniria.

<sup>17</sup> Alué 'yégalí benírameka pe napurigá bilé bajisoli wakígame, pe alarigá ju, 'lige pe napurigá bilé bemolí ekárale 'mame. Onorúgameka gastigárimála alué 'yégalí benírame 'légana injiérnochi júliga napu 'we chóniga ilígame ju. <sup>18</sup> Alué 'yégalí benírameka 'we semáriga ra'íchame ju ralámuli 'yuga napu pe kulí 'la oyérame ju Onorúgame. Alueka ruwime ju we'ká umugí 'yuga o'kome ko 'lige 'we nígame korime ju. Alarigá ruyame ju napurigá alué ralámuli napu pe kulí 'la oyérame ju Onorúgame a'chigóriga nokimela. <sup>19</sup> Alué 'yégalí benírameka ruwime ju tabilé e'wélame ko Moisesi nila nulalí nobi alueka e'weme

ju alué chátiri 'nátili. Napu'lige bilé ralámuli 'we 'la oyérame nisa alué chátiri 'nátili, 'ma tabilé umé'bame ju a'rea alué 'nátili 'nata rekó a'rénilie. <sup>20</sup> Wa'lula Esukristo ju ramué alawala bi'weme 'lige ramué nuleme ju. Napu'lige bilé ralámuli 'ma a'rea alué chátiri 'nátili oyeria napugiti 'ma námame kame churigá ko Wa'lula Esukristo, 'lige kúchigo oyélasaká alué chátiri 'nátili 'liko abé'chigo cha'sime gayéname ju. <sup>21</sup> Abé 'la nilige alué ralámuli tabilé machisá churigá ko Wa'lula Esukristo, nobi jípeko 'máchigo 'la machígó, 'lige a'résaká Onorúgame nulalila oyeria, abé'chigo cha nokame nímala me'tigá abé i'bé. <sup>22</sup> Alarigá nokame ju alué ralámuli napurigá aní ye ra'íchali: «O'kochí bo'né yo'sá, ku go'yame ju, 'lige bilé gowí 'we 'la u'barígame anaga wejsogachi bajkime ju.»

### 3

*Jena ruwimela Pegro ruwíligo Esukristo uché'chigo siné nawamio jena wijchimoba*

<sup>1</sup> Suwábaga 'emi napu ne 'we galegá eté, ye ju nujubá osirúgime apeli napu ne 'emi náola napurigá 'emi tabilé a'rémala alué a'lala 'nátili 'nata. <sup>2</sup> Neka najkí napurigá 'emi 'we 'la nélámala napu ruwilige alué ralámuli 'we 'ya napu ruwime nilige napu anele Onorúgame. 'Lige aminami tabilé we'kuawa alué nulalí napu nejile Wa'lula Esukristo napu ramué alawala bi'weme ju. 'Lige ramué makué oká rió napu Esusi 'yuga e'yéniru ruyeru napu Esusi benírale ramué.

<sup>3</sup> 'We a'lá 'nátaga epperélawa 'emi napugiti 'ma amulí suwibachí gawí 'jsimela we'ká ralámuli 'we cha nokame napu nokinali a'boi 'lige asiriga gawélimala 'emi olagá. <sup>4</sup> 'Lige regá animela: «Esusi uché'chigo siné nawámaoriéturu. ¿Koche ajtí? Napusí Onorúgame newale ye gawí, suwábaga peba alarigá ju.» <sup>5</sup> Tabilé bijchiá ju. Alué ralámulika tabilé námame ju. Onorúgameka 'we 'ya newale gawí 'lige rewagátiri pe bo'né 'nátaga, 'lige waná elale ba'wí 'lige we'étiri. <sup>6</sup> 'Lige aminami tabilé we'kuawa Onorúgame ba'wite o'póirigo gawí 'we 'ya. <sup>7</sup> 'Lige aminami alué rewagá 'lige ye gawí napu jípe nerú Onorúgameka 'we 'la 'nata ajtí chiéniko julamio na'í napurigá rajimela ye gawí 'lige rewagátiri napu'lige gastigáriwili ju suwábaga alué ralámuli cha nokame.

<sup>8</sup> Aminami 'emi ralámuli napu ne 'we galegá eté, tabilé we'kuawa Onorúgame níriká, bilé rawé napurigá bilé mili bamí nerame ju 'lige bilé mili bamí napurigá bilé rawé nerame ju. <sup>9</sup> Wa'lúlaka tabilé najkigá 'smi napurigá 'emi gastigáriwa tabilé oyérame kóriká, alué Onorúgameka najkí napurigá suwábaga 'emi a'rémala cha noká. Alekeri tabilé anaga gastigárame ju.

<sup>10</sup> Nobí napu'lige Wa'lula Esukristo ku nawá, nawámala pe yati neraga napurigá nawame ju bilé chigórigame. Alige rawé suwibámala rewagá 'lige sopilítiri, a'wágame rolómala napurigá anime ju na'í. Suwábaga napu ju ye gawí 'lige suwábaga napu nerú jena 'ma tané ikimela rajagá.

<sup>11</sup> Suwábaga suwibámili ju alarigá. 'Liko 'emi pe Onorúgamecho e'wímili júkuru 'lige 'la sébali olamili júkuru 'emi napu Onorúgame najkí. <sup>12</sup> 'La 'nátaga mochiwa Onorúgame nawamio bilé rawé gustisia olamia suwábaga ralámuli. Alige rawé Onorúgame e'kósimala rewagá, so'pílí, rayénali 'lige mechátiri. <sup>13</sup> Nobí ramueka 'we 'la buigá mochiwa Onorúgame newamio uché bilé rewagá nuebo 'lige gawítiri napurigá anilige bo'né, alarigá newámala a'liko suwábaga ralámuli 'la sébali olámala napu Onorúgame najkí.

<sup>14</sup> Alekeri 'emi napu ne 'we galegá eté, 'we 'la buigá mochiwa 'lige suwábaga 'la sébali olawa pe Onorúgamecho 'yuga 'nátaga. <sup>15</sup> Aka regá anime osáligé'é Páulo napu ramué 'we galegá eteru: «Onorúgameka tabilé anaga gastigárame ju bilé ralámuli cha'sisa. Alueka buweme júkuru napurigá alué ralámuli ku 'la natámala.» Onorúgame 'sile ye 'nátali 'ya alué Páulo 'lige néchigó alarigá 'nátame júchigó. <sup>16</sup> A'píli apélíchi napu Páulo osale a'chigóriga anime ju. I'sínimi jaré ra'íchali 'we nóchali kame ju námilia. Alekeri jaré ralámuli napu tabilé námame ju Onorúgame nila ra'íchali, alueka pe se'wináriga ruyeme ju alué ra'íchali suwábaga Onorúgame nila ra'íchali, 'lige alekeri gastigáriwili ju alué ralámuli.

<sup>17</sup> 'Emi napu ne 'we galegá eté, 'emi 'we 'la machíguru ye ra'íchali. 'Liko 'we 'la rejchiruga mochiwa napurigá alué napu pe 'yé'gali benírame ju, tabilé umbámala 'emi 'yegaria. 'Émika 'ma 'we a'lá 'nata mochíkuru napurigá ne, 'lige tabilé najkí ne napurigá rujsúmala 'emi. <sup>18</sup> Neka najkí napurigá aminabi benimela 'emi churigá ko Wa'lula Esukristo. Aminacho 'we 'la beniboa churigá ka Wa'lula Esukristo napu ramué alawala bi'weme ju 'lige aminami ramué nuleme ju. 'Lige senibí 'we 'la ra'íchawa alué olagá.

Pe ekí kápá ye ra'íchali. Wa'lú cheliérabá.

## Ye Ju Alué Apeli Napu Bajchá Osale Juani

*Kuira suwábaga 'emi ralámuli Onorúgame oyérame.*

<sup>1</sup> Ne Juani jena osé ne 'emi 'we 'la sébali ruigá 'ma asáligo 'we 'ya alué Esukristo napu'lige ta'chó i'tégichi ye gawí. 'Lige 'ma nerúligo napu ramué akirú. 'Lige jena wijchimoba nawáligo Esukristo ruwimee churigá 'la ganíliga ejperéliwa. Ramué, 'lige uché jaré, eteru 'lige nocharu ramué a'boi sekálate. <sup>2</sup> 'Lige 'la ma'chiná eteru ramué, ne 'lige uché jaré, 'lige ruilía 'emi jena wijchimoba nawáligo Kristo, 'la oyérisiká alué Esukristo 'liko 'la senibí ejperéliwa ramué 'lige apiépiri ralámuli alué Onorúgame 'yuga. <sup>3</sup> Ramué 'la ruiliwa 'emi napu eteru ramué 'lige napu akirú napu anile alué Esukristo, napurigá 'emi 'lige ramué napuika 'la Onorúgame oyérame niwa, napurigá oyeria mochiwa Onorúgame. Ramueka Onorúgame oyérame niru 'lige alué Inolá napu ju Esukristo. <sup>4</sup> Neka ye nawésali oséguru 'emi napurigá suwábaga ramué 'we 'la ganíliga ejperéliwa.

*Jena ruwimela Juani ruwíligo Onorúgame 'we 'la nátame ko, tabilé se'windruga*

<sup>5</sup> Ye 'nátili rejcholi ju napu beníruru ramué Esukristote, 'lige ramueka 'emi ruilía napu aní alué Esukristo. Kristoka aníturu 'we 'la nátame ko Onorúgame, tabilé tase se'wináriga, 'lige tabilé siné se'wináriga nátame ko. <sup>6</sup> 'We 'la Onorúgame oyérame korusúká, 'lige kúchigo pe se'winá nokagá e'yénisiká 'liko pe 'yégame niru, 'lige pe tabilé e'wame niru napu najkí Onorúgame. <sup>7</sup> 'La tabilé che nokagá e'yéname níriká, 'lige 'la semáriga nátaga napurigá najkí Onorúgame, 'liko 'la ganíliga ejperégame niwa ramué o'maka, napugiti 'ma 'la bi'wíligame ramué alawala alué Onorúgame Inolá Esusi napu'lige mukisá.\*

<sup>8</sup> Regá anisúgáká: «Ramueka 'ma 'la Onorúgame oyérame niru, 'lige jipe 'ma tabilé chátiri 'nátili nátame niru, pe 'la a'lala nátalicho.» 'Liko Onorúgame níriká 'ma chátiri nátame niru, alésiko pe ramué a'bopi resí ikiname niwa. <sup>9</sup> 'We 'la e'kali tánilime níriká Onorúgame napu'lige cha nokinálisa, cha nokisuga ma,† 'liko Onorúgameka 'la yati nejkúrimala, napugiti Onorúgameka 'la sébali olame kame napu aní bo'né, alueka tase lámala bilé ralámuli 'we cha 'sika eyénachi: «Rekó cha 'síkame ke ye rió, tabilé gastigárimala ne.» <sup>10</sup> Tase siné rawé

se'winá nokame koriáká ramué ralámuli, 'liko aniánti kérélawa: «Onorúgameka pe 'yégame ju.» Alésiko tabilé korume niwa Onorúgame nila ra'íchali.

## 2

*Jena ruwimela Juani ruwíligo Esukristo ramué gu'trame ko*

<sup>1</sup> 'Emi napu ne 'we najkí, neka osé 'emi ye ra'íchali napurigá tabilé chátiri nátaga e'yénamala 'emi, 'lige tabilé cha nokagá. 'Lige neyúrisaká alué chátiri nátili 'lige cha nokisá 'emi, 'liko Esukristo tániwa nejkúrimala alué Esukristo napu 'la nejkúrime ju, 'liko Esukristo Onorúgame tánimala napurigá Onorúgame 'we 'la nejkúrimala. <sup>2</sup> Alueka mukúlekuru ramué resítiri 'nátili bujigá. Esukristoka tabilé pe u'kabi ralámuli gu'iriga mukúlekuru, Esukristoka suwábaga ralámuli gu'iriga mukúlekuru napu ekí jena wijchimoba ejperéliuru.

<sup>3</sup> 'La e'wásiká napurigá nulale Esukristo, a'liko 'la machiwo 'la oyérame níligo Esukristo. <sup>4</sup> Bilé rió anisá: «Neka 'la oyérame ju Esukristo», 'lige tabilé e'wasa alué rió napurigá nulá Esukristo, 'liko 'yégame nímala alué rió. <sup>5</sup> Bilé ralámuli 'la sébali oyérame Onorúgame nila ra'íchali, alué ralámulika 'la galeme nímala Onorúgame, 'lige 'we 'la niraga etémala uché jaré ralámuli, a'chigóriga napurigá Onorúgame galé ramué. 'Lige 'la nélegiaká Onorúgame, 'la machiwo Onorúgame oyérame níligo. <sup>6</sup> Bilé ralámuli 'we 'la oyérame kórisaká Onorúgame, alueka a'chigóriga na'támili júkuru 'la napurigá nátale Esukristo jena wijchimoba asagá.

*Jena ruwimela Juani ruwíligo Esukristo 'sílago sébali gatea*

<sup>7</sup> 'Emi napu 'we galilía Onorúgamete, neka pecha nuebo nulali ruwígó, pe aba alué ra'íchali ruwí ne napu akele 'emi 'yasi. <sup>8</sup> Pe iligá jípeko abechigó 'la námature ruwí ne. Jipe 'la machí 'emi tachiri gite mukúligo Esukristo, 'lige churigá sébali olá ajtigó Esukristo jipe 'emi gu'iria, 'lige 'la machigá ajtigó choniá mochigo 'emi.

<sup>9</sup> Bilé ralámuli Onorúgame oyérame 'we 'la námame kórisá chonime ko ye ra'íchali tabilé 'yégalí, 'lige tabilé 'la ganíliga eteme nisa uché jaré ralámuli, 'liko alué ralámuli tabilé 'la e'wame kéré Onorúgame nila ra'íchali. <sup>10</sup> Bilé ralámuli Onorúgame oyérame 'we 'la galeme uché jaré Esukristo oyérame ralámuli, 'lige 'we 'la niraga eteme, alué ralámulika 'we 'la e'wame kéré ye tabilé 'yégalí ra'íchali. Alueka tabilé che nokagá

\* 1:7 Juánika regá anime osale: «Alué Esukristo elalá ramué alawala bi'weme ju.» 'Lige ramueka regá anime osirú: «'Ma 'la bi'wele ramué alawala Esusi napu'lige mukisá.» † 1:9 Chátiri nátaga einalia ka tabilé 'la ju Onorúgame níriga a'chigóriga resiriga ju napurigá cha 'sika einalia.

e'yenamala, napurigá uché jaré ralámuli tabilé che nokimémpáchigó. <sup>11</sup> Ralámuli 'we ayome ka uché jaré Esukristo oyérame ralámuli 'yuga, alueka tabilé námame nímala alué napu ju 'la tabilé 'yégali ra'íchali, alué ralámulika napurigá chónigichi e'yéname pe alarigá kérélamala, tabilé ra'ósiga ilígichi, alué ralámulika pe napurigá siego kérélamala. Ye ra'íchalika ruwime kéré alieri ralámulika bijí tabilé 'cho 'la bi'wígame alawégame ko.

<sup>12</sup> Neka oséguru 'emi napu pe kulí chojki Esukristo oyeria, 'emi napu 'ma bujérigame ju chátiri 'nátili Esukristote, alué Esukristoka 'sile sébali gatea, alué resítiri 'nátili bujigá, napurigá 'ma senibí bi'wígame alawégame nímempá 'emi. <sup>13</sup> Lige abiena osé ne 'emi napu 'ma 'la sébali oyérame ju Esukristo. 'Emi 'we 'la machí Esukristo 'we nejkúrame ko suwábaga nóchalichi 'lige 'nátalichi, 'lige aminami abiena oyérame ju 'emi alué napu 'yasi ajtígame ju ta'chó gayénichi ye gawí. Abiena osé ne 'emi napu bení churigá ko 'we 'la sébali oyérialia Onorúgame ralámuli níriga, 'emi abichilubi 'we jale alué Remónisi na'tálila a'rea, 'lige arigá 'ma 'la umévale 'emi alué Remónisi na'tálila a'rea.

Aminami osé ne 'emi napu pe kulí e'yena a'lala bowechi, e'wasia napu nulá Onorúgame. <sup>14</sup> Neka aminami oséguru 'emi napu 'ma 'la sébali oyérame ju Esukristo, alué napu 'yasi ajtígame ju ta'chó gayénichi ye gawí. Abiena osé ne 'emi napu bení churigá ko 'we 'la oyérialia Onorúgame, 'emi napu tabilé bijchígume ju alué 'yégali ra'íchali, 'émika pe Onorúgamecho 'we 'la bijchigi, 'emi napu 'ma umérole alué Riablo.

<sup>15</sup> Tabilé we'ká 'nata mochiwa, tase najkiá mochiwa we'ká e'karüginti, suwábaga alué 'nátili asíriga chátiri ju Onorúgame níriga. 'Emi alué 'nátili oyérasaká, 'liko 'ma tabilé oyérinilime nímala 'emi Wa'lula O'nó Onorúgame na'tálila. <sup>16</sup> Alué 'nátilika tabilé Onorúgame nejílala ju, pe ramué a'boi na'tálila ju alueka, napurigá we'ká e'karüginti najkigá járilia 'lige umugítiri, 'lige uchéchigo jaré tabiri. <sup>17</sup> Suwábaga alué 'nátilika 'ma suwíbámala, nobi Onorúgame na'tálilaká 'láchigo senibí nerúlmalagó, 'lige 'we 'la ju 'la suériga na'temaka gu'írilia ralámuli, napurigá Onorúgame najki.

*Jena ruwimela Juani ruwíligo we'ká e'yénimio Kristo korime a'boi*

<sup>18</sup> 'Emi 'la machí bilé rió sebámaráo Kristo korime ralámuli buyáname korime alé resítiri bowechi, 'ma we'ká mochíkuru alanime ralámuli, alekeri 'la ma'chígime nérékuru 'ma pe 'we gajumio ye gawí. <sup>19</sup> Alué ralámuli napu ralámuli buyáname korime alé resítiri bowechi, i'bé bajchabeka ramué 'yuga e'yénituru péchigo se'winátiri

'nátili 'nátaga e'yéname kérélekó. 'La bijchiá 'la oyérame nísaká Onorúgame napurigá ramué, 'la bijí ramué 'yuga e'yénimikuru, 'ma rojale, alekeri ma'chí nérékuru tabilé 'la Onorúgame oyérame níligo.

<sup>20</sup> 'Emika tabiléchigo alarigá júkó. 'Émika Onorúgamete 'yaru Onorúgame Alawala. Onorúgame Alawala gite 'we 'la machí 'emi alarigá ikimeo. <sup>21</sup> 'Emi 'we 'la námame ju Onorúgame nila ra'íchali, alekeri osé ne 'emi Onorúgame nila ra'íchali. 'Émika 'wéchigo 'la námame. 'Emi 'we 'la machíguru bilé rió 'we 'la ra'íchame ka, tabilé 'yégiga ra'íchame ko.

<sup>22</sup> Bilé rió, tabilé Onorúgamete julárigame korime Esusi rewigáchika, 'liko alué rioga 'yégiga ra'íchame nímala, alueka Kristo korime nímala bo'nepi, 'lige O'nó Onorúgame saíla nímala. <sup>23</sup> Suwábaga napu ekí anime ju tabilé Onorúgamete julárigame ko Esusi tabilé machime ju churigá ko O'nó Onorúgame. Bilé rió 'we 'la ruyeme nisa 'we 'la bi'wígame chieri ko Onorúgame Inolá, alueka 'ma 'la oyérame ju Onorúgame.

<sup>24</sup> 'We 'la 'nátaga mochiwa, 'la e'wawa, 'we 'la oyériwa napu akélige 'emi 'ya napu pe kulí oyeria 'emi Esukristo. Alarigá nokisáká 'emi, 'liko asíriga 'la oyérame nímala 'emi Esukristo, 'lige aminami O'nó Onorúgame. <sup>25</sup> Alarigáchigo aníligame Esukristo 'la simawio rewagachi 'lige alé ejperéliwio senibí neraga napu'lige suwisuga.

<sup>26</sup> Neka ruyéguru 'emi alarigá ko alué ralámuli 'yégali ruyeme 'emi. <sup>27</sup> Onorúgame Alawala pachágana ajtíkuru 'emi sa'pálachi, alekeri tabilé rokárékuru bilé a'lala 'nátili benírime. Onorúgame Alawala suwábaga benírime ju, 'we 'la bijchiá tabilé 'yégali. Alekeri napurigá aní alué Onorúgame Alawala 'la Esukristo na'tálila 'nátaga mochiwa suwábaga napurigá benírile Onorúgame Alawala 'ya.

<sup>28</sup> Jipe 'emi napu ekí pe kulí 'la o'wina Esukristo oyeria, tabilé a'rewa Esukristo na'tálila. 'Liko napu'lige uchéchigo siné nawachi alué Esukristo 'pa rewagáchika 'la tabilé majaga etewa alué Esukristo, 'lige tabilé chijunawa napu'lige alué Esukristo nawachi. <sup>29</sup> 'Emi 'la machíguru Onorúgame nabí 'la sébali olame ko napu aní. Alekeri 'la machíguru 'emi napu'lige bilé ralámuli 'we 'la nóchachi napurigá nulá Onorúgame, 'la Onorúgame Alawala narékame ko alué rió.

### 3

*Jena ruwimela Juani ruwíligo Onorúgame Alawala alawégame níriká, 'la Onorúgame 'kúchila níriga*

<sup>1</sup> 'We 'la machiboa, Onorúgame chiena galeo ramué, 'lige asíriga 'la níriga etuwío ramué. Alekeri 'la narékiaguru Onorúgame Alawala, jípeko alué alawate Onorúgame

'kúchila nírukuru, 'la bijchiá alarigá ju. Ralámuli tabilé oyérame Onorúgame, tabilé námame ju alué ra'íchali, 'lige tabilé machí churigá 'nátame nírigu ramué, napugiti tabilé oyérame kame Esukristo. <sup>2</sup> 'Emi napu 'we galilía Onorúgamete, Onorúgame Alawala nígame níru ramué. Rekó tabilé machiae alarigá nímió abé i'libeko nujubá rawé, 'láchigo machirúgó napu'lige Esukristo uchéchigo siné nawachi jena wijchimboba a'chigóriga nímió napurigá alué Esukristo. <sup>3</sup> Suwábaga napu ekí 'la bijchiga napurigá ikimeo, alueka 'ma 'la bi'wigame alawégame gayéniguru i'kilimi napurigá alué Esukristo.

<sup>4</sup> Suwábaga napu ekí cha nokagá járome ka, chibiyeti nóchaga, alueka resítiri alawégame gayena, napugiti bilé ríó resítiri alawégame gayéname kame napu'lige tabilé e'wasa Onorúgame nulalila. <sup>5</sup> 'Emi asiriga 'la machíguru Esukristo jena wijchimboba nawáligo alué resítiri 'nátali bujemia napu niga mochíriga. 'Emi 'la machíguru Esukristo tabilé resítiri alawégame ko. <sup>6</sup> Suwábaga napu ekí Esukristo 'yuga 'nátame ju aminabi tabilé cha nokagá járome ju. Suwábaga napu ekí abiena cha nokagá járome tabilé 'cho 'la námame ju alarigá ko Esukristo. <sup>7</sup> 'Emi napu ne 'we najki, 'we 'la 'nátaga mochiwa napu'lige uché jaré ralámuli ruwichi chibiyeti ra'íchili. Tabilé 'la 'ínili alué ralámuli. Ralámuli 'we 'la nóchame ka napurigá Onorúgame najki, alueka 'we 'la sébali ralámuli júkuru. <sup>8</sup> Ralámuli 'we cha nokagá járome, alueka Remónisi oyérame júkuru. Remónisika asiriga tabilé 'la nóchame ju napusi jena wijchimboba nawasa. Alekeri Onorúgame júale bo'né Inolá jeka wijchimboba napurigá mabuwa alué Remónisi aleké Onorúgame Inolate.

<sup>9</sup> Suwábaga napu ekí Onorúgame Alawala alawégame ju, alueka tabilé cha nokigá e'yéname ju, 'máchigo Onorúgame Alawala nígame kame alué ralámuli. <sup>10</sup> Alarigá 'la machiboa chieri ka 'la Onorúgame oyérame ralámuli, 'lige chieri ka Remónisi oyérame. Suwábaga napu ekí ta oyérinilime Esukristo napurigá najki Onorúgame, chibi nokigá járome ju, 'lige aminami tabilé 'la ganíliga etega uché jaré ralámuli, alueka tabilé Onorúgame Alawala alawégame ju. Alué ralámulika tabilé Onorúgame 'kúchila ju.

*Jena ruwimela Juani ruwíligo 'we 'la ganíliga járiline ko o'maka*

<sup>11</sup> Ye ra'íchalika ruyame ju churigá ka Onorúgame, 'lige ruyame ju alarigá oyératika Onorúgame, pe aba alué ju napu akirú 'yabesi napu'lige pe kulí oyeria Esukristo. Onorúgame nejírturu ye ra'íchali napurigá galegá járowa a'bopi o'maka ralámuli. <sup>12</sup> Tase

napurigá Kaíni, alué Arani 'lige Eba inolá, tabilé alarigá niwa, alueka pe Remónisi gompaniérola nile, alekeri me'ale bo'né bonila. ¿Chonigá me'ale? Alué Kaínika me'álekuru 'wéchigo chátiri 'nátaga eyéname níligame. Kaíni bonílaka 'we 'la ríó nile, alekeri me'líliru.\*

<sup>13</sup> 'Emi Onorúgame oyérame napurigá ne, tabilé chélagá mochiwa napu'lige alué ralámuli tabilé oyérame Onorúgame 'we gichichi 'emi. <sup>14</sup> 'La machirúguru 'ma tabilé cha'piruga mochírigo ramué alué Remónisite. Onorúgame júkuru ramué nuleme. 'We 'la machiáuru 'wéchigo 'la ganíliga járiline kame 'la niraga uché jaré ralámuli. Suwábaga ralámuli napu ekí tabilé na'temame ju uché jaré ralámuli Onorúgame oyérame alué ralámulika bijí Remónisite cha'piruga mochígame kéré, <sup>15</sup> pe napurigá bilé ralámuli me'agá oyame alarigá júkuru. 'La machíguru 'emi bilé ralámuli me'agá oyame tabilé alawégame ko Onorúgame Alawala. <sup>16</sup> Jena ruwimé ne churigá ka alué ralámuli napu 'we ganíliga eteme ju uché jaré ralámuli: Esukristo asiriga 'la na'temale ralámuli, 'lige arigá mukule ralámuli gu'iriga. Ramuéchigoó'la na'temátékuru uché jaré ralámuli. <sup>17</sup> Bilé ríó we'ká e'karúgame nígame 'lige go'ame, 'lige tabilé gu'irame nisa ralámuli tabilé nígame, alué rioka tabilé 'la galegá na'temame nímalá ralámuli. Alueka tabilé alawégame ju Onorúgame Alawala. <sup>18</sup> 'Emi napurigá ne 'kúchila, tase pe na'temame koripoa ralámuli. Napu'lige gu'iria bilé ralámuli 'la bijchiá 'la na'temaka gu'iriwa 'lige 'la galegá.

*Jena ruwimela Juani ruwíligo tabilé chijúniga ra'íchálime ko Onorúgame 'yuga*

<sup>19</sup> 'La alarigá gu'irisiká a'liko 'la machiboa 'la oyénilo alué ra'íchali Onorúgame nila. <sup>20</sup> Ramué a'boi laa mochísiga: «¿Chonigá aliena tabilé 'la na'temaka gu'irame júché neka uché jaré ralámuli 'lige tabilé 'la galegá?» Alarigá na'tálíka, Onorúgameka 'we 'la machí alarigá 'nátaga e'yénachi ramué. <sup>21</sup> 'Emi napu 'we 'la galilía Onorúgamete, ramué a'boi tabilé e'karúgame 'nata mochísiga 'liko tabilé chijúniga aminami tabilé majaga ra'íchawa Onorúgame 'yuga, iwérali tania. <sup>22</sup> 'We 'la machiiaa napu ekí tábiri táníla yati 'la nejmio Onorúgame, napugiti 'la sébali olagá ejperéirigime napu nulá Onorúgame, 'lige ramueka 'la semáriga na'talia, 'lige 'la semáriga gu'irilia ralámuli 'la napurigá najki Onorúgame. <sup>23</sup> Onorúgameka najkíguru napurigá 'we 'la oyériwa alué Esukristo, alué Onorúgame Inolá napu jipe 'pa rewagachi ajti. 'Lige aminami najki Onorúgame napurigá 'la nabí 'la niraga járowa uché jaré ralámuli.

\* 3:12 E'nesi Génesis 4:8-16 'lige Hebreos 11:4.

24 Bilé rió 'la sébali olame ka napurigá nulá Onorúgame, alué rioka 'la Onorúgame 'yuga 'nátame júkuru, 'lige Onorúgameka 'la semáriga gu'iriguruchigó alué rió. Alarigá 'la machíboa Onorúgame 'we 'la nejkura ajtigó, bo'néchigo alawala nejliligime.

#### 4

*Jena ruwimela Juani ruwíligo 'we 'la 'nátaga gepúlime ko pala Onorúgame ra'ichálima ko*

1 'Emi napu 'we 'la galilía Onorúgame, tase pe apiépiri ra'íchili oyériwa. 'La machigá gepuwa pala 'la Onorúgame ra'ichálima ko. We'ká ralámuli Onorúgame nila rejcholi benírime korime ju, péchigo 'yégalí benírime júkó ralámuli. Alueka tabilé Onorúgame nila ra'íchali benírime kéré. 2 Regá ju napurigá 'emi machimela bilé ralámuli Onorúgame Alawala alawégame ko: Bilé rió 'la bijchígume Esukristo napu ajtí jipe rewagachi alué ko napu jena nawale rió neraga, 'liko 'la Onorúgame Alawala alawégame nímalá alué rió. 3 Jaré ralámuli tabilé bijchígume Onorúgame julárigame ko Esukristo jékana napurigá ralámuli gu'irimala chátiri 'nátili bujea, alué ralámulika tabilé Onorúgame Alawala alawégame júkuru, 'liko alué ralámuli pe Esukristo saíla alawá alawégame júkuru. 'Emi machíguru ra'íchali napu ruwime ju sebamio alué ralámuli 'we chátiri 'nátili 'nátame 'lige se'winátiri ra'íchali benírime ralámuli, napu alawégame ju alué chátiri alawá napu eyena jena wijchimoba.

4 'Emi napu ekí alawégame ju Onorúgame Alawala 'ma Onorúgame 'kúchila ju 'emi. 'Ma umérikuru 'emi alué ralámuli se'winátiri ra'íchali benírime uché jaré ralámuli, Onorúgame Alawálaka 'wéchigo a'wágame kame me'tigá Remónisi alawala. 5 Alué ralámulika napu Remónisi alawala alawégame ju, napurigá Remónisi najkí alarigá benírime ju. 'Lige ralámuli napu ekí Remónisi gompaniérola ju 'we 'la oyérame ju alarigá benírige e'yénachi alué ralámuli. 6 Ramueka Onorúgame 'kúchila niru, bilé rió Onorúgame Alawala alawégame 'we 'la gepume ju napu'lige ramué alué Onorúgame nila ra'íchali benírige járlichí. Ralámuli tabilé alawégame Onorúgame Alawala tabilé gepume ju ramué napu'lige alué ra'íchali benírige járlichí. Alarigá machiáa bilé ralámuli Onorúgame Alawala alawégame ko, Remónisi alawala alawégame kómá. Alarigá 'la machiríguru bilé rió 'we 'la bijchiá ra'íchali benírime ko o 'yégalí benírime kómá.

*Jena ruwimela Juani ruwíligo Onorúgame 'we 'la ganílga eteme ko ralámuli*

7 'Emi ralámuli napu 'we galilía Onorúgame, 'we 'la ganílga etega járowa 'émi a'bopi, 'we 'la niraga, napugiti 'émika 'ma alawégame kame Onorúgame Alawala napugiti 'émika 'ma 'la oyériligame Onorúgame. Suwábaga alué ralámuli napu ekí 'la ganílga eteme ju uché jaré ralámuli, alueka 'ma 'la alawégame ju Onorúgame Alawala, 'lige asíriga 'la machí churigá nejkúriame ko Onorúgame. 8 Bilé ralámuli tabilé alarigá galeme ka uché jaré, alué ralámulika tabilé oyérame ju Onorúgame. Onorúgameka 'we ganílga eteme ju ralámuli. 9 Onorúgameka júlalekuru bo'né Inolá Esukristo jeka wijchimoba ramué na'temaka napurigá bi'wémala ramué alawala napurigá ejperéliwa 'la napurigá najkí alué bo'né Onorúgame, napurigá ejperéliwa alué Esukristo a'walílate. 10 Ramueka tabilé oyérame níriga Onorúgame, Onorúgameka abirigáchigo 'la galeme nílekó ramué. 'We 'la na'temale ramué, 'lige júlalekuru bo'né Inolá Esukristo napurigá gastigo narémala, alué gastigo napu ramué naréputi nílige chibi nokagá járame ka ramué. 'Liko alué nawálekuru gastigo naremia ramué neraga.

11 'Emi napu 'we galilía Onorúgame, Onorúgameka asíriga galéturu,\* 'liko ramué a'chigóriga galetí kárékuru uché jaré ralámuli. 12 Ta'wesi eteme ju Onorúgame, tabilé machirú chieti ko Onorúgame. 'La 'we 'la galegá járiliká uché jaré ralámuli, 'liko 'la machí néré Onorúgame 'la nejkura ajtigó napurigá 'we 'la galewa uché jaré ralámuli. Alarigá 'la machí nélélamala 'la ramuechi pachágana ajtigó Onorúgame Alawala. 13 'La machiáa Onorúgame 'kúchila níriga napugiti ramué 'ma alawégame níriga Onorúgame Alawala, napugiti bo'né Onorúgame nejliligime bo'né Alawala. 14 Napu ramué eteru 'la ruilía ramué uché jaré, Onorúgame júlaligo bo'né Inolá ralámuli bujéniliga alué chátiri 'nátili. 15 Bilé ralámuli napu 'la niraga ajtí Onorúgame Inolá ko alué Esukristo, alué napu nawale jena wijchimoba, 'liko alué rió 'la Onorúgame oyériga eyéname ju, 'la e'wagá, 'lige 'la Onorúgame Alawala alawégame ju.

16 Alarigá 'we 'la bijchigia mochiru 'we galilío ramué alué Onorúgame. Onorúgameka 'we na'temame ju ramué. 'Lige apiépiri ralámuli napu 'we ganílga eteme ju uché jaré, alué ralámulika 'la Onorúgame oyérame kérélamala, 'lige Onorúgameka 'la gu'irame kérélamala alué ralámuli napurigá 'la galegá etémala uché jaré ralámuli. 17 Napu'lige 'we ganílga etelia ralámuli, regá 'we 'la machiáa 'we 'la ganílga nejkurio Onorúgame. 'We 'la

\* 4:11 E'nesi glosario «amor».

machiaa suwábaga 'la bi'wígame alawégame nírgo, alekeri napu'lige raweli sébachi Onorúgame gustisia olamia ramué ralámuli tabilé majawa, 'wéchigo 'la Onorúgame 'yuga 'nátame nírgime. <sup>18</sup> 'We 'la ganílga eteme níriká uché jaré ralámuli 'la napurigá Onorúgame najki, 'liko tabilé majaga e'yéniwa, 'we majaga e'yéniliká pe wa'lú gastigo nímla, napugiti alué pe majaga epperégameká pe bijí tabilé 'cho 'la oyérame nímime Onorúgame.

<sup>19</sup> Onorúgameka bajchá 'we galele ramué, ramué ta'chó galilichi alué Onorúgame, alekeri ramué 'we 'la nírawachigó Onorúgame. <sup>20</sup> Bilé rió 'we 'la nírame kórisá Onorúgame, 'lige 'we ayome nisa Onorúgame oyérame ralámuli 'yuga, 'liko alué rió 'we 'yégame nímla, tabilé nírame nímla Onorúgame alué rió. Bilé rió tabilé nírame nisa ralámuli rekó 'we 'la etee, ¿'lige 'lacha níramalawé Onorúgame? Onorúgameka pecha ma'chiná ajtigá. <sup>21</sup> Jena ruimé ne churigá nulálga Onorúgame: Ralámuli napu ekí galegá jaróme ju Onorúgame, a'chigóriga galegá etémili júkuru Onorúgame oyérame ralámuli. Regá nulale Onorúgame.

## 5

*Jena ruwimela Juani ruwílgo suwábaga ralámuli napu alawégame ju Onorúgame Alawala alueka 'la umubamio alué chátiri 'nátili umeria*

<sup>1</sup> Suwábaga ralámuli napu ekí 'la bijchigi 'la Onorúgame julárigame níligo alué Esusi\* 'pákana rewagáchika, napurigá buinámala ralámuli alé resítiri bowechi, alué ralámulika nímla napurigá uchéchigo siné o'chérigame napugiti Onorúgame 'ma se'nú alawá 'yaligame napu ju bo'né alawala. Suwábaga ralámuli napu ekí 'we 'la nírame Onorúgame abiena 'we 'la nerámalachigó alué napu ju napurigá uchéchigo siné o'chérigame. <sup>2</sup> Napu'lige 'we 'la níralia Onorúgame 'lige 'la sébali oliá napurigá najki, alarigá 'la machiboa 'la galilío uché jaré ralámuli. <sup>3</sup> 'We 'la níraliká Onorúgame 'we 'la e'wálime júkuru napu nulá Onorúgame. <sup>4</sup> Suwábaga ralámuli napu ekí Onorúgame Alawala alawégame ju 'we 'la umubámala alué chátiri 'nátili umeria. Ramué'é 'la umubawa alué chátiri 'nátili umeria 'la lisensia 'yásiká napurigá nejkúrimala Onorúgame. <sup>5</sup> ¿Chieri 'la umérame ju Remónisi? Pe alué ralámuliguru alué napu 'la bijchigi 'la Onorúgame Inolá ko Esusi napu jena wijchimoba nawale.

*Jena ruwimela Juani ruwílgo tachiri gite nawálgo Esukristo jena wijchimoba*

<sup>6-7</sup> Esukristoka napu'lige rewarásiga chojkile rejcholi beniria ralámuli churigá 'la rewagachi moyéname ka ralámuli. 'Lige 'ma mukule bilena gulusichi napurigá mukumeli nílige. Esúsika mukule gastigo nareka, alué gastigo napu ramué narépli nílige. <sup>8</sup> Onorúgame Alawala 'we 'la 'nátale suwábaga 'la bijchiá 'la alarigá ikílgo. <sup>9</sup> Napu'lige bilé ralámuli ruwichi alarigá ko bilé tábiri, 'we 'la bijchigime níru. Napu'lige Onorúgame rusá tachiri gite nawálgo Esukristo jena wijchimoba abéchigo bijchígitékuru alueka 'la bijchiá kame. Onorúgameka 'ma ruwílekuru, 'lige 'la ma'chigime ruwílekuruchigó alarigá ko bo'né Inolá. <sup>10</sup> Bilé ralámuli 'we 'la oyérame Onorúgame Inolá, alueka 'ma alawégame nímla Onorúgame Alawala. Alué Onorúgame Alawálaka 'we 'la gu'írimala napurigá alué rió 'la machigá asimémpá jena wijchimoba nawálgo Esukristo. Bilé ralámuli anime tabilé Onorúgame Inolá ko Esukristo alué rioka 'we 'yégame korí Onorúgame olagá, tabilé bijchiginilimpá 'la bijchiá nawálgo Esukristo jena wijchimoba alué Onorúgame Inolá. <sup>11</sup> Regá ju napu 'sile Onorúgame napurigá 'la machiboa ye 'la bijchiá ko: Onorúgame bo'né alawala nejturu napurigá epperéliwa jena wijchimoba napurigá najki Onorúgame. <sup>12</sup> Ralámuli napu ekí 'la oyérame ju Onorúgame Inolá, alueka 'la alawégame júkuru Onorúgame Alawala napurigá epperélamala napurigá najki Onorúgame. Ralámuli tabilé oyérameka Onorúgame Inolá, alueka tabilé alawégame ju Onorúgame Alawala.

*Jena ruwimela Juani ruwílgo apiépiri chátiri 'nátili tabilé 'la ko Onorúgame nírga*

<sup>13</sup> Ye osilí oséguru ne 'emi napu ekí Onorúgame Inolá oyérame ju napurigá 'la machimela 'emi a'boi 'la Onorúgame 'yuga epperélimio 'emi senibí.

<sup>14</sup> Napu'lige Onorúgame 'yuga ra'ichalia apiépiri tábiri tánaga tabilé majaga tánilime ju 'we 'la machiame Onorúgame 'la akeo. <sup>15</sup> 'We 'la machiáká 'la akeo napu tánilia ramué a'lígeko 'la machigá mochiru 'la nejimio napu bo'né 'we 'la nerá.

<sup>16</sup> Onorúgame tánilime júkuru napurigá bujémala alué resítiri 'nátili napu'lige bilé ralámuli Onorúgame oyérame ta'mé chárigá se'winá 'sika eyénachi, 'lige Onorúgameka 'la yati bujémala alué 'nátili 'la ta'mé ená 'sika einásaká alué ralámuli. Nerú bilé 'nátili abé resítiri napu tabilé tánilime ju Onorúgame napurigá bujémala. Napu'lige bilé ralámuli nóchachi alué 'we resítiri nóchali, Onorúgameka 'ma abisibi tabilé gu'írame ju. <sup>17</sup> Apiépiri chátiri 'nátili tabilé 'la ju Onorúgame nírga.

\* 5:1 E'nesi glosario «Jesús» 'lige «Cristo».



<sup>18</sup> 'We 'la machiaa suwábaga napu ekí Onorúgame Alawala alawégame ju tabilé siné esítiri nóchali nóchaga e'yénimio. Esukristo 'we 'la repú alué ralámuli, 'lige tabilé gainámala Remónisi alué ralámuli umeria.

<sup>19</sup> 'We 'la machiaa Onorúgame 'kúchila nírigó ramué, 'lige Remónisika cha'pigá ajtigó suwábaga ralámuli jena wijchimo-ba ejperégame napu tabilé oyérame ju Onorúgame. Alué Remónisi 'sime ju nulá napurigá alué ralámuli resí nokagá e'yénamala.

<sup>20</sup> Abiena 'we 'la machiaa nawáligo alué Esukristo Onorúgame Inolá ramué gu'írimia, 'lige nejíligo semátiri 'nátili napurigá 'la námapua churigá ko Onorúgame 'lige 'la oyérame nírigó Onorúgame Inolá. Alué Esukristo ju Onorúgame 'lige alué ju ne-jime bo'né Alawala napurigá 'la alué 'yuga ejperéliwa senibí. <sup>21</sup> 'Emi napu ne 'we najkí, 'we 'la 'nátiga mochiwa. Tabilé na'tawa uché bilé 'nátili nerugo abé semátiri me'tagá Onorúgame na'tálila.†

Pe ekí júpá ye ra'íchali. Wa'lú cheliérabá.

† 5:21 Yolí ra'ichagaká aní «Hijitos, cuidense de los dioses falsos.»

## Ye Ju Uché Bilé Apeli Napu Osale Juani

*Kuira.*

<sup>1</sup> Ne Juani, napu ju repume Onorúgame oyérame ralámuli, osé ne mué mukí napu Onorúgamete wanápurigame ju, abiena osé ne mué u'kúchila,\* napu 'we ganíliga eté ne, 'emi napu 'we galilime ju uché jaré ralámulitechigó alué ralámuli napu machime ju alué Onorúgame nila ra'íchali 'lige napu 'we 'la oyérame ju alué ra'íchali. <sup>2</sup> Neka 'we 'la galé 'emi napugiti 'emi 'lige ne 'we 'la oyérilime nírigime alué Onorúgame nila ra'íchali, alué ra'íchali napu tabilé 'yégali ruwime ju. 'Lige senibí alué ra'íchali oyériga nokísiwa. <sup>3</sup> Onorúgame 'la gu'írisa 'la kápá, mué mukí 'lige mué 'kúchila, 'we 'la na'temasa 'la kápá, 'la bi'lepi 'nátili 'yasa 'la kápá pe alué 'nátalicho napu ju Onorúgame nélegá inálime. Ramueka 'we 'la oyérilime niru alué ra'íchali Onorúgame nila napugiti Onorúgame 'we 'la galeme ramué.

<sup>4</sup> Neka 'we ra'sáláturu napu 'lige machisá ne 'we 'la elío mué 'kúchila napurigá Onorúgame Alawálate nulewa napurigá najkí Onorúgame. <sup>5</sup> Neka osé mué mukí ruigá napurigá 'we 'la ganíliga etega nokísiwa o'maka. Ye ra'íchalika tase pe kulí ma'chínigame ju, 'we 'yasi nulá Onorúgame regá: «'We 'la ganíliga ejperéliwa o'maka, 'we 'la nakúriga.»† <sup>6</sup> 'We 'la ganíliga etega ejperéliriká o'maka, 'la e'wame kéréliwa napu najkí Onorúgame, napurigá akele 'emi 'yasi napu 'lige pe kulí chojkía Onorúgame oyeria.

*Jena ruwimela Juani ruwíligo jipe we'ká ralámuli mochigo jena wijchimoba napu Onorúgame oyérame korí*

<sup>7</sup> We'ká mochíkuru jena wijchimoba napu Onorúgame oyérame korí, nobi tabiléchigo bijchígime júkó jena wijchimoba nawáligo Esukristo napuyeri bilé ríó neraga. Alué ralámulika pe 'yégiga e'yéname ju, se'nú 'nátili beníriga ralámuli, 'lige aníme ju Onorúgamete julárigame ko ralámuli buinániliga alé chátiri bowechi e'yéname. <sup>8</sup> Mué mukí 'lige mué 'kúchila 'we 'la oyériga ejperéliwa Onorúgame, 'we 'la 'nátaga mochiwa napurigá tabilé guwana rujsúmala 'emi abichilubi beníá napu najkí Onorúgame, abichilubi beniboa napurigá 'la narémala 'emi napu Onorúgame nejíмили ju.

<sup>9</sup> Mué mukí 'lige mué 'kúchila na'loasa alué a'lala ra'íchali Kristo nila ra'íchali

alué pe se'nú ra'íchali 'yúriga pe 'yégali ruwime, 'liko tabilé a'lá oyérame nímala 'emi Onorúgame. Alué 'la Kristo nílacho ra'íchali oyérame ralámuli, alueka 'la oyérame nímala O'nó Onorúgame 'lige alué O'nó Onorúgame Inolá. <sup>10</sup> Jaré ralámuli jsísá alé 'mi napu 'emi ejperé, tabilé 'la a'ká ra'íchali benírimia, tabilé lisensia 'yawa napurigá ra'íchámala alué ra'íchali napu benírimia si alé napu mochí 'emi Onorúgame nila ra'íchali gepua nibilé regá anewa: «¡Mochisi pachami!», <sup>11</sup> napugiti alué napu regá ané alué ralámuli: «¡'Láchigo jsíkuru 'emi, mochisi pachaka!» Alarigá aníme ka 'ma alué tabilé 'la a'ká ra'íchali benírame ralámuli gompaniérola gayena 'emi.

<sup>12</sup> We'ká ra'íchánili ne mué mukí 'yuga 'lige mué 'kúchila 'yuga, pe iligá tabilé osilíchi osigá ra'íchánili ne, siné kachi pe 'wemi simé rekó ne 'emi 'yuga ra'íchamia napurigá abé 'la ra'sálagá mochiwa o'maka, mué mukí, mué 'kúchila, 'lige ne Juani.

<sup>13</sup> Alué mué go'chila 'kúchila wa'lú reporalí nawa mué, alué mué go'chila napu wanápurigame ju Onorúgamete.

Pe ekí kápá ye ra'íchali. Wa'lú cheliérabá.

\* **1:1** Jaré ralámuli mayé napu 'lige Juani aníá «mué mukí» pe aníme ke aníligo «suwábaga 'emi napu napuíme ju bilénami Onorúgame nila ra'íchali gepumia 'lige aminami benímea» aníme ke aníme mayé. Yolí ra'íchagaká «congregación» aníame ju. † **1:5** E'nesi glosario «amor».

## Ye Ju Alué Apeli Nujubá Osirúgime Napu Osale Juani

Kuira mué Gayo.

<sup>1</sup> Ne Juani, napu repume ju Onorúgame oyérame ralámuli, osé ne mué Gayo, mué napu 'we galilía Onorúgamete, napu ne 'we galegá etéchigó.

*Jena ruwimela Juani ruwíligo 'we ra'sáláo napugiti alué Gayo 'we 'la oyérame níligo Onorúgame*

<sup>2</sup> Mué rió Gayo, Onorúgame 'we 'la gu'iri mué 'la bi'lepi 'nátili 'nata pe 'la Onorúgamecho oyérimime, a'chigóriga 'la kápachigó napurigá 'we 'la semáriga gu'irisiga mué Onorúgamete napurigá 'we a'lá ma'chínamala mué nochálila, 'lige aminami tabilé nayuka ilírosa 'la kápá mué. <sup>3</sup> 'We ra'sálá ne napu'lige machísá 'we 'la oyériga eyenio mué Onorúgame nila ra'íchali tabilé 'yégalí, jaré jena epperégame ralámuli Onorúgame oyérame napu e'yénale alé napu mué ajtí ruwíturu 'la oyériga eyenio mué alué ra'íchali tabilé 'yégalí ruwime. <sup>4</sup> Neka 'we ra'salágá ajtí machiame ne 'we 'la oyériga e'yenio mué Onorúgame nila ra'íchali, 'emi napu ne beniri Onorúgame nila ra'íchali napu'lige pe kulí benichi 'emi.

<sup>5</sup> Mué napu 'we galilía Onorúgamete, mueka 'la lisensia 'yame ju napurigá che'lebámala mué bejtélachi suwábaga napu Onorúgame nila ra'íchali benírísia jsime ju alemi, alué pe kulí siné jsime alemi Onorúgame nila ra'íchali benírímia rekó tabilé siné eteme ke mué 'yabesi, <sup>6</sup> suwábaga alué ralámuli 'we 'la ruyele ralámuli Onorúgame oyérame jena epperégame 'we 'la lisensia 'yame ko mué napurigá che'lebámala alé alemi e'yénachi, 'lige 'we 'la 'yame kará mué go'ame napurigá nutugega simámala bilénami simiba Onorúgame nila ra'íchali benírímia. <sup>7</sup> Asíriga 'la júkuru alarigá gu'írichi mué alué ralámuli napugiti alué ralámulika e'yéname alemi 'we 'la oyériga Onorúgame tabilé nareka e'karúgame tábiri i'lía, nibilé go'ámetiri i'lía alué ralámulite napu tabilé oyérame ju Onorúgame. <sup>8</sup> Alekeri ramué 'we 'la gu'íritékuru alué ralámuli napu Onorúgame nila ra'íchali benírígá e'yena alé 'mi napurigá gompaniérola niwa.

*Jena ruwimela Juani ruwíligo 'we ne-  
jkumeme níligo alué rió Riótrepé anúlime*

<sup>9</sup> Neka osé bilé ra'íchali alué ralámuli Onorúgame oyérame napu epperé alé napu mué ajtí ruigá alemi e'yénigo jaré alué Onorúgame nila ra'íchali benírame ralámuli napurigá gu'írimala 'emi pe iligá 'we

nejkumeme alué rió Riótrepé rewégame, 'we wa'lula neraga chujkírime ju pe nejkumega, ta'mé ganílígá ajtí napurigá 'emi nuleme nímala ne. <sup>10</sup> Alekeri napu'lige alemi simísá ne'ochámala ne alué rió 'lige 'we 'la ma'chígime ruyémala ne napurigá tabilé 'yériga einámala chátiri ra'íchali benírígá e'yenio ramué peka 'la bijchiá kachi, 'lige pe alieti 'nátaga tabilé lisensia 'yame ju napurigá che'lebámala alé, alemi jsime ralámuli Onorúgame nila ra'íchali benírímia ralámuli, 'lige jaré 'la lisensia 'yánilisa napurigá che'lebámala a'boi epperélachi, yati sulime ju 'lige 'ma tabilé elime ju napurigá simela alé 'mi Onorúgame nila ra'íchali gepumia napu napuime ju suwábaga 'emi Onorúgame oyérame. <sup>11</sup> Mué rió Gayo 'we galilime Onorúgamete tase oyériga ilíriva alué chátiri rejcholi, iligá a'lá rejcholi oyériwa 'nalina. Alué 'we a'lala rejcholi oyérame ka, alueka 'la Onorúgame 'kúchila nímala, alué pe tabilé a'lá rejcholi oyérame ka pe tabilé Onorúgame oyérame kérélamala.

*Jena ruwimela Juani ruwíligo Remetrio 'we 'la oyérame níligo Onorúgame*

<sup>12</sup> Suwábaga ralámuli ruwí 'we a'lá oyérame ko alué Remetrio a'lala rejcholi, ramuéchigó ruwiyá 'we 'la oyerio Remetrio alué a'lala rejcholi, 'lige 'emi 'we 'la machí 'la bijchiá ko napu ruyá ramué 'we 'la oyerio alué Remetrio alué a'lala rejcholi.

<sup>13</sup> Neka we'ká ra'íchali ra'íchánili mué 'yuga, nobi tabiléchigo aminabi osimélagó ne. <sup>14</sup> Pe 'wemi simea ne alemi napu mué ajtí mué 'yuga ra'íchamia.

<sup>15</sup> 'We 'la bi'lepi 'nátili 'nátaga asísá 'la kápá mué. 'We nábole reporalí suwábaga napu mué machime ju napu jena mochi. Muéchigó 'we repóriwaká suwábaga machirume.

Pe ekí kápá ye ra'íchali. Wa'lú cheliérabá.

## Ye Ju Alué Apeli Napu Osale Jura

*Kuira suwábaga 'emi ralámuli.*

<sup>1</sup> Ne Jura anilime rió osá ye ra'íchali rejcholi. Alué Esukristo re'pá ajtúgame, aluete 'yárükuru ne bilé nóchali. Neka u'tala bonirúgame niraga ju Santiago 'yuga. 'Émika Onorúgamete bayérigame nilekuru napurigá 'emi Onorúgame oyérame nímala, alekeri neka 'emi oséguru. O'nó Onorúgameka asírige 'la galegá etelekuru 'emi. 'Lige Esukristo 'we nejkura napurigá tabilé che ikimela 'emi ralámuli. <sup>2</sup> 'We 'la kékuru Onorúgame na'temasa 'emi, aminami walú nejisa a'walí napurigá ta we'ká 'nata mochímala 'emi. 'Lige Onorúgame 'we 'la ganiliga etesa, 'la júkuru 'emi.

*Jena ruwimela Jura ruwíligo jaré rió sébiligo alé yégali benúrame*

<sup>3</sup> 'Emi ne amígola, neka asírige ruinalituru jena osagá bo'né Onorúgame 'láchigo nejkúrilikó 'emi 'lige néchigó, 'lige ta'chó osiachi, uchéchigo bilé 'nátili ma'chínaturu. Jípeko nawésali náomili júkuru ne napurigá 'la nemímala 'emi se'winá nokachi uché jaré ralámuli, alué ralámuli napu sairúgame ju alué ra'íchali napu Onorúgame benúrale bajchá rawé mochígame ralámuli napu Onorúgame oyérame nile. Alué ra'íchali 'ya nerúgame 'la sébali nilikuru, tabilé tase rokáré. <sup>4</sup> Jaré rió 'ma alemi mochí napu 'emi mochí. Alué ralámulika Onorúgame oyérame koríguru a'boika, tabiléchigo Onorúgame oyérame ke anigó, pe laní 'yégiga. Alué ralámuli asírige a'wágame gastigo narémili júkuru Onorúgame nila. Alarigá anile Onorúgame ra'ichálila 'we 'ya, 'ma asírige we'ká bamí ju. Alué ralámulika tabilé Onorúgame 'yuga 'nátame ju. A'boika aní 'we 'la narénili alué Onorúgame nejílala nawésali, tabiléchigo 'la 'nátame kéréko a'boika, pe we'ká umugí 'yuga okónilime ke aní. Alué ralámuli tabilé bijchigi Esukristo ko bi'lepi wa'lula nulame jena wijchimoba ramué 'yuga.

<sup>5</sup> Neka uché na'tárimé oláeke'é 'emi napurigá 'emi machimela alakímeo alué cha nokame ralámuli. 'Émika 'ma machílké alieti ruímeo ne, abirigá uchéchigo siné ruímé ne alué chukimeli ko alué cha nokame ralámuli, pe a'chigóriga nímala napurigá ikilige 'ya mochígame ralámuli. Onorúgame suwábaga ralámuli napu ekí nilige israelita 'ma buyánale alé Ejipto

mochígichi. Alué ralámuli israelita pe napurigá ralurúgame nile alé Ejipto. Alekeri Onorúgame 'ma buyánale alé Ejipto. Onorúgameka gawí nuebo 'yámorile, nobi tabilé e'wele ko Onorúgame 'la ruwichi. 'Liko Onorúgameka 'ma suwábale suwábaga alué ralámuli napu ekí tabilé oyérale Onorúgame ra'ichálila, tasiné sébale alé gawí nuebochi. <sup>6</sup> Abiénachigó a'chigóriga ikimeli ju alué ralámuli cha nokame napu ejperé napu 'emi mochí, napurigá ikile jaré santo ánjeli. Alueka tabilé ejtebile alé napu Onorúgame 'yálige napurigá mochímala, alueka pe se'wí simíbale. 'Liko Onorúgame 'ma gastigáriga alué santo ánjeli, wamí chonárale mochile karénate bulugá. Tabilé siné buyásamala alé karénate buluruga mochiga. Onorúgameka alé mochímala bulugá napusí bo'né nawámala alué santo ánjeli gastigárimia. <sup>7</sup> Alué ralámuli abichigó alarigá narémala alué gastigo.

Abiénachigó gastigárimala alué ralámuli napurigá alué ralámuli alé walú we'ká riógichi Soroma anilichi ejperégame 'lige Gomora\* anilichi ejperégametiri 'lige aminami uchéchigo jarénami we'ká riógichi ejperégame alé a'bemi. Ralámuli alué napu ekí rió nílige asírige we'ká umugí 'yuga okole, 'lige aminami riocho ka okole. 'Liko Onorúgame 'ma gajúnale suwábaga galí alué we'kaná we'ká riógichi jágame 'lige aminami ralámulitiri 'ma suwábaga suwábale napu ekí ejperégame nílige alé we'kaná we'ká riógichi, 'ma e'kósale na'ite. Yeka ruwime ju Onorúgame na'ite suwábimio ralámuli cha nokame, 'lige tajsiné cho'imela alué na'í.

<sup>8</sup> 'Lige abiena alué ralámuli napu chátiri eteme ju remuka, alué ralámuli anime júturu: «'We 'la oyérawa alué remugí.» Alué ralámulika 'ma najsabú suwábaga a'lala ra'íchali napu nerú jena wijchimoba, 'ma bo'né sa'pálatiri. Tabilé najkí alué a'boi ralámuli napurigá Onorúgame nulámala. Pe gawéliga eteme ju Onorúgame 'lige santo ánjeli 'lige Remónisitiri.† <sup>9</sup> Alué wa'lula santo ánjeli Migeli rewégame, aka alué Migeli peka che anélige'é Remónisi, 'lige alué ralámulika tabilé ikiárékuru napurigá gawélimala alué Remónisi. Alué Migeli Remónisi sí ra'icha ilile napu'lige mukule alué Moisesi. Alué Remónisika alué Moisesi sa'pala o'tonálile, 'lige alué Migéliga pe tabilé che anele, pe 'la niraga etele alué Remónisi. Pe iligá regá anele: «Bo'né Onorúgame machílké mué Moisesi sa'pala o'tosáká.» <sup>10</sup> Asírige chátiri ra'íchali ra'íchame ju napuyépiri ra'íchali napu ekí tabilé námame ju a'bopi. Pe

\* 1:7 Alé Soroma 'lige Gomora rewégichi 'we cha nokame ralámuli ejperégame nile 'ya napu'lige betjégichi Abraámi. Onorúgame 'ma e'kósale suwábaga ralámuli 'ma galítiri 'yúriga. E'nesi Génesis capítulo 18 'lige 19. † 1:8 Alué Remónisi 'yako 'we a'lá santo ánjeli nílige, iligá cha'sile 'liko Onorúgameka 'pa rewagáchikana pale. E'nesi glosario «Satanás».

napurigá e'yéname ju ajágame pe alarigá e'yéniniliga aní alué ralámuli, pe go'ámecho 'lige okókime 'nátame ju alué ralámuli, 'lige pe umugí 'yuga okókime. Pe aliericho 'nátage e'yéname kame napurigá jami oyame ajágame. Pecha siné 'nátame júkó alueka Onorúgame 'yuga. Napu'lige bilé rió alieti 'nata, 'liko alué rioka pe bo'nepi cha ikimela.

<sup>11</sup> Asírige resíríká nímala alué ralámuli níriga. Alué ralámulika napurigá Kaíni alarigá 'nátame ju napu'lige ayole bonila 'yuga. 'Lige aminami pe 'nátame ju alué ralámuli napurigá alué Balaámi pe enomí méniliga. Benírale 'we 'la ko Onorúgame saega mochírige. 'Lige alué ralámulika abiena napurigá Koré† anilime rió alarigá 'nátame ju, alueka pecha oyéralega Onorúgame nila rejcholi 'lige sairúgame neraga gayénale alué e'wéla 'yuga. Alué ralámuli napu ekí sairúgame neraga mochi, suwimela napurigá me'liliru alué Koré anilime. § <sup>12</sup> Ye we'ká rió cha nokáme ka 'emi si napuíka go'yame júkuru alué go'ame newárigime napu 'emi go'yame ju alé napuísa Onorúgame ra'ichálila benimea, tabiléchigo Onorúgame oyérame kéréko alué ralámuli. Pe asírige jobátigame ju napurigá rejté re'lé ba'ichí mochígáme rejpúrámé kárigó re'késiga pecha ma'chígime ka re'lé ba'ichika. Alué ralámulika tabilé chijúnáme ju. Pe iligá a'bopi niraga 'nátame ju. Alueka pecha gu'írame júkó uché jaré ralámuli. Alueka pe napurigá bilé nolí wakígáme ekáralimi júname, pe alarigá júkuru. Alué ralámuli 'we bajchá uchútame, tabiléchigo sébali olame júkó 'lige. 'Lige abiena napurigá bilé masana tabilé rakeme, alarigá ju alué ralámuli, 'lige pe 'ma bo'niboli ju alué masana. <sup>13</sup> 'Lige aminami alué ralámuli napurigá ba'wí gomichi ename alarigá ju. Alué ba'wí asírige we'ká repuga a'reme ju gomichi suwékimi. Alarigá júkuru alué cha nokame ralámuli. Asírige we'ká e'karúgame cha nokogá e'yéname ju, tabilé niraga a'bopi. Tabilé chijúnáme ju. 'Lige aminami alué ralámuli pe napurigá alué so'pilí wajségáme,\* alarigá ju, pe e'yéname ju. Napu'lige suwisá, nabí chónagachi mochímala, tasiné buyásiga. 'Lige alué ralámuli tajsiné buyásiga mochímala alé chonárale.

<sup>14</sup> Enoko rewégame nile bilé rió 'we 'ya

ajtígáme. Aránika Enoko bi'chela† nile. Alué Enoko ruwile alarigá ikimeo alué cha nokame ralámuli a'kinana rawé. Regá anile alué rió: «'We 'la buigá mochiwa, 'ma sebámili júkuru alué Wa'lula Onorúgame we'ká mili santo ánjeli 'yuga,<sup>15</sup> 'lige gustisia olámala suwábaga ralámuli, 'lige aminami alué gastigo 'yámala alué napu ekí tabilé 'nátame ju Onorúgame na'tálila. Alué ralámulika asírige we'ká e'karú nokogá e'yéname júkuru tabilé Onorúgame nulálila 'nátage. 'Lige aminami asírige tabilé 'la ra'íchali ra'íchame júkuru Onorúgame olagá.» <sup>16</sup> Alué ralámulika 'we cha anigá nokame ju sairúgame neraga ra'íchame ju Onorúgame olagá. Pe alué chátiri 'nátalicho 'nátage e'yéname ju pe a'bopi 'nátage. 'Lige asírige najtékame korigá e'yéname ju a'bopi. 'Lige aminami asírige 'la semáriga ra'íchame ju uché jaré ralámuli olagá napu'lige gu'írilime najkigá.

*Jena ruwimela Jura ruwíligo uché pe'kabi rejcholi*

<sup>17</sup> 'Emi Onorúgame oyérame napu ne 'we galegá eté, na'táwaguru alué ra'íchali napu ra'íchilige alué makué oká rió napu Wa'lula Esukristo 'yuga e'yénilige. <sup>18</sup> Regá anime: «'A'lige rawé napu'lige 'ma amulí suwíbachi gawí, asírige we'ká ralámuli mochímala Onorúgame gawélime, asírige chátiri ra'íchali ra'íchámala Onorúgame olagá. Alué ralámulika pe napu nóchame ju a'boi, pe aluecho oyéramala. Alué ralámulika tabilé na'támala Onorúgame 'yuga.» <sup>19</sup> Alué ra'íchali napu ruwíligo alué ralámuli, jipe 'ma 'la bijchiá ma'chínaguru. Ye cha nokame rioka we'ká e'karúgame 'nátame ju napurigá 'emi tabilé bi'lepi 'nátali 'nátage mochímala. Alué rioka pecha Onorúgame Alawala alawégáme júkó, alueka ju pe napurigá bilé ajágame, tabilé 'nátame Onorúgame 'yuga.

<sup>20</sup> 'Emi ne amígola, 'la nakúrilime júkuru a'bopi níriga napurigá 'emi 'we 'la e'wémala alué Onorúgame nila ra'íchali. Tániwa Onorúgame napurigá bo'né alawala gu'írimala ramué Onorúgame 'yuga ra'íchálichi. <sup>21</sup> 'La 'we 'la niraga jariwa 'la gu'íriga uché jaré ralámuli, 'la ganúliga e'yéniwa uché jaré 'yuga a'chigóriga napurigá galeme ju Onorúgame ramué. Uché siné sebámala alué Wa'lula Esukristo ramué na'temaka. Asírige 'la buigá mochiwa a'lige rawé. Alué 'símili júkuru ramué a'walí

† **1:11** Alué Koreka sairúgame nile Onorúgame 'lige Moisesi, 'liko Onorúgameka gasinale alué gawí 'lige alégana rusule alué Koré 'ma gompaniérola si, 'lige kúchigo na'oga ilíbase gawí. E'nesi Números 16:1-35. § **1:11** Kaínika nile bajchá ochérigame Arani inolá. E'nesi Génesis 4:3-9. Alué Balaámika sujkurúgame nile. 'Yégime nile ralámuli napu'lige Moisesi nulechi alué ralámuli israelita. E'nesi Números 22-24. \*

**1:13** Ralámulika aní: «Napu'lige paka ilisá so'pilí wajségáme, bilé tábiri ruwime kará. Tabilé 'la bamíbali ruwime kará.» † **1:14** Alué Enoko o'nola, jareri anilime nile. Enoko ochila ka, Majalaleli anilime nile. Enoko umúlila ka, Kainani anilime nile. Enoko ególila ka, Enosi anilime nile. Enoko geyóchila ka, Seti anilime nile. Enoko bi'chela ka, Arani anilime nile. Alué Arani anilime rió nile 'ya bajchá ajtígáme ta'wesi 'cho rió it'égichi.

'ya napurigá ramué alué a'walite 'la nabí ejperélawá rewagachi.

<sup>22</sup> Jaré ralámuli a'nagú 'nátame ju, bilena tabilé 'la niraga, bilena 'we 'la niraga, pecha machime ka ye Onorúgame ra'ichálila. Siné rawé na'tamaréko abe. 'We 'la na'temápua alué ralámuli. <sup>23</sup> Jaré mochí asírige cha nokame ralámuli. 'Liko bilé rejcholi 'yásiga 'la júleké alué cha nokame ralámuli napurigá ku 'la o'wé na'támala. Jípesíko 'la 'nátaga nokísiwagó napurigá tabilé resí ikimela 'emi. Alué ralámulika 'we cha nokame ju. Tabilé galétékuru napurigá nokame ju alué ralámuli, alueka pe sairúgame neraga kame Onorúgame 'yuga.

*Jena ruwimela Jura ruwíligo 'we 'la ra'sálagá járilime ko nabí*

<sup>24</sup> Pe Onorúgamecho ju napurigá 'emi repúmala napurigá tabilé se'nú bowé cha'pimela 'emi. Pe aluecho ju napurigá nejkúrimala napurigá 'la a'bé o'wemi neraga jawa napu ajtí Onorúgame. Ramueka 'we cha nokogá e'yéname nírikuru kákobá, Onorúgameka abirigáchigo 'la e'kale ko. 'We 'la ra'sálagá jáwaguru o'wemi napu Onorúgame ajtí, Onorúgameka 'la semáriga kame. <sup>25</sup> Bi'lepi Onorúgame ju. Napu'lige Onorúgame sébale jena wijchimoba bilé rió neraga Esukristo rewega, alué 'sílekuru ramué buyana alé resítirichi. Alueka wa'lú a'walí nígame kame napurigá aminabi nokísiwa tabilé guwana rusuka. Alué Onorúgame Alawala gite a'lá sébali o'toboa ramué napu ajtí Onorúgame re'pá rewagachi. Suwábaga ralámuli 'we 'la niraga etewa Onorúgame. Asírige a'wágame ju. Alué júkuru bi'neli neyúriga Wa'lula. Alarigá nile 'ya napu ta'chó i'tégichi ye gawí. Abalarigá júkuru jipe, alarigá nímili júkuru nabí.

Pe ekí kápá ye ra'ichali. Wa'lú cheliérabá.

## Ye Ju Alué Apeli Napu Osale Juani Ruigá Churigá Nimio Jena Wijchimoba Nujubá Rawé

*Kuira suwábaga 'emi ralámuli Onorúgame oyérame.*

<sup>1</sup> Ne ju Juani. Osá ne ye bilé ra'ichali. Onorúgame júlale bilé santo ánjeli ruyéniliga ne'chí chu'simio Esukristo napu'lige uché siné nawá jena wijchimoba. <sup>2</sup> Jena osá ne ruigá suwábaga napu eté ne 'lige suwábaga napu aké ne chukimeo pe 'wemi.

<sup>3</sup> Ralámuli ye osilí leérame ka napurigá gepúmala uché jaré ralámuli, alueka 'we 'la semáriga narémala Onorúgame nila a'walí, 'lige alué ralámuli gepume 'we 'la e'wasa abiena 'we 'la semáriga narémala Onorúgame nila a'walí. 'Ma pe 'wemi sebámala alué raweli napu alarigá ikimeli ju napurigá ruwí ye ra'ichali.

*Jena ruwimela Juani oséligo alué Esukristo oyérame gíchao we'ká riógichi mochígame*

<sup>4</sup> Ne Juani oséguru 'emi ralámuli Esukristo oyérame gíchao we'ká riógichi mochígame alé Asia anilichi we'kanami riógame. Neka najkíguru napurigá Onorúgame 'we 'la gu'írimala 'emi napurigá 'emi ralámuli tabilé we'ká chátiri 'nátili 'nátaga nokísamala. Neka najkíguru napurigá Onorúgame 'we 'la gu'írimala 'emi, alué Onorúgame napu jipe Onorúgame ju, 'lige napu nabí ajtilé asíruga 'yasi, 'lige napu nawámili ju. Abiena najkí ne napurigá alué gíchao alawégame\* 'we 'la gu'írimala 'emi, alué alawá napu alé o'wemi jái napu ajtí Onorúgame. <sup>5</sup> Abiena najkí ne napurigá 'we 'la semáriga gu'íriwa 'emi alué Esukristote napu 'la o'wé ruwime ju napu etele, alué napu pe kulí bilé ju napu ajana mukusá, alué napu nuleme ju jipe suwábaga alué e'wéwéla selígame napu ekí mochí jena wijchimoba, alué Esukristo napu asíruga na'temaka galeme ju ramué, napu mukule bilena gulusichí pe ramué buyánaga chátiri bowechi i'nárigichi. <sup>6</sup> 'Lige alué Esukristote wanápurigame niru ramué napurigá nochawa napu Onorúgame nulá, alué Onorúgame Esukristo O'nola. 'We 'la semáriga ra'ichasa 'la kápá suwábaga ralámuli alué Onorúgame olagá, 'lige Onorúgame senibí 'emi nulesa 'la kápá. Alarigá nisa 'la kápá.

<sup>7</sup> 'We 'la 'nátaga mochiwa.

\* **1:4** «Gichao» ruwime ju «'la sébali». «Gichao alawégame» pe ruwime ju «Onorúgame Alawala», napu 'we 'la sébali ju.

† **1:10** Yolí ra'ichaga napurigá «trompeta» ra'ichale alué rió.

Esukristo bilé rawé uché nawámala bilena nolichi

'lige suwábaga ralámuli etémala napu ekí ejperé jena wijchimoba, 'lige suwábaga ralámuli napu ekí najkile napurigá alué Esusi me'liboa, napu tabilé galele Esukristo, suwábaga alué ralámuli abiena etémalachigó. Suwábaga ralámuli we'kaná ejperégame jena wijchimoba,

rekó jaré se 'winátiri ra'ichame ke, suwábaga 'ma nalámala machigá 'ma sebio raweli gastigo narékime. Alarigá nímalaabá.

<sup>8</sup> Onorúgame wa'lú a'walí nígame ju napu asíruga 'yasi ajtígame ju 'lige napu jipe abiena ajtí, 'lige napu nabí asimeli ju, regá aní:

—Ne júkuru napu gawí newale 'lige i'libeko 'ma suwíbasa ye gawí abiena bijí abichilubi bejtélamala ne. Ne júkuru suwábaga 'emi nuleme.

*Jena ruwimela napu Juani etele napu 'lige rewírale Esukristo alé Pátmosi rewégichi*

<sup>9</sup> Ne Juani napu abiena Onorúgame oyérame júchigó napurigá 'emi, ne 'we resí nilia ajtí, a'chigóriga napurigá resí nilia mochí 'emi, gawéliga etelia ne 'lige chibi anilía ne Esusi oyérame kóriká, ne napu 'emi 'yuga nóchame ju Onorúgame nocháilachi jena wijchimoba napurigá nulá Onorúgame, neka jena a'páruturu Pátmosi rewégichi napu ju rabó nasipa ba'wichi napu ilí wa'lú ba'wí Meriteráneo rewégame napurigá resí nilia asimela ne tabilé gayéniga ku bajunía, napurigá 'ma tabilé aminabi beníruga einámala ne Onorúgame nila ra'ichali, 'lige napurigá 'ma tabilé aminabi beníruga einámala ne tachiri gite nawáligo Esusi jena wijchimoba. <sup>10</sup> Bilé rawé resíbilichi, Onorúgame bo'né a'walila 'yáturu ne'chí napurigá ne we'ká tábiri etémala napu tabilé 'wesi etiá ralámuli, 'lige bilé ra'ichali akéturu ne guwánaka 'we a'wágame 'lige 'we 'la ma'chígame,†<sup>11</sup> regá anime:

—Bilena apélichí osibóaká napu ekí tábiri etémala mué, 'lige náolawaká napu osimela mué alué Onorúgame oyérame ralámuli napu mochí gicháomana we'ká riógachi alé Asia anilime gawí bo'ígichi mochígame napu ju bilena chojkégame Ebeso anilichi we'ká riógichi mochígame, 'lige uché bilena chojkégame Esmirna anilichi we'ká riógichi mochígame, 'lige uché bilena chojkégame Pérgamo anilichi we'ká riógichi mochígame, 'lige uché bilena chojkégame Tiatira anilichi we'ká riógichi mochígame, 'lige uché bilena chojkégame Sárisi anilichi we'ká riógichi mochígame, 'lige uché bilena chojkégame

Pilarélpia anilichi we'ká riógichi mochígáame, 'lige alué uché bilena chojkégamechigó napu Laorisea anilichi we'ká riógichi mochígáame ju.

<sup>12</sup> Lige neka gu'liga e'néturu machinálíga chieri iligá aníá ra'icha, 'lige etéturu ne gichao tábiri 'órote newárigime napu kante-labro anilime ju, gichao gantela jawálime a'pílipi kante-labrochi. <sup>13</sup> Lige alé nasipa alué gichao kante-labrochi iligéturu bilé rió we'lí o'páchigime, 'lige 'órote newárigime sibala rekágáame kéturu sulachipo. <sup>14</sup> Lige asríga rojsákame gupégáame kéturu napuyeri no'sá 'lige napurigá gepá, 'lige busílaka napurigá na'í rajame alieri kéturu, <sup>15</sup> ralálaká asríga sejtákame kéturu napuyeri jiero rajtabáchirigame. 'Lige ra'ichálilaka napurigá ba'wí wal'ú bakochi ename alieri anime kéturu. <sup>16</sup> Lige wajtoná sekáchí gichao so'pílí o'ká iligéturu. 'Lige chu'chí bilé siparina i'kiga iligéturu, 'lige banalaka napuyeri rayénali napu'lige 'we a'wágáame rayena, 'we ra'ósagame alieri kéturu.

<sup>17</sup> Napu'lige alué etesa 'ma bo'íbaturu ne alé a'bé alué rió ilígichi 'ma rekúpaga, napurigá 'ma mukúgame neraga bo'íbaturu ne alé a'bé. 'Lige alué rió wajtoná sekálate ne'chí nocháturu, 'lige anéturu ne'chí:

—Tase majawa. Neka júkuru bajchá ajtígáame 'lige tajsíné we'kámili ju ne 'lige nabí asimela ne.† <sup>18</sup> Ne napu ajagá ajtime ju senibí, mukugéturu ne, jípeko kúchigo 'la ajagá ajtí ne 'lige tabilé siné mukumeli ju ne. 'Lige alué a'wépala ni ne alé yochi i'púlime napu bi'tí suwígáame, 'lige ne bo'né 'la buinámalá alué ralámuli suwígáame, pe aba alé a'rémala ne 'ma alé a'rénilisaká. <sup>19</sup> Mué Juani, 'la osibóaká napu ekí tábiri eté mué alarigá ko jípe, 'lige alarigá nimio i'libeko. <sup>20</sup> Mué bo'neka tabilé machimela tachiri ruwime ka alué gichao so'pílí napu eté mué jena ne sekálachi wajtoná mochígáame, 'lige tachiri ruwime ka alué gichao gantela jawala, alekeri 'la ruwimé ne tachiri ruwime ka: Alué gichao so'pílíka ruwime kéré alué santo ánjeli napu repume ju alué gicháomana we'ká riógichi mochígáame ralámuli Onorúgame oyérame. 'Lige alué gichao kante-labro 'órote newárigime, alueka ruwime kéré Onorúgame oyérame gichao we'ká riógichi mochígáame alé Asia anilichi.

## 2

*Jena ruwimela Juani ruwligo napu anéligo Esukristo alué ralámuli Onorúgame oyérame alé we'ká riógichi Ebésochi ejperégáame*

<sup>1</sup> Mué Juani, osibóaká napu ne ruwimela napurigá alué santo ánjeli o'tomela alué

osilí alué ralámuli 'yamia alué bilena chojkégáame ralámuli Onorúgame oyérame alé Eheso ejperégáame alé we'ká riógichi. Regá anime osibóaká: «Alué napu gichao so'pílí o'ká ilí wajtoná sekáchí napu eyena alé nasipa napu ja alué gichao gantela jawala 'órote newárigime, regá aní: <sup>2</sup> Neka 'la machí 'we 'la semáriga gu'írame ka 'emi uché jaré ralámuli, 'lige tabilé guwana rujsúpua 'emi 'lige tabilé eliwa 'emi napurigá chátiri 'nátili ruyewa 'emi, 'lige mochíkuru jaré ralámuli Esukristote 'yárimé korime nóchali napurigá nulame nímala 'lige ruyeme nímala alué ralámuli Onorúgame nila ra'íchali, 'lige 'émika 'we 'la rukeme júkuru machinálíga, 'lige machime júkuru 'emi tabilé Esukristote nulérigime ko alué ralámuli napurigá ruyémala ralámuli Onorúgame nila ra'íchali, yati machime ju 'emi pe 'yégame ko alué ralámuli. <sup>3</sup> 'Émika 'we resí nilia mochí napugiti 'we gawéliga etélime kame 'emi ne'chí oyérame korigá, 'émika tabiléchigo siné najsina go ne'chí oyeria, iligá 'émika abichilubi beniria mochí Onorúgame nila ra'íchali. <sup>4</sup> Rekó 'we 'la benirie 'emi Onorúgame nila ra'íchali tabilé najsinsina ne'chí oyeria, abiena ta'mé 'we 'la o'wé e'yéname kéré 'emi napugiti tabilé 'la bijchiá 'la ganíliga e'yéname 'emi. 'Ya napu'lige pe kulí siné o'wínale 'emi ne'chí oyeria 'we 'la semáriga galegá járome kéturu 'emi a'boi, jípeko tabiléchigo aliena 'la semáriga ganíliga járome júkó 'emi. <sup>5</sup> Ku 'we 'la na'tawa 'nalina, uché ku 'we 'la ganíliga járowa a'boi. Tabilé ku 'we 'la galegá etega járisaká 'emi a'boi 'liko alemi siné ne napu 'emi mochí 'lige 'ma bujémala ne 'emi alué gantela jawala. <sup>6</sup> Rekó ta'mé 'la galegá etega járome ke 'emi a'boi, 'wéchigo gichime júkó 'emi alué ralámuli napu chátiri 'nátili benírame ju. Alué ralámuli napu nikolaíta anilime ju 'we 'la kórimé nile rekó bilé rió uché jaré umugí 'yuga okoe tase 'la a'boi upila. Neka tabilé galé alué ralámuli napu'lige alarigá nokachí. <sup>7</sup> 'La tabilé najkacholo níriká 'la gepúlime júkuru napurigá ané Onorúgame Alawala suwábaga 'emi Onorúgame oyérame alé gicháomana we'ká riógichi ejperégáame. Bilé rió 'la umérisa riablo na'táilila, alueka 'la 'yámala ne lisensia napurigá go'mela alué rojá rakala, alué rojá napu ilí alé Ereni anilichi.»\*

*Jena ruwimela Juani ruwligo napu anéligo Esukristo alué ralámuli Onorúgame oyérame alé we'ká riógichi Esmírnachi ejperégáame*

† **1:17** Onorúgameka tajsíné o'wísale, nabí asálekuru, 'lige abiena nabí asimeli ju. **2:7** Yeka ruwime kéré alué napu 'la tabilé oyérame ju alué chátiri 'nátili, Onorúgame 'la 'yamio a'wali napurigá 'la senibí asimela rewagachi Onorúgame 'yuga.



8 › Jípeko alué uché bilena chojkégame ralámuli Onorúgame oyérame Esmírnachi epperégame oséwaká napurigá alué santo ánjeli o'tomela alué osilí. Regá anime oséwaká: «Ne napu 'we 'yasi ajtúgame ju 'lige napu abichilubi nabí asimeli ju, ne napu mukugé 'lige napu ku ajana, regá aní ne: 9 Neka 'la machí aliena resí nilia mochigo 'emi, 'lige tabilé nígame ko 'emi, 'wéchigo 'la 'nátame kéréko 'emi, 'la Onorúgame nélegá. Aminami 'we 'la machí ne 'we gawélilime ko 'emi uché jaré ralámulite napu Onorúgamete wanápurigame korime ju alué napu pe riablo oyérame kéré. 10 Tase majawa 'emi rekó resí oláwili ke 'emi pe 'wemi. Remónisi galírale mo'ámala jaré 'emi, pala a'rera 'emi ne'chí oyeria. Makué rawé resí nilia mochímala 'emi, 'émika abiena tabiléchigo a'réwagó ne'chí oyeria, 'la tabilé a'résaká 'emi ne'chí oyeria rekó galírale mo'árigé 'lige rekó me'liae 'liko 'la rewagachi moínámala 'emi ne 'yuga mochímala senibí.† 11 Tabilé najkacholo níriká 'we 'la gepuwa ye ra'íchali napurigá ané Onorúgame Alawala suwábaga 'emi gichao we'ká riógichi mochígame Onorúgame oyérame. Bilé rió 'la umérisa Riablo na'tálila, alué rioka 'la tabilé pápili ju lékana injiérnochi.»

*Jena ruwimela Juani ruwíligo napu anéligo Esukristo alué ralámuli Onorúgame oyérame alé we'ká riógichi Pérgamochi epperégame*

12 › Jípeko alué jaré ralámuli Onorúgame oyérame alé Pérgamo rewégichi epperégame oséwaká napurigá santo ánjeli o'tomela alué osilí alé. Regá anime oséwaká: «Regá aní alué rió napu siparina i'kiga iligé: 13 Neka 'la machí 'emi epperégo alé napu suwábaga ralámuli cha'pígá ajtí Satanasi, 'emi 'láchigo abichilubi oyeria mochíko ne'chí, rekó bilé rió me'lrige ne'chí oyérame kórigá, alué rió Antípasi rewégame. 14 Rekó 'emi 'we 'la oyeria mochige ne'chí, iligá bilena ta'mé 'la nerá ne. Jaré 'emi go'yame kame sa'pá napu kógirime ju alué rejte newárigime tábiri tabilé 'la Onorúgame 'lige abiena jaré 'emi uché jaré umugí 'yuga okome ju tase 'la a'boi upila. A'chigóriga noká 'emi napurigá nokame nile 'ya alué ralámuli israelita. Alué Balaámi ruyele chátiri rejcholi alué Balaki, alué Balaámika anele alué Balaki napurigá julámala alué umugí moabita napurigá alué israelita rió bayéromala go'achi sa'pá alé napu kógilime nile ajágame alué we'ká tábiri pe rejte newárigime tabilé Onorúgame nulalila nile, 'lige napurigá bayéromala napurigá alué israelita mochígame rió alué umugí moabita 'yuga okómala.‡ 15 Lige

jaré 'emi a'chigóriga nokame ju napurigá nokame ju alué ralámuli nikolaíta. Alué ralámuli 'we 'la korime ju rekó bilé rió uché jaré umugí 'yuga okoe tase 'la a'boi upila. 'Lige jaré 'emi a'chigóriga nokame júchigó, we'ká umugí 'yuga okome ju, mayega tabilé resítiri ko rekó alanokae. Alarigáká tabilé 'la ju ne níriga. 16 'Liko 'ma mabúwaká alué ralámuli alanokame, ta mabúsaká 'emi 'liko ne bo'né simela alemi alué ralámuli mabumia ne siparínate napu ne i'kiga ilí. 17 'La tabilé najkacholo níriká 'we 'la gepuwa ye ra'íchali napurigá ané Onorúgame Alawala suwábaga 'emi gichao we'ká riógichi epperégame Onorúgame oyérame. 'Emi napu ekí 'la umeri alué Satanasi na'tálila 'la 'yámala ne alué maná anilime go'ame§ napu ne 'we 'la ajchiga ajtí bilé u'tá rejte 'we 'la gajpóligame tabilé chajótigame 'yámala ne, 'we 'la rojsákame napu chujkú bilé rewá napu tabilé 'wesi machí chieri rewala ka alué rewá, pe alué napu alué rejte 'yámala ne, pe alueka 'la machimela chieri rewala ka alué rewá napu alé rejtechi chukú.»

*Jena ruwimela regá anime oséligo Juani alué ralámuli Tiatira rewégichi epperégame*

18 › Jípeko alué uché bilena we'ká riógichi epperégame Tiatira rewégichi epperégame Onorúgame oyérame oséwaká napurigá alué santo ánjeli o'tomela alué osilí alué ralámuli alé epperégame. Regá anime oséwaká: «Alué Onorúgame Inolá napu napuyeri na'í buségame ju, 'lige ralálaká napuyeri jiero rajtabáchirigame ju, alué regá aní: 19 Neka asíriga 'la machí asíriga 'la galegá eteme ko 'emi aminá uché jaré ralámuli, 'lige 'la bijchígime ko 'emi napu aní ne. 'Lige 'we 'la machí ne 'we 'la gu'ira mochigo 'emi alué uché jaré ralámuli ne'chí oyérame, 'lige tabilé guwana rujsúpua 'emi ne'chí oyeria, abichilubi oyeria mochiwa 'emi ne'chí, 'lige jípeko abéchigo 'la oyeri mué ne'chí, tase napurigá 'ya bajchá rawé. 20 Iligá bilena chojkégame tabilé 'la níra ne. 'Emi elí alué mukí Jesabeli napurigá anémala alué 'la ne'chí oyérame ralámuli tabilé chéréko rekó bilé rió uché jaré umugí 'yuga okoe tabilé 'la a'boi upila ke. 'Lige aminami ruyeme ju tabilé chéréko go'yae alué go'ame napu kógirigame ju alué tábirite ralámulite newárigime. 21 Neka asíriga we'ká rawé i'géturu alué mukí napurigá a'rémala alué resítiri 'nátli napurigá ku guwana na'támala, tabiléchigo a'rénligo alué 'nátli. 22 Alekeri neka 'nata napurigá a'wágame nayupámala, napurigá 'we ejeliga bo'imela. Abiena 'nata ne napurigá a'wágame

† 2:10 Yolí ra'íchagaká «van a recibir la corona de la vida», anime chujkú. ‡ 2:14 E'nesi Números 25:1-3. § 2:17 Alué go'ame maná anilime, Onorúgame 'yale alué go'ame napu 'lige simibale alué ralámuli israelita alé Ejipto mochiga.

napuyámala alué napu ekí oyérame ju alué Jesabeli na'tálila, tabilé a'résaká oyeria alué Jesabeli na'tálila. <sup>23</sup> Alué napu ekí tabilé a'ré oyeria alué mukí na'tálila, 'ma me'limela ne. Alésiko suwábaga ralámuli napu ekí ne'chí oyérame ju machimela ne, neka 'we 'la machime ju chieri ralámuli tabilé 'la 'nata ajtigó, 'lige chieri 'la semáriga 'nata ajtigó, 'lige ne gastigáralama alué napu ekí tabilé 'la 'nata mochí. <sup>24</sup> 'Emi ne'chí oyérame alé Tiatira ejperégame napu tabilé oyérame ju alué Jesabeli na'tálila, napu tabilé oyérame ju Satanasi na'tálila, regá ané ne 'emi: Abichilubi 'we 'la oyériwa ne'chí, tabilé guwana rujsuka, <sup>25</sup> tabilé a'regá alué 'nátali napu ne 'ya 'emi, napusi ne nawá alemi. <sup>26</sup> Apiépiri 'emi 'la umérisa alué Satanasi na'tálila 'lige 'la senibí 'la sébali olagá e'yénasa 'emi napu ne najkí, 'liko ne 'yámala nóchali 'emi napurigá bochígimi jena wijchimoba\* nulame nímala 'emi, <sup>27</sup> a'chigóriga napurigá Onorúgame ajchá ne'chí 'lige a'wágame nulámala 'emi 'lige suwábaga napu ekí tabilé e'wá 'ma gajpónaga 'lúmalá 'emi wejpisóká napurigá sikolí wejcholate newárigame, <sup>28</sup> 'lige 'emi 'we 'la neyúrimala ne a'walla gite suwábaga napu 'emi saila ju.† <sup>29</sup> Tabilé najkacholo níriká 'la gepuwa ye ra'íchali napurigá ané Onorúgame Alawala suwábaga 'emi ralámuli Onorúgame oyérame napu gichao we'ká riógichi ejperégame ju.»

### 3

*Jena ruwimela Juani ruwíligo napu anéligo Esukristo alué ralámuli Onorúgame oyérame alé we'ká riógichi Sárísichi ejperégame*

<sup>1</sup> Jípeko alué uché bilena we'ká riógichi ejperégame Sárísi rewégichi ejperégame Onorúgame oyérame, oséwaká napurigá alué santo ánjeli o'tomela alué osilí alué ralámuli alé. Regá anime oséwaká: Alué rojsákame gupégame rió napu 'ma narékame ju alué gichao Onorúgame Alawala 'lige alué gichao so'pili o'kame wajtoná sekachí, regá aní: «Neka asíríga 'la machí 'we 'la oyéranti kárikó 'emi Onorúgame, tabiléchigo 'la oyérame kéréko. <sup>2</sup> 'We 'la na'tasi 'emi suwábaga, rekó 'la oyérame ke 'emi Onorúgame, ta'mé 'we wélé 'emi Onorúgame oyérilime, Onorúgame níriga 'ma amulí a'ré 'emi Onorúgame oyeria. Ku 'we 'la iwériga nokísiwa o'maka 'la nakúruga abichilubi beniá Onorúgame nila ra'íchali. <sup>3</sup> Napu'lige pe kulí oyeria 'emi ne'chí, 'we 'la oyérame ke 'emi Onorúgame. Tase a'rewa Onorúgame oyeria, iligá ku

'we 'la iwériga nokísiwa 'nalina o'maka. Tabilé 'la 'nátaga mochísaká 'emi, 'liko alemi simela ne 'emi gastigárimia tabilé sainátiriga pe abiéniko neraga. <sup>4</sup> Abiénachigo jaré 'emi Onorúgame oyérame 'la tabilé chátiri alawégame júkó, 'la bi'wígame, 'la 'we 'la wéléme Onorúgame oyérilime, 'lige alueka 'la ne 'yuga e'yénamala 'la rojsákame o'páchaga napugiti alueka 'la e'wame kame napu ne najkí. <sup>5</sup> Apiépiri ralámuli napu ekí 'la umeri alué Satanasi na'tálila, alueka narémala rojsákame o'pacha, 'lige o'pachátamala, 'lige tabilé siné we'kámala ne alué ralámuli rewalá alé apelíchi uchuchárigame, alué apeli napu re'pá rewagachi ajtí. 'Lige 'we 'la ruyémalá ne, ne O'nola 'lige alué santo ánjeli 'we 'la oyérame ko ne'chí alué ralámuli. <sup>6</sup> Tabilé najkacholo níriká 'la gepuwa ye ra'íchali napurigá ané Onorúgame Alawala suwábaga 'emi Onorúgame oyérame gicháomana we'ká riógichi ejperégame.»

*Jena ruwimela Juani ruwíligo napu anéligo Esukristo alué ralámuli Onorúgame oyérame alé we'ká riógichi Pilarépiachi ejperégame*

<sup>7</sup> Jípeko alué uché bilena we'ká riógichi ejperégame Pilarépia rewégichi, Onorúgame oyérame, oséwaká napurigá alué santo ánjeli o'tomela alué osilí alué ralámuli alé. Regá anime oséwaká: «Alué Kristo napu tabilé siné cha 'sile, napu tabilé siné 'yégalí ra'íchame nile, napu ajchárigame ju napurigá wanápamala alué 'la Onorúgame oyérame ralámuli napurigá rewagachi moinámala, alueka tabilé élimala alué ralámuli tabilé oyérame Onorúgame napurigá moinámala rewagachi. <sup>8</sup> Neka 'we 'la machí 'we 'la oyérame ko 'emi ne'chí 'lige 'we 'la gu'írame ko 'emi uché jaré ralámuli. 'We 'la 'nátaga mochisi, neka i'puga a'rémala alé yochi napu ta'wesi umégame ju 'yeria. 'Lige 'émika rekó 'we u'kabi ke ne'chí oyérame 'lige tabilé nígame ke, abiénachigo 'we 'la oyérame júkó 'emi ne'chí tabilé siné chijúniga rekó chibi anilíe. <sup>9</sup> Alemi Pilarépia ejperé jaré ralámuli napu Onorúgamete wanápurigame korime ju napu pe 'yégame kéré, alemi julámala ne alué ralámuli napurigá chojkóbaka jábamala 'we chijúniga machigá 'we 'la na'temao ne 'emi. <sup>10</sup> 'Émika senibí 'la e'wame ju napu ne najkí 'we 'la anáchaga rekó chibi anilíe, 'lige 'we 'la anáchamala 'emi napu'lige seba raweli 'we resí ikiachi, napu'lige resí ikimeli ju suwábaga ralámuli jena wijchimoba ejperégame, rekó resí ikié tabilé guwana rujsúmalá 'emi Onorúgame oyeria. Ne 'la

\* **2:26** Jaré ralámuli mayé pe anime ko ye ra'íchali «bochígimi wijchimoba» aníá, pe alué tabilé jurío ralámuli olagá anime ke anéligo Juani. † **2:28** Yolí ra'íchagaká regá anime ju: «Le daré la estrella de la mañana.» «'Yámala ne 'emi alué so'pili napu be'á be'li ma'chínáme ju.» Ralámuli ka che'lisópili aneme ju, 'lige jaré ralámuli wa'lú so'pili aneme ju. «So'pili» aníaká pe «Esukristo» anime kéréle (e'nesi «Apocalipsis» 22:16) alué rió rojsákame mo'égame.

gu'irimala napurigá 'la anachámala 'emi napurigá 'la tabilé guwana rujsúmala. <sup>11</sup> Pe 'we 'na wámala ne, 'we 'la 'nátaga mochiwa tabilé a'rigá Onorúgame oyeria, napurigá tabilé 'wesi 'wisimala alué gorona napu a'pili 'emi mo'kókame ju napu semati raweli anime ju. <sup>12</sup> Apiépiri napu ekí umeri alué Satanasi na'tálila, alueka napurigá alué re'obá o'tónala nímala,\* 'lige alé o'tónachi ujchámala ne Onorúgame rewalá, 'lige aminami ujchámala ne «Nuebo Rusaleni» anime napu aniame kéré Onorúgame nila we'ká riógichi rewalá. Alué Nuebo Rusaleni aniák anime kéré napu mochímili ju alué 'la Onorúgame oyérame. Alué we'ká riógachiká bo'né Onorúgame re'kibúmala 'pa rewagáchika. 'Lige aminami ujchámala ne, ne rewalá nuebo alé o'tónachi.† <sup>13</sup> Tabilé najkacholo níriká 'we 'la gepuwa ye ra'ichali napu ruyé Onorúgame Alawala alué ralámuli Onorúgame oyérame, gicháomana we'ká riógichi ejperégame.»

*Jena ruwimela Juani ruwíligo napu anéligo Esukristo alué ralámuli Onorúgame oyérame alé we'ká riógichi Laoriséachi ejperégame*

<sup>14</sup>, Jípeko alué uché bilena we'ká riógichi ejperégame Laorisea rewégachi, Onorúgame oyérame, oséwaká napurigá alué santo ánjeli o'tomela alué osilí alé. Regá anime oséwaká: «Ye rió 'we 'la tabilé 'yégame 'lige 'we 'la o'wé ruyame napu etele, napu 'sile ye gawí newá,‡ regá aní: <sup>15</sup> Neka 'we 'la machí churigá ko mué na'tálila. Mueka kárékuru bilé go'ame tabilé rajtágame nibilé rulágame. Neka najkiépá napurigá 'we 'la rulágame nímala mué, o 'we rajtágame kómá. <sup>16</sup> Mueka pe napurigá jerólikeme ju, alekeri pe yo'ga pama olá ne mué.§ <sup>17</sup> Alarigá olama olá ne mué napugíti mueka anime kame: Neka 'we 'la nígame ju 'lige 'we 'la oyérame ju ne Onorúgame 'lige tabilé tábiri rokaré. Rekó alanié mué, Onorúgame níriká tabilé 'la sébali 'nátame kéréko mué, 'lige tabilé nígame kéré mué, napurigá tabilé o'páchigime kéré mué, 'lige napurigá tabilé ma'chílime kéré mué. <sup>18</sup> Neka 'la ruimélabá bilé rejcholi: 'La 'oro ralibóguru 'nalina 'la rusurúgame 'la bi'wígame, 'la ronérigame napurigá 'la semáriga bi'wígame nímala, a'lígeko 'la bijchiá 'la 'we 'alá nígame nímala mué. 'Lige 'la bi'wígame we'lí o'pacha raliboa, 'lige 'la rojsákame, 'lige alué o'pachátawa napurigá tabilé 'yeri einámala mué, 'lige 'la 'yowa busila napurigá 'la ma'chílime nímala

mué. <sup>19</sup> Neka 'we 'la rejcholi ruyeme ju mué napugíti 'we 'la na'temame ne mué, nobi tabilé e'wásaká mué a'wágame wejpisómala ne, alekeri 'we 'la bijchiá 'la oyériwa Onorúgame, 'ma ku a'rewa alué chátiri 'nátili. <sup>20</sup> Ne 'ma jena ilíkuru jipe jena yochi ma'chika reporá bajkinalia pachami, 'lige mué 'la i'púsaká yochi 'liko ne yati bajkimela pachami 'lige mué 'yuga go'mela ne. <sup>21</sup> Apiépiri ralámuli napu 'la umero alué Satanasi na'tálila, alueka 'la lisensia 'yámala ne napurigá ne 'yuga asimela napu ne asimela, a'chigóriga napurigá ne 'ma 'la umero alué Satanasi na'tálila 'lige ne 'la Onorúgame 'yuga asíbatu alé napu ajtime ju Onorúgame. <sup>22</sup> 'La tabilé najkacholo níriká 'la gepúwaká ye ra'ichali napu ruyé Onorúgame alué Onorúgame oyérame gicháomana we'ká riógichi ejperégame.»

## 4

*Jena ruwimela napu Juani etélige alé 'pa rewagachi*

<sup>1</sup> Pe aba'lige yati etéturu ne i'púriga ilígame alé 'pa rewagachi, 'lige akéturu ne ra'ichanti alé rewagáchika 'we a'wágame ra'ichame, 'lige 'we 'la ma'chígime alué ra'ichali napu abé i'bé ra'ichalige, 'lige antié ne'chí olaga:

—Jeka simí ne'chí 'yuga. Ruimé ne churigá nímala uché siné rawé.

<sup>2</sup> 'Lige Onorúgame bo'né a'walila 'yáturu ne'chí, 'lige etéturu ne bilé sía 'we semátiri napu Onorúgame ajtime ju 'lige bilé rió ajtígéturú alé 'we semátiri síachi napu Onorúgame ajtime ju. <sup>3</sup> 'Lige alé 'we semátiri síachi ajtígime rió napuyeri rejté rapame kéturu, 'we semátiri rapame, napuyeri alué rejté jaspe anilime 'lige alué kornalina anilime, 'lige alé noligá bo'ígéturu bilé benolá chijtúluga 'we siyókame. <sup>4</sup> 'Lige alé nolíbalí bilé lía naó sía jágeturuchigó 'we semátiri, 'lige alé síachi mochígeturu e'wélala nulame, rojsákame i'weli o'pacha o'páchigime 'lige 'órote newárigime gorona mo'kókame kéturu alué e'wélala. <sup>5</sup> 'Lige alé nasipa ajtígime síachika 'we ne'wime kéturu 'lige aminami napurigá trompeta\* gusume kéturu 'lige aminami re'ome kéturu, 'lige gichao chojpé rajame jágeturu alé o'wemi neraga napu iligé alué wa'lú sía alé nasipa ilígame. Alué gichao chojpé rajame ka pe alué gichao alawá ruyame kéré.† <sup>6</sup> 'Lige abiena iligéturu wa'lú ba'wí asíriga bi'wígame alé o'wemi neraga napu iligé alué wa'lú sía 'we semátiri alé nasipa ilígame.

\* 3:12 Ye ra'ichalika anime kéré bilé ralámuli 'la senibí sébali olame ka 'la Onorúgame 'yuga asimeo senibí. † 3:12

E'nesi «Apocalipsis» 22:4. ‡ 3:14 'La bijchiá Onorúgame ju alué rió. § 3:16 Ye ra'ichali ruyá Esukristo pe ne'óchame

ke anile alué ralámuli tabilé 'la sébali oyérame Onorúgame. \* 4:5 Alué trompétaka pe bo'á a'wálate newárigime nile.

Ebreo ra'ichagaká «shofar» anilime nile. † 4:5 Alué gichao alawaka pe alué Onorúgame Alawala ruyame kéré.

'Lige alé a'bé napu iligé alué sía nasipa iligame, alé nologá naó ajágame uchú kéturu, 'lige bochígimi buségame kéturu, bajchámana 'lige guwánaka. <sup>7</sup> Bilé napuyeri bilé mawiyá kéturu, 'lige uché bilélaka napuyeri bilé besero kéturu, 'lige uché bilela ajágameka napuyeri ralámuli alieri mo'égame kéturu, 'lige uché bilela ajágameka napuyeri a'wé i'nime alieri kéturu. <sup>8</sup> 'Lige a'pílipi neraga alué ajágame usani a'négame kéturu. 'Lige alué bochígimi buségame a'kué regá anime kéturu:

Mué Onorúgame bi'neli neyúriga Wa'lula ju napu bi'neli neyúriga wa'lú a'walí nígame ju, alué napu 'yasi Onorúgame nile tabilé siné ochégame,

'lige napu jipe abiena ajtí,

'lige napu nawámili ju.

<sup>9</sup> Napu ekisá alué naó ajágame alarigá anichi, <sup>10</sup> 'lige alué bilé liá na naó e'wélala alé nologá uchúpaturu chojkóbaka wijchí si mo'éga alé nologá napu ajtigé alué nasipa ajtigame síachi, 'lige alé o'wemi síachi mochíbale alué e'wélala alué gorona, alué bilé liá na naó e'wélala gorónala, 'lige regá anime kéturu:

<sup>11</sup> Mué ju Wa'lula Onorúgame napu oyérilime niru ramué,

'we 'la júkuru napurigá anewa mué:

«Mué Onorúgame bi'neli neyúriga Wa'lula ju napu bi'neli neyúriga wa'lú a'walí nígame ju, 'lige mué sílekuru suwábaga tábiri newá napu ekí nerú jena wijchimoba

'lige abiena napu ekí nerú 'pa rewagachi.

'We 'ya kulí siné tabilé tábiri i'tele, tabilé

i'tele ye gawí,

nibilé rayénali, nibilé ajágame, nibilé

ralámuli.

Mueka 'we 'yasi asale,

'lige mué 'sile suwábaga tábiri newá.»

## 5

*Jena ruwimela Juani ruwíligo Esukristo su'pánaligo alué apeli kabítigame gichao seyo ujchégame*

<sup>1</sup> 'Lige etéturu ne bilé we'lí apeli kabítigame alué alé nasipa síachi ajtigame wajtoná sekálachi bo'ígime. Alué apeli a'naguka osirúgime kéturu, 'lige gichao selá ajkabóligamete na'chuchágame kéturu napurigá tabilé 'wesi ra'lanámala. <sup>2</sup> 'Lige bilé santo ánjeli etiáturu ne alué santo ánjeli wa'lula e'wele sináká regá anime:

—¿Chieri 'la 'yárigame ju lisensia Onorúgamete napurigá 'la gojinámala alué gichao selá 'lige napurigá ra'lanámala alué apeli kabítigame?

\* 5:5 Alué napu Mawiyá anélime ju, alueka Esukristo ju.

naó e'wélala rió pe siné kachi okaná chojkégame ju. Bilé chojkégame makué oká «apóstole» napu Esusi 'yale nóchali 'lige uché bilé chojkégame makué oká rió Akobo 'kúchila nile. Sineko pe u'kabi nílige, pe makué oká rió, arigá we'ká gayénale napu jipe ju ralámuli israelita.

<sup>3</sup> 'Lige tabilé 'wesi ralámuli aniéturu: «Neka 'la 'yárigame ju lisensia.» Tabilé 'wesi i'tégeturu nibilé rewagachi, nibilé jena wijchimoba, nibilé re'lé we'echi i'tégeturu lisensia 'yárigame Onorúgamete napurigá ra'lanámala alué apeli. <sup>4</sup> 'Lige 'we naláturu ne machisá tabilé 'wesi 'yárigame ko lisensia napurigá ra'lanámala alué apeli kabítigame, 'lige napurigá leéramala. <sup>5</sup> 'Lige bilé alué e'wélala anéturu ne'chí:

—Tase nalápua, alué Mawiyá\* anélime napu Jurea anilichi bejtégame nile, napu wa'lula selígame rey Rabi rijimala nile, † alueka wa'lú a'walí nígame ju napurigá bujemala alué selá 'lige ra'lanámala alué apeli kabítigame.

<sup>6</sup> 'Lige etéturu ne bilé bo'á me'lirúgame neraga, alé amoba síachi chujkúgame etéturu ne, alué síachi alé nasipa iligame, alué naó ajágame uchúkichi nasipa iligame sía, alé nasipa iligame sía napu mochí alué bilé liá na naó e'wélala. 'Lige alué bo'á gichao a'wégame kéturu 'lige gichao buségame. Alué gichao a'wálaka 'lige gichao busí ruyame kéré alué gichao alawá Onorúgame Alawala, napu bo'né Onorúgame júalige bochígimi napu echelú ju jena wijchimoba. <sup>7</sup> 'Lige alé a'bemi simigá, alué bo'á alué apeli kabítigame cha'píturu, alué apeli alé nasipa ajtigame rió sekálachi bo'ígime apeli, alé wajtoná sekálachi. <sup>8</sup> 'Lige alué bo'á 'ma cha'pisá alué apeli, alué naó ajágame 'lige alué bilé liá

na naó e'wélala rió ‡ alé nologá mochígame alé o'wemi uchúpaturu chojkóbaka napu chujkugé alué bo'á. Suwábaga alué e'wélala rió 'lige alué naó ajágame a'pílipi neraga bilé arpa o'kame kéturu 'lige bejtoli o'kuí molélime o'kame kéturu 'órote newárigime, 'lige alé bejtólíchi o'kuí ajchágame kéturu. Alué o'kuíka ruwime nile alakí ra'íchali ra'íchame níligo alué Onorúgame oyérame alué Onorúgame 'yuga ra'icha bamúbali tánime nile, 'lige raweli. <sup>9</sup> 'Lige bilé wiká wíkaráturu napu tabilé siné wíkarálige, regá anigá wíkaráturu:

Mueka 'la 'yárigame ju lisensia Onorúgamete napurigá 'la cha'pimela alué apeli kabítigame

'lige napurigá gojinámala alué selá napu na'chuchágame ju alué apeli, napugiti mueka me'lirúgame kame napurigá mué elalá ramué alawala bi'wémala

napurigá 'la Onorúgame 'kúchila niwa rekó se'winátiri ra'íchame ke jaré,

† 5:5 E'nesi glosario «ancestor». ‡ 5:8 Bilé liá aminá

'lige rekó uché bilénami mejká epperégame ke jaré.

<sup>10</sup> 'Lige mué 'silekuru wanapa ramué napurigá nochawa napurigá Onorúgame nulá,

'lige nulame niwa bochígimi jena wijchimboba.

<sup>11</sup> 'Lige yati neraga etéturu ne aminami asíriga we'ká mili santo ánjeli ra'icha jágame noligá alé, napu mochíge alué bilé liá na naó e'wélala noligá napu uchuke alué naó ajágame, we'ká miyoni kéturu alué santo ánjeli, <sup>12</sup> regá aníá jágeturu alué santo ánjeli: Alué bo'á napu me'líliru alué júkuru Wa'lula suwábaga ramué nuleme

suwábaga tábiri alué nila ju

'lige 'we 'la benégame júkuru 'nátaga

'lige walú a'wali nígame ju.

'Lige 'la oyéritékuru 'we 'la niraga regá anigá: «Alué bo'á napu me'líliru 'we 'la nígame ju a'walí

bi'neli neyúriga

alué júkuru ramué repume

alekeri 'we 'la ra'salagá mochiru

alekeri 'la wikáritékuru.»

<sup>13</sup> 'Lige akéturu ne ra'ichame suwábaga alué napu newale Onorúgame napu 'pami rewagachi mochígame ju, 'lige napu nerú jena wijchimboba napu ju ajágame ralámuli, 'lige suwígame ralámuli, 'lige suwábaga ajágame napu nerú ba'wichí, regá aniéturu suwábaga alué ralámuli 'lige alué ajágame:

Alué bo'á napu alé nasipa ilígime síachi chujkú,

napu pe Esukristo kéré

'we 'la nígame ju a'walí bi'neli neyúriga

alué júkuru ramué repume,

alekeri 'we 'la ra'salagá mochiru,

alekeri 'la wikarátékuru.

Alarigá nokisúgá 'la kápá senibí.

<sup>14</sup> 'Lige alué naó ajágame napu uchuke alé noligá regá aniéturu:

—i'we 'la bijchiá júpá!

'Lige suwábaga alué bilé liá na naó e'wélala alé noligá mochígame alé a'bé a'boi síalachi uchúpaturu chojkóbaka wijchísí rojpochága, 'lige aniéturu:

—'we 'la nejkúrime ju mué, abichilubi 'we 'la nejkúrisa 'la kápá mué.

## 6

*Jena ruwimela Juani ruwíligo alué Bo'á Ranala gojínligo alué selá apeli kabítigame na'chuchárigame*

<sup>1</sup> 'Lige etiáturu ne alué Bo'á Ranala, gojínaturu bilé alué selá alué apeli kabítigame na'chuchárigame, 'lige akéturu

ne bilé alué naó ajágame, alé a'bé noligá uchúkame, a'wágame ra'ichame napuyeri u'ki re'ome, regá anime:

—jeka simí!

<sup>2</sup> 'Lige neka e'nénaturu, 'lige etéturu ne bilé gawé 'we rojsákame, 'lige bilé rió napu alué gawé aségame bilé iwá o'kame kéturu. 'Lige bilé gorona 'yáruturu alué rió 'lige yati mo'kóturu alué gorona 'lige simíturu nejkomia 'lige memia nejkoga.

<sup>3</sup> 'Lige pe nujubapi etiáturu ne alué Bo'á Ranala gojínachi uché bilé selá alué apeli kabítigame na'chuchárigame, 'lige alué uché bilé ajágame napu uchuke alé noligá alé nasipa ajtígime sía ilígichi, regá aniéturu:

—jeka simí!

<sup>4</sup> 'Lige neka e'nénaturu 'lige uché bilé gawé etéturu ne. Alué gaweka 'we sejtákame kéturu 'lige bilé rió napu alué gawé aségame ke 'yáruturu a'walí napurigá ralámuli 'ma na'awatamala 'lige napurigá 'ma suimela nakoga. 'Lige bilé walú siparina 'yáruturu.

<sup>5</sup> 'Lige pe nujubapi etiáturu ne alué Bo'á Ranala gojínachi uché bilé selá alué apeli kabítigame na'chuchárigame, 'lige alué uché bilé ajágame napu uchuke alé noligá alé nasipa ajtígime sía ilígichi, regá aniéturu:

—jeka simí!

'Lige neka e'nénaturu 'lige uché bilé gawé etéturu ne. Alué gaweka chókame kéturu, 'lige bilé rió napu gawé aségame ke o'kame kéturu ri'ligó 'lige senteno \* pesárala. <sup>6</sup> 'Lige akéturu ne napurigá bilé rió ra'ichame alé nasipa napu uchuke alué naó ajágame, regá anime ra'ichali:

—Bilé litro ri'ligó 'yámala ne bilé rió bilé rawé nochárigame, 'lige bakiá litro senteno 'yámala ne bilé rió bilé rawé nóchigime, 'lige tabilé najsibuwa alué ba'wí wi'ime 'lige alué rekútume.

<sup>7</sup> 'Lige pe nujubapi etiáturu ne alué Bo'á Ranala gojínachi uché bilé selá alué apeli kabítigame na'chuchárigame, 'lige alué uché bilé ajágame napu uchuke alé noligá alé nasipa ajtígime sía ilígichi regá aniéturu:

—jeka simí!

<sup>8</sup> 'Lige neka e'nénaturu 'lige uché bilé gawé etéturu ne, alué gaweka 'we che'tí kéturu 'we nayume, 'lige bilé rió napu alué gawé aségame ke «Mukúgame» anilime kéturu, 'lige uchéchigo bilé rió enegéturu alé guwánaka «Injiérno» anilime rió. 'Lige alué oká rió 'yáruturu Onorúgamete napurigá we'ká ralámuli me'limela amulí nasipasi,† bilé siparínate, 'lige napurigá tabilé u'kíramala napurigá tabilé rakémala go'ame, 'lige napurigá a'wágame nayúnamala napurigá nayuka suwimela ralámuli, 'lige napurigá

\* 6:5 Alué senteno ka napurigá alué ri'ligó ochérame ju 'lige abé ta'mé najteme ju, peka napurigá alué ri'ligó. Alué ra'ichalika pe regá anime ke aní: «Tabilé najsibuwa alué go'ame, cha gurúgime.»

† 6:8 Yolí ra'ichagaká «una cuarta parte» anime chujkú.

elímala alué ajágame jobátigame napurigá ralámuli me'limela.

<sup>9</sup> 'Lige pe nujubapi etiáturu ne alué Bo'á Ranala gojínachi uché bilé selá alué apeli kabítigame na'chuchárigame, 'lige gojínasa alué selá etiáturu ne bilé mesa napu kógime ju go'ame Onorúgame, 'lige alé mesa ilígichi chojkirá we'ká alawá etéturu ne alué suwíggame ralámuli alawala, alué napu me'líirige Onorúgame oyérame kórigá, aminami me'lírúgame alué ralámuli napugiti Onorúgame ra'ichálila beníruga e'yéname kórigá. <sup>10</sup> 'Lige e'wele ra'íchaga regá anía mochígaturu alué we'ká alué:

—Muérigo Onorúgame, mué napu ju Wa'lula Nulame, napu tabilé siné chátiri 'nátame ju, 'la bijhígiga ra'ichame, 'chíéniko gastigárima olá mué alué ralámuli napu ramué me'ale?

<sup>11</sup> 'Lige Onorúgameka rojsákame o'pacha 'yáturu alué alawá alé mochíggame 'lige alué alawaka yati o'pachátaturu 'lige aminami Onorúgame regá anéturu:

—Uché pe u'kabi rawé buwewa, pe 'wemi me'limé olá ne alué 'emi saila, napusí 'ma me'lisuga alué napu ekí me'liboli ju 'emi gompaniérola a'chigóriga napurigá me'líiru 'emi ne Onorúgame nila ra'íchali beníruga e'yéname kórigá.

<sup>12</sup> 'Lige pe nujubapi etiáturu ne alué Bo'á Ranala gojínachi alué selá uché bilé apeli kabítigame na'chuchárigame, 'lige etiáturu ne wa'lú gawí nokachi, 'lige etiáturu ne rayénali chóniga asíbigo 'ma mukugá, 'lige alué mechaka napuyeri elá gayénaturu. <sup>13</sup> 'Lige so'pilika 'ma jékana wijchí rujsunúuru napurigá rujsume ju alué chuná rakala napu'lige 'we a'wágame ekasá rekó 'we siyókame ke. <sup>14</sup> 'Lige rewagáká napurigá betate ro'minálime alakíturu, 'lige 'ma tané ikíturu, 'lige suwábaga e'wele gawí re'pá jággame 'ma gajúuru 'lige mejkami chí'poa mo'íaturu, 'lige alué gawí alé ba'wichí nasipa jággame 'ma gajú mo'íaturuchigó. <sup>15</sup> 'Lige suwábaga napu ekí e'wélala selíggame rey ke, 'lige alué sontalo e'wélala, 'lige alué 'we nígame ralámuli, 'lige alué 'we ejobénigame nakoga, 'lige alué ralámuli napu ekí ralurúgame 'lige alué tabilé ralurúgame, suwábaga alué 'ma chíaturu we'kanami resochimi, <sup>16</sup> 'liko arigá anélekuru alué gawí 'lige e'wele rejté alemi jággame:

—Alé ma'chígiká asibáwaká alé yóchika 'yériga ye resó 'yériga napu ramué mochiru chúbaka napurigá tabilé etémala ramué alué napu alé wa'lú síachi ajtí nasipa ajtíggame sía, 'lige tabilé najkiá napurigá alué Bo'á Ranala<sup>†</sup> ramué gastigárima, <sup>17</sup> napugiti 'ma sebalimpá raweli napu

sebámili nílige napu alué alé wa'lú síachi ajtíggame suwábaga ralámuli jena wijchimoba mochíggame gastigárimili ju. 'Lige 'chieri 'la ajagá rejpímala?

## 7

*Jena ruwimela Juani naó santo ánjeli etéligo*

<sup>1</sup> 'Lige pe'tá nujubapi naó santo ánjeli etiáturu ne naógana chijtochi jággame a'pilipi neraga jena wijchimoba alué naó eká najteka napurigá tabilé ekemela jena wijchimoba, nibilé alé wa'lú ba'wí ilígichimi, nibilé rojá jágichimichigó. <sup>2</sup> 'Lige uchéchigo bilé santo ánjeli etiáturu ne 'nákatu ma'chíname napu ma'chíname ju rayénali, bilé seyo o'kame Onorúgame nila, Onorúgame ajali nejime, 'lige sináchaturu alué uché jaré naó santo ánjeli napu alé chijtochi jale, alué naó santo ánjeli napu a'walí nígame nile napurigá najsibúmala ye gawí 'lige alué ba'wítiri. Regá aniéturu:

<sup>3</sup> —Tase najsibuwa gawí, nibilé ba'wítiri, nibilé rojátiri. Napu'lige alué ralámuli Onorúgame nochálilachi nóchame seyárisiga gowálachi Onorúgame nila séyote, a'lige kulí najsibuwa gawí. 'Lige alué seyo etega 'la machimela suwábaga ralámuli 'la Onorúgame 'kúchila ko, 'lige abiena 'la machimela Onorúgame buinamio alé resítirichi mochígichi alué ralámuli.

<sup>4</sup> 'Lige 'ma suwénaturu alué seyo ujchea alué santo ánjeli suwábaga alué Onorúgame nochálilachi nóchame, 'lige akéturu ne aníchi alué santo ánjeli:

—Bilé sientó aminá oká liá aminá naó mili ju alué Onorúgame nila séyote seyáririgame. Suwábaga pe israelítacho. <sup>5</sup> Bilena chojkéggame makué oká mili ralámuli Jurasí rijimála nile. Uché bilena chojkéggame makué oká mili ralámuli Rubení rijimála nile. Uché bilena makué oká mili ralámuli Garí rijimála nile. <sup>6</sup> Uché bilena chojkéggame makué oká mili ralámuli Aserí rijimála nile. Uché bilena chojkéggame makué oká mili ralámuli Neptalí rijimála nile. Uché bilena chojkéggame makué oká mili ralámuli Manasesí rijimála nile. <sup>7</sup> Uché bilena makué oká mili ralámuli Simióní rijimála nile. Uché bilena chojkéggame makué oká mili ralámuli Lebí rijimála nile. Uché bilena chojkéggame makué oká mili ralámuli Isakarí rijimála nile. <sup>8</sup> Uché bilena chojkéggame makué oká mili ralámuli Sabuloní rijimála nile. Uché bilena chojkéggame makué oká mili ralámuli José rijimála nile. 'Lige uché bilena chojkéggame makué oká mili ralámuli Benjamíní rijimála nile.

<sup>†</sup> 6:16 Alué Bo'á Ranala aniaká pe alué wa'lú síachi ajtíggame aniamé kéré, alué alé nasipa ilíggame sía. Alué alé nasipa ajtíggame pe Esusi kéré.

*Jena ruwimela Juani etéligo we'ká ralámuli se'winátiri ra'ichame suwábaga alué ralámuli o'tosákame o'páchigime*

<sup>9</sup> Pe'tá nujubapi etéturu ne we'ká ralámuli jágame alemi mejkabeka ta'mé a'bé abalemi o'wemi neraga alué alé nasipa ilígame sía ilígichi napu chujkule alué Bo'á Ranala. Asírige we'ká kéturu alué ralámuli tabilé umubárumé tetia. Jaré se'winátiri ra'ichame kéturu alué ralámuli, 'lige alué ralámuli ichúrimi we'kaná jena wijchimoba ejperégame kéturu. Suwábaga alué ralámuli 'we rojsákame o'páchagame kéturu, 'lige rajkú sawala o'kame kéturu alué ralámuli. <sup>10</sup> 'Lige suwábaga siná jágeturu regá:

Alué Onorúgame gite napu ajtí alué wa'lú síachi

'lige alué Bo'á Ranala gite 'láchigo a'rériko alué chátiri 'nátali,

jipe 'ma tabilé cha nokame niru.

<sup>11</sup> 'Lige suwábaga alué santo ánjeli noligá jágeturu, alé napu alué bilé lía na naó e'wélala mochígichi, alemi noligá jágeturu alué we'ká santo ánjeli.\* 'Lige alué santo ánjeli alé noligá jaga wijchimi si uchúpaturu chojkóbaka alé noligá napu jálige, <sup>12</sup> regá anigá uchúpaturu alemi wijchimi:

Alarigá ju.

'We 'la semáriga oyéraga ejperélisiga 'la kápá Onorúgame,

Onorúgame napu 'we benégame ju 'nátaga, napu wa'lú a'wali nígame ju, wa'lú cheliera 'yawa 'lige 'we 'la nirawa senibí.

Alarigá nisa 'la júkuru nabí.

<sup>13</sup> 'Lige bilé alué wa'lula rukéturu ne'chí regá:

—¿Chieri ju ye ralámuli rojsákame o'páchigime? ¿Kócheka si?

<sup>14</sup> 'Lige neka nejtúru:

—Mué rió wa'lula, mué bo'né 'la machílke.

'Lige alué rioka regá nejtúru:

—Ye ralámulika ju alé napu 'we resí ikile 'ya Onorúgame oyéraga. 'Lige 'we 'la rojsákame newale a'boi o'páchala alué Bo'á Ranala elalate.† <sup>15</sup> Alekeri alé a'nabeka jákuru o'wemi neraga napu ilí alué wa'lú sía Onorúgame nila. 'Lige ye ralámulika, senibí jena jame júturu napu jái kulipi 'we 'la semáriga ra'icha Onorúgame olagá 'lige alué napu alé wa'lú síachi ajtí, alué sía napu nasipa ilí, alué 'we 'la repúmala senibí. <sup>16</sup> 'Lige ye ralámuli 'ma tabilé siné e'lowímala, 'lige aminami tabilé siné balámamala, 'lige aminami tabilé siné

rajtálimala <sup>17</sup> napugiti 'we 'la repúmili kame alué Bo'á Ranala napu chujkú alemi o'wemi neraga napu ilí alué wa'lú sía, 'lige o'tomela bilénami bajichi 'we 'la semárikáchi napurigá bajímala ba'wí alemi. 'Lige alué Bo'á Ranala napu Onorúgame ju, 'ma bujémala alué cha lárime seweli.

## 8

*Jena ruwimela Juani ruwíligo Bo'á Ranala gojínligo guwichí ajtígime selá apeli kabítigame na'chuchárigame*

<sup>1</sup> 'Lige pe'tá nujubapi etiáturu ne alué Bo'á Ranala gojínachi alué selá guwichí ajtígime alué we'lí apeli kabítigame na'chuchárigame, 'lige suwábaga seweka ilíbalé tase acháchaneturu bochígimi 'lige tabilé 'wesi ra'icháchaneturu.\* <sup>2</sup> 'Lige etéturu ne gichao santo ánjeli jágame alé o'wemi Onorúgame ajtígichi, 'lige 'yáruturu bilé alué a'wágame buchilime a'pílipi, trompeta anilime yolí ra'íchaga. <sup>3</sup> 'Lige uché bilé santo ánjeli sébaturu, alé o'wemi neraga ilíbaturu napu iligé alué mesa napu kógilime ju go'ame Onorúgame. 'Lige bejtoli o'kame kéturu alué santo ánjeli sekachí o'kuí e'kósala, 'órote newárigime bejtoli. 'Lige wa'lú 'yáruturu o'kuí napurigá molémala napu'lige Onorúgame 'yuga ra'icha jágichi suwábaga alué alemi jágame 'we 'la oyérame Onorúgame. <sup>4</sup> 'Lige alué molí napu ma'china alé bejtólíchi 'pa o'wétiri neraga kibaturu 'lige Onorúgameka 'we 'la semáriga ganíliga akéturu alué ralámuli ra'íchachi Onorúgame 'yuga. <sup>5</sup> 'Lige alué santo ánjelika cha'píturu alué bejtoli o'kuí e'kósala 'lige bochíturu sawí rajame, 'lige pákana rewagáchika asagá jékana wijchimoba pasáturu alué bejtoli. 'Lige we'sá ra'náturu 'pa rewagachi, 'lige aminami asírige enátiri re'óturu, 'lige 'we ne'wíturu, 'lige aminami gawí nokáturu.

*Jena ruwimela Juani ruwíligo gichao santo ánjeli buchéligo alué trompeta*

<sup>6</sup> 'Lige alué gichao santo ánjeli napu a'pili o'ká jage alué buchilime trompeta anilime, 'ma listo jábaturu buchumea alué trompeta.

<sup>7</sup> 'Lige bilé alué santo ánjeli bucháturu alué trompeta, 'lige wa'lú u'kúuru rejsisi 'lige na'ítiri, elá na'lógame kéturu alué rejsisi. 'Lige we'kaná ichúrimi jena gawichí rajáturu rojá 'lige gajsalá, ta'mé nasípasi rajale. Bijí usani santo ánjeli rokárikéturu napurigá buchémela alué trompeta napu o'ká jage a'pili.

<sup>8</sup> 'Lige uché bilé santo ánjeli bucháturu alué trompeta, 'lige bilé tábiri napuyeri

\* 7:11 Alué bilé lía na naó e'wélala alé noligá mochime nile alé napu alué naó ajágame uchule 'lige napu ilile alué wa'lú sía. † 7:14 Ye ra'ichalika pe aníame kéré 'ma o'tóligo alué Esusi napu'lige mukule alué gastigo napu ramué naréplu nile.

\* 8:1 Napurigá rukó tabilé 'wesi tábiri akirume júturu nibilé chulugí nibilé ralámuli ra'ichame. Alué rukuchúluka abiena 'la akirume ju. Alé rewagáchika abéchigo tabilé tábiri gusume ma'chí anile.

bilé walú rabó páтуру Onorúgame, 'lige alué tábiri napuyeri rabó alé nasipa walú ba'wí manígichi wijchiá kíbaturu 'lige 'ma elá gayénaturu alué ba'wí amulí nasípasi. Alésiko bijí maligi santo ánjeli rokárikéturu napurigá buchémela alué trompeta napu 'yáliku a'pili. <sup>9</sup> 'Lige amulí nasípasi suwíturu we'ká ajágame alé ba'wichí ejperégame. 'Lige we'ká barko amulí nasípasi rajínaturu napu ekí neruge barko alé walú ba'wichí 'lige 'ma na'pilituru ba'wite.

<sup>10</sup> 'Lige uché bilé santo ánjeli bucháturu alué trompeta 'lige wijchíturu 'pa rewagáchika bilé walú so'pilí rajame 'lige we'ká bakó 'lige we'ká bajisoli na'pólíga asbaturu amulí nasípasi napu ekí bakó 'lige bajisoli neruge jena wijchimoba. Alígesiko bijí naó santo ánjeli rokárekéturu napurigá buchumela alué trompeta napu 'yáliku a'pili. <sup>11</sup> 'Lige alué so'pilí Chijpúgame anilime kéturu. 'Lige alué so'pilí wijchisá jékana wijchimoba, we'kaná ichúrimi bakochi 'lige bajíchimi manígime ba'wí bajílíme jena wijchimoba 'ma chijpúgame gayénaturu, amulí nasípasi napu echilú ju ba'wí bajílíme jena wijchimoba manígime, 'lige we'ká ralámuli suwíturu alué ba'wí bajíga.

<sup>12</sup> 'Lige uchéchigo bilé santo ánjeli bucháturu alué trompeta, 'lige 'ma tabilé rajtággame rayénaturu, 'ma pe napurigá napu 'lige nolega iligá, alieri rayénaturu alué rayénali. 'Lige abiena 'ma mukúтуру alué mechá amulí nasípasi neraga. 'Lige abiena suwíturu we'ká so'pilí amulí nasípasi neraga napu ekí nerú 'pa rewagachi. Ta'mé 'la rayénaturu rawé 'lige ta'mé 'la mehega iligéturu rukomi. Alésiko bijí bakiá santo ánjeli rokárikéturu napurigá buchémela alué trompeta napu 'yáliku a'pili.

<sup>13</sup> 'Lige yati neraga, etéturu ne 'pa rewagáchimi 'mame i'nisia bilé a'wé, 'lige regá aniéturu alué a'wé:

—¡Asíríga enáriga resí ikimela ralámuli jena wijchimoba mochígame, alué napu ekí 'we cha nokame ju, bakiá gastigo narémala ralámuli 'we cha nokame! ¡Napu'lige alué uché jaré bakiá santo ánjeli buchesa trompeta, a'lige resí ikimela alué ralámuli jena wijchimoba mochígame, alué napu 'we cha nokame ju!

## 9

<sup>1</sup> 'Lige uché bilé santo ánjeli bucháturu alué trompeta, 'lige etéturu ne bilé so'pilí alé 'pákana rewagáchikana wijchígame, 'lige bilé a'wépala 'yáruturu napurigá i'púmala alé yochi 'légana simime bowé bo'ígichi, asíríga re'lé rojkógichi tabilé siné sebálime 'légana napu bi'tí suwígime. <sup>2</sup> 'Lige i'púтуру yochi, 'lige 'ma i'pusa, walú molí ma'chínaturu alé rejkolíchika. Asíríga

walú rajá iligéturu alé re'lé. 'Lige asíríga walú molí chujkíbaturu re'pá ekárale 'lige 'ma kaga ilíbaturu. <sup>3</sup> 'Lige we'ká ojchí buiníturu alé molíraleka, 'lige alué ojchí 'we jobátigame gayénale, a'wágame negime napurigá majchili. <sup>4</sup> 'Lige anéleru alé santo ánjelite napurigá tabilé che olámala rojá, nibilé gajsalátiri. Alué ojchika 'yáliku lisensia napurigá pe ralámulícho i'kímala, alué ralámuli napu tabilé bawérigame nile gowálachi Onorúgame nila séyote. <sup>5</sup> 'Lige tabilé 'yáliku lisensia alué ojchí napurigá me'agá i'kímala ralámuli, alué ojchika pe 'we o'kógame nejkímili nile 'nalina napurigá 'we o'koka e'yénamala i'kísiga, maligi mechá neraga. <sup>6</sup> 'Lige alué ralámuli asíríga suwinálimili nile o'koka alué ojchite i'kísiga, nobi tabiléchigo gainámili nilekó suwiyá.

<sup>7</sup> 'Lige ojchí napuyeri gawé kéturu bilena nakólíchi o'towame nakomia. 'Lige mo'kókame kéturu napuyeri gorona, 'lige 'órote newárigime kari kéturu, 'lige banalaka napuyeri ralámuli alieri banégame kéturu. <sup>8</sup> 'Lige gupégame kéturu alué ojchí napuyeri umugí gupala 'lige ramalaka napuyeri mawiyá ramalá alieri ramégame kéturu. <sup>9</sup> 'Lige jiero ujhágame kéturu bajchámána napurigá tabilé che'wimela a'tánalia, 'lige napu'lige i'nía a'wágame chi'name kéturu napurigá we'ká kareta júmame nakomia alué kareta napu nakólíchi unilime ju, <sup>10</sup> 'lige we'ká wajségame kéturu napuyeri majchili wajsila, 'lige selégame kéturu alé wajsilachi, lisensia nígame kéturu napurigá maligi mechá nayútamala ralámuli i'kisa. <sup>11</sup> 'Lige alué ojchí nuleme bajchá ilígame Abaroni anilime kéturu ebreo ra'íchaga, 'lige griego ra'íchagaká Apolioni anilime kéturu napu Remónisi gompaniérola ju a'wépala nígame alé rejkolíchi i'púlíme. Abaroni 'lige Apolioni aniáká pe «Ralámuli Me'ame» aníame ju.

<sup>12</sup> 'Lige a'kinana maligi mechá kachi 'ma tabilé o'koka e'yénaturu alué ralámuli alué ojchite i'kísiga, 'ma simíraturu bilé gastigo napu narémili nílíge alué ralámuli 'we cha nokame jena wijchimoba ejperégame. Abiena bijí rokárikéturu napurigá oká gastigo narémala alué cha nokame ralámuli.

<sup>13</sup> Uché bilé santo ánjeli bucháturu alué trompeta, 'lige ra'íchame akéturu ne alé naó a'wachí alé nawágana chijtochi jágame alé walú mesa 'órote newárigime mesa napu alé o'wemi neraga iligé napu Onorúgame ajtigé. <sup>14</sup> 'Lige anéruturu alué santo ánjeli napu o'ká iligé alué trompeta:

—Yati bo'tanawa alué naó santo ánjeli napu buluruga mochí alé walú bakochi Euprate anilíchi.

<sup>15</sup> 'Lige 'ma bo'tanáleru alué naó santo ánjeli napu buluruga mochígame. Alué santo



ánjelika buluruga mochiálaru Onorúgamete, su'panamia 'la a'ligerikáchi napu'lige se-basa raweli napu su'panáwali nile napurigá me'limela we'ká ralámuli amulí nasípasi neraga napu ekí ejperé jena wijchimoba. <sup>16</sup> 'Lige asrīga we'ká gompaniérogame kéturu alué naó santo ánjeli, oká sientu miyoni sontalo karáturu. 'Lige gawé aségame kéturu alué sontalo.

<sup>17</sup> Etéturu ne alué gawé, 'lige alué ralámuli gawé aségame. Alué gawé 'lige alué ralámuli jiero ujchágame kéturu bajchámána sulachí. 'Lige alué jiero 'we sawarógame kéturu, 'we sejtákame kéturu aminami, 'lige 'we siyókame kéturu aminami. Alué gawé mo'ólaka napuyeri mawiyá mo'ola alieri mo'égame kéturu, 'lige na'í ma'china 'siéturu chu'álachika, 'lige molítiri, 'lige rejte rájamechigó napu asupre anilime ju. <sup>18</sup> 'Lige aleké na'íte 'lige aleké molite 'lige aleké rajame rejte 'ma suwíturu we'ká ralámuli amulí nasípasi jena wijchimoba ejperégame. <sup>19</sup> Aminami wajsilate me'áturu alué gawé we'ká ralámuli, alué gawé wajsílaka napuyeri sinowí kéturu, mo'égame kéturu 'lige neychume kéturu, 'lige 'ma suwime kéturu ralámuli aleké sinowite u'chúsiga.

<sup>20</sup> 'Lige ralámuli napu ekí ajagá ejtebige, tabilé siné regá aníturu:

—Pe rekó ku e'kawa ramué mué Onorúgame 'we resí nokagá ejperégame niru ramué.

'Lige aminami tabilé siné a'réturu iwérali tania alué Remónisi nibilé alué tábiri 'órote newárigime, 'lige plátate newárigime 'lige brónsete newárigime, 'lige rejte newárigime, 'lige abiena alué tábiri igute newárigime alué napu tabilé ma'chílime ju, 'lige tabilé akeme, 'lige tabilé e'yéname. <sup>21</sup> 'Lige aminami tabilé aniéturuchigó:

—Muérigo Onorúgame, pe rekó e'kárigó ramué asrīga seweka mochiru cha we'ká ralámuli me'áligime ramué 'we 'la ko mayega alanokogá e'yénila.

'Lige aminami tabilé a'rele sujkumua ralámuli, 'lige aminami tabilé majale Onorúgame uché jaré umugí 'yuga okoka tabilé 'la a'boi upila nile. 'Lige tabilé chijúnale chigoga. Tabilé lala: «'We resítiri raweli rekímala Onorúgame ne'chí aminabi chigoga einásaká ne.»

## 10

*Jena ruwimela Juani ruwíligo bilé santo ánjeli apeli ra'linárigame o'kame níligo*

<sup>1</sup> 'Lige etéturu ne uché bilé santo ánjeli wa'lula, alé 'pa rewagáchika re'kíname nolite kabítigame o'páchaga, bilé benolá si enegéturu alé mo'ólachika, 'lige banalaka\* <sup>11</sup> 'Lige regá anéturu ne'chí alué santo ánjeli:

napuyeri rayénali kéturu, 'lige suwábaga ronola (pierna) umichipo si 'lige ralala si napuyeri na'í kéturu o'weti ilígame. <sup>2</sup> 'Lige bilé u'tá apeli ra'linárigame o'kame kéturu sekachí kabika gatélime apeli, osilí uchúkame. Wajtoná ilígame ronola wa'lú ba'wí ilígichi amoba teka ilíbaturu, 'lige o'iná ilígame ronólaká wakígichi teka ilíbaturu. <sup>3</sup> 'Lige asrīga e'wele sináturu napurigá mawiyá, 'lige 'ma sinasa alué santo ánjeli, abiena ma'chí aníturu gichao tábiri 'we a'wágame ra'nagá ra'íchame. <sup>4</sup> 'Lige alué gichao tábiri a'wágame ra'nagá ra'íchasa, apélichi ujchama oláturu ne suwábaga tábiri napu aké ne a'lige, pe iligá bilé ra'íchali akéturu ne 'pa rewagáchika, regá anime:

—Tabilé rupóká napu aké mué alué gichao tábiri napu a'wágame ra'nagá ra'íchale, 'lige aminami tabilé osibóaká.

<sup>5</sup> 'Lige alué santo ánjeli alué napu wa'lú ba'wíchi teka iligé o'weti o'wínaturu wajtoná sekala. <sup>6</sup> 'Lige aniéturu:

—Onorúgame 'we 'la machí 'la bijchiá ko napu aní ne. Napu ne aní, Onorúgame 'we 'la sébali olámala. Onorúgame napu senibí bejtégame ju, napu 'sile newá napu ekí nerú 'pa rewagáchika, napu 'sile ye gawí newá 'lige suwábaga tábiri napu nerú jena wijchimoba, napu 'sile newá alué wa'lú ba'wí jena wijchimoba manígime 'lige suwábaga tábiri ajágame alé wa'lú ba'wíchi ejperégame, Onorúgame 'we 'la sébali olámala napu anile. <sup>7</sup> Napu'lige alué santo ánjeli guwíchi buchesa alué trompeta, a'lige 'ma sebámala raweli napurigá Onorúgame anélige alué 'ya mochígame ralámuli.

<sup>8</sup> 'Lige uchéchigo siné akéturu ne ra'íchachi rewagáchika ne'chí olagá pe alué ra'íchame napu akélige ne pe be'beipi, alué a'wágame ra'nagá ra'íchame, regá aniéturu:

—Simigá 'lige u'poa alué apeli ra'linárigame napu alué santo ánjeli o'ká ilí, alué kabika gatélime alué santo ánjeli ba'wíchi teka ilígame 'lige bilena wakígichi teka ilígame.

<sup>9</sup> 'Lige neka yati simíturu alé napu iligé alué santo ánjeli, 'lige alé sebase tánituru ne alué apeli ra'linárigame kabika gatélime. 'Lige regá anéturu ne'chí alué santo ánjeli:

—Cha'pi ye apeli ra'lanárigame 'lige go'poa. Chu'chika asrīga ajkágame nímala napurigá melalo, 'lige rojpachika 'we chijpúgame nímala.

<sup>10</sup> 'Lige neka yati cha'píturu alué apeli ra'lanárigame napu o'ká iligé alué santo ánjeli 'lige cha'pisá go'áturu ne, 'lige chu'chika 'we ajkágame kéturu napurigá melalo ijámpirichika ma'chínigame, 'lige rojpachika 'we chijpúgame gayénaturu. <sup>11</sup> 'Lige regá anéturu ne'chí alué santo ánjeli:

\* 10:1 Yolí ra'íchagaká «la cara» anime kéré.

—We 'la ruyémili júkuru mué choláwili ka Onorúgame alué ralámuli ichúrimi jena wijchimboba ejperégame, mejkarni ejperégame, a'bemi ejperégame, se'nú ra'ichali ra'ichame, we'kaná gawichí napu bi'lepi wa'lula ju nulame, 'lige pe u'kabi gawichí napu bi'lepi wa'lula ju nulame. Abiena alué e'sélikame 'we 'la ruyémili ju mué choláwili ka Onorúgame.

## 11

*Jena ruwimela Juani ruwíligo Onorúgame julamio oká rió Onorúgame nila ra'ichali benírame*

<sup>1</sup> 'Lige bilé baká 'yáruturu ne tétilime, 'lige anéroturu ne:

—Tétiwa alué wa'lú re'obá Onorúgame re'obala, 'lige abiena alué mesa tétiwa napu ilí alé re'obachi napu kógilime ju go'ame Onorúgame, 'lige aminami tétiwa chekí ralámuli jaga alemlí iwérali tania Onorúgame. <sup>2</sup> 'Lige alé re'obachi ra'pichika tase tétiwaká, aleka pe ralámuli tabilé israelita ra'pichila kame, 'lige alué ralámuli alemlí e'yénamala 'we cha nokigá, napurigá ajágame 'ma buyásigame go'lechi 'ma mo'gá alemlí 'yéchimi. Alarigá nímala alemlí naosa makué na oká mechá alé Rusaleni rewégichi. <sup>3</sup> 'Lige julámala ne oká rió ne'chí oyérame 'we 'la ruyénaliga ne nila ra'ichali suwábaga ralámuli alé Rusaleni ejperégame, o'páchaga julámala ne alué o'pacha o'chókame napu o'pachátame ju ralámuli napu'lige 'we seweka mochiga bilé rijimá mukugáriká. 'Lige alué oká rió abaleké bilé mili oká sientó aminá usánisa makué rawé (oká liá na oká mechá) e'yénamala ne Onorúgame nila ra'ichali ralámuli benírame, pe aba'lige napu'lige 'ma 'luka e'yénachi e'karúgame tábiri ichúrimi galírilimi alué tabilé Onorúgame oyérame.

<sup>4</sup> Alué oká rió rojá olibo\* neraga ju, 'lige aminami alué oká rió alué kantelabro neraga ju napu gichao gantela jawálime ju, napu alemlí o'wemi jai napu Onorúgame ajtí. <sup>5</sup> Jaré ralámuli cha olánilisa alué oká rió, alueka na'í ma'chí pame ju chu'chika, 'lige 'ma e'kósime ju alué na'ite. Alarigá suwimeli júpá. <sup>6</sup> 'Lige alué oká rió nígame ju a'walí napurigá tabilé u'kírimala abaleké oká liá na oká mechá, 'lige aminami nígame ju a'walí napurigá elá gainárimala ba'wí, 'lige aminami nígame ju a'walí napurigá o'chérimala we'ká u'kuchí ajágame negime napu ju ajté, rejpu'chítiri, chínchítiri, wí'chítiri 'lige we'ká aminá uché jaré u'kuchí ajágame negime napurigá resí olámala ralámuli bochígimi jena wijchimboba ejperégame napu ekisá resí olánili. <sup>7</sup> Napu'lige 'ma simárisa alué naosa

makué na oká mechá, 'lige alué ajágame 'we opurúgime ma'chínamala 'lékiri injiérnochika 'lige nejkómala alué oká rió 'yuga, 'lige 'ma me'liboli ju alué oká rió alué opurúgime ajágame 'lékiri injiérnochika ma'chínigame. <sup>8</sup> 'Lige alué oká rió suwígame alé 'miná nasipa we'ká riógichi nasipa ro'áwili ju alé Rusaleni rewégichi alé napu me'liliru Esusi bilena gulusichi. Alé Rusaleni ejperégame ralámuli 'we i'nígame ju tabilé nirame ju, a'chigóriga napurigá alé uché bilena we'ká riógichi ejperégame ralámuli, Soroma rewégichi 'lige Ejipto rewégichi we'kaná gawichí napu bi'lepi ju wa'lula nulame. <sup>9</sup> Suwábaga ralámuli bochígimi gawichí mochígame, we'ká se'winátiri ra'ichame, etémala alué oká rió suwígame bakiá rawé aminá nasipa, 'lige tabilé elámala suwábaga alué ralámuli napurigá tópuá alué oká rió. <sup>10</sup> 'Lige ralámuli jena wijchimboba ejperégame asíriga ra'sálámala alué oká rió suwisá, 'lige e'karúgame tábiri kóniga járomala a'bopi, napugiti ye oká rió asíriga a'wágame nawilí júlame nílgo napurigá alué ralámuli tabilé ganígame mochímala, alekiri asíriga ra'sálámala mochímala alué oká rió suwisá. <sup>11</sup> Napu'lige 'ma bakiá rawé na nasipa kachi, Onorúgame ku ajalí 'yale napurigá ku ajagá e'yénamala alué oká rió, 'lige alué oká rió yati o'weti jásele, 'lige we'ká ralámuli alué oká rió ajagá jágichi etesa, asíriga majale. <sup>12</sup> 'Lige alué oká rió ku ajánigame, ra'ichame akele 'pa rewagáchikana neraga, regá anime ra'ichali:

—Jékiri simasi:

'Lige bilena nolichí mo'ibaturu 'párimi rewagachi. 'Lige suwábaga napu nile alué oká rió saíla e'negá jágeturu napu'lige alué oká rió 'pa rewagachi simíbachi. <sup>13</sup> 'Lige alé Rusaleni anilichí we'ká riógichi peba a'lige yati neraga nokáturu gawí asíriga a'wágame, 'lige we'ká galí gajunúrturu, 'lige we'ká ralámuli suwíturu, gichao mili ralámuli. Aminá jaré ralámuli alué napu tabilé suwile, alueka asíriga majaga ejtebituru, 'lige o'wínaturu anía:

—Asíriga wa'lú a'walí nígame ju mué Onorúgame 'pa rewagachi ajtígame.

<sup>14</sup> 'Ma oká gastigo kéturu aluete 'lige abiena bijí bilé gastigo rokárekéturu.

*Jena ruwimela Juani ruwíligo bilé santo ánjeli bucháligo trompeta 'ma guwichí*

<sup>15</sup> 'Lige uché bilé santo ánjeli bucháturu alué trompeta napu 'yáliku, 'lige asíriga a'wágame ra'ichame ma'chí aniéturu 'pa rewagáchika, regá anime:

Jípeko Onorúgame napu ramué nuleme ju 'lige alué Kristo napu bo'né júlale 'pa rewagáchika

\* 11:4 Alué olibo rakala go'ame ju 'lige newalime ju aseite 'lige yowí. 'We najtékame nile alué olibo.

napurigá ralámuli gu'írimala,  
alué okáraga nulá bochígimi jena wijchi-  
moba.

'Lige alué Onorúgame nulámala nabí.  
16 'Lige alué bilé liá aminá naó rió  
e'wélala napu noligá mochige napu ajtigé  
Onorúgame, alemi o'wemi uchúpaturu  
chojkóbaka wijchí si rojpóchaga, 17 'lige regá  
aniéturu:

Cheliérabá mué Onorúgame,  
mué napu wa'lú a'walí nígame ju me'tigá  
suwábaga tábiri.

Mueka asíriga 'yasi ajtigame júkuru,  
'lige tabilé siné mukume júkuru mué.

Cheliérabá mué Onorúgame,  
mué júkuru jena wijchimoba nulame 'we 'la  
ma'chí nérékuru.

Mueka wa'lú a'walí nígame ju.

18 Alué tabilé oyérame Onorúgame 'we ayoga  
mochige

nobi máchigo sébaleko raweli  
napu gastigárimili nílige mué  
alué ralámuli tabilé oyérame Onorúgame,  
'lige aminami 'ma sébale raweli  
napu tabilé gastigárimala mué alué ralámuli  
napu 'ma suwigá bi'tí napu oyérame nile  
mué Onorúgame

napu'lige bijí ajagá mochiga,  
'lige aminami tabilé gastigárimili nílige mué  
alué mué nila ra'íchali benírame ralámuli  
'lige suwábaga uché jaré napu 'la mué  
oyérame ju,

alué napu ekí pioni ju 'lige alué napu ekí  
e'wélala ju.

'Lige aminami seba raweli napu'lige  
me'limeli nílige mué

alué ralámuli napu ekí me'ligá e'yéname ju,  
'lige aminami napu eki chibi olagá e'yéname  
ju

uché jaré ralámuli.

19 'Lige alué wa'lú re'obá Onorúgame nila  
'ma i'puga ilibaturu yochi alé 'pa rewagachi  
ilígame, 'lige alé pachá re'obachi bo'géturu  
alué gajoni 'we najtékame napu gatélime  
ju alué rejte i'chibérigime napu osálige  
Moisesi alué nulali rejcholi. 'Lige 'la abé  
ená aniániéturu 'we ne'wíturu 'lige aminami  
napurigá trompeta ka aníchaneturu, 'lige  
aminami re'óchaneturu jena wijchimoba  
'lige aminami a'wágame nokáturu gawí, 'lige  
wa'lú u'kúture rejsisi.

## 12

*Jena ruwimela Juani etéligo bilé mukí  
wa'lú bochágame*

1 Bilé mukí etiáturu ne 'pa rewagachi  
rayénali o'páchaga ilígame 'lige aminami  
rayénali si'púchaga, 'lige alé amoba mechá  
ajtigíchi ilígéturu, 'lige alé amoba mo'ólachi  
makué oká so'pili mochígeturu napurigá  
gorona neraga, alué mukí pe bilé tétali

ruwime kéréle churigá nimio a'kinana  
rawé. 2 'Lige alué mukí wa'lú rojégame  
kéturu 'ma ranélimili ke 'lige asíriga e'wele  
naláturu o'koka, máchigo ochérachi nilígame  
u'tátiri towí. 3 'Lige bilé ajágame etéturu ne  
alé 'pa rewagachi napuyeri ochá, asíriga  
wa'lú 'we sejtákame, 'lige gichao mo'égame  
kéturu alué ajágame, 'lige makué a'wégame  
kéturu, 'lige gorona mo'kókame kéturu a'pili  
mo'ólachi. 4 'Lige wajsílate asíriga we'ká  
so'pili rujsúnaturu 'pa rewagachi mochígame  
amulí nasípasi neraga napu ekí mochige  
alé 'pa rewagachi, 'lige jékana wijchí  
rujsúnaturu alué so'pili, 'lige alé a'bemi  
nawáturu alué wa'lú ajágame napuyeri  
ochá 'we chátiri alé alué mukí ajtigíchi,  
pe abiéniko go'mea alué u'tátiri pe kulí  
ochérasa. 5 'Lige ochératuru u'tátiri towí  
alué mukí ranala napu wa'lula nílimi nile  
napu'lige wa'lú ochérasa, suwábaga ralámuli  
nuleme jena wijchimoba epperégame. 'Lige  
bilé selá jírote newárigime o'ká asimeli  
ju napu'lige wa'lula neraga asigá. 'Lige  
yati bujéruturu alué u'tátiri alué mukí, bilé  
santo ánjeli simíturu bujea 'lige 'ma o'tóturu  
Onorúgame ajtigíchi alé wa'lú síachi alé  
'pa rewagachi. 6 'Lige alué mukika, alué  
u'tátiri eyela, 'ma másituru mejkami tabilé  
ba'égichi, 'lige aminami nibilé rojégichi napu  
Onorúgame 'ma 'la listo a'rélige 'la suériga  
gatega napurigá alé ajchagá nesériwa alué  
mukí bilé mili oká siento aminá usánisa  
makué rawé (naosa makué na oká mechá).

7 'Lige wa'lú nakó o'winíturu alé 'pa  
rewagachi. Migeli anilime santo ánjeli,  
'lige we'ká santo ánjeli Migeli gompaniérola  
alué gichao mo'égame chátiri tábiri saega  
nakóturu. 'Lige alué ajágame napuyeri  
ochá alué gichao mo'égame gompaniérola  
santo ánjeli abiena nakóturu alué Migeli  
gompaniérola saega, 8 'lige 'ma neyúrituru  
alué Migeli gompaniérola santo ánjeli 'lige  
'ma mabúture alé 'pa rewagáchika alué  
chátiri ajágame napuyeri ochá gichao  
mo'égame 'lige alué gompaniérola. 9 'Lige  
alué chátiri ajágame napuyeri ochá 'pa  
rewigáchika pátuturu alué napu pe sinowí  
nílige 'we 'ya, Riablo anilime ju 'lige Satanasi  
anilime ju, napu pe 'yégime ju suwábaga  
ralámuli jena wijchimoba epperégame, 'ma  
pátuturu 'pa rewagáchika, 'ma gompaniérola  
'yúriga.

10 'Lige ra'íchame akéturu ne alé 'pa  
rewagáchika asíriga a'wágame, regá anime:

—'Ma nawapa jena rewagachi alué  
napu bujémala alué chátiri 'nátali suwábaga  
ralámuli alé wijchimoba epperégame, 'ma  
seba Onorúgame a'walila, jípesíka 'la  
a'wágame nulámalabá Onorúgame, 'lige abi-  
ena nulámala alué napu pale Onorúgame alé  
wijchimoba, napugiti 'ma alégana pátigime  
alué napu pe 'yégime ju alué Onorúgame

oyérame ralámuli napurigá ramué, alué napu 'yégame ke alué Onorúgame oyérame senibí rawé 'lige rukomi. <sup>11</sup> Onorúgame oyérame 'ma neyúriile, napugiti Esukristo 'ma mukúligame alué ralámuli gu'iriga napurigá tabilé walú resítiri alawégame nímala, tabilé majale suwiyame Onorúgame oyéraga. <sup>12</sup> 'We ra'salási 'emi jena rewagachi ejperégame. 'We resí ikimela suwábaga 'emi napu ejperé alé wijchimoba napugiti alué Riablo 'ma re'kíligame alemi 'emi ejperélachi 'we ayoga, napugiti machiame 'ma pe 'wemi 'ma tabilé umubamio 'emi 'yegia.

<sup>13</sup> Napu'lige 'ma pásiga alué chátiri ajágame 'pa rewagáchika 'we ayole 'lige me'lisale alué mukí, alué napu ranele alué u'tá towí. <sup>14</sup> 'Liko alué mukí a'wé a'nalá 'yáruturu napurigá i'nímala mejkami tabilé ba'wégachi nibilé rojégichi napurigá tabilé cha'píboa alué chátiri ajágamete napuyeri ochá, alé mejkami napu Onorúgame 'ma 'la listo a'rélige 'la suériga gatega napurigá alé asimela alué mukí naosa makué na oká mechá. <sup>15</sup> 'Lige alué chátiri ajágame napuyeri ochá walú ba'wí go'míturu chu'álachika alé guwánami alué mukí 'machi napurigá u'lisimala. <sup>16</sup> 'Lige iligá alué we'eka walú re'nale 'lige bajile alué ba'wí. Alué we'eka pe alué mukí gu'iriga 'sile ala'siá napurigá tabilé u'lisimala alué mukí. <sup>17</sup> Alésíko alué chátiri ajágame napuyeri ochá 'we ayóturu alué mukí 'yuga pecha sébalinga, 'lige simíturu alué mukí 'kúchila 'yuga nejkomia, alué mukí 'kúchila napu 'la oyérame ju pe Onorúgamecho, alué napu 'we 'la oyérame ju napu Esukristo ruwile. <sup>18</sup> 'Lige alésíko alué walú chátiri ajágame napuyeri ochá alé walú ba'wí manígichi suweke chujkíbaturu.

### 13

*Jena ruwimela Juani etéligo oká ajágame oparúgime*

<sup>1</sup> 'Lige uché bilé ajágame etiáturu ne asiriga enátiri alé walú ba'wí manígichika ma'chínáme. 'Lige gichao mo'égame kéturu alué ajágame 'lige makué a'wégame, 'lige a'píli a'wálachi bilé gorona\* chijtúligame ajchágame kéturu alué ajágame, 'lige osirúgime kéturu alé a'pílipi mo'ólachi, 'we chátiri ra'íchali ruwime, pe Onorúgame gawéliga. <sup>2</sup> Alué ajágame napu ne eté napuyeri bilé re'séwili kéturu, 'lige ronólaká napuyeri oji ronola alieri ronégame kéturu, 'lige chu'álaka napuyeri mawiyá alieri chu'égame kéturu. 'Lige alué walú chátiri ajágame napuyeri ochá walula nulame newáturu alué ajágame napuyeri re'séwili. <sup>3</sup> 'Lige alué bilé mo'ó alué ajágame mo'ola

'we jechárigame kéturu 'ma ra'págame 'lige ku sa'wíturu alué ajágame mo'ola, 'lige suwábaga ralámuli jena wijchimoba ejperégame aniéturu:

—'La chiena 'la ku 'la sa'wigá ikí alué ajágame —aniéturu.

'Lige alué ralámuli 'we 'la oyératuru alué ajágame napurigá Onorúgame neraga, <sup>4</sup> 'lige tánituru iwérali alué walú chátiri ajágame napuyeri ochá napu walula nulame newálige alué uché bilela ajágame napuyeri re'séwili («leopardo» anilime yolí ra'íchaga). Abiénachigó tánituru iwérali alué ajágame napuyeri re'séwili. 'Lige regá aniániéturu suwábaga alué ralámuli jena wijchimoba ejperégame:

—Tabilé 'wesi i'té aminá uché bilé aliena a'wágame napuyena a'wágame ju ye ajágame. Tabilé 'wesi i'té napurigá neyúrimala ye ajágame 'yuga nejkoga.

<sup>5</sup> 'Lige Onorúgame lisensia 'yáturu alué ajágame napuyeri re'séwili napurigá ra'íchamala ra'íchali 'we chátiri, pe Onorúgame gawéliga, 'we rióliga. 'Lige abiena lisensia 'yáturu napurigá nulámala jena wijchimoba naosa makué na oká mechá. <sup>6</sup> 'Lige o'winaturu ra'ícha alué ajágame napuyeri re'séwili 'we chátiri ra'íchali, Onorúgame gawéliga, 'lige suwábaga napu mochí 'pa rewagachi gawéliga. <sup>7</sup> 'Lige Onorúgame abiena lisensia 'yáturu napurigá nejkómala Onorúgame gompaniérola saega 'lige napurigá umérimala Onorúgame gompaniérola. Abiena Onorúgame ajcháturu walula napurigá nulémala suwábaga chojkégame ralámuli napu ekí ejperé jena wijchimoba, alué napu se'winati ra'íchali ra'íchame ju a'pílipi chojkégame. <sup>8</sup> 'Lige suwábaga ralámuli napu ekí tabilé uchuchárigame ju rewalá alué Bo'á Ranala nila apélichí, alué ralámuli 'we 'la oyérituru alué ajágame napuyeri re'séwili. Alué ralámuli Onorúgame oyérame alé apélichí uchule rewalá 'we 'ya ta'chó i'tégichi ye gawí. Alué Bo'á Ranala napu me'líliru, alué 'sile uchucha alué ralámuli rewalá.

<sup>9</sup> 'La akeme níriká, 'we 'la gepuwa ye ra'íchali. <sup>10</sup> Onorúgame elasa napurigá cha'píruiga asimela bilé rió, alarigá nímala, 'ligechigó Onorúgame elasa napurigá siparínate ejchega me'liboa bilé rió, alarigá nímala. Onorúgame oyérame ralámuli 'we 'la anachámili ju rekó alakié tabilé guwana wijchigá Onorúgame oyeria.

<sup>11</sup> 'Lige uchéchigo bilé chátiri ajágame etiáturu ne, alueka we'éreleka ma'chínaturu. Alueka oká u'kuchí a'wégame kéturu napuyeri bo'á ranala, 'lige 'we chátiri ra'íchame kéturu <sup>12</sup> 'lige alueka nulalime kéturu alué uché bilela chátiri ajágamete,

\* **13:1** Alué gorona pe ruwame nile walula nulame neraga niligo alué ajágame.

alué uché bilela ajágame napuyeri re'séwili, napu'lige napuika uchuka. Lige alué a'wégame ajágame, asírige e'wérige anéturu ralámuli jena wijchimoba epperégame napurigá iwérali tánimala alué ajágame napuyeri re'séwili, alué napu sa'wígá ikigé mo'ola 'we ejelígame. <sup>13</sup> Abiena 'we 'la benégame kéturu i'kirú 'sika, 'la umébame kéturu na'í wijchiria 'pa rewagáchikana suwábaga ralámuli etérige. <sup>14</sup> Alarigá, asírige 'la umébame kéturu ralámuli 'yegia jena wijchimoba epperégame, pe na'í 'paka 'pa rewagáchikana. 'Lige pe alarigá 'yégali ruigá 'we 'la semáriga nuléturu ralámuli napurigá newámala bilé re'séwili a'chigóyéri napuyeri alué re'séwili ajágame ku sa'wígame. <sup>15</sup> 'Lige alué a'wégame ajágame a'walí 'yáruturu napurigá ajánamala alué re'séwili tabilé ajágame pe newárigime. 'Liko ajánale 'lige ra'ichale alué pe newárigime re'séwili. 'Lige alué chátiri ajágame we'éraleka ma'chínagame nulele napurigá ralámuli tánimala iwérali alué ajágame pe newárigime. 'Lige nulele me'línliga suwábaga ralámuli napu tabilé iwérali tánime nile alué re'séwili newárigime. <sup>16</sup> Aminami alué ajágame we'éraleka ma'chínagame nuláturu napurigá suwábaga ralámuli bawériwa wajtoná sekálachi o gowálachi kómá ye número usani siento na bakiá liá na usani (666), suwábaga ralámuli rekó 'we nígame ke, rekó tabilé nígame ke, rekó batroni ke, rekó pioní ke, suwábaga re'wániga. <sup>17</sup> Aminami bilé ríó tabilé ujchágame nisa alué número napu ju usani siento na bakiá liá na usani (666),<sup>†</sup> tabilé nilamala lisensia napurigá ralinémala o napurigá ralimela. <sup>18</sup> 'We 'la 'nátaga gepútékuru ye ra'ichali. 'We 'la benégame níríká tétiga, tétiwarú alué osilí bilé ríó rewalá, ye número buinírubá usani siento na bakiá liá na usani (666) napurigá 'la námaka mochiwa.

## 14

*Jena ruwimela Juani ruwíligo ralámuli Onorúgame oyérame wíkaráligo*

<sup>1</sup> 'Lige pe'tá nujubapi etiáturu ne alué u'tá Bo'á Ranala, alé rabó chujkugéturu Sioni anilichí rabó, 'lige bilé siento na naosa makué na naó mili (144,000) ralámuli mochígeturu alé napu alué u'tá Bo'á Ranala chujkugé, suwábaga alué ralámuli gowálachi osirúgime kéturu alué Bo'á Ranala rewalá 'lige alué Bo'á Ranala O'nola rewalá osirúgime kéturu gowálachi, <sup>2</sup> 'lige akéturu ne bilé tábiri 'pa rewígáchikana napuyeri ba'wí iwégame 'mame 'lige abiena napuyeri a'wágame ra'name, 'lige we'ká arpa rabisíkime rabisime akéturu ne. <sup>3</sup> 'Lige wíkaráchaneturu alué we'ká ralámuli arpa

rabisime, wíká nuebo, alé o'wemi jaga alé wa'lú sia ilígichi napu Onorúgame ajtime ju, alé napu alué naó ajágame uchuke, alé napu mochige alué bilé liá na naó e'wélala. 'Lige pe alué bilé siento aminá oká liá aminá naó mili ralámuli Onorúgamete buinárigime alé chátiri bowechi e'yénachi, pe aluecho 'la beníturu alué wíká. Aminá uché jareka tabilé beníturu. <sup>4</sup> Suwábaga alué ralámuli napu 'la benile alué wíká, alueka tabilé umugí 'yuga okome nile napu tabilé a'boi 'yula nile. Alué we'ká ralámulika nile napu e'yéname nile alué u'tá Bo'á Ranala eyénachi. Alué we'ká ríoka kéturu napu Onorúgame buyánale alé chátiri bowechi e'yénachi. Alué ralámulika nile napu bajchá buináliru napu'lige Onorúgame pe kulí siné buyánachi jaré ralámuli alé chátiri bowechi. <sup>5</sup> Alué ralámulika tabilé siné 'yégame nile, 'lige aminami tabilé siné cha nokagá e'yéname nile.

*Jena ruwimela Juani ruwíligo bakiá santo ánjeli beníraligo suwábaga ralámuli*

<sup>6</sup> 'Lige bilé santo ánjeli etiáturu ne re'pá 'máachi, Onorúgame nila ra'ichali o'kame, alué napu 'we 'la ma'chígime ruwime ju 'we 'la ko Onorúgame oyériali senibí. Alué santo ánjelika o'ká 'máaturu alué ra'ichali suwábaga ralámuli benírimia alué ra'ichali jena wijchimoba epperégame napu suwábaga chojkégame ralámuli napu ekí mochí jena wijchimoba, alué napu i'wani ra'ichali nígame ju a'pílipi chojkégame, <sup>7</sup> 'lige regá anisia 'máaturu alué santo ánjeli:

—'La bijchiá 'la oyérawa Onorúgame, 'la niraga napugiti 'ma sébampá raweli napurigá Onorúgame gustisia olámala ralámuli, regá aníboa: «Bi'neli neyúriga wa'lú a'walí nígame ju Onorúgame.» 'Lige 'we 'la táníwa iwérali Onorúgame, alué napu 'sile newá rewagá, rayénali, mechá, so'pílí 'lige napu 'sile newá ye gawí 'lige wa'lú ba'wí, 'lige alué ba'wí napu ma'china bajíchimi.

<sup>8</sup> 'Lige uché bilé santo ánjeli ma'chínaturu alé 'pami, 'lige alueka aniéturu:

—'Ma tabilé 'wesi ralámuli i'tépá alé Babilonia rewégichi napu wa'lúlachi nile. Ralámuli alé we'ká ríogichi Babilonia anilichí epperégame asírige cha nokagá epperégame kéturu, we'ká umugí 'yuga okome kéturu, 'lige aminami riocho ka napuika okome kéturu, 'lige suwábaga ralámuli we'kaná chojkégame jemi wijchimoba epperégame a'chigóriga nokáturu, alé Babilonia o'wísale alué chátiri nátali.

<sup>9</sup> 'Lige uché bilé santo ánjeli ma'chínaturu alé 'pami, 'lige alueka aniéturu:

—Ralámuli napu ekí tani iwérali alué ajágame ba'wichika ma'chínigame napuyeri re'séwili, 'lige aminami alué re'séwili

<sup>†</sup> 13:17 Ye númeroka 666 pe alué a'wégame ajágame bawelá kéré.

pe newárigime 'we tánisa iwérali, 'lige aminami elasa napurigá bawériwa sekálachi o gowálachi kómá, <sup>10</sup> aluéchigó 'ma oyérame kérélamala alué chátiri 'nátali, 'lige Onorúgame 'we ayómala alué ralámuli 'yuga, 'lige tabilé siné a'rémala gastigaria, 'lige aminami na'ite 'we rajtágamete gastigárimala 'we cha júkame na'ite. Alarigá gastigárimala Onorúgame alué ralámuli alué we'ká santo ánjeli etériga 'lige alué Bo'á Ranala etériga,\* <sup>11</sup> 'lige molí 'we cha júkame tabilé siné a'rémala moloa, rawemi 'lige rukomi. Tajsiné a'rémala ralámuli gastigaria, alué ralámuli napu 'we tánime ju iwérali alué chátiri ajágame napuyeri re'séwili, 'lige alué re'séwili pe newárigime, 'lige aminami alué ralámuli napu ekí ujchágame ju alué número usani sientu na bakía liá na usani (666) napu alué re'séwili bawelá kéré —regá aniéturu alué santo ánjeli.

<sup>12</sup> 'We 'la ma'chí nérélamala tabilé guwana rujsunio alué ralámuli 'la Onorúgame oyeria rekó chibi oliáe pe tabilé oyérame kóriká alué ajágame napuyeri re'séwili 'lige aminami tabilé tánime kóriká iwérali alué re'séwili pe newárigime, napu 'la sébali olame ju napu nulá Onorúgame 'lige napu tabilé siné a'reme ju oyeria Esusi. Alué ralámulika napu Onorúgame nulalila oyérame ju 'lige abiena 'we 'la oyérame ju Esusi, alueka wa'lú anachámili júkuru.

<sup>13</sup> 'Lige bilé ra'íchali akéturu ne alé 'pami ma'chí anime, regá anime:

—Osibóaká ra'íchali regá anime: 'We 'la semati raweli narémala alué ralámuli napu me'liboli ju Onorúgame oyérame kóriká. Bi-jchiá ju, 'ma 'la resibamala, 'lige 'ma tabilé resí nilamala napugiti Onorúgame 'we 'la machigá ajtigame tabilé se'winá nokame niligo alué ralámuli.

*Jena ruwimela Juani ruwiligo Onorúgame o'tomeli ko bo'né kompaniérula gastigárimio alué cha nokame ralámuli*

<sup>14</sup> 'Lige e'nénaturu ne alé 'pami rewagáchimi napu ma'chí anié alué ra'íchame 'lige etéturu ne bilé nolí rojsákame 'lige alé amoba nolichi ajtigéturu napuyeri bilé rió, alué napu ju Onorúgamete julárigame alué kárikéturu, 'lige bilé gorona mo'kókame kéturu 'órote newárigime, 'lige bilé 'osa ri'ligó sijkirela o'kame kéturu 'we olame. <sup>15</sup> 'Lige uché bilé santo ánjeli etiáturu ne alé wa'lú re'obachi ma'chíname, alué wa'lú re'obá napu ju Onorúgame re'obala alé 'pa rewagachi ilígame 'lige regá aniéturu e'wele ra'íchaga alé nolichi amoba ajtigame:

—Yati sijkiboa alué ri'ligó, 'ma sébakuru 'wílime.

<sup>16</sup> 'Lige alué napu ajtigé alé nolichi amoba yati sijkáturu suwábaga alué ri'ligó, 'lige 'ma sijkiruga ilíbaturu.

<sup>17</sup> 'Lige uché bilé santo ánjeli ma'chínaturu alé 'pa rewagachi alé wa'lú re'obachi napu ju Onorúgame re'obala alé 'pa rewagachi ilígame. Alueka 'osa o'kame kéturu 'we olame. <sup>18</sup> 'Lige bilé santo ánjeli napu alué mesa napu o'kuí e'kósilime repuka ilígame ma'chínaturu alé re'obachi pachaka 'lige anéturu e'wele ra'íchaga alué 'osa o'kame santo ánjeli:

—Yati rejpunawa alué 'uba 'ma wáligame jena wijchimoba.

<sup>19</sup> 'Lige alué santo ánjeli 'osa o'kame yati rejpunaturu alué i'wíli ('uba), 'lige mochíbaturu suwábaga alué i'wíli bilena rejkolichi ba'wila ma'chí pamia. Yeka ruwime kéré Onorúgame ralámuli gastigárimio. <sup>20</sup> 'Lige alué rejkolí mejká iligéturu tabilé riógichi, 'lige alé rejkolichi we'lisi re'kéturu, napurigá oliame nile alué 'uba ba'wila ma'chí pa, 'lige pe elá ma'chínaturu alé rejkolíchika, tase alué 'uba ba'wila, 'lige wa'lú kéturu alué elá, rojkógame napu echilú bilé gawé chu'lá re'pa (bilé metro neraga rojkógame) 'lige we'límána bilé mili na usani sientu estaria (oká sientu na gi makuesa na usani kilómetro kéré).

## 15

*Jena ruwimela Juani ruwiligo Onorúgame júlligo gichao santo ánjeli napurigá ralámuli gastigárimala*

<sup>1</sup> 'Lige etiáturu ne alé 'pa rewagachi gichao santo ánjeli gichao gastigo o'kame, 'we enátiri gastigo. 'Ma pe aluecho nile alué gastigo napu ralámuli narémili nile, 'ma tabilé aminabi gastigárima olale Onorúgame alué ralámuli.

<sup>2</sup> 'Lige etiáturu néchigó wa'lú ba'wí napuyeri bigrio na'í nalógame kéturu, 'lige alé suweke jágeturu alué ralámuli napu tabilé elile alué chátiri ajágame napuyeri re'séwili napurigá ujchewa alué bawé alé sekálachi o gowálachi kómá, alué napu tabilé tánale iwérali alué ajágame napuyeri re'séwili, alué napu 'la bijchiá 'la Onorúgame oyérame nile. Alué ralámuli arpa o'ká jágeturu napu Onorúgame 'yáligé. <sup>3</sup> 'Lige alué ralámuli bilé wíká wikaráturu alé napu Moisesi wikarame nilige, napu Onorúgame 'yuga nóchame nile. Abiena alué wíká wikarame nilige alué Bo'á Ranala. Regá wikaráturu: Mué Onorúgame, bi'neli neyúriga Wa'lula ju, 'we ra'sálágá mochiru napugiti mueka 'ma 'yáligame wa'lú gastigo alué 'we cha nokagá ejperégame ralámuli 'lige 'we 'la repume kame mué suwábaga ramué.

\* 14:10 Alué Bo'á Ranala alé nasipa ajtigame síachi chujkúgame pe Esukristo neraga kéré.

Mueka 'we 'la machí chieri ralámuli 'la gastigáritiká  
 'lige chieri tabilé gastigáritiká.  
 Mueka Wa'lula ju bochígimi jena wijchimo-  
 moba nulame.

Mueka nuleme ju alué ralámuli 'la a'lala  
 'lige aminami alué tabilé a'lala.

<sup>4</sup> ¿Chieri ralámuli tabilé nirámawé mué  
 Onorúgame,

'lige chieri tabilé 'la semáriga ra'ichámawé  
 mué olagá?

Aka péchigo muecho kago bi'neli neyúriga  
 'la bijchiá Onorúgame.

Suwábaga chojkégame ralámuli  
 napu eki ejperé jena wijchimoba,  
 sebámala napu mué ajtí iwérali tánimia mué,  
 napugiti mueka 'la sébali oláligime napurigá  
 'símili nligé.

<sup>5</sup> 'Lige pe'tá nubupapi etiáturu ne i'púriga  
 ilibago alué chiní alé re'obachi pachá  
 chujkúgame, napu bo'í alué gajoni alué  
 rejte mochígime napu osale Moisesi alué  
 makué nulali rejcholi. <sup>6</sup> 'Lige alé pachá  
 re'obáchika buinituru alué gichao santo  
 ánjeli napu o'kame ke alué gichao gastigo.  
 'We o'tosákame o'páchigime kéturu alué  
 santo ánjeli, 'lige asrīga bi'wígime 'lige  
 rapame, 'lige 'órote newárigime wasíbalaga  
 e'yénigituru sulachipo bo'ígime wasíbalaga.  
<sup>7</sup> 'Lige bilé alué ajágame alé a'bé alué wa'lú  
 sía ilígichi chujkule 'yáturu alué a'pílipi santo  
 ánjeli bilé bejtoli 'órote newárigime bochi  
 manígime alué i'wili\* ba'wila rekútume, alué  
 'uba ba'wila pee rekútume napu ruwime  
 kéréle pe alué gastigo nligo napu ralámuli  
 narémili nile. Onorúgame alarigá elale,  
 alué Onorúgame napu nabí asimeli ju.  
<sup>8</sup> 'Lige alé re'obachi 'ma bochi ilibaturu molí.  
 Alué molika ruyame nile alé asáligo alué  
 Onorúgame wa'lú a'walí niga, 'lige tabilé  
 'wesi gayénaturu alé re'obachi pachami  
 mo'yá napusi alué gichao santo ánjeli 'ma 'la  
 sébali olasa alué gichao gastigo 'we resítiri.

## 16

*Jena ruwimela Juani ruwligo gichao  
 santo ánjeli nulérime ko napurigá  
 gastigárimala ralámuli cha nokame*

<sup>1</sup> 'Lige ra'ichame akéturu ne alé re'obáchika  
 pachaka, regá nuléríturu alué santo ánjeli:

—Yatí simawa 'emi gichao santo ánjeli  
 'lige go'liawa alué 'uba ba'wila alé wijchi-  
 moba, alué 'uba ba'wila alé gichao bejtólíchi  
 manígime.

<sup>2</sup> 'Lige bilé santo ánjeli go'líturu alué i'wili  
 ba'wila rekútume alé bejtólíchi manígime  
 'pákana rewagáchikana, 'lige suwábaga alué  
 ralámuli napu ujhágame ke ye número  
 usani sientu na bakiá lía na usani (666) 'ma  
 wejchénaturu sa'pachí amoba, alué ralámuli

napu oyérame ke re'séwili newárigime.  
 'Lige bijí usani santo ánjeli rokárikéturu  
 napurigá 'pákana go'linámala alué i'wili  
 ba'wila rekútume.

<sup>3</sup> 'Lige uché bilé santo ánjeli go'líturu alué  
 i'wili ba'wila alé bejtólíchi manígime, alueka  
 alé wa'lú ba'wí ilígichi go'líturu, 'lige alué  
 ba'wika 'ma elá gayénaturu, chókame elá  
 napuyeri mukúgame elalá 'we enátiri 'lige  
 re'wániga ajágame alé wa'lú ba'wí ilígichi  
 ejperégame 'ma suwíturu. 'Lige bijí maligi  
 santo ánjeli rokárikéturu napurigá 'pákana  
 go'liámala alué i'wili ba'wila rekútume.

<sup>4</sup> 'Lige uché bilé santo ánjeli go'líturu  
 alué i'wili ba'wila rekútume alé be-  
 jtólíchi manígime, alueka bochígimi e'wele  
 bakóchimi go'liwíturu 'lige bajíchimi. 'Lige  
 alué ba'wí bochígimi bajichi manígime 'lige  
 bakochi ename 'ma elá gayénaturu. <sup>5</sup> 'Lige  
 akéturu ne bilé santo ánjeli ra'ichachi, alué  
 santo ánjeli ba'wí repume, regá anéturu  
 Onorúgame:

—Muérgo Onorúgame, mué napu bi'neli  
 bi'lepi Onorúgame ju, mué napu 'yasi  
 Onorúgame nile 'lige napu jipe Onorúgame  
 ju, 'we 'la sébali olá mué gastigaria alué  
 cha nokame ralámuli. <sup>6</sup> Alué cha nokame  
 ralámuli 'ma me'ale mué oyérame ralámuli  
 'ya ejperégame, 'lige mué nila ra'ichali  
 benírame ralámuli mueka, alekeri 'ma elá  
 newákuru ba'wí napurigá alué elá bajímala,  
 'we 'la ju alarigá olá mué alué ralámuli.

<sup>7</sup> 'Lige akéturu ne ra'ichame alé re'obachi  
 pachaka anime, alé méasachika ma'chínime  
 napu e'kósilime ke alué o'kui, regá anéturu:

—Mué Onorúgame Wa'lula Nulame,  
 mueka 'la sébali olá gastigaria alué cha  
 nokame ralámuli.

<sup>8</sup> 'Lige uché bilé santo ánjeli go'líturu i'wili  
 ba'wila rekútume, alueka alé rayénalíchi  
 amoba go'líturu alué i'wili ba'wila rekútume,  
 'lige alué rayénali asrīga rajtágame  
 rayénaturu amulí ta'mé anachárumé. <sup>9</sup> 'Lige  
 ralámuli 'we rajtálaga, 'we ayoga, asrīga  
 cha anía mochígíturu Onorúgame olagá.  
 Abirigáchigo tabilé arétigo cha noká  
 ralámuli jena wijchimoba mochígime 'we  
 cha nokame. Alésiko bijí bakiá santo  
 ánjeli rokárikéturu napurigá go'liámala i'wili  
 ba'wila rekútume.

<sup>10</sup> 'Lige uché bilé santo ánjeli go'líturu  
 alué i'wili ba'wila rekútume alé wa'lú síachi  
 napu chujkume ke alué chátiri ajágame  
 napuyeri re'séwili. Alué ajágame ka pe  
 alé asagá nuleme nile alué ralámuli bo'né  
 gompaniérola. 'Lige 'ma chóniga ilibaturu  
 bochígimi napu nulame ke alué chátiri  
 ajágame. 'Lige suwábaga ralámuli alué chátiri  
 ajágame oyérame 'ma asrīga resí nilituru noli  
 'ma inalá i'kiga jágeturu o'koka. <sup>11</sup> 'Liko

\* 15:7 E'nesi glosario «vino».

alué ralámuli asírige chátiri ra'íchaturu Onorúgame olagá, 'we ená niliga o'koka wejchagónite nayuka, abirigáchigo tabilé a'rétigo alué ralámuli cha noká. Alésíko bijí oká santo ánjeli rokárikéturu napurigá go'liámala alué i'wílí ba'wíla rekútume.

<sup>12</sup> Lige uché bilé santo ánjeli go'líturu alué i'wílí ba'wíla rekútume alé wa'lú bakochi Euprate anilichi, 'lige 'ma wakíbaturu ba'wí alé bakochi ename, napurigá alé bakóchika simáromala alué e'wélala e'sélikame rey napu epperégame nile napu rayénali ma'chínáme ju.

<sup>13</sup> Lige etiáturu ne bakiá alawá buyame. Bilé alué alawá ma'chínaturu alué chátiri ajágame chu'álachika napuyeri wa'lú ochá, 'lige uché bilé alué alawá ma'chínaturu alué chátiri ajágame napuyeri re'séwili chu'álachika. 'Lige uché bilé alué alawá ma'chínaturu alué napuyeri bo'á a'wégame ajágame chu'álachika, alué ajágame napuyeri bo'á a'wégame napu regá anime nile: «Neka ruwime ju napu Onorúgame ané ne'chí.» 'Lige napuyeri remó kéturu alué bakiá alawá. <sup>14</sup> Alué alawaka pe alué u'kuchípala Remónisi alawala nile 'we semá nokame kéturu pe ralámuli 'yégame, 'lige simíbaturu napubumia suwábaga alué e'sélikame rey bochígimi jena wijchimoba epperégame napurigá nakómala. A'lige rawé Onorúgame gastigárimala alué ralámuli 'we cha nokame, alué napu ju bi'neli neyúruga Wa'lula. <sup>15</sup> «Yati nawámala ne tabilé buwechi 'emi ne'chí», aní alué Esukristo. «'We 'la semati raweli narémala alué napu 'we 'la 'nata ajtí. Alué napu 'la mochíga ajtí o'pacha napurigá tabilé 'yeri ma'chínamala pachaka galíraleka, alueka tabilé chijúniga ma'chínamala», alarigá aní Esukristo. <sup>16</sup> Liko alué alawá 'ma napubúuru alué e'wélala e'sélikame rey bilena Armajeroni rewégichi ebreo ra'íchaga. Alésíko bijí bilé santo ánjeli rokárikéturu napurigá go'liámala alué i'wílí ba'wíla rekútume.

<sup>17</sup> Lige uché bilé santo ánjeli go'líturu alué i'wílí ba'wíla rekútume alé 'pami ekáralimi, 'lige bilé ra'íchali ma'chínaturu alé 'pa rewagachi ilígame re'obáchika pachaka alué wa'lú sía ilígichika, alué sía napu ajtime ju Onorúgame, regá anime kéturu alué ra'íchali: —Ma 'la sébali júpá, pe ekipi gastigo náomala ne.

<sup>18</sup> Lige ne'wíturu, 'lige a'wágame re'óturu alé 'pa rewagachi, 'lige asírige enáriga nokáuru gawí. Tabilé siné aliena a'wágame nokigéturu ye gawí, pe a'ligecho. <sup>19</sup> Alé we'ká riógichi Babilonia rewégichi bakiná neraga gajúuru alué gawí nokagá, 'lige aminami uché jarénami we'ká riógichi

'ma gajunúturuchigó suwábaga galí. 'Lige Onorúgame senibí 'la nélega eyénale gastigárimia alué Babilonia epperégame ralámuli, 'lige 'ma gastigárituru asírige a'wágame. <sup>20</sup> Lige suwábaga gawí alé nasipa ba'wíchi 'ma ba'wíchi jágame go'nágana bokuíturu alué gawí nokachi, 'lige suwábaga rabó 'ma gajunúuru, 'lige e'wele gawítiri re'pá jágame 'ma gajunúuru. <sup>21</sup> Lige asírige e'wele rejsisi u'kúuru, oká lía kilo neraga bejtégame a'pílipi rejsisi, 'lige we'ká ralámuli 'ma suwíturu alué rejsísite me'chósigá. 'Lige ralámuli 'we chátiri ra'íchali ra'íchaturu Onorúgame olagá, napugiti Onorúgame e'wele rejsisi u'kíriligame.

## 17

*Jena ruwimela Juani ruwíligo napu etéligo napu 'lige santo ánjeli bayérale 'mi mejká jami wakígachi*

<sup>1</sup> Alué napu gichao santo ánjeli nilige alué bejtoli o'kame, 'lige bilé nawáturu napu ne ilige, 'lige ne'chí bayérituru regá anigá:

—Nabá napu ajtí alué mukí we'ká rió 'yuga gojchime napu ajtí alé we'kaná bajichi amoba,\* <sup>2</sup> napu 'yuga okole alué e'wélala e'sélikame rey jena wijchimoba mochígame, 'lige abiena ralámuli jena wijchimoba mochígame a'chigóriga nokale alué e'wélala e'sélikame rey etega alué mukí e'néname, 'ma korúlechigó ralámuli uché jaré umugi 'yuga okókime. Nabá alé, 'lige etérimala ne chiena a'wágame gastigárimio ne alué mukí.

<sup>3</sup> Lige neka Onorúgame Alawálate 'yáraturu napurigá simela ne santo ánjeli 'yuga. 'Liko santo ánjelika bayérituru ne'chí jami wakígachi tabilé rojégichi nibilé ba'égichi. 'Lige alemi o'tosuga ne, etiáturu ne bilé mukí bilé chátiri ajágame aségame. Asírige chátiri kéturu alué ajágame, 'we sejtákame. 'Lige osirúgime kéturu bochígimi alué ajágame, regá anime: «Onorúgame bi'neli neyúruga Wa'lula ju, Onorúgame ralámuli buyánáme alé chátiri bowechi e'yénigime», alarigá anime osirúgime kéturu. Alué osilika pe Onorúgame gawélime kéturu. 'Lige alué ajágame gichao mo'égame kéturu 'lige makué a'wégame kéturu. <sup>4</sup> Lige alué mukí 'we siyókame si'púchigame kéturu 'lige 'we sejtákame o'páchame kéturu. 'Lige alué mukí 'we semátiri we'lá ujhágame kéturu, 'órote newárigime, 'lige golókame kéturu u'kuchí rejté ajkabóligame 'we najteme 'lige 'we semati, 'lige aminami alué 'we najteme 'lige 'we semati rejté uchúkame kéturu alué si'pucha bochígimi.† 'Lige o'kame kéturu bilé bejtoli sekachí suwábaga

\* **17:1** Siné kachi «mukí» aniáká pe Babilonia olagá anligo alué Juani, napu abé nile alé Euprate rewégichi bakó bo'ígichi. Babilonia anilichika we'ká riógichi nile. † **17:4** Yolí ra'íchagaká «perla» anilime ju alué rejté.



chátiri tábiri ajchágame kéturu alué bejtoli napu eki nóchiga oyame nílige alué mukí. <sup>5</sup> Lige osirúgime kéturu alué mukí gowálachi, napu ralámuli tabilé námale. Regá anime osirúgime kéturu: «Babilonia pe eyela ju alué uché jaré umugi we'ká rió 'yuga okome, 'lige alué eyela chojkile bajchá suwábaga alué chátiri nocha.» <sup>6</sup> Lige etiáturu ne alué mukí rekulí ajtigó ralámuli Onorúgame oyérame elalá bajiga, alué ralámuli napu Onorúgame nóchali nochámili nílige. Alué mukí me'ale alué ralámuli napu tabilé guwana rujsume nile Esusi oyériga. Napu'lige alué mukí etesa, láturu ne 'we majaga: «¿Chieri júché alué mukí alué chátiri ajágame aséganti?» <sup>7</sup> Lige alué santo ánjelika anéturu ne'chí:

—¿Tabilé machí mué tachiri ruwime ka alué mukí 'lige alué ajágame 'we enátiri alué gichao mo'égame 'lige makué a'wégame? Ne 'la ruwimela. <sup>8</sup> Alué ajágameka napu mué etele 'yako ajágame kéturu 'lige jípeko 'ma tabilé ajágame júkuru, 'lige 'ma pe u'kabi rawé rokaré 'lékiri rejkolíchiri ma'chínimia napu 'we rojkógame ju tabilé siné sebarume. Napu'lige ma'chíniasaká, Onorúgameka ku 'légana pákala 'ma mojánaga. 'Lige alésíko 'ma tabilé siné ajánamala alué ajágame napu eté mué. 'Lige alué ralámuli napu bijí ejperélamala jena wijchimoba napu tabilé ujháliru rewalá alé Onorúgame nila apélichí, alué ralámulika lámala alué ajágame etega: «¿Churigá 'la moyénaleché 'lékiri alué ajágame?» Alalámala alué ajágame etega napu ajágame nile, 'lige napu 'ma me'líli, 'lige napu ku ajánamala. Ye ralámuli tabilé machí Onorúgame 'la machí cholamia alué ajágame wamí ku 'légana pákala mojánaga.

<sup>9</sup> 'We benégame nísaká 'nátaga, pe regá ju: Alué gichao mo'oka pe ruwime kérékuru alué gichao rabó napu ajtí alué mukí. 'Lige abiena ruwime kéré alué gichao e'wélala e'sélikame. <sup>10</sup> Lige alué maligi e'wélala 'ma suwile, 'lige bilé bijí wa'lula selígame rey ju, 'lige napu'lige alué napu bijí ajtí wa'lula selígame rey neraga mukusá, uchéchigo bilé asibámala wa'lula selígame rey neraga. 'Lige alueka pe'wera asimela wa'lula neraga. <sup>11</sup> Lige alué ajágame 'we enátiri napu 'yako ajágame nílige napu aségame ke alué mukí, alué ajágame napu jipe 'ma tabilé bejté, alué ku asibámala pe nujubami alué uché bilela selígame rey mukusá, alué ajágame 'we enátiri 'ma siné wa'lula nílige abé 'ya, 'lige 'ma a'tabemí mojánaga pápua Onorúgamete, 'lige alésíko 'ma tabilé ajánamala. †

<sup>12</sup> Alué makué a'waka pe ruwime kéré alué makué e'sélikame rey napu mochíbimili ju i'lilbeko, makué rió napu tabilé 'cho

e'wélala ju, 'lige napu'lige 'ma mochíbase e'sélikame neraga pe bi'lepi 'ora nulámala a'pílipi alué makué e'sélikame. <sup>13</sup> Lige a'pílipi alué e'wélala e'sélikameka rey 'la nerámala napurigá wa'lula nímala alué ajágame 'we enátiri. <sup>14</sup> Alué e'sélikame 'lige alué ajágame 'we enátiri alué Bo'á Ranala 'yuga nakómala, 'lige alué Bo'á Ranala neyúrimala, alué Bo'á Ranala kame bi'neli neyúriga Wa'lula jena wijchimoba. 'Lige alué Bo'á Ranala oyérame Onorúgamete bayérigame ju 'lige wanápurigame 'lige 'we 'la sébali olame ju napurigá nulá Bo'á Ranala.

<sup>15</sup> Lige aminami regá anéturu alué santo ánjeli ne'chí:

—Alué ba'wí napu amoba ajtí alué mukí we'ká rió 'yuga gojchime, alué ba'wí pe ruwime kéré we'ká ralámuli ichúrimi gawichí ejperégame, jaré se'winátiri ra'íchame. <sup>16</sup> Lige alué ajágame 'lige alué makué a'wa napu eté mué aleké enátiri ajágame mo'ólachi jágame, 'we ayómala alué inílame mukí 'yuga, alué mukí we'ká rió 'yuga gojchime, 'ma bujémala o'páchala, 'lige 'ma ojtónaga uchúmala o'maka go'yá alué mukí sa'pala, 'lige 'ma e'kósimala alué mukí sa'pala rasírigame. <sup>17</sup> Bo'né Onorúgame rekile 'nátili napurigá alué makué e'wélala e'sélikame rey 'la nerámala napurigá wa'lula nímala alué ajágame 'we enátiri napurigá alué makué e'wélala e'sélikame rey nuleme nímala. Napu'lige 'ma wa'lula asibasa alué ajágame 'we enátiri, Onorúgame tabilé che olámala yati ka, napusi sébali olasa napu anílige Onorúgame, a'lige kulí gastigárimala alué makué e'wélala e'sélikame 'lige alué ajágame 'we enátiri. <sup>18</sup> Alué mukí napu mué etele, alueka pe ruwime kéré bilé we'ká riógachi§ napu ju wa'lúlachi we'kaná gawichí nuleme.

## 18

*Jena ruwimela Juani ruwiligo 'ma suwábaga gajúligo galí alé we'ká riógachi Babilonia anilichí*

<sup>1</sup> Pe a'lige yati uchéchigo bilé santo ánjeli etiáturu ne 'pa rewagáchikana re'kíname. Alué santo ánjeli 'la nígame kéturu lisen-sia napurigá nulámala. Asíriga rapame kéturu, nobi túbaga ilíbatu 'we 'la ma'chigá bochígimi jena wijchimoba alué santo ánjeli re'kínachi. <sup>2</sup> Lige asíriga e'wele ra'íchaturu, regá aniéturu:

—'Ma suwábaga gajule galí alé we'ká riógachi Babilonia anilichí, alé napu 'we machirume nile. Jípeko pe alué remónisi u'kuchípala ejperé, abiena pe alué e'karúgame chátiri tábiri alawá, 'lige alué

† 17:11 Pe gichao nile alué e'wélala e'sélikame, pe iligá bilé osá asíbale wa'lula selígame rey neraga. § 17:18 Jaré mayé

Roma anilichí nílige, 'lige jaréchigo mayé Babilonia anilichí nílige. \* 18:2 Alué ralámuli israelita níriká 'we chátiri nile alué wilú, 'lige alué sopichí, 'lige alué utugulu.

chátiri ajágame napurigá wilú, so'pichí, 'lige utugulu.\* <sup>3</sup> Suwábaga chojkégame ralámuli napu jena wijchimoba ejperé 'ma oyérale alué chátiri 'nátili alé Babilonia o'wísigime 'nátili 'lige suwábaga alué e'wélala e'sélikame rey okole umugí 'yuga tabilé a'boi ujubila, 'lige alué ralámuli napu nígame ju e'wele tienta, alueka 'we yati 'we nígame gayénale pe alué ralinéga napugiti alué muki najkíligame 'we najteme.

<sup>4</sup> 'Lige uchéchigo siné akéturu ne ra'íchanti alé 'pami rewagachi napu pe Onorúgame kéréle alué ra'íchame, regá aníchaneturu:

—Suwábaga 'emi napu ekí ne'chí oyérame ju 'ma buyásiwa alé we'ká riógichi napurigá tabilé oyéramala 'emi alué chátiri 'nátili alé Babilonia o'wísigime 'nátili 'lige napurigá tabilé narémala 'emi alué gastigo napu Onorúgame julámala. <sup>5</sup> Ralámuli alé we'ká riógichi mochígame ka asiríga wa'lú resítiri raweli nígame ju, 'lige Onorúgame 'we 'la machi, 'lige a'wágame gastigárimala. <sup>6</sup> Ralámuli alé we'ká riógichi mochígame asiríga resí oláturu 'emi, 'emi abéchigo resí olawa. <sup>7</sup> Alué ralámuli alé Babilonia ejperégame 'we nígame e'karúgame 'we gawélime nile uché jaré ralámuli olagá alekeri 'we wejpisópua, napugiti alué ralámuli regá 'nata mochígame: «Ramueka 'we 'la nígame niru, 'lige suwábaga ralámuli nuleme niru, 'lige tabilé siné seweka mochiwa ramué, peka napurigá bilé muki gunámakame.» <sup>8</sup> Alekeri bilé rawé si'népiríga alué alé Babilonia ejperégame ralámuli wa'lú gastigo narémala, 'we suwimela ralámuli, 'we seweka mochímala, 'lige gurúlamala go'ame 'lige e'kósiwili ju suwábaga galí, napugiti Onorúgameka cha wa'lú a'walí nígame kame, alué napu nígame ju lisensia napurigá gastigárimala alué ralámuli.

<sup>9</sup> Napu'lige alué e'wélala e'sélikame rey jena wijchimoba mochígame napu gompaniérola ju alué Babilonia anilichi mochígame, napu oyérame ju alué Babilonia anilichi mochígame, napu oyérame ju alué chátiri 'nátili alé Babilonia o'wísigime 'nátili, napu'lige etea wa'lú molochi suwábaga alué galí rajínaga 'ma nalámala 'lige 'we sewémala. <sup>10</sup> Jena wijchimóbami panápurí mochíga o'weti jábamala majaga, alarigá gastigárichi Onorúgame alué ralámuli Babilonia mochígame 'lige regá animela ralámuli:

—Resí ikígurubá ralámuli alé Babilonia ejperégame, alé we'ká riógachi napu ke wa'lúlachi. 'Lige yati neraga asiríga wa'lú gastigo sébakuru alué ralámuli gastigárilime.

<sup>11</sup> 'Lige alué ralámuli e'karúgame ralineme bochígimi wijchimoba mochígame 'ma

nalámala tabilé 'wesi i'télimempá alué e'karúgame tábiri ralamé alé Babilonia rewégichi ejperégame 'lige 'we seweka mochímala alakichi, <sup>12</sup> alué 'oro ralineme, 'lige plata, 'lige alué rejté 'we semátiri 'lige 'we najteme, 'lige u'kuchí rejté ajkabóligame 'we najteme napu perla anilime ju yolí ra'íchaga 'lige chiní asiríga jino «lino» anilime 'we najteme, 'lige alué chiní ojchilígime siyókame 'lige alué chiní sera anilime, 'lige alué chiní 'we sejtákame, 'lige igú 'we semá júkame, 'lige alué elepante ramalate newárigime, alué we'lí ramé, 'lige suwábaga tábiri igute newárigime 'lige brónsete newárigime, 'lige jierote newárigime, 'lige alué mármola anilime rejte newárigime. 'Ma pecha i'télimala, alekeri 'ma nalámala alué ralámuli. 'Lige suwábaga tábiri go'ame 'lige semá júkame 'ma tabilé i'télimalachigó <sup>13</sup> napurigá alué kanela, 'lige alué e'karúgame tábiri 'we semá júkame go'ame ajchilime, 'lige o'kuí, 'lige ba'wí 'we semá júkame, 'lige alué i'wili ba'wila rekútame, 'lige alué aseite gísaríga go'yame, 'lige ri'ligó, 'lige ri'ligó rusurúgame, 'lige bulito, 'lige bo'á, 'lige gawétiri, 'lige kareta gawete banírilime, 'lige ralámuli ralinélime. <sup>14</sup> 'Lige alué e'karúgame ralineme ralámuli bochígimi wijchimóbami mochígame animela:

—'Ma tabilé ni alué ralámuli alué e'karúgame tábiri napu 'we galeme ke a'boi, 'lige suwábaga napu nígame ke.

<sup>15</sup> Alué ralineme ralámuli bochígimi wijchimoba mochígame napu 'we nígame gayénale alué e'karúgame ralinéga 'we najtegachi, bochígimi wijchimóbami mochíga o'weti jábamala 'we majaga alarigá gastigárichi Onorúgame alué ralámuli, 'lige 'we nalámala 'lige 'we sewémala, <sup>16</sup> 'lige regá animela:

—Resí ikígurubá ralámuli alé we'ká riógachi ejperégame. Alué ralámuli alé ejperégame 'we nígame kéturu o'pacha «lino» chiní 'we jino newárigime o'pachátame kéturu alué 'we semátiri o'pacha. 'Lige aminami 'we nígame kéturu o'pacha alué ojchilígime siyókame chinite newárigime. 'Lige aminami 'we nígame kéturu o'pacha sejtákame chinite newárigime 'lige o'pachátame kéturu alué o'pacha. 'Lige 'we nígame kéturu e'karúgame tábiri 'órote newárigime alué u'kuchí karena goloka e'yénilime, we'látiri 'lige e'karúgame alieti tábiri napu uneme nile alué ralámuli. 'Lige 'we nígame kéturu alué u'kuchí ajkabóligame rejte 'we najteme perla anilime.† <sup>17</sup> Resí ikígurubá, pe yati neraga 'ma suwábaga rajínakuru suwábaga alakí tábiri 'we najteme 'lige aminami suwábaga

† 18:16 'Lige 'we nígame kéturu uché jaré u'kuchí rejté 'we najteme napu ujcheme ke alué ralámuli alué o'pacha 'lige napu ujcheme ke mo'ochimi.

alué galítiri 'lige suwábaga tábiri napu eki tábiri nígame ke alué ralámuli.

'Lige suwábaga alué e'wélala alué barko o'tome, suwábaga alué bárkochi e'yénigime, suwábaga alué bárkochi nóchame, 'lige suwábaga alué barko nígame napu nochárimo nile alué barko enomí meka, o'weti jábamala alué molí etega, suwábaga alué galí rajame molíla etega. <sup>18</sup> 'Lige animela:

—¿Kochiena uché bilena jágame kápá aliena 'la semátiri galí napuyeri alé we'ká riógichi jágame galí?

<sup>19</sup> 'Lige we'é bi'wígame ajchékala a'bopi mo'ola 'we seweka, † 'lige regá animela:

—Resí ikíkurubá ralámuli alé we'ká riógichi epperégame, suwábaga ralámuli napu eki nígame ke barko asírige nígame gayénale, alué bárkochi a'pagá ralinéga tábiri 'lige pe'wera kachi 'ma rajínakuru suwábaga tábiri 'ma galítiri.

Abiena akéturu néchigó re'pá rewagachi ra'íchame, alarigá anime:

<sup>20</sup> —Suwábaga 'emi napu eki me'liliru Onorúgame nila ra'íchali benírame kóriká, 'lige nulame kóriká Onorúgame nila nóchali, 'lige suwábaga napu me'liliru napu ruyame nile napu Onorúgame anélige napu jipe rewagachi mochi, 'we ra'sálagá mochiwa napugiti Onorúgame 'ma gastigárimpá alué ralámuli Babilonia epperégame.

<sup>21</sup> 'Lige bilé santo ánjeli 'we a'wágame o'wínaturu bilé wa'lú rejté napuchilú alué rejté rúsume, 'lige pasáturu alé wa'lú ba'wí ilígichi, 'lige tané ikía kíbaturu alué wa'lú rejté alé ba'wichí, 'lige aniéturu alué santo ánjeli:

—Yeka ruwime kéré Onorúgame 'ma gaju-namio suwábaga alué galí alé we'ká riógichi jágame 'lige 'ma tabilé siné uché jamio we'ká galí alé Babilonia rewégichi, nibilé pe bilé galí. <sup>22</sup> 'Ma tabilé siné ma'chí animela alué arpa alemi Babilonia rewégichi, nibilé wikarame, nibilé alué baká buchame 'we semátiri 'lige alué trompeta buchame 'we semátiri, nibilé 'wesi mochímala nóchame 'we jebénigame nóchaga, nibilé ma'chí animela rúsume, <sup>23</sup> pe chóniga ilimela rukó alemi, 'lige 'ma tabilé ma'chí animela alué rabisime napurigá nokame ke ralámuli bilé piesta newalichí, napu'lige wa'lú piesta newá newika, napugiti alué ralineme napu nile alé we'ká riógichi alé we'ká riógichi mochígame pe chigoga e'yéname nilígame 'lige sujumuga.

<sup>24</sup> Alé epperégame ralámuli chojkila gite me'lilirigame we'ká ralámuli jena

wijchimoba epperégame napu Onorúgame nila ra'íchali benírimo nile 'lige alué uché jaréchigó 'we 'la niraga Onorúgame oyérame ralámuli. 'Lige aminami we'ká uché jaré ralámuli me'liliru alé.

## 19

<sup>1</sup> 'Lige pe yati alué santo ánjeli suwénasa ra'icha, asírige a'wágame ra'íchame akéturu ne 'pa rewagáchika, we'ká ralámuli regá anime:

¡Onorúgame júkuru ralámuli a'kabámana jáwame!

Onorúgame bi'neli Wa'lula ju, napu bi'neli neyúriga wa'lú a'walí nígame ju, <sup>2</sup> 'lige tabilé gastigáriga a'reme ju ralámuli cha nokame,

alueka 'la bijchiá 'la gastigárimo ju ralámuli tase pe a'rigá,

alekeri 'ma wa'lú gastigo 'yale alué mukí we'ká rió 'yuga gojchime,\*

napugiti alué mukí chojkila nilígame.

'Ma a'chigóriga nokame ju ralámuli

jena wijchimoba epperégame.

Alué mukí chojkila gite

we'ká ralámuli suwile jena wijchimoba epperégame

Onorúgame oyérame,

alekeri Onorúgame 'ma me'ale alué mukí.

<sup>3</sup> 'Lige uchéchigo siné a'wágame ra'icháchineturu alé 'pa rewagáchika, regá:

—¡Bi'neli neyúriga Wa'lula ju Onorúgame!

'Lige 'ma rajáturu alué mukí 'lige wa'lú molóturu, tabilé siné a'rémala moloa.

<sup>4</sup> 'Lige alué bilé liá na naó e'wélala 'lige alué naó ajágame i'kili chojkóbaka uchúpaturu wijchí, 'lige regá aniéturu:

—¡Alarigá ju! ¡Onorúgame bi'neli Wa'lula ju, napu bi'neli neyúriga wa'lú a'walí nígame ju!

<sup>5</sup> 'Lige ra'íchame akéturu ne alé wa'lú síachika napu alé nasipa ilígame ju, regá aníchaneturu:

Regá anesi alué Onorúgame ramué O'nola:

«Mué Onorúgame, mueka asírige 'la repume ju ramué.»

Alarigá anewa 'emi suwábaga napu e'wélala ju nulame

'lige pe nóchame.

*Jena ruwimela Juani ruwíligo newímili ko Bo'á Ranala*

<sup>6</sup> 'Lige akéturu ne ralámuli rolókame ra'íchame, pe wa'lú ba'wí 'manti kaniéturu 'we najkáturume. E'wele re'ókame ra'ichásinituru. Alué ralámuli pe regá anime ke aniéturu:

¡Onorúgame bi'neli Wa'lula ju,

† **18:19** Alarigá nokame nile alué ralámuli 'we seweka mochiga. \* **19:2** We'ká rió 'yuga gojchime aniáká Juani, pe ruigá anime kéréle 'we resírige epperégame nilígame alué ralámuli Babilonia epperégame, 'we chátiri 'nátaga, cha nokagá járome, chigoga pe 'yégali beníriga ralámuli, 'lige aminami uché jaré rió 'yuga okome nilígame alué umugí tabilé 'la a'boi gunala, 'lige riótiri uché jaré umugí 'yuga okome nilígame tase 'la a'boi jubila.

jena wijchimoba nulame!

<sup>7</sup> 'We 'la ganíliga mochísiga 'la kápá, asíriga 'la ganíliga ra'íchaga Onorúgame olagá,

'la Onorúgame néléa, 'máchigo sébigame piesta napurigá newímala alué Bo'á Ranala.

Alué mukí napu newímili ju 'ma 'la listo ajtí newimía.

<sup>8</sup> Alué mukika asíriga 'la rojsákame o'pacha 'yáliku alué «lino» chinite newárigime, 'we rojsákame,

'we 'la bi'wígame napu ruwime kéré

'la bi'wígame alawégame ko alué ralámuli napu o'pachátame ju alué o'pacha.

<sup>9</sup> 'Lige alué santo ánjeli napu bejtoli o'kame ke anéturu ne'chí:

—Osibóaká napu ne ruwimela: «Ralámuli bayérigame ka napurigá sebámala alé piéstachi napu newímala alué Esukristo, asíriga 'la ra'sálagá mochí.»

'Lige aminami aniéTURuchigó:

—Ye ra'íchali ju napu Onorúgame ra'íchale, tabilé 'yégali ruwime ra'íchali.

<sup>10</sup> 'Liko chojkóbisiga ilibaturu ne alé o'wemi 'we 'la níraga napurigá bilé wa'lula. 'Lige alué santo ánjelika anéturu ne'chí:

—Tase chojkóbapua o'weka ne ilígichi napugiti neka pe nóchame kame Onorúgame nocháililachi pe a'chigóriga napurigá mué 'lige napurigá uché jaré 'la oyérame Onorúgame 'lige napu 'la e'wame ju napu nulale Esusi! 'Mí a'minami 'nalina 'la chojkóbaka iliboa napu ajtí Onorúgame. Alué Esukristo ra'íchálila 'we 'la gu'irime kame ralámuli. Ne ra'íchálila tabilé najté.

*Jena ruwimela Juani etéligo bilé gawé rosákame ma'chíname 'pa rewagáchika*

<sup>11</sup> 'Lige rewígá etiáturu ne i'púriga ilígime, 'lige bilé gawé rojsákame ma'chínaturu alé rewagáchika, 'lige alué bilé rió napu alué gawé aségame ke «Sébali Olame» anélime kéturu, 'lige aminami «Tabilé Siné 'Yégili Ruwime» anélimechigó 'lige napu 'lige ralámuli gastigaria 'la sébali gastigárima napuchilú gastigáritikaré, 'lige napu 'lige nejkoa ta'mé rasigá inílga nejcome nile ralámuli gastigáriga. <sup>12</sup> 'Lige busílaka napuyeri na'í kéturu, 'lige gorona mo'kókame kéturu 'órote newárigime, 'lige bilé rewá ujhágame kéturu gorá napu pe bo'neka 'la machime nile tachiri rewala nílga alué rewá. <sup>13</sup> 'Lige we'lí o'páchigime kéturu 'we elégame. 'Lige alué rioka regá rewégame kéturu: «Onorúgame Ra'íchálila». <sup>14</sup> 'Lige alué gawé enágichi guwánami we'ká sontalo

e'yénigituru 'pa rewagachi mochígame, 'lige asíriga jino o'pacha o'páchigime kéturu «lino» anilime chiní 'we najteme 'we o'tosákame, 'we bi'wígame, 'lige gawé o'tosákame aségame kéturu. <sup>15</sup> 'Lige alué rió gawé aségame chu'álachika ma'china 'siéturu asíriga olame siparina, resí olamia suwábaga we'kaná chojkégame gawichí mochígame ralámuli napu ekí mochí jena wijchimoba. 'Lige 'we a'wágame nulémala alué ralámuli tabilé majaga, bilé selate nulámala jíérote newárigime. Ye rió gawé aségame 'we a'wágame re'kémala i'wilí ba'wila ma'chí pamia. Yeka ruwime ju Onorúgame 'we a'wágame gastigárimala, Onorúgame napu bi'neli neyúriga Wa'lula ju. <sup>16</sup> 'Lige alé o'páchichi 'lige gajsílachi osirúgime kéturu regá anime: «Bi'neli neyúriga Wa'lula suwábaga ralámuli me'tagá.»†

<sup>17</sup> 'Lige bilé santo ánjeli etiáturu ne, alé rayénalichi iligéturu, 'lige a'wágame sináká bayéturu suwábaga wilú napu ekí i'niga oyame ju 'pami, regá anigá bayéturu:

—Jeka simasi, napurigá go'mela 'emi napu Onorúgame nejímala. <sup>18</sup> 'Émika alué chátiri ralámuli sa'pala go'meli ju tabilé nírime ju Onorúgame napu e'wéla e'sélikame rey sa'pala 'lige aminami e'wéla sontalo sa'pala, 'lige aminami alué u'kuchípala sontalo sa'pala, 'lige aminami alué nakólichí o'towame gawé sa'pala 'ma alué asagá e'yénigime 'yúriga, suwábaga ralámuli sa'pala tabilé oyérame Onorúgame rekó batroni ke 'lige aminami alué batrónila 'yuga nóchame sa'pala, 'lige alué e'wele o'chérame ralámuli sa'pala 'ma u'kuchítiri 'yúriga sa'pala go'meli ju 'emi.

<sup>19</sup> 'Lige etéturu ne alué ajágame 'we enátiri‡ gichao mo'égame 'lige makué a'wégame, 'lige aminami alué e'wélala e'sélikame rey 'ma 'la 'yuga jágame alué sontalo a'boi gompaniérola alué rojsákame gawé aségame saega nakomia 'lige alué gompaniérola saega nakomia. <sup>20</sup> 'Lige alué enátiri ajágame 'ma cha'pirúrturu, alué gichao mo'égame 'lige makué a'wégame, 'ma alué 'yúriga regá anime: «Neka ruwime ju napu ané Onorúgame ne'chí», napu 'we 'la benégame ke i'kirú 'sika, na'í wijchíruga 'pa rewagáchika, napu alarigá asíriga 'la umébale ralámuli 'yegia napurigá elámala ujhililichi alué ye número usani sientu na bakía lía na usani (666) 'lige napu 'la yati chojkóbaka jábale o'wemi alé napu chujkule alué ajágame pe rejete newárigime. 'Liko alué chátiri ajágame 'lige alué 'yégali ra'íchali ruwime 'ma na'ichí lúlu ru asupre rajá ilígichi abijí ajágame kachi.§ <sup>21</sup> 'Lige alué

† 19:16 Yolí ra'íchagá «Rey de reyes y Señor de señores» anime chujkú.

‡ 19:19 E'nesi 13:1-2.

§ 19:20 Asúpreka

rejté ju sawarógame, 'lige napu 'lige rajá asíriga rajtágame rajame ju 'lige 'we ená júkame ju.

e'wélala e'sélikame rey 'lige alué sontalo a'boi gompaniérola napu nakómili ke alué rojsákame gawé aségame gompaniérola saega, 'ma me'liruturu alué siparínate napu ma'china 'sié alué rojsákame gawé aségame chu'álachika. 'Lige suwábaga wilú asíriga o'pasáturu, wa'lú go'áturu napusí tabilé gayena aminabi go'yá.

## 20

*Jena ruwimela Juani ruwiligo alué Remónisi bilé mili bamí ajcháriligo buluruga*

<sup>1</sup> 'Lige bilé santo ánjeli etiáturu ne rewigáchikana re'kiname, 'lige a'wépala o'kame kéturu yochi i'púlime alé rejkolichi i'púlime napu 'we enárikáchi ju 'we rojkógichi, 'lige abiena karena o'kame kéturu. <sup>2</sup> 'Lige alué santo ánjeli cha'píturu alué chátiri ajágame napuyeri ochá, alué chátiri ajágame pe sinowí nílige napu jena wijchimboba asálige 'we 'ya napu'lige newáliku ye gawí napu pe Remónisi ju napu abiena Satanasi anilime ju. 'Lige alué santo ánjeli 'ma buléturu alué chátiri ajágame napuyeri ochá bilé mili bamí ajcháturu bulugá, <sup>3</sup> 'lige 'ma pasáturu alé rejkolichi napu 'we enárikáchi ju 'we rojkógichi, 'lige 'ma 'yérituru yochi, 'lige 'we 'la suériga na'chúchiga ujhéturu bilé tábiri alé yochi machináliga pala i'púligo alé yochi. Alé pasáturu napurigá tabilé aminabi 'yégamala suwábaga we'kaná chojkégame gawichí mochígame ralámuli bilé mili bamí. A'kinana bilé mili bamisá alégana rejkolichi 'we enárikáchi 'ma ku su'panáwili kéturu alué karena 'lige i'púwili kéturu napurigá ma'chinamala pe'wera.

<sup>4</sup> 'Lige etiáturu ne e'wele sía napu mochime ju e'wélala, 'lige alé síachi mochígeturu alué e'wélala ralámuli lisensia 'yárigame napurigá nulámala. 'Lige etiáturu ne suwígame ralámuli, alué ralámuli napu me'líliro gujtala rejpúniga Esusi oyérame kóriká 'lige aminami benírige e'yéname kóriká Onorúgame nila ra'íchali, napu tabilé tánime nile iwérali alué ajágame gichao mo'égame napu pe newárigime nile a'chigóyeri napuyeri alué ajágame asírige enátiri gichao mo'égame. Alué ralámuli tabilé elale napurigá ujhewa gorá nibilé sekachimi alué número usani sienta na bakia liá na usani (666). 'Lige etiáturu ne ku ajánigo alué suwígame napu me'líliro, 'lige bilé mili bamí gu'iríturu alué ralámuli ku ajánasa alué Esusi napurigá nulá Esusi. <sup>5</sup> 'Lige uché jaré we'ká ralámuli suwígame napu jena wijchimboba bi'tigé ichúrimi, alueka tabilé ajánaturu a'lige rawé, ajánaturu bilé mili bamí kachi. <sup>6</sup> Asírige 'la semati raweli narémala alué napu me'líliro gujtala rejpúniga napu ku

ajánale napu wanápale Onorúgame napurigá 'la Onorúgame oyérame nímala napurigá Onorúgame najki 'lige tabilé uché suwimela. Alué ralámulika Onorúgame nila nóchali nígame nímala, aminami alué Kristo nila nóchali, alaki bamí, bilé mili bamí.

*Jena ruwimela Juani ruwiligo Onorúgame 'ma umériligo Remónisi*

<sup>7</sup> Napu'lige suwibasa alué bilé mili bamí, 'ma ku su'panáwili ju alué Satanasi 'lige 'ma ku ma'chinamala alé re'lé rejkolíchika 'we rojkógichi, <sup>8</sup> 'lige ma'chínasa 'yégamala suwábaga ralámuli jena wijchimboba epperégame Onorúgame saíla napu Gog epperégame ralámuli ju 'lige Magog epperégame, 'lige asírige we'ká sontalo napabúmala nakomia Onorúgame oyérame ralámuli saega. <sup>9</sup> 'Lige bochígimi wijchimboba mochígame napuichíturu alué sontalo, 'lige noligá jábaturu napu mochige alué ralámuli Onorúgame oyérame napu Onorúgame 'we na'temá. 'Lige Onorúgameka pasáturu na'í alé 'pa rewagáchikana, 'lige 'ma rajáturu suwábaga alué sontalo, Onorúgame oyérame ralámuli saíla. <sup>10</sup> 'Lige alué Riablo napu alué asírige we'ká sontalo 'yéligile, 'ma pátuturu na'ichí asupre rajá iligachi asírige rajtágichi, abalé napu lúluu alué enátiri ajágame gichao mo'égame 'lige alué 'yégalí ra'íchali ruwime. Alé mochímala 'we resí nilia senibi rawé 'lige rukomi.

*Jena ruwimela Juani etéligo bilé wa'lú sía rosákame napu Onorúgame ajtime ju*

<sup>11</sup> 'Lige bilé wa'lú sía rojsákame etiáturu ne, alué sía napu Onorúgame ajtime ju, 'lige alé ajtigéturu Onorúgame. 'Lige 'ma tané ikíturu ye gawí, 'lige so'pilitiri, rayénalítiri, mechátiri. <sup>12</sup> 'Lige etiáturu ne ralámuli suwígame, o'chérame 'lige ejtemali, 'ma ku mochísale 'lige alé o'wemi neraga jágeturu napu iligé alué wa'lú sía, 'lige 'ma ra'laga mochíaturu alué apeli kabika gatélime. Abiena alué uché bilé apeli ra'laga asíaturu napu ralámuli rewalá uchúkame ke, alué ralámuli napu Onorúgame 'yuga epperélimili ke senibi alé rewagachi. 'Lige bo'né Onorúgame 'ma gastigárituru napu ekí 'we cha nokálige napu'lige ajagá mochiga, napugiti bo'né Onorúgame ujháligame alé apélíchi napu ekí tábiri cha nokagá e'yénale alé ralámuli. 'Lige tabilé gastigárituru alué napu 'we 'la oyérale Onorúgame. <sup>13</sup> 'Lige suwábaga napu ekí suwile ba'wichí 'ma buyáturu 'lige alé o'wemi neraga jábaturu napu iligé alué wa'lú sía. Aminami alué suwígame ichúrimi bi'tigame 'ma buiníturuchigó 'lige alé o'wemi neraga jábaturu napu iligé alué wa'lú sía, 'lige bo'né Onorúgame gastigárituru napu

\* 20:2 E'nese glosario «Satanás».

ekí cha nokálige napu'lige ajagá mochiga, napugiti bo'né Onorúgame ujháligame alé apélichí napu ekí cha nokagá e'yénale alué ralámuli. 'Lige tabilé gastigárituru alué napu tabilé cha nokale napu'lige ajagá mochiga. <sup>14</sup> 'Ma tabilé suwile ralámuli, pecha i'téliga koche simámala alué suwígame.† <sup>15</sup> 'Lige apiépiri rió rewalá tabilé chujkusáká alé Onorúgame nila apélichí napu uchúkame ju ralámuli Onorúgame oyérame rewalá, 'liko pápili ju alé na'ichí 'we rajtáigichi asupre rajachi.

## 21

### *Jena ruwimela Juani etéligo gawí nuebo*

<sup>1</sup> 'Lige etiáturu ne 'ma 'la se'wináriga ilígame rewagachi napu mochime ke so'píli 'lige mechá 'lige rayénali. 'Lige etiáturu ne 'ma tané ikigó alué gawí bajchá ajtgame 'lige uché bilé ma'Chínaturu 'we 'la se'winátiri, nuebo. 'Ma tabilé manígime kéturu walú ba'wí alué gawí. <sup>2</sup> 'Lige etiáturu ne re'kínasia enágichi alé gawichí we'ká riógichi Nuebo Rusaleni anilichí, Onorúgamete julárule alué we'ká riógichi Rusaleni rewégame. Alué we'ká riógichi Rusaleni rewégame 'we 'la semátiri kéturu napuyeri bilé mukí newímili. <sup>3</sup> 'Lige asrīga e'wele ra'íchame akéturu ne alé walú sía ilígichi neraga. Regá aníchaneturu:

—Jípeko Onorúgame asimela ralámuli 'yuga bejtega, 'lige alué ralámulika alué Onorúgame 'kúchila nímala. <sup>4</sup> Onorúgame 'símala alué ralámuli sewélila bujea, 'lige 'ma tabilé suwimeli ju, 'lige 'ma tabilé 'wesi nalámala resí nílga, napugiti 'ma tabilé nerúlimempá seweli, 'ma 'we se'wináriga nímala.

<sup>5</sup> 'Lige alé síachi ajtgame napu Onorúgame ke, regá anieturu:

—Jípesíko 'we se'wináriga nímala.

'Lige aminami anéturu ne'chí:

—'La osibóaká napu ruwimela ne napugiti 'la bijchiá kame napu ne ruwimela.

<sup>6</sup> 'Lige regá anieturu:

—'Ma 'la sébali olá ne. Ne júkuru napu o'wínale suwábaga nóchali 'lige ne júkuru napu gayénale suwábaga nóchali. 'Lige alué napu balama mochí, ne 'yámala alué ba'wí alé bajichi 'we semárikáchi manígime ma'chíname napurigá bajímala, 'lige tabilé tábiri goblálga. <sup>7</sup> Ralámuli napu ekí umero alué Riablo, 'la 'yámala ne suwábaga napu ne 'yánili: semati raweli, 'lige alésíko 'we 'la repúmala ne alué ralámuli, 'lige 'la ne 'kúchila nímala. <sup>8</sup> Suwábaga alué ralámuli napu majá

ne'chí oyéraga, 'ma 'lúmala ne alé na'ichí 'we rajtáigichi asupre rajachi. 'Lige alué ralámuli napu 'ma a'rele ne'chí oyeria, 'lige alué ralámuli napu apiépiri umugí 'yuga okoka e'yéname ju tabilé 'la a'boi upila, napu 'we tánime ju iwérali alué e'karúgame tábiri pe newárigime, 'lige alué napu me'agá e'yéname ju uché jaré ralámuli, 'lige alué sujkurúgame ralámuli, 'lige alué ralámuli riocho ka okome ju, suwábaga alué ralámuli 'ma 'lúmala ne alé na'ichí.

### *Jena ruwimela Juani etéligo alué Nuebo Rusaleni*

<sup>9</sup> 'Lige nawáturu bilé santo ánjeli alé ne ilígichi alué usani santo ánjeli gompaniérola, napu o'ká jage alué gichao gastigo bejtólichí ajchagá, 'lige regá anéturu ne'chí:

—Nabá, etéramala ne mué alué mukí napu newímili ju alé Bo'á Ranala 'yuga.

<sup>10</sup> 'Lige alué santo ánjeli o'tóuru ne'chí alawala bilena rabó 'we re'pá, 'lige alé iligá etéreturu ne rewagáchikana enágame alué gawí we'ká riógichi Rusaleni anilime gawichí we'ká riógichi napu eiperégame ju alué ralámuli 'we 'la oyérame Onorúgame.

<sup>11</sup> 'Lige alé we'ká riógichi ne ra'ósiga iligéturu Onorúgame a'walila gite. Ra'ósaga iligéturu napurigá bilé rejte rekóchili bi'wigame napurigá bilé bigrio. <sup>12</sup> 'Lige alué we'ká riógichi napu re'kínasia enegé rewagáchikana, walú tegótigame kéturu naó chijtógame, 'lige makué oká yógame kéturu alué tegoli, 'lige a'pílipi yochi bilé santo ánjeli iligéturu. 'Lige a'pílipi yochi osirúgime kéturu bilé rewá alué makué okaná chojkégame ralámuli israelita rewalá.\* <sup>13</sup> Alé napu rayénali chíbame ke be'á be'lí bakiná yochi kéturu, 'lige alemi neraga napu rayénali bokuíme ju alí bakiná yochi kéturuchigó, 'lige gaónaka neraga bakiná yochi kéturuchigó, 'lige gituna neraga bakiná yochi kéturuchigó. <sup>14</sup> Makué oká rejte e'wele mochígame kéturu alué tegoli kulí chojkíálachi. 'Lige alé a'pílipi rejtechí osirúgime kéturu bilé rió rewalá, alué makué oká rió napu alué Bo'á Ranala† 'yuga nóchame nile 'ya napu'lige bijí jena ajtígichi.

<sup>15</sup> Alué santo ánjeli napu ne 'yuga ra'ícha iligé bilé tábiri 'órote newárigime o'kame kéturu napuyeri gujsí, alekete tétimia alué tegoli naó chijtógame alé we'ká riógichi noligá suweke ilígame tegoli, 'lige tétimia alé yochi. <sup>16</sup> Alué walú tegoli naó chijtógame kéturu, re'lege suweke noligá makué miná oká mili estaria kéturu (napu ju oká mili na

† 20:14 Yolí ra'íchaga «La muerte y Hades fueron tirados en el lago de fuego.»

\* 21:12 Alué makué oká ralámuli israelita, alueka Akobo 'kúchila nilekuru, rewaláká: Rubeni anilime nile bilé, 'lige bilé Simeoni, 'lige bilé Lebí, 'lige bilé Jurá, 'lige bilé Isakari, 'lige bilé Sabuloni, 'lige bilé Rani, 'lige bilé Neptalí, 'lige bilé Gari, 'lige bilé Aseri, 'lige bilé José, 'lige bilé Benjamini. E'nesi Ezequiel 48:30-34. † 21:14 Bo'á Ranala aniáká pe Esusi anime ke anile alué Juani.

oká siento kilómetro kéturu), 'lige o'wétiri rewiná naógana chijtochi abechigó lakí makué miná oká mili estaria kéturuchigó (napu ju oká mili na oká siento kilómetro).<sup>17</sup> 'Lige bilé siento miná naosa makué miná naó chitógá (napu ju usánisa makué na naó metro) ra'lágame kéturu alué tegoli 'we re'pá iligame. Alué napu santo ánjeli tétame nile 'lige ralámuli pe aba aluete tétame nile.

<sup>18</sup> Alué naó chijtógame tególíka, rejté jaspe anilime 'we semati alekete tegótigame kéturu, 'lige alué we'ká galika 'órote newárigime kéturu. 'Lige asíríga 'la na'tawika ma'chígime kéturu alé 'órochi napurigá ba'wí asíríga 'la ma'chígime, 'lige 'we 'la re'wame kéturu alué 'oro napurigá bigrío. <sup>19</sup> 'Lige alué makué oká i'weli rejté alé re'lege bi'tígime napu alué rejté ro'agá tegótigame ke alué wa'lú tegoli we'ká e'karúgame rejté na'chuchárigame kéturu 'we semati. Alué bajchá bo'ígime rejté jaspe anilime rejté uchúkame kéturu amoba 'we semátiri rejté. 'Lige abé nujubá bo'ígime rejteka sapiro anilime rejté uchúkame kéturu amoba 'we semátiri rejté. 'Lige abé nujubá bo'ígime rejteka ágate anilime rejté uchúkame kéturu amoba 'we semátiri rejté. 'lige abé nujubá bo'ígime rejteka meralta anilime rejté uchúkame kéturu amoba 'we semátiri rejté. <sup>20</sup> 'Lige abé nujubá bo'ígime rejteka 'ónise anilime rejté uchúkame kéturu amoba 'we semátiri rejté, 'lige abé nujubá bo'ígime rejteka kornalina anilime rejté uchúkame kéturu amoba 'we semátiri rejté, 'lige abé nujubá bo'ígime rejteka krisólito anilime rejté uchúkame kéturu amoba 'we semátiri rejté. 'lige abé nujubá bo'ígime rejteka berilo anilime rejté uchúkame kéturu amoba 'we semátiri rejté, 'lige abé nujubá bo'ígime rejteka topasi anilime rejté uchúkame kéturu amoba 'we semátiri rejté, 'lige abé nujubá bo'ígime rejteka krisopasa anilime rejté uchúkame kéturu amoba 'we semátiri rejté, 'lige abé nujubá bo'ígime rejteka jasinto anilime rejté uchúkame kéturu amoba 'we semátiri rejté, 'lige abé nujubá bo'ígime rejteka amatista anilime rejté uchúkame kéturu amoba 'we semátiri rejté.<sup>†</sup> <sup>21</sup> Alué makué oká yochi makué oká perla kéturu. A'pílipi yochi bilé rejté pérlate newárigime kéturu. 'Lige alé nasipa we'ká riógichi bilé bowé bo'ígime kéturu 'órote newárigime 'lige napuyeri bigrío kéturu.

<sup>22</sup> 'Lige tabilé 'wesi re'obá i'tégeturu alé we'ká riógichi, napugiti Onorúgame asáligame alemi alué napu bi'neli neyúríga wa'lula ju, 'lige aminami alué Bo'á Ranala

napu Esukristo ju. <sup>23</sup> Alé we'ká riógachi tabilé rokáré rayénali nibilé mechátiri napurigá 'la ma'chúlamala napugiti bo'né Onorúgame gite 'la ra'ósíga iligame, 'lige aminami alué Bo'á Ranala gite 'la ma'chígá iligame, napugiti alemi ajtígame Onorúgame 'lige abienami alué Bo'á Ranala. <sup>24</sup> Suwábaga we'kaná chojkégame ralámuli jena wijchimoba mochígame napu ekí Onorúgame oyérame asíríga 'la ganílíga e'yenamala alué ra'ósílite. 'Lige suwábaga e'wélala e'sélikame rey napu ekí jena wijchimoba mochímala 'lige animela:

—Onorúgame bi'neli neyúríga we'lú a'walí nígame ju.

<sup>25</sup> Tajsíné 'yéríga ilimela alé we'ká riógichi bochígimi yochi, napugiti pecha chonámempá alé we'ká riógichi.<sup>§</sup> <sup>26</sup> 'Lige suwábaga we'kaná chojkégame ralámuli jena wijchimoba mochígame animela:

—Suwábaga tábiri napu ekí niga mochiru, pe Onorúgame nila kéré. <sup>27</sup> Alé we'ká riógichi tabilé sebámala alué chátiri 'nátíli, nibilé mo'imela alué ralámuli 'we cha nokame. Pe alué ralámuli 'la mo'imela napu 'la uchuchárigame ju rewalá alé alué Bo'á Ranala nila apélíchi.

## 22

<sup>1</sup> 'Lige alué santo ánjeli rewíruturu ne'chí wa'lú ba'wí ename, 'we bi'wígime ba'wí napu Onorúgame a'walíla ju. Alué ba'wí alé wa'lú síachika ma'china iligéturu, alué sía napu alué Bo'á Ranala ajtime ju napu Onorúgame kéré. <sup>2</sup> Alé napu bo'í alué bowé, alé we'ká riógachi nasípatu bo'ígime, alé a'naguka jágeturu alué rojá napu nabí mechachí rakeme ke.\* Alué rojaka wa'lú a'walí nígame nile napurigá ramué bi'lepi 'nátaga mochiwa Onorúgame 'yuga. 'Lige alué rojá sawálaka asíríga 'la kéturu napurigá 'yowa alué suwábaga we'kaná chojkégame ralámuli napu ekí jena wijchimoba mochí, <sup>3</sup> 'lige pe abisibi 'ma tabilé aminabi gastigárimala Onorúgame alué ralámuli alé Rusaleni ejperégame, 'lige alué wa'lú sía alé ilimela, alué sía napu alué Bo'á Ranala ajtime ju, alué Bo'á Ranala napu Onorúgame kéré, 'lige alué ralámuli alé we'ká riógichi 'we semárikáchi ejperégame 'we 'la e'wámala napu nulámala Onorúgame, <sup>4</sup> 'lige alué ralámuli 'we 'la etémala Onorúgame alé o'wemi jaga, 'lige Onorúgame rewalá ujhágame nímala gorá alué ralámuli. <sup>5</sup> 'Ma tabilé siné chonámala alé Rusaleni we'ká riógichi, 'lige tabilé resí nílmalala rayénali 'lige uché bilé tábiri

† **21:20** Ye rejteka 'we semati ju, jaré i'siyókame ju, jaré e'serákame ju, jaré u'lákame ju, jaré ojchillirígime ju. § **21:25** 'We 'ya alé Rusaleni 'lige napu ekiná we'ká riógichi, napu 'lige 'ma chónachi alí 'ma 'yérima nile alí bochígimi yochi alé e'wele tegoli jágichi. \* **22:2** Jaré ralámuli aní alué rojá siné rakega makué oká chojkégame se'winati rakeme nílogo. Siné kachi we'ká jáligeréko ye rojá.

rajame napurigá ma'chílamala napugiti bo'né Onorúgame gite 'la ra'ósiga ilimémpá, 'lige alué ralámuli alé mochígame senibí napuúka nulámala Onorúgame 'yuga.

*Jena ruwimela Juani ruwíligo pe'wemi uché ku nawamto Esukristo*

<sup>6</sup> Lige regá anéturu ne'chí alué santo ánjeli:

—Ye ra'íchalika tabilé 'yégalí ruwime ju, 'we 'la semátiri ra'íchali ruwime ju. Alué Wa'lula Onorúgame napu 'we 'la ruyeme ju alué ralámuli napu ruwime ju napu ané Onorúgame, alué júlalekuru santo ánjeli napurigá etérimala alué Onorúgame nila nóchame chukimeo pe 'wemi.

<sup>7</sup> Lige regá aniéturu alué Esukristo:

—'We 'la 'nátaga mochiwa. Pe 'wemi uché ku nawámala ne. Asiriga ganlīga mochímala alué ralámuli napu ekí 'la bijhígime ju ye ra'íchali napurigá osiruga chujkú jena ye apélichí, alué ra'íchali napu ruwime ju chukió jipe 'lige chukimeo pe 'wemi.

<sup>8</sup> Ne Juani 'we 'la etiáturu ne napu etériru ne'chí 'lige 'we 'la akéturu ne 'lige akisá ne alé a'bé alué santo ánjeli ronólachimi neraga chojkóbaka chujkibaturu ne alué santo ánjeli, alué santo ánjeli napu etériri ne'chí chukió jena wijchimoba, 'lige regá anéturu ne:

—Mueka 'la wa'lú a'walí nígame ju.

<sup>9</sup> Lige alué santo ánjelika regá aniéturu:

—Tase ala'sípua 'lige tase alarigá anewa ne'chí, napugiti neka pe nóchame kame napu nulá Onorúgame, pe a'chigóriga napurigá mué, 'lige napurigá alué ralámuli Onorúgame nila ra'íchali benírame ralámuli, 'lige napurigá alué ralámuli napu 'la e'wame ju napurigá aní ye osilí jena apélichí. 'La regá anewa alué Onorúgame 'we 'la oyériga: «Mué Wa'lula Onorúgame, mueka bi'neli neyúriga wa'lú a'walí nígame ju.»

<sup>10</sup> Lige aminami regá anéturu ne'chí alué santo ánjeli:

—Tase ku kabípua ye apeli napu ruwime ju chukimeo pe 'wemi, 'lige tase ujchewa alué selá, 'máchigo amulí sébame raweli napu'lige Onorúgame sébali olámili ju napurigá aní jena ye apélichí. <sup>11</sup> Alué ralámuli napu 'we cha nokagá járome ju, alueka peba 'la nokogá járomala, 'lige alué chátiri 'nátili 'nátaga e'yéname ka, alueka pe alarigá ejtebímala, 'lige alué ralámuli 'la tabilé cha nokame ka, alueka 'la abichilubi tabilé cha nokagá e'yénasa 'la kápá, 'lige alué napu wanápurigame ju Onorúgamete napurigá nochámala Onorúgamecho nila nóchalichí, alueka abichilubi tabilé guwana rujsusa 'la kápá.

<sup>12</sup> Lige regá aniéturu Esukristo:

—'We 'la 'nátaga mochiwa, pe 'wemi uché ku nawámala ne 'lige listo nawámala ne gastigárimia alué cha nokame ralámuli napu ekí cha nokale, 'lige 'ma listo nawámala ne gu'írimia alué 'la tabilé cha nokagame ralámuli. <sup>13</sup> Neka 'yasi ajtígame ju ta'chó newá ye gawí, 'lige i'líbeke 'ma suwibasa ye gawí abichilubi bejtélamala ne. Neka suwábaga newáturu, alekeri gastigárimala ne alué cha nokame ralámuli 'lige aminami tabilé gastigárimala ne alué tabilé cha nokagame ralámuli.

<sup>14</sup> › 'We ganlīga mochí alué ralámuli napu 'la suériga ichome ju a'boi o'páchala† alé we'ká riógichi mo'imea Rusaleni rewégichi, go'mea alué rojá rakala alé nasipa we'ká riógichi ilígame, Onorúgame a'walíla naremia. <sup>15</sup> Lige alué ralámuli 'we cha nokame ka ma'chige ejtebímala, tabilé eliwa napurigá alé we'ká riógachi mo'imela, alué napu ju sujkurúgame, alué napu pe riocho ka okome ju napuúka, 'lige umugicho ka okome napuúka, 'lige apiépiri rió 'yuga okome umugí tabilé a'boi gunala 'lige alué apiépiri umugí 'yuga okome rió tase 'la a'boi jubila, 'lige aminami alué ralámuli pe me'agá e'yéname uché jaré ralámuli, 'lige alué ralámuli napu 'we tánime ju iwérali e'karúgame tábiri pe newárigime, 'lige alué napu 'we ejebénigame ju ralámuli 'yéliga.

<sup>16</sup> › Ne Esusi júlaturu bilé santo ánjeli napurigá ruyémala suwábaga alué ra'íchali suwábaga 'emi we'kaná chojkégame Onorúgame oyérame. Neka Rabí rijímala ju, alué 'we 'ya ajtígame, 'lige alué so'pilí ju ne napu ma'chínime ju 'paka be'á be'lí che'lachi.‡

<sup>17</sup> Lige alué Onorúgame Alawala 'lige ralámuli Onorúgame oyérame, alué tárigame Onorúgamete napurigá bilé mukí tárigame, regá aní:

—Jeka nawasa 'la kápá Esusi.

'Lige ralámuli napu ekí aké ye ra'íchali napu osá ne abiena regá anisá 'la kápáchigó:

—Jeka nawasa 'la kápá Esusi.

Suwábaga ralámuli napu ekí balámime ju, jeka jsisá 'la kápá bajímia alué ba'wí napu ma'china alé wa'lú sia ilígichika tabilé tábiri goblálaga, abiena alué napu ekí bajínilime ju alué ba'wí alé wa'lú síachika ma'chínigame, jeka jsisá 'la kápá.

<sup>18</sup> Neka Juani 'we 'la ruyé suwábaga alué ralámuli napu ekí 'la aké ye ra'íchali napu osiruga chujkú jena ye apélichí, ra'íchali napu ruwime ju chukíá jipe 'lige chukimeo pe 'wemi, regá ruyé ne: Bilé ralámuli se'wináriga ujchasa ye ra'íchali napu ne

† 22:14 A'boi o'páchala ichome aniáká pe «alué 'la sébali olame napu Onorúgame nulá», aníame kéré. ‡ 22:16 Esusi napu'lige aní «Rabí rijímala ju ne», 'lige napu'lige aní «so'pilí be'á be'lí ma'chínime» aní, pe «ralámuli buyánime alé resitiri bowechi» aníame ke anile.



osá, Onorúgame wa'lú gastigo 'yámala, alué gastigo napu ruwí ye apélichí. <sup>19</sup> Lige bilé ralámuli bujesa ra'íchali ye apélichí chujkúgame napu ruwime ju chukió jipe 'lige chukimeo i'libékimi, Onorúgameka 'ma tabilé elímala napurigá go'mela alué rojá rakala napu ilí alé nasipa we'ká riógichi napu ju Onorúgame a'walila, 'lige aminami 'ma tabilé elímala Onorúgame napurigá mo'imela alé we'ká riógichi Rusaleni

rewégichi.

<sup>20</sup> Alué Esusi napu ruwí suwábaga ye ra'íchali, regá aní:

—Pe yati ku nawama olá ne.

'Lige ne Juánika aní:

—¡Alarigá júpá, yati ku nawawa mué Wa'lula Esusi!

<sup>21</sup> Esukristo 'we 'la gu'írisa 'la kápá 'emi ralámuli Onorúgame oyérame.

Pe ikí kápá ye ra'íchali. Wa'lú cheliérabá.